


Xela wezria cube nen  
salmo ca'



New Testament and Psalms in Zapotec, Tabaa (MX:zat:Zapotec,  
Tabaa)

# **Xela wezria cube nen salmo ca'** **New Testament and Psalms in Zapotec, Tabaa (MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

## **Copyright Information**

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament and Psalms**

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022  
 80626b72-93df-58ae-9f5e-9d86733fab46

## Contents

|                            |     |
|----------------------------|-----|
| Salmos . . . . .           | 1   |
| San Mateo . . . . .        | 112 |
| San Marcos . . . . .       | 155 |
| San Lucas . . . . .        | 183 |
| San Juan . . . . .         | 227 |
| Los Hechos . . . . .       | 259 |
| Romanos . . . . .          | 296 |
| 1 Corintios . . . . .      | 313 |
| 2 Corintios . . . . .      | 328 |
| Gálatas . . . . .          | 338 |
| Efesios . . . . .          | 344 |
| Filipenses . . . . .       | 349 |
| Colosenses . . . . .       | 353 |
| 1 Tesalonicenses . . . . . | 357 |
| 2 Tesalonicenses . . . . . | 360 |
| 1 Timoteo . . . . .        | 362 |
| 2 Timoteo . . . . .        | 367 |
| Tito . . . . .             | 371 |
| Filemón . . . . .          | 374 |
| Hebreos . . . . .          | 375 |
| Santiago . . . . .         | 387 |
| 1 San Pedro . . . . .      | 391 |
| 2 San Pedro . . . . .      | 396 |
| 1 Juan . . . . .           | 399 |
| 2 Juan . . . . .           | 403 |
| 2 Juan . . . . .           | 404 |
| Judas . . . . .            | 405 |
| Apocalipsis . . . . .      | 407 |

**SALMO CA'****1**

1 Ba neza zrentę naca na cheę bėnnea'  
 quebe dxezi'e da dxuluzėajni'i benne' wen da caleļa ca' le',  
 ne quebe dxunę' tuze benne' dul-la ca',  
 ne quebe dxunę' tu zren benne' ca' dxelún le' cheę Dios.  
 2 Zųę' xel-la' dxebe lawe' da dxuzųę' dizra'  
 da nadxixruij bea Xránadxu,  
 ne ca naca da nadxixruij bea na,  
 te zra ne chizrela dxelaba lazre' na.  
 3 Benne' nigá naque' ca tu xaga zua na dxu'a xegu nisa,  
 da dxunna na da zixre cheę na lu beu' cheęqueze na,  
 ne xrlegue na quebe dxase na.  
 Ca naca da dxun benne' nigá, dxępe ban na.  
 4 Quegá canı' zaj naca benne' wen da caleļa ca'.  
 Zaj naque' ca tu xizre laga' da dxua be' bdunu'.  
 5 Quebe xelexegá'ana chawe' benne' wen da caleļa ca'  
 gate guchi'a Dios cheę',  
 ne quebe xelú'u benne' dul-la ca' naga zaj nazraga  
 benne' xrlátaje ca'.  
 6 Dxezaca ba lazre' Dios ca da dxelún benne' xrlátaje ca'.  
 Da dxelún benne' wen da caleļa ca'  
 cheę na le' naga xelebıa xi'e.

**2**

1 ¿Bizr cheę na' dxeledábaga benne' xęzr la xu ca' neda'?  
 ¿Bizr cheę na' dxululaba lązrequeze bėnneache  
 da guzúa na neda' chalá'ala?  
 2 Dxeledábagaqueze benne' wenná bea ca',  
 ne dxelún tuze dizra' benne' ca' dxelenná bea ca xelunę'  
 cheę Xránadxu Dios, ne cheę Bėnnea' gucá'a Le'.  
 3 Dxelennę': "Guselá cuınadxu lu xel-la' dxenná bea cheę',  
 ne guzúadxu chalá'ala da zaj nadxixruij bė'ene' dxi'u."  
 4 Naga dxe' Xránadxu xabáa dxuzrizre'.  
 Quebe dxezi' lenę' cheę da dxelegú'u lazre' xelunę'.  
 5 Lu xel-la' dxezrá'a cheę' dxedil-le' le',  
 ne lu xel-la' snia cheę' dxuchebe' le'.  
 6 Dxennę': "Lu xi'a lá'azxa chia, xi'a Sıón  
 ba nuzúa' benne' gaque' Wenná Bea waláz chia' neda'."  
 7 Dxenná Wenná Bea na': "Guzenda' le'e da  
 guzre Xránadxu neda'."  
 Guzre' neda': "Lue' nacu' Zri'ina'. Ná'aqueze naca' Xrau'.  
 8 Gunabe neda', na' gunna' Lue' xúgute' cue' xęzr la xu ca',  
 na' gaca chiu' dute' ca naca xęzr la xu.  
 9 Guzıxenu' bėnneache xęzr la xu ca' nen vara xia,  
 ne ca tu dxe'e xu guzuzru' le'."  
 10 Na'a, le'e, wenná bea, le xene da nigá dxuzėajni'ida' le'e.  
 Le gusęde da nigá dxusızreda' le'e,  
 benne' dxelenná bea lu xęzr la xu.  
 11 Le gun zrin cheę Xránadxu Dios, dute' xel-la' dxezrebe cheęle.  
 Nen xel-la' dxezrize cheęle, le be lau Le'.  
 12 Le gapa ba lá'ana Zrí'ine' cheę quebe zre'e,  
 checa' cuıa xile la neza cheęle, lawe' da la zra'ate' Le'.  
 Da ba neza zrentę naca na cheę xúgute' benne'  
 dxuluxrén lazre' Le'.

**3**

1 Xrana' Dios, ba naxánle'e benne' dxeledábage' neda'.  
 Benne' zante' dxeledıl-lalene' neda'.

<sup>2</sup> Benne' zantę dxeleńné' chia': "Quebe guselá Dios le'."

<sup>3</sup> Lue', Xrana' Dios, dxucú'uju' neda'.

Nacu' Benne' dxebéłena', ne Benne' dxuzé chawe' neda'.

<sup>4</sup> Gudxezre xa'a, bláwizra' Xrana' Dios,  
na' Le' bechebe' chia' naga zuę' lu xi'a lá'azxa cheę'.

<sup>5</sup> Guta', ne gusia',

na' bebana' lawe' da nuxru Xrana' neda'.

<sup>6</sup> Quebe zreba' gaxúa gaxúa bėnneache,  
benne' zaj naxéčaję' neda'.

<sup>7</sup> Guzé, Xrana' Dios.

Bselá neda', Dios chia'.

Bęn wę' xraga benne' ca' dxeledíl-lalęę' neda',  
ne guzuzruj lazxa benne' xriwę' ca'.

<sup>8</sup> Xel-la' weselá za' lu na'u, Xrana' Dios.

Bęn da chawe' cheę bėnneache chiu'.

## 4

<sup>1</sup> Bechebe chia' gate dxuláwizra' Lue', Dios.

Nacu' Benne' dxuchi'ę ca da dxuna'.

Gate guzúa' lu da stebe, Lue' btipu' lazra'.

Bexache lazre' neda', ne bene ca da dxuchálajłena' Lue'.

<sup>2</sup> Le'e, bėnneache, ¿ájatęscha' gucá'ana dítjale neda'?

¿Ájatęscha' zri'ile da quebe zaca, ne chéajlele da węn lazre'?

<sup>3</sup> Le xexúnbea ba gucá'a Xránadxu

nu benne' dxape' Le' ba lá'ana.

Xrana' Dios xenęę gate dxuláwizra' Le'.

<sup>4</sup> Le zrebe lau Dios, ne quebe gunle dul-la.

Le gulaba lazre' cheę' naga dxásale, ne le sua zrize.

<sup>5</sup> Le gute lau Le' béadu ca' lu da naca du lazre',

ne le guxrén lázre' Xránadxu Dios.

<sup>6</sup> Benne' zantę dxeleńné': "¿Nuzra gun gá'anatu' chawe'?"

Dutę xel-la' zri'i lazre' chiu' bxue netu', Xran.

<sup>7</sup> Lue' bzu' xel-la' dxebe lu xichaj lázrdawa',

da naca na zrendxa ca da zaj napa benne' zaj nápalę'ę zrua',

ne xrise uva wal-la.

<sup>8</sup> Dutę xel-la' dxebeza zri lazre' gata', ne gasia',

lawe' da dxunu' Lue', Xran, zua' zri'a chawe'.

## 5

<sup>1</sup> Bzę naga dizra' chia', Xran.

Bde lazre' ca dxebezre lazra'.

<sup>2</sup> Bene ca guchálajłena' Lue', Wenná Bea chia', ne Dios chia', q lawe' da guláwizraja' Lue', Dios.

<sup>3</sup> Xran, che zílala xennu' chí'a.

Che zílala xídaqueza' lau Lue', ne wabeza lazra' Lue'.

<sup>4</sup> Nacu' Dios quebe dxezaca ba lazru' da calęla.

Benne' węn da calęla quebe súaquezę' naga zu' Lue'.

<sup>5</sup> Quebe dxu'u lataj xelezrín benne' węn da calęla lau'.

Dxecuidenu' xúgutę benne' dxelunę' da zrinnaj.

<sup>6</sup> Guzrí xi'quezu' benne' ca' dxelezí xę'ę.

Guzú' chalá'ala benne' węte benne', ne benne' guzrí xę'.

<sup>7</sup> Neda' waca chu'a lizru' lawe' da nazrí'ilę'ęnu' neda'.

Güe lá'ana' Lue' lu xudau' lá'azxa chiu' dutę xel-la' dxezrebe.

<sup>8</sup> Bsi neda' cheę guna' da xrlátaje chiu', Xran,

lawe' da zráłę'ę benne' dxeledábague' neda'.

Gulú'u neda' neza chawe' chiu'.

<sup>9</sup> Benne' caní quebe dxeleńné' da li.

Lu xichaj lázrdawę' xu'u da calęla.

Xędxu lbę'ę zaj naca na ca tu ba cheę benne' gate da naxalaj na.

Zaj nupę'ę dizra' chawe' cheę' da zaj naca na da węn lazre'.

<sup>10</sup> Bde benne' ca' lu da ba xa', Xrana' Dios.

Ben cheajlecházíe' cáteze zaj naca xrtízraqueze'.  
 Lawe' da naxánle'e da calela da dxelune'  
 ne lawe' da guledábague' Lue', bebéaje' chalá'ala.  
 11 Welebéle'e benne' ca' dxuluxrén lazre' Lue'.  
 Welebézre xá'aqueze' dutę xel-la' dxelebe'  
 lawe' da dxucú'uju' le'.  
 Lau Lue' welebéle'e benne' ca' zaj nazrí'ine' Lue'.  
 12 Gúnquezu' da chawe' cheę benne' xrlátaje, Xran.  
 Gucu'uju' bėnnea' lawe' da dxezaca ba lázreľnu' le'.

## 6

1 Lue', Xran, quebe til-lu' neda' lu xel-la' snia chiu',  
 ne quebe gudėu' neda' ba xa' lu xel-la' dxezrá'a chiu'.  
 2 Bexache lazre' neda', Xran, lawe' da quebe chawe' zua'.  
 Bexún neda', Xran, lawe' da dxedėa' xel-la' zi'.  
 3 Stėbele'e zua xichaj lázrdawa'.  
 Xran, ħbátala gácalenu' neda'?'  
 4 Gudá, Xran, bselá bėnne' du xu'a.  
 Bselá neda' dutę xel-la' zri'i lazre' chiu'.  
 5 Naga zaj zra' benne' gate ca', quebe nu dxeajsá lazre' Lue'.  
 Lu lataj ba xa' ħnúzraqueze güe lá'ana Lue'?'  
 6 Ba dxexedú lazra' lawe' da dxebezre lazra'.  
 Tu zre' tu zre' dxebísane ga dxásia' nisa da dxebezra'.  
 Dxusebisa' xrcugua' nisa da dxebezra'.  
 7 Ba dxane xiaj lawa' xel-la' dxebezre.  
 Ba bebízraqueze nisa xuzru xiaj lawa' lawe' da zrále'e  
 benne' dxulusaca zi'e neda'.  
 8 Le cuasa naga zua', xúguteľe dxunle da zrinnaj  
 lawe' da ba ben Dios dxebézreľe'a.  
 9 Xrana' Dios ba bėnne' da dxata' xueda' Le'.  
 Ba guzí' Xrana' Dios da dxuchálajľena' Le'.  
 10 Dxelexedu'e, ne zaj zua lu da stėbele'e xúguteľe  
 benne' dxeledábague' neda'.  
 Chaditę xelexebigue' naga zua', ne xelexedu'e'ene'.

## 7

1 Xrana' Dios, dxuxrén lazra' Lue'.  
 Gúcale neda' ne bselá neda' lu na' benne' ca' dxulusaca zi'e  
 neda',  
 2 cheę quebe xelęl-ľe' neda' ca dxun bęzre xixre',  
 na' xuluzúzruje' neda' naga quebe nu chilá' nu guselá neda'.  
 3 Xrana' Dios, che bėna' neda' caní:  
 Che bi da zrinnaj bėn ni'a na'a.  
 4 Che bi da calela bėna' cheę benne' zue' chawe' nen neda'.  
 (Bselá' bėnnea' dxedábague' neda' lácala quebe bi nuna' cheę'.)  
 5 Che caní bėna',  
 bę lataj benne' dxedábague' neda' gau zi' ne xezrúnene' neda'.  
 Bę lataj bėnnea' guchuchu gulėaje' neda' lu xu,  
 ne xusunitie' xel-la' ba lá'ana chia'.  
 6 Xran, dutę xel-la' dxezrá'a chiu', guzė.  
 Bexechaj benne' ca' dxulusaca zi'e neda' lu xel-la' dxelezrá'a cheę'.  
 Gusel-la da gácale na neda' gate guchi'u da dxaca chia'  
 ca da gunná be'u.  
 7 Xúguteľe benne' zaj zre'e xęzr la xu xelezrague' lau'.  
 Gunná be'e benne' ca' dutę xel-la' szren chiu'.  
 8 Lue', Xran, guchi'u cheę benne' xúguteľe xęzre.  
 Bchi'a ca da nuna' lu da naca xrlátaje,  
 ne lu da naca du lazre' chia'.  
 9 Bėn cheajsė naze da zrinnaj da dxelún benne' wėn da calela ca',  
 san bzua chawe' benne' xrlátaje,  
 lawe' da nacu' xrlátaje, Dios, ne dxenná'u da xu'u  
 xichaj lázrdau bėnneache.

<sup>10</sup> Diósqueze dxucu'uje' neda'.

Dxuselé' benne' zaj naque' du lazre'.

<sup>11</sup> Xlátaje dxuchi'a Dios chee da dxelún bénneache.

Tu dxezrá'azqueze Dios da dxelún benne' wen da zrinnaj ca'.

<sup>12</sup> Che quebe xelexíaje lazre' Dios gulé' xia chee'.

Ba nuzúa cuásate' xaga nalá xéche'ze chee'.

<sup>13</sup> Ba naxrúa cuásate' xia chee' ca' chee wedil-la.

Ba nuzúa cuásate' xaga nalá xéche'ze da dxelala.

<sup>14</sup> Benne' wen da zrinnaj dxugú'u lazre' ca da calela gune'.

Xu'u lázrdawe' da zrinnaj da gune', na' dxebéajé' da wen lazre'.

<sup>15</sup> Ba gudene' tu xedxu situj naga cheajlechaze bénneache,

na' lézqueze' xeajcházie' lu xedxu na'.

<sup>16</sup> Da zrinnaj da bene' dxebague na lézqueze',

na' da bsaque' bénneache xezrizre na xíhaje'.

<sup>17</sup> Güe lá'anaqueza' Xrana' Dios ca da xrlátaje da dxune',

ne gúl-laqueza' chee La Xrana' Dios, Bénnea' naque' szrente.

## 8

<sup>1</sup> Lue' Dios, Xránantu', zrente naca Lau' du gabí'i xezr la xu.

Zrendxa naca xel-la' szren chiu' ca xabáa.

<sup>2</sup> Bidu ca', ne bidu dxe'ene ca' dxelúl-labe' ca naca na.

Zúaquezu' lataj chawe' naga quebe xelezrín benne' ca'

dxeledábague' lue'.

Dxuzúa zriu' benne' dxeledábague' lue',

ne benne' dxelecuídené' Lue'.

<sup>3</sup> Gate dxenná'a xabáa da nunu' Lue',

ne beu', ne belaj ca', da ca' nuzú' cha chee na,

<sup>4</sup> na' dxucheba': "¿Ájazra naca bénneache, dxulaba lazru' chee le'?"

¿Ájazra naca bénneache, dxe'u gunne xue le'?"

<sup>5</sup> Benu' le' látezdxá szren ca nacu' Lué'queze,

ne bzu' chee' xel-la' szren, ne xel-la' ba lá'ana.

<sup>6</sup> Benu' dxenná bé'ene' xúgute da ca' nunu'.

Xúgute na bdeu' lu ne'e,

<sup>7</sup> zrila' ca', ne bezre ca',

ne xúgute be xixre' ca',

<sup>8</sup> be zaj zua xrila, ne bela ca',

ne xúgute da zaj zua na lu nísadau'.

<sup>9</sup> Xránantu', Dios,

szrente naca Lau' du gabí'i xezr la xu.

## 9

<sup>1</sup> Xran, duté lázrdawa' güe lá'ana' Lue'.

Guzenda' bénneache ca zaj naca da zrente da benu'.

<sup>2</sup> Wabéquezda', ne gúl-laqueza' ca naca chiu'.

Gul-la' chee lau' Lue', nacu' Dios zrente.

<sup>3</sup> Buluzrinnaj benne' dxeledábague' neda'.

Xeajlechazie', ne belexenitie' lau Lue'

<sup>4</sup> lawe' da nucá'ana chawu' da xrlátaje da dxuna'.

Dxe'u lataj blau chiu', ne lu da xrlátaje dxuchi'u.

<sup>5</sup> Gudil-lu' benne' xezr la xu ca',

ne bzria xi'u benne' wen da calela ca'.

Bsulu' la benne' ca' chadía chacanna.

<sup>6</sup> Ba gulebía xi' benne' dxeledábague' neda'.

Chadía chacanna zaj nazrinnaj lataj chee benne' ca',

ne xezre chee' ca', da ca' bchínnuju' Lue'.

Netú benne' cheajsá lazre' benne' ca'.

<sup>7</sup> Xránadxu Dios súatequeze' chadía chacanna.

Ba nucueze' lataj blau chee' naga guchi'e chee bénneache.

<sup>8</sup> Lu da xrlátaje guchi'e chee bénneache duté xezr la xu,

ne chee benne' xúgute xezre ca' lu da naca li lazre'.

<sup>9</sup> Xránadxu Dios gaque' ca tu lataj ga xelezrá chawe' benne' xache',

naga xelezré'ë chawe' gate zrin zra cheë da zi' da xa'.

<sup>10</sup> Benne' ca' zaj núnbe'ë Lue', Xran, xuluxrén lazre' Lue',  
lawe' da quebe bsan lazru' benne' ca' belexilaje' Lue'.

<sup>11</sup> Le gul-la cheë Xránadxu, Bénnea' zue' xezre Sión.  
Le guzén benne' xezre ca' ca' zaj naca da ca' nune',

<sup>12</sup> lawe' da dxeajsá lazre' cheë benne' ca',  
ne dxexebéaj lazre' cheë benne' wete benne'.  
Quebe gul-la lazre' ca' da dxululáwizra benne' ba xache' ca' Le'.

<sup>13</sup> Bexache lazre' neda', Xran.  
Gunná' da dxezaca' lu ni'a na' benne' ca' dxelecuídenë' neda'.

<sup>14</sup> Dxece'u neda' lu na' xel-la' gute,  
cheë guzenda' bènneache da dxue lá'ana' Lue',  
naga dxu'untu' xezre Sión,

ne cheë beda' lawe' da bseláu' neda'.  
<sup>15</sup> Xeajlechaze benne' xezr la xu ca' lu xëdxu da gulëne'.  
Xeajlechu'ë lu xralaj da bulucueze'.

<sup>16</sup> Xránadxu Dios blé'eng' ca' da zaj naque' ne cheë  
da zi' da xa' da gudichaj be'ë cheë benne' ca' dxelunë' da calela.  
Xeajchaze benne' wën da calela na' lu da nun ni'a ná'queze'.

<sup>17</sup> Benne' wën da calela ca' xeledéqueze' lu lataj ba xa'.  
Xúgute benne' ca' dxelal-la lazre' Xránadxu Dios.

<sup>18</sup> Quegá chadía chacanna gal-la lazre' Dios benne' xache' ca',  
ne quegá tu chí'ize xenite da dxelebeza lazre' le'.

<sup>19</sup> Guxasa, Xrana' Dios.

Quebe gu' u lataj xelexegá'ana szrénqueze bènneache.  
Xeeléla' lau' benne' xezr la xu ca' cheë guchi'u cheë'.

<sup>20</sup> Xran, bën xelezrebe benne' ca' Lue'.  
Bën xelexúnbea benne' xezr la xu ca' zaj naque' bènneacheze.

## 10

<sup>1</sup> ¿Bizr cheë na' zu' zitu', Xran?

¿Bizr cheë na' dxucache cuinu' gate dxeledé xel-la' zi'  
bènneache chiú'?

<sup>2</sup> Benne' wën da calela dxenáu zi' xuzre' benne' xache'  
lu xel-la' dxucá'ana szren cuine',  
na' xeajchaze benne' xache' na' lu da ba nucuéza bènnea'.

<sup>3</sup> Dxucá'ana szren cuine' ca' naca da dxezá lazre'.  
Nupé'ë dizra' da dxenné' cheë benne' dxucude',  
na' dxucá'ana dítajë Xránadxu Dios.

<sup>4</sup> Benne' wën da calela na' lu xel-la' dxucá'ana szren cuine'  
quebe dxape' Dios ba lá'ana,  
ne quebe dxéquene' che zua Dios.

<sup>5</sup> Tu dxúnzqueze' da calela,  
ne quebe dxéquene' guchi'u Lue' ca' da dxunë'.  
Dxuzúë' chalá'ala xúgute benne' dxeledábague' le'.

<sup>6</sup> Lu xichaj lázrdawe' dxenné': "Quebe bi seque' guzaga na neda'.  
Cabata' bi gaca chia' da calela."

<sup>7</sup> Tu dxennézqueze' dizra' schanni',  
ne da wën lazre', ne ca' naca da calela da gunë'.  
Dxeledxúaj dxu'ë dizra' calela, ne dizra' xälaze.

<sup>8</sup> Dxu'a xezre ca' dxucache cuine' cheë quele' bènneache.  
Bagácheze dxutie' benne' dxeledeze' na'.

Bagácheze dxenné'ë cheë bi gunë' cheë benne' xache' ca'.  
<sup>9</sup> Bagácheze dxebeze' ca' dxun bëzre xixre'.

Dxebeze' ga séquene' quel-le' benne' xache' ca'.  
Dxel-le' benne' xache' lu xralaj cheë', ne dxexu'ë le'.

<sup>10</sup> Dxine' xu bènnea' gudël-le'.  
Dxusaca zie' benne' zan nen ne'ë wal-la.



11 Lu xichaj lázrdawé' dxenné': "Nal-la lazre' Dios benne' caní. Nucache lawé', ne quebe lé'engé' da dxuna'."

12 Guxasa, Xrana' Dios, ne bze' na'u. Quebe gal-la lazru'u benne' xache' ca'.

13 ¿Ájazra chen' benne' ca' dxeluné' da calela dxuluzúé' Dios chalá'ala? Lu xichaj lázrdawé' dxelenné': "Quebe xebéaj lazre' Dios."

14 Dios, Lue' blé'eqeznu' da nigá, lawé' da dxenná'u benne' wən da calela, ne da ca' dxuné' quebe naca na xrlátaje, na' xebéaj lázrequezu' bėnnea'. Dxuluzúa cuina benne' xache' ca' lu na'u. Lue' dxácalequezu' bi wezėbedu ca'.

15 Dxugú' xel-la' wal-la chee' benne' wən da calela. Guleaj lávela da calela da nuné', da na' bėnė' lu da bagache'.

16 Chadía chacanna naca Xránadxu Wenná Bea cheedxu. Lu xezr la xu chee' ba gulebía xi' benne' dxelecuídengé' Le'.

17 Bnézruju' ca da bululáwizra benne' dxexruj lázre'du ca' Lue', Xran. Lue' dxupa'u lázxdau bėnne'du ca' chee' xuluzé' nague' xrtizru',

18 chee' guchi'u chee' bi wezėbedu ca', ne chee' benne' dxeledéé' xel-la' zi', chee' québedxa bi da calela xelún benne' ca' dxeluné' da calela chee' bėnne'du caní.

## 11

1 Dxuxrén lazra' Xrana' Dios.

Ájazra chen' dxi'u bėnne'du xu'a: "Bzrunnuj, guxíaj lu xí'ala ca tu bxinne?"

2 Le na' xque, dxulucuéza benne' ca' dxeluné' da calela xaga nalá xéche'ze.

Ba zaj naxrúé' xaga nalá xéche'ze chee' lu du chee' na, chee' xelútié' bagácheze benne' xrlátaje ca'.

3 Chete ca' xelexinnaj da dxulusé' chuchu da xrlátaje, ¿ájazra xelún benne' xrlátaje ca'?

4 Xránadxu Dios zúaqueze' lataj lá'azxa chee'.

Xabáaqueze zua lataj blau naga dxe' Dios.

Dxelenná' xanne xiaj lawé'.

Dxelé'engé' ca da dxelún bėnneache.

5 Xránadxu Dios dxudéé' chawe' benne' xrlátaje ca' lu da stėbe.

Dxecuídengé' benne' ca' dxeluné' da calela,

ne benne' dxeluné' da zrinnaj.

6 Gudéé' benne' ca' dxeluné' da calela lu da zi' da xa',

da zaj naca na xi', ne da dxuzėzrele'ė da dxala na ca xedxe,

ne tu be' lálė'ė, da ca' sel-le' lawé' benne' ca'.

7 Caní guné' lawé' da naca xrlátaje Xránadxu Dios,

ne nazrí'ingé' da naca na xrlátaje.

Benne' li lazre' ca' xeledé'engé' lawé'.

## 12

1 Xrana' Dios, bselá bėnneache chiu' lawé' da québedxa

dxape' benne' xezica Lue' ba lá'ana.

Quebe nu chilá' benne' li lazre' ládujla bėnneache ca'.

2 Xúgute' bėnneache ca' dxelezi xė'ė le sa' ljwezre'.

Lu da wən lazre' ba zaj nupé'ė dizra' chee' xelezí xė'ė le'.

3 Xránadxu Dios guzria xi'ė xúgute' benne'

quebe dxuluchálajé' du lazre',

ne benne' ca' dxuluchálajé' da dxucá'ana szren cuine'.

- 4 Benne' ca' gulenné': "Ñe cheę dizra' cheętu' zrué'entu' da chawe'.  
Ca dxezá lázrentu' guchálajntu', ¿nuzra nna be'e netu', xca'?"
- 5 Dxenná Xránadxu Dios: "Na'a xídaqueza' lawe' da dxulusaca zi'e benne' xache' ca',  
na' dxelebezre lazre' benne' baxache' ca'.  
Guselá' benne' ca' dxeláneng' da guna'."
- 6 Xrtizra' Xránadxu Dios zaj naca na du lazre'.  
Zaj naca na ca xiaj plata da ba gudé na lu xi',  
da ba gudé na lu xi' gazre lasa.
- 7 Xran, guxúequezu' Lue' bénneache chiu' ca'.  
Chadía chacanna gucu'uju' lę' lu na' benne' zaj zřę'e  
lu zra na'a zra.
- 8 Gátetęze na' dxaca da calęla  
gate dxulucá'ana szren bénneache da naca sban.

### 13

- 1 ¿Ájatequeze gal-la lazru' neda', Xran?  
¿Gal-la lázrtequezu' neda'?
- ¿Ájatequeze quebe le'enu' da dxaca chia'?
- 2 ¿Ájatequeze gun na ba xen guchaga lawa' da dxezaca?  
¿Ájatequeze gaca wi'ine lazra' te zra, ne chizrela?  
¿Ájatequeze nna be'e benne' dxedábague' Lue' neda'?
- 3 Gunná' da dxaca chia', Xran, ne bechebe chia'.  
Btipa lazra' cheę quebe gatia',  
4 ne cheę quebe nna benne' dxedábague' neda':  
"Ba bętia' ní'a ne'e."
- Benne' ca' dxeledábague' neda' xelebene'  
che cheajcházia' lu da calęla.
- 5 Neda' dxuxrén lazra' Lue' xexache lazru' neda'.  
Dutę lázrdawa' dxebeda' lawe' da dxuseláu' neda'.
- 6 Gúl-laqueza' cheę Xrana' Dios  
lawe' da ba nune' chia' da xrlátaje.

### 14

- 1 Benne' lázxdau zide' dxezá' lazre', dxenné': "Quebe zua Dios."  
Benne' caní zaj nazrinnaj xichaj lázrdawe'.  
Dxelunę' da sban ca'.  
Quebe nu chilá' benne' dxunę' da xrlátaje.
- 2 Xránadxu Dios zuę' xabáa dxenné'ę bénneache  
cheę lé'eng' che zua nu benne' dxéajni'ing',  
bénnea' dxape' ba lá'ana Dios.
- 3 Xúgute' zaj xu'e neza xuca'.  
Xúgute' zaj nazrinnaj xichaj lázrdawe'.  
Quebe nu chilá' benne' dxunę' da xrlátaje, netúguę'.
- 4 ¿Quebe dxeléajni'i benne' ca' dxelunę' da sban?  
Dxulusunítie' bénneache chia' ca dxuzuzruj tu benne'  
xeta da dxawe',  
ne quebe dxeléquebe'eng' zua Xranę' Dios.
- 5 Dutę xel-la' dxelezrebe dxelezrize benne' ca'  
lawe' da dxácale Dios benne' xrlátaje ca'.
- 6 Belún lę' cheę da gulenná benne' xache' ca',  
san benne' caní xebeza lazre' Xránadxu Dios.
- 7 Xídatega Bénnea' guselę' benne' Israel ca'.  
Gate gun Xránadxu xelexezrín benne' cheę' ca',  
benne' ca' zaj nada'u zítu'la,  
na' welebé zri'ine zre sua Jacob,  
ne welebéle'ęquezne' benne' Israel ca'.

## 15

<sup>1</sup> Xran, ¿núzraqueze benne' sue' naga zu' Lue'?  
¿Núzraqueze benne' sue' naga naca lá'azxa chiu'?

<sup>2</sup> Waca bénnea' naque' du lazre', ne dxune' da xrlátaje,  
bénnea' zua da líqueze lu xichaj lázrdawe',

<sup>3</sup> bénnea' quebe dxenné' chee le sa' ljwezre',  
ne quebe bi da calela dxune' chee le sa' ljwezre',  
ne quebe dxu'e lataj nu benne' si tizre' le sa' ljwezre'.

<sup>4</sup> Waca bénnea' quebe dxape' ba lá'ana  
nu benne' dxune' da sban.

Dxape' ba lá'ana benne' ca' dxelape' ba lá'ana Xránadxu Dios,  
bénnea' quebe dxuché'e dizra' da ba gunné' lácala bi da' gunítie'.

<sup>5</sup> Waca bénnea' dxusane' dumí chee' ne quebe dxenabe' xichajen,  
ne quebe dxezi' lu ne'e dumí chee' nnie' chee'  
nu benne' quebe bi zria nabague'.

Nu benne' dxune' caní cabata' cheajchazie' lu da calela.

## 16

<sup>1</sup> Bxue neda', Dios, lawe' da dxuxrén lazra' Lue'.

<sup>2</sup> Lu xichaj lázrdawa' gucha' Xrana' Dios:

“Lue' nacu' Xrana'.

Quebe bi xetu' da xrlátaje de chia' da quebe naca na chiu'.”

<sup>3</sup> Tuze benne' ca' zaj naque' chee Dios lu xezr la xu,  
ne benne' ca' zaj naque' du lazre' dxezaca ba lázrelena'.

<sup>4</sup> Waxánqueze da dxelezaca benne' ca' dxelape' ba lá'ana  
tu dios quebe bi zaca.

Quebe guna' le' tu zren gate dxuluzríe' zren lau dios na',  
ne quebe guchínedá' la dios na'.

<sup>5</sup> Xránadxu Dios dxugawe' neda', ne naque' da ba neza chia'.

Lue', Dios, nuxru' ca da naca chia'.

<sup>6</sup> Ca da nuzú' chia' zaj naca na da dxezi'a ba neza,  
ne xrtante zaj naca da nunnu' chia'.

<sup>7</sup> Tu gucá'ana szrénzqueza' Xránadxu Dios,

Bénnea' dxusédene' neda'.

Chizrela gate ne dxasia' dxuzéajni'ine' neda' lu xichaj lázrdawa'.

<sup>8</sup> Xránadxu Dios nuxrén lazra' gusi'e neda'.

Lawe' da zue' cuita', quebe bi seque' guchebe na neda'.

<sup>9</sup> Chee le na' gubé lázrdawa', ne gubéle'eqezda',  
na' zra gacha' lu xedxu ba cueza lazra'

<sup>10</sup> lawe' da quebe gucá'anu' bénne' du xu'a lu lataj ba xa',  
ne quebe gu'u lataj guzru nu benne' nácaqueze' chiu'.

<sup>11</sup> Gulé'enu' neda' da guna' chee gata' chia' xel-la' nabán.

Naga zu' Lue' wabéle'eqezda',  
na' cuitu' Lue' suatequeze da ba neza chia'.

## 17

<sup>1</sup> Bze naga chi'a, Xran.

Ben xanne' da dxuláwizra' Lue'.

Guzí' da dxenaba' Lue', naca' du lazra'.

<sup>2</sup> Benna lataj xelá'a lau' chee guchi'u chia',  
lawe' da dxelé'enu' xúgute' cáteze zaj naca na.

<sup>3</sup> Lue' dxenná' xánniu' xichaj lázrdawa'

ne dxelé'enu' neda' chizrela.

Gunná' xánniu' da dxuna', na' quebe bi da calela blé'enu'.

Ba nuna' quebe bi dizra' calela nnia'.

<sup>4</sup> Dxuzúa' dizra' ca naca da dxennáu',  
na' quebe dxuna' ca da dxelún benne' wen da zrinnaj ca'.

<sup>5</sup> Bxue neda' lu neza chawe' chiu',

chee quebe cheajcházia' lu da calela.

<sup>6</sup> Dxuláwizra' Lue', Dios, lawe' da dxennu' chí'a.

Bze naga chí'a, na' bene da dxennía'.

<sup>7</sup> Ble'e ca dxexache lázrele'u bénneache.

Bselá benne' ca' dxuluxrén lazre' Lue' lu na' benne'  
dxeledábague' le'.

<sup>8</sup> Bxue neda' ca dxun benne' dxuxúe' xiaj lawe'.

Gudezre neda' ca dxun bedxuj dxézreba' zrí'ineba' zran xrílaba'

<sup>9</sup> chee quebe bi xelún chia' benne' ca' dxelune' da calela,  
benne' dxeledábague' neda', ne dxelaca lazre' xelútie' neda'.

<sup>10</sup> Quebe dxelexache lazre' le sa' ljwezre',  
na' dute xel-la' dxulucá'ana szren cuine' dxuluchálaje'.

<sup>11</sup> Gáteteze dxedá' dxeléchaje' neda'.

Dxelaca lazre' xeline' neda' xu.

<sup>12</sup> Zaj naque' ca tu bezre xíxre'dau' dxaca lázreba' bi gáguba'.

Zaj naque' ca tu bezre xixre',

ba nucache cuínaba' chee quél-laba' béadu ca'.

<sup>13</sup> Gudá, Xran, gudábaga' benne' ca' dxelune' da calela,  
na' bchiche' lu xu.

Bselá neda' lu na' benne' ca' dxelune' da calela,  
guchínenu' xia chiu'.

<sup>14</sup> Bselá neda' lu na' benne' ca' nen ni'a ná'quezu', Xran.

Bselá neda' lu na' bénneache, benne' ca' zaj dxe'e gunne xue  
chee xezr la xu nigaze,

benne' ca' dxeláguqueze' da zácale'e chiu'.

Da nigáqueze dxulugawe' zrí'ine' ca',

ne dxexegá'anaqueze da dxelágu zrí'ine zre su'e'.

<sup>15</sup> Le'eda' neda' lau Lue' lawe' da naca' xrlátaje.

Xezaca ba lazra' gaca' ca nácaquezu' Lue' gate xebana'.

## 18

<sup>1</sup> Nazrí'ida' Lue', Xran.

Lue' dxuzé chuchu' neda'.

<sup>2</sup> Lue', Xran, nacu' ca tu xiaj naga ze chúchua',

ne ca tu xu'u zren naga xu'u chawa', na' nacu' weselá chia'.

Dios chia', Lue' dxuzé chuchu' neda', na' guxrén lazra' Lue'.

Dxucu'uju' neda', ne dxuseláu' neda', ne dxucache chawu' neda'.

<sup>3</sup> Wannéqueza' Xránadxu Dios,

Bénnea' naca chee' güe lá'anadxu Le'.

Le' guselé' neda' lu na' benne' ca' dxeledábague' neda'.

<sup>4</sup> Guzúa' lu da stebe chee xel-la' gute,

na' guca da calela ca tu xegu nisa da bchebe na neda'.

<sup>5</sup> Guzúa' lu da stebe chu'a lataj ba xa'

lawe' da zua' lu da stebe chee xel-la' gute.

<sup>6</sup> Lu da zi' da xa' bláwizra' Xrana' Dios, ne gunnéqueza' Dios chia'.

Le' benne' chí'a naga zue' lataj lá'azxa chee',

ne bze nague' da bchálaja' lawe'.

<sup>7</sup> Nadxa guzrú' lu xezr la xu nigá.

Gulezrize lane xi'a ca'.

Gulezrízele'e na lawe' da bzra'a Le'.

<sup>8</sup> Bdxuaj zren chee xi' lu zrine',

ne bdxuaj xi' lu dxu'e da bzezxe na da de lawe',

na' xi' na' gudel-la na bau ca'.

<sup>9</sup> Bzéxruje' da zria zran xabáa, na' bétaje',

na' guzúa da chul-la zran ni'e.

<sup>10</sup> Gudé' lu be' zrie' tu da nazí le na querubín.

Chadí gudé' lu be' bdunu'.

<sup>11</sup> Gúcu'e' da chul-la, da bcache na Le',

da na' naca na beuj bza da xuzru na nisa.

<sup>12</sup> Lu da dxácátite legala chee' da xu'u lu beuj bza,

na' beledxúaj bau dxelala, ne xiaj bezxe'.

<sup>13</sup> Zran xabáa gunné guziu' chee chí'i Xránadxu,

na' ben chi'i Dios szrentę ládujla bau dxelala ca',  
ne xiaj bezxe' na'.

<sup>14</sup> Bsanę' xaga nalá xéche'ze cheę' ca',  
na' beše dinnaję' benne' ca' dxeledábage' neda'.  
Bsanę' xesa guziu' ca', ne bzria xi'e benne' ca'.

<sup>15</sup> Nadxa belelá' da zaj dę lu situj cheę nísadau',  
ne ble'e lau lane xęzr la xu da zua na zran nísadau',  
gate na' gudil-lu' benne' ca' dxeledábage' neda', Xran,  
ne lu xel-la' dxezrá'a chiu' bzagu' benne' ca'.

<sup>16</sup> Bétaję' lu da sibe, ne bequę'e neda'.  
Bebéaję' neda' lu da naca ca tu nisa zila.

<sup>17</sup> Bselę' neda' lu na' benne' wal-la dxeledábage' neda',  
ne lu na' benne' ca' dxelecuídenę' neda',  
benne' zaj nácadxę' wál-la ca neda'.

<sup>18</sup> Buluzagųę' neda' gate na' zua' lu da stębeleę'e,  
san Xrana' Dios gúcaleņę' neda'.

<sup>19</sup> Bebéaję' neda' naga xu'a, ne bzųę' neda' tu lataj zren.  
Bselę' neda' lawe' da bezaca ba lazre' chia'.

<sup>20</sup> Xránadxu Dios bexunņę' chia' cáteze naca  
da xrlátaje da nuna'.

Cáteze naca da xrlátaje da nuna' bexunņę' chia'  
<sup>21</sup> lawe' da dxuna' ca da dxusede Xrana' neda',  
ne quebe guleaj xíchaja' Dios chia'.

<sup>22</sup> Dxuna' ca naca da dxenná bé'eng' neda',  
ne quebe bsana' da ca' nadxírųj be'e.

<sup>23</sup> Guca' li lazre' lau Le',  
ne bxue cuina' cheę quebe guna' da calęla.

<sup>24</sup> Cheę lę na' bexunna Xránadxu Dios chia'  
cáteze naca da xrlátaje da bęna',

cáteze naca da xrlátaje da nuna' lau Le'.

<sup>25</sup> Ddexache lazru' cheę benne' dxexache lazre' le sa' ljwezre',  
ne nacu' li lazre' nen benne' naquę' li lazre'.

<sup>26</sup> Dxunu' da naca chawe' cheę benne' naquę' chawe',  
na' gacu' snia nen benne' węn da calęla.

<sup>27</sup> Guseláu' benne' zaj zuę' lu da zi' da xa',  
san guzėxruju' benne' dxulucá'ana szren cuinę'.

<sup>28</sup> Lué'queze guzalju' xi' chia'.

Xrana' Dios, guzani'u chia' naga zua' lu da chul-la.

<sup>29</sup> Nen xel-la' waca chiu' guzria xi'a benne' zantę  
dxeledíl-lalęnę' neda'.

Che Lue', Dios, súalęnu' neda'

waca guchínnaja' ze'e da zaj naxechaj xęzre ca'.

<sup>30</sup> Li lazre' zaj naca da dxun Dios, na' du lazre' naca xrtizre'.

Dxucu'uję' xúgutę benne' ca' dxelebeza lazre' Le'.

<sup>31</sup> Tuze Xránadxu naquę' Dios.

Tuze Dios chegdxu naquę' Benne' dxucu'uję' dxi'u.

<sup>32</sup> Dios naquę' Bęnnea' dxunę' neda' benne' wal-la,  
ne Benne' dxunę' li lazre' da dxuna' neda'.

<sup>33</sup> Dxunę' ni'a ca zaj naca ni'a bzrina' xixre'  
ne dxuzúa chúčhųę' neda' lu xi'a Sión cheę'.

<sup>34</sup> Dxsúdenę' neda' cheę gaca cha'a lu wedil-la,  
ne cheę gaca guchíneda' xaga nalá xéche'ze  
da naca na xia gache'.

<sup>35</sup> Lu xel-la' weselá chiu' 'bcu'uju' neda',  
ne nen na'u xabęla gúcaleņu' neda'.

Xel-la' zri'i lazre' chiu' ba nucá'ana szren na neda'.

<sup>36</sup> Bęn chawu' neza naga tea',

cheę quebe cuila' lu neza na'.

<sup>37</sup> Blaga' benne' dxeledábage' neda', na' xeajzrena' lę',  
na' quebe bebi'a cadxa bétetea' benne' ca'.

<sup>38</sup> Bęna' benne' ca' wę', na' quebe guca xelexasę'.

Xeajlecházie' zran ni'a.

39 Btipu' lazra' chee cha'a lu wedil-la.  
 Bzéxruju' benne' dxeledábague' neda' zran ni'a.  
 40 Benu' buluzrunnuj benne' dxeledábague' neda' lawa',  
 chee bzria xi'a benne' ca' dxelecuídené' neda'.  
 41 Gulenné' nu benne' gácalené' le' san quebe nu chilá'.  
 Gulenné' Xránadxu Dios, san quebe benne' chee'.  
 42 Bzúzruja' benne' ca' ca bxrte xu da dxua be'.  
 Bléaja' le' ca dxuléaja' guna' la neza ca'.  
 43 Bseláu' neda' lu na' benne' ca' dxeledábague',  
 na' benu' neda' benne' xíchaje xezr la xu ca',  
 na' benne' ca' quebe núnbe'a dxeluné' zrin chia'.  
 44 Gate belenne' chia', na' buluzúe' xrtizra'.  
 Benne' zaj zra' xezr la xu ca' beluné' ca' gunná be'eda'.  
 45 Benne' zitu' ca' gulate ni'a ne'e,  
 na' beledxúaje' dxelezrízie' lu xezre zrentau' chee' ca'.  
 46 Gaca ba lá'azxa Xránadxu Dios.  
 Gaca ba Bénnea' dxucu'uje' neda'.  
 Xegá'ana szrénqueze Dios, Bénnea' dxuselé' neda'.  
 47 Naca Dios Bénnea' dxebéaj lazre' benne' dxeledábague' neda',  
 ne dxuzúe' benne' ca' zran ni'a.  
 48 Naque' Bénnea' dxuselé' neda' lu na' benne' ca'  
 dxeledábague' neda'.  
 Dxuné' dxenná be'eda' benne' ca' guledábague' neda'.  
 Bselé' neda' lu na' benne' xichaj zra'a ca'.  
 49 Chee le' na' xechéba' chiu', Xran, lau benne' xezr la xu ca',  
 na' gúl-laqueza' chee' Lau' Lue'.  
 50 Dxun Dios dxenná bea bénnea' waláz chee',  
 ne dxexache lazre' bénnea' guqu'é, bénnea' naque' David,  
 ne zri'ine zre sue' chadía chacanna.

## 19

1 Dxulé'e lau zran xabáa ca naca xel-la' szren chee' Dios.  
 Dxuchálajqueze na ca zaj naca da nune'.  
 2 Tu zra tu zra dxuzén na zra xula da nigá,  
 na' tu zre' tu zre' dxé na zre' xula da ná'queze.  
 3 Quebe dxuluchine na xrtizra' bénneache,  
 ne quebe nu dxen chi'i na,  
 4 san dxezriluj da dxelenná na du gab'i xezr la xu,  
 ne dxelezrín xrtizra' na dapa saca chee' xezr la xu.  
 Dios bene' xabáa ca tu xu'u naga zua gubizra.  
 5 Che zílala dxalaj na ca tu benne' wechaga na'.  
 Dxebé na ca tu benne' dxezá chégüe' lu witja.  
 6 Dxedxuaj na chalá'a naga dxalaj na,  
 na' dxezrín na chalá'a naga dxebía na.  
 Dxuchá'a na xúguté da zaj de.  
 7 Du lazre' naca da nadxixruj bea Xránadxu,  
 ne dxuzé chacha na bénne' du xú'udxu.  
 Li lazre' naca da dxexechébe Xránadxu,  
 ne dxunezruj na xel-la' sina chee' benne' ca'  
 quebe zaj nape' na.  
 8 Da líqueze zaj naca da nadxixruj bea Xránadxu,  
 na' dxelebélé'e benne' ca' dxeluné' ca zaj naca na.  
 Du lazre' zaj naca da dxuzéajni'i Xránadxu dxi'u,  
 da dxuluzúa na dxi'u lu xel-la' naxaní'.  
 9 Cháwedau' naca zrédexu Xránadxu,  
 da gun na súadxu chadía chacanna.  
 Da líqueze zaj naca da dxuchi'a Xránadxu cheedxu,  
 ne zaj naca na chawe'.  
 10 Zaj naca na da dxezá lázredxadxu ca oro,  
 ne ca oro zrenté da zácale'e na.  
 Zaj naca na zíxredxa ca bzrina'dau', da nácale'e na zixre.

<sup>11</sup> Dxulusizre na neda', wɛn zrin chiu'.  
Lawe' da dxuna' ca zaj naca na, da zrentɛ dxezi'a.

<sup>12</sup> Netú benne' quebe gaca lé'ene' da calɛla da dxunɛ'.  
Bselá neda', Xran, lu da calɛla da quebe dxéquebe'eda' dxuna'.

<sup>13</sup> Bucache chawe' neda', wɛn zrin chiu',  
cheɛ quebe bi dul-la guna' du lazra'.  
Quebe gu'u lataj nna be'e dul-la neda'.  
Nadxa gaca' du lazra', ne quebe baga' zria cheɛ dul-la na'.

<sup>14</sup> Gaca da dxuchálaja', ne da dxulaba lazra'  
da dxezaca ba lazru' Lue', Xran  
Nacu' Benne' dxuxúɛ' neda', ne Benne' dxexá'ue' neda'.

## 20

<sup>1</sup> Dxenaba' Xránadxu xenne' chi'u lu zra zu' lu da stɛbe,  
ne gucu'uj La Dios cheɛ Jacob lue'.

<sup>2</sup> Dxenaba' Lɛ' naga zuɛ' lataj lá'azxa cheɛ' sel-lɛ'  
da gácalɛ na lue',

ne cheɛ xi'a Sión xidɛ' guxrɛ' lue'.

<sup>3</sup> Dxenaba' Lɛ' cheajsá lazrɛ' ca naca xúgute' guna' bzu' cheɛ',  
ne si' lu ne'ɛ béadu ca' dxuzezxu' lawɛ'.

<sup>4</sup> Dxenaba' Lɛ' gunnɛ' lue' ca naca da dxezá lazru',  
ne gunɛ' xúgute' da dxéquenu' xrlátaje.

<sup>5</sup> Béle'entu' gate guselɛ' lue',

na' chísantu' tu da gulɛ'e lawe na La Dios cheɛdxu.

Dxenaba' Xránadxu gunnɛ' lue' xúgute' da dxenabu' lau Lɛ'.

<sup>6</sup> Na'a nezda' dxuselá Xránadxu bɛnnea' ba gucá'aquezɛ'.

Naga zuɛ' xabáa lá'azxa cheɛ' xenne' chi'i bɛnnea'.

Xel-la' waca zrentɛ cheɛ' guselɛ' bɛnnea'.

<sup>7</sup> Bal-la benne' dxuluxrɛn lazrɛ' carro ca' cheɛ wedil-la,  
na' xezícadxɛ' dxuluxrɛn lázrɛ' bzrina' ca'.

Dxi'u dxuxrɛn lázredxu La Xránadxu Dios.

<sup>8</sup> Benne' ca' gulate ni'a ne'ɛ, ne xejlechazie'.

Dxi'u hexásadxu, na' zɛdxu.

<sup>9</sup> Bselá netu', Xran, nacu' Wenná Bea cheɛntu'.

Ben chi'intu' gate dxuláwizrantu' Lue'.

## 21

<sup>1</sup> Benne' dxenná bea dxebéle'ene' nen xel-la' waca chiu', Xran,  
na' ca naca xel-la' weselá chiu' dxebéle'ene'.

<sup>2</sup> Bnézruju' lɛ' da guzá lazrɛ',

ne quebe bzagu' da gunabɛ' Lue'.

<sup>3</sup> Guzí' lu na'u lɛ', ne bɛnu' dxaca chawe' cheɛ'.

Nuzriu' xíchajɛ' tu da naca na oro.

<sup>4</sup> Gunabɛ' Lue' gunnu' lɛ' xel-la' nabán,

na' bnézruju' na lɛ' cheɛ súaquezɛ' zane' iza.

<sup>5</sup> Zrentɛ naca xabáa cheɛ' lawe' da bseláu' lɛ'.

Bennu' lɛ' xel-la' ba lá'ana, ne xel-la' szren.

<sup>6</sup> Lawe' da nunu' gaca chawe' cheɛ' chadía chacanna  
dxunu' dxebéle'ene' lau Lue'.

<sup>7</sup> Lawe' da dxuxrɛn lazre' wenná bea na' Xránadxu,  
xexache lazre' Dios szrentɛ lɛ',

na' quebe suɛ' lu da stɛbe.

<sup>8</sup> Xulétaju' xúgute' benne' dxeledábaguɛ' lue'.

Xel-la' waca chiu' xulétaju' benne' ca' dxelecuídenɛ' lue'.

<sup>9</sup> Lu zra na' zra'u lɛ' gaca cheɛ benne' ca'

ca guzú' lɛ' lu xi' ga dxulúzrie' bla'dau'.

Xránadxu guzúzrujɛ' benne' ca' lu xel-la' dxezrá'a cheɛ',  
na' xi' na' guzezxe na lɛ'.

<sup>10</sup> Xúgute' da belunɛ' lu xɛzr la xu nigá guzria xi'u,

ne xegú' zri'ine zre sue' ládujla bënneache,  
 11 lawe' da gulaca lazre' xelune' da calela chiu' Lue'.  
 Gulilaj lazre' ca da xelune', san quebe bi xezezéquene',  
 12 lawe' da gulagu' benne' ca'.  
 Nucuezu' xaga nalá xéche'ze chiu' chee' le'.  
 13 Begá'ana szrénqueze Lue', Xran, lu xel-la' wal-la chiu'.  
 Tu gúl-lazquezdxu, ne tu güe lá'anazquezdxu Lue'  
 ca naca xel-la' waca chiu'.

## 22

1 Dios chia', Dios chia', ¿bizr chee' na' nusán lazru' neda'?  
 ¿Bizr chee' na' quebe dxennu' da dxenaba' Lue'  
 chee' guseláu' neda'?

2 Dios chia', dxuláwizra' Lue' te zra, ne quebe dxexechebu' chia'.  
 Dxuláwizra' Lue' chizrela, ne quebe dxezí'i lazra'.  
 3 Lá'azxa nacu' Lue'.  
 Nacu' Benne' dxebeze' naga dxelúe lá'ana benne' Israel Lue'.  
 4 Xra xrtáuntu' gulebeza lazre' Lue'.  
 Gulebeza lazre', na' bseláu' le'.  
 5 Bululáwizre' Lue', na' belelé'.  
 Buluxrén lazre' Lue', na' quebe belexedué'ene'.  
 6 Neda' naca' ca tu belá' gúna'dau', ne quegá bënneache.  
 Dxelecuide bënneache neda', ne dxuluzúe' neda' chalá'ala.  
 7 Xúgute' benne' dxelelé'e neda' dxelún le' chia'.  
 Lu da dxelún le' chia' dxelexrá dxu'e,  
 ne dxulutá xíchaje', dxeleonné':  
 8 "Bzua cuine' lu na' Xránadxu chee' guselé' le'.  
 Guselé' le' che dxezaca ba lázreleñe' le'."  
 9 Lue' nacu' Bënnea' bexru' neda' gate gúlaja'.  
 Benu' bxren lazra' Lue' gate na' ne dxázrete'a'.  
 10 Guxu'a lu na'u gate quebe ne gálajtea'.  
 Gate ne xu'a lu le'e xrna'a, báchequeze nacu' Dios chia'.  
 11 Quebe xebigu' naga zua' lawe' da zua gágute'  
 da gusaca zi na neda',  
 ne quebe nu chilá' benne' gácalene' neda'.  
 12 Zaj naxechaj benne' dxeledábague' neda' ca bezure ca'.  
 Zaj naxechaj benne' neda' zaj naque' ca bezure wal-la ca'  
 chee' Basán.  
 13 Gulaca lazre' xuluzría xi'e neda'  
 ca tu bezure xixre' dxedunba', ne dxebezre xa'aba'.  
 14 Bebizre lazra' ca nisa da nalalaj na lu xu,  
 na' ca naca zrita xu'a bulusán ljwezre na.  
 Lázdawa' guca na ca xina' da bxuna na lu le'a ca nisa.  
 15 Bexaca xel-la' wal-la chia' ca tu xé'ena xu la'a,  
 na' luzra' bedá' na chichja'.  
 Nuzú' neda' lu xu xrte chee' xel-la' gute.  
 16 Zaj naxéchaje' neda' ca becu' ca'.  
 Zaj naxechaj benne' wen da zrinnaj ca' neda'.  
 Gulídue' ni'a na'a.  
 17 Waca gulaba' ca naca zrita xu'a,  
 na' benne' ca' dxeleonné'e neda', ne dxeleonné' xánnie' neda'.  
 18 Belexelé'e zra lana' late' weaj,  
 na' lawe' zra lana' gulebeje' da gaca bea na.  
 19 Quebe xebigu' naga zua', Xran.  
 Nacu' xel-la' wal-la chia'.  
 Gudázega gácalenu' neda', Xran.  
 20 Bselá bënne' du xu'a lu na' benne' gu'e neda' xia.  
 Bënnea' guzría xi'e neda' gune' ca dxun becu'.  
 21 Bselá neda' lu dxu'a bezure xixre'.  
 Bselá neda' lu luzu bezure wal-la ca'.  
 22 Guzenda' bi bícha'dau' ca' lau' Lue'.  
 Güe lá'anaqueza' Lue' ladaj benne' zaj nazrague' lau'.



23 Le'e, dxezrébele Xránadxu, le güe lá'ana Le'.

Le gucá'ana szrene', le'e, zri'ine zre sua Jacob.

Le zrebe Le', le'e, zri'ine zre sua Israel.

24 Quebe bzua Dios chalá'ala, ne quebe gucuídenē'

da zi' da xa' da guledé benne' xache' ca',

ne quebe bcache lawe' lau benne' ca'

san gate bululáwizre' Le', benne' chi'ē.

25 Güe lá'anaqueza' Lue' laduj benne' zan zaj nazrague' lau'.

Ca da guchebe lazra' gúnqueza' lau benne' ca' dxelezrebe' Lue'.

26 Xelagu benne' dxexruj lazre', ne welélajquezne'.

Benne' ca' dxelebigue' lau Xránadxu xelúe lá'anaqueze' Le'.

Tu gácazqueze da ba neza chee' benne' ca'.

27 Cheajlesá lazre' benne' dutē xęzr la xu Xránadxu,

na' xelexebí'ē lau Le'.

Xúgutę cue' benne' chee' xúgutę cue' xęzr la xu

xelúe lá'anaqueze' Le',

28 lawe' da xu'u lu na' Xránadxu xel-la' dxenná bea,

na' nna bé'ene' xúgutę benne' xęzr la xu ca'.

29 Xeláguqueze xúgutę benne' zren ca' chee' xęzr la xu nigá,

ne xelúe lá'anaqueze' Dios.

Xuluzú zribe lau Le' xúgutę benne' ca' xelate,

benne' ca' quebe xelezéqueņē' xelegú'u chawe'

bénne'du zaj xu'ē chee' quebe xelatię'.

30 Zri'ine zre sua benne' ca' xelunbe' zrin chee' Xránadxu.

Xuluzenne' zri'ing' ca' ca naca chee' Xránadxu

cadxa cheajsetę chee' bénneache.

31 Xelezrine', ne xuluzenne' bénneache ca naca

da xrlátaje da dxun Dios.

Xuluzenne' benne' quebe ne xelálaje' ben Dios da caní.

## 23

1 Xránadxu Dios dxuxúę' neda' ca tu benne' dxuxúę' zrila' chee'.

Quebe bi dxexáxrjeda'.

2 Ca dxelezrúa zríla'du ca' ba guláguba' xixre' xá'adau',

caní dxunę' chia' chee' xezí' lazra'.

Gunę' chia' ca dxaca chee' zríla' ca'

dxeché'e-ba' dxu'a xęgu nisa da de zrize.

3 Dxuxuzúa chúchue' neda' lu xichaj lázrdawa'.

Dxusi'ę neda' lu da xrlátaje chee' gaca li da guchebe lazre'.

4 Láqueze tea' naga sua' lu da stebe chee' xel-la' gute,

quebe bi da calęla guchebe na neda',

lawe' da zúalęnu' Lue' neda', Xran,

na' dxelácalę zriše', ne blazru chiu' neda'.

5 Dxucuezu' da xi'aj gawa' lácala benne'

dxeledábague' neda' zaj naxečaj neda'.

Dxugú'u da za xichja' da dxapa na neda' ba lá'ana,

ne dxusezráteu' zrięa' chia'.

6 Da xrlátaje, ne xel-la' dxexache lazre' chiu'

da líteęaze xelezúalę na neda' xúgutę zra naca bana',

na' lizru', Dios, gaca na lizra' chadía chacanna.

## 24

1 Chee' Dios naca xęzr la xu nigá ne xúgutę da zaj de lawe na.

Naca chee' xęzr la xu, ne xúgutę bénneache zaj zre'ę ga na'.

2 Bzue' na lawe' nísadau',

ne bzale' lane na sítuęla zran nísadau'.

3 ¿Nu seque' cuen xi'a chee' Xránadxu?

¿Nu seque' chu'u xudau' lá'azxa chee'?

4 Waca benne' ca' zaj naque' du lazre' ca naca da dxelunę',

ne ca naca da dxulaba lazre'.

Benne' ca' quebe ne xelechisa ne'ę lau bedáu' xiaj xaga ca',

ne quebe bi ne xelexebe lazre' da naca wen lazre'.

<sup>5</sup> Xránadxu gunę' da chawe' cheę benne' caní.

Dios guchi'ę cheę benne' caní, ne guselé' le'.

<sup>6</sup> Caní zaj naca bėnneache dxelebigue' lau Le',  
benne' ca' dxellexu'ę naga zua Dios cheę Jacob.

<sup>7</sup> Le salaj dxa xu'u cheę xudau'.

Le salaj dxa xu'u chawe' ca',

na' chu'u Wenná Bea szrentę.

<sup>8</sup> ¿Nuzra na' Wenná Bea szrentę nigá?

Naque' Xránadxu, Benne' wal-la,

Bėnnea' napę' dutę xel-la' waca.

Naque' Xránadxu, Bėnnea' dxedxúaje' chawe' lu wedil-la.

<sup>9</sup> Le salaj dxa xu'u cheę xudau'.

Le salaj dxa xu'u chawe' ca',

na' chu'u Wenná Bea szrentę.

<sup>10</sup> ¿Nuzra na' Wenná Bea szrentę nigá?

Naque' Xránadxu, Benne' dxenná bė'ene' xúgutę da zaj zua.

Le' naque' Wenná Bea szrentę na'.

## 25

<sup>1</sup> Xran, dxennía' Lue' dutę lázrdawa'.

<sup>2</sup> Dxuxrén lazra' Lue', Dios chia'.

Quebe gu'u lataj xedué'eda'.

Quebe gu'u lataj benne' dxeledábage' neda' xuluzétaje' neda'.

<sup>3</sup> Da líqueze, benne' ca' dxelebeza lazre' Lue'

quebe xelexeque zréajene'.

Xeledué'e benne' ca' dxeledábage' xrtizru'.

<sup>4</sup> Xran, ble'e neda' da dxaca lazru' guna'.

Ble'e neda' da dxezaca ba lazru' guna'.

<sup>5</sup> Bsede neda' guna' ca naca da li chiu'

lawe' da nacu' Dios dxuseláu' neda'.

Tu dxebeza lázrezqueza' Lue'.

<sup>6</sup> Bsa lazre', Xran, gacu' zri'i lazre',

ne xexache lazru' chia' cáteze da dxúntequezu'.

<sup>7</sup> Quebe chajsá lazru' dul-la da bėna' gate ne naca'

benne' cuide', ne ca gudábaga' xrtizru'.

Nen dutę xel-la' dxexache lazre' chiu', bsa lazre' neda',

ne nen dutę xel-la' zri'i lazre' chiu', Xran.

<sup>8</sup> Xrlátaje, ne li lazre' naca Xránadxu Dios.

Cheę le' na' gusédene' benne' dul-la ca' da dxal-la' xelunę'.

<sup>9</sup> Gulé'eng' benne' dxexruj lazre' ca' da xrlátaje da xelunę',

ne gusédene' benne' zren lazre' ca' da xelunę'.

<sup>10</sup> Lu xel-la' dxexache lazre',

ne lu da li dxeché Xránadxu benne' ca' dxelunę'

ca naca xel-la' wezría cheę', ne ca da dxusede Le'.

<sup>11</sup> Lawe' da dxunu' ca da ba gunnú', Xran,

gunite lau' ca naca dul-la nuna', da naca na zren.

<sup>12</sup> ¿Nu benne' dxezrebe' Xránadxu Dios?

Le' gusédene' benne' nigá da dxal-la' gunę'.

<sup>13</sup> Gaca cheę' tu da ba neza zrentę,

na' zri'ine zre suę' gaca cheębe' xęzr la xu.

<sup>14</sup> Xránadxu Dios naque' tuze nen benne' ca' dxelezrebe' Le',

na' gunę' xelúnbe'ę xel-la' wezría cheę'.

<sup>15</sup> Tu dxennázqueza' Xránadxu Dios

lawe' da guselé' neda' lu na' benne' ca' dxelaca lazre' xelexe' neda'.

<sup>16</sup> Gunná' neda', ne bexache lazre' neda'

lawe' da zua' tuza', ne dxezaca zi'a.

<sup>17</sup> Naxánle'ę da stebe da zaj zua lázrdawa'.

Bselá neda' lu da stēbe zua'.

<sup>18</sup> Gunná' ca dzezaca zi'a, ne ca dxunlē'a zrin,  
na' bnite lau xúgute dul-la da nabaga'.

<sup>19</sup> Gunná' benne' ca' dxeledábage' neda' ca naxánlē'ene',  
ne ca dxelecuídele'ene' neda'.

<sup>20</sup> Bxue bēnne' du xu'a, ne bselá neda'.

Quebe gu'u lataj xedué'eda' lawe' da dxuxrén lazra' Lue'.

<sup>21</sup> Zaj nuxru da xrlátaje, ne xel-la' li lazre' neda'  
lawe' da dxebeza lazra' Lue'.

<sup>22</sup> Dios, bselá benne' Israel ca'  
lu xúgute da dxelezaca zi'e.

## 26

<sup>1</sup> Bchi'a chia, Xran, lawe' da nuna' da xrlátaje.

Bxren lazra' Lue', Xrana' Dios, ne quebe ben chupa lazra'.

<sup>2</sup> Gunná' xanne' lázrdawa', Xran, ne bxue ca da nuna'.

Gunná' xanne' da xu'u lu xichaj lázrdawa'

<sup>3</sup> lawe' da dxeque be'eda' dxexache lazru' neda',  
ne dxuna' ca naca da li chiu'.

<sup>4</sup> Quebe ne guna' tu zren benne' ca' dxelunē' da xrlátaje cúzreze,  
ne quebe ne guna' tuze benne' ca' dxululé'e cuine' xrlátaje.

<sup>5</sup> Dxequídeda' da dxelún benne' ca' dxelunē' da calēla  
naga dxelezrague',

ne quebe ne chu'a tu zren benne' ca' dxuluzúē' Dios chalá'ala.

<sup>6</sup> Dxelé'enu' quebe bi zria nabaga',

na' waca biga' lu cugu chiu', Xran,

<sup>7</sup> cheē cuezre xa'a, xapa' Lue': "Xcalenu",

ne cheē guzenda' bēnneache ca naca da zren ca' da nunu'.

<sup>8</sup> Xran, nazrí'ida' lizru' naga zu',

ne lataj lá'azxa naga zua da xabáa chiu'.

<sup>9</sup> Quebe guzría xi'u neda' tu zren nen benne' dul-la ca',

ne quebe gutiu' neda' tu zren nen benne' ca' dxelútiē' benneáche,

<sup>10</sup> benne' ca' dxelunē' da calēla,

ne tu dxulunézrujzqueze' dumí cheē xelelé' lu da zaj nune'.

<sup>11</sup> Neda' tu gúnzqueza' da naca li lazre'.

Bselá neda', ne bexache lazre' neda'.

<sup>12</sup> Tu núnzqueza' da xrlátaje, na' güe lá'anaqueza'

Xránadxu Dios

lau benne' ca' zaj nazrague' cheē'.

## 27

<sup>1</sup> Xránadxu Dios naque' xel-la' naxani' chia',

ne Benne' dxuselē' neda'.

¿Nu benne' gaca guchebe' neda'?

Xránadxu Dios naque' Benne' dxucu'uje' neda'.

¿Nu benne' gaca guzúē' neda' lu da stēbele'ē'?

<sup>2</sup> Gate guléchaj benne' ca' dxelunē' da calēla chia',

nen benne' ca' dxulusaca zi'e neda',

ne benne' ca' dxeledábage' neda' cheē xuluzría xi'e neda',

na' gulechégtūē', ne xeailecháziē'.

<sup>3</sup> Láqueze xeléchaj tu cue' benne' dxjaque' wedil-la neda',

benne' ca' dxeledábage' neda', quebe zrēbequeza'.

Láqueze xuluzúē' neda' lu wedil-la, neda' guxrén lázrequeza' Dios.

<sup>4</sup> Tu da gunábeda' Xránadxu Dios.

Da nigáze sa lazra', da naca na cheē sua' lizre Xránadxu

xúgute zra gaca bana',

cheē gulaba lazra' ca naca da xrtante cheē Xránadxu,

ne cheē guchálajlena' Le' lu xudau' lá'azxa cheē'.

<sup>5</sup> Le' gucache chawe' neda' lu lataj lá'azxa cheē'

lu zra dxaca da calēla.

Gucache chawe' neda' lu lataj cheéqueze' naga zúaqueze'.

Guzúē' neda' tu naga se cháweda'.

<sup>6</sup> Nadxa gunę' guzétaja' benne' dxeledábage' neda',  
ne zaj naxéchaje' neda',  
na' nen dutę xel-la' dxebé gutia' béadu ca' guzúa'-ba'  
lu cugu cheę'.

Gúl-laqueza', ne tu güe lá' anazqueza' Xránadxu.

<sup>7</sup> Xran, ben chí'a gate ne dxuláwizra' Lue'.

Bexache lazre' neda', ne bechebe chia'.

<sup>8</sup> Lu xichaj lázrdawa' benda' chí'u, gunnú'u: "Bexilaj chia'."  
Xexíłaja' chiu', Xran.

<sup>9</sup> Quebe gucache lau' chia' neda'.

Lu xel-la' dxezrá'a chiu' quebe xebigu' naga zua' neda',  
wen zrin chiu'.

Nacu' Benne' dxácalęę' neda'.

Quebe gusanu' neda', ne quebe cueaj xichju' neda',  
Dios, weselá chia'.

<sup>10</sup> Lácala xulusán xra xrna'a neda',  
tu xecá'azqueze Xránadxu Dios neda'.

<sup>11</sup> Bseđe neda' da dxaca lazru' guna', Xran,  
ne ble'e neda' da li lazre' da dxal-la' guna',  
lawe' da zaj naxán benne' dxeledábage' neda'.

<sup>12</sup> Quebe gu'u lataj benne' dxeledábage' neda'  
xelunę' chia' da dxelaca lazre'.

lawe' da zaj naxechaj benne' wen lazre' neda'  
nen benne' dxelaca lazre' xulusaca zi'e neda'.

<sup>13</sup> Xránadxu Dios guchebe lazre' le'eda' da xrlátaje cheę'  
naga gaca bana'.

La quebe guxéajle'a da nigá, na' gute ni'a na'a.

<sup>14</sup> Le cueza xelá' Xránadxu.

Le gutipa lázrele, na' Le' guzę' chúchue' le'e.

Awe', le cueza xelá' Xránadxu.

## 28

<sup>1</sup> Xran, dxuláwizra' Lue'.

Nacu' Benne' dxucú'uju' neda'.

Bze naga chí'a lawe' da che quebe xennu' neda'  
gaca' ca tu benne' dxu'e lataj ba xa'.

<sup>2</sup> Ben chí'a dxuláwizra' Lue',  
ne dxechisa na'a lau' naga zu' lataj lá'azxa chiu'.

<sup>3</sup> Quebe guzrí'a xi'u neda' tu zren nen benne' wen da caleła ca',  
ne cá'anqueze nen benne' ca' dxelunę' da zrinnaj,  
benne' ca' dxelennę' dizra' cháwedau' lau le sa' ljwezre',  
san xu'u lázrdawe' da caleła gunę' cheę'.

<sup>4</sup> Bde benne' ca' lu da ba xa' cáteze naca cheę' da belunę',  
cáteze naca da caleła da zaj nune'.

Bunezruij cheę' benne' ca' cáteze da belunę', da na' dxal-la' xezezí'e.

<sup>5</sup> Lawe' da quebe gulape' ba lá'ana da ben Xránadxu,  
ne quegá da bene' lu ni'a ná'queze',  
guxrínnaje' benne' ca', ne gudę'e le' lu da ba xa'.

<sup>6</sup> Ĵgaca ba Xránadxu Dios, Bénnea' benne' chí'a  
gate bláwizra' Le'!

<sup>7</sup> Xránadxu naque' Bénnea' dxuzę' chúchue' neda',  
ne dxucu'uje' neda'.

Bxren lazra' Le', na' gúcalęę' neda',  
na' cheę' le' na' gubéle'eda', na' gul-laqueza',  
ne güe lá'anaqueza' Le'.

<sup>8</sup> Xránadxu naque' Bénnea' dxuzę' chúchue' benne' cheę' ca',  
ne naque' Benne' dxucu'uje', ne dxuselę' bénnea' guquę'e.

<sup>9</sup> Bselá benne' chiu' ca', ne ben gaca chawe' cheę' da naca cheę'.  
Bxue benne' ca', ne bęxru le' chadí'a chacanna.

## 29

<sup>1</sup> Le güe lá'ana Xránadxu, le'e, zrale xabáa.

Le güe lá'ana xel-la' szren cheę', ne xel-la' waca cheę'.

<sup>2</sup> ¡Da xabáa naca La Xránadxu!

¡Le güe lá'ana na!

Le guzú zríbele lau Xránadxu lá'azxa gate xel'é'e.

<sup>3</sup> Chi'i Xránadxu dxen na lawe' nísadau'.

Dxen chi'i Dios xabáa ca guziu' da dxenné na.

Dxedá chi'e lawe' nísadau'.

<sup>4</sup> Dxen chi'i Xránadxu ca naca xel-la' wal-la cheę na.

Dxen chi'i Xránadxu dutę xel-la' szren cheę na.

<sup>5</sup> Chi'i Xránadxu dxichaj na xaga cedro ca'.

Dxichaj na xaga cedro ca' zaj zę na xi'a Líbano.

<sup>6</sup> Dxuxrite na xi'a Líbano ca' ca dxelexrite bęzredu ca',  
na' dxuxrite xi'a Hermón ca tu bęzredau'.

<sup>7</sup> Chi'i Xránadxu dxun na chaze xesa.

<sup>8</sup> Chi'i Xránadxu dxuxrize na le'e xixre' lawe' lataj.

Dxuxrize na le'e xixre' cheę xęzr la xu Cades.

<sup>9</sup> Chi'i Xránadxu dxuxrize na xaga wal-la ca'.

Dxuchibe na xrlegue xaga ca',

na' lu xudau' cheę dxelenná xúgutę bénneache:

“¡Gaca ba Dios!”

<sup>10</sup> Dxenná be'e Xránadxu nísadau' ca'.

Chadía chacanna dxenná be'e ca Wenná Bea.

<sup>11</sup> Xránadxu Dios dxuzé chachę' benne' cheę' ca'.

Dxuzé le' lu da ba neza cheę xel-la' dxebeza zri lazre'.

### 30

<sup>1</sup> Gucá'ana szrena' Lue', Xran, lawe' da bechisu' neda',  
ne quebe bnézruju' lataj benne' ca' dxeledábague' neda'  
xelún le' chia'.

<sup>2</sup> Xrana' Dios, bláwizra' Lue', na' bexunu' neda'.

<sup>3</sup> Xran, bseláu' neda' lu lataj ba xa'.

Bexunu' neda' cheę quebe chu'a xędxu ba.

<sup>4</sup> Le gul-la cheę Xránadxu, le'e nácale benne' cheéqueze'.

Le xę Le'e: “Xcalenu”, ne dxajsá lázrele naque' lá'azxa,

<sup>5</sup> lawe' da tu chí'idauze dxezré'e

san chadía chacanna zua xel-la' zri'i lazre' cheę'.

Wabęzredxu tu zreze, san che zílala wabéle'ędxu.

<sup>6</sup> Gate guzúa chawa' gunnía': Quebe nu seque' gutá neda',

<sup>7</sup> lawe' da bęę chuchu' neda', Xran, ca tu xi'a zren,

ne blé'enu' neda' cháweda'.

Gate bcache lau', na' guzúa' stębe.

<sup>8</sup> Xran, guláwizra' Lue', ne gata' xueda' Lue'.

<sup>9</sup> ¿Bizra da ba neza gaca na chiu' che gatia',

ne chu'a xędxu ba?

¿Güe lá'ana' Lue' gate ba naca' xu xrte?

¿Waca nu guzenda' da li chiu'?

<sup>10</sup> Bęę naga neda', Xran, ne bexache lazre' neda'.

Xran, gúcale neda'.

<sup>11</sup> Bęnu' bexaca xel-la' dxebezre chia' xel-la' wexá'a.

Bcuasu' xel-la' dxewí'ine lazre' chia', ne bzu' chia' xel-la' dxebé.

<sup>12</sup> Cheę le' na' tu gúl-lazqueza' chiu', lawe' da nacu'

da ba neza chia', ne quebe sua zríqueza'.

Xrana' Dios, tu güe lá'anazqueza' Lue' chadía chacanna.

### 31

<sup>1</sup> Dxuxrén lazra' Lue', Xrana' Dios.

Quebe gu'u lataj xedué'eda'.

Lu da xrlátaje chiu' bselá neda'.

<sup>2</sup> Bęę naga chi'a, ne bselá neda'.

Bęę chuchu neda', ne bucu'uj neda' cheę la'.

<sup>3</sup> Nacu' Benne' dxuzé chuchu' neda', ne dxucú'uju' neda'.  
lawe' da nacu' li lazre' gulé'enu' neda' neza,  
ne gusi'u neda' neza na'.

<sup>4</sup> Bebéaj neda' lu xralaj da ba zaj nucueze', chee xelexe-le' neda'.  
Lue' nacu' Benne' dxuxúe' neda'.

<sup>5</sup> Lu na'u dxuzúa' bénne'du xu'a, Xran.  
Lue' bexá'awenu' neda', Dios li lazre'.

<sup>6</sup> Dxecuúeda' benne' ca' dxelebeza lazre' dios ca'  
quebe bi zaj zaca.

Neda' dxebeza lazra' Xrana' Dios.

<sup>7</sup> Béle'eda', ne sua' lu da ba neza lawe' da dxexache lazru' neda'.  
Caní dxunu' lawe' da dxelé'equeznu' ca da dzezaca zi'a.

Nézenu' ca dxedéa' lu da ba xa'.

<sup>8</sup> Quebe bdeu' neda' lu na' benne' ca' dxeledábague' neda'.  
Bze chuchu' neda' tu lataj chawe'.

<sup>9</sup> Bexache lazre' neda', Xrana' Dios, lawe' da zua' lu da ba xa'.  
Ba bebizre nisa xuzru xiaj lawa' lawe' da dxewí'ine lazra'

duṭé bénne'du xu'a, ne duṭé bēla' dxen chia'

<sup>10</sup> lawe' da dxedé xel-la' nabán chia' lu da ba xa',  
ne dxedéa' iza chia' ca' dxebezre lazra'.

Dxedú lazra' lawe' da nabaga' zria, na' dxelelá zrita xu'a.

<sup>11</sup> Xúgute benne' ca' dxeledábague' neda' dxelecuídenē' neda',  
na' benne' walír chia' dxuluzúe' neda' chelá'ala,

na' benne' zaj núnbe'e neda' dxelecuase' neda'.

Benne' ca' dxelelé'eng' neda' la neza dxuluzrúnnuje' naga zua'.

<sup>12</sup> Benne' caní ba gulal-la lazre' neda' ca dxelal-la lazre'  
tu benne' gate.

Naca' neda' ca tu xé'ena xu da nalá'a.

<sup>13</sup> Dxenda' dizra' schanni' da dxelelná benne' zante' chia',  
na' gáteteze zua da dxuchebe na neda'.

Dxácatē na' dxelunē' tuze dizra' bi xelunē' chia',  
ne zaj nunē' xelútiē' neda'.

<sup>14</sup> Neda' dxuxrén lazra' Lue', Xran.

Dxennía' nacu' Lue' Dios chia'.

<sup>15</sup> Lu na'u Lue' zaj xu'u zra chia' ca'.

Bselá neda' lu na' benne' ca' dxeledábague' neda',  
ne lu na' benne' ca' zaj nau zi' xuzre' neda'.

<sup>16</sup> Lu xel-la' szren chiu' bxue neda', wēn zrin chiu'.

Lu xel-la' dxexache lazre' chiu' bselá neda'.

<sup>17</sup> Quebe gu'u lataj xedué'eda', Xran, lawe' da dxuláwizra' Lue'.

Bēn xelexedué'e benne' ca' dxelebéaj xíchajē' Lue'.

Bēn xelezúa zriē' lu lataj ba xa'.

<sup>18</sup> Bēn quebe gaca xelennē' benne' ca' dxelezí xē'e,  
benne' ca' dxelelnē' da calela chee benne' xrlátaje ca',

da dxelelnē' lu xel-la' dxulucá'ana szren cuina,

ne lu xel-la' dxulucá'ana ditaj benne' caní.

<sup>19</sup> Da zrente naca xel-la' zri'i lazre' chiu' da napu'  
chee bi gunu' chee benne' ca' dxelape' Lue' ba lá'ana,

da na' dxunu' lau xúgute bēnneache

nē chee benne' ca' dxelebeza lazre' Lue'.

<sup>20</sup> Lu da bagácheze naga zu' Lue' dxucachu' benne' ca'  
chee quebe bi xelún bēnneache chee'.

Dxuzú' benne' ca' tu lu xu'u nagache

chee quebe bi gun chee' xel-la' wetil-la dizra' chee bēnneache.

<sup>21</sup> ¡Gaca ba Xránadxu Dios!

Lu xel-la' dxexache lazre' chee' bēne' da zrente  
chee gúcalēne' neda' tu lu xezre naga guca wedil-la.

<sup>22</sup> Gate na' guzúa da dxuchebe neda' gunnía':

Zua' naga québedxa le'e Xrana' neda'.

Lue' bennu' chí'a da guta' xueda' Lue' gate na' bláwizra' Lue'.

<sup>23</sup> ¡Le zri'i Xránadxu, xúgutele le'e nácale benne' chee Léqueze'!

Xránadxu dxuxúe' benne' ca' quebe dxulusane' Le',  
 na' dxuxunézrujle'e chee benne' ca' dxulucá'ana szrene' Le'.  
 24 Le gutipa lázrele, xúgutele le'e dxebeza lázrele Xránadxu Dios,  
 na' Le' guze chúchue' le'e.

## 32

1 ȷBa neza zrente naca na chee bénnea'  
 Dios ba bnite lawe' dul-la da gubáue',  
 ne ba gudúe' zria da guzúa chee'  
 2 ȷBa neza zrente naca na chee bénnea'  
 Dios quebe dxusebague' le' zria,  
 bénnea' quebe dxezi xe'e!  
 3 Gate quebe guxrúalepa' dul-la gubaga',  
 bedú lazra' lawe' da gudxezra' bedú zra.  
 4 Te zra ne chizrela bdeu' neda' xel-la' zi', Xran.  
 Bedú lazra' ca dxebizre beaj nisa beu' la.  
 5 Nadxa guxrúalepa' dul-la gubaga',  
 ne quebe bcacha' zria da guzúa chia'.  
 Bechugu lazra' guxrúalepa' na lau Lue', Xran,  
 na' Lue' bnite lau' chee dul-la gubaga'.  
 6 Xúgute bénneache chiú' dxal-la' xuluchálajlene' Lue'  
 gate de lataj xelexezrelne' Lue', na' gate zrin da zi' da xa'  
 da xelesaue',  
 da gaca na ca tu xegu nisa zren da dxedxuaj na,  
 na' quebe bi gune na benne' ca'.  
 7 Lue' nacu' ca tu lataj naga gaca gucache cuina',  
 na' gucache chawu' neda' chee quebe bi da saca'.  
 Tu gul-lazqueza' zizraj ca bseláu' neda' lawe' da dxuxú' neda'.

8 Dxenná Xránadxu: "Gulé'eda' lue' neza naga dxal-la' tau'.  
 Gusédeda' lue', ne guzéajni'ida' lue' ca dxal-la' gunu'.  
 9 Quebe gacu' ca tu bzrina' u tu bea, be quebe bi dxeléajni'iba',  
 bea ca' dxun na ba xen nna be'enu'-ba', na' cu'u xia dxú'aba',  
 chee gunu' xelunba' ca dxaca lazru'."  
 10 Benne' wen da calęla ca' dxun na ba xen  
 xeledęe' lu da zi' da xa'.  
 Benne' ca' dxuluxrén lazre' Xránadxu,  
 tu dxuxúezqueze' le' nen dutę xel-la' zri'i lazre' chee'.  
 11 Le'e, benne' xrlátaje, le be, ne le sua lu da ba neza,  
 ne chee da ben Xránadxu, gúcalene' le'e.  
 Nen dutę xel-la' dxebe le gul-la, le'e, nácale li lazre' lau Le'.

## 33

1 Le be le'e, benne' xrlátaje, lau Xránadxu Dios.  
 Xrtante naca lau Dios da dxelúe lá'ana benne' xrlátaje ca' Le'.  
 2 Le gucá'ana szren Dios nen da zriadi'i na du da dxinnele.  
 Le gúl-laqueze chee' nen da dxúl-lalęnle,  
 ne nen tu da nua na chi du.  
 3 Le gul-la chee Le' tu da cube.  
 Le gul-la cháwedau', quinnele dutę xel-la' dxebe.  
 4 Li lazre' naca xrtizra' Xránadxu Dios,  
 na' nung' dutę lu xel-la' li lazre' chee'.  
 5 Le' nazrí'ing' da naca xrlátaje, ne da naca du lazre'.  
 Zaj núnbea bénneache xel-la' dxexache lazre' chee Xránadxu  
 du gabí'i xęzr la xu.  
 6 Ne chee xrtizra' Xránadxu Dios, beņe' xabáa,  
 na' xúgute belaj da zaj nalá' zran xabáa beņe'  
 nen be' dxedxuaj dxu'e.  
 7 Le' dxuxutube' nísadau', ne dxexune' na ca tu xi'a nisa.  
 Dxeğá'a chawe' nisa lu da situj ca' naga nucueze' chee na.  
 8 Le zrebe Xránadxu Dios, xúgutele zrale xęzr la xu nigá.  
 Le zrebe lau Le', xúgutele le'e zrale lu xęzr la xu

9 lawe' da gunneze', na' guca xezr la xu.  
 Gunná be'ene' na, na' zúaqueze na.  
 10 Xránadxu Díos dxunge' dxexaca dácheze dizra' zaj nun  
 bénneache xezr la xu ca',  
 ne dxunge' dxelaca níteze da ca' zaj nune' xelune'.  
 11 Dizra' ba nun Xránadxu Díos tu súazqueze  
 na chadía chacanna.  
 Da dxegú'u be'e lu lázrdawe' tu wadíazqueze na  
 lau xúgute bénneache.  
 12 Ba neza zrente naca na chee benne' xezr la xu ca'  
 Xránadxu naque' Díos chee le',  
 benne' xezr la xu ca' gucá'a Díos chee xelaque' benne' chee'.  
 13 Naga zue' xabáa chee' dxenná' Xránadxu Díos,  
 na' dxelé'ene' xúgute cuen bénneache.  
 14 Naga zue' lataj lá'azxa chee' dxenné'e,  
 na' dxelé'ene' ca' zaj zra' bénneache lu xezr la xu.  
 15 Le' bene' xichaj lázxdau xúgute benne' ca',  
 na' dxenné'e xúgute da dxelune'.  
 16 Quebe la benne' wenná bea ne chee benne'  
 dxjaque' wedil-la zante chee',  
 ne quebe la benne' wal-la ne chee xel-la' wal-la da nape'.  
 17 Quebe nu benne' le' ne chee bzrina',  
 ne quebe nu la ne chee xel-la' wal-la zren chee'.  
 18 Le na' xque, dxuxúe Xránadxu Díos benne' ca' dxelezrebe' Le'.  
 Dxuxúe' benne' ca' dxelebeza lazre' Le' xexache lazre' le'  
 19 chee guselé' le' lu xel-la' gute,  
 ne chee gugawe' le' gate dxaca gubina'.  
 20 Dxebeza lázredxu Xránadxu Díos.  
 Le' naque' Bénéa' dxácalene' dxi'u, ne dxucu'uje' dxi'u.  
 21 Chee le' na' du lázredxu béle'equezdxu lau Le',  
 lawe' da tu dxuxrén lázrequezdxu La lá'azxa chee'.  
 22 Bexache lazre' netu', Xránantu',  
 lawe' da dxebeza lázrentu' Lue'.

### 34

1 Tu güe lá'anazqueza' Xránadxu Díos te zra chizrela.  
 Tu gúl-lazqueza' da güe lá'ana na Le'.  
 2 Xezaca ba lázreleña' Xránadxu Díos.  
 Xelén benne' dxexruj lazre' da caní, na' welebéle'ene'.  
 3 Le gucá'ana szren Xránadxu Díos tu zren nen neda',  
 na' tu zren gucá'ana szrendxu La lá'azxa chie'.  
 4 Bláwizra' Xránadxu Díos, na' Le' benne' chia',  
 ne bselé' neda' lu xúgute da buluchebe na neda'.  
 5 Benne' ca' gulebeza lazre' Le' belelé'ene' da xabáa chee',  
 ne quebe belexedué'ene'.  
 6 Neda', benne' xache', bláwizra',  
 na' ben Xránadxu Díos chia',  
 ne bselé' neda' lu xúgute da dxezaca zi'a.  
 7 Gubáz chee Xránadxu zue' cuita benne' ca' dxelezrebe' Le',  
 na' dxucu'uje' benne' ca'.  
 8 Le guxúe xque, na' lé'ele naca xrlátaje Xránadxu Díos.  
 Ba neza zrente naca na chee bénnea' dxuxrén lazre' Le'.  
 9 Le zrebe Xránadxu Díos, le'e, nácale benne' chee Léqueze',  
 lawe' da quee bi dxelexazrje benne' ca' dxelezrebe' Le'.  
 10 Bezre xíxre' du ca' dxelexázrjeba', ne dxeledunba'.  
 Benne' ca' dxelebeza lazre' Xránadxu Díos  
 quebe bi da chawe' xelaxázrjene'.  
 11 Le da, bidau', ne le xen chia'.  
 Gusédeda' le'e chee zrébele Xránadxu Díos.  
 12 Nu benne' ládujla le'e dxaca lazre' xegá'ane'  
 lu xel-la' nabán,  
 bénnea' dxaca lazre' sué' zane' iza chee lé'ene' da chawe'?



13 Bxue xanne' ca dxuchálaju' chee quebe nneu' da calëla,  
ne chee quebe guchálaju' da wen lazre'.

14 Bsan da calëla da dxunu', na' ben da xrlátaje.  
Ben ba xuzre gapu' xel-la' dxebeza zri lazre',  
ne ben ca naca chee na.

15 Dxuxúe Xránadxu Dios benne' ca' zaj naque' xrlátaje,  
ne dxuzé nague' da dxululáwizre' Lë'.

16 Dxezrá'a Xránadxu Dios benne' ca' dxelune' da calëla,  
chee quebe sua nu benne' chajsá lazre'  
benne' wen da calëla ca'.

17 Benne' xrlátaje ca' dxululáwizre' Xránadxu Dios,  
na' Lë' dxenne' chee',  
ne dxuselé' benne' ca' lu xúgutë da dxelezaca zi'e.

18 Gágutë zua Xránadxu Dios naga zaj zra' benne' ca'  
dxelexewi'ine lazre',  
ne dxuselé' benne' ca' dxelexewi'ine lazre'.

19 Da zantë da dxezaca zi' benne' xrlátaje.  
Dxuselá Xránadxu Dios bénnea' lu xúgutë da ca'.

20 Lë' dxuxúequeze' xúgutë zrita xu'e,  
na' netú zrita chee' quebe gachaj na.

21 Dul-la da dxun benne' wen da calëla gute na lë',  
na' xelebía xi' benne' ca' dxelecuídenë' benne' xrlátaje.

22 Xránadxu Dios dxexá'awë' bénnea' du xu'u  
benne' wen zrin chee' ca',  
na' xúgutë benne' ca' dxuluxrén lazre' Lë'  
québequeze xelebía xi'e.

## 35

1 Xran, bsizre benne' ca' dxeleonné' chia'.  
Gudíl-lalë benne' ca' dxeledíl-lalëne' neda'.

2 Gudá gucu'uju' neda' lu wedíl-la,  
ne gücalë neda'.

3 Gudël-la xia chee' wedíl-la chee' guzagu' benne' ca'  
dxululague' neda'.

Guzre neda' nacu' Benne' dxuselé' neda'.

4 Ben xelexedué'e, ne xeleque zrëaje benne' ca'  
dxelaca lazre' xelútië' neda'.

Ben xuluzrunnuj, ne xelexedué'e benne' ca' dxelaca lazre'  
xelune' chia' da calëla.

5 Ben xelaque' ca' tu xizre bebe da dxua be',  
ne gusel-la gubáz chee' xabáa chiu' chee' gulague' benne' ca'.

6 Ben chul-la neza naga xeledé'e, na' gaca na naga xelebilë',  
ne gusel-la gubáz chee' xabáa chiu' chee' gulague' benne' ca'.

7 Bulucachë' tu xralaj chee' quëla na neda',  
ne quegá bi nuna' chee'.

Gulëne' tu xëdxu naga cheajcházia' neda',  
ne quegá bi dë da dxagu na zria chia'.

8 Gusel-la da guzria xi na benne' ca', ne quebe xeleque be'ene'.  
Ben quëla xralaj chee' na' léqueze',

ne cheajlecházie' naga xelebía xi'e.

9 Nadxa béle'ëquezda' ca naca da nun Xránadxu Dios.  
Sua' lu da ba neza lawe' da bselé' neda'.

10 Xúgutë zrita xu'a xeleenná na: Xran, ¿núzraqueze naca  
ca nacu' Lue'?

Dxuseláu' benne' xache' lu na' benne' wál-ladxa ca lë',  
ne benne' dxexazrje lu na' benne' dxebane' da du dë chee'.

11 Belasa benne' dxelexechëbe' da wen lazre'.

Gulawë' zria neda' chee' tu da quebe dxaca be'eda'.

12 Belexebi'ë neda' da calëla chee' tu da xrlátaje da bëna,  
chee' xuluzúë' neda' lu da ba xa'.

13 Neda', gate quebe chawe' gulezúë', bewi'ine lazra'.  
Bëna' gubasa da bsaca zi na neda',

ne du lazra' bláwizra' Dios chee xexunę' benne' ca'.

<sup>14</sup> Bewi'ine lazra' chee benne' ca' ca dxuna' chee  
le sa' ljwezra', u chee bi bíchequeza'.

Guzúa' lu da baxache' ca dxun benne' chee xrne'ę gate dxatie'.

<sup>15</sup> Gulebé benne' ca' gate zua' lu da ba xa', ne belezrague'.

Belezraga benne' dxeledábage' neda',  
benne' węn da caleła, na' chadite gulel-le' neda'.

Tu belúezqueze' neda', ne quebe gulezúa zrie'.

<sup>16</sup> Bulusaca zi'ę neda', ne belún le' chia',  
ne gulagu lazxe' lu xel-la' dxelezá'a chee' neda'.

<sup>17</sup> Xran, ¿ájate scha' gu'u latja da dxelunę'?

Bselá neda' lu na' benne' caní dxuluzría xi'ę neda',  
benne' zaj naque' ca bezre xixre' ca'.

<sup>18</sup> Xapa' Lue': Xcalenu', lávela benne' zan ca' zaj  
nadupe' chiu' Lue'.

Tu güe lá'anazqueza' Lue' ládujla benne' zan ca'.

<sup>19</sup> Quebe gu'u lataj xelebé benne' ca' dxeledábage' neda',  
ne quebe bi nuna' chee'.

Quebe gu'u lataj xelún la benne' ca' chia',  
benne' dxelecuídenę' neda',

ne quebe bi de da dxagu na zria chia'.

<sup>20</sup> Benne' caní quebe dxelaca lazre' xelzúe' lu  
xel-la' dxebeza zri lazre',

na' lu xel-la' dxelezí xe chee' dxelennę' chee' benne' ca'  
dxelebeza zri lazre' lu xezr la xu nigá.

<sup>21</sup> Belún le' chia'.

Gulennę': "¡E! ¡E! ¡Ba blé'entu' da nune'!"

<sup>22</sup> ¡Xran, ba blé'equenzu' da dxelunę'!

¡Quebe sua zriu'!

¡Xran, quebe gusanu' neda'!

<sup>23</sup> ¡Guxasa, guzúa guchi' u chia'!

¡Gudá, Xrana' Dios, chee gácalenu' neda'!

<sup>24</sup> ¡Bchi'a chia' lu da xrlátaje chiu', Xrana' Dios!

¡Quebe gu'u benne' ca' lataj xuluzrizre' chia'!

<sup>25</sup> ¡Quebe gu'u lataj xelennę': "Ba guca da dxezá lázredxu!"

¡Quebe xelennę': "Ba bendxu chie'!"

<sup>26</sup> Ben xelxedué'e, ne xeleque zręaje xúgute benne' ca'  
dxelebenę' gate bi dxaca chia'.

Bsi'ę xel-la' stu', ne ben xelaca xala benne' ca'  
dxeledábage' neda'.

<sup>27</sup> Ben xelúl-la, ne xelebé benne' ca' zaj de'ę neda',  
chee xelennáqueze': "Tu xegá'ana szrénzqueze Xránadxu,

Bénnea' dxezá lazre' sua lu xel-la' dxebeza zri lazre'  
benne' węn zrin chee'!"

<sup>28</sup> Tu guchálajzqueza' chee da xrlátaje chiu',  
ne chee da dxue lá'anaqueze na Lue' te zra chizrela.

## 36

<sup>1</sup> Da zrinnaj da dxun benne' dxuzúa chalá'ala Dios  
dxuchálajle na le' lu xichaj lázrdawe'.

Quebe dxezá lázrequeze' gapę' Dios ba lá'ana.

<sup>2</sup> Chee le na' dxulé'e cuinę' ca tu benne' zrente'.

Dxéquenę' quebe dxelé'e Dios da zrinnaj da dxunę',  
ne quebe dxecuide Dios le'.

<sup>3</sup> Da tu dxuchálajzqueze' naca na da zrinnaj, ne da węn lazre'.

Québedxa dxéajni'ine', ne québedxa dxunę' da xrlátaje.

<sup>4</sup> Dxulaba lazre' ca naca da caleła gunę' gate de' naga dxate'.

Xu'ę neza da quebe naca neza chawe'.

Quebe dxecuídenę' da caleła.

<sup>5</sup> Xrana' Dios, zrente' naca xel-la' dxexache lazre' chiu'  
da dxezrintę na xabáa,

na' dxezrinte lu beuj xel-la' li lazre' chiu'.

<sup>6</sup> Da xrlátaje chiu' naca na ca tu xi'a zren chiu',  
na' ca dxuchi'u naca na ca tu nísadau' sítujte.

Xrana' Dios, tu dxuxúezquezu' bèneache, ne be xixre' ca'.

<sup>7</sup> Xrdante naca xel-la' dxexache lazre' chiu', Dios.

Cheq le na' dxuluxrén lazre' bèneache Lue' ca dxelún  
bedxuj dxé'enedu ca' dxelexezraba' zran xrila bedxuj.

<sup>8</sup> Welélaquezne' cheq da dele'q lizru',

na' Lue' gunézruju' xelé'aje' da naca na tu xegu da  
naca na da dxezaca ba lazru' Lue'.

<sup>9</sup> Naga zu' Lue' zua beaj naga dxalaj nisa da dxunna na  
xel-la' nabán.

Lu xel-la' naxaní' chiu' walé'entu' da naca lení'.

<sup>10</sup> Bexache lazre' benne' ca' zaj núnbe'q Lue',  
ne bzua cheq benne' li lazre' ca' da xrlátaje chiu'.

<sup>11</sup> Quebe gu' u' lataj tábaga benne' dxucá'ana szren cuina neda',  
ne quebe gutá benne' dxun da calela neda'.

<sup>12</sup> Xeajlechaze benne' ca' dxelune' da zrinnaj.

Lue' benu' xeajlechaze benne' ca', na' quebe gaca xelexase'.

### 37

<sup>1</sup> Quebe su' stébe ne cheq da dxelún benne' ca'  
dxelune' da calela,

ne quebe se lazru' da zaj nápalé'q benne' dxelune' da zrinnaj,

<sup>2</sup> lawe' da xeledé cheq benne' ca' ca dxaca cheq xixre' du ca',  
na' gaca cheq benne' ca' ca dxaca cheq xixre' da nadxugu,  
dxebizre na.

<sup>3</sup> Bxren lazre' Xránadxu Dios, ne ben da xrlátaje,

na' súaquezu' lu xezr la xu, ne sí'quezu' ba neza da li.

<sup>4</sup> Bezaca ba lazre' nen Xránadxu,

na' Le' gúnnaqueze' chiu' da dxezá lazru'.

<sup>5</sup> Bzua cuinu' lu na' Xránadxu,

ne bxren lazre' Le', na' Le' gune' ca da dxenabu'.

<sup>6</sup> Gulé'eng' da xrlátaje chiu' ca tu xel-la' naxaní',

ne da li lazre' chiu' ca lawe' zra.

<sup>7</sup> Guzúa zrize lau Xránadxu, ne guleza lazre' Le'.

Quebe su' stébe ne cheq benne' dxezi'q ba neza,  
bénnea' dxúnqueze' da calela.

<sup>8</sup> Bsan xel-la' xichaj zra'a, ne quebe cuídeni'.

Quebe sa lazru' bi xusacu' benne' ca' dxelune' da calela,

<sup>9</sup> lawe' da guzría xi' Dios benne' ca' dxelune' da calela.

Benne' ca' dxelebeza lazre' Xránadxu, gaca cheq xezr la xu.

<sup>10</sup> Chadite te cheq benne' ca' dxelune' da calela.

Le'enu' lizre lataj benne' ca', san québedxa zaj zre'q na'.

<sup>11</sup> Benne' dxexruj lazre' ca' gaca cheq xezr la xu,

na' xelexezaca ba lazre' lu xel-la' dxebeza zri lazre' zrente'.

<sup>12</sup> Benne' dxelún da calela dxelilaj lazre' bi xelune'  
cheq benne' xrlátaje,

ne lu xel-la' dxelezrá'a cheq xelagu lazxa benne' ca'.

<sup>13</sup> Xránadxu Dios guzrízqueze' cheq benne' ca' dxelune'  
da calela

lawe' da nézene' ba za zra cheajsé cheq benne' ca'.

<sup>14</sup> Benne' dxelune' da zrinnaj dxelebéaje' xia cheq',

ne dxuluzé' xaga nalá xéche'ze cheq',

cheq xuluzría xi'q benne' xache' ca', ne benne' dxelexazrje',

cheq xelútiq benne' ca' dxelune' da li lazre'.

<sup>15</sup> Xia nalá cheq benne' ca' chaze na lu lazrdáuqueze',

na' gáchajqueze xaga nalá xéche'ze cheq'.

<sup>16</sup> Cháwedxa naca da du da de cheq benne' xrlátaje

ca da gunn'a da zaj napa zánete' benne' dul-la ca',

<sup>17</sup> lawe' da welátequeze ni'a na' benne' dxelune' da zrinnaj.

Xránadxu ná'queze dxuxúe' benne' xrlátaje ca'.

- 18 Nunbea Xránadxu ca zaj naca zra xelezúa benne'  
du lazre' ca,  
na' da zaj napa benne' ca' xelezúa na chadía chacanna.
- 19 Quebe xelexedué'engé' gate quebe dxaca chawe' chee  
bénneache,  
na' lu zra chee gubina' gata' da xelawe'.
- 20 Xelebía xi' benne' dxeluné' da zrinnaj,  
na' benne' ca' dxeledábaga' Xránadxu,  
ca dxaca chee xiaj xixre' ca'.  
Xeledé chee', ne xelexenitigé' ca zren chee xi'.
- 21 Benne' ca' dxelún da caléla tu da dxelenabé' tu chí'idauze,  
ne quebe dxuluxunézruje' na,  
na' benne' xrlátaje dxexache lazre' lé', ne dxunézruje' chee'.
- 22 Benne' ca' dxelé'engé' Xránadxu lé' chawe', gaca chee  
benne' ca' xezr la xu,  
na' benne' ca' quebe dxelé'engé' chawe', xelebía xi'queze'.
- 23 Da dxelún benne' xrlátaje ca' zaj naca na da ble'e  
Xránadxu lé', na' dxelé'engé' cháwedau' ca da dxeluné'.
- 24 Gate dxeleajchaze benne' xrlátaje ca' quebe cheajlechaze'  
tu chí'ize lawe' da nuxru Xránadxu na' benne' ca'.
- 25 Benne' cuide' guca', ne na'a ba gúxrúa',  
ne cabata' ble'eda' tu benne' xrlátaje gusán Dios lé',  
na' quebe xeledá zri'ine zre sue' xelebéaje' guna'.
- 26 Benne' xrlátaje nigá tu dxexache lázrezqueze',  
ne dxunézruje' bi dxexazrje nu benne',  
na' zri'ine zre sue' zaj naque' da ba neza chee bénneache.
- 27 Québedxa gunu' da caléla, san ben da xrlátaje,  
na' gaca bánquezu' chadía chacanna,
- 28 lawe' da nazri'i' Xránadxu da naca li lazre',  
ne quebe dxusané' benne' zaj de'ge Le'.  
Chadía chacanna tu guxúezqueze' benne' ca',  
san guzría xi'e xrtia ljwezre benne' ca' dxeluné' da caléla.
- 29 Benne' xrlátaje ca' gaca chee' xezr la xu nigá,  
na' xelezrá'queze' chadía chacanna lu xezr la xu.
- 30 Benne' xrlátaje dxuchálajqueze' da naca sina,  
na' ca dxuchi'e naca na xrlátaje.
- 31 Da nadxixruj bea Dios tu xú'uzqueze na xichaj lázrdawe'.  
Chee lé' na' quebe cheajchaze bénnea'.
- 32 Benne' wen da zrinnaj dxenné'engé' benne' xrlátaje,  
ne dxuné' ba xuzre gutie' lé'.
- 33 Quebe gusán Xránadxu lé' lu na' benne' wen da caléla na',  
ne quebe guzría xi'e lé' gate dxuchi'e chee'.
- 34 Guleza lazre' Xránadxu, ne ben ca da ba gunné',  
na' Le' chísaqueze' Lue' chee gaca chiu' xezr la xu nigá.  
Gate xelebía xi' benne' dul-la ca', na' lé'enu' na.
- 35 Ble'eda' tu benne' wen da zrinnaj, nagá'ane' szrente,  
na' guxánlé' da de' chee' ca dxegula tu xaga zrente.
- 36 Na' gudé chee', na' québedxa zue' na'a.  
Bexilaja' lé', san quebe nu bezrelda'.
- 37 Blaba lazre' ca naca chee benne' li lazre',  
ne gunná' benne' xrlátaje  
lawe' da naga cheajsé gaca tu da ba neza chee benne'  
dxebeze' zri lazre'.
- 38 Benne' dxeluné' da caléla xelebía xi'queze'.  
Quebe nu cha' xrtia ljwezre benne' dxeluné' da zrinnaj.
- 39 Xránadxu Dios guseláqueze' benne' xrlátaje ca',  
na' Le' gutipe' lazre' benne' ca' lu zra chee da stebe.
- 40 Xránadxu Dios gácaléne' lé', ne guselé' lé'.  
Guselé' lé' lu na' benne' ca' dxeluné' da caléla,  
na' guné' gaca chawe' chee' lawe' da buluxrén lazre' Le'.

## 38

<sup>1</sup> Xrana' Dios, quebe til-lu' neda' lu xel-la' dxezrá'a chiu'.

Quebe gudéu' neda' da ba xa' lu xel-la' snia chiu',

<sup>2</sup> lawe' da belúe xaga nalá xéche'ze chiu' neda',  
na' be' na'u neda'.

<sup>3</sup> Quebe bi chawe' zua belá' dxen chia' lawe' da dxezra'u neda',  
ne quebe zaj zua zrita xu'a cháwedau' lawe' da nuna' dul-la.

<sup>4</sup> Ca naca da zrinnaj da nuna' ba zria cháqueze na xíchaja'.

Zaj naca na chia' ca tu xua' zí'ile'e.

<sup>5</sup> We' da zaj zria bel-la' dxen chia' ba dxelelá na,  
ne ba dxeluzru na,

da na' dxaca chia' lawe' da bena' da calela.

<sup>6</sup> Nucache lawa', ne dxexedué'ele'eda',

ne dxebezre xacha' te zra chizrela,

<sup>7</sup> lawe' da ca naca bel-la' dxen chia' dxelá na,

ne quebe bi chawe' zua belá' dxen chia'.

<sup>8</sup> Nate ni'a na'a, ne dxéqueda' ba naxúzrujne zrita xu'a.

Dxebezre lazra' lawe' da zua štebe lázrdawa'.

<sup>9</sup> Xran, ca naca da dxezá lazra' zaj zua na nen Lue',

na' da dxebezre lazra' dxelé'equenzu' Lue'.

<sup>10</sup> Dxatę lázrdawa', ne ba bedú lazra',

ne québedxa dxelé'eda' cháwedau'.

<sup>11</sup> Dxelexebiga ljwezra', ne le sa' ljwezra' ca' zítu'la

ne cheę xízrawę' chia',

na' benne' walízr chia' ba belexecuase' zítu'la.

<sup>12</sup> Benne' ca' dxelaca lazre' xelútie' neda' dxuluzale' xralaj,

na' benne' ca' dxelúe lazre' bi gaca chia' dxelenné' chia'

wabia xi'a, ne tu zaj zúaze' bi xulusaque' neda'.

<sup>13</sup> Neda' quebe dxenda' ca dxaca cheę tu benne' cuezru,

ne naca' ca tu benne' quebe dxaca nne',

benne' quebe dxexrá dxu'e.

<sup>14</sup> Naca' ca tu benne' quebe dxenne',

bénnea' quebe dxexechębe',

<sup>15</sup> lawe' da dxebeza lazra' Lue', Xrana' Dios.

Lue' xechębu' waláz chia', Xrana' Dios.

<sup>16</sup> Gunnia': Quebe gu'u lataj xelebenę ne cheę da dxaca chia'.

Gate dxeajcházia', quebe gu'u le' lataj xulucá'ana szren cuinę'

lawe' da zua' lu da baxache'.

<sup>17</sup> Ba zua' cheajcházia',

ne tu dxelázqueze dutę bel-la' dxen chia'.

<sup>18</sup> Cheę le' na' xrúalepequeza' da calela da bena',

ne xewine lazra' ca naca dul-la da nabaga'.

<sup>19</sup> Benne' ca' dxeledábage' neda' zaj zúaqueze' chawe',

ne zaj naque' benne' wal-la.

Zaj naxánle'e benne' ca' dxelecuideng' neda',

ne quebe bi de' da dxagu na zria chia' lau le'.

<sup>20</sup> Benne' ca' dxelunę' da calela cheę benne' ca'

dxelunę' da xrlátaje

zaj naque' benne' dxeledábage' neda' lawe' da

tu dxúnzqueza' da xrlátaje.

<sup>21</sup> Quebe gusanu' neda', Xrana' Dios.

Dios chia', quebe su' zítu' naga zua'.

<sup>22</sup> Ben ba xuzre gácalęnu' neda', Xran.

Nacu' Benne' dxuselé' neda'.

## 39

<sup>1</sup> Neda' gunniá': Guxúe xanne' cuina' cheę quebe guna' dul-la  
lu da guchálaja'.

Tu guxúe xánnezqueza' ca da guchálaja' dxácate na'  
zua benne' wen da calela naga zua'.

<sup>2</sup> Guzúá' zrize ca tu benne' quebe dxaca nnie',

ne québequeze bchálaja' da xrlátaje,

na' bzáladxa xel-la' dxudía chia'.

<sup>3</sup> Guca lázrdawa' ca tu da dxala,  
na' lu da dxulaba lazra' guca na ca tu xi'.

Na' gunaba' lau Xránadxu, gunnía':

<sup>4</sup> Xran, ble'e neda' da gaca chia',  
ne ájatę zra gaca bana'.

Bzéajni'i neda' chaditę nazruzre gatia'.

<sup>5</sup> Nunu' chia' sua' bábaze zra,  
na' iza chia' québequeze bi naca na lau Lue'.

¡Da líqueze quebe bi zaj naca zra cheę xúgutę bėnneachel!

<sup>6</sup> ¡Da líqueze zaj naca bėnneache ca tu zrúl-laze!

¡Da líqueze dácheze naca zaj dxe' bėnneache gunne xue  
cheę xel-la' nabán cheę'!

¡Dxulucúdie' xel-la' gunnía', ne quebe zaj nézene'  
nu cheę gaca na!

<sup>7</sup> Na'a, Xran, ¿bízraqueze cueza lazra'?

Tuzu' Lue' dxal-la' cueza lazra'.

<sup>8</sup> Bselá neda' lu xúgutę da zrinnaj da bęna'.

Quebe gu'u lataj benne' xala ca' xelún lę' chia'.

<sup>9</sup> Guzúa' zrize, ne quebe bi bchálaja'

lawe' da Lué'queze bėnu' guca caní chia'.

<sup>10</sup> Becá'a xízrawę' da bzu' lu bęla' dxen chia'.

Bache gatia' lu da dxusacu' neda'.

<sup>11</sup> Dxudéu' ba xa' tu benne' ba nun dul-la

cheę dxuzéajni'inu' lę',

ne ca dxun béadu dxuteba' ladxe' dxuzría xi'u  
da nazrí'idxe bėnnea'.

¡Da líqueze quebe bi zaj naca zra cheę xúgutę bėnneachel!

<sup>12</sup> Bene da dxenaba' lau Lue', Xran,

ne bżę naga ca da dxuláwizra' Lue'.

Quebe su' zrize gate zua' dxebezra' lau'

lawe' da naca' lau Lue' ca tu benne' dxedaze', ne quebe dę lizre',

ne naca' ca tu benne' quebe dę xęzr la xu cheę'

ca gulaca xra xrtawa' ca'.

<sup>13</sup> Bsan neda' cheę gata' lataj xezí' le dipa'

nédxula ca xexá'a xenitia'.

## 40

<sup>1</sup> Nen dutę xel-la' zren lazre' chia' guleza lazra' Xrana' Dios,

na' bżę nague' chia', ne benne' da gunábeda' Lę'.

<sup>2</sup> Bebéaję' neda' ca tu lu xędxu situj, ne lu da naca

ca guna' guzra'.

Bzue' ni'a ca tu lu xiaj xre, ne begu'ę neda' neza li.

<sup>3</sup> Bęę' dxul-la' tu da cube da naca na da dxue lá'ana'

Xránadxu.

Benne' zantę xeledé'eng' da nigá dxunę', na' xelezrebe' Lę',

ne xuluxrén lazre' Xránadxu Dios.

<sup>4</sup> Ba neza zrentę naca na cheę bėnnea' dxuxrén lazre'

Xránadxu Dios,

ne quebe dxunę' ca dxelún benne' ca' dxulucá'ana szrenę'

bedáu' xiaj xaga ca',

ne quegá ca dxelún benne' ca' dxelún lazre'.

<sup>5</sup> Da zantę bėnu', Xrana' Dios, da dxebánentu',

ne ca zaj naca da dxezá lazru' gunu' cheęntu'

quebe gaca gulábantu' lau Lue'.

Chela nu guzenda' ca zaj naca na,

ne che guchálaja' cheę na, quebe baben tu na.

<sup>6</sup> Quebe dxezaca ba lazru' béadu ca' gutia' lau',

u da gunna' Lue',

ne quebe gunabu' béadu ca' guzézxea' lau', u dxen cheę

béadu ca' da guzúa' lau' nę cheę dula nabaga',

san gusalaju' naga' cheę xenda' chi'u.

7 Nadxa gunnía': Guná' xque, za'a neda'.

Lu xiche lá'azxa naxúaj na ca naca chia'.

8 Dhezaca ba lazra' guna' ca da dxaca lazru' Lue', Dios chia',  
na' da nadxixruj be'u zua na lu xichaj lázrdawa'.

9 Ca naca da xrlátaje chiu' ba bzenda' bènneache  
naga zaj nazraga chiu' bènneache zante.

Gunná' xque, quebe guzúa zria',

ca nézqueznu' Lue', Xrana' Dios.

10 Quebe bcácheza' ca da xrlátaje chiu' lu lázrdawa'.

Ba bcháajqueza' ca naca xel-la' li lazre' chiu',

ne ca dxuseláu' bènneache.

Quebe guzúa' zri ca naca xel-la' dxexache lazre' chiu',

ne ca naca da li chiu' ládujla benne' zante zaj nazrage' chiu'.

11 Xran, quebe chenu' xexache lazru' neda'.

Xel-la' dxexache lazre' chiu', ne da li chiu'

tu dxelácalezqueze na neda'.

12 Lawe' da ba guléchajle'e da calela ca' neda',

da calela ca' da ba nuna' zaj zria na neda',

na' quebe gaca nna'a naga zu'.

Zaj naxándxa na ca zaj naca xicha xíchaja', na' dxedú lazra'.

13 Dxenaba' lau', Xran, guseláu' neda'.

Xran, ben ba xuzre gácalenu' neda'.

14 Ben xelexedué'e, ne xelexe zréaje

xúgute benne' ca' dxelaca lazre' xelútie' neda'.

Ben xeajxaca bzébela, ne xelexedué'e

benne' ca' dxelezá lazre' xelune' chia' da calela.

15 Ben xelexe zréaje' lawe' da belún zréaje' neda'

benne' ca' gulé'e neda': "E, e."

16 Ben xelexe, ne xelexúe lu da ba neza xúgute benne' ca'

dxelebeze' Lue',

ne ben xelexequeze benne' ca' zaj nazrí'ine' Lue',

weselé chee'.

Xelenné': "Xegá'ana szrénqueze Xránadxu."

17 Láqueze sua' neda' lu da ba xa', ne lu da baxache',

guxúequeze Xrana' Dios ájala gune' chia'.

Nacu' Benne' dxácalene' neda', ne Benne' weselé chia'.

Dios chia', quebe chenu' gácalenu' neda'.

## 41

1 Ba neza zrente naca na chee bènnea' dxe'e gunne xue  
chee benne' xache'.

Lu zra gate zue' lu da stebe, guselá Xránadxu bènnea'.

2 Xránadxu guxúequeze' le', ne gunézruje' le' xel-la' nabán.

Gaca na tu da ba neza zrente chee bènnea' lu xezr la xu nigá,  
na' quebe gudé Xránadxu le' lu na' benne' ca' dxeledábague' Le'.

3 Xránadxu Dios gúxruqueze' le' gate zúe' lu xel-la' dxudía.

Gun chawe' duté da naque' gate na' quebe chawe' zue'.

4 Gunnía': Xrana' Dios, bexache lazre' neda'.

Bexún bènne' du xu'a lawe' da bēna' dul-la gate gudábaga' Lue'.

5 Benne' ca' dxeledábague' neda' dxelenné' chia' da calela.

Dxelenné': "¿Bátala gate benne' nigá, ne xenite le'?"

6 Che xedajlenné'e neda', dxelún lazre'.

Dxelebéaje' neda' dizra' chee bi da calela gaca xelenné' chia',

na' gate dxelexedxúaje', na' dxelexrúe' dizra' na'.

7 Gate dxelezraga benne' dxelecuídene' neda',

na' tu dxelennézqueze' chia'.

Tu dxuluchálajlezqueze' ljwezre' chia' neda' da naca  
da calela, dxelenné':

8 "Ba guxú'e tu xízrawe' da gute na le',

ne québedxa xexásaqueze' ga na' de'."

9 Cá'anqueze bènnea' guleza zri lazre' nen neda',

bénnea' bxren lazra', na' gudágulequeze' neda',  
benne' nigá dxedábague' neda'.

<sup>10</sup> Lue', Xrana' Dios, bexache lazre' neda',  
ne ben xexasa' neda',

na' xunézruja' benne' ca' ca da dxal-la' xezezí'e.

<sup>11</sup> Caníqueze nezda' ba beña' da dxezaca ba lazru' Lue',  
chee quebe bi xebebéle benne' ca' dxeledábague' neda'.

<sup>12</sup> Ca naca chia' neda', ba béxruquezu' neda' lawe' da  
naca' du lazre',

ne ba bzu' neda' lau Lue' chadía chacanna.

<sup>13</sup> ¡Gaca ba Xránadxu, Dios chee benne' Israel ca'  
gaxuane iza, ne chadía chacanna!

¡Ca'an naca na, ne ca'an gaca na!

## 42

<sup>1</sup> Ca dxun bzrina' xixre' dxebezre xa'aba' lawe' da  
dxebíleba' nisa,

ca' dxuláwizra bénne' du xu'a da naca chiu', Dios.

<sup>2</sup> Dxebile bénne' du xu'a da naca chiu', Dios ban.

¿Bata gaca xida' chee guzúa cuina' lau Dios?

<sup>3</sup> Nisa xuzru xiaj lawa' guca na ca xeta dxawa'  
te zra chizrela,

dxácate na' gulé'e neda' xúgutē zra: “¿Ga na' Dios chiu'?”

<sup>4</sup> Dxajsá lazra' chee da caní, ne dxebezre lazra'.

Dxajsá lazra' ca guxá'alēna' benne' zan ca',

ne nuzúa' lawe' le' lize Dios.

Tu dxúl-lazquezdxu lu xel-la' dxebé,

ne dxue lá'anaquezdXu Dios lu laní.

<sup>5</sup> ¿Bizr chee na' dxate ni'a na'u, bénne' du xu'a?

¿Bizr chee na' zu' stebe lu xichaj lázrdawa'?

Guleza lazre' Dios lawe' da güe lá'anaqueza' Le' da xula.

Naque' Benne' dxuselé' neda', ne Dios chia'.

<sup>6</sup> Dios chia', ba nate ni'a na' bénne' du xu'a

lu xichaj lázrdawa'.

Chee le' na' dxajsá lazra' chiu' nigá zua' lu xezr la xu

xechalá'a xegu Jordán,

ne lu xezr la xu chee benne' Hermón naga zua xi'a Mizar.

<sup>7</sup> Ca schaga da dxun nísadau', ne da dxun tu bdua nisa

zren chiu', Dios,

ca' dxeque bénne' du xu'a lawe' da dxusaca zi' na'u neda'.

<sup>8</sup> Te zra xexache lazre' Xránadxu neda',

na' chizrela tu gúl-lazqueza' da güe lá'ana' Le',

ne tu guchálajlezqueza' Dios,

Bénnea' dxunne' xel-la' nabán chia'.

<sup>9</sup> Xapa' Dios: Lué'queze dxucu'uju' neda'.

¿Bizr chee na' nal-la lazru' neda'?

¿Bizr chee na' dxewi'ine lazra' lawe' da dxusaca zi'

benne' dxedábague' neda'?

<sup>10</sup> Ca tu benne' dxelé'e zrita xu'a, ca' dxelún benne' ca'

chia', dxelún le' chia'.

Tu zra tu zra dxelenné' chia': “¿Ga na' Dios chiu'?”

<sup>11</sup> ¿Bizr chee na' dxate ni'a na'u, bénne' du xu'a?

¿Bizr chee na' zu' stebe lu xichaj lázrdawa'?

Guleza lazre' Dios lawe' da güe lá'anaqueza' Le' da xula.

Naque' Benne' dxuselé' neda', ne Dios chia'.

## 43

<sup>1</sup> Bchi'a chia', Dios, ne ble'e lau naca' xrlátaje.

Bselá neda' lu na' benne' ca' dxuluzúe' Lue' chalá'ala,



ne lu na' benne' ca' dxelezí xē'ē, ne dxelunē' da zrinnaj.

<sup>2</sup> Nacu' Lue' Dios chia', ne dxuzé chuchu' neda'.

¿Bizr cheē na' nusán lazru' neda'?

¿Bizr cheē na' dxewí'ine lazra' lawe' da dxusaca zi' neda' benne' ca' dxeledábaguē' neda'?

<sup>3</sup> Gusel-la chia' xel-la' naxaní' chiu', ne da li chiu'.

Da caní xulusí na neda' neza.

Xeleché na neda' lu xi'a lá'azxa chiu', ne naga zúaquezu' Lue'.

<sup>4</sup> Chu'a naga zua lucugu cheē Dios.

Chu'a lau Dios, Bénnea' dxunē' dxebeda', na' zua' lu da ba neza.

Güe lá'ana' Lue' nen da zriadi'i na du, Dios chia'.

<sup>5</sup> ¿Bizr cheē na' dxate ní'a na'u, bénne'du xu'a?

¿Bizr cheē na' zu' stēbe lu xichaj lázrdawa'?

Guleza lazre' Dios lawe' da güe lá'anaqueza' Lē' da xula.

Naque' Benne' dxuselé' neda', ne Dios chia'.

## 44

<sup>1</sup> Dios, bache bénentu' lawe' da buluzén Xra xrtáuntu' netu' ca naca da benu' lu zra cheē', da naca na iza ba guledé na.

<sup>2</sup> Bzria xi'u bénneache xēzr la xu xezicadxa ca' lau xra xrtáuntu' ca', na' bzu' lē' xlataj benne' ca'.

Bsaca zi'u benne' xēzr la xu ca', san bzua chachu' bénneache chiu' lu xēzr la xu nigá.

<sup>3</sup> Xra xrtáuntu' ca' quebe gulezi'ē xēzr la xu nigá nen xia nalá cheéqueze',

Ne quebe buluselá cuine' nen xel-la' wal-la da zaj nape'.

Lue' bseláquezu' lē' nen xel-la' waca chiu', ne nen xel-la' wal-la chiu',

ne nen xel-la' naxaní' chiu', lawe' da bezaca ba lazru' nen lē'.

<sup>4</sup> Dios, nacu' wenná bea chia'.

Bselá zri'ine zre sua Jacob.

<sup>5</sup> Nen xel-la' waca chiu' xebéajntu' benne' ca' dxeledábaguē' netu'.

Lu Lau' Lue' guchuchuj guléajntu' benne' ca' dxeledábaguē' netu'.

<sup>6</sup> Quebe guxrén lazra' xaga nalá xéche'ze chia', ne quebe guselá xia chia' neda'.

<sup>7</sup> Lue' bcu'uju' netu' lau benne' ca' dxeledábaguē' netu', ne benu' belexedué'e benne' ca' belecuídenē' netu'.

<sup>8</sup> Nē cheē Dios tu súazquezentu' lu da ba neza, na' chadí chacanna güe lá'anantu' Lau' Lue'.

<sup>9</sup> Nusán lazru' netu', ne nunu' dxexedué'entu', ne quebe dxéajlenu' benne' cheentu' ca' dxjaque' wedil-la.

<sup>10</sup> Benu' buzrúnjntu' lau benne' ca' dxeledábaguē' netu', na' benne' ca' dxelecuídenē' netu' gulegüe' ca naca da nápantu'.

<sup>11</sup> Bdeu' netu' ca zrila' ca' lu na' benne' xelútiē' netu', ne ba bēse dímmaju' netu' ládujla benne' xēzr la xu ca'.

<sup>12</sup> Bdéu' netu', benne' chiu' ca' cá'aze, ne quebe bi guzi'u.

<sup>13</sup> Dxunu' dxelún la benne' walízre cheentu'.

Benne' zaj naxéchajē' netu' dxelún lē', ne dxuluzrizre' cheentu'.

<sup>14</sup> Nuzú' netu' ca tu da dxelenná benne' xēzr la xu ca' naca na da baxáchele'ē.

Xúgutē benne' dxelelé'engē' netu' dxulutá xíchajē', ne dxelexebánengē' ca da baxache' nácantu'.

<sup>15</sup> Tu zra tu zra tu dxexedué'ezquezda',

ne tu zúazqueza' lu da stébele'ē

<sup>16</sup> lawe' da dxelenné' schanni' chia', ne dxuluzúē' neda' chalá'ala,

ne dxulutíl-lalę neda' benne' ca' dxeledábague' neda',  
 nen benne' ca' dxelexebeaj lazre' neda'.  
 17 Xúgute da caní dxaca cheętu', ne quebe ne  
 gal-la lazrentu' Lue',  
 ne quebe ne guzúantu' chalá'ala xel-la' wezría chiu'.  
 18 Quebe ne gusán lázrentu' Lue',  
 ne quebe ne xecuásantu' lu da gunná be'enu' netu'.  
 19 ¿Bizr cheę na' nuzú' netu' chalá'ala tu lataj cheę be snia ca',  
 ne nuzú' netu' naga xelaze gátentu'?  
 20 La gul-la lázrentu' La Dios cheędxu,  
 ne bca'ana szrentu' tu dios da quebe bi zaca,  
 21 ¿quebe dxal-la' zra'a Dios netu' ne cheę da nigá?  
 Le' nézquezne' da zaj zua lu xichaj lázxdau bėnneache.  
 22 Lawe' da nácantu' chiu', tu zra tu zra ba  
 zaj zúatequeze' xelútię' netu'.  
 Zaj nune' netu' ca zrila' ca' ba zua xelútię'-ba'.  
 23 ¡Bebán, Xran!  
 ¿Bizr cheę na' dxasiu'?  
 ¡Bebán!  
 ¡Quebe su' zitu' tu chí'ize!  
 24 ¿Bizr cheę na' nucache cuinu',  
 ne quebe dxeque be'enu' ca dxezaca zí'intu',  
 ne ca dxuluchine benne' ca' netu'?  
 25 Ba nate ni'a na' bėnne'du xú'untu', ne dxeajcházetętu' lu xu,  
 na' ba dėtętu' sudxú'ala lu xęzr la xu.  
 26 ¡Guxasa, gúcalę netu',  
 ne dutę xel-la' dxexache lazre' chiu', bselá netu'!

## 45

1 Xu'u lázrdawa' tu dizra' xrtante,  
 na' gúl-laqueza' tu da naca cheę Wenná Bea.  
 Gúl-laqueza' tu da bzuaaj tu benne' dxuchálajlę'ę cháwedau'.  
 2 Nacu' xrtánlę'dxda ca xúgute bėnneache.  
 Dxezílę'ętu' ba neza cheę dizra' dxuchálaju',  
 lawe' da nucá'anaqueze Dios Lue' cháwedau' tu chí'izqueze.  
 3 Bda' xia chiu' dxu'a lę'u, Lue', benne' wal-la,  
 lu dutę xel-la' szren chiu', ne xel-la' dxenná bea chiu'.  
 4 Lu xel-la' szren chiu' chepe bánquezu'.  
 Bchine dizra' li, ne xel-la' dxexruj lazre', ne da xrlátaje,  
 na' guzėjani'i Cuinu' da zri'a ca'.  
 5 Zaj nalálę'ę xaga nalá xęche'ze chiu' ca',  
 da xelute na benne' xęzr la xu ca' lau Lue',  
 ne cheajlechaze na lu lázrdau benne' ca' dxeledábague' Lue'.  
 6 Lataj blau naga dxe'u, Dios, naca na da chadía chacanna,  
 ne súatequeze na.  
 ¡Xrlátaje naca ca dxenná be'u!  
 7 Nazri'inu' da naca xrlátaje, ne dxecuídenu' da caleļa.  
 Cheę lę na' ba nuzúa Dios chiu' Lue' xlátaju',  
 naga dxebélę'dxenu' ca le sa' ljwezru' ca'.  
 8 Dxelá zixre zra lanu' nen xala da naca na nizre xaga,  
 ne xiaj, da ca' dxelelá na zixre.  
 Lu xu'u lizru' da zácálę'ę na dxuluzúę' Lue' lu da ba neza.  
 9 Bi nu'ula cheę wenná bea ca' zaj zúabe' ládujla nu'ula  
 chiu' ca' zaj naque' blaudxa.  
 Chalá'a xabęla chiu' dxe' nu'ula gácabe' zru'ulu' nácube' oro  
 da za na xęzre Ofir.

10 Bene, nú'uladau', ne gunná' xque, ne bęę naga da nnia':  
 Bzala lazru' lazriu' ne lizre xrau',  
 11 na' benne' wenná bea sa lazre' xel-la' xrtan chiu'.  
 Bzexruj lazru' lau lę' lawe' da naca lę' xranu'.

<sup>12</sup> Xelelá' nu'ula xezre Tiro lau lue', zaj nu'e da xelunne' chiu',  
na' xelenaba benne' gunní'a ca' gunu' tu culuén chee'.

<sup>13</sup> Xrtanle'e naca bi nu'ula chee wenna' bea lu xu'u naga zu'e'.  
Zra lánabe' nazí' lechítaje na oro.

<sup>14</sup> Xeleché'e-be' lau wenna' bea, nácube' zra lánabe'  
da núale'e lechítaje na.

Nu'ula wégu'du ca' chjácabe' cuzru lebe'.  
Nu'ula caní, nu'ula ljwézrebe' xuluzúabe' lawe' lue'.

<sup>15</sup> Lu duté xel-la' dxebé, ne lu da ba neza xeleché'e-be',  
na' xelú'ube' lu xu'u lizru', wenna' bea.

<sup>16</sup> Waláz chee xra xrna'u xelexezúa zri'inu',

bi ca' gunu' xelenná beabe' du gabí'i xezr la xu.

<sup>17</sup> Guna' cheajlesá lazre' xúguté bénneache lau' lue'.

Chee le na' xelúe lá'ana bénneache lue' chadía chacanna,  
ne gaxuane iza.

## 46

<sup>1</sup> Dios naque' Benne' dxuxúe' dxi'u, ne dxune' dxi'u  
benne' wal-la.

Zúatequeze' gácalene' dxi'u gate dxededxu xel-la' zi'.

<sup>2</sup> Chee le na', quebe zrébedxu lácala xru' xezr la xu nigá  
na' cheajlechaze xi'a ca' lu nísadau',

<sup>3</sup> ne lácala xeajxruxa zren chee nísadau' xuluninne na,  
ne dxelúnle'e na schaga,

na' welezrízequeze xi'a ca' ne chee da dxezrú'.

<sup>4</sup> De tu xegu da dxunna na xel-la' dxebé lu xezre chee Dios,  
ne lu xu'u lá'azxa chee Dios, Benne' nape' duté xel-la' szren.

<sup>5</sup> Dios zu'e' xezre na', ne cabata' cuía xi na.

Dxani'sise' xide' gácalene' bénneache zaj zre'e xezre na'.

<sup>6</sup> Dxelezrebele'e benne' xezr la xu ca',  
na' dxelezrize benne' chee wenna' bea ca'.

Dxenné Dios ca dxenné guziu', na' dxexuna xezr la xu.

<sup>7</sup> Dios, Bénnea' nape' duté xel-la' waca, zúalene' dxi'u.

Dios na' chee Jacob dxucache chawe' dxi'u.

<sup>8</sup> Le da lé'ele da ca' nun Xránadxu.

Le nna' ca naca da dxebánedxu da nune' lu xezr la xu.

<sup>9</sup> Dxebeque zri'e' wedil-la da dxelaca du gabí'i xezr la xu.

Dxuzúzruje' da dxuzala na xaga nalá xéche'ze ca',

ne dxíchuje' xaga tuhe' ca' chee wedil-la,

na' dxuzezxe' da ca' zaj nache' benne' wedil-la ca'.

<sup>10</sup> Dxenná Dios: "Le sua zrize, ne le xúnbea naca' Dios.

Naca' szrendxa ca zaj naca xúguté cue' xezr la xu.

Naca' szrendxa ca duté xezr la xu."

<sup>11</sup> Dios, Bénnea' nape' duté xel-la' waca, zúalene' dxi'u.

Dios na' chee Jacob dxucache chawe' dxi'u.

## 47

<sup>1</sup> Le capa na'le, le'e, xúguté bénneache!

jLe güe lá'ana Dios nen duté xel-la' dxebé!

<sup>2</sup> Dxal-la' zrébedxu Xránadxu, nape' duté xel-la' szren.

Naque' Wenna' Bea zren dxenná bé'ene' duté xezr la xu.

<sup>3</sup> Bzue' benne' xezr ca' zran ní'adxu.

Bzue' dxi'u chee nna be'edxu zánete cue' xezr la xu ca'.

<sup>4</sup> Bequé'e tu xezr la xu da gaca na cheedxu,

Da naca tu xezr la xu xrtante chee zri'ine zre sua Jacob,  
benne' ca' nazrí'ine'.

<sup>5</sup> Dxeгүйэн Dios naga dxe'e dxenná be'e.

Dxelebezre luzu da dxulucuezre' gate dxegüén Xránadxu ga na'.

<sup>6</sup> ¡Le gul-la da gaca ba Dios!

¡Le gul-la!

¡Le gul-la da gaca ba Wenná Bea cheedxu!

¡Le gul-la!

<sup>7</sup> ¡Dios naque' Wenná Bea dutę lu xęzr la xu nigá!

¡Le gul-la cheę' nen dutę xel-la' dxéajni'i cheęle!

<sup>8</sup> Dxe' Dios naga dxenná be'e, lu lataj na' naca na lá'azxa.

Dxenná bé'ene' xúgute cue' xęzr la xu ca'.

<sup>9</sup> Dxelezraga benne' dxelenná bé'ene' xúgute cue' xęzr la xu tu zren nen bėnneache cheę Dios cheę Abraham.

<sup>10</sup> Benne' ca' dxelenná be'e du gabí'i xęzr la xu buludé' xel-la' dxenná bea cheę' lu na' Dios.

Le' dxenná bé'ene' xúgute benne' wenná bea ca'.

## 48

<sup>1</sup> ¡Zrentę naca Xránadxu!

¡Naca cheę' güe lá'anale'ędxu Le'

ga naca lu xęzre cheę Dios cheędxu,

da dxe' na lu xi'a lá'azxa cheę'!

<sup>2</sup> Sión, da naca na xi'a cheę Dios, naca na sibe, ne xrtante.

Naca na xęzre cheę Wenná Bea zrentę,

da dxunna na xel-la' dxebé dutę xęzr la xu nigá.

<sup>3</sup> Dios ba blé'ene' dxucache chawe' dxi'u,

lu xu'u zaca ca' cheę xęzre cheę' na'.

<sup>4</sup> Belezraga benne' wenná bea ca',

na' belelé'ę cheę xeledíl-lalęne' xęzre nigá,

<sup>5</sup> na' gate belelé'ene' na, na' belexebánene'.

Belezzréę', na' buluzrúnmuje'.

<sup>6</sup> Gulezré'ę lu da stebe,

ne gulezúę' xel-la' dxudía ca dxaca cheę tu nu'ula

ba zua sanę' bidau'.

<sup>7</sup> Gulaque' ca da ca' dxeledá lawe' nísadau' dxexrite na

gate dxácale'e be' bdunu' lu nísadau'.

<sup>8</sup> Bendxu ca da bęn Dios, na' na'a ba ble'edxu na,

ga naca lu xęzre cheę Xránadxu, nape' dutę xel-la' waca,

da naca na xęzre cheę Xránadxu Dios.

Le' guzúa chawe' xęzre nigá chadía chacanna.

<sup>9</sup> Ga naca lu xudau' chiu' Lue', Dios

dxajsá lázredxu ca naca xel-la' zri'i lazre' zren chiu'.

<sup>10</sup> Gáteteze na' dxelúe lá'ana bėnneache Lue',

na' ca naca xel-la' szren chiu' dxezrín na

du gabí'i xęzr la xu.

Ca naca da xrlátaje dxenná be'u.

<sup>11</sup> Xelebéł'ę bėnneache zaj zre'ę Sión.

Xelebéł'ę bėnneache zaj zre'ę xęzre ca' cheę Judá

ne cheę da dxuchi'u cheę'.

<sup>12</sup> Le'e, bėnneache cheę Dios, le chechaj dxu'a xęzre na',

ne le gulaba ca zaj naca xu'u sibe ca',

da dxuluzé chacha na xęzre na'.

<sup>13</sup> Le nna' xque ca naca ze'e zren naxechaj na xęzre na'.

Le nna' xanne' ca zaj naca xu'u wal-la cheę na,

cheę guzenle bi cheęle ca naca xęzre na'.

<sup>14</sup> Dios nigá nácaqueze' Dios cheędxu chadía chacanna.

Le' tu gulé'ezquezne' dxi'u neza.

## 49

<sup>1</sup> Le xen da nigá, le'e, benne' xúgute cue' xęzr la xu.

Le guzé nágale, le'e, benne' dutę xęzr la xu,

<sup>2</sup> le'e, benne' blau, ne le'e, benne' xezicadxa,

le'e, benne' gunní'a, ne le'e, benne' xache'.

<sup>3</sup> Guchálajqueza' xel-la' sina,

ne guzéajni'ida' le'e da xu'u lázrdawa'.

<sup>4</sup> Guzé naga' tu dizra' sina.

Gúl-laqueza' chee tu da nagache,  
ne quinnia' da zriadi'i na du cheñ.

<sup>5</sup> ¿Bizr chee na' dxun na ba xen zreba' lu zra chee da stebe,  
gate naxechaj da calela neda' da dxelún benne'  
dxeledábague' neda'?

<sup>6</sup> Benne' ca' dxuluxrén lazre' da zaj de chee',  
ne dxulucá'ana szren cuine' lawe' da zaj nápal'e.

<sup>7</sup> Quebe xezezéquene' xelexá'awe' le sa' ljweze',  
ne quebe gaca xulunézruje' Dios da guselá na le'

<sup>8-9</sup> chee tu xelaca bázqueze',

ne chee cabata' xeluzru bel-la' dxen chee'

lawe' da zrente naca da dxexa'u na xel-la' nabán chee bénneache,  
ne cabata' seque' nu benne' quízruje' na.

<sup>10</sup> Xelelé'ene' dxelátequeze benne' sina ca',  
ne xelúzrué' cáteze dxaca chee benne' xala ca',

ne chee benne' lázrdau zide' ca',

na' dxulucá'ane' xel-la' gunní'a chee' lu na' benne' xula ca'.

<sup>11</sup> Dxelequene' wazráqueze zri'ine zre sue' chadía chacanna,

na' xelexegá'ana lizre' chee xelaca na chee xúgute cuen  
xrtia ljweze',

na' dxelu'e la xezr la xu chee' ca' ca zaj nazí láqueze'.

<sup>12</sup> Quebe xelexegá'anatequeze bénneache lu da ba lá'ana.

Zaj naque' ca be xixre' ca', be dxeláteba'.

<sup>13</sup> Ca da dxelune' naca na da xálaze,

na' dxelexezaca ba lazre' xrtia ljweze' ca' nen da dxelennaze'.

<sup>14</sup> Zaj naque' ca tu cue' zrla' zjácaba' lataj ba xa',  
naga guxúe xel-la' gute leba'.

Benne' xrlátaje ca' xelenná bé'ene' benne' gunní'a ca'  
gate za' chani',

na' xelebía xi' da ca' guta' chee',

na' lataj ba xa' gaca na naga tu xezezáqueze'.

<sup>15</sup> Dios xexá'awe' xel-la' nabán chia' lu lataj ba xa'  
lawe' da xeché'e neda' naga zúaqueze' Le'.

<sup>16</sup> Quebe su' stebe gate nu benne' dxezrué'ene' xel-la' gunní'a,

ne gate dxune' lizre' da zácale'edxa,

<sup>17</sup> lawe' da gate gatie' quebe bi xexu'e,

ne quebe chéajle xel-la' gunní'a chee' le'.

<sup>18</sup> Lácala dxácaté naca bane' dxé cuine' zue'

lu da ba neza zrente,

na' dxelúe lá'ana bénneache le' gate dxépe bane',

<sup>19</sup> san chu'e naga zaj zra xra xrtawe' ca',

ne cabátadxa lé'ene' xel-la' naxani'.

<sup>20</sup> Bénnea' dxelapa bénneache le' ba lá'ana san quebe  
bi dxéajni'ine'

naque' ca be xixre' ca', be dxeláteba'.

## 50

<sup>1</sup> Ba gunné Xránadxu Dios, ne ba nutube' bénneache  
chee duté xezr la xu,

benne' zaj zre'e naga dxalaj gubizra,

ne benne' zaj zre'e naga dxebía na.

<sup>2</sup> Lu xi'a Sión, da naca na xrtánle'e ba bzaní' Dios.

<sup>3</sup> Xelá' Dios cheedxu, ne quebe sua zrie'.

Gálajqueze xi' lau Le',

ne gácale'e be' bdunu' da chechaj na Le'.

<sup>4</sup> Xutúbequeze' benne' zaj zre'e xabáa na'ala,

ne benne' zaj zre'e xezr la xu,

chee guchi'e chee bénneache chee'.

<sup>5</sup> Dxenné': "Le xutube benne' chia' ca',

benne' ca' belune' tu xel-la' wezría nen neda'

da buluzúa chúchug' nen dxen chee béadu ca."

<sup>6</sup> Da zua xabáala gulé'e lau na naque' xrlátaje, lawe' da naca Dios Benne' guchi'ē chee bēnneache.

<sup>7</sup> Dxenné': "Le xen, bēnneache chia', na' guchálaja'.

Le guzē nágale, benne' Israel, na' nnia'  
da gagu na zria cheele.

Neda', Dios, naca' Dios cheele.

<sup>8</sup> Quebe til-la' le'e ca naca béadu ca' bētele lawa',

ne ca naca béadu ca' bzézele,  
da zaj zúaqueze na lawa' neda'.

<sup>9</sup> Quebe ca'a lu na'ale medu ca',  
ne chivo biu ca', bē nápaquezle

<sup>10</sup> lawe' da zaj naca chia' xúgutē bē xixre' ca',  
ne zane gaxúa bē xixre' zaj zra'ba' lu xí'adu ca'.

<sup>11</sup> Xu'u lu na'a xúgutē bē zua xrila,  
ne naca chia' xúgutē bē zaj naca banba'.

<sup>12</sup> Chela neda' dxeduna', quebe xapa' le'e ca'  
lawe' da naca chia' xēzr la xu, ne xúgutē da dē lawe na.

<sup>13</sup> ¿Dxun na ba xen gawa' bēla' bezre ca'?  
¿Xí'aja' dxen chee chivo biu ca'?

<sup>14</sup> Le guzúa lau Dios da güe lá'anale Lē'  
ne le gunezruj ca da guchebe lázrele lau Dios szrente.

<sup>15</sup> Bláwizra neda' lu zra zu' lu da zi' da xa',  
na' guselá' lue', na' lue' gapu' neda' ba lá'ana."

<sup>16</sup> Dios guzrē' benne' wēn da calela:  
"¿Bi dxéquenu' lue', dxuchálaju' ca nadxixruj bi'a,  
ne dxenníu' ca naca chee xel-la' wezríá chia'?"

<sup>17</sup> Lue' dxecuídenu' neda' che dxusízreda' lue',  
ne dxuzú' chalá'ala dizra' chia'.

<sup>18</sup> Gate dxelé'enu' gubán, na' dxunu' lē' tu zren,  
ne nacu' tu zren benne' ca' dxeledálēne' nu'ula  
quebe zaj naca zru'ule'.

<sup>19</sup> Dxuchálajquezu' da calela,  
ne tu dxúnzquezu' da wēn lazre'.

<sup>20</sup> Tu dxennézquezu' da calela chee bi bíchequezu',  
Ne dxagu' zria chee bi chee xrná'aquezu'.

<sup>21</sup> Da caní bēnu', na' neda' guzúa' zrire.  
Gúquenu' naca' tu benne' ca nacu' lue'.

Na'a wadíl-laqueza' lue', ne gulé'eda' lue' ca ba bēnu'."

<sup>22</sup> Le chéajni'i da nigá na'a, le'e dxal-la lázrele Dios.  
Ga gaze guzuzruj Dios le'e, ne québedxa sua nu guselá le'e.

<sup>23</sup> Bēnnea' guzúe' lawa' da güe lá'ane' neda' gape'  
neda' ba lá'ana,

na' bēnnea' dxuxuchá cuine' chee guñe' da xrlátaje,  
gulé'eda' lē' ca guselá' lē', naca' Dios chee'.

## 51

<sup>1</sup> Gúcale neda', Dios, lu dutē xel-la' dxexache lazre' chiu'.  
Dutē xel-la' dxexache lazre' chiu' bsula zria da nabaga'.

<sup>2</sup> Gudibe neda' ca naca da calela da nuna',  
ne bca'ana chawe' neda' chee dul-la da bēna',

<sup>3</sup> lawe' da dxexúnbe'a ca bēna' gudábaga' Lue',  
ne ca naca dul-la chia' tu dxáguze na zria neda'.

<sup>4</sup> Lau' Lue' bēna' dul-la.

Awe', lau' Lué'queze, ne ba bēna' da calela lau' Lue'.  
Caní dxaca na chia' chee gaca bea nacu' xrlátaje lu da dxenníu',  
ne nacu' du lazre' ca da dxuchi'u chee bēnneache.

<sup>5</sup> Gunná' xque, báchequeze nabaga' dul-la gate gúlajtea',  
ne lu dul-la zúaqueza' gate guzrán xrna'a neda'.

<sup>6</sup> Lue' dxezá lazru' sua da li lu xichaj lázrdawa',  
ne lu xichaj lázrdawa' ba bzéajni'inu' neda' da naca sina.

<sup>7</sup> Bca'ana chawe' neda' nen da na' dxuchínenu',

na' xegá'ana' xrlátaje.

Gudibe neda', na' gaca' chíchedxa ca tu bezxe'.

<sup>8</sup> Ben xenda' xel-la' dxebé, ne da ba neza,  
na' xelexezi' le dipa zrita xu'a, da ba gudíchaju'.

<sup>9</sup> Quebe gusá lazru' ca naca dul-la da bēna,  
na' bsula xúgute da calela da nuna'.

<sup>10</sup> Dios, bzua neda' tu lázrdawa' xrlátaje,  
ne bzua tu be' li lazre' lu xichaj lázrdawa'.

<sup>11</sup> Quebe gucuasu' neda' lau' Lue',  
ne quebe xeca'u lu xichaj lázrdawa' be' lá'azxa chiu'.

<sup>12</sup> Bexunna neda' xel-la' dxebé chee xel-la' weselá chiu',  
ne bzua chuchu be' chawe' da xu'a.

<sup>13</sup> Nadxa gusédeda' benne' ca' dxelune' da zrinnaj  
ca dxaca lazru' xelune',

na' benne' dul-la ca' xelexexaque' chiu' Lue'.

<sup>14</sup> Bselá neda' lu zria da nabaga', bētia' benne'.  
Lue' Dios, nacu' Dios dxuseláu' neda',

na' gúl-laqueza' chee da xrlátaje nacu' Lue'.

<sup>15</sup> Xran, gusalaj dxu'a,  
na' guzenda' bēneache da dxue lá'ana' Lue'.

<sup>16</sup> Quebe dxaca lazru' béadu ca' gutia'-ba' lau',  
ne quebe dxaca lazru' béadu ca' guzézxea' lau'.

<sup>17</sup> Da guzúadxu lau' Dios da dxaca lazre' naca na  
tu lázxdau dxexruj lazre'.

Tu lázxdau dxexruj lazre', ne da dxexíaje lazre'  
quebe guzú' chalá'ala, Dios.

<sup>18</sup> Dute xel-la' zri'i lazre' chiu', bēn gaca chawe' chee  
xezre Sión.

Bsegula ze'e da nazečaj na xezre Jerusalén.

<sup>19</sup> Nadxa xezaca ba lazru' nen béadu ca' gútentu' lau'  
dute da naca xrlátaje cheentu',

ne béadu ca', ne da du ca' guzézxentu' lau'.

Nadxa xelútiē' béadu ca' lu cugu chiu'.

## 52

<sup>1</sup> Bizr chee na' dxucá'ana szren cuinu' chee da calela  
da nunu', lue', benne' wal-la?

Tu zúazqueze xel-la' dxexache lazre' chee Dios.

<sup>2</sup> Tu dxuchálajzquezu' chee da calela da gunu' chee le sa' ljwezru'.  
Da dxenníu' naca na ca tu xia da nalále'ē, dxezi' xē'u ljwezru'.

<sup>3</sup> Nazrí'idxenu' da calela quézcala da xrlátaje,  
ne dxedánnedxenu' da wēn lazre' quézcala da li.

<sup>4</sup> Nazrí'inu' xúgute dizra' da dxulucá'ana ditaj na bēneache,  
lue', benne' dxezi' xē'u.

<sup>5</sup> Chee le na' guzríia xi' Dios lue' tu chí'izqueze.

Waxelē' lue', ne xequé'ē lue' naga zúaquezu',  
ne gucuase' lue' naga zaj zra' benne' ban ca'.

<sup>6</sup> Xelelé'e benne' xrlátaje ca' da nigá, na' xelezrébequeze'.  
Xuluzrízrqueze' chiu' lue', xelenné':

<sup>7</sup> "Le na' xque, benne' nigá quebe bxren lazre' Dios  
chee gucu'uje' le'.

Bxren lázrequeze' ca naca xel-la' gunnía' zrentē chee',  
ne guzúaqueze' lu da calela da dxune'."

<sup>8</sup> Neda' naca' ca tu xaga olivo xa'a lu xu'u lizre Dios.

Tu dxuxrén lázrequeza' xel-la' dxexache lazre' chee  
Dios chadía chacanna.

<sup>9</sup> Güe lá'anaqueza' Lue' chadía chacanna lawe' da bēnu' da caní,  
ne cueza lazra' lau Lue' lawe' da naca na xrlátaje lau xúgute  
benne' chiu' Lue'.

## 53

1 Benne' xala ca' dxeleñná lu lázrdawé': Quebe zua Dios.  
 Xúgute' zaj naque' sban, ne zaj nunge' da calela.  
 Quebe nu chilá' benne' dxunge' da xrlátaje.  
 2 Dios zué' xabáa dxenné'é bénneache  
 chee lé'enge' che zua tu benne' sina,  
 bénnea' dxape' Dios ba lá'ana.  
 3 Xúgute' benne' zaj nabéaj xíchaje' Dios.  
 Xúgute' zaj naque' sban.  
 Quebe nu chilá' benne' dxunge' da xrlátaje, netú gue'.  
 4 Dxená Dios: "¿Quebe dxeléajni'i benne' caní  
 dxelune' da calela?  
 Dxele'aj dxelawe' da dxelebane' chee bénneache chia',  
 ne quebe dxelexilaje' neda'."  
 5 Za zrin zra xelexruse' ca da quebe ne xezezaque',  
 lawe' da gusedinnaj Dios zrita ca' chee benne'  
 guledábage' bénneache chee'.  
 Dios na' nuzú' chalá'ala benne' ca',  
 na' bénneache chee' xuluzría xi'é benne' ca'.  
 6 Dxenaba' Dios guné' dxuaj Sión da gácale na  
 benne' Israel ca'.  
 Gate ba nun Dios xelezrín bénneache chee' lu xezr la xu  
 cheéqueze',  
 xelebé zri'ine zre sua Jacob,  
 ne xelezúa lu da ba neza benne' Israel ca'.

## 54

1 Bselá neda', Dios, nen xel-la' waca chiu'.  
 Gúcale neda', Dios, nen xel-la' wal-la chiu'.  
 2 Bene da dxenaba' lau', Dios, ne bechebe chia'.  
 Bze naga da guchálajlëna' Lue'.  
 3 Za'aca benne' snia ca' xeledíl-lalëne' neda'.  
 Benne' xichaj zra'a ca' dxelaca lazre' xelútigë' neda',  
 benne' ca' quebe dxelape' ba lá'ana Lue', Dios.  
 4 Dios naque' Benne' dxácaleñe' neda'.  
 Xránadxu Dios zúalëne' benne' ca' dxuluxúe' neda'.  
 5 Ca naca da calela dxelún benne' dxeledábage' neda',  
 xuzrí'i Dios na chee benne' ca'.  
 Guzría xi'é benne' ca' lawe' da naque' li lazre'.  
 6 Du lazra' cu'a da gudéa' lau Lue', Xran.  
 Güe lá'anaqueza' Lau' lawe' da nácale'ë na xrlátaje.  
 7 Bseláu' neda' lu xúgute' da stëbe guzúa'.  
 Ble'eda' gulebía xi' benne' ca' dxeledábage' neda'.

## 55

1 Bze naga, Xran, ca da dxuchálajlëna' Lue',  
 ne quebe guzú' chalá'ala ca da dxenaba' lau'.  
 2 Guzúa ban lazre', ne bechebe chia'.  
 Dxuláwizra' Lue' lu da dxuchálajja', ne zua stëbe,  
 3 lawe' da benne' dxeledábage' neda' dxeleñné' chia',  
 ne lawe' da dxelún la benne' wen da calela neda'.  
 Bulusebage' neda' da zrinnaj,  
 ne dutë xel-la' dxelezrá'a zaj nau zi' xuzre' neda'.  
 4 Dxe' gunne xue lázrdawa' lu bëla' dxen chia',  
 ne dxuchebe xel-la' gute neda'.  
 5 Zua' lu xel-la' dxezrebe, ne dxezríztequeza',  
 na' zúale neda' da dxuchebe na neda'.  
 6 Na' gunnía': ¿Nuzra gunna neda' xrila' ca xrila tu bsia  
 chee cha'a lu be'la naga xezi' lazra'?  
 7 Da líqueze guzrúnnuja' zítu'la,  
 na' súaqueza' le'ë xixre' lawe' lataj.



<sup>8</sup> Guna' ba xuzre la' lu be' bdunu', ne lu be' wal-la.

<sup>9</sup> Bzria xi' benne' ca' dxelune' da calela, Xran.

Bzaga naze da dxelune',

lawe' da ble'eda' da zrinnaj, ne da calela da dxelune'  
lu xezre.

<sup>10</sup> Te zra chizrela dxeledé' lawe' ze'e da naxečaj na xezre,  
ne dxelune' da zrinnaj, ne da calela lu xezre nigá.

<sup>11</sup> Nazrate xezre nigá da calela da dxelune',

ne tu dxelúnzquezé' da wən lazre', ne xel-la' dxezí xé  
lu neza cheę na.

<sup>12</sup> La guca tu benne' bēnnea' dxedábage' neda',

bēnnea' bēn lę' chia',

na' bchaga lawa' da na'.

La guca tu benne' dxecuđene' neda' bēnnea' gudábage' neda',

na' bcache cuina' lau lę'.

<sup>13</sup> Lue', bēnnea', gucu' ca tu le sa' ljwezra'.

Bsi'u neda', ne gucu' tuze neda'.

<sup>14</sup> Tu zren bchálajdxu du lázredxu,

ne lu xel-la' zri'i lazre' gudadxu lu xu'u lizre Dios.

<sup>15</sup> Dios, bēn quela xel-la' gute benne' ca' dxelune'  
da calela chadite.

Bēn xelexú'e lu lataj ba xa' zaj naca banę',

lawe' da nazrate xu'u lizre' da calela da dxelune'.

<sup>16</sup> Ca naca chia' neda', bláwizra' Dios,

na' Xrana' Dios bselé' neda'.

<sup>17</sup> Che zílala, ne wagubizra, ne ca dxebía gubizra

guchálajęqueza' Dios, ne guláwizra' Lę',

na' Lę' xenne' chia'.

<sup>18</sup> Xexá'awę' bēnne'du xu'a lu wedil-la da dxaca chia' neda',

ne gunę' cueza' zri lazra',

lácala zaj zra' zánete benne' dxeledábage' neda'.

<sup>19</sup> Wene Dios, na' guzría xi'queze' benne' ca'.

Naquę' Bēnnea' zúatequeze' dxenná be'e nédxute.

Caní gunę' cheę benne' ca' lawe' da quebe dxuluché'e

ca dxelune', ne quebe dxelezrebe' Dios.

<sup>20</sup> Guchisa na' benne' wən da zrinnaj cheę gu'e benne' ca'

dxelebeza zri lazre' nen lę'.

Gudíčaję' xrba cheę xel-la' wezría da bēnę' nen benne' ca'.

<sup>21</sup> Dizra' bchálaję' zaj naca na dizra' zren lazre',

san xu'u lázrdawę' xel-la' dxezrá'a.

Dxunę' xrtante dizra' dxuchálaję',

san zaj naca na ca xia da zaj nalále'e.

<sup>22</sup> Bda xua chiu' cuzru Xránadxu, na' Lę' gutipe' lazru'.

Québequeze gu'e lataj cheajchaze benne' chawe' tu chí'ize.

<sup>23</sup> Lue', Dios, gunu' xelexú'u benne' ca' dxelune'

da calela lataj ba xa',

benne' dxelute benne', ne benne' dxelezí xę'e,

gate quebe ne xelezrine' gachaj catite dxal-la' xelaca banę',

san neda' guxrén lazra' Lue'.

## 56

<sup>1</sup> Bexache lazre' neda', Dios, cheę quebe xuluzría xi'

bēnneache neda'.

Tu zra tu zra dxulusaca zi' bēnneache neda', benne' ca'

dxeledíl-lalęnę' neda'.

<sup>2</sup> Te zra chizrela benne' ca' dxeledábage' neda'

dxulucá'ana dítaję' neda',

lawe' da zaj zra' benne' zante, benne' dxeledíl-lalęnę' neda'

lu xel-la' dxulucá'ana szren cuinę'.

<sup>3</sup> Lu zra dxezreba', dxuxrén lazra' Lue'.

<sup>4</sup> ¡Dxuxrén lazra' Dios, na' güe lá'ana' xrtizre'!

¡Dxuxrén lazra' Dios, na' québedxa zreba!  
 ¿Bízraqueze gaca gun bénneache chia' neda'?  
<sup>5</sup> Xúgute zra dxuluchuque' xrtizra'.  
 Ca naca da dxelegú'u be'e zaj naca na chee xelune' chia'  
 da calëla.  
<sup>6</sup> Dxelezrague', ne dxulucache cuine'.  
 Dxelenná' xánnie' ca da dxuna'.  
 Dxelilaj lazre' ca xelune' xelútie' neda'.  
<sup>7</sup> Dios, bxue ca da xelune',  
 na' dutë xel-la' dxezrá'a chiu' bzria xi' benne' ca'.  
<sup>8</sup> Nézqueznu' Lue' ca dxuzrúnmuja' lau benne' ca'.  
 Bsa lazre' nisa da ba gudxezra'.  
 ¿Quebe zaj naxúaj na lu xiche chiu'?  
<sup>9</sup> Gate dxuláwizra' Dios, lu zra ná'queze xuluxuzrunnuj  
 benne' ca' dxeledábague' neda'.  
 Nézquezda' zúalë Dios neda'.  
<sup>10</sup> ¡Dxuxrén lazra' Dios, na' güe lá'ana' xrtizre'!  
 ¡Dxuxrén lazra' Xránadxu, na' güe lá'ana' xrtizre'!  
<sup>11</sup> ¡Dxuxrén lazra' Dios, na' québedxa zreba!  
 ¿Bízraqueze gaca gun bénneache chia' neda'?  
<sup>12</sup> Nabaga' ca da nachëbe lazra' chiu', Dios.  
 Gúl-laqueza' da güe lá'ana' Lue'.  
<sup>13</sup> Ba bseláu' bënne'du xu'a lu xel-la' gute,  
 ne bebéajú' ní'a naga zaj zua cheajlechaze na,  
 chee gaca chu'a lau Dios lu xel-la' naxaní' da dxunne'  
 chee benne' ca' zaj naca banë'.

## 57

<sup>1</sup> Bexache lazre' neda', Dios.  
 Bexache lazre' neda', lawe' da dxuxrén lazra' Lue'  
 dutë lázrdawa'.  
 Quezru' neda' ca dxun bedxuj dxézreba' zrí'ineba'  
 zran xrílabá', cadxa te chee da stëbe caní.  
<sup>2</sup> Guláwizra' Dios, Benne' zrentë.  
 Guláwizra' Dios chee gácalenë' neda'.  
<sup>3</sup> Naga zúate' xabáa chee' sel-lë' nu guselá neda' lu na'  
 bënnea' dxáca lazre' guzrí'a xi'e neda'.  
 Gusel-la Dios xel-la' dxexache lazre', ne da li chee'.  
<sup>4</sup> Zua' lu da stëbe ca tu benne' zue' ládujla bezre xixre' ca'.  
 Xu'a ládujla bënneache zaj naque' ca bezre xixre' ca'  
 dxeláguba' bënneache.  
 Dizra' da dxelenné' chia' zaj naca na ca tu xia natuche',  
 ne xaga nalá xéche'ze ca',  
 na' xrtizre' zaj naca na ca tu xia da nalále'e.  
<sup>5</sup> Xega'ana szrénquezu' lu xabáa, Dios.  
 Xel-la' szren chiu' sua na lawe' dutë xëzr la xu.  
<sup>6</sup> Ba zaj nabeche' xralaj chee xelë-lë' neda'.  
 Ba dxedú lazra' lu da dxaca chia'.  
 Ba zaj naxenë' tu xëdxu chee cheajcházia' lu'ule na.  
 Lu'ule da na' ba xeajlecházqueze le'.  
<sup>7</sup> Ba zúate'queze lázrdawa', Dios.  
 Ba zúate'queze lázrdawa' chee gúl-laqueza' da güe lá'ana' Lue'.  
<sup>8</sup> Behán lazre', bënne'du xu'a, ne le xebán lázrele,  
 le'e dxínnele da dxúl-lalënle, ne da zriadi'i na du.  
 Che zílala chásaqueza'.  
<sup>9</sup> Güe lá'anaqueza' Lue' ládujla bënneache chiu', Xran.  
 Gúl-laqueza' chiu' lau benne' xúgute' cue' xëzr la xu,  
<sup>10</sup> lawe' da naca xel-la' dxexache lazre' chiu' zrendxa ca xabáa,  
 na' da li chiu' naca na zrendxa ca beuj bza ca'.  
<sup>11</sup> Xegá'ana szrénquezu' lu xabáa, Dios.  
 Xel-la' szren chiu' sua na lawe' dutë xëzr la xu.

## 58

1 Le'e dxenná beale ¿da li dxuchálajle da naca xrlátaje?

¿Dxuchí'ale ca naca da li chee bénneache chia'?

2 ¡Cabíze'!

¡Lu lázrdaule dxugú'u beale da zrinnaj!

¡Stébele'e dxuzúale bénneache lu xezr la xu chia'!

3 Zaj nazrinnaj lázxdau benne' ca' zaj nabéaj xíchaje' neda' gate gulálajte'.

Belexase dínnaje' dxelún lazre' gate gulezante xrne'e le'.

4 Dizra' da dxelenné' zaj naca na da dxelute bénneache ca da zria zran lazxa bela'.

Zaj naca na ca bela' snia, be nácaba' be cuezru.

5 Quebe dxenba' chi'i benne' dxunné' leba'

lácala dxennéle'e xrtandau'.

6 Dios, gudichaj lazxa benne' ca'.

Gudichaj, Xran, lazxa benne' ca' zaj naque' ca bezure xixre' ca'.

7 Ben xelexenítie' ca nisa da dxelalaj na lu xu.

Gate dxulusane' xaga nalá xéche'ze chee',

ben xeledé na chalá'ala.

8 Ben xeledé chee' ca dxaca chee be zaga dxelexexúnaba'.

Ben québedxa xeledé'enge' gubizra ca tu bidau' dxálajbe'

ba nátebe'.

9 Nédxula gate quebe ne la xesu' lu xi'

xecá'a Dios benne' ca' tu lu be' bđunu',

benne' zaj naca bané', ne benne' ca' zaj zua xelatie'.

10 Wabé benne' xrlátaje gate lé'enge' xebéaj lazre' Dios

benne' ca' dxeluné' da caléla.

Guchuchu guléaje' dxen chee benne' zaj nabéaj xíchaje' Dios.

11 Nadxa nne' bénnea': "Da líqueze de lazruj chee

benne' xrlátaje.

Da líqueze zua Dios, Bénnea' dxuchi'e chee bénneache

zaj zre'e lu xezr la xu."

## 59

1 Bselá neda' lu na' benne' ca' dxeledábague' neda', Dios chia'.

Bselá neda' lu na' benne' ca' dxeluné' chia' da caléla.

2 Bselá neda' lu na' benne' ca' dxeluné' da zrinnaj.

Bselá neda' lu na' benne' ca' dxelutie' benne',

3 lawe' da dxelilaj lazre' xelútie' neda'.

Zaj nazraga benne' wal-la ca' chee xeledíl-lalenge' neda',

quegá lawe' da bi zria nabaga', ne quegá ne chee

dul-la nuna' neda', Xran.

4 Lácala quebe bi beña' chee benne' ca',

zá'aca chégüe', ne dxulucueze' bi xeluné' chia'.

Bebán chee xidu' naga zua', na' le'enu' da dxeluné'.

5 Lue', Xran, Dios chee benne' zan dxjaque' wedíl-la,

ne Dios chee benne' Israel ca',

bebán chee gudéu' ba xa' benne' xúguté' cue' xezr la xu.

Quebe xexache lazru' xúguté' benne' ca' dxeledábague' Lue',

ne dxeluné' da zrinnaj.

6 Xeledé'e gate cuía gubizra, ne xebebre xé'e

ca dxelún becu', na' xeléchaje' xezre.

7 Gunná' xque, da dxuluchálaje' naca na ca da dxelexexébe'.

Dizra' dxelenné' zaj naca na ca xia zaj nalá na,

lawe' da dxelenné': "¿Nuzra xene?"

8 Lue', Xran, guzrizru' chee benne' ca'.

Gun lau' chee benne' xúguté' cue' xezr la xu ca'.

9 Zaj naca wal-la benne' ca' dxeledábague' neda'.

Cueza lazra' Lue' lawe' da dxucu'uju' neda', Dios.

10 Dios, Bénnea' dxexache lazre' neda', cuía lawe' lawa' neda'.  
Dios guné' le'eda' gaca chee benne' ca' dxeledábague' neda'  
ca da dxezá lazra'.

11 Quebe gutiu' benne' ca', chee quebe xelal-la lazre'  
béneache chia' ca da gunu'.

Bese dinnaj benne' ca' nen xel-la' waca chiu'.  
Lue', Xran, Benne' dxucu'uj netu', ben cheajlecházie'.

12 Ben xeledule' lu xel-la' dxulucá'ana szren cuine',  
ne chee dul-la dxelung' lu da dxuluchálaje',  
ne ne chee dizra' schanni', ne da wen lazre' da dxeleenné'.

13 Bzria xi'e lu xel-la' dxezrá'a chiu'.

Bzria xi'e chee québedxa xelezúe'.

Dios, ben xeleque be'ene' dxenná be'enu' zri'ine zre sua Jacob.  
Dxenná be'u du ca naca xezr la xu.

14 Dxelelé'e gate dxebía gubizra, ne dxelebezre xe'e  
ca dxelún becu', ne dxeléchaje' xezre.

15 Dxeledé' ca benne' dxeledaze', dxelílaje' da xelawe',  
na' che quebe dxeléljane', na' du xela dxelawe' zria tue' xetúe'.

16 Neda' gúl-laqueza' chee xel-la' waca chiu',  
na' che zílala güe lá'ana' xel-la' dxexache lazre' chiu',  
lawe' da gúcalenu' Lué'queze neda',

ne bcu'uju' neda' gate guzúa' lu da stébele'e.

17 Lue' dxutipu' lazra', na' gúl-laqueza' chiu',  
lawe' da nacu' Lue', Dios, Bénnea' dxucu'uje' neda',  
ne Dios, dxexache lazru' neda'.

## 60

1 Dios, Lue' ba bzu' netu' chalá'ala, ne benu' xeajcházentu'.  
Bzrá'ale'enu' netu'.

Na'a bedá gácalenu' netu'.

2 Benu' guzrú' xezr la xu, ne benu' bxfalaj na.

Bexún na naga bxfalaj na lawe' da dxebía xi na.

3 Benu' blé'entu' netu', benne' chiu', da naca stébele'e.

Benu' guca cheentu' ca güé'entu' tu da ben na xeajcházentu'.

4 Bnézruju' tu da dxulé'e lau chee benne' dxelezrebe' Lue',  
Da xeluxre' chee gulé'e lau da naca li.

5 Chee xelélé benne' ca' nazrí'iqueznu' Lue',  
bsel-la le' duté xel-la' waca chiu', ne bene chia'.

6 Dios gunné' lu lataj lá'azxa chee': "Wabéquezda' neda'.

Gunna' late weaj chee xezr la xu chee benne' Siquem,  
ne gudxixra' chee xezr la xu de cuita xegu Sucot.

7 Chia' naca xezr la xu Galaad, ne chia' naca xezr la xu  
chee zri'ine zre sua Manasés.

Xezr la xu chee zri'ine zre sua Efraín naca na ca  
tu da napa chi'i na xíchaja'.

Xezr la xu chee zri'ine zre sua Judá naca na naga dxenná be'a.

8 Xezr la xu chee benne' Moab naca na ca tu

zriga' da xuzru nisa guná'a,

na' xezr la xu chee benne' Edom guchichan' nen zrela'.

Si'a ba neza xezr la xu chee benne' Filistea."

9 ¿Nuzra che' neda' chee guzétaja' xezre da naxechaj na  
ze'e sibe?

¿Nuzra che' neda' chee guzétaja' benne' Edom ca'?

10 ¿Quegá Lue' na' che'u neda', Dios, nacu' Bénnea'  
bzue' netu' chalá'ala,

ne quebe guxeájlenu' benne' cheentu' ca', benne' dxjaque'  
wedil-la?

11 Gúcale netu' chee séquentu' tíl-lalentu' benne' ca'  
dxeledíl-lalene' netu',

lawe' da naca dácheze xelácale bénneache netu'.

<sup>12</sup> Tu zren nen Dios gundxu tu da zrente,  
na' Le' gulague' benne' ca' dxeledíl-lalene' dxi'u.

## 61

<sup>1</sup> Bene, Dios, da dxuláwizra' Lue'.

Bze naga da dxuchálajlena' Lue'.

<sup>2</sup> Zitu' naga zua lazria' dxuláwizra' Lue', lawe' da dxedú lazra'.

Guché' neda' naga zua Bénnea' naque' ca tu xi'a xiaj,

Bénnea' nácadxe' szren ca neda',

<sup>3</sup> Nacu' Lue' Benne' nuxrue' neda',

ne nacu' ca tu ze'e xiaj da dxucu'uj na neda' lau benne' ca'

dxeledábague' neda'.

<sup>4</sup> Tu súazqueza' lu xu'u lá'azxa chiu'.

Sua chawa'a cuitu' Lue' ca zaj zua chawe' bedxuj dxé'enedu ca'

zran xrila bedxuj.

<sup>5</sup> Lawe' da bennu' Lue', Dios, ca da guchebe lazra' chiu',

benu' napa' ca da dxelapa benne' ca' dxelezrebe' Lue'.

<sup>6</sup> Gunu' gaca bana' neda', wenná bea, zánete zra.

Iza chia' xelaca na ca da zaj naca chee chupa cuen bénneache.

<sup>7</sup> Tu súazqueza' lau', Dios.

Bcueza xel-la' dxexache lazre' chiu', ne da li

chee xulucá'ana chawe' na neda', wenná bea.

<sup>8</sup> Caníqueze gúl-laqueza' chee lau' tu chí'izqueze,

ne gúnqueza' tu zra tu zra ca da guchebe lazra'.

## 62

<sup>1</sup> Tuze nen Dios dxebeza zri lazre' bénne'du xu'a.

Léqueze' dxuselé' neda'.

<sup>2</sup> Tuze Le' dxucu'uje' neda', ne dxuselé' neda'.

Naque' Bénnea' dxuxre' neda', na' quebe negue lazra'.

<sup>3</sup> Ajatezcha' gucuézale da gunle chee tu benne',

na' dxunle ba xen xúgutele guzria' xile le',

ca dxun tu benne' dxuchínnaje' tu ze'e da ba de chalá'ala,

u tu le'aj da ba guzru'?

<sup>4</sup> Dxunle tuze dizra' ájazra xebéajle neda' lu xel-la' szren chia'.

Nazrí'ile da wen lazre'.

Nen dxú'ale dxennele da xrlátaje, san xu'u lázrdaule da calela.

<sup>5</sup> Lue', bénne'du xu'a, guleza lazre' tuze Dios,

lawe' da naca Le' Bénnea' dxebeza lazra'.

<sup>6</sup> Tuze Le' dxucu'uje' neda', ne dxuselé' neda'.

Naque' Bénnea' dxuxre' neda', na' quebe negue lazra'.

<sup>7</sup> Naca Dios Bénnea' dxuselé' neda', ne naque' da ba neza chia'.

Naca Dios Bénnea' dxucu'uje' neda', ne Benne' dxuxre' neda'.

<sup>8</sup> Le cueza lazre' Le' tu chí'izqueze, le'e, bénneache.

Le xe'e ca da dxezá lázrele.

Naca Dios Bénnea' dxuxre' dxi'u.

<sup>9</sup> Da líqueze, da dácheze zaj naca bénneache,

ne ca tu da wen lazre' benne' zren ca'.

Quebe bi dxelé'e lu lu zrgú'unsá.

Zaj nácadxe' zraze ca tu be' da dxecá'a lázredxu.

<sup>10</sup> Quebe guxrén lázrele da sile gate dxexúbele,

ne quebe gucá'ana szren cuínale chee da ca' dxebanle.

Che dxegula xel-la' gunní'a chee, quebe xezaca ba lázrele

chee da na'.

<sup>11</sup> Tu lásaze gunná Dios:

na' chupa lasa benda' da nigá:

Chee Dios naca xel-la' waca.

<sup>12</sup> Chiu' Lue', Xran, naca xel-la' dxexache lazre'

lawe' da dxunézruju' lazruj chee tu tu bénneache

cáteze da zaj nune'.

## 63

<sup>1-2</sup> Dios, Lue' nacu' Dios chia'.

Dxebile bénne' du xu'a da naca chiu',  
na' bêla' dxen chia' dxezá lazre' na da naca chiu'.  
Naca chia' ca zúaqueza' tu xęzr la xu bizre naga  
quebe bi nisa dę.

Dxani' siseze xida' lau Lue' cheę le'eda' xel-la' waca chiu',  
ne xel-la' szren chiu',

cáteze ba ble'eda' da naca chiu' lu lataj lá'azxa chiu'.

<sup>3</sup> Cháwedxa naca xel-la' dxexache lazre' chiu'  
ca xel-la' nabánqueze.

Cheę lę na' güe lá'anaqueza' Lue'.

<sup>4</sup> Caníqueze nnia' chiu' da xrlátaje dxácate naca bana'.

Cheę gucá'ana szrena' Lau' chísaqueza' na'a.

<sup>5</sup> Xélaje bénne' du xu'a da naca na ca beše zrita,  
ne bêla' da dxánnele'ę,

na' dutę xel-la' dxebé güe lá'anaqueza' Lue'

<sup>6</sup> gate dxajsá lazra' chiu', ne dea' ga dxata',  
ne gate dxulaba lazra' ca naca chiu' gate dxennaza' chizrela.

<sup>7</sup> Lawe' da dxácalenu' neda', béle'eda' cuitu'  
ca dxelún bedxuj dxé'enedu ca' zran xrila bedzuj.

<sup>8</sup> Naca bénne' du xu'a Lue' tuze.

Nen na' u wal-la nuxru' neda'.

<sup>9</sup> Benne' ca' gulezá lazre' xuluzría xi'ę neda'  
cheajlecházie' lataj ba xa'.

<sup>10</sup> Xelebía xi'ę lu xia nalá.

Xelaque' da xelagu becu' xixre' ca'.

<sup>11</sup> Neda', wenná bea, beda' lu da naca cheę Dios.

Xegá'ana ba lá'ana núteteze benne' dxuluchínene' la',  
lawe' da xelexxuj dxu'a benne' ca' dxelenné' da węn lazre'.

## 64

<sup>1</sup> Dios, bze naga chi'a lawe' da zua' stebe dxuláwizra' Lue'.

Bxue xel-la' nabán chia' lawe' da dxezreba' bi xelún benne' ca'  
dxeledábague' neda'.

<sup>2</sup> Bache chawe' neda' cheę quebe xelún benne' węn  
da calęla chia' ca da dxelezá lazre',

ne cheę quebe xelún benne' dxelún da zrinnaj chia'  
ca da zaj nune' xelune' chia'.

<sup>3</sup> Dizra' dxuluchálaje' zaj naca na ca xia zaj nalále'ę na,  
ne dxelenné' schanni' ca dxun tu benne' dxusane'  
xaga nalá xéche'ze cheę'.

<sup>4</sup> Caní dxelenné' bagácheze cheę xelune' cheajlechaze  
benne' zaj naque' li lazre'.

Chadite dxelune' na, ne quebe bi dxelezrebe'.

<sup>5</sup> Dxelune' ba xuzre xelune' da zrinnaj da zaj nune' xelune',  
na' dxuluzúę' xralaj ca' cheę xelele' bėnneache,  
dxelenné': "¿Nuzra le'e da dxundxu?"

<sup>6</sup> Dxelílaje' ca zaj naca da zrinnaj xelune',  
ne dxelenná' xánne' ca zaj naca na.

Ca da zaj xu'u xichaj lázrdawe' zaj naca na stébele'ę  
ca zaj naca lázrdauqueze'.

<sup>7</sup> Dios gunę' benne' ca' wę' nen tu xaga nalá xéche'ze cheę'.  
Chadite xelu'ę xízrawe' zren ca'.

<sup>8</sup> Dizra' buluchalaj benne' ca' xelún na cheajlecházie',  
na' xelezrebe xúgutę bėnneache gate xelele'eng' benne' ca'.

<sup>9</sup> Nadxa xelezrebe xúgutę bėnneache, ne xuluzenne'  
ca da nun Dios,

na' xuluxúnbe'ę ca zaj naca da bęne' Lę'.

<sup>10</sup> Bėqueze benne' xrlátaje lau Xránadxu, ne guxrén lazre' Lę',

na' xelezúa lu da ba neza xúgute benne' zaj naque' li lazre'.

## 65

<sup>1</sup> Naca chiu' Lue', Dios, güe lá'anantu' Lue' lu xezre Sión,  
na' guntu' da guchebe lázrentu' chiu'.

<sup>2</sup> Lue' dxénqueznu' da dxuchálajentu' Lue',  
na' xeledá' lau Lue' xúgute bénneache.

<sup>3</sup> Nabágale'a da zrinnaj da beña',  
san Lue' dxunite lau' ca da gudábagantu' Lue'.

<sup>4</sup> Ba neza zrente naca na chee bénnea' dxeca'u Lue',  
ne dxenníu' le' gaque' chiu', chee súaqueze' lataj lá'azxa chiu'.  
Xélajquezentu' da xrlátaje da de lizru', da ca' da zaj de  
xudau' lá'azxa chiu'.

<sup>5</sup> Lu da xrlátaje chiu' gunu' da zaj naca zrente gate gunu'  
ca da dxenábantu' Lue', Dios, Benne' dxuselé' netu'.  
Xúgute bénneache zaj zra' duté xezr la xu dxelebeza lazre' Lue',  
ne cá'anqueze dxelebeza lazre' benne' dxeledéé'  
zítu'la lawe' nísadau'.

<sup>6</sup> Lué'queze dxuzúa chuchu' xi'a zren ca' nen xel-la' waca chiu'.  
Nácaquezu' Benne' wal-la.

<sup>7</sup> Dxebeche zriu' nísadau' gate dxelucu na,  
ne schaga da dxélun xejxruza chee na.  
Dxebeche zriu' benne' xezr la xu gate dxeledábage' Lue'.

<sup>8</sup> Chee le' na' benne' zaj zre'g duté xezr la xu  
xelezrebe' ca naca da zrente da dxunu'.  
Dxuzú' lu da ba neza bénneache zaj zra' du gab'i xezr la xu.

<sup>9</sup> Dxenna'u xezr la xu, ne dxesel-lu' nisa xiuj.  
Dxunu' dxúnnale'g na lina chee na.  
Nuzúaquezu' lu xezr la xu xegu ca' da zaj dele'g na nisa.  
Dxucuezu' zrua' za da xelagu bénneache,  
ca ba núnquezu' gaca na.

<sup>10</sup> Dxesel-lu' nisa xiuj naga ba zaj nune' na'.  
Dxunu' dxexaca na xu xa'a.  
Dxuculu na nen nisa xiuj na'.  
Dxunu' dxelegula chawe' da du ca' ba zaj naxaza na.

<sup>11</sup> Dxunu' dxelexezi' bénneache ba neza tu iza tu iza  
ne chee da dxunézruju',  
na' ca zaj naca beuj bza chiu' dxelunna na xiuj  
da dxun na dxelegula chawe' da zaj naza bénneache.

<sup>12</sup> Dxelunna na xiuj naga dxeledá be xixre' du ca' da dxeláguba',  
na' dxelebe' bénneache dxelelé'eng' ca bane zaj zua xi'adu ca'.

<sup>13</sup> Lache' ca' zaj zra' zrila' ca',  
na' dxu'a xégudu ca' zaj naxaza zrua' xtila,  
na' dxelebezre xa'a bénneache chiu' duté xel-la' dxelebe',  
ne dxelúl-laqueze' chiu'.

## 66

<sup>1</sup> Le gucá'ana szren Dios duté xel-la' dxebe',  
le'e zrale duté xezr la xu.

<sup>2</sup> Le gul-la ca naca xel-la' szren chee le'.  
Le gucá'ana szrene' gate dxue lá'anale Le'.

<sup>3</sup> Le xe Dios: "Dxebánele'g quezentu' ca zaj naca da nunu'."  
Ne chee xel-la' szren chee xel-la' waca chiu' xuluzúa  
xrtizru' benne' ca' dxeledábage' lue'.

<sup>4</sup> Xúgute bénneache zaj zra' duté xezr la xu xelúe  
lá'anaqueze' Lue', ne xelúl-laqueze' chiu'.  
Tu xelúl-laqueze' chee Láquezu'.

<sup>5</sup> Le da, lé'ele ca zaj naca da nun Dios.  
Da zrébedxu zaj naca da bene' chee benne' ca'  
belun' da caléla.

<sup>6</sup> Bene' bexaca nísadau' xu bizre.  
Guledé bénneache chee ní'aze' naga nedxu de tu xegu situj.

Dxu'a nísadau' na' gubéle'ēdxu lau Dios.

<sup>7</sup> Dute' xel-la' waca chee' nna be'e' chadía chacanna.

Dxuxúequeze' ca da dxelún bénneache dute' xęzr la xu.

Benne' dxeledábague' Le' quebe xezezrué'equezne' xel-la' szren.

<sup>8</sup> Le'e, bénneache, le gucá'ana szren Dios cheędxu,

ne le guzén bénneache ca da dxue lá'ana le'.

<sup>9</sup> Léqueze' bxuę' dxi'u cheę naca bandxu,

ne quebe be'e' lataj cheajcházedxu.

<sup>10</sup> Lué'queze bxu' netu' ca da bentu', Dios.

Bdeu' netu' xel-la' zi' ca dxelún bénneache dxuludé'

xia plata lu xi' cheę xegá'ana chawe na.

<sup>11</sup> Benu' xeajchú'untu' tu lu xralaj.

Bda'u cúzruntu' tu xua z'ile'e.

<sup>12</sup> Benu' guledé xíchajntu' benne' zaj zrie' bzrina' chee' ca'.

Gudentu' tu lu xi', ne tu lu nisa situj,

na' bebéaju' netu', ne bzu' netu' tu lataj naga zúantu'

lu da ba neza.

<sup>13</sup> Chú'queza' lu xu'u lizru' cheę guzézxea' béadu ca',

ne gunna' chiu' ca da guchebe lazra' guna',

<sup>14</sup> da na' guchebe lazra' ca da gunnía'

gate guzúa' lu da stébele'e.

<sup>15</sup> Guzézxea' béadu ca', be' dxelanne lau' Lue',

ne guna' cuen zren cheę zríla'du ca' lau',

ne gutia' bezre ca', ne chivo biu ca' lau'.

<sup>16</sup> Le da, xénele, xúgute'le dxezrébele Dios,

na' guzenda' le'e ca da bene' gúcalęne' neda'.

<sup>17</sup> Du lazra' bláwizra' Le',

ne bca'ana szrénqueza' Le'.

<sup>18</sup> La guzé lazra' tu da calęla,

quebe ben Xránadxu chia'.

<sup>19</sup> Da líqueze bene Dios chi'a.

Bze' nague' ca da gunábeda' Le'.

<sup>20</sup> ¡Gaca báqueze Dios!

¡Quebe bzuę' chalá'ala da bchálajlęna' Le',

san bexache lazre' neda'!

## 67

<sup>1</sup> Dios, bexache lazre' netu', ne ben da chawe' cheęntu'.

Dute' xel-la' zri'i lazre' chiu' guzúale' netu',

<sup>2</sup> cheę xelúnbea bénneache du gabí'i xęzr la xu

ca naca da dxaca lazru',

ne cheę xeleneze bénneache dute' xęzr la xu

ca dxuseláu' bénneache.

<sup>3</sup> Xúgute' bénneache dxelúe lá'anę' Lue', Dios.

Dxelúe lá'ana xúgute' bénneache Lue'.

<sup>4</sup> Le be, ne le sua lu da ba neza, le'e, bénneache dute' xęzr la xu,

lawe' da guchi'a Dios cheęle ca naca da xrlátaje,

ne guxúequeze' xúgute' bénneache.

<sup>5</sup> Xúgute' bénneache dxelúe lá'anę' Lue', Dios.

Dxelúe lá'ana xúgute' bénneache Lue'.

<sup>6</sup> Xęzr la xu nigá ba zria na lina cheę na,

lawe' da ben Dios cheędxu da chawe' cheędxu.

<sup>7</sup> Dios ba bene' chawe' cheędxu,

na' gáteteze dxal-la' xelapa bénneache Le' ba lá'ana.

## 68

<sup>1</sup> Guzé, Dios, ne beşe dinnaj benne' ca' dxeledábague' Lue',

ne ben xuluzrunnuj benne' ca' dxelecuídene' Lue'.



- 2 Ca dxun tu be', dxulaga na zren chee xi',  
ca' gulagu' benne' ca'.  
Ca dxuna xina' lu xi', ca' xelexenite benne' ca' lau Dios,  
benne' ca' dxelunę' da zrinnaj.
- 3 Xelebé benne' xrlátaje ca', ne xelezúę' lu da ba neza lau Dios,  
ne xelexritequeze' lu xel-la' dxelebé cheę'.
- 4 ¡Le gul-la cheę Dios!  
¡Le gul-la da du ca' cheę Láqueze'!  
¡Le guca'ana szren Bénnea' dxe'e xabáa, nazí le' Jah!  
¡Le be lau Le'!
- 5 Ca xra bi dxé'enedu ca', ne ca benne' dxuxúe  
nu'ula ca' zaj zue' tuze,  
naca Dios lu lataj lá'azxa naga zúaqueze'.
- 6 Dxun Dios xelezúa xrtia ljwezre bénneache quebe nu  
xrtia ljwezre' zaj zra'.  
Dxebéaje' benne' zaj xu'e lu na' benne' zitu' ca'  
cheę xelezúę' lu da ba neza.  
Benne' ca' dxeledábaga Dios zaj zue' tu lu xęzr la xu bizre.
- 7 Dios, gate bdxúaju' lau bénneache chiu',  
ne gudáu' lu xęzr la xu bizre na',
- 8 na' guzrú' xęzr la xu na'.
- Cá'anqueze gúcale'e xiuj lau Dios.  
Xí'a Sinaí guzrize na lau Dios,  
Dios cheę benne' Israel ca'.
- 9 Gusel-lu' tu nisa xiuj zíalę'e, Dios.  
Gate belexedú lazre' bénneache chiu', Lue' btipu' lazre'.
- 10 Bénneache zaj naca chiu' zaj zúaqueze' lu xęzr la xu chiu'.  
Dute da chawe' chiu', Dios, dxuxú' benne' xache' ca'.
- 11 Xránadxu Dios gusel-le' tu dizra' chawe',  
na' gulezrá' benne' zante, benne' buluzenne' bénneache  
ca naca dizra' chawe' na'.
- 12 ¡Buluzrúnnuje'!  
¡Buluzrunnuj wenná bea ca' nen  
ca naca benne' cheę dxjaque' wedil-la,  
na' benne' ca' zaj nagá'ana lu xu'u lize' belexequę'e  
da bulucá'ana benne' ca' buluzrúnnuje'.
- 13 Lácala bcache cuínale naga dxuxúele zrila' ca',  
gacu zra lánale da naca na ca xrila bgúgudu ca' da  
zaj nazí lechítaje na plata,  
na' dube' cheę xrlába' ca' zaj nazí lechítaje na oro.
- 14 Gate beše dinnaj Dios zrentę wenná bea ca' lataj na',  
na' bexruj bezxe' da bgacu na xí'a Salmón.
- 15 Tu xí'a zrentę naca xí'a Basán.  
Tu xí'a zrí'a naca xí'a Basán na'.
- 16 ¿Bizr cheę na' dxenna'le, le'e, xí'a zrí'a ca',  
xí'a na' naga dxaca lazre' Dios súaqueze'?  
Da líqueze súaqueze Xránadxu lu xí'a na' chadía chacanna.
- 17 Da zaj naché' benne' ca' lu wedil-la da napa Dios  
zánete cue' gaxúa zaj naca na.  
Xránadxu Dios zezę'e xí'a Sinaí cheę suę' lataj lá'azxa cheę'.
- 18 Begüenu' xabáa, zeche'u benne' ca' bebéaju'  
lu na' xel-la' gute,  
na' guzi'u da chawe' ca' da belunna bénneache,  
ne cá'anqueze guzúa da bęnnu' cheę benne' ca'  
guledábague' Lue',  
cheę súaquezu' ládujla bénneache, Dios, leu' Jah.
- 19 ¡Gaca ba Xránadxu!  
¡Tu zra tu zra dxusezrate' dxi'u da chawe' cheę'!

¡Naque' Dios, dxuselé' dxi'u!

<sup>20</sup> Dios, Bénnea' naque' Dios cheedxu guselé' dxi'u.  
Léqueze Xránadxu Dios guselé' dxi'u lu na' xel-la' gute.

<sup>21</sup> Da líqueze Dios gune' we' xichaj benne' ca'  
dxeledábague' Lé'.

Gune' we' xichaj benne' quebe dxulusane' ca zaj naca  
dul-la da dxelune'.

<sup>22</sup> Gunná Xránadxu: "Guna' xezrinle lázrele,  
xeza'ale lu xi'a Basán.

Guna' xeza'ale lu da situj chee nísadau', xezrinle lázrele,  
<sup>23</sup> lawe' da guna' guchuchu guléajle dxen chee benne' ca'

dxeledábague' le'e,

na' xelelé'e becu' chee dxen chee benne' ca'."

<sup>24</sup> Belelé'e bénneache ca guledá bénneache chiu' belúe  
lá'ang' Lue', Dios.

Dute xel-la' dxelebé gulu'e lataj lá'azxa chiu', Dios,  
Wenná Bea chia'.

<sup>25</sup> Benne' ca' dxelul-la zeajzrie' láwe'la,  
na' benne' zaj nu'e da dxulucuezre' zja'aque' bzé'belá.  
Ládujla zjaca nu'ula cúide'du ca' zaj núxru'be'  
da du ca' dxulusé'xebe'.

<sup>26</sup> Le güe lá'ana Dios naga zaj nazraga bénneache chee'.  
Le güe lá'ana Xránadxu, le'e nácale zri'ine zre sua Israel.

<sup>27</sup> Zaj zra' zri'ine zre sua Benjamín na', guque' benne'  
cúidedxa, na' dxelenná be'e.

Zaj nazraga benne' xíchaje chee zri'ine zre sua Judá na',  
ne benne' xíchaje chee zri'ine zre sua Zabalón,  
ne benne' xíchaje chee zri'ine zre sua Neftalí.

<sup>28</sup> Dios, ble'e lau xel-la' wal-la chiu'.

Bzua chacha, Dios, da na' ben'u' cheentu'.

<sup>29</sup> Ne chee xel-la' szren chee xudau' chiu' da zua na  
xezre Jerusalén,

xelegú'u benne' wenná bea ca' da xelunne' lau'.

<sup>30</sup> Gudil-la benne' dxjaque' wedil-la chee dute xezr la xu  
zaj nazrague' chee xeledíl-lalene' Lue',

benne' ca' zaj naque' ca bezre zan ca' nen biadu cheeba' ca',  
cadxa xuluzúa xúgute' dízra' chiu',

na' xelunne' ca naca xia plata da zaj nape'.

Beše dinnaj benne' dute xezr la xu dxelexezaca ba lazre'  
xelezúe' lu wedil-la.

<sup>31</sup> Xelelá' benne' xíchaje chee xezr la xu Egipto.

Benne' xezr la xu Etiopía xelune' ba xen xulucá'ana szrene' Dios.

<sup>32</sup> ¡Le gul-la chee Dios, le'e zrle du gabí'i xezr la xu!

¡Le gul-la chee Xránadxu!

<sup>33</sup> ¡Le gul-la chee Bénnea' dxe'e xabáa na'ala,  
da zua na nédxute'!

¡Le nna' xque, wanné', ne zízrajle'e nne'!

<sup>34</sup> ¡Le nne' nápalé'e Dios xel-la' waca!

¡Lu xel-la' szren chee' dxuxúequeze' benne' Israel ca',  
na' zran xabáa nalá' xel-la' waca chee'!

<sup>35</sup> Benne' zrébentu' nacu' Lue', Dios,  
naga zu' lataj lá'azxa chiu'.

Dios chee benne' Israel ca', Léqueze' dxutipe' lazre'  
bénneache chee'.

¡Gaca ba Dios!

## 69

<sup>1</sup> Bselá neda', Dios.

Naca' ca tu benne' dxepe' lu nisa.

<sup>2</sup> Naca' ca tu benne' xu'e lu guzra' situj, ne quebe dxaca se'e.

Naca' ca tu benne' xu'ę lu nisa sítuję'e,  
na' nisa na' ba dxacu na xíchaje'.

<sup>3</sup> Ba dxajxréqueda' lawe' da ba gunnéę'e, ne ba da lba'a.  
Ba dxelátetę lawa' dxenná'a gácalę Dios neda'.

<sup>4</sup> Ba naxándxa benne' dxelecuídeng' neda' ca naxán  
xicha xíchaja', ne quebe bi de bi nuna'.

Zaj naca benne' wál-lalę'e benne' dxeledábague' neda',  
benne' ca' dxuluzría xi'ę neda', ne quebe bi de bizr cheę na'.  
¿Dxal-la' quízruja' da quebe gulana'?

<sup>5</sup> Dios, nézqueznu' Lue' naca da xálaze da nuna',  
ne dxelé'eqeznu' dul-la da bęna'.

<sup>6</sup> Quebe gu'u lataj xelexedué'e ne chia' neda' benne' ca'  
dxuluxrén lazre' Lue', Xrana' Dios szrente.

Quebe gu'u lataj xeleque zréaje ne chia' neda' benne' ca'  
dxelebeza lazre' Lue', Dios cheę benne' Israel ca'.

<sup>7</sup> Lawe' da nazrí'ida' Lue' bulucháchalęę' neda',  
na' lu xel-la' stu' zúaqueza'.

<sup>8</sup> Ca tu benne' zitu' naca' lau bi bícha'dau' ca',  
ne quebe zaj núnbea bi cheę xrna'a neda'.

<sup>9</sup> Lawe' da dxé'le'a gunne xue cheę lizru' dxal-la na  
lu lázrdawa'.

Gate dxelenné' benne' ca' schanni' chiu' Lue', Dios,  
naca ca dxelenné' schanni' chia' neda'.

<sup>10</sup> Gudxezra', ne bęna' gubasa, na' bde cuina' xel-la' zi',  
na' cheę le na' bulucháchalęę' neda'.

<sup>11</sup> Cá'aqueze bgacu cuina' zra lana' tuzruj.

Buluzúę' neda' ca tu da dxulé'e na da baxache' zrente.

<sup>12</sup> Gulenné chia' benne' ca' zaj xu'ę xu'u lawe',  
na' benne' ca' dxelezuzre' belún le' chia' lu da belul-ę'.

<sup>13</sup> Neda' bláwizra' Lue', Xrana' Dios, lu zra  
dxezaca ba lazru' Lue'.

Dios, lu xel-la' dxexache lazre' zren chiu', ne lawe' da  
líqueze nacu' weselá cheętu', bene chia'.

<sup>14</sup> Bebéaj neda' lu da stębe zua', naca' ca tu benne'  
xu'ę lu guzra' sítuj, ne quebe gu'u lataj cházedxa'.

Bselá neda' lu na' benne' ca' dxelecuídeng' neda'.

Naca' ca tu benne' xu'ę lu nisa sítuj.

<sup>15</sup> Quebe gu'u lataj gatía' ca tu benne' xegache' lu nisa sítuj,  
ne quebe gaca' ca tu benne' chu'ę lu da sítuj,

ne quebe gaca' ca tu benne' cheajchazię' tu lu xędxu sítuj.

<sup>16</sup> Bechebe chia', Xrana' Dios, lawe' da chawe' naca  
xel-la' dxexache lazre' chiu'.

Gudá, gúcalę neda', lawe' da zrente naca xel-la'  
dxexache lazre' chiu'.

<sup>17</sup> Gunná' xque ca da dxaca chia' neda', wen zrin chiu'.  
lawe' da zua' lu da stębelę'e, ben ba xuzre xennu' chia'.

<sup>18</sup> Gudá naga zua', ne bselá neda'.

Bselá neda' lawe' da zaj naxánle'ę benne' ca'  
dxeledábague' neda'.

<sup>19</sup> Lue' nézqueznu' ca dxulucháchalęę' neda', ne ca zua'  
lu da stębelę'e, ne ca dxulucá'ana dítaje' neda'.

Dxelé'eqeznu' xúgutę benne' ca' dxelecuídeng' neda'.

<sup>20</sup> Lawe' da dxelún le' chia' dxedú lazra', ne zua' lu da stębe.

Guleza' nu benne' xexache lazre' neda', san quebe nu chilá'.

Guleza' nu benne' xelexúę zrene' neda', san quebe nu chilá'.

<sup>21</sup> Bulugawę' neda' da sla',

na' gate gubíleda', buluxí'aje' neda' da zichaj.

<sup>22</sup> Ca naca laní cheę benne' ca' ben gaca na ca tu

xralaj naga cheajlecházię',

ne ben xexaca da ba neza cheę' tu da gun na cheajlecházię'.

23 Ben xelechul-la xiaj lawe' chee québedxa xelelé'eng',  
ne ben tu xelexrízrezqueze benne' ca'.

24 Dute xel-la' dxezrá'a chiu' ble'e benne' ca',  
ne dute xel-la' xichaj zra'a chiu' be' benne' ca'.

25 Ben quebe nu chilá' lu xu'u lizre benne' ca',  
ne quebe nu sua lu xezr la xu chee',

26 lawe' da guláu zi' xuzre' bënnea' benu' Lue' we',  
ne dxuluzrízre' ca naca xel-la' zi' dxedé bënnea' be'u Lue'.

27 Ble'e dul-la da zaj nabaga benne' ca',  
ne quebe gu'u le' lataj xelaque' tuze benne' xrlátaje chiu'.

28 Busula la benne' ca' lu xiche chee' benne' ca'  
zaj nape' xel-la' nabán,

ne quebe guzúaju' le' naga zaj naxúaj la benne' xrlátaje ca'.

29 Neda' zua' lu da ba xa', ne lu da stébele'e.

Bselá neda', Dios, ne bechisa neda'.

30 Gúl-laqueza' da güe lá'ana' La Dios chia'.

Gucá'ana szrena' Le' nen da dxue lá'ana' Le'.

31 Da nigá xezaca ba lázredxa Dios ca tu bezre, be gutia' lawe',  
u ca tu me', béadu zaj zua lúzuba', ne xrúguba'.

32 Xelelé'equeze benne' baxache' ca' da nigá, na' xelebene'.

Le biga lau Dios, na' gaca bánquezle,

33 lawe' da dxene Xránadxu benne' ca' dxelexázejeng',  
ne quebe dxuzúe' chalá'ala benne' chee' ca', benne'  
zaj xu'e lizre xia.

34 Le güe lá'ana Le', le'e zrle xabáa, ne le'e, zrle lu xezr la xu,  
ne le'e zrle lawe' nísadau', ne cá'anqueze xúgute  
da zaj naca ban xúgute lataj caní.

35 Dios guselé' benne' zaj zre'e xezre Sión,  
ne xexune' xezre ca' zaj zra na lu xezr la xu chee'  
benne' Judá ca',

na' tu xelezúazqueze' na', ne gata' chee' xezr la xu na'.

36 Zri'ine zre sua benne' wen zrin chiu' ca', gaca  
chee' xezr la xu na',

na' benne' ca' zaj nazrí'ing' Lau' Lue' xelezúe' na'.

## 70

1 Bselá neda', Dios.

Gúcalęche neda', Xran.

2 Ben xelexedué'e, ne xelezúa lu da stębe benne' ca'  
dxelaca lazre' xelútię' neda'.

Ben xelexebigę', ne xelexala benne' ca' dxelebene'  
lawe' da zua' lu da stębe.

3 Ben xelexegá'ana xala benne' ca' dxelún le' chia'.

4 Benne' ca' zá'aque' lau Lue' xelebene',  
ne xelezúe' lu da ba neza.

Benne' ca' dxelę'e Lue': "Xcalenu" lawe' da bseláu' le',  
tu dxelennázqueze': "jzrentę naca Dios!"

5 Zua' lu da stębe, ne nate ni'a na'a.

Gudázega gácalęnu' neda', Dios.

Nacu' Weselá chia', ne Xrana'.

Quebe chenu', Xran.

## 71

1 Za'a lau' Lue', Xran, chee guxru' neda'.

Ben québedxa xedué'eda'.

2 Gúcalę neda', ne bselá neda' nen dute da naca xrlátaje chiu'.

Bze naga chí'a, ne bselá neda'.

3 Nacu' ca tu xiaj xre naga sua' chawe', na' waca xida'  
naga zu' te zra chizrela.

Gunná be'enu' nu guselá neda', lawe' da nacu' Lue'

ca tu xiaj xre naga dxaca dipa lazra'.

<sup>4</sup> Dios chia', bselá neda' lu na' benne' ca' zaj nabéaj xíchaje' Lue',  
ne lu na' benne' ca' dxeluné' da calela ne zaj naque' xichaj zra'a,

<sup>5</sup> lawe' da dxebeza lazra' Lue', Xrana' Dios.

Nacu' Bénnea' dxuxúé' neda' gate nácatea' bídau'te.

<sup>6</sup> Lue' núxruquezu' neda' gate gúlajtea'.

Lue' benu' bdxuaja' lu le'e xrna'a.

¡Tu güe lá'anazqueza' Lue'!

<sup>7</sup> Belexebane benne' zante' ca naca chia',

ne ca naca chiu', dxuxúe xánniu' neda'.

<sup>8</sup> Ben tu gul-lazqueza' da güe lá'ana' Lue',

ne gucá'ana szrena' Lue' du zra.

<sup>9</sup> Quebe guzú' neda' chalá'ala gate ba guxrúa'.

Gate ba bedú lazra', quebe gusanu' neda'.

<sup>10</sup> Benne' dxeledábage' neda' dxelenné' chia',

na' benne' ca' dxelezá lazre' xelútié' neda' beluné' tuze dizra',

<sup>11</sup> dxelenné': "Ba bsan Dios le'.

Chéajdxu cheajtéladxu le' lawe' da québedxa nu zua  
nu guselá le'."

<sup>12</sup> ¡Dios, quebe su' zitu' naga zua'!

¡Dios chia', gudázega gácalenu' neda'!

<sup>13</sup> ¡Ben xelexedué'eng'!

"Ben xelexenite benne' ca' dxeledábage' neda'."

"Ben xelezúa xel-la' stu', ne xeleque zrêaje benne' ca'  
dxelezá lazre' xeluné' chia' da calela."

<sup>14</sup> Neda' tu cueza lázrezqueza' Lue',

ne tu güe lá'anazqueza' Lue'.

<sup>15</sup> Guzenda' bënneache nacu' xrlátaje,

ne tu guzénzqueza' le' ca da benu' bseláu' neda',

láqueze quebe nezda' bal-la lasa bseláu' neda'.

<sup>16</sup> Tu guchálajzqueza' chee' da zrenté da benu' Lue',

Xrana' Dios,

ne gusá'ala lazre' bënneache chee' da xrlátaje cheéquezu'.

<sup>17</sup> Dios, Lue' bsédenu' neda' gate nácatea' bídau'te.

Dxulé'eda' bënneache ca naca da zrenté da benu'.

<sup>18</sup> Dios, quebe gusán lazru' neda' gate bache guxrúa',

ne ba bgucha'.

Be' neda' lataj guzenda' zri'ine zre sua' ca naca

xel-la' waca chiu',

ne guzenda' bi za xelalaj ca naca xel-la' wal-la chiu',

<sup>19</sup> ne ca naca da xrlátaje chiu', da naca na da zrenté, Dios.

Lue' ba benu' da zaj nácale'e na zrenté.

Dios, ¿Núzraqueze ca Lue'?

<sup>20</sup> Lue' benu' gudéa' lu da stebe zante, ne lu da calela ca',

na' gunu' xexaca bana', na' da xula xechisu' neda' lu xedxu ba.

<sup>21</sup> ¡Gucá'ana szrendxu' neda',

ne xue zrénquezu' neda'!

<sup>22</sup> ¡Cá'anqueze güe lá'anaqueza' Lue', quínnia' da gul-lalena'!

¡Dios chia', gúl-laqueza' chee' da li chiu', quínnia'

da du' zriadi'i na du'!

¡Nacu' Benne' Lá'azxa chee' benne' Israel ca'!

<sup>23</sup> ¡Sua' lu da ba neza gate gúl-laqueza' chiu' Lue',

ne béqueze bënne'du xu'a, bënne'du' bexa'u'!

<sup>24</sup> ¡Tu guchálajzqueza' chee' da xrlátaje chiu' te zra chizrela,

lawe' da benu' belexedué'e, ne guleque zrêaje

benne' ca' beluné' ba xuzre xeluné' chia' da calela!

## 72

<sup>1</sup> ¡Dios, ben guchi'a wenná bea da dxaca cheentu'

ca dxuchí'aquezu' Lue',

ne ben xelaca xrlátaje zri'ine wenná bea na'!

<sup>2</sup> Nadxa le' guchi'a chee' bënneache chiu' ca naca

da naca xrlátaje,  
 ne ca naca da li guchi'ê chee benne' chiu' ca' zaj zue'  
 lu da ba xa'.  
<sup>3</sup> Lu xi'a ca' xebeza zri lazre' bënneache chiu',  
 ne lu xi'adu ca' xelezúe' lu da naca chawe'.  
<sup>4</sup> Guchi'ê chee benne' ca' zaj zue' lu da ba xa'  
 lu xezre cheentu',  
 ne guselé' bidu ca' chee benne' ca' dxelexázejene',  
 ne guzríá xi'ê benne' ca' dxulusaca zi'ê bënneache.  
<sup>5</sup> Xelezrebe' Lue' dxácatê ne zua gubizra,  
 ne beu' lawe' tu cuen tu cuen bënneache.  
<sup>6</sup> Gaca wenná bea na' ca nisa xiuj da dxaca naga ba nadín,  
 ne ca xrlê'êla da dxaca dxêla lu xezr la xu.  
<sup>7</sup> Lu zra chee wenná bea na' gaca da xrlátaje,  
 ne xebeza zri lazre' bënneache dxácatê ne zua beu'.  
<sup>8</sup> Nna be'ê dutê xezr la xu,  
 ne dxu'a xegu Eufates, ga zrintê dxu'a nísadau'.  
<sup>9</sup> Lau le' xuluzú zribe benne' ca' zaj zre'ê xezr la xu,  
 na' guzêxruje' lazre' benne' guledábague' Le'.  
<sup>10</sup> Benne' wenná bea chee xezr la xu Tarsis,  
 ne wenná bea ca' chee tu tu cue' xezr la xu zitu' ca'  
 xeelé'ê zaj nu'ê da xulunézruje' chee',  
 na' benne' wenná bea chee xezr la xu Sabá,  
 ne wenná bea chee Seba xulunézruje' chee' da gunní'a.  
<sup>11</sup> Xúgute benne' wenná bea ca' xuluzú zribe' lau le',  
 na' benne' xúgute cue' xezr la xu xelune' zrin chee'.  
<sup>12</sup> Le' guselé' benne' ca' dxelexázejene',  
 benne' dxululáwizre' le',  
 ne guselé' benne' ca' zaj zue' lu da ba xa',  
 ne quebe sua nu benne' gácalene' le'.  
<sup>13</sup> Xexache lazre' benne' xache' ca', ne benne' ca'  
 dxelexázejene',  
 na' guselé' benne' xache' ca' chee xelaca bang'.  
<sup>14</sup> Xexá'awe' benne' xache' ca' lu na' benne' wên lazre' ca',  
 ne benne' snia ca'.  
 Gune' ba xuzre guselé' benne' ca' lu na' benne' ca'  
 dxelutiê' benne'.  
<sup>15</sup> Gaca ban wenná bea nigá,  
 na' xulunézruje' chee' oro chee xezr la xu Sabá,  
 na' tu xelenábazqueze bënneache Dios gácalene' le',  
 ne te zra chizrela xelenabe' Dios gune' gaca chawe'  
 chee wenná bea na'.  
<sup>16</sup> Tu zrígadauze zrua' xtila xelaze' lu xezr la xu,  
 ne lu xi'adu ca',  
 da cuíalê'ê na ca da dxebíá lu xi'a Líbano,  
 na' benne' zaj zre'ê lu xezre ca' xelane' ca' xixre' zê lu xezr la xu.  
<sup>17</sup> Tu súazqueze la benne' wenná bea na'.  
 Tu xuluchálajzqueze' chee' la le' dxácatê ne zua gubizra.  
 Ne chee le' gaca da ba neza chee bënneache xúgute  
 cue' xezr la xu,  
 na' xelenné' chee' naca chee' da ba neza zrentê.  
<sup>18</sup> Xrlátaje naca Xránadxu Dios, Dios chee benne' Israel ca',  
 na' tuze Le' dxunge' da dxexebánedxu.  
<sup>19</sup> Xrlátaje naca La Le' da naca na da xabáa chadíá chacanna,  
 na' dutê xezr la xu nigá xeelé'ene' da xabáa chee'.  
 ¡Ca'an naca na, ne ca'an gaca na!  
<sup>20</sup> Nigá dxexuzre xrtizra' David, da dxuchálajlene' Dios.  
 David nigá naque' zri'ine Isái.

## 73

<sup>1</sup> Da líqueze ba ben Dios da chawe' chee benne' Israel ca',  
 benne' ca' zaj naque' du lazre' lau Dios.

<sup>2</sup> Neda' ba guzúa cheajcházia' lu dul-la.

Ba guzúa guna' tu da zrinnaj,

<sup>3</sup> lawe' da guca' zre'e lazre' ne chee benne' gunní'a ca',  
gate ble'eda' ca dxelepe ban benne' ca' zaj nabéaj xíchaje' Dios.

<sup>4</sup> Benne' caní quebe zaj zué' stébe chee xel-la' gute,  
lawe' da zaj zúale' chawe'.

<sup>5</sup> Quebe dxeledé' lu da ba xa' ca da dxeledé xúgute benne' ca',  
ne quebe dxelezaca zi'e ca da dxaca chee xezícadxa bénneache.

<sup>6</sup> Chee le' na' dxulucá' ana szren cuine'.

Tu dxelexúbezquezne' dxelune' da calela.

<sup>7</sup> Dxelánnie' lawe' da dxelagu cháwele'e.

Dxelezíle'e ca naca da dxelezá lazre'.

<sup>8</sup> Dxelún le' chee Dios, ne dxeleenné' calela ca da zrinnaj  
da xelune'.

Dute xel-la' dxulucá' ana szren cuina dxuluchálaje' da zrente'.

<sup>9</sup> Dxeleenné' chee da ca' zaj zua xabáa,

ne dxuluchálaje' ca benne' zaj nape' dute xezr la xu.

<sup>10</sup> Chee le' na' xúgute bénneache dxelune' le' tu zren,

ne dxelezi'e ca da dxeleenná benne' gunní'a ca'.

<sup>11</sup> Dxeleenná benne' ca' dxelune' da calela:

“¿Ájazra gaca neze Dios?

¿Dxelé'equeze Bénnea' zué' na'ala?”

<sup>12</sup> Benne' caní zaj naque' benne' zaj nabéaj xíchaje' Dios,  
na' dxelepe bane' lu xezr la xu, ne dxelaque' gunní'a.

<sup>13</sup> Da líqueze, dácheze naca guca' du lazre',  
ne quebe bi da calela nuna'.

<sup>14</sup> Gudéa' lu da ba xa' tu zra tu zra,

ne gudéa' xel-la' zi' xúgute zra.

<sup>15</sup> La nnia' neda': Guchálaja' ca dxuluchalaj benne' ca',  
na' si xe'a bénneachedu ca' chiu', Dios.

<sup>16</sup> Gate blaba lazra' chee chéajni'ida' da nigá,

gaca na stébele'e chia' neda'.

<sup>17</sup> Gate guxu'a lu lataj lá'azxa chee Dios,

na' guque be'eda' da gaca chee benne' ca' gate cheajsé.

<sup>18</sup> Da líqueze nunu' chee benne' ca' cheajlecházie',

ne gunu' xelebía xí'queze'.

<sup>19</sup> Chadite' gulebía xí'queze'.

Belexenite' lu xel-la' gulezrébele'e.

<sup>20</sup> Zaj naque' ca tu da ble'edxu lu xela da dxexenite na  
gate dxexebandxu.

Ca'an gaca, Xran, gate chasu', guzú' chalá'ala ca da  
gulaca benne' ca'.

<sup>21</sup> Gate guca' zre'e lazre' chee benne' ca',

guzúa lázrdawa' lu da stébe.

<sup>22</sup> Lawe' da guca' xichaj zide', na' quebe guxéajni'ida'

guca' ca tu be xixre' lau Lue'.

<sup>23</sup> Tu guzúazqueza' nen Lue', na' guca' u na'a xabela.

<sup>24</sup> Bsi' u neda' chee guna' da dxulé'enu' neda',

na' te nigá xezí' lu na' u neda' lu xabáa chiu'.

<sup>25</sup> Quebe nu xetú zua chia' xabáa san tuzu' Lue',

ne quebe nu xetú dxezá lazra' lu xezr la xu, san tuzu' Lue'.

<sup>26</sup> Dxelexedú lazre' b'ela' dxen chia', ne lázrdawa'.

Dios naque' Benne' dxutipe' lazra',  
ne naque' da ba neza chia' chadía chacanna.

<sup>27</sup> Benne' ca' dxelexecuase' naga zu' xelexenítie'.

Guzría xi' u xúgute benne' ca' xelexebeaj xíchaje' Lue'.

<sup>28</sup> Ca naca chia' neda', dxaca chawe' chia' lawe' da gubiga'  
lau Dios.

Tu dxebeza lázrequeza' Xránadxu Dios,

chee guchálajqueza' ca naca da zrente' da nune'.

## 74

- 1 Dios, ¿tu chí'izqueze nuzú' netu' chalá'ala?  
 ¿Dxezra'u netu', nácantu' ca zrila' chiu' ca'?
- 2 Bsá lazre' bénneache chiu', benne' ca' guzi'u nédxudaute.  
 Benne' ca' bexa'u cheę gunu' xelaque' benne' cheęquezu',  
 benne' ca' zaj zře'ę lu xi'a Sión nigá, naga zúaquezu' Lue'.
- 3 Gudá xedajnná'u ca nabía xi' xezre nigá,  
 ne ca naca da calela da belún benne' ca'  
 dxeledábage' netu', lu lataj lá'axza chiu'.
- 4 Dxelebezre xa'a benne' ca' dxeledábage' Lue'  
 laduj naga zaj nazraga bénneache chiu'.
- Zaj nuzú' nigá da dxululé'e na xu'untu' lu na' benne' ca'.
- 5 Buluzría xi'ę xezre nigá,  
 ca dxun tu benne' dxinę' ca naca xaga zaj zę tu xi'a.
- 6 Na'a nen xa waga cheę' ca', ne nen xaga cheę' ca',  
 ba buluzría xi'ę ca naca lechítaję cheę xudau' chiu'.
- 7 Ba buluzézxie' lataj lá'axza chiu'.
- Bulucá'ana dítaję' xu'u lizru'.  
 Buluchínnaję' na.
- 8 Lu lázrdawe' gulenné': "Guzría xí'tegadxu na tu chí'ize."  
 Ba buluzézxie' xúgute' xu'u naga bezrágantu' chiu'  
 lu xęzr la xu chiu'.
- 9 Québedxa dxelé'entu' da la'axza ca' da dxululé'e na  
 da guchísantu' lu xęzr la xu cheętu'.
- Québedxa nu chilá' benne' guchálaję' waláz chiu',  
 ne quebe nu zua ládujla netu', benne' nézene' bátaqueze lantu'.
- 10 Dios, ¿Báta cueza na xulucháchalę benne' ca' netu',  
 benne' ca' dxulusaca zi'ę netu'?
- ¿Chadía chacanna welenné' benne' dxeledábage' lue'  
 schanni' cheę Lau'?
- 11 ¿Bizr cheę na' quebe dxebéaj lazru' benne' ca'?
- ¿Bizr cheę na' quebe dxuzría xi'u benne' ca' dxelunę' da calela?
- 12 Lue', Dios, nacu' Wenná Bea chia' nédxudaute.  
 Lué'queze dxuseláu' bénneache dutę xęzr la xu.
- 13 Xel-la' waca chiu' bęnu' nísadau' chupa la'a.  
 Gula'u xichaj bę schanni' ca' lu nísadau'.
- 14 Bzúzruju' xichaj bę schanni' lęba' leviatán,  
 Na' bęnu' gulagu bę xixre' lęba', bea ca' zaj zraba' lu xu bizre.
- 15 Bęnu' gulaj nisa beaj, ne nisa xęgu ca'.  
 Bsebızru' xęgu zri'a ca'.
- 16 Chiu' Lue' naca te zra, ne cá'anqueze chiu' naca dxęla.  
 Lue' bzu' beu', ne gubızra naga dxeledé na.
- 17 Lue' bzu' tu chí'ize ca naca da zaj dę xęzr la xu nigá.  
 Lue' bęnu' beu' la ca', ne beu' zaga ca'.
- 18 Bsa lazre' da nigá: Benne' ca' dxeledábage' lue'  
 ba zaj nun le' chiu' Lue', Xran.  
 Benne' xala ca' ba gulenné' schanni' cheę Lau'.
- 19 Quebe gusanu' lu na' benne' zaj naque' ca bę snia ca'  
 benne' ca' nazrí'iquezu',  
 ne quebe gal-la lazru' tu chí'ize bénneache chiu' zaj  
 zuę' lu da ba xa'.
- 20 Gunná' ca naca xel-la' wezría da bęnu',  
 lawe' da gáteteze naca chul-la lu xęzr la xu,  
 na' zaj zra' benne' ca' dxelunę' da zrinnaj.
- 21 Quebe gu'u lataj xelegá'ana lu xel-la' stu' benne'  
 ca' zaj zuę' lu da baxache'.
- Benne' dxelezaca zi'ę, ne benne' dxelexázrjeng'  
 xelúe lá'anę' Lau'.
- 22 ¡Guzé, Dios!  
 ¡Bęn ca ba gunnáu'!  
 ¡Bsa lazre' ca dxelún benne' xala ca', dxelún le' chiu'  
 te zra te zra!



23 Quebe gal-la lazru' ca da gulenná benne' ca'  
dxeledábague' lue'.  
Da schaga dxelún benne' ca' dxeledábague' Lue'  
tu dxénzqueze na.

## 75

1 "Xcalenu", dxentu' Lue', Dios: "Xcalenu."  
Dxuzentu' bénneache zúalenu' netu', ne ba nunu' da ca'  
dxexebánequezentu'.  
2 Dxenná Dios: "Ba nuzúa' zra guchi'a cheę bénneache.  
Guchi'a ca naca da xrlátaje.  
3 Lácala xru' dute xęzr la xu, ne xelexrize xúgute  
da zaj naca ban na,  
neda' gúxruqueza' ca naca lane xęzr la xu na'.  
4 Dxapa' benne' xala ca': Quebe gáwele.  
Dxapa' benne' ca' dxelunę' da calęla:  
Quebe gucá'ana szren cuínale.  
5 Quebe guxrén lázrele xel-la' wal-la cheęle.  
Quebe gácale benne' lázxdau zide'."  
6 Quebe za xel-la' szren naga dxalaj gubizra,  
ne naga dxebíá na,  
ne quebe za na le'ę xixre' lawe' lataj.  
7 Dios naquę' Bénnea' guchi'ę cheę bénneache.  
Dxucá'anę' cá'aze tu benne', ne dxucá'anę' szren xetú benne'.  
8 Dios nuxre' tu zriga', da nazrate na xrise uva wal-la,  
da zeaje na xel-la' dxezrá'a cheę'.  
Dxulálaje' na cheę xelę'aj benne' ca' dxelunę' da calęla.  
Xelę'aje' na xebizrte na.  
9 Neda' guzénquezda' bénneache,  
ne gul-la' da güe lá'ana' Dios cheę Jacob.  
10 Le' guchínnajqueze' xel-la' waca cheę benne'  
węn da calęla ca'.  
Gusezrendxę' xel-la' waca cheę benne' xrlátaje ca'.

## 76

1 Zaj núnbea benne' Judá ca' Dios,  
na' ládujla benne' Israel zrentę nácaqueze La Le'.  
2 Lu xęzre Salem zua lataj lá'azxa cheę'.  
Lu xęzre Sión zua naga zúaqueze'.  
3 Lataj na' gudíchaje' xaga nalá xéche'ze ca',  
ne xia da dxucu'uj na benne' lu wedil-la,  
ne ca naca da dxuluchínene' lu wedil-la.  
4 Benne' xabáa nacu' Lue',  
ne Benne' wál-ladxa ca xi'a zri'a ca'.  
5 Xeajlechaze benne' wal-la ca', ne guláse dinnaje'.  
Netú benne' wal-la ca' quebe belexechisa ne'ę cheę  
xelunę' wedil-la.  
6 Dios cheę benne' Israel ca', gate gudil-lu' benne' ca',  
guláse dinnaj bzrina' ca', ne benne' gulebíę'-ba'.  
7 Nacu' Lue' Benne' zrébedxu.  
¿Nu benne' gaca se' lau Lue' gate dxezra'u?  
8 Xabáate gunná'u, na' guchi'u cheę bénneache.  
Dxelezrebe bénneache lu xęzr la xu, na' dxelebeze'  
9 zra seu' Lue', Dios, cheę guchi'u cheę bénneache,  
ne cheę guseláu' xúgute benne' dxexruj lazre' zaj  
zre'ę lu xęzr la xu.  
10 Da líqueze xel-la' dxelezrá'a cheę bénneache  
gaca na tu da gucá'ana szren na Lue'.  
Guzúa zriiu' xel-la' dxelezrá'a cheę bénneache zaj nagá'anę'.

11 Le cheębe lázrele da gunle cheę Dios,

na' le gun da na' chee Xránadxu, Dios cheeḷe.

Xúgute benne' zaj zre'e du gabi'la xeḷeḷ'e,  
na' xulunézruje' da zaj nu'e chee Dios,

Bénnea' dxezrébedxu.

<sup>12</sup> Guzague' da xu'u lu xichaj lázxdau benne' blau ca'.

Le' dxuchebe' benne' wenná bea ca' zaj zre'e lu xezr la xu.

## 77

<sup>1</sup> Nen chi'a bláwizra' Dios.

Bláwizra' Dios, na' Le' buzé nague' chi'a.

<sup>2</sup> Guxu'a lau Xránadxu lu zra guzúa' lu da ba xa'.

Chizrela guchisa na'a lau Le', ne quebe guzúa zria'.

Quebe be'a lataj nu benne' xue zrene' neda'.

<sup>3</sup> Bsa lazra' chee Dios, ne guzúa' stébe.

Gudawa' zria lawe', ne bedú lazra'.

<sup>4</sup> Begúe' bchigala chia'.

Guzúa' stébeḷ'e, ne quebe guca guchálaja'.

<sup>5</sup> Blaba lazra' ca naca zra nédxute.

Ca naca iza zan ca' da ba guledé chee na.

<sup>6</sup> Bsa lazra' ca naca da bil-la' chizrélala,

ne blaba lázrequeza' ca zaj naca na, na' gunaba be' xu'a:

<sup>7</sup> ¿Guzúa Xránadxu dxi'u chalá'ala tu chí'ize

ne québedxa gácalene' dxi'u?

<sup>8</sup> ¿Cabátadxa xexache lazre' dxi'u?

¿Cabátadxa guné' ca da guchebe lazre'?

<sup>9</sup> ¿Gul-la lázrequeze Dios xexache lazre' dxi'u?

¿Dxezré'e dxi'u, na' québedxa xexache lazre' dxi'u?

<sup>10</sup> Nadxa gunnía': Caní dxuna' lawe' da quebe chawe' zua'.

Chee le' na' cheajsá lazra' chee xúgute da zrente

da ben Dios zrente lu iza ba guledé chee na.

<sup>11</sup> Cheajsá lazra' chee da zrente ca' da ben Jah.

Awe', cheajsá lazra' chee da benu' nédxudate da ca'  
dxexebánentu'.

<sup>12</sup> Gulaba lazra' ca naca xúgute da ba benu',

ne guchálaja' ca zaj naca da nunu'.

<sup>13</sup> Dios, lá'azxa naca da dxusédenu' netu' ca guntu'.

¿Zua xetu' Dios naque' benne' zren ca naca Dios cheentu'?

<sup>14</sup> Lue' nacu' Dios, dxunu' da ca' dxexebánentu'.

Blé'enu' xúgute bénneache lu xezr la xu ca zrente  
naca xel-la' waca chiu'.

<sup>15</sup> Nen xel-la' waca chiu' bexa'u bénneache chiu',

zri'ine zre sua Jacob, ne zri'ine zre sua José.

<sup>16</sup> Xegu nisa ca' belelé'en Lue', Dios.

Belelé'e xegu nisa ca' Lue', na' belezrébeḷ'e na.

Cá'anqueze gulezúa stébe nísadau' situj ca'.

<sup>17</sup> Nisa xiuj zila bdxuaj na lu beuj bza ca',

ne gulennéḷ'e guziu', ne gulépeḷ'e xesa.

<sup>18</sup> Lu be' bdonu' ben guziu' chiu' da gunnéḷ'e na.

Bulusaní' xesa guziu' ca naca xezr la xu.

Guzúa stébe, ne guzrize xezr la xu.

<sup>19</sup> Lawe' nísadau' guza'u,

ne lawe' nisa zila ca' gudéquezu',

ne quebe naca bea naga bléaju'.

<sup>20</sup> Guche'u bénneache chiu' ca zrla' ca'

lu na' Moisés, ne lu na' Aarón.

## 78

<sup>1</sup> Le xen, le'e, bénneache chia', ca da dxusédeda'.

Le xen xanne' ca da dxuchálaja'.

<sup>2</sup> Guchíneda' dizra' ca da dxuluchalaj benne' sina ca',

na' guzéajni'ida' le'e da ca' gulezúa na bagácheze gate nate,

- 3 da ca' bendxu, ne bėnbeadxu na,  
da ca' belixru be'e xra xrtáudxu ca' dxi'u.
- 4 Quebe gucáchedxu na lau zrí'inedxu ca'.  
Guzénquezdxu zrí'inedxu ca' ca naca xel-la' szren  
cheę Xránadxu,  
ne ca naca xel-la' waca cheę', ne ca zaj naca da zren ca'  
da bęne'.
- 5 Bzue' tu da nadxixruj bea na da xelún benne' Israel ca',  
ne da bdxixruj be'ene' ca' da xelún zri'ine zre sua Jacob.  
Gunná bé'ene' xra xrtáudxu ca' xuluzenne' bi cheę' ca'  
ca naca da gunná bé'ene',
- 6 cheę xelúnbea zrí'ine' bidu ca' za xelálajbe' ca naca na,  
na' bi caní xuluzenbe' zrí'inebe' da na',
- 7 cheę xuluxrén lázrebe' Dios,  
ne quebe xelal-la lázrebe' da ca' bęn Dios,  
ne cheę xuluzúabe' dizra' da ca' gunná be'e.
- 8 Quebe xelácabe' ca gulaca xra xrtáube' ca'.  
Benne' ca' quebe buluzúe' dizra' cheę', ne guledábague' Le',  
ne quebe buluzúa chúchue' ca buluxrén lazre' Dios,  
ne quebe gulaque' li lazre' lu da naca cheę Dios lu  
be' zaj nácaqueze'.
- 9 Benne' zrí'ine zre sua Efraín, benne' zaj nu'e  
da dxuluchínene' lu wedil-la  
buluzrúnnuje' naga dxaca wedil-la.
- 10 Quebe belunę' ca naca xel-la' wezría da bęn Dios,  
ne quebe buluzúe' dizra' da gunná bé'ene'.
- 11 Gulal-la lazre' da ca' bęn Dios,  
ne xel-la' waca ca' blé'ene' Le'.
- 12 Lau xra xrtawe' ca' bęne' xel-la' waca ca'  
lu xezr la xu Egipto, ne lu xezr la xu Zoán.
- 13 Gusalje' neza lu nísadau' naga guledé benne' ca'.  
Bęne' nísadau' na' ca xi'a ca' chalá'a weaj.
- 14 Te zra blé'ene' benne' ca' neza nen tu beuj bza da xjácaleņe',  
ne chizrela nen beuj bza da naca na ca tu xi'.
- 15 Gulé'e xiaj ca' naga naca xu bizre,  
na' bxi'aje' benne' ca' nisa da gulaj na le'e xiaj ca'  
ca tu xegu nisa.
- 16 Bęne' gulaj tu xegu nisa le'e xiaj na',  
na' bzriluj na ca tu xegu zren.
- 17 Lácala bęne' caní belúndxaqueze' dul-la lau Dios  
le'e xixre' lawe' lataj,  
ne guledábague' Dios napę' dute xel-la' szren.
- 18 Gulegú'u lazre' xulu'zúa zrie' Dios.  
Gulenabę' xelawe' ca da dxelezá lazre' le'.
- 19 Gulenné' cheę Dios, gulenné':  
¿Wazeque Dios na' gunne' da gágudxu le'e xixre' nigá?
- 20 Da líqueze gulé'e xiaj na', na' gulaj nisa na',  
na' bzriluj na ca tu xegu zren.
- ¿Wazęquequezne' gunne' dxi'u xeta, ne gunne' bęla'  
da gágudxu?
- 21 Cheę le' na' bzra'a Xránadxu gate benne' da na',  
ne gusel-le' xi' da bzezxe na bal-la bėnneache cheę',  
na' bsedxi'ule'e xel-la' dxezrá'a cheę' nen benne' Israel ca',
- 22 lawe' da quebe guléajle'e cheę Dios,  
ne quebe buluxrén lazre' Le' guselé' le'.
- 23 Gunná bé'ene' beuj zran xabáa,  
ne gusalaje' dxa xu'u cheę xabáa,
- 24 na' bęne' bxinnaj xeta maná ca dxinnaj xiuj cheę  
gulagu benne' cheę' na.  
Bnézruje' le' da naca ca zrua' cheę xabáa.
- 25 Gulawe' da dxelagu gubáz cheę xabáa ca'.  
Gusél-lalé'e da gulawe', na' guléajteęquezene'.

26 Bēne' guca be' da za' chalá'ala naga dxalaj gubizra,  
 ne xel-la' waca chee' bēne' guca be' za' chalá'ala  
 naga dxedé gubizra beu' zaga,  
 27 na' gusel-le' chee' benne' ca' bēla' ca zē bxrte xu,  
 béadu zaj zua xrila naxanba' ca xuzre' da dxe' dxu'a  
 tu xegu zren.  
 28 Bēne' guléxrujba' chale'aj chee' benne' ca'.  
 Guléxrujba' dútequeze naga zaj zua xu'u xide chee'.  
 29 Gulawé'-ba', ne gulélajquezené'.  
 Dios bnézruje' chie' ca naca da gulaca lazre'.  
 30 Gate quebe ne xelélajene', ne ne dxelawé'-ba',  
 31 bzra'a Dios benne' ca',  
 na' bētie' benne' zaj nácadxe' benne' wal-la,  
 ne benne' Israel ca' zaj nácadxe' benne' waca.  
 32 Láqueze bēne' caní, na' belúndaqueze' dul-la,  
 ne láqueze belelé'ene' xel-la' waca ca' da bēne',  
 quebe buluxrén lazre' Le'.  
 33 Chee' lē na' guchugue' zra chee' benne' ca' ca  
 tu be' dxecá'adxu,  
 ne ca zaj naca iza da gulezúe', bdeē' le' lu da zi' da xa'.  
 34 Gate bētie' bal-la benne' ca', na' xezícadxe'  
 belexaque' chee' Dios.  
 Belexebí'i lazre', ne du lazre' buluchálajlēne' Le'.  
 35 Xeajlesá lazre' naca Dios Benne' dxuxúe' lē',  
 ne Dios na' nape' dutē xel-la' szren naque' Bénnea'  
 bxá'awenē' lē',  
 36 san quebe guca li lazre' da gulenné'  
 lawe' da belún lazre' lau Dios.  
 37 Quebe gulaque' li lazre' nen Le',  
 ne quebe belunē' du lazre' ca naca xel-la' wezríá chee'.  
 38 Dios bexache lazre' chee' benne' ca',  
 ne bnite lawe' dul-la belunē', ne quebe bzria xi'e lē'.  
 Zane' lásate bzue' chalá'ala xel-la' dxezrá'a chee',  
 ne quebe bzre'e lē' dutē ca da dxéquene'.  
 39 Xeajsá lazre' Dios zaj naque' bēla' dxen.  
 Zaj naque' ca tu be' da dxedé na, ne quebe xezrín na.  
 40 Zane' lasa guledábague' Le' lē'e xixre' lawe' lataj na',  
 ne zane' lasa buluzúe' Le' baxache'.  
 41 Zane' lasa buluzúe' Dios chalá'ala,  
 ne buluché'e Dios lá'azxa chee' benne' Israel ca'.  
 42 Gulal-la lazre' ca naca xel-la' waca zren chee',  
 ne ca bēne' lu zra na' bxá'awenē' lē' lu da zi' da xa',  
 43 gate bēne' xel-la' waca ca' lu xēzr la xu Egipto,  
 ne blé'ene' da ca' da dxebánedxu lu xēzr la xu Zoán.  
 44 Bexunē' xegu chee' ca' dxen,  
 na' québedxa guca da xe'e'aj benne' Egipto ca'.  
 45 Gusel-le' bē'a ládujla benne' ca', bē buludeba' lē' xel-la' zi'.  
 Gusel-le' bluzru ca' buluzríá xiba' xēzr la xu chee'.  
 46 Gusel-le' biche zu ca' guláguba' lina chee',  
 ne buluzríá xiba' da zaj zua lu xēzr la xu chee'.  
 47 Gusel-le' xiaj bezxe' zri'a da bzria xi na lba uva chee' ca',  
 ne gusel-le' da zaga da bsebizre na xaga higo chee' ca'.  
 48 Gusel-le' xiaj bezxe' zri'a da bēte na bē xixre' chee' ca',  
 ne gusel-le' xesa da bēte na zrila' chee' ca'.  
 49 Bdeē' benne' Egipto ca' lu xel-la' zi' zren,  
 lawe' da bzrá'alē'e benne' ca',  
 na' guca da ca' ca zánete gubáz ca' chee' xel-la' gute.  
 50 Quebe bzague' xel-la' dxezrá'a chee',  
 ne quebe bnite lawe' chee' chee' quebe xelátie',  
 san bētie' lē' nen tu xizrawe' wal-la.  
 51 Bētie' bi biu nedxu chee' benne' ca',  
 bi biu nedxu ca' chee' benne' Egipto ca'.

- 52 Nadxa beche'e benne' chee' ca' ca tu benne'  
dxeche'e zrila' ca',  
ne bsi'e le' le'e xixre' lawe' lataj.  
53 Bsi'e le' zri'a chawe', ne quebe bi belezrebe',  
san gulate benne' guledabague' Le' lu nísadau'.  
54 Beche'e le' lu xezr la xu lá'azxa chee',  
naga zua xi'a nigá da guca cheéqueze'.  
55 Bebéaje' benne' zaj zre'e lu xezr la xu na' lau  
benne' chie' ca',  
na' gulé'e xezr la xu chee' cha chee' benne' Israel ca',  
ne bzre'e le' lizre benne' ca' bebéaje'.  
56 Da xula buluzúe' Dios chálá'ala, ne buluché'e  
Dios, nape' duté xel-la' szren.  
Quebe buluzúe' dizra' da ca' gunná be'ene' le'.  
57 Da xula guledabague' Dios ca belún xra xrtawe' ca'.  
Gulaque' ca tu bdxeque' xala chee xaga nalá xéche'ze.  
58 Buluché'e Le' ne chee' lataj ca' naga bulucá'ana  
szrene' bedáu' xiaj xaga ca',  
ne ne chee' bedáu' xiaj xaga chee' ca' bzrá'ale'e Dios.  
59 Bzra'a Dios gate blé'ene' na,  
na' gucuídele'ene' benne' chee' ca', benne' Israel.  
60 Guleaj xíchaje' xu'u xide lá'azxa chee' zua na xezre Silo,  
xu'u xide na' guzuáqueze' ládujla benne' ca'.  
61 Be'e lataj belecá'a benne' ca' dxeledabague' dxi'u  
xi'ina lá'azxa chee',  
da na' dxulé'e na xel-la' waca, ne xel-la' szren chee'.  
62 Bzre'e benne' chee' ca',  
na' bdee' le' lu na' benne' ca' belútie' le'.  
63 Benne' wal-la ca' gulátie' lu wedil-la.  
Quebe nu zra' benne' wegú', benne' xelezúale'ne'  
nu'ula wegú' ca'.  
64 Cá'anqueze gulate bxruze ca' lu wedil-la,  
na' nu'ula chee' bxruze ca' quebe gulebezre xache'  
chee' bxruze ca'.  
65 Nadxa guca Xránadxu ca tu benne' dxexebane' lu bchigala.  
Guque' ca tu benne' wal-la dxebezre xe'e gate ba né'aje'  
xrise uva wal-la.  
66 Na' blague' benne' guledabague' Le',  
ne bca'ane' le' cá'aze chadía chacanna.  
67 Bzue' chálá'ala zri'ine zre sua José,  
ne quebe bequé'e zri'ine zre sua Efraín,  
68 san bequé'e zri'ine zre sua Judá,  
ne xi'a Sión, da na' nazrí'ile'ene'.  
69 Lu xi'a na' bene' xudau' lá'azxa chee',  
da guca na ca naca da zua na xabáa.  
Bzua chúchue' na chadía chacanna,  
ca nácaqueze xezr la xu nigá.  
70 Bequé'e David, benne' wen zrin chee'.  
Bebéaje' le' naga zaj zra' zrila' ca'.  
71 Beche'e le' naga zue' dxuxúe' zrila' ca' zaj nache'eba' bedau',  
chee' gague' wenná bea, benne' guxúe' bènneache chee',  
zri'ine zre sua Jacob, benne' zaj naque' benne' Israel ca'.  
72 Duté xel-la' du lazre' chee' bxue' benne' ca'.  
Bxue' le' duté xel-la' waca zren chee'.

## 79

- 1 Dios, ba gulú'u benne' xezr la xu zitu' ca' lu xezr la xu  
chee' bènneache chiu'.  
Bulucá'ana dítaje' xudau' lá'azxa chiu'.  
Buluzría xi'e xezre Jerusalén.  
2 Bulucá'ane' belá' dxen chee' wen zrin chiu' ca' naga  
gulagu be' zua xrila le'.

Bę xixre' ca' guláguba' bęla' dxen cheę benne' ca'  
zaj naque' chiu'.

<sup>3</sup> Ca nisa bululálaję' dxen cheę benne' ca' xúgute lu neza  
cheę xęzre Jerusalén,  
ne quebe nu chilá' benne' gucache' benne' ca'.

<sup>4</sup> Benne' xęzr la xu walizre' cheętu' ca'  
dxulucháchalęņę' netu'.

Benne' zaj zře'ę xęzre walizr ca' dxulucá'ana dítaję' netu',  
ne dxelún lę' cheętu'.

<sup>5</sup> ĆBata cuęzaqueze gaca caní cheętu', Xran?

ĆTu chí'izqueze dxezra'u netu'?

ĆTu chí'izqueze gaca xel-la' dxezrá'a chiu' ca tu xi'?

<sup>6</sup> Bzra'a benne' xęzr la xu ca' quebe zaj núnbe'ę Lue',  
na' benne' xęzr la xu ca' quebe dxululáwizre' Lue',

<sup>7</sup> lawe' da ba buluzría xi'ę zri'ine zre sua Jacob,  
ne bulucá'ana dítaję' xu'u lizre benne' ca'.

<sup>8</sup> Quebe gusebagu' netu' ca naca da zrinna da belún  
xra xrtauntu' ca'.

Gudázega xexache lazru' netu', lawe' da dxezraga láule'ętu'.

<sup>9</sup> Gúcalę netu', Dios, nacu' Bénnea' dxuselę' netu',  
cheę gaca ba Lau'.

Bselá netu', ne bnite lau dul-la nuntu' cheę xegá'ana szren Lau',

<sup>10</sup> lawe' da xelenná bęnneache: "ĆGa na Dios cheę benne' ca'?"

Bebéaj lazre' benne' ca' belútię' wen zrin chiu' ca'.

<sup>11</sup> Caní bęn cheę xeledé'ę xúgute benne' chiu' ca' zaj xu'ę  
lu na' benne' ca' dxeledábague' netu'.

Dute xel-la' waca zren chiu' bselá benne' ca' ba zaj nachugue'  
cheę' xelatie'.

<sup>12</sup> Bunezruj cheę benne' xęzr la xu walizre' cheętu'  
ca' xegazre cue'

ca da calęla da belunę', bulucá'ana dítaję' Lue', Xran.

<sup>13</sup> Netu', bęnneache chiu', nácantu' ca zřila' chiu' ca',  
güe lá'anaquezentu' Lue' chadía chacanna.

Tu cuen tu cuen zri'ine zre suantu' gúl-laquezentu' da  
güe lá'anantu' Lue'.

## 80

<sup>1</sup> Bene cheętu', Lue' dxuxú' benne' Israel ca',  
Lue' na', dxuxú' zri'ine zre sua José ca zřila'du ca',  
ne dxe'u lataj blau chiu' da zua na lávela querubín ca'.

<sup>2</sup> Ble'e xel-la' szren chiu' lau zri'ine zre sua Efraín,  
ne Benjamín, ne Manasés.

Ble'e xel-la' waca chiu', ne gudá guseláu' netu'.

<sup>3</sup> Beché' netu', Dios.

Bexache lazre' netu', na' lantu'.

<sup>4</sup> Xránantu' Dios, napu' dute xel-la' waca,

Ćbata chajsequeze zra'u netu',

ne quebe xennu' ca da nábantu' Lue'?

<sup>5</sup> Bzúalę'u netu' lu xel-la' dxewí'ine lazre',

ne bzílalę'u nisa dxebézrentu'.

<sup>6</sup> Bę'u lataj xęzr la xu walizre ca' bulucá'ana dítaję' netu',  
na' benne' ca' dxeledábague' netu' belún lę' cheętu'.

<sup>7</sup> Beché' netu', Dios, napu' dute xel-la' waca.

Bexache lazre' netu', na' lantu'.

<sup>8</sup> Bebéaju' tu zřigu' lba uva lu xęzr la xu Egipto da naca na  
bęnneache chiu'.

Blagu' benne' xęzr la xu gulezré'ę nigá, na' guzu' nigá  
zřigu' lba uva na'.

<sup>9</sup> Gú'unu' lba uva na' cheę gula na.

Bdéle'ę lue zřigu' lba uva na', na' gucu na xęzr la xu na'.

<sup>10</sup> Gulú'u na zřul-la xúgute xi'a ca',

na' zruze na ca' gulegú'u na zřul-la xaga cedro zren ca'.

11 Gulechiluj zruze na, belezrinte na dxu'a nísadau',  
 ne belezrinte na dxu'a xegu Eufates.  
 12 ¿Bizr chee na' gucá'u le'aj da naxechaj na le na?  
 Na'a xúgute benne' dxeledé na' dxelebane' da zixre chee na.  
 13 Dxuluchuchu dxululéaj cuche xixre' ca' lba uva na',  
 na' be xixre' ca' dxeláguba' na.  
 14 Bedá cheentu', Dios, napu' dute xel-la' waca.  
 Gunná' netu' ga na' zu' xabáa, ne gudá xedajnná'u lba uva chiu'.  
 15 Gudá, guseláu' lba uva nigá, da gúzaquezu'.  
 Bechuj chee lba uva na', ba bzua chuchu' gaca na chiu'.  
 16 Benne' ca' dxeledábague' netu' ba gulechúgue' lba na',  
 ne ba guládué' na xi'.  
 Gunná' benne' ca' lu xel-la' dxezrá'a chiu',  
 ne bzria xi' benne' ca'.  
 17 Bzua chuchu, ne bxue benne' ca' ba guca'u,  
 benne' xezr la xu na' ba nuzúa chuchu'.  
 18 Cabátadxa cueaj xíchajntu' Lue' xecha lasa.  
 Bcache chawe' netu', naca bantu', na' güe lá'anantu' Lau'.  
 19 Xránantu' Dios, napu' dute xel-la' waca, beché' netu'.  
 Bexache lazre' netu', na' lantu'.

## 81

1 Lu dute xel-la' dxebé le gul-la chee Dios, Bénnea' dxutipe'  
 lázredxu.  
 Lu da ba neza chee le cuezre xa'a lau Dios chee  
 zri'ine zre sua Jacob.  
 2 Le gul-la, ne le capa xídedau'.  
 Le quinne xrtan da con zriadi'i na du, ne da dxúl-lalenle.  
 3 Le gucuezre luzu da dxulucuezre' gate naca beu' dxe'ene,  
 da naca na zra nuzúadu gundxu laní lá'azxa.  
 4 Naca na tu da dxun na ba xen xelún benne' Israel ca',  
 da bdxixruj bea Dios xelún zri'ine zre sua Jacob.  
 5 Bzue' na ca tu da gulé'e lau na zri'ine zre sua José  
 gate beledxúaje' lu xezr la xu Egipto,  
 naga benda' tu xrtizra' bénneache da quebe guxéajni'ida'.  
 6 Gunná Dios: "Begúa' xua' da buludé'e' benne' chia' ca'.  
 Bsezrá'a benne' chia' ca' da zi'i."  
 7 Lu da ba xa' da guzúale, bláwizrale neda', na' bselá' le'e.  
 Becheba' chee naga nagacha' lu beuj bza gate na'  
 gunnéle'e' guziu',  
 na' bxua' ájala gunle naga zaj de beaj nisa zaj nazí le Meriba.  
 8 Le xene, bénneache chia', na' gusízreda' le'e.  
 Le'e, benne' Israel, che dxaca lázrele sile da dxennía',  
 9 quebe gápale tu dios chee benne' xula,  
 ne quebe guzú zribele lau tu dios chee benne' zitu'.  
 10 Neda', Xránale, naca' Dios cheele.  
 Bebéaja' le'e lu xezr la xu Egipto.  
 Le salaj dxú'ale, na' gunna' da gágule.  
 11 Bénneache chia' quebe belúe lazre' da gunnía'.  
 Benne' Israel ca' quebe gulaca lazre' xezezi' lu ne'e neda'.  
 12 Chee le na' bsana' benne' ca' lawe' da gulaque'  
 lázxdau zide'.  
 Belune' ca da guléquene' xrlátaje.  
 13 Che la gulebé' gunne xue bénneache chia' chee da gunnía',  
 ne che la belún benne' Israel ca da ble'eda' le',  
 14 na' chadite bzria xi'a benne' guledábague' le',  
 ne gudíl-lalena' benne' guledíl-lalene' le'.  
 15 Che la belún benne' Israel caní,  
 na' benne' ca' dxelecuídene' Xránadxu buluzúe' xrtizre',  
 (san chadía chacanna zaj nabague' zria),  
 16 na' Dios guné' xelawe' zrua' xtila cháwedau',

ne gunę' xelélajqueznę' nen bzrína'dau'.

## 82

<sup>1</sup> Zua Dios naga zaj nazraga benne' dxuluchi'e cheę bénneache cheę'.

Dios dxuchi'e cheę benne' ca' dxuluchi'e cheę bénneache.

<sup>2</sup> Dxenná Dios: “¿Bátadxa guchi'ale cheę bénneache chia' da quebe naca xrlátaje, ne gápale ba lá'ana benne' ca' zaj nabéaj xíchaję' Dios?”

<sup>3</sup> Le gácale benne' xache' ca', ne bidau' wezębe ca'.

Le gun da xrlátaje cheę benne' baxache' ca'

ne cheę benne' ca' dxelexárzjenę'.

<sup>4</sup> Le guselá benne' ca' dxeledéę' lu da ba xa',

ne benne' ca' quebe bi zaj nape'.

Le guselá benne' ca' lu na' benne' ca' zaj nabéaj xíchaję' Dios.

<sup>5</sup> Quebe bi zaj nézenę', ne quebe dxelėjni'ine',

na' dxeledé' lu da chul-la.

Dxuluzrizre' ca naca da zaj dę lu xęzr la xu.

<sup>6</sup> Neda' gunnía': Le'e nácaquezle ca dios ca',

ne nácale xúgutęle ca zrí'inequeze Dios szrentę,

<sup>7</sup> Wátele ca dxelate xezícadxa bénneache,

na' cheajcházete ca cheajchaze núteteze benne' dxenná be'e.

<sup>8</sup> ¡Guxasa, Dios!

¡Bchi'a cheę bénneache zaj zra' lu xęzr la xu,

lawe' da naca dutę xęzr la xu chiu' Lue'!

## 83

<sup>1</sup> ¡Dios, quebe sua zriu'!

Quebe su' zrize, Dios, ne quebe gusezxuj dxu'u,

<sup>2</sup> lawe' da dxelebezre xa'ana benne' ca' dxeledábague' Lue',

ne dxulucá'ana szren cuina benne' ca' dxelecuídene' Lue'.

<sup>3</sup> Bagácheze ba zaj nune' tuze dizra' bi xelunę' cheę bénneache chiu',

ne ba zaj nune' bi xelunę' cheę benne' ca' dxuxúquezu' Lue'.

<sup>4</sup> Gulenné': “Le chu'u, guzría xidxu benne' ca'

cheę québedxa xelaque' tu cue' xęzr la xu,

ne québedxa nu sua benne' cheajsa lazre' la Israel.”

<sup>5</sup> Ba belunę' tuze dizra'.

Zaj nune' tuze dizra' xeledábague' Lue'

<sup>6</sup> benne' Edom ca', ne benne' Ismael ca',

ne benne' Moab ca', ne benne' zrí'ine zre sua ca' Agar,

<sup>7</sup> ne benne' Gebal ca', ne benne' Amón ca', ne benne' Amalec ca',

ne benne' Filistea ca', ne benne' zaj zre'e xęzre Tiro.

<sup>8</sup> Cá'anqueze benne' Asiria ca' zaj nune' le' tuze.

Xúgute benne' caní dxelunę' zrin cheę zrí'ine zre sua Lot.

<sup>9</sup> Ben cheę benne' caní ca bęnu' cheę benne' Madián ca',

ne ca bęnu' cheę Sísara, ne ca bęnu' cheę Jabín dxu'a xęgu Cisón,

<sup>10</sup> benne' ca' gulátie' lu xęzr la xu Endor,

na' belexaque' ca xrche'e bezre da gun na bębe lu xęzr la xu.

<sup>11</sup> Ben gaca cheę benne' blau ca' cheę benne' caní

ca guca cheę Oreb, ne cheę Zeeb,

ne ben gaca cheę benne' dxelenná bé'ene' benne' caní

ca guca cheę Zeba, ne cheę Zalmuna,

<sup>12</sup> lawe' da gulenná benne' caní: “Gaca cheędxu xęzr la xu

naga zaj zra' bénneache cheę Dios.”

<sup>13</sup> Dios chia', ben xelaque' ca xizre bębe da dxua be' gate dxedube na.

Ben xelaque' ca xrlácue xia xéladu ca' da dxua be' bdunu'.

<sup>14</sup> Ca dxun tu xi' da dxuzezxe na tu xi'a zren,

ne ca dxun xi' da dxuzezxe na tu đin zren,

<sup>15</sup> ca'an gudáu zi' xuzre benne' caní tu lu be' bdunu',

ne bchebe le' nen tu be' bdunu' chiu'.

<sup>16</sup> Ben xelexedué'ele'ene',

ne ben xelape' Lue' ba lá'ana, Xran.

<sup>17</sup> Ben xeleque zréajene' ne xelezúa stébele'e tu chí'izqueze.

Ben xelexegá'ana đitaje', ne xelexenítie'.



<sup>18</sup> Ben xelexúnbe'ę nacu' Lue' Xránantu' Dios.  
Tuzu' Lue' nacu' Dios zrentę lawe' dutę xęzr la xu.

## 84

<sup>1</sup> Nazrí'ilę'ęda' xudau' chiu' Lue', Dios, napu' dutę xel-la' waca.

<sup>2</sup> Dxaca lázrelę'ęda' sua' ga na',  
ne dxezá lazra' sua' lu xudau' chiu', Xran.

Dutę da naca', ne dutę lázrdawa' dxul-la' chiu' Lue', Dios ban.

<sup>3</sup> Ba belún chjęgu ca' xrú'üneba',  
na' buchuj ca' zaj dę lataj naga dxuluzríaba' biadu cheęba' ca'  
naga zua lu cugu chiu' Lue', Dios, napu' dutę xel-la' waca.  
Nacu' Lue' Wenná Bea chia', ne Dios chia'.

<sup>4</sup> Ba neza zrentę naca na cheę benne' ca' zaj zre'ę xudau' chiu'.  
Chadía chacanna xelúe lá'anaqueze' Lue'.

<sup>5</sup> Ba neza zrentę naca na cheę benne' ca',  
Lue' dxuzúa chuchu' lę',  
benne' ca' dxelezá lazre' chjaque' xi'a lá'azxa chiu', xi'a Sión.

<sup>6</sup> Gate dxeledęe' lache' bizre nazí le na

Lache' Nisa Dxebézredxu,  
dxexaca na lataj naga dxalaj nisa,  
na' gusezrá nisa xiuj ca zaj naca beaj ca'.

<sup>7</sup> Dxelácadxe' benne' wal-la dxácatę ne zaj xu'ę neza  
lawe' da xelexé'eng' Dios lu xi'a lá'azxa cheę', xi'a Sión.

<sup>8</sup> Bene, Xran, ca naca da dxenaba' Lue', Dios, napu' dutę xel-la' waca.

Bene, Dios, nacu' Dios cheę Jacob.

<sup>9</sup> Ben da xrlátaje cheę benne' wenná bea cheęntu', Dios,  
benne' wenná bea na' guca'u Lue'.

<sup>10</sup> Cháwedxa naca sua' tu zraze lu xudau' chiu'

quézcala sua' chi gaxúa iza naga xula.

Dxaca lazredxa' sua' dxa xu'a xudau' cheę Dios chia'  
ca tu benne' nada'u,

quézcala súaqueza' tu lizra' zaca naga quebe zua Dios.

<sup>11</sup> Xránadxu Dios naque' Benne' dxuxúę' dxi'u,

ne Benne' Wenná Bea xabáa cheędxu.

Dxunę' dxi'u da chawe' dutę xel-la' zri'i lazre' cheę',

ne dxunę' dxelapa bėnneache dxi'u ba lá'ana.

Quebe xezúeng' zi' gune' da chawe' cheę benne' ca' zaj naque' du lazre'.

<sup>12</sup> ęDios, napu' dutę xel-la' waca!

ęBa neza zrentę naca na cheę benne' ca' dxuluxrén lazre' Lue'!

## 85

<sup>1</sup> Benu' da xrlátaje cheę bėnneache chiu', Xrana' Dios.

Benu' belexelá zri'ine zre sua Jacob,

benne' ca' gulu'ę lu na' benne' zitu' ca'.

<sup>2</sup> Bnite lau' da zrinnaj da belún bėnneache chiu'.

Bdeu' chalá'ala ca zaj naca dul-la cheę benne' ca'.

<sup>3</sup> Bzua zriiu' xel-la dxezrá'a chiu',

ne bsanu' xel-la' xichaj zra'a chiu'.

<sup>4</sup> Ben xezúantu' lu da ba neza cheę xel-la' weselá chiu', Dios,

ne québedxa zra'u netu'.

<sup>5</sup> ęTu chí'izqueze zra'u netu'?

ęWazrá'aquezu' tu cuen tu cuen zri'ine zre suantu'?

<sup>6</sup> ęQuébedxa gunu' xexaca bantu',

cheę súantu' lu da ba neza lau Lue'?

<sup>7</sup> ęXran, bexache lazre' netu', ne bselá netu'!

<sup>8</sup> Guzé naga' da nņę Xrana' Dios.

Nņę' da guzúa na bėnneache cheę'

lu xel-la' dxebeza zri lazre',

cheę québedxa xelún benne' lá'azxa cheę' da xálaze.

<sup>9</sup> Da líqueze Lę' zúatequeze' guselę' benne' ca' dxelezrebe' Lę',

cheę sua da xabáa cheę' lu xęzr la xu cheędxu.

<sup>10</sup> Zaj nazraga xel-la dxexache lazre', ne da li cheę Dios.

Zaj naca tuze da xrlátaje, ne xel-la' dxebeza zri lazre'.

<sup>11</sup> Da li chee' gusezrá na xezr la xu nigá,  
na' sel-le' da xrlátaje chee' da za xabáa.

<sup>12</sup> Xránadxu gúnnaqueze' dxi'u da cháwedau',  
na' gúnna'le' e' xezr la xu cheedxu.

<sup>13</sup> Nu benne' naque' xrlátaje waca xezrine' lau Dios,  
na' gune' gundxu ca da ba blé'ene' gundxu.

## 86

<sup>1</sup> Bze naga, Xran, ne bene chia',  
lawe' da zua' lu da ba xa', ne dxexáxrjeda'.

<sup>2</sup> Bxue neda' lawe' da naca' chiu'.  
Bselá neda', Dios chia', naca' wen zrin chiu',  
ne dxuxrén lazra' Lue'.

<sup>3</sup> Bexache lazre' neda', Xrana' Dios,  
lawe' da dxuláwizra' Lue' te zra chizrela.

<sup>4</sup> Ben béle'eda' neda', wen zrin chiu',  
lawe' da dxuzúa cuina' lau Lue', Xran,

<sup>5</sup> na' Lue', Xran, nacu' xrlátaje, ne dxunite lau' cheentu'.  
Zúatequezu' xexache lazru' benne' ca' dxululáwizre' Lue'.

<sup>6</sup> Xrana' Dios, bene da dxuchálajlena' Lue',  
ne bze naga ca da dxenaba' lau'.

<sup>7</sup> Lu zra sua' lu da stébele' e' wannéqueza' Lue',  
lawe' da dxexechébequezu' Lue' chia'.

<sup>8</sup> Xran, quebe nu chilá' Dios ca Lue',  
ne quebe nu dxun ca da dxunu' Lue'.

<sup>9</sup> Xelelá' bénneache duté xezr la xu da benu' Lue',  
na' xelúe lá'anaqueze' Lue', Xran,  
ne xulucá'ana szrene' Lau' Lue',

<sup>10</sup> lawe' da nacu' Lue' szren, ne dxunu' da dxexebámentu'.  
Tuzu' Lue' nacu' Dios.

<sup>11</sup> Bsede neda' da dxaca lazru' guna', Xrana' Dios,  
na' guna' ca naca da li chiu'.

Gunná be'e lázrdawa' chee zreba' La cuinu'.

<sup>12</sup> Duté lázrdawa' güe lá'anaqueza' Lue', Xrana' Dios,  
ne gucá'ana szrénqueza' Lau' chadía chacanna,

<sup>13</sup> lawe' da zúatequezu' xexache lazru' neda',  
ne bseláu' bénne'du xu'a lu lataj ba xa'.

<sup>14</sup> Dios, belasa benne' dxulucá'ana szren cuine',  
ne dxeledábague' neda',  
na' benne' xichaj zra'a ca' belune' tuze dizra' xelútié' neda',  
ne quebe dxelezrebe benne' ca' Lue'.

<sup>15</sup> Lue', Xrana', nacu' Dios dxexache lazru' netu',  
ne nacu' zren lazre',  
ne quebe dxezrá'azeu', san zúatequezu' xexache lazru' netu',  
ne nacu' li lazre'.

<sup>16</sup> Gunná' ca naca chia', ne bexache lazre' neda'.  
Benna chia' neda', wen zrin chiu', xel-la' waca chiu',  
na' bxue neda', zri'ine nu'ula wen zrin chiu'.

<sup>17</sup> Ble'e neda' tu da gaca bea na gaca chawe' chia',  
ne ben xelélé'e benne' ca' dxelecuídené' neda' da na',  
ne ben xelxedué'ene',

lawe' da nacu' Lue', Xrana' Dios, Bénnea' gúcalene' neda',  
ne bexúe zrene' neda'.

## 87

<sup>1</sup> Lane xezre Sión zria na lu xi'a lá'azxa.

<sup>2</sup> Nazrí'idxa Xránadxu Dios lataj naga dxuluchi'a benne' zaj zre'e xezre Sión,  
ca nazrí'ing' xúgute xu'u lizre zri'ine zre sua Jacob.

<sup>3</sup> Da xrtante' ca' dxelenná bénneache ca naca xezre chee' Dios.

<sup>4</sup> Cheajsá lazra' lu xezr la xu Egipto, ne lu xezr la xu Babilonia

ga na' zaj zra' b́enneache zaj núnbe'ę neda'.  
Le nna' xque, lu xęzr la xu Filistea, ne lu xęzre Tiro, ne lu  
xęzr la xu Etiopía gulalaj benne' caní zaj naque' chia'.

<sup>5</sup> Ca naca cheę xęzre Sión nnia':

Benne' nigá, ne b́ennea' gulálaje' ga na', na' neda',  
Dios zrente, guzúa ch́uchua' xęzre na'.

<sup>6</sup> Gate gulaba Xránadxu Dios benne' ca' zaj naque' cheę',  
nne': "Benne' nigá gúlaje' lu xęzre na'."

<sup>7</sup> Benne' ca' dxelul-le', ne benne' ca' dxeline' xide xelenné':  
Ca naca da ba neza zúantu' lu xęzre na'.

## 88

<sup>1</sup> Xran, nacu' Dios dxuseláu' neda'.

Te zra, ne chizrela dxuláwizra' Lue'.

<sup>2</sup> Bene da dxuchálajęna' Lue',

ne bze naga da dxuláwizra' Lue'.

<sup>3</sup> Dxedú lazra' lu da calęla ca' da dxaca na chia',  
ne ba zua' gatia'.

<sup>4</sup> Dxeleque b́enneache neda' ca tu benne' gate,  
lawe' da dxátele'ę ni'a na'a.

<sup>5</sup> Nagá'ana' cá'aze ládujla benne' gate.

Naca' ca tu benne' gulátie' lu wedil-la, ne zaj de' xędxu ba ca',  
benne' ca' québedxa dxajsá lazru', Dios,  
ne québedxa zaj xu'ę lu na'u Lue'.

<sup>6</sup> Dxaca chia' cáteze ba nuzú' neda' tu xędxu zren  
naga naca chul-la, ne nácale'ę situj.

<sup>7</sup> Dxéqueda' dxezrá'le'u neda'.

Da dxaca chia' naca na ca dxazia' zran xeajxruza zri'a  
cheę nisadau'.

<sup>8</sup> Benu' belexebiga bi ljwezra' ca' naga zua'.

Benu' neda' ca tu da dxusegute na benne' ca'.

Naca' ca tu benne' xu'ę lizre xia ne quebe gaca xedxúaje'.

<sup>9</sup> Dxelechul-la xiaj lawa' ne cheę da dxezí dzezaca'.

Xúgute zra dxuláwizra' Lue', Xrana' Dios.

Dxechisa na'a lau Lue'.

<sup>10</sup> ¿Dxúnquezu' xel-la' waca cheę xabáa dxácalęnu'  
benne' gate ca'?

¿Dxelexasa benne' gate ca' dxelúe lá'anę' Lue'?

<sup>11</sup> ¿Dxuluchalaj benne' zaj nagache' lu xędxu ba cheę  
xel-la zri'i lazre' chiu',

na' dxuluchalaj cheę da li lazre' chiu' benne' zaj xu'ę

lataj chul-la cheę benne' gate ca'?

<sup>12</sup> ¿Welexúnbea benne' zaj xu'ę lataj chul-la na' ca

naca da zrente da dxunu',

na' welexúnbea benne' zaj xu'ę naga quebe nu dxajsá lazre' le'  
ca nacu' xrlátaje?

<sup>13</sup> Neda' dxuláwizra' Lue', Xrana' Dios.

Xúgute zila dxezrín lau' da dxenaba' Lue'.

<sup>14</sup> ¿Bizr cheę na' dxebéaj xíchaju' neda', Xran?

¿Bizr cheę na' quebe dxenná'u neda' cheę gácalęnu' neda'?

<sup>15</sup> Dxezí dzezaca', ne ba zua' gatia'.

Nácatea' bi cuíde'tę dxedéa' xel-la' zi' da dxudeu' neda',  
na' dxedú lazra'.

<sup>16</sup> Dxéqueda' dxezrá'le'u neda'.

Da dxuchebu' neda' ba bsdú na lazra'.

<sup>17</sup> Zaj naxechaj da caní neda' du zra.

Dxulusaca zi na neda' gáteteze na'.

<sup>18</sup> Benu' belexebiga bi ljwezra' ca' naga zua',

na' tuze da naca chul-la dxedále na neda'.

## 89

<sup>1</sup> Tu gúl-lazqueza' cheę xel-la' zri'i lazre' chiu', Xran.  
Guzenda' tu cuen tu cuen zri'ine zre súantu' nacu' li lazre'.

<sup>2</sup> Nezda' tu súazqueze xel-la zri'i lazre' chiu',  
ne chadía chacanna zua xel-la li lazre' chiu',  
cáteze zúaqueze xabáa.

<sup>3</sup> Lue' gunnúu': "Bena' xel-la wezría nen bennea' ba gucá'a.  
Guchebe lazra' cheę David, wen zrin chia',

<sup>4</sup> gunnia': Guna' tu cházqueze zri'ine zre su'.  
Guna' xelenná be'e tu chí'izqueze lu waláz chiu'."

<sup>5</sup> Benne' zaj zra' xabáa dxelúe lá'ane' Lue',  
ne cheę da zrentę ca' da dxunu', Xran,  
ne ne cheę xel-la' li lazre' chiu', naga zaj nazrague'.

<sup>6</sup> Quebe nu zua xabáa, benne' naque' ca Lue', Xran.  
Quebe nu zua benne' szrentę, benne' naque' ca Lue'.

<sup>7</sup> Benne' zaj zra' xabáa dxelape' Dios ba lá'ana,  
na' xúgute benne' ca' zaj nazraga cheę dxelezrebe' Le'.

<sup>8</sup> Xran, nacu' Dios cheę benne' zante, benne' zaj zra' xabáa.  
Quebe nu zua, benne' naque' ca Lue', Xran.

Nacu' Benne' wál-late, ne tu nácazquezu' li lazre'.

<sup>9</sup> Xu'u lu na'u xeajxruza zren cheę nísadau'.  
Gate dxelasa xeajxruza ca' Lue' dxebeque zriu' na.

<sup>10</sup> Bchúchuju' benne' Egipto ca', na' belexegá'ane'  
ca tu da gate.

Bese dínnaju' benne' ca' dxeledábague' lue' nen na'u wál-late.

<sup>11</sup> Chiu' Lue' naca xabáa, ne chiu' Lué'queze naca xęzr la xu.  
Benu' xęzr la xu nigá, ne da ca' zaj nnita lawe na.

<sup>12</sup> Benu' da de chalá'a naga za' be' zaga,  
ne da de chalá'a naga dxedé gubizra beu' zaga ca'.

Xel-la dxelebé dxelul-la chiu' xi'a Tabor, ne xi'a Hermón.

<sup>13</sup> Benne' wál-late nacu' Lue'.

Da zrentę naca xel-la waca chiu', ne nagá'ana szren na.

<sup>14</sup> Lu da xrlátaje, ne lu da li lazre' dxenná be'u.

Lu xel-la zri'i lazre', ne lu da li lazre' zaj zua ca da dxunu'.

<sup>15</sup> Ba neza zrentę naca na cheę benne' ca' dxelul-le'  
da dxue lá'ana na Lue',

ne zaj zue' lu xel-la naxani' chiu', Xran.

<sup>16</sup> Ne chiu' Lue' dxelebéle'ęne' du zra,  
ne dxulucá'ana szrenę' Lue' ca naca da xrlátaje chiu'.

<sup>17</sup> Lué'queze nacu' xel-la wal-la cheę benne' ca',  
ne xel-la xrtan cheę'.

Dxúnnadxu' netu' xel-la' waca lawe' da ca' dxéquenu' xrlátaje.

<sup>18</sup> Xránadxu Dios dxucu'uje' dxi'u,  
na' Dios lá'azxa cheę benne' Israel ca' naque'  
Wenná Bea cheedxu.

<sup>19</sup> Nédxudaute bchálaju' lu da blé'enu' benne'  
wen zrin chiu' ca', benne' zaj naque' li lazre', gunnúu':

Ba gucá'a tu benne' wal-la ládujla benneache chia',  
ne ba bzua' le' gaque' wenná bea, ne dxácaleña' le'.

<sup>20</sup> Ba gucá'a David, wen zrin chia'.

Bzúaqueza' le' gaque' wenná bea.

<sup>21</sup> Neda' tu gácalezqueza' le'.

Xel-la waca chia' gutípaqueza' lazre'.

<sup>22</sup> Benne' ca' guledábague' Le' quebe xelezéquene'  
bi xelune' cheę',

na' benne' ca' dxelune' da calela quebe xelezéquene'  
xuluchúchuje' le'.

<sup>23</sup> Guchúchujqueza' benne' dxeledábague' Le', ne gucuasa'

benne' ca' lau le'.

Guna' we' benne' ca' dxelecuídené' le'.

<sup>24</sup> Tu zrí'izqueza' le', ne gaca' li lazre' nen le',  
na' ne' chia' neda' gápadxe' xel-la' wal-la.

<sup>25</sup> Guna' nna be'e duté dxu'a nísadau' zren,  
ne duté dxu'a xégu Eufartes.

<sup>26</sup> Le' xe'e neda': "Lue' nacu' Xra'.

Nacu' Dios chia', dxucu'uju' neda', ne dxuseláu' neda'."

<sup>27</sup> Neda' guzúa' le' ca zri'ina' blau,

na' nna bé'ene' xúgute' benne' wenná bea zaj zre'e  
lu xezr la xu.

<sup>28</sup> Tu chí'izqueze nuzúa' chee' xel-la' zri'i lazre' chia',  
na' ca naca xel-la' wezría chia' gaca líqueze na nen le'.

<sup>29</sup> Guna' tu cházqueze zri'ine zre sue',  
na' xelenná be'e lu waláz chee' dxácaté ne zua xabáa.

<sup>30</sup> Che xulusán zri'ine zre sua David da nadxixruj be'a,  
ne che quebe xeluné' ca da nuchi'a chee',

<sup>31</sup> ne che elecuase' lu da dxenná be'a,  
ne che quebe xeluné' ca da dxapa' le',

<sup>32</sup> na' gu'a le' zrise lawe' da dxeledábague' neda',  
ne quina' le' xide lawe' da dxeluné' da calela.

<sup>33</sup> Quebe gusana' ca nazrí'ida' David,  
ne quebe gusana' gaca' li lazre' nen le',

<sup>34</sup> ne quebe gal-la lazra' xel-la' wezría da nuna',  
ne quebe guchá'a ca da ba gunnía'.

<sup>35</sup> Tu lásaze bzetaj cuína' guchebe lazra',  
na' cabata' gun lazra' chee' David,

<sup>36</sup> gunnía': Tu cházqueze zri'ine zre sue',  
na' xelenná be'e lu waláz chee' lawa' neda'

dxácaté ne zua gubizra.

<sup>37</sup> Xel-la' dxenná bea chee' tu sua chúchuzqueze na  
ca zua beu' zran xabáa.

Tu sua chúchuzqueze na dxácaté ne zua xabáa.

<sup>38</sup> Lue', Dios, guleaj xíchaju', ne bzu' chalá'ala bénnea' guca'u,  
ne dxezrá'le'u le'.

<sup>39</sup> Nuzú' chalá'ala xel-la' wezría bēnlēnu' David,  
wen zrin chiu',

ne nucá'ana dítau' xel-la' dxenná bea chee'.

<sup>40</sup> Nuxrínnaju' ze'e da naxechaj na xezre zréntau' chee',  
ne nuzría xi'u ca naca lataj wal-la chee' chee' wedil-la.

<sup>41</sup> Xúgute' bēnneache, benne' dxeledaze ga na' dxelebané'  
chee' da zaj de chee',

na' benne' xezre walírz chee' dxelún le' chee'.

<sup>42</sup> Ba bēnu' bedxúaj chawe' benne' guledábague' Le',  
na' dxelebéle'ēne'.

<sup>43</sup> Bēn dítau' da ca' dxuchínene' lu wedil-la,  
ne quebe gúcalēnu' le' lu wedil-la na'.

<sup>44</sup> Ba gudú' ca naca da xrtante chee',  
ne nucá'ana dítau' xel-la' dxenná bea chee'.

<sup>45</sup> Bēnu' naque' ca tu benne' gula gate ne zue' iza cuide' chee',  
ne bsi'u le' xel-la' stu'.

<sup>46</sup> Xrana' Dios, z'bátaqueze quebe xennu' cheēntu'?

¿Tu chí'izqueze dxezrá'aquezu' netu'?

<sup>47</sup> Bsa lazre' látega sua' lu xezr la xu.

Látega nunu' xel-la' nabán chee' xúgute' bēnneache.

<sup>48</sup> Quebe zua nu benne' gaca bané' tu chí'izqueze.

Xúgute' xelatie'.

Quebe zua nu benne' le' lu na' xel-la' gute.

<sup>49</sup> Xran, z'ba bsanu' David, ne québedxa nazrí'inu' le',  
ca bzetaj cuínu' guchebe lazru' zri'iquezenu' le'?

<sup>50</sup> Gunná' xque, Xran, ca dxelún le' chia' neda',  
wen zrin chiu',

ne ca dxuchaga lawa' da dxelún lala benne' xúgute xęzr la xu chia' neda'.

<sup>51</sup> Benne' ca' dxeledábague' lue' dxulucá'ana dítaje' bėnnea' guca'u Lue', Xran.

Dxulucá'ana dítaje' le' gáteteze zéaje'.

<sup>52</sup> Ba neza zrente gaca Xránadxu Dios chadía chacanna.

Ca' naca na, ne ca' gaca na.

## 90

<sup>1</sup> Xránantu' Dios, ba cua ba cua,

Lue' nacu' ca tu xu'u naga zra cháwentu'.

<sup>2</sup> Néxdudautę ca za gunu' xi'a zri'a ca',

ne ca za sua xęzr la xu, ne bėnneache,

na' néxdudautę, ne lu da za za' nácaquezu' Lue' Dios.

<sup>3</sup> Dxu'u bėnneache xelexaque' da gulaque', dxelexaque' xu xrte.

<sup>4</sup> Chiu' Lue' chi gaxúa iza zaj naca na ca neaje, da ba gudé na, ne ca tu chí'idau'ze chizrela.

<sup>5</sup> Dzegú' bėnneache ca dxun guba'u,

da dxua na xúgute xizre laga ca'.

Zaj naque' ca tu bchigala da dxexenite na gate dxexebandxu.

<sup>6</sup> Zaj naque' ca tu xixre' da dxegula na che zílala.

Dzegula na, ne dxelá'tę na xiaj,

na' xelate' zua gubizra dxelechugue' na, na' dxebizre na.

<sup>7</sup> Dxebía xi'ntu' lawe' da dxezra'u netu'.

Stėbele'ę zúantu' lawe' da dxezrá'le'u netu'.

<sup>8</sup> Dxenna'u ca da calela da nuntu'.

Dxulé'enu' láwela zria da nabágantú'.

<sup>9</sup> Dxuzáchiu' iza cheętu' lawe' da dxezra'u netu'.

Dxelexedú iza cheętu' ca tu be' da dxecá'antu'.

<sup>10</sup> Ca zaj naca zra naca bantu', zaj naca na ga xun chi iza, na' che nácantu' benne' wal-la, waca bantu' du tápalalaj iza, san ca zaj naca iza ca', dxedentu' xel-la' zi',

ne dxéquentu' zęde.

Chadí dxeledé iza ca', na' xenítentu'.

<sup>11</sup> ¿Nuzra núnbea xanne' ca naca xel-la' dxezrá'a chiu'?

¿Nuzra núnbea ca naca xel-la' xichaj zra'a chiu'?

<sup>12</sup> Ble'e netu' ca láteze zaj naca zra cheętu'

cheę gácantu' benne' dxelėjni'ine'.

<sup>13</sup> Xran, bexaca netu' tuze.

¿Bátadxa chenu'?

Bexache lazre' netu', węn zrin chiu'.

<sup>14</sup> Tu tu zila bzua xichaj lázrdauntu' xel-la' zri'i lazre' chiu',

na' dutę xel-la' dxebé tu gul-lazquezentu' chiu'

xúgute zra naca bantu'.

<sup>15</sup> Benna netu' zane' iza cheę bentu' ca zaj naca iza

bsaca zi'u netu',

ne ca zaj naca iza guzúantu' lu da stębe.

<sup>16</sup> Bę lataj netu', węn zrin chiu', le'entu' da zrente da dxunu',

ne xeelé'e zri'ine zre suantu' da xabáa chiu'.

<sup>17</sup> Xránantu' Dios, bęn gaca cheętu' da chawe' chiu'.

Bęn chepe ban ca naca zrin dxuntu'.

Awe', Xran, bęn chepe ban ca naca zrin dxuntu'.

## 91

<sup>1</sup> Bėnnea' dxuxrén lazre' Xránadxu Dios cheę guxúę' le',

ne dxuzúę' Dios, Bėnnea' nape' dutę xel-la' waca,

cheę gácalęę' le',

<sup>2</sup> waca xę'e Dios: Nacu' Bėnnea' dxebeza lazra',

ne Bėnnea' dxucache chawe' neda'.

Nacu' Dios chia', na' dxuxrén lazra' Lue'.

<sup>3</sup> Dios gucache chawe' lue' lu xúgute da stębe da quebe zaj nalá',

ne lu xúgute xízrawe' da dxelute na bénneache.

<sup>4</sup> Gucache chawe' lue' ca dxun tu bedxuj dxézreba' biadu cheeba' zran xrílabá', na' chu'u chawu' lu na' Lẹ'.

Xel-la' li lazre' chee' gácale na lue', ne gucache chawe na lue'.

<sup>5</sup> Quebe bi guchebe lue' chizrela, ne quebe bi da stebe te zra,

<sup>6</sup> ne quebe bi xízrawe' chee' da chul-la,

ne quebe bi da calela ca' da dxelute na bénneache te zra.

<sup>7</sup> Welate chi gaxúa bénneache cuitu' lue',

ne gaxúa gaxúa bénneache gáguze naga zu',

san quebe bi sacu' lue'.

<sup>8</sup> Wanna'u, na' walé'enu'

ca ba xa' xeledé benne' ca' dxelune' da calela.

<sup>9</sup> Nuzú' Xránadxu Dios ca Benne' dxebeza lazru', ne Dios,

Bénnea' nape' dute xel-la' waca, chee' gucache chawe' lue'.

<sup>10</sup> Chee' lẹ' na' quebe bi da calela gaca na chiu',

ne quebe bi xízrawe' chu'u na lizru'.

<sup>11</sup> Dios gusebague' gubáz chee' xabáa chee' ca' chee' xelácalene' lue',

na' xuluxúe' lue' gáteteze chéaju'.

<sup>12</sup> Xeluxre' lue' lu ne'e chee' quebe ga'a xiaj ni'u.

<sup>13</sup> Guléajquezu' bezre xixre' ca', ne bela' ca',

bezre xixre' schanní' ca', ne be snia ca'.

<sup>14</sup> Dxenná Dios: "Guselá' xúgute benne' ca' zaj

nazrí'ine' neda',

ne gucache chawa' benne' ca' dxelexechebe' naca' Xrane'.

<sup>15</sup> Gate xelenné' neda', na' xecheba' chee'.

Gate zaj xu'e' lu da stebe, súalequeza' lẹ'.

Guselá' lẹ', ne guna' lẹ' ba lá'ana.

<sup>16</sup> Guna' xelaca bane' zánete iza, ne guselá' lẹ'."

## 92

<sup>1</sup> Chawe' naca dxue lá'anantu' Lue', Xrana' Dios,

ne gúl-lantu' da dxucá'ana szren na Lue', Dios szrente.

<sup>2</sup> Chawe' naca dxuzéentu' bénneache tu zra tu zra

ca dxexache lazru' netu',

na' dxela dxulé'entu' nacu' li lazre'.

<sup>3</sup> Dxúl-lantu' da caní, dxínnentu' da dxúl-lalentu'

da ze chi du chee' na,

ne dxínnentu' da con zríadi' na du da dxennéle'e xrtandau'.

<sup>4</sup> Xrana' Dios, ne chee' da dxunu' Lue', dxunu' dxebéle'eda'.

Ca zaj naca da nun na'u zua' lu da ba neza.

<sup>5</sup> Da zrente zaj naca da nunu', Xrana' Dios.

Da zrénele'e zaj naca da dxugú'u lazru' gunu'.

<sup>6</sup> Québequeze neze benne' lázxdau zide',

ne quebe dxéajni'i benne' xala ca naca da nigá.

<sup>7</sup> Gate dxelegula benne' dxelebéaj xíchaje' Dios

ca dxelegula xixre',

ne dxepe ban da dxelún benne' wen da zrinnaj,

naca na chee' xelebía xi'e tu chí'izqueze.

<sup>8</sup> Lue', Xrana' Dios, tu nácaquezu' Dios szrente.

<sup>9</sup> Dxunna bea na ca gaca chee' benne' dxedábage' Lue',

Xrana' Dios.

Dxunna bea na xelebía xi' benne' ca' dxeledábage' Lue'.

Xelase dinnaj xúgute benne' ca' dxelune' da zrinnaj.

<sup>10</sup> Lue' dxunu' dxezrendxa xel-la' wal-la chia' ca naca

xel-la' wal-la chee' bezre.

Dxugú'u da za xíchaja' da dxutipa na lazra'.

<sup>11</sup> Dxa-la' le'eda' xelezrá' zran ni'a benne'

dxeledábage' neda',

na' xenda' xelebezre xache' benne' ca' guledíl-lalene' neda',

benne' ca' dxelune' da calela.

<sup>12</sup> Welexán benne' xrlátaje ca' ca dxun xaga zina'.

Xelegule' ca dxun xaga cedro lu xi'a Líbano.

13 Zaj naque' ca tu xaga ze na lu xudau' chee Xránadxu Dios,  
da dxeǵúlale'e na lu chale'aj chee xu'u lizre Dios cheedxu.  
14 Zaj naque' ca xaga ca' dxelebía da zixre chee na gate  
ba zaj nagula na, ne zaj naca na xaga xa'a wal-la.  
15 Benne' caní xuluzenne' bénneache naca li lazre'  
Xrana' Dios, Bénnea' dxuzé chúchue' neda',  
ne quebe bi zúale Le' da quebe naca xrlátaje.

## 93

1 Xránadxu Dios naque' Wenná Bea,  
ne nacue' zra lane' da zácale'e.  
Nácu'e' zra lane', ne da nagú'u le'e naca na xel-la' waca zren.  
Nuzúa chúchue' xezr la xu nigá, na' quebe nu seque' gutá na.  
2 Lataj naga dxe'u dxenná be'u, Xran,  
zua chuchu na nédxudaute,  
na' Lue' zúaquezu' chadía chacanna.  
3 Dxelebezre xa'a xegu ca', Xran.  
Dxelebezre xa'a na, ne dxelenné na zizraj.  
4 Xránadxu, Bénnea' zue' xabáa nápadxe' xel-la' waca  
ca da zaj napa xegu ca' dxelebezre xa'a na,  
ne ca da zaj napa xeajxruza chee nisadau'.  
5 Chúchule'e zaj naca da nadxixru be'u, Xran.  
Lá'azxa nácaqueze xudau' chiu' chadía chacánnaqueze.

## 94

1 Xrana' Dios, dxebeaj lazru' bénneache.  
Lue', Bénnea' dxebeaj lazre' bénneache, ble'e cuinu'.  
2 Dxuchi'u Lue' chee da dxelún xúgute bénneache.  
Guxasa, bexizruj da dxal-la' xezezi' benne'  
dxulucá'ana szren cuine'.  
3 Xrana' Dios, ¿Bátadxaqueze xelún benne' wen da calela caní?  
¿Bátadxaqueze xelebé benne' ca' dxelebéaj xíchaje' Dios?  
4 ¿Bátadxaqueze xulucá'ana szren cuine', ne xelenné' dizra' zi'?  
¿Bátadxaqueze xulucá'ana szren cuina benne' ca'  
dxelebéaj xíchaje' Dios?  
5 Benne' caní dxuluxrinnaje' bénneache chiu' Lue', Xran,  
ne dxulusaca zi'e bénneache guca'u Lue'.  
6 Dxelúti'e' nu'ula tuze ca', ne benne' zitu' ca',  
ne dxelune' xelátebe' bidau' wezebe ca'.  
7 Dxelenné': "Quebe bi dxelé'e Dios, Xrana benne' ca'.  
Dios chee benne' Israel ca' quebe dxue lazre' chee da na'."  
8 Le chéajni'i, le'e, benne' lázxdau zide'.  
Le'e, benne' xala, ¿bátadxaqueze quebe chéajni'ile?  
9 Dios bene' nágadxu.  
¿Québequeze dxénne' da dxennale?  
Dios bene' xiaj laudxu.  
¿Québequeze dxelé'ene' da dxunle?  
10 Díósqueze dxuzúe' lu da ba xa' benne' xezr la xu ca'.  
¿Québequeze til-le' le'e?  
Díósqueze dxune' dxeléajni'i bénneache.  
¿Québequeze gueque be'ene' da xu'u xichaj lázrdaule?  
11 Xránadxu Dios nézquezne' da xu'u xichaj lázxdau  
xúgute bénneache.  
Nézene' zaj naca na da dácheze.  
12 Ba neza zrente naca na chee bénnea' dxuzéajni'inu', Xran,  
ne dxusédenu' le' ca naca da nadxixruj be'u,  
13 chee cueza zri lazre' gate za zra dxaca da calela,  
ca zrin zra xelexú'u xedxu ba benne' dxelune' da zrinnaj.  
14 Québequeze cueaj xichaj Xránadxu Dios bénneache chee',  
ne quebe gusán lazre' benne' ca' ba gucá'a Le'.



15 Naca xrlátaje ca xuluchi'ë cheë Bénneache,  
na' xelúnqueze da xrlátaje xúgute benne' zaj naque' li lazre'.  
16 ¿Núzraqueze gácale neda' tíl-lalëdxu benne'  
wen da calela ca'?  
¿Núzraqueze súale neda' tíl-lalëdxu benne'  
dxelune' da zrinnaj?  
17 Chela ca gúcale Xránadxu neda', bachelja xu'a xëdxu ba.  
18 Gate gunnía': Xran, ba zua cheajcházia',  
na' Lue', dutë xel-la' zri'i lazre' chiu' gúcalenu' neda'.  
19 Gate dxe'a gunne xue, ne zua' lu da štebe,  
Lué'queze dxexúe zrenu' neda', na' dxebéle'eda'.  
20 Québequeze nacu' tuze benne' ca' dxuluchi'ë cheë  
bénneache da quebe naca xrlátaje,  
benne' ca' dxulucá'ane' ca xrlátaje da quebe naca na xrlátaje.  
21 Benne' caní dxelune' tuze dizra' da xelune' cheë  
benne' xrlátaje,  
na' dxelechugue' cheë gate bénnea' quebe bi zria nabague'.  
22 Xránadxu Dios naque' ca tu xu'u naga zua chawa'.  
Dios chia' naque' ca tu xiaj xre da dxuzé chacha na neda'.  
23 Le' xexízruje' benne' ca' dxelune' da calela cáteze naca  
da zrinnaj da belune'.

Guzría xi'ë benne' ca' lu da calela da dxelune'.  
Xránadxu Dios guzría xi'ë benne' ca' dxelune' da calela.

## 95

1 Le da, güe lá'anadxu Xránadxu Dios dutë xel-la' dxebé.  
Dutë xel-la' dxebé gúl-ladxu cheë Bénnea' nuzúa chúchue'  
dxi'u naga ladxu.  
2 Cheajdxu lau Le', ne xëdxu Le': Xcalenu'.  
Dutë xel-la' dxebé gúl-ladxu da güe lá'anadxu Le'.  
3 Naca Xránadxu tu Dios szrentë,  
ne naque' Wenná Bea szrentë lawe' dios ca' cheë Bénneache.  
4 Dxenná bé'eng' du gabí'i xëzr la xu,  
naga naca situj, ne naga naca sibe cheë xi'a ca'.  
5 Dxenná bé'eng' nísadau' da núnqueze Le',  
ne cá'anqueze xëzr la xu da bënë'.  
6 Le da, gucá'ana szrendxu Le', gátadxu sudxú'ala.  
Guzú zríbedxu lau Xránadxu, Bénnea' nune' dxi'u.  
7 Le' naque' Dios cheëdxu.  
Nácadxu benne' ca' dxuxúequeze', ne nácadxu ca zríla'du ca'  
cheéqueze'.  
8 Che dxenle chí'ë na'a zra, quebe gun zide' lázrdaule  
ca belún xra xrtáule ca' naga nazí le na Meriba,  
ne ca belune' lu zra na' le'ë xixre' lawe' lataj naga  
nazí le na Masah,  
9 naga buluchá'a xra xrtáule neda', ne belune' neda' da štebe  
lácala belelé'eng' xúgute da bënë'.  
10 Lawe' chua iza beditaj lazra' cheë benne' ca',  
na' gunnía': Zaj naque' benne' dxelebéaj xíchaje' neda',  
ne quebe dxelune' ca da dxulé'eda' le'.  
11 Cheë le na', dutë xel-la' dxezrá'a chia' bzetaj cuina' gunnía':  
Quebe xelxú'uqueze' naga xelexezí' lazre' nen neda'.

## 96

1 Le gul-la cheë Xránadxu tu da cube.  
Le gul-la cheë Xránadxu, le'e zrale du gabí'i xëzr la xu.  
2 Le gul-la cheë Xránadxu, ne le güe lá'ana La lá'azxa chië'.  
Tu zra tu zra le guzén ca naca xel-la' weselá da dxunne'.  
3 Le guzén benne' xëzr la xu ca' ca naca xel-la' szren cheë',  
Ne benne' xúgute xëzre ca zaj naca xel-la' waca zren nune'.  
4 Szrentë naca Xránadxu, ne naca cheë güe lá'analë'ëdxu Le'.  
Naca cheë' gápadxe' xel-la' ba lá'ana ca dios ca'

chee b enneache,  
 5 lawe' da zaj naca x ugute dios ca' bedau' xiaj xaga ca'.  
 Xr nadxu Dios bene' xab a na'.  
 6 Zual e Le' da xab a, ne xel-la' szren.  
 Nazrate xudau' chee' xel-la' waca, ne da xrtante.  
 7 Le g ie l 'ana Xr nadxu, le'e zrale du gab 'i xezr la xu.  
 Le g ie l 'ana xel-la' szren chee', ne xel-la' waca chee'.  
 8 Le gapa ba l 'ana Xr nadxu ca da naca chee' si'e.  
 Le gua da gun ezujle, ne le da chale'aj chee' xudau' chee'.  
 9 Le guc 'ana szren Xr nadxu lu xel-la' xrtante chee'  
 da naca l 'azxa chee'.  
 Le zrebe lau Le', le'e zrale du gab 'i xezr la xu.  
 10 Le xe b enneache xezr la xu: Naca Xr nadxu Wenn  Bea.  
 Nuz a ch chue' xezr la xu nig , na' quebe nu seque' gut  na.  
 Guchi'e chee b enneache ca naca da xrl taje.  
 11 Le be, le'e, xab a, ne xezr la xu.  
 Le cuezre xa'a, le'e, n sadau', ne bea ca' zrale na'.  
 12 Le be, le'e, le'e xixre', ne bea ca' zrale na'.  
 Xaga ca' zaj dxe' xi'a ca' welunna schaga lu xel-la' dxebe'  
 13 lau Xr nadxu gate xide'.  
 Xide' guchi'e chee b enneache zaj zre'e xezr la xu.  
 Nna b 'ene' b enneache du gab 'i xezr la xu.  
 Nna be'e Le' ca naca da xrl taje, ne ca naca da li.

## 97

1 Naca Xr nadxu Benne' Wenn  Bea.  
 Le be, le'e zrale xezr la xu.  
 Le be, le'e zrale dxu'a n sadu'.  
 2 Zaj naxechaj beuj, ne da chul-la Le'.  
 Ca naca da li, ne da xrl taje dxenn  be'e.  
 3 Cu a lau xi' lau Le',  
 ne guzezxe na benne' guled bague' Le'.  
 4 Ca naca xesa ca' chee' bulusen  na xezr la xu.  
 Dxel e xezr la xu na, ne dxezrize na.  
 5 Dxelexuna xi'a ca' ca da zixre chee b ezudau' lau Xr nadxu,  
 lau Xrana b enneache zaj zre'e du gab 'i xezr la xu.  
 6 Dxul e xab a ca naca da xrl taje chee',  
 na' dxelele'e b enneache dute xezr la xu ca naca  
 xel-la' szren chee'.  
 7 Dxa-la' xelexedu'e x ugute benne' ca' dxuluc 'ana szrene'  
 bedau' xiaj xaga ca',  
 benne' ca' dxuluc 'ana szren cuine' ca zaj naca bedau' xiaj xaga ca'.  
 X ugute dios chee b enneache ca' dxa-la' xuluz  zribe na  
 lau Xr nadxu Dios.  
 8 Bel n benne' zaj zre'e S on, na' gulebene'.  
 Guleb  benne' zaj zre'e Jud , ne chee da guchi'u Lue', Xran.  
 9 Szrente nacu' Lue', Xran, lawe' dute xezr la xu.  
 Szrendxa nacu' Lue' ca x ugute dios chee b enneache.  
 10 Le'e, n lale nazr 'ile Xr nadxu, le cuide da calela.  
 Le' dxux e' b enne' du zaj xu'e b enneache chee'.  
 Dxusel ' le' lu na' benne' dxelebeaj x chaje' Dios.  
 11 Zual  da dxusen  na benne' xrl taje ca',  
 na' xel-la' dxebe zual  na benne' li lazre' ca'.  
 12 Le be, le'e, benne' xrl taje, lau Xr nadxu.  
 Le gus  l zrele ca da nun Dios l 'azxa, ne le g ie l 'ana Le'.

## 98

1 Le gul-la chee Xr nadxu tu da cube lawe' da nune' da ca'  
 da dxebedxu.  
 Ne chee xel-la' wal-la chee', ne xel-la' waca l 'azxa chee'  
 ba b inne'.  
 2 Ba nuz n Xr nadxu ca dxune' dxusel ' b enneache.

Ba bzenne' bënneache xęzr la xu ca' ca naca da xrlátaje chee'.

<sup>3</sup> Ba nune' ca da guchebe lazre' chee' benne' Israel ca' ca naca xel-la' li lazre' chee', ne xel-la' nazrí'i zren chee'.

Bënneache du gabí'i xęzr la xu ba belelé'ene' ca naca da ben Dios cheedxu.

<sup>4</sup> Le gul-la lu xel-la' dxebé lau Xránadxu, le'e zrale du gabí'i xęzr la xu.

Le güe lá'ana Le' nen da gül-lale, ne lu xel-la' dxebé chee le cuezre xa'a.

<sup>5</sup> Le gul-la da güe lá'anale Xránadxu.

Le gul-la nen da con zríadi'i na du ca' da quínnele.

<sup>6</sup> Le gucuezre luzu da ca' dxulucuezre', ne da dxutíl-lale ca', ne le cuezre xa'a lu xel-la' dxebé lau Xránadxu,

Wenná Bea cheedxu.

<sup>7</sup> Le gun schaga nísadau', ne bea ca' zrale na'.

Le gul-la, le'e, xęzr la xu, ne le'e zrale na'.

<sup>8</sup> Le capa na'le, le'e xęgu ca'.

Le gul-la lu xel-la' dxebé, le'e, xi'a ca', lau Xránadxu

<sup>9</sup> lawe' da xide' xedajnná bé'ene' xęzr la xu nígá.

Nna bé'ene' benne' zaj zre'e du gabí'i xęzr la xu lu da xrlátaje, ne bënneache dutę xęzr la xu lu da naca li lazre'.

## 99

<sup>1</sup> Naca Xránadxu Dios Benne' Wenná Bea,

na' dxelezrize xúgute bënneache lau Le'.

Dxe'e lataj blau chee' da zua na lávela querubín ca', na' dxezrú' lu xęzr la xu.

<sup>2</sup> Szrente naca Xránadxu lu xi'a Sión.

Naque' szren lawe' xúgute cue' xęzr la xu ca'.

<sup>3</sup> Le güe lá'ana La Xránadxu da naca na szren, ne da dxal-la' zrébedxu.

¡Lá'azxa naca Le'!

<sup>4</sup> Lue', Wenná Bea szrente, nazrí'inu' da naca xrlátaje.

Nuzúa chachu' da naca li lazre'.

Ba nunu' da naca xrlátaje, ne da naca li lazre'

ládujla zri'ine zre sua Jacob.

<sup>5</sup> Le gucá'ana szren Xránadxu Dios.

Le guzú zríbele lau Le' naga dxe'e.

¡Lá'azxa naca Le'!

<sup>6</sup> Moisés, ne Aarón gulaque' bxruze chee' ca'.

Samuel guque' tu benne' bchálajlene' Le'.

Gulenné' Xránadxu Dios, na' Le' bechebe'.

<sup>7</sup> Tu lu beuj bza bchálajlene' benne' ca'.

Buluzúe' dizra' da gunná bé'ene',

ne da ca' bdxixruij be'ene' le'.

<sup>8</sup> Xránantu' Dios, bechebu' lau benne' ca'.

Blé'enu' le' nacu' Dios, dxunite lau' chee bënneache,

lácala dxudéu' le' xel-la' zi' ne chee dul-la da zaj nabague'.

<sup>9</sup> Le gucá'ana szren Xránadxu Dios.

Le guzú zríbele lau Le' lu xi'a lá'azxa chee',

lawe' da lá'azxa naca Xránadxu Dios.

## 100

<sup>1</sup> ¡Le gul-la lau Xránadxu Dios, le'e zrale du gabí'i xęzr la xu!

<sup>2</sup> ¡Le gucá'ana szren Le' dutę xel-la' dxebé!

¡Le da lau Le', dxúl-lale dutę xel-la' dxebé!

<sup>3</sup> Cabata' gal-la lázrele naca Xránadxu Díósqueze.

Le' benę' dxi'u, na' nácadxu chee Le'.

Nácadxu xęzre chee', ne zríla' du chee'.

<sup>4</sup> Le chu'u lataj naga zua xudau' chee', xęle Le': Xcalenu',

ne chale'aj chee na, güe lá'anale Le'.

Le xe Le': Xcalenu', ne le güe lá'ana Le'.

<sup>5</sup>Chawe' naca Xránadxu, na' chadía chacanna zua  
xel-la' zri'i lazre' chee'.

Xel-la' li lazre' chee' tu súazqueze na chadía chacanna.

## 101

<sup>1</sup>Tu gúl-lazqueza' ca naca xel-la' zri'i lazre',  
ne xel-la' li lazre' chiu'.

Tu gúl-lazqueza' chiu' Lue', Xrana' Dios.

<sup>2</sup>Dxaca lazra' guna' da naca li lazre'.

¿Bátala xidu' gácalenu' neda'?

Guna' da naca du lazre', ne cá'anqueze guna' caní  
lu xu'u lizra'.

<sup>3</sup>Québequeze cu'u lazra' guna' tu da zrinnaj.  
Dxecuúdeda' da dxelún benne' ca' dxelebéaj xíchajé' Dios.  
Québequeze gu'a lataj xelebigue' naga zua' neda'.

<sup>4</sup>Gucuaa' lu xichaj lázrdawa' da calela,

ne quebe cu'u lazra' chee' da calela.

<sup>5</sup>Guzúa' chalá'ala benne' dxeleéné' bagácheze  
chee' benne' xula.

Quebe gu'a lataj súale neda' tu benne' dxucá'ana szren cuine',  
u naque' benne' wenná be'e.

<sup>6</sup>Le'eda' chawe' benne' ca' zaj naque' li lazre' lau Dios,  
chee' xelezré'e lawa' neda'.

Tuze benne' ca' zaj naque' du lazre' xelune' zrin chia'.

<sup>7</sup>Quebe gu'a lataj benne' wecache lan chu'e lizra'.

Quebe gu'a lataj tu benne' wen lazre' xegá'ane' naga zua'.

<sup>8</sup>Tu zra tu zra guzría xi'a benne' ca' dxelune' da calela,  
benne' ca' zaj zré'e lu xezr la xu chia'.

Gucuaa' xúgute benne' ca' dxelune' da zrinnaj lu xezre chee'  
Xránadxu Dios.

## 102

<sup>1</sup>Xrana' Dios, bene da dxenaba' lau',

ne bze naga da dxuláwizra' Lue'.

<sup>2</sup>Quebe gucache lau' lawa' neda', lawe' da lu da stebe zua'.

Bze naga neda', ne bechébeche chia' gate dxuláwizra' Lue'.

<sup>3</sup>Naca xel-la' nabán chia' ca zren chee' xi' da dxexenítete.

Xu'u da la lu zrita chia' ca tu xi' da dxálale'e na.

<sup>4</sup>Dxedú lazra', ne naca lázrdawa' ca tu xixre' da dxecuade,  
na' québedxa dxenná na gudagu xeta.

<sup>5</sup>Lawe' da dxebezre wé'le'a ba nazrítale'a.

<sup>6</sup>Naca' ca tu situgún dxedaba' tu lu xezr la xu bizre,  
ne ca tu bzriu zríaba' lawe' tu xu'u ze la'a.

<sup>7</sup>Dxíchaja' bchigala, ne naca' ca tu bxinne zríaba' túzeba'  
xrgu'u sibe.

<sup>8</sup>Tu zra tu zra tu dxuluchácalezqueze benne'  
dxeledábague' neda'.

Benne' ca' dxelecuúdené' neda' dxuluchínene' la' neda'  
gate nu benne' dxelegú'e de'.

<sup>9</sup>Lu waláz chee' xeta dxawa' de,  
na' nisa dxebezra' dxexixre na da dxé'aja'.

<sup>10</sup>Caní dxaca chia' lawe' da dxezra'u neda',  
ne dxecuúdenu' neda'.

Guca'u neda', na' gudxú'unu' neda'.

<sup>11</sup>Naca xel-la' nabán chia' ca tu zrul-la da dxedeze,  
na' naca' ca tu xixre' da ba nabizre.

<sup>12</sup>Lue', Xrana' Dios, tu chí'izqueze zu',  
na' cheajlesá lazre' xúgute cuen bénneache Lau'.

<sup>13</sup>Chasu', ne xexache lazru' benne' zaj zré'e xezre Sión,  
lawe' da ba bzrin zra xexache lazru' benne' ca'.

<sup>14</sup>Netu', wen zrin chiu', nazrí'intu' xiaj ca' chee' xezre na'.

Dxéquentu' zi' lawe' da ba nabía xi na.

<sup>15</sup> Nadxa benne' xezr la xu ca' xezezebe' lau Lue', Xran.  
Xezezrebe xúgute benne' wenná bea chee xezr la xu nigá  
da xabáa chiu'.

<sup>16</sup> gate ba bechisu' xezre Sión, Xran,  
ne xelélé'eqezne' ca naca da xabáa chee na,

<sup>17</sup> gate na' guzé' nagu' da dxelenaba benne' ca' guleaj xíchaju',  
ne québedxa guzú' chalá'ala da dxelata' xuene' Lue'.

<sup>18</sup> Xuaj da nigá chee xululaba benne' ca' za zá'aca,  
na' benne' ca' za xelalaj xelúe lá'ane' Xránadxu Dios.

<sup>19</sup> Naga zua Xránadxu xabáa gunné' e.  
Naga zue' xabáa blé'ene' lu xezr la xu nigá.

<sup>20</sup> Dxelé'eng' benne' dxelebezre xache', benne' zaj xu'e  
lizre xia,

na' gusané' benne' ca' ba zaj nachugue' chee' xelatié'.

<sup>21</sup> Xuluzenne' benne' zaj zre' e xezre Sión ca szren naca  
La Xránadxu Dios,

chee xelúe lá'ane' Le' lu xezre Jerusalén,

<sup>22</sup> gate xezezraga bénmeache chee xúgute xezre, ne xúgute cue'  
xezr la xu

chee xulucá'ana szrene' Xránadxu Dios.

<sup>23</sup> Xránadxu Dios bene' gute ni'a na'a gate ne naca' cuide'.  
Xeláteze ca betié' neda'.

<sup>24</sup> Nadxa gunniá': Dios chia', quebe gutiu' neda',  
gate quebe ne guéxrua'.

Lue' tu chí'izqueze zu'.

<sup>25</sup> Nédxudauté Lue' bzu' xezr la xu nigá, na' nen na'u  
benu' xabáa.

<sup>26</sup> Xelebíá xi' da ca', san tu zúazquezu' Lue'.

Welexru xúgute da ca' ca tu ladxe'.

Ca dxuchadxu zra lánadxu tuzruj, ca' gucha'u da ca',  
na' xucúbeu' na.

<sup>27</sup> Túzqueze ca nacu' Lue',

ne québequeze te chiu' Lue'.

<sup>28</sup> Zrí'inentu' netu', wen zrin chiu', xezezrebe' chawe',  
na' guzé' chúchuquezu' zri'ine zre súantu' lau Lue'.

## 103

<sup>1</sup> Be lá'ana Xránadxu Dios, lue', bénne'du xu'a.

Be lá'ana Le' lá'azxa, duté da naca'.

<sup>2</sup> Be lá'ana Xránadxu, lue', bénne'du xu'a,  
ne quebe gal-la lazru' ca da chawe' da nuné' chiu'.

<sup>3</sup> Dxunite lawé' chee xúgute dul-la nabaga'a.  
Dxexuné' neda' ca naca xúgute xízrawé' da xu'a.

<sup>4</sup> Dxuxúe' neda' chee quebe gatiá'.

Lu xel-la' zri'i lazre' chee', ne xel-la' dxexache lazre' chee'  
dxuné' chawe' chia'.

<sup>5</sup> Dxuzánle' e da chawe' da dxaca chia' chee xegá'ana'  
benne' cuide',

ne benne' wal-la ca dxaca chee tu bsia.

<sup>6</sup> Xránadxu Dios dxuchi' e chee da dxaca chee benne'  
dxeledé' da ba xa',

ne dxucá'ana chawe' da dxaca chee'.

<sup>7</sup> Blé'eng' Moisés da ca' gulú'u lazre' guné',  
ne be' e lataj benne' Israel ca' belelé'eng' da ca' bene'.

<sup>8</sup> Naca Xránadxu Benne' dxexache lazre', ne Benne' zri'i lazre'.  
Quebe dxezrá'azié', san zrente naca xel-la' zri'i lazre' chee'.

<sup>9</sup> Quebe nniaqueze', ne quebe zrá'aqueze'.

<sup>10</sup> Quebe dxudé' dxi'u lu da ba xa' ca naca zria  
da nabágadxu,

ne quebe ne guzríá xi' e dxi'u ne chee dul-la da nabágadxu.

<sup>11</sup> Ca sibe naca xabáa lawe' xezr la xu,

caníqueze naca xel-la' zri'i lazre' zren cheę' nen benne' ca'  
dxelape' Le' ba lá'ana.

12 Ca zitu' naca naga dxalaj gubizra, ne naga dxebía na,  
caníqueze dxucuase' zitu' dul-la da nabágadxu.

13 Ca zri'i lazre' naca xra bidu ca' nen zri'inequeze',  
caníqueze naca zri'i lazre' Xránadxu nen benne' ca'  
dxelape' Le' ba lá'ana.

14 Le' nézene' ca nácadxu lu beła' dxen cheędxu.  
Dxajsa lazre' nácadxu xu xrte.

15 Ca naca xel-la' nabán cheędxu, nácadxu ca tu xixre'.  
Dxegúladxu ca tu xiaj xixre',

16 na' dxedé be' dxua na le na, na' dxexenite na,  
na' québedxa nu dxelé'eqeze le na.

17 Ca naca cheę benne' ca' dxelape' ba lá'ana Xránadxu,  
zúale xel-la' zri'i lazre' cheę' benne' ca' chadía chacanna,  
na' xel-la' xrlátaje cheę' zúalequeze na xúgute zri'ine zre sua  
benne' ca',

18 benne' ca' dxelúnqueze' ca naca xel-la' wezría nune',  
ne benne' ca' dxelunge' ca zaj naca da nadxixruj be'e.

19 Nuzúa Xránadxu lataj cheę' xabáa naga dxe'e dxenná be'e.  
Nácaqueze' Wenná Bea lawe' xúgute da zaj zua.

20 Le güe lá'ana Xránadxu, le'e, gubáz cheę xabáa ca',  
Nácale benne' wal-la, ne benne' chúchule'e,  
na' dxunle ca dxenná Le', ne dxuzé nágale ca dxe'e le'e.

21 Le güe lá'ana Xránadxu, le'e, dxenná beale xabáa.

Nácale wen zrin cheę', ne dxunle ca dxaca lazre' Le'.

22 Le güe lá'ana Xránadxu, xúgutele le'e ba nun Dios le'e,  
zrale xúgute lataj naga dxenná bea Le'.

¡Be lá'ana Xránadxu, lue', bénne'du xu'a!

## 104

1 Be lá'ana Xránadxu Dios, lue', bénne'du xu'a.

¡Xrana' Dios, szrente nacu' Lue'!

Nacu' zra lanu' da xabáa, ne da xrtante.

2 Dxugacu cuinu' xel-la' naxani' ca zra lanu'.

Dxechilju' xabáa ca tu xu'u ladxe' chiu'.

3 Nunu' lizru' lawe' nisa da ze ná'ala.

Dxuchínenu' beuj ca' ca tu da dxudé xua naga dxe'u Lue',  
da dxedá na lu be'.

4 Dxuchínenu' be' ca' ca gubáz chiu' ca',

ne xesa ca' ca wen zrin chiu' ca'.

5 Bzua chuchu' xęzr la xu nigá lu lane na,

na' quebe nu gaca gutá le na.

6 Bgacu' xęzr la xu nigá nen nísadau' ca dxun tu benne'  
dxacue' zra lanę',

na' nisa na' bgacu na xi'a ca'.

7 Gate gudil-lu' nisa na', na' bzrunnuj na.

Bebiga na gate ben na chi'u zizraj.

8 Nisa na' bgacu na xi'a ca' xajxedé na dxu'a xęgu ca',  
lataj ca' ba nunu' cheę nisa na'.

9 Bzu' naga ze lau cheajsé na, naga québedxa gaca te na,  
cheę québedxa gacu na xęzr la xu bizre na'.

10 Dxunu' beaj ca' dxelalaj na dxu'a xęgudu ca',

ne xęgu ca' dxeledé na ládujla xi'a ca'.

11 Lu xęgu ca' dxelé'aj be xixre' ca' nisa,

na' dxegúa na xel-la' dxelebile cheę burro xixre' ca'.

12 Lu xaga zaj nnita dxu'a xęgu ca' zaj zra' béadu ca'  
zaj zua xrila.

Dxelúl-laba' ládujla zruze na ca'.

13 Zran xabáa dxesel-lu' xiuj da dxaca na lu xi'a ca',

na' dxezrate xęzr la xu na' ca naca da xrlátaje da dxunu'.

14 Dxusegulu' xixre' da dxelagu beẓre ca',  
 ne xixre'du ca' da dxelagu bēnneache,  
 ne da ca' dxuluchine bēnneache dxelune' xel-la' wagu,  
 15 ne uva ca' da dxelune' xrise uva wal-la da dxuzúa na  
 bēnneache ca' xel-la' dxelebé,  
 ne olivo ca' da dxelune' da za da dxelegú'e xíchaje',  
 ne zrua' da dxelune' xeta chee xelaca bané'.  
 16 Xaga cedro ca' da zaj zua na xi'a Líbano dxelezíle'e na nisa xiuj.  
 Zaj naca na xaga chee Xránadxu Dios, da ca' guza Le'.  
 17 Lu xaga ca' dxuluzría bxínneđu ca' xrú'uneba',  
 na' lu zruze na ca' zaj zua lizre bxuze' ca'.  
 18 Zaj zua chivo xi'a ca' lu xi'a zri'a ca',  
 na' lu bluaj ca' chee xi'a ca' zaj zua bzrizru' ca'.  
 19 Benu' beu' da dxulé'e na tu beu' tu beu' chee iza,  
 na' gubizra núnbea na gate dxal-la' cuía na.  
 20 Benu' dxela, na' gate bache nachul-la,  
 na' dxeledxúaj be dxela ca'.  
 21 Dxelebezre xa'a beẓre xixre' ca', zaj nauba' be xeláguba'.  
 Dxelílajba' da nun Dios xeláguba'.  
 22 Gate dxalaj gubizra, na' dxelexezrinba' lu bluaj cheeba',  
 naga dxeláseba' te zra.  
 23 Nadxa dxeledxúaj bēnneache dxelune' zrin,  
 na' dxelúnqueze' zrin ca dxebía gubizra.  
 24 Xran, da zante zaj naca da benu'.  
 Dute xel-la' sina chiu' benu' da ca'.  
 Nazrate xezr la xu nigá da ca' benu'.  
 25 Na' zua nisadau', da zri'a, ne da laga,  
 naga zaj xu'u zánete bea ca', béadu ca', ne be zri'a ca'.  
 26 Lu nisadau' na' zaj zra' da dxeledá lawe' nisadau' ca'.  
 Zua be zri'a na' benu' Lue', nazi' laba' leviatán.  
 27 Xúgute bea ca' dxuluxrén lázreba' Lue',  
 chee gunézruju' da xeláguba' ca zrin chee na.  
 28 Dxunézruju' leba', na' dxelecá'aba' na.  
 Dxunézruju' da dxeláguba', na' dxeléljeba'.  
 29 Gate quebe dxenná'u-ba', na' dxelezebeba'.  
 Gate dxucuasú' be' dxelecá'aba', na' dxeláteba',  
 ne dxelexácaba' xu xrte.  
 30 Gate dxesel-lu' be' chiu', na' xelexaca banba'.  
 Dxunézruju' xel-la' nabán cube chee da ca' zaj zua  
 xezr la xu nigá.  
 31 ¡Chadía chacanna gaca ba Xránadxu Dios!  
 Dhezaca ba lazre' Xránadxu chee da ca' ba núnqueze'.  
 32 Dxenné'e xezr la xu nigá, na' dxezrú' na.  
 Dxuté' xi'a ca', na' dxeledxúaj na zren.  
 33 Gúl-laqueza' chee Xránadxu dxácate na' naca bana'.  
 Xúgute zra zúaqueza' neda' gul-la' da güe lá'ana' Dios chia'.  
 34 Chawe' naca chia' da ca' dxulaba lazra' ca naca chee',  
 na' dxebéle'eda' ne chee Xrana' Dios.  
 35 Welebía xi' benne' dul-la ca' zaj zre'e lu xezr la xu nigá,  
 Na' québedxa cha benne' ca' dxelebéaj xíchaje' Dios.  
 ¡Be lá'ana Xránadxu Dios, lue', bēne'du xu'a!  
 ¡Le güe lá'ana Xránadxu!

## 105

1 ¡Le güe lá'ana Xránadxu Dios!  
 ¡Le gucá'ana szren La Le'!  
 ¡Le guzén bēnneache dute xezr la xu ca naca da nune'!  
 2 ¡Le gul-la chee'!  
 ¡Le gul-la da güe lá'anale Le'!  
 ¡Le guchalaj chee da zrente ca' da nune'!  
 3 ¡Le be lu da naca chee'!

Xúgute benne' ca' dxelapa ba lá'ana Xránadxu dxal-la'  
xelebéle'ene'.

<sup>4</sup> Le naba Xránadxu gácalene' le'e.

Tu zra tu zra le guxrén lazre' Xránadxu Dios.

<sup>5-6</sup> Le'e, zri'ine zre sua Abraham, wen zrin chee Xránadxu.

Le'e, zri'ine zre sua Jacob, bénnea' guqué'e,

Le gusá lazre' xel-la' waca ca', ne da zrente' ca' da bene',

ne ca naca da bchi'e chee.

<sup>7</sup> Le' naque' Xránadxu, ne Dios cheedxu.

Le' dxenná bé'ene' bénneache zaj zre'e dute xezr la xu.

<sup>8</sup> Lácala te chee chi gaxúa cuen bénneache,

québequeze gal-la lazre' da guchebe lazre'

lu xel-la' wezría chee',

<sup>9</sup> xel-la' wezría na' bénlene' Abraham,

da na' bzetaj cuine' guchebe lazre' chee Isaac,

<sup>10</sup> na' bzua chúche' na ca tu da nadxixruj bea na,

da gun Jacob,

da gaca na tu xel-la' wezría da zeajlí canna nen

benne' Israel ca',

<sup>11</sup> da bene' gate na' gunné': "Chiu' lue' gunna' xezr la xu chee

benne' Canaán ca',

da gaca na tu da xudele lu na' zri'ine zre súale."

<sup>12</sup> Gate na' bábaze zaj naque'

gulezré'e lu xezr la xu nigá ca benne' zitu' ca',

<sup>13</sup> ne guledé'e tu xezr la xu xetú xezr la xu, ne tu xezre

xetú xezre.

<sup>14</sup> Quebe be' Dios lataj nu benne' bi gune' chee

bénneache chee',

na' ne chee benne' ca' gudil-le' benne' wenna' bea ca'.

<sup>15</sup> Guzre' le': "Quebe bi gunle chee benne' ca' gucá'a,

ne quebe gunle da caléla chee benne' ca' dxuluchalaje'

waláz chia'."

<sup>16</sup> Bene' guta' tu gubina' lu xezr la xu na',

na' gudú'e' ca naca xeta xelawé'.

<sup>17</sup> Gusel-le' tu benne' cuía lawé' lau benne' chie' ca',

bénnea' naque' José, bi na' belutie'-be' chee gácabe'

wen zrin chee benne' zitu'.

<sup>18</sup> Buluzré'e ní'abe' lu xedxu chee cuaga da bexru na ní'abe',

gate na' gulu'e'-be' lizre xia lu xezr la xu Egipto,

<sup>19</sup> ca bzzrin zra guca li ca da gunná José dxal-la' gaca.

Caní guca, ble'e xrtizra' Xránadxu cúnnabe' da li.

<sup>20</sup> Nadxa benne' wenna' bea chee Egipto gusel-le'

nu gusán José na'.

Bénnea' dxenná bé'ene' zánete' cue' xezr la xu bsane'-be'.

<sup>21</sup> Bzue'-be' gácabe' xrana benne' zaj zre'e lizre',

ne chee nna be'ebe' ca naca da xu'u lu ne'e,

<sup>22</sup> chee tíl-labe' benne' szren ca' chee wenna' bea cáteze

dxaca lázrebe',

ne chee guzéajni'ibe' benne' gula chee xezr la xu Egipto

chee xelaque' benne' sina.

<sup>23</sup> Gudé na' gulu'e' benne' Israel ca' lu xezr la xu Egipto,

na' guzúa Jacob lu xezr la xu chee zri'ine zre sua Cam.

<sup>24</sup> Gulánle'e bénneache chee Xránadxu lu xezr la xu na',

na' bene' gualaque' wál-ladxá ca benne' guledábague' Le'.

<sup>25</sup> Bcha Dios lázxdau benne' Egipto ca' chee xelecuídené'

bénneache chee',

chee xelegú'u lazre' xelune' da caléla chee wen zrin chee' ca'.

<sup>26</sup> Nadxa gusel-le' Moisés, wen zrin chee', lau bénneache

chee' ca', ne Aarón, bénnea' guqué'e.

<sup>27</sup> Benne' caní be'e Dios lataj belune' xel-la' waca ca'

chee xabáa,

ne xel-la' waca zrente' ca' lu xezr la xu chee zri'ine zre sua Cam.



28 Gusel-la Dios tu da chul-la da bgacu na dutë xëzr la xu na',  
 san benne' Egipto ca' quebe buluzúe' dizra' da gunná be'ene' le'.  
 29 Nadxa bene' bexaca nisa xegu cheë benne' ca' dxen,  
 ne betie' xügute bela zaj zraba' xegu ca'.  
 30 Busezrate' xëzr la xu cheë bluzru ca' ga bzrintë gulezraba'  
 xu'u lizre benne' wenná bea cheë benne' Egipto ca'.  
 31 Gunnaze Dios, na' belelá' zánete be'a cheë bezre,  
 ne be'a lase ca' dutë lu xëzr la xu cheë benne' ca'.  
 32 Waláz cheë nisa xiuj gusel-le' xiaj bezxe' lu xëzr la xu  
 cheë benne' ca',  
 ne xi' da bzezxe na ca naca xëzr la xu cheë'.  
 33 Bzria xi'e ca zaj naca lba uva cheë', ne ca zaj naca xaga higo cheë',  
 na' bzúxuje' ca zaj naca xaga zaj zë lu xëzr la xu cheë'.  
 34 Gunnaze', na' belelá' biche zu ca',  
 da quebe nu seque' gulaba lëba',  
 35 na' guláguba' dutë xixre' xa'a lu xëzr la xu cheë',  
 ne guláguba' dutë lina da dxunna xëzr la xu na'.  
 36 Nadxa betie' xügute bi biu nedxu cheë benne' Egipto ca',  
 bi zaj nácabe' bi blau cheë'.  
 37 Bebéaje' bënneache cheë' na' zaj nu'e dumí plata,  
 ne dumí oro,  
 na' quebe nu chilá' benne' ládujla le', benne' quebe  
 chawe' zue'.  
 38 Gulebé benne' Egipto ca' gate beledxúaj benne' ca' ga na',  
 lawe' da belezrébele'e le'.  
 39 Bzalaj Dios tu beuj da gulú'u na benne' ca' zrul-la,  
 ne tu xi' da bsaní na cheë' chizrela.  
 40 Gulenabe' Dios, na' gusel-le' cheë' btau ca',  
 ne bene' gulélajene' xeta da bdxuaj na xabáa.  
 41 Gule'e tu xiaj xre, na' gulaj nisa  
 da gedé na lu xëzr la xu bizre na' ca tu xegu nisa.  
 42 Caní ben Dios lawe' da bsa lazre' xrtizre' lá'azxa  
 da guchebe lazre' gung' cheë Abraham, wen zrin cheë'.  
 43 Bebéaje' bënneache cheë' lu xëzr la xu Egipto, dxelebene'.  
 Lu da ba neza gulezrá' benne' ca' guqu'é.  
 44 Bnézruje' benne' ca' xëzr la xu cheë benne' xezica ca',  
 na' da belún benne' xëzr la xu ca' bexaca na cheë benne'  
 cheë' ca',  
 45 cheë xulupá'ane' ca naca xrba cheë' ca',  
 ne xelune' ca naca da gunná bé'ene' ca'.

¡Gaca ba lá'azxa Xránadxu Dios!

## 106

1 ¡Gaca ba lá'azxa Xránadxu Dios!  
 ¡Le xë Xránadxu Dios: "Xcalenu!"  
 Caní dxal-la' gunle lawe' da naque' xrlátaje,  
 ne lawe' da tu chí'izqueze dxexache lazre' dxi'u.  
 2 ¿Núzraqueze seque' gulé'ene' ca naca xel-la' waca zrente' ca'  
 da nune' Xránadxu?  
 ¿Núzraqueze seque' güe lá'ane' Le' ca dxal-la' gundxu?  
 3 Ba neza zrente' naca na cheë benne' ca' dxelune' da xrlátaje,  
 benne' ca' tu dxelúnqueze' da naca xrlátaje.  
 4 Bsa lazre' chia', Xrana' Dios, gate dxunu' da chawe'  
 cheë bënneache chiu'.  
 5 Gudá bselá neda' cheë gaca le'eda' da chawe' gunu'  
 cheë benne' ca' ba guca'u Lue',  
 ne cheë beda' gate xelezrá' bënneache chiu' lu da ba neza,  
 ne cheë bélena' bënneache chiu'.  
 6 Ba bentu' dul-la cáqueze belún xra xrtáuntu' ca'.  
 Bentu' da calela, ne bentu' da zrinnaj.  
 7 Gate gulezrá' xra xrtáuntu' lu xëzr la xu Egipto,

quebe bululaba lazre' ca naca xel-la' waca ca' chee xabáa da benu'.

Quebe xeajlesá lazre' ca bexache lázrele'u le'.  
Guledábage' Lue' dxu'a nísadau' da nazí le na Xrna.

<sup>8</sup> Le' bselé' benne' ca' chee gaca ba lá'ana La Le',  
ne chee gulé'e lau ca naca xel-la' waca chee'.

<sup>9</sup> Gudil-le' nísadau' Xrna na', na' bebizre na,  
na' guledé bénneache chee' laduj nísadau' na' lu xu bizre.

<sup>10</sup> Bselé' benne' ca' lu na' benne' guledábage' Le',  
ne bebéaje' le' lu na' benne' ca' bulusaca zi'e le'.

<sup>11</sup> Nadxa nísadau' na' bgacu na benne' ca' guledábage' le'.  
Netú benne' ca' quebe nu begá'ana.

<sup>12</sup> Nadxa benne' chee' ca' guléajle'e dizra' chee',  
ne belul-le' da belúe lá'ang' Le'.

<sup>13</sup> Chadi gual-la lazre' ca da bene'.

Quebe gulebeze' ca la' dizra' chee' Dios.

<sup>14</sup> Gulezá lazre' tu da calela le'e xixre' lawe' lataj na',  
na' buluché'e Dios le'e xixre' na'.

<sup>15</sup> Gudé na' bnezruj Dios ca da gulenabe',  
san gusel-le' ládujla le' tu da gute na bal-la benne' ca'.

<sup>16</sup> Gulaque' xa lazre' chee' Moisés naga zaj zre'e,  
ne chee' Aarón, Bénnea' gucá'a Xránadxu Dios.

<sup>17</sup> Nadxa bzra xezr la xu na', ne gudébe na Datán,  
ne bgacu na benne' ca' zaj de'e Abiram.

<sup>18</sup> Nadxa guxalaj xi' naga zaj nazraga benne' ca',  
na' bzezxe na benne' ca' dxeluné' da calela.

<sup>19</sup> Beluné' tu bedáu' beze da naca na oro lu xi'a Horeb,  
na' buluzú zribe' lau bedáu' oro na'.

<sup>20</sup> Caní bulucá'ang' Dios, Benne' xabáa,  
chee' xulucá'ana szrene' tu bedáu' beze,  
da naca na ca tu beze dxáguba' xixre'.

<sup>21</sup> Gual-la lazre' Dios, Bénnea' bselé' le',  
Bénnea' bene' xel-la' waca zrente' ca' lu xezr la xu Egipto,

<sup>22</sup> ne bene' xel-la' waca ca' chee' xabáa lu xezr la xu  
chee' zri'ine zre sua Cam,

ne da ca' buluchebe na dxi'u dxu'a Nísadau' Xrna.

<sup>23</sup> Nadxa guca lazre' Dios guzria xi'e bénneache chee',  
san Moisés, bénnea' gucá'a Dios, bzua cuine' lau Dios

chee' guzúa zrié' xel-la' dxezra' chee' Dios,  
na' bene' quebe guzria xi' Dios benne' ca'.

<sup>24</sup> Buluzúe' chalá'ala xezr la xu xrtanté da gunezruj Dios le',  
ne quebe guléajle'e dizra' chee'.

<sup>25</sup> Tu gulennézquezé' chee' Dios lu xu'u xide chee' ca',  
ne quebe buluzé nague' da gunná Xránadxu Dios.

<sup>26</sup> Chee le na' bzetaj cuine' gunné' ca da guné' chee' benne' ca'.  
Gunné' guné' xelate benne' ca' le'e xixre' lawe' lataj na',

<sup>27</sup> ne gusi'e bénneache chee' lu xel-la' stu' lau benne'  
xezr la xu ca',

ne guse dínnaje' le' ládujla benne' xezr la xu ca'.

<sup>28</sup> Nadxa beluné' tuze benne' ca' dxulucá'ana szrene'  
bedáu' xia nazí le na Baal-peor,

ne gulawé' béadu ca' belútié' lau dios gate ca'.

<sup>29</sup> Buluché'e Dios ne chee' da beluné',  
na' guxalaj tu xízrawé' zren da bete na benne' zan benne' ca'.

<sup>30</sup> Nadxa guxasa Finees, ne betié' bénnea' bene' dul-la,  
na' guleza xízrawé' zren na'.

<sup>31</sup> Da na' ben Finees guzi' Dios ca tu da dxucá'ana xrlátaje na  
bénnea',

da gulé'e lawe na lau xúgute cuen bénneache ca'.

<sup>32</sup> Cá'ancheze buluché'e Dios dxu'a beaj nisa nazí le na  
Meriba,

na' guca da calela chee Moisés ne chee benne' ca',  
 33 lawe' da ne chee da belune' guca Moisés xichaj zra'a,  
 na' bexúbete Moisés da gunné'.

34 Gate gulu'e lu xezr la xu nigá quebe buluzría xi'e  
 bèneache zaj nite' ga na'.

Caní guca, quebe belune' ca da guzre Dios le' xelune'.

35 Gulaque' tuze benne' xezr la xu ca',  
 ne bulusédié' benne' Israel ca' xelune' ca dxelún benne' ca',

36 na' bulucá'ana szrene' bedáu' xia xaga ca' chee benne' ca',  
 da na' ben na bxrinnaj Dios bèneache chee'.

37 Belútié' zrí'ine' bi biu, ne bi nu'ula chee'

lau bedáu' chee da xriwe' ca',

38 ne bululálaje' dxen chee bi dxé'enedu ca',

bi quebe zaj nunbe' dul-la,

da naca na dxen chee zrí'ine' bi biu, ne bi nu'ula,

bi ca' belútié' lau bedáu' xia xaga ca' chee bèneache Canaán,

na' guca sban xezr la xu na' ne chee dxen chee bidu ca'.

39 Da ca' belune' ben na le' sban,

na' gulebéaj xíchaje' Dios lu da belune'.

40 Chee le' na' bzrá'ale'e Dios bèneache chee',

na' gucuídene' benne' ca' zaj naca chee'.

41 Nadxa bdee' benne' ca' lu na' benne' xezr la xu ca',

na' benne' ca' dxelecuide bèneache chee Dios

gulenná bé'ene' le'.

42 Benne' ca' guledábage' le' bulusaca zi'e bèneache

chee Dios,

ne buluxrínnaje' le' lu xel-la' dxenná bea chee'.

43 Zánete' lasa Dios bselé' bèneache chee' ca',

san guledábage' ca da bsízrene' le',

na' gulape' xel-la' stu' lawe' da belune' da calela.

44 Lácala caní belune', gate gulezré'e lu da stebe,

Dios gunné'e ca da dxelezaque',

ne benne' ca da bululáwizre' Le',

45 na' xeajsá lazre' xel-la' wezría da bénlene' benne' ca',

na' bexíaje lazre' chee xel-la' dxezrá'a chee'

lawe' da nácale'e benne' dxexache lazre'.

46 Cá'aqueze bene' belexache lazre' benne' ca'

benne' ca' guleché'e le' ca benne' zaj nada'u.

47 ¡Bselá netu', Xránantu', nacu' Dios cheentu'!

¡Becá'a netu' ládujla benne' xezr la xu ca',

chee güe lá'anantu' Lau' lá'azxa,

ne chee béle'entu' lu da dxúl-lantu' chiu'!

48 Cháwedau' naca Xránadxu, Bènea' naque' Dios chee

benne' Israel ca' nédxudate, ne chadía chacanna.

Xúguté bèneache dxal-la' xelenné': ¡Ca'an gaca na!

¡Gaca ba lá'azxa Xránadxu Dios!

## 107

1 ¡Le güe lá'ana Xránadxu, Benne' xrlátaje!

¡Chadía chacanna naque' Benne' zri'i lazre'!

2 Da nigá dxal-la' xelenná benne' ca' ba naxá'awe Xránadxu le',

benne' ca' bselé' lu na' benne' guledábage' Le'.

3 Beche'e le' naga gulezrá' benne' xezr la xu zitu' ca',

da zaj zua naga dxalaj gubizra, ne naga dxebía na,

ne naga za' be' zaga, ne naga dxedé gubizra beu' zaga ca'.

4 Bal-la benne' ca' guledé' le'e xixre' naga quebe bi neza zua,

ne quebe belezrelne' xezre naga xelezúe'.

5 Guledune', ne gulebílene',

ne québedxa bi gulebeza lazre'.

6 Nadxa lu da dxelezaque' gulenné' Xránadxu,

na' bselé' benne' ca' lu da dxelezaque'.

- 7 Na' buzre'e le' tu neza li,  
chee chjaque' tu xezre naga xelezúe'.
- 8 Dخال-la' xelúe lá'ane' Xránadxu lawe' da bexache lazre'  
Xránadxu le',  
ne lawe' da bene' chee' da ca' da dxebánedxu.
- 9 Dxuxí'aje' benne' ca' dxelebile lazre',  
ne dxugawe' benne' ca' dxeledún nen da chawe' chee'.
- 10 Bal-la benne' caní gulezúe' lu da chul-la, ne lu da štebe  
chee' xel-la' gute.  
Gulaque' ca benne' zaj xu'e lizre xia,  
ne zaj nadxéaj du xia, ne dxeledé' ba xa',
- 11 lawe' da guledábage' xrtizra' Xránadxu,  
ne buluzúe' chala'ala da bzéajni'i Dios zrente le'.
- 12 Belexedú lazre' lu zrin zí'ite da dxelune'.
- Xeleajcházie' zran xua da zaj nu'e,  
ne quebe nu chilá' gácalene' le'.
- 13 Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.
- 14 Nadxa bebéaje' benne' ca' lu da chul-la  
ne lu da štebe chee' xel-la' gute,  
ne bzúzruje' du xia ca' da zaj nadxéaje'.
- 15 Dخال-la' xelúe lá'ane' Xránadxu lawe' da bexache lazre' le',  
ne lawe' da bene' chee' da ca' da dxebánedxu.
- 16 Bchínnaje' dxa xu'u ca' zaj naca na xia gache,  
ne bzúzruje' xia ca' da zaj naxechaj na benne' ca'.
- 17 Bal-la benne' ca' gulaque' benne' xala,  
ne guledé' xel-la' zi' ne chee' dul-la da zaj nabague',  
ne ne chee' da zrinnaj ca' da belune'.
- 18 Belexegútene' da dxelé'aj dxelawe',  
na' xáteze ca gulátie'.
- 19 Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.
- 20 Gusel-le' dizra' chee' chee' benne' ca',  
na' bexune' le', ne bselé' le' lu xel-la' gute.
- 21 Dخال-la' xelúe lá'ane' Xránadxu lawe' da bexache lazre' le',  
ne lawe' da bene' chee' da ca' da dxebánedxu.
- 22 Dخال-la' xel'é'e Le': Xcalenu'.  
Dخال-la' xelú'e da xulunézruje' Le',  
na' lu xel-la' dxelebé chee' dxal-la' xelúl-le',  
ne xuluzenne' bènneache ca zaj naca da nune'.
- 23 Bal-la benne' ca' guledé' lu nísadau'  
lu da zren ca' da dxedá lawe' nísadau'.  
Belezi'e dumí zren lu zrin dxelune' lu nísadau'.
- 24 Belelé'ene' ca naca da ca' dxun Xránadxu,  
da ca' dxune' lu nísadau' da zaj naca na da dxebánedxu.
- 25 Gunnéze', na' guzú lau dxaca be' bdunu',  
na' gulasa xeajxruza zren lu nísadau'.
- 26 Belegüén da dxedá lawe' nísadau' ca' ca lu xi'a zri'a  
da naca na nísadau',  
na' belexexetaj na lu da situj lawe' nísadau' na'.
- 27 Gulechégüe', ne xeajleté' ni xeajleté' na' ca  
benne' dxelezuzre,  
na' guca dácheze ca da zaj nusédie'.
- 28 Nadxa lu da dxelezaque' gulenné' Xránadxu,  
na' bselé' benne' ca' lu da dxelezaque'.
- 29 Bzua zrie' be' bdunu' na' da dxaca na,  
ne gulezúa zri xeajxruza chee' nísadau' na'.
- 30 Gulebéle'ene' lawe' da zaj zua zri xeajxruza ca',  
na' guché'e Dios le' cháwedau' naga zjaque'.

31 Dخال-la' xelúe lá'ane' Xránadxu lawe' da bexache lazre' le',  
ne lawe' da bene' chee' da ca' da dxebánedxu.

32 Dخال-la' xuluzenne' ca naca xel-la' szren chee' naga  
zaj nazraga bèneache chee',  
ne xelúe lá'ane' Le' naga zaj nazraga benne' gula ca', benne'  
dxelenná be'e.

33 Ben Xránadxu gulebizre xegu nisa ca',  
ne busú'aje' beaj nisa ca'.

34 Xu xa'a bexune' na xu bizre,  
ne chee' da calela da belún benne' ca' zaj zre'e na'.

35 Naga naca xu bizre hexune' na xu nisa,  
na' xu xiaj bexune' na naga dxalaj nisa.

36 Bzre'e ga na' benne' ca' benne' dxeledún,  
na' belune' tu xezre naga xelezúe'.

37 Gulaze' xezr la xu na', na' belexaze' lba uva ca',  
na' belexezi'le'e lina chee' na.

38 Bene' da chawe' chee' benne' ca', na' gulánle'e  
bidu chee' ca',

ne quebe be'e lataj xelexe ca zaj naca be xixre' chee' ca'.

39 Gate buludé benne' dxelenná bea benne' ca' lu xel-la' zi',  
ne bulusaca zi'e le',

ne gulenná bé'edxene' le', ne belune' le' da calela,  
ne buludé' le' lu da ba xa',

40 bca'ana ditaj Dios benne' xíchaje ca',  
ne bene' guledé' le'e xixre' lawe' lataj naga quebe bi neza de.

41 Bselé' benne' xache' ca' lu da zi' da xa' da dxeledé',  
ne bzánle'e zri'ine benne' ca' ca dxelán zrila' ca'.

42 Gate dxelelé'e benne' xrlátaje ca' da caní, na' dxelebé'enge',  
na' benne' ca' dxelune' da calela quebe bi gaca xelenné'.

43 Benne' ca' zaj naque' sina dxal-la' xulaba lazre'  
ca zaj naca da caní,

ne dxal-la' xelexúnbe'e ca naca xel-la' zri'i lazre'  
chee' Xránadxu.

## 108

1 Ba zúatequeze lázrdawa', Dios,  
chee' gúl-laqueza' da güe lá'ana' Lue'.  
Da nigá dxugú'u na neda' lu da ba neza.

2 Bebán lazre', béne'du xu'a, na' le xebán lázrele,  
le'e dxínnele da dxúl-lalēnle, ne da con zriadi'i na du.  
Che zílala cheajsá'queza'.

3 Güe lá'anaqueza' Lue' ládujla bèneache chiu', Xran.

Gúl-laqueza' chiu' lau benne' dutē xezr la xu,

4 lawe' da naca xel-la' dxexache lazre' chiu' zrendxa ca xabáa,  
na' da li chiu' naca na zrendxa ca beuj bza ca'.

5 Xegá'ana szrénquezu' xabáa, Dios.

Xel-la' szren chiu' sua na lawe' dutē xezr la xu.

6 Chee' xelexé' benne' ca' nazrí'iqueznu' Lue',  
bselá le' dutē xel-la' waca chiu', ne bene chia'.

7 Lu lataj lá'azxa chee' gunná Dios: "Wabéqueza' neda'.

Gunná' late weaj chee'le xezr la xu chee' benne' Siquem ca',  
ne gudixra' chee'le xezr la xu de cuite xegu Sucot.

8 Chia' naca xezr la xu Galaad,

ne chia' naca xezr la xu chee' zri'ine zre sua Manasés.

Xezr la xu chee' zri'ine zre sua Efraín naca na ca tu  
da napa chi'i na xíchaja'.

Xezr la xu chee' zri'ine zre sua Judá naca na naga dxenná be'a.

9 Xezr la xu chee' benne' Moab naca na ca tu zriga'  
da xuzru nisa guná'a,

na' lu xęzr la xu cheę benne' Edom chu'una' zrela' gula.  
Si'a ba neza xęzr la xu cheę benne' Filistea."

<sup>10</sup> ıNuzra che' neda' cheę chu'a xęzre da naxechaj ze'e sibe?

ıNuzra che' neda' cheę guzétaja' benne' Edom ca'?

<sup>11</sup> ıQuegá Lue' na' che' u neda', Dios.

Nacu' Bénnea' bzua netu' chalá'ala,

ne quebe guxéajlęnu' benne' cheęntu' ca', benne' dxjaque'  
wedil-la, Dios?

<sup>12</sup> Gúcaleę netu' cheę séquentu' tıl-lalęntu' benne' ca'  
dxeledıl-lalęne' netu',

lawe' da naca dácheze xelácaleę bénneache netu'.

<sup>13</sup> Tu zren nen Dios gundxu tu da zrente,

na' Le' gulague' benne' ca' dxeledil-lalęne' dxi'u.

## 109

<sup>1</sup> ıDios, dxue lá'ana' Lue'!

Quebe xegá'anu' zrize

<sup>2</sup> lawe' da dxelenná benne' ca' dxelunę' da caleła,  
ne benne' wen lazre' ca' chia' neda'.

Dxelenné' chia' da naca da wen lazre'.

<sup>3</sup> Lu xel-la' dxelecuide cheę' zaj naxéchaje' neda',  
ne dxelenné' chia'.

Dxeledıl-lalęne' neda', ne quebe bi nuna' cheę benne' ca'.

<sup>4</sup> Lácala bzri'ida' benne' ca', na'a dxeledábague' neda',

san neda' dxenaba' gaca da chawe' cheę benne' ca'.

<sup>5</sup> Lácala beña' neda' da chawe' cheę benne' ca', dxelunę' chia'  
da caleła,

ne lácala bzri'ida' le', dxelecuídenę' neda'.

<sup>6</sup> Bzua tu benne' wen da zrinnaj cheę guchi'e cheę  
benne' wen da caleła ca',

ne beñ sua tu benne' nnię' cheę benne' ca',

benne' guzúe' ca naca da caleła belún benne' ca'.

<sup>7</sup> Gate na' zri'a cheę', beñ gaca bea na zaj nabague' zria.

Ble'e da xelenabe' lau' ca tu dul-la da dxelunę'.

<sup>8</sup> Bzache zra xelaca ban benne' ca',

ne beñ xelú'u xezica' benne' waláz cheę'.

<sup>9</sup> Bca'ana zrí'ine' ca' bidau' wezębe,

ne xelaca zru'ule' nu'ula tuze ca'.

<sup>10</sup> Beñ xelaca zrí'ine' bi dxeledaze cheę xelenábabe' guna',

ne beñ xelezrébe' xeta xelágube' zitu' naga zaj zua lízrebe'  
da zaj naxinnaj.

<sup>11</sup> Ben xelú'u da ca' zaj nape' lu na' béñne' ca'  
bulusane' le' dumí.

Beñ xelexúa benne' zitu' ca' da ca' zaj nunę'.

<sup>12</sup> Beñ quebe nu zrel-la benne' xexache lazre' le',

ne quebe nu benne' zrel-la xexache lazre' bidau' wezębe  
cheę' ca'.

<sup>13</sup> Beñ xelebía xi' zri'ine zre sua benne' ca',

ne québedxa nu cha' zri'ine zre suę',

si' le' ca zaj nazi'i la benne' ca'.

<sup>14</sup> Bsa lazre' ca da caleła da belún xra xrtawe', Xran,

ne quebe xusulu' dul-la da gulún xrne'e ca'.

<sup>15</sup> Tu chí'izqueze bsa lazre' ca da caleła da zaj nunę'.

Québedxa cheajsá lazru' benne' ca'

<sup>16</sup> lawe' da quebe xeleajsá lazre' xelaxache lazre' le sa' ljwezre' ca',

san bulusaca zi'e benne' baxache' ca', benne' dxelexázzrjene',

ne benne' dxexruij lazre' ca', na' belútie' béñne'du ca'.

<sup>17</sup> Beledánene' da dxugú'u na de', na' da caníze guca na cheę'.

Quebe gulaca lazre' xelenabe' gaca chawe' cheę bénneache,  
na' da chawe' bebíga na naga zaj zuę'.

<sup>18</sup> De' da gulegú'e bénneache guca na ca tu da gulacu cuine',

na' guxú'u na le'e ca nisa gulé'aje',

ne guxú'u na zrita chee' ca da za.

<sup>19</sup> Tu chí'izqueze ben gaca na chee' ca xicha da dxelácu'e',  
ne gaca na ca tu xpádxue' dxuluchela le'e.

<sup>20</sup> Gaca da nigá da quizruj Xránadxu Dios benne' ca'  
dxelenné' calela chia',

ne da quízruje' benne' ca' dxelune' da calela,

ne dxelenné' calela chee' benne'du xu'a.

<sup>21</sup> Xrana' Dios, ben culuén chia' chee' xegá'ana'  
xrlátaje lau'.

Bselá neda' lawe' da dxexache lázrele'u bènneache,

<sup>22</sup> ne lawe' da dxezaca zi'a, ne dxexáxrjeda',  
ne dxeque zi' lázrdawa'.

<sup>23</sup> Dxedé chia' ca dxedé chee' tu zrul-la gate dxebía gubizra.

Dxaca chia' ca dxaca chee' biche xuaj gate dxua be' leba'.

<sup>24</sup> Dxelate zriba' lawe' da dxuna' gubasa,

ne nazritale'a lawe' da quebe bi dxawa'.

<sup>25</sup> Naca' ca tu da dxulucá'ana dítaje'.

Dxelenné'e neda', ne dxelún le' chia', dxulutá xíchaje'.

<sup>26</sup> Gúcale neda', Xrana' Dios.

Bselá neda' lawe' da dxexache lazru' bènneache.

<sup>27</sup> Ben xeque be'ene' Lué'queze dxácalenu' neda'.

Lué'queze, Xrana' Dios, ba nunu' da nigá.

<sup>28</sup> Dxelegu'e neda' de', san ben Lue' gaca chawe' chia'.

Guxasa, ben xelexedu'e benne' ca' dxeledábage' neda',  
san ben beda' neda'.

<sup>29</sup> Ben xelezrá' lu xel-la' stu' benne' ca' dxelenné'  
da calela chia'.

Ben xeque zréajene' tu chí'izqueze.

<sup>30</sup> Du lazra' gúl-laqueza' da güe lá'analé'a Xránadxu Dios.

Ládujla benne' zan ca' güe lá'ana' Le'.

<sup>31</sup> Le' zu'e' cuita xabela chee' benne' xache' ca'

chee' guselé' bènne'du zaj xu'e' lu na' benne' ca'  
dxuluchi'e chee'.

## 110

<sup>1</sup> Xránadxu Dios guzre' Xrana': "Gudxé'e chalá'a xabela chia'  
cadxa zrin zra guna' ga benne' ca' dxeledábage' lue'  
xuluzúa zribe' lau'."

<sup>2</sup> Naga zu' Sión, gun Xránadxu zriluj xel-la' dxenná bea chiu'.

Dxenné': "Gunná be'e benne' ca' dxeledábage' lue'.

<sup>3</sup> Lu zra gate tíl-lalenu' benne' ca' dxeledábage' lue',

du lázrequeze benne' chiu' ca' chjaque' wedil-la.

Ca dxun xrlé'ela chee' bálala, dxacu na xi'a lá'azxa,

caníqueze xelaca benne' cuide' chiu' ca',

xelelé'e naga zu' xelácalene' lue'."

<sup>4</sup> Guchebe lazre' Xránadxu, ne quebe gunítie' xrtizre',

gunné': "Chadía chacanna nacu' bxruze ca guca bxruze  
Melquisedec."

<sup>5</sup> Zua Xránadxu chalá'a xabela chiu'.

Gate zre'e, na' guzría xi'e benne' wenna' bea ca'.

<sup>6</sup> Guchi'e chee' benne' duté xezr la xu, na' gutie' zánete  
benne' xezr la xu ca'.

Guzría xi'e benne' dxelenná be'e duté xezr la xu.

<sup>7</sup> Xi'aj benne' wenna' bea nigá nisa xégudu zua na dxu'a neza,  
na' xexape' xel-la' wal-la chee'.

## 111

<sup>1</sup> Duté lázrdawa' güe lá'ana' Xránadxu Dios tu zren nen  
benne' xrlátaje ca', benne' zaj nazrague' lau Le'.

<sup>2</sup> Da zrenté zaj naca da ca' nun Xránadxu Dios,

na' xúgute benne' ca' dxelezaca ba lázreleṅe' da nune',  
ne dxelaca lazre' xeelé'ene' na.

<sup>3</sup> Da xabáa, ne da xrtante zaj naca da dxune' Le',  
ne tu chí'izqueze zua da xrlátaje chee'.

<sup>4</sup> Dxune' dxeajsá lázredxu ca naca xel-la' waca zrente  
da dxune'.

Xránadxu Dios naque' zren lazre', ne dxexache lazre'  
bénneache.

<sup>5</sup> Dxugawe' benne' ca' dxelezrebe' Le'.

Tu chí'izqueze dxeajsá lazre' xel-la' wezría da nune'.

<sup>6</sup> Blé'ene' bénneache chee' ca' ca naca xel-la' waca chee  
da ca' bene'.

Dxunézruje' benne' chee' ca' da zaj napa benne' xezica  
xezr la xu ca'.

<sup>7</sup> Li lazre', ne xrlátaje zaj naca da ca' dxune'.

Li lazre' zaj naca xúgute da bdxixruj be'e.

<sup>8</sup> Tu chí'izqueze, ne chadía chacanna zaj zua da ca' bdxíxruje'.

Lu da li, ne lu da li lazre' nune' ca zaj naca na.

<sup>9</sup> Gusel-le' tu benne' weselá chee guselé' bénneache chee'.

Tu chí'izqueze nadxixruj be'e xel-la' wezría chee'.

Lá'azxa, ne tu da zrédexu naca La Le'.

<sup>10</sup> Chee su laudxu gácadxu sina, dxun na ba xen zrédexu  
Xránadxu Dios.

Dxeléajni'i xanne' xúgute benne' ca' dxelune' ca zaj naca  
da nadxíxruje'.

Tu chí'izqueze dxal-la' güe lá'anadxu Le'.

## 112

<sup>1</sup> Ba neza zrente naca na chee bénnea' dxezrebe'

Xránadxu Dios,

ne ca zaj naca da bdxixruj be'e dxezaca ba lázrele'ene'.

<sup>2</sup> Zri'ine zre sua bénnea' xelape' xel-la' dxenná bea  
lu xezr la xu,

na' gaca chawe' chee benne' xrlátaje ca'.

<sup>3</sup> Da zan da de, ne xel-la' gunní'a zaj zra na xu'u lizre',

ne tu chí'izqueze zua da xrlátaje da dxun bénnea'.

<sup>4</sup> Dxusani' tu xi' lu da chul-la naga zaj zra' benne' li lazre' ca',

benne' ca' zaj naque' zren lazre', ne xrlátaje,

ne dxelexache lazre' bénneache.

<sup>5</sup> Tu benne' xrlátaje dxexache lazre' bénneache,

ne dxusané' le' dumí.

Lu da xrlátaje dxenná bé'ene' da zaj xu'u lu ne'e.

<sup>6</sup> Chee le' na' quebe bi gutá na le' lu lataj naga zue',

na' tu chí'izqueze xeajlesá lazre' bénneache ca'.

<sup>7</sup> Quebe zrebe' gate xenne' dxaca da caléla chee

da xu'u lu ne'e.

Ze chacha lázrdawe' lawe' da dxuxrén lazre' Xránadxu Dios.

<sup>8</sup> Zua chawe' lázrdawe', ne quebe bi dxezrebe',

ca zrindxa zra lé'ene' gaca chee benne' ca' guledábage' le'

ca da dxezá lazre'.

<sup>9</sup> Dxisié' da de chee', ne dxunézruje' da gácale

benne' xache' ca',

ne tu chí'izqueze zua da xrlátaje da dxune'.

Lu da xabáa xegá'ana szren xel-la' dxenná bea chee'.

<sup>10</sup> Walé'e benne' wen da caléla da nigá, na' gueque zréajene'.

Gágu xa'ate lazre', ne cue'e gunne xue.

Xelenite da ca' dxelezá lazre' benne' ca' dxelune' da caléla.

## 113

<sup>1</sup> ¡Le'e, wen zrin chee Xránadxu Dios, le güe lá'ana Le'!

¡Le güe lá'ana La Xránadxu Dios!

<sup>2</sup> ¡Gaca ba lá'azxa La Xránadxu Dios,



na'a zra, ne chadía chacanna!

<sup>3</sup> ¡Naga dxalaj gubizra ca zrinte naga dxebía na gaca ba lá'azxa La Xránadxu Díos!

<sup>4</sup> ¡Szrente nagá'ana Xránadxu Díos lawe' dutę xęzr la xu, na' lówela xabáa dxe' da xabáa cheę'!

<sup>5</sup> ¿Núzraqueze naca ca naca Xránadxu Díos, Bėnnea' dxe'e xabáa na'la?

<sup>6</sup> Díos dxun cuine' dxexruj lazre' cheę lé'eng' da de zran xabáa, ne lu xęzr la xu.

<sup>7</sup> Díos dxechise' benne' xache' lu xu xrte, ne dxebéaje' benne' baxache' lu da dxezaca zi'e,

<sup>8</sup> na' dxune' dxelebé' benne' caní ládujla benne' dxelenná be'e,

ládujla benne' ca' dxelenná bé'eng' bėnneache cheę'.

<sup>9</sup> Dxune' zua nu'ula zue' tuze ládujla zri'inequeze' ca', na' dxebé nu'ula nigá lawe' da naque' xrna bi cheęqueze'.

¡Gaca ba lá'azxa Xránadxu Díos!

## 114

<sup>1</sup> Gate beledxúaj benne' Israel ca' lu xęzr la xu Egipto, beledxúaj zri'ine zre sua Jacob lu xęzr la xu cheę benne' zitu' ca',

<sup>2</sup> na' gulaca zri'ine zre sua Judá ca tu xu'u lizre Díos, gulaca benne' Israel ca' naga dxenná be'e.

<sup>3</sup> Ble'e Nísadau' Xrna da nigá, na' bzrunnuj na, na' gugá xęgu Jordán.

<sup>4</sup> Gulexrite xi'a zri'a ca' ca dxelexrite chivo ca', na' gulexrite xi'adu ca' ca dxelexrite chibudu ca'.

<sup>5</sup> ¿Bizra guca chiu', nísadau', lawe' da ben na bZRúnnuju'? ¿Bizra guca chiu', xęgu Jordán, lawe' da ben na gugú'?

<sup>6</sup> Le'e, xi'a zri'a ca', ¿Bizr cheę na' guxrítele ca dxelexrite chivo ca'?

Le'e, xi'adu ca', ¿Bizr cheę na' guxrítele ca dxelexrite chibudu ca'?

<sup>7</sup> Dxezrize xęzr la xu lau Xránadxu Díos, lau Díos cheę Jacob.

<sup>8</sup> Díos nigá bęne' bexaca xiaj xre' tu beaj nisa, na' bexaca xiaj tu ga dxalaj nisa.

## 115

<sup>1</sup> Quegá netu', Xran.

Quegá cuintu', san Lué'queze dxal-la' xucá'ana szrentu' ne cheę xel-la' zri'i lazre' chiu', ne xel-la' li lazre' chiu'.

<sup>2</sup> ¿Bizr cheę na' dxun na ba xen xuluchębe bėnneache netu': "Gazra zua Díos cheęle?"

<sup>3</sup> Díos cheędxu zue' xabáa.

Dxune' ca da dxaca lázrequeze'.

<sup>4</sup> Díos ca' cheę benne' ca' zaj naca na bedáu' plata, ne bedáu' oro, da nun ní'a na' bėnneache.

<sup>5</sup> Zaj zua dxu'a na, san quebe dxelenné na.

Zaj zua xiaj lau na, san quebe dxelélé'e na.

<sup>6</sup> Zaj zua naga na, san quebe dxelén na.

Zaj zua zrina na, san quebe dxelélé'e na.

<sup>7</sup> Zaj zua na' na, san quebe bi dxelecá'a na.

Zaj zua ní'a na, san quebe dxeledá na.

Quebe dxedxuaj chi'i na lba na.

<sup>8</sup> Ca zaj naca na, zaj naca benne' ca' zaj nune' na, ne benne' ca' dxuluxrén lazre' na.

<sup>9</sup> Le' guxrén lazre' Xránadxu, le'e, benne' Israel ca'. Le' dxácalęne' le'e, ne dxuxúe' le'e.

<sup>10</sup> Le' guxrén lazre' Xránadxu, le'e, bxruze cheę Díos,

nácale zri'ine zre sua Aarón.  
 Le' dxácaleḡe' le'e, ne dxuxúe' le'e.  
 11 Le guxrén lazre' Xránadxu, le'e dxucá'ana szrenle Le'.  
 Le' dxácaleḡe' le'e, ne dxuxúe' le'e.  
 12 Xránadxu dxajsá lazre' dxi'u, na' gunę' dxi'u da chawe'.  
 Gunę' da chawe' cheę benne' Israel ca'.  
 Gunę' da chawe' cheę bxruze cheę', zri'ine zre sua Aarón.  
 13 Gunę' da chawe' cheę xúgute benne' dxelape' Le' ba lá'ana,  
 benne' blau ca', ne benne' quebe zaj naque' blau.  
 14 Gun Xránadxu chan zri'inu' ca',  
 ne chan zri'ine bi biu chiu' ca'.  
 15 Gun Xránadxu da chawe' chiu'.  
 Naque' Bénnea' ben xabáa, ne xęzr la xu.  
 16 Cheę tuze Xránadxu naca xabáa,  
 san bnézruje' bėnneache xęzr la xu.  
 17 Benne' zaj nate quebe gaca xelúe lá'ane' Xránadxu,  
 ne quebe gaca benne' ca' zaj zuę' lu xędxu ba.  
 18 Dxi'u, benne' ban, güe lá'anadxu Xránadxu,  
 na'a zra, ne chadía chacanna.

¡Le güe lá'ana Xránadxu!

## 116

1 ¡Nazrí'ida' Xránadxu Dios  
 lawe' da benne' chí'a, ne da gunaba' lawe',  
 2 ne lawe' da bze nague' chia!  
 Cheę le na' guláwizra' Le' dxácatę naca bana'.  
 3 Guzúa' lu da stębe cheę xel-la' gute,  
 ne bzreba' ba zua' chu'a lataj ba xa'.  
 Guzúa' lu da stębe, ne guzaca zi'a.  
 4 Nadxa bláwizra' Xránadxu Dios, gunnía':  
 Xrana' Dios, bselá bėnne'du xu'a.  
 5 Cháwe'le'e naca Xránadxu Dios, ne xrlátaje naque'.  
 Awe', dxexache lazre' Dios cheędxu dxi'u.  
 6 Dxuxúe Xránadxu benne' dxexruij lazre' ca'.  
 Gate na' guzúa' lu da stębe bselé' neda'.  
 7 Ben dipa lazre', bėnne'du xu'a,  
 lawe' da nun Xránadxu da chawe' chiu'.  
 8 Lue', Xran, bseláu' bėnne'du xu'a lu na' xel-la' gute,  
 cheę québedxa cuezre we'a, ne cheę quebe cheajcházia'.  
 9 Ta' lau Xránadxu Dios  
 naga zaj zra' benne' ca' zaj naca banę'.  
 10 Guxéajle'a cheę', na' cheę le na' bchálaja', lácala guzaca zí'le'a.  
 11 Lu xel-la' dxezrebe chia', gunnía':  
 Zaj naca xúgute bėnneache benne' wen lazre' ca'.  
 12 ¿Bizra quízrujqueza' Xránadxu Dios  
 cheę xúgute da chawe' da bęne' chia'?  
 13 Si'a lu ne'e xel-la' weselá,  
 ne guláwizra' Xránadxu Dios.  
 14 Na'a guna' da ca' guchebe lazra' lau Xránadxu.  
 Guna' na lau xúgute bėnneache cheę'.  
 15 Xránadxu Dios dxe'e gunne xue  
 cheę bėnneache cheę' gate dxelátie'.  
 16 Xrana' Dios, da li naca' wen zrin chiu'.  
 Naca' wen zrin chiu', ne zri'ine nu'ula wen zrin chiu'.  
 Lue' bzúzruju' da zaj nadxéaj na neda'.  
 17 Da güe lá'ana' Lue' gaca na ca tu béadau' gutia' lau',  
 ne gucá'ana szrena' Lau', Xrana' Dios.  
 18 Lau Xránadxu Dios guna' da ca' guchebe lazra' cheę',

da guna' lau xúgutę bénneache chee'.

<sup>19</sup> Guna' na chale'aj xu'u lizre Xránadxu Dios,  
da dxe' na lu'ule xęzre Jerusalén.

¡Gaca ba lá'azxa Xránadxu Dios!

## 117

<sup>1</sup> ¡Le güe lá'ana Xránadxu Dios, le'e, benne' dutę xęzr la xu!

¡Le güe lá'ana Le', le'e, xúgutę bénneache,

<sup>2</sup> lawe' da zrentę naca xel-la' zri'i lazre' chee' ca nazrí'ine' dxi'u,  
ne chadía chacanna naca xel-la' li lazre' chee'!

¡Le güe lá'ana Xránadxu!

## 118

<sup>1</sup> ¡Le güe lá'ana Xránadxu Dios lawe' da naque' xrlátaje,  
ne lawe' da chadía chacanna dxexache lazre' dxi'u!

<sup>2</sup> Dخال-la' xelenná benne' Israel ca':

¡Chadía chacanna dxexache lazre' dxi'u!

<sup>3</sup> Dخال-la' xelenná zri'ine zre sua Aarón:

¡Chadía chacanna dxexache lazre' dxi'u!

<sup>4</sup> Dخال-la' xelenná benne' ca' dxelezrebe' Xránadxu Dios:

¡Chadía chacanna dxexache lazre' dxi'u!

<sup>5</sup> Gate na' guzúa' lu da stebe bláwizra' Xránadxu Dios,  
na' bechebe Xránadxu, ne bselé' neda' lu da na'

bexru na neda'.

<sup>6</sup> Zualę Xránadxu neda', na' québequeze zreba'  
bi xelún bénneache chia' neda'.

<sup>7</sup> Zúale Xránadxu neda' ládujla benne' ca' dxelácalę' neda'.  
Cheę le na' le'eda' cheajlechaze benne' ca' dxelecuídenę' neda'.

<sup>8</sup> Cháwe'dxa naca guxrén lázredxu Xránadxu Dios  
quézcala guxrén lázredxu bénneache.

<sup>9</sup> Cháwe'dxa naca guxrén lázredxu Xránadxu Dios  
quézcala guxrén lázredxu benne' dxelenná be'e.

<sup>10</sup> Gulechaj benne' xúgutę cue' xęzr la xu neda',  
na' lu La Xránadxu Dios guzría xi'a benne' ca'.

<sup>11</sup> Guléchaję' neda', ne buluchidię' neda',

na' lu La Xránadxu Dios guzría xi'a benne' ca'.

<sup>12</sup> Guléchaję' neda' ca dxelún beşcutuche',  
na' guca xel-la' dxelezrá'a chee' ca tu xi' da dxuzezxe na  
xixre' xeche' bizre,

na' lu La Xránadxu Dios guzría xi'a benne' ca'.

<sup>13</sup> Buluzriguę' neda' cheę cheajcházia'

na' gúcale Xránadxu Dios neda'.

<sup>14</sup> Naca Xránadxu Dios ca tu xu'u naga zua chawa',  
na' tu gúl-lazqueza' chee' lawe' da Léqueze' dxuselé' neda'.

<sup>15</sup> Xel-la' dxelebé dxelul-la benne' xrlátaje ca'  
lawe' da dxuselá Xránadxu le'.

Dutę xel-la' waca chee' dxun Xránadxu Dios da zrentę ca'.

<sup>16</sup> Szrentę nagá'ana xel-la' waca zren cheę Xránadxu Dios.

Da zrentę ca' dxun xel-la' waca zren cheę Xránadxu.

<sup>17</sup> Québequeze gatia', san gaca bana',

na' guzenda' bénneache ca zaj naca da nun Xránadxu.

<sup>18</sup> Bde Xránadxu neda' lu da ba xa',

san quebe bdeę' neda' lu na' xel-la' gute.

<sup>19</sup> Gusalaj dxa xu'u cheę chu'a naga guchi'u chia', Xran,  
na' chu'a na', ne güe lá'ana' Lue', Xrana' Dios.

<sup>20</sup> Dxa xu'u nigá naca na cheę Xránadxu Dios.

Dxa xu'u nigá dxelú'u benne' xrlátaje ca'.

<sup>21</sup> Güe lá'ana' Lue', Xran, lawe' da bennu' chia',

ne bseláu' neda' lu da guca chia'.

<sup>22</sup> Xiaj na' da buluzúa benne' wən xu'u ca' chalá'ala,  
le na' naca na xiaj blau.

<sup>23</sup> Da nigá ben Xránadxu,  
na' naca na tu da dxexebánedxu.

<sup>24</sup> Zra nigá naca na zra da ben Xránadxu.  
Béle'edxu, ne súadxu lu da ba neza lu zra nigá.

<sup>25</sup> Xrana' Dios, dxata' xueda' Lue' guseláu' netu' na'a.  
Dxata' xueda' Lue', Xrana', gunu' chepe ban na'a da dxuntu'.

<sup>26</sup> Ba neza zrentę naca na cheę bénnea' ze'e waláz cheę  
Xránadxu Dios.

Lu xu'u lizre Xránadxu Dios nigá dxenábantu'  
gaca chawe' chiú'.

<sup>27</sup> Xránadxu naque' Dios, ne ba benne' dxi'u tu da dxusaní na.  
Le guchéaj béadu ca' gútele lawe' lu luzu cugu cheę'.

<sup>28</sup> Nacu' Lue' Dios chia', na' güe lá'ana' Lue'.  
Dios chia', gucá'ana szrena' Lue'.

<sup>29</sup> Je güe lá'ana Xránadxu Dios lawe' da naque' xrlátaje,  
ne lawe' da chadía chacanna dxexache lazre' dxi'u!

## 119

### *Da dxun da bdxixruj be'e Dios dxi'u*

<sup>1</sup> Ba neza zrentę naca na cheę benne' ca' tu dxelúnzqueze'  
da naca du lazre',

benne' ca' tu dxelúnzqueze' ca dxenná da bdxixruj bea  
Xránadxu Dios.

<sup>2</sup> Ba neza zrentę naca na cheę benne' ca' tu dxelúnzqueze'  
ca dxusęde dizra' cheę' dxi'u,

na' dutę xichaj lázrdawe' dxuluzię' dizra' cheę'.

<sup>3</sup> Benne' caní québequeze dxelunę' da zrinnaj,  
benne' ca' tu dxelúnzqueze' ca dxenná Dios dxal-la' xelunę'.

<sup>4</sup> Lue', Xran, bsízrenu' netu' cheę gun xánnetu'  
ca zaj naca da bdxixruj be'u Lue'.

<sup>5</sup> Dxaca lázrele'a tu gúnzqueza'  
ca zaj naca xrba chiú'.

<sup>6</sup> Nadxa québequeze xedué'eda',  
na' cue'a gunne xue guna' xügute da bdxixruj be'u.

<sup>7</sup> Dutę xel-la' li lazre' chia' güe lá'ana' Lue' gate ba nusédia'  
da ca' nuchi'u cheęntu', da zaj naca na xrlátaje.

<sup>8</sup> Tu gúnzqueza' ca da dxenná be'u.  
Québequeze cueaj xichaju' neda'.

### *Dxal-la' gundxu da gunnáqueze Dios*

<sup>9</sup> ¿Ájala gun benne' cuide' gunbe' da naca na xrlátaje?  
Dxal-la' tu gúnzquezebe' ca dxenná xrtizru'.

<sup>10</sup> Dutę xichaj lázrdawa' dxuna' ba xuzre guna'  
da dxennáu' Lue'.

Quebe gu'u lataj guzúa' chalá'ala ca da bdxixruj be'u.

<sup>11</sup> Lu xichaj lázrdawa' tu dxúnzqueza' ca da dxennáu' Lue'  
cheę quebe guna' dul-la tábaga' Lue'.

<sup>12</sup> Ba lá'azxa nacu' Lue', Xrana' Dios.  
Bsęde neda' da ca' dxenná be'u.

<sup>13</sup> Nen dxú'aqueza' ba bzenda' bénneache  
ca zaj naca da ca' nuchi'u cheęntu'.

<sup>14</sup> Dxebele'edxeda' tu dxúnzqueza' ca dxusęde dizra' chiú' netu',  
quez ca dxelebé benne' ca' déle'e xel-la' gunní'a cheę'.

<sup>15</sup> Gulaba lazra' ca zaj naca da bdxixruj be'u Lue',  
ne nna' xánnia' ca dxennáu' dxal-la' guntu'.

16 Béle'eda' guna' ca da dxenná be'u,  
ne quebe gal-la lazra' ca zaj naca xrtizru'.

*Dxebéle'edxu dxundxu da dxennáqueze Dios*

17 Bën gaca chawe' chia' neda', wën zrin chiu',  
na' gaca bana', ne tu gúnzqueza' ca naca xrtizru'.

18 Gusalaj xiaj lawa' chee' nna'a  
da zrente' ca' da zaj zua na lu da bdxixruj be'u.

19 Naca' ca tu benne' dxedaze' lu xezr la xu nigá.  
Bën chéajni'ida' da dxenná da bdxixruj be'u.

20 Dxedú lazra' lawe' da tu chí'izqueze  
dxezá lazra' guna' da ca' nuchi'u cheentu'.

21 Gudil-lu' benne' ca' dxulucá'ana szren cuine',  
benne' wën da calela ca',

benne' ca' dxuluzúe' chalá'ala da bdxixruj be'u.

22 Quebe gu'u lataj nu benne' nne' schanni' chia',  
na' quegá gucá'ana dítajé' neda'

lawe' da tu dxúnzqueza' ca dxusédenu' netu'.

23 Cá'anqueze benne' dxelenná bea ca' gulenné' chia'.

Neda', wën zrin chiu', blaba lazra' ca zaj naca xrba chiu'.

24 Dxezaca ba lázreleña' da dxusede dizra' chiu' netu'.  
Dxuluzéajni'i na neda'.

*Dute lázrdaudxu gundxu da dxennáqueze Dios*

25 Zua bënne' du xu'a lu da stebe chee' xel-la' gute.

Bën dipa xichaj lázrdawa' nen xrtizru'.

26 Ble'eda' Lue' ca zaj naca da dxuna', na' bezi'u neda'.

Bsède neda' ca zaj naca xrba chiu'.

27 Bën chéajni'ida' ca gaca guna' ca bdxixruj be'u  
chee' gulaba lazra' ca zaj naca da zrente' ca' da benu'.

28 Dxedú lazra' lawe' da dxewí'ine lázrele'a.

Bexru chacha neda' ne' chee' xrtizru'.

29 Quebe gu'u lataj guna' da naca na wën lazre'.

Lu xel-la' dxexache lazre' chiu' bsède neda' da bdxixruj be'u.

30 Bechugu lazra' guna' da naca li lazre',

na' dxe'a gunne xue guna' da ca' nuchi'u cheentu'.

31 Tu dxúnzqueza' ca dxusede dizra' chiu' netu'.

Xran, quebe guzú' neda' lu xel-la' stu'.

32 Tu gúnzqueza' ca bdxixruj be'u,

gate guzéajni'idxenu' neda'.

*Dxaca lázredxu chéajni'idxu xrtizra' Dios*

33 Xran, bsède neda' chee' guna' ca naca xrba chiu',

na' tu gúnzqueza' ca naca na ca zrindxa zra cheajsé' chia'.

34 Bzéajni'i neda', na' tu gúnzqueza' da bdxixruj be'u,

na' dute lázrdawa' guna' ca naca na.

35 Ble'e neda' chee' guna' da bdxixruj be'u,

lawe' da dxaca lázrequeza' guna' ca dxenná na.

36 Bën sa lazra' guna' ca dxusede dizra' chiu' netu',

chee' quebe gaca' benne' wecude.

37 Quebe gu'u lataj gucá'ana szrena' bedáu' xia xaga ca'.

Bën dipa xichaj lázrdawa' chee' guna' ca dxenná xrtizru'.

38 Bën ca dxenná xrtizru' da guchebe lazru' chia' neda',

wën zrin chiu', chee' zreba' Lue'.

39 Bde chalá'ala dizra' schanni' da dxelenné' chia',

da na' dxezreba', lawe' da xrlátaje zaj naca xrba chiu'.

40 Dxezá lazra' guna' da bdxixruj be'u.

Bën dipa xichaj lázrdawa' nen da xrlátaje chiu'.

*Dxuxrén lázredxu xrtizra' Dios*

41 Gudá xexache lazru' neda', Xrana' Dios.

Gudá guseláu' neda', ca ba guchebe lazru' gunu'.

42 Becheba' lau bënnea' dxusi'e neda' xel-la' stu', gunniá':

Dxuxrén lazra' xrtizra' Xrana' Dios.

43 Bēn tu séquezda' guchálaja' dizra' li lazre' chiu',  
lawe' da dxebeza lazra' da ca' dxuchi'u cheentu'.

44 Tu gúnzqueza' ca dxenná da bdxixruj be'u.  
Guna' na tu chí'izqueze, ne chadía chacanna.

45 Láqueza' neda'

lawe' da dxe'a gunne xue guna' ca bdxixruj be'u.

46 Guchálajqueza' ca dxusede dizra' chiu' netu'  
lau benne' wenná bea ca', na' québequeze xedué'eda'.

47 Wabéle'equezda' guna' ca bdxixruj be'u,  
da ca' nazrí'ile'eda'.

48 Dxechebe lazra' guna' ca bdxixruj be'u,  
da nazrí'ida', na' gulaba lazra' ca naca xrba chiu'.

*Tu zúazqueze xrtizra' Dios*

49 Bsa lazre' da guchebe lazru' chia' neda',  
wēn zrin chiu', da na' bēnu' dxebeza lazra'.

50 Gate na' guzaca zí'a, guzúa tu da bexúe zren na neda'  
lawe' da bēn dipa xrtizru' xichaj lárzdawa'.

51 Benne' dxulucá'ana szren cuine' belún lale' chia' neda',  
san québequeze gusana' da dxenná da bdxixruj be'u.

52 Xeajsá lazra' da bchi'u cheentu' nédxudaute, Xran,  
na' bexaca zrena'.

53 Nen dutē xel-la' dxezrá'a guzúa' lu da stebe  
ne cheē benne' ca' dxelune' da zrinnaj,

benne' ca' dxuluzúe' chalá'ala da bdxixruj be'u.

54 Xrba chiu' ca' gulaca na chia' ca tu da dxul-la'  
gate na' zua' tu xēzr la xu zitu'.

55 Chizrela xeajsá lazra' lau' Lue', Xrana' Dios,  
na' tu bēnzqueza' ca dxenná da bdxixruj be'u.

56 Lu da ba neza caní guzúa'  
lawe' da tu bēnzqueza' ca zaj naca da bdxixruj be'u.

*Dxebedxu dxulábadxu xrtizra' Dios*

57 Da dxezá lazra' nácaquezu' Lue', Xrana' Dios.

Ba gunnía' tu gúnzqueza' ca naca xrtizru'.

58 Dutē lárzdawa' dxenaba' Lue' xidu' gácalēnu' neda'.  
Bexache lazre' neda' ca ba gunnáu' gunu'.

59 Gunná' xannia' ca zaj naca da dxuna',  
na' xecha lasa dxuna' ca dxusede dizra' chiu' netu'.

60 Bēna' ba xuzre, ne quebe guzreda'  
cheē tu gúnzqueza' ca bdxixruj be'u.

61 Xralaj cheē benne' ca' dxelune' da calēla zaj nuchelē na  
neda',

san quebe ne gal-la lazra' ca dxenná da bdxixruj be'u.

62 Dxēla dxasa' cheē güe lá'ana' Lue'

lawe' da xrlátaje zaj naca da ca' dxuchi'u cheentu'.

63 Naca' tuze nen xúgutē benne' ca' dxelezrebe' Lue',  
benne' ca' tu dxelúnzqueze' da bdxixruj be'u.

64 Xrana' Dios, dxezrin dutē xēzr la xu  
xel-la' dxexache lazre' chiu'.

Bsēde neda' cheē guna' ca dxenná xrba chiu'.

*Zácalē'ē da wnnáqueze Dios*

65 Ba bēnu' guca chawe' chia' neda', wēn zrin chiu'.

Xran, bēnu' na cáteze dxenná xrtizru'.

66 Bsēde neda' cheē gueque be'eda' da naca xrlátaje,  
ne cheē chéajni'ida' lawe' da dxéajlē'a da bdxixruj be'u.

67 Nédxula ca bzéxruju' neda' gudéa' chalá'ala,  
na' na'a tu dxúnzqueza' ca dxenná xrtizru'.

68 Nacu' xrlátaje, ne dxunu' gaca chawe' cheentu'.  
Bsēde neda' guna' ca naca xrba chiu'.

69 Benne' dxulucá'ana szren cuine' gulenné' chia'  
da wēn lazre'

san dutę lázrdawa' tu gúnzqueza' ca bdxixruj be'u.

<sup>70</sup> Quebe xu'u xel-la' dxėjani'i lázrdau benne' ca'.  
Neda' dxezaca ba lázreļna' da dxenná da bdxixruj be'u.

<sup>71</sup> Chawe' naca bzéxruju' neda'  
cheę gusédia' guna' ca naca xrba chiu'.

<sup>72</sup> Cháwedxa naca da bdxixruj be'u chia' neda'  
quez ca gaxúa gaxúane dumí oro, ne plata.

*Cháweļę naca da wnnáqueze Dios*

<sup>73</sup> Nen ná'quezu' beņu' neda' cáteze naca'.  
Bzėjani'i neda' cheę gusédia' guna' ca bdxixruj be'u.

<sup>74</sup> Benne' dxelezrebe' Lue' xelexé'ene' neda'.  
Xelebenę' lawe' da dxebeza lazra' gaca ca dxenná xrtizru'.

<sup>75</sup> Xran, ba nézquezda' xrlátaje naca da dxuchi'u cheętu',  
na' lu dutę xel-la' li lazre' chiu' bsaca zi'u neda'.

<sup>76</sup> Lu dutę xel-la' dxexache lazre' chiu' bexúe zren neda'  
cáteze dxenná da guchebe lazru' chia' neda', węn zrin chiu'.

<sup>77</sup> Bexache lazre' neda' cheę gaca bana'  
lawe' da dxezaca ba lázreļna' da bdxixruj be'u.

<sup>78</sup> Bęn xelexedué'e benne' ca' dxulucá'ana szren cuina  
lawe' da gulenné' schanni' chia', ne quebe bi bena' cheę'.  
Neda' gulaba lazra' ca da bdxixruj be'u.

<sup>79</sup> Bęn xelexelá' benne' ca' dxelezrebe' Lue',  
cheę xelenņę' chia',

na' xulusédie' da dxusede dizra' chiu' netu'.

<sup>80</sup> Bęn gaca' du lazre' ca naca xrba chiu'  
cheę québequeze xedué'eda'.

*Gun Dios ca dxenná xrtizre'*

<sup>81</sup> Zua bęnne' du xu'a lu da stebe  
lawe' da dxebeza' xidu' guseláu' neda',  
na' dxebeza lazra' gaca ca dxenná xrtizru'.

<sup>82</sup> Dxezé bxrinne xiaj lawa' lawe' da dxezá lazra' xrtizru',  
dxennia': ¿Bátaqueze xexúe zrenu' neda'?

<sup>83</sup> Dxebizra' ca tu buzude xide zę na lu zren,  
san quebe dxal-la lazra' guna' ca dxenná xrba chiu'.

<sup>84</sup> ¿Bal-la zra gaca bana' neda', węn zrin chiu'?

¿Bátaqueze gudéu' lu da ba xa' benne' ca'  
dxeláu zi' xuzre' neda'?

<sup>85</sup> Benne' dxulucá'ana szren cuine' gulęne' tu xędxu  
naga cheajcházia'.

Québequeze dxelunę' ca dxenná da bdxixruj be'u.

<sup>86</sup> Da líqueze zaj naca xúgutę da bdxixruj be'u.

Gúcalę neda' lawe' da dxeláu zi' xuzre' neda',  
ne quebe bi nuna' cheę'.

<sup>87</sup> Xeláteze la belutię' neda',

san quebe ne gusana' guna' ca bdxixruj be'u.

<sup>88</sup> Lu xel-la' dxexache lazre' chiu' bęn dipa xichaj lázrdawa',  
cheę tu gúnzqueza' ca dxusede dizra' chiu' netu'.

*Dxęajle' dxu xrtizra' Dios*

<sup>89</sup> Xrana' Dios, tu chí'izqueze  
zua xrtizru' xabáa na'la.

<sup>90</sup> Xel-la' li lazre' chiu' sua na cheę xúgutę bęnneache.  
Lue' bzua chúchuquezu' xęzr la xu, na' zúaqueze na.

<sup>91</sup> Ne cheę da gunnáquezu' zaj nnita xúgutę da de,  
na' xúgutę da ca' dxelún na zrin chiu'.

<sup>92</sup> La quebe bezaca ba lázreļna' da bdxixruj be'u  
bache benítia' lu da guzaca zi'a.

<sup>93</sup> Cabátaqueze gal-la lazra' da bdxixruj be'u  
lawe' da ne cheę da ca' ba btipu' lazra'.

<sup>94</sup> Chiu' Lue' naca' neda'.

Belá neda', lawe' da dxuna' ba xuzre guna' ca bdxixruj be'u.

95 Benne' dxelebéaj xichaj Dios gulenné'ē neda' chee  
xuluzría xi'ē neda',  
san neda' dxulaba lazra' ca dxusede dizra' chiu'.  
96 Dxelé'equezda' dxeajsé chee xúgute da de lu xęzr la xu,  
san da bdxixruj be'u Lue' québequeze cheajsé chee na.

*Dxaca lázredxu gúnbeadxu xrtizra' Dios*

97 Dios, nazrí'ilé'ēda' da bdxixruj be'u.  
Du zra dxulaba lazra' ca naca na.  
98 Ne chee da bdxixruj be'u nunu' nácadxa' sina ca benne' ca'  
dxeledábaguē' neda'  
lawe' da tu zúalezqueze da bdxixruj be'u neda'.  
99 Dxéajni'idxeda' ca benne' ca' dxulusédene' neda'  
lawe' da dxulaba lazra' ca dxusede dizra' chiu' neda'.  
100 Ba guxéajni'idxeda' ca benne' gula ca'  
lawe' da tu dxúnzqueza' ca dxenná da bdxixruj be'u.  
101 Bena' ba xuzre quebe bi da calela guna'  
chee tu gúnzqueza' ca dxenná xrtizru'.  
102 Quebe bsana' dxuna' da ca' nuchi'u cheentu'  
lawe' da Lué'queze bsédenu' neda'.  
103 Xrtizru' naca na ca tu da zízrele'ē lu dxu'a.  
Nácadxa na zixre ca bzrina'dau' lu dxu'a.  
104 Ne chee da bdxixruj be'u naca' benne' sina.  
Chee le na' dxecuídeda' xúgute da węn lazre'.

*Xrtizra' Dios dxuzéajni'i na dxi'u*

105 Ca tu xi' naca xrtizru' naga dxedá',  
da dxusení na neza xu'a.  
106 Bzétaja' Dios, ne guchebe lazra'  
tu gúnzqueza' ca nuchi'u cheentu' da naca na xrlátaje.  
107 Dxezaca zí'le'a.  
Xrana' Dios, btípa lazra' cáteze guchebe lazru' gunu'.  
108 Xrana' Dios, dxata' xueda' Lue' si'u da dxue lá'ana' Lue',  
ne gusédenu' neda' guna' ca nuchi'u cheentu'.  
109 Tu zúazqueza' lu da stebe chee xel-la' gute,  
san québequeze ne gal-la lazra' guna' ca bdxixruj be'u.  
110 Benne' dxelebéaj xichaj Dios buluzale' xralaj  
da queła na neda'  
san neda' quebe bsana' dxuna' ca bdxixruj be'u.  
111 Ba gucá'a da dxusede xrtizru' neda' chee gaca na  
da gápaqueza' chadía chacanna  
lawe' da zaj naca xrtizru' da dxezaca ba lázrele'a.  
112 Zúatequeze lázrdawa' guna' ca zaj naca xrba chiu'  
tu chí'izqueze, ca zrindxa zra cheajsé chia'.

*Bexácadxu chawe' ne chee xrtizra' Xránadxu*

113 Dxecuídeda' benne' ca' dxelunę' láweze da xrlátaje,  
san nazrí'ida' da dxenná da bdxixruj be'u.  
114 Nacu' Lue' ca tu xu'u naga zua chawa', ne ca tu  
da dxucu'uj na neda',  
lawe' da dxebeza lazra' gaca na ca dxenná xrtizru'.  
115 Le gucuasa naga zua', le'e, benne' węn da calela,  
lawe' da tu gúnzqueza' ca bdxixruj bea Dios chia'.  
116 Bze chacha neda' cáteze dxenná xrtizru', na' gaca bana',  
ne quebe xedué'eda' chee da na' dxebeza lazra'.  
117 Bze chacha neda', na' la',  
ne tu xezaca ba lázrezqueza' ca naca xrba chiu'.  
118 Bchuchu bléaju' xúgute benne' ca' bulusane' ca naca  
xrba chiu'  
lawe' da węn lazre' naca xel-la' sina chee benne' ca'.  
119 Ca bebe bzria xi'u xúgute benne' ca' dxelebéaj xichaje'  
Lue' lu xęzr la xu nigá.  
Chee le na' nazrí'ida' da dxusede dizra' chiu' netu'.



<sup>120</sup> Dxezrize beła' dxen chia' lawe' da dxezreba' Lue',  
ne dxezreba' da dxuchi'u cheentu' da naca na xrlátaje.

*Dxal-la' gundxu ca dxenná xrtizra' Xránadxu*

<sup>121</sup> Ba beña' ca da nuchi'u cheentu', ne ca naca da xrlátaje.  
Quebe gudéu' neda' lu na' benne' ca' dxuluchínene' neda'.

<sup>122</sup> Guchebe lazre' chia' gunu' gaca chawe' chia'.  
Quebe gu'u lataj benne' ca' dxulucá'ana szren cuine'  
xuluchínene' neda' xadia.

<sup>123</sup> Guzé bxxrinne xiaj lawa' lawe' da dxebeza' xidu'  
guseláu' neda',

ne guchi'u cheentu' ca dxenná xrtizru'.

<sup>124</sup> Dutę xel-la' dxexache lazre' chiu' beñ gaca chawe'  
chia' neda', wen zrin chiu',

ne bşede neda' guna' ca naca xrba chiu'.

<sup>125</sup> Naca' wen zrin chiu'.

Bzéajni'i neda' cheę gúnbe'a da dxuşede dizra' chiu' netu'.

<sup>126</sup> Xrana' Dios, ba bzzrin zra bi gunu',

lawe' da ba buluzúę' chalá'ala da bdxixruj be'u.

<sup>127</sup> Cheę le' na' neda' nazrí'idxeda' da bdxixruj be'u Lue'  
quęzcala oro, ne quęzcala galega oro.

<sup>128</sup> Cheę le' na' dxéqueda' zaj nácadxa li lazre'

da bdxixruj be'u ca xúgute da de,

na' dxecuideda' xúgute da zaj naca na da wen lazre'.

*Dxaca lázredxu gundxu ca dxenná xrtizra' Dios*

<sup>129</sup> Dxebánetu' ca dxuşede dizra' chiu' netu'.

Cheę le' na' du lazra' tu dxúnzqueza' ca dxenná na.

<sup>130</sup> Gate nu dxuzájla'a ca naca xrtizru', dxusaní na.

Dxun na dxeléajni'i benne' dxexruj lazre' ca'.

<sup>131</sup> Guxá dxu'a, ne gucá'a lazra'

lawe' da dxezá lazra' gúnbe'a da bdxixruj be'u.

<sup>132</sup> Gunná' neda', ne bexache lazre' neda',

ca tu dxúnzquezu' cheę benne' ca' zaj nazrí'ine' Lue'.

<sup>133</sup> Ben tu gúnzqueza' ca dxenná xrtizru',

ne quebe gu'u lataj da zrinnañ nna be'e na neda'.

<sup>134</sup> Bselá neda' lu na' benne' xichaj zra'a ca',

na' tu gúnzqueza' ca dxenná da bdxixruj be'u.

<sup>135</sup> Ben gaca chawe' chia' neda', wen zrin chiu',

ne bşede neda' guna' ca zaj naca xrba chiu' ca'.

<sup>136</sup> Nisa gudxezra' guca na ca tu xęgu nisa

lawe' da quebe dxelún bėnneache ca bdxixruj be'u.

*Da li naca da dxenná Xránadxu*

<sup>137</sup> Xrana' Dios, xrlátaje nacu' Lue',

ne li lazre' naca ca dxuchi'u cheentu'.

<sup>138</sup> Da dxuşede dizra' chiu' netu', da na' bzu' lu na'ntu',

naca na da li, ne da li lazre'.

<sup>139</sup> Dxedú lazra' lawe' da dxé'le'a gunne xue

lawe' da gulal-la lazre' benne' ca' dxeledábaguę' neda'  
ca zaj naca xrtizru'.

<sup>140</sup> Du lázrele'ę naca xrtizru',

na' nazrí'ida' neda' na, naca' wen zrin chiu'.

<sup>141</sup> Dxezruj lazre' naca', na' dxuluzúę' neda' chalá'ala,

na' quebe ne gal-la lazra' da bdxixruj be'u.

<sup>142</sup> Tu chí'izqueze zua da dxuchi'u cheentu',

na' da li naca da bdxixruj be'u.

<sup>143</sup> Da dxezaca zı'a, ne da ştebe zua' zaj nuchuchuj na neda',

san dxezaca ba lázreleña' da bdxixruj be'u.

<sup>144</sup> Tu chí'izqueze naca li lazre' da dxuşede dizra' chiu'.

Bzéajni'i neda', na' gaca bana'.

*Dxal-la' gulaba lázredxu da gunná Dios*

<sup>145</sup> Dutę lázrdawa' dxuláwizra' Lue', Xrana' Dios.

Ben gaca chawe' chia', na' tu gúnzqueza' ca dxenná xrba chiu'.

<sup>146</sup> Dxuláwizra' Lue'.

Bselá neda', na' tu gúnzqueza' ca dxusede dizra' chiu' netu'.

<sup>147</sup> Bálala dxasa', na' dxuláwizra' Lue'.

Dxebeza lazra' gaca ca dxenná xrtizru'.

<sup>148</sup> Dxenná'aza' bedú xela,

cheę gulaba lazra' da bdxixruj be'u.

<sup>149</sup> Duteę xel-la' dxexache lazre' chiu' bene chi'a.

Xrana' Dios, da bchi'u cheętu' btipa lazra'.

<sup>150</sup> Benne' dxeláu zi' xuzre' neda' ba zaj zre'e xelune' chia' da caęla.

Zaj nusane' da dxenná da bdxixruj be'u.

<sup>151</sup> Xrana' Dios, zu' Lue' gagu naga zua',

ne da li zaj naca xúgute' da bdxixruj be'u.

<sup>152</sup> Gate nate ba núnbe'a da dxusede dizra' chiu' netu', da na' nuzú' cheętu' tu chí'izqueze.

*Da gunná Dios dxuzéajni'i dxi'u*

<sup>153</sup> Gunná' xque ca dzezaca zi'a, ne bselá neda' lawe' da quebe ne gal-la lazra' da dxenná da bdxixruj be'u.

<sup>154</sup> Bechebe waláz chia', ne bexa'u neda'.

Btipa lazra' nen xrtizru'.

<sup>155</sup> Stébele'e naca xeledá benne' ca' dxelebéaj xíchaje'

Lue', Dios,

lawe' da quebe dxelebé'e gunne xue xelune' ca naca xrba chiu'.

<sup>156</sup> Xrana' Dios, dxexache lázreę'u bénneache chiu'.

Btipa lazra' cáteze dxenná xrtizru' gunu'.

<sup>157</sup> Záneteę zaj naca benne' ca' zaj nau zi' xuzre' neda',

ne benne' ca' dxeledábague' neda',

san quebe ne gusana' dxuna' ca dxusede dizra' chiu' netu'.

<sup>158</sup> Ble'eda' benne' ca' dxelún lazre', na' dxegúteda' benne' ca'

lawe' da quebe dxelune' ca' dxenná xrtizru'.

<sup>159</sup> Gunná'xque, Xran, ca nazrí'ida' da bdxixruj be'u.

Duteę xel-la' dxexache lazre' chiu', btipa lazra'.

<sup>160</sup> Da líqueze zaj naca xúgute' xrtizru',

ne tu chí'izqueze zaj naca da dxuchi'u cheętu' lu

da xrlátaje chiu'.

*Da gunná Dios dxutipa lázredxu*

<sup>161</sup> Benne' ca' dxelenná be'e dxeláu zi' xuzre' neda'

na' quebe bi nuna' cheę'.

Duteę lázrdawa' dzezreba' ca zaj naca xrtizru'.

<sup>162</sup> Dxebéle'e'eda' lu da dxenná xrtizru'

ca dxebé bénnea' dxezrel-lene' tu xel-la' gunní'a zrente.

<sup>163</sup> Dxecuúdeda', ne dxegúteda' da wen lazre'.

Nazrí'ida' da dxenná da bdxixruj be'u.

<sup>164</sup> Gazre lasa tu zra dxue lá'ana' Lue'

lawe' da xrlátaje naca ca dxuchi'u cheętu'.

<sup>165</sup> Dxelebeza zri lázrele'e benne' ca' zaj nazrí'ine'

da bdxixruj be'u,

na' quebe bi de da gun na cheajlecházie'.

<sup>166</sup> Xrana' Dios, dxebeza' Lue' xidu' guseláu' neda',

ne tu dxúnzqueza' ca naca da bdxixruj be'u.

<sup>167</sup> Duteę lázrdawa' tu dxúnzqueza' da dxusede dizra' chiu' netu',

ne nazrí'ile'eda' ca naca na.

<sup>168</sup> Tu dxúnzqueza' ca naca da bdxixruj be'u,

ne ca dxusede dizra' chiu' netu'

lawe' da dxelé'equeznu' xúgute' da dxuna'.

*Dxebéle'e'ędxu xrtizra' Dios*

<sup>169</sup> Xrana' Dios, bene da dxuláwizra' Lue'.

Bzéajni'i neda' ca dxenná xrtizru' gunu'.

<sup>170</sup> Bene da dxenaba' lau Lue'.

Bselá neda' ca dxenná xrtizru' gunu'.

<sup>171</sup> Tu güe lá' anazqueza' Lue', Xran,  
gate ba nusédenu' neda' guna' ca naca xrba chiu'.

<sup>172</sup> Tu guchálajzqueza' ca naca xrtizru'  
lawe' da xrlátaje naca ca dxenná be'enu' netu'.

<sup>173</sup> Guzúatequeze gácaleñu' neda'  
lawe' da dxuna' ba xuzre guna' ca bdxixruj be'u.

<sup>174</sup> Dxezá lazra' guseláu' neda', Xrana' Dios.

Dxezaca ba lázreña' da bdxixruj be'u.

<sup>175</sup> Ben gaca bana', na' güe lá' ana' Lue',  
na' da dxuchi' u chia' xelácale na neda'.

<sup>176</sup> Gudéa' chalá' ala ca dxedá tu zrila' naníteba'.

Bexilaj neda', wen zrin chiu', lawe' da quebe ne gal-la lazra'  
da bdxixruj be'u.

## 120

<sup>1</sup> Gate guzúa' lu da stebe bláwizra' Xránadxu Dios,  
na' Le' gúcaleñe' neda'.

<sup>2</sup> Bselá neda', Xrana' Dios, lu na' benne' wen lazre' ca',  
ne lu na' benne' dxelezí xe'e ca'.

<sup>3</sup> ¿Bizra gunna Dios le'e, benne' dxelezí xe'e?  
¿Bizra da ba neza gaca na chee gate gudé'e' le'e  
lu da zi' da xa'?

<sup>4</sup> Gudé'e' le'e lu na' benne' ca' xuludé'e' le'e xaga nalá xéche'ze,  
ne xuluzríe' le'e xi' galaj.

<sup>5</sup> Edxugúa neda'.

Dxaca chia' ca zúaqueza' ládujla benne' Mesec,  
ne ca zua' tu lu xu'u xide chee benne' Cedar.

<sup>6</sup> Da zrente ba guzúa' ládujla benne' caní  
dxuluzúe' chalá' ala xel-la' dxebeza zri lazre'.

<sup>7</sup> Neda' dxezá lazra' gata' xel-la' dxebeza zri lazre'.

Gate dxuchálaja' cheen, dxeledil-la'e benne' ca' neda'.

## 121

<sup>1</sup> Chisa xíchaja' nna'a da dxelún bénneache lu xi'a ca'.

¿Gazra za' da gácale na neda'?

<sup>2</sup> Da gácale na neda' za' lu na' Xránadxu Dios,

Bénnea' bene' xabáa, ne xezr la xu.

<sup>3</sup> Quebe gu'e lataj cheajcháziu'.

Quebe gase Bénnea' dxuxúequeze' lue'.

<sup>4</sup> Gunná' xque, quebe te bchigala chee Bénnea'.

Québequeze gase Bénnea' dxuxúequeze' benne' Israel ca.

<sup>5</sup> Xránadxu Dios dxucú' uje' lue'.

Xránadxu Dios zue' cuitu' xabela dxegu'e lue' zrul-la.

<sup>6</sup> Quebe guzezxe gubizra lue' te zra,

ne quebe bi gune beu' lue' chizrela.

<sup>7</sup> Xranu' Dios guxúequeze' lue' chee quebe bi da caleja  
gaca na chiu'.

Guxúequeze' bénne' du xu'u.

<sup>8</sup> Xránadxu Dios guxúequeze' lue' gate dxedxúaju',  
ne gate dxexú'u, na'a zra, ne chadía chacanna.

## 122

<sup>1</sup> Gubélena' benne' ca' gulé'e neda':

“Chéajdxu xu'u lizre Xránadxu Dios.”

<sup>2</sup> Na'a zúadxu nigá, zentu' dxa xu'u ze'e  
da naxechaj lue', xezre Jerusalén.

<sup>3</sup> Jerusalén naca na tu xezre da belexung',  
na' naca na xrtante, ne dxé'le'e na cháwedau'.

<sup>4</sup> Lu xezre na' zjaca xúgute cuen bénneache zaj de'e

Xránadxu Dios.

Dxeluné' ca dxenná dizra' da guzre Dios benne' Israel ca',  
cheé xelúe lá'ané' La Xránadxu Dios.

<sup>5</sup> Lu xezre na' zaj dxé' benne' ca' dxuluchi'è chee  
benne' Israel ca',

naga zaj dxé' benne' xrtia David, benne' ca' dxelenná be'è.

<sup>6</sup> Le naba lau Dios gata' xel-la' dxebeza zri lazre'

lu xezre Jerusalén,

cheé xelepe ban da dxelún benne' ca' zaj nazrí'ine' xezre na'.

<sup>7</sup> Dxenábantu' Dios sua xel-la' dxebeza zri lazre'

lu'ule ze'e da naxechaj na lue', Jerusalén,

ne cheé xelezrá' chawe' benne' zaj xu'è xu'u zren chiu'.

<sup>8</sup> Nazrí'ida' le sa' ljwezra', ne bi ljwezra' ca', na' dxenná':

Gata' xel-la' dxebeza zri lazre' chiu', xezre Jerusalén.

<sup>9</sup> Lawe' da nazrí'ida' xu'u lizre Xránadxu Dios

dxuna' ba xuzre gaca chawe' chiu'.

## 123

<sup>1</sup> Chisa xíchaja' nna'a naga zu', Xran,

naga zu' Lue', zu' xabáa na'la.

<sup>2</sup> Ca dxun tu bi wen zrin dxenná'abe' bi nna xránabe',

ne ca dxun nu'ula wen zrin dxenná'abe' bi nna

nu'ula xránabe',

caní dxenná'adxu bi nna Xránadxu Dios

ca zrindxa zra xexache lazre' cheédxu.

<sup>3</sup> Bexache lazre' cheentu', Xránantu' Dios.

Bexache lazre' cheentu', lawe' da dxedú lázrentu'

lawe' da dxulucá'ana ditaj bènneache netu'.

<sup>4</sup> Dxedú lázrentu' lawe' da dxelún lala benne' gunní'a ca'

cheentu',

ne dxulucá'ana ditaj netu', benne' ca' dxulucá'ana szren

cuine'.

## 124

<sup>1</sup> Chela ca gúcalé Xránadxu Dios dxi'u.

Caní dxal-la' xelenná benne' Israel ca' na'a.

<sup>2</sup> Chela ca gúcalé Xránadxu Dios dxi'u

gate guledíl-lalé benne' ca' dxi'u,

<sup>3</sup> na' buluzría xi'té' dxi'u

lu duté xel-la' dxelezrá'a zrente cheé',

<sup>4</sup> ne guca cheédxu ca dxaca cheé benne'

dxugacu nísadau' lé', da na' gute na lé'.

<sup>5</sup> Chela guca caní cheédxu, na' béteté da na' dxi'u.

<sup>6</sup> Dخال-la' xédxu Xránadxu Dios; Xcalenu',

lawe' da quebe be'è lataj benne' ca' xuluzría xi'è dxi'u.

<sup>7</sup> Beladxu ca dxelá tu bxinne lu xixruj cheé benne' wezén bxinne.

Bzria xi' Xránadxu xel-la' dxenná bea cheé benne' ca', na' beladxu.

<sup>8</sup> Naca Xránadxu Dios Bènnea' dxácalené' dxi'u,

Bènnea' bènqueze' xabáa, ne xezr la xu.

## 125

<sup>1</sup> Benne' ca' dxuluxrén lazre' Xránadxu Dios zaj naque' ca xi'a Sión,  
da quebe nu seque' gutá, san tu chí'izqueze zua chacha na.

<sup>2</sup> Ca zaj zua xi'a ca' da zaj naxechaj na Jerusalén,

zua Xránadxu Dios, dxuxúezeze' bènneache cheé' na'a zra,

ne chadía chacanna.

<sup>3</sup> Quegá tu chí'izqueze xelenná bea benne' ca' dxeluné'

da calela lu xezr la xu cheé benne' xrlátaje ca',

cheé quebe xelaca benne' xrlátaje ca' tuze nen benne'

wen da zrinnaj ca'.

<sup>4</sup> Xrana' Dios, bèn gaca chawe' cheé benne' xrlátaje ca',

ne cheé benne' ca' zaj naque' li lazre'.

<sup>5</sup> Benne' ca' dxelebéaj xichaj Dios cheę xelunę' da calęla,  
xucuasa Xránadxu Dios benne' ca' tu zren nen benne' ca'  
dxelunę' da zrinnaj.  
Dxenaba' gata' xel-la' dxebeza zri lazre' cheę benne' Israel ca'.

## 126

<sup>1</sup> Gate Xránadxu Dios bselé' dxi'u lu na' benne' zitu' ca',  
ne begu'e dxi'u lu xęzre Sión, gúquedxu dxennędxu xęla.  
<sup>2</sup> Nadxa bżrízredxu, ne bę lá'anadxu Xránadxu Dios.  
Nadxa gulenná benne' xęzr la xu ca':  
"Da zrentę ca' bęn Dios, Xrana benne' ca', cheę'."  
<sup>3</sup> Da zrentę ca' bęn Xránadxu Dios cheędxu dxi'u,  
na' zúadxu lu da ba neza zrentę.  
<sup>4</sup> Bselá Xránadxu dxi'u lu na' benne' zitu' ca',  
na' bezrindxu lu xęzr la xu cheędxu  
ca dxezrín nisa guba'u lu xęgu bizre ca'.  
<sup>5</sup> Benne' ca' dxelebezre' tię' dxelazę',  
nen xel-la' dxelebé xelexezi'e lina.  
<sup>6</sup> Dxebezre tię' zéaje' nu'e binne cháwe'du ca',  
na' dutę xel-la' dxebé dxezrine' zeajnu'e lina cheę'.

## 127

<sup>1</sup> Chela ca zúalę Xránadxu Dios benne' ca' dxelunę' tu xu'u  
dácheze naca xelunę' zrin na'.  
Chela ca dxuxúe Xránadxu Dios tu xęzre,  
dácheze naca dxuluxúe benne' ca' lę na.  
<sup>2</sup> Dácheze naca dxásazęle che zílala,  
ne dxunle zrin cáteze dxalaj gubizra ca dxebíadxna na,  
ne dutę xel-la' dxudía dxezile da gágule,  
lawe' da dxunna Dios da xelagu benne' ca' nazrí'ine'  
dxácatę na' dxelásię'.  
<sup>3</sup> Le nna' xęue, zaj naca zrí'inedxu bi ca' bęnna Xránadxu dxi'u.  
Zaj naca bę' tu da gunní'a zrentę.  
<sup>4</sup> Zrí'inedxu dxelálajbe' cheędxu gate ne nácadxu cuide'  
zaj nácabe' ca xaga nalá xęche'ze ca' da nuxru benne'  
zeje' wedil-la.  
<sup>5</sup> Ba neza zrentę naca na cheę bęnnea' nuxruę' zánete  
xaga nalá xęche'ze caní.  
Québequeze xedué'eng' gate zri'a cheę'  
tu zren nen benne' ca' dxeledíl-lalęnę' lę'.

## 128

<sup>1</sup> Ba neza zrentę naca na cheę benne' ca' dxelezrebe' Xránadxu Dios,  
benne' ca' tu dxelúnzquezę' ca nadxixruj be'e Dios.  
<sup>2</sup> Gate dxagu' da dxezi'u cheę zrin da nunu'  
gaca chiu' tu da ba neza, ne gaca chawe' chiu'.  
<sup>3</sup> Gaca zru'ulu' ca tu lba uva da dxebía da zixre  
cuita xu'u lizru',  
na' zri'inu' ca' xelácabe' ca xaga olivo ca' zaj ze  
dxu'a ga dxagu'.  
<sup>4</sup> Caní gun Xránadxu gaca chawe' cheę bęnnea' dxezrebe' Lę'.  
<sup>5</sup> Dxenaba' gun Xránadxu, zuę' xi'a Sión, gaca chawe' chiu',  
cheę le'enu' gaca chawe' cheę xęzre Jerusalén xúgute zra naca banu',  
<sup>6</sup> ne cheę le'enu' zri'ine zre su'.  
Dxenaba' gata' xel-la' dxebeza zri lazre' cheę benne' Israel ca'.

## 129

<sup>1</sup> Zúadxu lu da stébelę'e gate nácateđdxu cuide',  
waca xelenná benne' Israel ca'.  
<sup>2</sup> Zúadxu lu da stébelę'e gate nácateđdxu cuide'  
san quebe buluzria xi'e dxi'u.  
<sup>3</sup> Belunę' we' cúzrudxu gate beline' dxi'u xide,

na' gulaca cúzrudxu ca xęzr la xu naga dxedé xia cheę bęzre.

<sup>4</sup> Xlátaje naca Xránadxu Dios.

Bselé' dxi'u lu na' benne' ca' buluchínene' dxi'u xadíaže.

<sup>5</sup> Bęn cheajlechaze, ne xelebígaqueze

xúgute' benne' ca' dxelecuídene' benne' Sión ca'.

<sup>6</sup> Bęn xelaque' ca xixre'du ca' dxelebía na xrgu'u

da dxelebízre na gate ne zaj nadxé'ene na,

<sup>7</sup> da na' quebe nu benne' dxexeque'ę na,

ne quebe seque' nu benne' gunę' na tu cheaj weaj.

<sup>8</sup> Quebe xelenná benne' dxeledéę' naga zaj zria na:

Dxenáantu' gun Xránantu' Dios gaca chawe' cheęe.

Lu La Xránantu' Dios dxenáantu' gaca chawe' cheęe.

## 130

<sup>1</sup> Ga ni zua' lu da stébele'ę dxuláwizra' Lue', Xrana' Dios.

<sup>2</sup> iXran, bene chí'a!

iBęz naga da dxenaba' lau'!

<sup>3</sup> Xrana' Dios, chela nna' xánniu' ca naca dul-la nabáantu'

čnúzraqueze xegá'ana xrlátaje lau Lue'?

<sup>4</sup> Lué'quezu' dxunite lau' cheętu'

cheę gápantu' Lue' ba lá'ana.

<sup>5</sup> Dute' lázrdawa' dxebeza lazra' Xránadxu Dios,

ne dxuxrén lazra' xrtízre'.

<sup>6</sup> Dxebeza lazredxa' Xránadxu Dios

cáqueze dxelún benne' ca' dxuluxúę' xęzre ca',

dxelebeze' chaní',

ne cáqueze dxelún benne' ca' dxelicha bchigala,

dxelebeze' chaní'.

<sup>7</sup> Benne' Israel ca' dxal-la' xebebeza lazre' Xránadxu Dios

lawe' da dxexache lazre' Xránadxu bėnneache cheę',

ne dxexá'awe' benne' ca' lu na' benne' guledábague' Le'.

<sup>8</sup> Dios xexá'awe' benne' Israel ca'

lu na' xúgute' dul-la da zaj nabague'.

## 131

<sup>1</sup> Xrana' Dios, ba bsana' xel-la' dxucá'ana szren cuina',

ne ba bcuasa' xel-la' dxequę xrlátaje cuina'.

Quebe dxulapa napa' lu da zaj naca szren,

da ca' quebe naca chia' gulapa' na'a.

<sup>2</sup> Quebe bi gunní'a, ne guzúa' zrize ca tu bi dxe'ene

za bexuzrte' gúzrebe'.

Naca bėnne' du xu'a ca tu bi dxe'ene za bexuzrte' gúzrebe'.

<sup>3</sup> Le cuezza lazre' Xránadxu Dios, le'e, benne' Israel

na'a zra, ne chadía chacanna.

## 132

<sup>1</sup> Bsa lazre', Xrana' Dios, ca guca cheę David,

ne ca guzaca zi'ę,

<sup>2</sup> ne ca da gučebe lazre' gunę' chiu',

da gučebe lazre' lau', Dios wal-la cheę Jacob.

<sup>3</sup> Gunę': "Québequeze chu'a xu'u lizra',

ne québequeze gáta'a ga dxasia'

<sup>4</sup> ne québequeze guchúdia' xiaj lawa'

ne québequeze gasia'

<sup>5</sup> ca zrindxa zra ba bėna' tu xu'u lizre Xrana' Dios

naga súaqueze Dios wal-la cheę Jacob."

<sup>6</sup> Bėnedxu zua xí'ina lá'azxa naga xu'u xel-la' wezría

lu xęzr la xu Efrata,

na' bezréledxu na lu xęzr la xu cheę bėnnea' lę' Jaar.

<sup>7</sup> Gunnantu': Chėajntu' naga zua Dios cheętu'.

Guzú zřibentu' zran ní'a Le'.

<sup>8</sup> Guxasa, Xránantu' Dios, nen xí'ina naga xu'u  
 xel-la' wezría chiu',  
 ne gudá lu xi'a naga súaquezu' Lue'.  
<sup>9</sup> Ben xelún bxruze chiu' ca' da naca xrlátaje,  
 ne xelebezre xa'a xúgute bènneache chiu', lu dute  
 xel-la' dxelebé chee'.  
<sup>10</sup> Lawe' da nazrí'inu' David, wen zrin chiu',  
 quebe guzú' chalá'ala wenná bea na' ba guca'u Lue'.

<sup>11</sup> Da líqueze bzetaj cuina Xránadxu Dios,  
 guchebe lazre' chee David quebe gucuase' ca da gunné'.  
 Gunné': "Guna' xelenná bea zri'ine zre su' naga  
 dxenná béaquezu' Lue'.

<sup>12</sup> Che zri'inu' ca' tu xelúnzqueze' ca naca xel-la' wezría chia',  
 ne ca naca xrtizra' da gusédeda' le',  
 zri'inu' ca' tu xelenná béazqueze' naga dxenná be'u lue'."

<sup>13</sup> Lawe' da gucá'a Xránadxu Dios xezre Sión,  
 guca lazre' sua xu'u lízrequeze' ga na'.

<sup>14</sup> Gunné': "Tu gácazqueze lataj nigá naga súaqueza' neda'.  
 Tu súazqueza' nigá lawe' da caní dzezaca ba lazra' guna'.

<sup>15</sup> Guna' gáta'le'e lina chee benne' ca',  
 ne guna' xelej benne' xache' ca' xeta.

<sup>16</sup> Guna' xelún bxruze chia' ca' da naca chawe',  
 na' xelebezre xa'a xúgute bènneache chia' lu dute  
 xel-la' dxelebé chee'.

<sup>17</sup> Lataj na' guna' xexaca xel-la' dxenná bea chee David.  
 Guna' xelezúa na' zri'ine zre sua wenná bea na'  
 ba gucá'a neda'.

<sup>18</sup> Guna' xeleque zréaje benne' guledábage' Le',  
 na' guna' chepe ban xel-la' dxenná bea chee David na'."

### 133

<sup>1</sup> Le nna' xque, xrtante naca, ne cháwe'le'e naca  
 gate zaj nazraga bènneache chee Dios, zaj naque' tuze.

<sup>2</sup> Naca na ca tu da za da dxuluzúa xíchaje',  
 da dxedínnete na dxu'a lawe',  
 ca na' dxedínnete na lu luzru Aarón,  
 ne dxedínnete na ga zria zre'.

<sup>3</sup> Dxedínnete na ca xrlé'ela da dxexruj lu xi'a Hermón,  
 ne dxexruj na lu xi'a Sión lawe' da gun Xránadxu Dios  
 gaca chawe' chee bènneache zaj zre'e na',  
 ne gunne' benne' ca' xel-la' nabán da zeajlí canna.

### 134

<sup>1</sup> Le na' xque, le güe lá'ana Xránadxu Dios,  
 le'e, nácale wen zrin chee Xránadxu,  
 zrале xu'u lizre Xránadxu chizrela.

<sup>2</sup> Le chisa na'le lau lataj lá'axza,  
 ne le güe lá'ana Xránadxu Dios.

<sup>3</sup> Dxenaba' lau Xránadxu zue' Sión guné' gaca chawe' chiu',  
 naque' Bènnea' bene' xabáa, ne xezr la xu.

### 135

<sup>1</sup> Le güe lá'ana La Xránadxu Dios!

Le güe lá'ana Le', le'e, wen zrin chee Xránadxu,

<sup>2</sup> le'e zrале xu'u lizre Xránadxu Dios,  
 lu chale'aj chee xu'u naga zúaqueze Dios!

<sup>3</sup> Le güe lá'ana Xránadxu lawe' da naque' xrlátaje!  
 Le gul-la da güe lá'anale La Le', lawe' da naque' zri'i lazre'!

<sup>4</sup> Xránadxu Dios ba guqu'é' zri'ine zre sua Jacob.

Guqu'é' zri'ine zre sua Israel chee xelaque' bènneache chee'.

<sup>5</sup> Nézquezdxu szrenté naca Xránadxu Dios.

Xránadxu naque' szrendxa ca xúgute dios chee' benne' zitu' ca'.

<sup>6</sup> Xúgute da dxaca lazre' Xránadxu gune',  
dxune' na zran xabáa, ne lu xezr la xu,  
ne lu nísadau', ne lu da situj chee' nísadau' ca'.

<sup>7</sup> Dxune' zá'aca beuj dapa saca chee' xezr la xu.  
Dxune' dxelepe xesa guziu' gate dxaca xiuj.  
Dxune' dxaca be' gáteteze.

<sup>8</sup> Bene' gulate bi biu nedxu chee' benne' Egipto ca'.  
Gulate bi biu nedxu chee' bèneache,  
ne béadu ca' chee' be' xixre' chee' ca'.

<sup>9</sup> Bene' xel-la' waca ca' da za xabáa, ne da zrente' ca'  
da bene' lu xezr la xu chee' benne' Egipto ca',  
da ca' ben Dios da guca chee' Faraón,  
ne chee' xúgute wen zrin chee' Faraón na'.

<sup>10</sup> Bzria xi'e' bèneache zánete' cue' xezr la xu ca',  
ne betie' benne' wenná bea ca',  
benne' zaj nápal'e' xel-la' dxelenná bea.

<sup>11</sup> Betie' Sehón, wenná bea chee' benne' amorreo ca',  
ne Og, wenná bea chee' benne' Basán ca',  
ne xúgute benne' wenná bea chee' benne' Canaán ca'.

<sup>12</sup> Bequ'e' xezr la xu nigá lu na' benne' wenná bea ca',  
na' bnéruje' na lu na' bèneache chee', benne' Israel ca'.

<sup>13</sup> Xrana' Dios, chadía chacanna zua lau' Lue'.  
Tu cheajlesá lázrezqueze bèneache Lue'.

<sup>14</sup> Xránadxu Dios guchi'e' chee' bèneache chee',  
ne xexache lazre' cheedxu dxi'u, wen zrin chee'.

<sup>15</sup> Bedau' xia xaga ca' chee' benne' xezr la xu ca'  
zaj naca na oro, ne plata.

Zaj naca na da belún bèneache.

<sup>16</sup> Zaj zua dxu'a na san quebe dxelenné na.

Zaj zua lau na san quebe dxelelé'e na.

<sup>17</sup> Zaj zua naga na san quebe dxelén na, ne quebe  
dxelecá'a na be'.

<sup>18</sup> Benne' ca' dxelune' na zaj nácaqueze' ca léqueze na,  
ne caní zaj naca xúgute benne' dxulxren lazre' na.

<sup>19</sup> Le'e, benne' xrtía Israel, le güe lá'ana Xránadxu Dios.

Le'e, benne' xrtia Aarón, le güe lá'ana Xránadxu Dios.

<sup>20</sup> Le'e, benne' xrtia Leví, le güe lá'ana Xránadxu Dios.

Le'e, núlale dxezrébele Xránadxu Dios, le güe lá'ana  
Xránadxu Dios.

<sup>21</sup> Le'e, zrале xezre Sión, le güe lá'ana Xránadxu Dios,  
Bénea' zúaqueze' xezre Jerusalén.

¡Gaca ba lá'azxa Xránadxu Dios!

## 136

<sup>1</sup> Le güe lá'ana Xránadxu Dios, Benne' xrlátaje!

¡Chadía chacanna dxexache lazre' dxi'u!

<sup>2</sup> Le güe lá'ana Dios, naque' szréntedxa ca zaj naca dios  
chee' xezr la xu ca'!

¡Chadía chacanna dxexache lazre' dxi'u!

<sup>3</sup> Le güe lá'ana Xránadxu, naque' szréntedxa ca zaj naca  
xrana xezr la xu ca'!

¡Chadía chacanna dxexache lazre' dxi'u!

<sup>4</sup> Le güe lá'ana Dios na', dxune' xel-la' waca zri'a ca'!

¡Chadía chacanna dxexache lazre' dxi'u!

<sup>5</sup> Le güe lá'ana Dios na', bene' xabáa dute' xel-la' sina chee'!

¡Chadía chacanna dxexache lazre' dxi'u!

<sup>6</sup> Le güe lá'ana Dios na', bzue' xezr la xu lawe' nísadau'!

¡Chadía chacanna dxexache lazre' dxi'u!



7 ¡Le güe lá'ana Dios na', bene' gubizra ne beu!  
 ¡Chadía chacanna dxexache lazre' dxi'u!  
 8 ¡Bene' gubizra chee gusení na te zra!  
 ¡Chadía chacanna dxexache lazre' dxi'u!  
 9 ¡Bene' beu' ne belaj ca' chee xulusení na chizrela!  
 ¡Chadía chacanna dxexache lazre' dxi'u!  
 10 ¡Le güe lá'ana Dios na', betie' bi biu nedxu chee  
 benne' Egipto ca!  
 ¡Chadía chacanna dxexache lazre' dxi'u!  
 11 ¡Le güe lá'ana Dios na', bebéaje' benne' Israel ca'  
 lu xezr la xu Egipto na!  
 ¡Chadía chacanna dxexache lazre' dxi'u!  
 12 ¡Beche'e le' duté xel-la' waca zren chee!  
 ¡Chadía chacanna dxexache lazre' dxi'u!  
 13 ¡Le güe lá'ana Dios na', bene' chupa la'a nísadau'  
 da nazi le' na Xrna!  
 ¡Chadía chacanna dxexache lazre' dxi'u!  
 14 ¡Bdee' benne' Israel ca' laduj nísadau' na!  
 ¡Chadía chacanna dxexache lazre' dxi'u!  
 15 ¡Bgacue' nísadau' na' Faraón, benne' wenná bea chee Egipto,  
 ne benne' zeje' wedil-la chee' ca!  
 ¡Chadía chacanna dxexache lazre' dxi'u!  
 16 ¡Le güe lá'ana Dios na', beche'e benne' chee' ca'  
 le'e xixre' lawe' lataj!  
 ¡Chadía chacanna dxexache lazre' dxi'u!  
 17 ¡Le güe lá'ana Dios na', betie' wenná bea blau ca!  
 ¡Chadía chacanna dxexache lazre' dxi'u!  
 18 ¡Betie' wenná bea wal-la ca!  
 ¡Chadía chacanna dxexache lazre' dxi'u!  
 19 ¡Betie' Sehón, wenná bea chee benne' amorreo ca!  
 ¡Chadía chacanna dxexache lazre' dxi'u!  
 20 ¡Betie' Og, wenná bea chee xezr la xu Basán!  
 ¡Chadía chacanna dxexache lazre' dxi'u!  
 21 ¡Bnézruje' xezr la xu chee benne' ca' chee gaca na  
 chee benne' chee' ca!  
 ¡Chadía chacanna dxexache lazre' dxi'u!  
 22 ¡Benne' na chee benne' Israel ca', benne' wen zrin chee' ca!  
 ¡Chadía chacanna dxexache lazre' dxi'u!  
 23 ¡Naque' Dios na', quebe gul-la lazre' dxi'u  
 gate buluzetja benne' ca' dxi'u!  
 ¡Chadía chacanna dxexache lazre' dxi'u!  
 24 ¡Le' bselé' dxi'u lu na' benne' ca' guledíl-lalene' dxi'u!  
 ¡Chadía chacanna dxexache lazre' dxi'u!  
 25 ¡Naque' Dios na', dxugawe' xúgute da zaj naca ban!  
 ¡Chadía chacanna dxexache lazre' dxi'u!  
 26 ¡Le güe lá'ana Dios chee xabáa!  
 ¡Chadía chacanna dxexache lazre' dxi'u!

## 137

1 Dxu'a xegu chee xezr la xu Babilonia gudxé'edxu,  
 ne gudxézredxu gate xeajsá lázredxu chee xezre Sión.  
 2 Lu zruze xaga labada' dxu'a xegu na'  
 buquéladxu da cun zriadi'i na du cheedxu ca'.  
 3 Benne' ca' guleché'e dxi'u ca benne' zaj nada'u  
 gulenábene' dxi'u gúl-ladxu.  
 Benne' ca' buluzría xi' xezre cheedxu gulé'e dxi'u  
 súadxu lu xel-la' dxebe', gulenné':  
 Le gul-la cheentu' da ca' bil-lale lu xezre Sión.  
 4 ¿Ajazra gúl-ladxu da güe lá'anadxu Xránadxu Dios  
 naga zúantu' lu xezr la xu chee benne' zitu' ca'?  
 5 Chela gal-la lazra' lue', xezre Jerusalén,  
 gun Dios gunita na'a xabeła xel-la' waca chee na.

<sup>6</sup> Ben xedá' luzra' chíchajla' che quebe cheajsá lazra' chiu',  
ne che quebe gucá'ana szrena' lue', Jerusalén,  
nacu' da dxezaca ba lázreleđa'.

<sup>7</sup> Xrana' Dios, bsa lazre' da caleļa da belún benne' Edom  
lu zra na' guzrí'a xi' xezre Jerusalén,  
gate na' gulenné': "Le guchinnaj na. Le guchinnaj na,  
ca zrintę lu lane cheę na."

<sup>8</sup> Le'e, benne' Babilonia, cuía xile.

Ba neza zrentę gaca na cheę bėnnea' gunę' cheęle  
ca da benle le'e cheentu' netu'.

<sup>9</sup> Ba neza zrentę gaca na cheę bėnnea' que'e bidu cheęle ca',  
ne quine'-be' lu xiaj xre na'.

## 138

<sup>1</sup> Xrana' Dios, dutę lázrdawa' güe lá'ana' Lue'.

Tu dxúl-lazqueza' da dxue lá'ana' Lue' lau dios ca' cheę  
benne' zitu' ca'.

<sup>2</sup> Dxuzú zriba' lau xudau' lá'azxa chiu',  
ne dxue lá'ana' Lau' lawe' da nacu' li lazre',  
ne dxexache lazru' bėnneache chiu',  
ne lawe' da blė'enu' nacu' Benne' szrentę,  
na' szrentę naca xrtizru'.

<sup>3</sup> Gate bláwizra' Lue', na' gúcalęnu' neda'.

Nen dutę xel-la' waca chiu' btipu' lazra'.

<sup>4</sup> Xúgute benne' wenná bea du gabí'i xęzr la xu  
xelúe lá'ang' Lue', Xrana' Dios.

Caní xelune' lawe' da ba belenne' ca naca xrtizru'.

<sup>5</sup> Xelúl-le' cheę da ba nune' Xránadxu Dios,  
lawe' da zrentę naca xel-la' ba cheę Xránadxu.

<sup>6</sup> Szrentę naca Xránadxu Dios, ne dxácalęne'  
benne' baxache' ca',

na' quebe dxu'e lataj benne' dxucá'ana szren cuine'  
zrine' lau Le'.

<sup>7</sup> Lácala zua' lu da ba xa', Lue' dxutipu' lazra'.

Dxedábagu' benne' ca' dxeledábage' neda',  
ne dutę xel-la' waca chiu' dxuseláu' neda'.

<sup>8</sup> Gun Xránadxu Dios da guchebe lazre' chia'.

Xrana' Dios, tu dxexache lázrezezezu' bėnneache chiu'.  
Quebe gusanu' dxunu' zrin da guzú lau' dxunu'.

## 139

<sup>1</sup> Xrana' Dios, ba gunná' xánniu' neda'

ne núnbea xánniu' neda'.

<sup>2</sup> Nézqueznu' gate dxe'a, ne gate dxasa'.

Zítu'la nézqueznu' da zaj xu'u xichaj lázrdawa'.

<sup>3</sup> Ba gunná' xánniu' ca dxuna', ne ca dxexezí' lazra'.

Nézqueznu' xúgute da dxuna'.

<sup>4</sup> Gate quebe ne guchálaja' ba nézqueznu' Lue', Xran,  
xúgute da nnia'.

<sup>5</sup> Gátetęzla cuita' neda' zúaquezu' Lue', Xran,  
ne nuzę na'u neda'.

<sup>6</sup> Ca szrentę naca da nézenu' Lue' naca na da dxebáneda'.  
Nácalę na sina da quebe gaca chėjni'ida'.

<sup>7</sup> ¿Gala cha'a zitu' naga quebe zúaqueze Be' chiu'?

¿Gala guzrúnmuja' naga quebe zúaquezu' Lue'?

<sup>8</sup> Che cuena' sibe zran xabáa, na' zúaquezu' Lue',  
ne che xétaja' lu da situj cheę xęzr la xu, na' zu' Lue'.

<sup>9</sup> La séqueda' tea' lu be', ne cha'a zitu' naga dxalaj gubizra,  
u tea' xechalá'a nísadau' naga dxebí'a gubizra,

10 cá'anqueze na' súalenu' neda',  
ne guxru na'u xabêla neda'.

11 Chela gaca guna' gacu da chul-la neda',  
u guna' xexaca lení' da naxechaj neda', chee  
xaca na da chul-la,

12 da chul-la na' quebe gaca gucache na neda' lau Lue',  
na' chizrela xaca na ca te zra lau'.  
Túzqueze ca zaj naca da chul-la, ne xel-la' naxaní' lau Lue'.

13 Lue' benu' da zaj xu' u lu bêla' dxen chia'.  
Lue' bzalju' neda' lu lê'e xrna'a.

14 Güe lá'anaqueza' Lue' lawe' da szrentę zaj naca da dxunu',  
ne dxebáneda' ca zaj naca na.

Dutę lázrdawa' nézquezda' caní naca na.

15 Blé'eqeznu' neda' gate gulá' gubinna zrita xu'a,  
gate na' belezraga na lu lê'e xrna'a,  
gate na' bgula' lu da bagácheze na'.

16 Ble'enu' bêla' dxen chia' gate gulá' gubinna na.

Xúgutę da caní ba naxúaj na lu xiche chiu',  
na' ca gudé na' gulá' gubinna na,

na' xúgutę na gulaca na cáteze zaj naxúaj na.

17 Dios, szrentę zaj naca da dxuwía lazru' gunu'.

Da zantę ca zaj naca na.

18 Chela gaca lazra' gulaba' ca zaj naca na,  
zaj naca na ca xuzre' dxe' dxu'a tu xęgu zren.

Gate dxexebana', ne zúalequeza' Lue'.

19 Dios, da líqueze gutiu' benne' ca' dxelunę' da caleła.

Cheę lę na', le gucuasa naga zua', le'e, węte benne'.

20 Chiu' Lue', Dios, dxelennę' dizra' schanni'.

Benne' ca' dxeledábague' lue' dxuluzétaje' Lau' lu da xálaze.

21 Xrana' Dios, dxecuđeda' benne' ca' dxuluzúę' Lue'  
chalá'ala,

ne dxezrá'li'a benne' ca' dxeledábague' Lue'.

22 Dutę lázrdawa' dxecuđeda' benne' ca'.

Dxéqueda' beque' benne' ca' ca benne' ca' dxeledábague' nédaqueza'.

23 Gunná' xanne' neda', Dios, ne gunná' da xu' u na lázrdawa'.

Bxue neda' cheę nézenu' da xu' u lu xichaj lázrdawa'.

24 Gunná' che zúale tu da caleła neda',

na' bsi neda' lu neza chawe' chiu' da zeajlí canna.

## 140

1 Xrana' Dios, bselá neda' lu na' benne' ca' dxelunę' da caleła.

Bxue neda' cheę quebe bi xelún benne' xichaj zra'a ca'  
chia' neda'.

2 Benne' caní dxuluwía lazre' da caleła ca' da xelunę'.

Tu zra tu zra dxulutíl-lalęne' bęnneache.

3 Da dxelennę' naca na ca lazxa bêla' da zaj nalále'e.

Xrtizra' benne' ca' zaj naca na ca nisa snia cheę bêla'.

4 Xrana' Dios, bxue neda' cheę quebe bi xelún benne' ca'

dxelunę' da caleła chia' neda'.

Bselá neda' lu na' benne' xichaj zra'a ca',

benne' ca' dxelunę' ba xuzre cheajcházia'.

5 Benne' ca' dxulucá'ana szren cuinę' zaj nabeque'

tu da queł-la na neda'.

Ba zaj nuzalę' xralaj dxu'a neza.

Ba zaj nabeque' da ca' xeleł-la na neda'.

6 Guča' Xrana' Dios: Lue' nacu' Dios chia'.

Xrana' Dios, bene chí'a dxuláwizra' Lue'.

7 Xrana' Dios, nacu' weselá chia'.

Lue' bcu'uju' xíchaja' lu zra guca wedil-la.

8 Xran, quebe gu' u lataj gaca ca da dxelezá lazre' benne' ca'

dxelunę' da caleła.

Quebe gu' u lataj chepe ban da dxuluwía lazre' xelunę',

chee quebe xulucá'ana szren cuine'.

<sup>9</sup> Zaj naxechaj benne' ca' dxelune' da calela neda'.

Ben gaca chee benne' ca' ca de' da dxelaca lazre' gaca  
chee benne' xula.

<sup>10</sup> Ben xexruj xi' lawe' benne' ca'.

Bzra benne' ca' lu xi'.

Bzra benne' ca' lu da sítuje'e naga cabátadxa xelexedxúaje'.

<sup>11</sup> Quebe gu'u lataj xegá'ana lu xezr la xu bénnea' dxenné'  
da calela.

Ben gaca da calela chee benne' xichaj zra'a, da guzría xi na le'.

<sup>12</sup> Nezda' xechebe Xránadxu Dios waláz chee benne' baxache',  
ne guzé chache' da zaj xu'u lu na' benne' xache' ca'.

<sup>13</sup> Da líqueze benne' xrlátaje ca' xelúe lá'ang' Lau' Lue',  
na' benne' li lazre' ca' xelezúe' naga zu' Lue'.

## 141

<sup>1</sup> Xrana' Dios, dxuláwizra' Lue'.

Gudázega gácalenu' neda'.

Bene chi'a gate nnia' Lue'.

<sup>2</sup> Ben la' da dxenaba' lau Lue' ca zren xala.

Ble'e na'a da dxechisa' lau' ca tu béadau' dxútia'-ba' lau'.

<sup>3</sup> Xrana' Dios, bxue dxu'a nigá,

ne bxue xide dxu'a chee quebe nnia' tu da calela.

<sup>4</sup> Quebe gu'u lataj gaca lazra' guna' tu da calela,

ne chee quebe guna' tu da calela tu zren nen benne' ca'  
dxelune' da zrinnaj,

ne chee quebe gágulena' benne' ca' dxelune' da calela  
lu laní chee'.

<sup>5</sup> Che gudé benne' xrlátaje neda' lu da ba xa', gaca na chia'  
tu da chawe',

na' che til-le' neda', gaca na chia' ca tu da dxelále'e zixre  
da dxegu'e xíchaja'.

Tu nábazqueza' Dios guzague' da calela da dxelún benne' ca'  
dxelune' da calela.

<sup>6</sup> Gate xeledxú'ung' benne' xíchaje ca' chee benne'

wen da calela ca' zran xi'a xiaj ca',

na' xeleque be'e bénneache naca li ca da gunnía'.

<sup>7</sup> Xelase dinnaj zrita chee benne' ca' dxu'a xedxu ba chee' ca'.

Xelaca na ca bhecu xu, da dxelase dinnaj na naga  
dxa'ana bezre.

<sup>8</sup> Chee le' na' dxenná'a naga zu' Lue', Xrana' Dios.

Dxuxrén lazra' Lue', quebe gusán lazru' neda'.

<sup>9</sup> Bxue neda' chee quebe xelél-la xralaj ca' chee benne' ca'

dxelune' da calela neda',

ne chee quebe cheajcházia' lu da zaj nabeque' benne'

wen da calela ca'.

<sup>10</sup> Ben cheajlechaze benne' ca' dxelune' da calela lu xralaj

da zaj nabéchequeze'

dxácaté na' tea' neda' ga na' zri'a chawe'.

## 142

<sup>1</sup> Zizraj dxuláwizra' Xránadxu Dios.

Du lazra' dxenaba' Xránadxu xexache lazre' neda'.

<sup>2</sup> Lau Le' dxawa' zría ca da dxaca chia'.

Lau Le' dxulé'eda' ca da stébe zua' neda'.

<sup>3</sup> Gate zua lázrdawa' lu da stébe, Lue', Xran, nézenu'  
da dxaca chia'.

La neza naga dxedá' gulebeque' xralaj da que'l-la na neda'.

<sup>4</sup> Dxenná'a cuita' xabéla, san quebe nu chilá' gácalé neda'.

Quebe nu chilá', benne' guxúequeze' neda'.

Quebe nu chilá', benne' dxe' gunna xue' chia' neda'.

<sup>5</sup> Dxuláwizra' Lue', Xrana' Dios, dxennia':  
Dxebeza lazra' tuzu' Lue'.

Tuzu' Lue' dxezá lazra' lu xęzr la xu nigá.

<sup>6</sup> Bene da dxuláwizra' Lue', lawe' da dxezaca zí'le'a.

Bselá neda' lu na' benne' ca' dxeláu zi' xuzre' neda',

lawe' da zaj naque' wál-ladxa ca neda'.

<sup>7</sup> Bebéaj neda' lu da dxaca chia', cheę gaca güe lá'ana' Lue'.

Benne' xrlátaje ca' xelęchaje' neda' lawe' da gunu' gaca chawe' chia'.

## 143

<sup>1</sup> Xrana' Dios, bene da dxuchálaja' lau Lue'.

Bzę naga da dxenaba' lau'.

Gudá gácalęnu' neda' lawe' da nacu' li lazre', ne xrlátaje.

<sup>2</sup> Quebe guchi'u chia' neda', węn zrin chiu',

ca naca da nabaga',

lawe' da lau' Lue' quebe nu chilá' benne' naque' du lazre'.

<sup>3</sup> Gúcalę neda' lawe' da dxeláu zi' xuzre' neda'.

Xeláteze bache xelútię' neda'.

Ba beluņę' naca' ca tu benne' dxedé' lu da chul-la

ca naca cheę benne' gate ca'.

<sup>4</sup> Zua lázrdawa' lu da stébele'e, ne dxewí'ine lázrele'a.

<sup>5</sup> Dxeajsá lazra' ca guca nédxudaute.

Dxulaba lazra' ca naca xúgute da bęnu'.

Dxeajsá lazra' ca naca da zrentę ca' da bęnu'.

<sup>6</sup> Dxechisa na'a lau Lue'.

Naca' ca tu xęzr la xu bizre, dxebíleda' Lué'queze.

<sup>7</sup> Gudázega gácalęnu' neda', Xran, lawe' da dxedú lazra'.

Quebe chenu' gácalęnu' neda', cheę quebe gaca' ca tu benne'

ba xu'e xędxu ba.

<sup>8</sup> Che zilala bęn cheajsá lazra' dxexache lazru' bęnneache

chiu' ca'

lawe' da dxuxrén lázrequeza' Lue'.

Bzėjni'i neda' ca dxal-la' guna'

lawe' da dxezá lazra' guna' da dxaca lazru' Lue'.

<sup>9</sup> Xrana' Dios, bselá neda' lu na' benne' ca' dxeledábaguę'

neda'

lawe' da dxuzúa cuina' lu na'u cheę guxúequezu' neda'.

<sup>10</sup> Bsede neda' cheę guna' da dxaca lazru' Lue',

lawe' da nacu' Lue' Dios chia'.

Gusel-la Be' xrlátaje chiu' cheę che'e neda' la neza chawe' chiu'.

<sup>11</sup> Cheę gaca bea na nacu' xrlátaje, Xran, gutipu' lazra'.

Lawe' da nacu' xrlátaje, guseláu' neda' lu da dxaca chia'.

<sup>12</sup> Lawe' da nacu' li lazre', guzría xi'u benne' ca'

dxeledábaguę' neda',

ne guzría xi'u xúgute benne' ca' dxelaca lazre'

xuluzría xi'e neda',

lawe' da naca' neda' węn zrin chiu'.

## 144

<sup>1</sup> ĴGaca ba lá'azxa Xránadxu Dios,

Bęnnea' dxuzé chache' neda'!

Naque' Bęnnea' dxuzázraje' na'a cheę cha'a lu wedil-la,

ne dxuzázraje' zrube na'a cheę séqueda' til-laęna' benne' ca'

dxelunę' da calęla.

<sup>2</sup> Naque' Benne' dxexache lazre' neda',

ne naque' ca tu xu'u naga zę chawa'.

Dxuzúa chache' neda', ne dxuselé' neda'.

Dxucu'uje' neda', na' dxuxrén lazra' Le'.

Dxunę' dxuluzúa bęnneache chia' dizra' chia'.

<sup>3</sup> Xrana' Dios, ĳájazra naca nu benne', dxeajsá lazru' le'?

ĳÁjazra naca nu benne' dxe'u gunne xue cheę'?

<sup>4</sup> Naca benne' ca tu da níteze.

Zaj naca zra chee' ca tu zrul-la da dxedeze.

<sup>5</sup> Xrana' Dios, gusalaj zran xabáa, ne betaj gácalenu' neda'.  
Bta xi'a ca', na' dxuaj zren chee xi'.

<sup>6</sup> Bzalaj xesa guziu', ne blaga benne' ca' dxelene' da calela.  
Bzalaj xaga nalá xéche'ze chiu', ne bzria xi' le'.

<sup>7</sup> Naga zu' na'la, bze na'u, ne bselá neda' lu da stébele'e zua'.  
Bselá neda' lu na' benne' zitu' ca',

<sup>8</sup> benne' ca' tu dxelennézqueze' da wen lazre',  
ne dxuluzétaje' Dios gate dxelezí xe'e.

<sup>9</sup> Dios, gúl-laqueza' chiu' da cube, quínnia' da dxúl-lalena'.

Nen tu da dxínnia' da nua chi du chee na gúl-laqueza' chiu'.

<sup>10</sup> Nacu' Lue' Bénnea' dxune' dxeledxúaj chawe'  
benne' wenná bea ca'.

Dxuseláu' David, wen zrin chiu', lu xia nalá chee  
benne' wen da calela ca'.

<sup>11</sup> Bexa'u neda', ne bselá neda' lu na' benne' zitu' ca',  
benne' ca' tu dxelennézqueze' da wen lazre',  
na' dxuluzétaje' Dios gate dxelezí xe'e.

<sup>12</sup> Ben xelegula bi biu cheentu' ca tu xaga da dxegula chawe',  
ne zaj nácabe' bi cuide'.

Ben xelaca bi nu'ula cheentu' ca bd'u xiaj xrtante' ca'  
da zaj nnita tu lu xu'u zren.

<sup>13</sup> Ben chaté lízrentu' xúgute' cuen lina cheentu'.

Ben xelánle'e be xixre' cheentu', chee xelácaba'  
gaxúa gaxúane be xixre' du ca' lu xezr la xu cheentu'.

<sup>14</sup> Ben xelaca beze cheentu' be wal-la chee xelunba' zrin.

Ben quebe xelexanba' gate quebe ne zrin cha beu' cheeba' ca'.

Ben quebe nu cha' cuezre xache' la neza cheentu'.

<sup>15</sup> Ba neza zrente' naca na chee bénneache ca' dxaca caní chee'.

Ba neza zrente' naca na chee bénneache ca'  
naca Xránadxu Dios chee'.

## 145

<sup>1</sup> ¡Gucá'ana szrena' Lue', Dios chia', ne Wenná Bea chia'!

¡Tu güe lá'anazqueza' Lau' Lue' chadía chacanna!

<sup>2</sup> ¡Tu zra tu zra güe lá'ana' Lue'!

¡Tu güe lá'anazqueza' Lau' Lue' chadía chacanna!

<sup>3</sup> ¡Szrente' naca Xránadxu Dios, ne naca chee'

tu güe lá'anazquezdxu Le'!

¡Québequeze séquedxu gúnbeadxu ca szrente' naque'!

<sup>4</sup> Xúgute' cuen bénneache chiu' xelúe lá'ane' da beñu' Lue',  
ne xuluzenne' benne' xezr la xu ca' ca naca da zrente' da beñu'.

<sup>5</sup> Gulaba lazra' ca naca da xrtante' chee da xabáa chee  
xel-la' szren chiu', ne ca naca da zrente' da nunu'.

<sup>6</sup> Xúgute' bénneache xuluchálaje' ca naca xel-la' waca chee  
da zrente' da nunu',

na' neda' guzenda' le' ca naca xel-la' szren chiu'.

<sup>7</sup> Xuluzenne' le sa' ljwezre' ca naca xel-la' zri'i lazre' zren  
chiu',

ne tu xelúl-lazqueze' chee da xrlátaje da nacu' Lue'.

<sup>8</sup> Xránadxu Dios naque' zri'i lazre', ne dxexache lazre'  
bénneache chee'.

Dxezrene', ne quebe dxezrá'aze', na' dxexache lázrele'e dxi'.

<sup>9</sup> Dxun Xránadxu Dios da chawe' chee xúgute' bénneache,  
ne dxexache lazre' xúgute' da zaj naca ban da nune'.

<sup>10</sup> Xúgute' da ca' nunu' xelúe lá'ana na Lue', Xran,  
na' bénneache chiu' xulucá'ana szreng' Lue'.

<sup>11</sup> Dxelenné' ca szrente' naca xel-la' dxenná bea chiu'.

Dxuluchálaje' ca naca xel-la' waca zrente' chiu',

12 cheę xuluzenne' xúgute bėnneache ca naca da zrente ca'  
da nunu',  
ne ca naca da xabáa cheę xel-la' szren cheę xel-la' dxenná bea  
chiu'.

13 Xel-la' dxenná bea chiu' tu súazqueze na,  
ne nna be'enu' xúgute cuen bėnneache.

14 Nuxru Xránadxu Dios xúgute benne' ca' dxeajlecházie',  
ne dxechise' xúgute benne' ca' zaj nada'u lu zrin wal-la.

15 Xúgute bėnneache dxelenné'e Lue' cheę gácalenu' le',  
na' Lue' gunézruju' da xelawe' ca zrin zra cheę na.

16 Dxuzé na'u, ne dxunézruju' ca naca da chawe'  
da dxelexárje xúgute da zaj naca ban.

17 Xlátaje naca Xránadxu Dios lu xúgute da dxune',  
ne dxexache lazre' xúgute da zaj naca ban da nun Le'.

18 Xránadxu Dios zúatequeze' gácalene' xúgute benne' ca'  
dxululáwizre' Le',

xúgute benne' ca' du lazre' dxululáwizre' Le'.

19 Gune' ca dxelezá lazre' benne' ca' dxelezrebe' Le'.

Cá'anqueze xenne' cheę gate xululáwizre' Le', ne guselé'  
benne' ca'.

20 Xránadxu Dios dxuxúequeze' xúgute benne' ca'  
zaj nazrí'ine' Le',

san guzría xi'e xúgute benne' ca' dxelebéaj xíchaje' Le'.

21 Du lazra' güe lá'ana' Xránadxu Dios.

Xúgute benne' dxal-la' tu xelúe lá'anazqueze' Le' lá'azxa  
chadía chacanna.

## 146

1 ¡Gaca ba lá'azxa Xránadxu Dios!

¡Du lazra' güe lá'ana' Xránadxu Dios!

2 ¡Dxácate naca bana' güe lá'ana' Xránadxu Dios!

¡Tu gúl-lazqueza' da güe lá'ana' Xránadxu Dios dxácate  
naca bana'!

3 Quebe guxrén lázrele benne' dxelenná bea,  
ne quegá bėnneache lawe' da quebe xelezéquene'  
xuluselé' le'e.

4 Dxeledxúaj be' zaj xu'e, na' xelelexaque' xu xrte.  
Lu zra ná'queze xelenite da dxuluwía lazre' xelune'.

5 Ba neza zrente naca na cheę bėnnea', dxácale Dios cheę  
Jacob le'.

bėnnea' dxebeza lazre' Xránadxu Dios.

6 Dios na' bene' xabáa, ne xęzr la xu, ne nísadau',  
ne xúgute da zaj zra' lataj ca'.

Naque' Bėnnea' tu dxúnzqueze' da li lazre'.

7 Dxuchi'e cheę benne' baxache' ca',

ne dxugawe' benne' ca' dxeledune'.

Xránadxu Dios dxuselé' benne' ca' zaj nada'u lu na'  
benne' ca'.

8 Xránadxu Dios dxexune' xiaj lau benne' la chul-la ca'.

Xránadxu Dios dxechise' benne' ca' dxeajlecházie'.

Xránadxu Dios nazrí'ine' benne' xrlátaje ca'.

9 Xránadxu Dios dxuxúe' benne' zitu' ca'.

Nuxre' bidau' wezebe ca', ne nu'ula tuze ca',

na' dxuchínnaje' da dxelún benne' ca' dxelune' da calela.

10 Tu nna béazqueze Xránadxu Dios.

Le'e, benne' xęzre Sión, nna be'e Dios cheęle

ne xúgute cuen zri'ine zre súale.

¡Gaca ba lá'azxa Xránadxu Dios!

## 147

- 1 Le güe lá'ana Xránadxu Dios lawe' da naca chawe' gúl-ladxu da güe lá'anadxu Dios cheedxu, lawe' da xrtante naca güe lá'anadxu Le'!
- 2 Xránadxu Dios xexune' xezre Jerusalén. Xequé'e benne' Israel ca' zaj zue' xezr la xu zitu' ca'.
- 3 Dxexune' benne' ca' dxelexewí'ine lázrele'e, ne dxudé'e ladxe' naga zaj naca we' chee benne' ca'.
- 4 Nézquezne' ca' zaj naxán belaj ca'!
- 5 Tu tu belaj ca' dxu'e la na!
- 6 Szrenté naca Xránadxu Dios, ne nape' duté xel-la' waca! jQuebe bi de da quebe dxéajini'ine'!
- 7 Xránadxu Dios dxácalene' benne' dxexruj lazre' ca', na' dxuzéxruje' benne' ca' dxelune' da calela.
- 8 Le gul-la da güe lá'anale Xránadxu Dios! jLe gul-la, ne le quinne da cun zriadi'i na du lau Dios cheedxu!
- 9 Le' dxudé'e beuj ca' zran xabáa!
- 10 Le' dxesel-le' nisa xiuj lu xezr la xu!
- 11 Le' dxune' dxelezria xixre'du ca' lu xi'a ca'!
- 12 Le' dxunézruje' da dxelagu be' xixre' ca'!
- 13 Dxunézruje' da dxelagu béchajdu ca', be' dxelebezre xa'aba'!
- 14 Da dxezaca ba lázrele' quebe naca na xel-la' wal-la chee bzrina' ca', ne quegá xel-la' wal-la chee bénneache.
- 15 Dxezaca ba lázrele' benne' ca' dxelezrebe' Le', ne benne' ca' dxelebeza lazre' Le' chee xexache lazre' le'.
- 16 Le güe lá'ana Xránadxu Dios, le'e zrle xezre Jerusalén!
- 17 Le güe lá'ana Dios cheele, le'e zrle xezre Sión!
- 18 Le' dxuzúa chúchue' dxa xu'u chee xezre cheele!
- 19 Dxune' dxaca chawe' chee benne' ca' zaj zre'e xezre cheele!
- 20 Dxebeque' xel-la' dxebeza zri lazre' lu xezr la xu cheele!
- 21 Gúnnale' cheele zrua' chawe'!
- 22 Dxusel-le' xrtizre' chee benne' ca' zaj zre'e duté xezr la xu, na' chadí dxaca ca da dxenné'!
- 23 Dxugacue' xezr la xu bezxe' da naca na ca zri-la'!
- 24 Dxuzéxruje' xrlé'ela dxela ca de!
- 25 Dxune' dxelexruj xiaj bezxe' ca weaj xíajdu ca'!
- 26 Nu benne' gaca guchaga lawe' da zaga chee na?
- 27 Dxenná be'e, na' dxexuna na!
- 28 Dxune' dxaca be', na' dxexaca bezxe' na' nisa guba'u!
- 29 Bzéajini'ine' Jacob ca naca xrtizre', ne bde' xrba chee', ne da ca' gunná be'e lu na' benne' Israel ca'!
- 30 Quebe ne gune' caní chee xezr la xu xezícadxa ca', na' benne' xezr la xu ca' quebe dxelexúnbe'e xrba chee'.
- 31 Gaca ba lá'azxa Xránadxu Dios!

## 148

- 1 Le güe lá'ana Xránadxu Dios!
- 2 Le güe lá'ana Xránadxu, le'e, zrle xabáa!
- 3 Le güe lá'ana Le', le'e, zrle dxala!
- 4 Le güe lá'ana Le', le'e, gubáz chee xabáa chee' ca'!
- 5 Le güe lá'ana Le', le'e, benne' zante chee'!
- 6 Le güe lá'ana Le', le'e, gubizra, ne beu'!
- 7 Le güe lá'ana Le', le'e, belaj dxusenile'!
- 8 Le güe lá'ana Le', le'e, xabáa ca', ne le'e, nisa zrle lówela xabáa!
- 9 Le güe lá'ana La Xránadxu, lawe' da gunná bé'ene', na' guzúale!
- 10 Be'ne' súale tu chí'ize, ne chadí chacanna!



¡Bzue' chee!e tu da bdxixruj be'e da quebe te chee na!  
 7 ¡Le güe lá'ana Xránadxu lu xezr la xu,  
 le'e, bea zri'a zrале lu nísadau', ne xúgute nisa situj,  
 8 ne le'e, xesa guziu', ne xiaj xiuj, ne bezxe', ne beuj ca',  
 ne le'e, be' bdunu' ca', dxunle ca gunná be'e!  
 9 ¡Le güe lá'ana Le', le'e, xí'adu ca', ne xi'a zri'a ca',  
 ne le'e, xaga zixre ca', ne xaga cedro ca',  
 10 ne le'e, be' xixre' ca', ne bea ca' dxuluxúe bénneache,  
 ne le'e, be' snia ca', ne be' zaj zua xrila!  
 11 ¡Le güe lá'ana Le', le'e, benne' wenná bea ca', ne xúgute  
 bénneache,  
 ne le'e, benne' dxeleenná be'e, ne benne' dxuluchi'e,  
 12 ne le'e, benne' wegu' ca', ne nú'uladu ca',  
 ne le'e, benne' gula ca', ne bidu ca'!  
 13 ¡Le güe lá'ana La Xránadxu!  
 ¡Szréntēdxa naca La Le' ca xúgute la bénneache!  
 ¡Da xabáa chee' dxulé'e lau na lu xezr la xu, ne xabáa!  
 14 ¡Le' nune' xezr chee' xezre wal-la!  
 ¡Le güe lá'ana Le', le'e, bénneache chee',  
 nácale zri'ine zre sua Israel!  
 ¡Nácale benne' nazri'i Le'!

¡Le güe lá'ana Xránadxu!

## 149

1 ¡Le güe lá'ana Xránadxu Dios!  
 ¡Le gul-la chee' Xránadxu tu da cube!  
 ¡Le güe lá'ana Le' naga zaj nazraga bénneache chee'!  
 2 ¡Le be, le'e, benne' Israel, lau Bénnea' bēne' le'e!  
 ¡Le sua xel-la' dxebé, le'e, zrале Sion, lau Bénnea' naque'  
 Wenná Bea chee!  
 3 ¡Le güe lá'ana La Xránadxu, ne guxa'ale!  
 ¡Le guchunchu xide ca', ne le quinne  
 da cun zriadi'i na du ca', dxue lá'anale Le'!  
 4 ¡Xránadxu Dios dxezaca ba lázrele' bénneache chee'!  
 ¡Dxape' ba lá'ana benne' dxexruj lazre' ca', ne dxuselé' le'!  
 5 Dxa-la' xelebéqueze bénneache chee' lu da xabáa chee',  
 ne xelú-le' dutē xel-la' dxelebé du xela.  
 6 Dxa-la' xelebezre xē'e, xelúe lá'ane' Dios,  
 zaj nu'e xia da zaj nalá dxupa la'ate,  
 7 chee' xelebéaj lazre' benne' xezr la xu ca',  
 ne xuludé' xel-la' zi' benne' xezre ca',  
 8 ne xuluchéaj' benne' wenná bea chee' ca' du xia,  
 ne benne' dxeleenná be'e nen du xia,  
 9 ne xuluzría xi'e benne' ca' ca ba nun Dios gaca chee'.  
 Da nigá gaca na da xabáa chee' bénneache chee' Dios.

¡Le güe lá'ana Xránadxu!

## 150

1 ¡Le güe lá'ana Xránadxu Dios!  
 ¡Le güe lá'ana Xránadxu lu xudau' chee'!  
 ¡Le güe lá'ana xel-la' waca chee' lu xabáa chee'!  
 2 ¡Le güe lá'ana Le' ca zaj naca da zren da nune'!  
 ¡Le güe lá'ana Le' ca naca xel-la' szren chee'!  
 3 ¡Le güe lá'ana Le', gucuézrele luzu ca' da dxulucuezre'!  
 ¡Le güe lá'ana Le', quínnele da cun zriadi'i na du,  
 ne da ca' dxínnele!  
 4 ¡Le güe lá'ana Le', guchúnhule xide, ne guxa'ale!  
 ¡Le güe lá'ana Le', quínnele da cun zriadi'i na du,  
 ne gucuézrele bchiuj!  
 5 ¡Le güe lá'ana Le', gutíl-lale xiadu ca'!

¡Le güe lá'ana Le', gutíl-lale xia zren ca'!

<sup>6</sup> ¡Le güe lá'ana Xránadxu, xúgutele naca banle!

¡Le güe lá'ana Xránadxu Dios!

## DIZRA' CHAWE' CA NACA CHEE JESUCRISTO DA BZUAJ SAN MATEO

*La benne' ca' gulaque' xra gula chee Cristo*

*(Lc. 3.23-38)*

<sup>1</sup> Da caní zaj naca na la chee benne' zaj naque' xra wdé chee Jesucristo. Jesús nigá nababe' zri'ine zre sua David, ne zri'ine zre sua Abraham.

<sup>2</sup> Abraham nigá guque' xra Isaac.

Isaac nigá guque' xra Jacob.

Jacob nigá guque' xra Judá, ne benne' biche' ca'.

<sup>3</sup> Judá nigá guque' xra Fares, ne Zara, na' Tamar guque' xrna Fares, ne Zara caní.

Fares nigá guque' xra Esrom.

Esrom nigá guque' xra Aram.

<sup>4</sup> Aram nigá guque' xra Aminadab.

Aminadab nigá guque' xra Naasón.

Naasón nigá guque' xra Salmón.

<sup>5</sup> Salmón nigá guque' xra Booz, na' Rahab guque' xrna Booz nigá.

Booz nigá guque' xra Obed, na' Rut guque' xrna Obed nigá.

Obed nigá guque' xra Isái.

<sup>6</sup> Isái nigá guque' xra David, benne' wenna' bea.

Wenna' bea David nigá, ne nu'ula na' nédxute' guque' zru'ula Uriás gulaque' xra xrna Salomón.

<sup>7</sup> Salomón nigá guque' xra Roboam.

Roboam nigá guque' xra Abías.

Abías nigá guque' xra Asa.

<sup>8</sup> Asa nigá guque' xra Josafat.

Josafat nigá guque' xra Joram.

Joram nigá guque' xra Uzías.

<sup>9</sup> Uzías nigá guque' xra Jotam.

Jotam nigá guque' xra Acaz.

Acaz nigá guque' xra Ezequías.

<sup>10</sup> Ezequías nigá guque' xra Manasés.

Manasés nigá guque' xra Amón

Amón nigá guque' xra Josías.

<sup>11</sup> Josías nigá guque' xra Jecónías ne benne' biche' ca' ca lu zra ca' gate benne' Babilonia guleché'e benne' Israel ca' lu xezr la xu Babilonia.

<sup>12</sup> Jecónías nigá guque' xra Salatiel.

Salatiel nigá guque' xra Zorobabel.

<sup>13</sup> Zorobabel nigá guque' xra Abiud.

Abiud nigá guque' xra Eliaquim.

Eliaquim nigá guque' xra Azor.

<sup>14</sup> Azor nigá guque' xra Sadoc.

Sadoc nigá guque' xra Aquim.

Aquim nigá guque' xra Eliud.

<sup>15</sup> Eliud nigá guque' xra Eleazar.

Eleazar nigá guque' xra Matán.

Matán nigá guque' xra xetú benne' le' Jacob.

<sup>16</sup> Jacob nigá guque' xra José, benne' chee María, xrna Jesús, Bénnea' naque' Cristo.

<sup>17</sup> Caní naca, gulaca chidá' cue' bénneache gate guzú lau zua Abraham, ca bzrinte zra zua David, na' gulaca xechidá' cue' bénneache ca' gate guzú lau zua David, ca bzrinte zra gate na' benne' Babilonia ca' guleché'e benne' Israel ca' lu xezr la xu chee', na' gulaca xechidá' cue' bénneache ca' gate guzú lau zra na', ca bzrinte zra gulaj Cristo.

*Ca guca gate gulaj Cristo*

*(Lc. 2.1-7)*

<sup>18</sup> Caní guca gate na' gulaj Jesucristo. María, xrna Jesús ba nachébebe' gácabe' zru'ula José. Nédxula ca za xelenite', nu'ula nigá ba zue' zi'i ne chee xel-la' waca chee Be' Lá'azxa chee Dios. <sup>19</sup> José, benne' chee María nigá, naque' benne' xrlátaje. Quebe guca lazre' gulé'ene' ca ba naca chee María lau benne' xezre ca'. Guca lazre' gusané' le' bagácheze. <sup>20</sup> Dxácate

dxudé lazre' da nigá, ble'e lau tu gubáz chee xabáa, gubáz chee Xránadxu, ga zua José na' lu bchigala, na' guzre' le':

—José, zri'ine zre sua David, quebe zrebu' si' lu na'u María chee gácabe' zru'ulu', lawe' da bidu biu na' sanbe' zabe' ne chee Be' Lá'azxa chee Dios. <sup>21</sup> Zrú'ulu' gúxrube' tu bidu biu cheebe', na' lue' gu'u labe' Jesús. Caní gu'u labe' lawe' da guselabe' bènneache lu dul-la da zaj nabague'.

<sup>22</sup> Xúgute' da caní gulaca ca' chee guca ca da gunná Xránadxu lu dxu'a benne' ca' buluchálaje' waláz chee'. <sup>23</sup> Caní gunné':

Tu nú'uladau' gúadaube' sanbe' tu bidu biu cheebe',  
na' xelu'e labe' Emanuel.

Emanuel zéaje na: Dios zúalenge' dxi'u.

<sup>24</sup> Ca bebán José, na' bene' cáteze gunná gubáz chee Xránadxu, na' guzí' lu ne'e María chee gácabe' zru'ule'. <sup>25</sup> Quebe gulaque' tuze ca gusandxa María bidu biu nedxu cheebe', na' buluzúe' labe' Jesús.

## 2

### *Dxeleznín benne' sina ca' lu xezre Jerusalén*

<sup>1</sup> Bidau' Jesús gúlajbe' lu xezre Belén da nababa xezr la xu Judea gate dxenná bea benne' le' Herodes ga na'. Nadxa beleznín benne' ca' lu xezre Jerusalén, benne' zá'aque' chalá'a naga dxalaj gubizra, zaj naque' benne' sina gula. <sup>2</sup> Na' gulenabe':

—¿Ga zua bidu na' ba gúlajbe' chee gácabe' benne' nna bé'enge' benne' judío ca'? Gate zuantu' chalá'a naga dxalaj gubizra blé'entu' belaj cheebe', na' bla'ntu' nigá chee gúe lá'ana gúe szrentu'-be'.

<sup>3</sup> Ca guneze Herodes, benne' wenná bea, da nigá, na' guzúe' stebe, ne cá'anqueze guca chee xúgute' benne' zaj zre'e Jerusalén. <sup>4</sup> Nadxa Herodes, wenná bea na', btupe' xúgute' benne' xíchaje chee bxruze ca', ne benne' dxuluxuzájle'e da nadxixruj bea Dios, na' gunábene' benne' ca':

—¿Gazra na' galaj Cristo?

<sup>5</sup> Benne' caní gulé'e le':

—Lu xezre Belén da nababa xezr la xu Judea, lawe' da bzuaj caní tu benne' bchálaje' waláz chee Dios, gate na' gunné':

<sup>6</sup> Lue', Belén chee xezre ca' zaj nababa na Judá, nacu' lue' xezre da quebe naca na da bzébedxa

ládujla benne' ca' dxelenná be'enge' xezr la xu Judá nigá, lawe' da ládujla bènneache chiu' dxuaj tu benne' nna be'e, na' guxúequeze' bènneache chia', benne' Israel.

<sup>7</sup> Nadxa Herodes, wenná bea na', bláwizre' bagácheze benne' sina gula ca', na' gunábene' le' bátala ble'e lau belaj na' belelé'enge'. <sup>8</sup> Nadxa gusel-le' benne' ca' chjaque' xezre Belén, ne guzre' le':

—Le chjaca na', ne le naba xanne' chee bidu na', na' ca cheajxrácale-be', na' le guzén neda' chee cha'a neda' gúe lá'ana gúe szrena'-be'.

<sup>9</sup> Ca bexuzre belén benne' sina gula ca da gunná Herodes, wenná bea, nadxa besí'aque', na' belaj da belelé'enge' gate zaj zre'e chalá'a naga dxalaj gubizra zeaj na lau le', na' bzrinte' na, ne guzúa na naga zua bidu na'. <sup>10</sup> Gate benne' sina gula ca' belelé'enge' belaj na', nadxa gulebé'enge'. <sup>11</sup> Ca gulu'e lu xu'u, belelé'enge' bidu na', ne xrnabe' María. Nadxa buluzú zribé' dxelúe lá'ana dxelúe szrene' bidu na'. Nadxa gulesálaje' xua chee' ca', ne bulunézruje'-be' oro, ne xalaj zixre, ne mirra da naca na zichaj. <sup>12</sup> Ca gudé na', Dios guzre' benne' ca' lu bchigala québedxa xelexedé' naga zua Herodes. Chee le' na belexequé'e neza xula, belexezrine' lazrie'.

### *Ca guca beleché'e Jesús lu xezr la xu Egipto*

<sup>13</sup> Ca gudé besí'aca benne' sina gula ca', nadxa tu gubáz chee xabáa, gubáz chee Xránadxu ble'e lawe' José lu bchigala, na' guzre' le':

—Guxasa. Becá'a bidu na', ne xrnabe', na' le chjaca lu xezr la xu Egipto, na' xegá'anu' ga na' ca zrindxa zra xapa' lue' xetú. Caní dxal-la' gunu' lawe' da wexilaj Herodes bidu nigá chee gutie'-be'.

<sup>14</sup> Nadxa José guxase', na' chizrélala beche'e bidu na', ne xrnabe', na' bexu'e-be' lu xezr la xu Egipto. <sup>15</sup> Gulezre'e na' ca bzrindxa zra gute Herodes. Caní guca ca naca da gunná Xránadxu lu dxu'a benne' bchálaje' waláz chee', gunné': “Xuláwizra' bi biu chia' chee xedxúajbe' lu xezr la xu Egipto.”

*Dxenná be'e Herodes benne' ca' xelútie' bidu biu ca'*

<sup>16</sup> Gate gúquebe'e Herodes gulezí xē benne' sina ca' lē', na' bzrá'ale'e, ne gunná bé'ene' benne' ca' xelútiē' xúgute bi biu dxé'enedau', ca zrintē bidu ca' ba zaj zua chup iza, bidu ca' zaj zrabe' xezre Belén, ne bidu ca' zaj zrabe' lu xézredu ca' zaj naxechaj na xezre Belén na'. Caní ben Herodes cáteze buluzén benne' sina gula ca' lē' ca naca zra na' belelé'ene' belaj na'. <sup>17</sup> Ca'an guca ca da bzuaj Jeremías, bénnea' bchálaje' waláz cheē Dios ba guca zan' iza, gunné':

<sup>18</sup> Guca tu schaga lu xezre Ramá.

Guca webezre, ne gulebezre xache'.

Raquel na' dxebézrele'e cheē bi cheē' ca'.

Québequeze dxaca lazre' xexaca zrene'

lawe' da ba gulate bi cheē' ca'.

<sup>19</sup> Ca gudé gute Herodes, na' tu gubáz cheē xabáa, gubáz cheē Xránadxu ble'e lawe' José lu bchigala naga zue' Egípto, na' guzre' lē':

<sup>20</sup> —Guxásache. Beche'e bidu chiu' nigá, ne xrnabe'. Bexíaj lu xezr la xu Israel, lawe' da ba gulate benne' ca' gulaca lazre' xelútiē' bidu nigá.

<sup>21</sup> Nadxa guxasa José, na' beche'e bidu na', ne xrnabe', na' belexezrine' lu xezr la xu Israel.

<sup>22</sup> Ca gunzeze José dxenná bea Arquelao naga nababa Judea waláz cheē xre', Herodes na', na' bzrebe José xexíaje' ga na'. Nadxa bexíaje' naga nababa Galilea ca da ba guzre gubáz cheē xabáa lē' lu bchigala. <sup>23</sup> Ca bezrine' na', na' bexíaje' cheajxezúe' lu xezre Nazaret. Caní guca ca da gulenná benne' ca' buluchálaje' waláz cheē Dios, gulenné' Jesús nigá si lē' benne' Nazaret.

### 3

*Juan dxegu'e lban lē'e xixre' lawe' lataj*

(Mr. 1.1-8; Lc. 3.1-9, 15-17; Jn. 1.19-28)

<sup>1</sup> Ca lu zra ca' bla' Juan, bénnea' bchue' bénneache nisa, dxegu'e lban lē'e xixre' lawe' lataj naga nababa Judea. <sup>2</sup> Dxenné':

—Le xebí'i lazre' lawe' da ba zua gáguze zra nna bea Dios lu xezr la xu nigá.

<sup>3</sup> Juan nigá naque' bénnea' bchalaj Isaiás cheē'. Isaiás bchálaje' waláz cheē Dios gate bzuaje' caní:

Dxene chí'i benne' dxebezre xe'e lē'e xixre' lawe' lataj, dxenné':

Le gucá'ana chawe' neza naga te Xránadxu.

Le xulí neza lase ca' lau Lē' naga té'e'.

<sup>4</sup> Zra lana Juan nigá nune na xicha zra camello, ne bazxu dxu'a lē'e cheē' naca na xide, na' dxawe' biche xuj, ne bzrina'dau' cheē bézudau'. <sup>5</sup> Belezrín benne' belenne' ca da dxuchalaj Juan, benne' zá'aque' xezre Jerusalén, ne benne' cheē xúgute xezre ca' zaj nababa Judea, ne benne' zá'aque' xézredu ca' zaj nniata gáguze xegu Jordán. <sup>6</sup> Ca gulexruálepe' dul-la cheē', Juan nigá bchue' benne' ca' nisa lu xegu Jordán.

<sup>7</sup> Gate ble'e Juan benne' zan benne' xudau' fariseo, ne benne' xudau' saduceo zá'aque' cheē xelexedxúe' nisa, na' guzre' benne' ca':

—Le'e, be snia. ¿Zua nu guzre le'e guzrúnnaje da ba xa' da za'? <sup>8</sup> Le gun da xrlátaje da xelunna bea na ba bebí'i lázrele. <sup>9</sup> Quebe guéquele lale, dxennale le'eze: “Nalatu' lawe' da nácantu' xrtia Abraham.” Neda' dxapa' le'e: Dios waca xexune' xiaj caní zri'ine xrtia Abraham.

<sup>10</sup> Le'e nácale ca xaga ca'. Xia waga bache nalá na cheē chugu na xaga ca', na' xúgute xaga ca' quebe dxelebia na da zixre chawe' welechugue na, san Bénnea' ze'e ca te chia' neda', Le' gunē' ca da zéaje xel-la' dxedxú nisa, guzúe' le'e Dios Be' Lá'azxa, ne xi' cheē'.

Benne' nigá nácadxe' blau ca neda', na' quebe zaca' cuéajza' zrele' xu'u ni'e. <sup>12</sup> Cá'anqueze nácale ca zrúa' xtila. Benne' nigá ba nu'e da dxun be', cuéaje' xrte zrúa' xtila na', na' xebéaje' chalá'ala xizre cheē na, na' xuzrá chawe' zrúa' xtila na' lu da'a cheē na, san guzezxē' xizre na' lu xi' da quebe xexula na.

*Da guca gate gudxúa Jesús nisa*

(Mr. 1.9-11; Lc. 3.21-22)

<sup>13</sup> Nadxa Jesús bezé'e naga nababa Galilea, na' bezrine' dxu'a xegu Jordán naga zua Juan cheē guchúe' Lē' nisa. <sup>14</sup> Nédxute Juan quebe guca lazre', na' dx'e Jesús:

—Lue' dxal-la' guchú'u neda' nisa. Quebe zaca' neda' guchúa' Lue' nisa.

<sup>15</sup> Jesús guzre' le':

—Be' lataj gaca caní na'a. Dxun na ba xen gundxu xúgute da xrlátaje lau Dios.

Nadxa Juan beñe' ca'. <sup>16</sup> Gate bexuzre gudxúa Jesús nisa, na' la bxálaje' xabáa, na' ble'e Juan Be' Lá'azxa cheē Dios dxétaje' ca tu gugu chíchidau', zeajúsaba' lawe Jesús. <sup>17</sup> Nadxa ben tu chí'i lu be', gunné':

—Benne' nigá naque' Zrí'inequeza' nazrí'ite lazra'. Dxezaca ba lázrelena' Le'.

## 4

*Dxaca lazre' da xriwe' gun na baga Jesús zria*

(Mr. 1.12-13; Lc. 4.1-13)

<sup>1</sup> Nadxa Be' Lá'azxa chee Dios la guché'te' Jesús le'e xixre' lawe' lataj naga gúe lazre' da xriwe' gun zrêaje na Le'. <sup>2</sup> Quebe bi gudagu Jesús chua zra chua xęla, na' ca gudé na' gudunę'. <sup>3</sup> Nadxa da xriwe' bzrin na naga zua Jesús chee gun zrêaje na Le', na' dxę na Le':

—Che Lue' nacu' Zrí'ine Dios, gunná be'e xiaj caní xelexaca na xeta xtila.

<sup>4</sup> Jesús bechebe':

—Lu xiche chee Dios dxenné': "Quebe gaca ban nu benne' gawe' xétaze, san nen xúgute dizra' chee Dios gaca bane'."

<sup>5</sup> Nadxa da xriwe' guché na Jesús lu xęzre lá'azxa Jerusalén, na' bzua na Le' xíchajte xudau', <sup>6</sup> na' guzre na Le':

—Che Lue' nacu' Zrí'ine Dios, guxrite' nigá, lawe' da dxenná lu xiche chee Dios:

Dios nna bé'ene' gubáz chee xabáa chee' ca'

chee xelácalęne' Lue'.

Welexechise' Lue' nen ne'e

chee quebe gunu' zi' ni'u lu xiaj ca'.

<sup>7</sup> Na' gunná Jesús:

—Cá'anqueze dxenná lu xiche chee Dios, dxę'e bėnneache: "Quebe guchínenu' Xranu' Dios cáteze dxaca lazru'."

<sup>8</sup> Nadxa da xriwe' guché na Le' tu lu xi'a sibe, na' ble'e na Le' ca naca xúgute cue' xęzr la xu zaj nnita lu xęzr la xu, ne ca naca xel-la' guni'a chee na. <sup>9</sup> Na' gunná da xriwe', dxę na Le':

—Xúgute da caní gunna' chiu' che guzú zribu' gucá'ana szrenu' neda'.

<sup>10</sup> Nadxa Jesús guzre' na:

—Bexiaj, da xriwe', lawe' da dxenná Dios lu xiche chee', dxę'e bėnneache: "Bca'ana szren Xranu' Dios, ne be lá'ana tuze Le'."

<sup>11</sup> Nadxa da xriwe' becuasa na lau Jesús, na' belezrín gubáz chee xabáa chee Dios, ne bulunęzruje' da dxechine Jesús.

*Dxuzú lau Jesús dxuchálaje' xrtizra' Dios naga nababa Galilea*

(Mr. 1.14-15; Lc. 4.14-15)

<sup>12</sup> Gate ben Jesús xu'u Juan lizre xia, na' bezé'e zexíaje' naga nababa Galilea. <sup>13</sup> Quebe bga'ana Jesús xęzre Nazaret. Xeajsúe' lu xęzre Capernaum da zua na dxu'a nísadau' naga zaj zra' xrtia Zabulón, ne xrtia Neftalí. <sup>14</sup> Caní guca ca da bzuaj Isaiás, benne' bchálaje' waláz chee Dios, gunné':

<sup>15</sup> Lu xęzr la xu chee Zabulón, ne chee Neftalí,

naga zrua neza da zeaj na dxu'a nísadau',

chalá'a naga dxalaj gubizra xechalá'a xęgu Jordán.

Naga nababa Galilea,

naga zaj zra' benne' quebe zaj naque' judío.

<sup>16</sup> Bėnneache zaj zra' lu da chul-la belelé'ene' tu da dxusaníle'e na,

na' benne' zaj zra' naga xu'u zrul-la chee xel-la' gute

ba bsaní' tu xi' naga zaj zre'e.

<sup>17</sup> Ca lu zra na' guzú lau Jesús dxęgu'e lban, dxenné':

—Le xebí'i lázrele, lawe' da ba zua gáguze zra nna bea Dios lu xęzr la xu nigá.

*Jesús dxuláwizre' tapa benne' wezén bela*

(Mr. 1.16-20; Lc. 5.1-11)

<sup>18</sup> Gate na' zeaj Jesús dxu'a nísadau' ga nababa Galilea, na' blé'ene' chupa benne'. Tue' le' Simón, ne zua xetú le' Pedro, na' xetúe' le' Andrés, biche Simón na'. Benne' caní zaj naque' benne' wezén bela, na' dxuluzalę' xixruj bela chee' lu nisa. <sup>19</sup> Nadxa Jesús dxę'e benne' caní:

—Le gun neda' tuze, na' guna' le'e benne' gutúpale chia' bėnneache ca dxunle dxezenle bela.

<sup>20</sup> La bulucá'anate' xixruj chee' ca', na' zjácálęne' Jesús.

<sup>21</sup> Xelátędauze gusá'aque', na' ble'e Jesús xechupa benne'. Tue' le' Jacobo, ne xetúe' le' Juan, biche Jacobo nigá. Zaj naque' zri'ine Zebedeo, ne zaj xu'e tu lu da dxedá lawe' nísadau' nen xre', dxelexún chawe' xixruj chee'. Jesús bláwizre' le', <sup>22</sup> na' la bulucá'anate' da dxedá lawe' nísadau' na', ne xre', na' zjácálęne' Jesús.

*Jesús dxusédene' bénneache naga nababa Galilea**(Lc. 6.17-19)*

<sup>23</sup> Zeaj Jesús xúgute xezre zaj nababa Galilea, na' tu tu xezre ca' dxuzéajni'ine' bénneache lu xu'u ca' naga dxulucá'ana szren benne' judío ca' Dios. Na' dxegu'e lban ca nna bea Dios, ne dxexune' xúgute benne' ca' ca zaj naca xízrawe' cha chee'. <sup>24</sup> Ca'an guca, xúgute benne' chee xezr la xu Siría belenne' ca da dxun Jesús, na' belezrine' lau Jesús, zaj naché'e benne' we' ca', benne' zaj xu'e xízrawe', ne benne' zaj zue' lu xel-la' dxudía, ne benne' zaj xu'e be' xriwe', ne benne' zaj xu'e chuna', ne benne' zaj naxrú'unie' bine, na' bexún Jesús xúgute benne' caní. <sup>25</sup> Zjácale benne' zan Le', benne' zaj nababe' xezre ca' zaj nababa Galilea, ne benne' zá'aque' xezre Decápolis ca', ne benne' Jerusalén, ne benne' zaj nababe' xezre ca' zaj nababa Judea, ne benne' zá'aque' xechalá'ala xegu Jordán naga dxalaj gubizra.

**5***Lban da bchalaj Jesús tu lu xi'a*

<sup>1</sup> Gate ble'e Jesús xúgute benne' zan ca' zá'aque' naga zue', nadxa guluéne' tu lu xi'a, ne gudxé'e na'. Nadxa benne' ca' dxuséde Jesús beledube' cuité'. <sup>2</sup> Nadxa guzú lau Jesús dxusédene' benne' ca'.

*Nu benne' naca chee' tu da ba neza**(Lc. 6.20-23)*<sup>3</sup> Gunná Jesús:

—Da ba neza zrenté naca na chee' benne' ca' dxelexúnbe'e ca naca xel-la' dxexazrje chee' lau Dios. Benne' caní zaj naca chee' xelexú'e naga dxenná bea Dios xabáa.

<sup>4</sup> 'Da ba neza zrenté naca na chee' benne' ca' dxelelé'ele' zaj zue' lu da baxache' lawe' da zaj nabague' dul-la. Dios dxexúe zrene' benne' caní.

<sup>5</sup> 'Da ba neza zrenté naca na chee' benne' zaj naque' zren lazre'. Benne' caní xelezí'e chee' xezr la xu da nachébe lazre' Dios gunézruje' benne' caní.

<sup>6</sup> 'Da ba neza zrenté naca na chee' benne' du lazre' dxelaca lazre' xelune' da naca xrlátaje lau Dios. Dios gácale'ne' benne' caní.

<sup>7</sup> 'Da ba neza zrenté naca na chee' benne' dxelexexache lazre' benne' xula. Dios wexache lazre' benne' caní.

<sup>8</sup> 'Da ba neza zrenté naca na chee' benne' ca' zaj xu'u xichaj lázrdawe' da xrlátaje. Benne' caní welelé'eng' Dios.

<sup>9</sup> 'Da ba neza zrenté naca na chee' benne' dxelebeza zri lazre' nen bénneache. Dios guzú'e le' ca bi cheéqueze'.

<sup>10</sup> 'Da ba neza zrenté naca na chee' benne' dxeledé'e xel-la' zi' lu na' benne' ca' dxelune' chee' da caléla cate' dxelune' da xrlátaje. Benne' caní zaj naca chee' xelexú'e naga dxenná bea Dios xabáa.

<sup>11</sup> 'Da ba neza zrenté naca na chee' le'e chee' benne' dxelenné' schanni' chee'le, ne dxelune' chee'le da caléla, ne dxelenné' chee'le xúgute dizra' wen lazre' lawe' da nácale chia' neda'. <sup>12</sup> Le be, ne le xezaca ba lázrele lawe' da wazile tu da zrenté da gunna Dios le'e xabáa. Caní gaca na lawe' da cá'anqueze caní gulú zi' xuzre' benne' ca' buluchálaje' waláz chee' Dios, benne' ca' gulezré'e nédxudxa ca le'e.

*Nácale ca zede', ne ca tu xi' lu xezr la xu**(Mr. 9.50; Lc. 14.34-35)*<sup>13</sup> Na' gunná Jesús:

—Le'e nácale ca zede' chee' bénneache lu xezr la xu nigá. Che zede' nigá xenite xel-la' sna'a chee' na, zájazra gácalele bénneache ca'? Québedxa gaca guchínedxu zede' caní. ¡Chú'unadxu na, na' xululéaj bénneache le' na!

<sup>14</sup> 'Le'e nácale ca tu xi' chee' bénneache zaj zre'e xezr la xu. Tu xezre da zua na tu lu xi'a, quebe gáchequeze na. <sup>15</sup> Gate guzálajdxu tu xi', quebe gudúsedxu na. Guzúdxu na sibe naga gusení na chee' xelexú'e xúgute benne' zaj zre'e lu xu'u. <sup>16</sup> Ca'anqueze le gun le'e. Le güe lataj gusení xi' da nácale lau bénneache ca' chee' xelexú'e'eng' ca da xrlátaje da dxunle. Nadxa xelúe lá'ang' Xrale Dios zue' xabáa.

*Da bchalaj Jesús ca naca chee' da nadxiruj bea Dios*<sup>17</sup> Gunná Jesús:

—Quebe dxal-la' guéquele le'e za'a neda' chee' cua' ca naca da bdxiruj be'e Moisés, ne ca naca dizra' da buluchalaj benne' ca' buluchálaje' waláz chee' Dios. Quebe za'a chee' cua' na. Za'a chee' gulé'eda' cáteze zéajé na. <sup>18</sup> Da li dxapa' le'e. Dxácate zaj zua xabáa, ne xezr la xu nigá, quebe dúaqueze tu dizra', ne tu da da' lu da nadxiruj bea na nigá ca zrindxa zra gaca xúgute ca da dxal-la' gaca na. <sup>19</sup> Chee' le' na', che tu benne' guzú'e' chalá'ala bítetézla

da nigá da bdxixruj bea Dios, láqueze naca na tu da dauze, ne che guzéajini'ing' bèneache chee xelúnqueze' ca', benne' nigá xegá'ane' cá'aze naga dxenná bea Dios xabáa. Bénnea' guzúe' dizra' da nadxixruj bea nigá, ne gulé'eng' bèneache chee xelúnqueze' ca', benne' nigá wegá'anaqueze' ba lá'ana naga dxenná bea Dios xabáa. <sup>20</sup> Dxapa' le'e, che quebe gunle da nácadxa xrlátaje ca da dxelún benne' ca' dxuluxuzájl'e da nadxixruj bea Dios, ne ca da dxelún benne' xudau' fariseo ca', cabata' xexú'ule le'e naga dxenná bea Dios xabáa.

*Da bchalaj Jesús ca naca chee xel-la' dxezrá'a*  
(Lc. 12.57-59)

<sup>21</sup> Na' gunná Jesús:

—Le'e ba bénele ca gulenná xrtiale gula ca': "Quebe gútele benne'," na "Núteteze benne' guti'e benne' waxíaj'e chee cuía xi'e." <sup>22</sup> Neda' dxapa' le'e, núteteze benne' dxezré'e le sa' ljwezré' waxíaj'e chee cuía xi'e. Na' bènea' dxenné' schanni' chee le sa' ljwezré' waxíaj'e lau benne' chee xu'u lawe' blau, na' xuludé'e le' chee cuía xi'e. Bénnea' dxenné' chee le sa' ljwezré' tu dizra' sban, benne' nigá nácaqueze chee' chéaj'e lu lataj ba xa'.

<sup>23</sup> 'Che gu'u lu xudau' tu da gunézruju' lau Dios, ne na' cheaj'sá lazru' chee tu da nunu' chee le sa' ljwezru', <sup>24</sup> bca'ana da na' gunézruju' na', teca xexíaju' xegá'anuu' chawe' nen le sa' ljwezru'. Nadxa waca xexíaju' lu xudau' chee bi gunézruju' lau Dios.

<sup>25</sup> 'Che zua nu benne' dxebagu' chee', na' che'e lue' lau benne' guchi'e chiu', bexaca chawe' nen le' la neza na', chee quebe gudé'e lue' lau bènea' dxuchi'e da dxaca. Che quebe gunu' caní, nadxa benne' dxuchi'e da dxaca na' gudé'e lue' lu na' benne' dxusézxuj'e bènea' ca' lizre xia, na' xelegú'e lue' lizre xia na'. <sup>26</sup> Da li dxapa' lue'. Quebe xedxúaju' na' che quebe quízruju' xúgut'e da dxebagu' chee benne' na'.

*Da bchalaj Jesús ca naca chee benne' dxichaj'e xrba chee xel-la' nuchaga na'*

<sup>27</sup> Na' gunná Jesús:

—Le'e bache bènequeze ca gulenné' nédxut'e: "Quebe gunu' dul-la da dxichaj na xrba chee xel-la' nuchaga na'." <sup>28</sup> Neda' dxapa' le'e, núteteze benne' ne'e tu nu'ula, ne sa lazre' le', báchequeze bène' dul-la nen nu'ula na' lu xichaj lázrdawe'.

<sup>29</sup> 'Che xiaj lau' da zua xabéla dxuzúa na lue' lu dul-la, guleaj na, ne gudxú'una na zítu'la. Nácadxa chawe' nite late' da naca na chee bel-la' dxen chiu' quézcala chu'u lataj ba xa' dut'e bel-la' dxen chiu'. <sup>30</sup> Che na'u da zua xabéla chiu' dxuzúa na lue' lu dul-la, guchugu na, ne gudxú'una na zítu'. Nácadxa chawe' nite late' da naca na chee bel-la' dxen chiu', quézcala chu'u lataj ba xa' dut'e bel-la' dxen chiu'.

*Jesús dxusédeng' ca naca chee benne' dxexelé'e nen zru'ule'*  
(Mt. 19.9; Mr. 10.11-12; Lc. 16.18)

<sup>31</sup> Na' gunná Jesús:

—Cá'anqueze gulenné' nédxut'e: "Núteteze benne' dxexelé'e nen zru'ule', dxal-la' gunézruje' nu'ula na' tu xiche da dxulé'e na belexelé'e." <sup>32</sup> Neda' dxapa' le'e, che tu benne' dxexelé'e nen zru'ule', na' nu'ula nigá quebe guzúaleng' benne' xula, benne' chee nu'ula nigá dxuzúe' le' lu dul-la chee da dxichaj na xrba chee xel-la' nuchaga na' che tu benne' biu xula guchaga ne'e nen nu'ula na' bsan benne' chee' le'. Cá'anqueze le' dxuné' dul-la nen nu'ula na'.

*Jesús dxusédeng' ca naca chee benne' dxucá'ana li'e' xrtizre'*

<sup>33</sup> Na' gunná Jesús:

—Cá'anqueze ba bénele ca gulenná benne' gula ca', gulenné': "Quebe gucá'anuu' cá'aze ca da nachebe lazru' nen dizra' bca'ana liu' lau Xránadxu Dios." <sup>34</sup> Neda' dxapa' le'e: Quebe dxal-la' guzétjale xabáa chee guca'ana lile dizra' cheele, lawe' da naca na naga dxe' Dios, <sup>35</sup> ne quebe guzétjale xezr la xu nigá lawe' da naca na naga nuzúa Dios ni'e, ne quebe guzétjale Jerusalén lawe' da naca na xezre chee Benne' Blau naque' Wenna' Bea. <sup>36</sup> Quebe guzétjale xichajle chee guca'ana lile dizra' cheele lawe' da quebe séquele gunle da chiche, ne da gasaj netú xicha xichajle. <sup>37</sup> Le nnaze: "Awe'," u le nnaze: "Cabí," lawe' da gate tu benne' dxudadx'e chee' chee da nigá, naca na chee da xriwe'.

*Dxulé'e Jesús ca naca chee nu benne' dxexebéaj lazre'*  
(Lc. 6.29-30)

<sup>38</sup> Na' gunná Jesús:

—Le'e ba bénele ca da gulenné' nédxut'e: "Che tu benne' cuéaj'e xiaj lau', cá'anqueze gunu' chee', ne che cuéaj'e lazru', cá'anqueze gunu' chee'." <sup>39</sup> Neda' dxapa' le'e, quebe til-lalele nu benne', san che tu benne' gu'e chala'a xragu', be' lataj gu'e xechalá'a xragu'. <sup>40</sup> Che tu benne' gaca xúzre'le' lue', ne dxaca lazre' cué' zrau', be' lataj xúate' xicha chiu'. <sup>41</sup> Che dxulusebágu'e lue' gu'u xua chee' tu cuéndau', bia na chupa cuenla. <sup>42</sup> Che núteteze benne' bi dxenabe' chiu', bnézruje' na, ne quebe guzagu' ca gunézruju' chee nu benne' bi dxenabe' chite.



*Jesús dxusédené' ca dxal-la' zri'idxu benne' ca' dxeledábage' dxi'u*  
(Lc. 6.27-28, 32-36)

<sup>43</sup> Na' gunná Jesús:

—Cá'anqueze ba bénele ca da gulenné' nédxute: “Bzri'i le sa' ljwezru', ne gucuide benne' dxedábage' lue'.” <sup>44</sup> Neda' dxapa' le'e, le zri'i benne' ca' dxeledábage' le'e. Le naba gaca chawe' chee benne' dxelenné' chee. Le gun da chawe' chee benne' dxelecuídené' le'e. Le naba lau Dios gaca chawe' chee benne' dxelenné' schanni' chee ne dxeluné' chee da calela. <sup>45</sup> Che gunle caní gácale bi cheéqueze Xrale zué' xabáa, lawe' da dxun Le' dxusani' gubizra naga zaj zra' benne' wen da calela ne naga zaj zra' benne' xrlátaje ca', ne dxusel-la' nisa xiuj lu xezr la xu chee benne' chawe' ca', ne lu xezr la xu chee benne' ca' dxeluné' da calela. <sup>46</sup> Che nazrí'ile tuze benne' zaj nazrí'ine' le'e, jájazra na' dxezá lázrele quizruj Dios le'e? Cá'anqueze dxelún benne' wechizruj ca', zaj nazrí'ine' le sa' ljwezre'. <sup>47</sup> Che le'e dxugápale diuzre tuze le sa' ljwézrele, ¿bizra da xrlátaje dxunle? Cá'anqueze dxelún benne' quebe zaj núnbe'e Dios. <sup>48</sup> Le gaca benne' xrlátaje cáteze naca Xrale zué' xabáa, naque' xrlátaje.

## 6

*Dxulé'e Jesús ca naca da xrlátaje da dxelún bénneache*

<sup>1</sup> Caní gunná Jesús:

—Le guxúe xanne' cuínale chee quebe gunle da naca chee xel-la' benne' xudau' chee lau bénneache chee xelélé'eng' na. Che ca'an dxunle, na' Xrale Dios zué' xabáa québequeze bi gunné' le'e. <sup>2</sup> Chee le na', gate lue' dxácalenu' benne' dxelexázrjene', quebe guzennu' xúgute bénneache ca da dxunu', ca dxelún benne' ca' dxeluné' xrlátaje cúzreze la neza, ne lu xu'u naga dxulucá'ana szren benne' judío ca' Dios. Dxeluné' da caní chee xelenné' bénneache xrlátaje chee'. Da li dxapa' le'e, ba déqueze lazruj chee'. <sup>3</sup> Gate lue' gunézruju' late' chee benne' dxelexázrjene', ben na luéze chee quebe neze le sa' ljwezru'. <sup>4</sup> Ben da caní bagácheze, na' Xrau' Dios, Bénnea' dxelé'eng' ca da dxunu' bagácheze, Le' gunné' lazruj chiú'.

*Jesús dxusédené' ca dxal-la' gundxu xel-la' dxuláwizra Dios*

(Lc. 11.2-4)

<sup>5</sup> Na' gunná Jesús:

—Gate le'e gunle xel-la' dxuláwizra Dios, quebe gunle ca dxelún benne' ca' dxeluné' xrlátaje cúzreze. Dxeledáneng' dxeluné' xel-la' dxuláwizra Dios zaj zéze' lu xu'u naga dxulucá'ana szren benne' judío ca' Dios, ne la neza, chee xelélé'e bénneache da dxeluné'. Da li dxapa' le'e, ba déqueze lazruj chee'. <sup>6</sup> Gate lue' dxuláwizru' Dios, guxú'u lu xu'u chiú'. Bsezxuj dxa xu'u chiú', na' bláwizra Dios guchálajlenu' Xrau' Dios zúalene' lue' naga zu' tuzu'. Nadxa Xrau' Dios, Bénnea' dxelé'eng' ca da dxunu' bagácheze, Le' xuzri'e chiú'.

<sup>7</sup> Gate dxuláwizru' Dios dxuchálajlenu' Le', quebe tuz ca da nneu' zánete' lasa ca dxelún benne' ca' quebe zaj núnbe'e Dios. Dxeléqueng' wen Dios chee' lawe' da dxelenné'le'e. <sup>8</sup> Quebe gunle ca dxelún benne' ca', lawe' da Xrale Dios ba nézquezne' ca da dxechnnele le'e nédxula ca za ná bale na. <sup>9</sup> Chee le na', le guláwizra Dios nnae caní:

Xrantu' Dios, zu' xabáa,

gaca lá'azxaqueze Lau'.

<sup>10</sup> Gudá nna be'u lu xezr la xu nigá.

Gaca lu xezr la xu nigá ca dxaca lazru' Lue',

cáteze dxaca xabáa.

<sup>11</sup> Benna netu' da gáguntu' na'a.

<sup>12</sup> Bnité lau cheentu' ca naca da calela da bentu',

ca netu' ba bnité launtu' chee benne' beluné' cheentu'  
da calela.

<sup>13</sup> Quebe gu' u lataj nu gun zréaje netu',

2 san bselá netu' lu na' da xriwe'.

Naca chiú' gápaquezu' xel-la' dxenná bea,

ne xel-la' waca,

ne da xabáa chadía chacanna. ¡Ca'an gaca na!

<sup>14</sup> Che le'e gunite laule chee benne' beluné' chee da calela, na' Xrale Dios zué' xabáa gunite lawe' chee le'e. <sup>15</sup> Che le'e quebe gunite laule chee benne' ca', na' Xrale Dios quebe gunite láuqueze' chee le'e ca naca dul-la da nabágale.

*Jesús dxusédené' ca dxal-la' gundxu gubasa*

<sup>16</sup> Na' gunná Jesús:

—Gate le'e dxunle gubasa, quebe guzúale baxache' laule ca dxelún benne' dxeluné' xrlátaje cúzreze. Benne' caní dxeluné' ca' chee xelélé'e bénneache le' dxeluné' gubasa. Da

li dxapa' le'e, ba déqueze lazruj chee benne' ca'. <sup>17</sup> Lue', gate dxunu' gubasa, bza xíchaju' chawe', ne gudibe lau'. <sup>18</sup> Chee quebe xeléquebe'e béneache dxunu' gubasa. Tuze Xrau' Dios na', Bénnea' zúalene' lue' naga zu' tuzu', Le' dxennátequeze', na' gunne' da naca na chiu'.

*Jesús dxusédené' chee da gunní'a chee xabáa*  
(Lc. 12.33-34)

<sup>19</sup> Na' gunná Jesús:

—Quebe gutúpale da gunní'a lu xezr la xu nigá, naga guteba' na, ne da ca' dxelebía xi na, na' xelú'u gubán ne xeleané' na. <sup>20</sup> Le'e, le gun da xrlátaje, da gaca na ca guzrá cháwele da gunní'a xabáa, naga quebe guteba' na, ne da ca' quebe bi xeleque na, na' québequeze xelú'u gubán chee xelequ'é na. <sup>21</sup> Naga nuzrale da gunní'a chee, na' zúaqueze lázrdaule.

*Jesús dxusédené' chee tu xi' da xú'udxu*  
(Lc. 11.34-36)

<sup>22</sup> Na' gunná Jesús:

—Xiaj laule zaj naca na ca tu xi' chee bel-la' dxen chee. Che xiaj laule zaj naca na chawe', duté ca naca bel-la' dxen chee naxaní'. <sup>23</sup> Che xiaj laule quebe zaj naca na chawe', duté ca naca bel-la' dxen chee nachul-la na. Cá'anqueze che xi' da xu'ule xexaca na tu da chul-la, chúl-lalé'edxa súaquezle.

*Jesús dxusédené' chee Dios, ne chee da gunní'a*  
(Lc. 16.13)

<sup>24</sup> Na' gunná Jesús:

—Netú benne' quebe séquene' guzúa cuine' lu na' chupa xrane', lawe' da wazré'e tu xrane' ne wazrí'ine' xetú'e, u wéquene' ba lánana tu xrane' na' xetú'e guzú'e chalá'ala. Quebe séquele guzúa cuinle lu na' Dios, ne lu na' da gunní'a.

*Jesús dxusédené' ca dxun Dios, dxuxú'e xúguté bi chee' ca'*  
(Lc. 12.22-31)

<sup>25</sup> Na' gunná Jesús:

—Chee le na' dxapa' le'e, quebe cue'le gunne xue ga sa' da gágule da xí'ajle chee gaca banle, ne ga sa' zra lánale da gágule. Zácadxa xel-la' nabán chee ca da dxágule, ne zácadxa bel-la' dxen chee ca zra lánale. <sup>26</sup> Le nna'xque bxínne'u ca' dxeledaba' lu be'. Quebe dxelázaba'. Quebe dxelelápaba'. Quebe ga dxuluxuzrá cháweba' na. Xrale Dios zue' xabáa dxunézruje' da dxeláguba'. Zácadxale le'e ca bxínne'u ca'. <sup>27</sup> ¿Nuzra benne' ládujla le'e gaca gusetunna cuine' xate' lawe' da dxe'e gunne xue?

<sup>28</sup> ¿Bizr chee na' dxe'le le'e gunne xue chee zra lánale? Le nna'xque ca dxelegula xiaj ca' zaj zé le'e xixre'. Quebe dxelún na zrin, ne quebe dxelache na du. <sup>29</sup> Dxapa' le'e, Salomón benne' wenná bea na' quebe gucu'e ca da xrtan chee xiaj caní, na' le' gúta'le'e chee' da gunní'a. <sup>30</sup> Che Dios dxudxene' xrtánle'e xiaj caní da ca' zaj zua na na'a le'e xixre', na' wxre xelexze na lu xi', quegá gundxe' da chawe' chee le'e, benne' quebeté ca dxeajlí lazre'. <sup>31</sup> Chee le na', quebe cué'tecale gunne xue, nnale: “¿Ga sa' da gágudxu? ¿Ga sa' da xí'ajdxu? ¿Ga sa' da gácudxu?” <sup>32</sup> Chee da caní zaj dxe' gunne xue benne' quebe zaj núnbe'e Dios, san le'e, zua tu Xrale xabáa ba nézquezne' ca naca xúguté da dxechínnele. <sup>33</sup> Zria laudxa cuele gunne xue chee nna bea Dios lu xichaj lázrdaule, ne chee gunle da xrlátaje da xezaca ba lazre' Dios, na' síle xúguté da ca' dxechínnele. <sup>34</sup> Quebe cuele gunne xue na'a da naca na chee wxre, lawe' da wxre ca'an gáta'queze da cuele gunne xue. Tu zra tu zra déqueze da guchaga laudxu.

## 7

*Jesús dxusédené' chee benne' dxuchi'e da dxun le sa' ljwezre'*  
(Lc. 6.37-38, 41-42)

<sup>1</sup> Na' gunná Jesús:

—Quebe guchí'ale da dxelún le sa' ljwézrele chee quebe guchi'a Dios caní chee le'e. <sup>2</sup> Le' guchi'e chee le'e cáteze dxunle le'e chee le sa' ljwézrele, ne cáteze dxunle le'e chee le sa' ljwézrele, ca'an gun Dios nen le'e. <sup>3</sup> ¿Bizr chee na' dxená'u bēbedau' da xu'u xiaj lau le sa' ljwezru', ne quebe dxená'u da zrenté da xu'u na xiaj láuquezu' lue'? <sup>4</sup> ¿Ájazra gunu' xu'u le sa' ljwezru': “Benna lataj xebéaja' bēbedau' da xu'u xiaj lau’”, che da zrendxa xu'u xiaj láuquezu' lue'? <sup>5</sup> Lue', benne' dxun xrlátaje cūzreze. Bebéaj nedxu da zrenté da xu'u xiaj láuquezu', na' gaca le'enu' cháwedau' xebéaju' bēbedau' da xu'u xiaj lau le sa' ljwezru'.

<sup>6</sup> Quebe gunézrujle da naca lá'azxa chee benne' dxelune' ca dxelún becu' snia, checa xelexéchaje', ne xuluzúruge' le'e. Quebe guzúale da zaca chee lau benne' dxelune' ca dxelún cuhe, dxuluchuchuj dxululéajba' da dxugágule-ba'.

*Dxuchalaj Jesús ca dxal-la' nábadxu, ne xexilajdxu, ne nnedxu dxu'a dxa xu'u*  
(Lc. 11.9-13; 6.31)

<sup>7</sup> Na' gunná Jesús:

—Le naba, na' Dios gunne' na chee. Le xilaj na, na' xezrélele na. Le nne dxu'a dxa xu'u, na' sáluje' chee. <sup>8</sup> Le gun caní lawe' da benne' bi dxenabe', dxezi'e na. Benne' bi dxexilaje', dxexjraque' na, na' benne' dxenne' dxu'a dxa xu'u, zua nu benne' sáluje' chee'.

<sup>9</sup> 'Netule le'e quebe gunézruje zrí'inele tu xiaj che lebe' dxenábabe' le'e tu xeta. <sup>10</sup> Quebe gunézruje zrí'inele tu bela' snia che lebe' dxenábabe' le'e tu bela. <sup>11</sup> Che le'e, benne' wen da calela, nézele gunézruje zrí'inele da naca na chawe', da cháwedxa gunna Xrale Dios zua xabáa, gunne' da chawe' chee benne' bi dxenábene' Le'.

<sup>12</sup> 'Le gun chee le sa' ljwézrele ca dxaca lázrele le'e xelún lebe' chee. Da nigá naca da nadxiruj bea na Moisés, ne da dxenná na lu xiche naga naxúaj da gulenná benne' ca' buluchálaje' waláz chee Dios.

*Jesús dxusédené' chee dxa xu'u lechide'*  
(Lc. 13.24)

<sup>13</sup> Na' gunná Jesús:

—Le chu'u lu dxa xu'u lechide'. Dxa xu'u laga, ne neza xu zaj naca naga zjaca benne' xelebia xi'e, na' benne' zante zjaque' na'. <sup>14</sup> Dxa xu'u lechide', ne neza lase zaj naca naga zjaca benne' xelezi'e xel-la' nabán da zeajlí canna, na' bábaze benne' dxexezrelne' na.

*Naca bea tu xaga ne chee da zixre dxebía na*  
(Lc. 6.43-44)

<sup>15</sup> Na' gunná Jesús:

—Le guxúe cuínale chee benne' wen lazre' ca', benne' dxelenné' zaj naque' benne' dxuluchálaje' waláz chee Dios. Benne' caní zá'aque' naga zrale le'e, zaj nun cuine' ca tu benne' dxexruj lazre' ca naca tu zríla'dau', san lu xichaj lázrdawe' zaj naque' snia ca tu becu' xi'a. <sup>16</sup> Le'e xúnbeale le' ne chee da dxelune'. Da zixre da dxebía lba uva quebe xuchíbedxu na lu xaga xeché, na' da zixre da dxebía xaga hígo quebe xuchíbedxu na lu xeché' ga'. <sup>17</sup> Ca'an naca, xúguté xaga chawe' dxelebia na da zixre chawe', na' xaga da quebe naca na chawe', quebe dxebía na da zixre chawe'. <sup>18</sup> Xaga chawe' ca' quebe dxelebia na da zrinnaj, na' xaga zrinnaj na' quebe dxebía na da chawe'. <sup>19</sup> Xúguté xaga zrinnaj welechugue na, na' xelezxe na lu xi'. <sup>20</sup> Ca'an naca, le'e xúnbeale benne' ca' ne chee da ca' dxelune'.

*Quegá xúguté benne' xelu'e naga dxenná bea Dios xabáa*  
(Lc. 13.25-27)

<sup>21</sup> Na' gunná Jesús:

—Quebe xelu'e naga dxenná bea Dios xabáa xuguté benne' ca' dxel'é neda: "Xrana, Xrana." Welú'u tuze benne' ca' dxelune' ca da dxaca lazre' Dios zue' xabáa. <sup>22</sup> Ca zrin zra na', benne' zante xel'é neda: "Xránantu', Xránantu', netu' bchálajntu' ne chee Lau' Lue', ne bchínentu' Lau' bebéajntu' be' xriwe' ca', ne nen Lau' Lue' bñle'entu' xel-la' waca ca' chee xabáa." <sup>23</sup> Nadxa neda' xápaqueza' benne' ca': "Quebe núnbe'a le'e. Le cuasa cuita' neda', le'e, ba benle da calela."

*Jesús dxusédené' chee chupa lane xu'u*  
(Lc. 6.47-49; Mr. 1.22)

<sup>24</sup> Na' gunná Jesús:

—Bénnea' dxenne' chia', ne dxune' ca da dxennía', naque' ca tu benne' naxéajni'iqueze', benne' bene' tu lizre' lu xiaj xre. <sup>25</sup> Guca xiuj, na' bdxuaj guba'u, ne guxasa be' bduu' chee xuluzría xi na xu'u na', san quebe guzré'e na lawe' da xu'u lane na lu xiaj xre. <sup>26</sup> Bénnea' quebe dxuzé nague' chia', ne quebe dxune' ca da dxennía', naque' ca tu benne' xala, benne' bene' tu lizre' lu xu dxeze. <sup>27</sup> Guca xiuj, na' bdxuaj guba'u ne guxasa be' bduu' chee xuluzría xi na xu'u na', na' chadite guzré'e na, ne guzría xité na.

<sup>28</sup> Ca bexuzre bchalaj Jesús, na' belexebanne benne' ca' ca naca da bsédené', <sup>29</sup> lawe' da dxusédené' benne' ca' ca tu benne' nape' xel-la' dxenná bea, ne quegá ca dxelún benne' ca' dxuluxúzajle'e da nadxiruj bea Dios.

## 8

*Dxexún Jesús tu benne' dxuzru lu xpele'*  
(Mr. 1.40-45; Lc. 5.12-16)

<sup>1</sup> Gate bexetaj Jesús lu xi'a na', benne' zante zjácálene' Le'. <sup>2</sup> Na' bzrin tu benne' we' dxuzru lu xpele', ne bzu zribe' lau Jesús. Dxe'e Le':

—Xran, che dxaca lazru', waca xexunu' neda'.

<sup>3</sup> Nadxa Jesús guxrúa ne'e bénnea'. Dxe'e le':

—Dxaca lazra'. Na'a dxexuna' lue'.  
 Ca gunné' caní, benne' we' na' bexácaté' ca naca xízrawe' chee'. <sup>4</sup>Na' Jesús guzre' le':  
 —Gunná' xque. Quebe nu xu'u ca'. Bexíajze na'a xeajxelé'e cuinu' lau bxruze, ne  
 xeajnezruj guna' ca da dxenná bea lu da bdxixruj be'e Moisés, chee xeledé'e benne' ca' ba  
 bexacu' na'a.

*Dxexún Jesús bi wen zrin chee tu benne' dxenná be'e lu wedil-la*  
*(Lc. 7.1-10)*

<sup>5</sup>Ca bexú'u Jesús lu xezre Capernaum, na' bzrin lawe' tu benne' Roma, benne' dxenná  
 be'ene' benne' ca' dxjaque' wedil-la, na' guta' xuene' Le', <sup>6</sup>dxé'e Le':

—Xran, bi wen zrin chia' debe' lizra'. Naxrú'unebe' bine, ne dxezácale'ebe'.

<sup>7</sup>Jesús dxé'e le':

—Wazá'a xexuna'-be'.

<sup>8</sup>Benne' dxenná be'e na' gunné':

—Xran, quebe naca chia' chu'u lizra'. Cun gunneze, na' xexaca bi wen zrin chia'. <sup>9</sup>Caní  
 waca gunu' lawe' da zua benne' dxenná bé'ene' neda', ne cá'aqueze neda' dxenná be'eda'  
 benne' ca' dxjaque' wedil-la. Gate dxapa' tube: “Guxíaj”, na' dxéajbe'. Na' gate dxapa' bi  
 xula: “Gudá”, na' dxídabe'. Na' gate dxuchíneda' bi wen zrin chia' chee bi da gunbe', na'  
 dxunbe' na.

<sup>10</sup>Gate bene Jesús da nigá, bebánene', na' guzre' benne' ca' zjácálene' Le':

—Da li dxapa' le'e, ládujla benne' Israel quebe nu ne xezrelda', benne' dxéajle'e chia' ca  
 dxun benne' nigá. <sup>11</sup>Neda' dxapa' le'e, zá'aca benne' zanté chala'a naga dxalaj gubizra, ne  
 xechalá'ala naga dxebía gubizra, na' xelebé'e tu zren xelawe' nen Abraham, ne Isaac, ne  
 Jacob naga dxenná bea Dios xabáa. <sup>12</sup>Benne' ca' gucá'a zga'ale Dios chee xelu'e naga dxenná  
 bea Le', guzale' benne' ca' lataj chul-la naga xelebezre', ne xeláguxa'ate lazze'.

<sup>13</sup>Nadxa Jesús guzre' benne' dxenná be'e na':

—Bexíaj lizru'. Waca ca da ba guxéajle'u.

Ca lu zra ná'queze bexácaté bi wen zrin chee'.

*Dxexún Jesús xrna zru'ule Pedro*  
*(Mr. 1.29-31; Lc. 4.38-39)*

<sup>14</sup>Guxíaj Jesús lizre Pedro, na' blé'ene' xrna zru'ule' de' lu da'a, xu'e da la. <sup>15</sup>Xeajté' ne'e, na'  
 bedxúaj da la da xu'e. Nadxa nu'ula na' guxase', ne guzú lawe' dxusení'e da xelagu benne'  
 ca'.

*Dxexún Jesús benne' zanté benne' we'*  
*(Mr. 1.32-34; Lc. 4.40-41)*

<sup>16</sup>Ca guzríaj gubizra, na' belezrín benne' zanté lau Jesús, zaj naché'e benne' zaj xu'e be'  
 xriwe' ca'. Nen dízra'ze da gunná Jesús, bebéajé' be' xriwe' ca', ne bexune' xúgute' benne' we'  
 ca'. <sup>17</sup>Da nigá guca na ca da gunná Isaías, benne' bchálajé' waláz chee Dios, gunné': “Le'  
 bequé'e xízrawe' ca' da nápadxu, ne gubague' ca da dxezácadxu.”

*Dxelaca lazre' benne' chjácálene' Jesús*  
*(Lc. 9.57-62)*

<sup>18</sup>Gate na' ble'e Jesús benne' zanté zaj naxéchajé' Le', na' guzre' benne' ca' dxusédene'  
 gulelague' xechalá'a nísadau' tu lu da dxedá lawe' nisa. <sup>19</sup>Na' bzrin lau Jesús tu benne'  
 dxuxuzájlé'e da bdxixruj be'e Dios, na' dxé'e Le':

—Benne' Wesede, dxaca lazra' sáləna' Lue' gáteteze chéajú'.

<sup>20</sup>Na' Jesús guzre' le':

—Beza' zaj zua bluaj cheəba', na' bxinne zaj zria xrú'uneba', san neda', Benne' Gulje'  
 Bénneache, ne naga xrua xíchaja' quebe ga zua.

<sup>21</sup>Bzrin xetú benne' naque' benne' ba bsédequeze Jesús, na' guzre' Le':

—Xran, bənna neda' lataj xexá'a nedxu chee cheajxecacha' xra'.

<sup>22</sup>Nadxa Jesús guzre' le':

—Gudálen neda'. Bə' lataj benne' gate ca' xulucache ljwezre'.

*Dxebeque zri Jesús be' bđunu', ne xeajxruza chee nísadau'*  
*(Mr. 4.35-41; Lc. 8.22-25)*

<sup>23</sup>Nadxa guxú'u Jesús lu da dxedá lawe' nísadau', na' benne' ca' dxusédene' belune' Le'  
 tu zren. <sup>24</sup>Na' guzú lau dxaca tu be' bđunu' lawe' nísadau', na' xeajxruza chee nísadau'  
 guxú'u na lu da dxedá lawe' nísadau' na', dxácaté dxase Jesús. <sup>25</sup>Nadxa benne' ca' dxusédene'  
 bulusebané' Le', na' dxelé'e Le':

—Xránantu'. Bselá netu'. Ba dxázentu' lu nisa.

<sup>26</sup>Jesús guzre' le':

—¿Bizr chee na' dxezrébelé'ele? Nácale benne' látega dxeleajlí lázre' Dios.

Nadxa guxasa Jesús. Gudil-le' be' bduunu', ne nísadau', na' la belebé zrite na. <sup>27</sup> Benne' ca' belexebánene', gulenné':

—¿Núzraqeze benne' nigá? Dxuluzúa be', ne nísadau' dizra' chee'.

*Benne' Gadara zaj xu'e be' xriwe'*

(Mr. 5.1-20; Lc. 8.26-39)

<sup>28</sup> Gate bezrin Jesús xechalá'a nísadau' na' lu xęzr la xu cheę benne' Gadara, na' chupa benne' biu belexedxúaje' lu bluaj cheę benne' gate, na' belezrine' lau Jesús. Dxúpatę benne' ca' zaj xu'e be' xriwe', ne zaj naque' benne' sníale'e, na' netú benne' quebe dxexázrene' xedé' la neza na'. <sup>29</sup> Na' gulezú lawe' dxelebézrexe'e. Dxelenné':

—¿Bizr cheę na' za'u naga zúantu', Jesús, Zri'ine Dios? ¿Za'u nigá cheę gusaca zi'u netu', ne quebe ne zrin zra?

<sup>30</sup> Tu chi na' zra tu cue' cuche dxeláguba'. <sup>31</sup> Be' xriwe' ca' gulata' xue na Jesús, gulenná na:

—Che Lue' xebéaju' netu' nigá, benne' lataj cheajchú'untu' lu cuche ca'.

<sup>32</sup> Nadxa Jesús guzre' na:

—Le hjaca xca'.

Nadxa be' xriwe' ca' belexedxúaj na lu benne' ca', na' belexú'u na lu cuche ca'. Nadxa xúgutę cuche ca' belélázruba' tu dxu'a xi'a zren, na' xeajlecházeba' lu nísadau' naga gulázeba' nisa, na' guláteba'.

<sup>33</sup> Benne' ca' buluxúe'-ba' belezrebe', na' besá'aca chégüe', ne belexezrine' lu xęzre. Buluchálaje' ca guca xúgutę da caní, ne ca guca cheę benne' ca', belexedxúaj be' xriwe' zaj xu'e. <sup>34</sup> Nadxa xúgutę benne' zaj zre'e lu xęzre na' beledxúaje', ne belezrine' naga zua Jesús. Na' ca belelé'ene' Le', gulata' xuene' Le' xezé'e lu xęzr la xu chee'.

## 9

*Dxexún Jesús tu benne' zaj zua zri ni'a ne'e*

(Mr. 2.1-12; Lc. 5.17-26)

<sup>1</sup> Nadxa Jesús guxú'e tu lu da dxedá lawe' nísadau', na' gulague' xechalá'a nísadau', na' bezrine' lázrequeze'. <sup>2</sup> Na' bedajlegu'e tu benne' biu lau Le', zaj zua zri ni'a ne'e, zaj naxrúe' benne' na' tu lu ta'a blaga'. Gate ble'e Jesús ca dxeléaje' e cheę, na' gunné', dxę'e benne' we':

—Ben dipa lazru', zri'ina'dau'. Dul-la chiu' dxunite lawa'.

<sup>3</sup> Nadxa bal-la benne' dxuluxuzájle' da nadxixruj bea Dios gulenné' lu xichaj lázrdawe': "Benne' nigá dxucá'ana dítajé' Dios nen xrtizre'." <sup>4</sup> Lawe' da neze Jesús ca gulenné' lu xichaj lázrdawe', na' dxę'e benne' ca', gunné':

—¿Bizr cheę na' dxennale caní lu xichaj lázrdaule? <sup>5</sup> ¿Bízrala da quebe nácadxa stębe guna? ¿Nnia': "Dul-la chiu' ba bnite lawa'", u che nnia': "Bexasa, guzá?" <sup>6</sup> Cheę le' na' gulé'eda' le'e neda', Benne' Gulje' Bénneache, napa' xel-la' dxenná bea lu xęzr la xu nigá gunite lawa' dul-la.

Nadxa dxę'e benne' zaj zua zri ni'a ne'e, gunné':

—Bexasa. Becá'a ta'a chiu'. Bexíaj lizru'.

<sup>7</sup> Bénnea' zaj zua zri ni'a ne'e bexase', na' zexíajte' lizre'. <sup>8</sup> Gate belelé'e bénneache da nigá, na' belezrebe', ne belulé lá'ane' Dios lawe' ba bnézruje' xel-la' waca caní cheę bénneache.

*Jesús dxuláwizre' Mateo*

(Mr. 2.13-17; Lc. 5.27-32)

<sup>9</sup> Ca bezá Jesús na', na' blé'ene' tu benne' biu le' Mateo, dxę'e lataj naga dxuchízruje' waláz cheę xęzre Roma, na' dxę'e le', gunné':

6 —Ben neda' tuze.

Nadxa Mateo nigá guxase' zéajlene' Jesús.

<sup>10</sup> Gate na' dxę'e Jesús dxawe' xeta lizre Mateo nigá, benne' zantę wechizruj, ne benne' dul-la belezrine', ne gulebé'queze' dxelawe' cuíta Jesús, ne benne' ca' dxusédené'. <sup>11</sup> Benne' xudau' fariseo ca', gate belelé'ene' da nigá, dxelé'e benne' ca' dxuséde Jesús, gulenné':

—¿Bizr cheę na' Benne' dxusédené' le'e dxágulene' benne' wechizruj ca', ne benne' wen da zrinna'j ca'?

<sup>12</sup> Jesús benne' da nigá, na' dxę'e benne' ca', gunné':

—Quebe dxelechine benne' chawe' nu benne' dxexune' bénneache. Benne' we' dxelechíne' le'. <sup>13</sup> Le hjaca, le cheajsede ca da dxenná da naxúaj na lu xiche cheę Dios, dxenné': "Neda' dxaca lazra' xexache lázrele le sa' ljwézrele, quegá gütele be' xíxre'du ca' lu cugu chia'." Bla' neda', quegá cheę guláwizra' benne' xrlátaje. Dxuláwizra' benne' dul-la cheę xelexebí'i lazre'.

*Jesús dxusédené' ca naca cheę gubasa*

(Mr. 2.18-22; Lc. 5.33-39)

<sup>14</sup> Nadxa belezrín lau Jesús benne' ca' dxeledálenē' Juan, bénnea' dxuchúē' bénneache nisa, na' gulenábene' Lē':

—¿Bizr cheē na' quebe dxelún gubasa benne' dxusédenu' Lue', ca dxuntu' netu', ne ca dxelún benne' xudau' fariseo ca'? Tu dxúnzquezentu' gubasa.

<sup>15</sup> Na' Jesús dxē'ē benne' ca', gunné':

—¿Ajala cheē na' xelexúa ba xácheze benne' zaj zuē' laní cheē wechaga na' dxácatē zua benne' wechaga na' nen lē'? Wazrín zra gate dua benne' wechaga na'. Nadxa xelúnqueze' gubasa.

<sup>16</sup> Quegá nu dxudá tu ladxe' cube lē'ē tu zra lánadxu gula, lawe' da gate cheajxedxé' da cube na', ne xrube xu na da gula na', na' dxézadxa da gula na'. <sup>17</sup> Cá'anqueze quebe nu benne' que'ē xrise uva wal-la cube lu bzude xide gula lawe' da che ca'an gungē', gate cue' chí'i xrise uva wal-la, na' dxeza bzude xide na', na' xelebía xi' xrise uva wal-la na', ne bzude xide na'. Cheē lē' na' dxal-la' ca'adxu xrise uva wal-la cube lu bzude xide cube. Che ca'an gundxu, xelegá'ana chawe' dxúpatē na.

Bchalaj Jesús da caní ca naca cheē benne' ca' dxelezl' lu ne'ē xrtizre'.

*Dxexún Jesús bi nu'ula cheē Jairo, ne nu'ula', xeajtē'ē zra lana Jesús*  
(Mr. 5.21-43; Lc. 8.40-56)

<sup>18</sup> Dxácatē na' dxuchalaj Jesús da nigá, na' bzrin tu benne' xíchajē cheē benne' judío ca', na' bzu zribe' lau Jesús, dxenné':

—Bi nu'ula chia' za gútētebe'. Che Lue' xidu' ne guzē na'u lēbe', wexaca banbe'.

<sup>19</sup> Na' guxasa Jesús, guxiájlēne' lē' nen benne' ca' dxusédene'. <sup>20</sup> Nadxa bzrin tu nu'ula we' cúzrula Jesús, ba naca chazrinnu iza dxé'ene' tu we' dxaque dxen, na' xeajtē'ē zra lana Jesús.

<sup>21</sup> Dxenné' lu xichaj lázrdawē': "Che cheajtaza' zra lanē', na' xexaca'."

—Jesús guxéxajē', gunē'ē nu'ula', na' dxē'ē lē':

—Ben dípa lazru', zrí'ina'dau'. Bache bexacu' lawe' da dxéajlē'u chia'.

La bexácatē nu'ula na'.

<sup>23</sup> Gate na' bzrin Jesús lizre benne' xíchajē cheē benne' judío ca', na' blé'ene' zaj zra' benne' wil-la xulucache' bi nu'ula na', ne benne' zaj zre'ē dxelunē' zralaj. <sup>24</sup> Gunná Jesús, dxē'ē benne' ca':

—Le xedxúaj nigá. Quegá nate bi nú'uladau' nigá. Dxásezebe'.

Na' buluzrizre' cheē'. <sup>25</sup> Gudé bebéajē' benne' ca', na' guxú'u Jesús, ne bēxruē' na' bi nu'ula na', na' guxásabe'. <sup>26</sup> Du ca naca xēzre ca' bzriluj dizra' cheē da ben Jesús.

*Dxexún Jesús chupa benne' la chul-la*

<sup>27</sup> Ca bedxúaj Jesús na', na' chupa benne' xjaque' cuzru Lē', dxelenné' zizraj:

—Bexache lazre' netu', Lue', Zrí'ine David.

<sup>28</sup> Ca guxú'u Jesús lu xu'u naga zúaquezē', na' benne' la chul-la caní gulebigue' lau Lē', na' Jesús guzre' benne' ca':

—¿Dxéajlele wazéqueda' xexuna' le'e'?

Na' gulé'ē Lē':

—Awe', Xran.

<sup>29</sup> Nadxa Jesús gudane' xiaj lau benne' ca', dxenné':

—Gaca cheēle ca dxéajlele.

<sup>30</sup> Belexaca xiaj lawē'. Nadxa Jesús gunné' xuene' benne' ca', gunné':

—Le guxúe xanne' cheē quebe nu neze da nigá.

<sup>31</sup> Gate beledxúajē', na' buluchálajē' du ca naca xēzre ca' ca da ben Jesús cheē'.

*Dxexún Jesús tu benne' quebe dxaca nniē'*

<sup>32</sup> Ca bezá' Jesús nen benne' ca', na' belezrín bal-la benne' zaj naché'ē tu benne' biu quebe dxaca nniē', benne' xu'ē be' xriwē'. <sup>33</sup> Cáteze bebéaj Jesús be' xriwē' nigá, na' benne' quebe dxaca nniē' bezú lawē' dxuchálajē'. Na' benne' ca' belexebánele'ē, dxelenné':

—Cabata' ne lé'edxu gaca caní ládujla benne' Israel ca'.

<sup>34</sup> Benne' xudau' fariseo ca' gulenné':

—Benne' nigá dxebéajē' be' xriwē', dxuchínene' xel-la' waca cheē da xriwē', da na' dxenná be'e na be' xriwē' ca'.

*Dxexache lazre' Jesús bénneache ca'*

<sup>35</sup> Gudé Jesús tu tu xēzre zren, ne tu tu xézredau', dxusédene' benne' ca' lu xu'u ca' naga dxulucá'ana szrene' Dios tu tu lataj ca'. Gulu'ē lban cheē dizra' chawe' ca nna bea Dios, ne bexunte' bénneache zaj napē' tu tu cue' xízrawē' ca da dxelezaque'. <sup>36</sup> Gate ble'e Jesús bénneache ca', na' bexache lazre' lē' lawe' da zaj zre'ē xácheze', ne dxelecuán lazre'. Zaj naque' ca zrila' ca' quebe zua benne' guxúē'-ba'. <sup>37</sup> Nadxa guzre' benne' ca' dxusédene':

—Da li, da zrentę de da lapadxu, na' babaze benne' wen zrin zaj zre'e. <sup>38</sup> Cheę le na' le naba lau Xrana lina nig, sel-le' benne' wen zrin xelexape' lina cheę'.

## 10

*Dxeca Jesus chazrinnu benne' xelaque' gubz cheę'*

(Mr. 3.13-19; Lc. 6.12-16)

<sup>1</sup> Nadxa Jesus blawizre' chazrinnu benne' ca' dxusdenę', na' bnezruje' le' xel-la' dxenn bea cheę xelexebaje' be' xriwe' ca', ne cheę xelexexunę' benneache zaj xu'e tu tu cue' xzrawę' ca da dxelezaque'.

<sup>2</sup> Can zaj le' chazrinnu benne' gubz ca' cheę Jesus:

Benne' nedxu le' Simon, ne lequeze' Pedro.

Xete' naque' benne' biche Pedro, le' Andres.

Xechupe' zaj le' Jacobo, ne Juan, benne' zaj naque' zri'ine Zebedeo.

<sup>3</sup> Xezcala benne' ca' zaj le' Felipe, ne Bartolome, ne Tomas.

Xetue' le' Mateo, benne' wechizruj cheę xzre.

Xetue' le' Jacobo, zri'ine Alfeo.

Xetue' le' Lebeo, benne' lequeze' Tadeo.

<sup>4</sup> Xete' le' Simon, benne' dxe'e gunne xue cheę xzr la xu Israel.

Xete' le' Judas Iscariote, bennea' gude' Jesus lu na' benne' dxeledbage' Le'.

*Dxesel-la Jesus benne' gubz cheę' ca' cheajlezenne' benneache xrtizre'e*

(Mr. 6.7-13; Lc. 9.1-6)

<sup>5</sup> Nadxa gusel-la Jesus benne' chazrinnu can. Guzre' le':

—Quebe cheajle naga zaj zra' benne' quebe zaj naque' judo, ne quebe chu'ule xzre ca' zaj nababa Samaria. <sup>6</sup> Le chjaca naga zaj zra' benne' Israel zaj naque' ca zrila' zaj nanteba'.

<sup>7</sup> Le chjaca cu'ule lban, xe le benneache ba bzrin gguze zra nna bea Dios lu xzr la xu nig.

<sup>8</sup> Le xexun benne' zaj xu'e we' guzru', ne benne' bila xzrawę' dxele'eng'. Le guseban benne' gate. Le xebej be' xriwe' da zaj xu'u benneache. C'aze guzile xel-la' dxenn bea nig, na' c'aze le guchine na, quebe bi xele.

<sup>9</sup> 'Quebe gale dum oro, ne dum plata, ne dum lase. <sup>10</sup> Quebe gale xixruj xeta da ggule la neza. Quebe gale xet cue' zra lanale, ne zrlale, ne xaga da gxrule. Benne' wen zrin wazrequeze' da gawe'.

<sup>11</sup> 'Gate na' zrinle le'e tu xzre zren u tu xzredau', le quilaj na' tu benne' du lazre', na' le xeg'ana lizre' ca zrindxa zra xeza'ale na'. <sup>12</sup> Gate na' chu'ule lu xu'u na', le xe bennea' naca lizre' na': "Xela dxebeza zri lazre' suale na le'e." <sup>13</sup> Che benne' ca' zaj naca cheę' xelexi'e xel-la' ba l'ana can, le guc'ana c'aze na'. Che quebe zaj naca cheę' xelexi'e da nig, na' quebe gata' cheę'. <sup>14</sup> Che quebe lataj dxelunę' le'e, ne quebe dxelennę' cheęle, le xedxaj lu xu'u na' u lu xzre na', na' le xebibe bxrtedu na' zria ni'ale. <sup>15</sup> Da li dxapa' le'e, ca zrin zra guchi'a Dios, Dios gundxę' da ba xa' cheę benne' xzre na' quez ca da gunę' cheę benne' Sodoma, ne benne' Gomorra, xzre ca' guzra xi'e.

*Xeleb nawę' bi ca' cheę Jesus*

<sup>16</sup> Na' gunn Jesus:

—Le na' xque nig. Neda' dxesel-la' le'e, gcale ca zrila' zaj zraba' ldujla becu' xi'a ca'. Cheę le na', le gaca sina ca zaj naca bela', san le gaca dxexruj lazre' ca zaj naca bggudu ca'.

<sup>17</sup> Le gxe cuinale. Zaj zra' benne' xulude' le'e lu na' benne' xu'u lawe', ne xuluzalaje' le'e lu xu'u naga dxuluc'ana szrene' Dios. <sup>18</sup> C'anqueze weleche' le'e lau benne' xu'u lawe' ca', ne lau benne' dxelenn bea lawe' da ncale chia' neda'. Ca'an gaca guchalaje ca naca chia' neda' lau benne' ca', ne lau benne' quebe zaj naque' judo. <sup>19</sup> Gate na' xulude' le'e lu na' benne' dxuchi'a da dxaca, quebe gunne xue cue'le ca da nnale u jala guchalaje, lawe' da gate zrin zra guchalaje, Dios gunne' ca da guchalaje. <sup>20</sup> Queg le'eze guchalaje, lawe' da Be' L'azxa cheę Dios guchalaje' lu dx'ale.

<sup>21</sup> 'Xulude' benneache benne' bichequeze' lu na' benne' xeltie' le'. C'anqueze xra xrna xulude' zri'ine', na' zri'ine' ca' xeledabagabe' xra xrnquezebe' cheę xeltie'. <sup>22</sup> Xgute benneache xelexre' le'e lawe' da ncale chia' neda', san bennea' guxru chache' dizra' cheę Dios ca zrin zra cheajse cheę', la bennea'. <sup>23</sup> Gate xeleb nawę' le'e tu xzre, le xuzrunnuj xet xzre. Da li neda', Benne' Gulje' Benneache, dxapa' le'e, xida' ndxula ca quebe ne tache tale xgute xzre cheę benne' Israel.

<sup>24</sup> 'Net benne' quebe naque' szrendxa ca benne' dxusdenę' le'. C'anqueze net benne' wen zrin quebe naque' szrendxa ca xranę'. <sup>25</sup> Tu benne' dxusede dxal-la' gun zi' lazre' gaque' ca naca benne' dxusdene' le', na' benne' wen zrin dxal-la' gun zi' lazre' gaque' ca naca xranę'. Che benne' naque' xrane xu'u dxele' le' Beelzeb, da xriwe', chezradxa xelennę' cheę bi cheę' ca'.

*¿Núzraqueze dxal-la' zrédexu?*

*(Lc. 12.2-9)*

<sup>26</sup> Na' gunná Jesús:

—Chee lę na', quebe zrėbele bėnneache. Xúgute da bagácheze gaca béaqueze na, na' xúgute da dxelaca ga nagache gulé'e láuqueze na. <sup>27</sup> Da nigá dxapa' le'e lu da chul-la, le guchalaj na te zra. Da dxapa' le'e bagácheze, le nne zizraj chee xelėn xúgute benne'. <sup>28</sup> Quebe zrėbele benne' xelútię' bėl-la' dxen cheele. Quebe xelexėquene' xelútię' bėnne'du xu'ule. Le zrebe Dios. Le' dxezėquene' guzría xi'e bėl-la' dxen cheele, ne bėnne'du xu'ule lu lataj ba xa'.

<sup>29</sup> 'Dxelúti'e chupa bxinnedu ca' nen tu dumí dau'. Netuba' quebe gáteba' chee quebe ne gře lataj Xrale. <sup>30</sup> Cá'anqueze xicha xíchajle, xúgute na zaj nababa na. <sup>31</sup> Chee lę na', quebe zrėbele. Zácadxale le'e quėzcala bę zan bxinnedu ca'.

*Dxal-la' xechėbedxu nácadxu chee Jesucristo*

*(Lc. 12.8-9)*

<sup>32</sup> Na' gunná Jesús:

—Xúgute benne' ca' dxelexechėbe' zaj naque' chia' neda' lau bėnneache, cá'anqueze neda' wechėbequeza' zaj naque' chia' neda' lau Xra' zue' xabáa. <sup>33</sup> Benne' ca' quebe dxelexechėbe' zaj naque' chia' lau bėnneache, neda' queza' quėbequeze xechėba' zaj naque' chia' lau Xra' zue' xabáa.

*Da naca Jesús naca na tu da dxun na chupa la'a bėnneache*

*(Lc. 12.51-53; 14.26-27)*

<sup>34</sup> Na' gunná Jesús:

—Quebe guėquele bla'a neda' chee guzúa' xel-la' dxebeza zri lazre' ládujla bėnneache. Bla'a neda', quegá chee guzúa' xel-la' dxebeza zri lazre', san chee guzúa' wedil-la. <sup>35</sup> Bla'a neda' chee guna' tábaga' tu benne' xre', ne chee guna' tábaga' tu bi nu'ula xrnabe', ne chee guna' tábaga' tu zru'a lizre' tau zri'ing'. <sup>36</sup> Ca'an gaca, tu tu benne' til-lalę xrtía ljwezre' lę'.

<sup>37</sup> Che tu benne' nazri'idxenę' bi chee' ca' quezca neda', quebe naca chee' gaque' chia', na' che nazri'idxenę' bi chee' ca' quezca neda', quebe naca chee' gaque' chia'. <sup>38</sup> Che tu benne' quebe gun cuine' ca tu benne' zėajte'e lę'e xaga bėguaj, ne gunę' neda' tuze, quebe naca chee' gaque' chia'. <sup>39</sup> Benne' dxaca lazre' gapa chi'e xel-la' nabán chee' gunitię' na. Bėnnea' zúatequeze gudėę' xel-la' nabán chee' ne chia' neda', guselė' xel-la' nabán chee'.

*Da gunna Dios dxi'u*

*(Mr. 9.41)*

<sup>40</sup> Na' gunná Jesús:

—Che tu benne' gape' le'e ba lá'ana, neda'queze gape' ba lá'ana, na' bėnnea' dxape' neda' ba lá'ana, dxápaqueze' ba lá'ana Dios, Bėnnea' gusel-le' neda'. <sup>41</sup> Che tu benne' gape' ba lá'ana tu benne' dxuchalaje' waláz chee Dios lawe' da ze'e waláz chee Dios, benne' nigá wazí'queze' tuze ca da si' bėnnea' dxuchálaje' waláz chee Dios. Na' che tu benne' gape' ba lá'ana tu benne' xrlátaje lawe' da naque' benne' xrlátaje, benne' nigá wazí'queze' tuze ca da si' benne' xrlátaje na'. <sup>42</sup> Núteteze benne' gunėzruję' tu zriga' nisa zaga da xi'aj tu bidu caní lawe' da naque' chia' neda', da líqueze wazie' da gunezruj Dios lę'.

## 11

*Dxelezrín benne' ca' gusel-la Juan lau Jesús*

*(Lc. 7.18-35)*

<sup>1</sup> Gate bexuzre Jesús bchálajlęę' bėnneache, na' bchálajlęę' chazrinnu benne' ca' dxusėdene'. Bezė'e na' chee cheajsėdene', ne cheajchálaje' lban xúgute xęzre ca' lu xęzr la xu na'.

<sup>2</sup> Juan, bėnnea' bchue' bėnneache nisa, xu'e lizre xia, na' benne' ca naca da dxun Cristo. Nadxa gusel-le' chupa benne' ca' dxeledálęę' lę' lau Jesús. <sup>3</sup> Benne' chupe' caní buluchėbe' Jesús:

—¿Nacu' Lue' Cristo, Bėnnea' dxal-la' xidę', u che dxal-la' cuėzant u' xelá' xetú benne'?

<sup>4</sup> Na' bechėbe Jesús:

—Le chjaca cheajėzrele Juan da caní dxelė'ele, ne da dxenle. <sup>5</sup> Le xę'e ca dxaca, dxelexelė'e benne' gulaque' la chul-la. Dxelexedá benne' gulezúa zri ni'a ne'e. Belexexaca benne' gulezaque' wę' guzru', ne belexexaca ban benne' ca' gulatię'. Benne' xache' ca' dxelenęę' dizra' chawe' chee Dios. <sup>6</sup> Ba neza zrentę naca na chee bėnnea' quebe xucuán lazre' sálęę' neda'.

<sup>7</sup> Ca besí'aca benne' chupa ca', na' guzú lau Jesús dxuchálajlęę' benne' zaj zre'e na' ca naca chee Juan. Dxennė':



—¿Bizra xeajinna'le le'e le'e xixre' na'? ¿Xeajinna'le tu xia da dxuxrize be'?<sup>8</sup> Che cabí, ¿bizra xeajinna'le na'? ¿Xeajinna'le tu benne' nacue' zra lane' da zaca? Nézquezle benne' ca' zaj nácu'e' ladxe' zaca, lizre benne' dxelenná be'e zaj zra' benne' caní.<sup>9</sup> ¿Bizraqueze xeajinna'le? ¿Xeajinna'le tu benne' dxuchálaje' waláz chee' Dios? Awe'. Ca'an guca. Bénnea' blé'ele na' nácadxé' blau ca tu benne' dxuchálaje' waláz chee' Dios.<sup>10</sup> Lu xiche chee' Dios naxúaj na ca naca chee' Juan na'. Dxenná na': Neda' dxesel-la' benne' gubáz chia' nédxula ca Lue', chee' gucueze' neza naga teu'.<sup>11</sup> Da li dxapa' le'e, ládujla xúgute' bénneache quebe nu chilá' benne' nácadxé' blau ca naca Juan, bénnea' bchue' bénneache nisa. Naga dxenná bea Dios, bénnea' nácadxé' benne' dxexruj lazre' nácadxé' blau ca naca Juan na'.

<sup>12</sup> Ca lu zra bla' Juan, bénnea' bchue' bénneache nisa, bzrinté na'a zra, zaj zra' benne' dxelune' zi' lazre' xelu'e' naga dxenná bea Dios xabáa, na' benne' dxelune' zi' lazre' dxelezrué'ene' na'.<sup>13</sup> Ca da bzuaj Moisés lu xiche chee' da nadxixruj bea na, ne ca gulenná xúgute' benne' buluchálaje' waláz chee' Dios, dxuchalaj na ca naca chee' xel-la' dxenná bea chee' Dios, bzrinté ca bla' Juan na'.<sup>14</sup> Che le'e dxaca lázrele chéajle da nigá, Juan na' naque' Elías, bénnea' bchálaje' waláz chee' Dios gate nate, na' dxal-la' xel'é'e chee' guchálaje' waláz chee' Dios.<sup>15</sup> Che zua nágale, le xen da nigá.

<sup>16</sup> ¿Ájazra zaj naca benne' zaj zre'e na'a zra? Zaj naque' ca bidu ca' dxelebé'ebe' dxelítajbe' lawe' xi'a, ne dxelennebe' zizraj, dxelé' ljwézrebe' ca':<sup>17</sup> "Bcuézrentu' bchiuj san quebe bxá'ale le'e. Bil-la xáchentú' san quebe gudxézrele." <sup>18</sup> Caní zaj naque' lawe' da bla' Juan, quebe dxawe', ne quebe dxí'aje' da zaca, na' le'e dxennale xu'e be' xriwe'.<sup>19</sup> Nadxa bla' neda', Benne' Gulje' Bénneache, dxawa', ne dxí'aja', na' dxennale naca' neda' benne' wagu xrata, ne benne' dxí'aj, ne ljwezre benne' dul-la, ne benne' wechizruj chee' Roma. Naca bea nu benne' nape' xel-la' sina chee' Dios ne chee' da dxun bénnea'.

*Ca gaca chee' bénneache quebe dxuluzú'e' xrtizra' Dios  
(Lc. 10.13-15)*

<sup>20</sup> Nadxa guzú' lau Jesús dxedil-le' bénneache chee' xezre ca' naga bene' xel-la' waca ca' chee' xabáa, lawe' da quebe belexebí'i lazre' benne' zaj zre'e na'. Na' gunné':

<sup>21</sup> —Baxache' nácale le'e zrale xezre Corazín. Baxache' nácale le'e zrale xezre Betsaida. Caní nácale lawe' da checa' la ba guca lu xezre Tiro, ne lu xezre Sidón ca naca xel-la' waca ca' chee' xabáa ca da gulaca ládujla le'e, da zrenté ba zēj gulácu'e' zra lane' tuzruj, ne gulegú'e' de xíchaje' da zaj naca bea na belexebí'i lazre'.<sup>22</sup> Neda' dxapa' le'e, lu zra guchi'a Dios, gundxe' da ba xa' cheele quez ca da ba xa' gune' chee' benne' Tiro, ne benne' Sidón.<sup>23</sup> Le'e zrale xezre Capernaum, ¿dxéquele Dios wechise' le'e xabáa? Dios gudé'e' le'e lataj ba xa'. Caní gaca na lawe' da checa' la ba guca lu xezre Sodoma ca naca xel-la' waca ca' chee' xabáa ca da gulaca ládujla le'e, nagá' anatequeze xezre na' lu zra na'a zra.<sup>24</sup> Neda' dxapa' le'e, lu zra guchi'a Dios, gundxe' da ba xa' cheele quez ca gune' da ba xa' chee' benne' Sodoma ca'.

*Dxenná Jesús: "Le da naga zua' xezí' lázrele"  
(Lc. 10.21-22)*

<sup>25</sup> Ca lu zra na' gunná Jesús:

—Dxue lá'ana' Lue', Xrae, nacu' Xrana xabáa, ne Xrana xezr la xu nigá. Dxue lá'ana' Lue' lawe' da bcácheu' da caní lau benne' sina ca', ne lau benne' dxeléajni'ine', san blé'enu' na bidu caní.<sup>26</sup> Ca'an naca, Xrae, lawe' da naca na ca dxaca lazru' Lue'.

<sup>27</sup> Xra' ba bde'e' lu na'a xúgute' da caní. Quegá nu benne' núnbe'e' neda', Zri'ine Dios, san Xra' Dios núnbe'e' neda'. Quegá nu benne' núnbe'e' Xra', san neda', Zri'ine Dios, núnbe'a' Le', ne zaj núnbea benne' ca' Le', benne' ca' dxaca lazra' gulé'eda' le' ca naca Xra'.<sup>28</sup> Le da naga zua', xúgutele le'e dxéajxréquele lu zrin dxunle chee' xudau', ne ca naca xua da núale, na' neda' guna' xezí' lázrele.<sup>29</sup> Le gunna lataj xrúa' le'e ca nu benne' xru'e' bezre xugu' cheeba', ne le gusede chia' lawe' da naca' dxexruj lazre', ne dxé'ene lazre', na' wazrué'ele xezí' lázrele lu bénne'du xu'ule.<sup>30</sup> Da na' naca na ca xugu' chee' bezre da xrúa' le'e québeté ca naca na stébe chee' gúale na, na' xua da xrúa' le'e naca na zraze.

## 12

*Bi ca' dxusede Jesús dxelequ'e' dau zrúa' xtila gate naca zra dxulupá'ana judío  
(Mr. 2.23-28; Lc. 6.1-5)*

<sup>1</sup> Ca lu zra na' xu'u Jesús neza zéaje' ládujla naga de xel-la' zrúa' xtila, ne naca zra dxulupá'ana benne' judío. Dxeledún benne' ca' dxusede Jesús, na' gulezú' lawe' dxelálaje' dau naga zria zrúa' xtila, ne dxelawe' na. <sup>2</sup> Gate beelé'e benne' xudau' fariseo ca' da caní, na' gulé'e' Jesús:

—Guná' xque ca dxelún benne' ca' dxusédenu', dxelune' zrin da quebe naca chee' xelune' lu zra dxupá'anaxu.

<sup>3</sup> Jesús guzrë' benne' ca':

—¿Quebe ne gulábale le'e ca ben David gate na' le', ne benne' ljwezre' ca' guledunë'?  
<sup>4</sup> Guxú'ë lu xu'u cheë Dios, ne gulawë' xeta xtila lá'azxa, da quebe zaj naca cheë' xelawë',  
 le', ne benne' ljwezre' ca', san tuze bxruze ca' zaj naca cheë' xelawë' na. <sup>5</sup> ¿Quebe ne gulábale  
 da naxúaj na lu da bdxixruj be'e Moisés ca dxelún bxruze ca' lu xudau', dxelunë' zrin cheë  
 xudau' lu zra dxupá'anadxu, ne quebe zaj nabague' zria? <sup>6</sup> Neda' dxapa' le'e, ðe tu da naca  
 blaudxa ca xudau' nigá. <sup>7</sup> ¿Quebe ne chéajni'ile ca zéajë da naxúaj na lu xiche cheë Dios?  
 Dxenná na: Neda' dxaca lazra' xexache lázrele le sa' ljwézrele, ne quegá gútele be xíxre' du ca'  
 lu cugu chia'. La ba guxéajni'ile da nigá, quebe ne guzríá xile bënneache quebe zaj nabague'  
 dul-la. <sup>8</sup> Cheë lë na', neda', Benne' Guljé' Bénneache, napa' xel-la' dxenná bea dxuna' zrin  
 chia' lu zra dxupá'anadxu.

*Dxexún Jesús tu benne' zua zri ne'ë*

(Mr. 3.1-6; Lc. 6.6-11)

<sup>9</sup> Nadxa Jesús bezé'ë na', na' guxú'ë tu lu xu'u naga dxelúe lá'ang' Dios. <sup>10</sup> Zua tu benne'  
 zua zri ne'ë ga na'. Benne' judío ca' gulaca lazre' xelezrelne' ájala xelunë' cheë gaca xelagu  
 zrië' cheë Jesús. Cheë lë na' gulenábenë' Lë':

—¿Dxunna Dios lataj xexundxu benne' wë' lu zra dxupá'anadxu?

<sup>11</sup> Jesús guzrë' benne' ca':

—Núteðze benne' zuë' ládujla le'e, che zua tu zrila' cheë', ne che bíxreba' tu xëdxu situj lu  
 zra dxupá'anadxu, ¿quebe chéajë' cheajxeláje'-ba' xca'? <sup>12</sup> Da zrendxa zaca tu benne' quez ca  
 tu zrila'. Ca'an naca dxunna Dios lataj gundxu tu da xrlátaje lu zra dxupá'anadxu.

<sup>13</sup> Nadxa Jesús guzrë' benne' wë' na':

—Bli na'u.

Ca bli ne'ë, na' bexaca na ca ne'ë xetú. <sup>14</sup> Nadxa beledxúaj benne' xudau' fariseo ca', ne  
 gulezú lawë' dxeliláje' ájala xelunë' xelútië' Jesús.

*Da gunná tu benne' bchálaje' waláz cheë Dios ca dxal-la' gaca cheë Jesús*

<sup>15</sup> Gate gúquebe'e Jesús da nigá, na' bezé'ë na', na' benne' zantë zjácalenë' Lë'. Bexún Jesús  
 xúgute benne' wë' zaj zre'ë ládujla benne' ca'. <sup>16</sup> Jesús gunné xüenë' benne' ca' quebe nu  
 xululé'ene' nu naca Lë'. <sup>17</sup> Caní guca ca da gunná Isaías, benne' bchálaje' waláz cheë Dios,  
 gunné':

<sup>18</sup> Benne' nigá naque' wen zrin chia', benne' ba gucá'a.

Benne' nigá nazri'ida', ne dxezaca ba lázrelena' Lë'.

Guzúaqueza' xichaj lázrdawë' Be' Lá'azxa chia'.

Guzenne' bënneache xúgute xëzr la xu ca dxuchi'a da dxaca.

<sup>19</sup> Quebe tíl-lalequeze' bënneache, ne quebe cuézrexe'ë.

Netú benne' quebe xenne' chi'ë la neza.

<sup>20</sup> Quebe quichjé' tu xia da ba nachaj,

ne quebe xusul-lë' xi' da ba dxaca wexul-la na,

ca zrindxa zra xuzúë' xel-la' dxenná bea chawe' cheë'.

<sup>21</sup> Bénneache xúgute xëzr la xu xuluxrén lázrequeze' Lë'.

*Dxelennë' napa Jesús xel-la' dxenná bea cheë da xriwë'*

(Mr. 3.19-30; Lc. 11.14-23; 12.10)

<sup>22</sup> Nadxa guleché'ë lau Jesús tu benne' la chul-la, benne' quebe dxaca nnie', lawë' da  
 xu'ë be' xriwë'. Jesús bexunë' benne' nigá, na' belé'ene', ne benníë'. <sup>23</sup> Xúgute benne' ca'  
 belexebánenë', gulennë':

—¿Naca benne' nigá Zri'ine David zra?

<sup>24</sup> Gate belén benne' xudau' fariseo da nigá, na' gulennë':

—Benne' nigá dxebéajë' be' xriwë', dxuchínenë' xel-la' dxenná bea cheë Beelzebú, xrane  
 be' xriwë' ca'.

<sup>25</sup> Dxeque be'e Jesús ca da dxelennë', dxelé'ë ljwezre', na' guzre' lë':

—Lu xu'u lawë' cheë gátetëze xezre, che xelaca chupa la'a benne' xu'u lawë' ca', ne bal-le'  
 xeledíl-lalëne' xezicadxë', na' wexul-la wenite xel-la' dxenná bea cheë benne' ca'. Cá'anqueze  
 che tu xezre benne', u tu cue' xrtía ljwezre xelaque' chupa la'a, ne xeledíl-lalëne' le sa'  
 ljwezre', wenítequeze xezre na', u xrtía ljwezre ca'. <sup>26</sup> Cá'anqueze, che Satanás, da xriwë',  
 dxebéaje na ljwezre da xriwë', leze na dxexún na chupa la'a cuina na. ¿Ájazra gácaqueze nna  
 bea na? <sup>27</sup> Le'e dxennale chia' dxebéaja' be' xriwë' ca', dxuchíneda' xel-la' dxenná bea cheë  
 Beelzebú da xriwë'. Che naca na ca', ¿Nuzra dxúnnaqueze xel-la' dxenná bea cheë benne' ca'  
 zaj naca le'e tuze cheë xeledéajë' be' xriwë' ca'? Cheë lë na' léqueze' dxululé'etëne' nanéguele  
 le'e. <sup>28</sup> Che neda' dxebéaja' be' xriwë' ca' dxuchíneda' xel-la' waca cheë Be' Lá'azxa cheë Dios,  
 da nigá dxunna bea na ba bla' xel-la' dxenná bea cheë Dios ládujla le'e.

<sup>29</sup> '¿Ájazra gun tu benne' chu'e lizre tu benne' wal-la chee que'e da de chee' che nédxula quebe guchéaje' ni'a na' b'ennea'? Che gune' caní, na' wazéquene' que'e da de chee' b'ennea'.

<sup>30</sup> 'Nu benne' quebe dxácalene' neda', dxedábague' neda', na' benne' quebe dxexeZígalene' neda', dxexúsi'e na.

<sup>31</sup> 'Chee le na' dxapa' le'e, gunité lau Dios chee b'enneache xúgute' dul-la zaj nabague', ne xúgute da calela da dxelenné', san che xelenné' schanni' chee Be' Lá'azxa, cabata' gunité lau Dios chee'. <sup>32</sup> Núteteze benne', che bi nnie' schanni' chia' neda', Benne' Gulje' B'enneache, Dios gunité lawe' chee', san che tu benne' nnie' schanni' chee Be' Lá'azxa, québequeze gunité lau Dios chee' lu xezr la xu nigá ne cá'anqueze lu xezr la xu da za za'.

*Da dxun tu benne' dxule'e na ca naque'*

*(Lc. 6.43-45)*

<sup>33</sup> Na' gunná Jesús:

—Che naca chawe' tu xaga, dxebía na da zixre chawe', na' che naca tu xaga bize, dxebía na da zixre bize. Ca'an naca, tu xaga naca bea na ne chee da zixre da dxebía na. <sup>34</sup> Le'e, be snia ca'. ¿Ájazra gunle le'e nnele da xrlátaje che le'e nácaquezle benne' wen da calela xca'? Ca da dxedxuaj dxú'adxu naca na ca da zua na lu xichaj lázrdau. <sup>35</sup> Benne' xrlátaje dxenné' da naca xrlátaje lawe' da zua da xrlátaje lu xichaj lázrdawe', na' benne' wen da calela dxenné' da calela lawe' da zua da calela lu xichaj lázrdawe'. <sup>36</sup> Neda' dxapa' le'e, lu zra guchi'a Dios, xúgute b'enneache xuludé' ca da gulenné', tu tu dizra' xala da gulenné'. <sup>37</sup> Ca naca dizra' da ba gunnú', Dios guchi'e chiu', na' Le' nnáqueze' che xedxúaju' xrlátaje, u che webagu' zria.

*B'enneache wen da calela ca' dxelenábene' Jesús gune' tu xel-la' waca chee xabáa*

*(Mr. 8.12; Lc. 11.29-32)*

<sup>38</sup> Nadxa bal-la benne' xudau' fariseo, ne benne' dxuluxuzájle'e da nadxixruj bea Dios gulé'e Jesús:

—Benne' Weséde, dxaca lázrentu' le'entu' chiu' gunu' tu xel-la' waca da za xabáa.

<sup>39</sup> Na' guzre Jesús benne' ca':

—B'enneache wen da calela, benne' zaj naque' chupa lazre', dxelenábene' neda' guna' tu xel-la' waca da za xabáa. Quebe xelexé'eqeuzne' tu xel-la' waca, san tuze ca da dxunna bea na ca da guca chee Jonás, benne' b'chálaje' waláz chee Dios. <sup>40</sup> Ca guca chee Jonás, guxú'e lu le'e bela zren chunna zra chunna xela, cá'anqueze gaca chia' neda', Benne' Gulje' B'enneache, waxú'u'queza' lu xedxu ba chunna zra chunna xela. <sup>41</sup> Benne' gulezré'e xezre Nínive welexásaqueze' lu zra guchi'a Dios gate guchi'e chee b'enneache zaj zre'e na'a, na' benne' Nínive ca' xululé'ene' zaj nabaga zria benne' caní lawe' da belexebí'i lazre' benne' Nínive gate na' b'chalaj Jonás dizra' chee Dios lau benne' ca', na' blaudxa ca Jonás na' naca Benne' zue' nigá. <sup>42</sup> Cá'anqueze nu'ula na' gunná be'e chala'a naga dxedá gubizra beu' zaga ca' wexásaqueze' lu zra guchi'a Dios gate guchi'e chee b'enneache zaj zre'e na'a, na' nu'ula na' gulé'ene' zaj nabaga zria benne' caní lawe' da bezé'e naga naca zitu'te chee xezr la xu nigá chee xenne' dizra' sina da b'chalaj Salomón, na' blaudxa ca Salomón na' naca Benne' zue' nigá.

*Ca naca chee be' xriwe' da bexú'u na tu benne'*

*(Lc. 11.24-26)*

<sup>43</sup> Na' gunná Jesús:

—Gate tu be' xriwe' dxedxuaj na tu benne', na' dxedá na lataj naga nabizre, dxexilaj na naga xezí' lazre' na, na' che quebe xezrele na, na' dxenná na lu xichaj lázrdau na: <sup>44</sup> "Webi'a xexá'a lizra' naga bedxúaja'." Ca xezrin na, le'e na benne' na', naque' ca tu xu'u da naxilajbe lu'ule na, ne nalúa na, ne nagá'ana chawe na. <sup>45</sup> Nadxa cheaj na cheaxezri' na xegazre be' xriwe' da zaj naca na xriwedxa ca le na, na' xúgute na dxelú'u na lu b'ennea', na' naca chee benne' na' da caléladxa ca guca chee' nedxu. Cá'anqueze gaca chee b'enneache wen da calela caní.

*Benne' zaj naque' ca xrna Jesús, ne ca benne' biche' ca'*

*(Mr. 3.31-35; Lc. 8.19-21)*

<sup>46</sup> Jesús ne zue' dxuchálajlene' benne' caní gate belezrín xrne'e ne benne' biche' ca' ga na'. Gulezré'e chala'ajla, ne dxelaca lazre' xuluchálajlene' Jesús. <sup>47</sup> Nadxa tu benne' guzre' Jesús:

—Xrna'u, ne bi bichu' ca' zaj zre'e chala'ajla. Dxelaca lazre' xuluchálajlene' Lue'.

<sup>48</sup> Jesús guzre' benne' nigá:

—¿Núnbeale nuzra na' xrna'a, ne bi bícha'dau' cá'?

<sup>49</sup> Nadxa ble'e Jesús benne' ca' dxusédené', dxenné':

—Benne' caní zaj naque' xrna'a, ne bi bícha'dau' ca'. <sup>50</sup> Caní naca na lawe' da núteteze benne' dxune' ca da dxaca lazre' Xra' zue' xabáa, benne' nigá naque' benne' bicha', ne benne' zana', ne xrna'a.

## 13

*Da bsede Jesús ca da ben benne' dxaza*

*(Mr. 4.1-9; Lc. 8.4-8)*

<sup>1</sup> Lu zra na' bdxuaj Jesús xu'u, na' xeajdxé'ē dxu'a nísadau'. <sup>2</sup> Na' lawe' da belezraga benne' zante naga zua Jesús, guxú'ē tu lu da dxedá lawe' nísadau', ne gudxé'ē na'. Xúgute benne' ca' belexegá'ang' dxu'a nísadau' na'. <sup>3</sup> Nadxa bsede Jesús benne' ca' da zante da bchálaje', dxenné':

—Tu benne' dxaza guzé'ē zíaje' guza. <sup>4</sup> Dxácate dxaze', bal-la bínnedu ca' xeajlechaze na dxu'a neza. Na' belelá' bxínnedu ca', guláguba' bínnedu ca'. <sup>5</sup> Bal-la bínnedu ca' xeajlechaze na lu xiaj naga quebe dxé'teca xu. Bínnedu caní chadí gulezria na lawe' da quebe dxé'teca xu. <sup>6</sup> Gate bla' gubizra, na' gulecuade na. Lawe' da quebe dxé'teca xu, na' gulebizre na. <sup>7</sup> Bal-la bínnedu ca' xeajlechaze na naga bezriale'ē lba xeche', na' lba xeche' ca' belegua na, ne blule na da du ca' naze'. <sup>8</sup> Bal-la bínnedu ca' xeajlechaze na lu xu bebe, na' belúnnale'ē na. Bal-la xágadu ca' belunna na tu gaxúa tu tu na, na' xebal-la na belunna na ga xun tu tu na, na' xebal-la na belunna na chi dxua tu tu na. <sup>9</sup> Che zua nágale, le xene.

*Dxenná Jesús bizr chee na' dxuchálaje' da dxululé'e na*

*(Mr. 4.10-12; Lc. 8.9-10)*

<sup>10</sup> Nadxa benne' ca' dxusede Jesús gulebigue' naga zue' Le', ne buluchebe' Le':

—¿Bizr chee na' dxuchálajenu' benne' ca' da dxululé'e na?

<sup>11</sup> Bechebe Jesús, dxenné':

—Dios dxunne' lataj nézele le'e da nagache ca dxenná bea Le' xabáa, san benne' caní quebe dxu'ē lataj. <sup>12</sup> Benne' nape' late', Dios gunézrujdxé' le', na' gápale'ē, san benne' quebe bi nape', Dios wequé'ē ca da du nape'. <sup>13</sup> Chee le' na' dxuchálajenu' benne' caní da dxululé'e na, lawe' da cate' dxelenné'ē quebe dxelélé'eng'. Cate' dxelenné' quebe dxeléajni'ing'. <sup>14</sup> Ca naca da dxaca chee benne' caní dxaca na ca gunná Isaías, bénnea' bchálaje' waláz chee Dios, gunné':

Da li wenle. Cate' dxenle quebe dxéajni'ile.

Da li wanná'le. Cate' dxenna'le quebe dxelé'ele.

<sup>15</sup> Caní naca na lawe' da zaj naca lázrdau zide' benne' caní.

Quebe dxelaca lazre' xelenné'.

Dxulugácué' xiaj lawe' chee quebe xelélé'eng'.

Quebe dxelenné', na' quebe dxeléajni'ing'.

Quebe dxelaxilaje' neda' chee xexuna' le'.

<sup>16</sup> Ba neza zrentę naca na chee le'e lawe' da dxelé'ele nen xiaj laule, ne dxenle nen nágale. <sup>17</sup> Da li dxapa' le'e, benne' zante, benne' ca' buluchálaje' waláz chee Dios, ne benne' xrlátaje' ca' gulaca lazre' xelélé'eng' da caní dxelé'ele le'e. Quebe belelé'eng' na. Gulaca lazre' xelenné' da caní dxénnele le'e. Quebe belenné' na.

*Jesús dxuzéajni'ing' benne' ca' ca naca chee benne' dxaza*

*(Mr. 4.13-20; Lc. 8.11-15)*

<sup>18</sup> Na' gunná Jesús:

—Le xenne ca zéaje' da naca chee benne' dxaza nigá. <sup>19</sup> Benne' dxelenné' ca naca chee Bénnea' dxenná be'ē xabáa, ne quebe dxeléajni'ing' zaj naque' ca bínnedu ca' xeajlechaze na dxu'a neza. Za da xriwę' ne dxugúa na ca naca dizra' da ba gulezi'ē lu xichaj lázrdawe'.

<sup>20</sup> Ca naca chee bínnedu ca' xeajlechaze na lu xiaj, da caní dxululé'e na ca naca chee benne' ca' dxelezi'ē dizra' na' du lazre'. <sup>21</sup> Ca na' guca chee bínnedu ca', quebe guca xuludé lue na, ne quebe guzi' bea na, ca'an dxaca chee benne' caní, gate na' bí da dxelezaque', u che nu zeajnáu' z' xuzre' le' lawe' da zaj nazi'ē dizra' nigá, na' dxelexebigüe'. <sup>22</sup> Bínnedu ca' xeajlechaze na ládujla xeche' dxululé'e na ca naca chee benne' dxelenné' dizra' nigá, san dxelebe'le'ē gunne xue da naca chee xęzr la xu nigá, na' ca naca xel-la' gunní'a dxezi xę na benne' ca'. Xúgute da caní dxuluzaga na dizra' nigá, na' quebe dxun na da dxal-la' gun dizra' nigá lu xichaj lázrdawe'. <sup>23</sup> Ca naca chee bínnedu ca' da xeajlechaze na lu xu bebe, da caní dxululé'e na ca naca chee benne' ca' dxelenné' dizra' nigá, ne dxeléajni'ing' na, na' zaj naque' ca bínnedu ca' belúnnale'ē na. Bal-la benne' zaj naque' ca bínnedu ca' belunna na tu gaxúa tu tu na, na' xebal-le' zaj naque' ca bínnedu ca' belunna na ga xun tu tu na, na' xebal-le' zaj naque' ca bínnedu ca' belunna na chi dxua tu tu na.

*Da bchalaj Jesús ca naca chee xixre' zrinnaj da dxenná queze na ca dxenná' xel-la' zrua' xtíla*

<sup>24</sup> Nadxa bchalaj Jesús xetú da dxulé'e na, dxenné':

—Ca dxaca ga ni dxenná bea Dios naca na ca da guca gate tu benne' guze' binne cháwe'dau' lu xęzr la xu chee'. <sup>25</sup> Gate dxelase xúgute', na' bzrin tu benne' dxezre'ē le', ne

xeajaze' binne xixre' zrinnaj lávela zrua' xtila, na' bezé'ê. <sup>26</sup> Gate na' bgula xel-la' zrua' xtila, ne bla' dau chee na, cá'anqueze bla' xixre' zrinnaj ca'. <sup>27</sup> Nadxa benne' wen zrin ca' xeajleguezre' xrane na, dxelé'ê le': "Xran, guzu' binne cháwe'dau' lu xezr la xu chiu'. ¿Gazra guzá xixre' zrinnaj caní?" <sup>28</sup> Gunná xránabe': "Tu benne' dxezre'ê neda' bene' da nigá." Nadxa benne' wen zrin ca' buluchebe' le': "¿Dxaca lazru' chéajntu' cheajlépentu' xixre' zrinnaj ca'?" <sup>29</sup> Le' guzre' wen zrin ca': "Quebe gaca na. Gate na' lázrule xixre' zrinnaj ca', walázrutéle xel-la' zrua' xtila. <sup>30</sup> Xelegúlaxda na cháwe'la tu zren ca xecá'adxadxu zrua' xtila. Nadxa nna be'eda' benne' wen zrin ca' xelegué'ê nedxu xixre' zrinnaj ca', na' xuluchéaje' xeluné' tu xrúnjdu weaj chee guzédxedu na. Nadxa xeelape' zrua' xtila na', ne xezrá chawe' na lizra."

*Da bchalaj Jesús ca naca chee binne mostaza*  
(Mr. 4.30-32; Lc. 13.18-19)

<sup>31</sup> Nadxa bchalaj Jesús xetú da dxulé'e na, dxenné':  
—Da dxaca chee benne' dxelezi' lu ne'ê nna be'e Dios le' naca na ca da guca gate tu benne' guze' binne mostaza lu xezr la xu chee'. <sup>32</sup> Da li binne mostaza nigá naca na da bízrujdxa lawe' xúgute binne ca'. Gate ba nagula na naca na tu xaga zrendxa lawe' xúgute xixre' cuan. Dxaca na ca tu xaga zren naga dxelezeque' cheajlezria bxinnedu ca' xru'üneba' lu zruze na.

*Da bchalaj Jesús ca naca chee cua zichaj chee xeta xtila*  
(Lc. 13.20-21)

<sup>33</sup> Nadxa bchalaj Jesús xetú da dxulé'e na, dxenné':  
—Da dxaca chee benne' dxelezi' lu ne'ê nna be'e Dios le' naca na ca da guca gate tu nu'ula bchixre cua zichaj chee xeta xtila lawe' chunna xaga cua zrua' xtila, na' duté na guxasa na blithe.

*Ca bchine Jesús da dxulé'e na caní*  
(Mr. 4.33-34)

<sup>34</sup> Xúgute da caní bchálajle Jesús benne' ca', dxuchálaje' da dxululé'e na, na' quebe bchálajené' benne' ca' che quebe bchálaje' da dxululé'e na. <sup>35</sup> Caní guca ca da gunná benne' bchálaje' waláz chee Dios, gunné':  
Guchálaja' ca naca da dxulé'e na da guchálaja'.  
Gulé'eda' ca naca da nagache gate guzrete' xezr la xu.

*Jesús dxuzéajni'ing' ca naca chee da dxulé'e na chee xixre' zrinnaj da dxenná'queze na ca dxenná' xel-la' zrua' xtila*

<sup>36</sup> Nadxa Jesús bze' benne' ca' dizra', na' guxú'ê lu xu'u. Benne' ca' dxusede Jesús gulebigué' lau Le', na' gulé'ê Le':

—Bzéajni'i netu' da dxulé'e na ca naca chee xixre' zrinnaj da dxenná'queze na ca dxenná' xel-la' zrua' xtila.

<sup>37</sup> Nadxa Jesús guzre' benne' ca':  
—Bénnea' dxaze' binne cháwe'dau' nigá naque' Benne' Gulje' Bénneache. <sup>38</sup> Naga dxaze' binne nigá naca na lu xichaj lázrdau bénneache. Binne cháwe'du ca' zaj naca benne' ca' dxenná be'e Dios, na' xixre' zrinnaj ca' zaj naca na benne' ca' zaj naque' chee da xriwe'. <sup>39</sup> Bénnea' dxezre'ê xrane xezr la xu na', ne xeajaze' xixre' zrinnaj naque' da xriwe' ná'queze. Zra xeelape' naca na zra bzebe chee xezr la xu nigá, na' benne' ca' xeelape' zrua' xtila na' zaj naque' gubáz chee xabáa chee Dios. <sup>40</sup> Ca belexequé'ê xixre' zrinnaj ca', ne buluzré'ê na lu xi' chee xelexze na, ca'an gácaqueze lu zra bzebe na'. <sup>41</sup> Neda', Benne' Gulje' Bénneache, sel-la' gubáz chee xabáa chia' ca' chee xulucuase' naga nna be'a xúgute benne' ca' dxuluxrínajte' benne' xula, ne benne' ca' dxeluné' da calela. <sup>42</sup> Nadxa gubáz chee xabáa ca' xuluzré'ê benne' ca' dxeluné' da calela lu xi' gabila naga xelebezre', ne xeláguxa' até lazze'. <sup>43</sup> Nadxa benne' ca' dxeluné' da xrlátaje ca da dxenná be'e Dios xelácaqueze' ca gubizra naga dxenná bea Dios, Xra benne' ca'. Che le'e zua nágale, le xene.

*Da dxulé'e na ca naca chee tu xel-la' gunní'a da nagache*

<sup>44</sup> Na' gunná Jesús:  
—Naga dxenná bea Dios naca na ca tu xel-la' gunní'a da nagache na tu lu xezr la xu. Tu benne' bezrélené' xel-la' gunní'a nigá, na' bucache' na. Ne zúale'ê xel-la' dxebe' zexíaje' xeajxétie' xúgute da nape', na' bezi'ê xezr la xu na'.

*Da dxulé'e na ca naca tu bga da zácale'ê na*

<sup>45</sup> Na' gunná Jesús:  
—Naga dxenná bea Dios naca na ca tu da dxexilaj tu benne' wete, dxexilaje' bga ca' da zaj zaca na. <sup>46</sup> Gate dxezrélené' tu da zácale'ê, na' zexíaje' zeajxétie' xúgute da nape', na' si'ê bga na'.

*Da dxulé'e na ca naca tu xixruj bela*

<sup>47</sup> Na' gunná Jesús:

—Ca naca chee' benne' ca' xelexú'e naga dxenná bea Dios, naca na ca tu xixruj bela, da dxuluzale' lu nísadau', na' dxelezene' zane' cue' bela. <sup>48</sup> Gate dxezrá xixruj na', na' benne' ca' dxelezene' bela dxelexequé'e na dxu'a nísadau', na' dxelebé'e dxelexebé'e' bela ca'. Bela chawe' ca' dxuluxuzré'e-ba' lu xcuite, na' bela xala ca' dxeledxú'ume'-ba'. <sup>49</sup> Ca'an gaca lu zra bzebe na'. Xeledxúaj gubáz chee' xabáa ca', xelexebéaj'e' benne' ca' dxelune' da calela ládujla benne' xrlátaje ca'. <sup>50</sup> Xuluzré'e' benne' ca' dxelune' da calela lu xi' gabila, naga xebezre', ne xeláguxa'atē lazxe'.

*Da zaca ca da zaj naca na da cube, ne da zaj naca na da gula*

<sup>51</sup> Nadxa bchebe Jesús benne' ca', dxenné':

—¿Dxéajni'ile le'e xúgute' da caní?

Benne' ca' gulenné':

—Awe', Xran.

<sup>52</sup> Nadxa guzre' benne' ca':

—Gate tu benne' dxusédene' da nadxixruj bea Dios, ne nazédene' ca dxenná bea Dios, naque' ca tu benne' xrane xu'u nézene' cuéaje' da zaj naca na da cube, ne da zaj naca na da gula ládujla da nuzrá chawe'.

*Jesús dxexezrine' Nazaret*

(Mr: 6.1-6; Lc. 4.16-30)

<sup>53</sup> Gate bexuzre bchalaj Jesús da dxulé'e na caní, na' bezé'e na'. <sup>54</sup> Bezrine' naga naca lazrie'. Na' guzú lawe' dxusédene' benne' ca' zaj zré'e lu xudau' chee' xezre na', na' belexebanne benne' ca', gulenné':

—¿Gazra bsede benne' nigá xel-la' sina nigá? ¿Ájazra dxune' xel-la' waca caní? <sup>55</sup> Benne' nigá naque' zri'ine gubizre xaga, na' naca xrne'e María. Naque' bi biche Jacobo, ne José, ne Simón, ne Judas. <sup>56</sup> Bi zane' zaj zue' nigá nen dxi'u. ¿Ájazra na' dxaca dxune' da caní?

<sup>57</sup> Chee' le' na' buluzú'e Jesús chalá'ala. Jesús guzre' benne' ca':

—Xúgute' benne' xula dxelape' ba lá'ana tu benne' dxuchálaje' waláz chee' Dios. Benne' lazrie', ne xrtia ljwezre' quebe dxelúne' ca'.

<sup>58</sup> Jesús quebe bñteque' na' xel-la' waca ca' lawe' da quebe guléajle'e chee'.

## 14

*Ca gute Juan, bñnea' bchue' bñneache nisa*

(Mr: 6.14-29; Lc. 9.7-9)

<sup>1</sup> Lu zra na' Herodes, benne' dxenná be'e xezre ca' zaj nababa na Galilea, benne' ca naca da dxun Jesús. <sup>2</sup> Na' guzre' bi wēn zrin chee' ca':

—Benne' nigá naque' Juan, bñnea' bchue' bñneache nisa. Ba bebane' ládujla benne' gate. Chee' le' na' nape' xel-la' waca zren nigá.

<sup>3</sup> Caní gunné' lawe' da gudēla Herodes nigá Juan na', ne bchéaje' le' du xia, ne gulu'e le' lizre xia. Beñe' caní ne chee' Herodías, zru'ula Felipe, biche Herodes na'. <sup>4</sup> Caní beñe' lawe' da guzre Juan le':

—Quebe naca chiu' súalenu' nu'ula nigá.

<sup>5</sup> Herodes guca lazre' gutiē' le', san dxezrebe' da xelún bñneache ca' lawe' da dxeléquene' naca Juan benne' dxuchálaje' waláz chee' Dios. <sup>6</sup> Gate bzrin zra dxezría iza Herodes, na' belune' laní chee', na' bxa'a bi nu'ula chee' Herodías na', na' bezaca ba lazre' Herodes na' da dxunbe'. <sup>7</sup> Chee' le' na' Herodes guchebe lazre' lau benne' ca' gunézruje' ca da naba bi nú'uladu na'. <sup>8</sup> Lawe' da ba guzre xrnabe' lebe', na' gunabe':

—Benna nigá xichaj Juan, bñnea' bchue' bñneache nisa. Gulú'u na tu lu xé'ena.

<sup>9</sup> Nadxa guzúa stebe Herodes, bñnea' dxenná be'e, san lawe' da ba guchebe lazre', na' benne' zaj zré'e dxágulene' le' belenne' ca', chee' le' na' guzre' tu benne' wēn zrin chee' gunézruje' na lebe'. <sup>10</sup> Gunná bé'ene' nu benne' guchugue' xichaj Juan naga xu'e lizre xia. <sup>11</sup> Nadxa xejlexrí'e xíchaje' tu lu xé'ena, ne bulunézruje' na bi nú'uladu na', na' lebe' bnézrujbe' na xrnabe'.

<sup>12</sup> Nadxa belezrín benne' ca' bsede Juan, na' belexú'e le', ne xejlecachē' le'. Nadxa xjaque' xejleguezre' Jesús.

*Dxugagu Jesús chi xun gaxúa benne' biu*

(Mr: 6.30-44; Lc. 9.10-17; Jn. 6.1-14)

<sup>13</sup> Gate ben Jesús da na', na' bezé'e na', bexu'e tu lu da dxedá lawe' nísadau', na' bzrine' tu naga quebe nu zra' benne'. Gate belén bñneache, na' gusiá'que' ni'e, na' belezrine' naga zua Jesús. <sup>14</sup> Gate bedxúaj Jesús lu da dxedá lawe' nísadau', na' blé'ene' benne' zante, ne bexache

lazre' le', na' bexune' benne' ca' quebe chawe' zaj zue'. <sup>15</sup> Gate ba za xrinne, benne' ca' dxusede Jesús gulebigue' lau Le', dxelenné':

—Lataj nigá quebe bi de, ne ba dxedé zra. Bze benne' caní dizra' chee chjaque' xézredu ca', ne xezezi'e da xelawe':

<sup>16</sup> Jesús guzre' le':

—Quebe dxun na ba xen chjaque'. Le gunezruj le'e da xelawe'.

<sup>17</sup> Benne' ca' gulé'e Le':

—Gáxxuze xeta xtila de cheedxu nigá, ne chúpaze bela.

<sup>18</sup> Jesús guzre' benne' ca':

—Le gunna na nigá.

<sup>19</sup> Nadxa gunná bé'ene' gulebé' benne' zan ca' lawe' zrie. Guqu'e xeta xtila, ne bela ca', na' gunné'e xabaala, ne guzre' Dios: "Xcalenu'." Nadxa bzúruje' xeta xtila, ne bnéruje' na benne' ca' dxusédene', na' benne' ca' gulisie' na lávela benne' zan ca'. <sup>20</sup> Xúguté' gulawe', ne guléajene'. Ca gudé na' bulusuzre'e chazrinnu ga' da bizrujdu ca' zaj nagá'ana. <sup>21</sup> Benne' gulawe' na zaj naque' chi xun gaxúa benne' biu, ne quebe nu'blaba nu'ula, ne bidu ca'.

*Jesús dxedé' lawe' nisa*

(Mr. 6.45-52; Jn. 6.16-21)

<sup>22</sup> Nadxa gunná be'e Jesús benne' ca' dxusédene' xelu'e lu da dxedá lawe' nísadau' chee xelagüe' nísadau' nédxudxa ca Le' chee xelexezrine' xéxala'a nísadau' na', dxácaté Le' dxuzé benne' zan ca' dizra'. <sup>23</sup> Ca gudé bze' dizra' benne' zan ca', na' guluéne' tu lu xi'a xejchálajlene' Dios naga zue' tuzé'. Gate guxrinne zua Jesús tuzé' na'. <sup>24</sup> Dxácaté na' ba zeaj da na' dxedá lawe' nísadau' gachajláwe'té nísadau' na'. Nadxa guxasa xejxruza chee nísadau' na', da dxutá na da dxedá lawe' nísadau' na', lawe' da dxácale'e be', ne quebe dxue na lataj sa na. <sup>25</sup> Gate gudé dxela gubiga Jesús naga zaj zre'e, zéaje' lawe' nisa. <sup>26</sup> Gate belelé'e benne' ca' dxedá Jesús lawe' nisa, na' belezrebe', na' lu xel-la' dxelezrebe gulebézrexe'e, gulenné':

—Da dxedá dxela na'.

<sup>27</sup> Jesús guzre' benne' ca':

—Le gun dipa lázrele. Neda' nigá. Quebe zrébele.

<sup>28</sup> Na' gunná Pedro, dxé'e Jesús:

—Xran, che Lue' na', gunná be'e xida' lawe' nisa naga zu' na'te.

<sup>29</sup> Jesús guzre' le':

—Gudá xca'.

Nadxa Pedro bdxúaje' lu da dxedá lawe' nísadau', ne guzú lawe' dxeze'e lawe' nisa chee zrine' naga zua Jesús. <sup>30</sup> Gate dxeque be'ene' ca dxun be' na', na' bzrebe', ne guzú lau dxazie' lu nísadau' na'. Ca'an guca gudxezre xe'e, gunné':

—Xran, becá'a neda'.

<sup>31</sup> Nadxa becá'a Jesús ne'e, ne guzre' le':

—Látega dxeajlí lazru' neda'. ¿Bizr chee na' ben chupa lazru'?

<sup>32</sup> Gate belexegüene' lu da dxedá lawe' nísadau', na' bebé' zri be' na'. <sup>33</sup> Nadxa benne' ca' zaj zre'e lu da dxedá lawe' nísadau' na' buluzú zribe' lau Jesús, dxelé'e Le':

—Da li nacu' Zri'ine Dios.

*Jesús dxexune' benne' we' ca', benne' zaj zre'e lu xezre Genesaret*

(Mr. 6.53-56)

<sup>34</sup> Guledé' xecha la'a nísadau', na' belezrine' lu xezr la xu chee benne' Genesaret ca'. <sup>35</sup> Gate benne' ca' zaj zre'e xezre na' belexexúnbe'e Jesús, na' buludé' dizra' xezícala xézredu ca', na' guleché'e xúguté benne' we' naga zua Jesús. <sup>36</sup> Gulata' xuene' Jesús gu'e lataj xulutá benne' ca' zra lané' naze. Xúguté benne' buluté' zra lané' belexexaque'.

## 15

*Da dxuxrinnaj na bénneache*

(Mr. 7.1-23)

<sup>1</sup> Nadxa benne' fariseo ca', ne benne' dxuluxuzájle'e da bdxixruj be'e Moisés, benne' ca' beledxuaje' lu xezre Jerusalén, gulebigue' lau Jesús, na' buluchebe' Le', dxelenné':

<sup>2</sup> —¿Bizr chee na' benne' ca' dxusédenu' quebe dxuluzú'e dizra' ca naca da gulún xra xrtaudxu? Quebe dxelibequeze ne'e ca naca da zéajlentu' gate dxelawe'.

<sup>3</sup> Jesús bchebe' benne' ca', gunné':

—¿Bizr chee na' le'e quebe dxuzuale dizra' da dxenná be'e Dios? Dxunle ca naca da zéajlele. <sup>4</sup> Dios gunné': "Gudapa ba lá'ana xra xrna'u." Cá'anqueze gunné': "Benne' nne' schanni' chee xra xrne'e, le gute bénnea!" <sup>5</sup> Le'e dxennale waca xe tu benne' xra xrne'e: "Quebe séqueda' bi gunna' le'e lawe' da ba guchebe lazra' gunézruja' Dios xúguté da de chia'." <sup>6</sup> Dxennale che tu benne' dxune' caní québedxa dxun na ba xen gácalene' xra xrne'e. Caní

dxunle le'e, dxuzuale chala'ala da bdxixruj be'e Dios, chee gunle ca naca da zéajlele. <sup>7</sup> Le'e, láweze dxunle da xrlátaje. Da li naca da gunná Isaías, bënnea' bchálaje' waláz chee Dios, ca naca chee le'e, gunné':

<sup>8</sup> Benne' caní dxelape' neda' ba lá'ana nen dxú'aze'.

Quebe dxelape' neda' ba lá'ana duté lázrdawe'.

<sup>9</sup> Dácheze naca dxelúe lá'ane' neda'.

Da gulenná be'ene' bënneache naca na da ca' dxulusédene'.

<sup>10</sup> Nadxa Jesús gunné' benne' ca', dxenné':

—Le xene, ne le chéajni'i. <sup>11</sup> Da dxu'u na dxu'a bënneache quegá le na guxrinnaj na bënneache. Da dxedxuaj na dxu'a bënneache naca na da dxuxrinnaj na bënneache.

<sup>12</sup> Nadxa benne' ca' dxuséde Jesús gulebigue' lau Le'. Dxelé'e Le':

—¿Nézenu' gulaca tula benne' xudau' fariseo ca' gate belenne' da gunnáu'?

<sup>13</sup> Jesús guzre' benne' ca':

—Bíteteze xágadau' da quebe guza Xra' zué' xabáa, welépeda'. <sup>14</sup> Le gusan benne' ca'. La chul-la zaj naque', ne dxulusi'e neza le sa' ljwezre' la chul-la ca'. Che tu la chul-la che'e le sa' ljwezre' la chul-la, dxúpate' xelebixre' tu lu xedxu.

<sup>15</sup> Nadxa Pedro guzre' Jesús:

—Bzéajni'i netu' ca naca chee da dxulé'e nigá.

<sup>16</sup> Gunná Jesús:

—¿Cá'anqueze le'e quebe dxéajni'ile? <sup>17</sup> ¿Quebe nézele xúgute' da dxu'u na dxú'adxu zeaj na le'edxu, na' te na' xedxuaj na? <sup>18</sup> Da dxedxuaj na dxú'adxu naca na da za' lu xichaj lázrdaudxu. Da nigá naca na da dxuxrinnaj na bënneache. <sup>19</sup> Lu xichaj lázrdau bënneache dxeledxuaj da dxezá lazre' da calela, ca naca xel-la' wete benne', ne ca naca xel-la' zuale zru'ula benne' xula, ne ca naca da sban da dxelún bënneache, ne ca naca xel-la' gubán, ne xel-la' wen lazre', ne xel-la' wetupa dizra' bizruj. <sup>20</sup> Da caní dxuluxrinnaj na bënneache. Che tu benne' quebe dxexibe ne'e ca da zéajlele gate dxawe' xeta, da nigá quebe dxuxrinnaj na le'.

*Tu nu'ula zitu' dxéajle'e chee Jesús*

*(Mr. 7.24-30)*

<sup>21</sup> Nadxa bedxuaj Jesús na', zexíaje' chala'a naga zaj nababa xezre Tiro, ne xezre Sidón.

<sup>22</sup> Tu nu'ula Canaán zué' na' ze'e dxebezre xe'e cúzrela Jesús, dxenné':

—Xran, Zrí'ine David, bexache lazre' neda'. Xu'ube' be' xriwe' zrí'ina' nu'ula, ne cáitega dxezácabe'.

<sup>23</sup> Quebe bi bechebe Jesús. Nadxa belezrín benne' ca' dxusédene', ne gulata' xuene' Le', gulé'e Le':

—Bsel-la nu'ula nigá lawe' da ze'e dxebezre xe'e cúzrudxu.

<sup>24</sup> Nadxa gunná Jesús:

—Dios gusel-le' neda' gácaleza' benne' Israel ca' zaj naque' ca zrí'adu ca' zaj naníteba'.

<sup>25</sup> Gubiga nu'ula na' naga zua Jesús, ne bzu zribe' lau Le', ne dxé'e Le':

—Xran, gúcale neda'.

<sup>26</sup> Jesús guzre' le':

—Quebe naca xrlátaje cá'adxu da dxelagu zrí'inedxu, chee gunézrujdxu na bécudu ca'.

<sup>27</sup> Nadxa nu'ula na' guzre' Jesús:

—Awe', Xran, san bécudu ca' dxeláguquezeba' da bízrujdu ca' dxelexruj zran naga dxelagu xránaba'.

<sup>28</sup> Nadxa Jesús guzre' le':

—Nú'uladu, da zrenté naca xel-la' dxeajlí lazre' chiu'. Gaca ca dxaca lazru'.

Lu zra ná'queze bexaca zrí'ine' nú'uladu na'.

*Jesús dxexuné' benne' zanté benne' we'*

<sup>29</sup> Jesús guzre' na', gudé'e dxu'a nísadau' chee Galilea. Guluéne' tu lu xi'a, ne gudxé'e na'.

<sup>30</sup> Benne' zan belezrine' naga zua Jesús, zaj naché'e benne' zrinnaj ca', ne benne' la chul-la ca', ne benne' quebe dxaca xelenné', ne benne' zan zaj nadxugu ni'a na', ne zánedxa benne' we'. Buluzré'e benne' ca' lau Jesús, na' Le' bexuné' le'. <sup>31</sup> Ca'an guca belexebane benne' ca' gate belelé'ene' dxelenné' benne' ca' quebe guca xelenné' nédxula, ne belexexaca benne' ca' gulaque' benne' ni'a na' dxugu, ne dxeledá benne' ca' gulaque' benne' zrinnaj, ne dxelelé'e benne' ca' gulaque' benne' la chul-la. Gulezú lawe' dxelúe lá'ane' Dios chee benne' Israel ca'.

*Jesús dxugawe' tapa cue' tu gaxúa benne' biu*

*(Mr. 8.1-10)*

<sup>32</sup> Nadxa Jesús gunné' benne' ca' dxusédene'. Dxe'e le':



—Dxexache lazra' chee benne' caní lawe' da ba zeaj chunna zra zráleṅe' neda' nigá, ne quebe bi de da xelawe'. Quebe dxaca lazra' xesel-la' le' chee cheajxaque' lizre' quebe ne xelawe' chee quebe xelate ni'a ne'e la neza.

<sup>33</sup> Nadxa benne' ca' dxusede Jesús gulé'e Le':

—¿Ájazra guntu' zrélentu' da xelagu cátiṅe' benne' zan caní? Lataj nigá quebe nu chilá' benne' zua lizre' nigá.

<sup>34</sup> Jesús bchebe' benne' ca', dxenné':

—¿Bal-la xeta xtila nápa'e?

Benne' ca' belexechebe':

—Gazre na, ne xetú chupa béladau'.

<sup>35</sup> Nadxa Jesús gunná bé'ene' benne' zan ca' xebebé'e lu xu. <sup>36</sup> Guqué'e da gazre xeta xtila, ne béladu ca', na' guzre' Dios: "Xcalenu'." Nadxa bzúzruje' na, ne bnézruje' na benne' ca' dxusédeṅe', na' benne' ca' gulisie' na chee benne' zan ca'. <sup>37</sup> Xúgute' gulawe', ne belélajtene'. Gudé na' bulusuzraté' gazre ga' da bízrujdu ca' zaj nagá'ana. <sup>38</sup> Benne' gulagu zaj naque' tapa cue' chi gaxúa benne' biu, ne quebe nu blaba nu'ula, ne bidu ca'. <sup>39</sup> Gudé na' Jesús bze' benne' zan ca' dizra', na' bexu'e lu da dxedá lawe' nísadau' zexíaje' naga nababa xezre Magdala.

## 16

*Dxelenabe' Jesús guné' tu xel-la' waca chee xabáa*

(Mr. 8.11-13; Lc. 12.54-56)

<sup>1</sup> Benne' xudau' fariseo ca', ne benne' xudau' saduceo ca' xjaque' naga zua Jesús chee xuluxunéguene' Le'. Chee le' na' gulenabe' Jesús guné' tu xel-la' waca zrenté da za xabáa. <sup>2</sup> Jesús bechebe' benne' ca':

—Xelate' zua gubizra dxennale le'e: "Gun chawe' wxre lawe' da da' beuj xrna zran xabáa." <sup>3</sup> Che zílala dxennale: "Quebe chawe' gun na'a zra lawe' da dá'le'e beuj xrna zran xabáa." Le'e dxulé'e cuínale da quebe nácale. Dxácaqueze dxennale ca' naca da gun zran xabáa. Quebe dxaca xuzájla'ale ca' sa'yeaj da dxaca na'a zra. <sup>4</sup> Benne' wen da caléla caní, benne' zaj nabéaj xíchaje' Dios, dxelenabe' guna' tu xel-la' waca zrenté. Quebe xeledé'ene' xetú xel-la' waca. Weledé'ene' tuze da gaca na ca da guca chee Jonás.

Nadxa bulucá'ana Jesús benne' ca', zjá'aque'.

*Da dxelún benne' xudau' ca' da naca na ca' zichaj chee xeta xtila*

(Mr. 8.14-21)

<sup>5</sup> Gate benne' ca' dxusede Jesús guladé' xechalá'a nísadau', na' gual-la lazre' xelu'e chizre'. <sup>6</sup> Jesús guzre' le':

—Le nna'xque. Le guxúe cuínale ca' naca chee' cua zichaj chee xeta xtila chee benne' fariseo ca', ne chee benne' saduceo ca'.

<sup>7</sup> Benne' ca' dxusede Jesús gulezú lawe' dxelé' ljwezre':

—Caní dxenné' lawe' da quebe núadxu xeta xtila.

<sup>8</sup> Jesús dxeque be'ene', na' guzre' le':

—¿Bizr chee na' dxennale naca na lawe' da quebe núale xeta xtila? Láteze dxéajle' chia'. <sup>9</sup> ¿Quebe ne chéajni'ile, ne quebe dxejásá lázrele chee da gazxu' xeta xtila da bgawa' gazxu' cue' chi gaxúa benne' biu, ne bal-la ga' becá'ale? <sup>10</sup> ¿Quebe dxejásá lázrele chee da gazre xeta xtila da bgawa' tapa cue' chi gaxúa benne' biu ca', ne bal-la ga' becá'ale? <sup>11</sup> ¿Ájazra na' quebe dxeque be'ele quegá bchálaja' chee xeta xtila gate gunnía' le' guxúe cuínale ca' naca chee' cua zichaj chee xeta xtila chee benne' fariseo ca', ne chee benne' saduceo ca'?

<sup>12</sup> Nadxa guleque bé'ene' quegá guzre Jesús le' xuluxúe cuine' chee da naca cua zichaj chee xeta xtila, san ca' naca da dxulusede benne' fariseo ca', ne benne' saduceo ca'.

*Pedro dxenné' Jesús naque' Cristo*

(Mr. 8.27-30; Lc. 9.18-21)

<sup>13</sup> Gate bzrin Jesús naga nababa xezre Cesarea da ben Filippo, na' bchebe' benne' ca' dxusédeṅe':

—¿Nuzra na' dxelenná bénneache naca' neda', Benne' Gulje' Bénneache?

<sup>14</sup> Na' benne' ca' gulenné':

—Bal-la benne' dxelenné' nacu' Juan, bénnea' bchue' bénneache nisa. Xebal-le' dxelenné' nacu' Elías, na' xebal-le' dxelennáqueze' nacu' Jeremías, u xetú benne' bchálaje' waláz chee Dios.

<sup>15</sup> Nadxa guzre Jesús benne' ca':

—¿Gazra le'e? ¿Nuzra na' dxennale naca'?

<sup>16</sup> Gunná Simón Pedro:

—Lue' nacu' Cristo, Zri'ine Dios ban.

<sup>17</sup> Bechebe Jesús:

—Ba neza zren naca na chiu' Simón, zri'ine Jonás. Netú benne' quebe ne gulé'eng' lue' da nigá, san Xra' zua xabáa, Le' blé'eng' lue'. <sup>18</sup> Neda' dxapa' lue', nacu' Pedro, da zéaje na tu xiaj, na' lawe' xiaj xre nigá guzúa' benne' xeleajlí lazre' neda', na' xel-la' dxenná bea chee da xriwe' quebe seque na gucu'uj na benne' ca'. <sup>19</sup> Neda' gunna' lue' da naca na zren xia chee xel-la' dxenná bea chee xabáa, na' da guchéaju' lue' lu xezr la xu nigá gaca na da ba nadxéajqueze na xabáa, na' da xesezru' lue' lu xezr la xu nigá gaca na da ba naxézrequeze na xabáa.

<sup>20</sup> Nadxa Jesús gunná bé'eng' benne' ca' dxusédene' chee quebe nu xelé'ē naca Le' Cristo.

*Jesús dxuchálaje' ca gaca gate gatie'*

(Mr. 8.31—9.1; Lc. 9.22-27)

<sup>21</sup> Lu zra ná'queze guzú lau Jesús dxuzéajni'ing' benne' ca' dxusédene' dxal-la' xexiáje xezre Jerusalén, na' benne' gula ca', ne benne' xíchaje ca' chee bxruze ca', ne benne' dxuluxuzájle'ē da nadxixruj bea Dios wulusaca zi'ē Le'. Na' guzre' benne' ca' dxusédene' welute benne' Jerusalén ca' Le'. Nadxa gate gaca chunna zra xebané'.

<sup>22</sup> Nadxa Pedro guléaje' Jesús chalá'ala, ne guzú lawe' dxedil-le' Le', dxenné':

—Dios quebe gu'ē lataj, Xran. Cabata' gaca chiu' da caní.

<sup>23</sup> Jesús hexéahaje', na' guzre' Pedro:

—Gucuasa cuita' neda', lue', da xriwe', lawe' da nacu' tu da dxusunegue na neda'. Quebe dxulaba lazru' ca dxun Dios. Ca dxun bēneache dxulaba lazru'.

<sup>24</sup> Nadxa Jesús guzre' benne' ca' dxusédene':

—Che nu benne' dxaca lazre' gaque' neda' tuze, dxal-la' guzúe' chalá'ala da naca chee', ne guzúa cuine' chee gatie', na' nadxa gaca xidalene' neda'. <sup>25</sup> Bēneae' dxaca lazre' gapa chí'ē xel-la' nabán chee' gunitiē' na. Bēneae' gunitiē' xel-la' nabán chee' lawe' da dxune' zrin chia', benne' nigá zrué'eng' xel-la' nabán du lazre'. <sup>26</sup> ¿Bízraqueze ba neza naca na chee' tu benne' che gata' chee' xúgute xel-la' gunní'a da de lu xezr la xu nigá, na' cuia xi'ē lau Dios? Quebe bi gaca quizruj tu benne' chee la bēne' du xu'e lau Dios. <sup>27</sup> Neda', Benne' Gulje' Bēneache wida' xecha lasa nen xel-la' szren chee Xra', ne nen gubáz chee xabáa ca'. Nadxa xuzria chee tu tu benne' ca naca da zaj nun tu tue'. <sup>28</sup> Da li dxapa' le'e, bal-la benne' zaj zre'ē nigá quebe xelatie' cadxa xelelé'eng' neda', Benne' Gulje' Bēneache, xida' xedajnná be'a.

## 17

*Dios dxuché'ē ca dxenná' lau Jesús*

(Mr. 9.2-13; Lc. 9.28-36)

<sup>1</sup> Ca gudé guca xrupa zra, na' Jesús guché'ē Pedro, ne Jacobo, ne Juan, bi biche Jacobo, na' bi cá'aze xjácálenē' Le' tu lau xi'a sibe. <sup>2</sup> Na' Dios bche'ē ca dxenná' lau Jesús lávela benne' ca'. Lawe' guca tite na ca gubizra, na' zra lane' guca na da chiche ca xel-la' naxaní'. <sup>3</sup> Na' benne' caní belelé'eng' Moisés, ne Elías, benne' gulezrá' gate nate, dxuluchálajlene' Jesús. <sup>4</sup> Nadxa Pedro guzre' Jesús:

—Xran, cháwe'le'ē zúadxu nigá. Che dxaca lazru', guntu' chunna xu'u lágadau', tu chiu', ne tu chee Moisés, ne tu chee Elías.

<sup>5</sup> Dxácatē dxenné' Pedro, bla' tu beuj da dxaca tite na, da gucu na benne' ca', na' lu beuj na' belenne' chí'i Dios, dxenné':

—Benne' nigá naque' Zri'ina' nazrí'ite lazra', ne chee Le' dxezaca ba lazra'. Chee Le' le xene.

<sup>6</sup> Gate belenne' da nigá, na' gulatē' sudxú'ala lu xu. Dxelezrébele'ē. <sup>7</sup> Nadxa Jesús gubigue' naga zaj zre'ē, na' bte' benne' ca', ne guzre' le':

—Le chasa. Quebe zrébele.

<sup>8</sup> Gate na' belenné'ē, québedxa nu belelé'eng'. Tuze Jesús zuē'.

<sup>9</sup> Nadxa gate dxelaxétaje' lu xi'a na', Jesús gunná bé'eng' benne' ca', dxenné':

—Quebe nu guchálajlele ca da ble'ele ca zrindxa zra neda', Benne' Gulje' Bēneache, xebana' ládujla benne' gate.

<sup>10</sup> Nadxa benne' ca' dxusede Jesús buluchēbe' Le':

—¿Bizr chee na' dxelenná benne' ca' dxuluxuzájle'ē da nadxixruj bea Dios dxun na ba xen xelá' Elías nédxudxa ca xelá' Cristo?

<sup>11</sup> Jesús guzre' benne' ca':

—Da li xelá' Elías nédxudxa, ne gucá'ana chawe' ca naca da dxal-la' gaca. <sup>12</sup> Neda' dxapa' le'e, ba bla' Elías, na' benne' ca' quebe belexúnbe'ē le'. Bulusaque' le' cáteze da gulaca lazre'. Cá'anqueze xulusaque' neda', Benne' Gulje' Bēneache.

<sup>13</sup> Nadxa benne' ca' dxusède Jesús guléque be'ene' dxuchalaj Jesús ca naca chee Juan, bènea' bchue' bèneache nisa.

*Jesús dxexune' tu bi biu dxe'ebe' chuna'*

(Mr. 9.14-29; Lc. 9.37-43)

<sup>14</sup> Gate belezrine' naga zaj zra' benne' zante, na' tu benne' gubigue' naga zua Jesús, ne bzu zribe' lau Le', dxenné':

<sup>15</sup> —Xran, bexache lazre' zri'ina', dxe'ebe' chuna', ne da zrente' da dxezácabe'. Zánete' lasa ba xeajcházebe' lu xi', ne lu nisa. <sup>16</sup> Ba bedajgu'a-be' lau benne' caní dxusédenu', na' quebe guca xelexune'-be'.

<sup>17</sup> Jesús bechebe':

—Le'e, benne' wen chupa lazre', ne benne' lázrdau zide'. ¿Bátate zúalena' le'e? ¿Bátate naca' zren lazre' nen le'e? Le cheajxri' bi cuide' na' nigá.

<sup>18</sup> Nadxa Jesús gudil-le' be' xriwe' na', na' bebéaje' na lu bel-la' dxen chee bi cuide' na', na' zra ná'queze bexacátébe'.

<sup>19</sup> Gudé na' benne' ca' dxusède Jesús gulenné' Le' chalá'ala, na' buluchebe' Le':

—¿Bizr chee na' quebe guca netu' xebéajntu' be' xriwe' na'?

<sup>20</sup> Jesús guzre' benne' ca':

—Lawe' da naca láteze ca dxéajlele chia'. Da li dxapa' le'e, che la nápaie xel-la' dxeajlí lazre', lácala naca na láteze ca naca tu binnedau' chee mostaza, waca xele xi'a nigá: “Gucuasa nigá chéajju' xetu' lataj”, na' xi'a na' wacuasa na. Quebe bi de da quebe gaca gunle che nápaie xel-la' dxeajlí lazre'. <sup>21</sup> Ca naca be' xriwe' caní, dxun na ba xen guchálajlele Dios, ne gunle gubasa chee séquele xebéajle be' xriwe' caní.

*Jesús dxuchálaje' xecha lasa ca gaca gate gate'*

(Mr. 9.30-32; Lc. 9.43-45)

<sup>22</sup> Dxácate na' dxeledé' naga nababa Galilea, Jesús guzre' benne' ca':

—Neda', Benne' Gulje' Bèneache wadéa' lu na' bèneache. <sup>23</sup> Xelútié' neda', na' gate gaca chunna zra, xebana'.

Gate belenne' dizra' nigá, na' bewi'ine lázrele'ene'.

*Da dxuluchízruje' bèneache chee xudau'*

<sup>24</sup> Gate Jesús ne benne' ca' dxusédene' belezrine' lu xezre Capernaum, na' benne' dxuluchízruje' chee xudau' belezrine' lau Pedro, na' buluchebe' le':

—¿Quebe dxizruj benne' dxusédene' le'e chee xudau'?

<sup>25</sup> Pedro bechebe':

—Awe'. Dxízruje' na.

Nadxa, gate na' guxú'u Pedro lu xu'u, guzre Jesús le':

—¿Aja dxéquenu', Simón? ¿Nuzra na' dxuluchizruj lazruj chee xezr la xu benne' ca' dxelenná bea lu xezr la xu nigá? ¿Dxuluchízruje' benne' waláizr chee', u benne' zitu' ca'?

<sup>26</sup> Bechebe Pedro:

—Benne' zitu' dxuluchízruje'.

Jesús guzre' le':

—Na' benne' waláizr chee' quebe xelízruje'. <sup>27</sup> Na'a, chee quebe nu guchá'adxu, guxíaj lu nísadau' na', ne guchize da na' dxeláieu' bela lu nisa na', na' bebéaj bela nedxu quelu'-ba'. Dxú'aba' na' xezrelnu' tu dumí da quízruju' chiu' lue', ne chia' neda'. Bia na, ne xeajtizruj na lau benne' ca'.

## 18

*Nu benne' nácadxa blau xabáa*

(Mr. 9.33-37; Lc. 9.46-48)

<sup>1</sup> Tu lasa gulebiga benne' ca' dxusède Jesús naga zue', na' buluchebe' Le':

—¿Nuzra benne' nácadxe' blau naga dxenná bea Dios?

<sup>2</sup> Nadxa Jesús gunné' tu bidau', na' bze'-be' lau benne' ca' dxusédene'. <sup>3</sup> Dxenné':

—Da li dxapa' le'e, che quebe xexácale ca bidu nigá, québequeze chu'ule naga dxenná bea Dios xabáa. <sup>4</sup> Ca'an naca, benne' nácadxe' blau naga dxenná bea Dios xabáa, naca benne' gaque' dxexruj lazre', ne xexaque' ca bidu nigá. <sup>5</sup> Benne' gape' ba lá'ana tu bidau' caní lu La' neda', néda'queza' gape' ba lá'ana.

*Ca naca da dxun na gundxu dul-la*

(Mr. 9.42-48; Lc. 17.1-2)

<sup>6</sup> Na' gunná Jesús:

—Núteteze benne' guné' gun tu bidu caní dul-la, bi dxeajlí lázrebe' neda', cháwela guchéajladxu lbe'e tu xiaj zi'i da dxutu, na' cheajchú'unadxu le' situj lu nísadau'. <sup>7</sup> Edxugúa

bénneache lawe' da déle'e da dxun na xelún bénneache dul-la. Tu gátazqueze da caní, na' edxugúa bénneache dxelune' xelún bénneache dul-la. <sup>8</sup> Chee' le' na', che na'u u ni'u dxun na gunu' dul-la, guchugu na, ne gudxú'una na zitu'. Cháwedxa xexú'u lu xel-la' nabán li lazre' nadxugu ni'u u na'u, quézcala xelegú'e lue' lataj ba xa', zua dxúpaté na'u, ne dxúpaté ni'u. <sup>9</sup> Che xiaj lau' dxun na gunu' dul-la, guleaj na, ne gudxú'una na zitu'. Wenla chu'u lu xel-la' nabán li lazre' nen tuze xiaj lau', quézcala xelegú'e lue' lu xi' gabila, zua dxúpaté xiaj lau'.

*Da dxulé'e na ca naca chee' zrila' naníteba'*  
(Lc. 15.3-7)

<sup>10</sup> Na' gunná Jesús:

—Gutu guzú' chalá'ala netú bidu caní. Neda' dxapa' le'e, zaj zra' gubáz chee' xabáa chee' bidu caní lau Xra' xabáa. <sup>11</sup> Neda', Benne' Gulje' Bénneache, bla'a bedajselá' benne' zaj naníteba'.

<sup>12</sup> ¿Ajazra dxéquele le'e? Che tu benne' nape' tu gaxúa zrila', na' nite tuba', ¿quebe gucá'angé' be' tápalalaj chennu na' le'e xixre', na' cheajdilje' zrila' na' naníteba'? <sup>13</sup> Gate ba bezrelne'-ba', wabéle'edxene' chee' be' tu na' quézcala chee' be' tápalalaj chennu ca' quebe guleníteba'. <sup>14</sup> Cá'anqueze Xrale le'e, zue' xabáa, quebe dxaca lazre' nite netú bidu caní.

*Ca dxal-la' gunité laudxu chee' le sa' ljwézredxu*  
(Lc. 17.3)

<sup>15</sup> Na' gunná Jesús:

—Che bi bichu' dxunbe' chiu' da calela, bchálajle' tuze lebe', chee' xúnbeabe' da calela da benbe'. Che xenbe' da dxu'u-be', na' ba bexacu' tuze bi bichu'. <sup>16</sup> Che quebe xenbe' da dxu'u-be', guché' tu chupa benne' chee' gaca chupa u chunna benne' xelexechébe' ca naca da dxu'u-be'. <sup>17</sup> Che quebe xenbe' chee' benne' ca', guze ca naca benne' dxelezragu lu xudau'. Che quebe xenbe' chee' benne' ca', le guzúa-be' ca tu benne' quebe dxéajle'e chee' Dios, u ca tu benne' dxuchízruje' waláz chee' benne' zitu' ca'.

<sup>18</sup> Da li dxapa' le'e, da guchéajle' lu xezr la xu nigá, naca na da ba nadxéajqueze na xabáa, ne da xesézrele lu xezr la xu nigá naca na da ba nazézrequeze na xabáa.

<sup>19</sup> Cá'anqueze dxapa' le'e, che chúpale le'e gácale tuze ca da návale Dios, na' Xra' zua xabáa gunne' na. <sup>20</sup> Naga zaj zra' chúpabe', u chúnname' zaj nazrágabe' lu La' neda', na' zúaqueza' neda' laduj lebe'.

<sup>21</sup> Nadxa Pedro bchebe' Jesús:

—Xran, che bi bícha'dau' gunbe' chia' da calela, ¿bal-la lasa dxun na ba xen gunité lawa' chee'be'? ¿Gazre lasa?

<sup>22</sup> Bechebe Jesús:

—Dxapa' lue', quegá gazre lasa, san ga xun chi da gazre lasa.

*Benne' wen zrin quebe guca lazre' gunité lawe' chee' le sa' ljwézre'*

<sup>23</sup> Na' gunná Jesús:

—Da gaca naga dxenná bea Dios xabáa naca na ca da guca gate tu benne' dxenná bea guca lazre' gucá'ana chawe' da dxelal-la benne' wen zrin chee'. <sup>24</sup> Gate guzú' lawe' dxucá'ana chawe' na, na' guleché'e lau le' tu benne' dxebague' chee' zane' cue' chi gaxúa dumí.

<sup>25</sup> Lawe' da quebe de chee' benne' wen zrin na' da quízruje' xrané', na' gunná be'e xrané' ta'u benne' wen zrin na, ne zru'ule', ne zrí'ingé' ca', ne ca nácaqueze da nape', chee' gazruj da na' dxebague'. <sup>26</sup> Nadxa bzu zribe benne' wen zrin na' lau xrané', na' guta' xuene' le', dxenné': "Xran, ben zren lazre' neda', na' quízrujqueza' ca naca na." <sup>27</sup> Na' xrané' bexache lazre' le', ne bnite lawe' da na' dxebague' chee', ne bsané' le'.

<sup>28</sup> Gate benne' wen zrin na' bedxúajé', na' bezrague' xetú benne' wen zrin ljwézre', benne' dxebague' chee' látédau'. Na' gudéle' lba bénnea', ne guzú' lawe' dxusézxuje' chi' bénnea', dxé'e le': "Gudizruj neda' da dxal-lu' chia'." <sup>29</sup> Nadxa benne' wen zrin ljwézre' na' bzu zribe' lau le', ne guta' xuene' le', dxenné': "Ben zren lazre' neda', na' quízrujqueza' ca naca na." <sup>30</sup> Bénnea' quebe guca lazre', na' guxíajé' xeaaju'e wen zrin ljwézre' na' lize xia dxácaté quízruje' da na' dxebague'.

<sup>31</sup> Gate benne' wen zrin ca' xezicala guleque bé'engé' da nigá, na' belewi'ine lázrele'engé', na' xjaque' xeaajleguezre' xrané' xúguté da ba guca. <sup>32</sup> Nadxa xrané' na' gunná bé'engé' xeaajlenné' benne' wen zrin na', na' guzre' le': "Bi wen zrin calela. Neda' bnite lawa' chiu' ca naca da na' dxebagu' chia' lawe' da guta' xúenu' neda'.

<sup>33</sup> Cá'anqueze lue' dxal-la' xexache lazru' le sa' ljwézru' na' ca beña' neda' bexache lazra' lue'." <sup>34</sup> Xrané' na' bzrá'ale'e bénnea', na' bde'e le' xel-la' zi' dxácaté na' quízruje' ca naca da na' dxal-le' chee'.

<sup>35</sup> Nadxa gunná Jesús:

—Cá'anqueze gun Xra' zua xabáa chee'le le'e che quebe gunité laule duté lázrdaule chee' le sa' ljwézrele.

## 19

*Da bchalaj Jesús ca naca chee benne' dxulusán ljwezre'*

*(Mr. 10.1-12; Lc. 16.18)*

<sup>1</sup> Ca gudé bchalaj Jesús da caní, na' bezé'ē xezre ca' zaj nababa Galilea, na' bezrine' chala'ala naga nababa Judea, da zua chala'ala xegu Jordán naga dxalaj gubizra. <sup>2</sup> Benne' zan zjácálenē' Lē', na' bexunē' benne' zante, benne' wē'.

<sup>3</sup> Nadxa bal-la benne' xudau' fariseo gulebigue' naga zua Jesús chee xelebéaje' Lē' dizra' chee gaca xelagu zrigē' Jesús, na' buluchebe' Lē':

—¿Waca nu benne' gusanē' zru'ule' ne chee bíteteze da gunē'?

<sup>4</sup> Bechebe Jesús:

—¿Quebe ne gulábale le'e lu xiche lá'azxa da na' dxenná na: “Bennea' bene' benne' ca' nédxudautē' bene' le' benne' biu, ne nu'ula”?” <sup>5</sup> Cá'anqueze gunné': “Chee le' na' benne' biu gusanē' xra xrnē'ē chee gaque' tuze nen zru'ule', na' dxupe' xelaque' ca tuze benne'.” <sup>6</sup> Caní naca na, québedxa zaj naque' chupe', san tuze benne' zaj naque'. Chee le' na' quebe dxal-la' xelá'a bēneache da na' ba nuchaga Dios.

<sup>7</sup> Nadxa buluchebe' Jesús:

—¿Bizr chee na' gunná be'e Moisés nu benne' gunézruje' zru'ule' tu xiche da dxulé'e na belexelē'ē, na' gusanē' le'?

<sup>8</sup> Jesús guzre' benne' ca':

—Caní bene' lawe' da gulaca lazrdau zizraj xra xrtaule. Moisés benne' lataj gusanle zru'ulale, san nédxudautē' quebe guca na ca'. <sup>9</sup> Neda' dxapa' le'e, che tu benne' gusanē' zru'ule', ne quebe dxedálenē' benne' biu xula, na' che xezúalenē' nu'ula xula, benne' nigá gunē' dul-la súalenē' nu'ula quebe naque' zru'ule', na' che nu benne' biu xequē'ē tu nu'ula nusán benne' chee', cá'anqueze gun dul-la bēneá' súalenē' nu'ula quebe naque' zru'ule'.

<sup>10</sup> Nadxa benne' ca' dxusede Jesús gulē'ē Lē':

—Che ca' dxaca chee benne' zúalenē' nu'ula, quebe dxal-la' súalentu' nu'ula.

<sup>11</sup> Jesús guzre' benne' ca':

—Qegá xúgute' benne' gaca xezezi'ē dizra' nigá, san tuze benne' ca' ba nun Dios chee' xezezi'ē na. <sup>12</sup> Zaj zra' benne' quebe dxelezúalenē' nu'ula lawe' da quebe zaj naca xánnie' benne' biu. Na' zaj zra' benne' québedxa zaj naca xánnie' benne' biu lawe' da zaj nun bēneache naca caní. Na' zaj zra' benne' dxelexegá'angē' cá'aze, quebe nu dxelezúalenē' chee gaca xelune' zrin chee Dios, Bēneá' dxenná be'ē xabáa. Benne' gaca si'ē dizra' nigá dxal-la' si'ē na.

*Jesús dxenabe' gaca chawe' chee bidu ca'*

*(Mr. 10.13-16; Lc. 18.15-17)*

<sup>13</sup> Nadxa belezrín benne' lau Jesús zaj naché'ē bal-la bidau' chee guzē' ne'ē bidu ca', ne nabe' Dios gaca chawe' cheebe', san benne' ca' dxusede Jesús gulezú lawe' dxeledil-le' benne' ca' zaj naché'ē bidu ca'. <sup>14</sup> Jesús guzre' le':

—Le güe bidu ca' lataj xelega'be' naga zua'. Quebe guzrúnale-be', lawe' da benne' zaj naque' ca' bidu caní xelu'ē naga dxenná bea Dios xabáa.

<sup>15</sup> Nadxa bzē Jesús ne'ē lawe' bidu ca', na' gudé na' bezé'ē lataj na'.

*Tu benne' cuide' nape' xel-la' gunní'a*

*(Mr. 10.17-31; Lc. 18.18-30)*

<sup>16</sup> Tu benne' cuide' guxíaje' naga zua Jesús, na' bchebe' Lē':

—Benne' Wesede chawe'. ¿Bi da xrlátaje dxal-la' guna' chee gapa' xel-la' nabán zeajlí canna?

<sup>17</sup> Jesús guzre' le':

—¿Bizr chee na' dxu'u neda', benne' wesede chawe'? Quebe nu chilá' benne' naque' chawe', san tuze Dios. Che dxaca lazru' zrué'enu' xel-la' nabán li lazre', bzua dizra' ca bdxixruj be'e Dios.

<sup>18</sup> Benne' cuide' na' gunné':

—¿Bila na'?

Jesús guzre' le':

—Quebe gutiu' benne'. Quebe súalenu' zru'ula benne' xula. Quebe cuanu'. Quebe nneu' da wēn lazre' chee benne'. <sup>19</sup> Gudapa ba lá'ana xra xrna'u. Bzri'i le sa' ljwezru' ca nazri'i cuinu'.

<sup>20</sup> Benne' cuide' na' gunné':

—Xúgute' da caní dxuna' nácatea' bídau'tē. ¿Bízdaxa quebe ne guna'?

<sup>21</sup> Na' guzre Jesús le':

—Che dxaca lazru' gacu' benne' li lazre', bexíaj, xeajete ca naca da napu', ne bnezruj na benne' xache' ca'. Nadxa gapu' xel-la' gunní'a xabáa. Na' gudátega nen neda'.

<sup>22</sup> Gate benne' cuide' na' benne' da nigá, bezé'ē dxexíaje lazre' lawe' da nápalē'e xel-la' gunní'a.

<sup>23</sup> Nadxa gunná Jesús, dxé'ē benne' ca' dxusédene':

—Da li dxapa' le'e, stébele'ē naca chu'u tu benne' gunní'a naga dxenná bea Dios xabáa.

<sup>24</sup> Da xula dxapa' le'e, chadidxa gaca te tu bea', bē dxebía bēnneache lu negue' tu xeche' zriche, quézcala chu'u tu benne' gunní'a naga dxenná bea Dios.

<sup>25</sup> Gate belenne' benne' ca' dxuséde Jesús da nigá, na' belexebánele'ēne', na' buluchebe ljawezre':

—¿Nuzra la xca'?

<sup>26</sup> Jesús guné'ē benne' ca', ne guzre' le':

—Da nigá quebe gaca xelún bēnneache, san Dios waca guné' ca naca.

<sup>27</sup> Nadxa gunná Pedro:

—Xran, netu' ba bcá'anantu' ca naca da nápantu', ne zéajlentu' Lue'. ¿Bizra gápantu' xca'?

<sup>28</sup> Bechebe Jesús:

—Da li dxapa' le'e, ca lu zra na' gate na' xúgute' xelexaca na cube, gate neda', Benne' Gulje' Bēnneache, cue'ana lataj chawe' chia' naga nna be'a, le'e na' ba gudálele neda' cué'queze lu chazrinnu lataj naga nna beale, chee' guchí'ale chee' chazrinnu cue' benne' Israel, benne' judío ca'. <sup>29</sup> Xúgute' benne' ca' ba bulucá'ang' lizre', u benne' biche', u nu'ula zane', u xre', u xrne'ē, u zru'ule', u zrí'ine', u xezr la xu chee', chee' xelune' zrin chia', xezezí'queze' tu gaxúala na, ne xezezí'queze' xel-la' nabán zeajlí canna. <sup>30</sup> Benne' zante' zaj naca blau na'a xelaque' benne' bzebe, na' benne' zante' zaj naca benne' bzebe na'a xelaque' benne' blau.

## 20

*Da dxulé'e na ca naca chee' benne' wen zrin ca'*

<sup>1</sup> Na' gunná Jesús:

—Da gaca naga dxenná bea Dios xabáa naca na ca da guca gate tu xrane zánete' cue' xezr la xu guzé'ē lizre' che zílala, zéaje' zeajtilaje' benne' wen zrin ca' chee' cheajlechibe' uva chee'.

<sup>2</sup> Bca'ana cháwelenē' benne' wen zrin ca' quízruje' tu dumí lazruj chee' tu zra, na' gusel-le' benne' ca' zeajleguene' zrin lu xezr la xu chee'.

<sup>3</sup> Ca gudé na' guzé'ē lizre' ca dxedá na, na' blé'ene' benne' zaj zre'ē lawe' xi'a zaj nalátajze'.

<sup>4</sup> Na' guzre' benne' ca': "Cá'anqueze le'e, le chjaca wen zrin lu xezr la xu chia', na' gunna' le'e da naca chawe'." Na' benne' ca' xjaque'.

<sup>5</sup> Xrane na' guzé'ē da xula wa gubizra, ne cá'anqueze dxexedá' chunna, ne tuze ca bēne'.

<sup>6</sup> Xetú du dxedá' gazxu' guxíaje' lawe' xi'a, na' blé'ene' zaj zra' na' benne' zaj nalátajzqueze', ne guzre' le': "¿Bizr chee' na' zrale le'e nigá bedú zra quebe bi zrin dxunle?"

<sup>7</sup> Gulenné': "Quebe nu ne xē netu' guntu' zrin chee'."

"Na' guzre' benne' ca': "Cá'anqueze le'e, le cheajén zrin lu lina chia', na' gunna' le'e da naca chawe'."

<sup>8</sup> Gate gul-la' chizrela, xrane na' guzre' benne' xu'u lu ne'ē zrin na': "Gunné' benne' wen zrin ca', ne gudízruje', su lau' quízruju' benne' ca' belelá' bzébedxa, na' bzébetē quízruju' benne' ca' belelá' nédxute'."

<sup>9</sup> Nadxa belezrin benne' ca' belú'ē lu zrin na' gate dxexedadxa gazxu', na' tu tu benne' ca' belezí'ē lazruj chee' du naxá' lazruj tu zra wen zrin.

<sup>10</sup> Gudé na' gate belezrin benne' ca' gulu'ē nédxute' lu zrin na', guléquene' xezezí'ē da zrendxa, san cá'anqueze gulezí' tu tu benne' ca' lazruj tu zra wen zrin weaj.

<sup>11</sup> Gate gulezí'ē na, na' gulezú' lawé' dxelawé' zria lau xrane zrin na', <sup>12</sup> dxelenné': "Benne' caní belelá' bzébedxa, tu chí'idau'ze ga belune' zrin, na' gudízrujquezu' benne' caní ca gudízruju' netu', na' netu' bedú zra bentu' zrin, ne ca naca da la chee' zra nigá bchaga launtu'."

<sup>13</sup> Bechebe xrane na', dxé'ē tu benne' ca': "Ljwézra'dau', quebe bi dxuna' chiu' da quebe naca na chawe'. ¿Quebe bca'ana cháwelená' lue' quízruja' lue' lazruj tu zra wen zrin?"

<sup>14</sup> Guzí' lazruj chiu', ne bexíaj. Neda' dxaca lazra' gunézruja' chee' benne' ca' belú'ē bzébedxa ca da gudízrujqueza' lue'. <sup>15</sup> ¿Quebe gaca guna' ca da dxaca lazra' nen dumí chia'?' ¿Dxacu' xa lazre' lawe' da naca neda' benne' xrlátaje'?"

<sup>16</sup> Na' gunná Jesús:

—Ca'an naca, benne' ca' zaj naca benne' bzebe xelaque' benne' blau, na' benne' blau ca' xelaque' benne' bzebe lawe' da ba gunní'a benne' zan, san bábaze benne' ca' xelaque' blau.

*Xecha lasa dxuchalaj Jesús ca gaca gate gatiē'*

*(Mr. 10.32-34; Lc. 18.31-34)*

<sup>17</sup> Gate xu'u Jesús neza, zexíaje' Jerusalén, guléaje' cheeze benne' chazrinnu ca' dxusédene', ne guzre' le':

<sup>18</sup> —Dxelé'ele le'e ba zexíajdxu Jerusalén naga neda', Benne' Gulje' Bénneache, xuludé benne' ca' neda' lau benne' xíchajé ca' chee bxruze ca', ne lau benne' ca' dxuluxuzájle'e da bdxixruj be'e Dios, na' xelechugue' chia' gatia'. <sup>19</sup> Xuludé' neda' lu na' benne' zitu' ca' chee xelún le' chia', na' xelu'e neda', ne xuludé'e neda' xaga béguaj, san zra guxunne zra xebana'.

*Da gunaba xrna Jacobo ne Juan*

(Mr. 10.35-45)

<sup>20</sup> Nadxa gubiga xrna Jacobo, ne Juan lau Jesús, bi ca' zaj naca be' zri'ine Zebedeo, naché'e bi ca', na' bzu zribe' lau Jesús, dxenabe' culuén. <sup>21</sup> Jesús bchebe' nu'ula na':

—¿Bi na' dxenabu'?

Nu'ula na' guzre' Jesús:

—Gate zrin zra nna be'u, na' gudxixruj be'e cue' tu zri'ina' caní chalá'a xabeła chiu', ne xetube' xéglala.

<sup>22</sup> Jesús bechebe', guzre' bi ca':

—Quebe nézele le'e bi na' dxenáale. ¿Waca xí'ajle le'e ca da xí'aja' neda', da na' naca na ca xel-la' zi' da tea' neda', ne waca si'le da naca na ca xel-la' dxedxúa nisa ca da si'a neda' gate chu'a lu xel-la' gute?

Na' gulenabe':

—Wácantu'.

<sup>23</sup> Nadxa Jesús guzre' bi ca':

—Da li xí'ajle ca da xí'aja' neda', ne si'le da naca ca xel-la' dxedxúa nisa na' da si'a neda', san da cue'le chalá'a xabeła chia', ne chalá'a xéglala chia' quebe naca na chia' gunna' na le'e. Xra' gunéxruje' na chee bi ca' ca da ba nucueze'.

<sup>24</sup> Gate xechi benne' ca' dxusede Jesús belenne' ca', na' belezre'e dxupa bi chee nu'ula na'.

<sup>25</sup> Jesús gunné' benne' ca', ne guzre' le':

—Ba nézele le'e ca dxelún benne' xíchajé chee xezr la xu ca', dxelenná bé'eng' benne' ca', na' benne' nácadxe' blau ládujla benne' ca' dxelenná be'e, dxuchínene' xel-la' dxenná bea chee'. <sup>26</sup> Le'e quebe dxal-la' gunle ca'. Benne' dxaca lazre' gaque' blau ládujla le'e dxal-la' gune' zrin chee xezícadxale le'e, <sup>27</sup> na' bénnea' dxaca lazre' gaque' xíchajé chee, dxal-la' gaque' wen zrin chee xúgutéle le'e. <sup>28</sup> Dخال-la' gune' ca' bena' neda', Benne' Gulje' Bénneache, quebe bida' chee nu gun zrin chia' neda', san bla'a chee guna' zrin chee bénneache, ne chee guzúa' xel-la' nabán chia' ca da quízruja' chee guselá' benne' zante.

*Jesús dxexune' chupa benne' la chul-la*

(Mr. 10.46-52; Lc. 18.35-43)

<sup>29</sup> Gate dxelxedxúaje' xezre Jericó, na' benne' zante zjácálene' Jesús. <sup>30</sup> Naga dxeledé'e zaj dxe' chupa benne' la chul-la dxu'a neza, na' gate belenne' dxedé Jesús na' gulebezre xe'e, dxelenné':

—Xran, Zri'ine David, bexache lazre' netu'.

<sup>31</sup> Benne' zan ca' guledil-le' dxúpaté' na' chee xelezúe' zrize, san le' gulebezre xe'e zízajdxa, dxelenné':

—Xran, Zri'ine David, bexache lazre' netu'.

<sup>32</sup> Nadxa Jesús guleze', na' gunné' benne' la chul-la ca', na' bchebe' le':

—¿Bi dxaca lázrele guna' chee?

<sup>33</sup> Belexechébe benne' ca':

—Xran, dxaca lázrentu' xelé'entu'.

<sup>34</sup> Jesús bexache lazre' benne' ca', ne bte' xiaj lawé'. Na' belexelé'ete' benne' la chul-la ca', na' xjácálene' Jesús.

## 21

*Ca da guca gate bexú'u Jesús Jerusalén*

(Mr. 11.1-11; Lc. 19.28-40; Jn. 12.12-19)

<sup>1</sup> Gate belezrin Jesús, ne benne' ca' dxusédené' gagu naga zua xezre Jerusalén, ne ba belezrine' xezre Betfagé, da zua na gagu naga zua xi'a naga zaj da' xaga olivo, na' Jesús gusel-le' chupa benne' ca' dxusédené' chee tu da xelune'. <sup>2</sup> Dxe'e le':

—Le chjaca xézredu na' da zua le nna' nigá. Na' lé'ele tu burro bzrise' da'ba' xaga, na' tu búrrodau' zúaleba' le'ba'. Le sezre-ba', ne le che'e dxúpaté'ba' nigá. <sup>3</sup> Che nu benne' bi xe'e le'e, le xe'e: "Xránadxu nachinne' le'ba', na' la xesél-la'tequeze'-ba'."

<sup>4</sup> Da nigá guca na chee guxá ca da gunná benne' bhálaje' waláz chee Dios, gunné':

<sup>5</sup> Le xe benne' zaj zra' xezre Sión:

"Le nna', Benne' nna bé'eng' le'e ze'e naga zúale.

Duté xel-la' dxexruj lazre' zrie' tu burro bzrise'.

Zrie' tu búrrodau', zri'ine tu be dxua xua."

<sup>6</sup> Nadxa dxupa benne' ca' dxusede Jesús besía'que', ne belune' ca da ba gunná be'e Jesús le'. <sup>7</sup> Xeaǵlexrí'e burro bzrise', ne zrí'ineba', na' belezrúe' zra lanę' cúzruba', na' guzría Jesús lęba'. <sup>8</sup> Benne' zan ca' gulechílaǵe' zra lanę' la neza na', na' xebal-lę' buluchibe' zina' da buluzale' la neza. <sup>9</sup> Benne' zjaque' lówela, ne benne' zá'aque' bzebe gulezú lawę' dxelebezre xe'e, dxelenné':

—ǵGaca ba lá'azxa Zrí'ine wenná bea David! ǵBa neza zrentę naca na cheę bénnea' ze'e waláz cheę Xránadxu Dios! ǵGaca ba lá'azxa Dios!

<sup>10</sup> Gate guxú'u Jesús xęzre Jerusalén, ca naca bénneache zaj zre'e na' beledxé'ena zrague', na' buluchebe lǵwezre':

—ǵNuzra benne' nigá?

<sup>11</sup> Bal-la benne' ca' gulenné':

—Benne' nigá naque' Jesús, benne' dxuchálaǵe' waláz cheę Dios, ze'e xęzre Nazaret da nababa Galilea.

*Jesús dxuchi'e lu xudau'*

*(Mr. 11.15-19; Lc. 19.45-48; Jn. 2.13-22)*

<sup>12</sup> Ca gudé na' guxú'u Jesús dxale'aj xudau' cheę Dios, na' bebéaǵe' xúgute benne' wete, ne benne' dxelá'awę' na'. Bdxixre' blag ca' cheę benne' ca' dxuluché'e dumí, ne bdxixre' da ca' zaj dxe' benne' ca' dxelútię' bǵgudu ca'. <sup>13</sup> Nadxa guzre' benne' ca':

—Lu xiche lá'azxa naxúaj da dxenná Dios: “Lizra' nigá naca na xu'u naga xelenaba bénneache lawa' neda”, san le'e ba nunle na ca tu lize gubán.

<sup>14</sup> Lu dxale'aj xudau' na' gulebiga lau Jesús bal-la benne' la chul-la, ne benne' zrinnaj ca', na' Le' bexunę' benne' ca'. <sup>15</sup> Belezrá' benne' xíchaję ca' cheę bxruze ca', ne benne' ca' dxuluxuzáǵe' da nadxixruj bea Dios, gate na' belenne' ca' dxelebezre xa'a bidu ca' lu xudau', dxelennabe': “ǵGaca ba lá'azxa zrí'ine wenná bea David!” <sup>16</sup> Gulé'ę Jesús:

—ǵDxennu' ca' dxelenná benne' caní?

Bechebe Jesús:

—Dxenda' na. ǵQuebe ne gulábale le'e lu xiche lá'azxa naga naxúaj na cheę da dxaca nigá? Dxenná na caní:

Ba bęnu' xelúl-la bidu ca', ne bidu dxe'ene ca'.

Da dxelúe lá'anabe' Dios naca na da li.

<sup>17</sup> Nadxa bca'ana Jesús benne' ca'. Bezé'e xęzre na', na' bezrine' xęzre Betania, naga beǵǵá'anę' xęla na'.

*Jesús dxugu'e de' xaga higo*

*(Mr. 11.12-14, 20-26)*

<sup>18</sup> Che zílala ca zexíaj Jesús xęzre na', na' gudunę'. <sup>19</sup> Zítu'la blé'ene' tu xaga higo dxu'a neza, na' gate bzrine' naga zua na, quebe bi da zixre cheę na blé'ene'. Lágaze zria na. Nadxa Jesús guzre' xaga higo na':

—Cabata' culaquezu' da zixre.

Gubízrete' xaga higo na'. <sup>20</sup> Ca belelé'e benne' ca' dxusede Jesús da nigá, na' belexebánene', ne buluchebe' Jesús:

—ǵÁjazra na' chaditę gubizre xaga higo nigá?

<sup>21</sup> Bechebe Jesús:

—Da li dxapa' le'e, che nápaie xel-la' dxeajlí lazre', ne quebe gun chupa lázrele, quegaze da nigá gaca gunle ca da bęna' neda' cheę xaga higo nigá, san waca xęle xi'a nigá: Gucuasa nigá, xeaǵsúa lu nísadau', na' gaca na. <sup>22</sup> Che dxeajlí lázrele, na' xezi'le bíteteze da nábaie Dios.

*Xel-la' dxenná bea da xu'u lu na' Jesús*

*(Mr. 11.27-33; Lc. 20.1-8)*

<sup>23</sup> Nadxa guxú'u Jesús lu chila xudau', na' dxácate' na' dxusedene' benne' zaj zre'e na', gulebiga naga zua Jesús benne' xíchaję ca' cheę bxruze ca', ne benne' gula cheę judío ca', na' buluchebe' Le':

—ǵBi xel-la' dxenná bea napu' dxunu' da caní? ǵNúzraqueze bęna lue' xel-la' dxenná bea nigá?

<sup>24</sup> Bechebe Jesús:

—Cá'anqueze neda' gucheba' le'e tu. Che xechébele da nigá, na' neda' xapa' le'e bi xel-la' dxenná bea napa' dxuna' da caní. <sup>25</sup> ǵNu benne' gusel-lę' Juan dxuchúe' bénneache nisa? ǵDios, che bénneacheze?

Gulezú lawę' dxuluchálaǵe' lǵwezre', dxelenné':

—Che nnadxu Dios gusel-lę' le', na' xe'e dxi'u: “ǵBizr cheę na' quebe guxéajle chee'?”

<sup>26</sup> Che nnadxu bénneache gusel-lę' le', dxal-la' zrębedxu bi xelún benne' zan ca' cheędxu dxi'u, lawe' da dxeleque xúgute bénneache bchalaj Juan na' waláz cheę Dios.



<sup>27</sup> Chee lę na' gulę'e Jesús:

—Quebe nézentu'.

Nadxa Jesús guzre' benne' ca':

—Cá'anqueze neda' quebe xapa' le'e bi xel-la' dxenná bea napa' dxuna' da caní.

*Da dxulé'e na ca naca chee chupa bi biu chee tu benne'*

<sup>28</sup> Na' guzre Jesús benne' ca':

—¿Aja dxéquele le'e chee da nigá? Tu benne' zaj zra' chupa zrí'ing' bi biu, na' guzre' tube': "Zrí'ina', guxíaj xeajén zrin lu lina chee uva chia'." <sup>29</sup> Zrí'ing' na' bechébebe': "Quebe dxaca lazra'." Ca gudé na' bexíaje lázrebe', na' guxíajbe' xeajénquezbe' zrin. <sup>30</sup> Cá'anqueze xrabe' na' guxíaje' xeajné'e xetube', ne guzre'-be', na' bi nigá bechébebe': "Waca, xrae. Na'a cha'a." Quebe guxíajbe'. <sup>31</sup> ¿Núlabé' bi chupa caní benbe' ca da guca lazre' xrabe'?

Gulenná benne' ca':

—Bi nedxu.

Na' gunná Jesús, dxę'e benne' ca':

—Da li dxapa' le'e, benne' wechizruj ca', ne nu'ula dxeledále benne' biu zantę selexúę naga dxenná bea Dios nédxudxa ca le'e <sup>32</sup> lawe' da bla' Juan, bedajlé'eng' le'e da naca xrlátaje, na' le'e quebe guxéajle chee'. Benne' wechizruj ca', ne nu'ula ca' dxeledále benne' biu zantę guléajle'e chee'. Le'e, gate ble'ele da nigá, quebe bexíaje lázrele chee' chéajlele chee'.

*Da dxulé'e na ca naca chee benne' wen zrin calęla ca'*

(Mr. 12.1-12; Lc. 20.9-19)

<sup>33</sup> Nadxa gunná Jesús:

—Le xene ca naca da nadxixruj bea nigá. Tu benne' xrane tu xęzr la xu guze' lba uva ca', ne bęne' le'aj chee na. Bęne' tu xędxu naga xelésię' uva ca', ne guchise' tu xu'u sibe chee gaca nu guxúę ca naca na. Na' bca'anę' na lu na' benne' wen zrin ca', ne guze'ę zęaje' zitu'. <sup>34</sup> Gate bzrin zra xuluchibę' uva ca', na' gusel-lę' tu chupa bi wen zrin chee' zeajlexezri'be' da dxal-la' xezí' xrane na'. <sup>35</sup> Benne' wen zrin ca' gulequę'ę bi wen zrin chee' ca'. Belúele'ę tube', ne belutię' xetube', na' xetube' buluzríe'-be' xiaj. <sup>36</sup> Nadxa xrane na' gusel-ladxę' bi wen zrin chee' bi zandxa ca nedxu. Benne' wen zrin ca' tuz ca bulusaque' bi ca'. <sup>37</sup> Naga xeajchę' tequeze na gusel-lę' zrí'inequeze' lawe' da dxéquene': Welape' ba lá'ana zrí'ina'. <sup>38</sup> Gate belelé'eng' zrí'ing', na' benne' wen zrin ca' gulę ljwezre': "Bi nigá xezí' lu na'be' ca naca da caní. Du gute-be' chee xegá'ana cheędxu da caní." <sup>39</sup> Chee lę na' gulęle'-be', ne belexebéaje'-be' lu xęzr la xu na', na' belutię'-be'.

<sup>40</sup> Nadxa Jesús bchebę' benne' ca':

—Gate xida xrane xęzr la xu na', ¿ájazra gune' chee benne' wen zrin ca'?

<sup>41</sup> Gulę'ę Le':

—Gutię' benne' ca' dxelune' da calęla ne quebe xexache lazre' lę'. Nadxa gucá'analęne' xęzr la xu na' benne' wen zrin xula, benne' xuluxunęzruję' da dxal-la' xezí' lę' gate zrin zra chee na.

<sup>42</sup> Nadxa Jesús guzre' benne' ca':

—¿Quebe ne gulábale le'e xiche lá'azxa? Caní dxenná na:

Xiaj na' da buluzúa benne' wen xu'u ca' chala'ala,

lę na' naca na xiaj blau na'a.

Da nigá naca na da bęn Xránadxu,

ne naca na tu da dxexebánedxu.

<sup>43</sup> Chee lę na' dxapa' le'e, Dios wequę'ę da naca chee le'e naga dxenná be'e, na' gunęzruję' na benne' xelune' da naca chee xel-la' dxenná bea chee Dios. <sup>44</sup> Che tu benne' cheajchazię' lawe' xiaj nigá waxúzruję', na' che xęzruj na lawe' tu benne', na' guzuzruj na lę'.

<sup>45</sup> Gate benne' xíchaje ca' chee bxruze ca', ne benne' xudau' fariseo ca' belenne' da bchalaj Jesús, guleque bé'eng' chee léqueze' bchalaj Jesús da caní. <sup>46</sup> Gate gulaca lazre' xelęle' Lę', belezrebe' benne' xęzre ca' lawe' da dxeléajle benne' ca' naca Jesús benne' dxuchálaje' waláz chee Dios.

## 22

*Da dxulé'e na ca naca chee laní wechaga na'*

<sup>1</sup> Guzú lau Jesús dxuchálajlene' benne' ca' xecha lasa tu da dxulé'e na, dxę'e lę':

<sup>2</sup> —Ca da gaca xabáa naga dxenná bea Dios naca na ca da guca gate tu benne' wenna' bea bęne' tu laní wechaga na' chee bi biu chee'. <sup>3</sup> Gusel-lę' benne' wen zrin chee' ca' cheajletupe' benne' ca'an gunnę' lizre', san benne' ca' quebe gulaca lazre' xédajgaque'. <sup>4</sup> Nadxa gusel-ladxę' benne' wen zrin chee' ca', benne' xula. Dxę'e lę': "Le xę benne' ca' gunnía', ba nucueza' xel-la' wagu. Ba gunná be'eda' xelútię' bęzre ca', ne bę dxelanne, na' ca naca na bache de. Dxa-la' xelélé'ę nigá naga zra' wechaga na'." <sup>5</sup> Benne' ca' gunnę' quebe gulaca lazre'

xédajgaque'. Tu benne' ca' guxiáje' lu xezr la xu chee', ne xetú benne' guxiáje' wete. <sup>6</sup> Xebal-la benne' ca' gulele' bi wen zrin ca' chee' wenná bea na', na' bulucháchalene'-be', ne belúte'te'-be'. <sup>7</sup> Nadxa wenná bea na' bzrá'ale'e, na' gusel-le' benne' chee' ca', benne' zjaca wedil-la xeajleguétie' benne' wete benne' ca', ne xeajlezé'xe'te' lazre' benne' ca'. <sup>8</sup> Nadxa guzre' bi wen zrin chee' ca': "Bal-la bi de ba de chee' wechaga na', na' benne' ca' gunniá' quebe zaj naca chee' xeledé'e. <sup>9</sup> Le chjaca neza zri'a ca', ne le nne' xúgute' benne' lé'ene, chee' xeledé'e laní chee' wechaga na'." <sup>10</sup> Benne' wen zrin ca' xjaque' la neza ca', na' xeajletupe' xúgute' bénneache, benne' belelé'ene' zaj naque' benne' caléla, ne benne' xrlátaje. Ca'an guca guzrate' xu'u na' bénneache. <sup>11</sup> Nadxa wenná bea na' guxú'e xeajné'e benne' ca' gunné', na' blé'ene' tu benne' dxe'e na', quebe nazi'e zra lané' chee' laní chee' wechaga na'. <sup>12</sup> Guzre' le': "Lue', benne', ¿ájazra guca guxú'u nigá, ne quebe nazi'u zra lanu' chee' laní wechaga na'?" Bénnea' gudxé'e zrize. <sup>13</sup> Nadxa wenná bea na' guzre' bi zaj zúabe' ga na', "Le guchéaj ni'a ne'e, ne le guzale' chalé'ajla naga naca chul-la, naga cuezre', ne xáguxa'ate' lazxe'." <sup>14</sup> Benne' zante' gunniá', na' bábaze' zaj naca chee' xelu'e nigá.

*Ca naca chee' dumí da dxuluchízruje'*

*(Mr. 12.13-17; Lc. 20.20-26)*

<sup>15</sup> Nadxa benne' fariseo ca' besiá'que', ne belune' tuze dizra' xelebéaje' Jesús dizra' chee' xelezé'quene' xelawe' zria chee'. <sup>16</sup> Nadxa gulesel-le' bal-la benne' ca' zaj naque' fariseo ca' tuze, ne bal-la benne' ca' zaj de'e Herodes, chee' zeajleguezre' Jesús:

—Benne' weséde, nézentu' dxenníu' da li, ne dxusédenu' da li da zaj naca chee' Dios, ne quebe dxezrebu' bi xelenná bénneache, ne quebe dxenná'u ca da zaj napa bénneache. <sup>17</sup> Gunná xque. ¿Aja dxéquentu' lue'? ¿Dxun na ba xen quízrujdxu da dxuluchizruj benne' ca' nassel-la César, benne' zitu', che cabí?

<sup>18</sup> Jesús ba nézeng' ca da dxelaca lazre' xelune' chee', na' guzre' benne' ca':

—Le'e, láweze dxunle da xrlátaje. ¿Bizr chee' na' dxuzúale da guzrí'a xi na neda'? <sup>19</sup> Le gulé'e neda' dumí na' da dxízrujle chee' wechizruj.

Nadxa bulunézruje' Le' tu dumí chee' xezre Roma. <sup>20</sup> Gate blé'ene' na, na' Jesús bchebe' benne' ca':

—¿Nuzra lau ni, ne le' da naxúaj na nigá?

<sup>21</sup> Belexechébe':

—Chee' César na'.

Na' guzre Jesús benne' ca':

—Le gunezruj chee' César da naca chee' César, ne le gunezruj chee' Dios da naca chee'.

<sup>22</sup> Gate belenne' da nigá, na' belexebánene', ne besiá'que' naga zua Jesús.

*Da buluchébe' Jesús chee' benne' xelexebane' ládujla benne' gate*

*(Mr. 12.18-27; Lc. 20.27-40)*

<sup>23</sup> Zra ná'queze belezrín bal-la benne' saduceo ca' naga zua Jesús. Benne' saduceo ca' dxelenné' quebe xelexebán benne' gate. Gulé'e Jesús:

<sup>24</sup> —Benne' weséde, Moisés gunné' che tu benne' nuchaga ne'e gatie', ne quebe nu bidu chee' chilá', na' bi biche' dxal-la' guchaga na'abe' nen nu'ula gute benne' biu chee' na' chee' sua tu bi chee' benne' ba gutie'. <sup>25</sup> Naga zúantu' gulezrá' gazre benne' gulácabe' zri'ine tuze benne'. Bi nedxu bchaga na'abe', na' gútebe'. Bi gudxupe' bchaga na'abe' nen nu'ula na' gute benne' biu chee' lawe' da quebe nu zri'ine bi nedxu na' gúlajbe'. <sup>26</sup> Cá'anqueze gúcaqueze na chee' bi gudxupe', na' gudé na' chee' bi guxunne', na' cá'anqueze guca chee' xúgute' bi gazre ca'. <sup>27</sup> Ca gudé na', na' gute nu'ula na'. <sup>28</sup> Gate xelexebán benne' gate, ¿nula bi gazre caní gácabe' benne' chee' nu'ula na' lawe' da tu tu bi gazre ca' bchaga na'abe' nen nu'ula na'?

<sup>29</sup> Jesús bechébe':

—Le'e dxeque zrájale lawe' da quebe núnbeale da naxúaj na lu xiche lá'azxa, ne ca naca xel-la' waca chee' Dios. <sup>30</sup> Gate zrin zra xelexebán benne' gate, québedxa xuluchaga na' bénneache, ne québedxa xelúte' bi nu'ula chee' xuluchaga na'abe'. Xelaque' ca zaj naca gubáz chee' xabáa chee' Dios. <sup>31</sup> Ca naca na che dxal-la' xelexebán benne' gate, ¿quebe ne gulábale le'e ca gunná Dios? Gunné': <sup>32</sup> "Neda' naca' Dios chee' Abraham, ne Dios chee' Isaac, ne Dios chee' Jacob." Dios quebe naque' Dios chee' benne' gate, san naque' Dios chee' benne' ban, benne' ca' ba gualatie' lu xezr la xu nigá.

<sup>33</sup> Gate belenne' da nigá, na' belexebane benne' ca' ca naca da dxuséde Jesús.

*Da gunná be'e Dios da naca blau*

*(Mr. 12.28-34)*

<sup>34</sup> Gate benne' fariseo ca' guleque bé'ene' ba bzua zri Jesús benne' saduceo ca', na' belezrague'. <sup>35</sup> Tu benne' ca', benne' naque' benne' dxuxuzájle'e da nadxizruj bea na, guca lazre' guxúe' ájala nne' Jesús. Bchébe' Le':

<sup>36</sup> —Benne' wesede, ¿bizrla da gunná be'e Dios naca blau?

<sup>37</sup> Bechébe Jesús:

—Dxal-la' zri'ínu' Xranu' Dios dutę xichaj lázrda'u, ne dutę bėnne'du xu'u, ne dutę xel-la' dxėajni'i chiu'. <sup>38</sup> Da nigá naca da nadxixruj bea da blaudxa, ne da dxundxa na ba xen. <sup>39</sup> Da nadxixruj bea da gudxupe' nácaqueze na ca', da dxenná na: Bzri'i le sa' ljwezru' ca nazri'i cuinu'. <sup>40</sup> Che tu benne' dxune' ca zaj naca chupa da nadxixruj bea caní, dxune' ca naca xúgute da nadxixruj bea da bzuaj Moisés, ne ca naca xúgute da bulusede benne' ca' buluchálaje' waláz cheę Dios.

*¿Nuzra zri'ine naca Cristo?*

*(Mr. 12.35-37; Lc. 20.41-44)*

<sup>41</sup> Dxácate ne zaj nazraga benne' fariseo ca' na', <sup>42</sup> Jesús bchebę le':

—¿Ájala dxéquele le'e cheę Cristo? ¿Nuzra zri'ine naque'?

Benne' ca' gulé'ę Le':

—Zri'ine David na'.

<sup>43</sup> Nadxa guzre Jesús benne' ca':

—¿Ájazra na' David gate bchálaje' cheę Cristo dxę'ę Le': Xran? Gate gunná David da nigá bchálaje' da ble'e Be' Lá'azxa le'. Caní naca da na' gunná David:

<sup>44</sup> Xrana' Dios guzre' Xrana':

“Gudxé'e chalá'a xabela chia'

cadxa guzúa' zran ni'u benne' ca' quebe chawe' dxelelé'eng' Lue'.”

<sup>45</sup> ¿Ájazra naca na naca Cristo zri'ine David, che David ná'queze dxę'ę Le': “Xrana”?

<sup>46</sup> Quebe nu benne' guca xechébequeze' cheę', na' ze lau zra na' netú québedxa nu bexazre bi guchébedxa Le'.

## 23

*Jesús dxedil-le' benne' xudau' ca'*

*(Mr. 12.38-40; Lc. 11.37-54; 20.45-47)*

<sup>1</sup> Nadxa Jesús guzre' benne' ca' zaj zre'ę na', ne benne' ca' dxusédenę', <sup>2</sup> dxenné':

—Benne' ca' dxuluxuzájle'ę da nadxixruj bea Moisés, ne benne' xudau' fariseo ca' zaj napę' xel-la' dxenná bea xuluxuzájle'ę da nadxixruj bea Moisés. <sup>3</sup> Cheę le' na' le guzúa dizra' cheę benne' caní, ne le gun xúgute da xelenné'. Quebe gunle ca da dxelún benne' ca', lawe' da dxelenné' da ca' dxal-la' gunle, na' quebe dxelúnqueze' na. <sup>4</sup> Dxelunę' xua zí'ile'ę da quebe dxelezeque xelezúe bėnneache, ne dxelenná bé'eng' bėnneache cheę xelu'ę na. Benne' ca' ne quebe dxuluzúe' na netú zrube ne'ę cheę da dxuluzúe benne' xubla. <sup>5</sup> Xúgute da dxelún benne' ca' naca na cheę xelélé'e bėnneache. Dxeledánneng' dxelu'ę luzxguę', ne ne'ę ladxe' laga naga naxúaj dizra' cheę Dios, ne dxelácue' zra lanę' da zeajzę luzre na tunna. <sup>6</sup> Dxelaca lazre' xelebé'ę naga zę ląweze naga dxelawe', ne naga naca blau lu xu'u ca' naga dxeledube'.

<sup>7</sup> Dxelaca lazre' xelapa bėnneache le' ba lá'ana la neza ca', ne xelę'ę le': “Benne' wesede.”

<sup>8</sup> Na'a le'e, quebe güele lataj nu xę le'e, “Benne' wesede”, lawe' da xúgutele nácale bi bichele tule xetule, ne tuze Benne' dxusédenę' le'e, neda', Cristo. <sup>9</sup> Quebe nu xe le'e: Xrae, lu xęzr la xu nigá, lawe' da zua tuze Xrale, Dios na' zue' xabáa. <sup>10</sup> Quebe güele lataj nu xę le'e: Xran, lawe' da zua tuze Xránale, neda', Cristo. <sup>11</sup> Bėnnea' dxunę' zrin cheę xęzicadxale le'e nácadxę' blau ládujla le'e. <sup>12</sup> Bėnnea' dxucá'ana szren cuinę' wexęxrujla bėnnea', na' bėnnea' dxaquę' dxęxruj lazre' wegá'ane' szren.

<sup>13</sup> Edxugua le'e, benne' dxusédele da nadxixruj bea na, ne le'e, benne' fariseo ca'. Ląweze dxunle da xrlátaje. Dxusęzrujle neza cheę xabáa cheę quebe nu chu'u na. Lé'ęqueze quebe dxú'ule, ne quebe dxuele lataj benne' dxelaca lazre' xelu'ę.

<sup>14</sup> Edxugua le'e, benne' dxusédele da nadxixruj bea na, ne le'e, benne' fariseo ca'. Ląweze dxunle da xrlátaje. Dxęgúale lızre nu'ula ca' ba gulate benne' biu cheę', na' cheę xulé'ele xrlátaje cuínale, dxuwızrale Dios xcha lu xudau'. cheę le' na' da zrentę da guzríia xi na le'e.

<sup>15</sup> Edxugua le'e, benne' dxusédele da nadxixruj bea na, ne le'e, benne' fariseo ca'. Ląweze dxunle da xrlátaje. Le'e dxedale du ca naca xęzr la xu nigá ne ca naca nísadau' cheę si' tu benne' ca naca da zęajle'ę cheę Dios, na' gate bache dxunle na, na' dxugápadxale bėnnea' dul-la ca da nabágale le'e cheę cuía xi'ę lu lataj ba xa'.

<sup>16</sup> Edxugua le'e. La chul-la nácale, ne dxaca lązrele cu'ule benne' neza. Dxennale che tu benne' dxuzétaje' xudau', quebe dxun na le' ba xen, na' che dxuzétaje' oro cheę xudau', da na' dxun na le' ba xen. <sup>17</sup> Nácale benne' xala, ne la chul-la. ¿Nula da naca na blaudxa, oro, che xudau' na' da dxucá'ana na lá'azxa oro na? <sup>18</sup> Cá'anqueze dxennale le'e che nu dxuzetaj cugu lá'azxa, quebe dxun na le' ba xen, san che dxuzétaje' guna' da zria na lawe' cugu lá'azxa, da na' dxun na le' ba xen. <sup>19</sup> Nácale benne' xala ne la chul-la. ¿Nula da naca na blaudxa, guna'

na', u cugu lá'azxa na' da dxucá'ana na lá'azxa guna' na'? <sup>20</sup> Che nu benne' dxuzétaje' cugu lá'azxa, quegaze cugu lá'azxa dxuzétaje', san cá'anqueze dxuzétaje' ca naca da zria lawe na. <sup>21</sup> Bénnea' dxuzétaje' xudau', quegaze xudau' na' dxuzétaje'. Cá'anqueze dxuzétaje' Dios zue' lataj na'. <sup>22</sup> Cá'anqueze benne' dxuzétaje' xabáa, dxuzétaje' lataj naga zria Dios, ne Diósqueze, Bénnea' zrie' lataj na' dxuzétaje'.

<sup>23</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxunézruje chee xudau' tu cue' chee da chi cue' chee xixruj weaj, ne chee bínnedu ca' chee anís, ne chee cumín. Quebe dxunle da zaj naca na blaudxa da zaj zua na lu da nadxixruj bea na, ca naca chee gácale xrlátaje, ne chee xexache lázrele le sa' ljwézrele, ne chee chéajlele chee Dios. Da caní zaj naca na da dxun na ba xen gunle, ne quebe gusanle da ca' ba dxunle. <sup>24</sup> La chul-la nácale, ne dxaca lázrele cu'ule benne' neza. Dxecá'ale da naca ca tu bé'adau', be zrua lawe' da dxi'ajle, na' quebe dxeque be'ele dxi'ajle da naca ca tu camello, be dxelaga benneache.

<sup>25</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca zaj naca zriga', ne xé'ena da dxíbele cúzreze na. Lu'ule na quebe dxíbele. Caní nácale lawe' da lu lázrdaule nácale ca gubán, ne benne' dxucudé. <sup>26</sup> Benne' fariseo la chul-la. Nedxu le quibe lu'ule zriga', ne xé'ena, na' cá'anqueze xegá'ana chawe' cúzrela.

<sup>27</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Nácale ca tu ba chiche da nalá na xrtante cúzrela, na' lu'ule na nazrate na zrita chee benne' gate', ne xúgute da sgute. <sup>28</sup> Ca'an nácale le'e. Cúzrela nala'le ca benne' xlátaje, na' lu lázrdaule nazrate na da wen lazre', ne da caléla da dxunle.

<sup>29</sup> 'Edxugua le'e, benne' dxusédele da nadxixruj bea na, ne le'e, benne' fariseo ca'. Láweze dxunle da xrlátaje. Dxucá'anale cháwedau' ba ca' naga zaj nagache benne' ca' buluchálaje' waláz chee Dios, ne dxuele lechítaje lu'a chee benne' xrlátaje ca'. <sup>30</sup> Dxennale: "Chela netu' ba zúantu' gate na' gulezrá' xra xrtantu' ca', quebe gúcalentu' benne' ca' belutié' benne' ca' buluchálaje' waláz chee Dios." <sup>31</sup> Gate dxennale ca', le'e dxexúnbeaqueze nácale zri'ine zre sua benne' ca' belutié' benne' ca' buluchálaje' waláz chee Dios. <sup>32</sup> Dxusexúzrele dxunle ca da gulezú lau belún xra xrtáule ca'.

<sup>33</sup> 'Be snia nácale, ne xrtia be snia. ¿Ájazra gunle chee gáchele lu da zi' da xa' chee lataj ba xa'? <sup>34</sup> Chee le na' neda' sel-la' cheele benne' ca' xuluchálaje' waláz chee Dios, ne benne' sina ca', ne benne' ca' xulusédené' le'e. Lé'equeze gútele, ne gudá'le xaga béguaj bal-la benne' ca', na' xebal-le' gunle le' zi' lu xudau' ca', na' gau zi' xúzrele le' tu xezre xetu' xezre. <sup>35</sup> Ca'an gaca, le'e bágale zria chee xel-la' gute chee xúgute benne' xrlátaje ca' belute xra xrtáule ca', gate guzú lau na nu beje Abel, benne' xrlátaje, ne naga bzrinté bétéle Zacarias ládujla naga zua lataj lá'azxa chee xudau' ne lataj naga dxuluzezxe' be xixre'du ca', be dxelégú'e lu cugu chee Dios. <sup>36</sup> Da li dxapa' le'e, bénneache zaj zre'e na'a xelebague' zria chee xúgute da caní.

*Jesús dxebezre' chee xezre Jerusalén  
(Lc. 13.34-35)*

<sup>37</sup> Nadxa gunná Jesús:

—Jerusalén, Jerusalén, le'e na' dxútele benne' ca' dxuluchálaje' waláz chee Dios, ne dxuzriale xiaj benne' gubáz ca' dxesel-la Dios naga zúale. Zane' lásate guca lazra' gutupa' zri'inele chia' ca dxun bedxuj, dxutúpaba' be dxé'enedau' zran xrilaba', san quebe guca lázrele. <sup>38</sup> Le nna'xque na'a, lízrele xelxegá'ana na dácheze, <sup>39</sup> lawe' da dxapa' le'e, québedxa lé'ele neda' cadxa zrin zra nnale: Lá'azxa naca bénnea' ze'e waláz chee Xránadxu.

## 24

*Jesús dxenné' wabía xi' xudau'  
(Mr. 13.1-2; Lc. 21.5-6)*

<sup>1</sup> Nadxa bedxúaj Jesús xudau', na' dxácaté dxexedxúaje' na', gulebiga benne' ca' dxusédené' lau Jesús, ne gulezú lawe' dxuluchálajle' Le' ca naca chee xudau' na'. <sup>2</sup> Bechebe Jesús:

—¿Dxelé'ele xúgute da caní? Da li dxapa' le'e, netú xiaj caní quebe xegá'ana zeajzria cuzru ljwezre na. Ca naca na cuía xi na.

*Ca naca da xelunna bea na ba za zra bzébe  
(Mr. 13.3-23; Lc. 21.7-24; 17.22-24)*

<sup>3</sup> Nadxa xjaque' lu xi'a naga zaj ze xaga olivo, na' gate dxe' Jesús na', benne' ca' dxusédené' belezrine' lau Le', ne bagácheze buluchébe' Le':

—Gunná netu'. ¿Bata gaca da na'? ¿Bi gunna bea na gate zrin zra xela'u, ne gate cheajsé chee xezr la xu nígá?

<sup>4</sup> Nadxa Jesús guzre' benne' ca':

—Le guxúe cuínale chee quebe nu si xę le'e. <sup>5</sup> Benne' zan xeledé'e. Xelún lazre' xelenné' zaj naque' Cristo, na' xelezí xe'e benne' zan. <sup>6</sup> Wenle le'e dxaca wedil-la, ne waca wedil-la gáteteze na'. Quebe zrébele, lawe' da dxal-la' xelaca da caní. Da caní quebe zaj naca na chee zra bzebe. <sup>7</sup> Tu cue' xęzr la xu tıl-lale na xetú cue' xęzr la xu, ne tu xęzre tıl-lale na xetú xęzre. Wata' gubina', ne welata' xızrawe' ca', ne wazrú' gáteteze na'. <sup>8</sup> Xúgute' da caní zaj naca na naga dxezú lau ca da xelezaca bėnneache.

<sup>9</sup> 'Nadxa xuludé'e le'e naga si sácale, na' bál-lale welútequeze'. Ca naca bėnneache xeledé'ne' le'e lawe' da dxunle da naca chia'. <sup>10</sup> Lu zra na' benne' zan quėbedxa xelėajle'e chia', na' xeledé'ne' le sa' ljwezre', ne xuludé'e le sa' ljwezre' lu na' benne' guledabague' le'. <sup>11</sup> Welelá' benne' zan benne' wen lazre'. Xelenné' dxuluchálaje' waláz chee Dios, na' xelezí xe'e benne' zante. <sup>12</sup> Lawe' da gáta'le'e da calela, benne' zan quėbedxa xelezrí'ine' le sa' ljwezre'. <sup>13</sup> Bėnnea' zra chache' ca zrinte zra bzebe, la bėnnea'. <sup>14</sup> Ca naca dizra' chawe' nigá ca nna bea Dios, xulaj na du gabí'i xęzr la xu chee xelén ca naca benne' chee xúgute cue' xęzr la xu, na' te na' cheajsé chee xęzr la xu nigá.

<sup>15</sup> 'Benne' gulabe' da nigá dxal-la' chėjni'ine'. Daniel, benne' bchálaje' waláz chee Dios, bzujaje' ca naca chee tu da dxezrá'a Dios, da dxuxrinnaj na. Gate lé'ele da nigá zua na lataj lá'azxa chee xudau', <sup>16</sup> nadxa benne' zaj zre'e xęzre ca' zaj nababa Judea dxal-la' xuluzrúnnuje', ne chjaque' lu xi'a zren. <sup>17</sup> Che tu benne' ze' chju'u chee', quebe dxal-la' xexétaje' bi cheajxelėaje' lu xu'u. Dخال-la' guzrúnnuje'. <sup>18</sup> Benne' zue' le'e xixre' quebe dxal-la' xezrine' lizre' cheajxęzri'e xicha chee' da gácue'. <sup>19</sup> Edxugúa nu'ula ca' zaj zre'e lu zra na' zaj zue' zi'i, ne nu'ula ca' zaj nu'e bidau', ne dxelázrebe'. <sup>20</sup> Le naba Dios quebe gun na ba xen guzrúnnuje beu' zaga, ne quegá lu zra dxupá'anale, <sup>21</sup> lawe' da che ca' gaca na, na' da zréntędxa da xelezí saca bėnneache ca da quebe ne xelezaque' ca guzú lautę zua xęzr la xu nigá, ne quėbedxa bi xelezaque' caní ca te chee da nigá. <sup>22</sup> Che Dios quebe guzáchie' zra ca', na' netú quebe nu la. Guzáchie' na chee gácalęne' benne' ca' bache nabėaje' chee'.

<sup>23</sup> 'Chee le na', quebe chėjlele che nu xę le'e: "Le nna'xque, nigá zua Cristo", u che nu xę le'e: "Le nna' xque, na'la zue'." <sup>24</sup> Caní dxapa' le'e lawe' da xeledá' benne' zan, benne' guzrí xe'e, na' xelenné' zaj naque' Cristo, u zaj naque' benne' dxuluchálaje' waláz chee Dios, na' da zrentę xululé'ene', ne xelune' xel-la' waca zren ca' chee xelezí xe'e benne' ca' ba nabėaj Dios. Caní xelunę' che xelezęque'. <sup>25</sup> Ba bchálajlena' le'e caníqueze na'a quebe ne gaca na. <sup>26</sup> Chee le na', che nu xę le'e: "Le nna'xque, na' zue' le'e xixre'", quebe chėjle na', u che nu xę le'e: "Le nna'xque, lu xu'u nigá zue'", quebe chėjlele. <sup>27</sup> Ca dxun tu xesa guziu', dxepe na naga dxalaj gubizra, na' dxelė'edxu na naga dxeбіá gubizra, ca'an gaca gate xida' neda', Benne' Gulje' Bėnneache. <sup>28</sup> Gáteteze de tu da nate, na' dxelezezraga laba ca'.

*Ca da gaca gate ba zua xelá' Benne' Gulje' Bėnneache*  
(Mr. 13.24-37; Lc. 21.25-33; 17.26-30, 34-36)

<sup>29</sup> Na' gunná Jesús:

—Gate bache guca zra na' gate xelezaca zi' bėnneache, nadxa gubizra chul-la na naga zua na, na' beu' quebe gusení na, na' belaj xelęxruj na, na' xelezrízequeze ca naca da zaj naca na szren da dxeledá' lu be'. <sup>30</sup> Nadxa lé'ele zran xabáa da gulé'e na ba zua xelá'a neda', Benne' Gulje' Bėnneache, na' ca naca bėnneache zaj zre'e xęzr la xu xeledzrequeze'. Nadxa xeledé'ene' neda', Benne' Gulje' Bėnneache, zezá'a lu beuj zran xabáa, zúale neda' dutę xel-la' dxenná bea, ne da xabáa. <sup>31</sup> Nadxa sél-laqueza' gubáz chee xabáa chia' ca', na' xulucúezre' zizraj lúzuba' chee xuluxutupe' benne' ca' ba nabėaja' chia' dapa saca chee xęzr la xu nigá, ne du ca naca xęzr la xu nigá.

<sup>32</sup> 'Le gusede ca naca da dxulé'e xaga higo. Gate dxelexedxé'ene zruze na, ne dxezri na laga' dxé'ene, ba nézele ba za xaca beu' la. <sup>33</sup> Cá'anqueze gate lé'ele dxelaca xúgute da caní, dxal-la' nézele gágute ba zua cheajsé chee xęzr la xu, ne ba zua gaca na. <sup>34</sup> Da lí dxapa' le'e, xúgute da caní xelaca na nédxula gate quebe ne xelate bėnneache zaj zre'e lu zra na'. <sup>35</sup> Xabáa ne xęzr la xu weledé chee na. Dizra' chia' quebe te chee na.

<sup>36</sup> 'Gate za zra na', ne bila zra na', quebe nu neze, quegá gubáz chee xabáa zaj zre'e xabáa, ne neda', Zrí'ine Dios. Tuze Xradxu Dios nézenę' gate zrin zra na'.

<sup>37</sup> 'Ca guca lu zra ca' gate zua Noé, cá'anqueze gaca na gate xelá'a neda', Benne' Gulje' Bėnneache. <sup>38</sup> Ca lu zra ca' gate quebe ne gun Dios nisa xiuj da guzrí'a xi na bėnneache, gulezrá' bėnneache ca' dxelė'aj dxelawe', ne dxuluchaga ne'e, ne dxulunęzruje' zrí'ine' ca' chee xuluchaga na'be', cadxa bzrin zra guxú'u Noé lu da zren na' dxedá lawe' nísadau' da nazi le na arca. <sup>39</sup> Quebe guleque bé'ene' ca da dxal-la' gaca na, cadxa bzrin zra guca xiuj na', ne bęte na ca naca benne' ca'. Cá'anqueze gaca gate xelá'a neda', Benne' Gulje' Bėnneache. <sup>40</sup> Ca lu zra ca' xelezrá' chupa benne' biu le'e xixre'. Tue' xeché'e, na' xetúe' xegá'ane'. <sup>41</sup> Xelezrá' chupa nu'ula dxelútue'. Tue' xeché'e, na' xetúe' xegá'ane'.

<sup>42</sup> Le sua le'e ban lazre' lawe' da quebe nézele bi zra xelá'a neda', Xránale. <sup>43</sup> Da nigá dxal-la' nézele: Che tu xrane xu'u nézene' bi zra chizrela zrin gubán, waxíchaje' bchigala, ne quebe gu'e lataj xusalaj benne' gubán lizre' chee' cuane'. <sup>44</sup> Chee' le' na', le sua le'e ban lazre' lawe' da xelá'a neda', Benne' Gulje' Bénneache, gate québela dxéquele ca'.

*Benne' wen zrin li lazre', ne benne' wen zrin quebe naque' li lazre'*  
(Lc. 12.41-48)

<sup>45</sup> Na' gunná Jesús:

—¿Nuzra na' benne' wen zrin li lazre' ne dxéajni'ing', bénnea' xrané' dxucá'analene' le' benne' zaj zre'e lizre' chee' gunézruje' da xelawe' gate zrin zra chee' na? <sup>46</sup> Ba neza naca na chee' benne' wen zrin na', gate xezrín xrané', lé'ene' le' dxune' ca naca da nabague'. <sup>47</sup> Da li dxapa' le'e, xrané' gucá'analene' le' ca naca da nape'. <sup>48</sup> Che benne' wen zrin na' gaque' benne' wen da calela, ne guéqueñe' quebe xelá' ze' xrané', <sup>49</sup> ne che su lawe' gusaca zi'e xezícala benne' wen zrin ca', ne xi'aj gágulene' benne' dxelezuzre', <sup>50</sup> nadxa xrané' xezrine' zra gate québela dxebeze'. Gaca na zra quebe nézene', <sup>51</sup> na' gusaca zí'le'e le'. Chugue' chee' gague' tuze benne' ca' dxelune' láweze da xrlátaje. Cuezre', ne xáguxa'ate' lazze'.

## 25

*Da dxulé'e na ca naca chee' chi nu'ula cuide'*

<sup>1</sup> Gunná Jesús:

—Ca gaca chee' benne' xelu'e naga dxenná bea Dios xabáa naca na ca da guca chee' chi nu'ula cuide' caní. Gulequ'e' xi' chee' ca', chee' chjaque' laní chee' wechaga na', dxelebeze' bátala xelá' benne' wechaga na'. <sup>2</sup> Gazxu' nu'ula caní gulaque' gat lazre', na' xegazxu' nu'ula caní zaj naque' ban lazre'. <sup>3</sup> Nu'ula ca' quebe zaj naque' ban lazre' belú'e xi' chee' ca', san quebe belú'e da za zxezxe na da xelegu'e' lu xi' chee' ca'. <sup>4</sup> Nu'ula ban lazre' ca' belú'e xi' chee' ca', ne da za zxezxe na da xelegu'e' na. <sup>5</sup> Lawe' da guzré benne' wechaga na', na' gulaca wase ca zaj naque', na' xúgute' gulasie'. <sup>6</sup> Dxele ben tu chí' benne' dxebeze' xe'e, dxenné': "Ba za wechaga na'. Le dxuaj si' lu na'le le'." <sup>7</sup> Xúgute' nu'ula cuide' caní gulasé', na' gulezú lawe' bulugale' xi' chee' ca'. <sup>8</sup> Nadxa gazxu' nu'ula ca' quebe zaj naque' ban lazre' gulé'e gazxu' nu'ula ban lazre' ca': "Le gunna late' da za zxezxe na cheentu', lawe' da ba dxelexula xi' cheentu'." <sup>9</sup> Nu'ula ban lazre' ca' belexechebe': "Quebe gaca, lawe' da che gúnnantu' late' chee'e, quebe gaca na da dxechínnentu' netu', ne da dxechínnele le'e. Le chjácala naga dxutie' na, ne le cheajxri' chee'e." <sup>10</sup> Dxácate' zjaca nu'ula ca' quebe zaj naque' ban lazre', na' bezrín wechaga na'. Nu'ula ban lazre' ca' gulu'e nen le' lu laní chee' wechaga na', na' bsezxuj dxa xu'u na'. <sup>11</sup> Gudé na' belexezrín xegazxu' nu'ula ca', na' gulenné': "Xran, Xran, gusalaj chú'untu'." <sup>12</sup> Le' bechebe': "Cabata'. Da liqueze quebe núnbe'a le'e."

<sup>13</sup> Nadxa Jesús guzré' benne' ca':

—Le sua le'e ban lazre', lawe' da quebe nézele bi zra, u bi xel-la' xelá'a neda', Benne' Gulje' Bénneache.

*Da dxulé'e na ca naca chee' benne' gulezú'e dumí*

<sup>14</sup> Na' gunná Jesús:

—Ca gaca chee' benne' xelu'e naga dxenná bea Dios xabáa, naca na ca da guca gate tu benne' zu'e' chee' se'e chéaje' zitu', na' gunné' bi wen zrin chee' ca', ne bcá'analene' bi wen zrin ca' dumí chee'.

<sup>15</sup> Tu bi ca' bnézruje' gazxu' cue' dumí, na' xetube' bnézruje' chupa cue' dumí, na' xetube' bnézruje' tu cue' dumí. Bnézruje' chee' tu tube' ca da xelezéquebe' xuluchínebe' na. Nadxa guz'é e zéaje' zitu'. <sup>16</sup> Bi wen zrin na' guzi'be' gazxu' cue' dumí bchínebe' dumí na', na' bezi'be' xegazxu' cue' dumí. <sup>17</sup> Cá'anqueze bi wen zrin na' guzi'be' chupa cue' dumí, bezi'be' xechupa cue' dumí. <sup>18</sup> Bi wen zrin na' guzi'be' tu cue' dumí na' guxíajbe', ne bcáchebe' dumí chee' xránabe' tu lu xedxu da bñebe' lu xu.

<sup>19</sup> Zane' iza ba guca gate bezrín xrane bi wen zrin ca', na' guzú lawe' dxezi'e da bdee' lu na' bi wen zrin ca'. <sup>20</sup> Nedxu bzrin bi wen zrin na' guzi'be' gazxu' cue' dumí, na' bnézruje' xránabe' xegazxu' cue' dumí, na' gúzrebe' le': "Xran, bennu' neda' gazxu' cue' dumí. Nigá de' xegazxu' cue' da bezi'a nen dumí chiu'." <sup>21</sup> Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubé'le'." <sup>22</sup> Gudé na' bzrin bi wen zrin na' guzi'be' chupa cue' dumí, na' gunabe': "Xran, bennu' neda' chupa cue' dumí. Nigá de' xechupa cue' da bezi'a nen dumí chiu'." <sup>23</sup> Na' xránabe' guzre' lebe': "Da chawe' benu'. Nacu' tu bi wen zrin xrlátaje, ne li lazre'. Gucu' li lazre' lu late' da benna' lue', na' gúnnaqueza' lue' da zréndxaqueze. Guxú'u naga zua' neda', ne gubé'le'." <sup>24</sup> Gate bzrin bi wen zrin na' guzi'be' tu cue' dumí, na' gúzrebe' xránabe': "Xran, nezda' nacu' benne' dxenné' xue, ne dxezi'u da quebe guzú', ne dxexeca'u da quebe besiu'. <sup>25</sup> Chee' le' na' bzreba', na' guxá'a xeaicáchia'

dumí chiu' lu xu. Nigá ðe da naca chiu'." <sup>26</sup> Na' xránabe' guzre' ðebe': "Nacu' bi wən zrin calela, ne zraweðe. Ba nézqueznu' dxezi'a da quebe guza', ne dxexecá'a da quebe besia'. <sup>27</sup> Chee ðe na' la xju'u dumí chia' na' lu na' benne' dxelízuje' chee dumí da dxuluchínene', na' gate za' neda', na' xezi'a da naca chia' nen da belezí'e." <sup>28</sup> Nadxa guzre' benne' ca' zaj zre'e na': "Le xecá'a dumí na' da núxrube', ne le gunezruj na bēneea' nape' chi cue' dumí. <sup>29</sup> Benne' nape' wazidxe' da zrendxa, na' benne' quebe nape', ca late' da du na' nape' wecá'a na. <sup>30</sup> Ca naca bi wən zrin nigá, bi wedegún, le xebéaj-be' chalé'ajla naga naca chul-la, naga cuézrebe', ne xáguxa'atē láxzabe'."

*Ca gun Dios gate guchi'e chee bēneache zaj zre'e xezr la xu*

<sup>31</sup> Na' gunná Jesús:

—Gate xelá'a neda', Benne' Gulje' Bēneache, ne Benne' Wenná Bea, nen ca naca gubáz chee xabáa chia', na' cué'queza' lataj naga nna be'a, da naca na da xabáa. <sup>32</sup> Na' bēneache chee xúgutē cue' xezr la xu xelexezrague' lawa' neda', na' xebéaja' cha chee' ca dxun benne' dxuxúe' zřila'. xebéaje' chíbudu ca' ládujla zřila' ca'. <sup>33</sup> Guzrá'a benne' ca' zaj naca zřila' chia' chalá'a xabēla chia', na' benne' ca' zaj naca ca chíbudu ca' guzrá'a le' chalá'a xégjala chia'. <sup>34</sup> Nadxa xapa' benne' ca' zaj zra' chalá'a xabēla chia': "Le da le'e, nácale xrlátaje lau Xra'. Le chu'u naga dxenná bea Xra', lataj na' bcueze' chee gate na' beñe' xezr la xu nigá. <sup>35</sup> Caní dxaca lawe' da guduna', na' bgágule neda'. Gubíleda', na' bēnnale da gu'a. Gudá' ca tu benne' xu'e neza, na' gulu'ule neda' lízrele. <sup>36</sup> Bxázzředa' zra lana' gácua', na' bgácule neda'. Quebe chawe' guzúa', na' bedajná bale neda'. Guxu'a lizre xia, na' bedajná bale neda'." <sup>37</sup> Nadxa benne' xrlátaje caní xelenné': "Xran, ¿bata blé'entu' Lue' dxedunu', na' bgáguntu' Lue'? ¿Bata blé'entu' Lue' dxebílenú' na' bēnnantu' da gu'u? <sup>38</sup> ¿Bata blé'entu' Lue' ca tu benne' xu'e neza, na' gulu'untu' Lue' lizrentu'? ¿Bata blé'entu' Lue' dxexázzřenu' zra lanu', na' bgácuntu' Lue'? <sup>39</sup> ¿Bata bēnentu' quebe chawe' zu', u xu'u lizre xia, na' bedajná bantú' Lue'?" <sup>40</sup> Neda' xechēba': Da li dxapa' le'e, ca da beñle chee bēnnedu caní, benne' zaj naca dxexruj lazre', chee néda'queza' beñle ca'.

<sup>41</sup> Nadxa neda', Benne' Wenná Bea, xapa' benne' ca' zaj zra' chalá'a xégjala chia': Le cuasa cuita' neda', le'e, nácale wən da calela lau Xra'. Le chjaca lu xi' chee lataj ba xa' da nabeza na chee da xriwe', ne chee gubáz chee na ca'. <sup>42</sup> Caní dxaca lawe' da guduna', na' le'e quebe bēnnale da gawa'. Gubíleda', na' quebe bēnnale da xí'aja'. <sup>43</sup> Gudá' ca tu benne' xu'e neza, na' quebe gulu'ule neda' lízrele. Bxázzředa' zra lana' gácua', na' quebe bgácule neda'. Quebe chawe' guzúa' ne guxu'a lizre xia, na' quebe bedajná bale neda'. <sup>44</sup> Nadxa benne' ca' xeléqueze' neda': "Xran, ¿bata blé'entu' Lue' dxedunu', u dxebílenú', u xu'u neza, u dxexázzřenu' zra lanu', u quebe chawe' zu', u xu'u lizre xia, na' quebe gúcalentu' Lue'?" <sup>45</sup> Neda', benne' wenná bea, xechēba': Da li dxapa' le'e, lawe' da quebe bi beñle chee bēnnedu caní, benne' zaj naca dxexruj lazre', quebe bi beñle chee néda'queza'. <sup>46</sup> Benne' caní chjácacqueze' lataj ba xa', na' benne' xrlátaje ca' chjaque' lu xel-la' nabán da zeajlí canna.

## 26

*Dxelíłaje' ájala xelele' Jesús*

(Mr. 14.1-2; Lc. 22.1-2; Jn. 11.45-53)

<sup>1</sup> Gate bexuzre bchalaj Jesús caní, na' guzre' benne' ca' dxusédenē':

<sup>2</sup> —Ca ba nézqueze, xechupa zraze na' a súadxu Laní Pascua, da naca na zra dxuluxucube benne' judío ca guca gate Dios bebéaje' bēneache chee' lu xezr la xu Egipto, na' neda', Benne' Gulje' Bēneache, xuludé'e neda' lu na' benne' xuludé'e neda' xaga bēguaj.

<sup>3</sup> Ca lu zra na' benne' xichaje' ca' chee bxruze ca', ne benne' dxuluxuzájle'e da bdxixruj Moisés, ne benne' gula sina ca' chee judío ca', belezrague' chale'aj chee xu'u zaca chee Caifás, bxruze blau. <sup>4</sup> Na' belíłaje' ájala xelele' Jesús lu da wən lazre' chee xelútíe' Le'.

<sup>5</sup> Gulenné':

—Quebe gundxu na lu zra laní nigá, chee quebe xeledábaga benne' ca' dxi'u.

*Tu nu'ula dxegu'e Jesús da dxelá zixre*

(Mr. 14.3-9; Jn. 12.1-8)

<sup>6</sup> Zua Jesús xezre Betania lizre Simón, bēneea' güé'ene' we' guzru'. <sup>7</sup> Bzrin tu nu'ula naga zua Jesús, nu'e tu zruágadau' da naca na xiaj alabastro, ne nazrate' na da dxelá zixre da zácale'e na. Gate na' dxe' Jesús ga dxelawé', na' nu'ula nigá gulu'e na xichaj Jesús. <sup>8</sup> Gate belelé'e benne' ca' dxusede Jesús da nigá, na' belezre'e, ne gulezú lawe' dxelenné':

—¿Bizr chee na' guzřia xi' da nigá? <sup>9</sup> Da nigá waca la gudá'u na sí'adxu da zřente, chee gácaleđxu benne' xache' ca'.

<sup>10</sup> Jesús bennē' da nigá, na' guzre' benne' ca':

—¿Bizr chee na' dxunle nu'ula nigá zede? Da nigá beñe' naca na tu da xrlátaje. <sup>11</sup> Benne' xache' ca' tu zrázqueze' ládujla le'e, na' neda' quegá tu súáleza' le'e. <sup>12</sup> Ca naca da beñ nu'ula

nigá, gulu'e da zixre na' bel-la' dxen chia', naca na da xucá'ana chawe na neda' chee zra gachia' lu xedxu ba. <sup>13</sup> Da li dxapa' le'e, gáteteze xuluchálaje' dizra' chawe' chia' nigá' zra gabí'i xezr la xu, na' zrálajqueze ca da ben nu'ula nigá, chee cheajlesá lazre' bénneache le'.

*Judas dxechebe lazre' gudé' Jesús*

(Mr. 14.10-11; Lc. 22.3-6)

<sup>14</sup> Nadxa tu benne' chazrinnu ca' dxusede Jesús, bénnea' le' Judas Iscariote, guxiáje' eajchálajlene' benne' xíchaje ca' chee bxruze ca'. <sup>15</sup> Guzre' le':

—¿Ajate gúnnale neda' che ca' gudéa' Jesús lu na'le?

Nadxa benne' ca' gulízruje' le' chi dxua dumí plata. <sup>16</sup> Ca lu zra na' guzú lau Judas dxexilaje' ájala gune' gudé' Jesús lu na' benne' ca'.

*Da dxágudxu chee xucúbedxu ca guca gate gute Xránadxu*

(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Zra nedxu chee laní na' gate na' dxelawe' xeta xtila da quebe nachixre cua zichaj chee na, benne' ca' dxusede Jesús belezrine' lau Le', na' buluchebe' Le':

—¿Gazra dxaca lazru' gucuézentu' da gágudxu chee laní pascua chee benne' judío?

<sup>18</sup> Jesús guzre' le':

—Le chjaca lu xezre na', naga zua lizre tu benne', na' le xe'e: “Bennea' dxusédené' dxi'u dxenné': Zra chia' gatia' ba zua gágute, na' lizru' lue' gawa' chee Laní Pascua tu zren nen benne' ca' dxusededa'.”

<sup>19</sup> Benne' ca' dxusede Jesús belune' ca da gunná bé'ene' le', na' bulucueze' da xelawe' chee Laní Pascua.

<sup>20</sup> Gate gula chizrela, na' gudxé' Jesús ga gawe' tu zren nen benne' ca' dxusédené'.

<sup>21</sup> Dxácaté na' dxelawe', guzre Jesús benne' ca':

—Da li dxapa' le'e, tule le'e naca bénnea' gudé' neda' lu na' benne' ca' dxelune' da calela.

<sup>22</sup> Nadxa benne' ca' belexewi'inele'e, na' gulezú lawe' tu tue' dxuluchebe' Jesús:

—Xran, ¿quebe naca neda'?

<sup>23</sup> Na' bechebe Jesús:

—Bénnea' dxudé ne'e lu xé'ena tu zren nen neda', benne' na' gudé' neda'. <sup>24</sup> Neda', Benne' Gulje' Bénneache, waxá'a naga dxal-la' gatia' ca naxúaj na lu xiche chee Dios, san edxugúa bénnea' gudé' neda'. Cháwedxa naca la quebe gulaj bénnea'.

<sup>25</sup> Nadxa gunná Judas, bénnea' gudé' Jesús, dxenné':

—Benne' dxusede, ¿quebe naca neda'?

Na' bechebe Jesús, gunné':

—Awe', lue' na'.

<sup>26</sup> Dxácaté dxelawe', Jesús guqu'é'e xeta xtila, na' guzre' Dios: “Xcalenu'.” Gudé na' bzúzruje' na, na' bnézruje' na benne' ca' dxusédené', dxenné':

—Le gagu. Da nigá naca na bel-la' dxen chia'.

<sup>27</sup> Gudé na' guqu'é'e tu zriga', na' guzre' Dios: “Xcalenu'”, na' bnézruje' na benne' ca', dxenné':

—Le xi'aj xúgutele da xuzru lu zriga' nigá. <sup>28</sup> Da nigá naca na dxen chia' da guzúa chacha na xel-la' wezría cube da dxun Dios. Dxen nigá lalaj na ne chee benne' zanté chee gunite lau Dios dul-la zaj nabaga benne' ca'. <sup>29</sup> Dxapa' le'e, québedxa xi'aja' ca naca xrise uva nigá ca zrindxa zra xi'aja' da cube tu zren nen le'e naga dxenná bea Xra'.

*Jesús dxenné' nna Pedro quebe númbe'e Le'*

(Mr. 14.26-31; Lc. 22.31-34; Jn. 13.36-38)

<sup>30</sup> Ca gudé belul-le' chee Dios, na' gusiá' que' zjaque' lu Xi'a Xaga Olivo Ca'. <sup>31</sup> Nadxa Jesús guzre' benne' ca':

—Xúgutele le'e gusan lázrele neda' na'a zre', lawe' da naxúaj na lu xiche chee Dios, dxenné': “Gutia' benne' dxuxié' zrila', na' zrila' ca' xelase dínnajba'.” <sup>32</sup> Gate te xebana' neda', cha'a neda' ga nababa Galilea nédxudxa ca le'e.

<sup>33</sup> Nadxa bechebe Pedro:

—Lácala xúgute benne' caní xulusán lazre' Lue', quebe guna' neda' ca'.

<sup>34</sup> Nadxa Jesús guzre' le':

—Da li dxapa' lue', lu zre' na'a zre' nédxudxa gate cuezre xjeaj, lue' wanná'u' chunna lasa quebe númbe'u neda'.

<sup>35</sup> Pedro guzre' Jesús:

—Lácala gatia' neda' tu zren nen Lue', québequeze nnia' quebe númbe'a Lue'.

Cá'anqueze gulenná xúgute benne' ca' dxusede Jesús.

*Jesús dxuchálajlene' Dios naga zaj xze' xaga olivo ca' nazí le na Getsemaní*

(Mr. 14.32-42; Lc. 22.39-46)



<sup>36</sup> Nadxa bzzrin Jesús nen benne' ca' dxusédene' tu lataj nazí le na Getsemaní, na' guzre' le':

—Le cue'e nigá dxácaté cha'a neda', guchálajlëna' Dios.

<sup>37</sup> Jesús guché'ë Pedro, ne dxúpaté zri'ine Zebedeo, na' guzú lawé' bewí'inele'ëne' ne guzúalé'ë stebe. <sup>38</sup> Nadxa guzre' benne' ca':

—Dxewí'ine lázrele'a dxunté na gute na neda'. Le xegá'ana le'e nigá, ne le sua ban lazre' tu zren nen neda'.

<sup>39</sup> Nadxa Jesús guzé'ë zéaje' xelate' caníladxa, na' gute' sudxú'ala lu xu, ne bchálajlëne' Dios, dxenné':

—Xrae, chela gaca, bde na chalá'ala quebe gaca chia' ca naca xel-la' gute caní da naca na ca tu da sla' da xi'aja'. Quebe gaca na ca dxaca lazra' neda'. Gaca na ca dxaca lazru' Lue'.

<sup>40</sup> Nadxa bezrín Jesús naga zaj zra' benne' ca' dxusédene', na' blé'ëne' benne' ca' dxelásië', na' guzre' Pedro:

—¿Quebe gúcale le'e quíchale bchigala nen neda' tu chí'idau'ze? <sup>41</sup> Le nnaze, ne le guchálajlë Dios cheë quebe gun zréaje da xriwé' le'e. Da li béenne'du xu'ule dxaca lázre'le'e na, san lu belá' dxen cheele dxate ni'a na'le.

<sup>42</sup> Da gudxupe' lasa guxíaj Jesús bchálajlëne' Dios caní:

—Xrae, che quebe gaca te chalá'ala ca naca da dxal-la' saca', gaca na ca dxaca lazru' Lue'.

<sup>43</sup> Ca gudé na' bezrine', ne belé'ëne' benne' ca' dxusédene', dxelásië' lawe' da ba dx-elezzrude' lawé' dxelaca wásele'ë. <sup>44</sup> Bca'ane' benne' ca', guzé'ë zéaje' bchálajlëne' Dios da guxunne' lasa, na' gunnáqueze' ca da ba gunné' ca'an bache. <sup>45</sup> Nadxa bezrine' naga zaj zra' benne' ca' dxusédene', na' guzre' le':

—Le gase na'a, ne le xezi' lazre'. Ba bzzrin zra gate neda', Benne' Guljé' Bénneache, tea' lu na' benne' dul-la ca'. <sup>46</sup> Le chasa, ne le chu'u. Ba za bënnea' dxudé' neda'.

*Dxeleché'ë Jesús ca tu benne' wën da zrinnaj*

(Mr. 14.43-50; Lc. 22.47-53; Jn. 18.2-11)

<sup>47</sup> Ne duchálajlë Jesús na' gate bzzrin Judas. Naque' tu benne' chazrinnu ca', na' zá'acale benne' zanté le', benne' zaj nu'ë xia ca' ne xaga ca'. Benne' caní zaj naque' benne' gulesel-la benne' xíchajë ca' cheë bxruze ca', ne benne' gula sina ca' cheë judío ca'. <sup>48</sup> Judas, bënnea' dxudé' Jesús, ba blé'ëne' benne' ca' ca tu da gungé' da gulé'ë na nu na' naca Jesús. Gunné':

—Bënnea' gunupa' neda', Le' na'. Le che'ë ca tu benne' wën da zrinnaj.

<sup>49</sup> Nadxa bzzrin Judas lau Jesús, dxenné':

—Diuzre, Benne' dxuséde.

Na' bnupe' Jesús.

<sup>50</sup> Bechébe Jesús:

—Ljwezra', ¿bi cheë za'u?

Nadxa gulebiga benne' ca', gulelë' Jesús, na' beleché'ë Le' ca tu benne' wën da zrinnaj.

<sup>51</sup> Tu benne' ca' dxuséde Jesús guléajë' xia cheë', ne guchugue' chalá'a naga bi wën zrin cheë bxruze blau. <sup>52</sup> Nadxa Jesús guzre' le':

—Begú'u xia chiú' lu zre na, lawe' da xúgute benne' dxelute benne' nen xia nalá, cá'anqueze gate le'. <sup>53</sup> ¿Quebe nézenu' wázéqueda' neda' naba' Xra', na' Le' sél-late' na'a naga zua' da zandxa ca chazrinnu cue' gubáz cheë xabáa, zaj naque' zánete tu tu cue'? <sup>54</sup> Na'a che ca'an guna', ¿ájazra gaca gaca na ca da naxúaj na lu xiche cheë Dios, da dxenná na caní dxal-la' gaca na?

<sup>55</sup> Nadxa guzre Jesús benne' ca':

—Le'e bdxuajle nen xia nalá ca', ne nen xaga ca' cheë quélale neda', dxunle neda' ca tu benne' gubán. Xúgute' zra gudxe'a neda' lu xudau' dxusédeda' le'e, ne quebe gudélale neda'. <sup>56</sup> Xúgute' da caní dxaca na cheë gaca na ca da gulenná benne' ca' buluchálajë' waláz cheë Dios, da na' naxúaj na lu xiche cheë Dios.

Nadxa xúgute' benne' ca' dxuséde Jesús bulucá'ane' Le' tuzé', buluxuzrúnmuje'.

*Dxezrín Jesús lau benne' ca' cheë xu'u lawe' blau cheë judío ca'*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Benne' ca' gulelë' Jesús guleché'ë Le' lau Caifás, bxruze blau, ga na' zaj nazraga benne' ca' dxuluxuzájle'ë da bdxiruj be'e Moisés, nen benne' gula sina ca'. <sup>58</sup> Pedro zéaje nawé' Jesús zítu'la, na' bzzrine' chale'aj cheë lizre bxruze blau, na' guxú'ë, ne gudxé'ë tu zren nen bi xa'aga cheë lé'ëne' ájala xexuzre da dxaca na'.

<sup>59</sup> Benne' xíchajë ca' cheë bxruze ca', ne benne' gula sina ca', ne xúgute' benne' ca' cheë xu'u lawe' blau cheë judío ca' belíajë' ájala xuluzría xi'ë Jesús, lácala naca na da wën lazre', cheë xelezéquene' xuludé' Le' gatie'. <sup>60</sup> Quebe bi belezrelne', lácala belezrín benne' zan benne' gulenné' da wën lazre' cheë Jesús. Naga xeajséte na belezrín chupa benne' wën lazre'. <sup>61</sup> Dxeleonné':

—Benne' nigá gunné': "Wazéqueda' neda' guchínna' xudau' chee Dios, na' xexuna' na lawe' chunna zraze."

<sup>62</sup> Nadxa guxasa bxruze blau, na' guzre' Jesús:

—¿Quebe bi dxexechebu'? ¿Bizra da dxelenné' chiu' lue'?

<sup>63</sup> Jesús guzúe' zrize. Nadxa bxruze blau na' guzre' Le':

—Lu La Dios ban dxenná be'eda' lue' nneu' da li. Gunná che nacu' lue' Cristo, Zri'ine Dios.

<sup>64</sup> Jesús guzre' le':

—Nácaqueza' cá dxennáu' lue'. Cá'anqueze dxapa' le'e, walé'ele neda', Benne' Gulje' Bénneache, cue'a chalá'a xabéla chee Dios nen xel-la' szren chee', na' xelá'a lu beuj bza chee xabáa.

<sup>65</sup> Nadxa bxruze blau gucheze' zra lané' chee blé'ene' quebe nabague' zria, na' gunné':

—Benne' nigá dxenné' schanni' chee Dios. ¿Nachínmedxadxu benne' xechébe'? Ba bénquezle le'e ca dizra' schanni' dxenné'. <sup>66</sup> ¿Bi dxennale le'e?

Benne' ca' gulenné':

—Nabague' zria, ne dxal-la' gatié'.

<sup>67</sup> Nadxa buluzré' e zrene' lau Jesús, ne belú'e Le', na' xebal-le' belegape' dxu'a lawe'. <sup>68</sup> Na' gulé' e Le':

—¿Nácaquezu' Lue' Cristo? Gunné' xa'a nu be' Lue'.

*Dxenná Pedro quebe núnbe'e Jesús*

(Mr. 14.66-72; Lc. 22.56-62; Jn. 18.15-18, 25-27)

<sup>69</sup> Dxácaté na' dxe' Pedro chalé'ajla, na' tu nu'ula wen zrin bzrine' lau Pedro ne guzre' le':

—Cá'anqueze lue' nacu' Jesús, benne' Galilea na', tuze.

<sup>70</sup> Pedro ben chúchué' xrtizre' lávela xúgute benne' ca', gunné':

—Quebe nezda' nu chee' na' dxenníu'.

<sup>71</sup> Nadxa Pedro zexíaje' chee xedxúaje' chale'aj na', na' ble'e xetú nu'ula ca' le', ne guzre' benne' ca' zaj zré' e na':

—Cá'anqueze benne' nigá dxedálene' Jesús, benne' Nazaret na'.

<sup>72</sup> Xecha lasa ben chúchué' Pedro xrtizre', na' bzétaje' Dios, gunné':

—Quebe núnbe'a benne' na'.

<sup>73</sup> Xetú chí'idau' guca belezrín benne' zaj zré' e na' lau Pedro, na' gulé' e le':

—Da li, tuze nácaquezu' nen bénnea' lawe' da xel-la' dxenné' chiu' dxunna bea na lue'.

<sup>74</sup> Nadxa guzú lau Pedro dxuzría xi' cuínazqueze', ne dxuzétaje' Dios, dxenné':

—Quebe núnbeaqueza' benne' na'.

Dxácaté na' gudxezre xjeaj. <sup>75</sup> Nadxa xeajsá lazre' Pedro ca da guzre Jesús le': Nédxudxa ca cuezre xjeaj, lue' wannáu' chunna lasa quebe núnbe'u neda'. Bedxúaj Pedro na', na' gudxézrele' e.

## 27

*Dxeleché'e Jesús lau Pilato*

(Mr. 15.1; Lc. 23.1-2; Jn. 18.28-32)

<sup>1</sup> Gate guxaní', xúgute benne' xíchaje ca' chee bxruze ca', ne benne' gula sina ca' chee benne' judío ca' belune' tuze dizra' ájala xelune' chee xelútie' Jesús. <sup>2</sup> Nadxa beleché'e Le' nadxéaje', ne xeajlegu'e Le' lau Poncio Pilato, benne' dxenná be'e waláz chee xezr la xu Roma.

*Ca guca gate gute Judas*

<sup>3</sup> Nadxa Judas, bénnea' bdege' Jesús, gate guque bé'ene' ba buluzría xi'e Jesús, bexíajele'ene', na' bunézruje' da chi dxua dumí plata lau benne' xíchaje ca' chee bxruze ca', ne benne' gula sina ca'. <sup>4</sup> Dxe' e le':

—Neda' b'ena' dul-la lawe' da bdea' tu benne' naque' du lazre' chee gatié'.

Belexechébe benne' xíchaje ca':

—¿Bizra naca cheentu' da nigá? Chiu' lue' naca da na'.

<sup>5</sup> Nadxa Judas buzale' dumí na' lu xudau', ne bezé'e, na' xeajxelú'u du lbé'e.

<sup>6</sup> Benne' xíchaje ca' chee bxruze ca' buluxutupe' dumí na', dxelenné':

—Quebe gaca cú'udxu dumí nigá naga xu'u dumí chee xudau', lawe' da naca na lazruj chee benne' dxute benne'.

<sup>7</sup> Nadxa belune' tuze dizra' xelá'awe' tu xezr la xu nen dumí na' da nazí le na xezr la xu chee wen xesu' zruaga, chee gaca na tu lataj naga xelegache benne' zitu'. <sup>8</sup> Chee le' na' nazí le xezr la xu na' Xezr La Xu Chee Dxen ca lu zra na'a zra. <sup>9</sup> Caní guca na chee gaca ca da gunná Jeremías, benne' bchálaje' waláz chee Dios, gunné': "Gulequé' e chi dxua dumí plata da naca na da zaca Le' da buluzúa benne' Israel. <sup>10</sup> Nen dumí na' belá'awe' xezr la xu chee benne' wen xesu' zruaga, cáteze gunná be'e Xrana' neda'."

*Dxezrín Jesús lau Pilato**(Mr. 15.2-5; Lc. 23.3-5; Jn. 18.33-38)*

11 Guleché'e Jesús lau bénnea' dxenná be'e waláz chee xezr la xu Roma, na' le' bchebe' Jesús:

—¿Nacu' Lue' Wenná Bea chee judío ca'?

Jesús gunné':

—Ca' naca na, ca dxennáu' lue'.

12 Gate benne' xíchajé ca' chee bxruze ca', ne benne' gula sina ca' gulawe' zria chee Jesús, na' Le' quebe bi bechebe'.<sup>13</sup> Nadxa gunná Pilato, dxé'e Jesús:

—¿Quebe dxennu' ca da dxelenná benne' caní chiu'?

14 Jesús quebe bi bechebe'. Ca'an guca bebanne bénnea', ne quebe bezrela lazre' ájala nne'.

*Dxelechugue' chee Jesús gatie'**(Mr. 15.6-20; Lc. 23.13-25; Jn. 18.38—19.16)*

15 Gate dxu'u laní na', bénnea' dxenná be'e na' xu'u lawé' dxusane' tu benne' wen da zrinnaj, núteteze benne' dxelaca lazre' benne' ca'.<sup>16</sup> Ca lu zra na' xu'u tu benne' lizre xia, benne' wénle'e da zrinnaj, nazi le' Barrabás.<sup>17</sup> Ca zaj nazraga benne' ca' na', Pilato bchebe' le':

—¿Nuzra dxaca lázrele gusana' neda'? ¿Gusana' Barrabás, che Jesús, bénnea' le' Cristo?

18 Caní gunné' lawe' da ba nézene' buludé'e Jesús lawe' le' lawe' da dxelaque' xa lazre' chee Jesús.

19 Dxácaté na' dxe' Pilato naga dxuchi'e chee bénneache, na' zru'ule' gusel-le' tu benne' xeajezre' Pilato: “Quebe guchixre chiu' da naca chee benne' xrlátaje na', lawe' da guneda' xela ba dxéle, da bzúale'e na neda' stébe ne chee Le'.”

20 Benne' xíchajé ca' chee bxruze ca', ne benne' gula sina ca' belegú'u xele' benne' ca' chee xelenabe' la Barrabás, ne gate Jesús.<sup>21</sup> Bénnea' dxenná be'e bchájláje' benne' ca' xecha lasa. Buchebe' le':

—¿Nula benne' chupa caní dxaca lázrele le'e gusana'?

Benne' zan ca' gulenné':

—Barrabás.

22 Pilato bchebe' benne' ca':

—¿Bizra guna' chee Jesús, benne' le' Cristo?

Xúguté' belexechébe':

—Bde'e xaga béguaj.

23 Nadxa gunná Pilato, dxé'e benne' ca':

—¿Bizra da calela nune'?

Benne' ca' gulezú lawe' dxelebezre xe'e, gulenné':

—Bde'e xaga béguaj. Bde'e xaga béguaj.

24 Gate Pilato guque bé'ene' quebe bi séquene', na' benne' zan ca' dxeledábague' le', na' gunná bé'ene' bla' nisa, na' gudibe ne'e lówela benne' ca', dxenné':

—Quebe bi dul-la nabaga' chee xel-la' gute chee benne' xrlátaje nigá. Naca na chee le'e.

25 Xúguté benne' ca' belexechébe':

—Netu', ne zrí'inentu' nabágantu' ca naca chee xel-la' gute chee'.

26 Nadxa Pilato bsane' Barrabás, ne gunná bé'ene' beleché'e Jesús chee xelu'e Le', na' bde'e Le' chee te'e xaga béguaj.

27 Nadxa benne' dxjaque' wedil-la chee bénnea' dxenná be'e guleché'e Jesús, ne gulegú'e Le' lu xu'u lawe'. Belexezraga ca naca benne' dxjaque' wedil-la naga ze Jesús.<sup>28</sup> Belequ'e zra lané', ne bulugácu'e Le' tu ladxe' bzawe.<sup>29</sup> Buluzú'e xíchajé tu da naca na zruze xaga xeché', ne buluguxre' Le' tu xaga ne'e xabela. Nadxa buluzú zribe' lau Jesús, ne belún le' chee', dxelenné':

—Gaca xabáa chiu', Wenná Bea chee judío ca'.

30 Cá'anqueze buluzré'e Le' zrene', na' gulequ'e xaga da nuxru Jesús, ne guliné' na xíchajé'.

31 Ca gudé belún le' chee Jesús, na' belexegú'e ladxe' bzawe, na' buluxugácu'e Le' zra lánaqueze'. Nadxa beleché'e Le' chee te'e xaga béguaj.

*Dxuludé'e Jesús xaga béguaj**(Mr. 15.21-32; Lc. 23.26-43; Jn. 19.17-27)*

32 Ca gusiá'que' na', belexezrague' tu benne' xezre Cirene, le' Simón, na' gulenná bé'ene' le' bi'e xaga béguaj chee Jesús.

33 Ca'an guca belezrine' tu lataj nazí le na Gólgota, da dxennadxu, Lataj Chee Zrita Xichaj Benne' Gate.<sup>34</sup> Na' bulunézruje' da xi'aj Jesús xrise uva wal-la da nachixre na da sla', san gate bxue Jesús ca naca na, quebe gu'e na.

<sup>35</sup> Ca beuzre benne' dxjaca wedil-la buludé'e Le' xaga béguaj, na' gulebéaje' da gaca bea na chee xelexelé'e ca naca zra lana Jesús. Ca'an guca guxá ca da gunná benne' bchálaje' waláz chee Dios, gunné': "Belexelé'e zra lana' leze'. Gulebéaje' da gaca bea na." <sup>36</sup> Nadxa gulebé'e dxuluzuzre' Jesús. <sup>37</sup> Buluzrié' xichaj Jesús na' tu xiche da naxúaj na da nabague', da dxenná na: Jesús, wenna' bea chee judío ca'.

<sup>38</sup> Cá'anqueze buludé'e chupa benne' gubán tu zren nen Jesús le'e xaga béguaj ca', tue' chalá'a xabéla, ne xetúe' chalá'a xéglala ga da' xaga béguaj chee Jesús. <sup>39</sup> Benne' dxeledé'e na' dxelún le' chee Jesús. Dxulutá xichaje', <sup>40</sup> ne dxelenné':

—Dxuchinnaju' xudau', na' lawe' chunna zraze xexunu' na? Bselá cuinu'. Che nacu' Zri'ine Dios, bexetaj le'e xaga béguaj na'.

<sup>41</sup> Cá'anqueze belún la chee' benne' xichaje ca' chee bxruze ca', ne benne' dxuluzuzájle'e da bdxixruj be'e Moisés, ne benne' xudau' fariseo ca', ne benne' gula sina ca'. Dxelé ljwezre':

<sup>42</sup> —Bselé' benne' xula, san quebe dxezéque' guselá cuine'. Che naque' Wenna' Be Chee Xezre Israel, dxal-la' xexétaje' le'e xaga béguaj, na' chéajlédxu chee'. <sup>43</sup> Le' bxren lazre' Dios. Na'a guselá Dios Le' che da li dxaca lazre', lawe' da gunná Le' naque' Zri'ine Dios.

<sup>44</sup> Cá'anqueze gubán ca' zaj da' xaga béguaj ca' nen Jesús gulenné' schanni' chee Jesús.

*Ca guca gate gute Jesús*

(Mr. 15.33-41; Lc. 23.44-49; Jn. 19.28-30)

<sup>45</sup> Nadxa ca naca xezr la xu na' guchul-la na. Guzú lau na wagubizra ca bzrinte na ca dxedá chunna. <sup>46</sup> La ná'queze Jesús gudxezre xe'e, dxenné':

—Elí, Elí, ¿lama sabactani?

(Da nigá zéajé na: Dios chia', Dios chia', ¿bizr chee na' nusán lazru' neda'?)

<sup>47</sup> Bal-la benne' zaj zre'e na' belenne' ca da gunná Jesús, na' gulenné':

—Benne' nigá dxenné' Elías, benne' bchálaje' waláz chee Dios.

<sup>48</sup> Dxácaté na' guzá' chegu tu benne' ca', xeaxrí'e tu da dxezrupe nisa, na' ca bsebise' na nen nupu zichaj, na' bzué' na lawe' tu xaga, ne bzrigue' na dxu'a Jesús chee xrupe' na. <sup>49</sup> Benne' xezica ca' gulenné':

—Le guxúe xca'. Quebe gunu' ca'. Nná'xquedxu che wida Elías guselé' Le'.

<sup>50</sup> Xecha lasa gudxezre xa'a Jesús, na' gutié'. <sup>51</sup> Lu zra ná'queze ladxe' da ze lu xudau' bdxuaj na chúpala, guzú lau na xichaje, bedxúajte na dxe'ela. Guzrú' xezr la xu, na' xiaj xre ca' gulúruqueze na. <sup>52</sup> Gulexalaj ba, na' belexebán benne' gate ca', benne' guléajle'e da naca chee Dios. <sup>53</sup> Ca gudé bebán Jesús, na' benne' caní belexedxúaje' lu xedxu ba, ne belexé'le'e lu xezre lá'axa Jerusalén, naga benne' zan belelé'ene' benne' ca'.

<sup>54</sup> Nadxa benne' dxenná be'e lu wedil-la, ne benne' dxajque' wedil-la, benne' ca' dxuluzuzre' Jesús, gate belelé'ene' guzrú', ne xezícadna da ca'an gulaca, na' belezrébele'e, dxelenné':

—Da lítegage benne' nigá guque' Zri'ine Dios.

<sup>55</sup> Nu'ula zan zaj zre'e na' dxelenné'e zítu'la, nu'ula ca' xjácálene' Jesús gate bezé'e ga nababa Galilea, ne gulácale'queze' Le'. <sup>56</sup> Ládujla nu'ula ca' xu'u María Magdalena, ne María xrna Jacobo ne José, ne xrna zri'ine Zebedeo ca'.

*Dxulucaché' Jesús lu xedxu ba*

(Mr. 15.42-47; Lc. 23.50-56; Jn. 19.38-42)

<sup>57</sup> Ca guzú lau dxaca waxrinne, na' bla' tu benne' gunní'a le' José, benne' xezre Arimatea, benne' dxéajle'queze' chee Jesús. <sup>58</sup> Benne' nigá guxiájé' xeaxchálajene' Pilato, na' benabe' bel-la' dxen chee Jesús. Pilato gunná bé'ene' xulunézruje' le' bel-la' dxen na'. <sup>59</sup> Nadxa José bequé'e bel-la' dxen na', na' bchele' na tu ladxe' da naxadxe. <sup>60</sup> Nadxa gulu'e Le' lu ba da naca na cheéqueze José na', da bene' tu lu xiaj. Gulexrúe' tu xiaj blaga zren dxu'a ba chee Jesús, na' bezé'e ga na'. <sup>61</sup> Gulezrá' María Magdalena, ne xetú María, zaj dxe'e le nna' dxu'a ba na'.

*Dxulubia dxuluxue' ba chee Jesús*

<sup>62</sup> Zeaj zra xula, da naca na zra ca gudé zra bulucueze', na' benne' xichaje ca' chee bxruze ca', ne benne' xudau' fariseo ca' belezrine' lau Pilato. <sup>63</sup> Dxelé'e le':

—Xran, dxeajsá lázrentu' ca naca da gunná benne' wen lazre' na' gate na' zue'. Gunné' gate gaca chunna zra, na' xebane' ládujla benne' gate. <sup>64</sup> Chee le na', bdxixruj be'ene' benne' ca' xulubia xuluxue' ba chee' na' cadxa gaca chunna zra, chee quebe xeledá' benne' ca' bsédene' xedajlexebéaje' bel-la' dxen na' chizrela, na' te na' xuluzenne' bénneache ba bebane' ládujla benne' gate. Che ca'an gaca, na' dizra' wen lazre' bzeje nigá gun na da zrinnaj zrendxa ca da nedxu.

<sup>65</sup> Pilato guzre' benne' ca':

—Na' zaj zra' benne' dxjaque' wedil-la xuluzuzre' na. Le chjaca le'e, ne le guxúe xanne' ba na' ca se' lau séquele.

<sup>66</sup> Nadxa xjaque', xeajlexúe' ba na'. Buluchiche' tu da gunna bea na che xalaj ba na', na' bulucá'ane' benne' dxjaca wedil-la ga na'.

## 28

### *Ca guca gate bebán Jesús*

(Mr. 16.1-8; Lc. 24.1-12; Jn. 20.1-10)

<sup>1</sup> Ca gudé chee zra dxulupá'ana judío ca', ca za dxani' zra nedxu, na' María Magdalena, ne xetú María na' xjaque' xeajlenné'e ba chee Jesús. <sup>2</sup> Chadite guzrú'le'e na lawe' da betaj tu gubáz chee xabáa chee Xránadxu, na' bzrine' dxu'a ba na', ne bequé'e xíajta'a zren na' da zrua na dxu'a ba na', na' gudxé'e lawe na. <sup>3</sup> Gubáz na' dxácatite legale', ne naca chiche zra lané' ca bezxe'. <sup>4</sup> Gate belelé'e benne' dxjaque' wedil-la gubáz chee xabáa na', na' belezrízene' xel-la' dxelezrebe, ne belexegá'ane' ca benne' gate ca'. <sup>5</sup> Nadxa gunná gubáz chee xabáa na', dxé'e nu'ula ca':

—Quebe zrèbele. Nezda' dxexíajle Jesús, bènnea' gudé'e xaga béguaj. <sup>6</sup> Quebe zue' nigá lawe' da ba bebane', cáteze na' gunné'. Le da nna'le lu ba naga gulegú'e Le'. <sup>7</sup> Le cheajxáquezega, le cheajezre benne' ca' bsédené' ba bebane' ládujla benne' gate, na' chéajé' ga nababa Galilea nédxudxa ca le'e. Na' lé'ele Le'. Da nigá naca na da nabaga'a xapa' le'e.

<sup>8</sup> Nadxa nu'ula ca' besía'que' dxu'a ba na', zeajxaca chégüe'. Dxelezrebe', ne dxelebene'. Zjaque' zeajleguezre' benne' ca' bsede Jesús. <sup>9</sup> Dxácaté na' Jesús bhague' nu'ula ca', ne bgape' le' diuzre. Belezrine' lau Jesús, dxelúe lá'ane' Le', ne bulunide' ni'a Jesús. <sup>10</sup> Le' guzre' nu'ula ca':

—Quebe zrèbele. Le chjaca, le cheajézre bi bícha'dau' ca' dxal-la' chjaque' naga nababa Galilea. Na' xelxelé'ene' neda'.

### *Ca da gulenná benne' dxjaque' wedil-la*

<sup>11</sup> Dxácaté zjaca nu'ula ca', na' benne' ca' dxjaca wedil-la gulu'e xezre, ne buluchálajlene' benne' xíchaje ca' chee bxruze ca' ca da guca. <sup>12</sup> Benne' xíchaje ca' buluchálajlene' benne' gula sina ca' chee xelune' tuze dizra'. Nadxa bulunézruje' benne' dxjaque' wedil-la dumí zrente. <sup>13</sup> Dxelenné':

—Le nna le'e belelá' benne' ca' bsede Jesús na' chizrela, dxácaté dxásele le'e, na' belexexú'e bel-la' dxen chee'. <sup>14</sup> Che benne' dxenná be'e na' xenne' da nigá, netu' guchálajlentu' le', ne gucá'ana cháwentu' chee quebe bi gaca chee le'e.

<sup>15</sup> Nadxa benne' dxjaque' wedil-la gulezú' lu ne'e dumí na', na' besía'que' belune' ca bache zaj nézene'. Da nigá naca na ca dxeleenná judío ca' zéajte lu zra na'a zra.

### *Jesús dxesel-le' benne' gubáz chee' ca'*

(Mr. 16.14-18; Lc. 24.36-49; Jn. 20.19-23)

<sup>16</sup> Nadxa xjaca benne' chinéaj ca' bsede Jesús, na' belezrine' lu xi'a naga ba guzre Jesús le'. <sup>17</sup> Gate belelé'ene' Jesús, na' bulucá'ana szrene' Le'. Bal-le' gulaca chupa lazre'. <sup>18</sup> Nadxa Jesús gubigue' naga zaj zra' benne' ca', na' guzre' le':

—Neda' ba nazí' lu na'a ca naca xel-la' dxenná bea xabáa, ne lu xezr la xu nigá. <sup>19</sup> Chee le' na' le chjaca, le cheajchálajle benne' zaj zre'e du ca naca xezr la xu nigá, ne le cheajsédené' ca naca da bsédeda' le'e. Le guchúe' le' nisa lu La Xra', ne lu La Zrí'ine', ne lu La Be' Lá'azxa. <sup>20</sup> Le guséde-ne' xelaque' wezúa dizra' ca naca da ba gunná be'eda' le'e, na' neda' tu súalezqueza' le'e xúgute zra cadxa cheajsé chee xezr la xu nigá. ¡Ca'an gaca na!

## DIZRA' CHAWE' CA NACA CHEE JESUCRISTO DA BZUAJ SAN MARCOS

*Da bchalaj Juan, benne' bchue' bénneache nisa*

*(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Caní guzú lau dizra' chawe' ca naca chee Jesucristo, Zri'ine Dios.

<sup>2</sup> Bzrin lazre' da bzuaj Isaías, benne' bchálaje' waláz chee Dios, ca da gunná Dios:

¡Le nna'xque nigá!

Neda' dxesel-la' benne' gubáz chia', benne' cuía lawe' lau Lue'.

Bénnea' gupé' e neza naga teu' chee ilúnbe'e bénneache Lue'.

<sup>3</sup> Welénqueze chi'i benne' dxebezre xe' e le' e xixre' lawe' lataj.

Dxenné': "Le gupá'a neza naga te Xránadxu lu xichaj lázrdaule.

Le xebéaj li neza lase chee' ca'."

<sup>4</sup> Caní guca lawe' da bla' Juan le' e xixre' lawe' lataj, na' bchálaje' dizra' chee Dios, ne gunné' dxal-la' xeledxúa bénneache nisa, na' bchue' le' nisa, benne' ca' belexebí'i lazre' chee gunite lau Dios dul-la da zaj nabague'. <sup>5</sup> Ca'an guca, guledxúaj bénneache zan lu xezre Jerusalén, ne xúgute xezre ca' zaj nababa Judea, na' xjaque' naga zua Juan, na' Juan nigá bchue' benne' ca' nisa lu xegu Jordán, benne' ca' gulexrúalepe' dul-la da zaj nabague'.

<sup>6</sup> Caní guca zra lana Juan. Gucue' zra lané' ladxe' xicha zra camello, bia dxelebía bénneache, ne tu xpádxue' xide bchela le' e. Dxawe' biche xuaj, ne dxé'aje' bzrina'dau' chee bézudau'. <sup>7</sup> Ca dxuchálaje' dizra' chee Dios, dxenné':

—Gate te chia' neda', na' xida xetú benne', bénnea' nápadxe' xel-la dxenná bea ca neda'. Quebe naca chia' xáchua' chee lechja' zrele'. <sup>8</sup> Da lítega, neda' bchua' le'e nisa. Le' gune' da zéaje xel-la dxedxúa nisa nigá, guzúe' Be' Lá'azxa lu xichaj lázrdaule.

*Ca da guca gate gudxúa Jesús nisa*

*(Mt. 3.13-17; Lc. 3.21-22)*

<sup>9</sup> Ca da guca lu zra ca', guzá' Jesús lu xezre Nazaret chee ga nababa Galilea, na' bzrine' lau Juan. Juan nigá bchue' Jesús nisa lu xegu Jordán. <sup>10</sup> Gate bdxuaj Jesús lu nisa, la blé'etene' naxalaj xabáa, ne blé'ene' betaj Be' Lá'azxa. Dxulé'e lawe' ca tu bgúgudu chiche, na' bzrine' ca li xichaj Jesús. <sup>11</sup> Ben tu chi'i da za xabáa, da dxenná na:

—Lue' nacu' Zri'ina'. Nazri'ida' Lue', ne dxezaca ba lázrele'da' Lue'.

*Dxaca lazre' Satanás da xriwe' gun ga бага Jesús dul-la*

*(Mt. 4.1-11; Lc. 4.1-13)*

<sup>12</sup> Nadxa Be' Lá'azxa guché' e Jesús le' e xixre' lawe' lataj. <sup>13</sup> Guzúa Jesús le' e xixre' lawe' lataj chua zra chua xe'la. Na' bzrin Satanás da xriwe', ne guca lazre' na gun na бага Jesús dul-la. Guzúa Jesús naga zaj zra' be xixre' be snia, na' gubáz chee xabáa chee Dios gulácalene' Jesús.

*Jesús dxezú lawe' dxusédene' bénneache*

*(Mt. 4.12-17; Lc. 4.14-15)*

<sup>14</sup> Ca gudé guxú'u Juan lizre xia, na' bzrin Jesús lu xezre ca' zaj nababa Galilea, ne dxuchálajene' bénneache dizra' chawe' ca dxenná bea Dios. <sup>15</sup> Gunná Jesús:

—Ba bzrin zra. Ba zua báguze gate nna bea Dios xezr la xu nigá. Chee le' na', le xebí'i lazre', ne le cheajlí lazre' dizra' chawe' nigá.

*Dxenné Jesús tapa benne' wezén bela chee xelaque Le' tuze*

*(Mt. 4.18-22; Lc. 5.1-11)*

<sup>16</sup> Gate gudá Jesús dxu'a nísadau' chee Galilea, na' blé'ene' Simón, ne Andrés, biche Simón na'. Benne' caní dxuluzale' xixruj bela chee' lu nísadau' lawe' da zaj naque' wezén bela.

<sup>17</sup> Na' gunná Jesús:

—Le gun neda' tuze, na' guzúa' le' e gácale wen zrin chia'. Cheajxrile bénneache ca dxunle dxezenle bela.

<sup>18</sup> La bulucá'anate' xixruj chee' ca', na' zjácálene' Jesús.

<sup>19</sup> Nadxa gudé Jesús xelate' ca na'la, na' blé'ene' Jacobo, ne Juan, benne' ca' zaj naque' zri'ine Zebedeo. Zaj zre' e lu da dxedá lawe' nísadau', dxelexexune' xixruj bela chee' ca'.

<sup>20</sup> Ca gunné Jesús Jacobo, ne Juan, na' la bulucá'anate' xre' Zebedeo ne wen zrin chie' ca' zaj zre' e lu da dxedá lawe' nísadau', na' zjácálene' Jesús.

*Tu benne' xu'e be' xriwe'*  
(Lc. 4.31-37)

<sup>21</sup> Gate gul-la na gulu'e lu xezre Capernaum, na' gate bzrin zra dxulupá'ana benne' judío ca', guxú'u Jesús lu xu'u naga dxelúe lá'ana judío ca' Dios, ne bsédené' benne' ca' zaj zre'e na'.

<sup>22</sup> Belexebánene' ca naca da dxusede Jesús le' lawe' da dxuchálaje' nen duté' xel-la dxenná bea, ne quegá ca dxuluchalaj benne' ca' dxuluxuzájle'e da nadxiruj bea Dios. <sup>23</sup> Nadxa bla' tu benne' xu'e be' xriwe' lu xu'u na', na' gudxezre xa'a na lu dxu'a bénnea'. <sup>24</sup> Gunná na:

—¿Bizra nápantu' chiu', Jesús, benne' Nazaret? ¿Za'u guzria xi'u netu'? Ba nézquezda' nu nacu'. Benne' Lá'azxa chee Dios nacu'.

<sup>25</sup> Jesús gudil-le' na, gunné':

—Zrize guzúa. Bedxúaj lu be-la' dxen chee benne' nigá.

<sup>26</sup> Nadxa be' xriwe' na' bxrizel'e na bénnea', ne gudxezre xá'alé'e na, na' bedxúaj na. <sup>27</sup> Belexebánele'e xúgute benne' zaj zre'e na', dxelé' ljwezre':

—¿Bizra dizra' cube da nigá? Duté' xel-la dxenná bea chee' dxenná be'ene' be' xriwe' ca', na' dxuluzúa na dizra' chee'.

<sup>28</sup> La bzrilujte dizra' chee' xel-la waca chee' Jesús du ca naca xezre ca' zaj nababa Galilea.

*Jesús dxexuné' xrna' zru'ula Pedro*

(Mt. 8.14-15; Lc. 4.38-39)

<sup>29</sup> Ca belexedxúaje' lu xu'u na' chee' judío ca', na' belezrine' lizre Simón, ne Andrés. Jacobo ne Juan dxelune' Jesús tu zren. <sup>30</sup> Lu xu'u na' de xrna' zru'ula Simón, xu'e da la. La buluchálajete' Jesús ca dxaca chee' nu'ula nigá. <sup>31</sup> Le' la béxruté' ne'e, bechise' le'. La bedxúajte da la da xu'e, na' bseni'e da gulawe'.

*Jesús dxexuné' bénneache zan*

(Mt. 8.16-17; Lc. 4.40-41)

<sup>32</sup> Ca gula guzré zra na', ca guzria gubizra, na' guleché'e xúgute benne' we' lau Jesús, ne benne' ca' zaj xu'e be' xriwe'. <sup>33</sup> Ca naca benne' xezre gulebigue' dxa xu'u naga zua Jesús.

<sup>34</sup> Jesús bexuné' zánete benne' we' ca zaj naca xízrawe' da xu'u tu tue', ne bebéaje' zane' be' xriwe' zaj xu'u bénneache ca'. Quebe be'e lataj be' xriwe' ca' xelenné' na lawe' da zaj núnbea na Le'.

*Dxuchalaj Jesús lau bénneache zaj zre'e Galilea*

(Lc. 4.42-44)

<sup>35</sup> Ca bebán Jesús bál-lala, ne nachúl-late, bedxúaje' guz'é'e zéaje' tu lataj naga nadache' bénneache, na' bchálajlene' Dios. <sup>36</sup> Simón Pedro, ne benne' ca' zaj zrálene' le' belexexilaje' Jesús. <sup>37</sup> Ca xeaajlexraque' Jesús, na' gul'é'e Le':

—Xúgute bénneache dxelexexilaje' Lue'.

<sup>38</sup> Na' gunná Jesús:

—Chéajdxu xezre walizre ca' chee' guchálajlena' benne' ca' xirtizra Dios. Chee le' na' belja'.

<sup>39</sup> Lu xu'u ca' naga dxelúe lá'ana judío ca' Dios, da ca' zaj zua tu tu xezre ca' chee' ga nababa Galilea, bchalaj Jesús dizra' chee' Dios, ne bebéaje' xízrawe' xriwe' ca' da zaj xu'u benne' we' ca'.

*Jesús dxexuné' tu benne' dxé'ene' xízrawe' guzru'*

(Mt. 8.1-4; Lc. 5.12-16)

<sup>40</sup> Nadxa bzrin lau Jesús tu benne' dxé'ene' xízrawe' guzru', na' bzu zribe', ne guta' xuene' Le', dxenné':

—Che Lue' dxaca lazru', waca xexunu' neda'.

<sup>41</sup> Jesús bexache lazre' le', na' bli ne'e, gudane' le'. Dxenné':

—Dxaca lazra'. Na'a dxexacu'.

<sup>42</sup> Ca gunné' caní, la becuásate xízrawe' na', na' begá'ane' chawe'. <sup>43</sup> Nadxa Jesús bsízrene' le', na' besel-le' le'. <sup>44</sup> Caní gunné':

—Quebe nu xu'u ca da guca chiu'. Guxíaj lau bxruze xeajlé'e cuinu', ne bnezruj ca naca da gunná be'e Moisés xelún benne' ca' xellexaque'. Caní gunu' chee' xelélé'ene' ba bexacu' na'a.

<sup>45</sup> Nadxa benne' nigá, ca bezé'e, guzú lawe' dxuchálajlene' tu tu benne' ca guca chee' bexaque'. Ca'an guca, québedxa guca chu'u Jesús zaca bal-la lau lu xezre. Begá'ane' le'e xixre' lawe' lataj. Bénéache chee' xúgute xezre ca' belezrine' lau Jesús naga zue'.

## 2

*Jesús dxexuné' tu benne' quebe gaca se'e*

(Mt. 9.1-8; Lc. 5.17-26)

<sup>1</sup> Ca gudé chupa chunna zra, na' guxú'u Jesús xecha lasa lu xezre Capernaum. Belénne bènneache zua Jesús tu lu xu'u. <sup>2</sup> La belezragate benne' zante naga zua Jesús. Ca'an guca, québedxa guque lu xu'u, ne dxa xu'u. Bchalaj Jesús xrtizra Dios. <sup>3</sup> Na' belezrín tapa benne' lu xu'u naga zua Jesús, law nu'ê tu benne' quebe gaca se'ê. <sup>4</sup> Lawe' da quebe gulezéquene' xezezrine' lau Jesús, lawe' da zaj zra' bènneache zante ga na', na' gulesáluje' chju' u chee' xu'u naga zua Jesús. Na' bululétaje' da'a da zrua benne' na' quebe gaca se'ê. <sup>5</sup> Lawe' da dxeque be'e Jesús ca dxeleajlí lazre' benne' ca' Le', na' gunné', dxé'ê bènnea' quebe gaca se'ê:

—Zrí'ina'dau', ba nanite lau dul-la da nabagu'.

<sup>6</sup> Zaj dxé'e bal-la benne' ga na', benne' dxuluxuzájle'ê da nadxixruj bea Dios, na' gulenné lanze': <sup>7</sup> —¿Bizr chee' na' dxuchalaj caní benne' nigá? Dxucá'ana dítaje' Xránadxu Dios. ¿Núzraqueze gaca gunite lau dul-la da zaj nabaga bènneache? Tuze Dios na'. <sup>8</sup> Dxeque be'e Jesús lu lázrdawe' ca dxelenné lane' chee', na' gunné':

—¿Bizr chee' na' dxéquele caní? <sup>9</sup> ¿Bizra dizra' quebe naca na stébela xapa' benne' nigá quebe gaca se'ê? ¿Naca na stébe xapa' le', ba nanite lau dul-la nabagu'? Cabí. ¿U che stébe xapa' le', bexasa, beca'a da denu', ne bexiaj? <sup>10</sup> Na'a, chee' nézele le'e neda', Benne' Gulje' Bènneache, napa' xel-la dxenná bea lu xezr la xu gunite lawa' dul-la da zaj nabaga bènneache.

Na' gunná Jesús, dxé'ê bènnea'.

<sup>11</sup> —Lue' dxapa', bexasa, beca'a da'a chiu', ne bexiaj lizru'.

<sup>12</sup> Ca'an guca, la bexásate', na' bequé'ê da'a chee', ne bedxúaje' lau xúgute bènneache. Ca'an guca, xúgute benne' ca' belexebánene', na' belúe lá'ane' Xránadxu Dios. Dxelenné':

—Cabata' ne lé'edxu gaca na ca guca da nigá.

#### *Dxenné Jesús benne' le' Leví*

(Mt. 9.9-13; Lc. 5.27-32)

<sup>13</sup> Ca gudé na' bedxúaj Jesús zéaje' dxu'a nísadau', na' xúgute bènneache lu xezre ca' belezrine' lau Le'. Nadxa bésdene' benne' ca' xrtizra Dios. <sup>14</sup> Ca gudé Jesús na', ble'ene' Leví, zri'ine Alfeo, dxé'ê lataj chee' wechizruj. Na' gunná Jesús, dxé'ê le':

—Ben neda' tuze.

La guxásate Leví, guxiájlene' Jesús.

<sup>15</sup> Ca' guca, gate gudxé' Jesús dxawe' lizre Leví, na' zánete benne' wechizruj, ne benne' dul-la ca' gulebé'ê dxelágulene' tu zren nen Jesús, ne benne' ca' dxusédene'. Caní naca lawe' da zjácále benne' zante Jesús. <sup>16</sup> Nadxa benne' ca' dxuluxuzájle'ê da nadxixruj bea Dios, ne benne' fariseo ca', gate belelé'ene' ca' da dxun Jesús, dxágulene' benne' wechizruj ca', ne benne' dul-la ca', na' gulenné', dxelé'ê benne' ca' dxuséde Jesús:

—¿Bizra da nigá? Dxagu dxé'ajlene' benne' wechizruj ca', ne benne' dul-la ca'.

<sup>17</sup> Ca ben Jesús da nigá, gunné':

—Benne' chawe' ca' quebe dxelechínene' benne' dxexún bènneache. Benne' we' ca' dxelechínene' bènnea'. Quegá bla'a dxennéa' benne' xrlátaje ca'. Benne' dul-la ca' dxennéa'.

#### *Ca dxal-la' xelún bènneache gate dxelune' gubasa*

(Mt. 9.14-17; Lc. 5.33-39)

<sup>18</sup> Ca guca lu zra na', belún gubasa benne' ca' dxuséde Juan, ne benne' ca' dxuluséde benne' fariseo ca'. Na' belezrín benne' ca', bedajleguezre' Jesús:

—¿Bizr chee' na' dxelún gubasa benne' ca' dxuséde Juan, ne benne' ca' dxuluséde benne' fariseo ca', na' benne' ca' dxusédenu' Lue' quebe dxelune' gubasa? ¿Bizr chee' na'?

<sup>19</sup> Na' Jesús guzre' benne' ca':

—¿Waca xelún gubasa benne' zaj zre'ê laní chee' wechaga na' dxácate' na' zua benne' wechaga na' nen le'? Dxácate' na' zua wechaga na' nen le' quebe gaca xelune' gubasa.

<sup>20</sup> Wazrín tu zra gate dua benne' wechaga na'. Lu zra na' xelune' gubasa.

<sup>21</sup> 'Quegá nu benne' xudé'ê tu ladxe' cube le'ê zradxu gula. Che ca'an guné', ladxe' cube da xudé'ê wazrube xu na da gula, na' wachézadxa na'. <sup>22</sup> Cá'anqueze, quegá nu benne' que'ê xrise uva wal-la cube lu bzude xide gula. Che ca'an guné', na' xrise uva wal-la cube na' wacheza na bzude xide gula, na' walalaj xrise uva wal-la, ne cuía xi bzude xide na'. Xrise uva wal-la cube lu bzude xide cube dxal-la' chuzruj na.

#### *Benne' ca' dxuséde Jesús dxelíchaje' dau chee' zrua' xtila zra dxulupá'ana judío ca'*

(Mt. 12.1-8; Lc. 6.1-5)

<sup>23</sup> Gate gudé Jesús naga zé zrua' xtila zra dxulupá'ana benne' judío ca', ná'ate' na' benne' ca' dxuséde Jesús, ca' zaj xu'ê neza, gulezú lawe' dxelíchaje' dau naga zria zrua' xtila. <sup>24</sup> Nadxa benne' fariseo ca' gulé'ê Jesús:

—Gunná'xque. ¿Bizr chee' na' dxelune' zrin da quebe dxal-la' xelune' zra dxupá'anadxu?

<sup>25</sup> Jesús guzre' benne' ca':



—¿Cabata' ne gulábale ca da ben David gate gudunę', ne bxázzręę' da gagu le', ne da gugawe' benne' ca' zaj zrálene' le'? <sup>26</sup> Guxú'e lu xu'u cheę Dios gate naca Abiatar bxruze blaú, na' David gudawe' xeta xtila da dxelu'e lau Dios, da quebe dxal-la' gagu benne' xula, san tuze bxruze ca' zaj naca cheę' xelawe' na. Na' bnézrujtę David da gulagu benne' ca' zrálene' le' cheę xeta xtila na'.

<sup>27</sup> Cá'anqueze gunná Jesús, dxę'e benne' ca':

—Dios gudíxruje' zra dxupá'anadxu cheę gaca ba neza cheę bénneache, quegá bene' bénneache cheę xelunę' zrin cheę zra dxupá'anadxu. <sup>28</sup> Cheę le' na', neda', Benne' Gulje' Bénneache, naca' xrane zra dxupá'anadxu.

### 3

*Ca guca cheę tu benne' nazrinnaj ne'e*

(Mt. 12.9-14; Lc. 6.6-11)

<sup>1</sup> Gate guxú'u Jesús da xula lu xu'u naga dxelúe lá'ana judío ca' Dios, zę tu benne' biu nazrinnaj ne'e ga na'. <sup>2</sup> Judío ca' buluzuzre' Jesús che xexunę' benne' we' nigá lu zra dxulupá'ane', cheę xelexęquene' xelagu zria Jesús. <sup>3</sup> Nadxa gunná Jesús, dxę'e benne' biu na' nazrinnaj ne'e:

—Guxasa. Guzę laduj benne' caní.

<sup>4</sup> Nadxa gunaba Jesús lau judío ca', dxę'e le':

—¿Naca cheę zra dxupá'anadxu gundxu da xrlátaje, u che gundxu da calela? ¿Waca gupá'adxu xel-la nabán cheę nu benne', u che guzría xidxu xel-la nabán cheę'?

Na' gulezúa zrize judío ca'. <sup>5</sup> Nadxa Jesús gunná zi'e benne' ca'. Bewi'inene' ca naca xel-la lázrdau zide' cheę'. Nadxa guzre' benne' nazrinnaj ne'e:

—Guchiluj na'u.

Guchiluj ne'e, na' bexaca na. <sup>6</sup> Ca'an guca, belexedxúaj benne' fariseo ca', na' belunę' xel-la wezría nen benne' ca' zaj de'e Herodes ájala xelútię' Jesús.

*Bénneache zan dxelezzrague' dxu'a nísadau'*

<sup>7</sup> Nadxa gucuasa Jesús laduj benne' ca', na' guxiáje' dxu'a nísadau' nen benne' ca' dxusédenę'. Zjácale benne' zan ca' Jesús, benne' cheę xęzre ca' zaj nababa Galilea. <sup>8</sup> Gate belén bénneache ca naca da zren ca' da dxun Jesús, belezrín benne' zan lau Le', benne' cheę xęzre ca' zaj nababa Judea, ne benne' xęzre Jerusalén, ne benne' cheę xęzre ca' zaj nababa Idumea, ne benne' gusá'aque' xechalá'a xęgu Jordán, ne benne' gusá'aque' xęzre ca' zaj naxechaj na xęzre Tiro, ne xęzre Sidón. <sup>9</sup> Cheę le' na' gunná be'e Jesús benne' ca' dxusédenę' xulucueze' tu da dxedá'awę nísadau' checa xuluchide' bénneache zan Le'. <sup>10</sup> Caní guca lawe' da bexún Jesús benne' zante, na' benne' we' ca' gulebigue' lau le' cheę cheajleté' Le'. <sup>11</sup> Gate be' xriwe' ca' zaj xu'u bénneache belelé'e na Jesús, na' buluzú zribe na lau Le', ne gulebezre xa'a na. Dxeleńna na:

—Lue' nacu' Zri'ine Dios.

<sup>12</sup> Jesús gudil-le' be' xriwe' ca' cheę quebe xulul'e na da naca Le'.

*Jesús dxenné' chazrinnu gubáz cheę'*

(Mt. 10.1-4; Lc. 6.12-16)

<sup>13</sup> Ca gudé na' guluén Jesús tu lu xi'a, na' gunné' benne' ca' guca lazre'. Na' gulebigue' lau Le'. <sup>14</sup> Bchague' chazrinnu benne' xelunę' Le' tuze, benne' sel-le' cheajlechálaje' xrtizra Dios. <sup>15</sup> Bzue' lu na' benne' caní xel-la dxenná bea cheę xelexexunę' benne' we' ca', ne cheę xelexebéaje' be' xriwe' ca' lu beł-la' dxen cheę bénneache ca'. <sup>16</sup> Benne' chazrinnu caní zaj le':

Simón, bénnea' bzua Jesús xetú le' Pedro,

<sup>17</sup> ne Jacobo ne Juan, biche Jacobo, benne' ca' zaj naque' zri'ine Zebedeo. (Benne' chupa caní bzua Jesús le' Boanerges, da zéaje na benne' wal-la ca guziu'.)

<sup>18</sup> Bchague' Andrés ne Felipe, ne Bartolomé, ne Mateo,

ne Tomás, ne Jacobo zri'ine Alfeo, ne Tadeo,

ne Simón, benne' dxue lázrele' cheę lazrię',

<sup>19</sup> ne Judas Iscariote, bénnea' xudęé' Jesús lu na' benne' ca' dxeledábague' Le'.

*Nu benne' dxenné' schanni' cheę Be' Lá'azxa*

(Mt. 12.22-32; Lc. 11.14-23; 12.10)

Ca gudé na' bzrin Jesús tu lu xu'u nen benne' ca' dxusédenę'. <sup>20</sup> Xecha lasa gulebiga bénneache zan naga zua Jesús, na' québedxa dxaca lataj xelawe'. <sup>21</sup> Gate belene benne' xrtia Jesús ca da dxun Le', na' belezrine' cheę xelexeché'e le'. Dxeleńné':

—Quebe zua xrlátaje xichaj lázrdawe'.

<sup>22</sup> Cá'anqueze benne' ca' dxuluxuzájle' e da nadxixruj bea Dios, benne' gusá'aque' Jerusalén, dxelenné':

—Benne' nigá zrague' Beelzebú, xrane be' xriwe' ca', na' ne' chee' xrane be' xriwe' ca' dxebéaje' be' xriwe' ca'.

<sup>23</sup> Nadxa gunné' Jesús benne' ca', na' bchálajlene' le' tu da dxulé'e na. Dxenné':

—¿Wazeque Satanás da xriwe' xebéaj cuine na? <sup>24</sup> Che benne' dxelenná bea xelexaque' chupa la'a, quebe díaqueze xel-la dxenná bea chee'. <sup>25</sup> Cá'anqueze che benne' zaj zre' e tu lu xu'u xelaque' chupa la'a, quebe xeledíaqueze benne' zaj zre' e lu xu'u na'. <sup>26</sup> Cá'anqueze, che Satanás tábaga cuíaqueze na, ne xexaca na chupa la'a, quebe díaqueze na. Wadéqueze chee' na.

<sup>27</sup> Quebe nu seque chu'u lizre benne' wal-la chee' cuane' da de' chee' che quebe guchéaje' le' nédxula. Nadxa seque' cuane' da de' lizre benne' wal-la na'.

<sup>28</sup> 'Da li dxennía', dxapa' le'e: Xúgute' dul-la da dxelún bèneache, ne dizra' schanni' da dxelenné', ájateze zaj naca na, gunite láuqueze Dios chee'. <sup>29</sup> Na'a, ca naca núteteze benne' nne' schanni' chee' Be' Lá'axxa, cabata' gunite lau Dios chee' bènea'. Webía xi'queze'.

<sup>30</sup> Caní gunná Jesús lawe' da dxelenné':

—Zraga Jesús da xriwe'.

*Nu naca ca xrna Jesús, ne bi biche' ca'*

*(Mt. 12.46-50; Lc. 8.19-21)*

<sup>31</sup> Ca gudé na' bzin xrna Jesús nen bi biche' ca'. Gulebeze' chalé'ajla, na' gulesel-le' tu benne' nne' Jesús. <sup>32</sup> Benne' ca' zaj zre' e cuita Jesús gulé' e le':

—Xrna'u ne bi bichu' ca' zaj ze' chalé'ajla, dxelenné' Lue'.

<sup>33</sup> Gunná Jesús, dxé' e benne' ca':

—¿Nézele nuzra na' xrna'a, ne bi bicha' ca'?

<sup>34</sup> Nadxa gunná' Jesús benne' ca' zaj zre' e cuita Le', na' gunné':

—Benne' caní zaj zrálene' neda' nigá zaj naque' ca' xrnáqueza', ne bi bicha' ca'. <sup>35</sup> Caní naca na lawe' da xúgute' benne' dxelune' ca' da dxaca lazre' Dios, benne' caní zaj naque' bi bicha' ca', ne bi zana' ca', ne xrna'a.

## 4

*Da dxulé'e na ca naca chee' dxaza dxa'ana*

*(Mt. 13.1-23; Lc. 8.4-15)*

<sup>1</sup> Xetú lasa guzú lau Jesús dxusédene' benne' ca' dxu'a nísadau', na' belezraga bèneache zante' naga zue'. Naxánle' e benne', na' ben na ba xen guxú'u Jesús tu lu da dxedá lawe' nísadau' da dxe na', na' gudxé' e lu'ule da dxedá lawe' nísadau', na' bèneache zan ca' gulezre' e dxu'a nísadau'. <sup>2</sup> Nadxa bchalaj Jesús da dxululé'e na, na' bsédene' benne' ca' da zante'. Ca dxusédene' benne' ca', na' bchálaje' caní:

<sup>3</sup>—Le xene da nigá. Tu benne' dxaza dxa'ana zéaje' guza. <sup>4</sup> Ca zéaje' dxaze', na' xeajlechaze bal-la bínnedu ca' dxu'a neza. Na' belezrín bxinne, ne guláguba' bínnedu caní. <sup>5</sup> Xezícadxa bínnedu ca' xeajlechaze na lu xiaj naga quebe déteca xu. Bínnedu caní belezría na lawe' da quebe déteca xu. <sup>6</sup> Ca bdxuaj gubizra, na' bzezxe na le' na, na' lawe' da quebe zaj nun lue na lu da situj, gulebizre na. <sup>7</sup> Xezícadxa bínnedu ca' xeajlechaze na naga dxelezría xixre' xeche'. Xixre' xeche' caní gulegúladxa na ca le' na, na' bululule na le' na, na' quebe gulebía na da gágudxu. <sup>8</sup> Xezícadxa bínnedu ca' xeajlechaze na lu xu bebe. Belezría na cháwedau', na' belegula na, ne gulezríale' e na da gágudxu. Bal-la na gulebía na chi dxua tu tu na. Xebal-la na gulebía na ga xun tu tu na. Xebal-la na gulebía na tu gaxúa tu tu na.

<sup>9</sup> Gunnadxa Jesús, dxé' e benne' ca':

—Che nu benne' zua naque', dxal-la' xenne' da nigá.

<sup>10</sup> Ca gudé na', ca gucuasa Jesús cuita benne' zan ca', na' gulenaba benne' ca' zrálene' benne' ca' dxuséde Jesús bi zéaje ca naca da dxulé'e nigá. <sup>11</sup> Na' gunná Jesús, dxé' e benne' ca':

—Dios dxunne' le'e lataj nézele ca naca chee' da nagache chee' da dxenná bea Le'. Na'a, ca naca chee' benne' ca' zaj zre' e cúzrela, dxuchálajlena' le' dizra'ze da dxulé'e na. <sup>12</sup> Caní dxuna' lawe' da dxelenné', na' quebe dxelaca lazre' xeelé'ene'. Dxelenné', na' quebe dxelaca lazre' xeléajni'ine', chee' quebe xelexebí'i lazre', na' chu'u xel-la wenite lau chee' dul-la da za nabague'.

<sup>13</sup> Na' gunnadxa Jesús:

—¿Quebe dxéajni'ile ca naca da dxulé'e nigá? ¿Ájalaqueze chéajni'ile xezícadxa dizra' ca' da dxululé'e na? <sup>14</sup> Benne' dxaza dxá'ane' naque' benne' dxuchálaje' xrtizra Dios. <sup>15</sup> Bal-la bèneache zaj naque' ca' bínnedu ca' xeajlechaze na dxu'a neza. Dxelenné' xrtizra Dios, na' ca dxedé na', dxezrín Satanás, na' dxucuasa na dizra' nigá da zua na xichaj lázrdau benne'

ca'. <sup>16</sup> Benne' xula ca' zaj naque' ca binnedu ca' xeajlechaze na lu xiaj. Ca dxelenne' xrtizra Dios, na' dxelebéle'ene' dxelezi'e na. <sup>17</sup> Tu chí'idauze dxelune' caní. Gate dxeledé'e' xel-la zi', ne zua da dxedábaga le' ne chee' xrtizra Dios, na' dxelexeuca'e' lawe' da quebe guxaze xrtizra Dios lú'ulete' xichaj lázrdawe' ca guca chee' binnedu ca' quebe belún lue na lu xu situj. <sup>18</sup> Benne' xula ca' zaj naque' ca binnedu ca' xeajlechaze na ládujla xixre' xeche' ca'. Dxele'ne' xrtizra Dios. <sup>19</sup> Lawe' da dxelebe'dxe' gunne xue da naca chee' xezr la xu nigá dxezi' xé xel-la gunní'a le', na' dxelezá lazre' da zante' da dxelelé'ene'. Xúgute' da caní dxelú'u na xichaj lázrdau benne' caní, na' xuluxunite na dizra' da guxú'u xichaj lázrdawe', na' quebe gaca gun na ca da dxal-la' gun dizra' nigá. <sup>20</sup> Zaj zra' benne' dxelenne' xrtizra Dios, ne dxelezi' lu ne'e' na. Bal-le' zaj naque' ca binnedu ca' gulebía na chi dxua tu tu na. Benne' xula zaj naque' ca binnedu ca' gulebía na ga xun tu tu na. Benne' xula zaj naque' ca binnedu ca' gulebía na tu gaxúa tu tu na.

*Xúgute' da nagache gul'é'e' lawe na*  
(Lc. 8.16-18)

<sup>21</sup> Cá'anqueze gunná Jesús, dxe'e' benne' ca':  
—¿Gúadxu xí', ne guzúadxu na zran xí'ina u che zran ga dxásedxu? Quebe gundxu ca', san guzúadxu na sibe chee' gusení na. <sup>22</sup> Xúgute' da nagache gul'é'e' lawe na, na' xúgute' da xu'u xichaj lázrdau dxu wénqueze na. <sup>23</sup> Che nu benne' zua nague', dxal-la' xenne' da nigá.

<sup>24</sup> Cá'anqueze gunná Jesús:  
—¡Le xene xanne' ca da dxénele! Ca da dxudxíxrele, nen le' na' gudxíxrequeze Dios cheele, na' gúnnadxé' le'e dxénele. <sup>25</sup> Caní gaca na, benne' nape' da naca chee' xrtizre'e', gunézrujdxé' chee', na' benne' quebe bi nape', ca da dauze da nape' xecá'ate' na.

*Da dxulé'e na ca naca chee' binne da dxegula na*

<sup>26</sup> Na' gunnáqueze Jesús:  
—Da dxenná bea Dios naca na ca da dxaca gate tu benne' dxaze' binnedu ca' lu xu. <sup>27</sup> Dxásie' chizrela, dxase' te zra, na' binnedu caní dxelezría na, ne dxelegula na, ne quegá nézene' ájala. <sup>28</sup> Dxaca na caní lawe' da nácaqueze ca da dxun xezr la xu. Nedxu dxebía na xrlregu na, nadxa za dau, na' bzébeté dxebía na binnedu ca' lu dau. <sup>29</sup> Gate ba gulegula xixredu caní, na' dxechugue' na lawe' da ba bzrin zra xequé'e' na.

*Da dxulé'e na ca naca chee' binne mostaza*  
(Mt. 13.31-32; Lc. 13.18-19)

<sup>30</sup> Cá'anqueze gunná Jesús:  
—¿Ájala gutil-la lébedxu da dxenná bea Dios, u che bila dizra' da dxulé'e na cá'adxu da gutil-la lébedxu le' na? <sup>31</sup> Naca na ca tu binne mostaza da dxázadxu lu xu. Binnedu nigá nácadxa cuide' ca da zaj nrita lu xezr la xu. <sup>32</sup> Gate ba guzúadxu na dxegula na, na' dxaca na da zrendxa ca xixre' ca' da zaj naca na ba dagu, na' dxebía zruze na zren, na' dxácate' dxelebia bxinnedu ca' zran zrula chee' na.

*Ca bgune Jesús da dxulé'e na caní*  
(Mt. 13.34-35)

<sup>33</sup> Caní bsede Jesús benne' ca' xrtizra Dios, na' bchálaje' zánete' da dxululé'e na caní, cadite guléajni'ine'. <sup>34</sup> Quebe bchálaje' da xula. Tuze dizra' da dxulé'e na bchálajlene' benne' ca'. Bzájla' adxe' ca naca na benne' ca' dxusédene'.

*Jesús dxebeche zri'e' be' bdunu'*  
(Mt. 8.23-27; Lc. 8.22-25)

<sup>35</sup> Lu zra ná'queze, ca gul-la chizrela, na' gunná Jesús, dxe'e' benne' ca' dxusédene':  
—Chéajdxu xecha la'a nísadau'.  
<sup>36</sup> Besá'aque' naga zaj zra' benne' zan ca', na' guleché'e' Jesús lu da dxedá lawe' nísadau' naga ba dxé'queze', na' gulennita xezícadxa da ca' dxeledá lawe' nísadau' ca' naga zaj zra' benne', na' xjácálene' Le'. <sup>37</sup> Nadxa guzú lau dxaca tu be' bdunu' lu nísadau' na', na' dxu'ute' nisa lu da dxedá lawe' nísadau'. Caní guca guzú lau dxezrá nisa lu da dxedá lawe' nísadau'. <sup>38</sup> Jesús de' dxasié' lu xcúgüe' naga nácadxa sibe lu da dxedá lawe' nísadau'. Na' bulusebange' Jesús, dxelé'e' Le':

—Benne' wesede, ¿quebe dxe'u gunne xue wátedxu nate ca na'a?  
<sup>39</sup> Nadxa guxasa Jesús, na' bchálajlene' be' bdunu', ne nísadau'. Dxenné':  
—¡Gudxé zri'! ¡Zrize guzúal!  
Gudxé zri' be' bdunu', na' nísadau' guzúa zri na. <sup>40</sup> Nadxa gunná Jesús, dxe'e' benne' ca' dxusédene':

—¿Bizr chee' na' dxezrébele'ele le'e? ¿Quebe dxeajlí lázrele Dios?

<sup>41</sup> Belezrébele'édxe', ne dxelé' ljwezre':

—¿Núzraqueze benne' nigá? Dxuluzúa dizra' be' bdunu', ne nísadau' chee'.

## 5

*Tu benne' xezre Gadara, benne' xu'e be' xriwe'*  
(Mt. 8.28-34; Lc. 8.26-39)

<sup>1</sup> Bezrín Jesús, tu zren nen benne' ca' dxusédene' xecha la'a nísadau' lu xezr la xu chee' benne' Gadara ca'. <sup>2</sup> Ca bedxúaj Jesús lu da dxedá lawe' nísadau', na' bzzrin tu benne' xu'e be' xriwe' naga zua Jesús. Bedxúaje' lu bluaj naga zaj nagache benne' gate ca'. <sup>3</sup> Benne' biu nigá zúaqueze' lu bluaj na'. Quebe nu dxezúe' guchéaj lebe' chalásaze, lácala nu guchéaj lebe' nen du xia. <sup>4</sup> Zane' lasa buluchéaje' lebe' nen du xia na'abe', ne ní'abe'. Bzúzrujbe' du xia ca', na' quegá nu guzeque nna bé'ene' lebe'. <sup>5</sup> Dxedáquezebe' te zra chizrela lu xi'a ca', ne lu bluaj ca' naga zaj nagache benne' gate. Dxebezre xa'abe', ne dxeajcházebe' lu xiaj ca', dxun we' cuínabe'. <sup>6</sup> Gate ble'ebe' zítu'la ba za Jesús, na' guzá chégube', xeajzú zríbebe' lau Le'. <sup>7</sup> Gunné zizraj be' xriwe' xu'ube', dxę na Jesús:

—¿Bizra dxaca chiu' nen neda', Jesús, Zri'ine Dios szrentę? Lu La Xránadxu Dios, dxata' xueda' Lue', quebe gudéu' neda' xel-la zi'.

<sup>8</sup> Caní gunná na lawe' da gunná Jesús, dxę'e na:

—Lue', da xriwe', bedxúaj lu beł-la' dxen chee' benne' nigá.

<sup>9</sup> Nadxa gunaba Jesús, dxę'e na:

—¿Bi leu'?

Na' bechebe na:

—Da Zan lea', lawe' da naxantu'.

<sup>10</sup> Guta' xue na Jesús chee' quebe xesel-le' na, ne quebe gucuase' na zitu' lu xezr la xu na'.

<sup>11</sup> Zaj zra' gagu lu xi'a na' tu cue' cuche zaj zra'ba' dxeláguba'. <sup>12</sup> Gulata' xue be' xriwe' ca' Jesús, gulenná na:

—Besel-la netu' lu cuche ca'. Benna lataj chú'untu' leba'.

<sup>13</sup> Nadxa Jesús be'e na lataj. Na' be' xriwe' ca' beledxúaj na lu bénnea', na' gulú'u na cuche ca'. Zaj nácabá' ca galaj gaxúa cuche ca', na' buludxixre cuínaba' tu chejéa. Xeajlechástęba' lu nísadau', ne gulátęba' lu nisa na'.

<sup>14</sup> Benne' ca' dxuluxúe' cuche ca' buluxuzrúnnuje', na' xeajlezenne' benne' zaj zre'e lu xezre, ne benne' zaj zre'e le'e xixre'. Na' belezrín benne' ca' naga zua Jesús, benne' ca' belenne' ca' da ba guca. <sup>15</sup> Gate belezrín benne' ca' naga zua Jesús, na' belelé'ene' bénnea' guxú'ube' be' xriwe' ca', dxe'ebe' ga zua Jesús, nácube' tu ladze', ne ba bezúa xrlátaje lu xichaj lázrdaube', na' gulezrebe'. <sup>16</sup> Benne' ca' belelé'e ca naca da guca chee' benne' guxú'ube' be' xriwe' ca', ne ca guca chee' cuche ca' buluchálaje' chee' da ba guca. <sup>17</sup> Nadxa benne' xezre ca' gulata' xuene' Jesús xedxúaje' lu xezr la xu chee'.

<sup>18</sup> Ca bexú'u Jesús lu da dxedá lawe' nísadau', na' bénnea' guxú'ube' be' xriwe' ca' guta' xuebe' Jesús gu'e lataj chéajlebe' Le'. <sup>19</sup> Quebe be' Jesús lebe' lataj, san dxę'e lebe', gunné':

—Bexiaj lizru', ne xeajchálaję xrtiu' ca' ca naca da zren ca' da ben Xranu' nen lue', ne ca bexache lazre' lue'.

<sup>20</sup> Nadxa bezá'abe' zexíajbe', ne guzú laube' dxuchálajbe' lu xezre ca' zaj nababa Decápolis ca naca da zren da ben Jesús nen lebe'. Belexebánele'e xúgute' benne' zaj zre'e xezre ca'.

*Bi nu'ula chee' Jairo, ne nu'ula na' xeajtę' zra lana Jesús*  
(Mt. 9.18-26; Lc. 8.40-56)

<sup>21</sup> Begüén Jesús lu da dxedá lawe' nísadau', na' bezrine' xecha la'a nísadau'. Belezrín benne' zan naga ze', na' Le' begá'ane' dxu'a nísadau'. <sup>22</sup> Ca'an guca bzzrin tu benne' xíchaję chee' xu'u naga dxelúe lá'ana judío ca' Dios, benne' le' Jairo. Gate blé'ene' Jesús, na' bzu zríbe' zran ni'e. <sup>23</sup> Guta' xuene' Jesús, dxę'e Le':

—¿Bi nu'ula chia' ba dxátebe'! ¿Gudá, bze' na'u lebe' chee' xexácabe', ne xaca banbe'!

<sup>24</sup> Nadxa guxíaję Jesús bénnea', na' bénneache zan xjácalgę' Le', ne dxuluchíteę' Le'. <sup>25</sup> Ládujla bénneache ca' za tu nu'ula quebe chawe' zue', ba zeaj chazrinnu iza nape' we' dxen. <sup>26</sup> Da zren da bulusaca benne' dxelexún bénneache ca' nu'ula nigá, na' bache ben dítaję xúgute' da nape'. Quegá bi gúcale na le', san bzáladxá we' chee'. <sup>27</sup> Gate ben nu'ula' dxuluchalaj bénneache ca naca chee' Jesús, na' bzzrine' cúzruła Jesús ládujla bénneache, na' xeajtę' zra lana Jesús. <sup>28</sup> Caní bene' lawe' da gunné' lu xichaj lázrdawe': Cun cheajtaza' zra lana Jesús, na' xexácatea'. <sup>29</sup> La gulézatę xel-la we' chię', ne la guque bé'etene' ba bexaca beł-la' dxen chee' chee' xízrawe' na'. <sup>30</sup> Gúquebe'e Jesús ben zrin xel-la waca chee'. Chee' le' na' bexéchaję, dxenné'e bénneache ca', na' gunábene' le':

—¿Nuzra bedajtá zra lana'?

<sup>31</sup> Nadxa benne' ca' dxusede Jesús gulé'e Le':

—Dxelé'equeznu' bènneache zan dxuluchíe' Lue'. ¿Bizr chee na' dxenabu': "Nuzra bedajtá neda'?"

<sup>32</sup> Jesús guzúe' dxenné'e cuite' chee lé'ene' nua' bedajtá Le'.

<sup>33</sup> Nadxa guxíaj nu'ula nigá, dxezríe' dxezrebe' lawe' da nézene' ca da ba guca chee, na' bzu zribé' lau Jesús, na' gunné' ca naca da li. <sup>34</sup> Nadxa gunná Jesús, dxe'e nu'ula':

—Bi nú'uladau', ba bexacu' lawe' da guxeajlí lazru' neda'. Bexíaj, cútudxa zrebu'. Ba bexácatequezu' chee xízrawe' da guzxacu'.

<sup>35</sup> Ne dxuchálajte Jesús gate belezrín benne' gusá'aca lizre benne' xíchaj chee xu'u naga dxelúe lá'ana judío ca' Dios, na' gulé'e xra nú'uladau' na':

—Bi nú'uladau' chiu' ba gútebe'. ¿Bizr chee na' dxunu' zédedxa benne' dxusede nigá?

<sup>36</sup> Gate Jesús benne' ca da gulenná benne' caní, dxe'e benne' xíchaj chee xu'u na', gunné':

—Quebe zrebu'. Guxeajlí lazre' neda'.

<sup>37</sup> Quebe be'e lataj chjácále bènneache zan ca' Le'. Tuze be'e lataj gusá'acale Pedro, ne Jacobo, ne Juan, biche Jacobo nigá, nen Le'. <sup>38</sup> Ca belezrine' lizre benne' xíchaj na', na' ble'e Jesús bènneache dxelún schaga. Dxelebezre benne', ne dxelebezre xa'ate'. <sup>39</sup> Nadxa guxúu Jesús lu xu'u, na' dxe'e benne' ca', gunné':

—¿Bizr chee na' dxunle schaga? ¿Bizr chee na' dxebézrele? Quegá nate bidau' nu'ula. Dxásezebe'.

<sup>40</sup> Belún lala benne' ca' chee'. Nadxa Jesús bebéaje' xúgute benne' ca', na' guché'e xra be', ne xra bidau' nigá, ne benne' ca' zjácálene' Le', na' guxú'e naga de nú'uladu na'. <sup>41</sup> Bexrue' na'be', ne guzre' lebe':

—Bi nú'uladau', lue' dxapa': ¡Guxasal

<sup>42</sup> La bexásate nú'uladu na', na' guzátébe' lawe' da ba zéajbe' chazrinnu iza. Na' benne' ca' zaj zre'e lu xu'u na' belezrebe'e. <sup>43</sup> Jesús gunná bé'ene' benne' ca' chee quebe nu xelé'e ca da bene'. Nadxa guzré' benne' ca' xulugawe' nú'uladu na'.

## 6

### *Dxezrín Jesús lazrie' da nacan xezre Nazaret*

(Mt. 13.53-58; Lc. 4.16-30)

<sup>1</sup> Jesús bezé'e naga zue', ne bezrine' lazrie', na' benne' ca' dxusédené' xjácálene' Le'. <sup>2</sup> Ca gula zra dxulupá'ana judío ca', na' bezú lau Jesús dxusédené' benne' ca' zaj zre'e lu xu'u naga dxelúe lá'ana judío ca' Dios. Bènneache zan belenne' chee', ne belxebánene', dxelenné':

—¿Gazra bsede benne' nigá ca nácate? ¿Bizra xel-la sina da nunezruj Le', ne xel-la waca zren caní da dxuné'? <sup>3</sup> ¿Quegá benne' nigá gubizre xaga, zrí'ine María, na' benne' biche' ca' zaj naque' Jacobo, ne José, ne Judas, ne Simón, na' nu'ula zane' ca' cá'aqueze zaj zrálene' dxí'u?

Chee le na' quebe gulé'aje'e chee Jesús. <sup>4</sup> Na' gunná Jesús, dxe'e benne' ca':

—Xúgute benne' dxelape' ba lá'ana tu benne' dxuchálaje' waláz chee Dios, san benne' walázz chee' ca', ne benne' xrtie' ca', ne benne' zaj zre'e xu'u lizre' quebe dxelape' le' ba lá'ana.

<sup>5</sup> Chee le na' quebe ben Jesús lazrie' na' netú xel-la waca zren. Tuze bexuné' bál-laze benne' we' gate na' guxrúa ne'e xichaj benne' ca'. <sup>6</sup> Bebane Jesús lawe' da quebe gulé'aje'e chee'.

### *Jesús dxusel-le' benne' ca' dxusédené' cheajlechálaje' xrtizra Dios*

(Mt. 10.5-15; Lc. 9.1-6)

Ca gudé na' bedé Jesús xecha lasa xézredu ca' zaj nnita gáguze, na' bsédené' benne' zaj zre'e ga na'. <sup>7</sup> Gunné' benne' chazrinnu dxusédené', ne guzú lawe' dxesel-le' le' chupa weaje', ne bnézruje' le' xel-la waca xulucuae' be' xriwe' ca' lu bel-la' dxen chee bènneache ca'. <sup>8</sup> Gunná bé'ene' le' quebe bi xelu'e chee la neza, con tuze xaga da xuluchiche'. Quebe xelu'e xixruj xeta, ne xeta, ne dumí. <sup>9</sup> Waca xululéaje' zrele', ne xelácué' tu cueze zra lané'.

<sup>10</sup> Gunnadxa Jesús, dxe'e benne' ca':

—Gate na' chu'ule le'e tu lu xu'u chee benne', waca xegá'anatele lizre bènnea' ca zrindxa zra xezá'ale lu xezre na'. <sup>11</sup> Che zrinle tu lu xezre naga quebe xuluxé lawe' le'e, ne quebe xelénene' chee,le, waca xezá'ale, na' cuibetele bxrte xu da dxedá' ní'ale. Da nigá gaca na tu da dxulé'e na zaj nabaga benne' xezre na' zria, benne' dxeledábaga' le'e. Da li dxennéa', lu zra guchi'a Dios chee bènneache, waxache' gácadxa da ba xa' da xeledé benne' xezre Sodoma, ne benne' xezre Gomorra quézcala da xeledé benne' xezre ca' naga quebe buluzé nague' chee,le.

<sup>12</sup> Nadxa gusá'aca benne' ca' dxusede Jesús, na' buluchálajlene' bènneache chee xelexebí'i lazre'. <sup>13</sup> Cá'aqueze belxebéaje' zánete be' xriwe' ca' lu bel-la' dxen chee bènneache ca', na' gulegúe'e da za zane' benne' we', na' belxexaque'.

*Ca gute Juan, benne' bchuę' bėnneache nisa*  
(Mt. 14.1-12; Lc. 9.7-9)

<sup>14</sup> Na' ben wenná bea Herodes ca naca da zren ca' da dxun Jesús lawe' da guzė dizra' cheę'. Bal-la benne' dxelennė':

—Juan, benne' bchuę' bėnneache nisa, bache bebane' ládújla benne' gate, na' cheę lę na' nape' xel-la waca zren nigá.

<sup>15</sup> Benne' xula dxelennė':

—Elías, bėnnea' bchálaje' waláz cheę Dios benne' nigá.

Benne' xula dxelennė':

—Nácalje' bėnnea' dxal-la' xelá' guchálaje' waláz cheę Dios, che nácalje' benne' gulasa, benne' bchálaje' waláz cheę Dios.

<sup>16</sup> Ca ben Herodes da caní, na' gunnė':

—Benne' nigá naque' Juan, bėnnea' gunná be'eda' neda' gulechugue' xíchaje'. Benne' nigá ba bebane' ládújla benne' gate.

<sup>17</sup> Caní gunná Herodes lawe' da gunná be'e lę' buluzú' Juan na' lizre xia, ne buluchėaje' lę' du xia, da na' bene' lawe' da dxezrá'a Herodías lę'. Herodías nigá guque' zru'ula Felipe, benne' biche Herodes. Herodes nigá bequė'ę nu'ula' cheę guque' zru'ule'. <sup>18</sup> Gunná Juan, dxe'ę Herodes:

—Quebe dxal-la' súałenu' zru'ula bi bichu'.

<sup>19</sup> Cheę lę na' Herodías guzrė'ę Juan, ne guca lazre' gútete' lę'. Quebe guca cheę' <sup>20</sup> lawe' da neze Herodes naca Juan nigá tu benne' xrlátaje, ne benne' naque' tuze nen Dios, na' bezrebe' lę'. Cheę lę na' quebe be'ę lataj Herodías na' gútete' Juan nigá, na' lácala quebe guxėajini'ine' ca naca xúgute' da bchalaj Juan, Herodes nigá bze' nague' cheę' du lazre'.

<sup>21</sup> Herodías na' bzrėlene' ajala gunę' ca da dxaca lazre' gate na' guxú'u laní ca gula la Herodes. Gulé'aj gulagu benne' xíchaje' ca', ne benne' dxelenná be'ę lu wedil-la, ne benne' zaj naque' blau lu xezre ca' zaj nababa Galilea. <sup>22</sup> Nadxa guxú'u bi nu'ula cheę Herodías na' lu xu'u naga dxelė'aj dxelawe', ne bxá'abe' lau benne' ca'. Bezaca ba lazre' Herodes ca bxá'abe', ne tuze ca belún benne' ca' zaj zra' dxelawe' tu zren nen lę'. Gunná wenná bea Herodes, dxe'ę nu'ula cuide' nigá:

—Gunaba neda' ca da dxedánenu', na' gunna' na chiu'.

<sup>23</sup> Gučebe lazre' Herodes, ne bzėtaje' Dios gunėzruje' bíteteze da nábabe', lácala nábabe' gáchajte naga dxenná be'ę lę'.

<sup>24</sup> Nadxa nu'ula cuide' nigá bdxúajbe', xeajchálajlebe' xrnabe', gunabe':

—¿Bizra naba'?

Gunná xrnabe':

—Gunaba xichaj Juan, bėnnea' bchuę' bėnneache nisa.

<sup>25</sup> La guxu'ute' nu'ula cuide' nigá naga zua wenná bea, na' gunabe', dxe'ębe' lę':

—Dxaca lazra' gunnu' neda' na'a tu lu xé'ena xichaj Juan, bėnnea' bchuę' bėnneache nisa.

<sup>26</sup> Nadxa wenná bea nigá bewi'inele'ę, ne lawe' da ba bzėtaje' Dios, na' belėnete' benne' ca' da gunnė', quebe guca lazre' guzrunę' ca da gunaba bi nu'ula nigá. <sup>27</sup> Cheę lę na' gusel-la wenná bea tu benne' dxeje' wedil-la, ne gunná bé'ene' lę' cheajxri'ę xichaj Juan na'. <sup>28</sup> Guxíaj benne' nigá lu xu'u lizre xia, na' bdxixre' xichaj Juan na', ne bexu'ę na tu lu xé'ena. Bnézrujte' na bi nu'ula na', na' lebe' bnėzrujbe' na xrnabe'.

<sup>29</sup> Gate gulėnzeze benne' ca' da nigá, benne' ca' bsėde Juan, na' xeajlexexri'ę bel-la' dxen cheę', na' xeajlecáčetę' na.

*Jesús dxugawe' chi xun gaxúa benne' biu*  
(Mt. 14.13-21; Lc. 9.10-17; Jn. 6.1-14)

<sup>30</sup> Ca gudé na' belexezrín benne' gubáz ca' cheę Jesús naga zua Le', ne buluzenne' Le' xúgute' ca da belune', ne ca da bulusėdene' benne' ca' naga xjaque'. <sup>31</sup> Nadxa gunná Jesús, dxe'ę benne' ca':

—Le chu'u. Chėajdxu xezi' lázredxu chadite' naga xu'u lataj.

Gunnė' caní lawe' da dxesá'aca benne' dxesá'aca, ne dxelexezrín benne' dxelexezrín, na' quebe dxelu'ę lataj xelawe'. <sup>32</sup> Nadxa Jesús ne benne' gubáz cheę' ca' belexexú'ę leze' tu lu da dxedá lawe' nísadau', na' belezrine' tu lataj naga quebe nu chilá' benne'. <sup>33</sup> Benne' zan ca' belele'eng' ca zjaque', ne belexexúnbe'ę Jesús, na' gusá'aca chėgűe' xjá'aque' na'. Benne' xúgute' xezre ca' belezrine' lataj na' nėdxudxa ca Jesús. <sup>34</sup> Gate bedxúaj Jesús lu da dxedá lawe' nísadau', na' blė'ene' benne' zante, ne bexache lazre' lę' lawe' da zaj zre'ę ca zřila' ca' quebe zua benne' dxuxúę' leba'. Na' guzú lawe' dxusėdene' benne' ca' da zante. <sup>35</sup> Ca gula guzrė', belezrín benne' ca' dxusėde Jesús lau Le', na' gulė'ę Le':

—Ba dxaca waxrinne, na' quegá nu lizre benne' zua lataj nigá. <sup>36</sup> Besel-la benne' caní chee cheajxaque' xezre ca' zaj nnita gálaze chee xezele' e xeta xelawe' lawe' da quebe bi de nigá da xelawe'.

<sup>37</sup> Na' gunná Jesús, dxé'e le':

—Le gunezruj le'e da xelawe'.

Na' gulenné', dxelé'e Jesús:

—¿Waca chéajntu' cheajgá'untu' xeta xtila, quízrujntu' lazruj chee chupa gaxúa zra chee gugágudxu benne' zan caní?

<sup>38</sup> Na' gunná Jesús, dxé'e le':

—¿Bal-la xeta xtila nápale? Le cheajnná'.

Ca gulénézene', na' gulenné', dxelé'e Jesús:

—Gaxxu' xeta xtila, ne chupa béladau'.

<sup>39</sup> Nadxa gunná be'e Jesús gulebé'e xúgute bénneache ca' tu cue' weaj lu xrguie xa'a. <sup>40</sup> Na' gulebé'e tu cue' weaj, du tu gaxúe', du chi xune'. <sup>41</sup> Nadxa Jesús béxrue' gazxu' xeta xtila ca', ne da chupa béladau'. Na' guchisa lawe' xabaala, gunabe' lau Dios gun la'azxe' na, na' bzúzruje' xeta xtila ca', ne bnézruje' na benne' ca' dxusédené' chee gulísie' na chee benne' ca'. Cá'anqueze gudísie' da chupa béladau' chee xúgute benne' ca'. <sup>42</sup> Na' gulagu xúgute' ne guléajte'. <sup>43</sup> Nadxa buluxutube' ca da begá'ana chee xeta xtila, ne chee béladu ca', na' guca chazrinnu xcuite xca'a. <sup>44</sup> Benne' ca' gulawe' xeta xtila ca' zaj naque' chi xun gaxúa benne' biu.

*Dxezá Jesús lawe' nísadau'*

*(Mt. 14.22-27; Jn. 6.16-21)*

<sup>45</sup> La gunná bé'ete Jesús benne' ca' dxusédené' gulu'e lu da dxedá lawe' nísadau' chee gulelague' nísadau' na' nédxudxa ca Le', chee xelexezrine' lu xezre Betsaida dxácaté Le' dxuzé' dizra' bénne' ca'. <sup>46</sup> Ca gudé bze' dizra' benne' ca', na' guzé'e zéaje' lu xi'a zeajchálajlene' Dios. <sup>47</sup> Gate gula guxrinnequeze, ba zeaj da dxedá lawe' nísadau' na' gachaj lawe' nísadau', na' begá'ana Jesús tuze' lu xu dxu'a nísadau'. <sup>48</sup> Gate blé'ene' ca dxelezraga lawe' dxulusé'e da dxedá lawe' nísadau' lawe' da za be' na', dxuzrí'i na da dxedá lawe' nísadau' na', na' gula balá' gubiga Jesús naga zaj zré'e, dxezé'e lawe' nísadau' na', ne guca lazre' té'e lau da dxedá lawe' nísadau' na'. <sup>49</sup> Gate belelé'ene' Le' ze'e lawe' nísadau' na', guléquene' da dxedá dxela, na' gulebezre xe'e. <sup>50</sup> Belelé'e xúgute' ca dxezé'e lawe' nísadau', na' belezrebele'e. Na' gunná Jesús, dxé'e benne' ca' dxusédené':

—Ga zrēbele. Neda' nigá. Le gun chuchu lázrele.

<sup>51</sup> Nadxa guluén Jesús lu da dxedá lawe' nísadau' naga zaj zré'e, na' guleza be' na'. Na' guleque zréajene', ne belexebánelé'ene', <sup>52</sup> lawe' da quebe ne xeléajni'ine' ca naca xel-la waca zren da bene' chee xeta xtila ca', lawe' da ne dxun zide' xichaj lázrdawe'.

*Dxexún Jesús benne' we' ca' lu xezre Genesaret*

*(Mt. 14.34-36)*

<sup>53</sup> Gate na' gulelague' nísadau', belezrine' lu xezr la xu chee benne' xezre Genesaret, na' buluchéaje' xaga da dxedá lawe' nísadau' dxu'a nísadau' na'. <sup>54</sup> Ca beledxúaje' lu da dxedá lawe' nísadau', la belexexúnbeate bénneache ca' Jesús. <sup>55</sup> La gusá'aca chégué' zjaque' lu xezre ca' xejlexrí'e benne' we' ca' tu tu lu ta'a, na' zeajlegüé'e le' naga zaj nézene' xedé Jesús. <sup>56</sup> Gáteteze xézredu ca', ne xezre ca', ne le'e xixre' naga dxedé Jesús, na' buluzúe' benne' we' ca' du la neza, ne gulata' xunen' Jesús gunézruje' lataj cheajletaze' zra lané', na' xúgute benne' ca' xejleté' zra lané' belexexácaté'.

## 7

*Da dxucá'ana sban bénneache*

*(Mt. 15.1-20)*

<sup>1</sup> Benne' fariseo ca' nen bal-la benne' dxuluxuzájle'e da bdxixruj be'e Moisés, benne' gusá'aque' Jerusalén, belezrine' lau Jesús. <sup>2</sup> Benne' caní belelé'ene' ca dxelún bal-la benne' dxuséde Jesús, dxelawe' xeta ne quebe zaj naxibe ne'e ca dxelenná bea benne' xudau' ca'. Chee le' na' gulenná benne' Jerusalén ca':

—Zaj naca sban na' benne' ca' dxuséde Jesús.

Nadxa gulezúe' tizre' le'.

<sup>3</sup> Caní gulenná benne' ca' lawe' da zjácále benne' xudau' fariseo ca', ne xúgute benne' judío ca' ca naca da belún xra xtau benne' ca', quebe dxelawe' xeta che quebe zaj naxibe ne'e zane' lasa. <sup>4</sup> Gate zjaque' lawe' xi'a wa'u, ca dxelexezrine' quebe dxelawe' xeta che quebe xelibe ne'e ca zaj nadxixruj bea benne' xudau' ca'. Cá'anqueze dedxa da zanté da zjácálene', ca xexadxe zriga' da dxelé'aje', ne zruaga, ne zriga xé'ena, ne da naga dxelásie'. <sup>5</sup> Nadxa benne' fariseo ca', ne benne' ca' dxuluxuzájle'e da bdxixruj be'e Moisés gulennábene' Jesús:

—¿Bizr chee na' quebe zjácále benne' ca' dxusédenu' ca naca da gulún benne' gula? Dxelawe' xeta, zaj naca sban ne'e.

<sup>6</sup> Na' bechebe Jesús:

—Láweze dxunle da xrlátaje. Lu lázrdaule xu'ule da caléla. Cháwedau' bchálajqueze Isaías ca nácale le'e gate na' bzujaje' caní:

Bénneache caní dxelúe lá'ane' neda' nen dxú'aze'.

Xichaj lázrdawe' ca' zaj nacuasa na neda'.

<sup>7</sup> Níteze naca xel-la ba lá'ana da dxelu'e neda',

lawe' da dxulusédene' da zaj nadxixruj bea bénneacheze.

<sup>8</sup> Caní naca xca', le'e dxuzúale chalá'ala ca da nadxixruj bea Dios, na' zéajlele ca naca da gulún bénneache ca dxibeles zruaga, ne zriga' cheele, ne zánete da caní da dxunle.

<sup>9</sup> Na' gunnadxé', dxé'e benne' ca':

—Chalá'ala dxuzúale ca da nadxixruj bea Dios chee zéajlele ca naca da tu dxúnzqueze.

<sup>10</sup> Caní gunná Moisés na': "Gudapa ba lá'ana xra xrna'u." Cá'anqueze gunné': "Che tu benne' nne' schanni' chee xre', che xrne'e, con gátequeze bénnea!" <sup>11</sup> Le'e dxennale, "Che tu benne' xe'e xra xrne'e: Corbán," da zéaje na, quebe gaca gácalena' le'e lawe' da bache bnézruja' chee Dios ca naca da de chia'. <sup>12</sup> Che ca'an dxenné', nadxa le'e québedxa dxu'ule le' lataj gácalene' xra xrne'e. <sup>13</sup> Gate dxunle caní dxuzúale chalá'ala xrtizra Dios, chee gunle ca da zéajlele. Na' zéajquezele dxunle zánete da zaj naca na caní.

<sup>14</sup> Xecha lasa gunné Jesús bénneache ca', na' gunné', dxé'e le':

—Le guzé nágale xúgutele, ne le chéajni'i. <sup>15</sup> Netú da dxe'aj dxagu benne' quebe seque gucá'ana na le' sban. Da dxedxuaj na lu xichaj lázrdau bénneache, le' na' dxucá'ana na le' sban. <sup>16</sup> Le'e zua nágale, le xene.

<sup>17</sup> Gate gucuasa Jesús naga zaj zra' benne' ca', na' guxú'e lu xu'u. Nadxa benne' ca' dxusédene' gulenábene' Le' ca naca chee da dxulé'e nigá. <sup>18</sup> Nadxa gunná Jesús, dxé'e le':

—¿Cá'anqueze le'e quebe dxéajni'ile? ¿Quebe dxéajni'ile xúgute da dxe'aj dxagu bénneache quebe seque gucá'ana na le' sban <sup>19</sup> lawe' da quebe dxu'u na lu xichaj lázrdawe'. Dxu'u na lu le'e, na' dxedxuaj na?

Cate' gunná Jesús caní blé'ene' zaj naca chawe' xúgute da dxe'aj dxágudxu. <sup>20</sup> Na' gunnadxé':

—Ca naca da dxedxuaj na lu xichaj lázrdau bénneache, le' na' dxucá'ana na le' sban <sup>21</sup> lawe' da lu xichaj lázrdau bénnea' dxeledxúaj ca da caléla da dxuwía lazre', ne dul-la da dxucá'ana ditaj xel-la wechaga na', ne dul-la chee da sban, ne wete benne', <sup>22</sup> ne xel-la gubán, ne da dxezá lazre' gapa da naca chee benne' xula, ne da caléla ca', ne xel-la wezrí xe', ne da dxezá lazre' da sban, ne xel-la zre'e lazre', ne xel-la wechalaj dizra' bizruj, ne xel-la dxun szren cuina, ne xel-la dxuchalaj bigaze. <sup>23</sup> Xúgute da caléla caní dxeledxúaj na lu xichaj lázrdau bénneache, ne dxuluxinnaj na le'.

*Tu nu'ula quebe naca judío dxeajli lazre' Jesús  
(Mt. 15.21-28)*

<sup>24</sup> Na' bezá'a Jesús naga zue', guxíaje' lu xezre ca' zaj nababa xezre Tiro, ne xezre Sidón. Guxú'u Jesús tu lu xu'u, ne quegá guca lazre' nu xene. Quebe guca gache'. <sup>25</sup> La gunézeté tu nu'ula zua Jesús na'. Nu'ula nigá zua tu zrí'ine' nu'ula, xu'ube' be' xriwe'. Bla' nu'ula' naga zua Jesús, ne bzu zribe' lawe'. <sup>26</sup> Nu'ula nigá quebe naque' nu'ula judío. Naque' nu'ula chee tu xezre nababa xezr la xu Sirofenicia. Bzrine' lau Jesús, na' gunabe' Le' xebéaje' be' xriwe' da xu'u zrí'ine' nu'ula. <sup>27</sup> Gunná Jesús, dxé'e nu'ula':

—Be' lataj xelagu nedxu zrí'ine benne' lu xu'u, lawe' da quebe naca chawe' cúadxu xeta xtila chee bidu ca', ne gunézrujdxu na chee bécudu ca'.

<sup>28</sup> Na' gunná nu'ula':

—Awe', Xran, san bécudu ca' zaj zra' zran ga dxelágube' dxeláguquezba' xeta bizruj da dxuluzexruj bidu ca'.

<sup>29</sup> Nadxa gunná Jesús:

—Ne chee dizra' da ba gunnéu', bexíaj na'a. Bache bedxúaj be' xriwe' lu bel-la' dxen chee zrí'inu' nu'ula.

<sup>30</sup> Gate bezrín nu'ula' lizre', na' blé'ene' zrí'ine' nu'ula debe' lu da naga dxásebe', na' be' xriwe' ba bedxúaj na lu bel-la' dxen cheebe'.

*Dxexún Jesús tu benne' nacuézruge', ne quebe dxaca nnie'*

<sup>31</sup> Nadxa bedxúaj Jesús, bezé'e naga nababa xezre Tiro, na' gudétie' naga nababa xezre Sidón, ne xezre ca' zaj nababa Decápolis, na' bezrine' dxu'a nísadau' chee xezr la xu Galilea.

<sup>32</sup> Nadxa bedajleguá' benne' ca' tu benne' nacuézruge', ne quebe dxaca nnie', na' gulenábe' Jesús xrua ne'e benne' nigá. <sup>33</sup> Guché Jesús benne' nigá chalá'ala naga zaj zra' benne' ca', na'



bdié' zrube ne'e lu naga bénnea', na' bzre'e zrene', ne bte' lawe' luzre bénnea'. <sup>34</sup> Nadxa la gunná'te' xabáa, ne gucá'a lazre', gunné':

—Efata.

Dizxa' nigá zéaje na: Bxalaj.

<sup>35</sup> Ca gunné' caní, na' bxalaj naga benne' cuezru nigá, ne bexaca luzre'. Nadxa guca bchálaje'. <sup>36</sup> Na' gunná Jesús, dxé'e benne' ca' quebe nu xelé'e ca da bene'. Lácala gunná be'ene' le' caní, buluchilujdxé' dizra' ca da bene'. <sup>37</sup> Benne' ca' zaj zra' na' belexebánele'ene', dxelenné':

—Xúgute dxune' cháwedau'. Ddexune' benne' cuezru ca', na' dxeléntene', ne dxexune' benne' ca' quebe dxaca nnie', na' dxelenné'tie'.

## 8

*Dxugagu Jesús chua gaxúa benne' biu*

(Mt. 15.32-39)

<sup>1</sup> Ca lu zra ca' zaj nazraga benne' zan, na' quebe bi de da xelawe'. Ca'an guca gunné' Jesús benne' ca' dxusédené', na' guzre' le':

<sup>2</sup> —Neda' dxexache lazra' benne' caní lawe' da bache guca chunna zra zaj zre'e nigá nen neda', ne quebe bi de da xelawe'. <sup>3</sup> Che ca' xesel-la' le' lizre' quebe xelawe', na' xelate ni'a ne'e la neza lawe' da zá'aca bal-le' zitu'.

<sup>4</sup> Na' belexechebe benne' ca' dxuséde Jesús, dxelé'e Le':

—¿Ájazra gundxu gunézrujdxu da xelawe' nigá, ga quebe nu chilá' benne'?

<sup>5</sup> Jesús bchebe' le':

—¿Bal-la xeta xtila nápa le'e?

Benne' ca' gulenné':

—Gazre na.

<sup>6</sup> Nadxa gunná be'e Jesús xelebé' xúgute bénneache ca' lu xu. Nadxa guqu'e xeta xtila, ne guzre' Dios:

—Xcalenu'.

Nadxa bzúzruje' na, ne bnézruje' na benne' ca' dxusédené', na' benne' caní gulisie' na lálwela xúgute bénneache ca'. <sup>7</sup> Zaj nápaqueze' tu chupa béladau'. Na' Jesús gunabe' Dios guné' na chawe'. Nadxa gunná bé'ene' gulise benne' ca' le' na. <sup>8</sup> Gulagu xúgute bénneache ca', ne belezúale'e chawe'. Ca gude' na' bulusuzre'e gazre xcuite xca'a nen xeta bizruj da belegá'ana. <sup>9</sup> Benne' ca' gulawe' zaj naque' ca chua gaxúa benne' biu. Nadxa Jesús bze' benne' ca' dizra'. <sup>10</sup> Nadxa guxú'e lu da dxedá lawe' nísadau' nen benne' ca' dxusédené'. Xjaque' lu xezr la xu chee benne' xezre Dalmanuta.

*Dxelenabe' Jesús gune' tu xel-la waca*

(Mt. 16.1-4; Lc. 12.54-56)

<sup>11</sup> Nadxa belezrín benne' xudau' fariseo ca' ga na', ne gulezú lawe' dxulutil-le' dizra' nen Jesús. Gulenabe' Jesús gune' tu xel-la waca da za xabáa, chee xelenézené' bi xel-la waca napé'. <sup>12</sup> Nadxa Jesús gucá'a dxgua lazre', gunné':

—¿Bizr chee na' dxelenaba benne' caní guna' tu xel-la' waca da za xabáa? Da li dxapa' le'e, québequeze bi xel-la waca guna' lau le'e.

<sup>13</sup> Nadxa Jesús bca'ane' benne' ca', na' bexu'e lu da dxedá lawe' nísadau', dxexíaje' xechelá'a chee nísadau'.

*Da naca ca' cua zichaj chee xeta xtila*

(Mt. 16.5-12)

<sup>14</sup> Gulal-la lazre' benne' ca' dxuséde Jesús xelu'e da xelawe', na' zaj nu'e tuze xeta xtila lu da dxedá lawe' nísadau'. <sup>15</sup> Nadxa Jesús gunná bé'ene', dxé'e benne' ca':

—¿Le nna'xque nigá! Le guxúe cuínale da naca cua zichaj chee xeta xtila chee benne' xudau' fariseo ca', ne ca naca cua zichaj chee xeta xtila chee Herodes.

<sup>16</sup> Nadxa benne' ca' dxuséde Jesús gulé' ljwezre':

—Le' dxenné' caní lawe' da quebe de xeta xtila gágudxu.

<sup>17</sup> Dxeque be'e Jesús da dxelenné', na' guzre' le':

—¿Bizr chee na' dxennale quebe de xeta xtila gágudxu? ¿Quebe ne chéajni'ile ne quebe dxeque be'ele? ¿Nácale'e zide' lázraule? <sup>18</sup> ¿Quebe dxelé'ele nen xiaj laule, ne quebe dxenle nen nágale? ¿Quebe dxeajsá lázrele? <sup>19</sup> Gate na' bgawa' chi xun gaxúa benne' biu nen gazxu' xeta xtila, ¿bal-la xcuite xca'a xeta bizruj da becá'ale?

Benne' ca' gulenné':

—Chazrinna na.

<sup>20</sup> Na' gunná Jesús:

—Na' gate na' bgawa' chua gaxúa benne' biu nen gazre xeta xtila, ¿bal-la xcuite xca'a da zaj zrate beca'ale?

Le' gulenné':

—Gazre na.

<sup>21</sup> Nadxa Jesús guzre' benne' ca':

—¿Ne la gázqueze quebe dxéajni'ile?

*Jesús dxexune' tu benne' la chul-la*

<sup>22</sup> Ca gudé na' Jesús, ne benne' ca' dxusédene' belexezrine' lu xezre Betsaida, na' benne' Betsaida guleché'e tu benne' la chul-la lau Jesús, na' gulata' xuene' Le' guté' le'. <sup>23</sup> Jesús gudele' na' benne' la chul-la, ne bebéaje' le' dxu'a xezre. Na' btupe' zrene' lu xiaj lawe', ne guxrúa ne'e le'. Na' bchebe' le' chete dxelé'ene'. <sup>24</sup> Benne' la chul-la gunné'e, na' gunné':

—Dxelé'eda' benne' ca', zaj naque' ca' weaj xaga, na' dxesi'aque'.

<sup>25</sup> Nadxa Jesús guxrúa ne'e xiaj lawe' da xula, na' benne' na' gunná' dxgüe'. Na' bexaque', ne xúguté' bache dxelé'eng' cháwedau'. <sup>26</sup> Nadxa Jesús besel-le' le' lizre', dxé'e le':

—Quebe chu'u lu xezre nigá, ne quebe nu xu'u caní.

*Pedro dxenné' naca Jesús benne' nasel-la Dios*

*(Mt. 16.13-20; Lc. 9.18-21)*

<sup>27</sup> Ca gudé na' Jesús, ne benne' ca' dxusédene' xjaque' lu xézredu ca' zaj nababa xezre Cesarea naga dxenná bea Filipo. Dxácaté zaj xu'e neza bchebe Jesús benne' ca':

—¿Nuzra na' dxelenná benne' naca' neda'?

<sup>28</sup> Belexechébe':

—Bal-la benne' dxelenné' nacu' Juan, bénnea' bchué' bénneache nisa. Benne' xula dxelenné' nacu' Elias, bénnea' bchálaje' waláz cheé Dios. Benne' xula dxelenné' nacu' tu benne' xula bchálaje' waláz cheé Dios.

<sup>29</sup> Nadxa Jesús bchebe' le':

—¿Gazra le'e? ¿Nuzra dxennale le'e naca' neda'?

Pedro gunné':

—Lue' nacu' Cristo, benne' nasel-la Dios.

<sup>30</sup> Nadxa gunná be'e Jesús benne' ca'. Gunné':

—Quebe nu xele ca'.

*Dxuchalaj Jesús ca dxal-la' gatie'*

*(Mt. 16.21-28; Lc. 9.22-27)*

<sup>31</sup> Nadxa guzú lau Jesús dxulé'ene' benne' ca' ca dxal-la' sáca'le'e Le', Benne' Gulje' Bénneache, ne ca xelún benne' gula cheé judío ca', ne benne' xíchaje' ca' cheé bxruze ca', ne benne' dxuluxuzájl'e' da nadxiruj bea Dios, xuluzú' Le' chálá'ala. Nadxa guzre' le' welúti'e' Le', san xebane' zra guxunne zra. <sup>32</sup> Da nigá guzre' le' caníqueze. Nadxa Pedro guché'e Jesús chálá'ala, ne guzú lawe' dxedil-le' Le'. <sup>33</sup> Jesús bexéchaje', ne gunné'e benne' ca' dxusédene', na' gudil-le' Pedro, dxé'e le':

—Gucuasa cuita' nigá, lue', da xriwe'. Quebe dxéquenu' da nigá ca dxun Dios. Ca dxun bénneache dxunu'.

<sup>34</sup> Nadxa Jesús gunné' benne' ca' dxusédene', ne xúguté' bénneache ca', na' guzre' le':

—Che núlale dxaca lázrele gunle neda' tuze, dxal-la' guzúale chálá'ala xúguté da dxezá lázrele le'e, ne gácale ca tu benne' zéaje' cheé te'e xaga béguaj, na' gunle neda' tu zren. <sup>35</sup> Che tu benne' dxaca lazre' guselé' xel-la nabán chee', benne' nigá gunitie' xel-la nabán chee'. Bénnea' gunitie' xel-la nabán chee' ne chia' neda', ne ne cheé dizra' chawe' chia', benne' nigá guselé' xel-la nabán chee'. <sup>36</sup> Che tu benne' gape' xúguté da naca chee' xezr la xu nigá, na' gunitie' bénne' du xu'e, ¿bizraqueze da ba neza gaca na chee' bénnea'? <sup>37</sup> Quebe bi gaca gunezruj tu benne' chee' guselé' bénne' du xu'e. <sup>38</sup> Che tu benne' gapa stu'e chia' neda', ne chee' dizra' chawe' chia' lau bénne' caní, benne' dxulucá'ana Dios, ne dxelún dul-la, la gaze neda', Benne' Gulje' Bénneache, gapa stú'queza' chee' bénnea' gate xida' nen xel-la szren chee' Xra', ne nen gubáz chee' xabáa lá'azxa ca'.

## 9

<sup>1</sup> Cá'anqueze guzre Jesús benne' ca':

—Da li dxapa' le'e, zaj zra' nigá benne' quebe xelatie' nédxula ca xelelé'ene' xida xel-la dxenná bea chee' Dios nen xel-la waca chee'.

*Ca guca gate bcha ca gunná' Jesús*

*(Mt. 17.1-13; Lc. 9.28-36)*

<sup>2</sup> Ca gudé xrupa zra, guché Jesús Pedro, ne Jacobo, ne Juan, na' guxíajlene' benne' canize tu lu xi'a sibe. Na' bcha ca gunná' Jesús lau benne' ca'. <sup>3</sup> Zra lana Jesús bexaca na chiche ca

bezxe' da dxágutę na laudxu. Quegá nu chilá' benne' lu xęzr la xu gaca quibe' zra lanę' cheę xegá'ana na chiche ca guca zra lana Jesús. <sup>4</sup>Na' benne' ca' dxusede Jesús belelé'ene' Elías, ne Moisés, benne' gulate nédxudaute, dxuluchálajlene' Jesús. <sup>5</sup>Pedro guzre' Jesús:

—Benne' wesede, cháwele'ę naca zradxu nigá. Guntu' chunna xu'u lágadau', tu chiu', ne tu cheę Moisés, ne tu cheę Elías.

<sup>6</sup>Caní gunná Pedro lawe' da dxelezrebe benne' ca' dxusede Jesús, na' Pedro quebe nézene' ca da dxenné'. <sup>7</sup>Nadxa betaj tu beuj naga zaj zre'ę, da bcache na le', na' lu beuj na' belenne' tu chi'i benne', gunné':

—Benne' nigá naque' Zri'ina' nazrí'ite' lazra'. Le xen da dxenné'.

<sup>8</sup>Gate gulenné'ę, québedxa nu nalá' nen le', san tuze Jesús.

<sup>9</sup>Dxácate dxelexétaje' lu xi'a na', gunná be'e Jesús benne' ca' quebe nu xuluchálajlene' ca naca da belelé'ene' gate te na' xebán Benne' Gulje' Bénneache ládujla benne' gate. <sup>10</sup>Cheę le' na' gulezúę' zrize ca naca da ba guca. Buluchebe ljwezre':

—¿Bizra zéaje da na', xebane' ládujla benne' gate?

<sup>11</sup>Nadxa buluchebe' Jesús:

—¿Bizr cheę na' dxeleenná benne' ca' dxuluxuzájle'ę da nadxixruj bea Dios dxal-la' xelá' Elías nédxula ca Cristo?

<sup>12</sup>Bechebe Jesús, na' guzre' le':

—Da li xelá' Elías nedxu, ne gucá'ana chawe' xúgute. ¿Bizra dxenná da naxúaj na lu xiche cheę Dios ca gaca chia' neda', Benne' Gulje' Bénneache? Dxenná na da zan da saca', na' xuluzúa bénneache neda' chalá'ala. <sup>13</sup>Neda' dxapa' le'e, ba bla' Elías, na' belunę' cheę' ca naca xúgute da gulaca lazre' ca da dxenná na lu xiche cheę Dios ca da dxal-la' gaca cheę'.

*Dxexún Jesús tu benne' cuide' xu'ube' be' xriwe'*

(Mt. 17.14-21; Lc. 9.37-43)

<sup>14</sup>Ca gudé na' belexezrine' naga zaj zra' xezícadxa benne' ca' dxusede Jesús, na' belelé'ene' benne' zan zaj naxéčaję' le', ne zaj zráqueze na' benne' dxuluxuzájle'ę da nadxixruj bea Dios, na' dxulutíl-lalene' le' dizra'. <sup>15</sup>Gate belelé'ene' Jesús, na' xúgute' belexebánene', na' gusi'aca chégüę' naga zua Jesús, ne bulugape' Le' diuzre. <sup>16</sup>Ca'an guca, Jesús bchebe' benne' ca':

—¿Bizra na' dxedíl-lalele benne' ca'?

<sup>17</sup>Nadxa tu benne' ze' ga na' bechebe':

—Benne' wesede, nache'a zri'ina' nigá cheę xexunu'-be' lawe' da xu'ube' be' xriwe' da ba nun na lębe' bi quebe dxaca nnebe'. <sup>18</sup>Gáteteze na' dxu'ube' da xriwe', na' dxęl-la na lębe', ne dxin na lębe' lu xu. Dxezría bzrina' xú'abe', ne dxagu lázxabe'. Cheę le' na' ba dxęxrujle'ębe'. Ba gunaba' benne' ca' dxusedenu' xelexebáaje' be' xriwe' na', san quebe gulezéquene'.

<sup>19</sup>Bechebe Jesús:

—Le'e, benne' quebe dxéajlele chia'. ¿Ájate dxal-la' súalena' le'e? ¿Ájate dxal-la' gaca' benne' zren lazre' nen le'e? Le cheajxri' bi cuide' na' nigá.

<sup>20</sup>Na' xeajlexri'ę-be'. Gate be' xriwe' na' ble'e na Jesús, na' ben na gudel-la chuna' bi cuide' na', ne gudinna lębe' xu, na' dxeboxre dxetúl-labe' lu xu, ne guzría bzrina' dxú'abe'. <sup>21</sup>Nadxa bchebe Jesús xrabe':

—¿Bátate dxezácabe' caní?

Gunná xrabe':

—Gate nácatebe' bidau'. <sup>22</sup>Zane' lasa be' xriwe' na' dxugú'u na lębe' lu xi', ne lu nisa cheę gute na lębe'. Che wazéquenu' bi gunu' cheębe', bexache lazre' netu', ne gúcale netu'.

<sup>23</sup>Na' guzre Jesús le':

—Che wazéquenu' lue' chéajle'u chia', xúgute wazeque cheę benne' dxéajle'ę chia'.

<sup>24</sup>Nadxa xra bi cuide' nigá gunné' zizraj:

—Dxéajle'a chiu'. Gúcale neda' cheę chéajlędxa.

<sup>25</sup>Gate ble'e Jesús dxelezraga benne' zan, na' gudil-le' be' xriwe' na', dxenné':

—Lue', be' xriwe', dxunu' benne' quebe dxaca nnie', ne cuezru, neda' dxenná be'eda' lue' xedxúaju'. ¡Bsan bi cuide' nigá! ¡Québedxa xexú'u lu be'l-la' dxen cheębe'!

<sup>26</sup>Na' be' xriwe' na' gudxezre xa'a na, ne ben na gudel-la chuna' bi cuide' na', na' bedxúaj na. Na' begá'anabe' ca tu benne' gate. Ca'an guca, gulenná benne' zan ca':

—Ba gútebe'.

<sup>27</sup>Nadxa gucá'a Jesús na'be', bechise'-be'. Na' benne' cuide' na' bezebe'.

<sup>28</sup>Nadxa guxú'u Jesús tu lu xu'u, na' benne' ca' dxusedene' buluchebe' Le' naga zue' tuze':

—¿Bizr cheę na' quebe guzéquentu' netu' xebéajntu' be' xriwe' na'?

<sup>29</sup>Nadxa Jesús guzre' benne' ca':

—Ca naca be' xriwe' caní séquele xebéaje na che ná bale lau Dios, ne gunle gubasa.

*Jesús dxuchálajé' da xula ca gaca gate gatíe'*

*(Mt. 17.22-23; Lc. 9.43-45)*

<sup>30</sup> Gate besí'aque' naga zaj zře'e, na' belexedéé' naga nababa Galilea. Jesús quebe guca lazre' nu neze ga zue', <sup>31</sup> lawe' da dxuzéajni'ine' benne' ca' dxusédene', na' guzre' le':

—Zua tu benne' gudéé' neda', Benne' Guljé' Bénneache, lu na' benne' ca' dxeledábague' neda', na' xelútié' neda', san gate gaca chunna zra natia', na' xebana'.

<sup>32</sup> Benne' ca' quebe guléajni'ine' ca da dxé'e le', ne belezrebe' xuluchébe' Le'.

*Nu benne' naque' blau*

*(Mt. 18.1-5; Lc. 9.46-48)*

<sup>33</sup> Nadxa belezrine' lu xezre Capernaum, na' gate zaj zře'e lu xu'u na', bchebe Jesús benne' ca' dxusédene':

—éBizra dízra' dxutíl-laléle ljuwézrele za'le la neza?

<sup>34</sup> Gulezré'e zrire lawe' da bulutil-le' dízra' la neza na' che nule' nácadxe' benne' blau.

<sup>35</sup> Nadxa Jesús gudxé'e, na' gunné' benne' chazrinnu, benne' ca' dxusédene', na' guzre' le':

—Che núlale dxaca lázrele gácale benne' blau, dxal-la' gácale ca benne' bzébe, ne gunle zrin cheé xúgute bénneache.

<sup>36</sup> Nadxa guqué'e tu bidau', na' bzué' lébe' gachajlawe' benne' ca'. Na' bnide'-be', ne guzre' benne' ca':

<sup>37</sup> —Benne' na' gape' ba lá'ana tu bidau' ca bidu nigá lawe' da nazrí'ine' neda', bénnea' gape' ba lá'ana neda', na' bénnea' gape' ba lá'ana neda', quegá tuza' neda' gape' ba lá'ana, cá'anqueze gape' ba lá'ana Xra' nasele' neda'.

*Benne' quebe dxedábague' dxi'u, dxácalene' dxi'u*

*(Lc. 9.49-50; Mt. 10.42)*

<sup>38</sup> Nadxa Juan guzre' Jesús:

—Benne' Weséde, blé'entu' tu benne' dxebeájé' be' xriwé' da xu'u bénneache, dxuchínene' Lau' Lue', san bénnea' quebe dxune' dxi'u tu zren. Cheé le' na' gúzrentu' le' québedxa guné' ca'.

<sup>39</sup> Jesús guzre' benne' ca' dxusédene':

—Quebe bi xe'e le'. Che nu benne' guné' tu xel-la waca, guchínene' La' neda', benne' nigá quebe gaca nne' schanni' chia'. <sup>40</sup> Caní naca na lawe' da benne' quebe dxedábague' dxi'u, dxácalene' dxi'u. <sup>41</sup> Núteteze benne' gunné' le'e tu zriga' nisa ne cheé La' neda' lawe' da nácale chia' neda', Cristo, da líqueze dxennia', wazí'queze' da dxal-la' si'e.

*Ca naca da dxun na dxi'u benne' dul-la*

*(Mt. 18.6-9; Lc. 17.1-2)*

<sup>42</sup> Gunnadxa Jesús:

—Núteteze benne' gulé'ene' tu bidau' cheé gunbe' dul-la, bidu na' dxéajlebe' chia', cháwedxa guchéajdxu tu xiaj zi'i lba bénnea', ne cheajchú'umadxu le' lu da situj cheé nísadau'.

<sup>43</sup> Che na'u dxun na gunu' dul-la, wendxa guchugu na'u na'. Cháwedxa xexú'u xabáa naga gaca banu' nen tuze na'u quézcala xexíaju' lataj ba xa' nen dxúpaté na'u, naga quebe xexula xi' da xezacu'. <sup>44</sup> Lataj ba xa' na' quebe xelate bzuga', be dxeláguba' benne' ca' dxelune' da calela, na' xi' na' cabata' xexúl-laqueze na. <sup>45</sup> Na' che ni'u dxun na gunu' dul-la, guchugu ni'u na'. Cháwedxa xexú'u xabáa naga gaca banu' nen tu ni'u, quézcala xexíaju' lataj ba xa' nen dxúpaté ni'u, naga quebe xexula xi'. <sup>46</sup> Lataj ba xa' na' quebe xelate bzuga', be dxeláguba' benne' ca' dxelune' da calela, na' xi' na' cabata' xexúl-laqueze na. <sup>47</sup> Che xiaj lau' dxun na gunu' dul-la, guleaj xiaj lau' na'. Cháwedxa xexú'u naga dxenná bea Dios nen tuze xiaj lau', quézcala xexíaju' lataj ba xa' nen dxúpaté xiaj lau'. <sup>48</sup> Lataj ba xa' na' quebe xelate bzuga', be dxeláguba' benne' ca' dxelune' da calela, na' xi' na' cabata' xexúl-laqueze na.

<sup>49</sup> 'Ca dxundxu gate dxugú'udxu zede' be'la' da gúzáladxu lu xi' cheé xegá'ana chawe' na, ca'an gaca cheé xúgute benne'. Cá'anqueze dxugú'udxu zede' da dxuzéxedxu lau Dios. <sup>50</sup> Zede' na' naca na da chawe', san che xenite xel-la sna'a cheé na, éájala gundxu cheé guchínedxu zede' na'? Le gaca le'e ca zede' chawe' na', ne le sua lu xel-la zri lázre' tule nen xetule.

## 10

*Ca naca cheé benne' dxexelé'e nen zru'ule'*

*(Mt. 19.1-12; Lc. 16.18)*

<sup>1</sup> Nadxa bedxúaj Jesús xezre Capernaum, na' guxíajé' naga nababa Judea xechalá'a xegu Jordán naga dxalaj gubizra. Na' belezraga bénneache zan naga zua Jesús, na' xecha lasa na' bsédene' le' cáqueze dxune'. <sup>2</sup> Nadxa bal-la benne' xudau' fariseo ca' belezrine' lau Jesús, na' buluchébe' Le' cheé da gun nne' Le' tu da quebe dxal-la' nne'. Buluchébe' Le':

—¿Waca tu benne' xelé'ē nen zru'ule'?

<sup>3</sup> Nadxa bechebe Jesús:

—¿Bizra gunná be'e Moisés le'e'?

<sup>4</sup> Na' belexechebe benne' ca':

—Benna Moisés lataj gunézrujdxu zru'uladxu tu xiche da dxenná na dxelá'adxu, na' gusandxu le'.

<sup>5</sup> Nadxa Jesús guzre' le':

—Caní gunná be'e Moisés lawe' da zaj naca zizraj lázrdaule le'e. <sup>6</sup> Gate nédxudau' gate ben Dios xúgute da dxelé'edxu, na' bene' bēnneache benne' biu, ne nu'ula, na' gunné': <sup>7</sup> "Chee le na' benne' biu na' gusané' xruze xrne'ē chee gaque' tuze nen zru'ule', <sup>8</sup> na' dxupe' xelaque' ca tuze benne'." Ca' naca na, québedxa zaj naca chupe', san tuze benne' zaj naque'. <sup>9</sup> Chee le na' netú benne' quebe dxal-la' xelé'ē da nuchaga Dios.

<sup>10</sup> Gate zaj zra' lu xu'u benne' ca' dxusede Jesús buluchēbe' Le' xetú lasa ca naca chee da nigá. <sup>11</sup> Na' Jesús guzre' benne' ca':

—Che tu benne' xelé'ē nen zru'ule', ne xezúalēne' nu'ula xula, dxíchujē' xrba chee wechaga na' lawe' da dxusebague' zru'ule' nedxu na' dul-la. <sup>12</sup> Cá'anqueze che tu nu'ula gusané' benne' chee', ne xezúalēne' benne' xula, la gázqueze dxíchujē' xrba chee wechaga na' da dxusebague' benne' chee' dul-la.

*Jesús dxenabē' Dios gun chawē'e bidu ca'*

*(Mt. 19.13-15; Lc. 18.15-17)*

<sup>13</sup> Nadxa bēnneache ca' guleché'ē bidu chee' ca' lau Jesús chee xrua ne'ē lebe', na' benne' ca' dxusede Jesús gulezú lawē' dxeledil-le' benne' ca' zaj naché'ē bidu ca'. <sup>14</sup> Gate ble'e Jesús da dxelunē', na' bzrē'ē, ne guzre' le':

—Le güe bidu ca' lataj xelélé'abe' naga zua'. Quebe guzágale-be' lawe' da benne' zaj naque' ca bidu caní xelu'ē naga dxenná bea Dios. <sup>15</sup> Da li dxapa' le'e, che tu benne' quebe gape' ba lá'ana da dxenná bea Dios ca dxelún bidu caní, cabata' chu'u bēnnea' naga dxenná bea Le'.

<sup>16</sup> Nadxa gucá'a Jesús bidu ca', ne bnide'-be'. Guxrúa ne'ē lebe', na' gunabe' Dios gun chawē'e-be'.

*Benne' cuide' napē' da gunní'a dxuchálajlēne' Jesús*

*(Mt. 19.16-30; Lc. 18.18-30)*

<sup>17</sup> Gate bexú'u Jesús neza, na' guzá chegu tu benne' biu, na' bzu zribe' lau Jesús, ne bchēbe' Le':

—Benne' xrlátaje, bi dxal-la' guna' chee gapa' xel-la nabán zeajlí canna?

<sup>18</sup> Jesús guzre' le':

—¿Bizr chee na' dxu'u neda' xrlátaje? Québedxa nu chilá' naca xrlátaje. Tuze Dios naque' xrlátaje. <sup>19</sup> Núnbeaquezu' ca da bdxixruj bea Dios gate na' gunné':

Quebe quichju' xrba chee wechaga na'.

Quebe gutiu' benne'.

Quebe cuanu' chee benne'.

Quebe nneu' chee nu benne' da quebe naca na.

Quebe gagu lanu'.

Gudapa ba lá'ana xra xrna'u.

<sup>20</sup> Nadxa bēnnea' bechebe':

—Benne' wesēde, xúgute da caní dxuna' nácatea' bidau'.

<sup>21</sup> Na' Jesús gunné'ē le' xrtandau', ne guzre' le':

—Tu da dxexá'zrjenu'. Guxíaj xeažete xúgute da napu', na' bnezruj benne' xache' ca' dumí chee na. Nadxa gapu' da gunní'a xabáa. Na' gudá, gacu' ca tu benne' zéajē' chee te'ē xaga béguaj, ne ben neda' tuze.

<sup>22</sup> Gate bene' da nigá, na' benne' cuide' na' bewi'ine lázrele'ē, na' bexíajē' dxewí'ine' lawe' da nácale'ē benne' gunní'a.

<sup>23</sup> Nadxa Jesús gunné'ē ni naze, na' guzre' benne' ca' dxusédene':

—Stébetē naca chu'u benne' gunní'a naga dxenná bea Dios.

<sup>24</sup> Belexebánele'ē benne' ca' dxusede Jesús ca naca dizra' gunná Jesús, na' Le' guzre' le' xetú lasa:

—Zrí'ina'dau', stébetē naca xelú'u naga dxenná bea Dios benne' dxuluxrén lazre' xel-la gunní'a. <sup>25</sup> Chadidxa te tu bea zren lu negue xechē' quézcala chu'u tu benne' gunní'a naga dxenná bea Dios.

<sup>26</sup> Gate belén benne' ca' dizra' nigá, na' belexebánele'ē'ēne', na' buluchēbe ljwezre':

—¿Núzraqueze la xca'?

<sup>27</sup> Jesús gunné'ē benne' ca', ne guzre' le':

—Quebe seque' nu bénne' guné' da nigá, san Dios wazéqueñe'. Quebe bi de da quebe gaca gun Dios.

<sup>28</sup> Nadxa Pedro guzre' Jesús:

—Xránantu', netu' ba bcá'anantu' xúgute' da nápantu', ne zéajlentu' Lue'.

<sup>29</sup> Na' bechebe Jesús:

—Da li dxapa' le'e, núteteze benne' gusane' lizre', u benne' biche', u nu'ula zane', u xre', u xrne'e, u zru'ule', u zri'ing', u xezr la xu chee' ne chia' neda', u ne chee' dizra' chawe' chia', <sup>30</sup> benne' nigá si'e na'a lu xezr la xu nigá tu gaxúa cue' ca' da si'e, xu'u ca', ne benne' biche' ca', ne nu'ula zane' ca', ne xrne'e ca', ne xezr la xu chee' ca', na' weláu zi' xúzrequeze bénneache le'. Lu xezr la xu da za za' wazí'queze' xel-la nabán zeajlí canna. <sup>31</sup> Zánete' benne' zaj naca na'a benne' blau xelaque' ca benne' bzebe, na' zánete' benne' zaj naca na'a ca benne' bzebe xelaque' benne' blau.

*Dxuchalaj Jesús xetu' lasa ca gaca gate gatie'*

(Mt. 20.17-19; Lc. 18.31-34)

<sup>32</sup> Gate zaj xu'e neza dxelegüene' zjaque' Jerusalén, na' Jesús zria lawe' lau benne' ca' dxusédené'. Dxelezrebe benne' ca', ne lu xel-la dxelezrebe zjácalene' Le'. Na' da xula gucá'a Jesús benne' chazrinnu ca' dxusédené', na' guzú lawe' dxé'e le' ca' naca da dxal-la' gaca chee'. <sup>33</sup> Na' guzre' le':

—¡Le na' xque nigá! Dxegüendxu zéajdxu Jerusalén naga tu benne' gudé'e neda', Benne' Gulje' Bénneache, lu na' benne' xichaje ca' chee' bxruze ca', ne lu na' benne' dxuluxuzájle'e da nadxixruj bea Dios, na' xelechugue' chia' chee' gatia', na' wuludee' neda' lu na' benne' zitu' ca'. <sup>34</sup> Nadxa xelún le' chia' neda', ne xelu'e neda', ne xuluzré'e neda' zrene', na' xelutie' neda'. Gate gaca chunna zra xebana' ládujla benne' gate.

*Jacobo ne Juan dxelenabe' Jesús bi gune' chee'*

(Mt. 20.20-28)

<sup>35</sup> Nadxa Jacobo ne Juan, zri'ine Zebedeo, belezrine' lau Jesús, na' gulé'e Le':

—Benne' Wesede, dxaca lázrentu' gunu' cheentu' da nábantu' Lue'.

<sup>36</sup> Nadxa bchebe Jesús le':

—¿Bi dxaca lázrele guna'?

<sup>37</sup> Na' belexechebe' Le':

—Benna netu' lataj cué'entu', tuntu' chalá'a xabêla chiu', ne xetuntu' chalá'a xéglala chiu' naga nna be'u xabáa chiu'.

<sup>38</sup> Na' guzre Jesús le':

—Le'e quebe nézele da dxenábale. ¿Waca xí'ajle le'e da na' xi'aj neda', da zéaje na ca naca da sácadxu? ¿Waca chuale nisa ca chua' neda' nisa lu xel-la gute?

<sup>39</sup> Le' belexechebe':

—Wácantu'.

Na' Jesús guzre' le':

—Da li wé'ajle ca naca da na' xi'aj neda', ne chuale nisa ca chua' neda' nisa. <sup>40</sup> Chee' cué'ele chalá'a xabêla chia' u chalá'a xéglala chia', quegá neda' gunna' na. Gaca chee' benne' ca' ba nucueza Dios chee'.

<sup>41</sup> Gate xechí benne' ca' dxusede Jesús belenne' na, na' belezré'e nen Jacobo ne Juan. <sup>42</sup> Jesús gunné' benne' ca', na' guzre' le':

—Bá nézquezle ca dxelún benne' dxelenná be'e benne' xezr la xu ca'. Dxelún cuine' xrane benne' xezr la xu ca'. Benne' blau ládujla le' dxezi'e ba neza xel-la dxenná bea chee'. <sup>43</sup> Quebe gaca caní ládujla le'e. Che nu benne' dxaca lazre' gaque' benne' blau ládujla le'e, benne' nigá dxal-la' gune' zrin chee' ljwezre', <sup>44</sup> na' che nu benne' ládujla le'e dxaca lazre' gaque' benne' xichaje, benne' nigá dxal-la' gaque' ca tu benne' nada'u chee' gune' zrin chee' xúgute' ljwezre'. <sup>45</sup> Caní gaca na lawe' da cá'anqueze neda', Benne' Gulje' Bénneache, bla'a, quegá chee' xelún bénneache zrin chia' neda'. Bla'a chee' guna' zrin chee' bénneache, ne chee' guzú'a' xel-la nabán chia' chee' guselá' benne' zan.

*Dxexún Jesús tu benne' la chul-la le' Bartimeo*

(Mt. 20.29-34; Lc. 18.35-43)

<sup>46</sup> Nadxa belezrine' xezre Jericó. Gate na' bedxúaj Jesús xezre nigá nen benne' ca' dxusédené', ne nen benne' zante, na' zua tu benne' la chul-la le' Bartimeo, zri'ine Timeo, dxé'e dxu'a' neza dxenabe' guna'. <sup>47</sup> Na' ca bénne' dxedé Jesús, benne' Nazaret, ga na', na' benne' la chul-la nigá guzú lawe' dxenné' zizraj:

—¡Jesús, Zri'ine David, bexache lazre' neda'!

<sup>48</sup> Benne' zan ca' guledil-le' le' chee' sué' zrize, na' le' zízrajdxu gunné':

—¡Zri'ine David, bexache lazre' neda'!

49 Nadxa gugá Jesús, na' gunné':

—Le nne le'.

Na' gulenné' benne' la chul-la na', gulé'e le':

—Bdipa lazru'. Guxasa lawe' da dxenné' lue'.

50 Nadxa bzale' lazxe' naxrúa cuzre' chalá'ala, na' guxritie' chee zrine' lau Jesús. 51 Nadxa Jesús gunábene' le':

—¿Bizra dxaca lazru' guna' chiu'?

Na' gunná benne' la chul-la:

—Benne' Wesede, dxaca lazra' xexunu' xiaj lawa'.

52 Na' Jesús guzre' le':

—Waca xexíaju'. Bache bexacu' lawe' da guxéajle'u chia'.

La ble'ete' benne' la chul-la na', na' guxíajlene' Jesús la neza.

## 11

### *Dxu'u Jesús xezre Jerusalén*

(Mt. 21.1-11; Lc. 19.28-40; Jn. 12.12-19)

1 Gate belezrine' gáguze naga dxe' xezre Jerusalén, ne zaj xu'e la neza naga zaj dxe' xezre Betfagé, ne xezre Betania zran xi'a chee xaga olivo ca', na' Jesús gusel-le' chupa benne' ca' dxusédene', 2 na' guzre' le':

—Le chjaca lu xézredau' da dxe' tu chi na', na' gate zrinle na', cheajxrácale tu burro da'ba' xaga, bea na' netú benne' quebe ne cuié' le'ba'. Le sezre-ba', ne le che'-ba' nigá. 3 Che nu benne' nabe' le'e bizr chee na' dxesézrele-ba', xégale le': "Xránadxu dxechine'-ba'", na' la xesél-la'te' le'ba'.

4 Nadxa xjaque', ne xeajlexraque' burro na' da'ba' xaga dxu'a dxa xu'u cuita neza, na' gulesézre'-ba'.

5 Nadxa bal-la benne' zaj zre'e na' gulé'e le':

—¿Bizra' dxunle? ¿Bizr chee na' dxesézrele búrrua'?

6 Nadxa le' gulé'e benne' ca' ca ba gunnáqueze Jesús, na' belúe' le' lataj. 7 La belexeché'ete' búrrua' lau Jesús, na' buluzríe' zra lane' cúzruba', na' guzría Jesús le'ba'. 8 Benne' zante' gulechíluje' xicha chee', ne xladxe' la neza, na' benne' xula gulechugue' zina' da gulíxrué' la neza.

9 Na' benne' ca' zaj zrie' lawe', ne benne' ca' zjaque' bzebe, gulezú lawe' dxelenné' zizraj: —¡Gaca ba! ¡Lá'azxa naca benne' ze'e, nasel-la Xránadxu Dios Le'! 10 ¡Lá'azxa naca xel-la dxenná bea da za', xel-la dxenná bea chee xradxu David! ¡Gaca ba Dios!

11 Ca'an guca gate na' guxú'u Jesús xezre Jerusalén, na' guxú'e lu xudau'. Ca gudé gunné'e xúgute' da zaj nmita du cuité', na' bezé'e xexíaje' xezre Betania nen benne' chazrinnu ca' dxusédene', lawe' da ba zeaj dxezré'.

### *Jesús dxugu'e de' xaga higo*

(Mt. 21.18-19)

12 Gute xu zra xula gate na' gusá'aque' xezre Betania, gudún Jesús. 13 Na' blé'ene' zítu'la dxe' tu xaga higo zria na laga', na' xeajnné'e che zria da zixre lu xaga na', san quebe bi zria na. Lágaze zria na lawe' da quebe ne zrin zra cuía na da zixre. 14 Nadxa Jesús guzre' xaga higo na':

—Cabátadxa nu gagu da zixre chiu'.

Benne' ca' dxuséde Jesús belénqueze' na.

### *Jesús dxexún lbé'e lu xudau'*

(Mt. 21.12-17; Lc. 19.45-48; Jn. 2.13-22)

15 Ca gudé na' belexezrine' xezre Jerusalén. Ca guxú'u Jesús lu xudau', guzú lawe' dxulague' lu xudau' benne' zaj zre'e wete, ne benne' zaj zre'e wewa'u na'. Na' bdxixre' blaga chee benne' weché'e dumí chee benne' zitu', ne bdxixre' naga dxelebe' benne' wete bgúgudu ca'. 16 Quebe be'e lataj nu benne' xudé'e xua ca' lu xudau'. 17 Nadxa bsédene' bènneache ca', dxenné':

—Lu xiche lá'azxa dxenná Dios: "Lizra' gaca na tu xu'u naga xuluchálajle Dios benne' zá'aque' xúgute' xezre." Le'e ba nunle lizra' ca tu lizre benne' gubán ca'.

18 Na' benne' xíchaje ca' chee bxruze ca', ne benne' dxuluxuzájle'e ca da nadxixruj bea Dios belenne', na' gulezú lawe' dxelexíluje' ájala gaca xelútete' Jesús lawe' da dxelezrebe' Le'. Ca'an guca lawe' da dxelexebane xúgute' bènneache ca naca da dxuséde Jesús le'. 19 Ca gula chizrela, Jesús bezé'e lu xezre.

### *Dxebizre xaga higo*

(Mt. 21.20-22)

<sup>20</sup> Ca gula zra xula che zílala, na' Jesús, ne benne' ca' dxusédene' belexedéé' na', na' beledé'ene' xaga higo na', ba nabizre na duté lue na. <sup>21</sup> Nadxa xeajásá lazre Pedro, na' guzre' Jesús:

—Benne' wesede, gunná'xque xaga higo nigá da gulú'u na de'. Bache gubizre na.

<sup>22</sup> Jesús gunné':

—Le cheajlí lazre Dios. <sup>23</sup> Da li dxapa' le'e, che nútetezele nnale, xe le xi'a nigá: “Cuasa lue' nigá, xeajchú'u lu nísadau”, ne che quebe dxun chupa lázrele, na' chéajlele waca da ba gunnale, na' gácaqueze na. <sup>24</sup> Cheé le na' dxapa' le'e, xúgute da nába le Dios gate dxuchálajlele Le', che chéajlele ba guzile na, ca'an gácaqueze. <sup>25</sup> Gate na' dxuchálajlele Dios, che dxezrá'ale nu benne', le gunité lau cheé bénnea' cheé cá'anqueze Xrale zue' xabáa gunité lawé' dul-la da nabágale. <sup>26</sup> Che quebe gunité laule cheé bénnea', Xrale zue' xabáa quebe gunité lawé' dul-la da nabágale.

*Ca naca xel-la dxenná bea da napa Jesús*

(Mt. 21.23-27; Lc. 20.1-8)

<sup>27</sup> Nadxa belexezrine' xezre Jerusalén, na' ca dxedá Jesús le'aj xudau', na' gulebiga lau Le' benne' xíchaje ca' cheé bxruze ca', ne benne' dxuluxuzájle'e da nadxixruj bea Dios, ne benne' gula ca'. <sup>28</sup> Na' benne' caní gulenábene' Jesús:

—¿Bizra xel-la dxenná bea napu' dxunu' da caní? ¿Nuzra benna lue' xel-la dxenná bea nigá?

<sup>29</sup> Na' bechébe Jesús:

—Cá'anqueze neda' de' tu da nábeda' le'e. Che xechébele chia', nadxa xapa' le'e ca naca xel-la dxenná bea da napa' dxuna' da caní. <sup>30</sup> ¿Nuzra gusel-la Juan bchué' bénneache nisa? ¿Dios che bénneache? Le xechébe na'a.

<sup>31</sup> Nadxa gulezú lau benne' ca' dxuluchálaje' leze', dxelé ljwezre':

—Che xedxu Le', Dios gusel-le' le', na' nnáqueze': “¿Bizr cheé na' quebe guxéajlele cheé'?”

<sup>32</sup> Che nnadxu bénneache gulesel-le' le', dxal-la' zrédexu da xelún benne' xezre ca'.

Caní gulenné' lawe' da xúgute benne' xezre nigá dxeléajle'e guca Juan benne' bchálaje' waláz cheé Dios. <sup>33</sup> Ca'an guca, gulenná benne' ca', dxelé'e Jesús:

—Quebe nézentu'.

Nadxa gunná Jesús, dxé'e le':

—Cá'anqueze neda' quebe nnia' ca naca xel-la dxenná bea da napa' dxuna' da caní.

## 12

*Da dxulé'e na ca naca cheé benne' wen zrin quebe zaj naque' xrlátaje*

(Mt. 21.33-46; Lc. 20.9-19)

<sup>1</sup> Nadxa guzú lau Jesús dxuchálajlene' benne' ca' tu da dxulé'e na. Dxe'e le':

—Zua tu benne' bde'e lba uva ca' lu xezr la xu chee', na' bene' le'aj chee' na. Bene' tu xiaj lutju naga guchuchuje' uva ca', ne bene' tu bdupa' naga cue' benne' guxúe' da caní.

'Nadxa bde'e xezr la xu chee' na' lu na' benne' wen zrin ca' chee xelune' la'a lina chee' na, na' guzú'e zéaje' xezre zitu'. <sup>2</sup> Ca gula zra chee' lina, na' gusel-le' tu bi wen zrin chee' cheajxezri'ibe' lu na' benne' wen zrin ca' ca naca lina da dxal-la' xezí' benne' xranbe'.

<sup>3</sup> Na' benne' wen zrin ca' gulel-le'-be', ne buluzalje'-be', na' belexesel-le'-be' dáchezebe'.

<sup>4</sup> Nadxa xránabe' gusel-le' bi wen zrin xula, na' bi nigá belú'e-be' xiaj, ne gulelé'e xíchajbe', ne bulucháchalene'-be'. <sup>5</sup> Na' xránabe' na' gusel-le' xetube', na' bi nigá belútete' benne' ca' lebe'. Ca gudé na' xránabe' gusel-le' bi zandxa bi xula, na' cá'anqueze belú'e bál-labe', ne belútete' xebál-labe'.

<sup>6</sup> Xránabe' zua tu zrí'ine' bi biu, bi nazrí'ile'ene', na' naga bzébeté gusel-le' zrí'ine' nigá, dxenné' lu xíchaj lázrdawe': Dxal-la' xelape' ba lá'ana zrí'ina'. <sup>7</sup> Benne' wen zrin ca' gulenné', dxelé ljwezre': “Bi nigá gueque cheebe' xezr la xu nigá. Gútetedxu-be' na'a, na' dxi'u xegá'analedxu da nigá.” <sup>8</sup> Ca'an guca, gulel-le'-be', ne belútete'-be', na' gulebéaje' bel-la' dxen cheebe' lu xezr la xu na'.

<sup>9</sup> Nadxa Jesús gunábene' benne' xudau' ca':

—¿Ájazra gun xrane xezr la xu nigá? Walé'e, na' gúteté' benne' wen zrin ca', na' gudé'e xezr la xu chee' lu na' benne' xula ca'. <sup>10</sup> Ba blábale da naxúaj na lu xiche chee' Dios. Dxenná na:

Xiaj na' da quebe buluchine benne' wen xu'u,

xiaj na' naca na'a xiaj blau chee' xu'u.

<sup>11</sup> Da nigá ben Xránadxu, na' dxexebánedxu chee' na.

<sup>12</sup> Nadxa gulaca lazre' xelél-le' Jesús lawe' da zaj nézene' bchálaje' da dxulé'e nigá chee' gulé'ene' ca zaj naca le'. Quebe bi gulune' lawe' da gulezrebe' bi xelún benne' xezre ca'. Chee le na' bulusané' Jesús, besí'aque'.



*Da bchalaj Jesús chee da dxuchizruj xu'u lawe'*  
(Mt. 22.15-22; Lc. 20.20-26)

<sup>13</sup> Ca gudé na' gulesel-le' lau Jesús bal-la benne' xudau' fariseo, ne benne' zaj de'e Herodes chee gulebéaje' Le' dizra' chee xelexéquene' xelawe' Le' zria. <sup>14</sup> Benne' caní belelé'e' lau Jesús, na' gulé'e' Le':

—Benne' weséde, ba nézentu' ca dxennáu' da li, ne quebe dxezi'u ca da dxelennaze bènneache, lawe' da quebe dxenná'u Lue' ca zaj naca cüzreze bènneache. Da li naca ca dxusédenu' bènneache da naca chee Dios. ¿Dxunna da nadxixruj bea Dios lataj quízrujdxu da dxuchizruj benne' dxenná bea Roma dxi'u, che cabí? ¿Dxal-la' quízrujdxu, che quebe quízrujdxu?

<sup>15</sup> Jesús dxéquebe'ene' quegá du lazre' dxelenábene' Le' da nigá, na' guzre' le':

—¿Bizr chee na' dxebéajle neda' dizra'? Le dajguá nigá tu dumí da dxixrujle chee le'eda' na.

<sup>16</sup> Na' bedajlegüé'e' na, na' ca ble'e Jesús le na, na' gunábene' le':

—¿Nu lau da' dumí nigá, ne nu la naxúaj na nigá?

Na' gulé'e' Le':

—Chee benne' dxenná bea Roma.

<sup>17</sup> Nadxa Jesús guzre' benne' ca':

—Le gunezruj chee benne' dxenná bea Roma da naca chee', na' le gunezruj chee Dios da naca chee Dios.

Na' belexebánene' ca naca da bchalaj Jesús.

*Da bchalaj Jesús ca xelexebán benne' gate*  
(Mt. 22.23-33; Lc. 20.27-40)

<sup>18</sup> Nadxa belezín lau Jesús bal-la benne' xudau' saduceo. Benne' caní dxelenné' quebe xelexebán benne' gate. Ca'an guca, gulenábene' Jesús caní:

<sup>19</sup> —Benne' weséde, Moisés bzuaaje' cheedxu da nadxixruj bea nigá: “Che tu benne' biu gatié', ne xegá'ana zru'ule', na' quebe nu zua bi chee bènnea', na' benne' biche' dxal-la' xeque'e' nu'ula na' gute benne' chee' chee sua zri'ine bènnea' gutié'.” <sup>20</sup> Gulezrá' gazre benne' biche'. Benne' nedxu bchaga na'abe', na' gütebe' quebe nu zri'inebe' zua. <sup>21</sup> Na' benne' gudxupe' bequ'é'e' nu'ula na', na' cá'anqueze gutié' quebe nu zri'ine' zúaqueze. Cá'anqueze guca chee benne' guxunne'. <sup>22</sup> Ca'an guca, benne' gazre caní gulezúalene' nu'ula na', na' netue' quebe nu zri'ine' guzúa. Naga xejsete' na güte'e' nu'ula'. <sup>23</sup> Na'a xca', gate na' xelexebán benne' gate, ¿nula benne' biu caní gaque' benne' chee nu'ula na', lawe' da gulezúale benne' gazre ca' le'?

<sup>24</sup> Nadxa Jesús guzre' benne' ca':

—Nanítele le'e lawe' da quebe núnbeale da naxúaj na lu xiche chee Dios, ne quebe nézele ca naca xel-la waca chee Dios. <sup>25</sup> Bzra' na' xelexebán benne' gate, québedxa xuluchaga ne'e, ne québedxa xuluchaga na' bi nu'ula ca'. Xelaque' ca zaj naca gubáz chee xabáa. <sup>26</sup> Na'a, ca naca chee benne' gate che xelexebane', ¿quebe ne gulábale ca da naxúaj na lu xiche chee Moisés ca gunná Dios gate na' bchálajene' Moisés tu lu xágadau' da dxala xi'? Gunná Dios caní: “Neda' naca' Dios chee Abraham, ne chee Isaac, ne chee Jacob.” <sup>27</sup> Dios naque' Dios, quegá chee benne' gate ca'. Naque' Dios chee benne' ban ca'. Ca'an naca, álega nanítele le'e.

*Da nadxixruj bea Dios da naca blau*  
(Mt. 22.34-40)

<sup>28</sup> Na' zéqueze tu benne' dxuxuzájle'e' da nadxixruj bea Dios, na' benne' da dxuchalaj Jesús, ne nézene' bzri'e dizra' chawe', na' gunábene' Le':

—¿Bizra da nadxixruj be'e Dios naca na da blaudxa?

<sup>29</sup> Na' Jesús guzre' le':

—Da bdxixruj be'e da naca na da blaudxa ca xúgute' dxenná na caní: Le xene benne' Israel. Xránadxu Dios tuze naque'. <sup>30</sup> Bzri'i Xranu' Dios du lazru', ne nen duté bènne' du xu'u, ne nen duté xichaj lázrda'u, ne nen duté xel-la wal-la da napu'. Da nigá naca da nadxixruj bea da blaudxa, <sup>31</sup> na' da nadxixruj bea gudxupe' nácaqueze na ca le na, da dxenná na caní: Bzri'i benne' xula ca nazri'i cuinu'. Quebe zua xetú da nadxixruj bea da naca blaudxa ca da chupa caní.

<sup>32</sup> Nadxa gunná bènnea' dxuxuzájle'e' da nadxixruj bea Dios, dxe'e Jesús:

—Ca'an xanne naca ca bechəbu', Benne' dxusede. Da li naca ca dxennáu'. Zua tuze Dios, ne quebe nu zua xetú ca Le', <sup>33</sup> na' che zri'idxu Dios du lázredxu, ne nen duté xichaj lázrdaudxu, ne nen duté bènne' du xú'udxu, ne nen duté xel-la wal-la da nápadxu, ne che zri'idxu benne' xula ca nazri'i cuínadxu, da caní zaj zácadxa na ca xúgute' be xixre' ca' dxútedxu-ba' lau Dios, ne ca xúgute' da dxuzézxedxu lu cugu chee Dios.

<sup>34</sup> Nadxa Jesús, ca benne' bchálaje' chawe', na' guzre' le':

—Xeláteze ne de na chee nna bea Dios xichaj lázrda'u.

Na' québedxa nu bexazre nábenę' Le' dizra' ca'.

*¿Nu zrí'ine' naca Cristo?*

*(Mt. 22.41-46; Lc. 20.41-44)*

<sup>35</sup> Jesús dxusédene' benne' ca' lu xudau', na' gunné':

—¿Bizr cheę na' dxeleenná benne' dxuluxuzájle'ę da nadxixruj bea Dios naca Cristo zri'ine David? <sup>36</sup> David ná'queze ca bzéajni'i Be' Lá'azxa le', gunné':

Xránadxu Dios guzre' Xrana':

“Gudxé'e chalá'a xabęla chia',  
ca zrin zra ba nuzú'a' benne' dxeledábague' lue',  
cheę na be'enu' le'.”

<sup>37</sup> Che David ná'queze dxenné': “Xrana’”, ¿ájala cheę na' naque' zri'ine'?

Benne' zan ca' du lazre' buluzę' nague' cheę'.

*Jesús dxulé'ene' zaj nachixre benne' ca' dxuluxuzájle'ę da nadxixruj bea Dios*

*(Mt. 23.1-36; Lc. 11.37-54; 20.45-47)*

<sup>38</sup> Ca dxusęde Jesús benne' ca', na' gunné':

—Le gapa chí'i cuínale cheę benne' ca'an dxuluxuzájle'ę da nadxixruj bea Dios. Benne' caní dxeledánene' dxelácuę' zra lane' tunna, ne dxeledánene' xulugapa bėnneache le' diuzre nen dizra' ba lá'ana lau bėnneache ca'. <sup>39</sup> Benne' caní dxeledánene' dxelebe'ę lataj blau lu xu'u naga dxelezraga benne' dxelúe lá'ane' Dios, ne dxeledánene' dxelebe'ę lataj blau naga dxelawe' xrche'. <sup>40</sup> Benne' caní dxelegüę' lizre xrlataj nu'ula ca' ba gulate benne' cheę', na' cheę xululé'e cuine' ca benne' xrlátaje, dxelune' xel-la dxuluwizraj Dios tunna. Le' zaj nabágadęe' zria.

*Dumí da gulu'u nu'ula xache' ba gute benne' chię'*

*(Lc. 21.1-4)*

<sup>41</sup> Tu lasa gate nu' dxe' Jesús lu xudau' cuita naga dxelegü'ę dumí, na' dxenné'ę ca dxelún benne' ca' dxelegü'ę dumí, ne ca dxelún benne' gunní'a ca', dxelegü'ę dumí zren. <sup>42</sup> Ca'an guca, bzrin tu nu'ula xache' ba gute benne' chię', na' gulu'ę chupa dumí lásedau' da quebe zaj zátate can. <sup>43</sup> Nadxa gunné' Jesús benne' ca'an dxusédene', na' guzre' le':

—Da li dxapa' le'e, nu'ula xache' nigá bnézrujdxę' ca xúgutę benne' ca'an gulegü'ę dumí.

<sup>44</sup> Xúgutę benne' ca' gulegü'ę da québedxa dxelechínne'. Nu'ula xache' nigá gulu'ę ca naca da nape', da nunte gawe'.

## 13

*Dxuchalaj Jesús ca gaca gate xrinnaj xudau'*

*(Mt. 24.1-2; Lc. 21.5-6)*

<sup>1</sup> Gate bedxúaj Jesús lu xudau', na' tu benne' dxusédene' guzre' Le':

—Benne' Wesęde, gunná'xque ca zren naca xudau', ne xiaj xrtante caní.

<sup>2</sup> Bechebe Jesús:

—¿Dxelé'enu' na'a ca zren naca xudau' nigá? Québedxa xegá'ana tu xiaj cuzru ljwezre nigá. Ca naca xudau' nigá wabía xí'queze na.

*Da xelunna bea na gate cheajsę cheę xęzr la xu nigá*

*(Mt. 24.3-28; Lc. 21.7-24; 17.22-24)*

<sup>3</sup> Nadxa xjaque' lu xi'a cheę xaga olivo ca', da zua na chalá'a ca li dxa xu'u xudau'. Gate dxe' Jesús ga na', na' Pedro, ne Jacobo, ne Juan, ne Andrés gulę'ę Jesús leęe':

<sup>4</sup> —Dxaca lázrentu' gulé'enu' netu' bata gaca caní. ¿Bizra da ca' xelunna bea na gaca xúgutę da caní?

<sup>5</sup> Na' bechebe Jesús:

—Le gapa chí'i cuínale cheę quebe nu si xę le'e, <sup>6</sup> lawe' da xeledá' benne' zante xelún lu'a neda', welenne' zaj naque' Cristo, na' welezí xę'ę benne' zante.

<sup>7</sup> Le'e, gate xėnele gaca wedil-la, ne ba dxaca wedil-la, quebe zrėbele. Cá'queze dxal-la' gaca na, san quegá ne zrin zra cheajsę cheę na, <sup>8</sup> lawe' da xeledil-lalę benne' tu xęzr la xu benne' xetú xęzr la xu, na' tu xęzre benne' tıl-lalę na xetú xęzre. Wazrú' zánete queze, ne wata' gubina', ne wadxé'e na zraga bėnneache. Da caní zaj naca na naga su lauze ca naca da xelezaca zi' bėnneache.

<sup>9</sup> Le guxúe cuínale lawe' da xuludé' le'e lu na' benne' xu'u lawe', na' xuluzalję' le'e lu xu'u naga dxulucá'ana szrene' Dios. Xuludé' le'e lau benne' xu'u lawe' ca', ne lau benne' dxeleenná be'ę lawe' da nácale chia' neda'. Gate ca'an gaca, na' guchálajle chia' neda' lau benne' ca'. <sup>10</sup> Nédxudxa ca zrin zra cheajsę cheę na, dizra' chawe' chia' gaca lban cheę na lau bėnneache zaj zre'ę xúgutę xęzr la xu. <sup>11</sup> Gate xelechę' le'e cheę xuludé' le'e lu na' benne' xu'u lawe' ca', quebe cue'le gunne xue bi nnale, ne quebe quilaj lázrele ájala guchálajle.

Nnele ca da gunna Dios le'e zra na' lawe' da quegá le'eze nnele, san Be' Lá'axza, Le' nne'.<sup>12</sup> Ca xelún bēneache lu zra na', xuludé' bi biche' ca' lu na' benne' xelútié' lēbe'. Cá'anqueze xelún xruze xrna' ca', xuludé' zrí'inequeze'. Na' zrí'ing' ca' weledábagabe' xruze xrnabe', ne xelunbe' xelátié'.<sup>13</sup> Xúgute bēneache xelezré'e le'e lawe' da nácale chia' neda'. Bēnea' zē tipe' ca' zrxinda zra cheajse' chee na, la bēnea'.

<sup>14</sup> Daniel, bēnea' bchálajé' waláz chee Dios bzuaie' ca naca chee da sban da guzríá xi na. Gate lé'ele le'e zria da nigá lataj lá'axza naga quebe dxal-la' cuía na, nadxa benne' zaj zre'e xezre ca' zaj nababa xezr la xu Judea dxal-la' xuluzrúnnuje', ne chjaque' lu xi'a zren. (Benne' dxulabé' da nigá dxal-la' cheajni'ing' da naca chee na.)<sup>15</sup> Nu benne' zria chju' u lize' lu zra na' quebe dxal-la' xexétajé' chee bi xebéajé' lu xu'u. <sup>16</sup> Benne' zē le'e xixre' quebe dxal-la' xezrine' lize' chee xequé'e zra lané'. Dخال-la' xuluzrúnnuje' benne' caní. <sup>17</sup> Baxache' xelaca nu'ula zaj zue' zi'i, ne nu'ula ca' zaj nuxre' bidu dxe'ene lu zra na'. <sup>18</sup> Le naba lau Dios chee quebe gaca beu' zaga gate na' dxal-la' guzrúnnuje',<sup>19</sup> lawe' da xelazaca zidxa bēneache lu zra ca'an ca da quebe ne xelezácate', gulala ben Xránadxu Dios xezr la xu nigá, ne québedxa xelezácadxé' ca'.<sup>20</sup> Che Xránadxu Dios quebe guzáchié' zra ca', québedxa nu láqueze', san ba bzachie' zra ca'an lawe' da nazrí'ing' bi chee' ca', bi ca' ba gucá'a Le'.

<sup>21</sup> 'Lu zra na', che nu benne' dxé'e le'e: "Le na' xque, nigá zua Cristo", u che nne': "Le na' xque, na' zē", quebe chéajle chee'.<sup>22</sup> Welelá' benne' xelezi xé'e, benne' xeluné' lu'a Cristo, ne xeluné' lu'a xel-la waca chee xabáa chee xelezi xé'e bi ca' ba gucá'a Dios che xelezéquene'.<sup>23</sup> Le sua le'e ban lazre'. Neda' ba gucha' le'e xúgute nédxute ca gaca na.

*Ca gaca gate xida Benne' Gulje' Bēneache*

*(Mt. 24.29-35, 42-44; Lc. 21.25-36)*

<sup>24</sup> Nadxa gunná Jesús:

—Lu zra ca', gate te zra chee xel-la zi' caní, na' chul-la gubizra, ne québedxa gusení' beu'.<sup>25</sup> Belaj ca' xelexruj na zran xabáa, na' ca da zaj nalá' zaj zē tipe' zran xabáa welezrízete' na.<sup>26</sup> Ca nadxa xelelé'ene' neda', Benne' Gulje' Bēneache, za'a lu beuj bza, napa' xel-la waca zren, ne da xabáa chia'.<sup>27</sup> Na' la sél-latea' gubáz chee xabáa chia' ca' chee xuluchague' benne' ca' gunniá', benne' zaj zre'e dapa saca chee xezr la xu nigá, benne' zitu' zá'aca nila, zá'aca na'la.

<sup>28</sup> Le gusede ca naca da dxulé'e na ca naca chee xaga higo. Gate na' dxelexedxé'ene zruze na, ne zá'aca xrlage na, na' ba nézele za beu' la. <sup>29</sup> Cá'anqueze, gate na' lé'ele ba dxelaca da caní, nézele ba zua gáguze zra cheajsé na, ne gácate' na. <sup>30</sup> Da li dxapa' le'e, xúgute da caní gaca na nédxudxa ca xelate bēneache zaj zre'e lu zra na'. <sup>31</sup> Xabáa ne xezr la xu nigá wadé chee na. Xrtizra' nigá quebe te na ca'anze, san waca li na.

<sup>32</sup> 'Ca naca chee zra na', ne chee beu' na' quegá nu neze bata gaca na. Quebe zaj neze gubáz chee xabáa, ne Zrí'inequeze Dios quebe nézene'. Tuze Xradxu Dios nézene'.

<sup>33</sup> 'Chee le' na', le sua le'e ban lazre'. Le guxúe, ne le guchálajle Dios lawe' da quebe nézele bátala zrin zra na'.<sup>34</sup> Gaca na ca guca chee tu benne' biu, benne' guzé'e zéajé' zitu'. Gate na' za dxúajé' xu'u, na' dxudé' da nape' lu na' bi wen zrin chee' ca', ne dxunézruje' tu tube' zrin da xelunbe', ne dxusebague' benne' zé' dxa xu'u guxúe xánnie'.<sup>35</sup> Chee le' na', le sua le'e ban lazre' lawe' da quebe nézele le'e bátala xelá' xrane xu'u, che dxe xrinneze, che dxála, che ca cuezre xjeaj, che che zílala,<sup>36</sup> ga gaze xelé'e chadí duté, na' cheajxraque' le'e dxásele. <sup>37</sup> Ca da dxennia', dxapa' le'e, dxapa' xúgute benne': ¡Le sua ban lazre'!

## 14

*Dxelexegá'ane' dizra' chee xelē-le' Jesús*

*(Mt. 26.1-5; Lc. 22.1-2; Jn. 11.45-53)*

<sup>1</sup> Xechupa zra za zrin chee xeluné' laní chee xulusá lazre' ca naca da ben Dios gate na' bebéajé' benne' Israel ca' lu xezr la xu Egipto, laní na' dxelawe' xeta xtila da quebe nachixre cua zichaj chee na. Na' benne' xíchajé ca' chee bxruze ca', ne benne' dxuluxuzájle' da nadxixruj bea Dios belilaj lazre' ájala xeluné' chee xelē-le' Jesús bagácheze chee xelútié' Le'.<sup>2</sup> Na' gulenné':

—Quegá gundxu na lu laní, chee quebe dxe'ena zraga bēneache.

*Tu nu'ula dxegüé'e da za xichaj Jesús*

*(Mt. 26.6-13; Jn. 12.1-8)*

<sup>3</sup> Zua Jesús lu xezre Betania, lu lize tu benne' le' Simón, benne' guzrí'e wé' guzru'. Dxácate' zaj dxe'e dxelawe' na, na' bzrin tu nu'ula nu'e tu da dau' da naca na xiaj xrtan da nazí le na alabastro, ne nazrate' na da za da dxelá zixre chee xiaj nardo, da zácalé' na. Na' gulé'e da dau' na', ne blálajé' da za na' xichaj Jesús. <sup>4</sup> Bal-la benne' ca', benne' zaj zre'e na', belezré'e, na' gulenné', dxelé' ljwezre':

—¿Bizr chee na' ben ditaj nu'ula nigá da za na'? <sup>5</sup> Waca ta'u da na' chee sídxadxu ca lázrujdxu chee tu iza, chee gácaledxu benne' xache' ca'. Na' guledil-le' nu'ula'.

<sup>6</sup> Na' Jesús guzre' le':

—Quebe xe le nu'ula nigá ca'. ¿Bizr chee na' dxunle le' zede? Ca naca da ben nu'ula nigá chia' neda' naca na da cháwele'e. <sup>7</sup> Benne' xache' ca' tu zrázqueze' ládujla le'e. Waca gunle benne' ca' chawe' gate dxaca lázrele, san neda' quegá tu súaleza' le'e. <sup>8</sup> Nu'ula nigá bene' ca da guzéqueng', gulu'e da za bel-la' dxen chia' nédxula chee zra gate gachia' lu xedxu ba. <sup>9</sup> Da li dxapa' le'e, gáteteze na' gaca lban chee dizra' chawe' chia' lu xúgutę xęzre zaj nni ta xęzr la xu nigá, cá'anqueze zrálajqueze ca naca da ben nu'ula nigá, chee xulusá lazre' chee'.

*Judas dxexegá'ane' dizra' gudęe' Jesús lu na' benne' ca' dxeledábague' Le'*

(Mt. 26.14-16; Lc. 22.3-6)

<sup>10</sup> Nadxa Judas Iscariote, tu benne' chazrinnu ca' dxusede Jesús, guxíaje' xeajchálajlene' benne' xíchaje ca' chee bxruze ca' chee xelexegá'ane' dizra' ájala gunęe' gudęe' Jesús lu na' benne' ca'. <sup>11</sup> Ca belén benne' ca' ca gunná Judas, gulebéle'ene', na' gulechebe lazre' xulunęzruje' le' dumí. Nadxa Judas guzú lawęe' dxexilaje' ájala gudęe' Jesús lu na' benne' ca'.

*Da dxágudxu chee gusá lázredxu ca gute Jesús*

(Mt. 26.17-29; Lc. 22.7-23; Jn. 13.21-30; 1 Co. 11.23-26)

<sup>12</sup> Zra nedxu chee laní gate dxelawe' xeta xtila da quebe nachixre cua zichaj chee na, ne dxelutięe' zrila'dau' chee Laní Pascua, gate na' dxulusá lazre' ca guca gate bebéaj Dios benne' Israel ca' lu xęzr la xu Egipto, na' benne' ca' dxusede Jesús buluchebe' Le':

—¿Gazra dxaca lazru' chęajntu' cheajcuęzentu' da gágudxu Laní Pascua?

<sup>13</sup> Nadxa Jesús gusel-le' chupa benne' ca' dxusedene'. Dxe'e le':

—Le chjaca lu xęzre Jerusalén, na' cheajxrácate tu benne' biu ze nu'e tu dxe'e nisa. Le chjácate, <sup>14</sup> na' naga xexu'e, xe le benne' xrane xu'u na': "Benne' Wesęde cheedxu dxenné': ¿Gazra zua xu'u naga guna' Laní Pascua, chee gawa' tu zren nen benne' ca' dxusededa?" <sup>15</sup> Nadxa gulé'ene' le'e tu xu'u zren da naca na gudxupe' cuía sibe da bache nabeza na. Na' gucuęzale da gágudxu.

<sup>16</sup> Nadxa benne' ca' dxusedene' belexedxúaje' gusá'aque', na' belezrine' xęzre Jerusalén. Na' guca xúgutę ca da ba guzre Jesús le', na' bulucueze' da xelawe' lu Laní Pascua.

<sup>17</sup> Ca gula chizrela, na' bzrin Jesús nen benne' chazrinnu ca' dxusedene'. <sup>18</sup> Na' ca zaj dxe'e dxelawe', na' gunná Jesús, dxe'e le':

—Da li dxapa' le'e, tu benne' ládujla le'e, benne' dxawe' tu zren nen neda', gudęe' neda' lu na' benne' ca' dxeledábague' neda'.

<sup>19</sup> Nadxa benne' ca' gulezúa xácheze', ne gulezú lawęe' dxuluchebe' Jesús tu tue':

—¿Neda' xca'?

Na' xetúęe' cá'anqueze guzre' Le':

—¿Neda' xca'?

<sup>20</sup> Nadxa bechebe Jesús, dxe'e le':

—Tu benne' ládujla le'e chazrinnule, benne' dxawe' tu zren nen neda' lu xé'ena nigá. <sup>21</sup> Da li gatia' neda', Benne' Gulje' Bénneache, ca da naxúaj na chia' lu xiche chee Dios. Baxache' naca chee benne' na' gudęe' neda' lu na' benne' ca' dxeledábague' neda'. Cháwedxa gaca chee bënnea' la ca gúlaje'.

<sup>22</sup> Dxácate zaj zre'e dxelawe', na' gucá'a Jesús xeta xtila, ne guzre' Dios: "Xcalenu." Ca gudęe' bzúruje' na, na' bnęzruje' na chee benne' ca', ne guzre' le':

—Le gagu na. Da nigá dxulé'e na ca gaca chee bel-la' dxen chia'.

<sup>23</sup> Nadxa guquęe' tu da dxé'ajdxu, ne ca gudęe' guzre' Dios: "Xcalenu", na' bnęzruje' na benne' ca', na' xúgutęe' gulé'aje' late' weaj da na'. <sup>24</sup> Nadxa Jesús guzre' le':

—Da nigá zéaje na dxen chia' da dxucá'ana chawe na xel-la wezría cube. Dxen chia' nigá lalaj na nę chee benne' zan. <sup>25</sup> Da li dxapa' le'e, québedxa xí'aja' xrise uva caní ca zrindxa zra gate na' xí'aja' da cube naga dxenná bea Dios xabáa.

*Dxulé'e Jesús nna Pedro quebe núnbe'e Jesús*

(Mt. 26.30-35; Lc. 22.31-34; Jn. 13.36-38)

<sup>26</sup> Ca gudęe' belul-le' da gaca ba Dios, na' belegüene' lu Xi'a Xaga Olivo Ca'. <sup>27</sup> Nadxa gunná Jesús, dxe'e le':

—Xúgutęle le'e gusan lázrele neda' na' xęla lawęe' da naxúaj na lu xiche chee Dios, dxenné': "Gutia' benne' dxuxúęe' zrila' ca', na' zrila' ca' welase dínnajba." <sup>28</sup> Gate te xebana' lu xedxu ba, wexá'a neda' nédxula ca le'e naga nababa Galilea.

<sup>29</sup> Nadxa Pedro guzre' Jesús:

—Láqueze xúgutęe' benne' caní xulusán lazre' Lue', neda' québequeze guna' ca'.

<sup>30</sup> Jesús guzre' le':

—Da li dxapa' lue', lu xela nigaze, nédxula ca za cuezre xjeaj chupa lasa, nnau' chunna lasa quebe núnbe'u neda'.

<sup>31</sup> Na' dxennáqueze Pedro na', gunné':

—Láqueze gatia' tu zren nen Lue', québequeze nnia' quebe núnbe'a Lue'.

Cá'anqueze gulenná xúgute'.

*Jesús dxuchálajlene' Dios tu lataj nazí le na Getsemaní*

(Mt. 26.36-46; Lc. 22.39-46)

<sup>32</sup> Nadxa belezrine' tu lataj naga nazí le na Getsemaní, na' gunná Jesús, dxé'e benne' ca' dxusédene':

—Le cueza nigá dxácaté cha'a cheajchálajlena' Dios.

<sup>33</sup> Nadxa Jesús guché'e Pedro, ne Jacobo, ne Juan, na' guzú' lau dxezúa xáche'le'e. <sup>34</sup> Na' dxé'e benne' ca', dxenné':

—Ba dxunte na watia' lawe' da zua xáche'le'a. Le xegá'ana le'e nigá, ne le sua ban lazre'.

<sup>35</sup> Nadxa Jesús guzé'e zéaje' xelate' ca na'la, na' guzúe' sudxú'ala, gunabé' Dios che gaca, quebe té'e' xel-la zi' ca da dxal-la' saque' lu zra na'. <sup>36</sup> Ca dxuchálajlene' Dios na', gunné':

—Xrae, xúgute' wazéquenu' Lue'. Bselá neda' chee quebe saca zi'a lu da caní. Quebe gaca ca dxaca lázreza' neda', san ca dxaca lazru' Lue' gaca na.

<sup>37</sup> Nadxa bezrine' naga zaj zra' benne' ca'an dxusédene', ne xeajxraque' le' dxelásie'. Na' Jesús guzre' Pedro:

—Simón, ¿dxásequezu' nigá? ¿Quebe guzéquenu' gusebán lazru' tu chí'idau'ze? <sup>38</sup> Le sua ban lazre', ne le guchálajle Dios chee quebe gun zréaje da xriwe' le'e. Da li, lu xichaj lázrdaule dxaca lázrele gunle da xrlátaje, san lu belá' dxen chee dxate ni'a na'le.

<sup>39</sup> Nadxa Jesús guxíaje' da xula zeajchálajlene' Dios, na' tuze ca dxenné'. <sup>40</sup> Nadxa ca bezrine', xecha lasa xeajxraque' benne' ca'an dxusédene', dxelásie' lawe' da xu'u bchigala xiaj lawé'. Benne' caní quebe belexezrela lazre' bi xelé'e Le'. <sup>41</sup> Na' ca bezrín Jesús da guxunne' lasa, na' guzre' benne' ca':

—¡Le gase na'a, ne le xezí' lázre'! ¡Bache na! ¡Ba bzin zra tea' neda', Benne' Gulje' Bénneache, lu na' benne' dul-la ca'! <sup>42</sup> ¡Le chasa! ¡Le chu'u na'a! ¡Ba za benne' gudé'e neda' lu na' benne' ca' dxeledábague' neda'!

*Dxelel-le' Jesús*

(Mt. 26.47-56; Lc. 22.47-53; Jn. 18.2-11)

<sup>43</sup> Dxácaté dxuchalaj Jesús caní, na' bzin Judas, tu benne' nabábalene' benne' chazrinnu ca' dxusede Jesús, na' zjácale benne' zan le', zaj nu'e xia nalá, ne xaga ca'. Zaj naque' benne' gulesel-la benne' xíchaje' ca' chee bxruze ca', ne benne' ca' dxuluxuzájle'e da nadxixruj bea Dios, ne benne' gula sina ca'. <sup>44</sup> Judas, benne' dxudé'e Jesús lu na' benne' ca' dxeledábague' Le', ba blé'ene' benne' ca' tu da gune' da gaca bea na nule' naca Jesús, gunné':

—Bénnea' gunupa', benne' na' quél-lale. Le xeché'e, ne le guxúe xanne' chee quebe xelé'.

<sup>45</sup> Na' ca bzrine' na', gubigüe' lau Jesús, ne dxé'e Le':

—Benne' Wesede.

Na' bnupe' Le'. <sup>46</sup> Nadxa benne' ca' gulel-le' Jesús, ne belexeché'e Le' ba nadxéaje'.

<sup>47</sup> Tu benne' dxune' Jesús tu zren guléaje' xia nalá chee', na' guchugue' naga tu bi wen zrin chee bxruze blau. <sup>48</sup> Nadxa Jesús guzre' benne' ca':

—¿Bdxuajle le'e zale nen xia nalá, ne xaga ca' chee quél-lale neda', dxugúnele neda' ca tu benne' gubán? <sup>49</sup> Xúgute' zra guzúa' neda' ládujla le'e dxusededa' le'e lu xudau', na' cabata' gudél-lale neda'. Da nigá dxaca na chee gaca li ca da naxúaj na lu xiche chee Dios.

<sup>50</sup> Nadxa xúgute' benne' ca' dxusede Jesús bulusán lazre' Le'. Buluzrúnnujé'.

*Dxuzrunnij tu bi cuide'*

<sup>51</sup> Tu bi cuide', bi zéajlebe' Jesús, ne nácube' tu ladxe' laga, gulel-la benne' ca' lebe'. <sup>52</sup> Na' bsanbe' ladxe' laga da nácube', na' bZRúnnujbe' gala xídezebe'.

*Dxezrín Jesús lau benne' ca' chee xu'u lawe' blau chee judío ca'*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Nadxa belexhé'e Jesús lau bxruze blau, na' belezraga xúgute' benne' xíchaje' ca' chee bxruze ca' ga na', ne benne' gula sina ca', ne benne' ca' dxuluxuzájle'e da nadxixruj bea Dios. <sup>54</sup> Pedro nawé' Jesús zítu'la, na' bzrine' chale'aj chee lizre bxruze blau, naga begá'ane' tu zren nen zruza ni'a na' benne' xu'u lawe' ca', dxuluxuché'e dxu'a xi'.

<sup>55</sup> Na' bxruze blau, ne xúgute' benne' chee xu'u lawe' blau chee judío ca' gulí-laje' tu da gagu na zria Jesús chee xelezéquene' xuluzria xi'e Le' chee gatié', na' quebe bi belezrélene'.

<sup>56</sup> Benne' zanté belún lazre' chee Jesús. Quebe bedxúaj dizra' chee' tuze ca dxelenné' tue' ne xetúe'. <sup>57</sup> Bal-le' belase', na' gulagu zria Jesús da wen lazre', dxelenné':

<sup>58</sup> —Netu' ba bémentu' chee', gunné': "Neda' guchínnaja' xudau' nigá da belún bénneache, na' ca gaca chunna zra xechisa' xetú xudau' da quebe xelún bénneache."

<sup>59</sup> Cá'anqueze quebe butil-le ca da dxelenné'.

<sup>60</sup> Nadxa bxruze blau guxase' ládujla xúgute benne' ca', na' bchebe' Jesús:

—¿Québequeze bi dizra' dxuxuzri'u Lue'? ¿Bizra da nigá dxelenné' chiu' Lue'?

<sup>61</sup> Jesús guzúe' zrize, ne gútuqueze bi dizra' buzri'e. Na' bxruze blau bchebe' Le' xecha lasa, dxenné':

—¿Nacu' Lue' Cristo, Zri'ine Dios Lá'azxa?

<sup>62</sup> Na' gunná Jesús, dxé'e le':

—Awe', ca' naca'. Walé'ele neda', Benne' Gulje' Bénneache, dxé'a chalá'a xabeła chee Dios, nape' duté xel-la waca. Walé'ele neda' zezá'a lu beuj bza.

<sup>63</sup> Nadxa bxruze blau gucheze' zra lané', na' gunné':

—¿Núzradxa nachínedxu benne' xelagu zria Le'? <sup>64</sup> Le'e bache bénquezle ca dxenné' schanni' chee Dios. ¿Bi dxennale le'e xca'?

Xúgute benne' ca' gulenné':

—Nabía xi'e dxal-la gatie'.

<sup>65</sup> Nadxa bal-la benne' ca' gulezú lawé' dxuluzr'é'e Le' zrené', na' bulucache' lau Jesús, ne buluzálaje' Le'. Dxelenné':

—Gunné xa'a nuzra dxue Lue'.

Na' benne' zruza ni'a na' benne' xu'u lawe' belú'e lau Jesús.

*Dxenná Pedro quebe núnbe'e Jesús*

(Mt. 26.69-75; Lc. 22.56-62; Jn. 18.15-18, 25-27)

<sup>66</sup> Pedro guzúe' lu chale'aj zriła, na' bzrin tu nu'ula wen zrin chee bxruze blau, <sup>67</sup> na' ca ble'ebe' Pedro dxé'e dxu'a xi' dxuxuché'e, na' gunná'abe' le', ne gúzrebe' le':

—Lue' dxedálequezu' Jesús, benne' Nazaret na'.

<sup>68</sup> Na' bechebe Pedro, dxenné':

—Quebe núnbe'a bénnea', ne quebe nezda' nu chee na' dxuchálaju'.

Na' bedxúaj Pedro chale'aj naga dxelu'e. Nadxa gudxezre xjeaj. <sup>69</sup> Nadxa nu'ula wen zrin chee bxruze blau na' gunná'abe' Pedro xecha lasa, na' gunabe', dxé'ebe' benne' ca' zaj zré'e na':

—Benne' nigá naque' tuze benne' ca'an.

<sup>70</sup> Pedro xecha lasa bzue' Jesús chalá'ala. Xetú chí'idau' benne' ca' zaj zré'e na' gulé'e Pedro xecha lasa:

—Da líqueze lue' nacu' tuze benne' ca'an lawe' da nacu' benne' chee xezre ca' zaj nababa Galilea. Ca dxuchálaju' naca bea na da na'.

<sup>71</sup> Nadxa Pedro guzú lawé' dxuzría xi' cuine', ne ben chúchue' xrtizre', gunné':

—Quebe núnbe'a bénnea' dxennale le'e ca'.

<sup>72</sup> Ca'an guca, gudxezre xjeaj da gudxupe' lasa. Nadxa Pedro xeajsá lazre' ca da guzre Jesús le', gunné': "Nédxudxa ca za cuezre xjeaj chupa lasa, lue' nnau' chunna lasa quebe núnbe'u neda'." Na' ca xeajsá lazre' da nigá, gudxzérelé'e.

## 15

*Dxezrín Jesús lau Pilato*

(Mt. 27.1-2, 11-14; Lc. 23.1-5; Jn. 18.28-38)

<sup>1</sup> Ca guxani' che zila, na' benne' xíchaje' ca' chee bxruze ca' belexedupe' nen benne' gula sina ca', ne benne' ca' dxuluxuzájle'e da nadxixruj bea Dios, ne xúgute benne' chee xu'u lawe' blau chee judío ca'. Guleché'e Jesús nadxéaje', na' buludé'e Le' lu na' Pilato. <sup>2</sup> Pilato gunábene' Jesús:

—¿Nacu' Lue' wenná bea chee judío ca'?

Na' bechebe Jesús:

—Ca' naca na, ca ba gunnáu' lue'.

<sup>3</sup> Na' benne' xíchaje' ca' chee bxruze ca' gulawé' zria Jesús da zante. <sup>4</sup> Nadxa Pilato gunábene' Jesús xecha lasa:

—¿Quebe bi dizra' dxuzri'u? Gunná'xque ca da zánete da dxelawé' zria Lue'.

<sup>5</sup> Jesús quebe bi dizra' ca buzri'e. Ca' guca, bebánele'e Pilato.

*Dxelichaj be'e gate Jesús*

(Mt. 27.15-31; Lc. 23.13-25; Jn. 18.38—19.16)

<sup>6</sup> Pilato zua tu da dxúnqueze' tu iza tu iza gate dxaca Laní Pascua. Dxusané' tu benne' xu'e lizre xia, núteteze benne' xelenaba bénneache ca' le'. <sup>7</sup> Lu xu'u lizre xia na' xu'u tu benne' le' Barrabás, benne' nune' tu zren benne' ca' belutié' benne' ca', gate na' gudíl-laléne' benne'

Roma ca'. <sup>8</sup> Na' belezrín lau Pilato benne' xezre ca', ne gulezú lawe' dxelenabe' lau Pilato gune' ca dxúnqueze'. <sup>9</sup> Na' bechebe Pilato:

—¿Dxaca lázrele le'e gusana' bémnea' naque' wenná bea chee judío ca'?

<sup>10</sup> Caní gunná Pilato lawe' da dxeque be'ene' buludé'e benne' xíchajé ca' chee bxruze ca' Jesús lu ne'e lawe' da dxelaque' zre'e lazre' Le'. <sup>11</sup> Na' benne' xíchajé ca' chee bxruze ca' beleché'e benne' xezre ca', ne gulegú'u xel-le' le' chee xelexenabe' lau Pilato gusane' Barrabás. <sup>12</sup> Nadxa Pilato gunábene' benne' ca':

—¿Bi dxaca lázrele le'e guna' chee bémnea' naque' wenná bea chee judío ca'?

<sup>13</sup> Nadxa belexechebe', gulenné' zizraj:

—Bde'e xaga béguaj.

<sup>14</sup> Na' Pilato bchebe' benne' ca':

—¿Bizra da calela nun benne'?

Xecha lasa gulenné' zizraj:

—Bde'e xaga béguaj.

<sup>15</sup> Nadxa Pilato bsane' Barrabás lawe' da dxaca lazre' xegá'ane' chawe' nen benne' xezre ca'. Na' ca gudé na' bsebague' benne' ca' xeline' Jesús tu xide, na' bde'e Le' lu na' benne' ca' chee xuludé'e Le' xaga béguaj.

<sup>16</sup> Nadxa benne' dxjaque' wedil-la guleché'e Jesús lu chale'aj xu'u lawe', na' bulutupe' xúgute ljwezre' benne' dxjaque' wedil-la lataj na'. <sup>17</sup> Na' bulugácue' Jesús tu ladxe' bzawe, ne buluzríe' xíchajé' tu da zaj nune' nen zruze xaga xeche'. <sup>18</sup> Nadxa gulezú lawe' dxelenné' zizraj:

—¿Gaca ba wenná bea chee judío ca'!

<sup>19</sup> Na' belú'e xichaj Jesús nen tu xia xtila, ne buluzré'e Le' zrene'. Na' buluzú zribe' lawe', dxelape' Le' ba lá'ana. <sup>20</sup> Ca gudé bulucá'ana dítaje' Le' caní, na' belexegu'e ladxe' bzawe, na' buluxugácue' Le' zra lá'anaqueze'. Nadxa belexebéaje' Le' chee chjaque' naga xuludé'e Le' xaga béguaj.

#### *Dxuludé'e Jesús xaga béguaj*

(Mt. 27.32-44; Lc. 23.26-43; Jn. 19.17-27)

<sup>21</sup> Tu benne' chee xezre Cirene le' Simón, xra Alejandro, ne Rufo, zezé'e le'e xixre', na' ca bedé'e na', na' bulusebague' le' gu'e xaga béguaj chee Jesús.

<sup>22</sup> Guleché'e Jesús tu lataj nazí le na Gólgota, da zéaje na "Lataj Chee Zrita Xichaj Benne' Gate." <sup>23</sup> Nadxa bulunézruje' Jesús xrise uva wal-la da nachixre da sla' chee mirra. Jesús quebe gu'e na. <sup>24</sup> Nadxa buludé'e Le' xaga béguaj, na' benne' dxjaque' wedil-la gulebéaje' da gulé'e na nule' xelexale' zra lana Jesús, na' bila xelexúa tu tue'.

<sup>25</sup> Guca che zílala gate na' buludé'e Jesús xaga béguaj. <sup>26</sup> Buludé'e da naxúaj xichaj xaga béguaj chee Jesús da dxulé'e na da nabague', da naxúaj na caní: "Wenná Bea Chee Judío Ca'." <sup>27</sup> Cuita Jesús buludé'e le'e xaga béguaj ca' chupa benne' gubán, tue' chalá'a xabéla chee', ne xetúe' chalá'a xéglala chee'. <sup>28</sup> Ca'an guca, guca li ca da naxúaj na lu xiche chee Dios naga dxenné' caní: "Buluzue' Le' tu zren nen benne' wen da zrinna' ca'."

<sup>29</sup> Na' benne' dxeledé'e na' gulenné' schanni' chee Jesús, ne buluté' xíchajé', dxelenné':

—Awe'. Guchínnaju' Lue' xudau' cheentu', na' gate gaca chunna zra, na' xechisu' na. <sup>30</sup> Bselá cuinu' na'a, ne bexetaj le'e xaga béguaj na'.

<sup>31</sup> Cá'anqueze belún benne' xíchajé ca' chee bxruze ca', ne benne' dxuluxuzájle'e da nadxixruj bea Dios. Belún le' chee Jesús, dxelé' ljwezre':

—Benne' xula bselá benne, san Le' québequeze dxezéquene' guselá cuine'. <sup>32</sup> Lue', Cristo, wenná bea chee benne' Israel, bexetaj le'e xaga béguaj na' chee le'entu', na' chéajlentu' chiu'.

Cá'anqueze belún benne' ca' zaj de'e le'e xaga béguaj ca' tu zren nen Jesús, gulenné' schanni' chee'.

#### *Dxate Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Ca bzrin wagubizra, na' guchul-la duté lu xezr la xu nigá tu chí'i wal-la gula. <sup>34</sup> Ca gudé na', na' gunná Jesús zizraj:

—Eloi, Eloi, ¿lama sabactani'?

Da nigá zéaje na: "Dios chia', Dios chia', ¿bizr chee na' nusanu' neda'?"

<sup>35</sup> Bal-la benne' ca' zaj zre'e na' belenne' na, na' gulenné':

—Le xene. Dxenné' Elías, bémnea' bhálaje' waláz chee Dios.

<sup>36</sup> Nadxa tu benne' guzá chégüe', na' xejlá'awaje' lu xrise uva zichaj tu da dxezrupe na nisa, na' bzue' na lawe' tu xia xtila da bcuene' dxu'a Jesús chee xi'aje', na' gunná benne' nigá:

—Cuézdaxu. Guxúexquedxu che wida Elías chee xulétaje' Le'.

<sup>37</sup> Nadxa Jesús gudxezre xe'e, na' gútete'. <sup>38</sup> Ca ná'queze gudxeza ladxe' da ze lu xudau', guca na chúpala. Gucá'a na dxa'la, bedxúajte na zri'la. <sup>39</sup> Na' benne' dxenná be'e lu wedil-la, benne' ze' lau Jesús, gate na' blé'ene' ca gudxezre xe'e, ne ca guca gútete', na' gunné':

—Da líqueze benne' nigá guque' Zri'ine Dios.

<sup>40</sup> Cá'anqueze zaj ze na' bal-la nu'ula dxelenné'e zítu'la. Ládujla nu'ula caní zaj ze María Magdalena, ne Salomé, ne María, xrna Jacobo cuide' ne José. <sup>41</sup> Nu'ula caní gúsá'acalene' Jesús, ne gulácalene' Le' gate na' gudé' naga nababa Galilea. Cá'anqueze zaj ze na' zánedxa nu'ula xula, nu'ula ca' belezrine' Jerusalén tu zren nen Jesús.

*Dxulucache' Jesús lu xedxu ba*

(Mt. 27.57-61; Lc. 23.50-56; Jn. 19.38-42)

<sup>42-43</sup> Ca za chizrela bzzin José, benne' Arimatea ga na'. Benne' nigá naque' benne' blau ládujla benne' ca' chee xu'u lawe' blau chee judío ca'. Cá'anqueze le' dxebeze' zra la' Dios chee nna be'e. Lawe' da naca zra dxulucueze', zra nedxu chee zra dxulupá'ang', du lazre' guxú'e' lau Pilato, na' gunabe' si'e' lataj xexu'e' Jesús. <sup>44</sup> Bébánele' Pilato ca bennene' ba gute Jesús, na' gunné' benne' dxenná be'e lu wedil-la na' chee gunabe' che ba guca ca'. <sup>45</sup> Gate bènnea' dxenná be'e lu wedil-la gunné' ca'an guca, nadxa Pilato bnézruje' José lataj bexu'e' Jesús. <sup>46</sup> Nadxa José guzi'e' tu ladxe' xtila laga, na' bulétaje' Jesús, ne bulazre' Le' ladxe' xtila na'. Na' gúxrué' Jesús tu lu ba da ba gudene' le'e xiaj xre, na' bséxruje' ba na' nen tu xiaj zren. <sup>47</sup> María Magdalena, ne María, xrna José belelé'equezne' naga bulucache' Jesús.

## 16

*Dxexebán Jesús ládujla benne' gate*

(Mt. 28.1-10; Lc. 24.1-12; Jn. 20.1-10)

<sup>1</sup> Ca gudé zra dxulupá'ang', na' María Magdalena, ne Salomé, ne María, xrna Jacobo, gulezi'e' da dxelá xizre chee cheajlelu'e' Jesús. <sup>2</sup> Na' bál-la'la zra nedxu chee da gazre zra belezrine' dxu'a ba gate na' za dxalaj gubizra. <sup>3</sup> Na' gulenné', dxelé' ljwezre':

—¿Nuzra cua xiaj da naxeexuj ba?

<sup>4</sup> Ca gulenné'e, na' belelé'ene' xiaj zren na' da buluséxruje' ba, ba nadúa na. <sup>5</sup> Ca gulu'e' lu ba, na' belelé'ene' tu benne' dxé'e' chalá'a xabela, nácue' zra langé' tunna da chiche, na' belezrebe'. <sup>6</sup> Na' gunná benne' nigá, dxé'e' nu'ula ca':

—Quebe zrèbele. Le'e dxexilajle Jesús, benne' Nazaret, bènnea' gudé'e' le'e xaga béguaj. Bache bebán bènnea'. Québedxa xu'e' nigá. Le nna' lataj naga gulexrué' Le'. <sup>7</sup> Le chjaca na'a, le cheajezre benne' ca' bsédene', ne Pedro cuía lau Jesús chéaje' naga nababa Galilea ca le'e. Na' xelé'equezle Le' ca ba gunnáqueze'.

<sup>8</sup> Nadxa nu'ula ca' buluzrúnruje', besí'aque' dxu'a ba lawe' da belezrébele'e. Quebe nu guléqueze' ca da guca na lawe' da dxelezzrébele'e.

*Jesús dxulé'e lau María Magdalena*

(Jn. 20.11-18)

<sup>9</sup> Ca gudé bebán Jesús ládujla benne' gate ca guxaní' zra nedxu chee da gazre zra, na' ble'e lawé' zate ca' María Magdalena, nu'ula na' bebéaj Jesús gazre be' xriwe' guxú'e'. <sup>10</sup> Nu'ula nigá guxíaje' xeajezre' benne' ca' gulaque' Jesús tuze, zaj zre'e' baxácheze, ne dxelebezre'. <sup>11</sup> Gate na' gulenne' nabán Jesús, na' ba ble'e nu'ula nigá Le', quebe guléajle'e.

*Dxulé'e lau Jesús chupa benne' bsédene'*

(Lc. 24.13-35)

<sup>12</sup> Ca gudé na' ble'e lau Jesús nazrala chupa benne' ca' bsédene' zaj xu'e' neza le'e xizre'. <sup>13</sup> Benne' caní belexebi'e, na' xeajleguezre' benne' xezícala. Cá'anqueze benne' caní quebe guléajle'e.

*Jesús dxusebague' benne' gubáz chee' ca' da dxal-la' xelune'*

(Mt. 28.16-20; Lc. 24.36-49; Jn. 20.19-23)

<sup>14</sup> Ca gudédxá, na' ble'e lau Jesús chinéaj benne' ca' bsédene' ca zaj dxé'e' dxelawe', na' gudil-le' le' lawe' da quebe guléajle'e ba bebange', ne lawe' da zaj naque' lázrdau zide' lawe' da quebe guléajle'e chee benne' ca' belexelé'ene' Le' ca gudé bebane'. <sup>15</sup> Na' gunné', dxé'e' benne' ca':

—Le chjaca du ca naca xezr la xu. Le cu'u lban chee dizra' chawe' chia' chee xelénqueze xúgute' bènneache. <sup>16</sup> Benne' chéajle'e, ne chue' nisa, la bènnea', na' benne' quebe chéajle'e, wabía xi' bènnea'. <sup>17</sup> Da dxelunna bea caní xululé'e benne' ca' xeléajle'e chia', xuluchínene' La neda' chee xelexebéaje' be' xriwe'. Xuluchálaje' dizra' nazrala. <sup>18</sup> Welúxrué' b'ela' ca', ne che xelé'aje' da gute benne', quebe bi xeléquene'. Cá'anqueze wuluxrúa ne'e benne' quebe chawe' zaj zue', na' xelexexaque'.



*Dxexepe Jesús xabáa**(Lc. 24.50-53)*

<sup>19</sup> Ca gudé bchálaj Xránadxu Jesús nen benne' ca', na' Dios bechise' Lẹ' xabáa, na' gudxé'ę chalá'a xabẹla cheę Dios. <sup>20</sup> Nadxa benne' ca' guledxúaje', xeajlelu'ę lban cheę dizra' chawe' nigá du ca naca xęzr la xu nigá. Lẹqueze Xránadxu gúcalęne' le', na' bdxixruj be'ę dizra' cheę' ne' cheę xel-la waca ca' da za xabáa da belune'. ¡Ca'an gaca na!

## DIZRA' CHAWÉ' CA NACA CHEÉ JESUCRISTO SDA BZUAJ SAN LUCAS

*Dizra' dxuchalaj San Lucas, dxé'ē Teófilo*

<sup>1</sup> Benne' zan ba beluné' ca da gulezé'quene' buluzúaje' cáteze naca da guca ládujla dxi'u, <sup>2</sup> cáteze na' gulé' benne' ca', benne' belelé' ené' nédxudaute ca naca da guca na, na' buluchálaje' dizra' chawé' na'. <sup>3</sup> Cá'anqueze neda' ba bchi'a xánnia' xúgute' da ca' gulaca na nédxudaute, na' dxé'queda' chawé' guzúaja' da nigá' chiu' cáteze guca, bi nazri' ité' lazra', lue', Teófilo. <sup>4</sup> Dxuna' caní' cheé nézenu' naca na da li ca da ba bululé' ené' lue'.

*Gubáz cheé xabáa dxuzenne' ca galaj Juan, benne' guchúé' bénneache nisa*

<sup>5</sup> Gate na' naca Herodes wenna' bea cheé xezre ca' zaj nababa Judea, na' zua tu bxruze le' Zacarías, benne' nababe' cue' bxruze ca' gunná' be'e Abías ca ni'te. Zru'ula Zacarías na' le' Elisabet, na' nácaqueze Zacarías na' zre sua benne' ca' gulebábale' bxruze Aarón. <sup>6</sup> Zacarías ne zru'ule' Elisabet gulaque' xrlátaje lau Dios, ne dxeluné' ca zaj naca da bdxixruj bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria le' lau Dios. <sup>7</sup> Quebe nu zri'ine' chilá', lawe' da naca Elisabet na' nu'ula wizre, na' dxúpaté' zaj bezúalé' gula.

<sup>8</sup> Tu zra, gate belexala bxruze ca' naga nababa Zacarías xeluné' zrin lu xel-la bxruze cheé' lau Dios, <sup>9</sup> cáteze naca da dxelún bxruze ca', na' bexala Zacarías chu'é lu lataj lá'azxa cheé Xránadxu lu xudau' cheé guzezxe' xala. <sup>10</sup> Dxácate na' dxezxe xala na', ca naca benne' ca' zaj zra' chalé'ajla dxuluchálajléné' Dios. <sup>11</sup> Nadxa ble'e lau tu gubáz cheé xabáa cheé Xránadxu, ze' chalá'a xabéla cheé cugu naga zria xala dxezxe na. <sup>12</sup> Ca ble'e Zacarías gubáz cheé xabáa na', guzúé' stebe, ne bzrebele'é.

<sup>13</sup> Gubáz cheé xabáa na' guzré' le':

—Zacarías, quebe zrebu', lawe' da ba ben Dios dizra' da dxuchálajlenu' Le', na' nu'ula chiu', Elisabet, walaj tu zri'ine', bi na' guzú' labe' Juan. <sup>14</sup> Wabéle'enu', ne gaca chiu' tu da ba neza zrenté, na' benne' zan xelebené' lawe' da ba gulaj bidu na'. <sup>15</sup> Ca'an gaca lawe' da gaca zri'inu' szrenté lau Dios. Quebe xi'ajbe' xrise uva wal-la, u da dxususre na bénneache, na' gate gálajtebe' tu súalezqueze Be' Lá'azxa nen lebe'. <sup>16</sup> Ne cheé lebe' benne' zan xelexaque' bi cheé Xránadxu Dios. <sup>17</sup> Juan nigá' quia laube' lau Xránadxu, na' Be' na', ne xel-la waca da gulezúale' na Elías, bénnea' bchálaje' waláz cheé Dios gate nate, xelezúale' na lebe', cheé guzúabe' tuze benne' ca' zaj naque' xra xrna nen zri'ine', ne cheé gulé'ebe' benne' dxeledábague' Dios cheé xeluné' ca dxenná xrtizra' Dios. Ca'an gaca, gucá'ana cháwebe' bénneache cheé xezezi' lu ne'ē Xránadxu.

<sup>18</sup> Zacarías na' bchebe' gubáz cheé xabáa:

—¿Ajazra gaca nezda' gaca caní' Neda' ba nagúlale'a, ne cá'anqueze naca nu'ula chia'.

<sup>19</sup> Na' bechebe gubáz cheé xabáa na':

—Neda' naca' Gabriel, ne naca' wen zrin cheé Dios. Le' gusel-le' neda' cheé guchálajléná' lue', ne guzenda' lue' dizra' chawé' nigá. <sup>20</sup> Na'a, lawe' da quebe guxéajle' u da gucha' lue', xegá'anú' quebe gaca nniú' cadxa galaj zri'inu'. Caní' gaca na ca zrinté zra cheé na.

<sup>21</sup> Dxácate na' zaj zra' benne' ca' chalé'ajla, dxelebeze' Zacarías, ne dxelexebánene' lawe' da dxezréle' ené', quebe dxedxúaje' lu lataj lá'azxa. <sup>22</sup> Gate bedxúaj Zacarías, québedxa dxaca nnié'. Nadxa guleque bé' ené' ba ble'e Zacarías tu da ble'e Dios le' lu lataj lá'azxa na'. Na' le' bta ná'ase', lawe' da quebe dxaca nnié'.

<sup>23</sup> Ca xeajsé cheé zra ca' dxal-la' gun Zacarías zrin cheé xudau', na' bezé'ē zexíaje' lizre'. <sup>24</sup> Ca gudé na' zru'ule' Elisabet ba zue' zi'i, na' quebe bdxúaje' lataj bchina' chie' ca gazxu' beu', na' dxenné' lu lázrdawe': <sup>25</sup> "Xrana' Dios ba bēne' chia' da nigá cheé québedxa xuluzúa bénneache neda' chalá'ala."

*Gubáz cheé xabáa dxuzenne' ca galaj Jesús*

<sup>26</sup> Ca gudé xrupa beu' gate na' bchálajle' gubáz cheé xabáa na' Zacarías, na' Dios gusel-le' le' tu xezre nababa Galilea nazí le na Nazaret, <sup>27</sup> cheé cheajchálajléné' tu nu'ula cuide'dau' lebe' María. Lebe' ba zua guchaga na'be' benne' biu na' le' José, benne' naque' zri'ine zre sua wenna' bea David.

<sup>28</sup> Gubáz cheé xabáa na' guxú'ē naga zua María na', na' guzré'-be':

—Padiuzre. Dios dxuné' lue' tu culuén. Xránadxu zúaléné' lue'. Dios ba bēne' tu da cháwedxa chiu' quézcala cheé xúgute' nu'ula ca'.

<sup>29</sup> Gate María na' ble'ebe' gubáz cheé xabáa na', bebánebe' ca naca dizra' na', na' gunabe' lu lázrdaube': ¿Bizr cheé na' dxugape' neda' diuzre caní'?

<sup>30</sup> Nadxa gunná gubáz chee xabáa na':

—María, quebe zrebu' lawe' da ba bzrué'enu' tu culuén da dxun Dios chiu' lue'. <sup>31</sup> Na'a, zua da gunna Dios chiu', na' galaj tu bidu biu chiu', na' guzú' labe' Jesús. <sup>32</sup> Lebe' gácabe' szren, na' xelennáqueze' naque' Zri'ine Dios szrente, na' Xránadxu Dios gung' Le' wenná bea ca guca xra xrtawé' David, <sup>33</sup> chee nna bé'etecaze' xęzr la xu Israel, na' xel-la dxenná bea chee' quebe cheajsęqueze che na.

<sup>34</sup> Nadxa María bchębebe' gubáz chee xabáa:

—¿Ájazra gaca da nigá, lawe' da quebe nu benne' biu zúalęna'?

<sup>35</sup> Gubáz chee xabáa na' gunné':

—Be' Lá'azxa chee Dios sue' xichaj lázrda'u, na' xel-la waca chee Dios szrente sua na nen lue'. Chee le' na' bidu na' gálajbe' gácaquezebe' chee Dios, na' sí'queze labe' Zri'ine Dios. <sup>36</sup> Cá'anqueze bila ljwezru' Elisabet wálajqueze bidu chee' lácala ba naque' benne' gula. Ca'an naca, nu'ula na' gulenné' naque' wizre, ba zeaj xrupa beu' bnezruj Dios chee'. <sup>37</sup> Quebe bi de da quebe gaca gun Dios.

<sup>38</sup> Nadxa gunná María:

—Neda' nácaqueza' węn zrin chee Xránadxu. Gun Dios chia' ca da ba gunnáu'.

Na' gubáz chee xabáa na' bezé'ę naga zua María na'.

*María zeajxúbe' Elisabet*

<sup>39</sup> Ca lu zra na' María guzá'abe' zéajbe' tu xęzredau' da zua na laduj xi'a ca' chee ga nababa Judea. <sup>40</sup> Na' guxú'ube' lízre Zacarías, ne bgápabe' diuzre Elisabet. <sup>41</sup> Gate ben Elisabet dizra' da gunné' María, na' bidu na' xú'ube' le'e Elisabet guxrítebe', na' guzúale' Be' Lá'azxa le'.

<sup>42</sup> Nadxa gunné' tu chí'e zizraj:

—Dios ba beņe' tu da cháwedxa chiu' quęzcała chee xúgute' nu'ula ca', lawe' da ba zua da benna Dios chiu'. <sup>43</sup> ¿Núzraqueze naca' neda', za xrna Xrana' ga zua' neda'? <sup>44</sup> Cátęze benda' dizra' da gunnéu', na' guxrite bidu chia' lu le'a lu xel-la dxebe' cheebe'. <sup>45</sup> Ba neza naca na chiu' guxęajle'u lawe' da gaca li ca da gunná Xránadxu.

<sup>46</sup> Nadxa gunná María:

Bénne'du xu'a dxue lá'ana na Xrana'.

<sup>47</sup> Lázrdawa' dxebe' na ca dxun Dios, weselá chia'.

<sup>48</sup> Lawe' da gudxé' Dios gunne xue chia', nácaqueza' węn zrin chee'.

Na'a su lau na, xúgute' benne' xelenné' nazi'a tu culuen zren chee Dios.

<sup>49</sup> Dios Szrente ba beņe' tu da zrente chia' neda'.

Chee le' na' lá'azxa naca La Le'.

<sup>50</sup> Le' xexache lázrqueze' xúgute' benne' ca' dxelezrebe' Le'.

<sup>51</sup> Da zrente ba beņ Le'.

Bzue' zrila benne' ca' dxulucá'ana szren cuine'.

<sup>52</sup> Bebéaje' benne' blau ca' lu lataj chee',

ne bechise' benne' dxexruj lazre' ca'.

<sup>53</sup> Bnézrujle'ę da gulagu benne' dxeledún,

na' benne' gunni'a ca' bca'ang' le' cá'aze.

<sup>54</sup> Gúcalęne' benne' Israel, benne' węn zrin chee' ca'

lawe' da bezri lázrqueze' le',

<sup>55</sup> ca da guchebe lazre' chee xra xrtáudxu ca',

chee Abraham, ne chee benne' xrtię' ca' chadía chacanna.

<sup>56</sup> María begá'analebe' Elisabet ca chunna beu', na' ca gudé na' bezrinbe' lízrebe'.

*Ca gulaj Juan, benne' bchue' bęnneache nisa*

<sup>57</sup> Ca gudé na' guxá' beu' chee Elisabet na' chee galaj bidu chee', na' guzane' tu bi biu chee'. <sup>58</sup> Benne' walızr chee' ca', ne xrtia ljwezre' belezrine' dxelebeņe' nen le', gate belenne' Dios bezri lázrele'ę le'. <sup>59</sup> Gate guca xrunu' zra, belezrine' chee xelexhúgug' lu xpęlabe' da gulé'e na naca be' bi chee Dios, na' gulaca lazre' xuluzúe' labe' Zacarías ca le' xrabe'.

<sup>60</sup> Na' gunná xrnabe':

—Quebe gaca. Dxal-la' si' labe' Juan.

<sup>61</sup> Na' gulé'ę le':

—¿Bizr chee na'? Quebe nu chilá' xrtia ljwézrele le' ca'.

<sup>62</sup> Na' buluchebe' xra bidu na', bulutá ne'ę chee xelenézene' ájazra guzúe' labe'. <sup>63</sup> Na' xrabe' na' gunabe' tu blágadau', na' bzuaje' le'ę na: Juan si' labe'. Na' xúgute' benne' ca' belexebánene'. <sup>64</sup> Ca' guca Zacarías benné', na' guzú lawe' dxue lá'ang' Dios. <sup>65</sup> Ca belelé'ene' da nigá, xúgute' benne' walızr chee' belexebánene', na' ca naca xęzre zajnnita laduj xi'a ca ga nababa Judea, buluchálaje' ca da guca. <sup>66</sup> Xúgute' benne' belenne' na, gulezú lawe' dxeleņne' lu lázrdawe', ne buluchebe ljwezre' tue' xetúe':

—¿Ájazraqueze gun bi nigá?

Naca bea na Xránadxu zúalene'-be'.

*Ca da bil-la Zacarías*

<sup>67</sup> Na' Be' Lá'azxa guzúalene' Zacarías, xra bidu nigá, na' bchálaje' waláz chee' Dios, gunné':

<sup>68</sup> ¡Gaca ba Xránadxu, Dios chee' xezre Israel!

Ba ble'e naga zúadxu, bénneache chee', na' bselé' dxi'u.

<sup>69</sup> Ba gusel-le' tu benne' wál-lale'e, weselá chee'dxu.

Bénnea' gulaj ládujla xrtia David, benne' wen zrin chee'.

<sup>70</sup> Ca'an guchebe lazre' Dios lu dxu'a benne' ca' buluchálaje' waláz chee' nédxudauté.

<sup>71</sup> Guchebe lazre' guselé' dxi'u lu na' benne' dxeleze're'e dxi'u, ne lu na' benne' dxelecuídené' dxi'u.

<sup>72</sup> Xezrí lazre' xra xrtáudxu ca',

ne quebe gal-la lazre' xel-la wezrí lá'azxa chee'.

<sup>73</sup> Da nigá naca na da guchebe lazre' Dios da bzua chache' nen xra xrtáudxu Abraham, da naca tu da gunné' chee'dxu dxi'u.

<sup>74</sup> Guchebe lazre' guselé' dxi'u lu na' benne' dxeleze're'e dxi'u

chee' gaca gundxu zrin chee', ne quebe zrébedxu,

<sup>75</sup> ne gácadxu xrlátaje lau Le', ne gácadxu bi cheéqueze' xúguté zra naca bandxu.

<sup>76</sup> Lue', zrí'ina'dau', sí'queze lau' bi guchálajqueze waláz chee' Dios szrente,

lawe' da quíia lau' lau Xránadxu, salju' neza chee' Xránadxu,

<sup>77</sup> Guzénenu' bénneache chee', Le' gunite lawe' dul-la chee',

ne guselé' benne' ca'.

<sup>78</sup> Ca'an gaca lawe' da dxexezrí lazre' Dios dxi'u.

Dxunge' na'a dxalaj tu xi' chee' xabáa da dxusení' chee'dxu,

<sup>79</sup> na' gusení na naga zaj zra' benne' zaj zre'e lu na' xel-la gute,

chee' cu'u na dxi'u lu neza xrtanté lau Dios.

<sup>80</sup> Bidu na' bgúlabe', ne bgula bénne'du xu'ube' chawe' lu da naca chee' Dios. Guzúaquezbe' le'e xixre' lawe' lataj cadxa bzrin zra ble'e laube' xezre Israel.

## 2

*Ca guca gate gulaj Jesús*

(Mt. 1.18-25)

<sup>1</sup> Ca lu zra na' gate dxenná bea Augusto, benne' xezre Roma, benne' dxenná be'e xúguté cue' xezr la xu, le' gunná bé'ene' xelú'u lu xiche xúguté benne' zaj zre'e xezr la xu. <sup>2</sup> Da nigá naca da nédxudau' gulú'u bénneache lu xiche. Guca caní gate naca Cirenio benne' zaj xu'u lu ne'e xezre ca' zaj nababa Siria. <sup>3</sup> Xúguté bénneache dxun na ba xen chjaque' lu xezre naga zaj nababe' chee' xelú'e lu xiche. <sup>4</sup> Chee' le na' José guz'é lu xezre Nazaret, da nababa Galilea, chee' bzrine' lu xezre Belén, da nababa Judea, naga gulaj wenná bea David. Bzrin José na' lawe' da naque' xrtia David na'. <sup>5</sup> José guxíaje' Belén chee' chu'e lu xiche tu zren nen María. María nigá ba nachébebe' guchaga ná'alebe' José, na' ba bnezruj Dios chee'be'. <sup>6</sup> Dxácaté na' zaj zre'e lu xezre Belén, na' bzrin zra san María bidu chee'. <sup>7</sup> Lu xezre na' gulaj bidu nedxu chee', na' bchele'-be' ládxe'du ca', na' gúxrué'-be' xu'u naga dxelún chi'e da dxelagu bea ca', lawe' da quebe ga bzrela tu lataj lu xu'u naga che'e.

*Dxuluchálaje' gubáz chee' xabáa benne' ca' dxuluxúe' zrila' ca'*

<sup>8</sup> Gagu cuíta xezre Belén zaj zra' benne' ca' dxuluxúe' zrila' ca', dxelexegá'ane' le'e xixre' chizrela, dxuluxúe' zrila' chee' ca'. <sup>9</sup> Naga zaj zre'e ble'e lau tu gubáz chee' xabáa chee' Xránadxu. Na' xel-la naxani' chee' Xránadxu Dios bsaní na naga zaj zre'e. Ca'an guca, belezrébele'e. <sup>10</sup> Na' gubáz chee' xabáa na' guzre' le':

—Quebe zrébele, lawe' da dxuzenla' le'e tu dizra' chawe'. Ne chee' dizra' nigá xelebéle'e xúguté bénneache. <sup>11</sup> Na'a, lu xezre chee' David, ba gulaj tu bidau' gácabé' weselá chee'e. Bi nigá naque' Cristo, Xránadxu. <sup>12</sup> Da nigá gaca na tu da gunna bea na chee'e. Cheajxrácale bidu dxe'ene nigá, dxélabé' ládxe'du ca', ne debe' tu xu'u naga dxelún chi'e da xelagu bea ca'.

<sup>13</sup> Chadí lau, cuíta gubáz chee' xabáa na' bululé'e lau zandxa gubáz chee' xabáa, dxelúe lá'ane' Dios, dxelenné':

<sup>14</sup> ¡Gaca ba Dios na'ala,

na' lu xezr la xu nigá sua xel-la dxebeza zri lazre' chee' bénneache,

benne' dxelune' ca da dxaca lazre' Dios!

<sup>15</sup> Gate besí'aca gubáz chee' xabáa ca', zeajxaque' xabáa, nadxa benne' ca' dxuluxúe' zrila' gulezú lawe' dxelé' ljwezre' tue' xetúe':

—Chéajxquedxu lu xezre Belén cheajnnadxu da ba guca, ca da ba gunná Xránadxu Dios, guzre' dxi'u.

<sup>16</sup> Ca'an guca, besí'aca zézxuje', na' xeajlexraque' María ne José, ne bidu dxe'ene na' dēbe' xu'u naga dxelún chi'e da xelagu bea ca'. <sup>17</sup> Gate belelé'ene' bidu na', na' buluchálajlene' benne' ca' ca da gunná gubáz chee xabáa ca da naca chee bidu na'. <sup>18</sup> Na' xúgutē benne' ca' belenne' da nigá belexebánele'ene' ca da gulenná benne' caní. <sup>19</sup> María bcache' da nigá lu xichaj lázrdawe', na' blaba lazre' ca naca da nigá. <sup>20</sup> Ca'an guca besí'aca benne' ca' dxuluxúe zrila', dxulucá'ana szrene' Dios, ne dxelúe lá'ane' Lē' ca naca xúgutē da belenne', ne da belelé'ene', lawe' da guca xúgutē ca da guzre gubáz chee xabáa na' lē'.

*Ca guca gate belú'e bidu Jesús lu xudau'*

<sup>21</sup> Ca guca xrunu' zra, na' gulechugue' tu lu xpela bidu na' ca da nadxixruj bea na chee Dios, na' belú'e La bidu na' Jesús, cáteze naca da gunná gubáz chee xabáa na', guzre' María nédxudxa ca za gu'e bidu na'.

<sup>22</sup> Ca bzin zra chee xelune' ca bdxixruj bea Moisés chee xelexexaque' chawe' lau Dios, na' belú'e bidu na' lu xezre Jerusalén chee xuluzúe'-be' lu na' Xránadxu Dios. <sup>23</sup> Belune' caní lawe' da ba naxúaj lu da nadxixruj bea Xránadxu Dios da dxenná na caní: Xúgutē bi biu, bi nedxu gálajbe' dxal-la' guzúale-be' chee Xránadxu Dios. <sup>24</sup> Na' xjaque' xeajlegu'e dxen chee be xixre'du ca' lau Dios ca da dxenná da nadxixruj bea na chee Xránadxu Dios, da dxenná na: Chupa bgugu, che chupa bxinnedau'.

<sup>25</sup> Ca lu zra na' zua tu benne' biu gula lu xezre Jerusalén, le' Simeón. Naque' tu benne' chawe', na' dxue lá'anaqueze' Dios, ne dxebeze' benne' sel-la Dios chee guselé' bēnneache Israel. Zúale Be' Lá'axxa chee Dios Simeón na'. <sup>26</sup> Be' Lá'axxa ba guzre' Simeón na' quebe gati'e cadxa lé'ene' Cristo, benne' na' sel-la Xránadxu Dios. <sup>27</sup> Simeón nigá guxíaje' lu xudau' lawe' da bsi' Be' Lá'axxa chee Dios lē'. Na' gate xra xrna bidu Jesús zaj nu'e-be' lu xudau' chee xelune' cheebe' ca da bdxixruj be'e Moisés, <sup>28</sup> na' Simeón na' guqu'é bidu na'. Bnide'-be', ne be' lá'ane' Dios, gunné':

<sup>29</sup> Xrana', na'a waca gunnu' lataj gatia' lu xel-la dxebeza zri lazre' lawe' da ba bēnu' ca da guchebe lazru' chia', naca' wēn zrin chiu'.

<sup>30</sup> Nen xiaj láuqueza' ba ble'eda' Benne' Weselá,

<sup>31</sup> Bēnnea' ba bzu' chee gácalene' xúgutē bēnneache.

<sup>32</sup> Lē' naque' tu xi' da gusení na chee benne' quebe zaj nababe' Israel.

Nē chee Lē' gaca tu da ba neza chee bēnneache chiu', benne' Israel.

<sup>33</sup> José ne xrna Jesús belexebánele'ene' ca da gunná Simeón chee bidu Jesús. <sup>34</sup> Nadxa Simeón gunabe' lau Dios gunē' chee' da chawe', na' guzre' María, xrna Jesús:

—jGunná'xque nigá! Bidu nigá, Dios nuzúe' lebe' chee gunbe' chee benne' Israel ca', cheajlecházie' benne' zantē lu na' da xriwe', na' benne' zantē xelexexase' lau Dios. Lebe' gácabe' tu da dxunna bea chee Dios, na' benne' zantē xuluzúe' lebe' chalá'ala. <sup>35</sup> Nē chee lebe' gulé'e lau ca da dxeajlesá lazre' tu tuē'. Na' chiu' lue' da nigá gaca na ca tu xia nalá, da cheajsúa lu lázrda'u.

<sup>36</sup> Cá'anqueze zua na' tu nu'ula dxenné' waláz chee Dios, lē' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuide'te, na' guzúalene' benne' chee' gazre iza. <sup>37</sup> Na' begá'ane' tuze', ne ba xu'e tapa lalaj tapa iza. Quebe becuase' xudau', na' dxunē' zrin chee Xránadxu Dios te zra chizrela. Dxune' gubasa, ne dxuchálajlene' Dios. <sup>38</sup> Ana na' bzinqueze' na', na' ca gudé guzre' Dios: "Xcalenu", na' guzú lawe' dxuchálajē' chee bidu Jesús nen xúgutē benne' ca' dxelebeze' benne' na' sel-la Dios chee guselé' benne' Jerusalén ca'.

*Ca guca gate belexezrine' xezre Nazaret*

<sup>39</sup> Ca belune' xúgutē ca da dxenná da nadxixruj bea Xránadxu, nadxa besía'que' xjaque' naga nababa Galilea, na' belexezrine' xezre Nazaret da naca lazriē'. <sup>40</sup> Na' bidu Jesús bgúlabe', ne gúcadxabe' chuchu, ne gúcadxabe' bi naxéajni'i, na' Dios bca'ane' lebe' chawe'.

*Ca guca gate bzin bidu Jesús lu xudau'*

<sup>41</sup> Xra xrna' Jesús, tu tu iza dxjá'aque' xezre Jerusalén gate dxu'u laní chee xulusá lazre' benne' judío ca da ben Dios, bebéaje' xra xrtawe' ca' lu xezr la xu Egipto. <sup>42</sup> Ca guque Jesús chazrinnu iza, na' xjá'aque' xúgutē' Jerusalén, ca dxelúnqueze' ca dxaca laní. <sup>43</sup> Ca gudé laní, na' besía'que', na' bidu Jesús begá'anabe' Jerusalén, ne quebe guleque be'e xrnabe', ne José. <sup>44</sup> Dxeléquene' Jesús zezabe' ládujla benne' zan ca', na' besía'que' tu zra nez. Gate belexilje'-be' ládujla benne' xrtiē' ca', ne benne' ca' zaj núnbe'e, <sup>45</sup> quebe belexezrlnē'-be'. Ca'an guca belexebi'e' zeajxá'aque' Jerusalén chee cheajlexedíjje'-be' na'.

<sup>46</sup> Ca gudé guca chunna zra, nadxa belexezrlnē'-be' lu xudau', dxe'ebe' ládujla benne' ca' dxuluxuzájle'e da nadxixruj bea Dios, na' dxenbe' ca dxelenné', ne dxuchébebe' benne' ca'. <sup>47</sup> Xúgutē benne' ca' dxelenné' dxelexebánele' cheebe' ca naca xel-la sina cheebe', ne ca

naca da dxuchálajlebe' le'. <sup>48</sup> Gate belelé'e xra xrnabe' lebe', na' belexebánene'. Na' gunná xrnabe', dx'e'e-be':

—Zri'ina', ¿bizr chee na' beñu' caní nen netu'? Cadite stębe ba guzúantu' chiu' dxexílajntu' lue', xrau' ne neda'.

<sup>49</sup> Nadxa Jesús dx'e'ębe' le':

—¿Bizr chee na' dxexílajle neda'? ¿Quebe nézele le'e dxal-la' guna' neda' da naca chee Xra'?

<sup>50</sup> Xra xrnabe' quebe guléajni'ing' ca da gúzrebe' le'.

<sup>51</sup> Nadxa bezálebe' le' zeajxá'aque' Nazaret, na' gúcaquezebe' bi wezúa dizra' chee xra xrnabe'. Na' xrnabe' bcache chawe' xúgute da nigá lu lázrdawe'. <sup>52</sup> Jesús zéajbe' dxegúlabe' lu beł-la' dxen cheębe', ne lu xichaj lázrdaube', na' dxedxúajquezebe' chawe' lau Dios, ne lau bėnneache.

### 3

*Juan, benne' dxuchúe' bėnneache nisa, dxuchálaje' xrtizra' Dios le'ę xixre'*

(Mt. 3.1-12; Mr. 1.1-8; Jn. 1.19-28)

<sup>1</sup> Iza chinu' ca dxenná bea Tiberio, benne' dxenná be'e ca naca xęzr la xu, na' Poncio Pilato dxenná be'ę naga nababa Judea, na' Herodes dxenná be'ę naga nababa Galilea, na' Felipe, benne' biche Herodes, dxenná be'ę naga nababa Iturea, ne Traconite, na' Lisianias dxenná be'ę naga nababa Abilinia. <sup>2</sup> Na' Anás, ne Caifás zaj naque' bxruze blau. Ca lu zra na' Dios bchálajlene' Juan, zri'ine Zacarías, naga zua Juan le'ę xixre' lawe' lataj. <sup>3</sup> Juan na' gudéę' ca naca xęzredu ca' zaj nñitan' chalá'a weaj xegu Jordán, na' dx'e'ę benne' ca' dxal-la' lelexebí'i lazre', ne xeledxúe' nisa chee gunite lau Dios chee xtul-le'. <sup>4</sup> Caní guca ca na' gunná Isaías, benne' bchálajle' waláz chee Dios, gunné':

Nen tu chi'i bėnnea' dxennę' zizraj le'ę xixre' lawe' lataj. Dxennę':

Le gucueza neza naga te Xránadxu.

Le xulí chawe' neza lase chee'.

<sup>5</sup> Ca naca zrítudu ca' le xuzrá na.

Ca naca xi'a ca', ne xi'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

<sup>6</sup> Ca naca bėnneache xeledé'eng' Benne' Weselá sel-la Dios.

<sup>7</sup> Gate benne' ca' belezring' lau Juan chee xeledxúe' nisa, na' le' dx'e'ę benne' ca':

—Xrtia beła snia. ¿Be'e nu benne' le'e chee cuásale ca naca xel-la dxezrá'a chee Dios da ba za? <sup>8</sup> Le gun da gulé'e na ba bebí'i lázrele, ne quebe nñale lu lázrdaule: Nácantu' xrtia lįweze Abraham. Neda' dxapa' le'e, Dios wazéqueng' xexunge' xiaj caní xrtia Abraham. <sup>9</sup> Xa waga ba de cuásate na chee chugue' xaga ca', na' xúgute xaga da quebe dxelebia na da zixre chawe' welechugue na, na' xuluzre'ę na lu xi'.

<sup>10</sup> Nadxa benne' ca' buluchębe' le':

—¿Bi dxal-la' guntu'?

<sup>11</sup> Juan bechebe':

—Benne' de'ę chupa zre' dxal-la' gunézruje' tu na benne' quebe de' chee', na' benne' de' da dxawe' dxal-la' gunézruje' da gagu bėnnea' quebe bi de' chee'.

<sup>12</sup> Cá'anqueze belelá' benne' wechizruj ca' chee xeledxúe' nisa, na' buluchębe' Juan:

—Benne' wesede, ¿bi da dxal-la' guntu' netu'?

<sup>13</sup> Juan guzre' le':

—Quebe guchízrujle da zrendxa ca da nadxixruj bea na.

<sup>14</sup> Cá'anqueze bal-la benne' dxjaque' wedil-la buluchębe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wen lazre' chee cuale dumí chee', na' le be nen cadite názrujle.

<sup>15</sup> Benne' zaj zre'ę na' zaj zue' stębe, na' dxuluchębe' lu lázrdawe' che Juan na' naque' Cristo, benne' nasel-la Dios. <sup>16</sup> Juan na' gunné':

—Neda', da li dxuchúa' le'e nisa nen nisa. Wida tu benne' gunę' da dxulé'e xel-la dxedxúa nisa nigá, guzúe' le'e Be' Lá'axza, ne xi' chee'. Benne' nigá nápadxę' xel-la dxenná bea ca neda', na' quebe naca chia' cuéaja' xel-la chee' da xu'u ni'ę. <sup>17</sup> Ba nuxre' da dxun be' chee', na' guchi'ę naga dxine' zrua' xtla. Na' xutupe' zrua' xtla, guzrá' chawe' na lizre'. Guzezxe' xizre chee na lu xi' da cabata' xul-la na.

<sup>18</sup> Ca naca dizra' nigá, ne xezícadxa dizra' zan bchálajlene' benne' ca' ca naca dizra' chawe' chee Dios. <sup>19</sup> Juan gudil-le' Herodes, benne' dxenná be'ę, lawe' da zúalęne' Herodías, zru'ula Felipe, benne' biche Herodes na', ne lawe' da ba beñe' da zante da calęla. Nadxa Herodes <sup>20</sup> bėndxaqueze' da calęla, gulu'ę Juan lizre xia.

*Da guca gate gudxúa Jesús nisa  
(Mt. 3.13-17; Mr. 1.9-11)*

<sup>21</sup> Gate ne dxuchúa Juan na' bénneache nisa, cá'anqueze Jesús gudxúe' nisa, na' gate dxuchálajlene' Dios, na' b'xalaj xabáa, <sup>22</sup> na' betaj Be' Lá'azxa lawe' Jesús. Ble'e lawe' ca tu bgugu chiche, na' ben tu chi'e xabáa, dxenné':

—Lue' nacu' zri'ina' nazri'ite' lazra'. Dxezaca ba lázreļena' Lue'.

*Ca naca xra xrtau Jesucristo  
(Mt. 1.1-17)*

<sup>23</sup> Jesús nape' ca chi dxua iza gate guzú lawe' dxune' zrin chee'. Dxeleque benne' naque' zri'ine José. Naca Jesús zre sua Elí, xra María.

<sup>24</sup> Elí na' guque' zri'ine Matat,

Matat na' guque' zri'ine Leví,

Leví na' guque' zri'ine Melqui,

Melqui na' guque' zri'ine Jana,

Jana na' guque' zri'ine xetú José.

<sup>25</sup> José nigá guque' zri'ine Matatías,

Matatías na' guque' zri'ine Amós,

Amós na' guque' zri'ine Nahum,

Nahum na' guque' zri'ine Esli,

Esli na' guque' zri'ine Nagai.

<sup>26</sup> Nagai na' guque' zri'ine Maat,

Maat na' guque' zri'ine xetú Matatías,

Matatías nigá guque' zri'ine Semei,

Semei na' guque' zri'ine xetú José,

José nigá guque' zri'ine Judá.

<sup>27</sup> Judá na' guque' zri'ine Joana,

Joana na' guque' zri'ine Resa,

Resa na' guque' zri'ine Zorobabel,

Zorobabel na' guque' zri'ine Salatiel,

Salatiel na' guque' zri'ine Neri.

<sup>28</sup> Neri na' guque' zri'ine xetú Melqui,

Melqui nigá guque' zri'ine Adi,

Adi na' guque' zri'ine Cosam,

Cosam na' guque' zri'ine Elmodam,

Elmodam na' guque' zri'ine Er,

<sup>29</sup> Er na' guque' zri'ine Josué,

Josué na' guque' zri'ine Eliezer,

Eliezer na' guque' zri'ine Jorim,

Jorim na' guque' zri'ine xetú Matat,

<sup>30</sup> Matat nigá guque' zri'ine xetú Leví,

Leví nigá guque' zri'ine Simeón,

Simeón na' guque' zri'ine xetú Judá,

Judá nigá guque' zri'ine xetú José,

José nigá guque' zri'ine Jonán,

Jonán na' guque' zri'ine Eliaquim,

<sup>31</sup> Eliaquim na' guque' zri'ine Melea,

Melea na' guque' zri'ine Mainán,

Mainán na' guque' zri'ine Matata,

Matata na' guque' zri'ine Natán.

<sup>32</sup> Natán na' guque' zri'ine David,

David na' guque' zri'ine Isai,

Isai na' guque' zri'ine Obed,

Obed na' guque' zri'ine Booz,

Booz na' guque' zri'ine Salmón,

Salmón na' guque' zri'ine Naasón.

<sup>33</sup> Naasón na' guque' zri'ine Aminadab,

Aminadab na' guque' zri'ine Aram,

Aram na' guque' zri'ine Esrom,

Esrom na' guque' zri'ine Fares,

Fares na' guque' zri'ine xetú Judá,

<sup>34</sup> Judá nigá guque' zri'ine Jacob,

Jacob na' guquē' zri'ine Isaac,  
 Isaac na' guquē' zri'ine Abraham,  
 Abraham na' guquē' zri'ine Taré,  
 Taré na' guquē' zri'ine Nacor.  
<sup>35</sup> Nacor na' guquē' zri'ine Serug,  
 Serug na' guquē' zri'ine Ragau,  
 Ragau na' guquē' zri'ine Peleg,  
 Peleg na' guquē' zri'ine Heber,  
 Heber na' guquē' zri'ine Sala,  
<sup>36</sup> Sala na' guquē' zri'ine Cainán,  
 Cainán na' guquē' zri'ine Arfaxad,  
 Arfaxad na' guquē' zri'ine Sem,  
 Sem na' guquē' zri'ine Noé,  
 Noé na' guquē' zri'ine Lamec,  
<sup>37</sup> Lamec na' guquē' zri'ine Matusalén,  
 Matusalén na' guquē' zri'ine Enoc,  
 Enoc na' guquē' zri'ine Jared,  
 Jared na' guquē' zri'ine Mahalaleel,  
 Mahalaleel na' guquē' zri'ine xetú Cainán.  
<sup>38</sup> Cainán na' guquē' zri'ine Enós,  
 Enós na' guquē' zri'ine Set,  
 Set na' guquē' zri'ine Adán,  
 Adán na' guquē' ca zri'inequeze Dios.

#### 4

*Satanás da xriwe' dxilaj lazre' na ájala gusebaga na Jesús dul-la*  
 (Mt. 4.1-11; Mr. 1.12-13)

<sup>1</sup> Jesús, zúalē Be' Lá'azxa Le', bezé'e xegu Jordán, na' guché Be' Lá'azxa Le' le'e xixre' lawe' lataj. <sup>2</sup> Na' guzúe' chua zra, na' Satanás da xriwe' gudilaj lazre' na ájala si xē na Le'. Quebe bi gudagu Jesús da chua zra ca', na' ca' gudé na' gudune'. <sup>3</sup> Nadxa gunná da xriwe', guzre na Le':

—Che da li nacu' Lue' Zri'ine Dios, bēn xelexaca xiaj caní xeta xtila.

<sup>4</sup> Na' bechebe Jesús:

—Naxúajqueze na lu xiche chee Dios, dxenné': Quegá nen xeta xtilaze gaca ban bēnneache, san cá'anqueze nen xrtizra' Dios gaca ban bēnneache.

<sup>5</sup> Nadxa da xriwe' guché na Jesús tu xi'a sibe, na' chaditē ble'e na Le' xúgute cue' xēzr la xu da zaj nnita lu xēzr la xu nigá, <sup>6</sup> na' guzre na Le':

—Neda' gunna' Lue' ca naca xel-la dxenná bea nigá, ne xel-la szren chee xúgute xēzr la xu caní, lawe' da zaj xu'u da caní lu na'a neda', na' gunézruja' na nu dxaca lazra' gunézruja' na. <sup>7</sup> Gunna' na chiu' che lue' guzú zribu' lawa', ne gucá'ana szrenu' neda'.

<sup>8</sup> Jesús bechebe':

—Gucuasa lue', Satanás, lawe' da dxenná xiche chee Dios, dxē'e bēnneache: "Bca'ana szren Xranu' Dios, ne bēn zrin chee tuze Le'."

<sup>9</sup> Nadxa da xriwe' na' guché na Jesús lu xēzre Jerusalén, na' bcuén na Le' xichaj ze'e xudau', na' guzre na Le':

—Che da li na' nacu' Zri'ine Dios, guxrite' nigá cheaxēzu' lu xu, <sup>10</sup> lawe' da lu xiche chee Dios dxenné':

Dios gusebague' gubáz chee xabáa chee' ca' xuluxue' Lue'.

<sup>11</sup> Xelechísaqueze' Lue' nen ne'e, chee quebe gaca we' ni'u lawe' xiaj ca'.

<sup>12</sup> Jesús bechebe':

—Cá'anqueze naxúaj na lu xiche chee Dios, dxē'e bēnneache: "Quebe guchínenu' ca dxaca lazru' Xranu' Dios."

<sup>13</sup> Gate da xriwe' québedxa bezrela lazre' na ájala gun zréaje na Jesús, na' becuasa na tu chi'i.

*Jesús dxune' zrin chee' naga nababa Galilea*  
 (Mt. 4.12-17; Mr. 1.14-15)

<sup>14</sup> Na' Jesús bezrine' Galilea, ba nápalē'e xel-la waca chee Be' Lá'azxa, na' ca naca xézredu ca' zaj nababa na' buluchálaj bēnneache ca naca xel-la waca chee'. <sup>15</sup> Jesús bsédene' benne' ca' tu tu lu xudau' ca', na' xúgute' belúe lá'ane' Le'.



*Jesús dxexezrine' Nazaret**(Mt. 13.53-58; Mr. 6.1-6)*

<sup>16</sup> Nadxa Jesús bezrine' Nazaret, xezre naga bgule'. Lu zra dxulupá'ana benne' judío ca' guxú'e lu xu'u ga na' dxelezraga benne' judío ca', ca xu'u lawe' dxune', chee gulabe' da naxúaj na lu xiche chee Dios. <sup>17</sup> Buludé'e Lu ne'e xiche naga naxúaj dizra' bzuaj Isaías, benne' bchálaje' waláz chee Dios, na' gate gusalaje' na, na' blabe' naga naxúaj da dxenná:

<sup>18</sup> Be' Lá'azxa chee Xránadxu zúalene' neda',

lawe' da guqu'é'e neda' chee guchálajlana' benne' baxache' ca' dizra' chawe' chee'.

Gusel-le' neda' chee xexuna' benne' ca' quebe chawe' zaj zue',

ne chee guzenda' benne' ba zaj nadxéaj' lu da zrinnaj, waca xelelé',

ne chee xexuna' lau benne' la chul-la ca',

ne chee guselá' benne' dxelezaca zi'e,

<sup>19</sup> ne chee guzenda' bénnache ba bzrin zra Xránadxu Dios gucá'ane' le' chawe'.

<sup>20</sup> Nadxa Jesús butube' xiche na', na' bde'e na lu na' benne' dxuxúe' xu'u na', na' bebé'e. Xúgute' benne' zaj zre'e lu xu'u na' dxelenné'e Le', <sup>21</sup> na' Jesús guzú lawe' dxé'e benne' ca':

—Na'a zra guca ca da naxúaj na laule le'e.

<sup>22</sup> Xúgute' gulenné' chawe' chee Jesús, ne belexebánene' ca naca dizra' chawe' da dxuchalaje'. Na' buluchebe ljwezre':

—¿Quegá benne' nigá zri'ine José?

<sup>23</sup> Jesús guzre' le':

—Da líqueze le'e wele neda' dizra' nigá: Lue', benne' dxexúnu' benne' we' ca', bexún cuinu', ne xeje neda': Ca da bémentu' benu' lu xezre Capernaum, cá'anqueze ben na lázriu' nigá na'a.

<sup>24</sup> Nadxa gunná Jesús:

—Da li dxapa' le'e, tu benne' dxuchálaje' waláz chee Dios, quebe nu dxue le' ba lá'ana lazrie'. <sup>25</sup> Dxapa' le'e, gulezrá' nu'ula zan ba gulate benne' chee' lu xezr la xu Israel ca lu zra guzúa Elías, benne' bchálaje' waláz chee Dios, gate na' quebe guca xiuj chun iza xugachaj, ne gúcale'e gubina' ca naca xezr la xu na'. <sup>26</sup> Dios quebe gusel-le' Elías lau netú nu'ula, nate benne' chee', zue' xezr la xu Israel. Gusel-le' le' lau tu nu'ula, nate benne' chee', zue' lu xezre Sarepta, da zua na gagu naga dxé' xezre Sidón. <sup>27</sup> Cá'anqueze gulezrá' benne' zan benne' dxeledxé'ene' we' guzru' lu xezr la xu Israel ca lu zra guzúa Eliseo, benne' bchálaje' waláz chee Dios, na' netúg' quebe bexaque'. Tuze Naamán, benne' xezr la xu Siria bexaque'.

<sup>28</sup> Gate belén benne' ca' zaj zre'e xu'u na' da nigá, na' belezrá'ale'e. <sup>29</sup> Na' gulase', ne belexebéajé' Jesús xezre na', na' beleché'e Le' dxu'a chjéaj naga zria xezre na', chee xuludxixre' Le' na'. <sup>30</sup> Na' Jesús bedé'e ládujla benne' ca', na' bezé'e zexíajé'.

*Jesús dxexune' tu benne' xu'e be' xriwe'**(Mr. 1.21-28)*

<sup>31</sup> Nadxa Jesús bexíajé' Capernaum, tu xezre nababa Galilea, na' guzú lawe' dxusédene' benne' ca' lu zra lá'azxa chee judío ca'. <sup>32</sup> Belexebánene' ca naca da dxusédene', lawe' da dxuchálaje' ca tu benne' napé' xel-la dxenná bea.

<sup>33</sup> Lu xu'u na' zua tu benne' xu'e be' xriwe', na' dxebezre xe'e, <sup>34</sup> dxenné':

—Bsan netu'. ¿Bizr chee na' dxunu' netu' zede, Jesús, benne' Nazaret? ¿Za'u guzría xi'u netu'? Neda' núnbe'a Lue', ne nezda' nacu' benne' lá'azxa chee Dios.

<sup>35</sup> Jesús gudil-le' be' xriwe' na', dxenné':

—Zrize guzúa. Bsan benne' biu nigá.

Nadxa be' xriwe' na' gudín na bénnea' xu lau xúgute' benne' ca', na' bedxúaj na lu xichaj lázrdau bénnea', ne quebe bi ben na chee'. <sup>36</sup> Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'ene' be' xriwe' ca' nen duté xel-la dxenná bea chee', ne nen xel-la waca, na' be' xriwe' ca' dxeledxúaj na.

<sup>37</sup> Na' buluchálaje' ca naca chee Jesús xúgute' lu xezre ca' zaj nababa na'.

*Jesús dxexune' xrna zru'ula Pedro**(Mt. 8.14-15; Mr. 1.29-31)*

<sup>38</sup> Nadxa bedxúaj Jesús lu xu'u na', na' guxú'e lizre Simón. Xrna zru'ula Simón na' quebe chawe' zue', xú'ule'e da la, na' gulata' xuene' Jesús xexune' le'. <sup>39</sup> Jesús gubigu'e'e cuite', na' gudil-le' da la na', na' bedxúaj na. Ca ná'queze bexásate', na' guzú lawe' dxuseni'e da xelawe'.

*Jesús dxexune' benne' zan quebe chawe' zaj zue'**(Mt. 8.16-17; Mr. 1.32-34)*

<sup>40</sup> Ca dxebía gubizra, benne' ca' zaj nnita' benne' quebe chawe' zaj zue' lizre' belú'e le' lau Jesús, na' Le' bzé ne'e tu tu benne' ca', ne bexune' le'. <sup>41</sup> Cá'anqueze zánete' be' xriwe' belexedxúaj na lu xichaj lázrdau benne' ca'. Dxelenná na:

—Lue' nacu' Zri'ine Dios.

Jesús gudil-le' be' xriwe' ca'. Quebe be'e na latax xelenné na, lawe' da zaj neze na naca Le' Cristo.

*Jesús dxuchálaje' naga nababa Galilea  
(Mr. 1.35-39)*

<sup>42</sup> Ca dxani'sise', bdxuaj Jesús xezre na', guxiáje' naga xeajsúe' tuze'. Na' benne' ca' belexexilaje' Le', na' belezrine' xuluzague' Le' chee quebe xeze'e. <sup>43</sup> Jesús gunné':

—Dxun na ba xen guzenda' bèneache xezicadxa xezrdu ca' ca dxenná bea Dios, lawe' da chee guna' caní gusel-le' neda'.

<sup>44</sup> Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dxelezraga judío ca' lu xezre ca'.

## 5

*Dxelezené' bela zan  
(Mt. 4.18-22; Mr. 1.16-20)*

<sup>1</sup> Gate zua Jesús dxu'a nísadau' chee Genesaret, na' belezrin benne' zan, ne buluchídeté' Le', lawe' da dxelaca lazre' xelenné' xrtizra' Dios. <sup>2</sup> Jesús blé'eng' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba belexdxúaj benne' wezén bela ca' lu'ule da dxedá lawe' nísadau', na' zaj zre'e dxelexibe' xixruj chee' ca'. <sup>3</sup> Nadxa guxú'u Jesús tu lu da dxedá lawe' nísadau', da naca na chee Simón, na' guzre' Simón guzrigue' na xelate' lu nísadau' na'. Jesús gudxé' lu da dxedá lawe' nísadau' na', na' guzú lawe' dxusédene' benne' ca'. <sup>4</sup> Ca behxuzre bchálaje', na' guzre' Simón:

—Bsa da dxedá lawe' nísadau' chiu' naga nácadxa situj nísadau', na' le guzal-la xixruj cheele na' chee senle bela.

<sup>5</sup> Simón bechebe':

—Benne' Weséde, bedú xela bentu' zrin, ne quebe bi bela ne sentu'. Lu dizra' chiu', na'a guzal-la' xixruj nigá.

<sup>6</sup> Ca beluné' ca gunná Jesús, na' bela zanté gulezene', na' gúcaté wadxeza xixruj na'. <sup>7</sup> Nadxa bulutá ne'e gulenné' benne' ljwezre' zaj zre'e xetú lu da dxedá lawe' nísadau' chee xelácalene' le'. Benne' ca' belezrine', na' bulusezrate' dxúpaté da dxedá lawe' nísadau' ca', na' gulácaté na zi'i, ne dxácaté welaze na lu nísadau'. <sup>8</sup> Gate ble'e Simón Pedro da nigá, na' bzu zribe' lau Jesús, gunné':

—Gucuasa cuita' neda', Xran, lawe' da naca' neda' benne' dul-la.

<sup>9</sup> Caní gunná Simón lawe' da dxezrébele'e ne chee da guca na, ne cá'aqueze dxelezrebe benne' ljwezre' ca', gate belelé'eng' bela zan ca'. <sup>10</sup> Cá'aqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná atela su lau' senu' bèneache lu da naca chee Dios.

<sup>11</sup> Nadxa, ca belexebéaje' da dxedá lawe' nísadau' na' dxú'ela nísadau', na' bulucá'ane' ca naca da ca', na' zjálacene' Jesús.

*Jesús dxexuné' tu benne' dxé'eng' we' guzru'  
(Mt. 8.1-4; Mr. 1.40-45)*

<sup>12</sup> Gate Jesús zue' tu xezre, na' bzrin tu benne' dxé'eng' we' guzru', na' ca blé'eng' Jesús, bzu zribe', ne gudíxrujté lawe' lu xu, na' bca'ana szrene' Le', gunné':

—Xran, che dxaca lazru', waca xexunu' neda'.

<sup>13</sup> Nadxa Jesús bte'-be' nen ne'e, gunné':

—Dxaca lazra'. Bache hexacu'.

Ca gunné' ca', we' guzru' na' bedxúajté na. <sup>14</sup> Jesús bsebage' bènea' quebe nu xe'e da nigá. Nadxa gunné':

—Guxiáj na'a, xeajlé'e cuinu' lau bxruze, ne gulú'u dumí chee xexádxeu' lau Dios ca da gunná be'e Moisés chee xeleneze benne' ba hexacu' ca naca xízrawé' chiu'.

<sup>15</sup> Ca naca xel-la waca chee Jesús bzrilujdxa na, na' benne' zanté belezrague' lau Jesús chee xelenné' da dxuchálaje', ne chee xexuné' le' ca naca xízrawé' chee'. <sup>16</sup> Nadxa Jesús bezé'e na', na' bzrine' naga quebe nu chilá' benne', na' bchálajlene' Dios.

*Jesús dxexuné' tu benne' naxrú'üne ni'a ne'e  
(Mt. 9.1-8; Mr. 2.1-12)*

<sup>17</sup> Tu zra zua Jesús dxusédene', na' bal-la benne' xudau' fariseo ca', ne benne' dxulux-uzájle'e da nadxixruj be'e Moisés, zaj dxe'e na', benne' zá'aque' ca naca xézredu ca' zaj nababa Galilea, ne xezre ca' zaj nababa Judea, ne chee xezre Jerusalén, na' zúale xel-la waca chee Xránadxu Dios Jesús, na' hexuné' benne' ca' quebe chawe' zaj zue'. <sup>18</sup> Nadxa belezrin tapa benne' zaj nu'e tu benne' zua zri ni'a ne'e, dee' tu lu blaga', na' gulaca lazre' xelegú'e le' lu xu'u chee xelíxrue' le' lau Jesús. <sup>19</sup> Quebe guca xelezrine' lau Jesús lawe' da zralé'e benne'

zan ga na'. Nadxa gulegüéne' chju'ula, ne gulesaluje' chju'u, na' bululétaje' benne' na' de' lu blaga' ládujla benne' zan ca' lau Jesús. <sup>20</sup> Gate ble'e Jesús ca' dxeléajle benne' ca' chee', na' guzre' benne' quebe chawe' zue':

—Bénne'dau', ba bnite lawa' dul-la chiu'.

<sup>21</sup> Nadxa benne' ca' dxuluxuzájle' da nadxixruj bea na, ne benne' xudau' fariseo ca' gulezú lawe' dxelenné' lu xichaj lázrdawe': ¿Nuzra benne' nigá, dxenné' schanni' chee Dios? Quebe nu benne' séquene' gunite lawe' dul-la chee' bénneache. Tuze Díos gaque'.

<sup>22</sup> Jesús dxéquebe'ene' da dxelenné' lu xichaj lázrdawe', na' guzre' benne' ca':

—¿Bizr chee' na' dxéquele le'e caní? <sup>23</sup> ¿Bízrala na quebe naca na stebe guna', che xapa' benne' nigá: Ba bnite lawa' dul-la chiu', u che xapa' le': Guxasa bexíaj? <sup>24</sup> Gulé'eda' le'e neda', Benne' Gulje' Bénneache, napa' xel-la dxenná bea lu xezr la xu nigá chee' gunite lawa' dul-la chee' bénneache.

Nadxa guzre' benne' na' naxrú' une ni'a ne'e':

—Lue' dxapa', bexasa, bexúa blaga' chiu', ne bexíaj.

<sup>25</sup> Ca gunné' ca', bexásate' benne' na' lau xúgute' benne' ca', na' bequé'e' blaga' chee', ne bezé'e' zexíaje' lizre' zeajxé' lá'ane' Dios. <sup>26</sup> Xúgute' benne' ca' belexebánene', na' belúe' lá'ane' Dios, ne nen xel-la dxelezrebe gulenné':

—Na'a ble'edxu da dxebánenezdxu.

*Jesús dxenné' Leví*

*(Mt. 9.9-13; Mr. 2.13-17)*

<sup>27</sup> Ca gudé na' bezá'a Jesús, na' blé'ene' tu benne' dxuchizruje' waláz chee' xezre Roma, le' Leví. Dxe'e' naga dxuchízruje', na' guzre' le':

—Ben neda' tuze.

<sup>28</sup> Na' guxasa Leví, bca'ane' ca' naca chee' ca', na' guxíajlene' Jesús.

<sup>29</sup> Ca gudé na', Leví gulu'e' tu xrche' zrenté' lizre' chee' bca'ana szrene' Jesús, na' zrále'eqeaze na' xezícadxa wechizruj ca', ne xezícadxa benne' zaj dxe'e' dxágulene' benne' ca'. <sup>30</sup> Na' benne' xudau' fariseo ca', ne benne' ca' dxuluxuzájle' da nadxixruj bea na gulezú lawe' dxelézí tizre' benne' ca' dxusede Jesús, dxelé'e' le':

—¿Bizr chee' na' dxe'aj dxágulele benne' wechizruj caní, ne benne' dul-la ca'?

<sup>31</sup> Jesús bechebe':

—Quebe zaj nachine benne' zaj zua chawe' nu benne' dxexúne' le'. Benne' quebe chawe' zaj zue' dxelechínene' le'. <sup>32</sup> Neda' quegá za'a dxennéa' benne' xrlátaje. Za'a dxennéa' benne' dul-la, chee' xelxebe'i lazre'.

*Dxuluchebe' Jesús ca naca chee' gubasa*

*(Mt. 9.14-17; Mr. 2.18-22)*

<sup>33</sup> Nadxa buluchebe' Jesús:

—¿Bizr chee' na' dxelúnle'e' gubasa, ne dxuluchálajle Dios benne' ca' zjácálene' Juan, ne benne' ca' zjácálene' benne' xudau' fariseo ca', san benne' ca' dxusédenu' tu dxelé'aj dxeláguzqueze'?

<sup>34</sup> Jesús bechebe':

—¿Wazéquele xele benne' zaj zra' laní chee' wechaga na' xelune' gubasa dxácaté na' zua benne' wechaga na' nen benne' ca'? <sup>35</sup> Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

<sup>36</sup> Nadxa bchálajlene' le' ca naca da dxulé'e' nigá:

—Quegá nu benne' cheze' tu zre' cube chee' xudé'e' na tu zre' gula. Che ca' guné', na' guzría xi'e' ca naca zre' cube na', na' ládxe'du cube na' quebe gulé'e' na cháwedau' nen ladxe' gula na'.

<sup>37</sup> Cá'anqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'.

<sup>38</sup> Chee' le' na' dxal-la' cá'adxu xrise uva cube lu bzude xide cube, na' dxúpaté na' xegá'ana chawe' na. <sup>39</sup> Che tu benne' xí'aje' xrise uva wal-la gula, québedxa nna na chee' xí'aje' xrise uva cube, lawe' da dxenné': "Nétajdxa da gula na'."

## 6

*Benne' ca' dxusede Jesús dxelálaje' dau zrua' xtila lu zra lá'azxa chee' judío ca'*

*(Mt. 12.1-8; Mr. 2.23-28)*

<sup>1</sup> Tu lu zra lá'azxa chee' judío ca', gudé Jesús naga naxaza zrua' xtila, na' benne' ca' dxusédene' zjaque' dxelálaje' dau zrua' xtila, na' dxelezrube na nen ne'e', ne dxelawe' zrua' xtila na'. <sup>2</sup> Nadxa benne' xudau' fariseo ca' buluchebe' le':

—¿Bizr chee' na' dxunle le'e' tu zrin da quebe naca na gunle zra lá'azxa cheedxu?

<sup>3</sup> Jesús bechebe':

—¿Quebe ne gulábale le'e ca ben David ne benne' ljwezre' ca' gate guleduné'? <sup>4</sup> Guxú'u David na' tu lu xudau' cheé Dios, ne guqué'e xeta xtila da galú'u bxruze lau Dios, na' gudawé' na, ne bné'zrujté' cheé benne' ca' zjácálené' le', ne quebe naca cheé' xelawé' xeta xtila na'. Tuze bxruze ca' naca cheé' xelawé' na.

<sup>5</sup> Cá'anqueze guzre Jesús benne' ca':

—Neda', Benne' Gulje' Bénneache, nápaqueza' xel-la dxenná bea ca naca cheé zra lá'azxa.

*Jesús dxexuné' benne' nazrinnaj ne'e*

(Mt. 12.9-14; Mr. 3.1-6)

<sup>6</sup> Xetú lu zra lá'azxa cheé judío ca', guxú'u Jesús tu lu xu'u, na' guzú lawé' dxusédene' benne' zaj nazragué' na'. Zua na' tu benne' nazrinnaj ne'e xabéla. <sup>7</sup> Benne' ca' dxulux-uzájlé'e da nadxixruj bea na, ne benne' xudau' fariseo ca' dxuluzre' Jesús cheé xelélé'ene' che xexún Jesús bénnea' lu zra lá'azxa cheé', cheé xezelequene' xelawé' zria Jesús. <sup>8</sup> Jesús ba nézene' ca da dxelegú'u lazre', na' guzre' bénnea' nazrinnaj ne'e:

—Guxasa, ne guzé laduj nigá.

Benne' na' guxase', na' guzé' na'. <sup>9</sup> Nadxa gunná Jesús, guzre' benne' ca':

—Na'a gucheba' le'e tu: ¿Bízrala na' waca gundxu zra lá'azxa chee'e, da xrlátaje che da calela? ¿Gucache cháwedxu xel-la nabán cheé tu benne', che guzria xidxu na'?

<sup>10</sup> Nadxa Jesús guné'e benne' ca' zaj naxechaj Le', na' guzre' benne' wé' na':

—Bli na'u nigá.

Benne' na' bēne' ca', na' hexácaté ne'e na'. <sup>11</sup> Na' benne' ca' zaj zre'e na' belezrá'ale'e, na' gulezú lawé' dxuluchebe ljwezre' bi xezelequene' xeluné' cheé Jesús cheé xuluzria xi'e Le'.

*Jesús dxequé'e benne' chazrinnu ca' xelaque' gubáz cheé'*

(Mt. 10.1-4; Mr. 3.13-19)

<sup>12</sup> Ca lu zra na' Jesús guxíajé' tu lu xi'a xeajchálajlene' Dios, na' guzúe' bedú xéla dxuchálajlene' Dios. <sup>13</sup> Ca guxani' gunné' benne' ca' dxusédene', ne guqué'e chazrinnu benne' ca', na' bzre'e benne' ca' xelaque' gubáz cheé'. <sup>14</sup> Benne' caní zaj naque':

Simón, (bénnea' bzue' le' Pedro),

Andrés, (benne' biche Simón na'),

Jacobo, Juan, Felipe, Bartolomé,

<sup>15</sup> Mateo, Tomás,

Jacobo, (zri'ine Alfeo),

Simón, (bénnea' dxedábague' benne' Roma ca')

<sup>16</sup> Judas, (benne' biche Jacobo), ne

Judas Iscariote, (bénnea' gudé'e Jesús lu na' benne' ca' dxeledábague' Le').

*Jesús dxusédene' benne' zante*

(Mt. 4.23-25)

<sup>17</sup> Jesús bdiinne' lu xi'a na' nen benne' ca' dxusédene', na' bzrine' tu lache' nen benne' ca'. Benne' zan zaj zre'e na' zaj nababé' xezre ca' zaj nababa Judea, ne Jerusalén, nen benne' zaj nababé' Tiro, ne Sidón. Benne' caní belelé'e cheé xelenne' da dxuchalaj Jesús, ne cheé xexún Jesús le' ca naca xízrawé' dxeledxé'ene'. <sup>18</sup> Cá'anqueze benne' ca' zaj xu'e be' xriwe' belexaque'. <sup>19</sup> Xúguté' benne' ca' gulaca lazre' xuluté' Jesús lawe' da dxexún Le' xúguté' nen xel-la waca cheé'.

*Benne' ca' naca da ba neza zren cheé', ne benne' ca' zaj naque' baxache'*

(Mt. 5.1-12)

<sup>20</sup> Nadxa Jesús gunné'e benne' ca' dxusédene', na' guzre' le':

—Ba neza zrenté naca na chee'e le'e, dxéquebe' ele nácale benne' xache', lawe' da waxú'ule le'e naga dxenná bea Dios.

<sup>21</sup> Ba neza zrenté naca na chee'e le'e, dxedunle da dxunna Dios, lawe' da wélajquezle.

'Ba neza zrenté naca na chee'e le'e, dxebézrele ne cheé dula, lawe' da guzrízrequezle.

<sup>22</sup> 'Ba neza zrenté naca na chee'e le'e, gate xelecuiide bénneache le'e, ne gate xelexebéajé' le'e chalé'ajla, ne gate xelenné' schanni' chee'e, ne gate xulucá'ana ditje' lale ca tu da sban lawe' da nácale bi chia' neda', Benne' Gulje' Bénneache. <sup>23</sup> Le béle'e, ne le sua lu da ba neza lu zra na' lawe' da zrué'ele tu da zren lu xabáa cheé Dios. Cá'anqueze benne' xra xrtau benne' caní bulusaca zi'e benne' ca' buluchálajé' waláz cheé Dios.

<sup>24</sup> 'Baxache' nácale le'e, benne' gunní'a, lawe' da ba nápale xel-la dxebé da naca cheé xezr la xu nigá.

<sup>25</sup> 'Baxache' nácale le'e, nélajle na'a, lawe' da wadunle le'e.

'Baxache' nácale le'e dxuzrízrele na'a, lawe' da cuezre xáchele.

<sup>26</sup> 'Baxache' nácale le'e gate xúgute bénneache dxelenné' da chawe' cheeḷe, lawe' da ca' belún xra xrtáule, gulenné' da chawe' chee benne' wən lazre' ca', benne' gulenné': "Netu' dxucháajntu' waláz chee Dios."

*Dxal-la' zri'idxu benne' ca' dxelecuidene' dxi'u*  
(Mt. 5.38-48; 7.12)

<sup>27</sup> Na' gunná Jesús:

—Dxapa' le'e dxénele chia', le zri'i benne' ca' dxelecuidene' le'e, ne le gun chawe' chee benne' ca' dxelezré'e le'e. <sup>28</sup> Le nne chawe' chee benne' ca' dxelenné' caleḷa cheeḷe, ne le naba lau Dios gaca chawe' chee benne' ca' dxelenné' schanni' cheeḷe. <sup>29</sup> Che nu benne' cape' xrágale, le guzete xecha la'a, ne che nu benne' que'e xicha cheeḷe, le güe lataj ca'ate' zrale. <sup>30</sup> Le gunezruj núteteze benne' bi nabé' le'e, ne che nu benne' que'e da naca cheeḷe, quebe xenábale na. <sup>31</sup> Le gun chee bénneache cáteze na' dxaca lázrele xelune' cheeḷe.

<sup>32</sup> 'Che le'e nazri'ile tuze benne' ca' zaj nazri'ine' le'e, ḷbízraqueze da chawe' dxunle? Cá'anqueze dxelún benne' ca' dxelune' da caleḷa. <sup>33</sup> Che dxunle chawe' chee tuze benne' ca' dxelune' le'e chawe', ḷbízraqueze da chawe' dxunle? Cá'anqueze dxelún benne' wən da zrinnaj ca'. <sup>34</sup> Che bi dxusanle chee tuze benne' ba nézele wexunne' na, ḷbízraqueze da chawe' dxunle? Cá'anqueze benne' wən da caleḷa ca' dxulusane' da naca chee' chee benne' ca' dxelune' da caleḷa, lawe' da zaj nézene' wulunézrujte benne' ca' le' na. <sup>35</sup> Dxal-la' zri'ile le'e benne' ca' dxelezré'e le'e, ne gunle da chawe' chee', ne gusanle chee benne' ca' da xelenabe' le'e, lácala quebe xellexunne' na. Che gunle ca', da zrendxa da si' lu na'le, ne gácale bi ca' chee Dios szrente, lawe' da naca Le' zri'i lazre' nen benne' ca' quebe dxellexzaca ba lazre', ne benne' wən da caleḷa ca'. <sup>36</sup> Le xezri lazre' bénneache ca dxun Dios, dxezri lazre' le'e.

*Quebe guzúale chalá'ala le sa' ljwézrele*  
(Mt. 7.1-5)

<sup>37</sup> Na' gunná Jesús:

—Quebe guzúale chalá'ala le sa' ljwézrele, na' Dios quebe guzúe' le'e chalá'ala. Quebe bi nnele chee le sa' ljwézrele, na' Dios quebe guchi'e cheeḷe le'e. Le gunité lau chee le sa' ljwézrele, na' Dios gunité lawe' cheeḷe le'e. <sup>38</sup> Le gunezruj chee bénneache, na' Dios gunne' cheeḷe le'e. Dios cu'e lu xcuite cheeḷe tu xi'ina da nálate, ne da naxi'tequeze, ne guníbete' na, ne sua dí'atequeze na. Dios gudxírxrequeze' cheeḷe ca da dxudxírxrele chee bénneache.

<sup>39</sup> Nadxa Jesús bchálage' da dxulé'e nigá, gunné':

—ḷwaca tu benne' la chul-la cu'e neza xetú la chul-la? Che ca' gune', dxúpaté' xelebixre' tu lu xedxu. <sup>40</sup> Netú benne' dxuséde gácadxe' szren ca naca bénnea' dxusédené' le', na' gate xuzre gusédie', gaque' ca naca bénnea' bsédené' le'.

<sup>41</sup> 'ḷBizr chee na' dxenná'u bébedu na' xu'u na xiaj lau le sa' ljwezru', ne quebe dxéquebe'enu' ca naca da zren da xu'u na xiaj lau' lue'? <sup>42</sup> Che quebe dxéquebe'enu' ca naca da zren na' da xu'u na xiaj lau' lue', ḷájazra dxunu' dxexázrenu' dxu'u le sa' ljwezru': "Benna lataj xebéaj'a' bébedu na' xu'u na xiaj lau'?" Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedeau' xebéaj'u' bébedu na' xu'u na xiaj lau le sa' ljwezru'.

*Naca bea tu benne' ne chee da dxune'*  
(Mt. 7.17-20; 12.34-35)

Nadxa gunná Jesús: <sup>43</sup> —Tu xaga xrlátaje quebe cuía na da zixre caleḷa, na' xaga da quebe naca chawe' quebe gaca cuía na da zixre chawe'. <sup>44</sup> Tu tu xaga naca bea na ne chee da zixre da dxebiá na. Quebe gaca guchíbedxu da zixre chee xaga higo tu lu xaga xeche', ne quebe guchíbedxu da zixre chee lba uva lu xeche' bisigá. <sup>45</sup> Benne' xrlátaje, da xrlátaje dxenné' bénnea' lawe' da naxaza da xrlátaje lu xichaj lázrdawe', na' benne' wən da caleḷa, da caleḷa dxenné' bénnea' lawe' da xu'u da caleḷa lu xichaj lázrdawe'. Dxu'e na' dxenné' na ca naca da xu'u lu xichaj lázrdawe'.

*Dxuchalaj Jesús chee chupa lane xu'u*  
(Mt. 7.24-27)

Gunná Jesús: <sup>46</sup> —ḷBizr chee na' dxéle neda': "Xran, Xran", ne quebe dxunle ca da dxapa' le'e? <sup>47</sup> Xapa' le'e aja naca bénnea' ze'e nen neda', ne dxenne' xrtizra'a, ne dxune' ca da dxapa' le'. <sup>48</sup> Naque' ca tu benne' bene' tu xu'u. Da zren gudene', na' bzrie' lane na lawe' xiaj xre. Gate bdxuaj xegu, na' xeajchú'ule'e na le'e xu'u na', quebe bi guzeque' gune na xu'u na' lawe' da zria lane na lawe' xiaj xre. <sup>49</sup> Na' bénnea' dxenne' xrtizra'a, ne quebe dxune' ca da dxapa' le', naque' ca tu benne' bene' xu'u chee' lawe' xu dxeze, ne quebe guzale' lane na, na' gate bdxuaj xegu na', ne xeajchú'ul'e' na le'e xu'u na', na' guché na le' na, na' tu chí'izqueze bzria xi na le' na.

## 7

*Jesús dxexuné' bi wən zrin chee tu benne' Roma*  
(Mt. 8.5-13)

<sup>1</sup> Gate hexuzre bchájlajle Jesús benne' ca', na' bezé'e xezíajé' Capernaum. <sup>2</sup> Zua tu benne' Roma na', benne' dxenná be'e lu wedil-la, na' zua tu bi wən zrin chee' nazrí'ile'ene'-be', na' bi na' quebe chawe' zúabe', ne dxaca wátebe'. <sup>3</sup> Gate ben benne' Roma na' ca da dxun Jesús, na' gusé-le' bal-la benne' gula sina chee' judío ca', chee' xeajleguezre' Jesús xidé' xexuné' bi wən zrin chee'. <sup>4</sup> Benne' gula ca' belezrine' lau Jesús, na' gulezú lawe' dxelata' xuene' Le', dxelenné':

—Benne' Roma nigá naca chee' gácalenu' le', <sup>5</sup> lawe' da dxape' ba lá'ana xezre cheedxu, na' léqueze' bene' tu xu'u cheedxu ga dxezragadxu.

<sup>6</sup> Nadxa Jesús guxíajlene' benne' gula ca'. Gate belezrine' gagu naga zua lizre benne' Roma na', le' gusé-le' bal-la benne' ljwezre' xeajleguezre' Jesús:

—Xran, quebe senu' gunne xue, lawe' da quebe naca chia' chu'u lizra'. <sup>7</sup> Chee le' na' ne quebe bexazrda' neda'queza' xedajdilja' Lue'. Cun gunnaze, na' xexaca bi wən zrin chia'. <sup>8</sup> Neda'queza' zua benne' dxenná bé'ene' neda', na' neda' dxenná be'eda' benne' dxjaca wedil-la. Che xapa' tu bènnea': Guxíaj, na' waxíajbe', ne che xapa' xetube': Gudá, na' wídabe', ne che nna be'eda' bi wən zrin chia' da gunbe', na' gunbe' na.

<sup>9</sup> Gate ben Jesús da nigá, na' bebánene', na' gunné'e benne' ca' zjácale Le', gunné':

—Da li, quebe ne cheajxraca' tu benne' xezre Israel dxeajli lazre' neda' ca dxun benne' nigá.

<sup>10</sup> Gate belezrine' benne' ljwezre benne' Roma na' lizre', na' belelé'ene' ba bexaca bi wən zrin na'.

*Jesús dxusebang' bi biu chee tu nu'ula ba gute benne' chie'*

<sup>11</sup> Ca gudé na' Jesús guzé'e zéajé' tu xezre da nazí le na Naín, na' xjácale Le' benne' ca' dxusédené', ne benne' zante. <sup>12</sup> Gate bzrine' gáguze naga zua xezre na', blé'ene' benne' zaj nu'e tu bi gate zeajlecache'-be', na' naca be' bi tulicha' chee' xrnabe', nu'ula na' ba gute benne' chie'. Benne' zan, benne' lazrie' zjácalene' le'. <sup>13</sup> Gate Xránadxu blé'ene' nu'ula na', na' bexache lazre' le', ne guzre' le':

—Québedxa cuezru'.

<sup>14</sup> Nadxa gubiga Jesús dxu'a xi'ina xu'ube', na' bté' na. Na' benne' ca' zeajlexexu'e-be' gulague'. Na' Jesús guzre' bi gate na':

—Bidau', dxapa' lue', guxasa.

<sup>15</sup> Na' bi na' ba nate bexásabe' gudxe'be', na' bezú laube' dxuchálajbe'. Na' Jesús bunézruje'-be' lu na' xrnabe'. <sup>16</sup> Gate belelé'e benne' ca' da nigá, na' belezrebe', ne gulezú lawe' dxelúe lá'ane' Dios, dxelenné':

—Tu benne' zrenté, benne' dxenné' waláz chee' Dios, ba ble'e ládujla dxi'u.

Cá'anqueze dxelenné':

—Dios ba ble'e dxácalene' xezre chee'.

<sup>17</sup> Ca naca naga nababa Judea, ne xezre walíaz chee' na belén bènneache ca naca xel-la waca chee' Jesús.

*Juan, bènnea' bchué' bènneache nisa dxesel-le' gubáz chee' lau Jesús*  
(Mt. 11.2-19)

<sup>18</sup> Naga xu'u Juan lizre xia, bènene' ca naca chee' da nigá lawe' da benne' ca' zjácalene' Juan buluzenne' le' da dxaca na. Juan gunné' chupa benne' ca', <sup>19</sup> na' gusel-le' le' lau Jesús chee' cheajlechebe' Le' che da li naque' Cristo, bènnea' dxal-la' xidé', u che dxal-la' xelebeze' benne' xula. <sup>20</sup> Nadxa benne' ca' gusel-la Juan belezrine' lau Jesús, na' gulé'e Le':

—Juan, bènnea' bchué' bènneache nisa nasele' netu' zedajchébentu' Lue' che Lue' na' nacu' Cristo, bènnea' dxal-la' xidé', u che dxal-la' cuézant'u' benne' xula.

<sup>21</sup> Ca lu zra na' Jesús hexuné' benne' zanté benne' we', ne benne' dxé'ene' xízrawé' da dxedá du zren, ne benne' ca' zaj xu'e be' xriwe', na' bexuné' benne' la chul-la ca'. <sup>22</sup> Nadxa Jesús guzre' benne' ca' nasele' la Juan:

—Le cheajxaca, ne le xé Juan ca naca da ba ble'ele, ne da bénele. Benne' la chul-la ca' dxelexelé'ene', na' benne' zrinnaj ca' dxelexedé', na' benne' dxeledxé'ene' we' guzru' ba belexaque', na' benne' xache' ca' dxelenne' dizra' chawe' chee' Dios. <sup>23</sup> Ba neza zren naca na chee' benne' quebe gusán lazre' neda'.

<sup>24</sup> Gate besí'aca benne' ca' gusel-la Juan, na' Jesús guzú lawe' dxuchálajlene' benne' zaj zré'e na' ca naca chee' Juan na', dxenné':

—¿Bizra guxíajle le'e xeajjna' le le'e xixre' lawe' lataj? ¿Tu xia xtila da dxutá be'? <sup>25</sup> Che cabí, ¿bizra xeajjna'le? ¿Tu benne' nacu' zra lane' da zácale'e? Ba nézquezele le'e benne' ca'

dxelacu zra lanë' da zácale'e, ne dxelé'aj dxelawë' da zácale'e zaj zre'e lizre benne' blau ca'. <sup>26</sup> Che cabí, ¿bizra xeajinna'le? ¿Tu benne' dxuchálajë' waláz chee Dios? Awe', blë'ele tu benne' nácadxë' szren ca tu benne' dxuchálajë' waláz chee Dios. <sup>27</sup> Juan nigá naque' bënnea' naxúaj na chee' lu xiche chee Dios, dxenné':

Dxesel-la' gubáz chia' lau Lue',

chee' gucá'ana chawë' neza naga teu'.

<sup>28</sup> Dxapa' le'e, ládujla xúgute' benne' quebe nu chilá' benne' dxuchálajë' waláz chee Dios nácadxë' szren ca Juan nigá. Na'a benne' nácadxë' dxexrui lazre' naga dxenná bea Dios nácadxë' blau ca Juan nigá.

<sup>29</sup> Na' gunná Jesús:

—Gate na' benne' dxexrui lazre' ca', ne benne' wechizrui ca' belenne' da dxuchalaj Juan, guleque bé'eng' Dios naque' xrlátajë, na' beledxúë' nisa lu na' Juan. <sup>30</sup> Benne' xudau' fariseo ca', ne benne' ca' dxuluxzájle'e da nadxixrui bea na buluzúë' chalá'ala ca naca da dxaca lazre' Dios gunë' chee' na' quebe beledxúë' nisa lu na' Juan.

<sup>31</sup> Na' gunná Xránadxu:

—¿Ájazra gutil-la lébeda' benne' zaj zre'e na'a zra? ¿ájazra zaj naque'?' <sup>32</sup> Zaj naque' ca bidu ca' dxelebe'be' dxelítajbe' lawe' xi'a, ne dxelebezre xa'abe', dxelebe' bidu ljwézrebe': "Bcúezrentu' bchiuj da bénele, san quebe bxá'ale. Bil-la xácentu', san quebe gudxézrele."

<sup>33</sup> Caní zaj naca benne' ca' lawe' da bla' Juan, bënnea' bchuë' bënneache nisa, ne quebe gudawë' xeta, ne quebe gu'e xrise uva wal-la, na' gulenné' xu'e be' xriwe'. <sup>34</sup> Nadxa bla'a neda', Benne' Guljë' Bënneache, dxe'aj dxawa', na' dxelenné' naca' wagu xrata, ne benne' dxé'ajlé'e, ne dxelenné' naca' ljwezre benne' dul-la ca', ne benne' wechizrui ca'. <sup>35</sup> Xel-la sina chee Dios naca bea na ne chee da dxelún benne' ca' zaj nape' xel-la sina chee Dios.

*Da bchalaj Jesús lizre Simón, benne' xudau' fariseo*

<sup>36</sup> Tu benne' xudau' fariseo gunné' Jesús cheajtawë' xeta lizre', na' Jesús guxiájë' lizre bënnea', na' gudxé'e dxawë'. <sup>37</sup> Nadxa tu nu'ula dul-la chee xezre na', gate benne' bzrin Jesús dxawë' xeta lizre benne' fariseo na', na' bzrin nu'ula na' ga na', nu'e tu da' naca na xiaj zaca, da nazrátë na da dxelá zixre. <sup>38</sup> Gate bzrin nu'ula na' naga zua Jesús, na' gudxé'e zran ni'e dxebezre', ne guzú lawë' dxibe' ni'a Jesús nen nisa dxebezre', ne bsebizre' ni'e nen xicha xíchajë', ne bnupë' ni'a Jesús, na' gulu'e na da dxelá zixre na'. <sup>39</sup> Na' benne' xudau' fariseo, bënnea' gunné' Jesús lizre', gate blé'eng' da nigá, gunné' lu lázrdawë': "Chela benne' nigá da li naque' benne' dxuchálajë' waláz chee Dios, guéquebe'equeze' aja naca chee nu'ula nigá dxuté' ni'e, lawe' da naque' nu'ula dul-la." <sup>40</sup> Nadxa Jesús guzre' benne' fariseo na':

—Simón, dë tu da guchálajlëna' lue'.

Na' bechebe benne' fariseo na':

—Gunná, Benne' Wesëde.

<sup>41</sup> Jesús gunné':

—Chupa benne' dxelal-lë' dumí chee tu benne' tu dxusántëzqueze' benne' dumí. Tue' dxal-lë' chee' lazrui chee' chupiza, na' xetúë' dxebague' lazrui chee' chupa beu'. <sup>42</sup> Lawe' da quebe dxelezéque' xelexixruijë' chee bënnea', na' lë' bnite lawë' chee' dxúpatë benne' ca' ca naca da dxelebaguë' chee'. Na'a gunná, ¿nula benne' caní zrí'idxeng' bënnea'?

<sup>43</sup> Simón bechebë':

—Dxéqueda' bënnea' bnite lawë' chee' da zrendxa.

Na' Jesús guzre' lë':

—Da li dxennáu'.

<sup>44</sup> Nadxa Jesús gunné'e nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu gunná be'enu' quibe ni'a, san nu'ula nigá gudibe' ni'a nen nisa dxebezre', ne bsebizre' na nen xicha xíchajë'. <sup>45</sup> Quebe bnupu' neda', san nu'ula nigá, gate guxú'utea', quebe dxusanë' dxunúpequeze' ni'a. <sup>46</sup> Quebe gulú'u da za xíchajá', san nu'ula nigá gulu'e ni'a da dxelá'le'e zixre. <sup>47</sup> Chee' lë' na' dxapa' lue', lawe' da nazrí'ile'eng' neda', da nigá naca bea na ba bnite lawa' chee' ca naca dul-la zan chee', san bënnea' naca bábaze dul-la chee' da bnite lawa', láteze zrí'ine' neda'.

<sup>48</sup> Nadxa Jesús guzre' nu'ula':

—Dul-la chiu' ba bnite lawa'.

<sup>49</sup> Na' benne' ca' zaj zre'e nen Lë', ne zaj dxe'e na' gulezú lawë' dxelenné' lu lázrdawë': "¿Nuzra benne' nigá, dxunitë láuqueze' dul-la?"

<sup>50</sup> Jesús guzre' nu'ula na':

—Ba naláu' lawe' da guxéajlé'u chia'. Bexíaj dutë xel-la dxebeza zri lazre'.

<sup>1</sup> Ca gudé da nigá, gudá Jesús zane' xezre, ne xézredu ca', dxusédene', ne dxuchálaje' ca dxenná bea Dios. Benne' chazrinnu gubáz ca' zjácalene' Le'. <sup>2</sup> Cá'anqueze zjácale' Le' bal-la nu'ula ca', benne' ca' bexunge' le' ca naca xízrawe' chee', ne bebéaje' be' xriwe' ca' da zaj xu'e. Ládujla nu'ula ca' ziaj María Magdalena, nu'ula na' belexedxúaj gazre be' xriwe' lu xichaj lázrdawe'. <sup>3</sup> Ládujla le' ziajqeje Juana, zru'ula Chuza, benne' na' xu'u lu ne'e da napa Herodes. Cá'anqueze ládujla le' ziaj Susana, na' zjaca nu'ula zandxa na', nu'ula ca' dxelácalene' Jesús nen da zaj nape'.

*Da dxulé'e na ca naca chee benne' dxaze' zrua' xtila*  
(Mt. 13.1-9; Mr. 4.1-9)

<sup>4</sup> Benne' zan beledxúaje' lu xezre ca' chee xeledé'ene' Jesús, na' gate belezraga benne' zan naga zue', na' bchálaje' tu da dxulé'e na, dxé'e le':

<sup>5</sup> —Tu benne' dxaze' guzé'e zjaze' zrua' xtila. Ca zéaje' dxaze' na, bal-la bínnedu ca' xeajlechaze na dxu'a neza, na' benne' ca' bululéaje' na, na' belezrín bxínnedau' guláguba' na. <sup>6</sup> Xebal-la bínnedu ca' xeajlechaze na lu xiaj ca', na' gate bínnedu caní belezría na, chadite' gulebizre na, lawe' da quebe gudxé' gupa'. <sup>7</sup> Xebal-la bínnedu ca' xeajlechaze na naga zaj dxe' lue xeche', na' bululule xeche' ca' le' na. <sup>8</sup> Xebal-la bínnedu ca' xeajlechaze na lu xu bebe, na' gate belegula na, na' gulezríale' na. Bal-la na gulezría na tu gaxúa weaj.

Gate bexuzre bchalaj Jesús da nigá, na' gunné' zizraj:

—¡Che le'e zua nágale, le xene!

*Jesús dxenné' bizr chee na' dxuchálaje' da dxulé'e na*  
(Mt. 13.10-17; Mr. 4.10-12)

<sup>9</sup> Nadxa benne' ca' dxuséde Jesús gulenábene' Le' bizra zéaje da dxulé'e nigá. <sup>10</sup> Jesús guzre' le':

—Dios dxuzéajni'ine' le'e ca naca da nagache chee xel-la dxenná bea chee', san benne' xula, dxuchálajlena' le' da dxulé'e na caní, chee gate dxeledé'ene' xelaque' ca benne' quebe dxeledé'ene', ne gate dxelenne' quebe dxeléajni'ine'.

*Jesús dxuxuzáje'e da dxulé'e na ca naca chee bénnea' dxaze'*  
(Mt. 13.18-23; Mr. 4.13-20)

<sup>11</sup> Na' gunná Jesús:

—Da nigá naca ca zéaje da dxulé'e na': Bínnedu ca' zéaje na xrtizra' Dios. <sup>12</sup> Bínnedu ca' xeajlechaze na dxu'a neza zéaje na benne' ca' dxelenne' xrtizra' Dios, san za' da xriwe', na' dxe'gú na dizra' na' lu xichaj lázrdau benne' ca', chee quebe xeléajle'e, ne quebe xeledé'. <sup>13</sup> Bínnedu ca' xeajlechaze na lu xiaj ca' zéaje na benne' ca' dxelenne' dizra' na, ne dxelezi'e na duté xel-la dxelebé, san quebe dxaze na lu xichaj lázrdawe'. Dxeleajle'e tu chí'idau'ze, na' gate dxeledé' lu da zi' da xa', na' dxulusán lazre' na. <sup>14</sup> Bínnedu ca' xeajlechaze na naga zaj dxe' lue xeche' zéaje na benne' ca' dxelenne' dizra' na, na' dxeajxaque', na' lawe' da dxeleze'ne' gunne xue da zante, ne dxelezé' lazre' xel-la gunní'a, ne da xele'aj xelawe' da zácale'e, na' xúgute' da caní dxulusunite na dizra' na, na' quebe dxun na zrin lu xichaj lázrdawe'. <sup>15</sup> Na' bínnedu ca' xeajlechaze na lu xu bebe zéaje na benne' ca' zua chawe', ne du lazre' lázrdawe', na' gate dxelenne' dizra' na, dxuluzá chache' na, na' dxun zrin dizra' na' lu xichaj lázrdawe'.

*Da dxulé'e na ca naca chee tu da dxe'gú'u lení'*  
(Mr. 4.21-25)

<sup>16</sup> Gunná Jesús:

—Netú benne' che gugale' da dxe'gú'u lení', quebe gudúsie' na tu xi'ina, u zranle ga dxasie', san guzúe' na sibe, chee cu'u lení' na chee benne' zaj zre'e lu xu'u na'. <sup>17</sup> Quebe bi de' da nagache' da quebe gulé'e lau na, ne quebe bi xu'u lu xichaj lázrdau bénneache da quebe gaca bea na, ne lá'tequeze na.

<sup>18</sup> 'Chee le' na', le xene xanne'. Tu benne' nazi'e xrtizra' Dios, wazidxe', san benne' quebe dxezi'e na, wegá'a ca da du dxé'quene' nape'.

*Dxelezrín lau Jesús xrné'e, ne benne' biche' ca'*  
(Mt. 12.46-50; Mr. 3.31-35)

<sup>19</sup> Nadxa xrna Jesús, ne benne' biche' ca' belezrine' naga zue', san quebe gulezé'quene' xelezrine' lau Le', lawe' da zrále'e benne' zan ga na'. <sup>20</sup> Tu benne' na' bzenne' Jesús, gunné': —Xrna'u, ne bi bichu' ca' zaj zre'e chale'aj nigá, dxelaca lazre' xuluchálajlene' Lue'.

<sup>21</sup> Jesús guzre' le':

—Benne' ca' dxelenne' xrtizra' Dios, ne dxelune' ca dxenná na, benne' caní zaj naque' ca xrna'a, ne benne' bicha'dau' ca'.



*Jesús dxuzúa zri'e be' b'dunu', ne xeajxruxa chee' nísadau'*

*(Mt. 8.23-27; Mr. 4.35-41)*

<sup>22</sup> Tu zra guxú'u Jesús tu lu da dxedá lawe' nísadau' nen benne' ca' dxusédene', na' guzre' le':

—Cheajdxu xecha la'a nísadau'.

Na' gusiá'que', <sup>23</sup> ne dxácaté zjaque' lu nísadau' na', guse Jesús. Na' guzú lau dxácale'e be' b'dunu' lu nísadau', na' guzú lau dxu'u nisa lu da dxedá lawe' nísadau' na', ne ba dxácaté waxaze na lu nísadau'. <sup>24</sup> Nadxa bulusebané' Jesús, dxel'é'e Le':

—¡Benne' Wesede! ¡Benne' Wesede! ¡Ba dxázedxu lu nisa nigá!

Nadxa guxasa Jesús, na' gudil-le' be' b'dunu' na', ne nisa na', na' ca naca da ca' belezúa zri na. <sup>25</sup> Nadxa Jesús guzre' benne' ca' dxusédene':

—¿Quebe ne chéajlele chee' Dios?

Benne' ca' belezrebe', ne belexebánene', na' buluchebe ljwezre':

—¿Núzraqueze benne' nigá, dxenná bé'ene' be', ne nisa, na' dxuluzúa na dizra' chee'?

*Tu benne' Gadara xu'e be' xriwe'*

*(Mt. 8.28-34; Mr. 5.1-20)*

<sup>26</sup> Nadxa belezrine' xecha la'a nisa lu xezr la xu chee' xezre Gadara, chalá' ca'ala chee' Galilea. <sup>27</sup> Gate bedxúaj Jesús lu da dxedá lawe' nísadau' na', na' bzrin tu benne' xezre na' lau Le'. Záneté iza ba guca xu'u be' xriwe' ca' benne' nigá. Quebe gúcue' zra lané', ne quebe guzúe' netú lu xu'u, san xeajchu'e tu lu ba ca'. <sup>28</sup> Gate blé'ene' Jesús, na' xeajzú zribe' lau Le', na' gudxezre xe'e, dxenné':

—¿Bizr chee' na' za'u naga zua', Jesús, Zri'ine Dios szrente? Dxata' xueda' Lue' quebe gusaca zi'u neda'.

<sup>29</sup> Gunná na caní lawe' da ba gunná be'e Jesús be' xriwe' ca' xelexedxúaj na lu xichaj lázrdau benne' nigá. Zane' lasa be' xriwe' ca' ba guléla na benne' nigá. Benne' xezre na' gulele' benne' nigá, ne buluchéaj'e le' ni'a ne'e nen du xia, san le' búzuxuj'e du xia na', na' be' xriwe' ca' guleché na le' le'e xixre' lawe' lataj. <sup>30</sup> Jesús bchebe' be' xriwe' ca':

—¿Bi lele?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zanté benne' na'. <sup>31</sup> Be' xriwe' ca' gulenaba na Jesús quebe sel-le' na lataj chul-la. <sup>32</sup> Lu xi'a naga zua Jesús, na' zrále'e cuche zan dxeláguba', na' be' xriwe' ca' gulata' xue na Jesús gu'e lataj da ca' cheajxezrá na lu cuche ca', na' bnezruj Jesús na lataj. <sup>33</sup> Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúgute cuche ca' buluzrúnujba', ne gulebixreba' dxu'a chjéa, na' xeajlecházeba' lu nísadau', naga gulépeba', guláteba'.

<sup>34</sup> Benne' ca' dxuluxúe' cuche ca', gate belelé'ene' ca da guca, na' buluzrúnuj'e lu xel-la dxelezrebe, na' gul'é'e benne' zaj zre' e le'e xixre', ne benne' zaj zre'e lawe' xezre ca da guca.

<sup>35</sup> Nadxa benne' ca' beledxúaj'e xeajlenné'e ca da guca. Gate belezrine' naga zua Jesús, na' belelé'ene' bénnea' belexedxúaj be' xriwe' ca' lu xichaj lázrdawe', dxe'e zran ni'a Jesús, ba nácue' ladxe', ne ba bezúa chawe' xichaj lázrdawe', na' benne' ca' belezrebe'. <sup>36</sup> Na' benne' belelé'e ca da guca buluchálajlene' benne' xula ca' ca guca gate bexaca bénnea' guxú'e be' xriwe' ca'. <sup>37</sup> Gate belenne' caní, ca naca benne' zaj zre'e lu xezr la xu chee' xezre Gadara gulezú lawe' dxelata' xúene' Jesús xezé'e lazrie', lawe' da dxelezrebele'e. Ca'an guca, guxú'u Jesús lu da dxedá lawe' nísadau', chee' xezé'e xéaj'e'. <sup>38</sup> Bénnea' belexedxúaj be' xriwe' ca' lu xichaj lázrdawe' gunabe' lau Jesús gunézruje' lataj chéajlene' Le', san Jesús busebague' le' xegá'ane' lázrie', na' guzre' le':

<sup>39</sup> —Bexiaj lizru', na' bchalaj chee' xúgute ca da ba ben Dios chiu'.

Na' benne' na' bezé'e zexiaje', na' bchalajlene' benne' xezre ca' ca da ben Jesús chee' le'.

*Jesús dxexune' bí nu'ula chee' Jairo, ne tu nu'ula xeajté' zra lané'*

*(Mt. 9.18-26; Mr. 5.21-43)*

<sup>40</sup> Gate bezrin Jesús xecha la'a dxu'a nísadau', benne' ca' zaj zre'e na' gulezi' lu ne'e Le' nen duté xel-la dxelebe', lawe' da xúgute' dxelebeze' Le'. <sup>41</sup> Nadxa bzrin tu benne' le' Jairo, benne' blau chee' xu'u naga dxelezraga judío ca', na' bzu zribe' lau Jesús, ne guta' xúene' Le' chéaj'e lizre', <sup>42</sup> lawe' da zua tuze bi nu'ula chee'. Xu'ube' chazrinnu iza, na' ba dxaca wátebe'. Gate guzá' Jesús zéaj'e, benne' zanté zjálalene' Le', ne buluchídete' ljwezre'.

<sup>43</sup> Ládújla benne' ca' zeaj tu nu'ula quebe chawe' zu'e', na' chazrinnu iza ba zeaj dxé'ene' we' dxen da dxaca chee' nu'ula ca'. Ba gudízruje' benne' dxelexún bénneache ca' xúgute ca da gudape', na' quebe bi gulezéquene' xelune' chee' xexaca nu'ula na'. <sup>44</sup> Nu'ula na' gubigüe' cúzrula Jesús, na' xeajté' zran ni'a zre', na' la ná'queze bexágate dxen da dxaca nu'ula na'.

<sup>45</sup> Nadxa Jesús bchebe':

—¿Nuzra bta neda'?

Xúgute' gulenné': "Quebe nu ne gutá Lue'", na' Pedro, ne benne' ljwezre' ca' gulenné':

—Benne' Wesede, benne' caní dxuluchíde' Lue', ne dxuluzrigue' Lue', na' dxuchébequezu', dxennáu': "¿Nuzra bta neda'?"

<sup>46</sup> Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

<sup>47</sup> Gate gúquebe'e nu'ula na' ba neze Jesús da guca, nadxa gudé' dxezrízete', na' bzu zribe' lau Jesús, ne guxrúalepe' lau xúgute' benne' ca' bizr chee' na' bte' Jesús, ne ca guca bexácate'.

<sup>48</sup> Nadxa gunná Jesús, guzre' nu'ula na':

—Zrí'ina'dau', ba bexactu' lawe' da guxéajle'u chia'. Bexíaj na'a, duté xel-la dxebeza zri lazre'.

<sup>49</sup> Ne dxuchálajte Jesús, bzrin tu benne' naga ze Jesús, benne' guzé'e lizre Jairo, benne' blau chee xu'u ga na' dxelezraga judío ca', na' guzre' Jairo:

—Ba gute bi nu'ula chiu'. Québedxa guzúa xuzru' Benne' Wesede nigá.

<sup>50</sup> Gate ben Jesús ca gunné', na' guzre' Jairo:

—Quebe zrebu'. Con guxeajle. Bi nu'ula chiu' na' xexácabe'.

<sup>51</sup> Gate bzrin Jesús xu'u na', netú quebe be' lataj chú'ule Lé', san tuze Pedro, ne Jacobo, ne Juan, ne xra xrna bi nu'ula na'. <sup>52</sup> Xúgute' benne' zaj zre'e na' dxelebezre', ne dxelebezre xache' chee bi nu'ula na'. Jesús gunné':

—Quebe cuezrele. Bi nú'uladu nigá quebe nátebe'. Dxásezebe' na'.

<sup>53</sup> Na' benne' ca' buluzrizre' chee', lawe' da zaj nézquezne' ba gútebe'. <sup>54</sup> Nadxa Jesús guqu'é' na' bi na', na' gunné' zizraj:

—¿Bi nu'ula, bexasa!

<sup>55</sup> Na' bebanbe', ne bexásatebe'. Na' Jesús busebague' le' xulunézruje' da gágube'. <sup>56</sup> Xra xrnabe' belexébánele'ene'. Jesús busebague' le' quebe nu xelé'e ca da guca.

## 9

*Jesús dxesel-le' benne' chazrinnu ca' xelune' xrchine'*

(Mt. 10.5-15; Mr. 6.7-13)

<sup>1</sup> Jesús bchague' benne' chazrinnu ca' dxusédené', na' bnézruje' le' xel-la waca, ne xel-la dxenná bea chee xelexebéaje' xúgute' cue' be' xriwe' ca' da zaj xu'u bénneache, ne chee xelexexuné' benne' ca' zaj xu'e xízrawé'. <sup>2</sup> Na' gusel-le' le' chee xuluzenné' bénneache ca dxenná bea Dios, ne chee xelexexuné' benne' zaj xu'e xízrawé' ca'. <sup>3</sup> Na' guzre' le':

—Quebe bi gúale chee la neza. Quebe gúale xaga da gúchíche, na' xixruj cheeje, ne da gágule, ne dumí. Le gua' tu cue'ze zra lánale. <sup>4</sup> Gáteteze xu'u naga chú'ule, le xegá'ana na' cadxa zrin zra xeza'ale lu xezre na'. <sup>5</sup> Naga quebe xelezi' e dizra' guchálajle le', le xedxúaj xezre na', ne le cuibe bxrte xu da da ní'ale, da gul'é' na zaj nabague' zria lau Dios.

<sup>6</sup> Nadxa beledxúaje', na' ca naca xézredu ca' xejlechálaje' dizra' chawe' chee Dios, ne belexexuné' benne' zaj xu'e xízrawé' ca'.

*Ca guca gate gute Juan, benne' bchue' bénneache nisa*

(Mt. 14.1-12; Mr. 6.14-29)

<sup>7</sup> Herodes, benne' dxenná be'ene' xezr la xu na', benne' ca naca xúgute' da dxun Jesús, na' guzú' stebe lawe' da dxelenná bal-la benne' ba bebán Juan ládujla benne' gate. <sup>8</sup> Xebal-le' dxelenné' Elías, bénnea' bchálaje' waláz chee Dios ba bele'e, na' xebal-le' dxelenné' ba bebán tu benne' ca' buluchálaje' waláz chee Dios ca ní'te. <sup>9</sup> Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zante dxenda' dxuné'?

Nadxa Herodes bene' ba xuzre lé'ene' Jesús.

*Jesús dxugawe' chi xun gaxúa benne'*

(Mt. 14.13-21; Mr. 6.30-44; Jn. 6.1-14)

<sup>10</sup> Gate belexezrin benne' gubáz ca' chee Jesús lau Lé', na' gul'é' Lé' ca da ba beluné'. Na' Jesús beche'e benne' ca', na' besía'que' zeajxaque' tu lataj da nagá'ana zitu' naga zaj dxe' xezre ca', naga zua lu xezr la xu chee xezre Betsaida. <sup>11</sup> Gate benne' xezre na' belenné' zua Jesús na', na' gusiá'que' zjaque' naga zua Lé'. Na' Jesús guzi' lu ne'e benne' ca', ne bchálajlene' le' ca dxenná bea Dios, ne bexuné' benne' zaj xu'e xízrawé' ca'.

<sup>12</sup> Gate guzú' lau zeaj dxezré', na' gulebiga benne' chazrinnu gubáz ca' chee Jesús lau Lé', na' gul'é' Lé':

—Bze benne' caní dizra' chee chjaque' naga xelasie', ne xelíajé' da xelawe' xézredu ca' zaj nnita gagu, lawe' da ga zúadxu nigá quebe bi de.

<sup>13</sup> Jesús guzre' le':

—Le gunezruj le'e da xelawe'.  
 Nadxa benne' ca' bele'e Jesús:  
 —Quebe dedxa cheentu' ca gáxzuga xeta xtiladau', ne chúpaga bela, u ¿wacheajxríquezentu'  
 da xelagu catite benne' zan caní?  
<sup>14</sup> Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédené':  
 —Le xe benne' ca' xelebé'e chi xun weaje' tu cue' tu cue'.  
<sup>15</sup> Ca'an beluné', na' gulebe'e xúgute'. <sup>16</sup> Nadxa Jesús guqu'é'e da gazxu' xeta xtila ca',  
 ne chupa bela ca'. Na' guchisa lawe' xabaala, ne guzre' Dios "Xcalenu'", na' ca bexuzre  
 bzúzruje' na, na' bnézruje' na benne' ca' dxusédené' chee' xelisié' na chee' benne' zan ca'.  
<sup>17</sup> Xúgute' gulawe', ne belélaje'. Ca gudé na' bulusuzré'e chazrinnu ga' da bízrujdu ca'  
 belexegá'ana na.

*Pedro dxenné' Jesús naque' Cristo*

*(Mt. 16.13-19; Mr. 8.27-29)*

<sup>18</sup> Tu zra gate zua Jesús dxuchálajlene' Dios naga quebe zaj zra benne' zan ca', na' zrale  
 benne' ca' dxusédené' Le', na' Le' bchebe' benne' ca':

—¿Nuzra dxelenná benne' naca' neda'?

<sup>19</sup> Le' belexechebe':

—Bal-le' dxelenné' nacu' Juan, bénnea' bchue' bénneache nisa, na' xebal-le' dxelenné'  
 nacu' Elías, bénnea' bchálaje' waláz chee' Dios, na' xebal-le' dxelenné' nacu' tu benne' ca'  
 buluchálaje' waláz chee' Dios ca ni'ite, na' bebane'.

<sup>20</sup> Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo chee' Dios.

*Jesús dxuzenne' benne' ca' ca gaca gate gatié'*

*(Mt. 16.20-28; Mr. 8.30—9.1)*

<sup>21</sup> Jesús bsebague' benne' ca' quebe nu xelé'e ca'. <sup>22</sup> Na' guzre' le':  
 —Neda', Benne' Gulje' Bénneache, dxal-la' téle'a xel-la zi', na' benne' gula sina ca', ne benne'  
 xíchaje ca' chee' bxruze, ne benne' ca' dxuluxuzájle'e da nadxixruj bea na xuluzúe' neda'  
 chalá'ala. Xelútié' neda', san gate gaca chunna zra, na' xebana'.

<sup>23</sup> Ca gudé na' guzre' ca naca benne' zaj zre'e na':

—Che nu benne' dxaca lazre' gaque' neda' tuze, dxal-la' guzúe' chalá'ala xúgute' da naca  
 chee', na' guné' neda' tuze xúgute' zra, lácala gate benne' na'. <sup>24</sup> Benne' dxaca lazre' gapa chí'e  
 xel-la nabán chee', gunítie' na, san benne' gunítie' xel-la nabán chee' lawe' da naque' chia',  
 wazrué'ene' na. <sup>25</sup> ¿Bizra da ba neza gaca na chee' tu benne' che gape' ca naca da de lu xezr  
 la xu nigá, san cuía xi' léqueze'? <sup>26</sup> Che nu benne' xedué'ene' chia' neda', ne chee' dizra' chia',  
 cá'anqueze neda', Benne' Gulje' Bénneache, wedué'eda' chee' bénnea' gate za' a neda' chee' nna  
 be'a nen xel-la szren chee' Xra', ne chee' gubáz lá'azxa chee' xabáa ca'. <sup>27</sup> Da li dxapa' le'e,  
 bál-lale zrale nigá quebe gátele nédxudxa ca lé'ele zra nna bea Dios.

*Gate bcha lu'a lesaca Jesús*

*(Mt. 17.1-8; Mr. 9.2-8)*

<sup>28</sup> Ca guzre xi' gudé gunná Jesús da nigá, na' guluéne' tu lu xi'a chee' guchálajlene' Dios,  
 na' xjácalé Pedro, ne Jacobo, ne Juan Le'. <sup>29</sup> Dxácaté dxuchálajlene' Dios, na' bcha lu'a lesaca  
 Jesús, na' zra lane' bexaca na da chiche, ne guca tite na. <sup>30</sup> Nadxa bululé'e lau chupa benne'  
 dxuluchálajlene' Jesús. Zaj naque' Moisés ne Elías. <sup>31</sup> Naga zéle Jesús benne' ca' gúcatite'  
 legala, na' dxuluchálajlene' Jesús ca gaca gate gatié' Le' xezre Jerusalén. <sup>32</sup> Gulácalé'e welase  
 Pedro ne benne' ljwezre' ca', san bulusebán lazre', na' belelé'ene' ca naca xel-la szren chee'  
 Jesús, ne chupa benne' ca' zaj zélene' Jesús. <sup>33</sup> Gate benne' ca' belexesiá'que' naga ze' Jesús,  
 na' Pedro gunné':

—Benne' Weséde, néquega zúadxu nigá. Benna netu' lataj guntu' chunna xu'u lága'dau', tu  
 chiu', ne tu chee' Moisés, ne tu chee' Elías.

Pedro quebe dxéquebe'ene' ca da dxenné'. <sup>34</sup> Dxácaté dxenná Pedro caní, na' bla' tu beuj  
 da gucu na naga zaj zre'e, na' belezrebe Pedro, ne benne' ljwezre' ca' gate gulezré'e lu beuj  
 na'. <sup>35</sup> Na' belenne' chi'i nu dxuchalaj lu beuj na', gunná:

—Bi nigá naque' Zri'ina', nazri'ite lazra'. Le xen da dxuchálajbe'.

<sup>36</sup> Ca gudé belenne' chi'i na', na' belelé'ene' Jesús ba ze' tuze'. Na' benne' caní gulezúe'  
 zrize, na' quebe nu gulé'e ca da belelé'ene'.

*Jesús dxexune' tu bi biu xu'ube' be' xriwe'*

*(Mt. 17.14-21; Mr. 9.14-29)*

<sup>37</sup> Gute xu, gate belexexétaje' lu xi'a na', na' benne' zan zjaque' zeajlexrígale' Jesús.

<sup>38</sup> Nadxa tu benne' ca' gunné' zizraj, guzre' Jesús:

—Benne' Wesede, dxata' xueda' Lue' dajxú' bi biu chia' lawe' da tu lícha'te' bi chia' naca, <sup>39</sup>na' tu be' xriwe' dxaze na lebe', ne dxucuezre xa'a na lebe', ne dxudxixre dxutula na lebe', na' dxebia' bzrina' dxú'abe'. Dxsaca zi na lebe', ne quebe dxaca lazre' na gusán na lebe'.

<sup>40</sup>Ba guta' xueda' benne' ca' dxusédenú' chee' xelexebéaje' na, san quebe gulezéquene'.

<sup>41</sup>Jesús bechebe':

—Le'e, benne' wen chupa lazre', ne wen da calela. ¿Ájate' dxal-la' súałena' le'e? ¿Ájate' dxal-la' guchaga lawa' nen le'e? Xeajxri' zri'ínu' na' nigá.

<sup>42</sup>Gate bi cuide' na' ba zéajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudil-le' be' xriwe' na', ne hexune' bi cuide' na', na' bde'e'-be' lu na' xrabe'.

<sup>43</sup>Xúgute' benne' ca' belexebánene' ca naca xel-la szren chee' Dios.

*Jesús dxuzenne' benne' ca' xecha lasa ca gaca gate gatié'*

*(Mt. 17.22-23; Mr. 9.30-32)*

Dxácaté' na' xúgute' benne' ca' dxelexebánene' ca da dxun Jesús, Le' guzre' benne' ca' dxusédené':

<sup>44</sup>—Le xen xanne' da nigá, ne quebe gal-la lázrele na. Neda', Benne' Gulje' Bénneache, wuludé' neda' lu na' bénneache.

<sup>45</sup>Benne' ca' dxusédené' quebe guléajni'ine' ca da dxenná Jesús lawe' da quebe ne gunézruj Dios lataj xeléajni'ine', na' belezrebe' xelenabe' Jesús guzéajni'ine' le' ca da na' gunné'.

*¿Nuzra naca blau?*

*(Mt. 18.1-5; Mr. 9.33-37)*

<sup>46</sup>Nadxa benne' ca' dxusede Jesús gulezú lawe' dxuluchebe' ljwezre' núzraqueze naca blau ládujla le'. <sup>47</sup>Jesús gúquebe'eng' ca da dxelenné'. Nadxa guqué'e' tu bi biúđau', ne bze'-be' cuite', <sup>48</sup>na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze' ba lá'ana Dios, Bénnea' nasele' neda'. Cá'anqueze' bénnea' nácadxe' benne' dxexruj lazre' ládujla le'e, benne' nigá naque' benne' blau.

*Benne' quebe dxedábage' dxi'u zue' gácalene' dxi'u*

*(Mr. 9.38-40)*

<sup>49</sup>Nadxa Juan guzre' Jesús:

—Benne' Wesede, blé'entu' tu benne' dxuchínene' Lau', dxebéaje' be' xriwe' ca' lu xichaj lázrdau benne' ca', na' gúzrentu' le' quebe gune' ca' lawe' da quebe naque' dxi'u tuze.

<sup>50</sup>Jesús guzre' le':

—Quebe guzágale ca da dxune' lawe' da benne' quebe dxedábage' dxi'u zue' gácalene' dxi'u.

*Jesús dxedil-le' Jacobo ne Juan*

<sup>51</sup>Gate ba za zrin zra dxal-la' xexíaj Jesús xabáa, ben zi' lazre' chéaje' Jerusalén. <sup>52</sup>Na' gusél-le' gubáz chee' ca' xelebia' lawe', na' benne' ca' xjaque' tu xézredau' nababa Samaria chee' cheajlecuéze' naga sua Jesús. <sup>53</sup>Benne' Samaria ca' quebe gulaca lazre' xegá'ana Jesús na', lawe' da guleque bé'ene' zéaje' Jerusalén. <sup>54</sup>Gate Jacobo ne Juan, benne' ca' dxuséde Jesús, belele'eng' da nigá, na' gulé'e' Jesús:

—Xran, ¿dxaca lazru' nna béantu' xetaj xi' da za xabáa chee' guzríja xi na benne' caní, ca ben Elías, bénnea' bchálaje' waláz chee' Dios?

<sup>55</sup>Nadxa Jesús guné'e' le', ne gudil-le' le', dxenné':

—Le'e quebe nézele nu be' zúale le'e. <sup>56</sup>Caní naca lawe' da bla' neda', Benne' Gulje' Bénneache, quegá chee' guzríja xi'a xel-la nabán chee' bénneache, san chee' gucache chawa' le' na.

Nadxa xjaque' xetú xézredau'.

*Benne' dxelaca lazre' chjácalene' Jesús*

*(Mt. 8.19-22)*

<sup>57</sup>Ca zjaque' lu neza na', tu benne' biu guzre' Jesús:

—Xran, dxaca lazra' sálaena' Lue' gáteteze chéaju'.

<sup>58</sup>Jesús bechebe':

—Beza ca' zaj zua blauj cheeba', na' bxínnedu ca' zaj zria xru'üneba', san neda', Benne' Gulje' Bénneache, quebe bi de' ga xrua xíchaja'.

<sup>59</sup>Na' Jesús guzre' xetú benne':

—Ben neda' tuze.

Benne' nigá gunné':

—Xran, benna neda' lataj cheajcáchea' xra'.

<sup>60</sup> Na' Jesús bechebe':

—Be' lataj benne' ca' zaj naque' ca benne' gate xulucache' ljwezre', na' lue', guxíaj, xeajchalaj ca dxenná bea Dios.

<sup>61</sup> Nadxa tu benne' xula guzre' Jesús:

—Xran, dxaca lazra' guna' Lue' tuze, san stecca, benna neda' lataj xexá'a cheajzéa' dizra' benne' zaj zra' lizra'.

<sup>62</sup> Jesús guzre' benne' na':

—Benne' dxugá'angé' be'zre, na' nne'é' cúzrule', quebe gaca chee' bënnea' guné' zrin chee' da dxenná bea Dios.

## 10

*Jesús dxesel-lé' benne' gaxún chi ca'*

<sup>1</sup> Ca gudé na', Xránadxu gucuqé'g xegaxún chi benne' ca', na' gusel-lé' chupa weaje' xelebía lawé' lau Lé' xúgute' xezre, ne xézredu ca' naga dxal-la' chéajé' Lé'. <sup>2</sup> Guzre' benne' ca':

—Da li dxennéa', lina da zren naca na, na' benne' wën zrin bábaze zaj naque'. Chee' le' na' le naba lau Xrane zrin na' sel-lé' benne' wën zrin ca' xelexequé'g lina na'. <sup>3</sup> ¡Le hjaca! Le nna'xque, neda' dxesel-la' le'e, gácale ca zríla'du ca' ládujla becu' xi'a ca'. <sup>4</sup> Quebe gúale xixruj, ne dumí, ne zréale, ne quebe gagale la neza nu gucháajlele. <sup>5</sup> Gate chu'ule tu lu xu'u, na' gugápale diuzre, nnale: "Xel-la dxebeza zri lazre' gaca chee' benne' zaj zre'g lu xu'u nigá." <sup>6</sup> Che zaj zra' na' benne' dxelebeza zri lazre', na' da gunábale gaca chee' benne' ca', san che quebe nu chilá' naca caní, le naba quebe gaca da ba gunábale. <sup>7</sup> Le xegá'ana lu xu'u ná'queze, na' le xi'aj le gagu ca da xelunne' lawe' da benne' wën zrin quebe te le tune'. Quebe cheajsúale tu xu'u xetú xu'u. <sup>8</sup> Gate zrinle tu xezre naga xelezi' lu ne'g le'e, le gagu ca da xelunne'. <sup>9</sup> Le xexún benne' zaj xu'g xízrawé' zaj zre'g na', na' le xé'g: "Xel-la dxenná bea chee' Dios ba zua nen le'e." <sup>10</sup> Che zrinle tu xezre naga quebe xelezi' lu ne'g le'e, le xedxúaj la neza chee' xezre na', na' nnale: <sup>11</sup> "Ca naca bxrte'du' da' ní'antu' dxexebíent'u' na chee' gaca tu da gulé'e na le'e nabáale zria lau Dios. Dxal-la' nézele ba bla' ládujla le'e xel-la dxenná bea chee' Dios." <sup>12</sup> Dxapa' le'e, ca lu zra guchi'a Dios, da xelezaca benne' zaj zre'g lu xezre nigá gácadxa na xel-la zi' ca da xelezaca benne' xezre Sodoma, xezre na' bzria xi' Dios.

*Da gaca chee' xezre naga quebe beluné' ca dxenná xrtizra' Dios*

*(Mt. 11.20-24)*

<sup>13</sup> Na' gunná Jesús:

—¡Edxugú'a le'e, benne' xezre Corazín! ¡Edxugú'a le'e, benne' xezre Betsaida! Chela lu xezre Tiro, ne lu xezre Sidón belelé'engé' ca naca xel-la waca chee' xabáa da ba gulaca ládujla le'e, gate na'te ba belexebí'i lazre', belácué' zra lané' tuzruj, ne buluzríe' de xíchaje'. <sup>14</sup> Lu zra guchi'a Dios da dxaca, na' sácadxale le'e xel-la zi' ca da xelezaca benne' Tiro, ne Sidón. <sup>15</sup> Na' le'e, benne' xezre Capernaum, ¿dxéquele waxásale zrínte'le xabáa? ¡Lataj chúl-lala xétajle!

<sup>16</sup> Nadxa guzre' benne' ca' dxusédené':

—Benne' xenne'g chege le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bënnea' gusel-lé' neda', guzúe' chalá'ala.

*Dxelexezrín benne' gaxún chi ca'*

<sup>17</sup> Benne' gaxún chi ca' belexuzrine' lu xel-la dxelebé, dxelenné':

—Xran, be' xriwe' ca' dxuluzúaqueze na dizra' cheentu' gate dxuchínentu' Lau'.

<sup>18</sup> Jesús guzre' benne' ca':

—Ca' naca, na' neda' ble'eda' da xriwe' bexruj na zran xabáa ca tu xesa da dxeajsúa na lu xu. <sup>19</sup> Neda' ba benna' le'e xel-la dxenná bea chee' gulé'ajle be' snia ca', ne béxrujni, ne chee' guchúchujle duté xel-la dxenná bea chee' da xriwe', na' quebe bi seque guné na le'e. <sup>20</sup> Quebe bele lawe' da dxelún be' xriwe' ca dxennale le'e, san le be lawe' da ba naxúaj lala xabáa na'la.

*Jesús dxebene'*

*(Mt. 11.25-27; 13.16-17)*

<sup>21</sup> Lu zra ná'queze gubéle'g Jesús, zúale Be' Lá'azxa Lé', na' gunné':

—Dxue lá'ana' Lue', Xrae, Xrane xabáa ne xezr la xu, lawe' da ba blé'enu' bënne'du caní da bcácheu' chee' benne' sina ca', ne benne' dxeléajni'ine'. ¡ca' naca, Xrae, lawe' da ca'an guca lazru' Lue'!

<sup>22</sup> Xra' ba bënne' neda' xúgute. Quegá nu neze nu na' naca Zrí'ingé', san tuze Xrá'queza', ne quegá nu neze nu na' naca Xra', san tuze Zrí'inequeze', ne nu benne' ca' dxaca lazre' Zrí'ingé' guzéajni'ine' le' Nu na' naca Xre'.

<sup>23</sup> Nadxa guné'e benne' ca' dxusédene', na' guzre' benne' cá'anze:

—Ba neza naca na chee benne' ca' dxelélé'ene' ca da dxelélé'ele le'e, <sup>24</sup>lawe' da dxapa' le'e, zánete benne' ca', benne' buluchálaje' waláz chee Dios, ne benne' wenná bea ca' gulaca lazre' xeelé'ene' ca' da dxelélé'ele le'e, san quebe belelé'ene' na. Gulaca lazre' xelenne' ca' da dxene' le'e, san quebe belenne' na.

*Da dxulé'e na ca ben benne' Samaria, benne' naque' chawe'*

<sup>25</sup> Nadxa tu benne' dxuxuzájle'e da nadxixruj bea Dios bdxúaje', ne guxíaje' xeajchálajlene' Jesús chee gaca guzúa zri'e Le', na' bchebe' Le':

—Benne' Weséde, ¿bizra dxal-la' guna' chee gata' chia' xel-la nabán da zeajli canna?

<sup>26</sup> Jesús bechebe':

—¿Bizra da naxúaj na lu da nadxixruj bea Dios? ¿Aja dxéquenu' da dxulabu'?

<sup>27</sup> Bénnea' dxuxuzájle'e da nadxixruj bea Dios bechebe':

—Bzri'i Xranu' Dios duté lázrda'u, ne nen duté bénne'du xu'u, ne nen duté xel-la dxun zi' lazre' chiu', ne nen duté xel-la dxulaba lazre' chiu', na' bzri'i le sa' ljwezru' ca nazri'i cuinu'.

<sup>28</sup> Nadxa gunná Jesús, guzre' le':

—Cháwe'le'e bechebu'. Che dxunu' caní, na' gapu' xel-la nabán na'.

<sup>29</sup> Bénnea' dxuxuzájle'e da nadxixruj bea Dios guca lazre' gucá'ana chawe' cuine', na' guzre' Jesús:

—¿Nuzra na' le sa' lwezra'?

<sup>30</sup> Bechebe Jesús:

—Tu benne' guzé'e Jerusalén, bétaje' zíaje' Jericó. Lu neza na' xu'e, na' gulela gubán le', ne gulebané' ca naca da nape', ne zra lané'. Na' buluzálaje' le', ne besía'que' zaj nucá'ane' le' ca benne' gate. <sup>31</sup> Nadxa gudé tu bxruze neza na', na' gate blé'ene' le', gudé' chala'ala.

<sup>32</sup> Cá'anqueze gudé na' tu benne' xrtia Leví, benne' dxuné' zrin chee xudau', na' gate blé'ene' le' bénnea', gudé' chala'ala. <sup>33</sup> Nadxa tu benne' Samaria gudé' neza na', na' gate blé'ene' le' bexache lazre' le'. <sup>34</sup> Bugibe' cuita benne' na', ne btupe' tu da za lu we' chee', ne xrise uva wal-la, na' bchele' na ladxe'. Nadxa bcuene' le' cuzru bea chee', na' beche'e le' tu lu xu'u naga xegá'ane', ne bxue' le' na'. <sup>35</sup> Zra xula, ca bezá' benne' Samaria na', na' gulé'aje' chupa dumí da bnézruje' xrane xu'u na', ne guzre' le': "Bxue benne' nigá, na' che ba gucá'adxa xelate' dumí chiu', neda' xexunna' na gate xelá'a."

<sup>36</sup> Nadxa Jesús guzre' benne' dxuxuzájle'e da nadxixruj bea Dios:

—¿Nula benne' chunna caní guque' le sa' ljwezre bénnea' gulela gubán ca'?

<sup>37</sup> Na' gunná bénnea' dxuxuzájle'e da nadxixruj bea Dios:

—Bénnea' bexache lazre' le'.

Nadxa Jesús guzre' le':

—Bexíaj lue', na' gúnquezu' ca'.

*Jesús dxezrine' lizre Marta ne María*

<sup>38</sup> Jesús bexu'e neza, na' bezrine' tu xézredau', na' lu xezre na' zua tu nu'ula le' Marta, na' gulu'e Jesús lizre'. <sup>39</sup> Marta na', zua tu bi bile' le' María, na' María na' gudxé'e zran ni'a Jesús chee xenne' da dxuchálaje'. <sup>40</sup> Marta déle'e da dxune', na' bzrine' lau Jesús, ne guzre' Le':

—Xran, ¿quebe dxexache lazru' neda' lawe' da dxucá'ana bi bila' neda' chee guna' tuza' zrin cheentu'? Guzre-be' gácalebe' neda'.

<sup>41</sup> Jesús bechebe':

—Marta, Marta, dxezéle'enu' gunne xue, ne zu' stebe ca naca chee da ca' dxunu', <sup>42</sup> san de tuze da dxun na ba xen nu gun. María ba bezrelne' da cháwedxa, na' netú benne' quebe seque' cue' na.

## 11

*Ca dxal-la' gundxu guchálajle dxu Dios  
(Mt. 6.9-15; 7.7-11)*

<sup>1</sup> Tu zra Jesús bchálajlene' Dios tu lataj, na' gate bexuzre bchálajlene' Dios, na' tu benne' ca' dxusédene' guzre' Le':

—Xran, bséde netu' guchálajlentu' Dios, ca ben Juan, bsédene' benne' ca' zaj de'e le'.

<sup>2</sup> Jesús gunné':

—Gate guchálajlele Dios, na' nnale:

Xrantu' Dios, zu' xabáa,

gaca lá'azxa Lau' Lue'.

Gudá nna be'u.

Gaca ca dxaca lazru' lu xezr la xu, ca da dxaca xabáa.

<sup>3</sup> Benna cheentu' da gáguntu' na'a zra.

<sup>4</sup> Bnute lau dul-la cheentu' ca dxunite launtu' chee benne' ca' dxelune' cheentu' da calela.

Quebe gu'u lataj da xriwe' cu'u na netu' neza chee na, na' bselá netu' lu na' da calela.

<sup>5</sup> Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxela, ne xe'e le': "Bi ljwezra', guleaj neda' chunna xeta xtila <sup>6</sup>lawe' da zua tu bi ljwezra' za belá' tēbe' lizra', na' quebe bi de' chia' gugawa'-be'." <sup>7</sup> ¿Wechebe benne' ljwezre' na', benne' xu'u lu xu'u: "Quebe gunu' neda' zede. Naxeuxj dxa xu'u chia', na' bi chia' zaj debe' nigá. Quebe gaca chasa' bi gunna' chiu'?" <sup>8</sup> Neda' dxapa' le'e, lácala quebe chasé' bi gunézuje' le' lawe' da naque' ljwezre', san chasé' chee québedxa gune' le' zede, na' gunézuje' le' ca naca da nachínene'. <sup>9</sup> Caní dxapa' le'e:

Le naba, na' Dios gunne' cheele.

Le xexilaj, na' xezrélele.

Le nne' dxu'a dxa xu'u, na' xalaj cheele.

<sup>10</sup> Ca' naca na, lawe' da benne' dxenabe', na' si'e, ne benne' dxexilaje', na' xezrélene', ne benne' dxenné' dxu'a dxa xu'u, na' xalaj chee'.

<sup>11</sup> 'Che tu benne' ládujla le'e naque' xra xrna', ¿waca gunézuje' zrí'ine' tu xiaj che nábabe' tu xeta xtila? ¿Waca gunézuje'-be' tu belá' che nábabe' tu bela? <sup>12</sup> ¿Waca gunézuje'-be' tu béxrujni che nábabe' tu zrita? <sup>13</sup> Che le'e nácale benne' wen da calela, na' nézele gunézuje' da chawe' chee zrí'inele, ¿quebe nácadxa Xrale zua xabáa li lazre' chee gunne' chee nu benne' nabe' Be' Lá'azxa?

*Dxelenné' napa Jesús xel-la dxenná bea chee da xriwe'*

(Mt. 12.22-30; Mr. 3.19-27)

<sup>14</sup> Tu zra Jesús bebéaje' be' xriwe' lu xichaj lázrdau tu benne', da nucá'ana na le' quebe dxaca nnié', na' gate bedxúaj be' xriwe' na', na' benné' bénnea'. Na' benne' ca' belexebánene' chee da nigá. <sup>15</sup> Na' bal-le' gulenné':

—Benne' nigá dxebéaje' be' xriwe' ca', dxuchínene' xel-la dxenná bea chee Beelzebú, xrane be' xriwe' ca'.

<sup>16</sup> Xebal-la benne' gulaca lazre' gulé'e Jesús xel-la waca chee', na' gulenabe' Le' gune' tu xel-la waca da za xabáa. <sup>17</sup> Le' nézene' ca da dxelaca lazre', na' guzre' benne' ca':

—Che benne' zaj zre'e tu xezre xelaque' chupa la'a, ne xeledil-le', wabía xi' xezre na', na' che benne' tu lu xu'u xelaque' chupa la'a, cá'anqueze welebía xi' benne' ca'. <sup>18</sup> Cá'anqueze, che da xriwe' ca' xelaca na chupa la'a, ¿ájazra xegá'ana xel-la dxenná bea chee na? Da nigá dxapa' le'e lawe' da dxennéle dxebéaja' be' xriwe' ca', dxuchíneda' xel-la dxenná bea chee Beelzebú da xriwe'. <sup>19</sup> Che caní naca na, ¿nuzra dxunezruj xel-la dxenná bea benne' ca' dxusédele le'e chee xelxebéaje' be' xriwe' ca'? Chee le' na', benne' caníqueze dxululé'ene' dxeeque zréajele. <sup>20</sup> Na'a che neda' dxebéaja' be' xriwe' ca', dxuchíneda' xel-la dxenná bea chee Dios, da li xel-la dxenná bea chee Dios ba bla' na ládujla le'e.

<sup>21</sup> 'Che tu benne' wal-la napé' da guchínene' lu wedil-la, ne dxuxéqueze' lizre', na' da zra lizre' napa chi'e na. <sup>22</sup> Che za' xetú benne' nácadxe' wal-la ca le', ne dxucul-le' le', nadxa que'e ca naca da dxuchínene' lu wedil-la, da na' dxuxrén lazre', na' quisié' da gudapa bénnea'.

<sup>23</sup> 'Benne' quebe zue' gácalene' neda', dxedábage' neda', na' benne' quebe dxexeque'e nen neda' dxúsela bénnea'.

*Be' xriwe' da dxexezrín na lizre na*

(Mt. 12.43-45)

<sup>24</sup> Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: "Wexá'á lizra' naga bezá'a." <sup>25</sup> Gate xezrín na, na' le'e na bénnea' naque' ca tu xu'u da nalúa lu'ule na, ne nabá'atē na. <sup>26</sup> Nadxa zexíaj na, zeajxezrí na xegazre be' xriwe' da zaj nácadxa na xriwe' ca le' na, na' ca naca da ca' xelú'u na xelézúa na lu xichaj lázrdau bénnea', na' naga cheajsete chee benne' na' nácadxa da calela chee' ca da guca chee' nédxula.

*Da ba neza chee bénneache da naca na li lazre'*

<sup>27</sup> Dxácatē Jesús dxenné' da caní, tu nu'ula ládujla benne' ca' gunné' zizraj:

—Ba neza zrentē naca na chee nu'ula na' guzane' Lue', ne bsegulé' Lue'.

<sup>28</sup> Na' gunná Jesús:

—Ba neza zrendxa naca na chee benne' ca' dxelenne' ca da dxenná Dios, ne dxune' ca dxenná dizra' na'.

*Dxelenabe' Jesús gune' tu xel-la waca da za xabáa*

(Mt. 12.38-42; Mr. 8.12)

<sup>29</sup> Benne' ca' ne zaj zre'e cuita Jesús, na' Le' guzú lawe' dxuchálajlene' le', gunné':

—Benne' zaj zře'ę lu zra caní zaj naqe' benne' wen da caleła, na' dxelenabe' neda' guna' tu xel-la waca da za xabáa, na' québedxa bi xeledé'ene' ca da ble'e Jonás, bēnea' bchálaje' waláz cheę Dios. <sup>30</sup> Ca guca cheę Jonás, guque' tu da ble'e na benne' gulezře'ę lu xęzre Nínive, cá'aqueze neda', Benne' Gulje' Bénneache, gaca' tu da gulé'e na benne' zaj zře'ę lu zra na'a zra. <sup>31</sup> Lu zra guchi'a Dios, gate Dios guchi'ę cheę benne' zaj zře'ę lu zra na'a zra, na' chasa nu'ula na' gunná bé'ene' xęzr la xu da zua chalá'a naga dxedé gubizra beu' zaga ca', na' gulé'ene' zaj nabaga zria benne' caní, lawe' da nu'ula na' guzé'ę zitu'tę cheę xenne' ca naca xel-la sina cheę Salomón, na' nigá zua tu Benne' nácadxe' blau ca Salomón na'. <sup>32</sup> Lu zra guchi'a Dios, gate Dios guchi'ę cheę benne' zaj zře'ę lu zra na'a zra, na' xelase' benne' ca' gulezře'ę xęzre Nínive, na' xululé'ene' zaj nabaga zria benne' caní, lawe' da benne' ca' gulezře'ę xęzre Nínive belexebí'i lazre' gate Jonás bchálajęne' benne' ca' xrtizra' Dios, na' nigá zua tu Benne' nácadxe' blau ca Jonás na'.

*Da dxusení' lu xichaj lázrdaudxu*

*(Mt. 5.15; 6.22-23)*

<sup>33</sup> Gunná Jesús:

—Netú benne' che dxugale' xi' cheę, quebe guzúe' na tu naga nagache, ne quebe gudusie' na tu xi'ina, san guzúe' na sibe cheę xeledé'e benne' ca' xelu'ę lu xu'u na'. <sup>34</sup> Xiaj laudxu zaj naca na ca tu xi' da dxusení na lu xichaj lázrdaudxu. Che xiaj lau' zaj naca na chawe', ca naca xichaj lázrdau xu'u na lení', na' che xiaj lau' quebe zaj naca na chawe', na' xu'u da chul-la lu xichaj lázrdau. <sup>35</sup> Bxue xanne' ca naca xi' da napu' cheę quebe xexaca na da chul-la. <sup>36</sup> Che ca naca xichaj lázrdau xu'u na lení', na' quebe bi xu'u da chul-la, na' le'enu' chawe' xúgute ca dxaca gate tu xi' dxusení na lizru'.

*Jesús dxedil-łę benne' xudau' ca'*

*(Mt. 23.1-36; Mr. 12.38-40; Lc. 20.45-47)*

<sup>37</sup> Gate bexuzre bchalaj Jesús, na' tu benne' xudau' fariseo gunné' Lę' cheajtawe' xeta lizre'. Na' guxú'u Jesús, gudxé'ę dxawe'. <sup>38</sup> Na' benne' fariseo na' bebánene' gate blé'ene' Jesús quebe gudibe ne'ę ca da zjácále benne' judío gate dxelawe' xeta. <sup>39</sup> Xránadxu guzre' le': —Le'e, benne' fariseo, dxíbele cúzrela zřiga', ne xé'ena, san lu'ule na, nazrátele ca naca da ba gulanle, ne da caleła da dxunle. <sup>40</sup> Le'e, benne' lázrdau zide, ¿quebe nézele Bénnea' bene' da zua cúzrela bēnqueze' da zua lu'ula? <sup>41</sup> Le gunezruj benne' xache' ca' cheę da nápaie, na' ca nácale xegá'anale chawe'.

<sup>42</sup> 'jEdxugúa le'e, benne' fariseo ca! Le'e dxunézrujle Dios tu cue' cheę da chi cue' cheę xixru weaj, ne cheę binne cheę ruda, ne cheę xúgute xixre' cuan, san dxuzúale chalá'ala ca naca xel-la wen xrlátaje, ne xel-la zři'i lazre' cheę Dios. Da caní dxal-la' gunle, ne quebe gusanle ca da ba dxunle.

<sup>43</sup> 'jEdxugúa le'e, benne' fariseo ca! Dxaca lázrele gápale lataj blau naga cue'le lu xu'u naga dxezřágale, ne dxaca lázrele xelapa benne' le'e ba lá'ana lawe' xi' ca'.

<sup>44</sup> 'jEdxugúa le'e, benne' dxuluxuzájla'a da nadxixruj bea na, ne le'e, benne' fariseo ca', benne' dxelúne' lóweze da xrlátaje! Nácale ca xędxu ba ca' da quebe zaj nalá', na' benne' ca' dxeledé' lávela na, ne quebe zaj nézene' da dxululé'ę.

<sup>45</sup> Nadxa gunná tu benne' dxuxuzájle'ę da nadxixruj bea na, guzre' Jesús:

—Benne' Wesęde, gate dxennáu' da nigá, dxennéteu' ca' cheęntu'.

<sup>46</sup> Na' Jesús gunné':

—jEdxugúa le'e, benne' dxuluxuzájle'ę da nadxixruj bea na! Dxugúale bēneache xua da quebe xezeuene', na' le'e netú zrube názele quebe dxaca lázrele gutale na.

<sup>47</sup> 'jEdxugúa le'e! Dxunle lu'a cheę ba ca' cheę benne' ca' buluchálaje' waláz cheę Dios, benne' ca' belute xra xrtáule. <sup>48</sup> Ca da dxunle dxulé'e na nácale tuze nen da belún xra xrtáule ca'. Benne' ca' belutie' le', na' le'e dxunle lu'a cheę ba cheę ca'.

<sup>49</sup> 'Cheę le' na' gunná Dios lu xel-la sina cheę, gunné': "Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-łę' xelútie', na' xebal-łę' xeláu zi' xúzrequeze' le'." <sup>50</sup> Dios gusebague' benne' zaj zře'ę lu zra na'a zra ca naca xel-la gute cheę xúgute benne' ca' gulenné' waláz cheę, benne' gulatie' lu na' benne' ca' zaj zře'ę gate bente' xęzr la xu, <sup>51</sup> gate na' tu benne' bętie' Abel, zři'ine Adán, ca bzrintę zra belutie' Zacarías gachaj lávela naga zua lucugu, ne naga zua lataj lá'axza. Ca'an dxapa' le'e, Dios gusebague' benne' zaj zře'ę lu zra na'a zra xel-la gute cheę benne' ca'.

<sup>52</sup> 'jEdxugúa le'e, benne' dxuluxuzájla'a da nadxixruj bea na! Xu'u lu na'le ca naca zren xia cheę dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dxelaca lazre' xelu'ę na'.

<sup>53</sup> Gate Jesús guzre' benne' ca' da caní, na' benne' ca' dxuluxuzájle'ę da nadxixruj bea na, ne benne' fariseo ca' belezřá'ale'ę Lę', na' gulezú lawe' dxelune' Lę' zęde, na' da zante da buluchębe' Lę', <sup>54</sup> na' buluzuzre' che bi nna Jesús cheę xeledé'ene' xelagu zřie' Lę'.



## 12

*Jesús dxenné' ca naca chee da naca xrlátaje láweze*

<sup>1</sup>Ca lu zra na' belezraga zane gaxúa benne' ca', na' dxululéajte ljwezre'. Na' guzú lau Jesús dxe'e benne' ca' dxusédene':

—Le guxúe xanne' cuínale ca naca cua zichaj chee xeta xtla chee benne' xudau' fariseo ca', da naca na da dxulé'e na láweze da xrlátaje chee benne' ca'. <sup>2</sup>Quebe bi de da dxundxu bagácheze da quebe gul'é lawe', ne quebe bi de da nagache da quebe nu neze. <sup>3</sup>Chee le na', xúgute da gunle lu da chul-la, xululé'e lawe' te zra, na' da gunle bagácheze lu xu'u naga naxéxujte dxa xu'u, wénqueze na lau xúgute bénneache.

*Nu dxal-la' zrédexu*

*(Mt. 10.28-31)*

<sup>4</sup>Na' gunná Jesús:

—Dxapa' le'e, bi ljwézra'du ca', quebe dxal-la' zrébele benne' dxelute belá' dxen chee bénneache, san gate te na', québedxa xelezéquene' bi xelune'. <sup>5</sup>Na'a dxapa' le'e nu dxal-la' zrébele. Le zrebe Bénnea' gate te xequé'e xel-la nabán chee bénneache, nape' xel-la dxenná bea gudeé' bénneache ca' lataj ba xa'. Awe', Le' le zrebe.

<sup>6</sup>¿Quebe ta'u gazxu' bxínnedau' lawe' chupa dumí lásedau'? Dios quebe dxal-la lazre' netú bxínnedu ca'. <sup>7</sup>Cá'anqueze xicha xíchajle le'e xúgute na zaj nababa na lau Dios. Chee le na' quebe zrébele. Zácadxale le'e ca be zante bxínnedu ca'.

*Benne' dxelexechebe' zaj naque' chee Jesús*

*(Mt. 10.32-33; 12.32; 10.19-20)*

<sup>8</sup>Na' gunná Jesús:

—Dxapa' le'e, xúgute benne' xelexechebe' zaj naque' chia' neda' lau bénneache, cá'anqueze neda', Benne' Gulje' Bénneache, xechébequeza' chee benne' ca' lau gubáz chee xabáa ca' chee Dios, <sup>9</sup>san benne' ca' quebe xelexechebe' chia' lau bénneache, neda'queza' quebe xechéba' chee' lau gubáz chee xabáa ca' chee Dios.

<sup>10</sup>'Che nu benne' bi nnie' chia' neda', Benne' Gulje' Bénneache, gunite lau Dios chee', na' benne' nnie' chee Be' Lá'azxa, quebe gunite lau Dios chee bénnea'.

<sup>11</sup>'Gate xeleché'e le'e lau benne' xíchajle chee xudau', u lau benne' dxuchi'e da dxaca, u lau benne' xu'u lawe', quebe cue'le gunne xue bi xechébele u bi nnale, <sup>12</sup>lawe' da gate zrin zra dxal-la' nnele, Be' Lá'azxa gul'é'eng' le'e da dxal-la' nnele.

*Da stébe chee xel-la gunní'a*

<sup>13</sup>Tu benne' ládujla benne' ca' guzre' Jesús:

—Benne' Weséde, guzre bi bicha' gúnnabe' chia' da xexal-la' chee da guca chee xrantu'.

<sup>14</sup>Jesús guzre'-be':

—Benne', ¿zua nu bzua neda' ca benne' dxuchi'e da dxaca u ca benne' le'e xezr la xu?

<sup>15</sup>Nadxa guzre' benne' ca':

—¡Le na' xque! ¡Le guxúe xanne' cuínale chee quebe gucúdele! Xel-la nabán chee nu benne' quebe zua na lu da nápalé'e.

<sup>16</sup>Nadxa bchalaj Jesús da dxulé'e nigá, gunné':

—Guzúa tu benne' gunní'a, na' xezr la xu chee' bnézrujle'e na. <sup>17</sup>Na' benne' gunní'a na' guzú lawe' dxenné': ¿Bizra guna? Québedxa de naga guzrá'a lina chia' nigá. <sup>18</sup>Nadxa dxenné': "¡Ba nezda' ca da guna! Guchínnaja' naga dxezrá' lina chia', chee guna' da zri'adxa, na' guzrá'a na' ca naca lina chia' nigá, ne ca naca da ba napa'. <sup>19</sup>Nadxa nníqueza' neda'queza': Ba déle'e chiu' da zante chee zane' iza. Bezí' lazre'. Güe'e gudagu, ne gubé." <sup>20</sup>Na' Dios guzre' bénnea': "Lue', benne' zide', lu zre' na'a zre' gatiu', na' da nuzrá' chawu', quebe nézenu' nu chee gaca na." <sup>21</sup>Ca'an dxaca chee benne' dxutupe' xel-la gunní'a da gaca cheéqueze'. Naque' ca tu benne' xache' lau Dios.

*Dios dxuxúe' bi chee' ca'*

*(Mt. 6.25-34)*

<sup>22</sup>Ca gude' na', Jesús guzre' benne' ca' dxusédene':

—Dxapa' le'e, quebe cue'le gunne xue ca naca da gágule chee gaca banle, ne ca naca zra lánale da gácule. <sup>23</sup>Xel-la nabán chee le zácadxa na ca da gágule, na' bel-la' dxen chee le zácadxa na ca zra lánale. <sup>24</sup>Le nna'xque ca dxaca chee bxínnedu ca'. Quebe dxelázaba', ne quebe dxelelápaba', ne quebe zaj zua naga dxuluxzraba', na' Díosqueze' dxuxi'aj dxugawe'-ba'. Zácadxale le'e ca bxínnedu ca'. <sup>25</sup>¿Núla le'e séquele gusetunna cuínale xetú ben lawe' da dxebe'le'e gunne xue? <sup>26</sup>Che quebe gaca gunle tu da naca da dauze, ¿bizr chee na' dxebe'le gunne xue chee da ca' xezícala?

<sup>27</sup>'Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du ladxé', na' dxapa' le'e, wenná bea Salomón quebe gucue' da xrtandxa ca tu xiajdu

caní. <sup>28</sup> Che Dios dxugacue' caní xíxre'du ca', da zaj zua na'a le'e xixre', na' wxre xelexze na, ¿quegá gundxe' cheele le'e, benne' dxelájle'e láteze chia'? <sup>29</sup> Chee le na', quebe cue'le gunne xue ca naca da gágule, u ca naca da xí'ajle, ne quebe súale stebe. <sup>30</sup> Ca' naca na, lawe' da ca naca benne' ca' zaj zre'e xezr la xu dxelxilaje' ca naca da caní, san le'e, zua Xrale xabáa ba nézeng' nachínnele ca naca da caní. <sup>31</sup> Le cue' gunne xue nna bea Dios lu xichaj lárdaule, na' sile ca naca da caní.

*Da gunní'a da dxegú'u cháwedxu xabáa*  
(Mt. 6.19-21)

<sup>32</sup> Na' gunná Jesús:

—Quebe zrêbele, zrila'du chia', bábaze nácale le'e. Xrale Dios dzezaca ba lazre' gunne' cheele lataj naga dxenná be'e. <sup>33</sup> Le gute da nácale, na' le gunezruj benne' xache' ca'. Ca'an gaca, guzrale na naga quebe te chee na, na' gápale da gunní'a xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na. <sup>34</sup> Naga nuzúale xel-la gunní'a cheele, na' súaqueze lárdaule.

*Dxal-la' gupá'a cuínadxu*

<sup>35</sup> Na' gunná Jesús:

—Le gupá'a cuínale, ne le gugala xi' cheele. <sup>36</sup> Le gaca ca benne' wen zrin ca' dxelebeze' xrane' xezrine' lu laní chee wechaga na', na' nne' dxu'a dxa xu'u na'. <sup>37</sup> Ba neza zrente naca na chee benne' wen zrin ca', benne' ca' xedajxraca xrane' le' dxelenaze' gate xezrine'. Da li dxapa' le'e, xrane' na' cueche' benne' ca' xelawe', na' guzúa cuine' chee que'e da xelagu benne' wen zrin ca'. <sup>38</sup> Lácala xezrine' dxela u dxani'sise', che xedajxraque' le' dxelennaze', ba neza naca na chee benne' wen zrin ca'. <sup>39</sup> Dxal-la' nézele da nigá, che xrane xu'u gunézen' bi zra zrin gubán, na' quebe gasie' chee quebe gu'e lataj quíduje' lizre' chee cuane' da nape'. <sup>40</sup> Cá'anqueze le'e, le sua ban lazre', lawe' da gate québela nézele, xelá'a neda', Benne' Gulje' Bénneache.

*Benne' wen zrin li lazre', ne benne' wen zrin quebe naque' li lazre'*  
(Mt. 24.45-51)

<sup>41</sup> Nadxa Pedro bchebe' Jesús:

—Xran, ¿bchálaju' da dxulé'e nigá chee nétu'ze, che chee xúguté benne'?

<sup>42</sup> Xránadxu gunné':

—¿Nuzra naca wen zrin li lazre', bënnea' dxucá'ana xrane' lu ne'e benne' zaj zra' lizre' chee gunézruje' da xelagu benne' ca' gate zrin zra chee na? <sup>43</sup> Ba neza naca na chee benne' wen zrin na', gate xezrin xrane', xedajxraque' le' dxune' ca da nabague'. <sup>44</sup> Da li dxapa' le'e, xrane' gucá'ane' lu ne'e xúguté da nape'. <sup>45</sup> Che benne' wen zrin na' dxéquene' wazré xrane' xel'é, ne su lawe' gusaca zi'e benne' wen zrin xezica ca', ne nu'ula wen zrin ca', ne su lawe' xi'aj gawe', ne súzrene', <sup>46</sup> nadxa xrane' xel'é lu zra quebe dxebeze' le', ne lu zra quebe nézeng', na' gusaca zi'le'e le', ne chugue' chee' saque' ca xezezaca benne' ca' quebe zaj naque' chee Dios.

<sup>47</sup> Benne' wen zrin na' nézeng' ca da dxaca lazre' xrane' san quebe nucueze', ne quebe dxuzúe' dizra', benne' nigá gudé'e le' ba xa'. <sup>48</sup> Benne' wen zrin na' quebe nézeng' da na', ne dxune' da dxusebaga na le' zria, benne' nigá té'e láteze xel-la zi'. Che tu benne' dxezí'le'e da dxunezruj Dios le', Dios wanábale'e le, na' bënnea' Dios nuxrén lazre' le' da zrente, Dios wanné xúele'ene' le'.

*Dxelaca benne' chupa la'a ne chee Jesús*  
(Mt. 10.34-36)

<sup>49</sup> Na' gunná Jesús:

—Neda' bla'a guzrena' xi' lu xezr la xu nigá, na' la guzreda' ba dxala xi' na'. <sup>50</sup> Dxal-la' chu'a lu xel-la gute ca dxu'u tu benne' lu nisa gate dxedxúe' nisa, na' tèle'a xel-la zi' cadxa gácatequeze na. <sup>51</sup> ¿Dxéquele le'e za' neda' cu'a xel-la dxebeza zri lazre' lu xezr la xu nigá? Dxapa' le'e: Cabí. Za'a chee guna' benne' chupa la'a. <sup>52</sup> Na'a su lau, gazxu' benne' zaj zre'e tu xu'u xelague' chupa la'a. Chunne' xeledábague' chupe', na' chupe' xeledábague' chunne'. <sup>53</sup> Xra tu bi biu tábague' bi biu chee', na' bi biu na' tábagabe' xra'be'. Xrna tu bi nu'ula tábague' bi nu'ula chee', na' bi nu'ula na' tábagabe' xrnabe'. Tau zrí'ine tu nu'ula tábague' zru'a lizre', na' zru'a lizre' na' tábague' tau zrí'ine'.

*Da dxululé'e na ca da gaca lu zra na'a zra*  
(Mt. 16.1-4; Mr. 8.11-13)

<sup>54</sup> Na' Jesús guzre' benne' ca':

—Gate le'e dxelé'ele da' beuj naga dxebía gubizra, na' dxennale, waca xiuj, ne ca' dxaca. <sup>55</sup> Gate dxaca be' za na chalá'a naga dxedé gubizra beu' zaga ca', na' dxennale waca da la, ne dxaca ca'. <sup>56</sup> Le'e, benne' dxunle láweze da xrlátaje. Le'e nézele nnale ca da gaca zran xabáa,

ne lu xęzr la xu nigá, san quebe dxezéquele xuzájla'ale da dxululé'e na ca gaca cheęle lu zra na'a zra.

*Dxal-la' xezúadxu lu xel-la dxebeza zri lazre' nen benne' dxedábague' dxi'u*  
(Mt. 5.25-26)

<sup>57</sup> Na' gunná Jesús:

—¿Bizr cheę na' quebe dxeque be'ele da naca xrlátaje? <sup>58</sup> Che nu benne' dxaca lazre' guzúę' lue' lau benne' dxuchi'e, na' gate chéajęnu' le' cheę zrinle lau bęnnea', bęn ba xen xezú' lu xel-la dxebeza zri lazre' nen bęnnea' dxácate xu'ule neza, cheę quebe che'e lue' lau bęnnea', na' bęnnea' gudęę' lue' lu na' benne' gusęzıxuje' lue' lizre xia. <sup>59</sup> Dxapa' lue' quebe xedxúaju' na' cadxa quızruju' ca da dxebagu'.

## 13

*Dxal-la' xelxebi'i lazre' bęnneache*

<sup>1</sup> Ca lu zra na' belezrin bal-la benne' lau Jesús, na' buluzenne' Le' ca bęn Pilato, bętię' bal-la benne' Galilea, na' bchague' dxen cheę benne' ca' nen dxen cheę bę xixre', bea ca' ba belutię' cheę xuluzrıę' dxen cheę na lau Dios. <sup>2</sup> Na' Jesús guzre' le':

—¿Dxéquele le'e canı gulezaca benne' ca' lawe' da zaj nácadxe' benne' dul-la ca benne' ca' xezıcala zaj zre'e xezre ca' zaj nababa Galilea? <sup>3</sup> Dxapa' le'e: Cabı, na' che quebe xebi'i lázrele le'e, xúgutele le'e cuıa xile. <sup>4</sup> ¿Dxéquele le'e benne' chinu chunna ca' gulatıę' gate guzrıa cha xu'u sibe le' da nazı le na Siloé zaj nabágadxe' dul-la ca xezıcala benne' ca' zaj zre'e xezre Jerusalén? <sup>5</sup> Dxapa' le'e: Cabı, na' che le'e quebe xebi'i lázrele, cá'anqueze le'e wabıa xile.

*Xaga higo da quebe dxebıa na da zixre*

<sup>6</sup> Nadxa Jesús bchálajęne' benne' ca' da dxulé'e nigá, dxenné':

—Tu benne' zua tu xaga higo cheę' zua na lu xęzr la xu cheę', na' xeańę'e na che zrıa na, na' quebe bi bezréleńę'. <sup>7</sup> Nadxa guzre' benne' dxun zrin lu xęzr la xu cheę': "Gunná'xque, chun ızate ba bida' dxenná'a che zrıa xaga nigá, ne quebe bi bezréleda'. ¡Guchugu na! ¿Bizr cheę na' nulán na xęzr la xu nigá?" <sup>8</sup> Bęnnea' dxun zrin cheę xęzr la xu na' bechebe': "Xran, bca'ana na xetú ıza na'a. Guzúludxa' zran na, ne cua'a na bębe. <sup>9</sup> Nen da na', gúnmalja na, san che cabı, na' chugu na."

*Jesús dxexunę' tu nu'ula nalegu cuzre'*

<sup>10</sup> Gate naca zra dxulupá'ana judıo ca', na' zua Jesús tu lu xu'u naga dxelezraga judıo ca' dxusédenę' benne' ca', <sup>11</sup> na' zua na' tu nu'ula xu'e wę' ba guca chinu chunna ıza. Tu be' xriwe' nun na le' cuzru legu, na' quebe dxácaqueze' xelıę'. <sup>12</sup> Gate ble'e Jesús le', na' gunné' le', ne guzre' le':

—Nu'ula, ba bexacu' cheę xızrawę' chiu'.

<sup>13</sup> Nadxa guxrıa ne'e nu'ula na', na' la ná'queze nu'ula na' belite', na' guzú lawe' dxue lá'ane' Dios. <sup>14</sup> Na' benne' xıchaję cheę xu'u na' bzre'e lawe' da bexún Jesús nu'ula na' lu zra dxulupá'ane', na' guzre' benne' zaj zre'e na':

—Xrupa zra dxal-la' gundxu zrin. Lu zra ca' waca xıdale xexácale, quegá lu zra dxupá'anadxu.

<sup>15</sup> Nadxa Xránadxu bechebe':

—Le'e, benne' dxelún láweze da xrlátaje, ¿quebe dxesézrele le'e bezre cheęle u burro cheęle lu zra dxupá'anadxu chjua'le-ba' xelé'ajba' nısa? <sup>16</sup> Nú'ula nigá naque' xrtıa Abraham, na' da xriwe' nuchéaj na le' lu xızrawę' nigá ba zeań chinu chunna ıza, na' ¿quebe dxal-la' xebéaja' xızrawę' da nuchéaj na le' lu zra dxupá'anadxu?

<sup>17</sup> Gate gunná Jesús da nigá, xúgute benne' dxeledábague' Le' belexedué'ene', na' xúgute benne' xezıcadxa gulebenę' gate belelé'ene' ca naca da zrentę da dxun Jesús.

*Da dxulé'e na ca naca cheę binnedau' cheę mostaza*

(Mt. 13.31-32; Mr. 4.30-32)

<sup>18</sup> Nadxa gunná Jesús:

—¿Aja naca xel-la dxenná bea cheę Dios, ne bi gutıl-le lębedá na? <sup>19</sup> Naca na ca tu binnedau' cheę mostaza, tu benne' dxaze' na lu xęzr la xu cheę', na' dxegula na, ne dxácate na ca tu xaga zren, na' bxınnedu ca' dxuluzrıaba' xrú'uneba' lu zruze na ca'.

*Da dxulé'e na ca naca cheę cua zichaj cheę xeta xtıla*

(Mt. 13.33)

<sup>20</sup> Cá'anqueze gunná Jesús:

—¿Bizra gutıl-le lębedá' xel-la dxenná bea cheę Dios? <sup>21</sup> Naca na ca cua zichaj cheę xeta xtıla tu nu'ula dxuchague' na chunna xaga de xezaj, na' dxuchazra na ca naca cua na'.

*Dxa xu'u lechide'*

*(Mt. 7.13-14, 21-23)*

<sup>22</sup> Dxácatē xu'u Jesús neza zexíaje' xēzre Jerusalén, dxusédene' bēnneache lu xēzre ca', ne xēzredu ca' naga dxedéé'. <sup>23</sup> Na' bchebe tu benne' Le':

—Xran, ¿bábaze benne' xelélé?

Bechebe Jesús:

<sup>24</sup> —Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'e na', na' quebe xelezéquene'. <sup>25</sup> Ca te na' chasa xrane xu'u, ne gusézxuje' dxa xu'u, na' le'e zrale chalé'ajla nnele dxu'a dxa xu'u na', nnale: "Xran, gusalaj chú'untu!" Na' le' xechébe': "Quebe nezda' ga benne' le'e." <sup>26</sup> Nadxa su láuquezle le'e nnale: "Güe'e gudágulēntu' lue', na' lue' bsédenu' lu neza cheēntu' ca'." <sup>27</sup> Le' xechébe': "Dxapa' le'e, quebe nezda' ga benne' le'e. Le cuasa cuita' neda', xúgutele le'e dxunle da calela." <sup>28</sup> Na' cuézele, ne xagu xá'atē lázxale gate lé'ele Abraham, ne Isaac, ne Jacob, ne xúgute benne' ca' gulenné' waláz cheē Dios, zaj zue' naga dxenná bea Dios, na' le'e zrale chalé'ajla. <sup>29</sup> Welelá' benne' zaj zre'e dapa saca cheē xēzr la xu nigá, na' xelebé'e xelawē' naga dxenná bea Dios. <sup>30</sup> Nadxa bal-la benne' zaj naque' bzébedxa na'a xelaque' benne' blau, na' benne' zaj naque' blau na'a xelaque' bzébedxa.

*Dxebezre Jesús cheē xēzre Jerusalén*

*(Mt. 23.37-39)*

<sup>31</sup> Lu zra ná'queze, belezrín lau Jesús bal-la benne' fariseo ca', na' gulé'e Le':

—Bezá' nigá, lawe' da dxaca lazre' Herodes gutie' Lue'.

<sup>32</sup> Jesús bechébe':

—Le chjaca cheajguézrele benne' wilaj lazre' calela na': "Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'." <sup>33</sup> Dxun na ba xen chéajlēna' neza chia' na'a, ne wxre, ne wizraj, lawe' da quebe gaca gate tu benne' dxenné' waláz cheē Dios che quebe xelute benne' Jerusalén le'.

<sup>34</sup> "Jerusalén, Jerusalén, le'e na' dxútele benne' dxelenné' waláz cheē Dios, ne dxuzríale xiaj benne' gubáz ca' dxesel-la Dios. Zane' lasa guca lazra' gutupa' bi chee le ca' ca dxun bedxuj, dxutúpaba' bédxujdu ca' zran xrílaba', san quebe guca lázrele. <sup>35</sup> ¡Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca zrindxa zra nnale: ¡Lá'azxa naca Bēnnea' ze'e lu La Xránadxu!"

## 14

*Jesús dxexunē' tu benne' de xi' ca naca bēl-la' dxen chee'*

<sup>1</sup> Tu zra dxulupá'ana benne' judío ca' guxíaj Jesús zeajtawē' lizre tu benne' blau chee benne' fariseo ca', na' benne' fariseo ca' dxuluzuzre' Jesús bi guné'. <sup>2</sup> Zúaqueze lau Jesús tu benne' de xi' ca naca bēl-la' dxen chee'. <sup>3</sup> Nadxa Jesús bchebe' benne' ca' dxuluzuzájle'e da nadxixruj bea na, ne benne' fariseo ca', gunné':

—¿Waca nu benne' xexunē' benne' we' lu zra dxupá'anadxu, che cabí?

<sup>4</sup> Benne' ca' gulezúe' zrize. Nadxa Jesús guquē'e benne' we' na', ne bexunē' le', na' guzre' le' xexíaje'. <sup>5</sup> Nadxa guzre' benne' fariseo ca':

—¿Núlale le'e, che bezre chee le u bia chee le bíxreba' tu lu xēdxu, quebe xebéajle-ba' zra ná'queze lálala naca zra dxupá'anadxu?

<sup>6</sup> Quebe bi guca xelexechebe'.

*Benne' zaj zre'e laní cheē wechaga na'*

<sup>7</sup> Gate ble'e Jesús ca dxelún benne' ca', dxelebé'e lataj blaudxa ga dxelawē', na' bchálaje' da dxulé'e na, dxenné':

<sup>8</sup> —Gate tu benne' dxenné' lue' laní cheē wechaga na', quebe cue'u lataj blau, lawe' da che wazá tu benne' nácadxē' blau ca lue', <sup>9</sup> na' bēnnea' gunné' dxúpatele xidē' xe'e lue': "Bnezruj lataj nigá benne' nigá." Nadxa gun na ba xen xexíaju' lataj bzébedxa lu xel-la stu'. <sup>10</sup> Na'a, gate nu benne' nne' lue', gudxé'e lataj bzébedxa, chee gate za bēnnea' gunné' lue', wanné': "Bi ljwezra', gudé nigala naga nácadxá blau." Ca'an gaca, xegá'anu' szren lau benne' ca' zaj zre'e dxelágulēne' lue'. <sup>11</sup> Benne' dxucá'ana szren cuine', wexéxrujla bēnnea', na' benne' dxucá'ana baxache' cuine' wegá'ana szrénqueze'.

<sup>12</sup> Nadxa Jesús guzre' benne' na' gunné' Le':

—Gate gunézruju' tu zrué u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walízr chiú' ca' zaj nape' da gunní'a, lawe' da benne' caní welenné'queze' lue', na' zrué'equenzu' da xelexexunne' chiú'. <sup>13</sup> Gate dxunu' tu laní, gunné' benne' xache' ca', ne benne' zaj nadxugu ni'a ne'e, ne benne' zrinnaj ca', ne benne' la chul-la ca'. <sup>14</sup> Caní gaca tu da ba neza chiú', lawe' da benne' caní quebe gaca xelexexunne' ca' chiú', na' wazrué'enu' lazru' gate xelexebán benne' xrlátaje ca'.

*Da dxulé'e na ca naca chee tu xrche' zren*

<sup>15</sup> Gate ben tu benne' dxágulë Le' da na', na' guzre' Jesús:

—Ba neza zrentë naca na chee benne' gawe' xeta naga dxenná bea Dios.

<sup>16</sup> Jesús guzre' le':

—Tu benne' gulu'e tu xrche' zren, na' gunné' benne' zan. <sup>17</sup> Ca bzrin zra xelawe' xrche' na', gusél-le' wën zrin chee' chee' cheajezre' benne' ca' gunné': "Le da, lawe' da ba nusení'a da gágudxu." <sup>18</sup> Xúgute' gulezú lawe' dxelenabe' gu'e le' lataj quebe xelidë'. Benne' nedxu gunné': "Za bezitea' tu cue' xezr la xu chia', na' dxal-la' cheajnná'a na. Dxata' xueda' lue' si zrenu' chia'." <sup>19</sup> Xetúe' gunné': "Za bezitea' gazxu' cue' bežr chia', na' guxúa' aja xelumba'. Dxata' xueda' lue' si zrenu' chia'." <sup>20</sup> Na' xetúe' gunné': "Za bchágate na'a, na' quebe gaca xida'." <sup>21</sup> Gate bezrín benne' wën zrin na', guzre' xranë' ca naca da nigá. Nadxa bzra'a xranë' na', na' guzre' wën zrin na': "Guxíaj na'a la neza ca', ne neza chee' xezre nigá, na' xeaxrí' xúgute' benne' xache' ca', ne benne' zaj nadxugu ní'a ne'e, ne benne' zrinna' ca', ne benne' la chul-la ca'." <sup>22</sup> Ca gude' na' gunná benne' wën zrin na': "Xran, ba bena' ca' gunnáu', na' ne dexda lataj." <sup>23</sup> Nadxa gunná xranë' na': "Guxíaj na'a la neza ca', ne neza lásedu ca', na' xeaxjén ba xen xelélé'e, chee' cha' lizra' nigá. <sup>24</sup> Dxapa' le'e, netú benne' ca' gunné'a' nédxula quebe xelawe' xrche' chia'."

*Xel-la zi' da te benne' chéajlëne' Jesús*

<sup>25</sup> Benne' zan zjácalëne' Jesús, na' Le' bexéchajë', na' guzre' benne' ca':

<sup>26</sup> —Che nu benne' ze'e naga zua', ne quebe guzúe' chalá'ala xre', ne xrne'e, ne zru'ule', ne zrí'ine' ca', ne bi biche' ca', ne bi zang' ca', ne xel-la nabán chee', quebe gaca gaque' neda' tuze. <sup>27</sup> Benne' quebe sál'lene' neda' lácala dxal-la' te'e xaga béguaj, quebe gaca gaque' neda' tuze. <sup>28</sup> Che tu benne' ládujla le'e dxaca lazre' gune' tu xu'u sibe, ¿quebe cue'e' nedxu gune' xrbaba chee' che wazúene' xuzrte' na? <sup>29</sup> Che quebe gune' caní, ne che cueche' lane na, na' ca te na' quebe suene' xuzre' na, na' xúgute' benne' xelélé'eng' na xelézú lawe' xelún le' chee' bënnea', <sup>30</sup> na' xelenné': "Benne' nigá guzú lawe' dxunë' tu xu'u. Quebe guque' gune' ca naca." <sup>31</sup> Che tu benne' wenná bea dxal-la' cheajtíl-lalëne' xetú benne' wenná bea, ¿quebe cue'e' gune' xrbaba chee' che wazúene' nen tu gaxúa gaxúa benne' dxjaque' wedil-la cheajtíl-lalëne' bënnea' za' nen chupa gaxúa gaxúa benne' dxjaque' wedil-la? <sup>32</sup> Che quebe séquene', gate benne' wenná bea na' xetú ne ze'e' zitu', na' sel-le' gubáz chee' ca' xelenabe' gata' xel-la dxebeza zri lazre'. <sup>33</sup> Ca' naca na, núteteze benne' ládujla le'e, che quebe gusanë' ca naca da nape', quebe gaca gaque' neda' tuze.

*Zede' da québedxa naca na sna'a*

(Mt. 5.13; Mr. 9.50)

<sup>34</sup> Na' gunná Jesús:

—Zede' naca na da chawe', san che québedxa naca na sna'a, ¿ájazra guchínedxu na?

<sup>35</sup> Quebe gaca guchínedxu na, quegá chee' gucá'ana cháwedxu xezr la xu, ne quegá chee' guchíxredxu bebe, san dxal-la' chú'unadxu na. Benne' ca' zaj zua nague', dxal-la' xelenne'.

## 15

*Ca guca chee tu zrila' guníteba'*

(Mt. 18.10-14)

<sup>1</sup> Benne' zantë benne' wechizruj waláz chee' Roma, ne benne' dul-la ca' gulebigue' naga zua Jesús chee' xelenne' da dxuchálaje'. <sup>2</sup> Chee le' na' benne' fariseo ca', ne benne' dxuluxuzájle'e da nadxixruj bea na gulezí tizre' Jesús, gulenné':

—Benne' nigá dxunë' tu zren benne' dul-la ca', ne dxágulëne' le'.

<sup>3</sup> Nadxa bchalaj Jesús da dxulé'e na, gunné':

<sup>4</sup> —Nu benne' ládujla le'e, che nape' tu gaxúa zrila', na' nite tuba', ¿quebe gucá'ane' xetápalalaj chënnu zrila' ca', bea ca' zaj zraba' le'e xixre', na' se'e' cheajdílaje' bea na' guníteba' cadxa xezrelne'-ba? <sup>5</sup> Na' gate xezrelne'-ba', bene', na' xeque'e-ba' xexrúe'-ba' xe'a xene'.

<sup>6</sup> Na' ca' xezrine' lizre', gutupe' ljwezre' ca', ne benne' walizre chee' ca'. Na' xe'e le': "Le be nen neda', lawe' da bezrelda' zrila' chia' guníteba'!"

<sup>7</sup> Na' gunná Jesús, dxë'e benne' ca':

—Cá'anqueze zúalë'dxa xel-la dxebe' xabáa gate tu benne' dul-la dxexebí'i lazre', quézcala chee' tápalalaj chënnu benne' xrlátaje ca' dxelëquene' quebe dxun na ba xen xelexebí'i lazre'.

*Ca guca chee tu dumí da gunite*

<sup>8</sup> Nadxa Jesús bchálaje' xetú da dxulé'e na, dxë'e benne' ca':

—Tu nu'ula nape' chi dumí zaca, na' che nite tu na, nadxa guzúe' xi' chee' chee' gusaní na lu xu'u chee'. Nadxa su lawe' gulúe' lu xu'u chee', xexílaje' bínnalu ca' xezrelne' dumí chee'

da gunite na. <sup>9</sup> Na' ca xezrelne' dumí na', gutupe' nu'ula ljwezre' ca', ne nu'ula walíizr chee' ca', na' xe'e le': "Le be nen neda', lawe' da bache bezrelda' dumí chia' da gunite na."

<sup>10</sup> Na' gunná Jesús, dxé'e benne' ca':

—Cá'anqueze dxelebé gubáz chee' xabáa ca' chee' Dios gate tu benne' dul-la dxexebi' lazre'.

*Ca guca chee' zri'ine tu benne' gunítebe'*

<sup>11</sup> Nadxa Jesús bchálaje' xetú da dxulé'e na, dxé'e le':

—Tu benne' zaj zra' chupa bi chee'. <sup>12</sup> Na' bi cuide' chee' gúzrebe' xrabe': "Xrae, benna chia' da dxal-la' si'a chee' da naca chiu'." Nadxa xrabe' beñe' gachaj da bnézruje' cha chee'be' tube', ne xetube'. <sup>13</sup> Ca gudé tu chupa zra, bi cuide' chee' bénnea' btúpabe' xúgute' da naca chee'be', na' guzabe' zitu', na' bzrinbe' xetú xezr la xu. Na' ben dítajbe' dumí chee'be' lu da calela da benbe'. <sup>14</sup> Na' ca gudache xúgute' dumí chee'be', bzrin tu gubina' lu xezr la xu na', na' lebe' gudunbe'. <sup>15</sup> Nadxa guzabe' xeajtlajbe' zrin gunbe' chee' tu benne' lu xezr la xu na'. Benne' na' gúsé-le'-be' le'e xixre' chee' chee' cheajxúbe' cuche chee' ca'. <sup>16</sup> Guca lázrebe' gágube' da calela da dxelagu cuche ca'. Netú benne' quebe bi bnézruje' da gágube'. <sup>17</sup> Nadxa xeajsá lázrebe', dxennabe': "Benne' zante, benne' wen zrin zaj zre'e lizre xra', na' déle'e da dxelawe'. Neda' dxátequeza' xel-la dxedún. <sup>18</sup> Webi'iza' xexá'a naga zua xra', na' xapa' le': Xrae, bena' dul-la lau Dios, ne lau lue'. <sup>19</sup> Québedxa naca chia' gaca' zri'inu'. Bzua neda' ca tu benne' wen zrin chiu'." <sup>20</sup> Nadxa begú'ube' neza, bezrinbe' lizre xrabe'.

"Tu chi na', ble'e xrabe' lebe' ba zezabe', na' bexache lazre'-be'. Na' guzá chégüe' xeajchague'-be', na' bnide'be', ne bnúpete'-be'. <sup>21</sup> Nadxa gunabe': "Xrae, bena' dul-la lau Dios, ne lau lue'. Québedxa naca chia' gaca' zri'inu'." <sup>22</sup> Na' gunná xrabe', dxé'e benne' wen zrin chee' ca': "Le cueaj zra lana' da zaca, ne le gugacu-be'. Le cu'u tu da naca oro zrube nabe', ne le cu'u xel-la ní'abe'. <sup>23</sup> Le cheajzri' tu bezre be' dxanne, na' gútele-ba'. Gágudxu, ne gundxu laní, <sup>24</sup> lawe' da bi chia' nigá guca chee'be' ca tu benne' ba gute, na' bebanbe'. Gunítebe', na' ba bezrágadxu-be'." Na' gulezú lawe' dxelune' laní.

<sup>25</sup> 'Dxácaté na', zri'ine' bi waca zúabe' le'e xixre' dxunbe' zrin. Na' chizrela' ca bezrinbe' gagu cuita xu'u lizre xrabe', na' benbe' dxaca wil-la, ne dxaca wexá'a. <sup>26</sup> Nadxa gunnébe' tu bi wen zrin na', dxé'ebe' lebe': "¿Bi dxaca nigá?" <sup>27</sup> Bi wen zrin nigá cúnname': "Ba belá' bi bichu', na' xrau' gunná bé'eng' nu gute tu bezre be' dxanne, lawe' da belabe' zúabe' zri'a chawe'." <sup>28</sup> Bzra'a bi waca na', na' quebe guca lázrebe' xexú'ube'. Nadxa bdxuaj xrabe', ne guta' xuene' lebe' xexú'ube'. <sup>29</sup> Na' cúnname', dxé'ebe' xrabe': "Nézqueznu' zane' iza ba bena' zrin chiu', ne cabata' bcha'a lue', na' ne tu lasa quebe ne gunnu' chia' tu chibudau' chee' guna' tu laní nen ljwezra' ca'. <sup>30</sup> Na'a belá' bi chiu' nigá, bi ba ben dítajbe' dumí chiu', guzúalebe' nu'ula dxeledá zraga ca', na' be'te lizu' bezre be' dxanne ne chee' lebe'." <sup>31</sup> Nadxa gunná xrabe', dxé'e-be': "Zri'ina', lue' tu zúalezquezu' nen neda', na' xúgute' da de' chia' naca na chiu'. <sup>32</sup> Na'a dxun na ba xen gundxu laní, ne bedxu, lawe' da bi bichu' gúgabe' ca tu benne' ba gute, ne naca banbe'. Gunítebe', na' ba bezrágadxu-be'."

## 16

*Benne' wen zrin blau quebe naque' xrlátaje*

<sup>1</sup> Nadxa Jesús guzre' benne' ca' dxusédene':

—Guzúa tu benne' gunní'a, na' zua tu benne' wen zrin blau chee'. Na' bal-la benne' xeajleguezre' le' benne' wen zrin blau na' dxun dítajé' da de' chee' xrané'. <sup>2</sup> Nadxa xrané' gunné' le', ne guzre' le': "¿Bizra da nigá dxelenné' chiu'?" Blué'e neda' ca naca chee' zrin dxunu', lawe' da québedxa gaca gacu' wen zrin blau chia'." <sup>3</sup> Nadxa benne' wen zrin blau na' guzú lawe' dxenné' lu xichaj lázrdawe': ¿ájazra guna' na'a, lawe' da xebéaj xrana' neda' lu zrin chia'? Quebe sueda' guna' zrin le'e xixre', ne wedué'eda' naba' guna'. <sup>4</sup> Na'a ba nezda' tu da guna' chee' xelezúa benne' xelezú' lu ne'e neda' gate québedxa de' zrin chia'. <sup>5</sup> Nadxa gunné' tu tu benne' dxelal-le' chee' xrané' na'. Na' bche'be' benne' nedxu: "¿ájate dxal-lu' chee' xrana'?" <sup>6</sup> Benne' na' beche'be': "Dxal-la' chee' tu gaxúa zruaga da za." Nadxa benne' wen zrin blau na' guzre' le': "Nigá de' xiche chiu'. Gudxé'e bexún xetú na, na' bzuaj na dxebagu' chi xu zruaga ca'." <sup>7</sup> Gudé na' bche'be' xetú benne' ca': "¿Gazra lue', ájate dxebagu'?" Na' benne' nigá guzre' le': "Dxebagu' tu gaxúa bzude' zrua' xtila." Nadxa benne' wen zrin blau guzre' le': "Nigá de' xiche chiu'. Ben xetú na, na' bzuaj na dxebagu' tápalalaje." <sup>8</sup> Xrané' gúquebe'eng' nácalé'e sina benne' wen zrin blau na' ca beñe' da ca'.

Nadxa gunná Jesús:

—Ca' naca na, benne' zaj zre'e na'a zra zaj nácadxe' sina lu da dxelune' nen le sa' ljwezre' ca', ca zaj naca benne' zaj naque' chee' Dios.

<sup>9</sup> 'Neda' dxapa' le'e, le guchine xel-la gunní'a chee' xezr la xu nigá chee' cha benne' ljwézrele, chee' gate te chee' xel-la gunní'a na', na' sua nu si' lu na' le'e naga gaca banle chadía chacanna.

<sup>10</sup> 'Benne' dxuchínene' láteze lu duté xel-la li lazre' chee', cá'anqueze guchínene' tu da zrendxa duté xel-la li lazre' chee', na' benne' quebe naque' li lazre' ca dxuchínene' láteze, cá'anqueze quebe gaque' li lazre' ca guchínene' tu da zrendxa. <sup>11</sup> Ca' naca na, che quebe nácale li lazre' ca dxuchínele xel-la gunní'a chee' xezr la xu nigá, ¿nuzra guxrén lazre' le'e chee' guchínele xel-la gunní'a li? <sup>12</sup> Che quebe nácale li lazre' ca dxuchínele da naca chee' benne' xula, ¿nuzra gunna le'e da gaca cheé'quezele?

<sup>13</sup> 'Quebe gaca tu benne' w'en zrin gune' zrin chee' chupa xrane', lawe' da cuídené' tué', na' xetúe' zrí'ine', u gaque' li lazre' nen tué', na' xetúe' guzúe' chalá'ala. Quebe gaca nu gun zrin chee' Dios, ne chee' da gunní'a da nape'.

<sup>14</sup> Benne' fariseo ca', benne' dxulucúdee' dumí, ne dxuluzé' nague' da dxenná Jesús, belún le' chee'.

<sup>15</sup> Nadxa gunná Jesús:  
—Le'e dxulé'e cuínale xrlátaje lau bénneache ca', san Dios núnbe'e' lázrdaule. Da dxeleque bénneache naca na xrlátaje, naca na da dxuzúa Dios chalá'ala.

*Da nadxiruj bea na, ne xel-la dxenná bea chee' Dios*

<sup>16</sup> Na' gunná Jesús:

—Ca bzrin zra zua Juan gulenná bea da nadxiruj bea na, ne da bululé'e benne' ca' buluchálaje' waláz chee' Dios. Na'a, ca na'te dxendxu dizra' chawe' ca gaca chú'udxu naga dxenná bea Dios, na' xúguté benne' dxelune' ba xuzre xelu'e na'.

<sup>17</sup> 'Waca te chee' xabáa, ne chee' xezr la xu nigá, san quebe te chee' tu da naxúaj na lu da nadxiruj bea na.

*Benne' biu dxulusáne' nu'ula chee'*

*(Mt. 19.1-12; Mr. 10.1-12)*

<sup>18</sup> Na' gunná Jesús:

—Che tu benne' biu gusané' zru'ule', ne súalene' nu'ula xula, benne' biu nigá dxune' dul-la dxáchajne' xrba chee' xel-la wechaga na', na' benne' biu zúalene' tu nu'ula ba bsan benne' chee' le', benne' nigá cá'anqueze dxune' dul-la dxáchajne' xrba chee' xel-la wechaga na'.

*Tu benne' gunní'a, ne tu benne' xache'*

<sup>19</sup> Na' gunná Jesús:

—Guzúa tu benne' gunní'a, gúcue' zra lané' da zaca, ne da zri'a xrtan, na' xúguté zra bene' laní zren. <sup>20</sup> Cá'anqueze guzúa tu benne' xache' le' Lázaro, nazrate' we' lu be'l-la' dxen chee', na' dxeajché'e lu xu dxu'a lizre benne' gunní'a na'. <sup>21</sup> Benne' xache' nigá guzá lazre' gawe' ca da dxelexrj zranla ga dxelagu benne' gunní'a na', na' bécudu ca' dxelelé'eba' lu we' ca' chee' Lázaro. <sup>22</sup> Bzrin zra gute benne' xache' na', na' belexché' gubáz chee' xabáa ca' le' zeajxezúalene' Abraham lu lataj chawe' chee' Dios. Cá'anqueze gute benne' gunní'a na', na' bulucache' le'. <sup>23</sup> Gate benne' gunní'a na' dxezaca zi'e lataj chul-la chee' benne' gate, na' guchisa lawé', na' blé'ene' Abraham zue' zitu', ne Lázaro zúalene' le'. <sup>24</sup> Nadxa gudxezre xe'e, gunné': "¡Xrae, Abraham, hexache lazre' neda', ne gusel-la Lázaro, cheajsebisé' tu zrube ne'e, na' xidé' xucule' luzra' nigá! Dxezaca zi'a lu xi' nigá." <sup>25</sup> Na' Abraham gunné': "Bi chia', bsa lazre' gúcalé'e chawe' chiu' lu xezr la xu, san Lázaro gúcalé'e da zi' da xa' chee'. Na'a le' dxezi'e da ba neza nigá, na' lue' dxezaca zi'u na'. <sup>26</sup> Xetú da zua, zua tu chejéa zrenté laduj netu' ne le'e. Ca' naca na, che nu benne' zua nigá dxaca lazre' chéajé' naga zu', quebe gaca, ne quebe gaca benne' zua naga zu' xidé' naga zúantu' netu'." <sup>27</sup> Nadxa gunná benne' gunní'a na': "Dxata' xueda' lue', xrae Abraham, sel-lu' Lázaro lizre xra', <sup>28</sup> naga zaj zra' gazxu' bi bícha'dau', chee' cheajchálajene'-be', chee' quebe xelalá' lebe' nigá xelzaca zi'be' ca dxaca chia'." <sup>29</sup> Abraham gunné': "Zaj nape' da buluzúaj Moisés, ne benne' ca' buluchálaje' waláz chee' Dios. Dxal-la' xelená' xánnie' da na' naxúaj na'." <sup>30</sup> Benne' gunní'a na' bechebe': "Awe', xrae Abraham, san che nu benne' ládujla benne' gate chéajé' cheajchálajene' le', welexebi' lazre'." <sup>31</sup> Abraham gunné': "Che quebe xelenne' ca da gulenná Moisés, ne benne' ca' buluchálaje' waláz chee' Dios, québequeze xeléajle'e che tu benne' xebane' ládujla benne' gate."

## 17

*Ca naca da dxun na ga nabágadxu dul-la*

*(Mt. 18.6-7, 21-22; Mr. 9.42)*

<sup>1</sup> Jesús guzre' benne' ca' dxusédené':

—Welezúaqueze da xelún na xelebaga bénneache dul-la, na' edxugúa bénnea' gune' da gun na xebaga benne' xula dul-la. <sup>2</sup> Gácadxa chawe' chee' bénnea' che nu guchéaj xiaj xiche lbe', na' chu'e lu nísadau' naga gáteté' quézcala gune' da gun na xebaga bidu caní dul-la. <sup>3</sup> Le guxúe xanne' cuínale.

'Che le sa' ljwezru' gune' chiu' da calela, bzéajni'ine', na' che xebí'i lazre', bnite lau chee'.  
 4 Lácala gune' chiu' da calela gazre lasa tu zra, na' gazre lasa xide' xe'e lue': "Dxexebí'i lazra", dxal-la' gunité lau' chee'.

*Xel-la waca chee' xel-la dxeajli lazre'*

5 Benne' gubáz ca' chee' Xránadxu gul'é' Lē':

—Ben ga cheajli lázredxantu' Dios.

6 Nadxa gunná Xránadxu:

—Che le'e zrué'ele xel-la dxeajli lazre', lácala naca na láteze ca tu bínmedu chee' mostaza, waca xe'e xaga zrenté nigá: "Gucuasa nigá, ne xeajsúa lu nísadau!" na' xaga na' guzúa na dizra' chee'le.

*Da dxal-la' gun benne' wen zrin*

7 'Che tu benne' ládujla le'e zua tu benne' wen zrin chee', na' xel'é' le'e xixre' gate te gudé'e bezre u guxúe' béadu ca', ¿we'e benne' wen zrin na': "Gudé nigala, gudxé'e gagu?" 8 Cabí, san nne': "Bcueza da gawa', ne gusi' chawe' le'u chee' gaca ca'u chia' da xi'aj gawa'. Te na' waca xi'aj gagu' lue'." 9 ¿we'e benne' wen zrin na': "Xcalenu'", lawe' da bñe' da gunná be'e xrané' le'? Cabí. 10 Cá'anqueze le'e, gate xuzre gunle xúguté da gunná be'e Dios le'e, dxal-la' nnale: "Nácantu' benne' wen zrin quebe bi zaj zaca, lawe' da quebe bi ne guntu' da zrédxala ca naca da nabá'gantu'."

*Jesús dxexune' chi benne' zaj de'e we' guzru'*

11 Ca zexiaj Jesús zéaje' Jerusalén, gudé'e lu xezr la xu chee' xezre ca' zaj nababa Samaria, ne xezre ca' zaj nababa Galilea. 12 Gate bzrine' tu xézredau', bedajlechaga Lē' chi benne' zaj de'e we' guzru', na' belezé' zítu'la, 13 ne gulebezre xe'e, dxelenné':

—Jesús, Benne' Weséde, hexache lazre' netu'.

14 Gate ble'e Jesús le', na' gunné':

—Le chjaca le cheajlué'e cuínale lau bxruze ca'.

Dxácte zjaque' na', na' belexexaque' chee' xízrawe' chee'. 15 Nadxa tu benne' ca', gate guque bé'ene' ba hexaque', na' bebi'e, dxue lá'ang' Dios du lazre'. 16 Bzu zribe' lau Jesús, ne gudíxrujte' lawe' lu xu, dxé'e Lē': "Xcalenu'." Benne' nigá naque' tu benne' Samaria. 17 Nadxa gunná Jesús:

—¿Quegá chie' na' belexexaque' lu xízrawe' na'? ¿Gazra na' xegué'? 18 ¿Tuze benne' zítu' nigá belá' güe lá'ang' Dios?

19 Nadxa Jesús guzre' benne' na' hexaque':

—Bexasa, bexiaj. Ba bexactu' lawe' da guxéajle'u chia'.

*Ca la' xel-la dxenná bea chee' Dios*

(Mt. 24.23-28, 36-41)

20 Benne' fariseo ca' buluchébe' Jesús bátala la' xel-la dxenná bea chee' Dios, na' bechébe Lē':

—Ca la' xel-la dxenná bea chee' Dios quebe naca na da lé'ele. 21 Quegá nu nna: "Nigá zua na", u "Na' zua na", lawe' da ba zua lu'ule le'e xel-la dxenná bea chee' Dios.

22 Nadxa guzre' benne' ca' dxusédene':

—Wazrín zra gate le'e gaca lázrele lé'ele tu zra zua' neda', Benne' Gulje' Bénneache, na' quebe lé'ele na. 23 Che xelenná bénneache, xel'é' le'e: "Nigá zue'", u: "Na' zue'", quebe chéajle, ne quebe gaule benne' ca'. 24 Ca dxeajsúa xesa chalá'a zran xabáa, na' nalá'tequeze na xechalá'a zran xabáa, ca'an gaca gate xelá' neda', Benne' Gulje' Bénneache, lu zra xelá'a neda'. 25 Nédxula dxal-la' tèle'a xel-la zi', na' benne' zaj zre'e lu zra na'a zra xuluzúe' neda' chalá'ala. 26 Ca guca lu zra gate zua Noé, cá'anqueze gaca lu zra gate xelá'a neda', Benne' Gulje' Bénneache. 27 Lu zra na' zua Noé gul'é'aj gulawe', ne buluchaga ne'e, ne bulunézruje' bi nu'ula chee' ca' lu xel-la wechaga na', cadxa bzrin zra guxú'u Noé lu da zren na' da dxedá lawe' nísadau', na' gúcale' xiuj, na' gulate xúguté benne' ca'. 28 Cá'anqueze guca lu zra zua Lot, gul'é'aj gulawe', ne gulá'awe', ne belútie', na' gulazé', ne belune' lizre', 29 na' gate Lot bedxúajé' lu xezre Sodoma, na' ca dxaca gate dxaca xiuj, ca'an guca bexruj xi', ne da gache da dxuzéxle'e zran xabáa, ne bzria xi na ca naca benne' ca'. 30 Ca'an gaca lu zra xelá'a neda', Benne' Gulje' Bénneache.

31 'Lu zra na', che nu benne' zé' chju'u chee', na' da de' chee' zra na lu xu'u chee' na', quebe dxal-la' chu'e cuéaje' na, na' che nu benne' zue' le'e xixre', quebe dxal-la' xezrine' lizre'. 32 Le cheajsá lazre' ca guca chee' zru'ula Lot. 33 Benne' dxaca lazre' gapa chi'e xel-la nabán chee' gunitie' na, na' bénnea' wdee' na, wazrué'e bénnea' xel-la nabán.

34 'Dxapa' le'e, lu zre na', chupa benne' xelate' tu zren ga dxelase'. Tue' xeché'e, na' xetúe' xegá'ang'. 35 Chupa nu'ula xelezré'e dxelútue'. Tue' xeché'e, na' xetúe' xegá'ang'. 36 Chupa benne' xelezré'e le'e xixre'. Tue' xeché'e, na' xetúe' xegá'ang'.



<sup>37</sup> Gate belén benne' ca' da nigá, na' buluchebe' Jesús:

—¿Gazra gaca ca', Xran?

Le' bechebe':

—Naga de tu da nate, na' xeledúpaqueze laba ca'.

## 18

*Da dxulé'e na ca naca chee tu nu'ula ba gute benne' chee', ne benne' dxuchi'a da dxaca*

<sup>1</sup> Jesús bchálaje' da dxulé'e na ca naca chee gusédene' benne' ca' dxal-la' xuluwizrajtecaze' Dios, ne quebe xelexebigüe'. <sup>2</sup> Na' guzre' benne' ca':

—Tu xezre guzúa tu benne' dxuchi'e da dxaca, na' quebe gudape' ba lá'ana Dios, ne cá'anqueze bënneache. <sup>3</sup> Lu xezre ná'queze guzúa tu nu'ula ba gute benne' chee'. Guxíaje' xejnabe' lau benne' dxuchi'e da dxaca chee guchi'e da dxaca chee' nen tu benne' dxune' chee' da calela. <sup>4</sup> Zane' lásate benne' dxuchi'e da dxaca quebe guca lazre' guchi'e chee nu'ula na', san ca gudé na' gunné' lu xichaj lárzdawe': Lácala quebe dxapa' ba lá'ana Dios, ne cá'anqueze bënneache, <sup>5</sup> san lawe' da nu'ula nigá dxune' neda' zede, guchi'a chaza' da dxaca chee' chee québedxa xide' gúnle'e neda' zede.

<sup>6</sup> Na' gunná Xránadxu:

—Caní na' gunná benne' wen da calela na', benne' dxuchi'e da dxaca. <sup>7</sup> ¿Quebe guchi'a Dios da dxaca chee benne' ca' ba guqu'e, benne' ca' dxelenné' Le' te zra, ne chizrela? ¿Wazrene' xechebe' chee benne' ca'? <sup>8</sup> Dxapa' le'e, Le' guchi'e da dxaca chee', ne quebe chene'. Gate xelá'a neda', Benne' Gulje' Bënneache, ¿wazréldxada' tu benne' lu xezr la xu nigá, benne' dxéajle'e chia'?

*Da dxulé'e na ca naca chee tu benne' fariseo, ne tu benne' wechizruj*

<sup>9</sup> Jesús bchálaje' xetú da dxulé'e na, chee xelene benne' ca' dxeléquene' zaj naque' xrlátaje, san dxuluzúe' chalá'ala le sa' ljwezre'. <sup>10</sup> Gunné':

—Chupa benne' xjaque' xudau' chee xuluchálajlene' Dios. Tu'e naque' benne' xudau' fariseo, na' xetúe' naque' wechizruj waláz chee xezre zitu'. <sup>11</sup> Benne' xudau' na' guzé' dxuchálajlene' Dios, gunné': "Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da calela, ne benne' dxelún dul-la dxeláchajne' xrba chee wechaga na', ne quegá ca benne' wechizruj nigá. <sup>12</sup> Neda' dxuna' gubasa chupa lasa da gazre zra, ne dxunna' chiu' tu cue' chee da chi cue' da dxezi'a." <sup>13</sup> Benne' wechizruj na' guzúe' dxu'a dxa xú'uze, ne quebe bexazrjne' chisa lawe' xabáa. Béle'e la chu'e, dxenné': "Dios, bexache lazre' neda', naca' benne' dul-la." <sup>14</sup> Dxapa' le'e, benne' wechizruj na' bezé'e xexíaje' lize', ne bexaque' xrlátaje lau Dios, san quegá caní guca chee' xudau' na'. Ca' guca lawe' da benne' dxucá'ana szren cuine' wexéxrujla bënnea', san benne' dxucá'ana baxache' cuine' wegá'ana szrénqueze bënnea'.

*Jesús dxenabe' gaca chawe' chee' bidu ca'*

(Mt. 19.13-15; Mr. 10.13-16)

<sup>15</sup> Belezrín benne' ca' zaj naché'e bidu ca' lau Jesús chee guzé ne'e lebe'. Gate belelé'e benne' ca' dxuséde Jesús da nigá, na' gulezú lawe' dxeledil-le' benne' ca'. <sup>16</sup> Jesús gunné' benne' ca' dxusédene', na' dxe'e le':

—Le güe lataj xeledá' bidu ca' naga zua', ne quebe guzágale-be', lawe' da benne' zaj naque' ca bidu caní welexu'e naga dxenná bea Dios. <sup>17</sup> Da li dxapa' le'e, benne' quebe si' lu ne'e nna bea Dios le' ca dxelún bidu caní, québequeze chu'e naga dxenná bea Dios.

*Tu benne' cuide' naque' benne' gunní'a*

(Mt. 19.16-30; Mr. 10.17-31)

<sup>18</sup> Tu benne' xíchaje' bchebe' Jesús:

—Benne' Wesede xrlátaje, ¿bi da dxal-la' guna' chee' zrué'eda' xel-la nabán zeajlí canna?

<sup>19</sup> Jesús guzre' le':

—¿Bizr chee' na' dxennáu' naca' xrlátaje? Netú benne' quebe naque' xrlátaje. Tuze Dios naque' xrlátaje. <sup>20</sup> Lue' núnbe'u ca zaj naca xrba chee' Dios: Quebe gunu' dul-la da dxachaj na xrba chee' wechaga na'. Quebe gutiu' benne'.

Quebe cuanu'.

Quebe nneu' chee' le sa' ljwezru' da quebe naca na. Gudapa ba lá'ana xra xrna'u.

<sup>21</sup> Benne' na' guzre' Jesús:

—Xúgute da caní dxuna' ne nácatea' bídaute'.

<sup>22</sup> Gate ben Jesús da nigá, na' guzre'-be':

—Ne dxexázrjenu' xetú da dxal-la' gunu'. Beṭe ca naca da deṭe chiu', na' bnezruj na cheṭe benne' xache' ca'. Nadxa gapu' xel-la gunní'a lu xabáa cheṭe Dios. Na' gudá sálenu' neda'.

<sup>23</sup> Gate benne' cuide' na' benne' da nigá, bewí'inele'ene' lawe' da nápalé'e da gunní'a.

<sup>24</sup> Gate ble'e Jesús ca bewí'ine benne' na', gunné':

—Stébeṭe naca cheṭe benne' gunní'a ca' xelexú'e naga dxenná bea Dios. <sup>25</sup> Chadídxala te tu bea zren lu negue' tu xeche' zriche quegala chu'u tu benne' gunní'a naga dxenná bea Dios.

<sup>26</sup> Na' benne' ca' dxelenne' gulenné':

—Che ca' naca na, ¿núzraqueze la?

<sup>27</sup> Jesús guzre' benne' ca':

—Da quebe gaca xelún bēneache, waca Dios gúnqueze' na.

<sup>28</sup> Na' gunná Pedro, guzre' Jesús:

—Xran, ba bsantu' ca da gudápantu' cheṭe zálentu' Lue'.

<sup>29</sup> Nadxa Jesús becheṭe':

—Da li dxapa' le'e, núteteze benne' gusané' lizre', u xra xrne'e, u bi biche', bi zane' ca', u zru'ule', u zrí'ine' ca', cheṭe gune' zrin cheṭe xel-la dxenná bea cheṭe Dios, <sup>30</sup> benne' nigá wazí'e da zrendxa lu xezr la xu nigá, na' lu xezr la xu da za za' wazí'e xel-la nabán da zeajlí canna.

*Jesús dxuchálaje' xecha lasa ca gaca gate gatié'*

(Mt. 20.17-19; Mr. 10.32-34)

<sup>31</sup> Na' Jesús gunné' chalá'ala benne' chazrinnu ca' dxusédene', na' guzre' le':

—Na'a zexíajdxu Jerusalén, naga gaca li ca naca da buluzúaj benne' ca' buluchálaje' waláz cheṭe Dios ca gaca chia' neda', Benne' Gulje' Bēneache. <sup>32</sup> Benne' zaj zre'e Jerusalén xuludé' neda' lu na' benne' zitu' ca', na' xelún le' chia', ne xelennéqueze' schanni' chia', ne wuluzráqueze' neda' zrene'. <sup>33</sup> Welúequeze' neda', na' te na' xelútié' neda', na' zra guxunne' zra xebana' ládujla benne' gate.

<sup>34</sup> Benne' ca' quebe guléajni'ine' da nigá, ne quebe zaj nézene' bi cheṭe na' dxuchálajlene' le', lawe' da zaj naca da quebe guca xeléajni'iquezne'.

*Tu benne' la chul-la, benne' zue' xezre Jericó*

(Mt. 20.29-34; Mr. 10.46-52)

<sup>35</sup> Gate Jesús bzrine' gagu naga zua xezre Jericó, na' dxe' tu benne' la chul-la dxu'a neza dxenabe' guna'. <sup>36</sup> Gate benne' dxeledé benne' zante, na' benne' la chul-la na' bcheṭe' benne' ca' bizra na' dxaca na. <sup>37</sup> Na' gulé'e le':

—Jesús, benne' Nazaret dxedé' nigá.

<sup>38</sup> Nadxa gudxezre xa'a la chul-la na', gunné':

—¡Jesús, Zrí'ine David, bexache lazre' neda'!

<sup>39</sup> Benne' ca' zaj zria lawe' lau Jesús guledil-le' benne' la chul-la na' cheṭe sué' zrize, san gudxezre xá'adxa le', dxenné':

—¡Zrí'ine David, bexache lazre' neda'!

<sup>40</sup> Nadxa gugá Jesús, na' gunná bé'ene' xeajlexrí'e le'. Gate ble'e lau Jesús, na' Jesús bcheṭe' le':

<sup>41</sup> —¿Bi dxaca lazru' guna' chiu'?

Becheṭe la chul-la na':

—Xran, dxaca lazra' xelé'eda'.

<sup>42</sup> Jesús guzre' le':

—Gaca ca dxenná'. Ba bexacu' lawe' da guxéajle'u chia'.

<sup>43</sup> Zra ná'queze belé'e benne' la chul-la na', na' guxíajlene' Jesús, dxue lá'ane' Dios. Xúgute benne' ca' belelé'ene' da nigá cá'anqueze belúe lá'ane' Dios.

## 19

*Jesús dxuchálajlene' Zaqueo*

<sup>1</sup> Nadxa Jesús guxú'e xezre Jericó, ne dxedé' xezre na'. <sup>2</sup> Lu xezre na' zua tu benne' gunní'a le' Zaqueo. Naque' xíchaje cheṭe benne' wechizruj ca'. <sup>3</sup> Benne' nigá dxaca lazre' gúnbe'e Jesús, san quebe guca lé'ene' Le' lawe' da zaj zra' benne' zante na', na' Zaqueo na' quebe naque' benne' tunna. <sup>4</sup> Nadxa guxíaj chégü'e guzrí'a lawe', ne cheṭe gaca lé'ene' guluéne' tu lu xaga zren da zua gagu naga dxal-la' te Jesús. <sup>5</sup> Gate gudé Jesús na', gunné'e lu xaga na', ne guzre' le':

—Zaqueo, bexétajche, lawe' da na'a dxun na ba xen xegá'ana' lizru'.

<sup>6</sup> Nadxa Zaqueo na' bexétaje' chadí, na' nen duté xel-la dxebé guz' lu ne'e Jesús. <sup>7</sup> Gate belelé'e benne' ca' da nigá, xúgute' gulezú lawe' dxelezi tizre' Jesús, dxelenné':

—Jesús bzrine' begá'ane' lizre tu benne' dul-la.

<sup>8</sup> Nadxa Zaqueo na' guzré', na' guzre' Xránadxu:

—Gunná'xque, Xran, gunézruja' benne' xache' ca' gáchajtę da da dę chia', na' che nu benne' bsaca zia' le', xunézruja' tapa cue'la chee'.

<sup>9</sup> Na' Jesús guzre' le':

—Na'a bla' xel-la weselá lu xu'u nígá, lawe' da nácaqueze benne' nígá xrtia Abraham. <sup>10</sup> Ca' naca na lawe' da bla' neda', Benne' Gulję' Bénneache, cheę xexilaja', ne guselá' benne' ca' zaj nanítie'.

*Da dxulę'e na ca naca cheę chi dumí zaca*

<sup>11</sup> Dxácate na' dxuluzę naga benne' ca' dxenná Jesús da caní, na' bchálaje' tu da dxulę'e na lawe' da ba zuę' gáguze xęzre Jerusalén, na' benne' ca' dxelęquene' zra ná'queze nna bea Dios lu xęzr la xu nígá. <sup>12</sup> Nadxa guzre' benne' ca':

—Guzúa tu benne' gunní'a xrlátaje, na' dxal-la' chęaje' zitu' cheę xuluzę' le' gaque' wenná bea, na' te na' xęzrine' lazrie'. <sup>13</sup> Gate za se'ę, gunné' chi benne' wen zrin cheę, na' bnéruje' tu tu benne' ca' tuwéaj dumí zácalę'e, ne guzre' benne' ca': "Le guchine dumí nígá cadxa xelá'a." <sup>14</sup> Benne' zaj zre'ę lázrie' dxelecuídene' le', na' gulesel-le' bal-la benne' gubáz cheę naga zęaje' cheę cheajleguęzre' benne' zaj zre'ę na': "Quebe dxaca lázrentu' gaca benne' nígá wenná bea cheentu'." <sup>15</sup> Buluzę' le' gaque' wenná bea, na' bezrine' lázrie'. Gate bezrine' gunné' benne' wen zrin ca' bnéruje' dumí, cheę nézene' ájate' bezi' tu tu benne' ca'. <sup>16</sup> Benne' nedxu bzrine' lawę', na' gunné': "Xran, dumí chiu' ba bezi na chi cue'la." <sup>17</sup> Wenná bea na' bechebe': "Chawe' benu'. Nacu' wen zrin xrlátaje. Lawe' da gucu' li lazre' lu late' da benna' lue', na'a guna' lue' benne' nna be'ene' chi xęzre ca'." <sup>18</sup> Na' bzrin xetúę' lawę', na' gunné': "Xran, dumí chiu' ba bezi na gazxu' cue'la." <sup>19</sup> Cá'anqueze guzre' benne' nígá: "Lue' gacu' benne' nna be'ene' gazxu' xęzre ca'." <sup>20</sup> Nadxa xetúę' bzrine', na' gunné': "Xran, nígá dę dumí chiu'. Bcacha chawa'a na tu lu bazxu, <sup>21</sup> lawe' da bzreba' lue'. Nacu' tu benne' dxuzúa xuzre. Dxececa'u da quebe guxrú', ne dxexelapu' naga quebe guzu'." <sup>22</sup> Nadxa wenná bea na' guzre' le': "Wen zrin calęla. Ca dzira' da gunnéu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxrúa', ne dxelapa' naga quebe guza", <sup>23</sup> bizr cheę na' quebe xju'u dumí chia' lu na' benne' xuluchínene' na, cheę xęzi' lu na'a neda' dumí chia' nen da gun xíchaję na, gate xęzrina' neda' lizra'?" <sup>24</sup> Nadxa guzre' benne' ca' zaj zre'ę na': "Le xecá'a dumí na' lu ne'ę, na' le gunezruj na benne' nape' chi dumí ca'." <sup>25</sup> Benne' ca' gulę'ę le': "Xran, ba nape' chi dumí." <sup>26</sup> Na' bechebe' wenná bea na': "Dxapa' le'ę, benne' nape' wazidxę da zrendxa, na benne' quebe nape', wecá'a ca da du nape'." <sup>27</sup> Na'a, ca naca cheę benne' ca' quebe gulaca lazre' gaca' neda' wenná bea cheę', le cheajxri'ę nígá, ne le gutie' lawa' neda'."

*Jesús dxexu'ę Jerusalén*

*(Mt. 21.1-11; Mr. 11.1-11; Jn. 12.12-19)*

<sup>28</sup> Ca gudę gunné' da nígá, na' bexú'u Jesús neza zexíaję' Jerusalén. <sup>29</sup> Gate ba zua xęzrine' xęzre Betfagę, ne xęzre Betania, ne zuę' gáguze naga zua Xí'a Xaga Olivo, na' gusel-le' chupa benne' ca' dxusędene'. <sup>30</sup> Guzre' le':

—Le chjaca xęzredu na' zua gáguze, na' ca zrinle na' lé'ele tu burru da'ba' xaga, bę netú quebe nu ne cuía lęba'. Le sezre-ba', na' le che'-ba' nígá. <sup>31</sup> Che nu naba le'ę bizr cheę na' dxesęzrele-ba', le xę'ę Xránadxu nachínene'-ba'.

<sup>32</sup> Na' gusiá'ca benne' ca', na' belelé'ęne' xúgutę naca na ca ba guzre Jesús le'. <sup>33</sup> Na' gate dxelesęzre' búrrua', na' xránaba' buluchębe' le':

—¿Bizr cheę na' dxesęzrele búrrua'?

<sup>34</sup> Benne' chupa ca' belexęchebe':

—Lawe' da nachine Xránadxu lęba'.

<sup>35</sup> Na' beleché'ę-ba' lau Jesús, na' belexrúę' xicha cheę' cúzruba', na' buluzrie' Jesús cúzruba'.

<sup>36</sup> Ca zeaj Jesús, xu'ę neza zrie' búrrudu na', na' dxelechiluj benne' ca' xicha cheę' la neza naga tęg'. <sup>37</sup> Gate bzrine' gagu naga naca létajla cheę Xí'a Xaga Olivo, xúgutę benne' ca' zaj dę'ę Lę' gulezú lawę' dxelebezre xę'ę lu xel-la dxelebe, ne dxelúe lá'ang' Dios ca naca xúgutę xel-la waca cheę xabáa da belelé'ęne'. <sup>38</sup> Gulennę':

—La'azxa naca wenná bea, benne' za' waláz cheę Xránadxu Dios. Gaca xel-la dxebeza zri lazre' da za xabáa, ne gaca ba Dios.

<sup>39</sup> Nadxa bal-la benne' fariseo ca' zaj zra' ládujla benne' ca' gulę'ę Jesús:

—Benne' Wesęde, gudil-la benne' caní zaj dę'ę Lue'.

<sup>40</sup> Jesús bechebe':

—Dxapa' le'ę, che benne' caní xelęzúa zrie', xiaj caní xelebezre xa'a na.

<sup>41</sup> Gate bzrine' gagu xęzre Jerusalén, ne ca blé'ęne' na, na' gudxęzre Jesús ca naca cheę na.

<sup>42</sup> Na' gunné':

—La chęajni'ile lu zra cheęle nígá da gaca gunna cheęle xel-la dxebeza zri lazre'. Na'a da na' nagache na, na' quebe gaca lé'ele na. <sup>43</sup> Welezrín zra gaca cheęle da zrinnaj, gate

benne' dxelecuídene' le'e xeléchajé' ze'e dxu'a xezre chee, ne xuluzague' le'e gáteteze na',  
<sup>44</sup> na' xuluchínnajé' xezre chee. Na' xelútié' ca naca benne' zaj zre'é nigá, na' quebe  
 xuluxucá'ang' tu xiaj cuzru ljwezre na. Caní gaca chee lawe' da quebe gúquebe'ele zra bla'  
 Dios chee gácalene' le'e.

*Jesús dxucá'ana chawé' chale'aj xudau'*

*(Mt. 21.12-17; Mr. 11.15-19; Jn. 2.13-22)*

<sup>45</sup> Nadxa guxú'u Jesús chale'aj xudau', na' guzú lawe' dxebéaje' na' benne' ca' dxelutié', ne  
 dxelá'awe' na'. <sup>46</sup> Na' guzre' benne' ca':

—Lu xiche chee Dios dxenné': "Lizra' naca na xu'u naga guchálajle neda'," na' le'e nunle  
 na ca tu lizre gubán ca'.

<sup>47</sup> Tu zra tu zra Jesús dxusédene' benne' ca' zaj zra' chale'aj xudau'. Benne' xíchajé' ca' chee  
 bxruze, ne benne' dxuluxuzájle' da nadxixruj bea na, ne benne' xu'u lawe' chee xezre na'  
 dxelíajé' ájala xelune' xelútié' Le'. <sup>48</sup> Quebe belezrélene' ájala xelune', lawe' da dxuluzé' naga  
 xanne' xúgute' benne' ca' Jesús, chee xelenne' ca da dxenné'.

## 20

*Ca naca xel-la dxenná bea napa Jesús*

*(Mt. 21.23-27; Mr. 11.27-33)*

<sup>1</sup> Tu zra gate zua Jesús chale'aj xudau' dxusédene' benne' ca', ne dxuchálajlene' le' ca naca  
 dizra' chawe' chee Dios, na' belezrín na' benne' xíchajé' ca' chee bxruze ca', ne benne' ca'  
 dxuluxuzájle' da nadxixruj bea na, ne benne' gula sina ca', <sup>2</sup> na' gulé' Le':

—Gunná bi xel-la dxenná bea napu' dxunu' da caní. ¿Nuzra benna lue' xel-la dxenná bea  
 nigá?

<sup>3</sup> Na' gunná Jesús:

—Cá'anqueze neda' gucheba' le'e tu. Le xechebe chia'. <sup>4</sup> ¿Nuzra gusel-la Juan guchúe'  
 bēneache nisa? ¿Dios che bēneache?

<sup>5</sup> Na' gulezú lawe' dxelé ljwezre':

—¿Bizra nnadxu? Che nnadxu gusel-la Dios le', na' guchebe' dxi'u: "¿Bizr chee na' quebe  
 guxéajle chee?" <sup>6</sup> Che xedxu Le', bēneache gulesel-le' le', benne' zaj zre'é nigá wuluzríe'  
 dxi'u xiaj, lawe' da zaj neze xánnie' bchalaj Juan waláz chee Dios.

<sup>7</sup> Nadxa belexechebe' quebe zaj nézene' nu gusel-la Juan bchue' bēneache nisa. <sup>8</sup> Na' Jesús  
 guzre' benne' ca':

—Cá'anqueze neda' quebe xapa' le'e bi xel-la dxenná bea napa' dxuna' da caní.

*Da dxulé'e na ca naca chee benne' wen zrin caléla ca'*

*(Mt. 21.33-44; Mr. 12.1-11)*

<sup>9</sup> Na' guzú lau Jesús dxuchálajlene' benne' ca' zaj zre'é na', dxuchálajé' da dxulé'e na,  
 dxenné':

—Guzúa tu benne' bde' lba uva lu xezr la xu chee', na' ca gudé na' bca'ane' na lu na'  
 benne' wen zrin ca', na' guzú'e na' zane' iza. <sup>10</sup> Gate bzrin zra xuluchibe' uva ca', na' gusel-  
 le' tu bi wen zrin chee' zeajxenábabe' tu cue' chee lina na' da dxal-la' xezí'e, san benne' wen  
 zrin ca' buluzálajé'-be', na' belexesel-le'-be' cá'aze. <sup>11</sup> Nadxa xrane lina na' gusél-le' xetú bi  
 wen zrin chee', na' cá'anqueze bi nigá buluchácalene'-be', ne buluzálajé'-be', na' belexesel-  
 le'-be' cá'aze. <sup>12</sup> Xrane na' gusél-le' xetú bi wen zrin chee', na' benne' wen zrin ca', cá'anqueze  
 belune'-be' zi', na' belexebéaje'-be' lu lina na'.

<sup>13</sup> Naga xeajche'te na, xrane na' gunné': "¿ájazra guna? Sel-la' zri'ina' nazrí'ite' lazra'. Gate  
 xelulé'ene'-be' nalja xelape'-be' ba lá'ana." <sup>14</sup> Na' gate benne' wen zrin ca' belelé'ene'-be', na'  
 gulé' ljwezre': "Bi nigá xezí' lu na'be' da de chee xránadxu. Gútedxu-be', chee gácadxu xrane  
 na dxi'iqueze." <sup>15</sup> Nadxa belexebéaje'-be' lu xezr la xu na', na' belutié'-be'.

Nadxa Jesús bchebe' benne' ca':

—¿Bizra gun xrane na' chee benne' wen zrin ca'? <sup>16</sup> Xelé'e, na' gutié' benne' wen zrin ca',  
 na' gudé'e xezr la xu na' lu na' benne' xula ca'.

Gate belén benne' ca' ca gunná Jesús, na' gulenné':

—Dios quebe gu'é lataj gaca ca'.

<sup>17</sup> Na' Jesús gunné'e benne' ca', na' gunné':

—¿Bizra zéaje da naxúaj na lu xiche chee Dios? Dxenné' caní:

Xiaj na' da buluzúa benne' wen xu'u ca' chalá'ala,

le' na' naca na xiaj blau.

<sup>18</sup> Núteteze benne' cheajchazie' lawe' xiaj na', na' chúzrujqueze bēnea', na' che xiaj na' xexruj  
 na lawe' nu benne', gútute' na le'.

*Ca naca chee da dxuchizruj xezre zi'tu'*  
(Mt. 21.45-46; 22.15-22; Mr. 12.13-17)

<sup>19</sup> Benne' xíchaję ca' chee bxruze ca', ne benne' ca' dxuluxuzájle'e da nadxixruj bea na gulaca lazre' xelęle' Jesús zra ná'queze, lawe' da guleque bé'ene' bchalaj Jesús da dxulé'e na ca zaj naca le', san belezrebe' da xelún bėnneache ca'. <sup>20</sup> Nadxa gulesel-le' benne' ca' xuluzuzre' Jesús, benne' xululé'e cuine' ca' benne' xrlátaje ca'. Benne' caní dxelaca lazre' xelebéaję' Jesús dizra' chee xelezéquene' xuludé'e Le' lu na' bėnnea' dxenná be'e. <sup>21</sup> Chee xelunę' da nigá, buluchębe' Le':

—Benne' Wesęde, nézentu' dxennáu', ne dxusédenu' da naca li lazre', ne quebe dxuchi'u chee bėnneache cáteze dxululé'e cuine', san lu da li dxusédenu' da naca chee Dios. <sup>22</sup> Guzre netu', ¿naca na chawe' quízrujdxu da dxuchizruj César, bėnnea' dxenná bé'ene' dute xęzr la xu, che cabí?

<sup>23</sup> Dxeque be'e Jesús ca naca da dxelaca lazre' xelunę' chee', na' guzre' benne' ca':  
—¿Bizr chee na' dxaca lázrele gun xálele neda'? <sup>24</sup> Le gulé'e neda' tu dumí. ¿Nuzra lu'a na' da na nigá, ne nu la naxúaj nigá?

Benne' ca' belexechebe':

—Chee benne' dxenná bea na'.

<sup>25</sup> Nadxa gunná Jesús:

—Le gunezruj bėnnea' da naca chee', na' le gunezruj Dios da naca chee Dios.

<sup>26</sup> Quebe gulezéquene' xelún xálene' Jesús ca naca da bechebe' lau benne' ca'. Belexebánene' ca naca da bechebe', na' gulezúa zrie'.

*Ca gaca gate xelexebán benne' gate*

(Mt. 22.23-33; Mr. 12.18-27)

<sup>27</sup> Ca gudé na' bal-la benne' xudau' saduceo ca' belezrine' lau Jesús. Benne' saduceo ca' dxelęquene' quebe xelexebán benne' gate, na' gulé'e Jesús:

<sup>28</sup> —Benne' Wesęde, Moisés bzúaję cheętu' che tu benne' gatie', ne gucá'ane' zru'ule', ne che quebe nu chilá' zri'ine', na' bi biche bėnnea' dxal-la' guchaga na'abe' nen nu'ula na' gute benne' chee' chee galaj tu bidau' gácabe' ca' zri'ine' bėnnea' ba gúte'e. <sup>29</sup> Gulezrá' gazre benne' gulaque' zri'ine' tuze xre'. Bi nedxu bchaga na'abe' nen tu nu'ula, na' gútebe', quebe nu chilá' bi cheebe'. <sup>30</sup> Bi gudxupe' bchaga na'abe' nen nu'ula na', ne cá'anqueze gútebe' quebe nu chilá' bi cheebe'. <sup>31</sup> Nadxa bi guxunne' bchaga na'abe' nen nu'ula na', na' cá'anqueze belún bi ca' xezica, na' bi gazre ca' gulátebe' quebe nu chilá' bi cheebe'. <sup>32</sup> Naga xeajche'tę na, na' gute nu'ula na'. <sup>33</sup> Gate xelexebán benne' gate, ¿nula bi ca' gaca zru'ulabe' nu'ula na', lawe' da ca naca bi gazre ca' buluchaga na'abe' nen nu'ula na'?

<sup>34</sup> Nadxa bechebe' Jesús:

—Lu xęzr la xu nigá dxuluchaga na' benne' biu ca' nen nu'ula ca'. <sup>35</sup> Na' benne' ca' naca chee' xelexexú'e xęzr la xu da za za, ne chee xelexebane' ládujla benne' gate, quėbedxa xuluchaga ne'e, ne quėbedxa xulunęzruje' zri'ine' lu xel-la wechaga na'. <sup>36</sup> Ca'an gaca lawe' da quebe nu gátedxa na'. Xelaque' ca zaj naca gubáz chee xabáa ca', ne xelaque' bi chee Dios lawe' da belexebane'. <sup>37</sup> Moisésqueze, gate bzuaaje' ca guca chee bisigá da guzúa na' xi', dxulé'ene' dxi'u dxal-la' xelexebán benne' gate. Naga naxúaj da nigá dxenná na ca naca chee Dios, naque' Dios chee Abraham, ne Dios chee Isaac, ne Dios chee Jacob. <sup>38</sup> Dios quebe naque' Dios chee benne' gate ca'. Naque' Dios chee benne' ban ca', lawe' da lau Le' zaj naca ban xúgute bėnneache.

<sup>39</sup> Nadxa bal-la benne' ca', benne' dxuluxuzájle'e da nadxixruj bea na gulé'e Jesús:

—Cháwedau' dxennáu', Benne' Wesęde.

<sup>40</sup> Quėbedxa belexázrjne' bi xuluchębe' Jesús.

*¿Nu benne' naca Cristo zri'ine'?*

(Mt. 22.41-46; Mr. 12.35-37)

<sup>41</sup> Jesús guzre' le':

—¿Bizr chee na' dxennale le'e naca Cristo zri'ine' David? <sup>42</sup> Davidqueze gunné' lu xiche naga zaj naxúaj salmo ca':

Xránadxu Dios guzre' Xrana':

“Gudxé'e cuita' xabela chia',

<sup>43</sup> Cadxa guzúa' benne' dxelecuídene' lue' ca' zran ni'u.”

<sup>44</sup> ¿ájazra chee na' naca Cristo zri'ine' David, na' Davidqueze dxę'e Le': “Xran”?

*Jesús dxenné' chee benne' ca' dxuluxuzájle'e da nadxixruj bea na*

(Mt. 23.1-36; Mr. 12.38-40; Lc. 11.37-54)

<sup>45</sup> Ca naca benne' ca' zaj zra' na' dxuluzé nague' chee Jesús gate guzre' benne' ca' dxusédene':

<sup>46</sup>—Le guxúe xanne' cuinale chee benne' ca' dxuluxúzajlé' da nadxixruj bea na, lawe' da dxeledánengé' dxeledé' zaj nacue' zre' tunna, ne dxelaca lazre' xelapa bénneache le' ba lá'ana lawe' xi'a ca', ne dxelebé' le' lu lataj blau ca' lu xu'u naga dxezrágale, ne lataj blau ca' naga dxelawe' zrué. <sup>47</sup>Benne' caní dxelequé' ca naca lizre nu'ula ca' ba gulate benne' chee', na' chee' xulucá'ana cuine' xrlátaje lau bénneache ca' dxululawízrajé' Dios da tunna lu xu'u ca' naga dxezrágale. Benne' caní xelezaca zídxaqueze'.

## 21

*Dumí da bnezruj tu nu'ula xache' ba gute benne' chee'*

(Mr. 12.41-44)

<sup>1</sup> Gate zua Jesús chale'aj xudau', blé'engé' benne' gunní'a ca' dxelegú'e dumí lu xí'ina chee' xudau'. <sup>2</sup> Na' blé'engé' tu nu'ula naque' benne' xache', ne ba gute benne' chee', gulu'e chupa dumí'au'. <sup>3</sup> Na' gunná Jesús:

—Da li dxapa' le'e, nu'ula xache' nigá gulú'udxe' da zrendxa ca benne' gunní'a caní, <sup>4</sup>lawe' da dxelegú'u benne' ca' chee' da dxutinneze na, san nu'ula nigá, lu xel-la baxache' chee' bnézruje' ca naca da nape' da nunte' gawe'.

*Jesús dxuchálaje' ca gaca gate cuía xi' xudau'*

(Mt. 24.1-2; Mr. 13.1-2)

<sup>5</sup> Bal-la benne' dxuluchálaje' ca naca chee' xudau' na, ne chee' xiaj xrtante' da zaj zrále' na ze'e xudau' na, ne chee' da xrtan da bulunezruj benne' chee' xudau' na'. Nadxa gunná Jesús, dxé'e le':

<sup>6</sup>—Wazrín zra gate xelebí'a xi' xúgute' da caní dxelé'ele, ne quebe xegá'ana netú xiaj cuzru ljwezre na.

*Da xululé'e na gate cheajsé' chee' xezr la xu nigá*

(Mt. 24.3-28; Mr. 13.3-23)

<sup>7</sup>Nadxa benne' ca' buluchébe' Jesús:

—Benne' Wesede, ¿bata gaca da na'? ¿Bi gulé'e na gate ba za xelaca da caní?

<sup>8</sup>Jesús gunné':

—Le guxúe xanne' cuinale, ne quebe güele lataj nu si xé' le'e, lawe' da xelélé' benne' zante' benne' xulusí' cuine' La' neda', xelenné' zaj naque' Cristo, ne xelenné' ba bzin zra. Quebe chéajlele benne' ca'. <sup>9</sup> Gate xénele dxaca wedil-la, ne xeledábague' bénneache xu'u lawe', quebe zrébele, lawe' da dxal-la' gaca da caní nedxu, san quebe ne zrin zra cheajsé' chee' xezr la xu nigá.

<sup>10</sup>Nadxa guzre' benne' ca':

—Bénneache tu xezr la xu xeledíl-lalé' bénneache xetú xezr la xu, na' benne' tu xezre xeledíl-lalé' benne' xetú xezre. <sup>11</sup> Wazrú'le'eqeze, ne gácale' e gubina', ne gáta'le' e xízrawé' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

<sup>12</sup> Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché' e le'e lu xu'u ca' ga dxelezrague' chee' xelechugue' ca xeluné' chee', na' xelegú' e le'e lizre xia, ne xeleché' e le'e lau benne' wenná bea ca', ne lau benne' xu'u lawe' ca' lawe' da nácale neda' tuze. <sup>13</sup> Gate gaca da caní gata' lataj guchálajlele benne' ca' ca naca chia' neda'.

<sup>14</sup> Le guzúa chacha lázrdaule, quebe gucuézale nédxula da dxal-la' nnele, <sup>15</sup> lawe' da gunna' neda' le'e dizra', ne xel-la siná da quebe xezezeque benne' dxeledábague' le'e bi xelenné' chee' na. <sup>16</sup> Wuludéqueze bénneache le'e lu na' benne' dxeledábague' le'e. Caní xelúnqueze xra xrnale, ne bi bíchele, ne xrtia ljwézrele, ne bi ljwézrele ca'. Welútequeze' bál-lale le'e, <sup>17</sup> na' xúgute' bénneache welecuídené' le'e lawe' da nácale neda' tuze, <sup>18</sup> san quebe nite tu xicha xichajle lau Dios. <sup>19</sup> Che sua cháchale, na' gápale xel-la nabán.

<sup>20</sup> Gate lé'ele zaj naxechaj benne' dxjaque' wedil-la xezre Jerusalén, na' nézele ba za cuía xi' xezre nigá. <sup>21</sup> Lu zra na', benne' zaj zré' e xezre ca' zaj nababa Judea dxal-la' xuluzrúnnuje' chjaque' lu xi'a ca', na' benne' zaj zré' e xezre Jerusalén dxal-la' xeledxúaje' na', na' benne' zaj zré' e le'e xixre' quebe dxal-la' xelexezrine' xezre na'. <sup>22</sup> Lu zra ca' Dios gudé' benne' ca' lu da zi' da xa', na' gaca li ca naca da naxúaj na lu xiche chee' Dios ca dxal-la' gaca chee' benne' ca'. <sup>23</sup> Edxugúa nu'ula zaj zue' zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le' e da xelezaca bénneache ca', na' gaca tu da ba xa' zrenté' chee' benne' ca'. <sup>24</sup> Bal-le' xelatíe' lu wedil-la na', na' xebal-le' xeleché' e le' zaj nadxéaje' tu tu xezr la xu ca', na' benne' zitu' ca' xululáje' xezre Jerusalén cadxa cheajsé' chee' zra xelenná bea benne' zitu' ca'.

*Ca gaca gate xelá' Benne' Gulje' Bénneache*

(Mt. 24.29-35, 42-44; Mr. 13.24-37)

<sup>25</sup> Na' gunná Jesús:

—Lu zra na' xelata' da xululé'e na lau gubizra, ne lau beu', ne lau belaj ca', na' lu xezr la xu xelezúa stêbe benne' ca', ne xelezrebe' ca' na naca schaga' da gun nísadau', ne xeajxruza chee na. <sup>26</sup> Benne' ca' xelate ni'a ne'e ne chee xel-la dxelezrebe gate xulusá lazre' ca' da dxal-la' gaca lu xezr la xu, ne ca naca da zaj zra' zran xabáa, da zaj napa xel-la waca xelezrízequeze na. <sup>27</sup> Lu zra na' xeledé'equezné' neda', Benne' Guljé' Bénneache, xelá'a tu lu beuj, nen duté xel-la waca zren, ne da xabáa chia'. <sup>28</sup> Gate su lau gaca da caní, le gun dipa lázrele, ne le chisa xíchajle, lawe' da ba za zrin zra lale lu da dxaca cheeje.

<sup>29</sup> Nadxa bchalaj Jesús tu da dxulé'e na, gunné':

—Le nna'xque xaga higo, u bíteteze xaga. <sup>30</sup> Gate lé'ele ba dxezría na laga' dxe'ene, nézqueze le'e ba za xaca beu' la. <sup>31</sup> Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

<sup>32</sup> Da li dxapa' le'e, xúgute da caní xelaca na nédxudxa gate quebe ne xelate bénneache zaj zra' lu zra na'a zra. <sup>33</sup> Xabáa, ne xezr la xu weledé chee na, san dizra' chia' quebe te chee na.

<sup>34</sup> Le guxúe xanne' cuínale, quebe güele lataj xelú'u lu xichaj lázrdaule da caleja ca' ca naca xel-la dxagu xrata, ne xel-la dxezuzre, ne xel-la dxezá lazre' da naca chee xezr la xu nigá, chee quebe gácale ca tu benne' nachúl-lené' lu xichaj lázrdawe' gate zrin zra na', <sup>35</sup> ne chee quebe gaca na ca tu da queja na le'e, lawe' da caní gaca chee xúgute benne' zaj zre'e lu xezr la xu nigá. <sup>36</sup> Le sua le'e ban lazre', ne le naba lau Dios chee gaca lale lu da dxal-la' gaca lu xezr la xu nigá, ne chee gaca gulé'e cuínale du lázrele lawa' neda', Benne' Guljé' Bénneache.

<sup>37</sup> Jesús bsédene' benne' ca' lu xudau' te zra, na' chizrela dxexíaje' lu Xi'a Xaga Olivo. <sup>38</sup> Xúgute benne' ca' belezriné' lu xudau' na' xugu' zila chee xelenne' chee Jesús.

## 22

### *Dxelune' tuze dízra' xejele' Jesús*

(Mt. 26.1-5, 14-16; Mr. 14.1-2, 10-11; Jn. 11.45-53)

<sup>1</sup> Ba zua gagu laní gate dxelawe' xeta xtila da quebe nachixre cua zichaj chee xeta xtila, da naca na Laní Pascua gate dxulusá lazre' ca' da ben Dios gate bebéaje' bénneache chee' lu xezr la xu Egipto. <sup>2</sup> Lu zra ca' benne' xíchaje' ca' chee bxruze ca', ne benne' ca' dxuluxuzáje'e da nadxixruj bea na belilaje' ájala xelune' xelútie' Jesús bagácheze, lawe' da dxelezrebe' da xelún benne' zan ca'.

<sup>3</sup> Nadxa guxú'u Satanás da xriwe' lu lázrdau Judas, bénnea' cá'anqueze le' Iscariote. Naque' tu benne' chazrinnu gubáz ca' chee Jesús. <sup>4</sup> Judas nigá guxíaje' xeajchálajlene' benne' xíchaje' ca' chee bxruze ca', ne benne' blau ca' chee xudau', na' bchálajlene' benne' ca' ájala gune' gudéje' Jesús lu na' benne' ca'. <sup>5</sup> Benne' caní gulebene', na' gulechebe lazre' xulunézruje' le' dumí. <sup>6</sup> Judas na' guzú' lu ne'e dumí na', na' guzú lawe' dxilaje' ájala gune' gudéje' Jesús lu na' benne' ca' gate quebe nu chilá' benne'.

### *Da dxágudxu chee cheajsá lazrdxu ca gute Xránadxu*

(Mt. 26.17-29; Mr. 14.12-25; Jn. 13.21-30; 1 Co. 11.23-26)

<sup>7</sup> Bzrin zra laní gate dxelawe' xeta xtila da quebe nachixre cua zichaj chee xeta xtila, gate dxal-la' xelútie' zrila'dau' ca' chee Laní Pascua. <sup>8</sup> Na' Jesús gusel-le' Pedro ne Juan, na' guzre'-be':

—Le hjaca, ne le gucuéza da gágudxu chee Laní Pascua.

<sup>9</sup> Benne' caní buluchébe' Le':

—¿Ga dxaca lazru' gucuézentu' na?

<sup>10</sup> Na' bechebe Jesusen':

—Gate chu'ule lu xezre, na' xezrágale tu benne' biu zenu'e tu dxe'e nisa. Le chjálalene' xu'u naga xezrine', <sup>11</sup> na' le xe xrane xu'u na': "Benne' Wesede dxe'e lue': ¿Ga zua xu'u naga gágulena' benne' ca' dxusédea' zrila'dau' chee Laní Pascua?" <sup>12</sup> Nadxa gulé'eng' le'e tu xu'u zren da zua chupa cuia sibe, da bache nucá'ana chawe'. Le gucuéza da gágudxu na'.

<sup>13</sup> Benne' ca' xjaque', na' belezrélene' xúgute ca da ba guzre Jesús le', na' bulucueze' da xelawe' chee Laní Pascua.

<sup>14</sup> Gate bzrin zra, Jesús ne benne' ca' dxusédene' gulezré'e ga xelawe' na. <sup>15</sup> Nadxa gunná Jesús, dxe'e benne' ca':

—Guzá lázrele'a gágulena' le'e chee Laní Pascua nigá nédxudxa ca quebe ne gatia'. <sup>16</sup> Dxapa' le'e québedxa gawa' da nigá cadxa gaca li na naga dxenná bea Dios.

<sup>17</sup> Nadxa guqué'e tu zruágadau', na' guzre' Dios: "Xcalenu'", na' gunné':

—Le xi'aj late' weaj tu tule le'e. <sup>18</sup> Dxapa' le'e québedxa xi'aja' chee nisa uva caní cadxa xida xel-la dxenná bea chee Dios.

<sup>19</sup> Nadxa guqué'e xeta xtila, ne guzre' Dios: "Xcalenu'", na' bzúruje' na, ne bnézruje' na benne' ca', dxenné':

—Da nigá naca na bel-la' dxen chia', da guzúa' waláz cheeḷe. Le gun da nigá chee cheaḷsá lázrele chia' neda'.

<sup>20</sup> Cá'anqueze beṅe' nen zruágadau' na' ca gudé gulawe' xrche', na' gunné':

—Zruágadau' nigá zéaje na xel-la wezría cube, da guzúa chúchua' nen dxen chia', da gulálaja' waláz cheeḷe.

<sup>21</sup> Na'a, zrua na benne' biu na' tu zren nen na'a ga zua da dxágadxu, bénnea' gudé'e neda' lu na' benne' dxeledábague' neda'. <sup>22</sup> Neda', Benne' Gulje' Bénneache, waxá'a lu neza da ble'e Dios neda' naga gatia', san edxugúa bénnea' gudé'e neda' chee gatia'.

<sup>23</sup> Nadxa benne' ca' dxusede Jesús gulezú lawe' dxuluchebe ljwezre' nu na' gudé Jesús.

*Dxuluchebe ljwezre' nule' gácadxe' blau*

<sup>24</sup> Cá'anqueze buluchebe ljwezre' nule' gácadxe' benne' blau. <sup>25</sup> Na' Jesús guzre' le':

—Benne' wenná bea chee xezr la xu ca' dxelenná bé'engé' bénneache ca xrane bénneache ca', na' benne' xíchaje chee benne' ca' dxelenné' zaj naque' benne' dxelunge' da chawe' chee benneáche ca'. <sup>26</sup> Le'e quebe dxal-la' gunle ca'. Benne' nácadxe' blau ládujla le'e dxal-la' gaque' ca' benne' nácadxe' cuide', na' benne' dxenná be'e dxal-la' gaque' ca' benne' nada'u chee ljwezre' ca'. <sup>27</sup> ¿Nu nácadxa blau, benne' dxe'e dxawe', che benne' dxudé'e xel-la wagu? ¿Quebe naca bénnea' dxe'e dxawe'? Neda' zúaleña' le'e ca tu benne' dxunge' zrin cheeḷe.

<sup>28</sup> Le'e guzúalequezle neda' gate neda' guzú guzaca'. <sup>29</sup> Chee le' na' dxunna' le'e lataj nna beale, ca ben Xra', benne' na neda', <sup>30</sup> chee xi'aj gágule ga naca chia' naga nna be'a neda', na' cue'le lataj blau ca' chee guchí'ale chee chazrinnu cue' xrtia Israel.

*Jesús dxenné' Pedro nne' quebe númbe'e Le'*

(Mt. 26.31-35; Mr. 14.27-31; Jn. 13.36-38)

<sup>31</sup> Na' gunnáqueze Xránadxu:

—Simón, Simón, Satanás, da xriwe' ba gunaba na le'e chee seque gudé na le'e lu dul-la ca dxun tu benne' dxudixire dxutul-le' xizre za. <sup>32</sup> Neda' guta' xueda' Xra' gácalene' lue' chee quebe guníteu' xel-la dxeajlí lazre chiu'. Na' lue', gate bache bexacu' dipa lazre', gúcale le sa' ljwezru' ca' chee chelezé chache'.

<sup>33</sup> Na' gunná Simón, guzre' Jesús:

—Xran, ba zúaqueza' sá'leña' Lue' lizre xia, ne chee gátequeza' nen Lue'.

<sup>34</sup> Jesús guzre' le':

—Pedro, dxapa' lue', ná'atela ne dédxela cuezre xjeaj, lue' wannáu' chunna lasa quebe númbe'u neda'.

*Ba zua gagu zra sí saca Jesús*

<sup>35</sup> Nadxa Jesús bchebe' benne' ca':

—Gate gusel-la' le'e quebe bíale xixruj, ne naga cu'ule dumí, ne zrélale, ¿bxázrjele bi da guchínnele?

Benne' ca' belexechebe':

—Gutu bi de.

<sup>36</sup> Nadxa guzre' benne' ca':

—Na'a, benne' nape' xixruj dxal-la' gu'e na, ne naga dxugu'e dumí. Bénnea' quebe nape' xia da dxuluchínene' lu wedil-la, dxal-la' xexutie' xicha chee', na' si'e xia chee'. <sup>37</sup> Dxapa' le'e dxal-la' gaca chia' néda'queza' ca da naxúaj na lu xiche chee Dios, dxenné': "Gubabe' ca tu benne' wen da zrinnaj." Xúgute' da naxúaj na chia' dxal-la' gaca li na.

<sup>38</sup> Nadxa benne' ca' gulenné':

—Xran, nigá de chupa xia.

Le' bechebe':

—Da naze.

*Jesús dxuchálajlene' Dios naga nazí le na Getsemaní*

(Mt. 26.36-46; Mr. 14.32-42)

<sup>39</sup> Nadxa bedxúaj Jesús xu'u na', na' ca dxúnqueze', guxíaje' lu Xi'a Xaga Olivo, na' benne' ca' dxusédene' xjácalene' Le'. <sup>40</sup> Gate belezrine' na', Jesús guzre' le':

—Le naba lau Dios chee quebe seque da xriwe' cu'u na le'e lu dul-la.

<sup>41</sup> Nadxa Jesús guz'e' ca tu legu'una xiaj naga zaj zra' benne' ca', na' bzu zribe' bchálajlene' Dios. <sup>42</sup> Gunné':

—Xrae, che dxaca lazru', bcuasa neda' ca naca da dxal-la' saca', da naca na ca tu da sla' da dxal-la' xi'aja', quegá gaca na ca dxaca lazra' neda', san ca dxaca lazru' Lue'.

<sup>43</sup> Nadxa ble'e lau naga zua Jesús tu gubáz chee xabáa, na' btipe' lazre' Jesús. <sup>44</sup> Gate ne dxezácale'e, du lazre' bchálajlene' Dios, na' xesa chee' guca na ca dxen dxezrún na lu xu.



<sup>45</sup> Ca bexuzre bchálajlene' Dios, na' bexase', na' bezrine' naga zaj zra' benne' ca' dxusédene', na' blé'ene' dxelase benne' ca', lu xel-la dxelexewi'ine lazre' chee'. <sup>46</sup> Nadxa guzre' benne' ca':

—¿Dxáselale le'e na'a? Le chasa, ne le naba lau Dios chee quebe seque da xriwe' cu'u na le'e lu dul-la.

*Dxelele' Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Ne dxuchálajte Jesús gate belelá' benne' zan ca'. Bénnea' le' Judas, tu benne' chazrinnu ca', ze'e zria lawe' lau benne' ca', na' gubigué' cuita Jesús chee gunupe' Le'. <sup>48</sup> Nadxa Jesús guzre' le':

—Judas, ¿dxunupu' neda', Benne' Gulje' Bénneache, chee gudéu' neda' lu na' benne' dxeledábague' neda'?

<sup>49</sup> Benne' ca' zrálene' Jesús, ca belelé'ene' ca da dxaca, na' buluchebe' Jesús:

—Xran, ¿guchímentu' xia?

<sup>50</sup> Tu benne' ca' dxedále Jesús bene' zi' tu bi wen zrin chee bxruze blau, guchugue' nágabe' zua xabela. <sup>51</sup> Jesús gunné':

—Québedxa gunle ca'. Cá'anze.

Nadxa Jesús bte' naga bi wen zrin na', na' bexunge' na.

<sup>52</sup> Na' guzre' benne' xíchaje ca' chee bxruze, ne benne' blau ca' chee xudau', ne benne' gula sina ca', benne' zá'aque' xeleché' Jesús, gunné':

—¿Blale le'e nen xia, ne xaga chee quélale neda' ca dxélate tu gubán? <sup>53</sup> Gate guzúa' neda' lu xudau' nen le'e tu zra tu zra, quebe bi benle le'e chia', san zra nigá naca na zra cheele, gate dxenná bea da zua na lataj chul-la.

*Pedro dxenné' quebe núnbe'e Jesús*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Nadxa gulele' Jesús, na' guleché' e Le' lizre bxruze blau, na' Pedro zíaje' nawe' Le' zítu'la.

<sup>55</sup> Na' gulebé'e gulechaje' xi' na', na' Pedro gudxe' e ládujla benne' ca'. <sup>56</sup> Nadxa tu nu'ula wen zrin, gate blé'ene' Pedro dxe'e dxu'a xi' na', guzúe' dxenné' e le', na' gunné':

—Cá'anqueze benne' nigá guque' tuze len Jesús.

<sup>57</sup> Pedro gunné':

—Nu'ula, quebe núnbe'a bénnea'.

<sup>58</sup> Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

<sup>59</sup> Xelate gudé na', xetú benne' ben chúchué' xrtizre', gunné':

—Da li, benne' nigá guque' tuze len Jesús, lawe' da naque' benne' Galilea.

<sup>60</sup> Nadxa gunná Pedro:

—Benne', quebe nezda' nu chee na' dxuchálaju'.

Dxacate' na' ne dxuchálajte Pedro ca', na' gudxezre xjeaj. <sup>61</sup> Nadxa Xránadxu bzechaj xíchaje', gunné' e Pedro, na' Pedro xeajsá lazre' ca da guzre Xránadxu le', gunné': “Ná'atela ne dédxela cuezre xjeaj, lue' wannáu' chunna lasa quebe núnbe'u neda'.” <sup>62</sup> Nadxa bedxúaj Pedro, na' gudxezre xáche'le'e.

*Dxelún le' chee Jesús*

(Mt. 26.67-68; Mr. 14.65)

<sup>63</sup> Na' benne' ca' zaj nuxre' Jesús belún le' chee', na' buluzalje' Le'. <sup>64</sup> Bulucache' lawe', na' belegape' xrague', dxelé' e Le':

—Gunné xa'a nu be Lue'.

<sup>65</sup> Da zan da gulenné', dxelenné' schanni' chee Jesús.

*Jesús dxezrine' lau benne' ca' chee xu'u lawe' blau chee judío ca'*

(Mt. 26.59-66; Mr. 14.55-64; Jn. 18.19-24)

<sup>66</sup> Gate naca te zra, na' belezraga benne' gula sina ca' chee judío ca', ne benne' xíchaje ca' chee bxruze ca', ne benne' ca' dxuluxuzájle'e da nadxixruj bea na, na' guleché' e Jesús lau benne' ca' chee xu'u lawe' blau chee judío ca'. Na' buluchebe' Le':

<sup>67</sup> —Gunná, ¿nacu' lue' Cristo?

Na' bechebe Jesús:

—Che xapa' le'e: Awe', quebe chéajlele, <sup>68</sup> na' che bi guchéba' le'e, quebe xechébele chia', ne quebe gusanle neda'. <sup>69</sup> Ná'atela neda', Benne' Gulje' Bénneache, cue'a chalá'a xabela chee Dios napé' duté xel-la waca.

<sup>70</sup> Nadxa xúgute' buluchebe' Le':

—¿Nacu' Lue' Zri'ine Dios?

Jesús bechebe':

—Naca', ca dxennáquezle le'e.

<sup>71</sup> Nadxa gulenná benne' ca':

—¿Núzradxa chínnedxu bi nne' chee benne' nigá? Dxi' uqueze ba bédexu ca da gunnáqueze'.

## 23

*Jesús dxezrine' lau Pilato*

(Mt. 27.1-2, 11-14; Mr. 15.1-5; Jn. 18.28-38)

<sup>1</sup> Nadxa gulasa xúgute benne' dxuluchi'e, na' guleché'e Jesús lau Pilato, benne' dxenná be'e waláz chee Roma. <sup>2</sup> Na' gulezú lawe' dxelagu zrie' Jesús, dxelenné':

—Ble'entu' benne' nigá dxegú'u xel-le' bènneache chee xeledábage' xu'u lawe'. Dxenné' quebe dxal-la' quízrujntu' da dxuchizruj César, benne' Roma, na' cá'anqueze dxenné' naque' Cristo, Benne' Wenná Bea.

<sup>3</sup> Nadxa Pilato bchebe' Jesús:

—¿Nacu' Lue' Wenná Bea chee judío ca'?

Na' bechebe Jesús:

—Ca' naca na, ca ba gunnáu' lue'.

<sup>4</sup> Nadxa gunná Pilato, guzre' benne' xíchaje ca' chee bxruze ca', ne bènneache ca':

—Quebe bi da zrinnaj dxezreda' nun benne' nigá.

<sup>5</sup> Benne' ca' belún chúchue' dizra' chee', gulenné':

—Dxegú'u xel-le' xúgute benne' zaj zre'e xezre ca' zaj nababa Judea chee xeledábage' xu'u lawe'. Guzú lawe' dxunge' na naga nababa Galilea, na' na'a dxunge' na nigá.

*Jesús dxezrine' lau Herodes*

<sup>6</sup> Gate ben Pilato da nigá, na' bchebe' che naca Jesús benne' Galilea. <sup>7</sup> Gate gulé'e le' naca Jesús benne' Galilea, na' Pilato gusél-le' Le' lau Herodes, benne' dxenná be'e xezre ca' zaj nababa Galilea, na' lu zra na' zue' Jerusalén. <sup>8</sup> Gate ble'e Herodes Jesús, gubéle'engé', lawe' da bátate dxaca lazre' lé'engé' Le', lawe' da ba benne' dxuluchalaj bènneache chee Jesús, na' guca lazre' lé'engé' gun Jesús tu xel-la waca da za xabáa. <sup>9</sup> Da zanté da bchebe' Jesús, na' Le' quebe bi bechebe'. <sup>10</sup> Zráqueze benne' xíchaje ca' chee bxruze ca' na', nen benne' ca' dxuluxuzájle'e da nadxixruj bea na, na' belún chúchue' dizra' chee' da dxelagu zria Jesús. <sup>11</sup> Nadxa Herodes, ne benne' chee' ca' dxjaque' wedil-la buluzúe' Le' chalá'ala, na' chee xelún le' chee', bulugácué' Le' ladxe' bzawe ca naca zra tu benne' wenná bea. Nadxa Herodes besel-le' Le' lau Pilato. <sup>12</sup> Lu zra na' Pilato, ne Herodes belexaque' tuze, lawe' da belezrá'a ljwezre' nédxute.

*Dxelechugue' chee Jesús gatie'*

(Mt. 27.15-26; Mr. 15.6-15; Jn. 18.39—19.16)

<sup>13</sup> Nadxa Pilato bhague' benne' xíchaje ca' chee bxruze ca', ne benne' xu'u lawe' ca', <sup>14</sup> na' guzre' benne' ca':

—Le'e guchele benne' nigá za'le naga zua', dxennale dxegú'u xel-le' bènneache chee xeledábage' xu'u lawe'. Neda' ba bcheba' Le' laule le'e, na' quebe bi da zrinnaj dxezréleda' nune' ca naca da dxennale chee'. <sup>15</sup> Cá'anqueze Herodes quebe bi da zrinnaj bzrélené' da nun Jesús, na' budéé' Le' launtu'. Quebe bi ne gune' chee chuga' chee' gatie'. <sup>16</sup> Gudéa' Le' xel-la zi', na' gusánqueza' Le'.

<sup>17</sup> Dxácaté dxaca laní na', Pilato dxal-la' gune' tu da dxelezaca ba lazre' bènneache, gusane' tu benne' xu'e lizre xia. <sup>18</sup> Xúgute benne' ca' gulezú lawe' dxelebezre xe'e, dxelenné':

—¡Gate benne' nigá! ¡Bsan Barrabás na'!

<sup>19</sup> Barrabás nigá gulegú'e le' lizre xia lawe' da gudábage' xu'u lawe', na' betie' tu benne'. <sup>20</sup> Pilato guca lazre' gusane' Jesús, na' bchálajlene' benne' ca' xetú. <sup>21</sup> Na' benne' ca' gulebezre xe'e zízrajdxá, dxelenné':

—¡Bde'e xaga béguaj! ¡Bde'e xaga béguaj!

<sup>22</sup> Da guxunne' lasa gunná Pilato:

—¿Bizra da zrinnaj nune'? Quebe bi dxezréleda' da gudé na Le' gatie'. Gudéa' Le' xel-la zi', na' te na' gusana' Le'.

<sup>23</sup> Na' benne' ca' belún chúchue' dizra' chee' chee te'e xaga béguaj, ne gulebezre xá'atie', nen benne' xíchaje ca' chee bxruze ca', cadxa guca ca da gulaca lazre'. <sup>24</sup> Nadxa Pilato guchugue' chee Jesús gaca chee' ca da dxelaca lazre' benne' ca'. <sup>25</sup> Na' bsane' bènnea' belenabe', xu'e lizre xia lawe' da gudábage' xu'u lawe', ne betie' tu benne', na' bdeé' Jesús chee gaca chee' ca dxelaca lazre' benne' ca'.

*Dxuludé'e Jesús xaga béguaj**(Mt. 27.32-44; Mr. 15.21-32; Jn. 19.17-27)*

<sup>26</sup> Gate zjaquə' zaj naché'e Jesús cheə xuludé'e Lə' xaga béguaj, na' gulelə' tu benne' Cirene, le' Simón, zezé'e le'e xixre', na' bulugu'e le' xaga béguaj cheə Jesús, na' zéajə' cuzru Jesús na'.

<sup>27</sup> Na' xjácalə' Lə' benne' zante, ne nu'ula zan dxelebezre', na' dxelebezre xache' ne cheə da dxaca cheə Jesús. <sup>28</sup> Nadxa Jesús gunné'e nu'ula ca', na' guzre' le':

—Le'e, nu'ula Jerusalén, quebe cuézrele chia' neda'. Le cuezre cheéquezle, ne cheə zrí'inele, <sup>29</sup> lawe' da zrin zra gate xelessé': "Ba neza zren naca na cheə nu'ula wizre, ne nu'ula ca' cabata' gulezú'e zi'i, ne nu'ula ca' cabata' bulugazre' bidau'." <sup>30</sup> Lu zra na' xelezú' lau bəneache xelé'e xi'a ca': "Le gugacu netu' xu." Na' xelé'e xí'adu ca': "Le gucache netu'."

<sup>31</sup> Che dxelunə' da caní chia' neda', naca' ca tu xaga ban, ¿gázradxa xelunə' cheele le'e, nácale ca xaga bizre ca'?

<sup>32</sup> Cá'anqueze guleché'e chupa benne' wen da zrinnaj cheə xelúti'e le' tu zren nen Jesús. <sup>33</sup> Gate belezrinə' lataj na' nazí le na, Calavera, da zéajə' na, Xi'a Zrita Xíchajdxu, na' buludé'e Jesús xaga béguaj, ne cá'anqueze belunə' cheə benne' wen da zrinnaj ca', tue' cuitə' xabəla, ne xetú'e cuitə' xégla. <sup>34</sup> Ca dxuludé'e Lə' xaga béguaj, na' gunná Jesús:

—Xrae, bnite lau cheə benne' caní lawe' da quebe zaj nézene' bi na' dxelunə'.

Na' benne' dxjaquə' wedil-la gulebejə' da dxunna bea' cheə xelezi'e late' weaj zra lana Jesús. <sup>35</sup> Benne' ca' zaj zre'e na' dxelenné'e, ne benne' xu'u lawe' ca' belún le' cheə', dxelenné':

—Bselé' benne' xula ca'. Na'a dxal-la' guselá cuine' che da li naquə' Cristo, Bəneea' Gucá'a Dios.

<sup>36</sup> Cá'anqueze benne' dxjaquə' wedil-la belún le' cheə', na' gulebiguə' cuita Jesús, ne buluxí'ajə' Lə' nupe zichaj. <sup>37</sup> Gulé'e Lə':

—Che lue' nacu' Wenná Bea cheə judío ca', bselá cuinu'.

<sup>38</sup> Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea cheə judío ca'.

<sup>39</sup> Tu benne' wen da zrinnaj, bəneea' de'e xaga béguaj ben le' cheə Jesús, dxenné':

—Che Lue' nacu' Cristo, bselá cuinu', ne bselatə' netu'.

<sup>40</sup> Na' xetú benne' wen da zrinnaj na' gudil-le' ljwezre'. Guzre' le':

—¿Quebe dxezrebu' Dios? Lue' dxezácaquezu' ca da gulechugə' cheə' Lə'. <sup>41</sup> Dxi'u dxezácadxu ca da dxál-la'queze sácadxu, lawe' da dxaca cheədxu da dxal-la' sidxu ca naca da zrinnaj da nundxu, san benne' nigá quebe bi da zrinnaj nunə'.

<sup>42</sup> Nadxa gunné':

—Jesús, xeajsá lazre' neda' gate su lau' nna be'u.

<sup>43</sup> Na' bechebe Jesús:

—Da li dxapa' lue', ná'atəla súalequezu' neda' lu lataj chawe' cheə Dios.

*Ca guca gate gute Jesús**(Mt. 27.45-56; Mr. 15.33-41; Jn. 19.28-30)*

<sup>44</sup> Guca ca wagubizra. Nadxa ca naca lu xəzr la xu guchul-la na cadxa bzrintə' na dxedá' chunna. <sup>45</sup> Gubizra guchul-la na, na' ladxe' zə lu xudau' bdxuaj na chúpala. <sup>46</sup> Nadxa gudxezre xa'a Jesús, dxenné':

—Xrae, lu na'u dxegu'a be' xu'a.

Ca gunné' ca', na' gutiə'.

<sup>47</sup> Gate benne' dxenná bé'ene' benne' dxjaquə' wedil-la blé'ene' ca da guca, na' bə lá'ane' Dios, gunné':

—Da li, benne' nigá quebe bi da zrinnaj bəne'.

<sup>48</sup> Xúgute' benne' ca' zaj zre'e na', gate belelé'ene' ca da guca, na' besía'quə' na', dxelu'e lachu'e. <sup>49</sup> Xúgute' benne' ca' zaj núnbe'e Jesús, ne nu'ula ca' xjácaləne' Jesús gate bezé'e Galilea, belexəgá'ane' zítu'la dxelenné'e da caní.

*Dxulucache' Jesús**(Mt. 27.57-61; Mr. 15.42-47; Jn. 19.38-42)*

<sup>50</sup> Zua tu benne' chawe' ne xrlátaje le' José, benne' xezre Arimatea cheə xezre ca' zaj nababa Judea. Nababə' xu'u lawe' blau cheə judío ca'. <sup>51</sup> José nigá dxebeze' zra nna bea Dios, na' quebe bəne' tuze ca da belún benne' xu'u lawe' blau ca'. <sup>52</sup> Benne' nigá guxijaje' xeajchálajləne' Pilato, na' gunabə' latja gucache' Jesús. <sup>53</sup> Ca bexuzre buluxulətaje' Lə' xaga béguaj, na' buluxuchelə' Lə' tu ladxe', na' gulu'e Lə' tu lu xədxu ba, da ba gudəne' tu le'e xi'a xiaj, naga quebe nu ne gáchequeze. <sup>54</sup> Naca na zra dxulucueze' cheə zra dxulupá'ane', da ba zua su lau na.

<sup>55</sup> Nu'ula ca' xjácálenē' Jesús gate bezé'e xezre ca' zaj nababa Galilea, xjaque' na', ne belelé'eng' ba na', ne belené'e ájala zaj nagu'e Le' xedxu ba. <sup>56</sup> Gate belexezrine' xu'u naga zaj zre'e, na' bulucueze' da du ca' dxelelále'e zixre, ne da zaj naca na ca za dxelelále'e na zixre. Belexezi' lazre' zra dxulupá'ane' cáteze naca da gunná bea Dios.

## 24

*Ca guca gate bebán Jesús*

*(Mt. 28.1-10; Mr. 16.1-8; Jn. 20.1-10)*

<sup>1</sup> Zra nedxu chee da gazre zra, nu'ula ca' belezrine' dxu'a ba na' dxani'sise', zaj nu'e ca naca da ca' dxelelá zixre da bulucueze', na' xebal-la nu'ula xjácálenē' le'. <sup>2</sup> Gate belezrine' na', belelé'ene' xiaj da guduse dxu'a ba na', québedxa naduse na naga guduse na. <sup>3</sup> Belú'e lu ba na', san quebe belexezrelnē' Xránadxu Jesús na'. <sup>4</sup> Na' belezrébelé'e, ne quebe zaj nézene' ájala xelunē', na' belelé'eng' chupa benne' zaj ze' cuite', zaj nacue' zra lanē' dxácáтите na. <sup>5</sup> Nu'ula ca' belezú'e' sudxú'ala lu xu, ne belezrébelé'e. Na' benne' ca' gulé'e le'.

—¿Bizr chee na' dxexílajle le'e tu benne' naca banē' lávela benne' gate? <sup>6</sup> Quebe zue' nigá, lawe' da ba bebane'. Le gusá lázre' da bchálajlenē' le'e gate ne zue' Galilea. <sup>7</sup> Gunné': "Benne' Gulje' Bénneache dxal-la' xuludé'e Le' lu na' benne' dul-la ca', na' xuludé'e Le' xaga béguaj, na' zra guxunne' zra xebane'."

<sup>8</sup> Nadxa nu'ula ca' xejáze lazre' ca naca da gunná Jesús. <sup>9</sup> Ca gudé besia'que' dxu'a ba na', na' belexezrine' lu xezre na', na' buluchálajlenē' benne' chinéaj gubáz ca' chee Jesús, ne xúgutē benne' ca' xezica, ca naca da guca na'. <sup>10</sup> Nu'ula ca' xjaque' xejajzenne' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'. <sup>11</sup> Benne' gubáz ca' gulé'quene' da xálaze dxelenná nu'ula caní, na' quebe guléajle'e chee'.

<sup>12</sup> Nadxa bdxuaj Pedro, zeaj chégü'e' dxu'a ba na', na' gate guné'e lu ba na', blé'eng' ladxe' da bedxela Jesús xu'u na chálá'ala, na' bezé'e zexíaje' xu'u naga guzé'e, dxexebánene' ca naca da guca.

*Da guca lu neza da zeaj xezre Emaús*

*(Mr. 16.12-13)*

<sup>13</sup> Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén. <sup>14</sup> Zjaque' dxuluchálaje' ca naca da guca lu zra ca'. <sup>15</sup> Dxácate' na' dxuluchálaje' caní, na' Jesús ná'queze gubigue' cuita benne' ca', na' guzú lawe' zéajlenē' le'. <sup>16</sup> Quebe belexúnbe'e Jesús, lawe' da guzúa tu da guxúa na xiaj lau benne' ca'. <sup>17</sup> Nadxa bchebe Jesús benne' ca'.

—¿Bizra da na' dxuchálajle ljwézrele dxácate' xu'ule neza? ¿Bizr chee na' zale dxewí'ine lázrele?

<sup>18</sup> Tu benne' ca' le' Cleofas bechebe':

—Xúgutē benne' zaj nézene' ca da guca xezre Jerusalén lu zra caní. ¿Nacu' lue' benne' zitu' zu' Jerusalén, na' tuze lue' quebe nézenu' ca da guca na'?

<sup>19</sup> Nadxa Le' guzre' benne' ca':

—¿Bizra guca na'?

Gulé'e Le':

—Da guca chee Jesús, benne' Nazaret. Guque' tu benne' bchálaje' waláz chee Dios, na' xel-la waca zren ca' benē', ne bchálaje' dizra' lau Dios, ne lau xúgutē bénneache. <sup>20</sup> Na' benne' xíhaje ca' chee bxruze ca', ne benne' xu'u lawe' cheentu' ca' buludé'e Le' chee gulechugue' chee' gatie', na' buludé'e Le' xaga béguaj. <sup>21</sup> Netu' guleza lázrentu' Le' naque' Benne' dxal-la' guselé' xezr la xu Israel. Na'a, ba zeaj chunna zra guca da ca'. <sup>22</sup> Bal-la nu'ula ca' ládujla netu' buluzúaqueze' netu' lu da stēbe, lawe' da xjaque' dxani'sise' dxu'a ba chee' na', <sup>23</sup> na' gate quebe belexezrelnē' Le', na' belexelé'e naga zúantu', ne gulenné' belelé'eng' chupa gubáz chee xabáa ca' buludé'e lawe' nu'ula ca', na' gulé'e le' nabán Jesús. <sup>24</sup> Nadxa bal-la benne' ljwézrentu' ca' xjaque' dxu'a ba na', na' belelé'eng' cáteze na' gulenná nu'ula ca', san quebe belelé'eng' Jesús.

<sup>25</sup> Nadxa gunná Jesús:

—Le'e quebe dxéajni'ile, na' ne naca zide' lárdaule chee quebe chéajlele xúgutē da gulenná benne' ca' buluchálaje' waláz chee Dios. <sup>26</sup> ¿Quebe dxal-la' saca Cristo da caní nédxudxa ca xegá'ane' szren?

<sup>27</sup> Nadxa guzú lawe' dxuzéajni'ine' benne' ca' ca naca xúgutē da naxúaj lu xiche chee Dios naga dxuchalaj na chee Le'. Guzú lawe' lu xiche ca' chee Moisés, na' ne zéajdxaqueze na lu xiche ca' chee benne' ca' buluchálaje' waláz chee Dios.

<sup>28</sup> Gate belezrine' lu xezre naga zjaque', Jesús benē' ca benne' zeajtēze' xu'e neza. <sup>29</sup> Na' benne' ca' buluxucá'ane' Le' xadía, dxelenné':

—Begá'analē netu', lawe' da ba zeaj dxezré', ne ba dxe' xrínnequeze na'a.

Nadxa Jesús guxú'uləne' benne' ca'. <sup>30</sup> Gate na' dxé'leñe' le' dxelawe', guqué'e xeta xtila, ne bzúzruje' na, na' guzre' Dios "Xcalenu", ne bnézruje' na benne' ca'. <sup>31</sup> La' ná'queze becuasa ca naca da guxúa na xiaj lau benne' ca', na' belexúnbe'e Jesús, san la' ná'queze benite Le' lau benne' ca'. <sup>32</sup> Na' gulé ljweze':

—¿Quebe guzúa xel-la dxebe lu lázrdaxdu gate ze'e dxuchálajleñe' dxi'u tu neza, ne bzéajni'ine' dxi'u ca naca da naxúaj lu xiche chee Dios?

<sup>33</sup> Nadxa, ne québedxa gulezrene', belexegu'e neza, zeajxaque' Jerusalén, naga belelé'ene' zaj nazraga benne' chinéaj gubáz ca', ne benne' ljweze' ca'. <sup>34</sup> Benne' ca' zaj nazrague' na' gulé'e benne' chupa ca':

—Da li bebán Xránadxu, na' Simón ba blé'ene' Le'.

<sup>35</sup> Nadxa benne' chupa ca' buluzenne' le' ca naca da guca la neza, ne ca belexúnbe'e Jesús gate bzúzruje' xeta xtila na'.

*Jesús dxulé' lawe' benne' ca' xjácalene' Le'*

*(Mt. 28.16-20; Mr. 16.14-18; Jn. 20.19-23)*

<sup>36</sup> Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale na le'e.

<sup>37</sup> Na' benne' ca' belexurse', ne belezrébele'e. Guléquene' dxelelé'ene' bxinne dxela. <sup>38</sup> Na' Jesús guzre' benne' ca':

—¿Bizr chee na' dxezrébele? ¿Bizr chee na' dxaca chupa lázrele? <sup>39</sup> Le na' na'a caní, ne le na' ni'a. Neda'queza' na'. Le gutá neda', ne le guxúe xque neda'. Tu bxinne dxela quebe napa na bəla' zrita, ca dxelé'ele le'e napa' neda'.

<sup>40</sup> Ca dxé'e benne' ca' da nigá, na' blé'ene' le' ne'e, ne ni'e. <sup>41</sup> Benne' ca' québequeze dxeləajle'e chee' lawe' da dxelebéle'ene', ne dxelexebánele'ene', na' guzre Jesús le':

—¿De late da gawa' nigá?

<sup>42</sup> Nadxa bulunézruje' Le' late bəla' guzrúa xi', ne late da zixre che bəzudau', <sup>43</sup> na' gucá'a Jesús da ca', ne gudawe' na lau benne' ca'. <sup>44</sup> Nadxa guzre' benne' ca':

—Da ba guca chia' naca na ca da gucha' le'e gate ne zúalequeza' le'e, gunnéa' dxal-la' gaca li ca naca xúgute' da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee benne' ca' buluchálajé' waláz chee Dios.

<sup>45</sup> Nadxa bzéajni'ine' benne' ca' ca da naxúaj lu xiche chee Dios, <sup>46</sup> na' guzre' benne' ca':

—Caní naxúaj na dxal-la' gate Cristo, na' zra guxunne' zra dxal-la' xebane' ládujla benne' gate ca', <sup>47</sup> na' lu La Le' dxal-la' xuluchalaj bənneache lau xúgute' xezr la xu ca'. Su lau gunle na lu xezre Jerusalén, xele bənneache dxal-la' xelexebí'i lazre' chee gunite lau Dios dul-la zaj nabaga benne' ca'. <sup>48</sup> Le'e nácale benne' xelexechebe' da caní. <sup>49</sup> ¡Le nna'xque! Neda' sel-la' chee ca da guchebe lazre' Xra'. Le xegá'ana nigá lu xezre Jerusalén, cadxa si'le xel-la waca da za xabáa.

*Jesús dxexegüéne' xabáa*

*(Mr. 16.19-20)*

<sup>50</sup> Nadxa Jesús beche'e benne' ca', belexedxúaje' Jerusalén, xeajxaque' xezre Betania, na' guchisa na' Jesús, ne gunabe' gaca chawe' chee benne' ca'. <sup>51</sup> Ne dxúnte'e ca', na' bezé'e naga zaj zra' benne' ca', begüéne' zexíaje' xabáa. <sup>52</sup> Ca bexuzre belúe lá'ane' Le', besiá'que' zeajxaque' Jerusalén lu duté xel-la dxelebé, <sup>53</sup> na' gulezráqueze' chale'aj xudau' dxelé' lá'ane' Dios. Ca' naca na.

## DIZRA' CHAWE' CA NACA CHEE JESUCRISTO DA BZUAJ SAN JUAN

*Bénnea' le' Xrtizra' Dios dxaque' bénneache*

<sup>1</sup> Gate guzú lau zua xúgute da de, ba zúaqueze Bénnea' le' Xrtizra' Dios, da zéaje na Benne' naque' duté da nácaqueze Dios, na' Bénnea' le' Xrtizra' Dios zúalene' Dios, ne nácaqueze' Dios. <sup>2</sup> Nédxudaute Benne' nigá zúalene' Dios. <sup>3</sup> Lu na' Benne' nigá ben Dios xúgute da de. Quebe bi de da quebe nun Le'. <sup>4</sup> Nácaqueze Le' xel-la' nabán, na' xel-la' nabán nigá naca na da dxusení na lu xichaj lázrdau bénneache chee xelaca bané'. <sup>5</sup> Xel-la' naxaní' nigá dxusení na lu da chul-la chee dul-la da zaj nabaga bénneache, na' da chul-la nigá quebe dxezeque na xusula na xel-la' naxaní' nigá.

<sup>6</sup> Guzúa tu benne' le' Juan, gusel-la Dios benne'. <sup>7</sup> Benne' nigá ble'e chee bchálaje' ca naca chee Bénnea' naque' xel-la' naxaní' nigá, chee xeláajle' xúgute bénneache chee Bénnea' ne chee da dxenné'. <sup>8</sup> Juan nigá quebe naque' xel-la' naxaní' na'. Ble'e chee bchálaje' ca naca chee Bénnea' naque' xel-la' naxaní' nigá. <sup>9</sup> Xel-la' naxaní' li, da dxusení na lu xichaj lázrdau xúgute bénneache ba za' la' na lu xezr la xu nigá.

<sup>10</sup> Bénnea' naque' Xrtizra' Dios zué' lu xezr la xu nigá, na' lácala ben Dios xezr la xu lu na' Bénnea', bénneache zaj zre'e lu xezr la xu quebe belexxúnbe'e Le'. <sup>11</sup> Ble'e naga zua da naca chee', na' benne' lazrie' ca' quebe gulezí' lu ne'e Le'. <sup>12</sup> Benne' ca' gulezí' lu ne'e Le', ne guléajle'e chee', be'e benne' caní lataj xelaque' bi ca' chee Dios. <sup>13</sup> Benne' caní québedxa zaj naque' ca zri'ine bénneacheze, bi ca' dxelálajbe' ne chee bénneache, u ne chee da dxezá lazre' tu benne'. Benne' caní zaj naque' bi ca' chee Dios ná'queze.

<sup>14</sup> Bénnea' naque' Xrtizra' Dios gúlaje' ca tu bénneache, na' guzúe' ládujla dxi'u, zaj zúale xel-la' zri'i lazre', ne da li Le'. Blé'entu' ca naca xel-la' szren chee', tu xel-la' szren da nunezruj Xradxu Dios chee Zrí'ing' tu licha'. <sup>15</sup> Juan bchálaje' ca naca chee Bénnea', gunné':

—Benne' nigá naque' Bénnea' bchálaja' neda' chee' gate gunné' Bénnea' ze'e te chia' neda' naque' szrendxa ca neda' lawe' da zúaqueze' nédxute ca neda'.

<sup>16</sup> Xúgutedxu ba guzidxu xel-la' zri'i lazre' chee' da dxúnnaqueze Le'. <sup>17</sup> Bla' da nadxixruj bea Dios ládujla dxi'u lu na' Moisés, na' xel-la' zri'i lazre', ne da li belelá' na lu na' Jesucristo. <sup>18</sup> Netú benne' quebe ne le'enge' Dios. Zrí'ing' tu licha', bi nazrí'ite' lazre', benne' nigá guque' tuz ca nácaqueze Xre'.

*Juan, benne' bchué' bénneache nisa, dxexechebe' chee Jesús  
(Mt. 3.11-12; Mr. 1.7-8; Lc. 3.15-17)*

<sup>19</sup> Benne' xíchaje' ca' chee judío ca', benne' zaj zre'e Jerusalén, gulesel-le' bxruze ca', ne xrtia Leví, benne' ca' dxelune' zrin chee xudau', na' belezrine' lau Juan chee xuluchébe xánnie' le' nu naque'. <sup>20</sup> Bechebe Juan du lazre', gunné':

—Quebe naca' neda' Cristo. (Dizra' nigá zéaje na Benne' guchebe lazre' Dios sel-le'.)

<sup>21</sup> Nadxa buluchébe' le':

—¿Nuzra nacu'? ¿Nacu' Elías, bénnea' bchálaje' waláz chee Dios?

Bechebe Juan:

—Cabí.

Na' buluchébequeze' le':

—¿Nacu' bénnea' dxal-la' le'e, ne guchalaje' waláz chee Dios, ca da gunná Moisés dxal-la' gaga na?

Le' bechebe':

—Cabí.

<sup>22</sup> Nadxa buluchébedxaqueze' le':

—¿Nuzra nacu'? Dxun na ba xen gata' bi xechébentu' chee benne' gulesel-le' netu'. ¿Bi dxennáquezu' nu nacu'?

<sup>23</sup> Juan bechebe':

—Neda' naca' bénnea' naxúaj na ca naca chee' lu xiche chee Dios, da dxenná: Wen chí'i tu benne' dxebezre xe'e le'e xixre' lawe' lataj, dxenné': "Le salaj tu neza li naga te Xránadxu." Naquen cáteze gunná Isaías, bénnea' bchalaje' waláz chee Dios.

<sup>24</sup> Benne' xudau' fariseo ca' gulesel-le' benne' caní chee cheajlechálajlene' Juan. <sup>25</sup> Le' buluchébe' le':

—Che lue' quebe nacu' Cristo, ne Elías, ne bénnea' dxal-la' xedajchalaje' waláz chee Dios, ¿bi xel-la' dxenná bea napu' dxuchú' bénneache nisa?

<sup>26</sup> Juan guzre' benne' ca':

—Neda' dxuchúa' bénneache nisa lu nísaze. Zua tu benne' ládujla le'e quebe nézele ca szren naque'. <sup>27</sup> Benne' nigá ze'e ca te chia' neda', na' zúaqueze' nédxudxa ca neda'. Quebe zaca' neda' cuéaja' zrelë' da xu'u ni'e.

<sup>28</sup> Xúgute da caní guca na lu xezr la xu cheë xezre Betábara, da zua na chalá'a xegu Jordán naga dxalaj gubizra, naga zua Juan dxuchúe' bénneache nisa.

*Jesús naque' Zríla'dau' cheë Dios, be dxelutie' lau Dios ne cheë xtul-le'*

<sup>29</sup> Zra xula ble'e Juan dxezrín Jesús naga zue', na' gunné':

—¡Le nna'xque! Benne' nigá naque' Zríla'dau' cheë Dios, cuë' dul-la zaj nabaga bénneache. <sup>30</sup> Neda' bchálaja' ca naca cheë gate gunnéa': Te chia' neda' za tu benne' naque' szrendxa ca neda' lawe' da zúaqueze' nédxudautë ca neda'. <sup>31</sup> Néda'queza' quebe gunezda' nu naque'. Bla'a dxuchúa' bénneache nisa cheë xeleneze xezre Israel nu Benne' naca Le'.

<sup>32</sup> Cá'anqueze gunná Juan:

—Neda' ble'eda' Be' Lá'azxa bétaje' xabáa ca tu bgugu chíchedau', ne begá'analene' Benne' nigá. <sup>33</sup> Neda' quebe ne nezda' nu naque'. Dios na' nasele-le' neda' cheë guchúa' bénneache nisa, Le' guzre' neda': "Gate le'enu' Be' Lá'azxa xétaje' xegá'analene' tu benne', Benne' nigá gunë' da zéaje xel-la' dxedxúa nisa, guzúe' Be' Lá'azxa lu xichaj lázrdaule." <sup>34</sup> Na'a ba ble'eda' guca da nigá, ne dxexechëba' nácaqueze Benne' nigá Zrí'ine Dios.

*Benne' nedxu ca' dxusede Jesús*

<sup>35</sup> Zra xula zúaqueze na' Juan nen chupa benne' ca' dxusedene'. <sup>36</sup> Gate blé'ene' dxedé na' Jesús, na' gunná Juan:

—¡Le nna'xque! ¡Benne' nigá naque' Zríla'dau' cheë Dios, bia gáteba' ne cheë dul-la nabágadxu!

<sup>37</sup> Dxúpatë benne' ca' dxusede Juan belenne' ca da gunné', na' xjácálene' Jesús. <sup>38</sup> Nadxa bexechaj Jesús, gunné'e cúzrule', ne blé'ene' benne' ca' zá'aque' cúzrule', na' guzre' le':

—¿Bi dxexilajle?

Benne' caní gulé'e Jesús:

—Benne' Wesëde, ¿gazra zu'?

<sup>39</sup> Jesús bechebe':

—Le da nna'le.

Nadxa xjácálene' Jesús, ne belelé'ene' naga zue', na' belexegá'analene' Le' zra na' lawe' da bache zeaj du dxedá' tapa.

<sup>40</sup> Tu benne' chupa ca', benne' belenne' ca da gunná Juan, ne xjácálene' Jesús, naque' Andrés, benne' biche Simón Pedro. <sup>41</sup> Andrés nigá la guxíajte' xejdílaje' bi biche' Simón, na' guzre' le':

—Ba bezrélentu' Mesías. (Dizra' nigá zéaje na Cristo, Bénnea' guchëbe lazre' Dios sel-le'.)

<sup>42</sup> Nadxa Andrés guché'e Simón naga zua Jesús, na' gate ble'e Jesús Simón na', na' guzre' le':

—Lue' nacu' Simón, zri'ine Jonás. Si' lau' Cefas. (Dizra' hebreo nigá zéaje na: Pedro, da zeaje na: Xiaj.)

*Jesús dxenné' Felipe ne Natanael*

<sup>43</sup> Zra xula guca lazre' Jesús chéaje' naga nababa Galilea, na' bezrague' Felipe, ne guzre' le':

—Ben neda' tuze.

<sup>44</sup> Felipe nigá naque' benne' xezre Betsaida, da naca na lazre Andrés, ne Pedro. <sup>45</sup> Felipe guxíaje' xejdílaje' Natanael, na' guzre' le':

—Ba bezrélentu' Bénnea' bzuaj Moisés cheë lu xiche naga zaj naxúaj da nadxixruj bea na, ne cá'anqueze cheë Benne' nigá buluzúaj benne' ca' buluchálaje' waláz cheë Dios. Benne' nigá naque' Jesús, zri'ine José, tu benne' xezre Nazaret.

<sup>46</sup> Na' gunná Natanael:

—¿Waca dxuaj tu da chawe' Nazaret?

Felipe bechebe':

—Gudá le'enu'.

<sup>47</sup> Gate ble'e Jesús za Natanael naga zue', gunné':

—Nigá za' tu benne' naca xánnie' benne' Israel, benne' dxennéqueze' da dxéquene'.

<sup>48</sup> Nadxa Natanael bchebe' Jesús:

—¿Ájazra naca núnbe'u neda'?

Jesús guzre' le':

—Ble'eda' lue' nédxudxa gate za nne Felipe lue', gate ze'u zran xaga higo.

<sup>49</sup> Nadxa Natanael guzre' Jesús:

—Benne' Wesëde, Lue' nacu' Zrí'ine Dios. Lue' nacu' Wenná Bea cheentu', benne' Israel.

<sup>50</sup> Bechebe Jesús:

—¿Dxeájle'u chia' lawe' da gucha' lue' ble'eda' lue' zran xaga higo? Walé'enu' da zaj naca na da szrendxa ca da nigá. <sup>51</sup> Da li dxapa' le'e, walé'equezle le'e naxalaj xabáa, na' gubáz chee xabáa ca' chee Dios dxeletáje', ne dxelexegüene' naga zua neda', Benne' Gulje' Bénneache.

## 2

*Dxaca laní chee wechaga na' lu xezre Caná*

<sup>1</sup> Zra guxunne zra, na' guca laní chee wechaga na' lu xezre Caná da nababa Galilea. Xrna Jesús zué' na', <sup>2</sup> na' zua nu gunné Jesús, ne benne' ca' dxusédene' lu laní na'. <sup>3</sup> Bebizre xrise uva wal-la, na' xrna Jesús guzre' Le':

—Québedxa bi de xrise uva wal-la xelé'aje'.

<sup>4</sup> Jesús bechebe':

—Nú'uladau', ¿bizr chee na' dxu'u neda' caní? Quebe ne zrin zra gulé'e lau da naca'.

<sup>5</sup> Xrne'g guzre' benne' wen zrin ca':

—Le gun ca naca da xe'e le'e.

<sup>6</sup> Zaj nnita xrupa xesu' xiaj na', da dxuluchine judío ca' gate dxelibe ni'a ne'e ca naca da zjácalene'. Tu tu xesu' xiaj ca' dxeluzru na chupa u chunna dx'e'e nisa. <sup>7</sup> Jesús guzre' benne' wen zrin ca':

—Le gusezrá nisa xesu' xiaj caní.

Gulegué'e nisa na, ne bulusuzrate' tu tu xesu' xiaj ca'. <sup>8</sup> Nadxa Jesús guzre' benne' ca':

—Le ca'a na, na'a, ne le gua na lau benne' ze' dxu'a ga dxelawe'.

Ca'an belune'. <sup>9</sup> Bénnea' zué' dxu'a ga dxelawe' bxue' nisa na' da bexaca na xrise uva wal-la, ne quebe nézene' ga za na. Benne' wen zrin ca' zaj nézene' ga za na lawe' da gulegué'e nisa na'. Nadxa bénnea' zué' dxu'a ga dxelawe' gunné benne' wechaga na', <sup>10</sup> na' guzre' le':

—Xúguté benne' dxelebéaje' nedxu xrise uva wal-la nácadxa chawe', na' gate ba gulé'ajle'e benne' ca' zaj zre'e laní, nadxa dxelebéaje' xrise uva wal-la quebe zúateca chawe'. Lue' bcuézaquezu' xrise uva wal-la chawe' na', ne guléaju' na na'a.

<sup>11</sup> Da nigá da ben Jesús lu xezre Caná da nababa Galilea naca na tu xel-la' waca zrente da bene' nedxu, da ble'e na xel-la' szren chee', na' benne' ca' dxusédene' guléajle'e chee'.

<sup>12</sup> Gudé na' Jesús bezé'e zexiáje' xezre Capernaum, zéajle xrne'g Le' nen benne' biche' ca', ne benne' ca' dxusédene'. Na' gulezúe' na' zane' zra.

*Jesús dxucá'ana chawe' chale'aj xudau'*

(Mt. 21.12-13; Mr. 11.15-18; Lc. 19.45-46)

<sup>13</sup> Na' Jesús guxíaje' xezre Jerusalén lawe' da ba za Laní Pascua gate benne' judío ca' dxulusá lazre' ca' ben Dios, bebéaje' xra xrtawe' ca' lu xezr la xu Egipto. <sup>14</sup> Lu xezre Jerusalén blé'ene' lu chale'aj xudau' na' zaj zra' benne' dxelexutié' bezre ca', ne zrila' ca', ne bgúgudu ca', béadu ca' dxelutié' lau Dios. Cá' anqueze blé'ene' na' benne' dxuluxuché'e dumí chee xezr zitu' ca'. <sup>15</sup> Gate ble'e Jesús da caní, na' bgu'e du ca' da güe'g benne' ca', na' bebéaje' ca naca benne' ca' tu zrente nen bezre chee' ca', ne zrila' chee' ca'. Na' gudxú'ung' lu xula dumí chee benne' ca' dxuluxuché'e dumí, ne bdxixre' blaga' ca' chee benne' ca'. <sup>16</sup> Na' guzre' benne' ca' dxelexutié' bgúgudu ca':

—¡Le xebéaj da caní! Quebe gunle lizre Xra' ca tu lawe' xi'a.

<sup>17</sup> Nadxa benne' ca' dxusede Jesús xeajlesá lazre' da naxúaj na lu xiche chee Dios, da dxenná na: Dxácaté zi' lázrdawa' lawe' da dxé'le'a gunne xue chee lizru'.

<sup>18</sup> Nadxa judío blau ca' buluchébe' Jesús:

—¿Bi xel-la' waca da za xabáa gulé'enu' netu' da gulé'e na napu' xel-la' dxenná bea dxunu' da caní?

<sup>19</sup> Bechebe Jesús:

—Le guzría xi' xudau' nigá, na' neda', te chunna zra xechisa' na.

<sup>20</sup> Nadxa judío ca' gulé'e Le':

—Xrupe xun iza ba zeaj dxelune' xudau' nigá, na' Lue', ¿xechisu' na chunna zraze?

<sup>21</sup> Bchalaj Jesús chee xudau' na' da naca na bēl-la' dxen chee'. <sup>22</sup> Chee le' na', gate bebán Jesús ládujla benne' gate, na' benne' ca' bsédene' xeajlesá lazre' ca da gunné', na' guléajle'e chee da naxúaj na lu xiche chee Dios ca naca chee Jesús, ne chee da guzre Jesús le'.

*Jesús núnbe'g xúguté bénneache*

<sup>23</sup> Gate zua Jesús xezre Jerusalén lu Laní Pascua chee judío ca', na' benne' zan guléajle'e chee' gate belelé'ene' ca naca xel-la' waca zren ca' da dxuné'. <sup>24</sup> Jesús quebe bde cuine' lu na' benne' ca' lawe' da nézquezne' quegá xúguté benne' ca' dxeléajle'e chee'. <sup>25</sup> Quebe guchínene' nu benne' xe'e Le' ca zaj naca bénneache lawe' da nézquezne' ca da zaj xu'u xichaj lázxdau bénneache.



## 3

*Jesús dxuchálajlęne' Nicodemo*

<sup>1</sup> Zua tu benne' xudau' fariseo le' Nicodemo. Naque' benne' blau lávela benne' judío ca'.

<sup>2</sup> Benne' nigá guxiáję' xeajnné'e Jesús chizrela, na' guzre' Le':

—Benne' Wesęde, nézentu' Dios nasel-le' Lue' cheę gusędenu' netu' lawe' da quebe nu benne' gaca gunę' ca zaj naca xel-la' waca zrentę da dxunu' Lue' che quebe zúalę Dios le'.

<sup>3</sup> Nadxa Jesús guzre' le':

—Da li dxapa' lue', nu benne' quebe gálaję' xecha lasa quebe gaca gaque' tuze benne' ca' dxenná be'e Dios.

<sup>4</sup> Nicodemo bcheębe' Jesús:

—¿Ájazra gaca xexalaj tu benne' ba naque' gula? ¿Waca xexu'e le'e xrne'e cheę gálaję' xetú?

<sup>5</sup> Jesús becheębe':

—Da li dxapa' lue', nu benne' quebe gálaję' ne cheę nisa cheę xrtizra' Dios, ne ne cheę Be' Lá'azxa, quebe gaca chu'e naga dxenná bea Dios. <sup>6</sup> Benne' nálaję' lu ni'a lu na' bęnneache, naque' bęnneacheze. Nu benne' nálaję' ne cheę Be' Lá'azxa, naca ban bęnnea' ne cheę Be' Lá'azxa. <sup>7</sup> Quebe xebánenu' lawe' da dxapa' lue', dxun na ba xen gálaju' xecha lasa. <sup>8</sup> Gáteteze dxaca be'. Dxennu' ca schaga da dxun na, na' quebe nézenu' gala za na, ne gala zeaj na. Cá'anqueze naca cheę benne' zaj nálaję' ne cheę Be' Lá'azxa. Gaca le'enu' da ba nun Be' na' lu xichaj lázxdau bęnnea', na' quebe dxelę'enu' ájala dxun Be' na'.

<sup>9</sup> Nadxa Nicodemo bcheębe' Jesús:

—¿Ájazra gaca da caní?

<sup>10</sup> Becheębe' Jesús:

—Lue' nacu' tu benne' wesęde blau ládujla benne' Israel ca', na' ¿quebe nézenu' da caní? <sup>11</sup> Da li dxapa' lue', netu' dxuchálajntu' ca naca da nézentu', ne dxexechębentu' ca da blę'entu', na' le'e quebe dxęajle da dxęntu' le'e. <sup>12</sup> Che quebe dxęajle chia' gate dxuchálajlęna' le'e ca naca cheę da dxaca lu xęzr la xu nigá, ¿ájazra gaca chęajle chia' che guchálajlęna' le'e cheę da dxaca xabáa?

<sup>13</sup> 'Quebe ne cuen tu benne' xabáa cheę lé'ęne' ca dxaca na'. Tuze Bęnnea' bętaję' xabáa, Bęnnea' naca' neda', Benne' Gulje' Bęnneache, naca' Bęnnea' zúaqueze' xabáa. <sup>14</sup> Ca ben Moisés, bde'e tu bęla' xia le'e xaga naga zua le'e xixre' lawe' lataj, cá'anqueze neda', Benne' Gulje' Bęnneache, wuludá'queze' neda' tu le'e xaga, <sup>15</sup> cheę quebe xelebía xi' nu benne' xelęajle' chia'. Zrué'e bęnnea' xel-la' nabán da zeajli canna.

*Dios dxezri'i lazre' bęnneache*

<sup>16</sup> Dios dxezri'i lázre'ęne' bęnneache, na' cheę le' na' bde'e' Zri'ine' tu licha' cheę quebe xelebía xi' nu benne' dxelęajle' cheę'. Zrué'e bęnnea' xel-la' nabán da zeajli canna. <sup>17</sup> Dios gusęl-le' Zri'ine' lu xęzr la xu nigá, quegá cheę guzriá xi'e bęnneache, san cheę guselę' bęnneache.

<sup>18</sup> Bęnnea' dxęajle' cheę Zri'ine' Dios quebe naca cheę' cuía xi'e, san nu benne' quebe dxęajle' cheę' ba naca cheę' cuía xi'e lawe' da quebe dxęajle' cheę Zri'ine' Dios, bi tu licha' cheę'. <sup>19</sup> Benne' ca' quebe dxelęajle' cheę' ba zaj naca cheę' cuía xi'e lawe' da gate bla' xel-la' naxanı' lu xęzr la xu nigá, beledánedxęne' da chul-la ca xel-la' naxanı', lawe' da dxelunę' da calela. <sup>20</sup> Xųgute' benne' dxelunę' da calela dxelęuidene' xel-la' naxanı', ne quebe dxelębigue' lu xel-la' naxanı', cheę quebe gaca bea da calela da dxelunę'. <sup>21</sup> Benne' ca' dxelunę' ca naca da li dxelębigue' lu xel-la' naxanı' cheę gaca bea naca na cheę Dios da dxelunę'.

*Da gunná Juan, bęnnea' bchuę' bęnneache nisa*

<sup>22</sup> Gudé na' guxiáj Jesús naga nababa Judea nen benne' ca' dxusędene', na' guzųe' na' zane' zra nen benne' ca', dxuluchųe' bęnneache nisa. <sup>23</sup> Cá'anqueze zua Juan lu xęzr la xu cheę xęzre Enón da zua gáguze naga dxę' xęzre Salím, dxuchųe' bęnneache nisa lataj na' lawe' da dęle'e na' nisa zila, na' belezrin benne' zan naga zua Juan, na' beledxųe' nisa. <sup>24</sup> Da nigá guca na nédxudxa gate quebe ne xelęųe' Juan lizre xia.

<sup>25</sup> Nadxa bal-la benne' zaj dę'e Juan gulezú lawe' dxulutil-le' judío ca' dizra' ca naca cheę da dxucá'ana chawe na bęnneache lau Dios. <sup>26</sup> Nadxa xeajleguezre' Juan:

—Benne' wesęde, bęnnea' blę' e naga zu' chalá'a xęgu Jordán naga dxalaj gubizra, bęnnea' bchálajlęnu' netu' cheę', na'a dxuchųe' bęnneache nisa, na' xųgute' bęnneache zjčalęne' Le'.

<sup>27</sup> Nadxa Juan guzre' benne' ca':

—Quegá nu benne' gaca bi gape' che quebe gunezruj Dios na cheę'. <sup>28</sup> Le'e bęnquezle gunnía' neda' quebe nácaqueza' neda' Cristo, Bęnnea' gucheębe lazre' Dios sel-le'. Naca' tu benne' nasel-la Dios cheę quia lawa' lau Le'. <sup>29</sup> Lu laní cheę wechaga na', bęnnea' si'e nu'ula wechaga na' naque' benne' wechaga na', na' benne' ljwezre benne' wechaga na',

bénnea' zue' na', ne dxenne' chee', dxebéle'ene' gate dxenne' da dxuchalaj benne' wechaga na'. Cá'anqueze neda' dxebéle'eda' lawe' da caní naca' ljwezre Cristo. <sup>30</sup> Le' dxal-la' gácadxe' szren, na' neda' dxal-la' gácadxa' cá'aze.

*Ca naca chee Bénnea' za' xabáa*

<sup>31</sup> Na' gunná Juan:

—Bénnea' za' xabáa nácadxe' blau ca xúgute' bèneache. Benne' naque' chee' xezr la xu nigá naque' bèneacheze, ne dxuchálaje' ca naca chee' da dxaca lu xezr la xu nigáze. Bénnea' ze'e xabáa nácadxe' szren ca xúgute' bèneache. <sup>32</sup> Le' dxuchálaje' ca naca chee' da ba blé'ene', ne da ba benne' xabaala, na' quebe dxéajle' nu benne' chee' da dxenné'. <sup>33</sup> Che nu benne' dxéajle'e chee', benne' nigá dxulé'ene' naca li ca da dxenná Dios. <sup>34</sup> Bénnea' nase-la Dios dxuchálaje' xrtízra' Dios lawe' da dxunna Dios Le' Be' Lá'azxa chee' dute' ca naque'. <sup>35</sup> Xradxu Dios nazrí'ine' Zrí'inequeze', ne ba bde'e' lu ne'e' xúgute' da de. <sup>36</sup> Nu benne' dxéajle'e chee' Zrí'ine Dios nape' xel-la' nabán da zeajlí canna, na' benne' quebe dxuzúe' dizra' chee' Zrí'ine Dios quebe gape' xel-la' nabán caní. Wadé'e' lu da ba xa' da gun Dios.

#### 4

*Dxuchálaje Jesús tu nu'ula chee tu xezre nababa na Samaria*

<sup>1</sup> Benne' fariseo ca' belenne' zjácale' benne' zandxa Jesús ca benne' zjácalene' Juan, na' dxuchúa Jesús benne' zandxa nisa ca benne' dxuchúa Juan nisa. <sup>2</sup> Quebe dxuchúaqueze Jesús bèneache nisa. Benne' ca' dxusédené' dxuluchúe' bèneache nisa. <sup>3</sup> Gate guque be'e Jesús da nigá, na' bezé'e' naga nababa Judea, xexíaje' naga nababa Galilea.

<sup>4</sup> Ca xu'u Jesús neza, ben na ba xen té'e' naga nababa Samaria. <sup>5</sup> Ca'an guca, bzrine' tu xezre naga nababa Samaria nazí le na Sicar, da dxé' gáguze naga zua xezr la xu na' bnezuj Jacob chee' zrí'ine', bi lebe' José. <sup>6</sup> Lu xezr la xu na' gudén Jacob, zre sua Abraham, tu beaj situj. Ba dxeajxreque Jesús xu'e' neza, na' gudxé'e' dxu'a beaj na'. Naca na zran wagubizra. <sup>7-8</sup> Benne' ca' dxuséde Jesús xjaque' lu xezre Sicar, xeajlegá'awe' da xelawe'. Dxácaté' na' bzrin tu nu'ula Samaria dxu'a beaj na' zeajxri'e' nisa, na' Jesús guzre' le':

—Benna nisa xí'aja'.

<sup>9</sup> Nadxa nu'ula na' bechebe':

—¿Ájazra naca, lue', benne' judío, dxenabu' neda' nisa, naca' nu'ula Samaria?

Caní gunné' lawe' da quebe zaj zra' chawe' benne' judío ca' nen benne' Samaria ca'.

<sup>10</sup> Nadxa bechebe Jesús:

—Chela nézenu' da dxunna Dios, ne nua' dxenabe' lue' nisa xí'aje', lue' nábenu' neda', na' neda' gunna' lue' nisa da gunna na lue' xel-la' nabán.

<sup>11</sup> Na' nu'ula na' guzre' Le':

—Benne', quebe bi nuxru' cuéaju' nisa, na' beaj nigá nácale'e' na situj. ¿Ájazra na' gunu' gunnu' neda' nisa chee' xel-la' nabán? <sup>12</sup> Xra xrtáuntu', Jacob, benne' netu' beaj nigá, naga güé'equze le' nisa, ne naga gulé'ajqueze zrí'ine', ne be' xixre' chee'. ¿Nácadxu' szrendxa ca le'?

<sup>13</sup> Jesús bechebe':

—Xúgute' benne' dxelé'aje' nisa chee' beaj nigá welexe'bílequezne' nisa. <sup>14</sup> Nu benne' xí'aje' nisa da gunézruja' neda', québedxa bílene' na, lawe' da nisa na' dxunézruja' neda' galaj na lu xichaj lázrdawe' ca tu beaj nisa da gunna na le' xel-la' nabán da zeajlí canna.

<sup>15</sup> Nadxa nu'ula na' guzre' Le':

—Benne', benna neda' nisa na', chee' québedxa gun na ba xen xida' nigá xedajxri'a nisa.

<sup>16</sup> Na' Jesús guzre' nu'ula na':

—Guxíaj xeajnné' benne' chiu', na' xídale nigá.

<sup>17</sup> Na' bechebe nu'ula na':

—Quebe nu chilá' benne' chia'.

Nadxa Jesús guzre' le':

—Da li dxenná' quebe nu chilá' benne' chiu', <sup>18</sup> lawe' da ba guzúalenu' gazxu' benne', na' bènea' zúalenu' na'a quebe naque' benne' chiu'. Ca naca da nigá gunná' da li.

<sup>19</sup> Gate nu'ula' benne' da nigá, na' gunné':

—Xran, dxéqueda' nacu' lue' benne' dxuchalaje' waláz chee' Dios. <sup>20</sup> Xra xrtáuntu' ca' bulucá'ana szrene' Dios lu xi'a nigá, na' le'e, benne' judío, dxennale dxun na ba xen gucá'ana szrendxu Dios xezre Jerusalén.

<sup>21</sup> Na' bechebe Jesús:

—Guxéajle' chia', nu'ula. Ba za zra gate le'e gucá'ana szrenle Xradxu Dios, ne quebe gun na ba xen xídale lu xi'a nigá, ne quebe gun na ba xen chéajle' Jerusalén. <sup>22</sup> Le'e, benne' Samaria, quebe núnbeale nua' dxucá'ana szrenle. Netu' núnbeantu' Nua' dxucá'ana szrentu', lawe' da za' benne' weselá ládujla benne' judío ca'. <sup>23</sup> Wazrín zra, ne ba dxezrín zra na', gate benne' ca' da li dxulucá'ana szrene' Xradxu Dios, xelune' na ne' chee' Be' Lá'azxa, ne ne' chee' da li,

lawe' da dxaca lazre' Xradxu Dios xulucá'ana szren bénneache Le' caní. <sup>24</sup>Dios naque' Be', na' benne' dxulucá'ana szrene' Le', dxun na ba xen xulucá'ana szrene' Le' ne' chee' Be' Lá'azxa, ne ne' chee' da li.

<sup>25</sup>Na' nu'ula na' guzre' Le':

—Neda' nezda' walá' benne' Mesías (da zéaje na Cristo), na' gate la' Le', na' guzéajni'ine' dxi'u ca naca xúgute.

<sup>26</sup>Jesús guzre' le':

—Neda' naca' Bénnea', dxuchálajlena' lue'.

<sup>27</sup>Ca gunné' ca', na' belexezrin benne' ca' dxuseđene', na' belexebánene' lawe' da dxuchálajle' Jesús tu nu'ula Netúe' quebe bexázrjene' guchebe' Le' bi da dxaca lazre', u bizra chee' dxuchálajlene' nu'ula na'. <sup>28</sup>Nadxa nu'ula na' bca'ané' dxe'e chee' dxu'a beaj na', na' bezé'e zexíaje' xezre na' naga xeajezre' benne' ca':

<sup>29</sup>—Le da lé'ele tu benne' guzre' neda' xúgute da ba bēna'. ¿Quegá benne' nigá Cristo, Bénnea' sel-la Dios?

<sup>30</sup>Nadxa beledxúaj benne' ca' xezre na', zjaque' naga zua Jesús. <sup>31</sup>Dxácate' na', benne' ca' dxuseđe Jesús gulata' xuené' Le', gulenné':

—Benne' Wesede, gudagu late'.

<sup>32</sup>Jesús guzre' benne' ca':

—De da dxawa', da quebe núnbeale le'e.

<sup>33</sup>Nadxa benne' ca' dxuseđe Jesús gulezú lawe' dxuluchebe ljwezre', dxelenné':

—¿Núteca bedajgú'e da gudawe'?

<sup>34</sup>Jesús guzre' le':

—Xela wagu chia' naca na chee' guna' da dxaca lazre' Xra', Bénnea' nasele' neda', ne chee' gusexuzra' guna' zrin chee'. <sup>35</sup>Le'e dxennale: “Xetapa beu' xelápadxu.” Neda' dxapa' le'e, le nna' bēneache zaj naque' ca tu lina, da bache naca na xelápadxu. <sup>36</sup>Benne' dxelape' dxezi'e lazruj chee', na' da dxelape' naca na chee' xelapa bēneache xel-la' nabán da zeajlí canna, chee' sua xel-la' dxebe' benne' dxaza tu zren nen benne' ca' dxelape'. <sup>37</sup>Da li naca ca da dxelenná bēneache: Tu benne' dxaze', na' xetúe' dxelape'. <sup>38</sup>Neda' gusel-la' le'e xelápale naga quebe gúzale. Ca' naca na, benne' xula belune' zrin gulaze', na' le'e dxezile ba neza zrin da belún benne' ca'.

<sup>39</sup>Benne' zan, benne' xezre na' naga nababa Samaria, guléajle' chee' Jesús ne' chee' xtrizra' nu'ula na', gunné': “Guzre' neda' xúgute da ba bēna'.” <sup>40</sup>Gate belelá' benne' Samaria ca' naga zua Jesús, na' gulata' xuené' Le' xegá'ané' nen le', na' begá'ané' na' chupa zra. <sup>41</sup>Benne' zandxa guléajle' chee' Jesús gate belenne' ca da dxenná Le'. <sup>42</sup>Nadxa gulé'e nu'ula na':

—Na'a dxéajlentu' chee' quegá tuze ne' chee' da guzru' lue' netu', na' cá'anqueze lawe' da bēnquezentu' netu' chee', na' nézentu' da li naque' Cristo, Bénnea' guselé' ca naca bēneache.

*Jesús dxexune' zri'ine tu benne' wen zrin blau chee' xu'u lawe'*

<sup>43</sup>Gudé chupa zra bezá' Jesús xezre ca' zaj nababa Samaria, na' guzé'e zéaje' naga nababa Galilea. <sup>44</sup>Guxíaje' na' lawe' da gunnáqueze Jesús, gunné': “Tu benne' dxuchalaje' waláz chee' Dios, quebe dxelapa benne' lazrié' le' ba lá'ana.” <sup>45</sup>Gate bezrine' naga nababa Galilea, benne' zaj zre'e na' belezí' lu ne'e Le' du lazre', lawe' da xjácaqueze le' Laní Pascua da guca na Jerusalén, na' belelé'ene' xúgute da bēn Jesús lu laní na'.

<sup>46</sup>Nadxa bezrín Jesús xezre Caná naga nababa Galilea naga bēne' bexaca nisa xrise uva wal-la. Zua lu zezre Capernaum tu benne' wen zrin blau chee' xu'u lawe', zua tu zri'ine' bi biu quebe chawe' zúabe'. <sup>47</sup>Gate ben benne' wen zrin blau nigá ba bezá' Jesús naga nababa Judea, ne ba bezrine' naga nababa Galilea, na' guxíaje' xeajnné' Jesús, na' gutá' xuené' Le' chéaje' lizre' xexune' bi biu chee', bi na' ba zua gátebe'. <sup>48</sup>Nadxa Jesús guzre' le':

—Le'e quebe chéajlele' chia' che quebe lé'ele xel-la' waca chee' xabáa da dxulé'eda'.

<sup>49</sup>Benne' wen zrin blau na' gunné':

—Xran, gudázega na'a quebe ne gate zri'ina'.

<sup>50</sup>Nadxa guzre Jesús le':

—Bexíaj lizru'. Naca ban bi chiú'.

Benne' wen zrin blau na' guxéajle' chee' da guzre Jesús lé', na' bezé'e zexíaje'. <sup>51</sup>Gate ba zua xezrine' lizre', na' benne' wen zrin chee' xeajlexezrígalé' le', na' gulé'e le':

—Naca ban zri'inu'.

<sup>52</sup>Nadxa bchebe' benne' ca' bátala guzú lau bexácabe', na' gulé'e le':

—Ná'aqueze dxedé wagubizra bedxúaj da la da xu'ube'.

<sup>53</sup>Nadxa benne' wen zrin blau na' bexúnene' guca na la' ná'queze gate guzre Jesús le': “Naca ban zri'inu'.” Ca'an guca, le', ne xúgute benne' zaj zra' lizre' guléajle' chee' Jesús.

<sup>54</sup>Da nigá naca na xel-la' waca zren da gudxupe' da bēn Jesús gate bezrine' naga nababa Galilea.

## 5

*Jesús dxexuné' tu benne' biu naga nazí le na Betesda*

<sup>1</sup> Ca gudé na' guxú'u tu laní chee judío ca', na' bezrín Jesús xezre Jerusalén. <sup>2</sup> Lu xezre na', gáguze naga zua dxa xu'u chee xezre da nazí le na Dxa Xu'u Chee Zríla' Ca', dxe' tu cue'la nisa nazí le na Betesda lu dizra' hebreo, na' dxu'a nisa na' zaj nnita gazxu' lachila. <sup>3</sup> Lachila ca' zaj dę benne' zan zaj xu'ę wę', benne' la chul-la ca', ne benne' zaj zua zri ni'a ne'ę, ne benne' zrinnaj ca'. Dxelebeze' ca bixre nisa na'. <sup>4</sup> Ca'an naca lawe' da dxetaj tu gubáz chee xabáa bata gala, ne dxunibe' nisa na', na' benne' nedxu dxeajchu'ę lu nisa na' ca dxedé dxunibe' na, dxexaque' chee bíteteze xel-la' wę' xu'ę. <sup>5</sup> Zua tu benne' na' ba guca chinu chunne dxua iza xu'ę wę'. <sup>6</sup> Gate ble'e Jesús benne' nigá, ne dxeque bé'ene' ba guca zane' iza xu'ę wę' na', na' bchebe' le':

—¿Dxaca lazru' xexacu'?

<sup>7</sup> Benne' wę' na' bechebe':

—Benne', quebe nu chilá' benne' cu'ę neda' lu nisa na' ca dxedé dxe bixre na. Tu tu lasa gate dxaca lazra' chu'a, benne' xula dxu'ę nédxudxa.

<sup>8</sup> Jesús guzre' le':

—¡Guxasa! Becá'a da'a chiu', ne bexíaj.

<sup>9</sup> La' ná'queze bexaca benne' wę' na', na' bequę'ę da'a chee', ne guzú lawe' dxedé'. Zra na' naca zra dxulupá'ana judío ca', <sup>10</sup> na' benne' judío ca' gulę'ę bénnea' bexaque':

—Na'a naca na zra dxupá'anadxu. Quebe naca na gu'u da'a chiu'.

<sup>11</sup> Na' benne' na' bechebe':

—Bénnea' bexunę' neda' guzre' neda': "Becá'a da'a chiu', ne bexíaj."

<sup>12</sup> Nadxa buluchębe' le':

—¿Nuzra na' guzre' lue': Becá'a da'a chiu', ne bexíaj?

<sup>13</sup> Benne' na' quebe nézene' nu bénnea' bexunę' le' lawe' da ba zexíaj Jesús lówela benne' zan ca' zaj zre'ę na'. <sup>14</sup> Ca gudé na' Jesús bezrague' bénnea', dxedé' chale'aj xudau', na' guzre' le':

—¡Gunná'xquel! Ba bexacu' na'a. Québedxa gunu' dul-la, chee quebe bi sacu' xetú da wál-ladxa.

<sup>15</sup> Nadxa benne' na' bezę'ę zexíaje', na' bzenne' judío ca' bexún Jesús le'. <sup>16</sup> Chee le' na' benne' judío ca' guláu zi' xuzre' Jesús, ne gulaca lazre' xelútię' Le' lawe' da dxunę' da caní lu zra dxulupá'ane'. <sup>17</sup> Jesús guzre' benne' ca':

—Dios, Xra', tu dxúnzqueze' zrin, na' neda' dxuna' zrin.

<sup>18</sup> Chee le' na' benne' judío ca' gulaca lázredxe' xelútię' Jesús lawe' da quegá tuze dxuzúę' chálá'ala da nadxixruj bea na chee zra dxulupá'ane', na' cá'anqueze dxun cuine' ca Dios gate gunné' Dios nácaqueze' Xre'.

*Xel-la' dxenná bea da napa Zrí'ine Dios*

<sup>19</sup> Nadxa Jesús guzre' benne' judío ca':

—Da li dxapa' le'e, neda', Zrí'ine Dios, quebe gaca bi guna' cheézqueza'. Tuze dxuna' da dxelé'eda' dxun Xra'. Xúgutę da dxun Xra', cá'anqueze dxuna' neda', Zrí'ine'. <sup>20</sup> Dios, Xra', nazrí'ine' neda', Zrí'ine', ne dxulé'eng' neda' xúgutę da dxúnqueze' Le', na' gulé'eng' neda' da zaj nácadxa szren ca da ca' dxuna', na' xebánequeze le'e ca xelaca na. <sup>21</sup> Ca dxun Xradxu Dios, dxusebang' benne' gate, ne dxunézruje' xel-la' nabán chee', cá'anqueze neda', Zrí'ine', dxunézruja' xel-la' nabán chee benne' ca' dxaca lazra' xunézruja' na. <sup>22</sup> Xradxu Dios quebe dxuchi'ę nu benne', san ba benne' neda', Zrí'ine', xel-la' dxenná bea guchi'a da dxelún tu tu bénneache, <sup>23</sup> chee xelapa xúgutę benne' neda', Zrí'ine', ba lá'ana, cáteze na' dxelape' ba lá'ana Dios, Xra'. Nu benne' quebe dxape' ba lá'ana neda', Zrí'ine', cá'anqueze quebe dxape' ba lá'ana Xradxu Dios nasel-le' neda'.

<sup>24</sup> 'Da li dxapa' le'e, benne' dxenne' da dxennéa' neda', ne dxéajle'ę chee Dios nasel-le' neda', benne' nigá nape' xel-la' nabán da zeajlí canna, na' quebe cuía xi'ę lawe' da ba bedxúaję' lu na' xel-la' gute, ne ba zuę' lu xel-la' nabán. <sup>25</sup> Da li dxapa' le'e, wazrín zra, ne ba dxezrín zra na' gate benne' gate ca' xelenne' chi'a neda', Zrí'ine Dios, na' benne' xuluzúa xrtizra' welaca bánqueze'. <sup>26</sup> Xrá'queza' nape' xel-la' dxenná bea xunézruje' xel-la' nabán da naca na li lazre' chee bénneache, ne cá'anqueze ba benne' neda', Zrí'ine', xel-la' dxenná bea xunézruja' bénneache xel-la' nabán caní, <sup>27</sup> ne ba benne' neda' xel-la' dxenná bea guchi'a chee bénneache lawe' da naca' Benne' Gulje' Bénneache. <sup>28</sup> Quebe xebánele chee da nigá lawe' da zrin zra gate xúgutę benne' gate xelenne' chi'a <sup>29</sup> xelxedxúaję' lu xedxu ba. Benne' ca' belune' da xrlátaje xelxebane' chee xelape' xel-la' nabán da zeajlí canna. Benne' ca' belune' da calęla xelxebane' chee xelabía xi'ę.

*Da dxelunna bea na napa Jesús xel-la' dxenná bea*

<sup>30</sup> Neda' gunná Jesús:

—Neda' quebe bi gaca guna' cheézqueza'. Neda' dxuchi'a chee b́enneache ca gunná bea Dios, Xra', neda', na' ca dxuchi'a naca na xrlátaje lawe' da quebe dxuna' ca da dxaca lázrequeza' neda'. Dxuna' ca da dxaca lazre' Xra', nasele' neda'. <sup>31</sup> Che neda' dxexecheba' da nácaze cheéqueza', da dxennéa' quebe naca na da dxunna bea na. <sup>32</sup> Zua tu benne' xula dxexechebe' da nácaqueza' chia', na' da dxenné' naca na da dxunna bea na. <sup>33</sup> Le'e guselale benne' xejlechebe' Juan, na' ca da bechebe' naca na da li. <sup>34</sup> Da dxunna bea na da dxuxrén lazra' neda' quebe naca na chee b́enneacheze. Dxapa' le'e da nigá chee lale le'e. <sup>35</sup> Juan na' guque' ca tu xi' da gula na, ne bsení na, na' le'e bezaca ba lázrele lu xi' na' tu chí'idau'. <sup>36</sup> Zua tu da dxunna bea na chia' neda', da nácadxa szren ca da bchalaj Juan. Da ca' dxuna' neda', da bsebagá Xra' neda' dxuna'. Da caní dxelunna bea na da li Dios, Xra', gusel-le' neda'. <sup>37</sup> Cá'anqueze Xra' nasele' neda' dxexechebe' chia'. Lácala ba bchalaj Le', le'e quebe ne xénele chí'e, ne quebe ne lé'ele Le', <sup>38</sup> ne quebe nuzúale dizra' chee' xichaj lázraule lawe' da quebe dxéajlele chia' neda', nasele' Xra' neda'. <sup>39</sup> Le'e dxusédele du lázrele da naxúaj na lu xiche chee Dios lawe' da dxéquele xezrélele xel-la' nabán da zeajlí canna lu xiche na', na' da naxúaj na lu xiche chee Dios dxuchalaj na ca naca chia' neda'. <sup>40</sup> Le'e quebe dxaca lázrele xídale naga zua' neda' chee gápale xel-la' nabán na'.

<sup>41</sup> Neda' quebe dxezi'a xel-la' ba lá'ana ca da dxelunna b́enneache, da quebe naca na li lazre'. <sup>42</sup> Neda' núnbe'a le'e, ne nezda' quebe nazrí'ile Dios. <sup>43</sup> Bla'a neda' waláz chee Dios, Xra', na' le'e quebe dxezi' lu na'le neda'. Che za' tu benne' lu da naca cheézqueze', benne' na' wazí' lu na'le. <sup>44</sup> ¿Ájazra gaca chéajlele le'e chia' che dxunle zrin chee xelapa ljwézrele le'e ba lá'ana, ne quebe dxue lázrele sile xel-la' ba lá'ana da dxunna Dios tu licha'? <sup>45</sup> Quebe guéquele néda'queza' gusebagá le'e zria lau Dios, Xra'. Da gusebagá le'e zria naca na da ba gunná Moisésqueze, da na' dxuxrén lázrele guselá na le'e. <sup>46</sup> Che da li guxéajlele le'e chee da gunná Moisés, cá'anqueze chéajlele chia' neda' lawe' da bzua' Moisés ca naca chia' neda'. <sup>47</sup> Na'a, che quebe dxéajlele chee da bzua' le', ¿ájazra gaca chéajlele chee da dxapa' le'e?

## 6

*Jesús dxugawe' chi xun gaxúa benne' biu*  
(Mt. 14.13-21; Mr. 6.30-44; Lc. 9.10-17)

<sup>1</sup> Ca gudé na' guxíaj Jesús xecha la'a dxu'a nísadau' chee Galilea, da nazíqueze le na nísadau' chee Tiberias. <sup>2</sup> Benne' zanté zjácálené Jesús lawe' da ba belelé'ene' xel-la' waca zren ca' da dxun Le', dxexune' benne' we' ca'. <sup>3</sup> Nadxa Jesús guluéne' tu lu xi'a, na' gudxé'e na' nen benne' ca' dxusédené'. <sup>4</sup> Ba zua gagu Laní Pascua chee judío ca'. <sup>5</sup> Gate ble'e Jesús benne' zan ca' zá'aque' zeaj nawe' Le', na' guzre' Felipe:

—¿Gazra cheajxridxu da xelagu benne' zan caní?

<sup>6</sup> Gunná caní Jesús chee la' bi nna Felipe, lawe' da ba neze Jesús ca da gune'. <sup>7</sup> Nadxa bechebe Felipe:

—Che sidxu xeta xtila lazruj da sidxu chee chupa gaxúa zra, quebe gueque na xelez'í benne' caní late' weaj.

<sup>8</sup> Nadxa Andrés, xetú benne' ca' dxuséde Jesús, ne naque' bi biche Simón Pedro, guzre' Jesús:

<sup>9</sup> —Ze tu bi cuide' nigá nápabe' gazxu' xeta xtila zrua' cebada, ne chupa bela. ¿Ájazra gun da nigá gueque na chee xúgute' benne' caní?

<sup>10</sup> Nadxa gunná Jesús:

—Le xé xúgute' xelebé'e.

Naca lu daca lataj na', na' gulebé' ca du chi xun gaxúa benne' biu. <sup>11</sup> Nadxa gucá'a Jesús xeta xtila ca', na' ca gudé guzre' Dios "Xcalenu'", bnézruje' na benne' ca' dxusédené', na' benne' caní gulísie' na láwele benne' zan ca' zaj dxe'e na'. Cá'anqueze ben Jesús chee bela ca', na' bnézruje' ca da gulaca lazre' benne' ca'. <sup>12</sup> Gate gulélaje benne' ca', na' Jesús guzre' benne' ca' dxusédené':

—Le xutupa da bízrujdu ca' da dxelexegá'ana na, chee quebe bi gaca dítaje.

<sup>13</sup> Belexequé'e na, na' buluzré'e chazrinnu xcuite da bízruj ca' zaj nagá'ana na chee da gazxu' xeta xtila zrua' cebada ca'. <sup>14</sup> Nadxa benne' zan ca', gate belelé'ene' xel-la' waca zren nigá da ben Jesús, gulenné':

—Da li benne' nigá naque' b́ennea' guchálaje' waláz chee Dios, b́ennea' dxal-la' le'e.

<sup>15</sup> Guque bé'ene' Jesús dxelaca lazre' xeleché'e Le' xadía chee xuluzú'e Le' ca benne' wenna' bea, na' bezé'e na, ne begüéne' lu xi'a sibe na' chee sué' leze'.

*Jesús dxedé' lawe' nísadau'*  
(Mt. 14.22-27; Mr. 6.45-52)

<sup>16</sup> Gate ba za xrinne, benne' ca' dxusede Jesús belétaje' dxu'a nísadau', <sup>17</sup> na' gulu'ē lu da dxedá lawe' nísadau', ne gulezú lawe' zjaque' xeledé' xechalá'a nísadau' chee xezezrine' xezre Capernaum. Ca guxrinne, quebe ne xezrín Jesús na'. <sup>18</sup> Nadxa guzú lau dxaca tu be' bdunu' lawe' nísadau' na', na' xeajxruza chee nísadau' na' guxásale'ē na'. <sup>19</sup> Gate ba guledé' lu nísadau' na' catite sadxu tu chí'i zren, na' belelé'ēng' Jesús ba dxezrine' naga ziaj da dxedá lawe' nísadau', dxezé'ē lawe' nísadau', na' belezrebe'. <sup>20</sup> Nadxa Jesús guzre' benne' ca':

—Neda' na'. Quebe zrébele.

<sup>21</sup> Nadxa lu dutē xel-la' dxelebé gulezú' lu ne'ē Le' lu da dxedá lawe' nísadau' na', na' chadite belezrine' lu xezr la xu naga zjaque'.

*Benne' zan ca' dxelexilaje' Jesús*

<sup>22</sup> Zra xula benne' zan ca', benne' belexegá'ana xecha la'a nísadau', guleque bé'ēng' ba zeajxaca benne' ca' dxusede Jesús lu da dxedá lawe' nísadau' tu licha' da dxe' chalá'a na', na' Jesús quebe guxíajlēng' benne' ca'. <sup>23</sup> Dxácatē na' xezícala da dxeledá lawe' nísadau', da ca' beledxúaj na' xezre Tiberias, belezrín na' tu lataj da zua gáguze naga gulawe' xeta xtila na' ca' gudé guzre Xránadxu Dios: "Xcalenu'." <sup>24</sup> Chee le' na' gate benne' zan ca' guleque bé'ēng' québedxa zua Jesús na', ne cá'anqueze benne' ca' dxusedēng', na' gulu'ē lu da dxeledá lawe' nísadau', ne xjaque' xezre Capernaum zeajlexedilaje' Jesús.

*Jesús naque' xeta xtila da dxunna na xel-la' nabán li lazre'*

<sup>25</sup> Gate benne' zan ca' belezrine' xecha la'a dxu'a nísadau', na' belexezrague' Jesús, ne buluchebe' Le':

—Benne' Wesede, ¿bata bla'u nigá?

<sup>26</sup> Jesús guzre' benne' ca':

—Da li dxapa' le'e, dxexilaje le'e neda' lawe' da gudágule, ne béljele, ne quegá lawe' da ble'ele xel-la' waca ca' da ble'eda' le'e. <sup>27</sup> Quebe cue'le gunne xue sile da gágule da te chee na. Le cue' gunne xue sile da gágule da zeajlí canna, da na' gunna na le'e xel-la' nabán da zeajlí canna. Da nigá naca na xel-la' wagu da gunna' neda', Benne' Gulje' Bénneache, le'e, lawe' da bzua Xra' Dios nen neda' da dxunna bea na naca' Zri'ine'.

<sup>28</sup> Nadxa buluchebe' Le':

—¿Bi dxal-la' guntu' chee gaca ca da dxaca lazre' Dios guntu'?

<sup>29</sup> Jesús bechebe':

—Da dxaca lazre' Dios gunle naca na chéajlele chia' neda', naca' Bénnea' gusel-la Dios.

<sup>30</sup> Nadxa buluchebe' Le':

—¿Bizra xel-la' waca gunu' chee le'entu' na, na' chéajlentu chiú? ¿Bizra dxunu'? <sup>31</sup> Xra xrtauntu' ca' gulawe' xeta maná le'ē xixre' lawe' lataj, ca naxúaj na lu xiche chee Dios, dxenná na: Dios bgawe' benne' ca' xeta xtila da za xabáa.

<sup>32</sup> Bechebe Jesús:

—Da li dxapa' le'e, quegá Moisés na' bnézruje' benne' ca' xeta xtila da za xabáa. Dios, Xra', dxunne' le'e xeta xtila da za xabáa da naca na li lazre'. <sup>33</sup> Xeta xtila na' da dxunna Dios le'e naca na Bénnea' bétaje' xabáa, ne dxunézruje' chee bénneache xel-la' nabán li lazre'.

<sup>34</sup> Nadxa benne' ca' gulé'ē Le':

—Xran, tu bénnazqueze cheentu' xeta xtila caní.

<sup>35</sup> Jesús guzre' benne' ca':

—Neda' naca' xeta xtila da dxunna na xel-la' nabán li lazre'. Benne' xide' naga zua' neda' cabátadxa tung', na' benne' chéajle'ē chia' cabátadxa bílēng'. <sup>36</sup> Naca na ca ba gucha' le'e. Le'e na' quebe dxéajlele chia', lácala ba ble'ele neda'. <sup>37</sup> Xúgutē benne' ca' dxunna Xra' neda', xeledé'ē lawa', na' benne' ca' xeledé'ē naga zua', quebe guzúa' benne' ca' chalá'ala. <sup>38</sup> Neda' guzú'a xabáa, quegá chee guna' ca dxaca lázrequeza' neda'. Bla'a chee guna' ca da dxaca lazre' Xra', gusel-le' neda'. <sup>39</sup> Da dxaca lazre' Xra', nasel-le' neda', naca na chee quebe gunitia' netú benne' ca' ba benne' chia'. Nacan chee gusebana' benne' ca' lu zra bzebe. <sup>40</sup> Da dxaca lazre' Xra', nasel-le' neda', naca na chee xelapa bénneache xel-la' nabán da zeajlí canna, xúgutē benne' ca' xelenné'ē neda', Zri'ine Dios, ne xeléajle'ē chia' neda', na' chee gusebana' neda' benne' ca' lu zra bzebe na'.

<sup>41</sup> Gate belenne' da nigá, na' judío ca' gulezú lawe' dxelezi tizre' Jesús lawe' da gunné': "Neda' naca' xeta xtila da betaj xabáa." <sup>42</sup> Nadxa gulenné':

—¿Quegá benne' nigá zri'ine José? Dxi'u núnbeadxu xra xrne'ē. ¿Bizr chee na' dxenné' bétaje' xabáa?

<sup>43</sup> Nadxa Jesús guzre' benne' ca':

—Québedxa si tízrale. <sup>44</sup> Quebe nu benne' gaca xide' naga zua' neda', che quebe xedajgúa Xra' nasel-le' neda' bénnea', na' neda' gusebana' bénnea' lu zra bzebe na'. <sup>45</sup> Lu xiche ca' naga naxúaj da gulenná benne' ca' buluchalaje' waláz chee Dios, dxenná na: Dios

gusédene' xúgute bénneache. Ca' gaca na, xúgute benne' ca' dxuluzé nague' ca da dxuséde Xra', dxelelé'e naga zua'.

<sup>46</sup> 'Quebe ne le'e nu benne' Xra'. Benne' tu licha', bénnea' blé'ene' Le', naca bénnea' guzé'e naga zua Dios. <sup>47</sup> Da li dxapa' le'e, nu benne' dxéajle'e chia' neda' nape' xel-la' nabán da zeajlí canna. <sup>48</sup> Neda' naca' xeta xtila da dxunna na xel-la' nabán li lazre'. <sup>49</sup> Xra xrtáule ca' gulawe' xeta maná le'e xixre' lawe' lataj, na' gudé na' xúgute benne' ca' gultatie'. <sup>50</sup> Xeta xtila nigá naca na da za xabáa, na' che nu benne' gawe' na, quebe gatie' tu chi'ize. <sup>51</sup> Neda'queza' naca' xeta xtila da dxunna na xel-la' nabán da za xabáa. Benne' gawe' xeta xtila nigá waca bánqueze' chadí chacanna. Xeta xtila na' da dxunna' neda' naca na belá' dxen cheé'zqueza', da gunna' chee' xelaca bánqueze bénneache.

<sup>52</sup> Nadxa benne' judío ca' gulezú lawe' dxuluchébe ljwezre', dxelenné':

—¿Ájazra gun benne' nigá, gunne' dxi'u belá' dxen cheé'zqueze' chee' gágudxu na?

<sup>53</sup> Jesús guzre' benne' ca':

—Da li dxapa' le'e, che le'e quebe gágule belá' dxen chia' neda', Benne' Gulje' Bénneache, ne che quebe xí'ajle dxen chia', quebe gápale xel-la' nabán li lazre'. <sup>54</sup> Benne' dxawé' belá' dxen chia', ne dxi'ajé' dxen chia' nape' xel-la' nabán da zeajlí canna, na' neda' gusebana' bénnea' lu zra bzebe na'. <sup>55</sup> Belá' dxen chia' naca na xel-la' wagu li lazre' chee' bénne' du xu'ule, na' dxen chia' naca na da xele'aj bénneache da naca na li lazre'. <sup>56</sup> Benne' dxawé' belá' dxen chia', ne dxi'ajé' dxen chia', naque' neda' tuze, na' neda'queza' naca' bénnea' tuze. <sup>57</sup> Xra' nasele' neda' xu'u lu ne'e xel-la' nabán li lazre', na' neda' naca bana' ne chee' Le'. Cá'anqueze bénnea' dxawé' da naca chia' neda' gaca bánqueze' ne chia' neda'. <sup>58</sup> Da nigá naca na xeta xtila da za xabáa. Xeta xtila nigá quebe naca na ca xeta maná da gulagu xra xrtáule ca', na' gudé na' gulate xúgute'. Benne' dxawé' xeta xtila nigá waca bánqueze' chadí chacanna.

<sup>59</sup> Bsede Jesús ca naca da caní naga zaj zra' benne' zan ca' lu xu'u naga dxelezraga bénneache chee' xezre Capernaum.

*Ca naca dizra' na' da dxunna na xel-la' nabán da zeajlí canna*

<sup>60</sup> Gate belén benne' zan ca' da nigá dxuséde Jesús, na' benne' ca' zjácale Jesús gulenné':

—Dizra' caní dxenná Jesús zaj nácale'e na stebe sidxu. ¿Nuzra gaca gun caní?

<sup>61</sup> Guque bé'ene' Jesús dxelenné' chee' xrtizre', na' bchebe' benne' ca':

—¿Dxuzúa dizra' nigá le'e stebe? <sup>62</sup> ¿Ájazra gunle checa' lé'ele neda', Benne' Gulje' Bénneache, xegüéna' xabáa naga zua' nédxute? <sup>63</sup> Be' naca na da dxunna xel-la' nabán li lazre'. Da naca na belá' dxen quebe bi zaca na. Dizra' ca' da ba gucha' le'e zaj naca na chee' Be', ne zaj naca na da dxelunna na xel-la' nabán li lazre'. <sup>64</sup> Bál-lale le'e quebe dxéajlele chia'.

Caní gunná Jesús lawe' da nézene' nédxudauté nu benne' ca' quebe dxeléajle'e chee', ne nua' gudé Le' lu na' benne' guledábague' Le'. <sup>65</sup> Nadxa gunná Jesús:

—Chee' le' na' gucha' le'e, quebe nu benne' gaca xide' naga zua' neda' che quebe xedajgúa Xra' bénnea'.

<sup>66</sup> Lu zra ná'queze benne' zan ca', benne' xjácale' Jesús, québedxa xjácale' Le'. <sup>67</sup> Nadxa Jesús bchebe' benne' chazrinnu ca' dxusédene', gunné':

—¿Cá'anqueze le'e dxaca lázrele xexíajle?

<sup>68</sup> Bechebe Simón Pedro:

—Xran, ¿nuzra chéajlentu'? Dizra' chiu' naca na da dxunna na xel-la' nabán da zeajlí canna. <sup>69</sup> Netu' dxéajlentu' chiu', ne nézentu' nacu' Cristo, Zri'ine Dios ban.

<sup>70</sup> Jesús bechebe':

—Neda' gucá'a le'e, benne' chazrinnu, na' tu benne' ládujla le'e xu'e da xriwe'.

<sup>71</sup> Da nigá gunná Jesús, bchálaje' ca naca chee' Judas Iscariote, zri'ine tu benne' le' Simón, lawe' da gudé Judas nigá Jesús lu na' benne' guledábague' Le'. Naque' tu benne' chazrinnu ca' dxuséde Jesús.

## 7

*Benne' biche Jesús quebe dxeléajle'e chee'*

<sup>1</sup> Gudé na' gudé Jesús naga nababa Galilea. Quebe guca lazre' tee' naga nababa Judea lawe' da dxelaca lazre' judío blau zaj zre'e na' xelútie' Le'. <sup>2</sup> Ba za laní gate judío ca' dxelezúe' lu xu'u laga' ca'. <sup>3</sup> Chee' le' na' bi biche Jesús gulé'e Le':

—Quebe xegá'anu' nigáze. Bexíaj Judea, chee' cá'anqueze benne' ca' dxeléajle' chiu' zaj zre'e na' gaca xelelé'ene' ca da dxunu'. <sup>4</sup> Che nu benne' dxaca lazre' xelúnbe'e bénneache le', quebe dxuné' da ca' bagácheze. Lawe' da dxunu' Lue' da caní, ben na lau xúgute' bénneache.

<sup>5</sup> Caní gulenné' lawe' da quebe dxeléajle' benne' biche' ca' chee' Jesús. <sup>6</sup> Nadxa Jesús guzre' benne' ca':

—Quebe ne zrin zra cha'a na'. Cheeḷe le'e bíteteze zra waca cheájle. <sup>7</sup> Benne' ca' zaj naca chee xezr la xu nigá quebe gaca xelecuidene' le'e. Dxelecuidene' neda' lawe' da dxulé'eda' neda' naca da calela da dxelún benne' ca'. <sup>8</sup> Le chjaca le'e laní na'. Quebe sa'a neda' na' lawe' da quebe ne zrin zra cha'a.

<sup>9</sup> Ca gudé guzre Jesús benne' ca' da nigá, na' begá'ane' naga nababa Galilea na'.

*Jesús dxezrine' laní gate judío ca' dxelezúe' xu'u laga' ca'*

<sup>10</sup> Ca gudé besía'aca benne' biche Jesús, na' cá'anqueze Le' guxíaje' laní na'. Bagácheze guxíaje' chee quebe nu le'e Le'. <sup>11</sup> Benne' xíchaje chee judío ca' belexíaje' Jesús lu laní na'. Dxeleñé':

—¿Gazra zua bénnea'?

<sup>12</sup> Ládujla benne' zan ca', benne' zan buluchálaje' ca naca chee Jesús. Bal-le' gulenné': “Naque' benne' xrlátaje.” Xebal-le' gulenné': “Quebe naque' xrlátaje lawe' da dxezi xe'e bénneache.”

<sup>13</sup> Quebe nu benne' bchálaje' caníqueze ca naca chee lawe' da dxelezrebe' da xelún benne' xíchaje ca' chee judío ca'.

<sup>14</sup> Ba zeaj gachaj laní na' gate guxú'u Jesús lu chale'aj xudau', na' guzú lawe' dxusédene' benne' zaj zre'e na'. <sup>15</sup> Belexebane benne' judío ca', dxeleñé':

—¿Ajazra na' benne' nigá da zante nézene', ne quebe bsédie' chee xudau'?

<sup>16</sup> Bechebe Jesús:

—Da dxusédeda' neda' le'e quebe naca na cheézqueza'. Naca na chee Xra' nasele' neda'. <sup>17</sup> Che nu benne' dxaca lazre' gun'e ca da dxaca lazre' Dios, na' wanézene' che da dxusédeda' naca na chee Dios, u che dxenné' ca da naca cheézqueza'. <sup>18</sup> Benne' dxuchálaje' da naca cheézqueze' dxunge' na chee xelapa bénneache le' ba lá'ana. Bénnea' dxue lazre' xelapa bénneache ba lá'ana bénnea' gusel-le' le', benne' nigá dxenné' da li, ne quebe bi dxenné' da naca na da wen lazre'.

<sup>19</sup> Moisésqueze benne' le'e da nadxixruj bea na, na' netule le'e quebe dxuzúale dizra' chee da nadxixruj bea na na'. ¿Bizr chee na' dxaca lázrele gütele neda'?

<sup>20</sup> Belexechebe benne' zan ca':

—Xu'u lue' be' xriwe'. ¿Núzraqueze dxaca lazre' gutie' lue'?

<sup>21</sup> Jesús guzre' benne' ca':

—Tu xel-la' waca beña' lu zra dxupá'anale, na' xügutele le'e dxebánele. <sup>22</sup> Moisés benne' da zéajlele, dxechúgule late' weaj belá' chee bel-la' dxen chee zrí'inele bi biudu ca' chee xelexegá'anabe xrlátaje lau Dios. Da nigá da dxunle quebe guzú lau na gate na' zua Moisés. Guzú lau na gate zaj zra' xra xrtau Moisés cá'ante. Chee le' na' le'e dxechúgule late' belá' chee bel-la' dxen chee tu bi biúda' chee xegá'anabe xrlátaje lau Dios lácala naca zra dxupá'anale. <sup>23</sup> Che caní dxunle lu zra dxupá'anale chee quebe gusanle ca naca da bdxixruj be'e Moisés, ¿bizr chee na' dxezra'ale neda' lawe' da bexuna' duté bel-la' dxen chee tu benne' gate naca zra dxupá'anale? <sup>24</sup> Quebe guchí'ale le'e chee tu da dxun benne' ca naca da dxelé'ezele. Gate bi da guchí'ale, le gun na lu da naca xrlátaje.

*Jesús dxuchálaje' chee naga ze'e*

<sup>25</sup> Nadxa bal-la benne' ca' zaj zre'e Jerusalén gulezú lawe' dxuluchebe ljwezre':

—¿Quegá benne' nigá bénnea' dxelexíaje' chee xelútie' le'? <sup>26</sup> Nigá zue' dxuchálaje' lávela bénneache, na' quebe nu bi dxé Le'. ¿Zaj neze benne' xíchaje ca' da li naca benne' nigá Cristo, Bénnea' nasele-la Dios? <sup>27</sup> Netu' nézentu' ga za' benne' nigá. Gate xida Cristo, quegá nu neze ga ze'e.

<sup>28</sup> Jesús zue' dxusédene' benne' ca' chale'aj xudau', na' gate benne' da nigá, na' gunné' zizraj:

—Dxennale núnbeale neda', ne dxennale nézele ga za'a. Bla'a nigá, quegá cheézqueza'. Bénnea' nasele-le' neda' naque' li lazre', na' Bénnea' quebe núnbeale le'e. <sup>29</sup> Neda' núnbe'a Le' lawe' da za'a naga zua Le', na' Le' gusel-le' neda'.

<sup>30</sup> Nadxa gulaca lazre' xelex-le' Jesús. Quebe nu gudela Le' lawe' da quebe ne zrin zra chee xelútie' Le'. <sup>31</sup> Benne' zan guléajle'e chee Jesús, na' gulenné':

—Gate xida Cristo, ¿gúnljadxe' xel-la' waca zrenté ca da dxun benne' nigá?

*Benne' fariseo ca' dxelesel-le' xra'aga wen zrin chee' chee xelex-le' Jesús*

<sup>32</sup> Benne' fariseo ca' belenne' ca da dxeleñá bénneache ca naca chee Jesús, na' le', ne benne' xíchaje ca' chee bxruze ca' gulesel-le' xra'aga wen zrin chee xudau' chee xelex-le' Jesús. <sup>33</sup> Nadxa gunná Jesús:

—Wazúalena' le'e xetú chí'idau', na' xezríneza' naga zua Bénnea' gusel-le' neda'. <sup>34</sup> Le'e wexíajle neda', na' quebe xezrélele neda', lawe' da quebe gaca sa'le naga sua' neda'.

<sup>35</sup> Nadxa benne' judío ca' gulezú lawe' dxuluchebe ljwezre':



—¿Gazra cheaj benne' nigá, naga quebe gaca xezreldxu Le'? ¿Waxíajé' naga zaj zra' benne' judío ca' zaj nase dínnajé' ládujla benne' xezr la xu ca' chee gusédené' benne' quebe zaj naque' judío? <sup>36</sup> ¿Bizra zéajé da nigá guzre' dxi'u: Wexíajle neda', na' quebe xezrélele neda' lawe' da quebe gaca sa'le naga sua' neda'?

*Jesús dxuchálajé' chee xegu nisa da dxunna xel-la' nabán li lazre'*

<sup>37</sup> Zra bzebe chee laní na' naca na zra blaudxa. Lu zra na' guzé Jesús, na' gunné' zizraj: —Che nu benne' dxebilene', dxal-la' xidé' naga zua' neda', na' xí'ajé'. <sup>38</sup> Naca na ca naxúaj na lu xiche chee Dios, dxenné': "Benne' dxéajlé'e chia', lu lázrdawé' galaj xegu nisa da gunna na xel-la' nabán."

<sup>39</sup> Da nigá gunná Jesús ca naca chee Be' Lá'azxa, Bénnea' xelezí' benne' ca' xeléajlé'e chee Jesús, lawe' da quebe ne la' Be' Lá'azxa lawe' da quebe ne xegá'ana szren Jesús naga zua Xre'.

*Bénneache dxelaque' chupa la'a*

<sup>40</sup> Bal-la bénneache, gate belenne' da nigá, gulenné':

—Da li benne' nigá naque' Bénnea' guchalajé' waláz chee Dios, Bénnea' dxal-la' xidé'.

<sup>41</sup> Xebal-le' gulenné':

—Benne' nigá naque' Cristo, Benne' guchebe lazre' Dios sel-le'.

Xebal-le' gulenné':

—¿Waca Cristo benne' Galilea? <sup>42</sup> Lu da naxúaj na lu xiche chee Dios dxenná na gaca Cristo zri'ine zre sua David, ne gaque' benne' xezre Belén, xezre na' naga gulaj David.

<sup>43</sup> Ca'an guca, gulaca benne' ca' chupa la'a ne chee Jesús. <sup>44</sup> Bal-le' gulaca lazre' xel-le' Jesús, na' quebe nu bexazre guné' na.

*Benne' xíchajé ca' chee judío ca' quebe dxeléajlé'e chee Jesús*

<sup>45</sup> Xra'aga wen zrin ca' chee xudau' belexezrine' naga zaj zra' fariseo ca', ne benne' xíchajé ca' chee bxruze ca', na' benne' caní buluchébe' xra'aga wen zrin ca':

—¿Bizr chee na' quebe guchéle bénnea'?

<sup>46</sup> Belexechebe xra'aga wen zrin ca':

—Quebe ne guchalaj nu bénneache ca dxuchalaj benne' nigá.

<sup>47</sup> Nadxa fariseo ca' gulé'e xra'aga wen zrin ca':

—¿Cá'anqueze le'e be'le lataj guz' xé'e le'e? <sup>48</sup> Quebe nu ne chéajlé chee bénnea', benne' xíchajé caní, ne cá'anqueze benne' fariseo ca'. <sup>49</sup> Benne' ca' dxeléajlé'e chee bénnea' quebe zaj núnbe'e da nadxixruj bea na, ne zaj nabía xí'e.

<sup>50</sup> Nicodemo, bénnea' guxíajé' xeajjné'e Jesús chizrela naque' tu benne' fariseo ca', na' guzre' benne' ca':

<sup>51</sup> —Cateze dxenná da nadxixruj bea cheedxu quebe gaca guzría xidxu tu benne' che quebe ne xénedxu xechébe' chee nézedxu che bi da nabague'e.

<sup>52</sup> Nadxa belexechebe benne' ca':

—¿Nácaquezu' lue' benne' Galilea? Gunná' xanne' da naxúaj na lu xiche chee Dios, na' le'enu' netú benne' dxuchalajé' waláz chee Dios quebe ne galajé' naga nababa Galilea, naga zaj zra' bénneache quebe zaj naca xánnie' judío.

<sup>53</sup> Nadxa tu tu benne' ca' xeajxaque' lizre'.

## 8

<sup>1</sup> Na' Jesús guz'é zéajé' lu Xi'a Xaga Olivo.

*Jesús dxuchálajlé' tu nu'ula dxuné' dul-la dxíchajé' xrba chee xel-la' nuchaga na'*

<sup>2</sup> Zra xula, gate guxani', na' bezrín Jesús chale'aj xudau' na'. Xúgute benne' ca' gulebigue' naga zua Jesús, na' Le' gudxé'e, ne guzú lawé' dxusédené' benne' ca'. <sup>3</sup> Nadxa benne' ca' dxuluxuzájle'e da nadxixruj bea Dios, ne benne' fariseo ca' guleché'e tu nu'ula naga zua Jesús, belelé'ene' le' dxuné' dul-la dxíchajé' xrba chee xel-la' nuchaga na'. Buluzé' nu'ula na' laduj benne' zaj zre'e na', <sup>4</sup> na' gulé'e Jesús:

—Benne' Weséde, nu'ula nigá blé'entu' le' dxuné' dul-la dxíchajé' xrba chee xel-la' nuchaga na'. <sup>5</sup> Da bdxixruj be'e Moisés dxenná be'e netu' gútentu' nu'ula caní, güentu' le' xiaj. ¿Bizra dxenná' Lue'?

<sup>6</sup> Caní gulenná benne' ca' chee xuludxixre' Jesús chee xelezéquene' xelagu zria Le'. Nadxa gudxé' luche Jesús, ne guzú lawé' dxuzúajé' lu xu nen zrube ne'e. <sup>7</sup> Benne' ca' buluchébequeze' Jesús, na' Le' bezé' dxé'e benne' ca':

—Nútetezlake le'e quebe nabágale dul-la, waca su laule güele nu'ula nigá xiaj.

<sup>8</sup> Na' bebé' luche Jesús, ne bzúajqueze' lu xu. <sup>9</sup> Benne' ca', gate belenne' da nigá, quebe bzua xichaj lázrdawé' le' zrize, na' belexedxúajé' tu weaje'. Belexedxúaj za'a benne' gúlaxda, na' ca belexedxúaj xúgute benne' ca' dxelagu zrie' nu'ula', na' begá'ana Jesús tuzé' nen nu'ula na',

zë' laduj benne' ca' dxuluzé nague' cheë'. <sup>10</sup> Nadxa bezé' Jesús, ne gate québedxa nu benne' ca' ble'e Jesús, benne' dxulagu zrië' nu'ula na', nadxa guzre' le':

—Nu'ula, ¿gazra na' benne' ca' gulagu zrië' lue'? ¿Quebe nu chilá' benne' guzrí'a xi'e lue'?

<sup>11</sup> Nu'ula na' gunné':

—Quebe nu chilá', Xran.

Nadxa Jesús guzre' nu'ula na':

—Cá'anqueze neda', quebe guzrí'a xi'a lue'. Bexíaj, ne québedxa gunu' dul-la.

*Jesús dxusení'e lu xichaj lázxdau bénneache*

<sup>12</sup> Bchálajle Jesús benne' ca' xecha lasa, gunné':

—Neda' naca' xel-la' naxaní' cheë lu xichaj lázxdau bénneache. Benne' dxdéleñe' neda' gape' xel-la' naxaní' nigá da gunezruj na le' xel-la' nabán li lazre', na' cabata' tadxe' lu da chul-la cheë dul-la da zaj nabague'.

<sup>13</sup> Nadxa benne' fariseo ca' gulé'e Le':

—Lue' dxexechëbu' cheé'zquezu', na' da dxexechëbu' quebe bi zaca na.

<sup>14</sup> Bechebe Jesús:

—Da dxexechëba' zaca na lácala néda'queza' dxexechëba' cheé'zqueza'. Neda' nezda' gala za'a, ne gala cha'a. Le'e quebe nézele gala za'a, ne gala cha'a. <sup>15</sup> Le'e dxuchí'ale cáteze dxenná xichaj lázrdaule. Bla'a neda', quegá cheë guchi'a ca da dxun nu benne'. <sup>16</sup> Che dxuchi'a, dxuchi'a cáteze naca na, lawe' da quebe dxuchi'a néda'za'. Xra' nasel-le' neda' dxuchi'e tu zren nen neda' ca naca da dxelún bénneache. <sup>17</sup> Lu da nadxiruj bea cheele le'e naxúaj gate zaj zra' chupa benne' dxelexechëbe' tuz ca dxelenné', naca da li xrtizra' benne' ca'. <sup>18</sup> Néda'queza' dxexechëba' da naca cheé'zqueza', na' Xra' nasel-le' neda', cá'anqueze dxexechëbe' chia'.

<sup>19</sup> Nadxa benne' ca' buluchëbe' Jesús:

—¿Ga na' Xrau'?

Jesús bechebe':

—Le'e quebe núnbeale da nácaqueza' neda', ne quebe núnbeaquezle Xra'. Chela da li núnbeale neda', cá'anqueze núnbeale Xra'.

<sup>20</sup> Da caní bchalaj Jesús dxácatë na' dxusédenë' bénneache chale'aj xudau' naga zaj nnita xi'ina dumí cheë xudau'. Quebe nu gudëla Le' lawe' da quebe ne zrin zra cheë'.

*Dxenná Jesús: "Naga cha'a neda' quebe gaca sa'le le'e"*

<sup>21</sup> Nadxa Jesús guzre' benne' ca':

—Wexá'a neda', na' le'e xexilajle neda', na' wátele lu dul-la nabágale, lawe' da naga cha'a neda', le'e quebe gaca sa'le.

<sup>22</sup> Nadxa benne' judío ca' gulé'ljwezre':

—¿Gute cuine', ne cheë le na' dxenné' quebe gaca chéajdxu naga cheaj Le'?

<sup>23</sup> Nadxa Jesús guzre' benne' ca':

—Le'e nácale cheë zran xabáa nigá. Neda' naca' cheë xabáa na'la. Le'e nácale cheë xëzr la xu nigá. Neda' quebe naca' cheë xëzr la xu nigá. <sup>24</sup> Cheë le na' gucha' le'e wátele lu dul-la nabágale, lawe' da che quebe dxéajlele zúaqueza' neda', wátele lu dul-la nabágale.

<sup>25</sup> Nadxa benne' ca' buluchëbe' Jesús:

—¿Nuzra nacu' Lue'?

Bechebe Jesús:

—Nácaqueza' ca ba gucha' le'e nédxudautë. <sup>26</sup> Déle'e da dxal-la' nnia' cheële, ne da dxal-la' guchi'a ca naca da dxunle. Bénnea' gusél-le' neda' dxenné' da li, na' da dxapa' bénneache naca na da ba benda' gunné' Le', lácala quebe dzezaca ba lázreñe na.

<sup>27</sup> Benne' ca' quebe guléajni'ine' dxuchálajle Jesús le' ca naca cheë Dios, Xre'. <sup>28</sup> Nadxa Jesús guzre' benne' ca':

—Gate le'e chísale sibe neda', Benne' Gulje' Bénneache, nadxa xúnbeale zúaqueza' neda', ne quebe bi dxuna' da naca cheé'zqueza'. Tuze dxenné'a ca da ba ble'e Xra' neda'. <sup>29</sup> Bénnea' gusél-le' neda' zúalequeze' neda'. Xra' quebe nucá'angé' neda' tuza' lawe' da tu dxúnzqueza' ca da dzezaca ba lazre' Le'.

<sup>30</sup> Ca gunná Jesús da caní, guléajle benne' zan cheë'.

*Benne' zaj naque' cheë Dios, ne benne' ca' nuxru dul-la le'*

<sup>31</sup> Nadxa Jesús guzre' benne' judío ca', benne' dxeléajle'e cheë':

—Che le'e se típale lu da dxapa' le'e, da li nácale neda' tuze. <sup>32</sup> Gúnbeale da li, na' da li na' guselá na le'e.

<sup>33</sup> Belexechëbe benne' zan ca':

—Netu' bícantu' xrtia Abraham, ne quebe ne chú'untu' lu na' nu benne' ca benne' zaj nada'u. ¿Bizr cheë na' dxenná'u' Lue' lantu'?

<sup>34</sup> Jesús guzre' benne' ca':

—Da li dxapa' le'e, xúgute benne' dxelúnqueze' dul-la, dúl-laqueze na' nuxru na benne' ca'.

<sup>35</sup> Nu benne' xu'e lu na' tu benne' ca benne' nada'u quebe tu súazqueze' xu'u na'. Zrí'inequeze bénea' wazúatequezebe'. <sup>36</sup> Chee le na', che neda', Zrí'ine Xra', guselá' le'e, da li láqueze le'e.

<sup>37</sup> Nezda' nácale le'e xrtia Abraham. Na'a dxaca lázrele gútele neda' lawe' da quebe dxezí' lu na'le da dxapa' le'e. <sup>38</sup> Neda' dxuchálaja' ca naca da ble'e Xra' neda', na' le'e dxunle ca da guzre xráqueze le'e.

<sup>39</sup> Belexechebe benne' ca':

—Xra xrtauntu' naca Abraham.

Na' Jesús guzre' benne' ca':

—Chela nácale da li xrtia Abraham, na' gunle ca da ben Abraham. <sup>40</sup> Lácala gucha' le'e da li da ble'e Xra' neda', le'e dxaca lázrele gútele neda'. Abraham cabata' bene' da caní. <sup>41</sup> Le'e dxúnquezele ca da dxun xráquezele.

Nadxa benne' ca' gulé'e Jesús:

—Netu' quebe nácantu' bi lan. Zua tuze Xrantu', Dios.

<sup>42</sup> Nadxa Jesús guzre' benne' ca':

—Chela naca Dios da li Xrale, le'e wazrí'ile neda' lawe' da za'a neda' naga zua Dios, ne zúaqueza' nigá. Quebe za'a da naca cheézqueza'. Dios nasel-le' neda'. <sup>43</sup> ¿Bizr chee na' quebe dxezéquele chéajni'ile da dxennéa'? Naca na lawe' da quebe dxaca lázrele xénele dizra' chia'.

<sup>44</sup> Xráquezele le'e naca da xriwe'. Le'e nácale chee da na', ne dxaca lázrele gunle ca da dxaca lazre' le na. Da xriwe' na' naca na wete benne' nédxudauté. Cabata' dxenné na da li lawe' da quebe bi zua da li nen le na. Gate dxun lazre' na, dxenné na cáteze naca na, lawe' da tu dxun lázrequeze na, ne naca na da guzú lau na ben lazre' na. <sup>45</sup> Lácala dxapa' le'e da li, le'e quebe dxéajlele chia'. <sup>46</sup> ¿Núcale le'e séquele gulé'ele nabaga neda' tu dul-la? Che dxennéa' da li, ¿bizr chee na' quebe dxéajlele chia'? <sup>47</sup> Benne' naque' chee Dios dxenné' dizra' chee Dios. Le'e quebe nácale chee Dios. Chee le na' quebe dxaca lázrele xénele chee Dios.

*Cristo ba zúaqueze' nédxudxa ca Abraham*

<sup>48</sup> Nadxa benne' judío ca' gulé'e Jesús:

—Da li dxennantu' gate dxennantu' nacu' benne' Samaria, ne xu'u be' xriwe'.

<sup>49</sup> Jesús bechebe':

—Quebe xu'a be' xriwe'. Neda' dxapa' ba lá'ana Xra' Dios, na' le'e dxuzúale neda' chalá'ala.

<sup>50</sup> Quebe dxe'a gunne xue chee gápale neda' ba lá'ana, ne si' lu na'le neda'. Zua Benne' xabáa dxezá lazre' gápale neda' ba lá'ana, ne Le' dxuchi'e ca da dxunle. <sup>51</sup> Da li dxapa' le'e: Benne' dxuné' ca naca dizra' chia', cabata' gátequeze bénea'.

<sup>52</sup> Nadxa benne' judío ca' belexechebe':

—Na'a nézquezentu' xu'u be' xriwe'. Ba gulátequeze Abraham, ne xúgute benne' ca' buluchálaje' waláz chee Dios, na' lue' dxennáu' benne' guné' ca naca dizra' chiu' cabata' gátequeze'. <sup>53</sup> ¿Nácadxu' szrendxa ca xra xrtáudxu Abraham? Gútequeze Le', ne cá'aqueze gulate benne' ca' buluchálaje' waláz chee Dios. ¿Bízraqueze dxugune cuinu'?

<sup>54</sup> Bechebe Jesús:

—Che neda' dxucá'ana cuina' ba lá'ana, quebe bi zaca na. Benne' dxape' neda' ba lá'ana naque' Xra', Bénea' dxennale le'e naque' Xrale. <sup>55</sup> Le'e quebe núnbeale Le'. Neda' núnbeaqueza' Le'. Chela dxennéa' quebe núnbe'a Le', naca' wen lazre' ca nácale le'e. Neda' da li núnbe'a Le', ne dxuna' ca da dxenné'. <sup>56</sup> Xra xrtáule Abraham, bénea' gutié' nédxudauté, gubélé'ene' lawe' da dxal-la' lé'ene' zra zua neda'. Blé'ene' na, na' gubélé'ene'.

<sup>57</sup> Nadxa benne' judío ca' gulé'e Jesús:

—Québequeze ne su' chi xun iza, na' ¿dxennáu' blé'enu' Abraham?

<sup>58</sup> Jesús bechebe':

—Da li dxapa' le'e, nédxudauté gate quebe ne sua Abraham, báchequeze zua' neda'.

<sup>59</sup> Nadxa gulequ'é xiaj chee xelu'e Jesús, na' Le' bcache cuine'. Bdeé' ládujla benne' ca', na' bedxúaje' chale'aj xudau', ne bezé'e.

## 9

*Jesús dxexune' tu benne' gúlaje' la chul-la*

<sup>1</sup> Gate gudé Jesús tu lataj, na' blé'ene' tu benne' gúlaje' la chul-la. <sup>2</sup> Benne' ca' dxusede Jesús buluchebe' Le':

—Benne' Wesede, ¿bizr chee na' gulaj benne' nigá la chul-la? ¿Naca na lawe' da belún xra xrne'e dul-la, che lawe' da ben léqueze' dul-la?

<sup>3</sup> Jesús guzre' benne' ca':

—Quebe naca na lawe' da ben le' dul-la, ne quebe naca na lawe' da belún xra xrne'e dul-la. Naca na chee gulé'e lau xel-la' szren chee Dios ne chee benne' nigá. <sup>4</sup> Dxacaté naca te zra

dxal-la' guna' zrin chee Bénnea' nasele-ḷe' neda' lawe' da ba za da chul-la gate netú benne' quebe seque' gune' zrin. <sup>5</sup> Dxácatē ne zua' neda' xēzr la xu nigá, naca' xel-la' naxaní' chee bēnneache.

<sup>6</sup> Ca gudé gunná Jesús da nigá, na' bzre'e zrene' lu xu, ne bene' guna' nen zrene' na', na' btupe' na xiaj lau benne' la chul-la na'. <sup>7</sup> Nadxa guzre' ḷe':

—Guxíaj xejtibe lau' lu beaj nisa nazí le na Siloé. (Dizra' nigá zéajē na: Da Nasel-la Na.)

Benne' la chul-la na' guxíajē' xejtibe lawe', na' gate bezrine' ba dxelé'ene'. <sup>8</sup> Nadxa benne' walízr chee' ca', ne benne' ca' belelé'ene' ḷe' nédxula, naque' la chul-la, gulenné':

—¿Quegá benne' nigá bēnnea' dxebe'e dxenabe' guna'?

<sup>9</sup> Bal-ḷe' gulenné':

—ḷe' na'.

Xebal-ḷe' gulenné':

—Quegá ḷe' na', na' ca'an ca dxenné'e.

Benne' ná'queze gunné':

—Neda' na'.

<sup>10</sup> Nadxa buluchebe' ḷe':

—¿Ájazra na' ba dxelé'enu'?

<sup>11</sup> Bechebe bēnnea':

—Bēnnea' ḷe' Jesús bene' guna', ne btupe' na xiaj lawa', na' gunné': “Guxíaj beaj nisa nazí le na Siloé, xejtibe lau'.” Guxá'a na', na' gate gudiba' lawa', guca ble'eda'.

<sup>12</sup> Nadxa buluchebe' ḷe':

—¿Ga na' zua bēnnea'?

ḷe' guzre' benne' ca':

—Quebe nezda'.

*Benne' fariseo ca' dxuluchebe' bēnnea' guque' la chul-la*

<sup>13</sup> Nadxa benne' ca' guleché'e bēnnea' guque' la chul-la lau benne' fariseo ca'. <sup>14</sup> Naca na zra dxulupá'ana judío ca' gate bej Jesús guna', ne btupe' na xiaj lau benne' la chul-la na'.

<sup>15</sup> Chee ḷe' na' benne' fariseo ca' buluchebe' bēnnea' guque' la chul-la ájazra guca dxelé'ene'. ḷe' guzre' benne' ca':

—Bzriē' guna' xiaj lawa', na' bexiba' na, ne dxelé'eda'.

<sup>16</sup> Nadxa bal-la benne' judío ca' gulenné':

—Bēnnea' bene' da nigá quebe naque' chee Dios lawe' da quebe dxape' ba lá'ana zra dxupá'anadxu.

Na' xebal-ḷe' gulenné':

—¿Ájazra na' dxunē' xel-la' waca zrentē caní che naque' benne' dul-la?

Ca'an guca, gulaca chupa la'a benne' fariseo ca'. <sup>17</sup> Xecha lasa buluchebe' bēnnea' guque' la chul-la:

—¿Bi dxennáu' lue' chee bēnnea' bexunē' lue'?

ḷe' gunné':

—Neda' dxenné'a' naque' benne' dxuchalaje' waláz chee Dios.

<sup>18</sup> Benne' judío ca' quebe guléajle'e guque' la chul-la, ne na'a dxelé'ene', na' gulenné' xra xrna bēnnea' bexaque'. <sup>19</sup> Na' buluchebe' xra xrna bēnnea':

—¿Nácaqueze benne' nigá zrí'inele, dxennale le'e gúlajē' la chul-la? ¿Ájazra na' dxaca dxelé'ene'?

<sup>20</sup> Belexechebe' xra xrne'e:

—Nézentu' benne' nigá naque' zrí'inentu', ne gúlajē' la chul-la. <sup>21</sup> Quebe nézentu' aja guca dxelé'ene' na'a, ne quebe nézentu' nu bexún xiaj lawe'. Le guchebe ḷe'. Ba nápaqueze' iza, ne waca xechébequeze'.

<sup>22</sup> Caní gulenná xra xrne'e lu xel-la' dxelezrebe lawe' da ba zaj nun benne' xíchajē chee judío ca' tuze dizra' xelexebéajē' xu'u na' núteteze benne' xechebe' Jesús naque' Cristo. <sup>23</sup> Chee ḷe' na' gulenná xra xrne'e: “Le guchebe ḷe'. Ba nápaqueze' iza.”

<sup>24</sup> Nadxa benne' judío ca' belenné' bēnnea' guque' la chul-la, na' gulé'e ḷe':

—¡Gunné' da li lau Dios! Nézentu' naca benne' nigá benne' dul-la.

<sup>25</sup> ḷe' bechebe':

—Quebe nezda' che naque' benne' dul-la, che cabí. Tuze da nezda'. Neda' guca' la chul-la, na' na'a dxelé'eda'.

<sup>26</sup> Na' buluchébequeze' ḷe':

—¿Bizra bene' chiú' ? ¿Ájazra bene' chee bexunē' xiaj lau'?

<sup>27</sup> Na' bechebe bēnnea':

—Ba gucha' le'e, ne quebe dxénele chia'. ¿Bizr chee na' dxaca lázrele nnia' xetú? ¿Cá'anqueze le'e dxaca lázrele gácale ḷe' tuze?

<sup>28</sup> Nadxa benne' judío ca' gulenné' schanni' chee' bénnea' guque' la chul-la, dxeleenné':  
—Lue' da'u bénnea', na' netu' da'ntu' Moisés. <sup>29</sup> Netu' nézentu' Dios bchálajlene' Moisés.  
Quebe nézentu' ga benne' benne' nigá.

<sup>30</sup> Nadxa bénnea' bechebe':  
—Da nigá naca na da dxebáneda'. Le'e quebe nézele ga bénnea', na' bexuné' xiaj lawa'.  
<sup>31</sup> Nézquezdxu Dios quebe dxenne' chee' benne' dul-la. Tuze dxenne' chee' benne' ca'  
dxulucá'ana szrené' Le', ne dxelune' ca da dxaca lazre' Le'. <sup>32</sup> Quebe ne xendxu che nu  
benne' xexuné' tu benne' gúlajé' la chul-la. <sup>33</sup> Chela benne' nigá quebe naque' chee' Dios,  
quebe gaca bi guné'.

<sup>34</sup> Nadxa gulé'e le':  
—Ca gúlajquezu' dxulé'e na nabagu' dul-la. Na'a, ¿dxaca lazru' guzėjajni'inu' netu'?  
Nadxa belexebéaje' le' lu xu'u na'.

*Benne' zaj naque' la chul-la lu xichaj lázrdawe'*

<sup>35</sup> Jesús benne' belexebéaje' bénnea' guque' la chul-la, na' gate bezrague' le', guzre' le':

—¿Dxéajle' u lue' chee' Zri'ine Dios?

<sup>36</sup> Benne' na' guzre' Jesús:

—Xran, guzre neda' Nu na', chee' chéajle'a chee'.

<sup>37</sup> Bechebe Jesús:

—Ba blé'eqeznu' Le', Neda', dxuchálajlena' lue' naca' Bénnea'.

<sup>38</sup> Nadxa benne' na' bzu zribe' lau Jesús, na' gunné':

—Dxéajle'a chiu', Xran.

<sup>39</sup> Nadxa gunná Jesús:

—Neda' bla'a lu xezr la xu nigá chee' guchi'a ca da dxelún bénneache, chee' xelexé'e la chul-  
la ca', ne chee' xelexaca ca la chul-la benne' ca' dxeleenné' dxelexé'ene'.

<sup>40</sup> Nadxa bal-la benne' fariseo ca', benne' zaj zre'e nen Jesús, gate belenne' da nigá gunná  
Jesús, buluchébe' Le':

—¿Cá'anqueze netu' nácantu' la chul-la?

<sup>41</sup> Jesús bechebe':

—Chela nácale le'e la chul-la quebe nabágate ca naca dul-la da benle. Dxennale dxelé'ele,  
na' chee' le' na' nabágate dul-la.

## 10

*Dxuchalaj Jesús da dxulé'e na ca naca chee' le'aj chee' zrila' ca'*

<sup>1</sup> Na' gunná Jesús:

—Da li dxapa' le'e, bénnea' quebe dxu'e dxu'a dxa xu'u chee' le'aj chee' zrila' ca', na' dxu'e  
naga xula, naque' gubán, ne tu dxebánqueze'. <sup>2</sup> Bénnea' dxu'e dxu'a dxa xu'u na' naque'  
benne' dxuxúqueze' zrila' ca'. <sup>3</sup> Bénnea' zué' dxu'a dxa xu'u dxesálajé' chee' chu'u bénnea'  
dxuxúqueze'-ba', na' zrila' ca' dxelexúnbeaba' chí'e. Benne' nigá dxu'e la tu tu zrila' ca', ne  
dxebéaje'-ba' lu le'aj cheéba'. <sup>4</sup> Ca dxedé dxebéaje' xúgutéba', na' dxebíá lawé' lauba', na'  
zrila' ca' zjácáleba' Le', lawe' da dxelexúnbeaba' chí'e. <sup>5</sup> Quebe zjácáleba' tu benne' quebe zaj  
núnbeaba'. Dxuluzrúnnyjba' lau benne' na' lawe' da quebe dxelexúnbeaba' chí'i benne' quebe  
zaj núnbeaba'.

<sup>6</sup> Bchálajle Jesús benne' ca' da dxulé'e nigá, na' benne' ca' quebe gulėjajni'ine' bi zéaje da  
guzre Jesús le'.

*Jesús naque' benne' chawe' dxuxúe' zrila' ca'*

<sup>7</sup> Nadxa Jesús guzre' benne' ca' da xula:

—Da li dxapa' le'e, neda' naca' dxa xu'u naga dxelú'u bénneache zaj naque' ca' zrila' chia'  
ca'. <sup>8</sup> Xúguté benne' dxuluxúe' zrila', benne' belelé'e nédxudxa ca neda', gulaque' gubán, ne  
tu gulebánqueze'. Zrila' ca' quebe beléneba' chee' benne' ca'. <sup>9</sup> Neda' naca' dxa xu'u. Bénnea'  
chu'e nę chia' neda', láqueze bénnea'. Gaque' ca tu zrila' dxu'uba', ne dxuajba' le'aj cheéba',  
na' dxezréleba' zriędu dxáguba'.

<sup>10</sup> Benne' gubán ze'e tuze chee' cuane'-ba', ne chee' gútete'-ba, ne chee' guzría xi'te'-ba'.  
Neda' bla'a chee' gápale xel-la' nabán, ne chee' gapa xánnele na. <sup>11</sup> Neda' naca' benne' chawe'  
dxuxú'a zrila' ca'. Benne' chawe' dxuxúe' zrila' ca' dxuzúe' xel-la' nabán chee' chee' guselé'  
zrila' ca'. <sup>12</sup> Benne' dxuxúe'-ba' lawe' da dxezi'e lazruj, gate dxelé'ene' za becu' xi'a, na'  
dxusane' zrila' ca', ne dxuzrúnnyje', lawe' da quebe nácaqueze' benne' dxuxúe' leba', na'  
zrila' ca' quebe zaj nácaba' be cheéqueze'. <sup>13</sup> Benne' nigá dxuzrúnnyje' lawe' da dxunze'  
zrin chee' si'e lázruje', na' quebe dxe'e gunne xue cheéba'.

<sup>14-15</sup> Neda' naca' benne' chawe' dxuxú'a zrila' ca'. Cáteze núnbea Xra' neda', na' neda'  
núnbe'a Xra', cá'anqueze neda' núnbe'a zrila' chia' ca', na' leba' zaj núnbeaba' neda'. Neda'  
dxuxú'a xel-la' nabán chia' chee' guselá' zrila' ca'. <sup>16</sup> Cá'anqueze zaj zra' zrila' chia' quebe

zaj zraba' lu le'aj nigá. Dخال-la' cheajxexri'a-ba'. Zrila' ca' xelunba' ca dxenná xrtizra', ne xelácaba' tu cueze, na' tuze benne' guxúe' leba'.

<sup>17</sup> 'Xra' nazrí'ine' neda' lawe' da dxuzúa' xel-la' nabán chia', na' xecá'a na. <sup>18</sup> Quebe nu seque' cua xel-la' nabán chia'. Neda' xuzú'a' na cáteze dxaca lázrequeza' neda'. Napa' xel-la' dxenná bea guzú'a' na, ne chee xecá'a na. Da nigá naca na da gunná be'e Xra' neda' guna'.

<sup>19</sup> Gate benne' judío ca' belenne' dizra' caní, na' gulaque' chupa la'a xetú. <sup>20</sup> Benne' zan benne' ca' gulenné':

—¿Bizr chee na' dxuzé nágale chee benne' nigá? Xu'e be' xriwe', ne nadá xichaj lázrdawe'.

<sup>21</sup> Xebal-le' gulenné':

—Tu benne' xu'e be' xriwe' quebe séquene' guchálaje' caní. ¿Waca tu be' xriwe' xexún na xiaj lau tu benne' la chul-la'?

*Dxuluzúa benne' judío ca' Jesús chalá'ala*

<sup>22</sup> Naca na beu' zaga, na' lu xezre Jerusalén zaj zue' laní gate dxulusá lazre' ca guca gate gulegú'e xudau' na' lu na' Dios. <sup>23</sup> Jesús dxedé' chale'aj xudau' na' naga naca lachila chee Salomón. <sup>24</sup> Nadxa benne' judío ca' guléchaje' Le', ne gulé'e Le':

—¿Bátalaqueze québedxa gunu' lue' chupa lázrentu'? Che lue' nacu' Cristo, Bénnea' sel-la Dios, gunnátegala.

<sup>25</sup> Bechebe Jesús:

—Ba gucha' le'e, na' quebe guxéajlele chia'. Ca naca da dxuna' neda', ne dxuchíneda' xel-la' dxenná bea chee Xra', dxululé'e na nu naca' neda'. <sup>26</sup> Le'e quebe dxéajlele chia' lawe' da quebe nácale zrila' chia', ca ba gucha' le'e nédxula. <sup>27</sup> Zrila' chia' dxelexúnbeaba' chi'a, na' neda' núnbe'a-ba', na' leba' dxelauba' neda'. <sup>28</sup> Benne' zaj naque' zrila' chia', dxunézruja' chee benne' ca' xel-la' nabán da zeajlí canna, ne cabáta'quezdxa xelebía xi'e, na' quebe nu seque' xecá'a le' lu na'a neda'. <sup>29</sup> Xra' benne' neda' benne' caní, na' Le' nácadxe' szren ca xúgute' bénneache, na' quebe nu seque' xecá'a benne' ca' lu na' Xra'. <sup>30</sup> Neda', ne Xra' tuze nácantu'.

<sup>31</sup> Nadxa benne' judío ca' gulequé'e xiaj xetú chee xelútie' Jesús. <sup>32</sup> Nadxa Jesús guzre' benne' ca':

—Ba bénqueza' da zan da chawe' laule le'e, dxuchíneda' xel-la' waca chee Xra'. ¿Nula chee da chawe' caní güele neda' xiaj?

<sup>33</sup> Belexechebe benne' judío ca':

—Quebe güentu' lue' xiaj lawe' da nunu' da chawe'. Dxuntu' na lawe' da gunnéu' schanni' chee Dios. Lue' nacu' bénneache, na' dxun cuinu' Dios.

<sup>34</sup> Nadxa Jesús guzre' benne' ca':

—Lu da nadxixruj bea chee le'e naxúaj xrtizra' Dios, dxenná na: Le'e nácale dios ca'.

<sup>35</sup> Quebe gaca tábagadxu ca da naxúaj na lu xiche chee Dios, na' Diósqueze' gunné' chee benne' ca' gulezi'e xrtizre' zaj naque' dios ca'. <sup>36</sup> Che Dios bzue' neda', ne gusél-le' neda' lu xezr la xu nigá, ¿bizr chee na' dxennale le'e gunnéa' schanni' chee Dios lawe' da gunnéa' naca' Zri'ine Dios? <sup>37</sup> Che quebe dxuna' ca naca da dxun Xra', quebe chéajlele chia'. <sup>38</sup> Che dxuna' na, lácala quebe dxéajlele chia' ne chee da dxennéa', le chéajle chia' ne chee da ca' dxuna', chee nézele Xra' zúalene' neda', na' neda' zúalena' Xra'.

<sup>39</sup> Xetú lasa gulaca lazre' xelél-le' Jesús, na' Le' gulé' lu na' benne' ca'.

<sup>40</sup> Nadxa bezrín Jesús dxu'a xegu Jordán chalá'a naga dxalaj gubizra, na' begá'ane' na', naga guzúa Juan nédxute dxuchúe' bénneache nisa. <sup>41</sup> Benne' zan xjaque' xejlenné'e Jesús, na' gulenné':

—Juan, da li quebe bi xel-la' waca zren bene', na' xúgute da gunné' ca naca chee benne' nigá naca na da li.

<sup>42</sup> Benne' zan guléajle'e chee Jesús lataj na'.

## 11

*Ca guca gate gute Lázaro*

<sup>1</sup> Zua tu benne' dxé'ene' le' Lázaro, benne' xezre Betania, da naca na lazre María, ne bi bile' le' Marta. <sup>2</sup> María nigá, bi zan Lázaro, benne' dxé'ene' na', naque' nu'ula na' gulu'e ni'a Jesús da na' dxelálé'e zixre, ne bsebizre' na nen xicha xichaje'. <sup>3</sup> Dxúpaté nu'ula caní gulesel-le' benne' xejezre' Jesús:

—Xran, bénnea' nazrí'inu' quebe chawe' zue'.

<sup>4</sup> Ca ben Jesús da nigá, na' gunné':

—Da dxé'ene' quebe naca na da gúteje na le'. Naca na chee gulé'e lau na xel-la' szren chee Dios, ne cá'aqueze chee gulé'e lau na xel-la' szren chia' neda', Zri'ine Dios, ne chee xel-la' we' na'.

<sup>5</sup> Lácala nazrí'i Jesús Marta, ne bi bile', ne Lázaro, <sup>6</sup> gate benne' quebe chawe' zua Lázaro na', begá'ane' naga zue' xechupa zra. <sup>7</sup> Ca gudé na' guzre' benne' ca' dxusédene':

—Le chu'u naga nababa Judea xetú.

<sup>8</sup>Nadxa benne' ca' gulé'e Le':

—Benne' Weséde, ná'asca benne' judío ca' zaj zre'e na' gulaca lazre' xelúti'e Lue' nen xiaj. ¿Dxaca lazru' chéaju' na' xetú?

<sup>9</sup>Jesús guzre' benne' ca':

—¿Quebe nun Dios duté te zra gate dxelún bénneache zrin? Che nu benne' dxedé' te zra, quebe cheajchazie' lu da stebe lawe' da dxelé'ene' xel-la' naxaní' da nuzúa Dios lu xezr la xu nigá. <sup>10</sup>Che nu benne' dxedé' chizrela, dxechégü'e' lawe' da quebe zúale xel-la' naxaní' le'.

<sup>11</sup>Ca gudé na' guzre Jesús benne' ca':

—Benne' ljwézredxu Lázaro ba dxási'e'. Cha'a neda' cheajsebana' le'.

<sup>12</sup>Nadxa benne' ca' gulé'e Jesús:

—Xran, che dxási'e', wexaque'.

<sup>13</sup>Da nigá da gunná Jesús zéaje na ba gute Lázaro. Benne' ca' dxusédené' guléquene' gunná Jesús dxáseze'. <sup>14</sup>Nadxa Jesús bzéajni'ine' benne' ca', gunné':

—Ba gútequeze Lázaro. <sup>15</sup>Dxebeda' lawe' da quebe zua' na'. Caní gácadxa chawe' cheeje le'e, chee chéajlele chia'. Le chu'u cheajnnadxu Lázaro.

<sup>16</sup>Nadxa Tomás, bénnea' léqueze' bilide', guzre' xezícala benne' ca':

—Le chú'uqueze dxi'u chee gátedxu tu zren nen Jesús.

*Jesús naque' benne' dxusebané' benne' gate ca', ne benne' dxunne' dxi'u xel-la' nabán li lazre'*

<sup>17</sup>Gate belezrine' xezre Betania, na' bene Jesús gudapa zra bulucache' Lázaro. <sup>18</sup>Betania dxe na gáguze naga dxe' Jerusalén, ca cadite sadxu tu chí'ida'u'ze zrindxu na', <sup>19</sup>na' benne' zan benne' judío ca' xjaque' xeajlenné' Marta ne María, na' xulunézruje' le' xel-la' zren lazre' lawe' da gute bi zane'. <sup>20</sup>Gate ben Marta ba za' Jesús, na' guzré'e zeajxrígalé' Le', na' María begá'ane' xu'u. <sup>21</sup>Marta guzre' Jesús:

—Xran, chela zu' nigá, quebe gute bi zana'. <sup>22</sup>Neda' nezda' Dios gunne' Lue' bíteteze da nabu'.

<sup>23</sup>Jesús gunné':

—Webán bi zanu'.

<sup>24</sup>Nadxa Marta guzre' Le':

—Nezda' webané' lu zra xelxebán benne' gate ca', zra bzebe na'.

<sup>25</sup>Nadxa gunná Jesús:

—Neda' naca' benne' dxusebané' benne' gate ca', ne benne' dxunne' xel-la' nabán li lazre'. Nu benne' dxéajle'e chia', lácala gati'e, webané', <sup>26</sup>na' xúgute' benne' zaj naca bané', ne dxeléajle'e chia', québequeze xelatie' tu chí'ize. ¿Dxéajle'u da nigá?

<sup>27</sup>Marta guzre' Jesús:

—Awe', Xran. Neda' dxéajle'a nacu' Cristo, Zri'ine Dios, Bénnea' guchebe lazre' Dios sel-le'.

*Jesús dxebezre' lawe' da zaj zua baxache' nu'ula ca'*

<sup>28</sup>Ca gudé gunná Marta da nigá, na' guxíaje' xeajzenné' bi bilé' María, na' guzre' le' zrize: —Ba bla' Benne' dxusede, ne dxenné' lue'.

<sup>29</sup>Ca ben María da nigá, na' guxase' guzé'e, xeajnné'e Jesús. <sup>30</sup>Jesús quebe ne chu'e xezre na', na' zue' naga bezraga Marta Le'. <sup>31</sup>Benne' judío ca' zaj zra' xu'u na' dxulunézruje' María xel-la' zren lazre', gate belelé'ene' guxasa María, ne chadí bdxúaje', na' xjácálé' benne' caní le', dxeléquene' zéaje' dxu'a ba zeajchezre' na'.

<sup>32</sup>Gate bzinr María naga zua Jesús, na' bzu zribe' zran ni'a Jesús, gunné':

—Xran, chela zu' nigá, quebe gute bi zana'.

<sup>33</sup>Gate ble'e Jesús dxebezre María, ne cá'anqueze dxelebezre judío ca', benne' zjácáléne' María, na' bexíajle'e'ne', ne guzú'e' stebe lu lázrdawe'. <sup>34</sup>Na' bchebe' benne' ca':

—¿Ga bcáchele bénnea'?

Na' gulé'e Le':

—Xran, gudá le'enu'.

<sup>35</sup>Na' gudxezre Jesús. <sup>36</sup>Nadxa gulenná benne' judío ca':

—Le nna'xque cáti'te nazrí'ine' le'.

<sup>37</sup>Bal-la benne' ca' gulenné':

—Benne' nigá bexune' benne' la chul-la. La zue' nigá, ¿quebe guzéquene' ájala guné' chee quebe gute Lázaro?

*Jesús dxusebané' Lázaro*

<sup>38</sup>Jesús guzú'e' stebe xetú, na' bzrine' dxu'a ba. Ba na' naca na tu bluaj, na' da' tu xiaj ta'a dxu'e na. <sup>39</sup>Gunná Jesús:

—Le xecá'a xiaj nigá.

Marta, bi zan benne' gate na' guzre' Jesús:

—Xran, ba dxelá bënnea' tula, lawe' da ba guca tapa zra na'a gutië'.

<sup>40</sup> Na' Jesús gunné':

—¿Quebe gucha' lue' che cheájle'u chia', walé'enu' xel-la' szren cheë Dios?

<sup>41</sup> Nadxa belexequé'ë xiaj ta'a na'. Jesús guné'ë xabáa, gunné':

—Xrae, dxapa' Lue': "Xcalenu'" lawe' da ba bennu' chia'. <sup>42</sup> Neda' nezda' tu dxénzquezenu' chia'. Dxennéa' da nigá cheë gaca tu da ba neza cheë benne' caní, cheë xeléajlé'ë chiu' nasel-lu' neda'.

<sup>43</sup> Ca gudé gunné' da nigá, na' gunné' zizraj:

—¡Lázaro, bedxúaj nigá!

<sup>44</sup> Bedxúaj benne' gate na', nadxéaj ni'a ne'ë nen ládxe' dau' da buluchele' ni'a ne'ë, na' lawe' dxela na ladxe'. Jesús guzre' benne' ca':

—Le xesezre', ne le gusanë' xexiáje'.

*Benne' dxeledábague' Jesús dxelune' tuze dizra' xelë-lë' Le'*

(Mt. 26.1-5; Mr. 14.1-2; Lc. 22.1-2)

<sup>45</sup> Nadxa guléajlé benne' zan cheë Jesús, benne' judío ca' xjácalë María, ne belelé'eng' ca da ben Jesús. <sup>46</sup> Bal-la benne' ca' xjaque' xejlechálajlëne' benne' fariseo ca', na' buluzenne' le' ca da ben Jesús. <sup>47</sup> Nadxa fariseo ca', ne benne' xíchajë ca' cheë bxruze ca' belezrague' nen benne' xu'u lawe' blau cheë judío ca', na' gulenné':

—¿Ajazra gundxu? Benne' nigá dxúnle'ë xel-la' waca da za xabáa. <sup>48</sup> Che ca' güedxu Le' lataj, xúgutë bënneache xeleajlé'ë cheë' cheë xuluzúë' Le' ca wenná bea, na' xelélé' benne' Roma ca', benne' zjaque' wedil-la, na' xuluzría xi'ë xudau' cheëdxu, ne xezr la xu cheëdxu.

<sup>49</sup> Nadxa tu benne' le' Caifás, bxruze blau iza na', guzre' benne' ca':

—Le'e québequeze bi nézele, <sup>50</sup> ne quebe dxeque be'ele gácadxa chawe' cheëdxu gate' tuze benne' ne' cheë xezre nigá, ne quegala ca' naca xezr la xu nigá cuia xi na.

<sup>51</sup> (Quegá gunná Caifás da nigá cheézqueze'. Lawe' da naque' bxruze blau iza na', bchálajë' waláz cheë Dios, gunné' gate' Jesús ne' cheë xezr la xu judío. <sup>52</sup> Quegá gatië' tuze ne' cheë xezr la xu naze. Cá'anqueze cheë xutupe' lu na' Dios xúgutë benne' zaj naque' cheë Dios, benne' zaj nase dínnajë', benne' ca' zaj nababe' xúgutë cue' xezr la xu.) <sup>53</sup> Ca'an guca, ca lu zra na'të benne' judío wenná bea ca' belune' tuze dizra' xelútië' Jesús.

<sup>54</sup> Cheë lë na' Jesús québedxa gudé' naga zaj zra' benne' wenná bea ca' cheë judío ca', na' guzë'ë naga nababa Judea, na' guxiájë' xezre Efraín naga zua gáguze tu lë'ë xixre' lawe' lataj. Begá'ane' xezre na' nen benne' ca' dxusédenë'.

<sup>55</sup> Ba zua gáguze zrin Laní Pascua cheë judío ca', na' benne' zan cheë xezre ca' xjaque' Jerusalén cheë xulucá'ana chawe' cuine' nédxudxa ca zrin Laní Pascua. <sup>56</sup> Guledé' dx-elëxilajë' Jesús, na' gate zaj zre'ë chale'aj xudau' na', buluchëbe ljwezre':

—¿Ajazra dxéquele? ¿Wide' laní, che quebe xidë'?

<sup>57</sup> Benne' fariseo ca', ne benne' xíchajë ca' cheë bxruze ca' ba gulebéajë' dizra' che nu benne' ca' nézene' ga zua Jesús, na' xelé'ë benne' ca' cheë gaca xelë-lë' Le'.

## 12

*María dxugu'ë da dxelá xixre ni'a Jesús*

(Mt. 26.6-13; Mr. 14.3-9)

<sup>1</sup> Xrupa zra nédxudxa gate za chu'u Laní Pascua cheë judío ca', guxiáj Jesús xezre Betania naga zua Lázaro, bënnea' bsebán Jesús ládujla benne' gate'. <sup>2</sup> Lu xezre na' belune' tu xrche', cheë gulapë' ba lá'ana Jesús. Marta bdeë' xel-la' wagu, na' Lázaro dxé'lëne' benne' ca' dxelágulëne' Jesús. <sup>3</sup> Nadxa María guqué'ë tu xia da za da dxelále'ë xixre, da naca na cheë dusén lase, da zácalë'ë na, na' gulu'ë da za na' ni'a Jesús, ne bsebize' na nen xicha xíchajë'. Ca naca benne' zaj zra' xu'u na' gulelé'ëne' ca dxelá da xixre na'. <sup>4</sup> Nadxa Judas Iscariote, zri'ine Simón, tu benne' ca' dxuséde Jesús, ne naque' bënnea' gudéë' Jesús lu na' benne' guledábague' Le', gunné':

<sup>5</sup> —¿Bizr cheë na' quebe gudá'u da xixre na', na' sidxu na dumí lazruj cheë chunna gaxúa zra cheë gácalëdxu benne' xache' ca'?

<sup>6</sup> Quebe gunná Judas da nigá lawe' da dxe'ë gunne xue cheë benne' xache' ca'. Naque' gubán, ne nu'ë bzude dumí cheë benne' ca' dxuséde Jesús, ne dxebane' late' weaj dumí na' da dxuluzré'ë lu bzude na'. <sup>7</sup> Nadxa Jesús guzre' Judas na':

—Bë lataj nu'ula nigá lawe' da bene' da nigá cheë dxucá'ana chawe' neda' cheë gate xulucache' neda' lu xëdxu ba. <sup>8</sup> Benne' xache' ca' tu zrázqueze' ládujla le'e. Neda' quebe tu súazqueza' nen le'e.



*Dxelunę tuze dizra' xelútię Łázaro*

<sup>9</sup> Zane' benne' judío ca' belenne' zua Jesús xęzre Betania, na' xjaque' na', quegá tuze zeajlennę'e Jesús. Cá'anqueze zeajlennę'e Łázaro, bęnnea' bsebán Jesús ládujla benne' gate ca'. <sup>10</sup> Nadxa benne' xíchaję ca' cheę bxruze ca' belunę tuze dizra' cá'anqueze xelútię Łázaro, <sup>11</sup> lawe' da nę cheę Łázaro benne' zan benne' judío ca' dxelebéaj xíchaję' bxruze ca' cheę xeajlę'e cheę Jesús.

*Dxexú'u Jesús Jerusalén*

(Mt. 21.1-11; Mr. 11.1-11; Lc. 19.28-40)

<sup>12</sup> Benne' zan ba zjaca Jerusalén, zjaque' Laní Pascua na', na' zra xula belenne' ba za' Jesús lu xęzre na'. <sup>13</sup> Nadxa gulechugue' zina', na' xjaque' xeajlexrigalę' Jesús, ne dxeleńnę' zizraj: —jGaca ba lá'azxa Dios! jBa neza zrentę naca na cheę Benne' ze'ę waláz cheę Xránadxu Dios! jBa neza zrentę naca na cheę Wenná Bea cheę xęzre Israel!

<sup>14</sup> Jesús xeajxraque' tu burro, na' guzrię'-ba', ca naxúaj na lu xiche cheę Dios, dxenná na: <sup>15</sup> Quebe zrębele le'e, benne' zre'ę xęzre Sión.

Le nna'xque, ba za' Wenná Bea cheęle.

Zrię' tu burro.

<sup>16</sup> Nędxutę benne' ca' dxusede Jesús quebe gulęajni'ing' da na' dxaca na. Ca gudę na', gate begá'ana szren Jesús lau Dios, na' xeajlesá lazre' xúgutę da caní zaj naxúaj na lu xiche cheę Dios ca naca cheę Jesús, na' ca'an guca cheę'.

<sup>17</sup> Benne' ca' zaj zre'ę nen Jesús gate gunńę' Łázaro lu xędxu ba, ne bsebane' le' ládujla benne' gate, buluzenne' bęnneache Jerusalén ca da guca na'. <sup>18</sup> Cheę le' na' benne' caní xeajlexrigalę' Jesús lawe' da belenne' ca naca xel-la' waca zrentę da bęnę'. <sup>19</sup> Nadxa benne' fariseo ca' gulę ljwezre':

—Ba dxelę'ele quebe séquedxu bi gundxu. Ca naca bęnneache dxelunę' Le' tuze.

*Dxelexilaj benne' griego ca' Jesús*

<sup>20</sup> Zaj zra' bal-la benne' griego ca' ládujla benne' ca' belezrine' Jerusalén cheę xulucá'ana szrene' Dios lu laní na'. <sup>21</sup> Benne' caní belezrine' lau Felipe, benne' Betsaida cheę ga nababa Galilea, ne naque' Jesús tuze, na' gulata' xuene' le', dxeleńnę':

—Benne', dxaca lázrentu' le'entu' Jesús.

<sup>22</sup> Felipe guxiąję' xeajezre' Andrés caní, na' xjaca dxupe' xeajleguezre' Jesús ca'. <sup>23</sup> Nadxa Jesús guzre' benne' dxupa ca':

—Ba bzrin zra xegá'ana szrena' neda', Benne' Gulję' Bęnneache. <sup>24</sup> Da li dxapa' le'e, tu binne zrua' xtla wegá'ana na tuze na che quebe xexrui na lu xu, ne gacu na xu. Che gacu na xu, na' gunna na lina. Caní dxal-la' gaca chia' neda'. <sup>25</sup> Benne' dxe'ę gunne xue gapa chí'ę xel-la' nabán cheę' gunitię' na. Bęnnea' dxuzúę' chalá'ala xel-la' nabán cheę' lu xęzr la xu nigá, gapa chí'ę na, ne zrué'ene' xel-la' nabán da zeajli canna. <sup>26</sup> Che nu benne' dxaca lazre' gunę' zrin chia', dxal-la' gaque' neda' tuze, na' gátetęze sua' neda', na' súaqueze benne' dxunę' zrin chia'. Che nu benne' dxunę' zrin chia', Xra' gape' le' ba lá'ana.

*Jesús dxuchálaję' ca gaca gate gatię'*

<sup>27</sup> Gunná Jesús:

—Na'a stębele'ę zua'. jBizra nńia'? jNńia': Xrae, bselá neda' lu da dxal-la' gaca chia' na'a? Belájqueza' cheę gaca chia' da caní. <sup>28</sup> Xrae, bca'ana szren lau'.

Nadxa ben tu chí'i benne' dxennę' xabáa:

—Ba bca'ana szrena' na, ne gucá'ana szrena' na xetú.

<sup>29</sup> Benne' ca' zre'ę na' dxelenńę' gulennę' guziu' gunńę. Xebal-le' gulennę':

—Tu gubáz cheę xabáa bchálajlene' Le'.

<sup>30</sup> Nadxa Jesús guzre' benne' ca':

—Quegá gunńę chí'ę na' nę chia' neda'. Gunnę na nę cheęle le'e. <sup>31</sup> Na'a ba bzrin zra guchi'a Dios cheę bęnneache zre'ę xęzr la xu nigá, na' na'a cueaj Dios chalá'ala da xriwe', da na' dxenná bea na lu xęzr la xu nigá, cheę quębedxa nna bea na. <sup>32</sup> Gate xelechisę' neda' lu xęzr la xu nigá le'ę xaga bęguaj, na' neda' nńia' xúgutę bęnneache cheę xelaque' neda' tuze.

<sup>33</sup> Nadxa benne' caní, ble'e Jesús ca gatię'. <sup>34</sup> Nadxa benne' zan ca' gulę'ę Jesús:

—Netu' bęnentu' ca da naxúaj na lu xiche cheę da nadxixrui bea na da dxenná na waca bńnqueze Cristo chadıa chacanna. jBizr cheę na' dxennáu' Benne' Gulję' Bęnneache xelechisę' Le'? jNuzra na' Benne' Gulję' Bęnneache?

<sup>35</sup> Nadxa Jesús guzre' benne' ca':

—Xetú chí'idauze xel-la' naxanı' sua na ládujla le'e. Le ta na'a dxácate ne zua xel-la' naxanı' nen le'e, cheę quebe xrńnele, lawe' da benne' dxedę' lu da chul-la quebe nęzene' ga zęaję'. <sup>36</sup> Le cheajlę cheę xel-la' naxanı' da naca' neda' dxácate zua xel-la' naxanı' nen le'e, cheę gácale tuze xel-la' naxanı' na'.

Ca gudé gunná Jesús da nigá, na' bezé'ē bcache cuine' lau benne' ca'.

*Benne' judío ca' quebe dxeajlé'ē chee Jesús*

<sup>37</sup> Lácala blé'e Jesús zane' xel-la' waca zrente lau benne' judío ca', quegá xúgute' guleajlé'ē chee', <sup>38</sup> lawe' da ben na ba xen guca ca da gunná Isaías, benne' bchálaje' waláz chee Dios, gunné':

Xran, ¿nuzra guxeajlé'ē chee dizra' cheedxu?

¿Nuzra na' blé'e Xránadxu xel-la' waca chee'?

<sup>39</sup> Ca'an guca, quebe guca xeleajlé'ē chee' lawe' da caní gunnáqueze Isaías na':

<sup>40</sup> Dios bene' benne' ca' la chul-la, ne bene' zide' lázrdawe',

chee quebe xelélé'ē'ē nen xiaj lawe',

ne quebe xeléajni'ine' lu xichaj lázrdawe',

ne quebe xelélé'ē lawa' neda' chee xexuna' le'.

<sup>41</sup> Isaías na' gunné' da nigá lawe' da blé'ē'ē xel-la' szren chee Jesús, ne bchálaje' ca naca chee'.

<sup>42</sup> Zane' benne' judío ca' guléajlé'ē chee Jesús, ne cá'anqueze bal-la benne' xíchaje' ca'. Quebe belexechebe' lówela bēnneache lawe' da belezrebe' da xelún benne' fariseo ca', chee quebe xelxebéajé' le' xu'u naga dxelezrague'. <sup>43</sup> Caní beluné' lawe' da beledánedxene' xel-la' ba lá'ana da dxelúe bēnneache le' ca xel-la' ba lá'ana da dxue Dios le'.

*Dizra' chee Jesús guchi'a na chee da dxelún bēnneache*

<sup>44</sup> Jesús gunné' zizraj:

—Benne' dxéajlé'ē chia', quegá cheeza' dxéajlé'ē, cá'anqueze dxéajlé'ē chee Xra' nasel-le' neda'. <sup>45</sup> Bēnnea' dxelélé'ē'ē neda', dxelélé'equezne' Xra' nasel-le' neda'. <sup>46</sup> Neda', xel-la' naxaní', bla'a lu xezr la xu nigá chee quēbedxa xelxegá'ana benne' dxeléajlé'ē chia' lu da chul-la.

<sup>47</sup> Che nu benne' dxenne' dizra' chia', ne quebe dxune' ca naca na, quegá neda' guzría xi'a le', lawe' da quebe bla'a neda' chee guzría xi'a bēnneache. Bla'a chee guselá' benne' ca'.

<sup>48</sup> Benne' dxuzúe' neda' chalá'ala, ne quebe dxune' ca naca dizra' chia', ba zua da guzría xi na le'. Dizra' da ba gunnéa' naca na da guzría xi na bēnnea' lu zra bzebe na'. <sup>49</sup> Caní gaca na lawe' da quebe dxuchálaja' cheézqueza', lawe' da Xra' nasel-le' neda' ba gunná bé'ē'ē'ē neda' bi dxal-la' nnia', ne bi dxal-la' gusededa'. <sup>50</sup> Neda' nezda' gunná be'e Xra' neda' caní chee xelezeque bēnneache xelape' xel-la' nabán da zeajlí canna. Ca'an naca, da dxennéa' neda', dxennéa' na ca gunná be'e Xra' neda'.

## 13

*Jesús dxibe' ni'a benne' ca' dxusédene'*

<sup>1</sup> Naca na zra nedxu gate za chu'u Laní Pascua chee judío ca'. Jesús ba nézene' ba bzin zra xezé'ē lu xezr la xu nigá chee xexíajé' naga zua Xre'. Nazrí'iquezne' benne' zaj naca chee', benne' zaj zre'ē xezr la xu, na' na'a ba zua gulé'ē'ē'ē benne' ca' tu da zrendxa da gulé'ē na nazrí'ine' le'.

<sup>2-4</sup> Da xriwe' ba nagú'u na xichaj lázxdau Judas Iscariote, zri'ine Simón, ca dxal-la' gune' chee gudé'ē Jesús lu na' benne' guledábage' Le'. Nézqueze Jesús ze'ē naga zua Dios, ne dxal-la' xezrine' naga zua Dios, na' Xre' ba bnézruje' Le' duté xel-la' dxenná bea. Chee le' na', gate dxelawe' xrche', guxasa Jesús, na' gudúe' ladxe' naxrúa cuzre', ne bnase' tu ladxe' dxu'a le'ē.

<sup>5</sup> Nadxa gudé'ē nisa tu zriga xia zren, ne guzú lawe' dxibe' ni'a benne' ca' dxusédene', na' bsebizre' ni'ē nen ladxe' na' da nunase' dxu'a le'ē.

<sup>6</sup> Ca bzrine' chee quibe' ni'a Simón Pedro, le' guzre' Jesús:

—Xran, ¿Lue' quíbequezu' ni'a?

<sup>7</sup> Jesús bechebe':

—Na'a quebe dxéajni'inu' da dxuna'. Te na'a chéajni'inu' na.

<sup>8</sup> Pedro guzre' Le':

—Cabata' quibu' ni'a.

Jesús guzre' le':

—Che quebe quiba' ni'u, quebe gaca gacu' neda' tuze.

<sup>9</sup> Na' Simón Pedro guzre' Jesús:

—Xran, quegá tuze ni'a quibu'. Cá'anqueze na'a, ne xíchaja'.

<sup>10</sup> Jesús guzre' le':

—Benne' ba bexuzrte' guzje', tuze ni'ē dxal-la' chadxé lawe' da ba naxádxéqueze'. Le'e ba naxádxéle, san quegá xúgutele.

<sup>11</sup> Gunná Jesús: “Quegá xúgutele”, lawe' da nézene' nu na' gudé'ē Le' lu na' benne' dxeledábage' Le'.

<sup>12</sup> Ca gudé gudibe Jesús ni'a benne' ca', na' bexrúe' ladxe' chee' cuzre', ne bebe'ē ga dxelawe', na' guzre' benne' ca':

—¿Dxéajni'ile le'e da ba bēna'? <sup>13</sup> Le'e dxēle neda': Benne' Wesēde, ne: Xran, na' caní dxal-la' nnaale lawe' da caní naca'. <sup>14</sup> Che neda', Benne' Wesēde cheele, ne Xránale, ba gudiba' ní'ale, cá'anqueze le'e dxal-la' quíbele ní'a l'jwézrele tule xetule. <sup>15</sup> Neda' ba ble'eda' le'e tu da dxulé'e na, cheē gunle le'e ca da bēna' neda'. <sup>16</sup> Da li dxapa' le'e, tu benne' wēn zrin quebe nácadxé' szren ca xrané', na' tu benne' gubáz quebe nácadxé' szren ca benne' nasel-lé' lé'. <sup>17</sup> Che dxéajni'ile da caní, ne dxunle ca zaj naca na, gaca cheēle tu da ba neza.

<sup>18</sup> 'Quebe dxuchálaja' cheē xúgutele le'e. Neda' núnbe'a benne' ca' gucá'a, san dxal-la' gaca ca naxúaj na lu xiche cheē Dios, dxenná na: Benne' dxágule neda' ba gudábague' neda' cheē gudé' neda'. <sup>19</sup> Dxapa' le'e da nigá na'a, nédxula gate quebe ne gaca na, cheē gate gaca na, na' chéajlele le'e zúaqueza' neda'. <sup>20</sup> Da li dxapa' le'e: Benne' dxezi' lu ne'ē Bēneea' dxusel-lé' neda', neda' na' dxezi' lu ne'ē, na' benne' dxezi' lu ne'ē neda', dxezi' lu ne'ē Xra' nasel-lé' neda'.

*Dxenná Jesús gudé Judas Lē' lu na' benne' dxeledábague' Lē'*

(Mt. 26.20-25; Mr. 14.17-21; Lc. 22.21-23)

<sup>21</sup> Ca gudé gunná Jesús da nigá, na' guzúé' stēbe lu xichaj lázrdawe', na' bzéajni'ine' benne' ca', gunné':

—Da li dxapa' le'e, tu benne' ládujla le'e gudé' neda' lu na' benne' ca' dxeledábague' neda'.

<sup>22</sup> Nadxa benne' ca' dxusede Jesús gulezú lawé' dxelenná' l'jwezre', ne quebe zaj nézeng' nu cheē na' dxuchalaj Jesús. <sup>23</sup> Tu benne' ca' dxusede Jesús, bēneea' nazrí'ile' Jesús lé', zue' cuita Jesús naga dxelawé' xrche', <sup>24</sup> na' Simón Pedro bēne' tu da dxunna bea lau bēneea' cheē guchebe' Jesús nu cheē na' dxenné' caní. <sup>25</sup> Nadxa bēneea' de'ē cuita Jesús bchebe' Lē':

—Xran, ¿nuzra na'?

<sup>26</sup> Bechebe Jesús:

—Gusebisa' late' xeta xtila, na' bēneea' gunézruja' na, benne' ná'queze'.

Nadxa Jesús bsebisé' late' xeta xtila, na' bnézruje' na cheē Judas Iscariote, zri'ine Simón.

<sup>27</sup> Ca gucá'a Judas xeta xtila na', na' da xriwe' guxú'tutē na lu xichaj lázrdawe'. Nadxa Jesús guzre' lé':

—Da dxal-la' gunu', bēntega na.

<sup>28</sup> Benne' ca' zaj zre'ē dxelawé' na' quebe guléajni'ine' bizr cheē na' guzre' Judas na' caní.

<sup>29</sup> Lawe' da nua Judas bzude' dumí, bal-lé' guléquene' Jesús guzre' lé' bi si'ē cheē laní na', u bi gunézruje' benne' xache' ca'. <sup>30</sup> Ca gudé gudagu Judas xeta xtila na', na' bdxúaje'. Ba guxrinne.

*Da nadxiruj bea cube*

<sup>31</sup> Ca gudé bdxuaj Judas, gunná Jesús:

—Na'a gulé'e lau xel-la' szren chia' neda', Benne' Gulje' Bēneache, na' xegá'ana szren Dios ne chia' neda'. <sup>32</sup> Che neda', Benne' Gulje' Bēneache, dxulé'eda' ca naca xel-la' szren cheē Dios, na' Dios gulé'ene' ca naca xel-la' szren chia' neda', ne la gúntequeze' na. <sup>33</sup> Le'e, bidu chia' ca', québedxa sua' scha' nen le'e. Le'e wexílajle neda', san ca gucha' benne' judío ca', dxapa' le'e na'a, quebe gaca sa'le le'e naga cha'a neda'. <sup>34</sup> Tu da cube dxixruj be'eda' le'e. Le zri'i le sa' l'jwézrele tule xetule ca neda' nazrí'ida' le'e. Caní dxal-la' zri'i l'jwézrele tule xetule. <sup>35</sup> Che nazrí'i l'jwézrele tule xetule, na' xúgute' bēneache xequebe bé'eng' nácale neda' tuze.

*Jesús dxenné' nna Pedro quebe núnbe'ē Lē'*

(Mt. 26.31-35; Mr. 14.27-31; Lc. 22.31-34)

<sup>36</sup> Simón Pedro bchebe' Jesús:

—Xran, ¿gazra chéaju'?

Bechebe Jesús:

—Naga cha'a neda', quebe gaca sá'lēnu' neda' na'a. Te na'a wadéquezu' naga tea' neda'.

<sup>37</sup> Nadxa gunná Pedro:

—Xran, ¿bizr cheē na' quebe gaca sá'lēna' Lue' na'a? Zúaqueza' guzú'a' xel-la' nabán chia' cheē guna' Lue' tuze.

<sup>38</sup> Jesús bechebe':

—¿Zúaquezu' guzú' xel-la' nabán chiu' cheē gacu' neda' tuze? Da li dxapa' lue', nédxudxa ca cuezre xjeaj, lue' wannáquezu' chunna lasa quebe núnbe'u neda'.

## 14

*Jesús naque' neza da dxezrín na naga zua Xradxu Dios*

<sup>1</sup> Gunná Jesús:

—Quebe cuele le'e gunne xue. Le guxrén lazre' Dios, ne le guxrén lazre' neda'. <sup>2</sup> Lizre Xra' déle'ē lataj naga súale. Chela quebe naca na caní, neda' ba gucha' le'e. Wexá'a cheajxecueza' lataj cheele. <sup>3</sup> Ca te xexá'a cheajxecueza' lataj cheele, na' wexelájqueza' xetú

chee xedajxezri'a le'e súalele neda', chee súale le'e naga súaqueza' neda'. <sup>4</sup> Le'e nézele naga cha'a, ne núnbeale neza na'.

<sup>5</sup> Tomás guzre' Jesús:

—Xran, quebe nézentu' ga chéaju'. ¿Ájazra guntu' gúnbeantu' neza na'?

<sup>6</sup> Jesús bechebe':

—Neda' naca' neza na', ne naca' da li, ne naca' xel-la' nabán. Tuze ne chia' neda' waca zrinle naga zua Xra'. <sup>7</sup> Chela núnbeale neda', cá'anqueze núnbeale Xra'. Ná'atela núnbeale Le' lawe' da ba dxelé'ele Le'.

<sup>8</sup> Nadxa Felipe guzre' Jesús:

—Xran, ble'e netu' Xrau', xetú da ná'teze.

<sup>9</sup> Bechebe Jesús:

—Felipe, scha' ba guzálena' le'e, na' ¿quebe ne gúnbe'u neda'? Benne' dxelé'ene' neda', dxelé'equezene' Xra'. Chee le na', ¿bizr chee na' dxenabu' neda' gulé'eda' le'e Xra'? <sup>10</sup> ¿Quebe dxéajle'u zúalena' Xra', na' Xra' zúalene' neda'? Da dxapa' le'e, quegá dxennéa' na cheézqueza'. Xra', Bénnea' zúalene' neda', Léqueze' na' dxune' zrin chee' lu na'a neda'. <sup>11</sup> Le chéajlele zúalena' Xra', na' Xra' zúalene' neda', u che cabí dxéajlele ca da dxennéa', le chéajle chia' ne chee da ca' dxuna'. <sup>12</sup> Da li dxapa' le'e, benne' dxéajle'e chia', gúnqueze' ca da dxuna' neda', na' gune' da zaj nácadxa zren ca da caní dxuna' lawe' da xexá'a neda' naga zua Xra'. <sup>13</sup> Xúgute da nábele le'e lu La' neda', neda' guna' na, chee gulé'eda' neda' xel-la' szren chee Xra'. <sup>14</sup> Neda'queza' guna' bíteteze da nábele lu La' neda'.

*Jesús dxechebe lazre' sel-le' Be' Lá'azxa*

<sup>15</sup> Gunná Jesús:

—Che le'e nazrí'ile neda', le guzúa dizra' ca naca da dxixruj be'eda' le'e. <sup>16</sup> Neda' gata' xueda' Xra' sel-le' cheele xetú Benne' gácalequeze' le'e, ne súaletechee' le'e. <sup>17</sup> Benne' nigá naque' Be' Lá'azxa gulé'ene' le'e ca naca da li. Benne' zaj naca chee xezr la xu nigá quebe xelexé'quene' xelexí' lu ne'e Le' lawe' da quebe gaca xelexé'ene' Le', ne quebe zaj núnbe'e Le'. Le'e núnbeale Le' lawe' da zúalene' le'e, ne súaqueze' lu xichaj lázrdaule. <sup>18</sup> Quebe gucá'ana' le'e ca bi wezebe ca'. Welá'queza' súalena' le'e. <sup>19</sup> Xetú chí'idau' bénneache ca' québedxa xelexé'ene' neda', san le'e welé'ele neda'. Le'e tu gaca bánzquezele lawe' da tu naca bánzqueza' neda'. <sup>20</sup> Lu zra na' guéquebe'ele neda' zúalena' Xra', na' le'e zúalele neda', na' neda' zúalena' le'e. <sup>21</sup> Benne' nézene' ca naca da nadxixruj bea na nuna' neda', ne dxune' na, dxulé'ene' nazrí'iqueze' neda'. Xra' zrí'ine' benne' nazrí'ine' neda', na' cá'anqueze neda' zrí'ida' bénnea', ne gulé'e lawa' le'.

<sup>22</sup> Judas, quegá bénnea' le' Iscariote, guzre' Jesús:

—Xran, ¿bizr chee na' gulé'e lau' netu', ne quegá gulé'e lau' lau bénneache zaj zre'e xezr la xu nigá?

<sup>23</sup> Jesús bechebe':

—Benne' nazrí'ine' neda' dxune' ca naca da dxennéa', na' Xra' zrí'ine' bénnea', na' neda' ne Xra' xedajsúalentu' le'. <sup>24</sup> Benne' quebe nazrí'ine' neda' quebe dxune' ca da dxennéa'. Ca naca dizra' da dxénele quebe zaj naca na cheézqueza'. Zaj naca na chee Xra' nasel-le' neda'.

<sup>25</sup> 'Dxapa' le'e xúgute da caní dxácaté ne zúalena' le'e, <sup>26</sup> na' Be' Lá'azxa, Bénnea' sel-la Xra' lu La' neda' chee gácalene' le'e, Le' gulé'ene' le'e xúgute, ne gusá'queze' lázrele ca naca xúgute da ba gucha' le'e.

<sup>27</sup> 'Xel-la' dxebeza zri lazre' dxuca'ana' cheele. Dxunna' le'e xel-la' dxebeza zri lazre' chia'. Quebe dxunna' na ca dxelunna bénneache xel-la' dxebeza zri lazre'. Quebe cuele gunne xue, ne quebe zrébele. <sup>28</sup> Ba bénele gunnéa' wexá'a, ne welá'a súalena' le'e xetú. Chela da li nazrí'ile neda', suale xel-la' dxebe, lawe' da xexá'a naga zua Xra', na' nácadxa Le' szren ca neda'. <sup>29</sup> Da nigá dxapa' le'e na'a nédxula gate quebe ne gaca na, chee gate gaca na, na' chéajlele chee da dxennéa'.

<sup>30</sup> 'Québedxa guchálajleca' le'e da zren lawe' da ba za' da xriwe', da na' dxenná bea na lu xezr la xu nigá. Da na' quebe seque na bi gune na neda'. <sup>31</sup> Caní dxal-la' gaca chee xeleneze bénneache neda' nazrí'ida' Xra', ne dxuna' ca da gunná bé'ene' neda'. ¡Le chasa! ¡Le xebú'u nigá!

## 15

*Jesús dxuchálaje' chee lba uva ne chee zruze na ca'*

<sup>1</sup> Gunná Jesús:

—Neda' naca' ca tu lba uva da naca na li lazre', na' Xra' naque' ca tu benne' dxá'ang' na. <sup>2</sup> Le' dxechugue' zruze na ca' da quebe dxelebia na da zixre, ne dxun chí'e zruze na ca' da dxelebia na da zixre chee xelexiádx na. <sup>3</sup> Le'e nácale ca zruze na ca' da ba nun chí'e, ne chee dizra' da ba gucha' le'e. <sup>4</sup> Le súaqueze gácale neda' tuze ca neda' tu zúalezqueza' le'e. Tu

zruze xaga quebe gaca cuía na da zixre cheézqueze na che quebe súlequeze na xaga na'. Cá'anqueze le'e quebe bi gaca gunle che quebe tu gácazquezle neda' tuze.

<sup>5</sup> 'Neda' naca' bzirgu lba uva, na' le'e nácale zruze na ca'. Bénnea' naque' neda' tuze, na' neda' naca' le' tuze, naque' ca tu zruze na da dxebialé'e na da zixre, lawe' da quebe bi seque' gunle che quebe gácale neda' tuze. <sup>6</sup> Benne' quebe súatequeze' nen neda' gaque' ca tu zruze na da dxugu na, na' bizre na. Xuluxutupe' zruze na bizre ca', ne xuluzré'e na lu xi'.

<sup>7</sup> 'Che le'e súatequezle neda' tuze, ne quebe gusanle dizra' chia', waca nácale ca da dxaca lázrele, na' sile na. <sup>8</sup> Xra' dxegá'ana szrene' gate nácale ca zruze na ca' da dxebialé'e na da zixre, ne caní gaca bea na nácale neda' tuze. <sup>9</sup> Neda' nazrí'ida' le'e ca nazrí'i Xra' neda'. Chee le' na' le' súaquezle lu xel-la' zri'i lazre' chia'. <sup>10</sup> Che gunle ca da dxixruj be'eda' le'e, na' súatequezle lu xel-la' zri'i lazre' chia', ca dxuna' neda', dxuna' ca bdxixruj be'e Xra' neda', ne zúatequeza' lu xel-la' zri'i lazre' chee'.

<sup>11</sup> 'Neda' dxuchálajlena' le'e caní chee' súale lu xel-la' dxebé chia', ne chee' gaca du lazre' xel-la' dxebé cheele. <sup>12</sup> Cani naca da dxixruj be'eda' le'e: Le zri'i le sa' ljwézrele tule xetule ca neda' nazrí'ida' le'e. <sup>13</sup> Xel-la' zri'i lazre' da naca szrendxa naca bea na che tu benne' guzúe' xel-la' nabán chee' chee' gácalene' bi ljwezre' ca'. <sup>14</sup> Le'e nácale bi ljwezra' che dxunle ca da dxixruj be'eda' le'e. <sup>15</sup> Québedxa xapa' le'e nácale bi wen zrin chia' lawe' da quebe neze bi wen zrin bi da gun xránabe'. Dxapa' le'e nácale bi ljwezra' lawe' da ba bzenda' le'e xúgute' da guzre Xra' neda'. <sup>16</sup> Le'e quebe gunnéle neda'. Neda' gunnéa' le'e, ne ba nuzúa' le'e chee' gácale ca zruze lba na' da dxebialé'e na da zixre, na' tu súazqueze da zixre na'. Che gunle caní, na' Xra' gunne' le'e xúgute' da nácale lu La' neda'. <sup>17</sup> Da nigá naca na da dxixruj be'eda' le'e: Le zri'i le sa' ljwézrele tule xetule.

*Bénneache chee' xezr la xu nigá dxelecuídenē' Jesús, ne cá'anqueze benne' chee' ca'*

<sup>18</sup> Nadxa gunná Jesús:

—Che bénneache dxelecuídenē' le'e, dxal-la' cheajsá lázrele belecuídequeze' neda' nédxute. <sup>19</sup> Chela nácale le'e chee' xezr la xu nigá, na' xelezrí'i bénneache le'e ca zaj nazrí'ine' le sa' ljwezre' ca'. Neda' ba gucá'a le'e ládujla bénneache chee' xezr la xu nigá, na' chee' le na' dxelecuíde bénneache le'e lawe' da québedxa nácale xezr la xu nigá tuze. <sup>20</sup> Le gusá lázrele da gucha' le'e, gunnéa': Netú benne' wen zrin quebe nácadxe' szren ca xrane'. Che guláu zi' xuzre' neda', cá'anqueze xelau zi' xuzre' le'e, na' che belune' ca dxenná dizra' chia', cá'anqueze xelune' ca dxenná dizra' cheele le'e. <sup>21</sup> Xúgute' da caní xelune' cheele lawe' da nácale chia', ne lawe' da quebe zaj númbe'e Xra' nasele' neda'.

<sup>22</sup> 'Chela quebe bla'a neda', ne bchálajlena' benne' ca', quebe bi dul-la zaj nabague'. Na'a zaj nabágaqueze' dul-la <sup>23</sup> lawe' da nu benne' dxecuídenē' neda', cá'anqueze dxecuídenē' Xra'. <sup>24</sup> Chela quebe bēna' neda' xel-la' waca zren ca' lálwela benne' ca' ca da netú benne' quebe ne gunē', na' quebe bi dul-la xelebáguē'. Lácala ba belelé'eng' da ca', dxelecuídenē' neda', ne dxelecuídenē' Xra'. <sup>25</sup> Da nigá dxaca na chee' gaca li ca naxúaj na lu da nadxixruj bea na da zjácále benne' ca'. Dxenná na: Belecuídenē' neda' ne quebe bi da calela bēna' chee' benne' ca'.

<sup>26</sup> 'Gate xida Bénnea' gácalene' le'e, Bénnea' naque' Be' Lá'azxa, ne dxulé'eng' da li, Bénnea' sel-la' neda' waláz chee' Xra', Léqueze' xechebe' ca naca chia' neda'. <sup>27</sup> Cá'anqueze le'e wechēbequezle ca naca chia' neda' lawe' da zúalele neda' nédxudaute.

## 16

<sup>1</sup> Gunná Jesús:

—Dxapa' le'e da caní chee' quebe gusanle lázrele da naca chia'. <sup>2</sup> Welxebéajē' le'e lu xu'u naga dxelezrague', na' zrin zra gate núteteze benne' gutiē' le'e guéquene' gunē' zrin chee' Dios. <sup>3</sup> Caní xelune' lawe' da quebe ne xelúnbe'e Xra', ne neda'. <sup>4</sup> Dxapa' le'e da nigá chee' gate zrin zra na', na' cheajsá lázrele ba gucha' le'e da nigá.

*Da dxun Be' Lá'azxa*

Nadxa gunná Jesús:

—Quebe gucha' le'e da nigá nédxute lawe' da zúalequeza' le'e. <sup>5</sup> Na'a wexá'a cheajx-ezúalēna' Xra' nasele' neda', na' netule le'e quebe dxuchébele neda' ga cha'a. <sup>6</sup> Dxewí'ine lázrele lawe' da gucha' le'e da caní. <sup>7</sup> Na'a dxapa' le'e da li: Cháwe'dxa gaca cheele le'e che xexá'a neda' lawe' da che quebe xexá'a, quebe xida Be' Lá'azxa xedajsúalēne' le'e, Bénnea' gácalene' le'e. Che xexá'a neda', sel-la' Lē' cheele. <sup>8</sup> Gate xida Le', na' gulé'eng' bénneache zaj naque' benne' dul-la, ne quebe dxelune' da xrlátaje, na' Dios guzria xi'e benne' caní. <sup>9</sup> Zaj naque' benne' dul-la lawe' da quebe dxelájle'e chia' neda'. <sup>10</sup> Xeleque bé'eng' quebe dxelune' da xrlátaje lawe' da xexá'a neda' naga zua Xra', na' le'e québedxa lé'ele neda'. <sup>11</sup> Xeleque bé'eng' Dios guzria xi'e le' lawe' da ba guchugue' chee' da xriwe', da na' dxenná bea na lu xezr la xu nigá.

<sup>12</sup> 'Ne déle'e da dxal-la' xapa' le'e, san le'e quebe gaca chéajni'ile na na'a. <sup>13</sup> Gate xida Be' Lá'azxa, Bénnea' dxulé'ene' da li, Le' gulé'ene' le'e ca naca xúgutę da li lawe' da quebe guchálaję' cheézqueze'. Wanné' xúgutę da xénene', na' guzéajni'ine' le'e ca da dxal-la' gaca na. <sup>14</sup> Le' gucá'ana szrenę' neda' lawe' da wazi'e cheę da naca chia' neda', na' guzéajni'ine' na le'e. <sup>15</sup> Xúgutę da napa Xra', cheęqueza' naca na, na' cheę le na' gunnéa', wazi' Be' Lá'azxa da naca chia', na' guzéajni'ine' na le'e.

*Xel-la' dxelewi'ine lazre' cheę benne' ca' xexaca na xel-la' dxelebe'*

<sup>16</sup> Gunná Jesús:

—Xetú chí'idau', na' le'e québedxa lé'ele neda', na' xetú chí'i, na' xelé'ele neda' lawe' da xexá'a neda' naga zua Xra'.

<sup>17</sup> Nadxa bal-la benne' ca' dxusede Jesús buluchebe ljwezre':

—¿Bizra zéaję da nigá? Dxe'e dxi'u, xetú chí'idau' québedxa lé'edxu Le', na' xetú chí'i, na' xelé'edxu Le' lawe' da xexiáję' naga zua Xre'. <sup>18</sup> ¿Bi zéaję da na', xetú chí'idau'? Quebe dxéajni'idxu bi cheę dxuchálaję'.

<sup>19</sup> Guque be'e Jesús dxelaca lazre' xuluchebe' Le', na' guzre' benne' ca':

—Neda' gucha' le'e, xetú chí'idau' québedxa lé'ele neda', na' xetú chí'i, na' xelé'ele neda'. ¿Da nigá na' dxuchebe ljwézrele? <sup>20</sup> Da li dxapa' le'e, wabézrele le'e, ne xewi'ine lázrele, san bénneache cheę xęzr la xu nigá xelebeng'. Lácala le'e xewi'ine lázrele, xel-la' dxewi'ine lazre' cheęle xexaca na xel-la' dxebé. <sup>21</sup> Gate tu nu'ula zua sane' bidau' zue' štebe lawe' da ba bzrin zra sua xel-la' dxudía cheę'. Gate te galaj bidu na', na' québedxa dxeajsa' lazre' da guzaque' lawe' da dxebéle'ene' cheę bidu na' ba gúlajbe'. <sup>22</sup> Cá'anqueze le'e zúale štebe na'a, san neda' welá'queza' xedajxenná'a le'e, na' lu xichaj lárdaule súdequeze xel-la' dxebé, da naca na tu xel-la' dxebé da quebe nu seque' cua.

<sup>23</sup> 'Lu zra na' québedxa bi guchébele neda'. Da li dxapa' le'e, Xra' gunne' le'e xúgutę da nábale lu La' neda'. <sup>24</sup> Nédxula quebe bi gunábale lu La' neda'. Na'a le naba, na' si'le, cheę súale'ele xel-la' dxebé.

*Jesús guchuchuj guléaję' da dxaca lu xęzr la xu nigá*

<sup>25</sup> Gunná Jesús:

—Ba gucha' le'e da caní nen dizra' ca' da dxululé'e na. Wazrin zra gate québedxa guchálajęna' le'e da naca da dxululé'e na. Guchálajęna' le'e caniqueze da naca cheę Xra'. <sup>26</sup> Lu zra na' nábale Xra' lu La' neda', na' quebe dxennéa' neda' gata' xueda' Xra' waláz cheęle, <sup>27</sup> lawe' da Xrá'queze nazri'ine' le'e. Nazri'ine' le'e lawe' da nazri'ile le'e neda', ne dxéajlele chia' za'a naga zua Dios. <sup>28</sup> Guzá'a lau Xra' cheę bla'a lu xęzr la xu nigá cheę xexá'a naga zua Xra'.

<sup>29</sup> Nadxa benne' ca' dxusede Jesús gulé'e Le':

—Na'a dxuchálajęnu' netu' caniqueze. Quebe dxuchínenu' dizra' ca' da dxululé'e na. <sup>30</sup> Na'a dxeque bé'entu' nézenu' xúgutę da ca', na' quebe dxal-la' nu guchebe Lue'. Cheę le na' dxéajęntu' chiu' za'u naga zua Dios.

<sup>31</sup> Jesús guzre' benne' ca':

—¿Dxéajlele chia' na'a? <sup>32</sup> Za' zra, ne ba naca zra ná'queze gate le'e gase dínnajle ca'ale xrneza chá cheęle, na' gucá'anale neda' tuza'. Quebe zúaqueza' tuza' lawe' da zúale Xra' neda'. <sup>33</sup> Dxapa' le'e da nigá cheę gápale xel-la' dxebeza zri lazre' lawe' da nácale neda' tuze. Lu xęzr la xu nigá dxun na ba xen si sácale. Le gun chuchu lárdaule, lawe' da ba bchuchuj bléaję' da dxaca lu xęzr la xu nigá.

## 17

*Jesús dxenabę' Dios xucá'ana chawę'e benne' ca' dxelájle'e cheę'*

<sup>1</sup> Ca gudé'gunné' da nigá, na' Jesús gunné'e xabáa, dxenné':

—Xrae, ba bzrin zra. Bca'ana szren neda', Zri'inu', cheę cá'anqueze neda', Zri'inu', gucá'ana szrena' Lue'. <sup>2</sup> Lue' ba bęnnu' neda', Zri'inu', xel-la' dxenná' bea cheę nna be'eda' xúgutę bénneache, cheę gunézruja' xel-la' nabán da zeajli canna cheę xúgutę benne' ca' bęnnu' neda'. <sup>3</sup> Xel-la' nabán da zeajli canna naca na cheę xelúnbe'e Lue', nacu' Dios tu licha', ne li lazre', na' cheę xelúnbe'e neda', Jesucristo, Bénnea' gusel-lu Lue'.

<sup>4</sup> 'Neda' ba bca'ana szrena' Lue' lu xęzr la xu nigá, ne ba bexuzre bęna' da bdxixruj be'enu' neda'. <sup>5</sup> Na'a, Xrae, bęnna neda' xel-la' szren lau Lue', da naca na xel-la' szren na' da guca na chia' naga zu' Lue' nédxudautę gate za gata' xęzr la xu nigá.

<sup>6</sup> 'Benne' ca' guca'u Lue' ládujla bénneache, benne' ca' bęnnu' neda', neda' ba bzéajni'ida' le' Nu nacu' Lue'. Gulaque' chiu', na' Lue' bęnnu' neda' benne' ca', na' ba belunę' ca' dxenná' xrtizru'. <sup>7</sup> Na'a zaj nézeng' xúgutę da bęnnu' neda' za na naga zu' Lue'. <sup>8</sup> Ba bnézruja' cheę benne' caní dizra' chiu' da bęnnu' neda', na' benne' caní ba gulezi' lu ne'e na. Ba guleque bé'ene' da li neda' za'a naga zu' Lue', ne ba guléajle'e chiu', gusel-lu' neda'.

<sup>9</sup> 'Neda' dxata' xueda' Lue' gaca chawe' chee benne' caní. Quebe dxata' xueda' Lue' ne chee benne' ca' zaj naque' chee xezr la xu nigá. Dxenaba' Lue' ne chee benne' ca' bennu' neda', lawe' da zaj naque' chiu'. <sup>10</sup> Xúgute da naca chia' naca na chiu', na' da naca chiu' naca na chia' neda', na' xel-la' szren chia' dxulé'e lawe' na ne chee benne' caní.

<sup>11</sup> 'Neda' québedxa sua' lu xezr la xu nigá, san benne' caní xelexegá'ang' lu xezr la xu nigá, na' neda' wezá' a nigá, ne xedajxezúalequeza' Lue'. Xrae Lá'azxa, lu xel-la' dxenná bea chiu' bxue benne' caní, benne' ca' bennu' neda', chee xelácaqueze' tuze ca nácadxu dxi'u tuze, Lue' ne neda'. <sup>12</sup> Gate ne zua' neda' lu xezr la xu nigá, bxua' benne' caní nen xel-la' dxenná bea chiu', benne' caní bennu' neda', ne bcache chawa' le'. Netú benne' caní quebe gunite, san tuze bēnea' ba nanítequeze', na' caní guca na chee guca li ca naxúaj na lu xiche chiu'.

<sup>13</sup> 'Na'a ba zezá'a naga zu' Lue'. Dxácatē ne zua' lu xezr la xu nigá dxennéa' da caní chee xelápale'e benne' caní xel-la' dxebé ca da nápaqueza' neda'. <sup>14</sup> Neda' bnézuja' benne' caní dizra' chiu'. Bénneache chee xezr la xu nigá dxelecuídenē' benne' caní lawe' da québedxa zaj naque' tuze nen benne' ca' chee xezr la xu nigá, ca na' neda' quebe naca' tuze nen da naca chee xezr la xu nigá. <sup>15</sup> Quebe dxenaba' Lue' xeca'u benne' caní lu xezr la xu nigá. Dxenaba' guzrá chawu' benne' caní chee quebe seque' da xriwe' bi gun na chee' le'. <sup>16</sup> Ca neda' quebe naca' chee xezr la xu nigá, cá'anqueze benne' caní quebe zaj naque' chee xezr la xu nigá. <sup>17</sup> Bzua benne' caní chee xelaque' cheéquezu' Lue' ne chee da li. Dizra' chiu' naca na da li. <sup>18</sup> Ca gusel-lu' Lue' neda' ládujla bēnneache zaj naque' chee xezr la xu nigá, cá'anqueze neda' dxusel-le' benne' caní ládujla bēnneache zaj naque' chee xezr la xu nigá. <sup>19</sup> Ne chee benne' caní nuzúa cuina' cheéquezu' Lue', chee cá'anqueze benne' caní xelaque' cheéquezu' Lue' ne chee da li.

<sup>20</sup> 'Dxata' xueda' Lue', quegaze chee benne' caní, san cá'anqueze chee benne' ca' xeléajle'e chia' gate xelenne' da xuluchalaj benne' caní. <sup>21</sup> Dxenaba' Lue' chee xelaca xúgute benne' caní túzqueze, ca Lue', Xrae, nácaquezu' neda' tuze, ne neda' nácaqueza' Lue' tuze, ne chee xelaca benne' caní tuze nen dxi'u, chee xeléajle bēnneache zaj naca chee xezr la xu nigá Lue' gusel-lu' neda'. <sup>22</sup> Neda' ba bnézuja' chee benne' caní xel-la' szren na' da bennu' neda' chee xelaque' tuze ca nácaquezdxu tuze dxi'u. <sup>23</sup> Neda' súalēna' benne' caní, na' Lue' súalēnu' neda', chee xelácaqueze benne' caní tuze, na' caní xeleque be'e bēnneache Lue' gusel-lu' neda', ne nazrí'inu' benne' caní cáteze nazrí'inu' neda'.

<sup>24</sup> 'Xrae, Lue' bennu' neda' benne' caní, na' dxaca lazra' xelezúalēne' neda' naga sua' neda', chee xelélé'ene' xel-la' szren da ba bennu' neda', lawe' da nazrí'inu' neda' nédxudautē gate quebe ne gunu' xezr la xu nigá. <sup>25</sup> Xrae chawe', benne' zaj naque' chee xezr la xu nigá quebe zaj núnbe'e Lue', san neda' núnbe'a Lue', na' benne' caní ba zaj nézene' Lue' gusel-lu' neda'. <sup>26</sup> Neda' bzéajni'ida' benne' caní Nu nacu' Lue', ne zúaqueza' dxuzéajni'ida' le' chee sua xel-la' zri'i lazre' dxéquenu' Lue' neda' lu xichaj lázrdau benne' caní, ne chee súalē neda'queza' le'.

## 18

### *Dxelēl-le' Jesús*

(Mt. 26.47-56; Mr. 14.43-50; Lc. 22.47-53)

<sup>1</sup> Ca gudé gunná Jesús da caní, na' bdxúaje' nen benne' ca' dxusédene' chee chjaque' xecha la'a xegu Cedrón. Lataj na' zélé'e xaga olivo naga guxú'u Jesús nen benne' ca'. <sup>2</sup> Cá'anqueze Judas, bēnea' dxudé' Jesús lu na' benne' ca' dxeledábague' Le', núnbe'e lataj na' lawe' da zane' lasa guxíaj Jesús na' nen benne' ca' dxusédene'. <sup>3</sup> Ca' guca, bzrin Judas na' nen tu cue' benne' ca' dxjaque' wedil-la, ne nen bal-la benne' xra'aga wen zrin chee xudau', benne' ca' gulesel-la benne' xichaje' ca' chee bxruze ca', ne benne' fariseo ca'. Zaj nu'e xaga, ne xia ca', ne xi' ca', ne xi' xédx. <sup>4</sup> Jesús ba nézene' ca da gaca chee', na' chee le' na' bdxúaje' lau benne' ca', na' bchebe' le':

—¿Nuzra dxexílajle?

<sup>5</sup> Belexechebe benne' ca':

—Jesús, benne' Nazaret.

Jesús bechebe':

—Neda' na'.

Judas, bēnea' dxudé' Jesús lu na' benne' ca' zúaqueze' ládujla benne' ca'. <sup>6</sup> Gate gunná Jesús: Neda' na', na' benne' ca' belexebigue' lau Jesús, ne xeajlechazte' lu xu. <sup>7</sup> Nadxa Jesús bchebe' benne' ca' da xula:

—¿Nuzra dxexílajle?

Gulenná benne' ca':

—Jesús, benne' Nazaret.

<sup>8</sup> Nadxa guzre Jesús benne' ca':

—Ba gucha' le'e neda' na'. Che dxexílajle neda', le güe benne' caní lataj cheajxaque'.

<sup>9</sup> Ca guca da nigá guca li ca gunná Jesús, gunné: “Benne' ca' benna Xra' neda', netue' quebe bñitia'.” <sup>10</sup> Nadxa Simón Pedro, ne nu'e xia, guléaje' na, na' guchugue' naga da zua xabela chee Malco, wen zrin chee bxruze blau. <sup>11</sup> Jesús guzre' Pedro:

—Begú'u xia chiu' lu zre na. Ca da ba nun Xra' si' saca' neda', ¿quebe dxal-la' saca' na?

*Jesús dxezring' lau bxruze blau*

(Mt. 26.57-58; Mr. 14.53-54; Lc. 22.54)

<sup>12</sup> Nadxa benne' dxjaca wedil-la, ne benne' dxenná be'ene' le', ne benne' xra'aga wen zrin chee judío ca' gulel-le' Jesús, ne buluchéaje' Le'. <sup>13</sup> Nadxa guleché'e Jesús lizre Anás. Anás nigá naque' xrtau zri'ine Caifás, bènnea' naque' bxruze blau iza na'. <sup>14</sup> Caifás nigá naque' bènnea' guzre' judío blau ca' gácadxa chawe' gate tuze benne' waláz chee xezr la xu chee'.

*Pedro dxenné' quebe núnbe'e Jesús*

(Mt. 26.69-70; Mr. 14.66-68; Lc. 22.55-57)

<sup>15</sup> Simón Pedro, ne xetú benne' ca' dxusede Jesús zjaque' zeajnawe' Jesús. Benne' ljwezre Pedro nigá núnbea bxruze blau le'. Ca'an guca, benne' nigá guxú'ulene' Jesús chale'aj lizre bxruze blau na'. <sup>16</sup> Pedro begá'ane' dxu'a dxa xu'u da zua chale'aj na'. Chee le' na' bdxuaj bènnea' núnbea bxruze blau le', na' bchálajlene' nu'ula zua dxu'a dxa xu'u na', na' gulu'e Pedro chale'aj na'. <sup>17</sup> Nadxa nu'ula na' zua dxu'a dxa xu'u bchebe' Pedro:

—¿Quebe nacu' lue' tuze nen benne' Nazaret na'?

Pedro bechebe':

—Quebe naca'.

<sup>18</sup> Lawe' da dxun na zaga, benne' wen zrin ca', ne benne' xra'aga wen zrin chee bxruze ca' ba zaj nabeque' xi', ne zaj ze' dxu'a xi' na' dxexeze're'engé'. Pedro ze' nen benne' ca', dxexeze're'engé' dxu'a xi' na'.

*Bxruze blau dxuchebe' Jesús*

(Mt. 26.59-66; Mr. 14.55-64; Lc. 22.66-71)

<sup>19</sup> Bxruze blau guzú lawe' dxuchebe' Jesús nuca benne' ca' zaj naque' benne' dxusédené', ne bi da dxusédené' le':

—Neda' ba bchálajqueza' lávela xúgute bènneache. Bsédequeza' lu xu'u ca', ne lu xu'u naga dxelezraga xúgute benne' judío ca'. Quebe bi bchálaja' bagácheze. <sup>21</sup> ¿Bizr chee na' dxuchebe' neda'? Bchebe benne' ca' ba belenne' chia', na' le' xelenné' bi da bchálajlena' le'. Benne' ca' zaj nézene' da ba gunnéa'.

<sup>22</sup> Gate gunná Jesús da nigá, na' tu benne' xra'aga wen zrin chee xudau', benne' ze' na', gudape' xraga Jesús, na' gunné:

—¿Caní dxexechebu' lau bxruze blau nigá?

<sup>23</sup> Jesús bechebe':

—Che gunnéa' tu da caléla, gunná ájala naca na. Che da gunnéa' naca na xrlátaje, ¿bizr chee na' dxu'u neda'?

<sup>24</sup> Nadxa Anás gusel-le' Jesús, zaj nadxéaj ne'e, lau Caifás, bxruze blau.

*Pedro dxenné' xecha lasa quebe núnbe'e Jesús*

(Mt. 26.71-75; Mr. 14.69-72; Lc. 22.58-62)

<sup>25</sup> Dxácaté na' ze' Pedro dxu'a xi' na' dxexeze're'engé', na' gulé'e le':

—¿Quebe nacu' lue' tu benne' ca' zaj naque' tuze nen bènnea'?

Na' Pedro gunné:

—Quebe naca'.

<sup>26</sup> Nadxa tu benne' wen zrin chee bxruze blau, benne' naque' xrtia bènnea' guchugu Pedro nague', bchebe' le':

—¿Quegá ble'eda' lue' nen bènnea' naga zaj ze' xaga olivo ca'?

<sup>27</sup> Pedro gunné' xecha lasa:

—Quebe núnbe'a bènnea'.

La' ná'queze gudxezre xjeaj.

*Jesús dxezring' lau Pilato*

(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Nadxa belexebéaje' Jesús lizre Caifás, na' guleché'e Le' xu'u lizre benne' xu'u lu ne'e xezr la xu na' waláz chee Roma. Ba dxezú lau dxani'sise', na' benne' judío ca' quebe gulu'e xu'u na' chee quebe xelexegá'ane' sban, lawe' da che xelu'e na', quebe gaca xelawe' xrche' chee Laní Pascua. <sup>29</sup> Chee le' na' bdxuaj Pilato bchálajlene' benne' ca', na' guzre' le':

—¿Bizra da zria dxágule benne' nigá?

<sup>30</sup> Belexechebe benne' ca':

—Chela ca naque' tu benne' wen da zrinnaj, quebe gudentu' le' lau'.

<sup>31</sup> Nadxa Pilato guzre' benne' ca':



—Le xeché'e, ne le guchi'a chee' cáteze naca da nadxixruj bea cheeḷe.  
 Belexechebe benne' judío ca':  
 —Netu', benne' judío, quebe naca cheentu' nu gütentu'.  
<sup>32</sup> Ca'an guca, guca li ca naca da ba gunná Jesús ca gatié'. <sup>33</sup> Pilato bexu'e xu'u na', na' gunné' Jesús, ne bchebe' Le':  
 —¿Nacu' Lue' Wenná Bea chee' judío ca'?  
<sup>34</sup> Jesús gunné':  
 —¿Dxenabu' da nigá lue'zqueze, u lawe' da nu guzre lue' ca naca chia'?  
<sup>35</sup> Pilato bechebe':  
 —¿Naca' neda' judío? Benne' xezr la xu chiu', ne benne' xíchajé ca' chee' bxruze ca' buludé' lue' lawa' neda'. ¿Bizra benu'?'  
<sup>36</sup> Nadxa bechebe' Jesús:  
 —Naga dxenná be'a quebe naca na chee' xezr la xu nigá. Chela naca na chee' xezr la xu nigá, na' benne' ca' zaj naque' neda' tuze welásaqueze' chee' quebe tea' neda' lu na' benne' judío caní. Naga dxenná be'a quebe naca na nigá.  
<sup>37</sup> Nadxa guzre Pilato Jesús:  
 —¿Nacu' Lue' wenná bea?  
 Bechebe' Jesús:  
 —Naca' wenná bea, cáteze dxennáu' lue'. Neda' gúlaja', ne bla'a lu xezr la xu nigá chee' nnia' da li. Xúgute' benne' ca' dxelune' ca dxenná dizra' chee' da li dxellené' da dxennéa' neda'.  
<sup>38</sup> Pilato gunné':  
 —¿Bizra na' da lí?

*Dxelechugue' chee' Jesús gatié'*  
 (Mt. 27.15-31; Mr. 15.6-20; Lc. 23.13-25)

Ca gudé bchebe' Pilato Jesús caní, na' bdxúajé' xetú. Bchálajleñé' benne' judío ca', na' guzre' le':  
 —Neda' quebe bi da calela dxezrelda' nun benne' nigá. <sup>39</sup> Le'e zua tu da zéajlele. Gusana' neda' tu benne' xu'u lizre xia lu Laní Pascua nigá. ¿Dxaca lázrele gusana' wenná bea chee' judío ca'?  
<sup>40</sup> Nadxa xúgute' gulenné' zizraj:  
 —¡Quegá benne' nigá! ¡Bsan Barrabás!  
 Barrabás na' naque' gubán.

## 19

<sup>1</sup> Nadxa Pilato guqué'e Jesús, na' bdxixruj bé'ene' xelu'e Le' xide'. <sup>2</sup> Benne' dxjaque' wedil-la buluzríe' xichaj Jesús tu da' belune' zruze xaga xeche', ne bulugácué' Le' tu ladxe' bzawe.  
<sup>3</sup> Nadxa guléchajé' Le', dxellené':  
 —¡Gaca ba lue', wenná bea chee' judío ca'!  
 Nadxa belú'e dxu'a lau Jesús.  
<sup>4</sup> Nadxa bdxuaj Pilato da xula, ne guzre' benne' ca':  
 —¡Le nna'xque! Dxebéaja' benne' nigá chee' nézele quebe dxezrelda' bi da zrinnaj nabague'.  
<sup>5</sup> Bdxuaj Jesús zria xíchajé' da naca zruze xaga xeche', ne nacue' ladxe' bzawe na'. Nadxa Pilato guzre' benne' ca':  
 —Nigá zua bénnea'.  
<sup>6</sup> Gate benne' xíchajé ca' chee' bxruze ca', ne xra'aga wen zrin chee' ca' belelé'ene' Jesús, na' gulezú lawe' dxellené' zizraj:  
 —¡Bde'e xaga béguaj! ¡Bde'e xaga béguaj!  
 Pilato guzre' benne' ca':  
 —Le che'e, ne le gudé'e xaga béguaj lé'equeze, lawe' da quebe dxezrelda' bi da zrinnaj nabague'.  
<sup>7</sup> Na' benne' judío ca' belexechebe':  
 —Netu' ná pantu' tu da nadxixruj bea na, ne ca dxenná na dxal-la' gatié' lawe' da dxun cuine' Zri'ine Dios.  
<sup>8</sup> Gate ben Pilato da nigá, na' bezrébedxe'. <sup>9</sup> Bexu'e xu'u na', na' bchebe' Jesús:  
 —¿Gazra benne' Lue'?  
 Quebe bi bechebe' Jesús.  
<sup>10</sup> Nadxa guzre Pilato Le':  
 —¿Quebe dxexechebu' chia'? ¿Quebe nézenu' Lue' napa' neda' xel-la' dxenná bea gudá'a Lue' xaga béguaj, ne napa' xel-la' dxenná bea gusana' Lue'?

<sup>11</sup> Bechebe Jesús:

—Quebe bi xel-la' dxenná bea napu' bi gunu' chia' chela ca benna Dios lue' xel-la' dxenná bea nigá. Chee le na', bénnea' bdege' neda' lu na'u dul-la zrendxa nabague' ca lue'.

<sup>12</sup> Lu zra na'te gudilaj lazre' Pilato ájala gune' gusané' Jesús, san benne' judío ca' gulenné' zizraj:

—Che gusanu' benne' nigá, quebe nacu' César tuze, bénnea' dxenná bea Roma. Nu benne' dxun cuine' wenná bea dxedábage' César.

<sup>13</sup> Nadxa Pilato, gate benne' da nigá, bdxixruj bé'ene' xelexebéaje' Jesús, na' gudxé'e lataj blau chee', da zua lataj na' nazí le na Gabata nen dizra' hebreo, da zéaje' na chale'aj xiaj ta'a.

<sup>14</sup> Naca na zra za zrin Laní Pascua, ca du wagubizra. Nadxa Pilato guzre' benne' judío ca':

—Nigá zua wenná bea cheele.

<sup>15</sup> Na' benne' ca' gulenné' zizraj:

—¡Gatie'! ¡Gatie'! ¡Bde'e xaga béguaj!

Pilato guzre' benne' ca':

—¿Gudá'a wenná bea cheele xaga béguaj?

Belexechebe benne' xíchaje' ca' chee' bxruze ca':

—Netu' zua tuze wenná bea cheentu'. ¡César! <sup>16</sup> Nadxa Pilato bdege' Jesús lu na' benne' ca' chee' te'e xaga béguaj, na' guleché'e Jesús.

*Jesús dxedé'e xaga béguaj*

(Mt. 27.32-44; Mr. 15.21-32; Lc. 23.26-43)

<sup>17</sup> Na' bdxuaj Jesús nu'e xaga béguaj chee' chéaje' lataj na' nazí le na Zrita Xichaj Benne' Gate, na' nen dizra' hebreo nazí le na Gólgota. <sup>18</sup> Buludé'e Jesús xaga béguaj lataj na', na' tu zren nen Jesús buludé'e xechupa benne' xaga béguaj ca' chalá'a weaj naga da' Jesús. <sup>19</sup> Pilato bdxixruj bé'ene' buluzúe' le'e xaga béguaj xichaj Jesús da dxenná na: Jesús, Benne' Nazaret, Wenná Bea Chee' Judío Ca'. <sup>20</sup> Zane' benne' judío ca' bululabe' da na' lawe' da zua lataj na' naga buludé'e Jesús xaga béguaj gáguze naga dxe' xezre na', na' da na' naxúaj na nen dizra' hebreo, ne nen dizra' griego, ne nen dizra' latín. <sup>21</sup> Chee' le na' benne' xíchaje' ca' chee' bxruze chee' judío ca' gulé'e Pilato:

—Quebe guzúaju' na: Wenná Bea Chee' Judío Ca'. Bzujaj na: Le' Gunné' Naque' Wenná Bea Chee' Judío Ca'.

<sup>22</sup> Bechebe Pilato:

—Da bzuaja', ba naxúajqueze na.

<sup>23</sup> Ca' gudé' buludá' benne' dxjaque' wedil-la Jesús xaga béguaj, na' belexequé'e zra lane', ne belebeque' na tapa cue', tu cue' weaj chee' tu tu benne' dxjaque' wedil-la. Belecá'aqueze' ladxe' dxexrúa cuzre' da quebe nadía na. Tu ca nácheze na. <sup>24</sup> Chee' le na' benne' dxjaque' wedil-la gulé' ljwezre':

—Quebe chézadnu na. Cwéajdxu da gunna bea na chee' la' nu xala le na.

Ca'an guca, guca li da naxúaj na lu xiche chee' Dios, da dxenná na: Belexelé'e zra lana', ne guléaje' da gunna bea na chee' le na. Caní belún benne' dxjaque' wedil-la.

<sup>25</sup> Gáguze naga zua xaga béguaj chee' Jesús ze' xrna Jesús nen bi bila xrne'e, ne María, zru'ula Cleofas, ne María Magdalena. <sup>26</sup> Gate ble'e Jesús xrne'e, ne cuita xrne'e na' ze' Juan, benne' bsede Jesús, bénnea' nazri'idxe', na' guzre' xrne'e:

—Nú'uladau', na' ze' zri'ínu'.

<sup>27</sup> Nadxa guzre' Jesús bénnea':

—Na' ze' xrna'u.

Zra na'te benne' nigá beche'e nu'ula na' lizre'.

*Dxate Jesús*

(Mt. 27.45-56; Mr. 15.33-41; Lc. 23.44-49)

<sup>28</sup> Ca' gudé' gunná Jesús da nigá, lawe' da nézene' xúguté' na ba guca li, ne chee' guca li ca naxúaj na lu xiche chee' Dios, gunné':

—Dxebíleda'.

<sup>29</sup> Zua na' tu dxe'e nupe zichaj, na' bulusubise' tu da dxezrupe na nupe zichaj na', ne buluzúe' na lawe' tu xia tunna, na' buluzúe' na dxu'a Jesús. <sup>30</sup> Na' Jesús guzrupe' nupe zichaj na', na' gunné':

—Ba guca li ca naca na.

Nadxa bse dxu'a xíchaje', gutie'.

*Tu benne' dxeje' wedil-la dxechizie' xia lachú'u Jesús*

<sup>31</sup> Naca na zra za zrin Laní Pascua, na' judío ca' quebe gulaca lazre' xelexegá'ana benne' ca' le'e xaga béguaj ca' lu zra dxulupá'ane' lawe' da naca zra na' tu zra blau. Chee' le na' gulenabe' lau Pilato dxixruj bé'ene' xelíchaje' ní'a benne' ca' zaj de'e xaga béguaj ca', ne xelexequé'e le'

le'e xaga béguaj ca'. <sup>32</sup> Nadxa tu benne' ca' dxjaque' wedil-la gudíchajé' ni'a benne' nedxu na', ne cá'anqueze chee' benne' xetú de'e cuita Jesús. <sup>33</sup> Gate bzrine' naga da' Jesús, blé'engé' ba gutié', na' chee' le' na' quebe gudíchajé' ni'e.

<sup>34</sup> Tu benne' ca' dxjaque' wedil-la guchízíe' xia chee' lachú'u Jesús, na' bdxuaj dxen, ne nisa na'. <sup>35</sup> Benne' dxuchalaj da nigá naque' benne' blé'engé' na, ne dxuchálajé' da li, ne nézene' dxenné' da li, chee' cá'anqueze le'e chéajlele chee' Jesús. <sup>36</sup> Da caní guca na chee' guca li ca da naxúaj na lu xiche chee' Dios, da dxenná na: Quebe gulíchajé' netú zrita chee'. <sup>37</sup> Xetú da naxúaj na lu xiche chee' Dios dxenná na: Welelé'engé' bénnea' belunge' we'.

### *Dxulucache' Jesús*

(Mt. 27.57-61; Mr. 15.42-47; Lc. 23.50-56)

<sup>38</sup> Ca gudé na' José, benne' xezre Arimatea, xeajnabe' Pilato gu'e le' lataj xexu'e Jesús. José naque' tu benne' guque' Jesús tuze, san bagácheze lawe' da bzrebe' judío blau ca'. Pilato be'e le' lataj, na' bexu'e Jesús. <sup>39</sup> Cá'anqueze Nicodemo, bénnea' xeajchálajle' Jesús chizrela, bzrine' na', nu'e tu gaxúa xiaj nedxe, ne tu da dxelále'e zixre. <sup>40</sup> Nadxa José, ne Nicodemo belexequé' Jesús, na' buluchele' Le' ladxe' nen nedxe na' ca naca da zjácále' benne' judío ca' da dxelunge' chee' benne' gate', gate na' dxulucache' le'. <sup>41</sup> Lataj na' naga buludé'e Jesús xaga béguaj zua tu lataj naga zaj ze xaga ca', na' lávela lataj na' zua tu ba cube le'e xiaj na', naga quebe nu ne chú'uqueze benne' gate'. <sup>42</sup> Lu ba na' belegu'e Jesús lawe' da zua ba na' gáguze, ne lawe' da ba dxebíá gubizra, ne ba zua su lau zra dxulupá'ana judío ca'.

## 20

### *Jesús dxexebangé' ládujla benne' gate*

(Mt. 28.1-10; Mr. 16.1-8; Lc. 24.1-12)

<sup>1</sup> Zra nedxu, guxíaj María Magdalena dxu'a ba na' dxaní'sise', gate ne nachúl-laté, na' blé'engé' québedxa naduse xiaj dxu'a ba na'. <sup>2</sup> Nadxa bexíaj chégüé' naga zua Simón Pedro nen xetú benne' bsede Jesús, bénnea' bzri'idxe' Jesús, na' guzre' benne' ca':

—Ba belequé'e Xránadxu lu ba na', ne quebe nézentu' ga xeajlélú'e Le'.

<sup>3</sup> Nadxa Pedro, ne bénnea' xetú beledxúaje' zjaque' dxu'a ba na'. <sup>4</sup> Dxúpaté' zjaca chégüé' tu zren, san bénnea' xetú guzá chégudxe' ca' Pedro, ne bzrine' nédxudxa dxu'a ba na'. <sup>5</sup> Na' xeajsé' su dxú'ala xeajnné'e lu ba na', na' blé'engé' ladxe' da buluchele' Jesús xu'u na na', san quebe guxú'e lu ba na'. <sup>6</sup> Ca gudé na', bzrin Simón Pedro, na' guxú'e lu ba na'. Cá'anqueze le' blé'engé' ladxe' na' xu'u na na', <sup>7</sup> ne blé'engé' ladxe' da buluchele' xichaj Jesús, quebe xu'u na tu zren nen ladxe' da bedxela na le'. Nadube na, dxe' na chala'ala. <sup>8</sup> Nadxa cá'anqueze guxú'u bénnea' xetú, bénnea' bzrin nedxu dxu'a ba na', na' blé'engé' ladxe' ca', ne guxéajle'e. <sup>9</sup> Quebe ne xeléajni'ine' da naxúaj na lu xiche chee' Dios da dxenná na xebán Jesús ládujla benne' gate'. <sup>10</sup> Nadxa benne' ca' bsede Jesús belexezrine' xu'u naga zaj zre'e.

### *Jesús dxulé'e lawe' María Magdalena*

(Mr. 16.9-11)

<sup>11</sup> María begá'angé' dxu'a ba na', dxebezre'. Ca dxebezre' na', na' gulégüé' dxenné'e lu ba na', <sup>12</sup> na' blé'engé' chupa gubáz chee' xabáa zaj nácué' zra lané' chiche, zaj dxe'e naga guxú'u Jesús. Tue' dxe'e naga guzrúa xichaj Jesús, na' xetúe' dxe'e zeaj zranle ga guzrúa ni'a Le'. <sup>13</sup> Na' buluchebe gubáz chee' xabáa ca' María na':

—Nu'ula, ¿bizr chee' na' dxebezru'?

Le' guzre' gubáz chee' xabáa ca':

—Lawe' da belú'e Xrana', ne quebe nezda' ga xeajlélú'e Le'.

<sup>14</sup> Caní dxenné', na' bzéchaj xíchajé', ne blé'engé' Jesús ze' ca'ala, san quebe nézene' che Jesús na'. <sup>15</sup> Nadxa Jesús bchebe' María na':

—Nú'uladau', ¿bizr chee' na' dxebezru'? ¿Nu dxexílaju'?

María gúquene' naque' benne' dxá'angé' xaga ca' zaj ze na', na' guzre' Le':

—Benne', che lue' bi'u Le', gunná ga xeajlú'u Le', chee' cheajxezri'a Le'.

<sup>16</sup> Nadxa Jesús guzre' nu'ula na':

—María.

María na' bexéchajé', ne guzre' Le' nen dizra' hebreo:

—¡Rabonil!

Dizra' nigá zéaje na: Benne' Dxusede.

<sup>17</sup> Jesús guzre' María na':

—Bsan neda' lawe' da quebe ne xegüé'na' naga zua Xra'. Bexíaj, xeajxezre bi bícha'dau' ca', benne' ca' bsédeda', xegüé'na' naga zua Xra', ne nácaquezé' Xrale. Naque' Dios chia', ne Dios chele.

<sup>18</sup> Nadxa bexíaj María Magdalena, xeajzenne' benne' ca' bsede Jesús ba blé'engé' Jesús, na' Le' guzre' le' da caní.

*Jesús dxulé'e lawe' benne' ca' bsédene'*  
(Mt. 28.16-20; Mr. 16.14-18; Lc. 24.36-49)

<sup>19</sup> Lu zra ná'queze, da naca na zra nedxu chee da gazre zra, na' chizrela zaj nazraga benne' ca' bséde Jesús, ne zaj nuséxujé' dxa xu'u ca' lawe' da dxelezrebe' judío blau ca'. Na' guxú'u Jesús, guzé' laduj benne' ca', na' bgape' benne' ca' diuzre, dxenné':

—Le gapa xel-la' dxebeza zri lazre'.

<sup>20</sup> Ca gudé' gunná Jesús da nigá, na' blé'ene' benne' ca' ne'e, ne le'e naga gudé' xia na'. Benne' ca' bséde Jesús gulebé'ene' gate belelé'ene' Xránadxu. <sup>21</sup> Nadxa Jesús guzre' benne' ca' xecha lasa:

—Le gapa xel-la' dxebeza zri lazre'. Cáteze gusel-la Xra' neda', cá'anqueze dxusel-la' neda' le'e.

<sup>22</sup> Nadxa blube' lau benne' ca' ne guzre' le':

—Le si' Be' Lá'axxa chee Dios. <sup>23</sup> Benne' ca' dxunite laule le'e chee dul-la zaj nabague' ba bnite lau Dios chee', na' benne' ca' quebe dxunite laule le'e chee dul-la zaj nabague', quebe bunité lau Dios chee'.

*Tomás dxelé'ene' Xránadxu ba bebang'*

<sup>24</sup> Tomás, tu benne' chazrinnu ca' bséde Jesús, bénnea' le' Bi Lide', quebe zue' nen benne' ca' xezicadxa gate ble'e lau Jesús. <sup>25</sup> Ca gudé' na' gulé' Tomás na':

—Ba blé'entu' Xránadxu.

Gunná Tomás:

—Che quebe le'eda' ne'e naga guledé' bdiuduj ca', ne gudé'a' zrube na'a lu xedxu chee' bdiuduj ca', ne gudé'a' na'a le'e naga gudé' xia na', québequeze chéajlé'a.

<sup>26</sup> Ca guca xrunu' zra, benne' ca' bséde Jesús zaj nazrágaqueze' lu xu'u na' xetú' lasa, na' zua Tomás nen benne' ca'. Nadxa, lácala zaj naxeexuj dxa xu'u ca', ble'e lau Jesús lau benne' ca', ne guzé' laduj le', na' bgape' le' diuzre, gunné':

—Le gapa xel-la' dxebeza zri lazre'.

<sup>27</sup> Nadxa Jesús guzre' Tomás:

—Bde zrube na'u nigá, ne gunná' na'a nigá. Benna na'u, bde na le'a nigá. Québedxa gun chupa lazru', san guxéajle.

<sup>28</sup> Nadxa bechebe Tomás:

—Xrana', ne Dios chia'.

<sup>29</sup> Jesús guzre' le':

—Tomás, na'a dxéajle'u lawe' da ba blé'enu' neda'. Ba neza zrenté naca na chee benne' ca' dxeléajlé'e chia' lácala quebe ne xelelé'ene' neda'.

*Da dxaca lazre' Juan gun xiche nigá*

<sup>30</sup> Jesús bene' da zandxa xel-la' waca zrenté lau benne' ca' bsédene' da quebe zaj naxúaj na lu xiche nigá. <sup>31</sup> Da caní zaj naxúaj na chee chéajle le'e chee Jesús, naque' Cristo nasel-la Dios, ne Zri'ine Dios, ne chee gápale xel-la' nabán lawe' da dxéajle chee'.

## 21

*Jesús dxulé'e lawe' gazre benne' ca' bsédene'*

<sup>1</sup> Ca gudé' na' Jesús ble'e lawe' lau benne' ca' bsédene' dxu'a nísadau' chee Tiberias. Caní guca na. <sup>2</sup> Zaj nazraga Simón Pedro, ne Tomás, bénnea' lé'queze' Bi Lide', ne Natanael, benne' xezre Caná da nababa Galilea, ne chupa zri'ine Zebedeo, ne xechupa benne' ca' bséde Jesús.

<sup>3</sup> Simón Pedro guzre' benne' ca':

—Cheajsendxa' bela.

Benne' ca' gulenné':

—Cá'anqueze netu' wazá'entu' lue'.

Nadxa xjaque', na' gulu'e tu lu da dxedá lawe' nísadau'. Xela na' quebe nu bela gulezénqueze'. <sup>4</sup> Ca guzú' lau dxaní'sise', ble'e lau Jesús dxu'a nísadau' na'. Benne' ca' bsédene' quebe zaj nézene' che Jesús na'. <sup>5</sup> Nadxa Jesús guzre' benne' ca':

—Bénne'dau', ¿quebe nu bela ne senle'?

Belexechebe benne' ca':

—Quebe bi ne sentu'-ba'.

<sup>6</sup> Nadxa guzre Jesús benne' ca':

—Le guzala xixruj na' chalá'a xabéla chee da dxedá lawe' nísadau' na', na' senle bela.

Ca' beluné', na' ca' dxexeque' e xixruj na' quebe dxelexegué'ene' na lawe' da nazrate na bela zan. <sup>7</sup> Nadxa bénnea' nazrí'idxa Jesús guzre' Pedro:

—Xránadxu na'.

Ca ben Simón Pedro naca Xránadxu, na' bexázié' ladxe' dxexrúa cuzre' lawe' da nagüé' na, na' bexétaje' lu nisa. <sup>8</sup> Xezicadxa benne' ca' belexezrine' dxu'a nísadau' na', zaj zre'e lu

da dxedá lawe' nísadau', dxelexezrube xue' xixruj na' nazrate na bela ca' lawe' da dxe' da dxedá lawe' nísadau' na' lu nísadau' ca tu le gu'una xiaj. <sup>9</sup> Gate belexétaje' lu xu bizre, na' belelé'ene' ba dxe' xi', ne ba zrúa tu bela lawe' xi' na', na' de na' xeta xtila. <sup>10</sup> Nadxa Jesús guzre' benne' ca':

—Le cheajxri' tu chupa bela ca', be za guzéntele.

<sup>11</sup> Begüén Simón Pedro lu da dxedá lawe' nísadau' na', ne bezrube xue' xixruj na' dxu'a nísadau' na'te, nazrate na bela zri'a, tu gaxúa chi'inu xunba', na' lácala naca tu cá'anteba' quebe gudxeza xixruj na'. <sup>12</sup> Nadxa guzre Jesús benne' ca':

—Le da gágule xrsila.

Netú benne' ca' quebe dxelexázrene' xuluchebe' Le' nu Le', lawe' da zaj nézene' naque' Xránadxu. <sup>13</sup> Nadxa Jesús guqu'é' xeta xtila na', na' bnézuje' na benne' ca', ne cá'anqueze bene' chee' bela ca'.

<sup>14</sup> Da nigá naca na da guxunne' lasa ble'e lau Jesús lau benne' ca' bsédene' ca gudé bebange' ládujla benne' gate.

*Jesús dxuchálajlene' Simón Pedro*

<sup>15</sup> Ca gudé gulawe' xrsila, na' Jesús bchebe' Simón Pedro:

—Simón, zri'ine Jonás, ¿nazrí'idxenu' neda' ca benne' caní?

Bechebe Pedro:

—Awe', Xran, nézenu' dxelé'eda' Lue' chawe'.

Na' Jesús guzre' le':

—Bxue zrila' du chia' ca'.

<sup>16</sup> Nadxa Jesús bchebe' le' da xula:

—Simón, zri'ine Jonás, ¿nazrí'inu' neda'?

Pedro bechebe':

—Awe', Xran, Lue' nézenu' dxelé'eda' Lue' chawe'.

Jesús guzre' le':

—Bxue zrila' chia' ca'.

<sup>17</sup> Da guxunne' lasa Jesús bchebe' le':

—Simón, zri'ine Jonás, ¿dxelé'enu' neda' chawe'?

Pedro bewi'ine lazre' lawe' da bchebe Jesús le' da guxunne' lasa che dxelé'ene' Le' chawe', na' guzre' Jesús:

—Xran, Lue' nézquezenu' xúgute. Lue' nézenu' dxelé'eda' Lue' chawe'.

Na' Jesús guzre' le':

—Bxue zrila' chia' ca'. <sup>18</sup> Da li dxapa' lue', gate ne nacu' benne' cuide' gucu' zra lanu', ne guxíaju' naga dxaca lazru'. Gate bache nacu' benne' gula, chilju' na'u, na' benne' xula gugácué' lue', ne che'e lue' naga quebe gaca lazru' chéaju'.

<sup>19</sup> Gate gunná Jesús da nigá, dxuzéajni'ine' benne' ca' ca dxal-la' gate' Pedro chee' gucá'ana szrene' Dios. Ca gudé na' Jesús guzre' le':

—Ben neda' tuze.

*Da gaca chee' bénnea' nazrí'idxa Jesús*

<sup>20</sup> Gate bexechaj Pedro, blé'ene' bénnea' nazrí'idxa Jesús zéaje' nawe' le', naque' bénnea' dxe'e cuita Jesús gate na' gulawe' xrche' na', ne bchebe' Jesús: "Xran, ¿nuzra na' gudé Lue' lu na' benne' ca' dxeledábague' lue'?" <sup>21</sup> Gate Pedro blé'ene' bénnea', na' bchebe' Jesús:

—Xran, ¿gazra benne' nigá? ¿Aja gaca chee'?

<sup>22</sup> Jesús bechebe':

—Che neda' dxaca lazra' xegá'ane' nigá ca zrindxa zra xelá'a neda', ¿naca na chiu' lue' nézenu'? Lue', ben neda' tuze.

<sup>23</sup> Belén benne' ca' zaj de'e Jesús quebe gate benne' na'. Jesús quebe guzre' le' quebe gatíe'. Guzre' le': "Che neda' dxaca lazra' xegá'ane' ca zrindxa zra xelá'a neda', ¿naca na chiu' lue' nézenu'?"

<sup>24</sup> Benne' nigá naque' benne' dxexechébe' chee' da nigá, ne ba nuzúaje' na. Nézentu' dxenné' da li.

<sup>25</sup> Cá'anqueze ne zaj dēdxá da zantē da ben Jesús, na' chela xuaj tu tu na, dxéqueda' quebe gueque lu xēzr la xu nigá cha' xiche ca' dxal-la' guzúajdxu. Ca' naca na.

## DA CA' BELÚN BENNE' GUBÁZ CHEE CRISTO

*Dios nachebe lazre' sel-le' Be' Lá'azxa*

<sup>1</sup> Lue', Teófilo, bzuaja' chiu' lu xiche nedxu ca naca xúgute da guzú lau Jesús dxunge', ne dxusédené' nédxudaute, <sup>2</sup> cadxa begüéne' xabáa. Gate za xezé' e xexíajé' xabáa guqué' e gubáz chee' ca', na' zúale Be' Lá'azxa Le' guzre' benne' ca' ca da dxal-la' xelune'. <sup>3</sup> Ca gudé gutié', Jesús ná'queze ble'e lawé' benne' ca', ne lawe' chua zra ble'e lawé' benne' ca', na' blé'ene' da zan da dxelunna bea na naca bané', ne bchálajlene' benne' ca' ca dxal-la' nna bea Dios.

<sup>4</sup> Gate ne zúale Jesús benne' gubáz ca', gunné xuené' le' quebe xesi'aque' xezre Jerusalén. Na' guzre' benne' ca':

—Le cueza ca da guchebe lazre' Xra' gunné' chee, ca gunníqueza' neda'. <sup>5</sup> Da li Juan bchué' bénneache nisa, san lu zra caní gaca chee ca da zéajé' xel-la' dxedxúa nisa, xida Be' Lá'azxa xedajsúe' lu xichaj lázrdaule.

*Jesús dxegüéne' xabáa*

<sup>6</sup> Gate na' zaj nazrague' nen Jesús, na' buluchébe' Le':

—Xran, zgue Dios lataj nna béaqueze xezre Israel lu zra caní?

<sup>7</sup> Na' bechébe Jesús:

—Quebe naca chee nézele bátala, u bi zra gun Dios da ca' tuze Le' nape' xel-la' waca gungé'. <sup>8</sup> Gate xida Be' Lá'azxa súalene' le'e, sile xel-la' waca, na' chéajle cheajchálajle da naca chia' lu xezre Jerusalén, ne ca naca naga nababa Judea, ne naga nababa Samaria, ne ca nácaqueze xezr la xu nigá.

<sup>9</sup> Ca gudé gunné' da nigá, ne dxácaté dxelenná' benne' ca' Le', begüén Jesús xabáa, na' ca bexu'e tu lu beuj benite Jesús lau benne' ca'. <sup>10</sup> Ne zaj zra' benne' ca' dxelenné' e dxácaté dxegüén Jesús, belelá' chupa benne' zaj nácué' ladxe' chiche lau benne' ca', <sup>11</sup> na' gulé' e benne' gubáz ca':

—Le'e, benne' Galilea, zbizr chee na' zele dxenna'le xabáa? Jesús nigáqueze begüéne' zexíajé' xabáa, bezé' e ládujla le'e, welé' e xetú cáqueze ble'ele Le' zexíajé'.

*Dxelequé' e Matías chee xedé' waláz chee Judas*

<sup>12</sup> Nadxa besí'aca benne' gubáz ca' lu Xi'a Xaga Olivo, ne belexezrine' Jerusalén, da quebe naca na zitu', san dxe' cátitéze da dxunna da nadxixruj bea na lataj xesi'aque' lu zra dxulupá'ane'. <sup>13</sup> Gate belexezrine' lu xezre na', belexegüéne' xu'u sibe naga zaj zue'. Benne' caní zaj naque' Pedro, ne Jacobo, ne Juan, ne Andrés, ne Felipe, ne Tomás, ne Bartolomé, ne Mateo, ne Jacobo zri'ine Alfeo, ne Simón, bénnea' dxedábague' benne' Roma ca', ne Judas, zri'ine Jacobo. <sup>14</sup> Xúgute benne' caní tu dxelezházgazeze' nen benne' biche Jesús, ne María xrna Jesús, ne xebal-la nu'ula ca', chee xuluchálajlene' Dios.

<sup>15</sup> Lu zra ca' Pedro guzé' laduj bi bíchedxu ca', zaj naque' ca tu gaxúa galaj bénneache, na' guzre' le':

<sup>16</sup> —Le'e, bi bícha'dau', ben na ba xen guca li ca da gunná Be' Lá'azxa lu xiche chee Dios, da na' gunná David waláz chee Dios ca naca da dxal-la' gaca chee Judas, bénnea' guché' e benne' ca' gulel-le' Jesús. <sup>17</sup> Judas nigá guzúalene' dxi'u tu zren, ne guqué' dxi'u tuze lu zrin nigá. <sup>18</sup> Bxa'u tu cue' xezr la xu ca naca lazruj chee Judas, da guzú' lu ne'e chee da calela da bene'. Na' benne' nigá xejacházíe' suxíchajla, ne gutín le'e, na' bdxuaj ca naca zrájlué'. <sup>19</sup> Xúgute benne' zaj zre' e Jerusalén belenne' da nigá, na' buluzúe' la xezr la xu na' Acéldama, da zéajé' na: Xezr La Xu Chee Dxen. <sup>20</sup> Guca li ca da dxal-la' gaca chee' lawe' da naxúaj lu xiche lá'azxa naga zaj naxúaj salmo ca', da dxenná na:

Xegá'ana cá'aze lízre',

ne quebe nu chilá' sua na'.

Cá'anqueze dxenná na:

Xetú benne' té' e waláz chee'.

<sup>21</sup> Zaj zra' nigá benne' ca' gusá'acalene' dxi'u ca naca dxácaté guzúale Jesús dxi'u. <sup>22</sup> Guzú lau na gate bchua Juan Jesús nisa, cadxa bzrin zra begüéne' xabáa. Dxun na ba xen tu benne' caní gaque' dxi'u tuze chee xechébe' ca guca gate bebán Jesús lu xel-la' gute.

<sup>23</sup> Nadxa gulebéajé' chupa benne' ca', José ne Matías. José na' léqueze' Barsabás ne léqueze' Justo. <sup>24</sup> Buluchálajlene' Dios, gulenné':

—Xran, Lue' nézqueznu' ca naca da xu'u lu xichaj lázxdau xúgute bénneache. Ble'e netu' nula benne' chupa caní ba nabéaju' Lue', <sup>25</sup> chee gaque' gubáz chiu', ne xedé' waláz chee Judas, bénnea' bnité' da naca chee' lawe' da bene' dul-la, na' bexíajé' lataj naga naca chee'.

<sup>26</sup> Nadxa gulebéajé' da gaca bea na, na' bexala Matías, na' gúcaté' tuze benne' chinéaj gubáz ca'.

## 2

*Ca guca gate bla' Be' Lá'azxa*

<sup>1</sup> Ca bzrin zra Pentecostés, xúgute benne' ca' dxeléajle'e chee Jesús zaj nazrague' tuze lataj.  
<sup>2</sup> Ca' guca, belenne' tu schaga da za' lu be' zran xabáa, ca dxun tu be' bđunu', na' belén na xúgute benne' zaj zre'e lu xu'u naga zaj dxe'e. <sup>3</sup> Nadxa belelé'ene' lu be' xi' ca', da dxelala, na' xeajlezúa na xíchaj tu tu benne' ca'. <sup>4</sup> Nadxa guzuáletequeze Be' Lá'azxa xúgute benne' ca', na' tu tue' gulezú lawe' dxuluchálaje' dizra' nazrala cáteze dxuchine Be' Lá'azxa le'.

<sup>5</sup> Ca lu zra ca' zaj zra' xezre Jerusalén benne' judío ca' dxulucá'ana szrénqueze' Dios. Benne' caní zá'aque' xúgute xezr la xu zaj dxe' lu xezr la xu nigá. <sup>6</sup> Ca belenne' bēnneache ca naca schaga na' da dxaca na, na' belexezrague', ne quebe zaj nézene' bi na', lawe' da dxelén tu tu benne' ca' dizra' cha chee' da dxuluchalaj benne' ca' dxeléajle'e chee Jesús. <sup>7</sup> Na' belexebánele'ene', ne belexruse', ne gulé ljwezre' tue' xetúe':

—Zaj naca benne' Galilea xúgute benne' caní dxuluchálaje'. <sup>8</sup> ¿Ájazra na' dxendxu dxuluchálaje' dizra' cha chegdxu dxi'u? <sup>9</sup> Zradxu dxi'u nigá, nácadxu benne' xezr la xu Partia, ne benne' xezr la xu Media, ne benne' xezr la xu Elam, ne benne' xezr la xu Mesopotamia, ne benne' chee xezre ca' zaj nababa Judea, ne benne' chee naga nababa Capadocia, ne benne' chee naga nababa Ponto, ne benne' chee naga nababa Asia, <sup>10</sup> ne benne' chee naga nababa Frigia, ne benne' chee naga nababa Panfilia, ne benne' xezr la xu Egipto, ne benne' chee xezr la xu Africa da zua dédexa chee xezre Cirene. Cá'anqueze zaj zra' benne' xezr la xu Roma nigá. Bal-la benne' Roma ca' zaj naque' benne' judío, benne' gulálaje' ca', ne benne' zaj nazi'e ca naca da nadxixruj bea chee benne' judío ca'. <sup>11</sup> Cá'anqueze nácadxu benne' xezr la xu Creta, ne benne' xezr la xu Arabia. Xúgutedxu dxendxu lu dizra' cha chegdxu dxuluchalaj benne' caní ca naca da zren ca' da dxun Dios.

<sup>12</sup> Xúgute' belexebánele', ne quebe zaj nézene' bi da dxaca na', na' gulenaba ljwezre' tue' xetúe':

—¿Bizra zéaje da nigá?

<sup>13</sup> Benne' xula ca' belún le', gulenné':

—Dxelezuzre benne' caní.

*Da bchalaj Pedro lau benne' ca'*

<sup>14</sup> Nadxa guxasa Pedro nen benne' chinéaj gubáz chee Cristo, na' zizraj bchálajlene' bēnneache zaj zra' na'. Dxe'e le':

—Le'e, benne' Judea, ne xúgutele le'e nazrágale xezre Jerusalén. Dxa-la' nézele le'e da nigá. Le xen xanne' ca naca da xapa' le'e. <sup>15</sup> Netu' quebe dxezúzentu' ca dxéquele le'e. Za gudete xrsila na'a. Netú benne' quebe dxezúzrene' ca ná'queze. <sup>16</sup> Da nigá naca da gunnáqueze Joel, bēneea' bchálaje' waláz chee Dios gate na' gunné':

<sup>17</sup> Caní dxenná Dios: “Lu zra bzēbe wasél-laqueza'

Be' Lá'azxa chia' chee súalene' xúgute bēnneache.

Zrí'inele bi biu ne bi nu'ula welenné'quezebe' waláz chia' neda'.

Bi cuide' ca' welelé'equzebe' ca da gulé'eda'-be'.

Na' benne' gula ca' welenné'quezene' xēla.

<sup>18</sup> Ca lu zra na' guzuáqueza' Be' Lá'azxa chia'

nen bi wēn zrin chia' ca', benne' biu ne nu'ula ca',

na' guchálajquezebe' waláz chia' neda'.

<sup>19</sup> Lu be' zran xabáa gulé'equzda' xel-la' waca chia', na' lu xezr la xu dxe'ela gulé'eda' da xelunna bea na, dxen, ne xi', ne zren da naca ca beuj gasaj.”

<sup>20</sup> Gubizra xechul-la na,

na' beu' xexaca na xrna ca dxen

nedxu ca za zrin zra xelá' Xránadxu.

Zra na' gaca na tu zra chee da xebánedxu

ne zra na' walé'equzdxu xel-la' szren chee Dios.

<sup>21</sup> Nadxa xelelá xúgute benne' ca'

xelenné' Xránadxu lu xel-la' dxeleajlí lazre' chee'.

<sup>22</sup> Chee le' na', le'e, benne' Israel, le xen ca da xapa' le'e. Jesús, benne' Nazaret, guque' tu benne' bedxúaje' xrlátaje lau xúgutele le'e ne chee da ben Dios laule le'e. Lu na' Jesús Dios blé'ene' da zan da dxebánedxu, ne xel-la' waca ca', ne da dxelunna bea na ca ba nézqueze le'e. <sup>23</sup> Gate Dios be'e lataj tu benne' bdege' Le' lu na'le le'e cáteze bache núnqueze' nedxu, nadxa le'e gudél-lale Le', na' bētele Le' gate na' bdele Le' lu na' benne' ca' dxelunge' da calēla, benne' ca' buludé'e Le' xaga bēguaj naga gutie'. <sup>24</sup> Nadxa Dios bsebane' Le', bebéaje' Le' lu xel-la' gute. Quebe guxú'u ájala xegá'ane' chalásaze lu xel-la' gute na'. <sup>25</sup> Ca naca da nigá bchalaj wenná bea David ca naca chee Jesús na', gate gunné':

Belé'equezda' Xrana' lawa' nigá.

Le' zue' cuita' xabela, chee quebe bi guchebe na neda'.

<sup>26</sup> Chee le na' gubelé'eda', ne bil-la' lu xel-la' dxebé chia'.

Chee le na' guxrén lázrequeza' Le' gate gatia',

<sup>27</sup> lawe' da quebe xucá'anaquezu' neda' lu lataj chee benne' gate.

Quebe güequezu' lataj guzru bel-la' dxen chia' neda',

naca' benne' wen zrin chiu', ne benne' nazrí'inu'.

<sup>28</sup> Blé'equezenu' neda' ca dxal-la' guna' chee zrué'eda' xel-la' nabán,

na' gúnnale'u neda' xel-la' dxebé lawe' da zúalenu' neda'.

<sup>29</sup> Le'e, bi bícha'dau'. Naca bea na gute xra xrtáudxu David, na' bulucache' le' lu xedxu

ba chee' da zúaqueze na na'a nagá zúadxu. <sup>30</sup> David na' guque' tu benne' bchálaje' waláz

chee Dios, ne gunézene' ca da nachebe lázrequeze Dios gune'. Gunné lie' tu benne' zri'ine

zre sua David na' gaque' Cristo, Bénnea' nna béaqueze', xeque'e lawe' chee David. <sup>31</sup> Ca'

guca, David nigá belé'equezne' nedxu ca naca da dxal-la' gaca chee Cristo, na' bchálaje' ca

guca gate bebán Cristo, gunné': "Benne' nigá quebe xegá'anaqueze' lataj chee benne' gate,

ne quebe gúzruqueze bel-la' dxen chee'." <sup>32</sup> Caní guca, Dios bsebané' Jesús nigá, na' netu'

dxexeché'entu' da li ca guca da nigá. <sup>33</sup> Ca' guca, Dios bzue' Jesús lu xabáa chee' nen

xel-la' waca chee', na' be'e Le' lataj gusel-le' Be' Lá'azxa chee' nigá ca nachebe lázrequeze'

nedxu gune', na' xúgute da caní dxelé'ele le'e, ne dxenle zaj naca na da dxun Be' Lá'azxa na'.

<sup>34</sup> David na' quebe begüéne' xabáa, san léqueze' gune':

Xránadxu Dios guzre' Xrana':

"Gudxe'e cuita' xabela nigá

<sup>35</sup> ca zrindxa zra guzúa' benne' dxedábague' lue' chee' nna be'enu le'."

<sup>36</sup> Xúgutele le'e, benne' Israel, dxal-la' nézquezle da nigá: Jesús nigá, bénnea' bda'le le'e

xaga béguaj, Dios ba nuné' Le' Xránale ne Cristo cheele, Benne' guselé' le'e.

<sup>37</sup> Gate benne' ca' belenne' da nigá, na' belexewí'ine lazre', na' buluchebe' Pedro, ne

benne' gubáz ca' chee Jesús, dxelé'e le':

—Benne' bíchentu', ¿ájazra dxal-la' guntu' xca'?

<sup>38</sup> Nadxa gunná Pedro:

—Le xebí'i lazre' lau Dios, ne le chua nisa tu tule chee gácale Jesucristo tuze, chee gunité

lau Le' cheele le'e ca naca dul-la da nabágale. Ca' gaca, nadxa Dios sél-laqueze' Be' Lá'azxa

chee' chee súalene' le'e. <sup>39</sup> Da nigá nachebe lazre' Dios naca na cheele le'e, ne chee zrí'inele,

ne chee xúgute benne' zaj zre'e zitu', xúgute benne' ca' dxaca lazre' Dios nne'.

<sup>40</sup> Ca naca dizra' nigá, ne xezícaladxa dizra' da bchalaj Pedro, bzéajni'ine' benne' ca', na' gunné':

—Le la ládujla benne' wen da caléla caní.

<sup>41</sup> Ca'an guca, benne' ca' guléajle'e chee da bchalaj Pedro belexedxúe' nisa, na' lu zra na'

belaca tuze ca chi dxua gaxúa benne' nen benne' ca' ba dxeléajle'e chee Jesús. <sup>42</sup> Na' xúgute

benne' ca' gulezúa típaqueze' ca da dxulusede benne' gubáz chee Jesús le', na' gulezúe' tuze

nen le sa' ljwezre' chee bululáwizre' Dios, ne buluzrague' chee xelawe' da dxusá lázredxu ca

guca gate gute Cristo.

*Ca belún benne' nedxu ca', benne' guleajlí lazre' Cristo*

<sup>43</sup> Xúgute benne' ca' gulezrebe' gate belelé'ene' xel-la' waca zante, ne da dxelunna bea na

da dxelún benne' gubáz chee Jesús. <sup>44</sup> Xúgute benne' ca' dxeléajle'e chee Jesús gulaque' tuze,

ne bulunézruje' da de chee' tué' xetúe'. <sup>45</sup> Belutié' xúgute da zaj nape', ne bulunézruje' dumí

na' chee benne' ca' ca da dxelaxázzre'. <sup>46</sup> Xugu' zra belexezrague' lu xudau', ne cá'aqueze

lu lizre cha chee', chee xelawe' da dxusá lázredxu ca guca gate gute Cristo. Gulawe' tu zrente

lu xel-la' dxelebé, ne duté xel-la' dxelexruj lazre' chee'. <sup>47</sup> Belúe lá'ang' Dios, na' xúgute

bénneache guléquene' benne' ca' ba lá'ana. Tu zra tu zra Xránadxu bzane' benne' ca' chee

Cristo ca dxelezi' lu ne'e tu tué' Cristo.

### 3

*Dxexaca tu benne' zrinnaj*

<sup>1</sup> Tu zra xjaque' Pedro ne Juan lu xudau' dxexedá' chunna, da naca na gate dxululáwizraj

bénneache Dios lu xudau'. <sup>2</sup> Tu zra tu zra zua tu benne' na' naque' zrinnaj ca nálajte'.

Dxeleché' benne' ljwezre' le' xudau' na', ne dxelebeche' le' dxu'a dxa xu'u na' nazí le na:

Da Xrtante, chee nabe' guna' chee benne' dxelu'e na'. <sup>3</sup> Gate benne' zrinnaj nigá blé'ene'

Pedro ne Juan, dxelu'e xudau', na' gunabe' guna' lau benne' caní. <sup>4</sup> Nadxa Pedro ne Juan

gulenné'e le', na' Pedro guzre' benne' na':

—Gunná' netu'.

<sup>5</sup> Benne' na' gunná' xánnie' le' lawe' da dxéquene' bi xulunezruje' le'. <sup>6</sup> Pedro guzre' le':



—Quebe bi de chia' dumí plata ne dumí oro. Da napa' gunna' lue'. Lu La Jesucristo, benne' Nazaret, guxasa gudá.

<sup>7</sup> Nadxa Pedro guqé'e na' benne' zrinna' na' da zua xabêla, ne bechise' le', na' ca bēne' caní, belexezúa chacha ni'e, ne béchajdu chee' ca'. <sup>8</sup> Nadxa benne' zrinna' na' guxritie' tu, na' guzé', ne guzú lawe' dxedé'. Guxú'e nen benne' ca' xudau', dxedé', dxexritie', ne dxue lá'ane' Dios. <sup>9</sup> Xúgute benne' zaj zre'e na' belelé'ene' le' dxedé', ne dxue lá'ane' Dios. <sup>10</sup> Belexebánene', ne belezrebē' ca da belelé'ene' guca na, lawe' da zaj núnbe'e benne' zrinna' na', ne zaj nézene' naque' bēnnea' dxebé'e dxenabe' guna' ga dxelexú'u bēnneache xudau', da na' nazí le na Da Xrtante.

*Da bchalaj Pedro la chila da nazí le na La Chila Chee Salomón*

<sup>11</sup> Benne' zrinna' na', benne' ba bexaque', quebe bsane' na' Pedro ne Juan, na' xúgute benne' dxelxebánene', ne xjaque' naga nazí le na La Chila Chee Salomón, naga zaj zra' Pedro ne Juan. <sup>12</sup> Gate ble'e Pedro da nigá, na' guzre' benne' ca':

—Le'e, benne' Israel, ¿bizr chee na' dxebánele le'e? ¿Bizr chee na' dxenná'le netu' caní, ne dxéquele netu' bexuntu' benne' nigá, na' dxexedé' ne chee xel-la' waca cheentu', u ne chee xel-la' benne' xudau' cheentu'? <sup>13</sup> ¡Cabi! Dios chee xra xrtáudu Abraham, ne Isaac, ne Jacob bca'ana szrene' Zrí'ine', Jesús, Bēnnea' bdele le'e lu na' benne' xu'u lawe'. Gate guca lazre' Pilato gusane' Le', le'e quebe guca lázrele. <sup>14</sup> Bzúale chala'ala Benne' na' naque' lá'azxa ne xrlátaje, na' gunábale la tu benne' wen da zrinna'. <sup>15</sup> Ca'an guca, bétele le'e Bēnnea' dxunne' bēnneache xel-la' nabán, san Dios bsebané' Le' ládujla benne' gate, na' netu' dxexehé'entu' chee da nigá. <sup>16</sup> Guca lu La Jesús nigáqueze, u nnadxu guca na lawe' da guxéajle chee La Jesús, chee bezí' le dípa benne' nigá dxelé'ele, ne núnbeale le'. Lawe' da guxéajle chee Jesús, ba bexácatequeze' ca dxelé'ele le'e xúgutele.

<sup>17</sup> Le'e, Bi bicha', nezda' gate le'e, ne benne' xíchaje ca' chee bétele Jesús, quebe guque be'ele ca da dxunle. <sup>18</sup> Dios bēne' guca caní chee guca li ca da ba gunné' nédxute gate buluchalaj waláz chee' benne' ca', na' gulenné' dxal-la' si' saca Cristo chee Dios. <sup>19</sup> Chee le' na, le xebi' lázrele, ne le xexaca Dios tuze, chee xusule' dul-la nabágate. Nadxa Xránadxu Dios gunné' le'e lataj xexaca chawe' xichaj lázraule. <sup>20</sup> Sel-le' cheele Jesús, Bēnnea' guchebe lazre' sel-le' cheele nédxudaute. <sup>21</sup> Lu zra caní Jesucristo dxal-la' xegá'ane' xabáa cadxa gucá'ana chawe' Dios xúgute da dxaca, ca na' gunné' lu dxu'a benne' ca' buluchálaje' waláz chee' nédxudaute. <sup>22</sup> Ca' naca na, lawe' da gunná Moisés, guzre' xra xrtáudu ca': "Sel-la Xránadxu Dios chee tu benne' guchálaje' waláz chee'. Gaque' tu benne' ládujla bi bíche ca', na' sel-le' le' chee ca gusel-le' neda'. Le xen xanne' xúgute da xe'e le'e, <sup>23</sup> lawe' da welebía xi' xúgute benne' quebe xelapa Le' ba lá'ana, na' cuase' benne' ca' ládujla xezre Israel."

<sup>24</sup> Xúgute benne' ca', benne' buluchálaje' waláz chee Dios, guzú lau na gate zua Samuel, ne zeaj na, buluchálaje' chee zra caní. <sup>25</sup> Le'e dxezile ca da gulenná benne' ca' buluchálaje' waláz chee Dios, ne nácale tuze lu xel-la' wezría da ben Dios nen xra xrtáule ca', ca guzre' Abraham: "Lu na' benne' zrí'ine zre su' gaca chawe' chee xúgute bēnneache zaj zre'e lu zezr la xu." <sup>26</sup> Gate Dios bsebané' Zrí'ine', gusel-le' Le' nedxu laule le'e chee gaca chawe' chee, chee gusanle tu tule le'e da calela da dxunle.

## 4

*Pedro ne Juan dxelezzrine' lau benne' xu'u lawe' ca'*

<sup>1</sup> Pedro ne Juan ne dxuluchálajene' benne' ca' gate belezrín na' bxruze ca', ne benne' xu'u lu ne'e bi xra'aga chee xudau', ne benne' saduceo ca'. <sup>2</sup> Dxelezzre' lawe' da dxulusede Pedro, ne Juan benne' ca', dxelenné' welexebán benne' gate lawe' da bebán Jesús. <sup>3</sup> Nadxa gulel-le' Pedro ne Juan, na' guleché'e le' lizre xia ca zrindxa zra xula lawe' da ba dxezré' zra na'. <sup>4</sup> Guléajle' benne' zan ládujla benne' ca' belénne' da bchalaj Pedro, na' cátime benne' ca' dxeléajle' chee Jesús zaj naque' ca gaxxu' cue' chi gaxúa benne' biu.

<sup>5</sup> Zra xula na' benne' xíchaje ca' chee judío ca', ne benne' gula sina ca', ne benne' ca' dxuluxuzájle' da nadxixruj bea na, belezrague' lu xezre Jerusalén <sup>6</sup> nen Anás, bxruze blau, ne Caifás, ne Juan, ne Alejandro, ne xúgute benne' xrtia bxruze blau ca'. <sup>7</sup> Nadxa gulenná be'e xaejlexrí'e Pedro ne Juan, na' buluzé' le' laduj naga zaj zre'e, na' buluchebe' le':

—¿Bi xel-la' dxenná bea, u nu lu La dxunle da caní?

<sup>8</sup> Nadxa Pedro, zúalequeze Be' Lá'azxa le', guzre' benne' ca':

—Le'e, benne' xíchaje ca' chee bxruze, ne benne' gula sina ca', <sup>9</sup> le'e dxuché'bele netu' chee tu da chawe' da guca chee tu benne' we', chee nézele ájala guca bexaca bēnnea'. <sup>10</sup> Dxuzentu' xúgutele le'e chee xeleneze xúgute benne' Israel, benne' nigá ze' lau xúgutele le'e, ba bexaque' lu La Jesucristo, Benne' Nazaret, Bēnnea' bda'le le'e le'e xaga bégua, na' Dios bsebané' Le' ládujla benne' gate. <sup>11</sup> Jesús nigá naque' xiaj na', le'e, benne' wen xu'u bzúale chala'ala, san na' Lá'queze' naque' xiaj blau chee xu'u. <sup>12</sup> Quebe nu chilá' bēnneache

seque' guselé' dxi'u lawe' da quebe ne gunna Dios xetú La bèneache lu xezr la xu nigá, benne' séquene' guselé' dxi'u.

<sup>13</sup> Gate benne' xu'u lawe' belelé'ene' Pedro ne Juan dxuluchálaje' du lazre', ne dxeleque bé'ene' quebe zaj nazédie' lu na' bxruze ca', san zaj naque' benne' zre'e cá'aze, na' belexebáne benne' xíchaje' ca', san guleque bé'ene' zaj naque' benne' guledálene' Jesús. <sup>14</sup> Cá'anqueze bènea' bexaque' ze' na' nen Pedro ne Juan, na' chee le na' quebe gulezéquene' bi xelenné' chee'. <sup>15</sup> Nadxa gulenná be'e belexedxúaj benne' gubáz ca' ládujla le'. Cate' belexegá'ana leze' buluchebe ljwezre', <sup>16</sup> dxeleenné':

—¿Ájazra gundxu chee benne' caní? Xúgute' benne' zaj zre'e Jerusalén zaj nézene' belune' xel-la' waca zren nigá, na' quebe gaca tábagadxu na. <sup>17</sup> Na'a, chee québedxa zrilu da nigá láwela bèneache, guxrúsadxu benne' caní chee québedxa nu xuluchálajene' lu La Jesús.

<sup>18</sup> Nadxa gulenná be'e belexezrin Pedro ne Juan, na' gulenná bé'ene' le' québedxa nu xuluchálajene', ne quebe nu xulusédene' lu La Jesús. <sup>19</sup> Pedro ne Juan belexechebe':

—Le nna' le'e che naca xrlátaje lau Dios guzúazrantu' xrtízrale le'e, quézcala xrtizra' Dios. <sup>20</sup> Netu' quebe gaca gusantu' gucháljantu' ca naca da blé'entu', ne da béntu'.

<sup>21</sup> Nadxa benne' xu'u lawe' ca' buluxruse' Pedro ne Juan, san bulusané' le'. Quebe belezrelne' ájala xelune' xuluzaca zi'e le' lawe' da dxelúe lá'ana xúgute' bèneache Dios ca naca da ba guca. <sup>22</sup> Bènea' bexaque' ne chee xel-la' waca zren nigá ba gudé' chua iza.

*Benne' ca' dxelájle'e chee Jesús dxelenabe' lau Dios gunézruje' le' xel-la' dxuluxrén lazre'*

<sup>23</sup> Gate bulusané' Pedro ne Juan, benne' caní xjaque' naga zaj zra' benne' ljwezre', na' buluzenne' le' ca naca xúgute' da gulenná benne' xíchaje' ca' chee bxruze ca', ne benne' gula sina ca'. <sup>24</sup> Gate belenne' da caní, xúgute' buluchálajene' Dios, gulenné':

—Xránantu', Lue' nacu' Dios. Benu' xabáa, ne xezr la xu, ne nísadau', ne xúgute' da zaj nnita lataj ca'. <sup>25</sup> Lue', lu na' Be' Lá'azxa, ne lu dxu'a David, benne' wen zrin chiu', gunnáu':

¿Bizr chee na' dxelasa bèneache xezr la xu ca', na' bèneache dxelegú'u lazre' da quebe bi zaj zaca?

<sup>26</sup> Benne' wenná bea ca' chee xezr la xu gulune' tuz, na' benne' blau ca' chee xezr ca' belezrague' chee xeledábague'e Xránadxu Dios, ne Cristo chee'.

<sup>27</sup> Da li, Herodes. ne Poncio Pilato belezrague' lu xezre nigá nen benne' zitu' ca', ne nen benne' Israel ca', na' guledábague' Zri'inu' Lá'azxa, Jesús, Bènea' bzúaquezu' Lue'. <sup>28</sup> Ca'an guca, benne' ca' belune' xúgute' ca da ba núnquezu' Lue' dxal-la' gaca na. <sup>29</sup> Na'a, Xran, gunná' ca dxuluxruse' netu', ne benna netu', wen zrin chiu' ca', xel-la' dxuxrén lazre' chee guchálajntu' xrtizru', ne quebe zrébentu', <sup>30</sup> ne benna netu' xel-la' waca chiu' chee gaca xexuntu' benne' we' ca', ne chee guntu' xel-la' waca chee xabáa lu La Zri'inu' Lá'azxa Jesús. ¡Ca'an gaca!

<sup>31</sup> Gate bexuzre buluchálajlene' Dios, lu lataj naga zaj nazrague' guzrú', na' xúgute' guzúale Be' Lá'azxa le', na' buluchálaje' xrtizra' Dios duté xel-la' dxuluxrén lazre' chee'.

*Xúgute' dxelune' tuze ca naca da zaj nape'*

<sup>32</sup> Benne' zan ca', benne' dxelájle'e chee Jesús gulaque' tuze lu xichaj lázrdawe'. Netúe' quebe gunné' cheeze' naca da nape'. Xúgute' da zaj nape' zaj nune' tuze. <sup>33</sup> Benne' gubáz ca' chee Jesús, nen duté xel-la' dxeleenná bea buluchálajqueze' ca guca gate bebán Xránadxu Jesús, na' Dios bene' guca chawe' chee xúgute' benne' ca'. <sup>34</sup> Quebe nu guzúa ládujla benne' ca' bi bxázrjene' lawe' da caní belún xúgute' benne' zaj nape' xezr la xu ca' u xu' ca'. Belutie' na, na' belú'e dumí na', <sup>35</sup> ne xeajlenézruje' na lu na' benne' gubáz ca', chee xelexele'e na tu tu benne' ca' ca da dxelechínene'. <sup>36</sup> Zua ládujla benne' ca' tu benne' xrtia Leví le' José, benne' gúlaje' Chipre da naca tu xezr la xudau' naxechaj nísadau' le' na. Benne' nigá, buluzta gubáz ca' le' Bernabé, da zéaje na benne' dxexúe zrene'. <sup>37</sup> Benne' nigá betie' tu xezr la xu da nape', na' bi'e dumí na', ne bnézruje' na lu na' benne' gubáz ca'.

## 5

*Dul-la da belún Ananías ne Safira*

<sup>1</sup> Xetú benne' le' Ananías nen zru'ule' Safira, betie' tu xezr la xu chee'. <sup>2</sup> Benne' nigá bequé'e late' dumí na', na' da begá'anze bi'e lau benne' gubáz ca', ne gunné' ca naca na'. Zru'ule' ca naca na nézene'. <sup>3</sup> Nadxa guzre Pedro le':

—Ananías, ¿bizr chee na' be'u lataj Satanás guxú'u na lu xichaj lázrda'u chee si xe'u Be' Lá'azxa, na' beca'u late' chiu' ca naca da guzú'u chee xezr la xu na'? <sup>4</sup> ¿Quebe guca xezr la xu na' chiu'? Na' gate betiu' na, ¿quebe guca dumí na' chiu'? ¿Ájazra guca benu' da nigá? Dios guzú xe'u, quegá bèneache.

<sup>5</sup> Ca ben Ananías da nigá, na' guzré'e gútete'. Xúgute benne' belén da nigá belezrébelé'e.  
<sup>6</sup> Nadxa gulebiga bal-la bi cuide' ca', ne buluchélabé' le' tu ladxe', na' belúabe' le' cheajlecáchebe' le' lu ba.

<sup>7</sup> Ca guca chunna hora gudé na', guxu'u zru'ula Ananías na', ne quebe nézene' bi ba guca.

<sup>8</sup> Pedro bchebe' le':

—Gunná, ¿bétele le'e xezr la xu na' ca dxennale guzile na?

Gunná Safira na':

—Awe', ca naca na'.

<sup>9</sup> Nadxa Pedro guzre' le':

—¿Bizr chee na' benle le'e tuze dizra' gúquele si xebe Be' Lá'azxa? Chale'aj na' ba zesi'aca bi ca' xajlecáchebe' benne' chiu', na' na'a xelúatequezebe' lue'.

<sup>10</sup> La' ná'queze nu'ula na' guzré'e gútete' zran ni'a Pedro. Gate belú'u benne' cuide' ca', na' belelé'ebe' le' ba gutie', na' belexebéajbe' le' xajlecáchebe' le' cuita ba chee benne' chee'. <sup>11</sup> Xúgute benne' ca' zaj nazrague' na', ne xúgute bénneache, benne' belén da caní belezrébelé'e.

*Benne' gubáz ca' dxelúnle'e xel-la' waca chee xabáa*

<sup>12</sup> Benne' gubáz ca' belúnle'e xel-la' waca chee xabáa, ne da dxelunna bea na lau benne' ca', na' xúgute' belezrague' La Chila Chee Salomón, da naca na chee xudau'. <sup>13</sup> Netú benne' ca', benne' quebe dxeléajle'e chee Jesús, quebe belexázrene' guné' benne' ca' tuze, san xúgute bénneache belape' benne' caní ba lá'ana. <sup>14</sup> Benne' zandxa gulezú lawe' dxeléajle'e chee Xránadxu, benne' biu ne nu'ula ca'. <sup>15</sup> Ca' guca na, belebéajé' benne' we' ca', zaj de' lu da dxeláta'ne', ne da'a chee', na' gulixruge' le' la neza ca' chee gate te Pedro na', na' te zrula chee' lawe' benne' ca'. <sup>16</sup> Cá'anqueze benne' xezre walizre ca' belelé'e lu xezre Jerusalén, zaj nu'e benne' we' chee' ca', ne benne' ca' zaj xu'e be' xriwe' ca', na' xúgute' belexaxaque'.

*Benne' gubáz ca' dxelu'e lizre xia*

<sup>17</sup> Nadxa bxruze blau, ne benne' saduceo ca' zaj zúalene' le', gulaque' xa lazre', <sup>18</sup> na' gulel-le' benne' gubáz ca', ne buluzré'e le' lizre xia. <sup>19</sup> Na' tu gubáz chee xabáa chee Xránadxu gusaláje' dxa xu'u chee lizre xia na' chizrela, na' bebéajé' benne' ca', ne dxé'e le':

<sup>20</sup> —Le chjaca, ne le cheajsé lu xudau', ne le guzén benne' ca' ca naca chee xel-la' nabán cube nigá.

<sup>21</sup> Ca belenne' da nigá, zra xula belú'e chila xudau' che zílala, na' gulezú lawe' dxulusédené' benne' zaj zre'e na'.

Dxácaté na', bxruze blau na', ne benne' zraléne' le', buluchague' benne' ca' chee xu'u lawe' blau, ne benne' gula sina ca' chee xezre Israel, na' gulenná be'e xelexebéajé' gubáz ca' zaj xu'e lizre xia. <sup>22</sup> Gate belezrín bi xra'aga chee xudau' na', quebe nu belelé'ene' lu xu'u lizre xia, na' belexezrine', ne buluzenne' benne' ca', <sup>23</sup> dxelenné':

—Gate bzrintu' lizre xia na', naxezxuj tipa na, na' benne' dxjaque' wedil-la zaj zre'e dxu'a dxa xu'u na', ne dxuluxúe' na, san gate gusalajntu' na, quebe nu bezrélentu' lu xu'u na'.

<sup>24</sup> Gate bxruze blau, ne benne' xíchajé ca' chee bxruze ca', ne xíchajé chee bi xra'aga ca', belenne' da nigá, na' buluchebe ljwezre' ga cheajsé da nigá. <sup>25</sup> La' ná'queze bzrin tu benne' guzre' le':

—Benne' ca' bzra'le le'e lizre xia zaj zre'e lu chila xudau', dxulusédené' bénneache.

<sup>26</sup> Nadxa benne' xíchajé chee bi xra'aga chee xudau' guxiájléne' bi xra'aga ca', na' xajlexrí'e gubáz ca'. Quebe bi belúnene' le' lawe' da belezrebe' bi xelún benne' ca' dxelenne' chee gubáz ca', lawe' da dxeléque' xelu'e le' xiaj. <sup>27</sup> Gate xajlexrí'e gubáz ca', na' buluzré'e le' lau benne' xu'u lawe' blau, na' gunná bxruze blau na', dxé'e benne' gubáz ca':

<sup>28</sup> —Netu' bzrúnantu' le'e quebe guchálajledxale bénneache lu la bénnea'. ¿Bizra na' benle? Ba bzenle ca naca benne' zaj zre'e xezre Jerusalén ca naca da dxusédele, ne dxaca lázrele gusebágate netu' xel-la' gute chee benne' na'.

<sup>29</sup> Nadxa belexechebe Pedro, ne xezícadxa benne' gubáz ca':

—Dxala' guzúantu' xrtizra' Dios, quegá xrtizra' bénneache. <sup>30</sup> Dios chee xra xrtáudxu ca' bsebange' Jesús, Bénéa' bétele le'e bda'ale Le' xaga béguaj. <sup>31</sup> Dios bca'ana szrene' Le' chalá'a xabela chee', ne bené' Le' Benne' Blau, ne Weselá, chee gata' lataj chee benne' Israel xelexebi'i lazre' chee gunite lau Dios dul-la chee'. <sup>32</sup> Chee le' na' netu' dxexechébentu', ne cá'anqueze dxun Be' Lá'azxa. Dios dxunézruje' Be' Lá'azxa benne' dxuluzúe' dizra' chee'.

<sup>33</sup> Gate belenne' da nigá, na' belezré'e, ne gulaca lazre' xelútie' gubáz ca'. <sup>34</sup> Ládujla benne' xu'u lawe' ca' zua tu benne' fariseo le' Gamaliel. Naque' benne' dxuxuzájle'e da nadxixruj bea na, na' dxelápale'e bénneache le' ba lá'ana. Benne' nigá guzé', na' gunná bé'ene' xelexebéajé' gubáz ca' chalé'ajla tu chí'idau'. <sup>35</sup> Nadxa guzre' benne' xu'u lawe' ca':

—Le'e, benne' Israel, le guxúe xanne' ca gunle chee benne' caní. <sup>36</sup> Le gusá lazre', bache guca zane' iza, gudábaga Teudas xu'u lawe', gunné' naque' tu benne' blau, na' xjácalé ca tapa

gaxúa benne' biu' le'. Na' belutië' le', na' xúgute benne' ca' gulaca le' tuze belexase dinnaje' ca', na' gudé cheë da na'. <sup>37</sup> Gudé na', lu zra gate belú'u bënneache xiche, na' bla' Judas, benne' Galilea, na' benne' zan xjácalenë' le'. Cá'anqueze belutië' bënnea', na' xúgute benne' gulede'ë le' belexase dinnaje'. <sup>38</sup> Cheë le' na', le gusán benne' caní, ne quebe guchixre cheële nen benne' ca'. Che da nigá naca na da dxun beneácheze, wadé cheë na. <sup>39</sup> Che naca na da dxun Dios, quebe séquele le'e guzríá xile na. Le guxúe xanne' cheë quebe tíl-lalële Dios.

<sup>40</sup> Xúgute' belexaque' tuze. Nadxa gulenná be'ë belú'u gubáz ca' da xula, na' ca belú'u benne' ca', na' buluzrunë' le' québedxa nu xuluchálajle benne' ca' lu La Jesús. Gudé na' bulusanë' le'. <sup>41</sup> Na' benne' gubáz ca' belexedxúajë' naga zaj zra' benne' xu'u lawe' ca', dxelebë'ëne' lawe' da be' Dios lataj gulede'ë' xel-la' zi' lawe' da zaj naque' Jesús tuze. <sup>42</sup> Quebe bulusanë' dxuluchálajë', ne dxulusédenë' bënneache ca naca cheë Jesucristo xúgute zra, lu chila xudau', ne lu xu'u ca'.

## 6

### *Dxuluzúë' gazre benne' xelunë' zrin cheë benne' zaj de'ë Cristo*

<sup>1</sup> Lu zra ca', gate zaj dxan benne' ca' zaj de'ë Jesús, na' benne' ca' dxelennë' dizra' griego gulawë' zria benne' ca' dxelennë' dizra' hebreo. Dxelennë' quebe nu dxunezruj xanne' da xeláw nu'ula ba gulate benne' cheë' zaj zre'ë ládújla le' gate dxelísie' xel-la' wagu tu zra tu zra.

<sup>2</sup> Nadxa benne' gubáz ca' buluchague' ca naca benne' ca' dxeléajle'ë cheë Jesús, na' gulé'ë le':

—Quebe naca xrlátaje gusantu' guchálajntu' xrtizra' Dios cheë gudentu' xel-la' wagu.

<sup>3</sup> Cheë le' na', biche ljwézrentu', le quilaj gazre benne' lálwela le'e, benne' zaj naque' du lazre', ne dxeléajni'ing', ne zúale Be' Lá'azxa le', na' le gusebague' zrin nigá. <sup>4</sup> Netu' tu guchálajlezquezentu' Dios, ne gusedantu' bënneache xrtizra' Dios.

<sup>5</sup> Xúgute' gulaza lazre', na' gulequë'ë Esteban, tu benne' dxéajle'ë dutë lázrdawë' cheë Jesús, ne zúale Be' Lá'azxa le'. Cá'anqueze gulequë'ë Felipe, ne Prócoro, ne Nicanor, ne Timón, ne Parmenas, ne Nicolás, tu benne' xezre Antioquía, benne' nédxute' bexaque' tuze benne' judío ca'. <sup>6</sup> Na' guleché'ë benne' caní lau benne' gubáz ca', na' le' bululáwizre' Dios, ne buluzé ne'ë lawe' benne' gazre caní.

<sup>7</sup> Xrtizra' Dios zeaj dxezriluj na, na' benne' ca' dxeléajle' cheë Jesús guxánle'ë lu xezre Jerusalén, na' bxruze zan cheë judío ca' guléajle'ë cheë'.

### *Dxelë-lë' Esteban*

<sup>8</sup> Esteban, tu benne' nápalë'ë xel-la' waca, ne naque' chawe' lau Dios, benë' xel-la' waca ca' cheë xabáa, ne da dxelunna bea na cheë da ca' lau bënneache ca'. <sup>9</sup> Nadxa bal-la benne' cheë xu'u naga dxelezraga bënneache ca', nazí le na Xu'u Cheë Benne' Québedxa Zaj Nada'u, benne' xezre Cirene ca', ne benne' xezre Alejandría ca', ne benne' cheë ga nababa Cilicia, ne Asia, gulezú lawe' dxulutl-lalëne' Esteban dizra'. <sup>10</sup> Quebe gulezéquene' bi xelennë' cheë xrtizra' Esteban lawe' da bchálajë' nen dutë xel-la' sina cheë Be' Lá'azxa. <sup>11</sup> Nadxa gulízrujë' bal-la benne' ca' cheë xelennë' belennë' gunné Esteban dizra' schanni' cheë Moisés, ne cheë Dios. <sup>12</sup> Caní belunë', ne gulu'ë xel-lë' bënneache ca', ne benne' gula sina ca', ne benne' dxuluxuzájle'ë da nadxiruj bea na, na' gulebía di'ë Esteban. Gulel-lë' le', ne guleché'ë le' lau benne' xu'u lawe' blau. <sup>13</sup> Cá'anqueze gulílajë' benne' wën lazre' xelennë' cheë Esteban, na' gulennë':

—Benne' nigá quebe dxusanë' dxennë' schanni' cheë xudau' lá'azxa nigá, ne cheë da bdxiruj bea Dios. <sup>14</sup> Ba bentu' gunné' ca gun Jesús, benne' Nazaret, dxennë' guzríá xi'ë xudau' nigá, ne guché'ë ca naca da zéajlëdxu da bca'ana Moisés.

<sup>15</sup> Nadxa benne' xu'u lawe' ca', ne xúgute benne' zaj zre'ë na', gate gulennë'ë Esteban, belelé'eng' lawë', naca na ca lau tu gubáz cheë xabáa.

## 7

### *Dxexechebe Esteban lau benne' xu'u lawe' ca'*

<sup>1</sup> Nadxa bxruze blau bchebë' Esteban:

—Zaj naca da li da caní?

<sup>2</sup> Na' Esteban bechebë':

—Le'e, benne' gula, ne le'e biche ljwezra', le xene. Xradxu zuë' xabáa ble'e lawë' lau xra xrtáudxu Abraham gate ne zuë' lu xezr la xu Mesopotamia, nédxudxa gate quebe ne xezé'ë cheajxezúë' xezre Harán. <sup>3</sup> Dios guzre' le': "Bsan lázriu' ne xúgute xrtia ljwezru', na' guxiáj lu xezr la xu da gulé'eda' lue'." <sup>4</sup> Nadxa Abraham guzë'ë lu xezr la xu Caldea, xeajsúë' xezre Harán. Ca gudé gute xra Abraham, Dios guché'ë Abraham lu xezr la xu nigá, naga zrale le'e na'a. <sup>5</sup> Dios quebe bi bnézrujë' cheë Abraham naga suë' lu xezr la xu nigá, ne naga gungë' lizre', san guchebe lazre' gunézrujë' le' xezr la xu nigá, na' gate te gate le', na' gaca na cheë zrí'ing', lálcala lu zra na' quebe ne galaj nu zrí'ine Abraham. <sup>6</sup> Cá'anqueze Dios guzre' le'

xelezúa zri'ine zre sue' ca benne' zitu' tu lu xezr la xu chee benne' xula, ne xelaque' benne' zaj nada'u, na' xuluzálaje' le' tapa gaxúa iza. <sup>7</sup> Cá'anqueze guzre Dios le': "Neda' chuga' ca gaca chee xezr la xu na' guchine na zri'ine zre su', na' te na' xelixedxúaje' ga na', ne xelúe lá'ané' neda' lu xezr la xu nigá." <sup>8</sup> Dios bene' tu xel-la' wezríá nen Abraham, na' gunná bé'ene' le' chugu látedu weaj belá' chee benne' biu ca' lu bel-la' dxen chee, tu da guzúa chuchu na xel-la' wezríá na'. Chee le' ga gate gulaj Isaac, zri'ine Abraham, guchugue' látedau' belá' chee bel-la' dxen chee Isaac gate gúquebe' xrunu' zra, na' cá'anqueze ben Isaac chee zri'ine', Jacob, ne cá'anqueze ben Jacob chee zri'ine' ca', benne' ca' gulaque' xra chazrinnu cue' benne' Israel.

<sup>9</sup> Zri'ine Jacob na', benne' ca' zaj naque' xra xrtáudxu, gulaque' xa lazre' chee bi biche' José, na' belutié-be' chee chu'ube' lu na' benne' guchíne'-'be' lu xezr la xu Egipto. Dios guzúalene' José, <sup>10</sup> na' bselé-'be' lu xúgute da zi' da xa'. Bnézruje-'be' xel-la' dxéajini'i, na' ben Dios bezaca ba lázrele' Faraón José na'. Faraón nigá guque' wenna' bea lu xezr la xu Egipto, na' bzue' José gácabe' benne' ca' lu ne'e xezr la xu Egipto na', ne benne' walizre Faraón na'.

<sup>11</sup> 'Nadxa guca gubina' du ca naca xezr la xu Egipto, ne ca naca xezr la xu Canaán, na' xra xrtáudxu ca' quebe bi belezrelene' da xelawe'. <sup>12</sup> Gate ben Jacob de zrua' xtila lu xezr la xu Egipto, na' gusel-le' na' zri'ine' ca', benne' ca' zaj naque' xra xrtáudxu. Da nigá guca na da nedxu lasa xjaque' Egipto. <sup>13</sup> Da gudxupe' lasa xjaque' na', José ble'e lawe' benne' biche' ca', na' ca'an guca gunzeze wenna' bea chee Egipto ga benne' José na'. <sup>14</sup> Nadxa José gunná bé'ene' xeajlexri'e xre', ne ca naca xrtia ljwezre', zaj naque' ga xun chíne'. <sup>15</sup> Ca'an guca, Jacob xeajsúe' Egipto naga gutie', ne naga gulátequeze xra xrtáudxu ca'. <sup>16</sup> Ca gudé na' belú'e bel-la' dxen gate chee benne' ca' lu xezre Siquem, naga bulucache' le' lu ba da zua na lu xezr la xu na' da guzi' Abraham nen dumí da gudízruje' bi ca' zri'ine Hamor lu xezre Siquem na'.

<sup>17</sup> 'Gate ba zua gagu zra gaca li da guchébe lazre' Dios da na' ben chíchue' lau Abraham, na' benne' Israel zaj zre'e xezr la xu Egipto gulánle'e. <sup>18</sup> Nadxa xuzúe' lau dxenná bea tu wenna' bea lu xezr la xu Egipto, benne' quebe núne'e José. <sup>19</sup> Wenna' bea nigá guzi' xe'e benne' ljwézredxu, ne bzálaje' xra xrtáudxu ca', na' gunná bé'ene' le' cheajlecá'ané-'be' bidu dxé'ene chee' ca' chee xelátebe'. <sup>20</sup> Lu zra ca' gulaj Moisés, ne gúcabe' tu bidau' bezaca ba lazre' Dios cheebe', na' xra xrnabe' bulusegule-'be' lizre' chunna beu'. <sup>21</sup> Gate bzrin zra zxa-la' cheajlega'ané-'be', na' bi nu'ula chee wenna' bea na' bequ'e-'be', ne bsegule-'be' ca zri'inequeze'. <sup>22</sup> Chee le' na', Moisés guzúdebe' ca naca xel-la' sina chee Egipto, na' gúcabe' tu benne' nape' xel-la' dxenná bea ca naca da gunné', ne da bene'.

<sup>23</sup> 'Gate bzrig' chua iza, Moisés guca lazre' cheajnné'e benne' ljwezre', benne' Israel ca'. <sup>24</sup> Blé'ene' tu benne' Egipto dxu'e' tu benne' Israel. Chee gúcalene' benne' na', ne chee bebéaj lazre' bènea', betie' benne' Egipto na'. <sup>25</sup> Moisés gúquene' benne' lazrie', benne' Israel ca', xeleque bé'ene' Dios guselé' benne' ca' ne chee le'. Benne' ca' quebe guleque bé'ene' na. <sup>26</sup> Zra xula Moisés blé'ene' chupa benne' Israel dxeledil-le', na' lawe' da guca lazre' xelezrá zrie' benne' ca', na' guzre' le': "Le'e nácale biche ljwézrele. ¿Bizr chee na' dxue ljwézrele?" <sup>27</sup> Nadxa benne' na' dxu'e' benne' ljwezre' bzrigue' Moisés, na' guzre' le': "¿Nu bzua lue' ca benne' xíchaje cheentu' chee guchi'u ca da dxuntu?" <sup>28</sup> ¿Dxa ca lazru' gutiu' neda' ca bentu' neaje, betiu' benne' Egipto na'?" <sup>29</sup> Ca ben Moisés da nigá, na' bzrúnaje' zexíaje' lu xezr la xu chee benne' Madián ca'. Na' guzúe' ca tu benne' zitu', na' bchaga ná'lene' nu'ula, na' gulaj chupa zri'ine'.

<sup>30</sup> 'Ca gudé chua iza, gate zue' le'e xixre' lawe' lataj da zua na gagu lu xi'a Sinaí, na' ble'e lau tu gubáz chee xabáa le' tu lu xi' da dxé' lu xeche' bisigá. <sup>31</sup> Moisés bzrebe' ca naca da blé'ene', san gate gubigue' chee le'e xánnene', benne' chí'i Xránadxu, dxenné'. <sup>32</sup> "Neda' naca' Dios chee xra xrtá'u ca', Dios chee Abraham, ne Dios chee Isaac, ne Dios chee Jacob." Nadxa Moisés guzúe' lau dxezríze' lu xel-la' dxezrebe, na' quebe bexárzjene' nne'e. <sup>33</sup> Xránadxu guzre' le': "Guleaj zrelu' xu'u ni'u lawe' da naca lá'azxa lataj naga dxeléaju'. <sup>34</sup> Neda' ba ble'eda' ca naca da dxelezaca zi' bèneache chia' zaj zre'e' lu xezr la xu Egipto. Dxenda' ca dxelebezre xache', ne ba bla'a chee guselá' benne' ca'. Gudá lue', sel-la' lue' lu xezr la xu Egipto."

<sup>35</sup> 'Lácala benne' ca' buluzúe' Moisés chalá'ala, gulé'e le': "¿Nu bzua lue' ca benne' xíchaje cheentu' chee guchi'u ca da dxuntu?" Dios gusel-le' le' ca benne' xíchaje, ne benne' guselá le', ne chee gubáz chee xabáa na' ble'e lawe' le' lu xeche' bisigá. <sup>36</sup> Moisés na' bebéaje' xra xrtáudxu ca' lu xezr la xu Egipto, ne bene' xel-la' waca ca', ne da gulunna bea na da bene' lu xezr la xu na', ne lu nísadau' Xrna, ne le'e xixre' lawe' lataj da chua iza na'. <sup>37</sup> Moisés nigáqueze guzre' benne' Israel ca': "Dios sel-le' tu benne' guchálaje' waláz chee', benne' gálaje' ládujla xrtia ljwézrele le'e, ca gusel-le' neda'. Chee le' le xen." <sup>38</sup> Cá'anqueze Moisés nigá, bènea' guzúale' benne' ca' le'e xixre' lawe' lataj, tu zren nen gubáz chee xabáa na' bchálaje' le' lu xi'a Sinaí, guzúalene' xra xrtáudxu ca', ne guzi'e dizra' chee xel-la' nabán chee bdee' na cheentu'.

<sup>39</sup> Xra xrtáudxu ca' quebe gulaca lazre' xuluzúa dizra' chee Moisés, san buluzúe' le' chalá'ala, ne gulaca lazre' xelexezrine' Egipto. <sup>40</sup> Gate cabí zue' Moisés ga na' gul'é'e Aarón: "Dxaca lázrentu' gunu' dios ca' chee xelebía lawe' launtu', lawe' da quebe nézentu' bi guca chee Moisés, bènnea' bebéaje' netu' lu xezr la xu Egipto." <sup>41</sup> Nadxa beluné' tu bedáu' guca na ca tu bézredau', ne belutié' be' xixre'du ca' lau bedáu' na', ne gulebengé' chee da zaj nunge'. <sup>42</sup> Nadxa Dios becuase' nen benne' ca', na' be'e le' lataj belúe' lá'ané' belaj zaj zria zran xabáa. Ca'an naxúaj na lu xiche chee benne' ca' buluchálaje' waláz chee Dios. Dxelenné':

Le'e, benne' Israel ca', ¿guzríale-ba' chia' neda' be' xixre'du ca' bêtele duté' chua iza gate na' guzúale le'e xixre' lawe' lataj?

<sup>43</sup> ¡Cabí! Bíale xudau' xide zra be' xixre' chee dios cheele, Moloc, ne xudau' chee belaj nazí le na Renfán, dios cheele, bedáu' ca' bènquezle le'e chee be' lá'anale na.

Chee le' na' cuéaja' le'e lu xezr la xu cheele, ne sel-la' le'e dédedxa ca naga dxe' Babilonia.

<sup>44</sup> 'Le'e xixre' lawe' lataj na' xra xrtáudxu ca' beluné' tu xudau' xide naga buluzrá chawe' blaga' xiaj naga naxúaj da nadxixruj bea na. Beluné' na ca naca da ble'e Dios Moisés, gate guzre' le' guné' na ca naca da na' ba blé'engé'. <sup>45</sup> Zri'ine xra xrtáudxu ca' belexaca lu ne'e xudau' xide na', na' belú'e na gate belezrine' lu xezr la xu nigá nen Josué, chee belequ'é xezr la xu nigá lu na' benne' xezr la xu ca' zaj zre'e nigá, benne' ca' Dios bebéaje' le' chee bnézuje' xezr la xu nigá chee xra xrtáudxu ca'. Ca'an guca ca bzrinté zra ca' zua David. <sup>46</sup> Wenná bea David na', Dios bezaca ba lazre' chee', na' guca lazre' David guné' tu xudau' naga sua Dios chee Jacob. <sup>47</sup> Salomón, zri'ine David, bengé' lizre Dios na'. <sup>48</sup> Dios szrenté quebe zue' lu xudau' ca' da zaj nun bènneache. Caní gunná tu benne' bchálaje' waláz chee Dios, gunné':

<sup>49</sup> Xabáa naca lataj naga dxe'a, na' xezr la xu naca na naga nuléaj ni'a.

¿Ájazra naca xu'u gunle le'e chia'? dxenná Xránadxu.

¿Ájazra naca lataj naga dxal-la' xezí' lazra'?

<sup>50</sup> ¿Quegá neda' bènqueza' da ca'?

<sup>51</sup> Nadxa gunná Esteban:

—Le'e nácaquezle lázxdau zide', ne zria nágale, ne lázrdaule ca zaj naca chee benne' quebe zaj núnbe'e Dios, quebe dxezile xrtizre'. Dxedábagaquezle Be' Lá'azxa. Nácale ca gulaca xra xrtáule ca'. <sup>52</sup> Xra xrtáule ca' buluzría xi'e xúgute benne' ca' buluchálaje' waláz chee Dios. Belutié' benne' ca' buluchálaje' nédxudauté ca dxal-la' gaca chee benne' xrlátaje nigá, na' gate blé'e, lé'eequezle bdele Le' lu na' benne' ca' guledábague' Le', ne bêtele Le'. <sup>53</sup> Le'e guzile da nadxixruj bea na da benna gubáz chee xabáa dxi'u, san quebe dxuzúale dizra' chee na.

### *Dxelutié' Esteban*

<sup>54</sup> Gate belén benne' ca' da caní, na' gulágu lazxe' lu xel-la' dxelezrá'a Esteban. <sup>55</sup> Nadxa Esteban, zúale Be' Lá'azxa le', gunné'e xabáa, ne blé'engé' xel-la' szren chee Dios, na' Jesús ze' chalá'a xabéla chee Dios. <sup>56</sup> Nadxa gunné':

—Le nna'xque, dxelé'eda' naxalaj xabáa, na' Benne' Gulje' Bènneache ze' chalá'a xabéla chee Dios.

<sup>57</sup> Benne' ca' bulusézxuje' nague', na' gulebezre xe'e, ne xeajlechía che'e Esteban na'.

<sup>58</sup> Na' belebéaje' le' lu xezre na', naga belú'e le' xiaj. Na' benne' ca' gulenné' chee Esteban bulucá'ané' zra lané' lu na' tu benne' cuide' le' Saulo. <sup>59</sup> Dxácaté dxuluzríe' le' xiaj, Esteban na' bláwizre' Dios, gunné':

—Xrana' Jesús, bezí' lu na'u be' nácaqueza'.

<sup>60</sup> Gudé na' bzu zribe', na' gunné' zizraj:

—Xran, quebe gusebagu' benne' caní dul-la nigá.

Ca bexuzre gunné' ca', na' gutié'.

## 8

### *Saulo dxenáu zi' xuzre' benne' ca' dxelájle'e chee Jesús*

<sup>1</sup> Saulo guque' tuze nen benne' ca' belutié' Esteban.

Lu zra ná'queze gulezú' lawe' dxelau zi' xuzre' benne' ca' dxelájle'e chee Jesús, benne' ca' zaj zre'e xezre Jerusalén. Xúgute' belexase dímmaje' ca naca xezre ca' zaj nababa Judea, ne xezre ca' zaj nababa Samaria. Benne' gubáz ca' belexegá'ané' xezre Jerusalén na'. <sup>2</sup> Bal-la benne' ca' zaj naque' chee Dios bulucaché' Esteban na', ne gulebézrele'e chee'. <sup>3</sup> Dxácaté na' Saulo dxenáu zi' xuzre' benne' ca' dxelájle'e chee Jesús, na' guxú'e tu tu xu'u chee cheajxrube xue' benne' ca', ne cheajlu'e le' lizre xia.

*Dxuluchálaję' dízra' chawe' cheę Jesús naga nababa Samaria*

<sup>4</sup> Benne' ca' cheę Cristo, benne' buluzrúnmuje' Jerusalén, buluchálaję' dízra' chawe' cheę Jesús gáteteze na' zjaque'. <sup>5</sup> Felipe, tue' benne' ca', guxíaję' tu xęzre naga nababa Samaria, na' guzú lawę' dxuchálajęne' benne' ca' ca naca cheę Cristo. <sup>6</sup> Benne' ca' zaj nazrague' belén xánnenę' ca da dxuchálaj Felipe, ne belelé'equezne' ca naca xel-la' waca ca' da dxunę'. <sup>7</sup> Benne' zan, benne' zaj xu'e be' xriwe' belexexaque', na' be' xriwe' ca' belexedxúaj na lu xichaj lázrdau benne' ca', dxelebezre xa'a na, na' benne' zan benne' zaj zua zri ni'a ne'e, ne benne' zrinnaj ca' belexexaque'. <sup>8</sup> Ca'an guca, gulebéle'ę xúgute' benne' ca' lu xęzre na'.

<sup>9</sup> Zua na' tu benne' le' Simón, nédxute guque' benne' wazrá', ne guzí xe'e benne' Samaria ca', dxennę' naque' tu benne' szren. <sup>10</sup> Xúgute' belén xánnenę' cheę', benne' cazraze ca', ne benne' blau ca', gulennę':

—Benne' nigá nape' xel-la' szren cheę Dios.

<sup>11</sup> Gulape' le' ba lá'ana lawę' da lu xel-la' wazrá' cheę' na' guzí xe'e benne' ca' zane' iza. <sup>12</sup> Gate guléajle'ę cheę dízra' chawe' da dxuchálaj Felipe ca dxenná bea Dios, ne ca naca cheę La Jesucristo, xúgute', benne' biu, ne nu'ula ca', beledxúę' nisa. <sup>13</sup> Ca'ánqueze Simón na' guxéajle'ę cheę Jesús, ne gudxúę' nisa, na' guzú lawę' zéajęne' Felipe, na' dxexebánenę' ca naca xel-la' waca da za xabáa da dxun Felipe.

<sup>14</sup> Gate benne' gubáz ca' cheę Jesús, benne' zaj zre'ę Jerusalén, belenne' gulezí' lu na' benne' Samaria ca' xrtizra' Dios, na' gulesel-le' Pedro ne Juan na'. <sup>15</sup> Gate belezrine' na', na' belenabe' law Dios cheę benne' Samaria ca' dxeléajle'ę cheę Jesús cheę xezezí'e Be' Lá'azxa. <sup>16</sup> Quebe ne xida Be' Lá'azxa súalene' netú benne' ca'. Tuze beledxúaze' nisa lu La Xránadxu Jesús. <sup>17</sup> Nadxa Pedro ne Juan buluzę ne'e lawę' benne' ca', na' gulezí'e Be' Lá'azxa.

<sup>18</sup> Gate ble'e Simón bla' Be' Lá'azxa gate gubáz ca' buluzę ne'e benne' ca', na' guca lazre' gunézruje' gubáz ca' dumí, <sup>19</sup> gunné':

—Le gunna neda' xel-la' waca nigá cheę gate guzúa' na'a lawę' núteteze benne', na' si'e Be' Lá'azxa.

<sup>20</sup> Nadxa guzre Pedro le':

—Wabía xi' dumí chiu' na' nen lue' lawę' da dxéquenu' wazéquenu' ga'u nen dumí ca da dxúnnaze Dios. <sup>21</sup> Quebe naca chiu', ne quebe napu' lataj lu da nigá lawę' da quebe naca xrlátaje xichaj lázrda'u lau Dios. <sup>22</sup> Bsan ca naca da calela chiu' nigá, ne guta' xue Dios cheę gunite lawę' chiu' ca da gúquenu' lu xichaj lázrda'u. <sup>23</sup> Dxeque be'eda' nazrate xichaj lázrda'u da calela, na' da calela na' nuchéaj na lue'.

<sup>24</sup> Na' bechebe Simón:

—Le gata' xue Xránadxu chia' neda', cheę quebe gaca chia' ca da gunnáu'.

<sup>25</sup> Ca gudé belexechebe' cheę Jesús, ne buluchálaję' dízra' cheę Dios, na' benne' gubáz ca' buluzenne' bėnneache dízra' chawe' cheę Jesús lu xęzredu ca' zaj nababa Samaria, na' ca gudé na' belexezrine' Jerusalén.

*Felipe dxuchálajęne' tu benne' cheę xęzr la xu Etiopía*

<sup>26</sup> Gudé na' guzre tu gubáz cheę xabáa cheę Xránadxu Felipe:

—Guxasa, guxíaj chala' a naga dxedé gubizra beu' zaga ca', naga zrúa neza cheę Jerusalén da zeaj xęzre Gaza, da dxedé na le'ę xixre' lawę' lataj.

<sup>27</sup> Felipe guxase', na' guzre'ę zéaję', na' la neza na' bezrague' tu benne' Etiopía. Benne' nigá naque' wizre, ne naque' benne' szren xu'u lu ne'e xel-la' gunní'a cheę Candace, nu'ula na' dxenná bé'eng' xęzr la xu Etiopía. Ba guxíaj benne' nigá Jerusalén cheę be lá'anę' Dios. <sup>28</sup> Na'a zexíaję' Etiopía na', dxe'e lu carreta cheę' da dxeleca' a bzrina, ne dxulabe' xiche naga zaj naxúaj xrtizra' Isaías, benne' bchálaję' waláz cheę Dios. <sup>29</sup> Nadxa gunná Be' Lá'azxa, guzre' Felipe:

—Gubiga gagu cuita carreta na'.

<sup>30</sup> Gate gubiga Felipe na' benne' dxulaba bėnnea' xiche cheę Isaías, na' bchebe' le':

—¿Dxéajni'inu' ca naca da dxulabu'?

<sup>31</sup> Benne' biu na' guzre' le':

—¿Ájazra gaca chéajni'ida' che quebe nu chilá' guzéajni'i neda'?

Na' guzre' Felipe cuenę' cué'lene' le'.

<sup>32</sup> Naga dxulabe' lu xiche cheę Dios dxenná na caní:

Belech'e Le' naga gatie' ca tu zrila'dau', na' ca zrila' na' dxátaba' zrize lau benne' ca' dxuluchibe' zraba', ca' bėnqueze Le', quebe bi gunné'.

<sup>33</sup> Bulucá'ana ditje' Le', ne quebe belú'ę lataj nu guchi'a cheę', ne quebe nu gaca guchálaję' ca naca cheę zri'ine zre suę', lawę' da belutie' Le'.

<sup>34</sup> Na' benne' Etiopía na' bchebe' Felipe:

—Gunná, ¿nuzra chee dxenná benne' nigá, cheéqueze' na', che chee xetú benne' xula?

<sup>35</sup> Nadxa guzú lau Felipe bzéajni'ine' le' ca naca naga dxulabe', ne bchálajlene' le' dizra' chawe' ca naca chee Jesús. <sup>36</sup> Gate guledé' tu naga de nisa, na' gunná benne' Etiopía na':

—Nigá de nisa. ¿Quebe gaca chua' nisa, zra?

<sup>37</sup> Felipe guzre' le':

—Che dxéajle' u duté lázrda' u, waca.

Benne' na' bechebe':

—Dxéajle' a naca Jesucristo Zri'ine Dios.

<sup>38</sup> Nadxa gunná bé'ene' guleza carreta na', na' dxúpate' gulu'e lu nisa, na' Felipe bchue' le' nisa. <sup>39</sup> Gate belexedxúaje' lu nisa na', na' Be' chee Xránadxu beche'e Felipe naga xula. Benne' Etiopía na' québedxa blé'ene' le', na' bexu'e neza chee' duté xel-la' dxebe'. <sup>40</sup> Felipe na' guque bé'ene' ba zué' xezre Azoto, na' gudé' tu tu xezre dxuchálaje' dizra' chawe' ca naca chee Jesús cadxa bezrine' Cesarea.

## 9

### *Saulo dxexaque' benne' chee Jesús*

(Hch. 22.6-16; 26.12-18)

<sup>1</sup> Dxácaté na' Saulo quebe dxusané' dxuné' ba xuzre gutié' benne' ca' dxeléajle'e chee Xránadxu. Chee guné' caní guxíaje' xeajchálajlene' bxruze blau. <sup>2</sup> Gunabe' xiche da dxulé'e na nape' xel-la' dxenná bea da gu'e chéaje' xudau' ca' zaj nnita xezre Damasco, chee séquene' cheajxedilaje' benne' ca' dxeléajle'e chee dizra' chawe' chee Jesús, ne che'e le', benne' biu, ne nu'ula ca', chee guzré'e le' lizre xia lu xezre Jerusalén. <sup>3</sup> Na' gate ne xu'e neza zéaje', ne ca ba zua zrine' xezre Damasco, na' bsaní' tu xi' naga zéaje' da za' xabáa. <sup>4</sup> Saulo xeajcházie' lu xu, na' benne' chi'i tu benne' dxé'e le':

—Saulo, Saulo, ¿bizr chee na' nau zi' xuzru' neda'?

<sup>5</sup> Nadxa Saulo bchebe':

—¿Nuzra Lue', Xran?

Na' bènnea' bechebe':

—Neda' naca' Jesús, benne' na' nau zi' xuzru'. Lue'ze dxun zi' cuinu', ca dxun beze gate dxulíbeba' lawe' xágala da dxádue'-ba'.

<sup>6</sup> Nadxa Saulo dxezrizque' dxezrebe', gunné':

—Xran, ¿bi dxaca lazru' guna'?

Na' Xránadxu guzre' le':

—Guxasa, guxú'u lu xezre, na' xeléqueze' lue' da dxal-la' gunu'.

<sup>7</sup> Benne' ca' zjácate Saulo belezrébele'e lawe' da belenne' chi'i benne' na', san quebe nu belelé'ene'. <sup>8</sup> Nadxa Saulo hexase' lu xu na', na' gate guxá' lawe', quebe guca lé'ene'. Ca' guca, belequé'e ne'e, ne guleché'e le' lu xezre Damasco. <sup>9</sup> Guzú'e na' chunna zra quebe dxelé'ene', ne quebe bi güe'e gudawe'.

<sup>10</sup> Lu xezre Damasco na' zua tu benne' dxéajle'e chee Jesús le' Ananías, na' Xránadxu ble'e lawe' le' tu lu da ble'e le', na' guzre' le':

—Ananías.

Na' le' bechebe':

—Nigá zua', Xran.

<sup>11</sup> Nadxa gunná Xránadxu, dxé'e le':

—Guxasa, guxíaj neza da nazí le na: Neza Li, na' lizre Judas guchébu' chee tu benne' Tarso, le' Saulo. Benne' nigá dxuláwizre' Dios. <sup>12</sup> Tu lu da blé'ene', ba blé'ene' tu benne' le' Ananías chu'e guzé ne'e le' na' gunná Ananías:

<sup>13</sup> Gate benne' da nigá, na' gunná Ananías:

—Xran, benne' zan ba buluzenne' neda' chee benne' nigá, ne chee xúgute da calela da dxuné' chee benne' ca' dxeléajle'e chiu' Lue' lu xezre Jerusalén. <sup>14</sup> Na'a ble'e nigá nape' xel-la' dxenná bea chee benne' xíchaje' ca' chee bxruze ca', chee che'e lizre xia xúgute benne' dxelenné' Dios lu Lau' Lue'.

<sup>15</sup> Na' Xránadxu guzre' le':

—Guxíaj. Neda' ba gucá'a benne' na' chee cheajzenne' benne' xezr la xu ca', ne benne' wenna' bea ca', ne benne' Israel ca', ca naca chia' neda'. <sup>16</sup> Neda' gulé'eda' le' ca naca da zante da saque'e ne chia' neda'.

<sup>17</sup> Nadxa Ananías guz'é'e zéaje' xu'u naga zua Saulo. Gate guxú'e na', guxrúa ne'e lawe' le', na' guzre' le':

—Saulo, bicha'. Xránadxu Jesús, Bènnea' ble'e lawe' lue' la neza naga za'u, nasele' neda' chee xelé'enu', ne chee súde Be' Lá'axza lue'.



<sup>18</sup> Ca' guca beléxrujté lu xiaj lawé' da zaj naca ca xrlacu bela, na' belé'engé'. Na' bexasa Saulo, ne gudxúate' nisa. <sup>19</sup> Gudé na' gudawe', ne bedipe'. Begá'angé' tu chupa zra nen benne' Damasco ca' dxeléajlé' chee Jesús.

*Saulo dxuchálajé' chee Jesús lu xezre Damasco*

<sup>20</sup> Nadxa guzú lau Saulo dxuchálajé' chee Jesús lu xu'u ga dxelezraga judío ca' zaj nnité' Damasco, dxenné' Jesús naque' Zri'ine Dios. <sup>21</sup> Xúgute' benne' beléne' chee' belexebánengé', dxelenné':

—¿Quegá benne' nigá bénnea' gudáu zi' xuzre' benne' ca' zaj zre'e Jerusalén, benne' ca' dxelenné' Dios lu La Jesús? ¿Quegá léqueze' na' blé'e nigá chee che'e benne' ca' xezre Jerusalén chee gudé'e' le' lu na' benne' xíchajé' ca' chee bxruze ca'?

<sup>22</sup> Saulo bchálajdxé' du lazre' chee Jesús, ne dxulé'engé' Jesús naque' Cristo chee Dios, na' bzua zrié' benne' judío ca' zaj zre'e Damasco.

*Saulo dxelé' lu na' benne' judío ca'*

<sup>23</sup> Ca' gudé zane' zra, benne' judío ca' belune' tuze dizra' xelútié' Saulo. <sup>24</sup> Gunezne' le' da nigá. Té zra ne chizrela gulebeza benne' judío ca' dxu'a dxa xu'u ca' naga dxelexedxúaj bénneache xezre na', chee xelútié' le'. <sup>25</sup> Nadxa benne' ca' dxeléajlé' chee Jesús gulegú'e Saulo tu lu xcuite lba zren, na' buluxulétajé' le' chizrela le'e ze'e da naxechaj na xezre. Ca' guca, gulá Saulo.

*Saulo dxezrine' Jerusalén*

<sup>26</sup> Gate bezrin Saulo Jerusalén, guca lazre' guné' tuze benne' ca' dxeléajlé' chee Jesús, san benne' ca' dxelezrebe' le' lawe' da quebe dxeléajlé' ba dxéajlé' Saulo chee Jesús. <sup>27</sup> Bernabé guché'e Saulo, ne bze' le' lau benne' gubáz ca' chee Jesús. Na' bchálajlé' Bernabé gubáz ca' ca ble'e Saulo Xránadxu la neza, ne ca' ben Xránadxu bchálajléne' Saulo, ne ca' bchalaj Saulo du lazre' lu xezre Damasco nen xel-la' dxenná bea chee La Jesús. <sup>28</sup> Nadxa Saulo begá'angé' Jerusalén, dxedálengé' benne' ca'. <sup>29</sup> Bchalaj Saulo du lazre' lu La Xránadxu, dxuchálajléne' benne' ca' dxelenné' dizra' griego, san benne' caní gulaca lazre' xelútié' le'. <sup>30</sup> Gate guleque be'e biche lfwézredxu da caní, na' guleché'e Saulo lu xezre Cesarea, na' lu xezre na' gulesel-le' le' xezre Tarso.

<sup>31</sup> Nadxa benne' ca' dxelezrague' lu La Jesús tu tu xezre zaj nababa Judea, ne Galilea, ne Samaria, gulebeza zri lazre', ne beledipa lazre'. Xel-la' dxelezrebe gulaque' Xránadxu tuze, na' lawe' da gúcale' Be' Lá'azxa le', gulane'.

*Pedro dxexune' Eneas*

<sup>32</sup> Gate dxedá Pedro dxeajnné'e biche lfwézredxu ca', na' guxíajqueze' xejajnné'e benne' ca' dxeléajlé' chee Jesús lu xezre Lida. <sup>33</sup> Na' bezrague' tu benne' le' Eneas, bache guca xrunu' iza de' lu da'a lawe' da naque' benne' zrinnaj. <sup>34</sup> Na' gunná Pedro, dxé'e le':

—Eneas, Jesucristo ba bexune' lue'. Bexasa, ne butube da'a chiu'. Na' bexásate' Eneas na'. <sup>35</sup> Belelé'e xúgute' benne' le', benne' zaj zre'e xezre Lida, ne xezre Sarón, na' belexaque' chee Xránadxu.

*Dorcas dxexebane' ládujla benne' gate*

<sup>36</sup> Lu zra na' zua tu nu'ula le' Tabita lu xezre Jope. Dxéajlé' chee Jesús. Lu dizra' griego le' Dorcas. Nu'ula nigá dxúnqueze' da xrlátaje, ne dxácalengé' benne' xache' ca'. <sup>37</sup> Lu zra ca' guxú'u Dorcas xel-la' we', na' gutié'. Na' bulugazje' le', ne belexrué' le' tu lu xu'u naga zua gudxupe' cuía dxala. <sup>38</sup> Xezre Jope na' zua na' gagu naga zua xezre Lida naga zua Pedro, na' lawe' da zaj neze benne' Jope ca' zue' na', na' gulesel-le' chupa benne' biu cheajleguezre' le':

—Gudázega xezre Jope.

<sup>39</sup> Nadxa Pedro guxíajléne' benne' ca'. Gate bzrine' na', na' beleché'e le' naga zrua Dorcas na', na' xúgute' nu'ula ca' ba zaj nate benne' chie' zaj naxéchajé' Pedro dxelebezre', ne dxululé'engé' le' zra nu'ula, ne zra benne' biu, da ca' ben Dorcas na' gate ne zue' nen benne' ca'. <sup>40</sup> Nadxa guleaj Pedro xúgute' benne' ca', na' bzu zribe' bchálajléne' Dios. Na' gunné'e nu'ula gate na', gunné':

—Tabita, bexasa.

Nadxa nu'ula na' bexá' lawe', na' gate blé'engé' Pedro, bexase' gudxé'e. <sup>41</sup> Na' Pedro bequ'é'e ne'e, bechise' le'. Nadxa gunné' biche lfwézredxu ca', ne nu'ula ca' ba gute benne' biu chee', na' blé'engé' benne' ca' le' naca bane'. <sup>42</sup> Ca' guca da nigá belén ca' naca benne' zaj zre'e xezre Jope, na' benne' zan guléajlé' chee Xránadxu. <sup>43</sup> Pedro begá'angé' zane' zra lu xezre na' lizre Simón, tu benne' dxucá'ana chawe' xide zra be xixre'.

<sup>1</sup> Zua lu xezre Cesarea tu benne' le' Cornelio, benne' dxenná be'e lu wedil-la tu cue' benne' nazile na Benne' Italia Zjaque' Wedil-la. <sup>2</sup> Benne' nigá, ne benne' zaj zre'e lizre' dxulucá'ana szrene' Dios, ne dxelezrebe' Le'. Cá'anqueze dxunézruje'e dumí dxácalene' benne' judío ca', ne tu dxuchálajlezqueze' Dios. <sup>3</sup> Tu zra gate dxexedá chunna ble'e Cornelio tu da ble'e Dios le', na' blé'ene' cátequeze guxú'u tu gubáz chee' xabáa naga zue', na' guzre' le':

—Cornelio.

<sup>4</sup> Cornelio guzúe' dxenné'e gubáz chee' xabáa na' duté xel-la' dxezrebe, na' bchebe' le':

—¿Bizra na', Xran?

Nadxa gunná gubáz chee' xabáa, guzre' le':

—Dios ba benne' da dxuláwizru' Le', ne nézene' ca da dxunu' dxácalenu' benne' xache' ca'. <sup>5</sup> Gusel-la benne' chjaque' xezre Jope, cheajlenné' Simón, bénnea' léqueze' Pedro. <sup>6</sup> Zue' lizre xetú benne' le' Simón, benne' dxucá'ana chawe' xide zra be' xixre', na' zua lizre' dxu'a nísadau'. Pedro na' xe'e lue' ca da dxal-la' gunu'.

<sup>7</sup> Gate bezá' gubáz chee' xabáa na' bchálajlene' le', na' gunné' Cornelio chupa bi wen zrin chee', ne tu benne' dxeje' wedil-la, ne dxape' Dios ba lá'ana, ne zúaqueze' lizre Cornelio na'. <sup>8</sup> Na' bchálajlene' benne' ca' ca naca da ba guca, na' ca gudé na' gusel-le' le' chjaque' xezre Jope.

<sup>9</sup> Zra xula, dxácaté zaj xu'e benne' ca' neza, ne ba dxezrine' gagu naga dxe' Jope, na' guluén Pedro chju'u sibe du wagubizra chee' guchálajlene' Dios. <sup>10</sup> Ba dxedúnle'e, ne guca lazre' gawe', na' dxácaté ne dxulucueze' da gawe', blé'ene' tu da ble'e Dios le'. <sup>11</sup> Blé'ene' naxalaj xabáa, ne dxetaj lu xezr la xu da naca na ca tu ladxe' zren nadxéaj na dápaté la'a chee' na. <sup>12</sup> Lawe' ladxe' na' zaj zria xúguté cue' be' xixre', be' zria tapa ni'a na'ba', ne be' snia ca', ne be' zua xrila ca'. <sup>13</sup> Nadxa benne' tu chí'i benne' dxé'e le':

—Guxasa, Pedro. Bete tu bea ca' chee' gagu'-ba'.

<sup>14</sup> Pedro bechebe':

—Cabí, Xran. Neda' cabata' ne gawa' da quebe nun Dios gagu bénneache, ne quegá da naca na sban.

<sup>15</sup> Benne' na' bchálaje' da xula, dxe'e le':

—Da ba nucá'ana chawe' Dios, quebe nnau' lue' naca na sban.

<sup>16</sup> Da nigá guca na chunna lasa, na' ladxe' na' beguén na xabáala. <sup>17</sup> Dxácaté dxe' Pedro dxulaba lazre' bi zéaje ca naca da blé'ene', na' belezrin benne' ca' nasele' Cornelio dxu'a dxa xu'u, dxuluchebe' ga zua lizre Simón. <sup>18</sup> Gate belezrine' lizre Simón na', na' gulenné' zizraj, dxelenabe' che zua xu'u na' tu benne' le' Simón, bénnea' léqueze' Pedro. <sup>19</sup> Gate Pedro ne dxulaba lazre' ca naca da blé'ene', na' Be' Lá'azxa guzre' le':

—Gunná'xque, chunna benne' dxelexilaje' lue'. <sup>20</sup> Guxasa, bexetaj. Guxíajle benne' ca', ne quebe gun chupa lazru' lawe' da nasele' neda' benne' ca'.

<sup>21</sup> Nadxa Pedro bexétaje' naga zaj zra' benne' ca' nasele' Cornelio, na' guzre' le':

—Neda' na' dxexilajle le'e. ¿Bizra chee' za'le'?

<sup>22</sup> Benne' ca' belexechebe':

—Za'ntu' waláz chee' Cornelio, benne' dxenná be'e lu wedil-la. Naque' benne' xrlátaje, ne dxezrebe' Dios, na' xúguté benne' judío ca' dxelape' le' ba lá'ana, ne zaj nazrí'ingé' le'. Tu gubáz chee' xabáa chee' Dios guzre' le' dxal-la' sel-le' benne' xedajlenné' lue' xidu' lizre' chee' xenne' ca da dxal-la' xu'u le'.

<sup>23</sup> Nadxa Pedro bzre'e benne' ca' xu'u na', na' belexegá'angé' nen le' xela na'. Zra xula guxíajle Pedro benne' ca', na' xjácalé bal-la biche ljwézredxu le', benne' zaj zre'e Jope.

<sup>24</sup> Zra gudxupe' zra belezrine' xezre Cesarea naga zua Cornelio dxebeze' le', ne zrale bal-la benne' xrtie' le', ne xezícadxa benne' ljwezre', benne' ca' gunné'. <sup>25</sup> Gate bzrin Pedro chale'aj, bdxuaj Cornelio guzi' lu ne'e le'. Bzu zribe' lau Pedro chee' gucá'ana szrene' le'. <sup>26</sup> Pedro bechise' le', dxenné':

—Guzé. La gázqueze neda' naca' bénneache ca lue'.

<sup>27</sup> Dxácaté dxuchálajle Pedro Cornelio, gulu'e lu xu'ula, na' blé'ene' benne' zan zaj nazrague' na'. <sup>28</sup> Nadxa gunná Pedro, dxé'e le':

—Nézqueze le'e quebe dxunna da nadxixruj bea chee' judío ca' neda' lataj gaca' tuze nen benne' quebe zaj naque' judío u chu'a lizre'. Na' a Dios ba blé'ene' neda' quebe dxal-la' nnia' chee' netú benne', quebe nnia' naque' sban, u naque' benne' quebe gapa' ba lá'ana. <sup>29</sup> Chee' le' na', gate gulenné' neda', la guzá'tea', ne quebe ben chupa lazra'. Dxaca lazra' nezda' bi chee' na' gunnele neda'.

<sup>30</sup> Nadxa bechebe Cornelio:

—Ba zeaj tapa zra ca zúadxu na'a, zua' lizra' nigá dxuna' gubasa, ne dxuchálajlene' Dios, gate ble'e lau tu benne' neda', nacu'e zra lané' da dxácatite na. <sup>31</sup> Benne' na' guzre' neda': "Cornelio, Dios ba benne' da dxuchálajlene' Le', na' nézene' ca da dxunu' dxácalenu' benne' xache' ca'. <sup>32</sup> Gusel-la benne' chjaque' xezre Jope, cheajlexri'e Simón, bénnea' léqueze'

Pedro. Zug' lizre xetú benne' le' Simón, benne' dxucá'ana chawe' xide zra be xixre' ca', na' zua lizre' dxu'a nísadau'. Gate xide' nigá, na' guchálajlene' lue'." <sup>33</sup> Ca'an guca, gusél-latea' benne' ca' bedajlexedilaje' lue', na' benu' da chawe' bla'u nigá. Na'a xúgutentu' zrantu' nigá lau Dios, ne dxaca lázrentu' xénentu' xúgute ca da gunná be'e Xránadxu lue' guchálajlentu' netu'.

*Da bchalaj Pedro lizre Cornelio*

<sup>34</sup> Nadxa guzú lau Pedro dxuchálaje', dxenné':  
—Na'a dxéajni'ida' Dios quebe dxebéaje' bál-laze bénneache, <sup>35</sup> Na' xúgute xezr la xu Dios dxezi' lu ne'e benne' ca' dxelezrebe Le', ne dxelune' da xrlátaje. <sup>36</sup> Dios bchálajlene' zri'ine zre sua Israel ca', ne bchálaje' dizra' chawe' chee xel-la' dxebeza zri lazre', da dxezidxu ne chee Jesucristo, Bénnea' naque' Xrana xúgute bénneache. <sup>37</sup> Le'e ba néqueze ca naca da guca du ca naca lu xezr la xu chee benne' judío ca', da guzú lau na naga nababa Galilea ca gudé bchalaj Juan xrtizra' Dios, ne bchue' bénneache nisa. <sup>38</sup> Nézele ca ben Dios, bnéruzje' Jesús, benne' Nazaret, xel-la' waca chee Be' Lá'azxa, ne ca gudá Le' dxunge' da chawe', ne dxexune' xúgute benne' dxelezaca zi'e lu na' da xriwe'. Da nigá bene' lawe' da guzúale Dios Le'. <sup>39</sup> Netu' dxexechébentu' chee da caní, xúgute da ben Jesús naga nababa Galilea, ne da bene' lu xezre Jerusalén. Gudé na' belutié' Le', gate buludé'e Le' xaga béguaj, <sup>40</sup> na' Dios bsebané' Le' gate guca chunna zra, na' be'e lataj ble'e lau Jesús netu'. <sup>41</sup> Quebe ble'e lawe' xúgute bénneache, san launtu' nétu'ze, nácantu' benne' ca' guleaj Dios nédxudauté chee xechébentu' chee da caní. Netu' güe'e gudáguntu' nen Le' gate gudé bebane' ládujla benne' gate. <sup>42</sup> Gusel-le' netu' guchálajlentu' bénneache, ne xechébentu' ca da nun Dios, nuzúe' Jesús nigá chee guchi'e chee benne' ban ca', ne chee benne' gate ca'. <sup>43</sup> La gázqueze nédxudauté gulenná xúgute benne' ca' buluchálaje' waláz chee Dios, buluchálaje' ca dxal-la' gaca chee Jesús, gulenné' xúgute benne' xelájaje' chee Jesús, na' ne chee Le' Dios gunite lawe' xtul-la benne' ca'.

*Benne' quebe zaj naque' judío dxelezi'e Be' Lá'azxa*

<sup>44</sup> Ne dxuchalaj Pedro gate bzrin Be' Lá'azxa bedajsúalene' xúgute benne' ca' dxelenne' da dxuchalaj Pedro. <sup>45</sup> Benne' judío ca' dxelájaje' chee Jesús, benne' ca' zá'acalene' Pedro, belexebánene' gate guleque bé'ene' ba zúale Be' Lá'azxa benne' ca' quebe zaj naque' judío. <sup>46</sup> Dxeleque bé'ene' na lawe' da belenne' dxuluchalaj benne' ca' dizra' chee benne' xula, ne dxelúe lá'ane' Dios. <sup>47</sup> Nadxa gunná Pedro:

—¿Waca nnadxu quebe dxal-la' xeledxúa benne' caní nisa, benne' ca' bache gulezi'e Be' Lá'azxa ca bentu' netu'?

<sup>48</sup> Nadxa gunná bea Pedro xeledxúa benne' ca' nisa lu La Jesucristo. Gudé na', benne' ca' gulata' xuene' Pedro xegá'ane' nen le' tu chupa zra.

## 11

*Pedro dxuzenne' benne' gubáz ca' zaj zre'e Jerusalén ca naca da bene'*

<sup>1</sup> Benne' gubáz ca', ne biche ljwézredxu ca' zaj zre'e Jerusalén belenne' ba gulezi' lu na' benne' quebe zaj naque' judío dizra' chee Dios. <sup>2</sup> Gate bezrín Pedro xezre Jerusalén, gulezi' tizra' benne' ca' le', benne' ca' dxelenné' dxal-la' chugu late' bela' chee benne' ca' zaj naque' chee Dios. <sup>3</sup> Benne' caní buluchébe' Pedro:

—¿Bizr chee na' guxiáju' xeajsúalenu' benne' ca' quebe zaj naque' judío, ne gudágulenu' le'?

<sup>4</sup> Nadxa Pedro bzenne' benne' ca' xúgute da guca cha chee na, gunné':

<sup>5</sup> —Neda' zua' lu xezre Jope, na' gate dxuchálajlenu' Dios, ble'eda' tu da ble'e Dios neda'. Ble'eda' tu ladxe' zren nadxéaj dápaté la'a chee na, da dxetaj na xabáa, ne bedajsé na lawa'. <sup>6</sup> Gate gunná' xámnia' chee ble'eda' bi na' zaj zria na lawe', ble'eda' be xixre', be zria tapa ni'a na'ba', ne be snia ca', ne bea ca' zaj zua xrláaba'. <sup>7</sup> Na' benda' tu chi'i benne' guzre' neda': "Guxasa Pedro, bete tu bea ca', na' gagu'-ba'." <sup>8</sup> Neda' gunnéa': Cabí, Xran, lawe' da cabata' ne gawa' neda' tu da quebe nun Dios gagu bénneache, ne quegá da naca sban. <sup>9</sup> Nadxa bénnea' dxenné' xabáa gunné' neda' da xula, na' guzre' neda': "Da ba nucá'ana chawe' Dios, quebe nnau' lue' naca na sban." <sup>10</sup> Da nigá guca na chunna lasa, na' ca gudé na' xúgute da ca' belexegüen na xabáa. <sup>11</sup> Lu zra ná'queze belelá' chunna benne' lu xu'u naga zua', benne' ca' gusel-la tu benne' zua Cesarea chee zedajlexedilaj neda'. <sup>12</sup> Be' Lá'azxa gunná bé'ene' neda' chéajlenu' benne' ca', ne quebe gun chupa lazra'. La gázqueze gusiá'cale' xrupa benne' biche ljwézredxu caní neda'. Xúgutentu' guxú'untu' lizre tu benne'. <sup>13</sup> Le' bchálajlene' netu' ca blé'ene' lizre' tu gubáz chee xabáa, ze ni'e, ne guzre' le': "Gusel-la benne' chjaca xezre Jope chee cheajlenné' Simón, benne' léqueze' Pedro. <sup>14</sup> Benne' nigá xe'e lue' aja gunu' chee lau' lue', ne xeeléa xúgute benne' zaj zre'e lizru'." <sup>15</sup> Gate guzú lawa' dxuchálajlenu' benne' ca', na' bzrin Be' Lá'azxa guzúalene' benne' ca', ca ble'e guzúalene' dxi'u nédxudauté. <sup>16</sup> Nadxa xeajsa lazra' ca gunná Xránadxu, gunné': "Da li Juan bchue' bénneache nisa, na' gaca cheeje

da zéaję xel-la' dxedxúa nisa, súalę Be' Lá'azxa le'e." <sup>17</sup> Che Dios bnézruje' cheę benne' ca' ca benne' dxi'u, guxéajlędxu cheę Xránadxu Jesucristo, ¿nuzra naca' neda' cheę tábaga' Dios?

<sup>18</sup> Nadxa gate biche lįwézredxu ca' zaj zře'ę Jerusalén belenne' da caní, na' gulezúa zrie'ę, ne gulezú lawę' dxelúe lá'anę' Dios, dxelennę':

—Ca' naca, la gázqueze dxunna Dios lataj benne' quebe zaj naque' judío xelexebí'i lazre' cheę xezezi'e xel-la' nabán zeajlı canna.

*Benne' dxeléajlę' cheę Jesús zaj zře'ę xęzre Antioquía*

<sup>19</sup> Gate belutię' Esteban, na' belau zi' xuzre' xezícala benne' dxeléajlę' cheę Jesús, na' bal-łę' buluzrúnnaje', xjaque' xęzre Fenicia, ne lu xu Chipre, ne xęzre Antioquía. Gate belezrine' lataj ca', na' buluchálaję' dizra' cheę Jesús lau benne' judío cá'aze, ne quegá lau benne' quebe zaj naque' judío. <sup>20</sup> Nadxa bal-la benne' dxeléajlę' cheę Jesús, benne' Chipre, ne benne' Cirene, belełę' xęzre Antioquía, na' buluchálajlęne' benne' ca' quebe zaj naque' judío, ne buluzenne' le' dizra' chawe' ca naca cheę Xránadxu Jesús. <sup>21</sup> Xel-la' waca cheę Xránadxu guzúalę na benne' ca', na' ca'an guca, benne' zan belexexaęę' cheę Xránadxu.

<sup>22</sup> Gate belén benne' ca' da nigá, benne' dxeléajlę' cheę Jesús zaj zře'ę Jerusalén, na' gulesel-łę' Bernabé xęzre Antioquía. <sup>23</sup> Gate bzrin Bernabé na', blé'ene' ca da chawe' da dxun Dios cheę benne' ca', na' gubéłę'ene'. Na' bsízrene' xúgute benne' ca' cheę xelexúa chúchue' lu da naca cheę Xránadxu. <sup>24</sup> Bernabé naque' benne' xrlátaje, na' zúalę Be' Lá'azxa le', ne dute lázrdawe' dxéajlę' cheę Jesús. Ca'an guca, ne cheę le' guléajlę benne' zan cheę Xránadxu.

<sup>25</sup> Gudé na' guxía Bernabé xęzre Tarso, zeajxedilaję' Saulo, na' gate bezrelne' le', beche'ę le' Antioquía. <sup>26</sup> Gulezúę' na' tu iza naxá' nen benne' ca' dxeléajlę' cheę Jesús, na' bulusédenę' benne' zan. Lu xęzre Antioquía na' guca na da nedxu gulé'ę benne' ca' dxeléajlę' cheę Xránadxu, Benne' Cristiano.

<sup>27</sup> Ca lu zra ca', bal-la benne' dxelennę' waláz cheę Dios besiá'que' Jerusalén, xjaque' Antioquía. <sup>28</sup> Tu benne' ca' le' Agabo guzé' lávela biche lįwézredxu ca', na' ca da bnezruj Be' Lá'azxa le', gunné' waca tu gubina' zren du ca naca xęzr la xu, na' gubina' nigá guca na gate naca Claudio benne' dxenna bé'ene' ca naca xęzr la xu Roma. <sup>29</sup> Nadxa benne' ca' dxeléajlę' cheę Jesús, benne' zaj zře'ę Antioquía belún zi' lazre' xelesel-łę' da gácalę na biche lįwézredxu zaj zře'ę xęzre ca' zaj nababa Judea, ca da xezezeque' tu tuę' xulunézruje'. <sup>30</sup> Ca'an belunę', na' belesel-łę' tu guna' lau benne' gula ca' cheę Cristo zaj zře'ę Judea, na' Bernabé ne Saulo belú'ę na na'.

## 12

*Dxelutię' Jacobo ne dxelegú'ę Pedro lizre xia*

<sup>1</sup> Lu zra ca' guzú lau wenná bea Herodes nau zi' xuzre' bal-la benne' ca' dxeléajlę' cheę Jesús. <sup>2</sup> Gunná bé'ene' belutię' Jacobo, biche Juan nen xia nalá. <sup>3</sup> Gate ble'e Herodes dxelexezaca ba lazre' benne' judío ca' ca naca da beņę', na' gudel-łę' Pedro. Da nigá guca na lu zra laní ca' gate dxelawe' xeta xtila da quebe nachixre na cua zichaj cheę xeta xtila. <sup>4</sup> Ca gudé gudęł-łę' Pedro, na' gulu'ę le' lizre xia naga buluxúe tapa cue' benne' dxjaca wedil-la le', zaj naca tapa benne' zeje' wedil-la tu cue' tu cue'. Herodes guca lazre' guzúę' Pedro lau benne' xęzre ca' te laní. <sup>5</sup> Ca'an guca xu'u Pedro lizre xia naga dxuluxúe xánnię' le', na' benne' biche lįwézredxu ca' buluchálajlęqueze' Dios du lazre'.

*Dios dxuselę' Pedro lizre xia*

<sup>6</sup> Dxela xanne' ca za chaní' zra xula gate dxal-la' guzúa Herodes le' lau benne' xęzre ca', Pedro de' dxásię' laduj chupa benne' dxjaque' wedil-la, nadxéaję' chupa du xia, na' xebal-la benne' dxjaca wedil-la zaj zře'ę dxu'a dxa xu'u dxuluxúe' lizre xia na'. <sup>7</sup> Nadxa ble'e lau tu gubáz cheę xabáa cheę Xránadxu, na' ca naca lizre xia na' guxaní'. Na' gubáz cheę xabáa na' bte' le'ę Pedro, ne bsebanę' le', na' guzre' le':

—Guxásache.

Ca'an guca, du xia ca' belexexęzre na na' Pedro. <sup>8</sup> Na' gunná gubáz cheę xabáa na', guzre' le':

—Besí le'u, ne buléaj zrelu'.

Gate bexuzre beņ Pedro da na', na' guzre gubáz cheę xabáa na' le':

—Guxrúa xicha chiu' cuxru', ne gudáłę neda'.

<sup>9</sup> Pedro bedxúaję' cuzru gubáz cheę xabáa na', ne quebe nézene' che naca da li che cabí ca da dxun gubáz cheę xabáa na'. Dxéqueng' dxelé'ene' tu da dxulé'e Dios le'. <sup>10</sup> Belexedéę' naga zaj zra' benne' dxjaque' wedil-la nedxu ca', ne naga zaj zra' benne' gudxupe' benne' dxjaque' wedil-la, na' gate belexezrine' dxu'a dxa xu'u xia da dxedxuaj zeaj la nézala, dxa xu'u na' leze na bخالaj na. Belexedxúaję', na' ca gudé besiá'que' belezrine' xetú neza xula cheę xęzr na', na' bca'ana gubáz cheę xabáa na' leze'. <sup>11</sup> Nadxa guque be'e Pedro ba

bedxúajé', na' guzá' lazre', gunné': Na'a dxelé'eda' naca na da li. Xrana' gusel-le' gubáz chee xabáa chee' chee bselé' neda' lu na' Herodes, ne lu xúgute da gulaca lazre' judío ca' xelune' chia'.

<sup>12</sup> Da nigá dxulaba lazre' Pedro gate bzrine' lizre María, xrna Juan, bi na' léquezebe' Marcos, na' lu xu'u na' zaj nazraga benne' zan dxelenabe' Dios gácalne' Pedro. <sup>13</sup> Gate gunné' Pedro dxu'a dxa xu'u na', bzrin na' tu bi nu'ula lebe' Rode zexajabe' nu na'. <sup>14</sup> Gate bexúnbeabe' chi'i Pedro, quebe gusalájbe' dxa xu'u. Xel-la' dxebe' chee'be' zexíaj chégube' naga zaj nazraga benne' ca' chee' zeajézrebe' benne' ca' zé Pedro dxu'a dxa xu'u. <sup>15</sup> Nadxa benne' ca' gulé'e bi nu'ula na':

—Nadá xichaj lázrda'u.

Bi nu'ula na' ben chúchube' xrtízrabe'. Benne' ca' gulenné':

—Quebe le' na'. Be' guxu'e na'.

<sup>16</sup> Dxácaté na' zé Pedro tu dxennézqueze' dxu'a dxa xu'u. Na' gate gulesálajé', ne belelé'ene' Pedro, na' belexebánene'. <sup>17</sup> Pedro guchisa ne'e chee' xelúza benne' ca' zrize, na' bchálajlene' benne' ca' ca ben Xránadxu bebéajé' le' lizre xia. Na' guzre' benne' ca':

—Le guzén Jacobo, ne biche lhwézredxu ca' ca naca da nigá.

Nadxa bezé'e zexíajé' naga xula.

<sup>18</sup> Gate guxaní', gulezúalé'e stebe benne' dxjaque' wedil-la ca' lawe' da quebe zaj nézene' aja guca chee' Pedro. <sup>19</sup> Herodes gunná bé'ene' xelexilaj benne' dxjaca wedil-la Pedro, na' lawe' da quebe belexezrelne' le', na' gunáb xánnie' benne' dxjaque' wedil-la bi guca, na' gudé na' gunná bé'ene' xelate benne' ca' dxjaque' wedil-la. Ca gudé na' guzá' Herodes xezre ca' zaj nababa Judea, guxíajé' xeajúsé' xezre Cesarea.

### *Dxate Herodes*

<sup>20</sup> Herodes dxezré'e benne' ca' zaj zré'e xezre Tiro, ne xezre Sidón. Benne' chee' xezre ca' belune' tuze dizra' chee' cheajlelé'e cuine' lau Herodes na'. Belune' Blasto benne' lhwézre'. Naque' tu benne' blau chee' wenná bea Herodes, na' gulesel-le' le' lau Herodes na' chee' nabé' le' sua zri ca naca da dxaca chee' Herodes nen benne' ca'. Caní belune' lawe' da néxute dxelagu benne' xezre Tiro, ne Sidón da guzá' xezre Cesarea naga zua Herodes. <sup>21</sup> Nadxa Herodes bzue' tu zra xelezrín benne' ca' lawe'. Lu zra na' Herodes gucue' zra lane' da zácale'e, na' gudxé'e lataj blau chee', ne bchálajlene' benne' zan ca'. <sup>22</sup> Nadxa benne' zan ca' gulezú lawe' dxelenné' zizraj:

—¡Benne' nigá dxuchálajé' quebe naque' beniácheze! ¡Dios na'!

<sup>23</sup> Zra na'te tu gubáz chee' xabáa chee' Xránadxu gulu'e Herodes tu xízrawe' lawe' da guzi'e xel-la' ba lá'ana da dxal-la' si' Dios, na' guzré'e bzuga', ne gütete'.

<sup>24</sup> Bzriluj dizra' chawe' chee' Xránadxu, na' benne' ca' buluchálajé' ca naca na gáteteze na'.

<sup>25</sup> Gate belezúe Bernabé, ne Saulo zrin dxelune' lu xezre Jerusalén, besía'que' xezre na', zaj naché'e Juan, bi na' léquezebe' Marcos.

## 13

### *Bernabé ne Saulo dxelezú lawe' dxeledé' dxuluchálajé' dizra' chee' Dios*

<sup>1</sup> Ládujla benne' ca' zaj nazraga chee' Cristo lu xezre Antioquia zaj zra' benne' ca' dxelenné' waláz chee' Dios, ne benne' ca' dxulusédene' bènneache xrtízra' Dios. Ládujla benne' caní zaj zua Bernabé, ne Simón, bènnea' léqueze' benne' gasaj, ne Lucio, benne' xezre Cirene, ne Manaén, benne' gúlalebe' Herodes, benne' xu'u lu ne'e xezr la xu Galilea na', ne Saulo. <sup>2</sup> Tu zra gate benne' caní zaj zré'e dxelúe lá'ane' Dios, ne dxelune' gubasa, Be' Lá'axza gunné':

—Le cueaj Bernabé, ne Saulo chee' xelune' zrin na' da gunné' le' xelune'.

<sup>3</sup> Chee' le' na', ca gudé buluchálajlene' Dios, ne belune' gubasa, na' buluzé ne'e lawe' benne' ca', ne buluzé' le' dizra'.

### *Dxupa benne' gubáz ca' dxuluchálajé' dizra' chee' Dios lu xezr la xu Chipre*

<sup>4</sup> Gudé na', ca gusel-la Be' Lá'axza le', na' Bernabé, ne Saulo xjaque' xezre Seleucia naga gulu'e tu lu da dxedá lawe' nísadau' chee' chjaque' lu xezr la xu da naxechaj nísadau' da nazí le na Chipre. <sup>5</sup> Gate belezrine' na', na' belexedxúajé' lu da dxedá lawe' nísadau' naga zua xezre Salamina, na' gulezú lawe' dxuluchálajé' dizra' chee' Dios lu xudau' ca' chee' benne' judío ca'. Juan zéajlequezebe' gubáz ca' chee' gácalebe' le'. <sup>6</sup> Na' guledé' xúgute xézredu ca' da zaj nrita lu xezr la xu na', na' belezrine' xezre Pafos. Na' belexezrague' tu benne' judío le' Barjesús, naque' benne' wazrá'. Naque' tu benne' wen lazre' dxenné' dxuchálajé' waláz chee' Dios. <sup>7</sup> Benne' wazrá' nigá zue' nen Sergio Paulo, benne' xu'u lu ne'e xezr la xu na', ne naque' benne' sina. Benne' xu'u lu ne'e xezr la xu na' gusel-le' benne' xeajnné' Bernabé, ne Saulo lawe' da dxaca lazre' xenne' dizra' chee' Dios. <sup>8</sup> Na' benne' wazrá' na', léqueze' Elimas gudábague' gubáz ca' lawe' da guca lazre' quebe chéajle chee' Jesús benne' xu'u lu ne'e xezr la

xu na'. <sup>9</sup> Nadxa Saulo, bënnea' lëqueze' Pablo, zúale Be' Lá'azxa le', gunná' dxugüe' le', <sup>10</sup> na' guzre' le':

—Guzrí xe, benne' wen da calela. Zri'ine da xriwe', ne benne' dxusezxuj xrneza xúgute bënneache. ¿Bizr chee' na' quebe dxusanu' dxusézxuju' neza chee' benne' ca' dxelaca lazre' chjácálenge' Xránantu'? <sup>11</sup> Na'a, Xránantu' gudé' lue' ba xa'. Xegá'anu' la chul-la, na' tu chí'iqueze quebe le'enu' xel-la' naxani' chee' gubizra.

Benne' na' guzúe' lu da chul-la, na' guzú lawe' dxíla'je' nu xecá'a ne'e lawe' da québedxa dxel'é'eng'. <sup>12</sup> Gate ble'e benne' xu'u lu ne'e xezr la xu na' da nigá, na' guxéajle' chee' Jesús lawe' da bebánenge' ca naca da dxusede Pablo ca naca chee' Xránadxu.

*Pablo ne Bernabé dxeleznine' xezre Antioquia da nababa xezr la xu Pisidia*

<sup>13</sup> Pablo ne benne' ljwezre' ca' belú'e tu lu da dxedá lawe' nísadau' lu xezre Pafos na', na' beleznine' xezre Perge da nababa na xezr la xu Panfilia. Lu xezre na' Juan bsanbe' gubáz ca', na' bexíajbe' xezre Jerusalén. <sup>14</sup> Gudé na' gubáz ca' besía'que' Perge, na' beleznine' xezre Antioquia da nababa na xezr la xu Pisidia. Lu xezre na', gate naca zra dxulupá'ana judío ca', gulu'e xudau' chee' judío ca', na' gulebé'e. <sup>15</sup> Nadxa, ca gudé bululabe' lu xiche naga naxúaj da bdxixruj bea Moisés, ne da gulenná benne' ca' buluchálaje' waláz chee' Dios, na' benne' xíchaje ca' chee' xudau' na' gulesel-le' benne' xeajezre' Pablo, ne Bernabé:

—Le'e, biche ljwézrentu', che nápa'e dizra' da guzéajni'ile netu', waca nnele na na'a.

<sup>16</sup> Nadxa Pablo guxase', na' guchisa ne'e chee' xelezúa zri benne' ca', na' gunné':

—Le xene le'e, benne' Israel, ne le'e dxezrébele Dios. <sup>17</sup> Dios chee' xezre Israel guqu'e' xra xrtáudxu ca', na' be'ne' benne' ca' tu cue' benne' zante gate ne zaj zre'e ca' benne' zitu' ca' lu xezr la xu Egipto, na' ca gudé na' bebéaje' le' lu xezr la xu na' duté xel-la' waca chee'. <sup>18</sup> Dios bchaga lawe' benne' ca' chua iza le'e xixre' lawe' lataj, <sup>19</sup> na' bzria xi'e gazre cue' bënneache gulezúa lu xezr la xu Canaán, chee' bnéruje' xra xrtáudxu ca' xezr la xu chee' benne' ca'. <sup>20</sup> Gudé na', lawe' tapa gaxúa xu gachaj iza gunná be'e Dios benne' ca' lu na' benne' ca' buluchi'e chee', cadxa bzin zra zua Samuel, benne' bchálaje' waláz chee' Dios. <sup>21</sup> Nadxa benne' ca' gulenabe' Dios sua tu benne' gaque' wenna' bea chee', na' Dios bzue' wenna' bea tu benne' le' Saúl, zri'ine Cis, tu benne' chee' tu cue' benne' judío zaj naque' zri'ine zre sua Benjamín. Saúl nigá guque' wenna' bea lawe' chua iza. <sup>22</sup> Gudé na' Dios begüe' Saúl lataj chee', na' bzue' David gaque' wenna' bea chee', na' chee' benne' nigá gunné': "Nezda David, zri'ine Isaí, naque' tu benne' dxuné' da dxezaca ba lazra', ne guné' xúgute da dxaca lazra'." <sup>23</sup> Tu benne' zri'ine zre sua David nigá naca Jesús, bënnea' bzua Dios chee' guselé' benne' Israel ca', ca ba guchebe lazre' chee' David. <sup>24</sup> Nédxudxa gate za xida Jesus, Juan bchálajenge' ca naca benne' Israel ca', guzre' benne' ca' dxal-la' xelexebi'i lazre', ne xelexedxúe' nisa. <sup>25</sup> Na' gate ba za cheajse' chee' Juan, na' gunné': "Neda' quebe naca' bënnea' dxéquele naca', san ca te chia' neda' za xetú benne' quebe naca chia' neda' cuéaja' zrelé' da xu'u ni'e."

<sup>26</sup> Le'e, biche ljwezra', zri'ine zre sua Abraham, ne le'e dxezrébele Dios. Dios nasel-le' cheele dizra' nigá chee' lala. <sup>27</sup> Benne' ca' gulezrá' Jerusalén, ne benne' blau chee' ca', quebe belexünbe'e nu na' Jesús, ne quebe guléajni'ing' dizra' da buluchalaj benne' ca' buluchálaje' waláz chee' Dios da dxelenne' xúgute zra dxulupá'ane'. Ca' guca, benne' ca' belún líqueze' ca naca da naxúaj na chee' Jesús gate gulechugue' chee' gatie'. <sup>28</sup> Lácala quebe belezrelne' tu da nabaga Jesús chee' xelútie' Le', gulenabe' lau Pilato nna bé'eng' gatie'. <sup>29</sup> Nadxa, gate gudé beluné' xúgute da naxúaj na lu xiche chee' Dios ca naca da dxal-la' gaca chee' Jesús, na' buluxulétaje' Le' xaga béguaj, ne bulucache' Le'. <sup>30</sup> Nadxa Dios bsebane' Le' ládujla benne' gate. <sup>31</sup> Lu zane' zra Jesús ble'e lawe' benne' ca' guledáenge' Le' gate bezé'e Galilea dxeaje' Jerusalén, na' na'a, benne' caní dxelexechebe' ca naca chee' lau bënneache.

<sup>32</sup> Cá'anqueze netu' dxuzénentu' le'e dizra' chawe' ca naca da guchebe lazre' Dios lau xra xrtáudxu ca'. <sup>33</sup> Ben li'e ca naca da guchebe lazre' cheedxu dxi'u, nácadxu zri'ine zre sua benne' ca', gate bsebane' Jesús, ca naxúaj gudxupe' salmo, dxenné': "Lue' nacu' zri'ina'. Neda' bzua' Lue' na'a." <sup>34</sup> Dios blé'eng' gusebane' Le' ládujla benne' gate, chee' quebe guzru bel-la' dxen chee' gate gunné' lu xiche chee': "Gunna' le'e da chawe' da guchebe lazra' lau David." <sup>35</sup> Cá'anqueze dxenné' xetú lu salmo: "Quebe gu'u lataj guzru bel-la' dxen chee' wen zrin chiu', bi nazri'ite lazru'." <sup>36</sup> Da li David be'ne' zrin chee' benne' ca' zaj zre'e gate zua le', ca gunná be'e Dios le', san ca gudé na' gutie', na' bulucache' le' naga belegache xra xrtawe' ca', na' guzru bel-la' dxen chee'. <sup>37</sup> Quebe guzru bel-la' dxen chee' Bënnea' bsebané Dios Le'. <sup>38</sup> Biche ljwezra', dxuzenda' le'e, dxal-la' nézele Dios gunité lawe' chee' dul-la' chee' ne chee' Jesús. <sup>39</sup> Ne chee' Le', xúgute benne' dxeleajlí lazre' Le', Dios dxunité lawe' chee' benne' ca' ca naca xúgute da quebe guca gunité lawe' chee' lácala beluné' ca naca da bdxixruj be'e Moisés. <sup>40</sup> Le guxúe xanne' cuinale chee' quebe gaca chee' ca naca da buluzúaj benne' ca' buluchálaje' waláz chee' Dios, gate gulenné':

<sup>41</sup> Le nna', le'e, benne' wen la, ne le xebane, ne le xenite,

lawe' da guna' neda', Dios cheeḷe, lu zra cheeḷe,

tu da naca da zrente, da quebe chéajle lácala nu guzén le'e.

<sup>42</sup> Gate Pablo ne benne' ljwezre' ca' belexedxúaje' lu xudau' chee judío ca', na' benne' ca' quebe zaj nálaje' judío gulenabe' le' guchálajlene' le' chee da caní gate zrin xetú zra dxulupá'ane'. <sup>43</sup> Gate belexedxúaje' lu xudau' na', benne' zan benne' judío ca', ne benne' ca' belexaque' judío, ne dxelune' da naca chee Dios, xjácálene' Pablo ne Bernabé. Gubáz caní buluzéajni'ing' benne' ca' dxal-la' xelezúa chache' lu xel-la' zri'i lazre' chee Dios.

<sup>44</sup> Guledé xrunu' zra gate naca zra dxulupá'ane', belezraga ca nácaqueze benne' zaj zre'e xezre na' chee xelenne' dizra' chee Dios. <sup>45</sup> Gate benne' judío ca' belelé'ene' benne' zante zaj nazrague' na', na' belaque' xa lazre' ne gulezú lawe' dxelenné' chee da dxenná Pablo, ne gulenné' schanni' chee'. <sup>46</sup> Nadxa Pablo ne Bernabé gulenné' du lazre', gulé'e benne' judío ca':

—Ben na ba xen bzéntenú' le'e nedxu dizra' chee Dios, le'e nácale judío, san lawe' da quebe dxaca lázrele xénele, ne da dxunle dxulé'e na quebe naca cheeḷe gápale xel-la' nabán zeajlí canna, chee le na' chéajntu' na'a chálajlentú' benne' quebe zaj naque' judío. <sup>47</sup> Caní guntu' lawe' da caní gunná bea Xránadxu gate gunné':

Bzua' Lue' ca tu xi' da gusení na benne' xezr la xu ca',

ne chee gacu' weselá chee bénneache zaj zre'e ca naca xezr la xu.

<sup>48</sup> Gate be lenne' da nigá, benne' quebe zaj naque' judío gulebé'ene', na' gulezú lawe' dxelenné' xrlátaje naca dizra' chee Xránadxu, na' guléajle xúgute benne' ca' ba nabéaj Dios chee xelape' xel-la' nabán zeajlí canna. <sup>49</sup> Ca' guca, bzriluj dizra' chee Dios du ca naca lu xezre ca' zaj nababa na'. <sup>50</sup> Benne' judío ca' buluchálajlene' bal-la nu'ula blau ca' zjácálene' da dxulusédene' chee Dios, ne benne' biu blau ca' chee xezre, na' gulegú'u xel-le' benne' ca' chee xeláu zi' xuzre' Pablo, ne Bernabé, ne chee xuluxulague' le' naga nababa na'. <sup>51</sup> Nadxa gubáz ca' belexebibe' bxrte xu da zeajzria na zrele' da dxulé'e na zaj nabaga benne' ca' zria, na' xjaque' lu xezre Iconio. <sup>52</sup> Gulebé'le'e benne' zaj zre'e Antioquia na', benne' dxeléajle'e chee Jesús, zúale Be' Lá'axza le'.

## 14

### *Da belún Pablo ne Bernabé lu xezre Iconio*

<sup>1</sup> Gate beluzrin Pablo ne Bernabé xezre Iconio, na' belú'e tu zrente lu xudau' chee judío ca', na' ca buluchálaje' dizra' chee Dios, benne' zante guléajle'e chee Jesús, benne' judío ca', ne benne' quebe zaj naque' judío. <sup>2</sup> Nadxa benne' judío ca', benne' quebe dxeléajle'e chee Jesús belegú'u xel-le' benne' quebe zaj naque' judío chee xelecuídene' biche ljwézredxu ca'. <sup>3</sup> Lácala belune' caní, benne' gubáz ca' gulezúaqueze' na' zane' zra, ne du lazre' buluchálaje' dizra' chee Dios, dxuluxrén lazre' Xránadxu, na' Xránadxu bzua chúchue' ca da dxelenná benne' gubáz ca' ca naca xel-la' zri'i lazre' chee Dios, na' Le' bnézruje' gubáz ca' xel-la' dxenná bea xelune' xel-la' waca ca' chee xabáa ne da dxelunna bea na naca da li da dxelenné'. <sup>4</sup> Benne' ca' zaj zre'e xezre na' gulaque' chupa la'a. Bal-le' beledé'e judío ca', na' xebal-le' beledé'e gubáz ca' chee Jesús. <sup>5</sup> Nadxa benne' judío ca', ne benne' quebe zaj naque' judío belune' tuze dizra' nen benne' xu'u lawe' ca' chee gulenné' schanni' chee benne' gubáz ca', na' gulaca lazre' xuluzrié' le' xiaj. <sup>6</sup> Pablo ne Bernabé, gate be lenne' ca', buluzrúnnaje' zjaque' naga zaj dxe' xezre Listra, ne xezre Derbe, da zaj nababa Licaonia, na' guledé'e ca naca xézredu ca' chee xezre ca' zaj nababa na', <sup>7</sup> na' buluchálaje' na' ca naca dizra' chawe' chee Jesús.

### *Dxuluzrié' Pablo xiaj lu xezre Listra*

<sup>8</sup> Lu xezre Listra zua tu benne' nazrinnaj ni'e. Dxe'e na' lawe' da gúlaje' nazrinnaj ni'e, ne quebe dxácaqueze se'e. <sup>9</sup> Benne' nigá dxenne' da dxuchalaj Pablo, na' Pablo gunné'e benne' zrinnaj na', na' guque bé'ene' nape' xel-la' dxeajlí lazre' chee xexaque'. <sup>10</sup> Nadxa Pablo gunné' zizraj:

—Guzé ni'u.

Benne' na' guxase' guzete', na' guzú lawe' dxedé'. <sup>11</sup> Gate belelé'e benne' ca' da ben Pablo, na' gulezú lawe' dxelenné' zizraj nen dizra' walazre' chee benne' Licaonia, dxelenné':

—Dios ca' zaj naca ca bénneache ba belelé'e naga zúadxu.

<sup>12</sup> Dxelenné' naca Bernabé dios Júpiter, ne naca Pablo dios Mercurio lawe' da dxuchálajqueze Pablo. <sup>13</sup> Na' bxruze chee dios Júpiter, zua xudau' chee na ca dxú'udxu xezre na', guché'e bezre ca' ne xiaj zaj nuzé'e na du, na' bxruze na du, ne benne' zan ca' gulaca lazre' xuluxucá'ana szrene' benne' gubáz ca', ne xelútié' bezr ca' lau benne' gubáz ca' ca dxelúnqueze benne' xezre Listra na' chee dios chee'. <sup>14</sup> Gate guleque be'e Bernabé ne Pablo, benne' gubáz ca', na' gulecheze' zra lané' da dxulé'e na dxelezrebe' bi gun Dios, na' gulu'e lówela benne' ca', dxelenné' zizraj:

<sup>15</sup> —Le'e, benne', ¿bizr chee na' dxunle da nigá? Netu' nácantu' bénneache ca lé'eequeze, ne za'ntu' nigá chee xentu' le'e dxal-la' gusanle québedxa gunle da caní da quebe bi zaca na, ne chéajle chee Dios ban, Bénnea' bñe' xabáa ne xezr la xu, ne nísadau', ne xúgute da de lu'ule na. <sup>16</sup> Lu iza da ba guledé Dios be'e lataj xúgute bénneache guledé' lu xrneza cha chee', na' belune' ca da gulaca lazre', <sup>17</sup> lácala blé'eequezne' benne' ca' nu naca Le' ne chee da chawe' da dxuné' chee benne' ca'. Le' dxusel-la' xiuj cheedxu ne ca naca lina xrtante, ne dxunne' da dxechínedxu da gágudxu, ne chee bedxu.

<sup>18</sup> Lácala gulenná gubáz ca' da nigá, gúcale'e na stēbe buluzague' benne' ca' chee quebe xelúti'e beyr ca' lau le' chee xuluxucá'ana szrene' le'.

<sup>19</sup> Gudé na' belezrín bal-la benne' judío, benne' Antioquía, ne benne' Iconio, na' belegú'u xel-le' bénneache ca', na' buluzrí'e Pablo xiaj. Gulé'quene' ba beluti'e Pablo, na' gulezrube xue' le' belebéajle' le' xezre na'. <sup>20</sup> Gate benne' ca' dxeléajle'e chee Jesús belezrague' zaj naxéchaje' naga de' Pablo, na' bexasa le', ne bexu'e xezre na', na' zra xula bezá'lene' Bernabé, zjaque' xezre Derbe.

<sup>21</sup> Ca gudé bchálaje' dizra' chawe' chee Jesús lu xezre Derbe, naga benne' zante gulez'í' lu ne'e dizra' chee Dios, na' gubáz ca' belexedé'e xezre Listra, ne xezre Iconio, ne xezre Antioquía. <sup>22</sup> Lu xezre caní belún chache' lázrdau benne' ca' dxeléajle'e chee Jesús, ne buluszrene' le' chjácalene' da naca chee Dios, dxelé'e le':

—Benne' xelu'e naga dxenná bea Dios, xel-la' zi' zrente xeledé'e.

<sup>23</sup> La gázqueze buluzú'e benne' gula ca' chee xuluxú'e tu tu cue' benne' ca' dxeléajle'e chee Jesús, na' ca gudé na' buluzré'e benne' ca' lu na' Xránadxu, Bénnea' ba guléajle'e chee'.

*Pablo ne Bernabé dxelexezrine' lu xezre Antioquía da nababa Siria*

<sup>24</sup> Ca gudé na' belexedé'e naga nababa Pisidia, na' belezrine' naga nababa Panfilia. <sup>25</sup> Buluchálaje' dizra' chee Dios lu xezre Perge, na' ca gudé na' xjaque' xezre Atalia. <sup>26</sup> Na' beluxú'e da dxedá lawe' nísadau', na' belexezrine' xezre Antioquía, naga zaj zra' benne' belegu'e gubáz ca' lu na' Dios chee xelune' zrin na', da ba belezuene' na'a. <sup>27</sup> Gate belezrine' Antioquía na', na' bulutupe' benne' ca' dxeléajle'e chee Jesús, ne buluzenne' benne' ca' xúgute da ba ben Dios, bchínene' gubáz ca', ne ca ben Xránadxu, be'e benne' quebe zaj naque' judío lataj xeléajle'e chee Jesús. <sup>28</sup> Na' Pablo, ne Bernabé belexegá'ane' na' zane' beu' nen benne' ca' dxeléajle'e chee Jesús.

## 15

*Gubáz ca' chee Jesús dxelexezrague' Jerusalén*

<sup>1</sup> Ca lu zra ca', bal-la benne' gusiá'que' xezre ca' zaj nababa Judea, ne belezrine' xezre Antioquía na', na' gulezú lawe' dxelé'e biche ljwézredxu ca' dxal-la' chugu late' weaj belá' chee bel-la' dxen chee benne' biu ca' chee xeledé', ca gunná bea Moisés. <sup>2</sup> Pablo ne Bernabé bulutíl-lale'e le' dizra', na' naga xeajche'te na, biche ljwézredxu ca' buluzú'e Pablo, ne Bernabé, ne xezícala benne' ca' chee chjaque' Jerusalén chee cheajlechálaje' chee da nigá nen benne' gubáz ca', ne benne' gula ca' chee cue' benne' dxeléajle'e chee Jesús zaj zre'e Jerusalén.

<sup>3</sup> Benne' dxeléajle'e chee Jesús, benne' zaj zre'e Antioquía, belexegu'e benne' caní neza, na' belexedé'e xezre ca' zaj nababa Fenicia, ne xezre ca' zaj nababa Samaria, na' dxuluzenne' benne' xézredu ca' ca belún benne' quebe zaj naque' judío, ba belexexaque' chee Dios, na' xúgute biche ljwézredxu belebé'ene' gate belenne' da nigá.

<sup>4</sup> Gate Pablo ne Bernabé belexezrine' Jerusalén, na' benne' ca' dxeléajle'e chee Jesús ne benne' gubáz ca', ne benne' gula ca' gulez'í' lu ne'e le', na' Pablo ne Bernabé buluzenne' le' ca naca da ben Dios lu na' le'. <sup>5</sup> Bal-la benne' fariseo ca', benne' ba guléajle'e chee Jesús, gulez'e' gulenné':

—Dxun na ba xen chugu late' weaj belá' chee bel-la' dxen chee benne' biu ca', benne' ba guléajle'e chee Jesús, benne' quebe zaj naque' judío, ne nna be'edxu le' xuluzú'e dizra' da bdxixruj be'e Moisés.

<sup>6</sup> Nadxa belezraga benne' gubáz ca' ne benne' gula ca', benne' dxeléajle'e chee Cristo, chee xulucá'ana chawe' da na' dxaca. <sup>7</sup> Ca gudé buluchálaje' ljwezre' chee da nigá, na' Pedro guxase', ne guzre' benne' ca':

—Biche ljwezra', nézquezle le'e Dios guqu'e neda' nédxute ládudla le'e chee guzenda' benne' quebe zaj naque' judío dizra' chawe' ca naca chee Jesús, chee xeléajle' benne' ca' chee Le'. <sup>8</sup> Dios nézene' ca naca da xu'u lu xichaj lázxdau bénneache, na' blé'ene' dxez'í' lu ne'e benne' ca', lawe' da bnézruje' benne' ca' Be' Lá'azxa ca bñe' cheedxu dxi'u. <sup>9</sup> Dios quebe dxuché'e ca zrí'ine' tudxu xetudxu lawe' da bca'ana cháwequeze' lázxdau benne' ca' guleajlí lazre' Jesús. <sup>10</sup> Na'a, ¿bizr chee na' dxaca lázrele le'e guchale ca da ba ben Dios, dxuzúale tu xua' lawe' benne' ca' dxeléajle'e chee Jesús, da quebe gaca gúadxu dxi'u, ne quebe guca



xelúa xra xrtáudxu na? <sup>11</sup> Na'a, dxéajlédxu dxi'u bache naladxu nē cheē xel-la' zri'i lazre' cheē Xránadxu Jesús, ne cá'anqueze zaj nalá benne' ca'.

<sup>12</sup> Nadxa xúgute' gulezúa zrie', ne buluzé nague' dxácatē dxuchalaj Pablo ne Bernabé ca naca da bēn Díos, bēne' da zan da dxelunna bea na naca li xrtizre' nen xel-la' waca ca' da za xabáa, da ca' bēne' lu na' Pablo ne Bernabé lāwela benne' ca' quebe zaj naque' judío. <sup>13</sup> Gate beaxuz buluchálaje', na' gunná Jacobo:

—Biche ljwezra', le xene chia'. <sup>14</sup> Simón Pedro bzenne' dxi'u ca bēn Díos, be'ē lataj benne' ca' quebe zaj naca judío xelexexaque' cheē' da nedxu lasa, bequ'é ē lādújla benne' ca' bēnneache xelexexaque' cheē'. <sup>15</sup> Da na' guca naca na tuze nen da buluzúaj benne' ca' buluchálaje' waláz cheē Díos, da na' naxúaj na lu xiche cheē Díos, dxenné':

<sup>16</sup> Te nigá xelá'a

na' xechisa' ca naca lizre David da nazre'e.

Gucá'ana chawa' da nagá'ana cheē na,

na' xechisaqueza' na,

<sup>17</sup> cheē xelexilaj xúgute' benne' xezica ca' Xrane' Díos,

ne cá'anqueze xelún xúgute' benne' zaj zra' xēzr la xu ca',

benne' ca' xelenne' cheē La' neda'.

<sup>18</sup> Ca' dxenná Xránadxu, blé'eng' da nigá nédxudaute.

<sup>19</sup> Cheē lē na' dxapa' le'e quebe dxal-la' gunle zēde benne' quebe zaj naque' judío, benne' ca' dxellexexaque' cheē Díos. <sup>20</sup> Dخال-la' guzúajntu' cheē benne' ca' dxal-la' xulusang' da naca cheē bedáu' xaga ca' u' bedáu' xiaj, ne quebe dxal-la' xelunē' dul-la' cheē da dxucá'ana sban bēnneache, ne quebe dxal-la' xelawē' bēla' cheē bē xixre', bē quebe bdxuaj dxen, ne quebe dxal-la' xelawē' dxen cheēba'. <sup>21</sup> Caní dxal-la' xelunē' lawe' da ca ni'i zaj zra' benne' tu tu xēzre, benne' dxuluzennē' bēnneache ca naca da bdxixruj bea Moisés, da na' dxululabē' lu xudau' ca' cheē benne' judío ca' tu tu zra ca' dxulupá'ang'.

<sup>22</sup> Nadxa benne' gubáz ca', ne benne' gula ca', ne xúgute' benne' dxeléajlē' cheē Jesús belunē' tuze dizra' xelegu'é bal-la' benne' ca' lādújla lē' ne xelesel-lē' lē' xēzre Antioquia nen Pablo, ne Bernabé. Belegu'é Judas, bēnnea' léqueze' Barsabás, ne Silas. Chupa benne' caní zaj naque' benne' blau lādújla biche ljwézredxu ca'. <sup>23</sup> Bulugü'é benne' ca' tu xiche da dxenná na: “Netu', benne' gubáz zrantu' nigá, ne benne' gula zrantu' nigá, ne biche ljwézrele zrantu' nigá, dxugápantu' le'e diuzre, biche ljwézrentu' quebe nácale judío, zrale xēzre Antioquia, ne le'e zrale xēzre ca' zaj nababa Siria, ne xēzre ca' zaj nababa Cilicia. <sup>24</sup> Ba bēnentu' bal-la' benne' blau besía'que' nigá, ne quebe nasél-lantu' netu' lē', na' belunē' le'e zēde nen dizra' da buluchálaje', ne belún zrējeng' le'e, dxelenné' dxal-la' chugu late' weaj bēla' cheē bēl-la' dxen cheēle, benne' biu ca', ne chéajlele ca naca da bdxixruj be'e Moisés. <sup>25</sup> Cheē lē na' dxēquentu' naca xrlátaje cá'antu' bal-la' benne' lādújla netu' cheē xelegu'é xedajlenné' le'e nen biche ljwézredxu Bernabé ne Pablo, benne' ca' nazri'i lāzrelē'entu'. <sup>26</sup> Benne' caní belunē' zrin cheē Xránadxu Jesucristo, xjaque' lu da stēbe naga gulaca lazre' bēnneache xelútiē' lē'. <sup>27</sup> Ca' naca na, dxesél-lantu' naga zúale Judas ne Silas, na' benne' caní xuluchálajlē' le'e ca naca cheē da nigá. <sup>28</sup> Guque Be' Lá'azxa xrlátaje, ne cá'anqueze netu' gúquentu' xrlátaje quebe bi xua' guzúantu' lawe' le'e, san da canize dxun na ba xen gunle. <sup>29</sup> Dخال-la' gusanle da naca cheē bedáu' xaga, ne bedáu' xiaj ca', ne quebe dxal-la' gunle dul-la' cheē da dxucá'ana sban bēnneache, ne quebe dxal-la' gágule bēla' cheē bē xixre', bē quebe bdxuaj dxen, ne quebe dxal-la' gágule dxen cheēba'. Che gunle ca naca da nadxixruj bea caní, gunle xrlátaje. Dxenábantu' lau Díos gaca chawe' cheele.”

<sup>30</sup> Nadxa benne' ca' gulesel-lē' xjaque' xēzre Antioquia. Na' buluchague' benne' ca' zaj naque' cheē Díos, ne bulunézruje' lē' xiche na'. <sup>31</sup> Gate biche ljwézredxu ca' bululabē' na, na' gulebélē'eng' lawe' da dxue zren na lē'. <sup>32</sup> Judas ne Silas zaj naque' benne' dxelenné' waláz cheē Díos. Cheē lē na' buluchálajlē' biche ljwézredxu ca', belúe zrenē' lē', ne bulutipe' lazre' lē'. <sup>33</sup> Gate gudé guca tu chí'i zaj zre'ē na', na' benne' bíchedxu ca' buluzé' benne' ca' dizra', ne gulenabē' Díos sua xel-la' dxēbeza zri lazre' nen benne' ca', cheē xesi'aque' xelexezring' naga zaj zra' benne' ca' gulesel-lē' lē'. <sup>34</sup> Silas gúquentē' xrlátaje xegá'ang' na'. <sup>35</sup> Cá'anqueze Pablo, ne Bernabé belexegá'ang' lu xēzre Antioquia, na' tu zren nen benne' zandxa gulezúē' dxulusédeng' bēnneache, ne dxuluchálaje' ca naca dizra' cheē Xránadxu.

*Dxezú lau Pablo zéajē' zitu' da gudxupe' lasa guchálaje' cheē Jesús*

<sup>36</sup> Ca gudé na', Pablo guzre' Bernabé:

—Xu'u xecha lasa cheajnnadxu biche ljwézredxu ca' zaj zre'ē xúgute' xēzre ca' naga xeajchálajdxu dizra' cheē Xránadxu, cheē cheajnnadxu aja dxaca zaj zre'ē.

<sup>37</sup> Bernabé guca lazre' che'ē Juan nen lē', bi na' léquezebe' Marcos, <sup>38</sup> san Pablo quebe xuxáza lazre' che'ē-be' lawe' da bsanbe' benne' ca' gate zaj zre'ē xēzre ca' zaj nababa

Panfilia, ne québedxa guxiájlebe' le' lu zrin chee Xránadxu. <sup>39</sup> Na' Pablo, ne Bernabé bulutil-la ljwezre' dizra'. Ca'an guca, belexela'a cha chee'. Bernabé guché'e Marcos, na' gulu'e tu lu da dxedá lawe' nísadau', na' xjaque' Chipre. <sup>40</sup> Na' Pablo guqu'é'e Silas, na' ca gudé biche ljwézredxu ca' belegü'e Pablo ne Silas lu na' Xránadxu chee' gune' da chawe' chee' benne' ca', <sup>41</sup> na' gusiá'que', ne guledé'e xezre ca' zaj nababa Siria, ne xezre ca' zaj nababa Cilicia, na' bulutipe' lazre' bi bíchedxu ca'.

## 16

### *Timoteo dxéajlebe' Pablo ne Bernabé*

<sup>1</sup> Pablo ne Silas belezrine' xezre Derbe, ne xezre Listra naga belexezrague' tu benne' cuide' dxéajlebe' chee' Jesús, lebe' Timoteo, zri'ine tu nu'ula judío dxéajle'e chee' Jesús, san xrabe' naque' benne' griego. <sup>2</sup> Bi bíchedxu zaj zre'e xezre Listra, ne xezre Iconio dxelenné' xrlátaje dxgua dxunbe'. <sup>3</sup> Pablo guca lazre' chéajle Timoteo le', na' guchugue' late' belá' chee' bel-la' dxen cheebe' ca' dxenná bea da bdxixruij be'e Moisés, chee' quebe xelezrá'a benne' judío ca' zaj zre'e naga nababa na lawe' da zaj neze xúgute' benne' ca' naca xra Timoteo benne' griego. <sup>4</sup> Lu xúgute' xezre naga dxeledé'e buluzenne' benne' bíchedxu ca' ca naca da zaj nadxixruij bea na belún benne' gubáz ca', ne benne' gula ca' zaj zre'e Jerusalén. <sup>5</sup> Ca'an guca bi bíchedxu ca' gulezúa chúchue' ca' dxeleajlí lazre' Jesús, na' benne' ca' dxeléajle'e chee', tu zra tu zra zeajte dxelane'.

### *Dxelé'e Pablo tu da ble'e Dios le', dxelé'ene' tu benne' Macedonia*

<sup>6</sup> Be' Lá'azxa quebe be'e benne' gubáz ca' lataj xuluchálaje' dizra' chee' Dios naga nababa Asia. Chee' le' na' guledé'e naga nababa Frigia, ne xezre ca' zaj nababa Galacia. <sup>7</sup> Belezrine' naga nazraga xezre ca' zaj nababa Misia. Gulaca lazre' chjaque' naga nababa Bitinia, san Be' Lá'azxa chee' Jesús quebe be'e le' lataj. <sup>8</sup> Nadxa guledé'e naga nababa Misia, na' belezrine' xezre Troas. <sup>9</sup> Lu xezre na' Pablo blé'ene' tu da ba ble'e Dios le' chizrela, blé'ene' tu benne' bíu chee' ga nababa Macedonia, ze' dxata' xuene' Pablo, dxenné': "Gudá Macedonia nigá, gácalenu' netu'." <sup>10</sup> Gate ble'e Pablo da nigá, na' benne' ca', ne neda', Lucas, la gudíajntu' ájala guntu' chee' chéajntu' ga nababa Macedonia lawe' da gúquequezentu' Dios dxenné' netu' chee' cheajchálajntu' benne' ca' dizra' chawe' ca' naca chee' Jesús.

### *Pablo ne Silas dxelezrine' ciudad Filipos*

<sup>11</sup> Lu xezre Troas na' guxú'untu' tu lu da dxedá lawe' nísadau', na' guxéajntu' tu xezre la xu da naxečaj nísadau', nazí le' na Samotracia, na' zra xula bzrintu' xezre Neápolis. <sup>12</sup> Beza'ntu' Neápolis, na' bzrintu' xezre Filipos, da naca tu xezre naga zaj zra' benne' Roma, ne naca xezre blau ga nababa Macedonia. Lu xezre na' guzú'antu' tu chupa zra. <sup>13</sup> Gate naca zra dxulupá'ana judío ca', na' bdxúajntu' dxu'a xezre na', ne bzrintu' dxu'a xegu naga zaj nabéajle' dxeajlechálajlene' Dios. Gudxe'ntu' na' ne bchálajntu' nu'ula ca' zaj nazrague' na' ca naca dizra' chawe' ca' naca chee' Jesús. <sup>14</sup> Tu nu'ula ca' le' Lidia, naque' nu'ula chee' xezre Tiatira, nu'ula dxute' ladxe' zaca da naca bzawe. Nu'ula nigá zéajlene' da naca chee' Dios, na' benne' cheentú', na' Xránadxu bzani'e lázrdawe' chee' guzú' lu ne'e da dxuchalaj Pablo. <sup>15</sup> Na' bdxue nisa nu'ula nigá nen benne' zaj zre'e lizre'. Gudé na' guta' xuene' netu', gunné':

—Che le'e dxéquele da li dxeajlí lazra' Xránadxu, le da súale lizra'.

Na' bēne' ba xuzre begá'anantu' na'.

<sup>16</sup> Tu zra gate zéajntu' naga zeajchálajntu' Dios, bezrágantu' tu bi nu'ula cuide' xu'ube' be' xriwe', ne dxenné' xa'abe' ne chee' be' xriwe' na'. Bi nu'ula nigá xú'ube' lu na' benne' ca' dxuluchíne' lebe' xadía, na' xránabe' ca' dxelezíle'e dumí da dxezibe', dxenné' xa'abe'. <sup>17</sup> Bi nu'ula nigá guzú' laube' za'be' cuzru Pablo ne netu', dxennabe' zizraj:

—Benne' caní dxelune' zrin chee' Dios szrente, ne dxuluzenne' le'e ájala gunle lale.

<sup>18</sup> Zane' zra benbe' caní cadxa guque Pablo zede, na' bexéčajje', ne guzre' be' xriwe' da xu'ube':

—Lu La Jesucristo dxenná be'eda' lue' xedxúaju' lu bel-la' dxen chee' bi nu'ula nigá.

Na' be' xriwe' na' bedxúajte na.

<sup>19</sup> Gate benne' ca' dxuluchíne'ne'-be' xadía guleque bé'ene' québedxa bi xelexezí'e ne cheebe', na' guléj-le' Pablo ne Silas, na' guleché'e benne' caní lau benne' xu'u lawe' naga zua chale'aj xu'u lawe' blau. <sup>20</sup> Na' buluzíe' benne' caní lau benne' xu'u lawe' ca', na' gulenné':

—Benne' caní zaj naque' judío ne dxelún zréajene' benne' zaj zre'e xezre cheedxu, <sup>21</sup> ne dxulusedene' ca' naca da zjácalene', da quebe gaca sidxu, ne quebe gaca gundxu na lawe' da nábabadxu Roma.

<sup>22</sup> Nadxa benne' zaj zre'e xezre na' guledábague' Pablo ne Silas, na' benne' xu'u lawe' na' gulenná be'e xelexéčajje' zra lana Pablo ne Silas, ne xelu'e le' zrize. <sup>23</sup> Ca gudé belúele'e le', na' buluzré'e le' lizre xia, ne gulenná bé'ene' benne' xu'u lu ne'e lizre xia na' guxúe xámié'

benne' ca'. <sup>24</sup> Gate benne' ca gulenná bé'e, na' bzre'e le' zane' lézxudxa ne bzre'e ni'a benne' ca' lu xedxu chee cuaga da dxuxru na ni'e.

<sup>25</sup> Gate gula dxela Pablo ne Silas dxuluchálajlene' Dios, ne dxelul-le' da dxelúe lá'ane' Dios, na' xezicadxa benne' zaj zre'e lizre xia dxuluzé nague' chee'. <sup>26</sup> La' na'te guzru'le'e da bxrize na ca naca lizre xia, na' belexalaj xúguté dxa xu'u ca', ne belexezre du xia da zaj nadxéaj ni'a xúguté benne' ca' zaj zre'e lizre xia. <sup>27</sup> Na' benne' xu'u lu ne'e lizre xia na' bebané', ne gate blé'ene' zaj naxalaj dxa xu'u ca' chee lizre xia, gúlaje' xia chee xute cuine' lawe' da dxéquene' ba buluxzurrúnaj benne' ca' zaj zre'e lizre xia. <sup>28</sup> Pablo gudxezre xe'e, guzre' le':

—Quebe bi gune cuinu'. Xúgutentu' zúantu' nigá.

<sup>29</sup> Nadxa benne' na' xu'u lu ne'e lizre xia gunabé' tu xi', na' guxu'u chégüe', dxezrízequeze' xel-la' dxezrebe, na' bzu zribé' lau Pablo ne Silas. <sup>30</sup> Nadxa guléaje' benne' ca' ne bchebe' le':

—Le'e, benne', ¿bizra dxal-la' guna' chee la'?

<sup>31</sup> Benne' ca' belexechebe':

—Guxéajle' chee Xránadxu Jesucristo, na' lau', ne cá'aqueze benne' zaj zre'e lizru'.

<sup>32</sup> Na' buluchálajlene' le', ne xúguté benne' zaj zre'e lizre' ca naca dizra' chee Xránadxu.

<sup>33</sup> Lu xela ná'queze benne' na' xu'u lu ne'e lizre xia gudibe' we' chee Pablo ne Silas, na' ca gudé na', le' ne xúguté benne' zaj zre'e lizre' guledxúe' nisa. <sup>34</sup> Ca gudé na' beche'e Pablo ne Silas lizre', na' bnézruje' da gulawe', na' le' ne benne' zaj zre'e lizre' gulebé'le'ene' lawe' da ba guléajle'e chee Dios.

<sup>35</sup> Che zilala benne' xu'u lawe' ca' gulesel-le' bi xra'aga lau benne' na' xu'u lu ne'e lizre xia, ne gulenná bé'ene' le' gusane' Pablo ne Silas. <sup>36</sup> Nadxa benne' na' xu'u lu ne'e lizre xia guzre' Pablo:

—Benne' xu'u lawe' ca' gulenná bé'ene' neda' gusana' le'e. Na'a waca xedxúajle du lázrele.

<sup>37</sup> Pablo guzre' bi xra'aga ca':

—Netu' nabábantu' Roma, na' belú'e netu' lávela benne' xezre ca', ne quebe ne xuluchí'e cheentu', na' buluzré'e netu' lizre xia. Na'a ¿dxeléquene' xulusane' netu' bagácheze? Quebe gaca. Xelída léqueze' xelexebéaje' netu'.

<sup>38</sup> Bi xra'aga ca' xeajlexezénnebe' benne' xu'u lawe' ca', na' benne' caní belezrebe' gate guleque bé'ene' Pablo ne Silas zaj nababé' Roma. <sup>39</sup> Na' xjaque' lizre xia na', ne gulenabe' Pablo ne Silas xelezi zrene' chee'. Nadxa belexebéaje' le', ne gulata' xuene' le' xelexedxúaje' xezre na'. <sup>40</sup> Gate Pablo ne Silas belexedxúaje' lizre xia na', na' xjaque' lizre Lidia, na' ca' gudé buluchálajlene' biche ljwézredxu ca', ne bulutipe' lazre', na' besia'que'.

## 17

### *Benne' zaj zre'e xezre Tesalónica dxeledábage' Pablo*

<sup>1</sup> Nadxa Pablo ne Silas guledé'e xezre Anfípolis, ne xezre Apolonia, na' belezrine' xezre Tesalónica, naga zua tu xudau' chee judío ca'. <sup>2</sup> Pablo guxíaje' xudau' na', na' ca' dxúnqueze' bchálajlene' benne' ca' tu tu zra dxulupá'ane' du chunna da gazre zra. <sup>3</sup> Ca da naxúaj na lu xiche chee Dios, bzéajni'ine' le' ben na ba xen Cristo guzi guzaque', ne gutié', na' ca' gudé na' ben na ba xen bebané' ládujla benne' gate. Na' guzre' benne' ca':

—Jesús nigáqueze, bénnea' dxuzenda' le'e chee', naque' Cristo, Bénnea' guchebe lazre' Dios sel-le'.

<sup>4</sup> Nadxa bal-la benne' judío ca' guléajle'e chee Jesús, ne gulaque' tuze Pablo ne Silas. La gázqueze guléajle benne' zan benne' griego, ne nu'ula zan zaj naque' nu'ula blau. <sup>5</sup> Benne' judío ca', benne' quebe dxeléajle'e chee Jesús gulaque' xa lazre' chee Pablo, na' buluchague' bal-la benne' ca' dxelune' da calela dxeledaze', ne bulutupa ljwezre', na' buluzúe' stébe ca naca benne' xezre. Gulu'e xadía lizre Jasón, dxelexilaje' Pablo ne Silas, chee xelexebéaje' le', ne xuludé'e le' lu na' benne' xezre ca'. <sup>6</sup> Gate quebe belexezrelne' Pablo ne Silas lu xu'u na', nadxa beleché'e xadía Jasón ne xebal-la biche ljwézredxu ca' lau benne' xu'u lawe' ca' chee xezre, na' dxelebezre xe'e, dxelenné':

—Benne' ca', benne' ba belún zréajene' ca naca benne' zaj zre'e xezr la xu, cá'aqueze ba belelé'e nigá. <sup>7</sup> Jasón nigá ba gulu'e benne' ca' lizre'. Ca naca benne' ca' dxeledábage' da bdxixruj bea César lawe' da dxelenné' zua xetú wenná bea, tu benne' le' Jesús.

<sup>8</sup> Gate belenne' da caní, na' benne' xezre ca', ne benne' xu'u lawe' ca' gulezúe' stébe. <sup>9</sup> Jasón, ne biche ljwézredxu ca' bulucá'ane' dumí chee gulezúe' lataj, na' benne' xu'u lawe' ca' bulusane' le'.

### *Pablo ne Silas dxelezrine' xezre Berea*

<sup>10</sup> Nadxa biche ljwézredxu gulé'e Pablo ne Silas chee xesí'aque' chizrela, chee chjaque' xezre Berea. Gate belezrine' na', na' belú'e lu xudau' chee judío ca'. <sup>11</sup> Benne' judío caní zaj nácaxé' zren lazre' ca' benne' Tesalónica ca' lawe' da du lazre' gulezúe' dizra' chee Dios, na' tu zra tu zra dxululabe' lu xiche chee Dios chee xuluxúe' che naca da li da dxelé'e le'. <sup>12</sup> Ca'an

guca, benne' zan benne' judío ca' guléajle'e chee Jesús, ne cá'anqueze benne' griego. Benne' zan guléajle'e, nu'ula blau ca', ne benne' biu ca'. <sup>13</sup> Gate benne' judío ca' zaj zre'e xezre Tesalónica guleque bé'ene' dxuchalaj Pablo dizra' chee Dios lu xezre Berea, na' belezrine' na', ne gulegú'u xel-le' bèneache chee xeledábage' Pablo ne Silas. <sup>14</sup> Biche ljwézredxu ca' la gulesél-la'te' Pablo chéaj'e dxu'a nísadau', na' Silas ne Timoteo bellexegá'ane' lu xezre Berea. <sup>15</sup> Benne' ca' zjácálene' Pablo beleché'e le' lu xezre Atenas. Nadxa benne' ca' belexezrine' lazrie', ne gulé'e Silas, ne Timoteo chjácázeque' naga zua Pablo.

*Da dxun Pablo lu xezre Atenas*

<sup>16</sup> Dxácaté na' Pablo dxebeze' Silas ne Timoteo naga zué' lu xezre Atenas, na' guzúale'e stebe gate blé'ene' ca naca xezre na', ni' naze nítale'e bedáu' xiaj. <sup>17</sup> Chee le' na' bchálaje' lu xudau' chee judío ca' nen benne' judío ca', ne xezícala benne' ca' zjácálene' da naca chee Dios, na' tu zra tu zra bchálajlene' benne' ca' zaj zre'e lawe' xi'a. <sup>18</sup> Bal-la benne' zjácálene' ca naca da dxulusede benne' ca' zaj le' benne' epicureo, ne benne' estoico gulezú lawe' dxuluchálajlene' Pablo. Bal-le' gulenné':

—¿Bizra xega benne' wechalaj nigá dxi'u?

Na' xebal-le' gulenné':

—Dxéquentu' naque' benne' dxuse dizra' chee dios zitu' ca'.

Ca'an gulenné' lawe' da dxuchalaj Pablo dizra' chawe' ca naca chee Jesús, ne ca naca chee xel-la' dxexebán. <sup>19</sup> Nadxa guleché'e Pablo lu lataj nazí le na Areópago, naga dxelezrágaqueze' bi xuluzén ljweze'. Na' buluchebe' Pablo:

—¿Waca guzúenu' netu' ca naca da cube nigá da dxusedentu' bèneache? <sup>20</sup> Lue' dxuchálaju' dizra' da quebe ne xénetu', na' dxaca lázrentu' nézentu' bi zéaje ca naca da caní.

<sup>21</sup> Caní gulenné' lawe' da dxuluzé nágaze, ne dxuluchálajeze ca naca tu dizra' cube xúgute benne' Atenas, ne benne' zitu' ca' zaj zre'e xezre na'.

<sup>22</sup> Nadxa Pablo guzé' laduj benne' ca' zaj zre'e Areópago na', na' guzre' le':

—Le'e, benne' Atenas, ca naca xúgute da dxelé'eda', dxulé'e na dxápale'ele ba lá'ana dios chee ca', <sup>23</sup> lawe' da gate gudá' neda' gunná'a ca zaj naca xudau' ca' naga dxue lá'anale dios chee ca', na' ble'eda' tu xudáudau' naga naxúaj dizra' caní: Chee Dios Quebe Nu Núnbea. Na'a, Dios na' dxue lá'anale le'e, ne quebe núnbeale Le', chee Dios na' dxuchálajlene' le'e.

<sup>24</sup> 'Naque' Dios na' bene' xezr la xu nigá, ne xúgute da de lawe na'. Naque' Xrane xabáa, ne Xrane xezr la xu nigá. Quebe zué' xudau' da nun ni'a na' bèneache. <sup>25</sup> Quebe nachínene' bi da gaca xelún bèneache chee Le' lawe' da dxunna Dios ná'queze xúgutedxu xel-la' nabán, ne be' da dxeca'adxu, ne xúgute da de.

<sup>26</sup> "Tuze benne' bene' naque' xra xúgute cue' xezr la xu ca' chee che'e du gabí'i xezr la xu, na' blé'ene' zra, ne lataj naga dxal-la' xelexré'e, <sup>27</sup> chee xelexexilaje' Dios chee ajala xelexezrelne' Le' lácala quebe xelúnbea xánnie' Le', san da li Dios quebe zué' zitu' naga zua tu tudxu dxi'u. <sup>28</sup> Ne chee Dios nigá naca bandxu, ne dxedadxu, ne zradxu. Naca ca gulenná bal-la benne' wíla chee, gulenné': "Nácadxu xrtia Dios." <sup>29</sup> Che nácadxu xrtia Dios, quebe dxal-la' guéquedxu naca Dios ca tu bedáu' oro, u tu bedáu' plata, u tu bedáu' xiaj, da zaj nun bèneache cáteze dxululaba lázrequeze'. <sup>30</sup> Dios bzue' chala'ala da belún bèneache ca ni'te lu xel-la' quebe zaj neze chee', san na'a dxenná bé'ene' xúgute benne' gáteteze zaj zre'e xelexebí'i lazre'. <sup>31</sup> Dios ba nuzúe' tu zra gate guchi'e chee xúgute bèneache lu da xrlátaje chee' lu na' tu benne' ba gucá'a Le', na' chee da nigá bzue' tu da dxunna bea na gate bsebane' bènea' ládujla benne' gate.

<sup>32</sup> Gate benne' ca' belenne' dizra' nigá ca naca chee tu benne' bebane' ládujla benne' gate, na' bal-le' belún le' chee', ne xebal-le' gulenné':

—Waca guchálajlenu' netu' ca naca da nigá xetú zra.

<sup>33</sup> Nadxa Pablo bezé'e naga zaj zra' benne' ca'. <sup>34</sup> Bal-la benne' ca' guléajle'e chee Jesús, na' gulaque' Pablo tuze. Ládujla benne' caní zua Dionisio, benne' naque' tuze nen benne' dxelezrague' Areópago na', ne tu nu'ula le' Dámaris, ne xebal-la benne' ca'.

## 18

*Pablo dxezrine' xezre Corinto*

<sup>1</sup> Gudé na' bezá' Pablo xezre Atenas, bexíaje' xezre Corinto. <sup>2</sup> Lu xezre na' xeajxraque' tu benne' judío le' Aquilo, naque' benne' nababe' tu xezre nababa Ponto. Láteze ba guca belexezrin Aquilo, ne zru'ule' Priscila ga na'. Benne' caní besia'que' xezr la xu Italia lawe' da gunná bea César Claudio xelexedxúaj xúgute benne' judío ca' xezre Roma. Pablo guxíaje' xeajjné'e Aquilo ne Priscila, <sup>3</sup> na' lawe' da tuze ca naca zrin da dxelún Pablo ne Aquilo, dxelunge' xu'u xide zra be xixre' da dxelútie' chee benne' dxjaca wedil-la, na' begá'ana Pablo nen benne' caní chee xelunge' tu zren zrin. <sup>4</sup> Tu zra tu zra gate naca zra dxulupá'ana judío ca',

Pablo zéajé' lu xudáudau' cheé judío ca' naga bchálajé', ne blé'engé' benne' ca', benne' judío, ne benne' quebe zaj naque' judío, Jesús naque' Cristo, Bénnea' guchebe lazre' Dios sel-le'.

<sup>5</sup> Gate belezrín Silas, ne Timoteo ga na', gudé belexesi'aque' xezre ca' zaj nababa Macedonia, na' Pablo tu dxuchálajzqueze' dizra' cheé Dios, ne dxulé'engé' benne' judío ca' da li Jesús naque' Cristo, bénnea' nasel-la Dios, bénnea' dxelebeza judío ca'. <sup>6</sup> Benne' judío ca' gulezú lawé' dxeledábague' Pablo, ne dxenné' schanni' cheé'. Nadxa Pablo guzribé' gabán cheé' da dxulé'e na dxebéaj xíchajé' benne' ca', dxenné':

—Le'e nabágale cheé xel-la' gute cheé bénne'du xu'ule. Québedxa nabaga' neda' cheé na lawe' da ba bzenda' le'e dizra' chawe' cheé Cristo. Ná'atela guchálajlëna' benne' quebe zaj naque' judío.

<sup>7</sup> Bezé'e lu xudáudau' na', na' bezrine' lizre tu benne' le' Justo, benne' dxucá'ana szrene' Dios ne zua lizre' cuita xudáudau' cheé judío ca'. <sup>8</sup> Na' Crispo, benne' xíchajé cheé xudáudau' cheé judío ca', ne ca naca benne' zaj zre'e lizre' guléajlé'e cheé Xránadxu. Cá'anqueze benne' zan benne' Corinto, gate belenne' dizra' cheé Dios, guléajlé'e ne guledxú'e nisa. <sup>9</sup> Nadxa Xránadxu blé'e lawé' Pablo tu zre' tu lu da blé'e Dios lé', ne guzre' lé':

—Quebe zrebu'. Bchálajtëze, ne quebe sua zriu'. <sup>10</sup> Neda' zúalëna' lue', na' quebe nu seque' bi gune lue' lawe' da zaj zrálé'e benne' zaj naque' chia' lu xezre nigá.

<sup>11</sup> Ca'an guca, begá'ana Pablo tu iza xugachaj lu xezre Corinto, dxusédené' benne' ca' dizra' cheé Dios.

<sup>12</sup> Lu zra ca' gate naca Galión benne' xu'u lu ne'e xezr la xu na' naga nababa Acaya, waláz cheé Roma, na' benne' judío ca' guledábague' Pablo. Beleché'e lé' xu'u lawe', <sup>13</sup> ne gulé'e benne' xu'u lu ne'e xezr la xu na':

—Benne' nigá dxedé' dxegú'u xel-le' bénneache cheé xelúe lá'angé' Dios, ne xeluné' tu da dxedábaga da nadxixruj bea cheentu'.

<sup>14</sup> Pablo ba zue' guchálajé' gate Galión guzre' benne' judío ca':

—Chela naca na cheé tu da dxuzúa chalá'ala da bdxixruj bea César u cheé tu da zrinnaj zren, na' gun na ba xen xenda' ca da dxennale le'e, benne' judío. <sup>15</sup> Lawe' da naca na cheé dizra'ze, ne cheé la tu benne', ne cheé da nadxixruj bea na cheézele, le gucá'ana chawe' na lé'equeze, lawe' da quebe dxaca lazra' neda' guchi'e da dxaca cheé da ca'.

<sup>16</sup> Nadxa bebéajé' benne' ca' lu xu'u lawe' na'. <sup>17</sup> Nadxa xúgute benne' griego gulél-le' Sóstenes, benne' xíchajé cheé xudáudau' cheé judío ca', ne belú'e lé' lau benne' xu'u lu ne'e xezr la xu na', lé' Galión. Galión na' quebe be' lazre'e cheé da na'.

*Pablo dxezrine' xezre Antioquia, na' dxezú lawé' zéajé' da guxunne' lasa zéajé' wen zrin cheé Cristo*

<sup>18</sup> Pablo begá'angé' xezre na' xezane' zra. Gudé na' bze' biche ljwézredxu ca' dizra', na' guxú'e tu lu da dxedá lawe' nisadau' zéajé' naga nababa Siria tu zren nen Priscila ne Aquilo. Lu xezre Cencrea nédxudxa gate za chu'e lu da dxedá lawe' nisadau', Pablo bzuate' xideze xíchajé', da dxunna bea na zua tu da nachebe lazre' guné' lau Dios. <sup>19</sup> Gate belezrine' lu xezre Efeso, Pablo bsané' Priscila ne Aquilo, na' guxíajé' lu xudáudau' cheé judío ca', ne bchálajlëné' judío ca' zaj nazrague' na'. <sup>20</sup> Benne' ca' gulata' xuene' le' xegá'anadxé' xetú chí'i, na' lé' quebe guca lazre'. <sup>21</sup> Nadxa Pablo bze' benne' ca' dizra', dxenné':

—Dxun na ba xen xezrina' sua' Jerusalén cheé súaqueza' lu laní da ba za'. Welá'aqueza' xedajnná'a le'e che gunna Dios lataj.

Na' guxú'e lu da dxedá lawe' nisadau', ne bezé'e Efeso na'. <sup>22</sup> Gate bezrine' xezre Cesarea, Pablo guxíajé' Jerusalén xeajape' diuzre benne' ca' dxeléajlé'e cheé Jesús, na' gudé na' guxíajé' xezre Antioquia. <sup>23</sup> Ca gudé guzú'e na' tu chí'i, na' bezé'e na', gudé'e tu tu xezredu ca' zaj nababa Galacia, ne xezre ca' zaj nababa Frigia, dxutipe' lazre' benne' ca' dxeléajlé'e cheé Jesús.

*Apolos dxuchálajé' dizra' cheé Dios lu xezre Efeso*

<sup>24</sup> Ca lu zra ca' tu benne' judío lé' Apolos bzrine' lu xezre Efeso, naque' benne' xezre Alejandria, lu xu Egipto. Naque' tu benne' nupá'algé'e xrtizre', ne núnbealé'e da naxúaj na lu xiche cheé Dios. <sup>25</sup> Naxéajni'ilé'engé' ca naca cheé Xránadxu, ne duté lázrdawe' dxuchálajé', dxusédené' cáteze naca cheé Jesús, lácala dxusédezené' xel-la' dxuchúa nisa ca ben Juan. <sup>26</sup> Apolos guzú lawé' dxusédené' benne' ca' zaj zre'e xudáudau' cheé judío ca' du lazre'. Gate belén Priscila, ne Aquilo cheé', na' guleché'e lé' chalá'ala, ne buluzéajni'idxengé' lé' cáteze naca dizra' cheé Dios. <sup>27</sup> Ca gudé na', gate guca lazre' Apolos chéajé' naga nababa Acaya, bi bíchedxu ca' bulutipe' lazre', ne buluzuaje' tu xiche cheé benne' ca' dxeléajlé'e cheé Jesús zaj zre'e xezre ca' zaj nababa Acaya na' cheé xezezi' lu ne'e Apolos na'. Gate bzrin lé' naga nababa Acaya, gúcaléle'engé' benne' ca', na' Dios be'e lé' lataj guléajlé'e cheé Jesús. <sup>28</sup> Apolos blé'engé' lau xúgute benne' ca' ca dxeleque zréaje benne' judío ca', ne blé'engé' ne cheé da

naxúaj na lu xiche chee Dios Jesús naque' Cristo, Bénnea' nase-la Dios, Bénnea' dxelebeza judío ca'.

## 19

### *Pablo dxezrine' xezre Efeso*

<sup>1</sup> Dxácatę zua Apolos lu xezre Corinto, na' gudé Pablo xézredu ca' zaj dxe' laduj xi'a ca', na' bzrine' lu xezre Efeso naga xeajxraque' bal-la benne' dxelájle' chee Jesús. <sup>2</sup> Na' bchebe' benne' ca':

—¿Guzi'le le'e Be' Lá'azxa gate guxéajle?

Belexechebe':

—Ne quebe xénentu' che zua Be' Lá'azxa.

<sup>3</sup> Nadxa Pablo bchebe' benne' ca':

—¿Bi xel-la' dxedxúa nisa guzi'le le'e?

Benne' ca' belexechebe':

—Xela dxuchúa nisa ca' ben Juan.

<sup>4</sup> Na' gunná Pablo, guzre' benne' ca':

—Awe', Juan bchuę' nisa benne' ca' belexebi'i lazre', san guzre' benne' ca' dxal-la' xelájle' chee Bénnea' xide' ca' te chee le', da zéaje na, chee Jesús, Bénnea' naque' Cristo, nase-la Dios.

<sup>5</sup> Gate belenne' da nigá, na' beledxúe' nisa lu La Xránadxu Jesús. <sup>6</sup> Gate bze' na' Pablo benne' ca', na' guzúale Be' Lá'azxa le', na' gulenne' dizra' chee benne' zitu' da quebe bulusede', ne bulucháaję' waláz chee Dios. <sup>7</sup> Benne' caní zaj naca chazrínne'.

<sup>8</sup> Lawe' chunna beu' dxeaj Pablo lu xu'u ca' naga buluzraga judío ca' naga bchálajlene' benne' ca' dizra' chee Dios, ne blé'ene' benne' ca' naca da li da dxuchálaje' ca' naca xel-la' dxenná bea chee Dios. <sup>9</sup> Bal-le' belún zide' lázrdawe', ne quebe gulaca lazre' xelájle' chee Jesús, na' gulenne' schanni' chee dizra' chawe' ca' naca chee Jesús lávela benne' ca'. Nadxa Pablo bezé'e naga zaj zra' benne' ca', ne guché'e benne' ca' dxelájle' chee Jesús lu xu'u ga dxusede tu benne' le' Tiranno, na' lu xu'u na' bchálajlene' benne' ca' tu zra tu zra. <sup>10</sup> Ca' bene' lawe' chupa iza, na' ca'an guca xúgute benne' zaj zre'e xezre ca' zaj nababa Asia belenne' dizra' chee Xránadxu Jesús, benne' judío ca', ne benne' quebe zaj naque' judío. <sup>11</sup> Dios bene' xel-la' waca zri'a ca' lu na' Pablo lu zra ca'. <sup>12</sup> Ca'an guca, gulequę'e ladxe' ca' da dxuchéaj xichaj Pablo, ne ladxe' ca' da bde'e lachu'e, na' belú'e na naga zaj de' benne' we' ca', na' benne' caní belexejaque' ca' naca xízrawe' da zaj nape', na' be' xriwe' ca' belexedxúaj na lu bel-la' dxen chee benne' ca'.

<sup>13</sup> Bal-la benne' judío ca', benne' dxeledé' dxelexebéaje' be' xriwe' ca' lu xichaj lázxdau benne' ca', gulaca lazre' xuluchínene' La Xránadxu Jesús chee xelexebéaje' na, na' gulé'e be' xriwe' ca':

—Dxenná bé'entu' le'e xedxúajle lu xichaj lázxdau benne' nigá lu La Jesucristo, Bénnea' dxuchalaj Pablo chee'.

<sup>14</sup> Caní belún gazre benne' zaj naque' zri'ine tu benne' judío le' Esceva, naque' tu benne' xichaję chee bxruze ca'. <sup>15</sup> Gate belune' caní, be' xriwe' na' bechebe na chee':

—Núnbe'a Jesús, ne nezda' nua' Pablo, san le'e, ¿nuzra le'e?

<sup>16</sup> Gate gunná na da nigá, na' benne' biu na' xu'e be' xriwe' na', guxritie' guzríja che'e benne' ca', na' dutę xel-la' wal-la chee' buculę' xúgute benne' ca', na' bé'le'e benne' ca' cadxa buluzrínne' lu xu'u na' gala' xídeze, ne dxelaque' dxen. <sup>17</sup> Xúgute benne' zaj zre'e xezre Efeso, benne' judío ca', ne benne' quebe zaj naque' judío, belenne' ca' guca da nigá, na' chee le' na' belezrélę'e, ne bulucá'ana szrene' La Xránadxu Jesús.

<sup>18</sup> Cá'anqueze benne' zan lávela benne' ca' dxelájle' chee Jesús belelé'e dxelexrúalepe' da caleja da belune', <sup>19</sup> na' benne' zan, benne' belune' xel-la' wazrá', zaj nu'e xiche chee wazrá', na' buluzeze' na lau xúgute benne' ca'. Gate bululabe' ca' gulezaca xiche ca', na' gulénezene' gulezaca na ca' gazxu gaxúa cue' tu gaxúa dumí plata. <sup>20</sup> Ca'an guca, guxíaj bzriluj dizra' chee Xránadxu, ne blé'e na xel-la' waca chee na.

<sup>21</sup> Gudé na' Pablo guca lazre' téę' xézredu ca' zaj nababa Macedonia, ne Acaya, na' te na' chéaje' xezre Jerusalén. Gunné' ca' te chéaje' Jerusalén, na' dxal-la' cheajte' xezre Roma. <sup>22</sup> Nadxa gusel-le' chupa benne' dxelácale' le', Timoteo ne Erasto, naga nababa Macedonia, dxácatę begá'ana le' xetú' chi'i naga nababa Asia.

### *Benne' xezre Efeso dxeledábagę' Pablo*

<sup>23</sup> Ca lu zra na' benne' zan guledábagę' dizra' chawe' ca' naca chee Jesús, <sup>24</sup> da na' guca na ne chee tu benne' le' Demetrio, benne' gubizre plata. Benne' nigá dxunę' níchudu ca' da zaj naca plata ca' xudau' chee dios nu'ula le' Diana, na' benne' ca' dxelúnlene' le' zrin nigá

dxelezíl'le'e dumí. <sup>25</sup> Demetrio na' bchague' benne' caní tu zren nen xezica benne' dxelune' zrin caní, na' guzre' benne' ca':

—Le'e, benne', nézquezle lu zrin nigá dxaca cheedxu da cháwele'e, <sup>26</sup> na' ca dxelé'equezle le'e ne dxenle, Pablo nigá dxedé' dxenné' dios ca' da zaj nun bénneache quebe zaj naca na dios, na' caní ba bsédené' benne' zan, quegá Efeso nigáze, san du ca nababa Asia. <sup>27</sup> Da nigá nácale'e na štebe cheedxu, lawe' da ca naca zrin cheedxu nigá nazruzre cuía xi na, ne la gaze xudau' chee dios nu'ula Diana nazruzre nite xel-la' nuzé chee na, na' caní xegá'ana ditaj ca naca xel-la' szren chee dios nu'ula, bénnea' dxelúe lá'ana ca naca benne' zaj zre'e ga nababa Asia, ne du ca naca bénneache zaj zre'e xezr la xu.

<sup>28</sup> Gate belenne' da nigá, na' belezrá'ale'e benne' ca', ne gulebezre xe'e, dxelenné':

—¡Ga'ana szren Diana, dios cheedxu, benne' Efeso!

<sup>29</sup> Na' ca naca benne' zaj zre'e xezre na' guleque zrėjene'. Gulele' Gayo, ne Aristarco, benne' Macedonia dxeledále' Pablo, na' gulezrube xue' benne' caní chalé'aj xu'u lawe'. <sup>30</sup> Pablo guca lazre' chu'e na' chee guchálajlene' benne' ca', san bi bíchedxu ca' quebe gulegú'e le' lataj. <sup>31</sup> Cá'anqueze bal-la benne' xu'u lawe' chee xezre ca' zaj nababa Asia gulegel-le' benne' xeajezre' Pablo quebe dxal-la' chu'e na'. <sup>32</sup> Dxácaté na', naga zaj nazraga benne' ca', bal-le' gulebezre xe'e, tu da dxelenné', na' xebal-le' dxelebezre xe'e, dxelenné' da xula, lawe' da beledxé'ena zraga benne' zan, na' benne' zanté quebe zaj nézene' bizr chee na' zaj nazrague' na'. <sup>33</sup> Nadxa benne' judío ca' buluzúe' Alejandro lau benne' ca' chee guzéajni'ine' le' ca naca da nigá, na' le' guchisa ne'e chee xelezúa zri benne' ca' lawe' da guca lazre' guchálajlene' benne' zan ca' da gácale na judío ca'. <sup>34</sup> Gate benne' zan ca' guleque bé'ene' naque' benne' judío, na' gulebezre xa'a xúgute' ca chupa hora, dxelenné':

—¡Ga'ana szren Diana, dios cheedxu, benne' Efeso!

<sup>35</sup> Nadxa benne' dxuzúaje' ne chee xezre na', gate ba bzua zrie' benne' zan ca', gunné':

—Le'e, benne' Efeso. Ca naca bénneache zaj zra' xezr la xu nigá zaj nézene' benne' zaj zre'e xezre Efeso nigá zaj nabague' xuluxúe' xudau' chee dios nu'ula Diana, ne bedáu' chee' da bexruj na zran xabáa. <sup>36</sup> Quebe nu seque' tábaga' da nigá. Chee le' na' le sua zrize, ne quebe bi gunle da quebe ne guxúe xánnele. <sup>37</sup> Benne' caní nache'le nigá quebe bi da calela ne xelune', ne quebe bi schanni' ne xelenné' chee dios nu'ula cheele. <sup>38</sup> Che Demetrio, ne benne' ca' dxelune' zrin nen le' dxelaca lazre' xelagu zria chee tu benne', zaj zra' benne' dxuluchi'e da dxaca, ne zaj zua xu'u lawe' ca' naga gaca xelawe' zría chee benne' ca'. <sup>39</sup> Na' che le'e bi xetú da ná bale, dxal-la' ná bale na naga zaj nazraga benne' xu'u lawe' ca dxenná bea da bdxixruj bea César. <sup>40</sup> Na'a zúadxu štebe ga gaze nu gagu zria cheedxu ca naca da bendxu, xelenné' dxedábagadxu xu'u lawe' lawe' da quebe seque' bi xechébedxu che nu gagu zria dxi'u ne chee da guca na'a.

<sup>41</sup> Ca gudé gunné' da nigá, na' bze' benne' zan ca' dizra'.

## 20

### *Pablo dxedé'e ga nababa Macedonia ne Grecia*

<sup>1</sup> Gate gudé guca da štebe na' lu xezre Efeso, na' Pablo btupe' benne' ca' dxeléajle'e chee Jesús chee guzéajni'ine' le'. Nadxa bze' benne' ca' dizra', ne bnide' le', na' guze'e zéaje' xezre ca' zaj nababa Macedonia. <sup>2</sup> Xeajné'e bíchedxu ca' zaj zre'e xúgute' xézredu ca', ne btípale'e lazre' benne' ca' ne chee dizra' da bchálajlene' le'. Ca gudé na' bezrine' naga nababa Grecia. <sup>3</sup> Begá'ang' na' chunna beu', na' gudé na' gate ba zuate' chu'e tu lu da dxedá lawe' nísadau' chéaje' xezre ca' zaj nababa Siria, guque bé'ene' ba zaj nun judío ca' ca da xelune' chee'. Chee le' na' gulu'u bi'e xezé'e ni'e té'e naga nababa Macedonia. <sup>4</sup> Belún le' tuze Sópater, benne' xezre Berea, ne Aristarco, ne Segundo, benne' xezre Tesalónica na', ne Gayo, benne' xezre Derbe, ne Timoteo, ne Tíquico, ne Trófimo, benne' ca' chee xezre ca' zaj nababa Asia. <sup>5</sup> Bi bíchedxu caní gulebía lawe' launtu', neda', Lucas, ne xezícadxa ljwezre Pablo, na' gulebezé' netu' lu xezre Troas. <sup>6</sup> Netu', gate gudé laní gate dxelagu benne' judío xeta xtila da quebe nachixre cua zichaj chee na, guxú'untu' tu lu da dxedá lawe' nísadau', na' beza'ntu' xezre Filipos. Zra gazxu' zra na' xeajzrentu' bi bíchedxu ca' lu xezre Troas, naga guzúiantu' gazre zra.

### *Da ben Pablo lu xezre Troas*

<sup>7</sup> Zra nedxu chee da gazre zra bezrágantu' chee gágantu' da dxusá lázredxu ca guca gate gute Xránadxu, na' Pablo bsédené' bi bíchedxu ca'. Ben na ba xen xeza'ntu' zra xula, na' chee le' na' bchálajqueze Pablo cadxa bzrinté dxela. <sup>8</sup> Nazrágantu' tu xu'u da zua chunna cuía sibe, na' zaj zéle'e xi' da dxulusení na. <sup>9</sup> Tu bi cuide' zríabe' ga dxu'u lení, na' gate Pablo bsetúnnadxé' xrtizre', na' guca wásele'e bi cuide' na', na' naga xeajcheté na, na' dxásetébe' gubíxrebe' chunna cuía sibe, na' xeajlechise'-be' ba nátebe'. <sup>10</sup> Nadxa betaj Pablo, na' gulégúe' bequé'e-be', ne bnide'-be'. Nadxa guzre' bi bíchedxu ca':

—Quebe zrébele. Nabanbe'.

<sup>11</sup> Nadxa Pablo begüéne' bezrine' chunna cuía sibe na'. Na' bzúzruje' xeta xtila gudawe', na' bezú lawe' dxuchálaje' cadxa guxaní'te. Zra na' bezé' na'. <sup>12</sup> Nadxa bíchedxu ca' belexeché' bi na' gubíxrebe' ba bexaca banbe', na' xúgute' gulezúe' lu xel-la' dxelezné' lazre'.

*Pablo dxexeze' e xezre Troas xezrine' xezre Mileto*

<sup>13</sup> Netu' guzría launtu' lau Pablo, na' guxu'untu' lu da dxedá lawe' nísadau', na' bzrintu' xezre Asón naga xezrágantu' Pablo ca' ba nun le' lawe' da guca lazre' zéaje' ní'aze'. <sup>14</sup> Gate bezrágantu' le' lu xezre Asón, na' guxú'e' lu da dxedá lawe' nísadau' naga xu'untu', na' guxíajntu' xezre Mitilene. <sup>15</sup> Beza'ntu' na', na' zra xula bedentu' le' nna' xezre Quío, na' xetú zra, zra xula bezrintu' lu xezre Samos. Na' guzúantu' xezre Trogilio naga bezí' lázrentu', na' zra xula bzrintu' xezre Mileto. <sup>16</sup> Ca' bentu' chee quebe guzré'tecantu' naga nababa Asia. Chee le' na' Pablo quebe guca lazre' chéaje' Efeso lawe' da guca lazre' xezrinze' lu xezre Jerusalén chee sue' na' lu zra Pentecostés che ba guca.

*Pablo dxuchálajene' benne' gula dxeléajle' e chee Jesús, benne' zaj zre' e Efeso*

<sup>17</sup> Ca zrantu' lu xezre Mileto, Pablo gusel-le' lu benne' cheajné' benne' gula ca' dxeléajle' e chee Jesús zaj zre' e xezre Efeso. <sup>18</sup> Gate beledá' benne' ca', Pablo guzre' le':

—Le'e nézquezle ca' beña' neda' xúgute' zra ca' gudé bla'a ga nababa Asia. <sup>19</sup> Xúgute' zra guzúa' lálwela le'e dxuna' zrin chee Xránadxu duté xel-la' dxexruj lazre', ne zane' lasa gudxezra', na' gudé'a' lu zane' da guzxaca' ca' naca da gulaca lazre' benne' judío ca' xelune' chia'. <sup>20</sup> Bchálajlène' le'e xúgute' da naca na' xrlátaje, ne bsédeda' le'e lálwela benne' zan, ne lízrquezle. <sup>21</sup> Benne' zaj naque' judío, ne benne' quebe zaj naca judío, gúchequeza' benne' ca' dxal-la' xelexebí'i' lazre' lau Dios, ne xeléajle' e chee Xránadxu Jesucristo. <sup>22</sup> Na'a zexá'a Jerusalén, ca' dxenná be'e Be' Lá'azxa neda', ne quebe nezda' bi gaca chia' na'. <sup>23</sup> Tuzé da nezda', lu xúgute' xezre ca' naga dxedéa', Be' Lá'azxa dxé'e neda' dxal-la' chu'a lizre xia, ne tea' zane' xel-la' zi'. <sup>24</sup> Quebe dxebe'a gunne xue chee da nigá, ne quebe bi zaca xel-la' nabán chia', san tuze che gaca chéajlène' ca' naca da dxuna', ne chee gusexúzrqueza' guna' ca' naca da nusebaga Xránadxu Jesús neda', guchálaja' dizra' chawe' ca' nazrí'i Dios dxí'u.

<sup>25</sup> 'Nézqueza' netule le'e, ba bchálajlène' le'e ca' dxenná bea Dios, québedxa lé'ele neda'. <sup>26</sup> Chee le' na', dxaca lazra' xapa' le'e na'a, quebe nabaga' zria ne chee tule le'e, <sup>27</sup> lawe' da ba bzenda' le'e ca' naca da dxaca lazre' Dios guné', ne quebe bi bcá'ana' da quebe bzéajni'ida' le'e. <sup>28</sup> Chee le' na', le' guxúe cuínale, ne le' guxúe ca' naca benne' ca' nácale tuze, benne' ca' Be' Lá'azxa ba nuzúe' le'e ládújla le' chee chu'u lu na' le' guxuele benne' ca' zaj nazrague' chee Xránadxu, benne' ca' naxá'awene' nen dxen cheéqueze'. <sup>29</sup> Nezda' gate zexá'a neda' xeledá' bal-la benne' xelaca lazre' guzría xi'e benne' zaj nazraga chee Xránadxu ca' dxelún becu' xi'a, be snia ca' dxuluzria xiba' zri'a' ca'. <sup>30</sup> Ládújla le'e weledá' bal-la benne' xulusédene' da wen lazre', ne quegá da li, chee chjácále benne' ca' dxeléajle' e chee Jesús le'. <sup>31</sup> Chee le' na', le' guxúe cuínale. Le' gusá' lázrele ca' beña' chun iza, te zra ne chizrela quebe bsana' bzéajni'ida' le'e tu tule le'e, ne gudxézrete'a'.

<sup>32</sup> Na'a, biche ljwezra', dxuzúa' le'e lu na' Dios, ne lu dizra' chee xel-la' zri'i lazre' chee', da napa na' xel-la' waca chee gun na' le'e benne' chuchu lazre', ne chee guzúa' na' le'e lálwela xúgute' benne' ca' ba guleaj Dios cheéqueze'. <sup>33</sup> Quebe guca lazra' neda' si'a chia' dumí ne zra lana nu benne'. <sup>34</sup> Nézquezle le'e ca' beña', beña' zrin nen ni'a ná'queza' chee guta' da guchínneda' neda', ne da gulechinne benne' ca' gulaque' neda' tuze. <sup>35</sup> Blé'equenza' le'e, ca'an dxal-la' gunle zrin chee séquele gácaléle benne' dxelexazrje. Bsa lázrele xrtizra' Xránadxu Jesús, gate gunné': "Ba neza zrendxa naca na' chee benne' dxunezruj, quézcala chee benne' si' lu ne'e."

<sup>36</sup> Ca gudé gunná Pablo da nigá, na' bzu zribe', ne bchálajlène' Dios nen xúgute' benne' ca'. <sup>37</sup> Xúgute' gulebezre', na' bulunide', ne bulunupe' Pablo. <sup>38</sup> Belexewí'inele'ene' lawe' da guzre' le' québedxa xeledé'ene' le'. Na' xjácálene' le' naga bexu'e' lu da dxedá lawe' nísadau'.

## 21

*Pablo dxezrine' xezre Jerusalén*

<sup>1</sup> Gate beza'ntu' naga zaj zra' bi bíchedxu ca', na' bexú'untu' lu da dxedá lawe' nísadau', na' bexíajteczentu' naga dxé' xezre Cos, na' zra xula gudentu' naga dxé' xezre Rodas, na' gudé na' bzrintu' xezre Pátara. <sup>2</sup> Lu xezre Pátara xeajxrácantu' tu da dxedá lawe' nísadau' da zeaj na naga nababa Fenicia. Na' guxu'untu' lu da dxedá lawe' nísadau' nigá, na' beza'ntu' na'. <sup>3</sup> Gate gudentu' naga dxé' xezr la xu Chipre, blé'entu' na' chala' a'églala, na' bexíajteczentu', bzrintu' lu xezre ca' zaj nababa Siria. Lu xezre Tiro beñ na' ba xen xuluxulétaje' xua' da nua da dxedá lawe' nísadau' na', na' chee le' na' bzrintu' na'. <sup>4</sup> Na' bezrágantu' benne' ca' dxeléajle' e chee Jesús, benne' zaj zre' e xezre Tiro na', na' begá'anantu' nen benne' ca' gazre zra. Benne' caní,



lawe' da bzéajni'i Be' Lá'azxa le' da gaca, gulé'e Pablo quebe dxal-la' chéaje' Jerusalén. <sup>5</sup> Gate gudé guca gazre zra ca', na' zua xeza'ntu' na'. Xúgute' benne' ca' dxeléajle' chee' Xránadxu, ne zru'ule' ca', ne bidu chee' ca' gusá'acalene' netu' bedxúajtentu' xezre na', na' dxu'a nísadau' na' bzu zríbentu' bchálajlentu' Dios. <sup>6</sup> Nadxa bze' ljwézrentu' dizra', ne bñidate' ljwézrentu'. Nadxa bexú'untu' lu da dxedá lawe' nísadau', na' bi bíchedxu ca' belexezrine' lizre'.

<sup>7</sup> Beza'ntu' Tiro, gudentu' lu nísadau', ne bzrintentu' xezre Tolemaida, naga bgápantu' bi bíchedxu ca' diuzre, ne begá'anantu' nen benne' ca' tu zra. <sup>8</sup> Zra xula Pablo, ne netu' zrálentu' le' bezá'ntu' na', na' bzrintu' xezre Cesarea. Na' bzrintu' lizre Felipe, benne' dxedá dxuchálaje' dizra' chee' Dios. Naque' tu benne' gazre, benne' ca' buluzúa gubáz ca' xelune' zrin chee' Jesús. Begá'anantu' nen benne' nigá. <sup>9</sup> Felipe na' zaj zra' tapa zrí'ine' nu'ula quebe ne xuluchaga na'abe', ne dxuluchálajbe' waláz chee' Dios. <sup>10</sup> Guzúantu' na' zane' zra gate bla' tu benne' le' Agabo chee' xezre ca' zaj nababa Judea. Naque' benne' dxuchálaje' waláz chee' Dios. <sup>11</sup> Agabo na' bidé' bedajnné'e netu'. Guqué'e bazxu dxu'a le'e chee' Pablo, na' bchéaje' na ni'a na' cuine', dxenné' judío:

—Be' Lá'azxa dxenné' judío ca' lu xezre Jerusalén xuluchéaj caní benne' xrane bazxu dxu'a le'e nigá, na' xuludé'e le' lu na' benne' zitu' ca'.

<sup>12</sup> Gate bentu' netu', ne benne' Cesarea da nigá, na' guta' xuentu' Pablo quebe chéaje' Jerusalén. <sup>13</sup> Pablo bechebe':

—¿Bizr chee' na' dxebézrele, ne dxuzúale neda' xel-la' dxewi'ine lazre'? Ba zúaqueza', quegá tuze xuluchéaje' neda', san la gázqueze zua' chee' gatia' lu xezre Jerusalén ne chee' Xránadxu Jesús.

<sup>14</sup> Gate guque bé'entu' quebe séquentu' guzágantu' Pablo, na' québedxa bi gúzrentu' le', dxennantu':

—Gaca ca dxaca lazre' Xránadxu.

<sup>15</sup> Gudé na' bseni'antu' cheentu', na' guxiájntu' Jerusalén. <sup>16</sup> Na' gusiá'acale bal-la benne' netu', benne' Cesarea dxeléajle'e chee' Jesús, na' ládujla benne' ca' zua tu benne' Chipre le' Mnasón, zane' iza ba zeaj dxéajle'e chee' Jesús, na' lizre benne' nigá dxal-la' zrintu' súantu'.

### *Pablo zeajnné'e Jacobo*

<sup>17</sup> Gate bzrintu' Jerusalén, bi bíchedxu ca' belezi' lu ne'e netu' dute' xel-la' dxelebé. <sup>18</sup> Zra xula Pablo guxiájlene' netu' xeajnná'ntu' Jacobo, na' zaj zrá'queze na' xúgute' benne' gula ca' dxeléajle'e chee' Jesús. <sup>19</sup> Pablo bgape' le' diuzre, na' bzenne' benne' ca' tu tu da ben Dios lu na' le' ládujla benne' quebe zaj naque' judío. <sup>20</sup> Gate belenne' ca', na' belúe lá'ane' Dios. Nadxa gulé'e Pablo:

—Chawe' naca na, bi bícha'dau'. Dxelé'equezenu' zane gaxúa benne' judío dxeléajle'e chee' Jesús, na' xúgute' dxelenné' dxun na ba xen chéajlédxu da bdxixruj bea Moisés. <sup>21</sup> Zaj zra' benne' ba gulé'e benne' judío caní lue' dxusédenu' xúgute' benne' judío zaj zre'e zitu' québedxa xelune' ca da gunná be'e Moisés, ne quebe xelexhugue' late' béla'dau' chee' bel-la' dxen chee' bidu biu chee' ca', ne quebe chjácálene' ca naca da zéajlédxu dxi'u dxundxu.

<sup>22</sup> ¿Ájala dxal-la' gundxu? Benne' judío caní welezrague' gate xelenne' ba bla'u. <sup>23</sup> Cháwedxa gunu' da caní: Zaj zra' tapa benne' lávela dxi'u dxal-la' xelune' tu da zaj nachebe lazre' lau Dios. <sup>24</sup> Guché benne' caní chjácálene' lue', ne bca'ana chawe' cuinu' lau Dios nen benne' caní, na' gudizruj ca naca da dxal-la' xelízruje' benne' guchibe' xícha xíchaj benne' caní. Ca'an gaca, xúgute' benne' xeleque bé'ene' quebe naca da li ca da gulenné' chiu', san la gázqueze lue' dxunu' xúgute' ca da dxenná da nadxixruj bea na. <sup>25</sup> Ca naca chee' benne' ca' quebe zaj naque' judío, ba bzúajntu' chee' quebe dxun na ba xen xelune' da caní, san tuze dxal-la' xulusane' da naca chee' bedáu' xiaj xaga ca', ne quebe xelawe' dxen chee' be xixre' ca', ne quebe xelawe' béla' chee' be xixre', be quebe bdxuaj dxen, ne quebe xelune' dul-la chee' da dxucá'ana sban bénneache.

### *Dxele'e Pablo lu xudau'*

<sup>26</sup> Nadxa Pablo guché'e tapa benne' ca', na' zra xula bca'ana chawe' cuine' lau Dios nen benne' ca', na' belexú'e lu xudau' chee' buluzenne' bxruze ca' gate xezuzre zra ca' chee' da dxulucá'ana chawe' cuine' lau Dios, gate na' tu tue' dxal-la' xelegtú'e guna'.

<sup>27</sup> Gate ba zua xuzre da gazre zra, na' bal-la judío ca', benne' zá'aca xezre ca' zaj nababa Asia, belelé'ene' Pablo lu xudau' na', na' buluchague' ca naca benne' ca' zaj zre'e na', na' gulebía che'e Pablo. <sup>28</sup> Dxelenné' zizraj:

—Benne' Israel, le gácale netu'. Benne' nigá dxedé' gáteteze dxusédene' xúgute' bénneache xuluzúe' chalá'ala xezre la xu cheedxu, ne da bdxixruj be'e Moisés, ne xudau' nigá, ne ba guzre'e lu xudau' nigá bal-la benne' griego. Dxucá'ana dítajé' lataj lá'azxa nigá.

<sup>29</sup> Caní gulenné' lawe' da ba belelé'ene' Pablo lu xezre na' nen Trófimo, tu benne' xezre Efeso, na' dxeléquene' gulu'u Pablo le' lu xudau'.

<sup>30</sup>Ca naca benne' zaj zre'e xezre na' beledxé'ena zrague', ne zá'aca chégüé'. Nadxa gulel-le' Pablo, ne gulezrube xue' le' chale'aj xudau' na', na' bulusézxujé' dxa xu'u chee na. <sup>31</sup>Ba zuate xelútié' Pablo gate benne' Roma dxenná be'e lu wedil-la benne' ba dxeledxé'ena zraga ca naca benne' zaj zre'e xezre Jerusalén. <sup>32</sup>Nadxa benne' nigá bchague' benne' dxjaque' wedil-la nen benne' dxenná bé'ene' le', na' xjaca chégüé' naga zaj nazraga benne' zan ca'. Gate benne' ca' belelé'ene' benne' na' dxenná be'e lu wedil-la, na' bulusane' québedxa buluzálaje' Pablo. <sup>33</sup>Nadxa gubiga' benne' na' dxenná be'e lu wedil-la, na' gudél-le' Pablo, ne gunná bé'ene' xuluchéaje' le' chupa du xia. Gudé na' bchebe' benne' ca' nua' benne' nigá, ne bi ba bene'. <sup>34</sup>Benne' ca' gulebezre xe'e da zan da gulenné'. Ca'an guca benne' dxenná be'e lu wedil-la quebe bi guxéajni'ine' lawe' da dxelúnle'e schaga'. Nadxa gunná bé'ene' xeleché'e Pablo xu'u naga zaj zra' benne' dxjaque' wedil-la, benne' zan ca'. <sup>35</sup>Gate belezrine' dxa xu'u naga zaj zra' benne' dxjaque' wedil-la, na' benne' dxjaque' wedil-la belexú'e Pablo lu na'ze' lawe' da dxelúele'e benne' zan ca' Pablo, <sup>36</sup>na' xúgute' zá'aque' cuzre na' dxelenné' zizraj:—Gate bènea'.

*Pablo dxexechébe' lau benne' zan ca'*

<sup>37</sup>Gate dxelegú'e Pablo lu xu'u naga zaj zra' benne' dxjaque' wedil-la, le' guzre' benne' na' dxenná bé'ene' le':

—¿Waca bi nnia'?

Na' bchebe bènea' le':

—¿Waca nneu' dizra' griego? <sup>38</sup>¿Quebe nacu' lue' benne' Egipto na' ba zeaj tu chupa iza btupe' benne' ca' guledábage' xu'u lawe', na' guché'e tapa gaxúa benne' dxelutie' benne', xeajzre'e le' le'e xixre' lawe' lataj?

<sup>39</sup>Nadxa Pablo guzre' benne' na':

—Neda' naca' benne' judío, ne nababa' tu xezre blau chee ga nababa Cilicia. Ben culuén gunu' neda' lataj guchálajlana' benne' zan caní.

<sup>40</sup>Benne' na' be'e le' lataj, na' Pablo guzé' lachila chee xu'u na', na' guchisa ne'e chee xelexú'a zri benne' zan ca'. Gate gudxe' zri, na' bchálajlene' le' dizra' hebreo, dxenné':

## 22

1—Le'e, benne' gula, ne le'e, bi bicha', le xen ca da xapa' le'e da dxexechéba' chee.

<sup>2</sup>Gate belenne' dxuchálajle Pablo le' dizra' hebreo, na' gulezúadxe' zrize, na' Pablo guzre' le':

<sup>3</sup>—Neda' naca' judío. Gúlaja' xezre Tarso naga nababa Cilicia, na' bgula' Jerusalén nigá, na' Gamaliel bsédené' neda' cáteze naca da nadxixruj bea na chee xra xrtáudxu ca'. Tu dxue lázrezqueza' dxuna' da naca chee Dios cáteze dxunle le'e na'a. <sup>4</sup>Nédxute' gudáu zi' xuzra' benne' ca' dxelájle'e chee Jesús, ne bétequeza' bal-le', ne guche' a benne' biu, ne nu'ula chee, na' bzra' a le' lizre xia. <sup>5</sup>Bxruze blau, ne xúgute' benne' gula sina waca xelexechébequeze' belunne' neda' xiche chee bi'a na lau bi bíchedxu judío ca' zaj zre'e xezre Damasco. Guxá'a na' xeajxedilja' naga zaj zra' benne' ca' dxelájle'e chee Jesús chee che'a benne' ca' Jerusalén nigá, chee xeledé' ba xa'.

<sup>6</sup>Gate zexá'a xu'a neza, ne ba zua zrina' Damasco, ca du wagubizra gúcatite' tu xi' naga zexá'a da za' xabáa. <sup>7</sup>Na' xeajchazia' lu xu, ne benda' chi'i tu benne' guzre' neda': "Saulo, Saulo, ¿bizr chee na' nau zi' xuzru' neda'?" <sup>8</sup>Nadxa bchéba' le': ¿Núzraqueze lue', Xran? Na' guzre' neda': "Neda' naca' Jesús, benne' Nazaret, bènea' nau zi' xuzru' lue'."<sup>9</sup> Benne' ca' zrálené' neda' belelé'ene' xi' na', ne belezrebe', san quebe belenne' chi'i bènea' gunné' neda'. <sup>10</sup>Nadxa gunnéa': ¿Bi dxal-la' guna', Xran? Na' Xránadxu gunné': "Guxasa, ne guxíajteze Damasco, ga na' zua benne' xelé'e lue' ca da dxal-la' gunu'." <sup>11</sup>Benne' ca' zjácálene' neda' belequé'e na'a zeajntu' Damasco lawe' da bca'ana xi' na' neda' la chul-la.

<sup>12</sup>Zua na' tu benne' le' Ananías, benne' dxunge' du lazre' ca naca da bdxixruj be'e Moisés, na' xúgute' benne' judío zaj zre'e Damasco dxelenné' cháwele'e ca dxunge'. <sup>13</sup>Ananías na' ble'e naga zua' neda', na' guzre' neda': "Bicha' Saulo, na' a xe'e'enu'." Lu zra ná'queze belé'etéda', ne ble'eda' benne' na'. <sup>14</sup>Nadxa guzre' neda': "Dios chee xra xrtáudxu guqué'e lue' nédxute' chee gúmbu' ca naca da dxaca lazre' Le', ne chee le'enu' Benne' xrlátaje chee Dios, ne xennu' chi'i Bénnea'. <sup>15</sup>Lue' guchálaju' da naca chee Le' lau ca naca bèneache zaj zre'e lu xezr la xu, ne guzennu' benne' ca' ca naca da blé'enu', ne da bennu'. <sup>16</sup>Na'a, ¿bizr chee na' dxezrenu'?" Guxasa, gudxúa nisa, ne bxren lazre' chee Xránu' Dios chee cueé' dul-la chiu'."

<sup>17</sup>'Gate bezrina' Jerusalén, guxá'a lu xudau' xeajchálajlana' Dios, na' ble'eda' tu da ble'e Dios neda'. <sup>18</sup>Ble'eda' Xránadxu, na' guzre' neda': "Bdxuajche Jerusalén nigá lawe' da quebe xelexí'e ca naca da guchálaju' chia'." <sup>19</sup>Nadxa gucha' Le': Xran, zaj nézquezne' guxá'a neda' xúgute' xu'u naga dxelezraga judío ca', ne xeajxri'a benne' ca' dxelájle'e chiu', na' bzra'a le' lizre xia, ne bzálajqueza' benne' ca', <sup>20</sup>na' gate belútié' Esteban, benne' wen zrin chiu', na'

zéquenza' neda' naca' tuze nen benne' ca' belútię' lę'. <sup>21</sup> Xránadxu guzre' neda': "Guxíaj, lawe' da sel-la' lue' zitu' naga zaj zra' benne' quebe zaj naque' judío."

*Da ben benne' dxenná be'e lu wedil-la*

<sup>22</sup> Dizra' caní belenne', san lu dizra' nigá gulezú lawe' dxelebezre xę'e, dxelenné':

—¡Gate benne' nigá! ¡Québedxa dxal-la' gaca banę'!

<sup>23</sup> Na' gulebezre xá'aquezę', ne buluzalę' sibe zra lanę', ne belequę'e bxrte xu da buluzalę' sibe. <sup>24</sup> Cheę lę na' benne' na' dxenná be'e lu wedil-la gunná bé'eng' xelegú'e Pablo lu xu'ula, ne xelu'e lę' cheę nne' da li, bizr cheę na' gulebezre xa'a benne' zan ca' cheę lę'. <sup>25</sup> Gate bexuzre buluchéaję' na' Pablo, cheę xelu'e lę', Pablo guzre' tu benne' dxeaję' wedil-la zue' na':

—¿Naca cheęle le'e güele tu benne' nababę' Roma, ne quebe ne guchí'ale aja naca cheę'?

<sup>26</sup> Gate ben benne' dxeaję' wedil-la da nigá, na' guxíaję' xeajezre' benne' dxenná be'e lu wedil-la:

—Guxúe xánniu' bi na' gunu', lawe' da nababa Roma benne' nigá.

<sup>27</sup> Nadxa benne' nigá gubigüę' naga zę Pablo, na' bchebę' lę':

—¿Da li na' nababu' Roma?

Pablo bechebę':

—Awe'.

<sup>28</sup> Na' benne' dxenná be'e lu wedil-la gunné':

—Neda' da zrentę gudízruja' cheę gubaba' Roma.

Na' Pablo gunné':

—Neda' nabábaqueza' Roma gate gúlajtea'.

<sup>29</sup> Gate belennę' da nigá, na' benne' ca' ba zaj zę' xelu'e Pablo belexeuase' cuita lę', na' la gaze benne' na' dxenná be'e lu wedil-la, gate guque bé'eng' nababa Pablo Roma, bzrebę' lawe' da nuchéaję' lę lu xia.

*Pablo dxezringę' lau benne' xu'u lawe' blau ca' cheę judío ca'*

<sup>30</sup> Zra xula, benne' na' dxenná be'e lu wedil-la guca lazre' nézene' bi cheę na' dxelagu zria judío ca' Pablo, na' bequę'e du xia na' nadxéaj na' na' Pablo, na' gunná bé'eng' xelexzraga benne' xíchaję ca' cheę bxruze, ne xúgutę benne' xu'u lawe' blau. Nadxa guléaję' Pablo, na' bzę' lę' lau benne' ca'.

## 23

<sup>1</sup> Pablo gunné'e benne' xu'u lawe' blau ca', na' guzre' lę':

—Le'e, bi bicha', ca naca xúgutę da ba bęna' neda', zua zri xichaj lázrdawa' lau Dios.

<sup>2</sup> Nadxa Ananías, bxruze blau, gunná bé'eng' benne' zaj zę' na' xelegapę' dxu'a Pablo. <sup>3</sup> Na' Pablo bechebę':

—Dios güę'e lue', benne' dxun láweze da xrlátaje. Dxe'u na' cheę guchi'u chia' neda' ca dxenná bea da nadxixruj bea Dios. ¿Bizr cheę na' dxunu' da dxedábaga da bdxixruję', dxenná be'enu' xelu'e neda'?

<sup>4</sup> Benne' ca' zaj zre'e na' gulę'e Pablo:

—¿Caní schanni' dxennáu' cheę bxruze blau cheę Dios?

<sup>5</sup> Pablo gunné':

—Le'e, bi bicha', quebe gunezda' che benne' nigá naque' bxruze blau lawe' da dxenná lu xiche cheę Dios: Quebe nneu' schanni' cheę benne' dxenná be'e lázriu'.

<sup>6</sup> Nadxa guque bé'eng' Pablo bal-le' benne' xu'u lawe' zaj naque' benne' saduceo ca', na' xebal-le' zaj naque' benne' fariseo ca', na' gunné' zizraj:

—Le'e, bi bicha', neda' naca' fariseo, ne xrtia' zaj nauę' fariseo ca', na' dxuchí'ale ca naca chia' lawe' da dxebeza lazra' xelexebán benne' gate.

<sup>7</sup> Gate gunná Pablo da nigá, na' benne' fariseo ca', ne benne' saduceo ca' gulezú lawe' dxulutil-la ljwezre' dizra', na' gulaca chupa la'a ca naca benne' ca'. <sup>8</sup> Ca'an guca lawe' da dxelenná saduceo ca' quebe xelexebán benne' gate, ne quebe nu chilá' gubáz cheę xabáa ca', ne quebe nu chilá' bęnne'du xu'u bęnneache, san benne' fariseo ca' dxeléaję'e dxata' xúgutę da ca'. <sup>9</sup> Xúgutę' gulebezre xę'e, na' gulezę bal-la benne' dxuluxuzáję'e da nadxixruj bea na, benne' zaj naque' fariseo, na' gulenné':

—Benne' nigá quebe bi da calęla ne gunę'. Che nu bęnnedu xu'u bęnneache, u tu gubáz cheę xabáa ba gunné' lę', quebe dxal-la' nnędxu cheę Dios.

<sup>10</sup> Na' bulutíl-lalę'e ljwezre' dizra', na' benne' na' dxenná be'e lu wedil-la bzrebę' xełę-lę' Pablo xuluzúzruję' lę'. Cheę lę na' gunná bé'eng' benne' dxjaca wedil-la xelexebáję' lę' lówela benne' ca', ne xelexechę'e lę' lu xu'u na' naga zaj zra' benne' dxjaque' wedil-la.

<sup>11</sup> Xęla xula, Xránadxu ble'e lawe' Pablo, na' guzre' lę':

—Ben dipa lazru', Pablo, lawe' da ca bchálajquezu' chia' Jerusalén nigá, ca'an dxál-la'queze guchálaju' chia' lu xezre Roma.

*Zaj nun benne' judío ca xelune' xelútié' Pablo*

<sup>12</sup> Zra xula bal-la benne' judío ca' belune' tuze dizra' xelútié' Pablo. Gulenné':

—Dios cu'ë dxi'u de' che bi xi'aj gágudxu, ne quebe ne gútedxu Pablo.

<sup>13</sup> Nadé chua benne' biu ca' zaj nachebe lazre' xelune' da nigá. <sup>14</sup> Benne' caní xjaque' lau benne' xíchajé ca' cheé bxruze ca', ne benne' gula sina ca', na' gulenné':

—Netu' ba guchebe lázrentu' lau Dios cu'ë netu' de' che bi gáguntu', ne quebe ne gútentu' Pablo. <sup>15</sup> Na'a, le'e, ne xezicadxa benne' xu'u lawe' blau ca' dxal-la' nábale benne' dxenná be'ë lu wedil-la xedajlegüé' Pablo wxre zila laule le'e, xeje bënnea' dxaca lázrele guchébe xánnele Pablo, na' netu' se cuásantu' gútentu' le' québela ne xide' nigá.

<sup>16</sup> Zri'ine bi zan Pablo benne' ca naca da nigá, na' guxiájbe' naga xu'a Pablo cheajézrebe' le'. <sup>17</sup> Nadxa Pablo gunné' tu benne' xu'u lu ne'ë benne' ca' dxjaque' wedil-la, na' guzre' le':

—Guché' bi cuide' nigá lau benne' xíchajé chiu' lawe' da de' da dxal-la' xebe' le'.

<sup>18</sup> Na' benne' na' xu'u lu ne'ë benne' ca' dxjaque' wedil-la guché'ë-be' lau xrané', na' guzre' le':

—Pablo, bënnea' nadxéajé' gunné' neda', na' gunabé' xedajgu'a bi cuide' nigá naga zu' lawe' da de' da dxal-la' xebe' lue'.

<sup>19</sup> Benne' xíchajé na' guqué'ë na' bi cuide' na', na' guché'ë-be' chalá'ala, ne bchebe'ë-be':

—¿Bi dxaca lazru' xu'u neda'?

<sup>20</sup> Na' gunná bi cuide' na', gúzrebe' le':

—Benne' judío ca' ba zaj nuné' tuze dizra' xelenabé' lue' che' u Pablo wxre zila lau benne' xu'u lawe' blau ca', xelenné' dxelaca lazre' xuluchebe xánnie' le'. <sup>21</sup> Quebe cheájle' u chee benne' ca' lawe' da nadé chua benne' ca' xelebeze' le' bagácheze, ne ba gulechebe lazre' lau Dios Le' cu'ë benne' ca' de' che bi xele'aj xelawé', ne quebe ne xelútié' Pablo. Na'a ba zaj zue' dxelebeze' xrtizru'.

<sup>22</sup> Nadxa benne' xíchajé na' bze' bi cuide' na' dizra', na' guzre'ë-be' quebe nu xebe' ba xejézrebe' le' caní.

*Dxelesel-le' Pablo lau Félix, benne' xu'u lu ne'ë xezr la xu na'*

<sup>23</sup> Benne' xíchajé na' gunné' chupa benne' chee', benne' xu'u lu ne'ë benne' ca' dxjaque' wedil-la, na' gunná bé'ene' le' xulucuezé' chupa gaxúa benne' dxjaque' wedil-la, benne' sa'aca ni'ë, ne ga xun chi benne' dxjaque' wedil-la, benne' xelebía bzrina', ne chupa gaxúa benne' dxjaque' wedil-la, benne' xelu'ë xia tunna, chee chjaque' lu xezre Cesarea dxedá' ga chizrela. <sup>24</sup> La gázqueze gunná bé'ene' xulucuezé' bzrina' cuía Pablo, ne gunná bé'ene' xeleché'ë le' cháwedau' lau Félix, benne' xu'u lu ne'ë xezr la xu na' waláz chee Roma. <sup>25</sup> Gusel-le' tu xiche da belúa benne' dxjaque' wedil-la. Caní naxúaj na':

<sup>26</sup> Neda' Claudio, dxugapa' lue' diuzre Félix, benne' xu'u lu na' u xezr la xu nigá. <sup>27</sup> Benne' judío ca' gulel-le' benne' nigá ná'tega na'a chee xelútié' le'. Gate gunezda' neda' nababe' Roma, na' guxiájlena' benne' chia' ca', benne' dxjaque' wedil-la, xeaxselá' le'. <sup>28</sup> Guca lazra' nezda' bi dxelagu zria le', na' guche'a le' lau benne' xu'u lawe' ca' chee judío ca'. <sup>29</sup> Na' gunezda' dxelagu zria le' da naca chee da nadxixruj bea chee judío ca', san quebe naca na chee xelútié' le', ne chee chu'ë lizre xia. <sup>30</sup> Gate benda' ca ba zaj nun judío ca' chee xelútié' le', na' dxusel-la' le' naga zu', ne ba gucha' benne' ca' dxelagu zria le' waca xelawé' le' zria lau lue'. Gaca xrlátaje chiu'.

<sup>31</sup> Nadxa benne' dxjaque' wedil-la belune' ca gunná be'e benne' xíchajé chee', na' beleché'ë Pablo chizrela, na' belezrine' xezre Antípatris. <sup>32</sup> Zra xula benne' dxjaca wedil-la, benne' ca' dxeledá' ní'aze, belexezrine' Jerusalén, na' benne' dxjaque' wedil-la zaj zrié' bzrina' beleché'ë Pablo naga dxal-la' zrine'. <sup>33</sup> Gate belezrine' xezre Cesarea, na' bulunézruje' benne' xu'u lu ne'ë xezr la xu na' xiche na', ne buludé' Pablo lu ne'ë. <sup>34</sup> Ca bexuzre blabé' xiche na', na' benne' xu'u lu ne'ë xezr la xu na' bchebe' ga benne' Pablo. Gate benne' naque' benne' chee xezre nababa Cilicia, <sup>35</sup> na' guzre' le':

—Guchi'a chee da dxaca chiu' gate xelelá' benne' ca' dxelagu zria lue'.

Nadxa gunná bé'ene' cha benne' dxjaca wedil-la xuluxúé' Pablo naga xa xu'u lawe' chee Herodes.

## 24

*Pablo dxuzri'ë dizra' da dxácale na le' lau Félix*

<sup>1</sup> Ca gudé gazxu' zra, Ananías, bxruze blau, bzrine' xezre Cesarea nen bal-la benne' gula sina ca', ne tu benne' dxenné' waláz chee benne' ca', le' Tértulo. Benne' caní belezrine' lau benne' xu'u lu ne'ë xezr la xu na' chee xelagu zria Pablo. <sup>2</sup> Gate xeaxlexri'ë Pablo, na' guzú lau Tértulo dxawé' xria Pablo, dxé'ë Félix:

—Xcalenu' lue', benne' xu'u lu na'u xezr la xu nigá, lawe' da zúantu' xel-la' dxebeza zri lazre', na' da chawe' dxgua dxaca na cheentu', na' ca dxenná be'enu' netu' lu xel-la' sina chiu' dxexedxúaj na chawe'. <sup>3</sup> Xúgute da nigá dxezí'queze lu na'ntu' gáteteze na', ne dxentu' lue' xcalén cuinu', Félix. <sup>4</sup> Chee québedxa guntu' lue' zédeťe, dxata' xueda' lue' gun zren lazru' xennu' cheentu' tu chí'idau'. <sup>5</sup> Dxenná'antu' benne' nigá dxúnle' da caleja, ne gáteteze na' lu xezr la xu nigá dxune' benne' judío chupa la'a, ne naque' benne' xíchaje chee benne' ca' zaj da' tu benne' Nazaret. <sup>6</sup> Benne' nigá guca lazre' guzúe' chalá'ala xudau' cheentu', na' netu' gudél-lantu' le', ne guca lázrentu' guchi'antu' da naca chee' ca nadxixruj bea na cheentu'. <sup>7</sup> Na' Lisias, benne' dxenná be'e lu wedil-la, bequé'e le' lu na'ntu' xadia. <sup>8</sup> Na' gunné' che zaj zra benne' xelagu zri'e Le', dxal-la' xelelé'e lau lue'. Lue' gaca guchebu' benne' nigá, na' nézenu' naca da li zria dxáguntu' le'.

<sup>9</sup> Benne' judío ca' zaj zre'e na' gulenné' naca da li xúgute da ca'. <sup>10</sup> Nadxa benne' xu'u lu ne'e xezr la xu na' guchisa ne'e chee guchalaj Pablo, na' gunná Pablo:

—Dxebéle'eda' dxunu' neda' lataj xecheba' lau lue', lawe' da nezda' naca xrlátaje ca dxuchi'u da dxaca chee xezr la xu cheentu' ba zeaj zane' iza. <sup>11</sup> Lue'queze waca chéajni'inu' ba zeaj chazrinnu zraze bla'a Jerusalén chee güe lá'ana' Dios. <sup>12</sup> Quebe belelé'ene' neda' nu gutil-la' dizra', ne quebe nu benne' guché'ena' zraga lu xudau' blau, ne lu xezícala xu'u ca', ne lu neza ca' chee xezre na'. <sup>13</sup> Benne' caní quebe xelezéquee' xululé'ene' naca da li ca zaj naca da dxelawe' neda' zria. <sup>14</sup> Tu da dxexecheba', dxucá'ana szrena' Dios chee xra xrtáudxu ca', dxuna' ca' da dxelenná benne' caní naca na da wen lazre', lawe' da dxéajle'a xúgute da naxúaj na lu xiche chee da nadxixruj bea na, ne chee benne' ca' buluchálaje' waláz chee Dios. <sup>15</sup> Neda' dxebeza lázrqueza' ca da gun Dios, ca dxebeza lazre' benne' caní, dxebeza lázrentu' Dios gusebang' benne' gate ca', benne' xrlátaje, ne benne' ca' dxelune' da caleja. <sup>16</sup> Chee le' na' dxue lazra' sua zri xichaj lázrdawa' lau Dios, ne lau bénmeache ca'.

<sup>17</sup> 'Ca gudé gudá' xezre xula ca' zane' iza, na' bezrina' lazria' chee gunézruja' da gácale na benne' xache' ca', ne cu'a guna' lau Dios. <sup>18</sup> Da nigá dxuna' neda' gate bal-la benne' judío chee xezre ca' zaj nababa Asia belexezrague' neda' lu xudau' ca' gudé bca'ana chawe' cuina' cáteze naca da zéajlentu', san quebe nu benne' bhaga', ne quebe nu benne' guché'ena' zraga. <sup>19</sup> Benne' caní dxal-la' xelelé'e nigá chee xelawe' neda' zria che bi zua dxelaca chee' nen neda', <sup>20</sup> san che quebe bi de, na' benne' caní zaj zre'e nigá dxal-la' xelenné' che bi belezrelene' da dxebagá' gate zua' lau benne' xu'u lawe' blau ca' chee judío ca'. <sup>21</sup> Tuze da bena' gate zua' lau benne' ca', gunnéa' zizraj: Na'a dxuchi'ale chia' lawe' da dxeajli lazra' xelexebán benne' gate.

<sup>22</sup> Gate Félix benne' da nigá, na' bca'ane' na cá'aze lawe' da neze xanne' le' ca naca chee benne' ca' dxeléajle'e chee Jesús, na' guzre' benne' ca':

—Gate xida Lisias, benne' dxenná be'e lu wedil-la, na' chéajni'idxeda' chee da nigá dxaca chee.

<sup>23</sup> Nadxa Félix gunná bé'ene' benne' dxenná be'e lu wedil-la, ne benne' ca' dxenná be'ene' xelaxegu'e Pablo lu xu'u lawe' na', na' xelu'e le' lataj bi gune', ne xelu'e lataj benne' ljweze Pablo cheajlenné'e le', ne bi xelune' chee'.

<sup>24</sup> Gudé tu chupa zra Félix belé'e xetú nen zru'ule' Drusila, nu'ula judío, na' gunná bé'ene' bzin Pablo chee guchálajlene' le' ca naca xel-la' dxeajli lazre' chee' chee Jesucristo. <sup>25</sup> Gate Pablo bchálajlene' le' ca dxal-la' gundxu da xrlátaje, ne nna be'e chinadxu, na' zrin zra guchi'a Dios cheedxu gate cheajsé chee xezr la xu, na' bzrebe Félix, ne guzre' Pablo:

—Bexiaj na'a. Gate nalátaja', na' nnéqueza' lue'.

<sup>26</sup> La gaze dxaca lazre' Félix gunezruj Pablo le' dumí chee gusané' le'. Chee le' na' gunnéle'e Pablo chee guchálajlene' le'. <sup>27</sup> Ca' guca, gudé chupa iza, na' Félix bedxúaje' xrlátaje' ga xu'u lu ne'e xezr la xu na', na' bedé tu benne' le' Porcio Festo waláz chee Félix. Félix bca'ane' Pablo lize xia lawe' da guca lazre' xegá'ane' chawe' lau judío ca'.

## 25

### *Pablo dxexechebe' lau Festo*

<sup>1</sup> Nadxa Festo bzrine' xezre Cesarea chee si' lu ne'e gaque' benne' xu'u lu ne'e xezr la xu na', na' gate guca chunna zra, guxíaje' Jerusalén. <sup>2</sup> Lu xezre na' belezrin benne' xíchaje ca' chee bxruze ca', ne benne' judío blau ca' lau le', ne gulawe' zria Pablo. <sup>3</sup> Gulata' xuene' benne' xu'u lu ne'e xezr la xu na' sel-le' benne' cheajlexezri'e Pablo chee xezrine' Jerusalén. Benne' judío ca' ba zaj nune' xelútie' Pablo la neza gate zezé'e na'. <sup>4</sup> Bechebe Festo ba xu'u Pablo lize xia lu xezre Cesarea, na' léqueze' ba nune' chéaje' na' xetú chupa zra. <sup>5</sup> Na' guzre' benne' ca':

—Benne' ca' zaj zre'e lávela le'e, benne' zaj nape' xel-la' dxenná bea, dxal-la' chjácálene' neda' Cesarea, na' che benne' na' zua bi da caleja da bene', waca gágule le' zria.

<sup>6</sup> Festo begá'ane' Jerusalén ca du xrunu' ga chi zraze, na' bezrine' Cesarea. Zra xula gudxé'e lataj blau chee', ne gunná bé'ene' xeajlexrí'e Pablo. <sup>7</sup> Gate bzrin Pablo lau benne' xu'u lu ne'e xezr la xu na', na' gulebiga judío ca' zá'aca Jerusalén, ne gulágule'e zria Pablo, san quebe guca xululé'ene' naca na da li. <sup>8</sup> Nadxa Pablo bechebe' waláz chee', gunné':

—Neda' quebe bi da calela ne guna', quegá chee' da nadxixruj bea chee' judío ca', ne quegá chee' xudau' chee', ne quegá chee' César.

<sup>9</sup> Festo guca lazre' xegá'ane' xrlátaje lau benne' judío ca', na' bchebe' Pablo:

—¿Dxaca lazru' chéajju' Jerusalén chee' guchi'a neda' ca naca chiú' na'?

<sup>10</sup> Pablo bechebe':

—Zua' lau xu'u lawe' da nuzúa César naga dxal-la' zri'a ca naca chia'. Lue' nézqueznu' quebe bi da zrinna' ne guna' chee' benne' judío ca'. <sup>11</sup> Che ba beña' tu da zrinna' da dxun na gútele neda', waca gútele neda'. Che quebe bi de naca na da li ca naca zria da dxelawe' neda', quebe nu napa xel-la' dxenná bea gudé'e neda' lu na' benne' ca'. Dxenaba' zri'a chia' lau César.

<sup>12</sup> Ca gudé' bchálajle' benne' dxuluzéajni'i le', na' Festo guzre' Pablo:

—Ba gunabu' zri'a chiú' lau César. Chéajju' lau César.

*Pablo dxezrine' lau Agripa, benne' wenna' bea*

<sup>13</sup> Ca gudé' zane' zra Agripa, benne' wenna' bea, ne bi zane' belezrine' Cesarea chee' xulugape' Festo diuzre. <sup>14</sup> Gulezú'e na' tu chupa zra, na' Festo bzenne' Agripa, benne' wenna' bea na' ca naca chee' Pablo. Guzre' le':

—Zua tu benne' nigá, benne' bca'ana Félix lizre xia. <sup>15</sup> Gate guzúa' xezre Jerusalén, na' benne' xíchaje ca' chee' bxruze ca', ne benne' gula sina ca' chee' judío ca' gulenné' chee' benne' nigá, ne gulenabe' neda' chuga' chee' gatié'. <sup>16</sup> Neda' becheba' benne' ca', gunná' benne' xu'u lu lawe' chee' Roma quebe nu benne' dxelechugue' chee' gatié' che quebe zrine' lau benne' ca' dxelawe' le' zria chee' xechébe' waláz chee'. <sup>17</sup> Chee' le' na', gate belelá' benne' ca' nigá, quebe guzreda', na' zra xula gudxe'a lataj blau chia', ne gunná be'eda' bla' benne' na'. <sup>18</sup> Benne' ca' gulawe' le' zria quebe bi gulenné' chee' ca da gúqueda' neda'. <sup>19</sup> Laze láweze da gulenné' chee' naca na ca naca da dxelájle'e chee' Dios, ne chee' tu benne' le' Jesús, benne' gute, san dxenná Pablo naca bane'. <sup>20</sup> Quebe bezréleda' ájala guna' chee' da na', na' bcheba' Pablo chee' dxaca lazre' chéaje' Jerusalén chee' zri'a ca naca chee' na'. <sup>21</sup> Nadxa le' gunabe' zri'a chee' lau César Augusto, na' gunná be'eda' xegá'ane' lizre xia cadxa séqueda' sel-la' le' lau César.

<sup>22</sup> Nadxa gunná Agripa, dxe'e Festo:

—La gaze neda' dxaca lazra' xenda' chee' benne' nigá.

Na' bechebe Festo:

—Wxre xennu' chee'.

<sup>23</sup> Zra xula, gate belezrín Agripa, ne Berenice ga na', belú'e lu duté xel-la' szren nen benne' dxenná be'e lu wedil-la, ne benne' blau ca' chee' xezre. Na' Festo gunná bé'ene' xeajlexrí'e Pablo, <sup>24</sup> na' gunné':

—Agripa, benne' wenna' bea, ne le'e, nazrágale nigá nen netu'. Nigá zua benne' na'. Benne' zan, benne' judío zaj zre'e Jerusalén, ne benne' zaj zre'e Cesarea nigá, gulenné' chee' benne' nigá, na' tu gulézqueze' neda' dxal-la' gatié'. <sup>25</sup> Neda' dxéqueda' quebe bi beñe' da gudé na le' gatié', san léqueze' gunabe' zri'a chee' lau César. Chee' le' na' ba nuna' chee' sel-la' le' lau César. <sup>26</sup> Quebe bi de da guzúaja' chee' Xrana' César ca naca chee' benne' nigá. Chee' le' na' dxuzúa' benne' nigá laule le'e, ne da naca bláuqueze, dxuzúa' le' lau lue', wenna' bea Agripa, chee' guchébu' le' chee' gata' late' da guzúaja' ca naca chee'. <sup>27</sup> Dxéqueda' quebe naca chawe' sel-la' tu benne' nadxéaje' du xia, ne quebe nnia' bi da zria nape'.

## 26

*Pablo dxexechébe' lau Agripa, benne' wenna' bea*

<sup>1</sup> Nadxa gunná wenna' bea Agripa, guzre' Pablo:

—Waca xechébu'.

Na' Pablo guchisa ne'e, ne guzú lawe' dxuchálaje', dxenné':

<sup>2</sup> —Dxebéle'eda' dxunu' neda' lataj dxuchálaja' lau lue', wenna' bea Agripa, chee' xechéba' ca da gulenná benne' judío chia' neda', <sup>3</sup> ne da naca blaudxa, lawe' da nézqueznu' lue' ca naca da zéajlentu' netu', benne' judío ca', ne ca naca dizra' dxutil-la ljwézrentu'. Chee' le' na' dxenaba' lue' xennu' chia' duté xel-la' zren lazre' chiú'.

<sup>4</sup> Xúgute' benne' judío ca' zaj nézene' ca beña' lazria', ne lu xezre Jerusalén gate nácatea' bidau'te. <sup>5</sup> Zaj nézqueze benne' ca', ne waca xelexechébe' che dxelaca lazre', ca nácatea' benne' cuide'te, naca fariseo. Benne' fariseo ca' zjácalédxé' ca naca chee' da dxelájle' judío ca' chee' Dios. <sup>6</sup> Na'a lawe' da dxebeza lazra' gusebán Dios benne' gate ca', ca guchébe lazre'

chee xra xrtáuntu' ca', benne' ca' buluzúe' neda' lau xu'u lawe'. <sup>7</sup>Dxelebeza lazre' chazrinnu cue' zri'ine zre sua Israel xeledé'ene' gaca ca naca da nigá guchebe lazre' Dios, na' chee le na' dxulucá'ana szreng' Dios, ne dxelung' zrin chee' te zra ne chizrela. Na'a, wenná bea Agripa, benne' judío ca' dxelawe' neda' zria lawe' da dxebeza lazra' ca naca da caniqueza da nachebe lazre' Dios. <sup>8</sup>¿Quebe dxéajle'u gusebán Dios benne' gate ca'?

<sup>9</sup>Néda'queza' nédxute' gúqueda' da zan da dxal-la' guna' chee benne' ca' dxeléajle'e chee Jesús, benne' Nazaret. <sup>10</sup>Caní bena' lu xezre Jerusalén. Lu xel-la' dxenná bea chee benne' xichajé ca' chee bxruze ca', benne' zan bzra'a lizre xia, benne' dxeléajle'e chee Jesús, na' gate belútié' benne' ca' neda' bñqueza' tuze benne' ca' belútié' le'. <sup>11</sup>Zane' lásate' bdea' benne' ca' ba xa' chee xulusane' xel-la' dxeajli lazre' chee'. Caní bena' xúgute' lu xu'u ca' naga dxelezraga judío ca', na' lu xel-la' dxezrá'a chia' benne' ca', gudáu zi' xuzra' benne' ca' zaj zre'e lu xezre zitu' ca'.

<sup>12</sup>Chee' guna' da nigá zexá'a xezre Damasco, zaj nasel-la benne' xichajé ca' chee bxruze ca' neda' nen xel-la' dxenná bea chee'. <sup>13</sup>Ca zexá'a xu'a neza na', du wagubizra ble'eda' tu xi' da za' xabáa da nácadxa ca xel-la' dxenná' chee gubizra, na' gusení na naga zexá'a neda' nen benne' zjácálene' neda'. <sup>14</sup>Nadxa xúgutentu' xejcházentu' lu xu, na' benda' chi'i tu benne' gunné' dizra' hebreo, guzre' neda': "Saulo, Saulo, ¿bizr chee' na' nau zi' xuzru' neda'? Lue'ze dxun zi' cuinu' ca dxun beze gate dxulíbeba' lawe' xágala da dxádue'-ba'." <sup>15</sup>Nadxa gunnéa': ¿Nuzra Lue', Xran? na' Xránadxu guzre' neda': "Neda' naca' Jesús, bñmea' nau zi' xuzru'. <sup>16</sup>Bexasa, guzé, lawe' da ble'e lawa' lue' chee' gunu' zrin chia', ne chee' xechebu' ca naca da ba blé'enu', ne ca naca da za le'enu' gate te na'a. <sup>17</sup>Guselá' lue' lu na' benne' judío ca', ne lu na' benne' zitu' ca' naga dxusel-la' lue' na'a. <sup>18</sup>Dxusel-la' lue' lau benne' ca' chee' sálaju' xiaj lau benne' ca' chee' xulusane' da naca chee' da chul-la, na' xelung' da naca chee' xel-la' naxaní', ne chee' xelexedxúaje' lu na' da xriwe', ne xelexú'e lu na' Dios, ne chee' xeléajle'e chia' neda', na' xunite lau Dios ca naca dul-la chee', ne gaca chee' tu da xelape' lówela benne' ca' ba gucá'a Dios."

<sup>19</sup>'Ca' guca, wenná bea Agripa. Bzua' dizra' ca naca da ble'e Dios neda' da naca chee' xabáa. <sup>20</sup>Nedxu bchálaja' dizra' chee' Dios lau benne' zaj zre'e xezre Damasco, na' gudé na' lau benne' zaj zre'e Jerusalén, ne ca naca naga nababa Judea, ne lau benne' ca' quebe zaj naque' judío. Gucha' benne' ca' dxal-la' xelexebi'i lazre', ne xelexequé' chee' Dios, na' xelung' da xelunna bea na ca da ba zaj naque'. <sup>21</sup>Chee' le na' benne' judío ca' gulél-le' neda' lu xudau', ne gulaca lazre' xelútié' neda'. <sup>22</sup>Dios dxácálene' neda', na' ze chúchuqueza' lu zra na'a zra, dxuchálajena' xúgute' benne' ca naca chee' Dios, benne' cá'aze ca', ne benne' blau ca'. Dxapa' benne' ca' tuze ca naca da gulenná benne' ca' buluchálaje' waláz chee' Dios, ne da gunná Moisés dxal-la' gaca. <sup>23</sup>Gulenné' Cristo dxal-la' si' saque', na' ca te gatie' dxal-la' xebane' ládujla benne' gate nédxudxa ca xúgute' benne' ca', na' gulenné' xelén benne' judío ca', ne benne' quebe zaj naque' judío ca naca chee' xel-la' naxaní' chee' Dios, da dxulé'e na le' ca gaca xeledé'.

*Pablo dxaca lazre' guzéajni'ine' Agripa gaque' benne' chee' Cristo*

<sup>24</sup>Gate gunná Pablo da caní, na' gunná zizraj Festo:

—Nadá xichaj lázrda'u, Pablo. Lawe' da dxusédele'u, na' nadá xichaj lázrda'u.

<sup>25</sup>Pablo bechébe':

—Quebe nadá xichaj lázrdawa', dxapa' cuinu' Festo. Da dxennéa' naca na da gaca chéajledxu, ne da li. <sup>26</sup>Nigá zua wenná bea Agripa. Nézele'ene' ca naca chee' da caní, na' chee' le na' dxuchálaja' duté xel-la' dxuxrén lazre' chia' lawe'. Nézquezda' le' nézene' ca naca da nigá lawe' da dxuchálaja' ca naca chee' da quebe guca na bagácheze. <sup>27</sup>¿Dxéajle'u lue', wenná bea Agripa, ca naca da gulenná benne' ca' buluchálaje' waláz chee' Dios? Nezda' dxéajle'u.

<sup>28</sup>Nadxa gunná Agripa:

—Xeláteze guzéajni'inu' neda' gaca' chee' Cristo.

<sup>29</sup>Nadxa gunná Pablo:

—Che xeláteze u che da zrendxa dxenaba' gun Dios, quegá lue'ze, san cá'anqueze xúgute' benne' dxelenné' chia' na'a, xelaque' ca néda'queza', san quebe xeledxéajé' du xia.

<sup>30</sup>Ca gudé gunná Pablo da nigá, na' gulexasa wenná bea, ne benne' xu'u lu ne'e xezr la xu na' tu zren nen Berenice, ne xúgute' benne' ca' zaj dxé'e na'. <sup>31</sup>Belexedxúaje' cheeze' chee' xuluchálajle' ljwezre' ca naca chee' da nigá. Na' gulenné', dxelé' ljwezre':

—Benne' nigá quebe bi da calela ne guné' da gudé na le' gatie', ne quebe dxal-la' chu'e lizre xia.

<sup>32</sup>Na' gunná Agripa, guzre' Festo:

—Waca gusandxu benne' nigá chela quebe gunabe' zri'a chee' lau César.

## 27

*Dxelesel-łe' Pablo lu xezre Roma*

<sup>1</sup> Gate ba zaj nung' xelesel-łe' netu' lu xezr la xu Italia, na' Pablo, ne xezícala benne' ca' zaj zrz'e' lizre xia, buludé'e' łe' lu na' tu benne' dxenná bé'ene' lu wedil-la łe' Julio, benne' yu'lu lu ne'ę tu cue' benne' dxjaque' wedil-la nazí le na Benne' Chee Augusto Dxjaque' Wedil-la. <sup>2</sup> Na' guxú'untu' tu lu da dxedá lawe' nísadau' chee' xezre Adramitio, da ba zua te na xézredu ca' chee ga nababa Asia. Zúalequeze Aristarco netu', tu benne' xezre Tesalónica chee ga nababa Macedonia. <sup>3</sup> Zra xula bzrintu' xezre Sidón, naga Julio bėnłe'ę da chawe' chee Pablo, na' be'ę łe' lataj xeajnné'ę bi bíchedxu ca' chee bi belunę' chee'. <sup>4</sup> Gate beza'ntu' xezre Sidón, na' gudentu' naga dxe' xezr la xu Chipre da naxechaj nísadau'. Blé'entu' na chalá'a xéglala lawe' da dxaca be' da quebe dxue na da dxedá lawe' nísadau' lataj cheaj na lizra lidau'. <sup>5</sup> Gudentu' lu nísadau' le nna' xezre ca' zaj nababa Cilicia, ne Panfilia, na' bzrintu' xezre Mira da nababa Licia.

<sup>6</sup> Lu xezre na' benne' dxenná be'ę lu wedil-la bezragę' tu da dxedá lawe' nísadau' chee xezre Alejandria da zeaj na xezr la xu Italia, na' bzre'ę netu' lawle chee zeajntu' Italia na'. <sup>7</sup> Zane' zra zėajntu' chawe' lazre', na' stėbełe'ę bzrintu' le nna' xezre Gnido. Lawe' da ne za be' na' dxedábaga na da dxedá lawe' nísadau', na' gudentu' le nna' Salmón, ne guxéchajntu' naga dxe' xezr la xu Creta da naxechaj nísadau'. <sup>8</sup> Stėbełe'ę gudentu' chalá'ala naga dxe' Creta na', na' bzrintu' tu xézredau' nazí le na Buenos Puertos, da zua gagu naga zua xezre Lasea.

<sup>9</sup> Záne'tę zra bnítentu' xu'untu' da dxedá lawe' nísadau' na', na' ba naca stębe zėajntu' lu nísadau' na' lawe' da ba dxexú'udxu beu' zaga. Chee łe' na' bzėajni'i Pablo benne' ca'. <sup>10</sup> Dxenné':

—Le'e, benne', dxelė'eda' wácalę'ę stębe naga zėajdxu na'a, na' wabía xi' da dxedá lawe' nísadau' nigá ne xua da nua na, na' zrzúretę cuía xidxu dxi'u.

<sup>11</sup> Benne' dxenná be'ę lu wedil-la guxėajłedxe' chee xrane da dxedá lawe' nísadau' na', ne chee benne' xu' u na lu ne'ę, ca chee Pablo. <sup>12</sup> Na' lawe' da quebe naca lataj na' chawe' súadxu na' beu' zaga ca', na' xúgute' gulėquene' nácadxa chawe' xezá da dxedá lawe' nísadau' na' chee xexėaj na Fenice, tu xezre chee Creta na', da dxe' chalá'a chee xezr la xu Creta naga dxebia gubizra, na' xegá'anadxu na' beu' zaga ca'.

*Dxaca be' bđunu' lu nísadau'*

<sup>13</sup> Nadxa guzú lau dxaca lase be' da za' chalá'a naga dxedé gubizra beu' zaga, na' gulėquene' waca chėajtezentu' lu nísadau', na' gudentu' gáguze lu xezr la xu Creta na'. <sup>14</sup> Nadxa chíteze guca guzú lau dxácalę'ę be' bđunu' da za' chalá'a ga za' be' zaga. <sup>15</sup> Be' na' guzú lau dxuzriga na chalá'ala da dxedá lawe' nísadau' na', na' lawe' da quėbedxa guca chėajdxantu' naga za' be' na' bėn na ba xen bęntu' lataj bzriga na da dxedá lawe' nísadau' na'. <sup>16</sup> Na' gudentu' cúzrela tu xezr la xudau' naxechaj nísadau' da nazí le na Claudia, naga quėbedxa dxácatę na be' na' wal-la, na' stėbełe'ę gúquentu' bcuentu' da dau' da dxedá lawe' nísadau' da nazrube xu da zren na' xu'untu', na' bzuantu' na lu da zren da dxedá lawe' nísadau' na'. <sup>17</sup> Ca gudé bulucuenę' da dau' na', na' buludé'ę du zri'a ca' zran da dxedá lawe' nísadau' na' da xeluxru chacha na. Nadxa, lawe' da belezrebę' chaze da dxedá lawe' nísadau' na' lu xuzre' naga nazí le Sirte, na' bululėtaję' ladxe' ca' da dxelecá'a be' lu da dxedá lawe' nísadau' na', na' belúe' lataj be' na' bzriga na łęn. <sup>18</sup> Zra xula, lawe' da ne dxácalę'ę be' bđunu', gulezú lawe' dxeledxú'unę' xua ca' lu nísadau', da nua da dxedá lawe' nísadau' na'. <sup>19</sup> Zra guxunne' zra nen ná'quezentu' gudxú'unantu' lu nísadau' da dxuluchíneę' chee da dxedá lawe' nísadau' na'. <sup>20</sup> Zane' zra quebe blé'entu' gubizra ne belaj ca', ne ca naca be' bđunu' zren na' ne dxuzriga na da dxedá lawe' nísadau' na', na' quėbedxa guleza lázrentu' ląquezentu'.

<sup>21</sup> Zane' zra gudentu' quebe náguntu', na' guzé Pablo ląwela benne' ca', ne gunné':

—Le'e, benne', chąwedxa la guca cheędxu la bęnle da gucha' le'e, na' quebe bedxúajdxu lu xezr la xu Creta, ne quebe bi guque da dxedá lawe' nísadau' nigá, na' xua' da nua na quebe guzria xi'. <sup>22</sup> Na'a, quebe guchebe lázrele. Netudxu dxi'u quebe cuía xidxu, lálaca cuía xi' da dxedá lawe' nísadau' nigá. <sup>23</sup> Ba dxele ble'e lau tu gubáz chee xabáa chee Dios neda'. Naca' chee Dios nigá ne dxuna' zrin chee'. <sup>24</sup> Gubáz na' guzre' neda': "Quebe zrebu', Pablo, lawe' da dxun na ba xen zrinu' lau César, na' ne chiu' lue' Dios guselę' lu xel-la' gute xúgute benne' zaj zra' nen lue' lu da dxedá lawe' nísadau' nigá." <sup>25</sup> Chee łe' na', benne', le gun dipa lázrele, lawe' da dxuxrėn lazra' Dios, ne nezda' waca ca gunná gubáz chee xabáa na' bchálajłene' neda'. <sup>26</sup> Na'a dxun na ba xen cheajchaze da dxedá lawe' nísadau' nigá tu lu xezr la xu da naxechaj nísadau'.

<sup>27</sup> Ca gudé chinu' zra gate naca chizrela, ne zrantu' lu nísadau' nazí le na Adria, na' be' na' dxaca dxuzriga na da dxedá lawe' nísadau' quela ca'ala, na' dxęła guleque be'e benne' ca'



dxulusá da dxedá lawe' nísadau' na' ba dxezrín na dxu'a xu bizre. <sup>28</sup> Na' buludxixre' cáтите situj dxe' nisa na', na' dxe' na galaj esa. Na' xetu chí'idau' gudé buludxixre' da xula, na' dxe' na chinu' ésaze. <sup>29</sup> Belezrebe' cheajtá da dxedá lawe' nísadau' na' xiaj, na' buluzale' tapa xia da nácale'ē zi'i zran nisa zeaj zranla da dxedá lawe' nísadau' na', na' gulebeze' chani' dudxuze dxelezrebe'. <sup>30</sup> Nadxa benne' ca' dxulusá da dxedá lawe' nísadau' na' guléquene' xeluxe dxúaje' lu da dxedá lawe' nísadau' na', na' gulezú lawe' dxululétaje' da dau' na' zria lawe' da zren na' dxedá lawe' nísadau', dxelung' ca benne' xuluzáladxa xia da guxru na da dxedá lawe' nísadau' zren na' da zeaj laula na. <sup>31</sup> Pablo bzenne' benne' dxenná be'ē lu wedil-la, ne benne' dxjaque' wedil-la, dxenné':

—Che quebe xelegá'ana benne' caní lu da dxedá lawe' nísadau', quebe lale le'e.

<sup>32</sup> Nadxa benne' dxjaque' wedil-la gulechugue' du zri'a da nadxéaj da dau' na', na' belúe' na lataj bexruj na lu nísadau'.

<sup>33</sup> Ca guxani'sise' bzéajni'i Pablo xúgutē benne' ca' dxal-la' xelawe' xeta, gunné':

—Ba zeaj chinu' zra quebe dxásele ne quebe dxágule. <sup>34</sup> Dxata' xueda' le'e gágule. Da níga dxun na ba xen cheē lale. Netudxu dxi'u quebe cuia xi' netú xicha xíchajdxu.

<sup>35</sup> Ca gunné' caní, Pablo guquē'ē tu xeta xtila, na' guzre' Dios: “Xcalenu’”, lau xúgutē benne' ca'. Nadxa búzruje' na, na' guzú lawe' dxawe'. <sup>36</sup> Nadxa xúgutē' belún dipa lazre', na' gulezú lau dxelawe'. <sup>37</sup> Cáтите netu' zrantu' lu da dxedá lawe' nísadau' na' nácantu' chupa gaxúa ga xun chinu' tuntu'. <sup>38</sup> Ca gudé gulawe' cáтите guléljenge', na' buluzale' zrua' xtila lu nísadau' cheē bezrá' da dxedá lawe' nísadau' na'.

*Dxebía xi' da zren da dxedá lawe' nísadau'*

<sup>39</sup> Gate guxani', benne' ca' dxulusá da dxedá lawe' nísadau' na' quebe belexúnbe'ē xezr la xu na' da zua na le nna' naga zaj zre'ē. Belelé'ene' naga dxexú'u nísadau' gachaj lálwela xezr la xu na', na' dxu'e na' naca lache'. Na' gulaca lazre' xuluxudé' da dxedá lawe' nísadau' laduj na'. <sup>40</sup> Gulechugue' du zri'a ca' zaj nacá'a xia ca', ne bulucá'ane' xia ca' lu nísadau'. Gulesezre' du zri'a da nadxéaj ne'ē xaga da dxuzechaj na da dxedá lawe' nísadau'. Nadxa gulechise' ladxe' da dxecá'a be' da zeaj lálwela da dxedá lawe' nísadau', na' da dxedá lawe' nísadau' na' guzú lau dxebiga na naga naca lache'. <sup>41</sup> Bzrin na naga dxezraga nisa na' dxupa la'a, na' da dxedá lawe' nísadau' na' guxaze na lu xuzre' da dxe' zran nisa na'. Zeaj lálwela da dxedá lawe' nísadau', na' begá'ana na chálásaze lu xuzre' na', ne québedxa gulezéquene' xuluté' na. Da zeaj zranla guzú lau dxuzruj na lawe' da dxejéle'ē xeajxruza cheē nísadau' na' zran da dxedá lawe' nísadau' na'. <sup>42</sup> Benne' dxjaque' wedil-la gulaca lazre' xelútie' benne' zaj nadxéaje' cheē quebe xuluxuzrúnnuje' xeluzre' lawe' nisa na'. <sup>43</sup> Benne' dxenná be'ē lu wedil-la guca lazre' guselé' Pablo, na' quebe be'ē lataj benne' dxjaque' wedil-la xelútie' benne' ca'. Na' gunná be'ene' benne' ca' dxelauque' dxelezrúe' nisa cheajlexerítie' lu nisa na' cheē xelexezrine' lu xu bizre. <sup>44</sup> Benne' ca' xezícala, bal-le' gulequé'ē blaga', ne xebal-le' gulequé'ē blaga' bizruj cheē da dxedá lawe' nísadau' na', na' caní guca, xúgutē' belexezrine' lu xu bizre.

## 28

*Da beñ Pablo lu xezr la xu na' nazí le na Malta*

<sup>1</sup> Ca gulá xúgutentu', na' gunézentu' xezr la xu na' da naxechaj nísadau' nazí le na Malta. <sup>2</sup> Benne' zaj zre'ē na' belúnle'ē netu' cháwedau'. Gulebéche'le'ē xi' lawe' da dxúnle'ē zaga, ne dxaca xiuj, na' gulenné' netu' cheajsentu' dxu'a xi' cheē xezré'entu'. <sup>3</sup> Nadxa Pablo guqué'ē tu xrunu zruze xaga, na' ca dxuzré'ē na lu xi', bedxúaj tu belá' da na' dxuzrúnnujba' lu da la na', na' gudagu xa'aba' na' Pablo. <sup>4</sup> Gate belelé'e benne' ca' zaj zre'ē lu xezr la xu na', nal-la' belá' na' na' Pablo, na' gulé ljwezre':

—Benne' níga naque' wete benne' lawe' da lácala gulé' lu nísadau', quebe dxue lataj dios na' nazí'i le' Xrlátaje gaca ban le'.

<sup>5</sup> Pablo guzribe' belá' na' lu xi', ne quebe bi gúquene'. <sup>6</sup> Xúgutē' gulebeze' cheē gata' xi' na' Pablo u che'ē gatie'. Ca gudé gulebeze' tu chí'i wal-la, ne belelé'ene' quebe bi gúquene', na' buluché'ē ca da dxeléquene', ne gulezú lawe' dxelenné' naca Pablo tu dios.

<sup>7</sup> Gágutē naga zrantu' de' xezr la xu cheē benne' blau cheē xezr la xu na', le' Publio. Benne' níga guzú' lu ne'ē netu', ne bxúele'ē netu' cháwedau' lawe' chunna zra. <sup>8</sup> Xra Publio deze', quebe chawe' zue', na' xu'ē da la, ne dxaque' xizrawe' dxen. Pablo guxíaje' xeajjnné'ē le', na' ca gudé bchálajlene' Dios, bzé ne'ē lawe' le', na' bexaque'. <sup>9</sup> Gate belenne' da níga, na' benne' ca' xezícadxa, benne' wé' ca' zaj zre'ē xezr la xu na', belezrine' lau Pablo, na' belexaque'. <sup>10</sup> Gulápale'ē netu' ba lá'ana, na' ca gudé na', gate ba zua chú'untu' da xula tu lu da dxedá lawe' nísadau', belunne' xúgutē da nachínnentu'.

*Pablo dxezrine' xezre Roma*

<sup>11</sup> Ca gudé guca chunna beu' zúantu' lu xezr la xu na', na' bexú'untu' tu lu da dxedá lawe' nísadau' da gudxé' na na' dxácatē naca beu' zaga ca'. Naca na tu da dxedá lawe' nísadau' cheē

xəzre Alejandría, na' luzrgue da dxedá lawe' nísadau' na' zaj da bedáu' chee dios bi lide' ca' zaj lə' Cástor ne Pólux. <sup>12</sup> Bzrintu' dxu'a xəzre Siracusa naga begá'anantu' chunna zra. <sup>13</sup> Gate beza'ntu' na', na' gudentu' dxu'a xəzr la xu na', ne bzrintu' xəzre Regio. Zra xula dxaca be' da za' chalá'a naga dxedé gubizra beu' zaga ca', na' zra gudxupe' zra bzrintu' xəzre Puteoli. <sup>14</sup> Lu xəzre na' bežrágantu' bal-la bi bíchedxu, benne' gulenné' netu' lizre' xegá'analəntu' lə' xrunu' zra, na' ca' gudé na' guza'ntu' ní'antu' zéajntu' Roma. <sup>15</sup> Bi bíchedxu zaj zra' Roma ba belenne' cheəntu', na' beledxúaje' xəzre na', bedajlechague' netu' tu xəzredau' nazí le na Xi'a Chee Apio, na' xebal-lə' belexezrague' netu' tu lataj nazí le na Chunna Xú'udau'. Gate ble'e Pablo bi bíchedxu ca', na' guzre' Dios: "Xcalenu'", ne beŋ dipa lazre'. <sup>16</sup> Gate bzrintu' Roma, benne' dxenná be'ə lu wedil-la bdeə' benne' zaj nadxéaje' lu na' benne' xíchaje chee bi xra'aga ca', san be'ə lataj Pablo suə' cheeə' nen tu benne' dxéaje' wedil-la, benne' guxúə' lə' chee' quebe xuzrúnnuje'.

*Pablo dxuchálaje' chee Jesús lu xəzre Roma*

<sup>17</sup> Ca' gudé chunna zra Pablo gusel-lə' benne' xeajnné' benne' judío blau ca' zaj zre'ə Roma, na' gate belezrague', guzre' benne' ca':

—Le'e, bi bicha'. Neda' quebe gudábaga' judío ca', ne quebe gudábaga' da xjácale xra xrtáudxu ca', san benne' judío ca' zaj zre'ə Jerusalén buludé' neda' lu na' benne' Roma ca'.

<sup>18</sup> Gate benne' Roma zaj zre'ə na' buluchebe' neda', gulaca lazre' xulusang' neda' lawe' da quebe belezrelne' bi da beŋa' da gun na xelexhugue' chia' gatia'. <sup>19</sup> Judío ca' guledábague', na' beŋ na ba xen gunaba' neda' zri'a chia' lau César. Quebe nacan chee gawa' zria benne' lázredxu. <sup>20</sup> Chee lə' na' gunnéa' le'e chee le'eda' le'e, ne guchálajəna' le'e lawe' da naca ne chee da dxebeza lázredxu dxi'u, benne' Israel, zua' nigá nadxéaja' xia.

<sup>21</sup> Nadxa gulé'ə lə':

—Netu' quebe bi xiche ne si' lu na'ntu' da za na Judea ca' naca chiu' lue', na' netú bi bíchedxu, benne' judío, benne' ba be'ə nigá bezé'ə Judea, quebe bi da calela dxenné' beŋu'.

<sup>22</sup> Dxaca lázrentu' xénentu' ca' da dxéəntu' lue' lawe' da nézentu' gátəteze na' dxelenné' chee benne' ca' dxeləjə'ə dizra' cube nigá.

<sup>23</sup> Buluzúə' tu zra gate xelexezrague', na' lu zra na' benne' zan belezrague' naga zua Pablo. Bchálajəne' benne' ca' ca' naca xel-la' dxenná bea chee Dios che zílatela guxrínelete. Beŋe' ba xəzre guzəajni'ine' benne' ca' ca' naca chee Jesús ne chee da bdxixruj be'e Moisés, ne ne chee da buluzúaj benne' ca' buluchálaje' waláz chee Dios. <sup>24</sup> Bal-lə' gulezú'ə xrtizra' Pablo, san xebal-lə' quebe guləjə'ə. <sup>25</sup> Quebe belune' tuze dizra', na' gulezú lawe' dxelexedxúaje'. Nadxa gunná Pablo:

—Da li naca da gunná Be' Lá'azxa, guzre' xra xrtáudxu ca' lu dxu'a Isaías, bénnea' bchalaje' waláz chee Dios, gunné':

<sup>26</sup> Guxíaj, xeajezre benne' ca':

Da li wenle le'e san quebe chəajni'ile.

Da li walé'ele, ne quebe gueque be'e'ele.

<sup>27</sup> Zaj naca zide' lázxdau benne' caní,

ne quebe dxelenné' chawe'.

Zaj naxeəxuj xiaj lawe'

chee quebe xelélé'ene' nen xiaj lawe',

ne quebe xeləne'ə nen nague',

ne quebe xeləajni'ine' nen lázrdawe',

ne quebe xelxelé'ə lawa' neda' chee xexuna' neda' lə'.

<sup>28</sup> Dxa-la' nézele le'e, na'a ne da za za' xel-la' weselá chee Dios guchálajəntu' benne' quebe zaj naque' judío, na' benne' ca' xelezú'ə na.

<sup>29</sup> Gate gunná Pablo da nigá, na' besía'aca judío ca', dxuluchébe'ə ljwezre'.

<sup>30</sup> Pablo guzúə' chupa iza lu xu'u da dxízruje', ne dxezú' lu ne'ə xúgute benne' dxedajlenné' lə'. <sup>31</sup> Du lazre' bchálaje' ca' naca xel-la' dxenná bea chee Dios, ne bsédene' ca' naca chee Xránadxu Jesucristo, na' netú quebe nu blale' lə'.

## DA BZUAJ SAN PABLO CHEE BI CHEE CRISTO ZAJ ZRABE' XEZRE ROMA

*Pablo dxugape' diuzre bi chee Cristo zaj zrabe' Roma*

<sup>1</sup> Neda', Pablo, naca' wen zrin chee Jesucristo. Dios bláwizre' neda' chee gaca' gubáz chee', ne guqé'e neda' chee guzenda' bénneache dizra' chawe' chee'.

<sup>2</sup> Dios guchebe lazre' sel-le' dizra' chawe' nigá gate nate lu dizra' lá'azxa chee' lu na' benne' ca' buluchálajé' waláz chee'. <sup>3</sup> Dizra' chawe' nigá dxul'é na ca naca chee Xránadxu Jesucristo, Zri'ine Dios. Lu belá' dxen chee' naque' zri'ine zre sua wenná bea David. <sup>4</sup> Lu be' nácaqueze' da naca na lá'azxa, naque' Zri'ine Dios. Dios blé'eng' naca caní gate bsebané' Le' ládujla benne' gate ne chee xel-la waca chee'. <sup>5</sup> Ne chee Zri'ing' Dios nunne' netu' lataj nácantu' gubáz chee' chee xelexrá' benne' ládujla xúgute cue' xezr la xu, benne' xelexálí lazre' Cristo, ne xuluzé' dizra' chee' chee gaca ba La Le'. <sup>6</sup> Ládujla benne' caní zrabe le'e chee gácale bi chee Jesucristo.

<sup>7</sup> Dxuzúaja' chee xúgutele le'e dxéajlele chee Cristo, zrabe xezre Roma. Dios nazri'ing' le'e, ne bláwizre' le'e chee gácale bi cheéqueze'. Dxenaba' Xradxu Dios, ne Xránadxu Jesucristo guné' chawe' cheele, ne gunné' le'e xel-la dxebeza zri lazre'.

*Pablo dxaca lazre' chéajé' xezre Roma*

<sup>8</sup> Da naca blaudxa, ne chee Jesucristo dxapa' Dios chia' xcalenge' ca naca chee xúgutele lawe' da dxezralaj ca dxeajlí lázrele Cristo du gabí'i xezr la xu. <sup>9</sup> Duté lázrdawa' dxuna' zrin chee Dios, dxuzenda' bénneache dizra' chawe' chee Zri'ing'. Le' nézquezne' dxeajlá lázrqueza' le'e gate dxuchálajlena' Le'. <sup>10</sup> Dxata' xúeda' Dios, che naca da dxaca lazre' Le', chee ájala gunné' neda' lataj xedajná'a le'e <sup>11</sup> lawe' da dxaca lazra' le'eda' le'e ne gunná' le'e lataj sí'le da naca chee Be' Lá'azxa, chee se cháchadxale. <sup>12</sup> Caní gutipa lázredxu tudxu xetudxu lu xel-la dxeajlí lazre' cheedxu.

<sup>13</sup> Bi bícha' dau', dxaca lazra' nézele zane' lasa guca lazra' xida' xedajná'a le'e, san dxácate' ca' dxecuasa na. Dxaca lázrele'a xida' chee guna' zrin gusededa' da naca chee Cristo ládujla le'e, cáteze ba bena' ládujla xezícadxa bénneache zaj zré'e lu xezr la xu nigá. <sup>14</sup> Nabaga' guna' zrin caní ládujla xúgute bénneache, che zaj naque' benne' blau u ca zaj naque', u che zaj naque' benne' zaj naxéajni'i u ca zaj naque'. <sup>15</sup> Chee le' na', neda' ba zúaqueza' guzenda' le'e zrabe xezre Roma dizra' chawe' chee Cristo.

*Xel-la waca chee dizra' chawe' chee Cristo*

<sup>16</sup> Quebe dxedué'eda' chee dizra' chawe' chee Cristo lawe' da napa na xel-la waca chee Dios chee guselá na xúgute benne' dxeajlí lazre' le' na, nédxula benne' judío ca', san cá'anqueze benne' quebe zaj naque' judío. <sup>17</sup> Dizra' chawe' nigá dxulé'e na dxi'u nagá'anadxu chawe' lau Dios che dxeajlí lázredxu le' na, chee cheajlí lázredxu Le' ca naxúaj na lu dizra' lá'azxa, da dxenná na: Benne' nagá'ane' chawe' lau Dios gata' chee' xel-la nabán li lazre' che dxeajlí lazre' Le'.

*Dul-la da zaj nabaga bénneache*

<sup>18</sup> Ba blé'e Dios lu xabáa chee' ca guné', gudé'e xel-la zi' xúgute benne' dxuluzé' chalá'ala Dios, ne benne' wen da caléla, benne' dxuluzague' da li ne chee da caléla da dxelunge'. <sup>19</sup> Zaj nézquezne' ca gaca xelúnbea bénneache da naca chee Dios lawe' da Léqueze Dios na' bache blé'eng' na zaca ba lau. <sup>20</sup> Da quebe gaca lé'edxu chee Dios gaca gúnbeadxu na ne chee da ca' da ben Dios. Gate benté' xezr la xu dxunna bea na nácaqueze Dios, ne nápaqueze' xel-la waca. Chee le' na' quebe bi de xuludé'eng'. <sup>21</sup> Lácala zaj númbe'e ca naca Dios, quebe ne xelape' Le' ba lá'ana ca Dios, ne quebe ne xelé'e Le'; Xcalenu', san dxuludé lazre' da níteze, na' gulechul-la xichaj lázrdawé' lawe' da zaj naque' benne' zide'. <sup>22</sup> Lácala dxelé'queng' zaj naxéajni'ing', da li zaj naque' benne' xala, <sup>23</sup> lawe' da buluzé' chalá'ala Dios xabáa, Bénnea' quebe dxedé chee', ne dxelúe lá'ane' bedá'u' xiaj xaga zaj naca na lu'a bénneache dxelate, ne lu'a bea ca' zaj zua xrila, ne lu'a be snia, ne lu'a be xixre' be zria tapa ni'a na'ba'.

<sup>24</sup> Chee le' na' Dios ba guleaj xichajé' benne' ca' chee xelunge' xúgute da sban da dxelezá lazre', na' bulucá'ana ditaj cuine' tue' xetue', <sup>25</sup> lawe' da buluzé' chalá'ala xel-la li chee Dios, na' gulezi' lu ne'e da wen lazre', ne belúe lá'ane', ne belecá'ana szrene' da ca' nun Dios, ne quegá Diosqueze, Bénnea' dxal-la' güe lá'anaquezdxu. ¡Ca'an gaca na!

<sup>26</sup> Chee le' na' Dios ba guleaj xichajé' benne' ca' chee xelunge' da dxelezá lazre' da ca' xedué'edxu. Cá'anqueze nu'ula buluzé' chalá'ala xel-la zúale benne' chee', ne dxelunge' da quebe zaj naca chee' xelunge'. <sup>27</sup> Cá'anqueze belún benne' biu, buluzé' chalá'ala xel-la zúale

zru'ule', ne dxelunę' da sban da dxelezá lazre' tue' xetue', ne dxelunę' da ca' xedué'edxu tue' xetue', na' dxeledé' xel-la zi' lu bel-la' dxen cheę' ne cheę da sban da dxelunę'.

<sup>28</sup> Lawe' da québedxa gulaca lazre' xelexúnbe'e Dios, Le' guleaj xíchaję' benne' ca' cheę xuludé lazre' da caleļa, ne cheę xelunę' da quebe dxal-la' xelunę'.

<sup>29</sup> Dxelunę' xúgute' da caleļa.

Dxulucá'ana ditje' bėnneache.

Dxelunę' da quebe naca xrlátaje.

Zaj naque' benne' wecude'.

Dxelunę' da zrinnaį.

Zaj naque' benne' xa lazre'.

Dxelutie' benne'.

Dxelólaje' da ba xa'.

Dxelezi' xe'e.

Dxeledanne' da xálaze.

Dxuluchálaje' dizra' bizruį.

<sup>30</sup> Dxelenné' schanni' cheę ljwezre'.

Dxelecuídene' Dios.

Zaj naque' benne' wenné wal-la.

Dxulucá'ana szren cuine'.

Zaj naque' benne' wezé cua.

Dxelalaj lazre' bícala da sban.

Quebe dxuluzúę' dizra' cheę xra xrne'e.

<sup>31</sup> Zaj naque' benne' lázrdau zide'.

Dxulunitię' xrtizre'.

Quebe zaj naque' zri'i lazre'.

Quebe dxulunitie lawę' cheę ljwezre'.

Quebe dxelexache lazre' cheę ljwezre'.

<sup>32</sup> Zaj nézene' Dios guzría xi'e bėnneache, na' benne' dxelunę' da caní dxal-la' xelátie'.

Benne' caní tu dxelúnzqueze' na,

ne dxelexezaca ba lazre' nen benne' dxelunę' da caníqueze.

## 2

### *Dios dxuchi'e cheę bėnneache cáteze da zaj nune'*

<sup>1</sup> Cheę le' na' québedxa bi de da gudé'enu', lue' dxuchi'u da dxun benne' xula, núteteze nacu'. Gate dxuchi'u da dxun benne' xula, na' dxule'enu' nabagu' zria, lawe' da dxuchi'u da dxun benne' xula, ne cá'anqueze dxunu' lue'. <sup>2</sup> Nézquezdxu dxuchi'a Dios cáteze da naca na gate dxenné' zaj nabaga zria benne' ca' dxelún da caní. <sup>3</sup> Dxéquenu' lue' wadé gun ca'aze chi'u' gate Dios nne' zaj nabaga zria bėnneache, lue' na' dxenná'u' zaj nabaga zria benne' dxelún da caní, ne cá'anqueze dxunu' lue'? <sup>4</sup> Dxuzú' chalá'ala xel-la zri'i lazre', ne xel-la zren lazre' zren cheę Dios, ne quebe nézenu' lu xel-la zri'i lazre' cheę dxunne' lue' lataį xebi' lazru'? <sup>5</sup> Nacu' lázrdau zide', ne quebe dxexebi'i lazru'. Cheę le' na' dxuzanu' da si sacu' lu zra na' gate Dios nne' zaj nabaga zria benne' ca' dxelunę' da caleļa. Naca xrlátaje gunę' da caní. <sup>6</sup> Lu zra na' gunne' ca da dxal-la' si' tu tudxu cáteze naca da bėndxu. <sup>7</sup> Xel-la nabán zeajlį canna gunna Le' xúgute' benne' dxelaca lazre' xelezíę lu na' Dios da xabáa, ne xel-la ba lá'ana, ne da zaj naca na da chadía chacanna ne cheę da chawe' da tu dxelúnzqueze'. <sup>8</sup> Lu xel-la dxezrá'a cheę nne' zaj nabaga zria xúgute' benne' zre'e lazre' ca', benne' quebe dxuluzúę' dizra' da li, san dxuluzúę' dizra' da weń lazre'. <sup>9</sup> Gusaca zi'e, ne gudéę' lu da ba xa' xúgute' benne' dxelunę' da caleļa. Ga su lau gunę' caní cheę benne' judío ca', ne cá'anqueze gunę' cheę benne' quebe zaj naque' judío. <sup>10</sup> Da xabáa, ne da ba lá'ana, ne xel-la dxebeza zri lazre' gunne' xúgute' benne' dxelunę' da chawe'. Ga su lau gunę' caní cheę benne' judío ca', ne cá'anqueze gunę' cheę benne' quebe zaj naque' judío.

<sup>11</sup> Dios tuze ca dxuchi'e da dxelún xúgute' bėnneache, <sup>12</sup> na' benne' dxelunę' dul-la, ne quebe zaj núnbe'e da bdxixruį be'e Moisés welebía xi'e lácala quebe belúnbe'e da nadxixruį bea na, na' benne' dxelunę' dul-la lácala zaj núnbe'e da bdxixruį be'e Moisés welebía xi'e ne cheę da nadxixruį bea na na'. <sup>13</sup> Quebe zaj nagá'ana chawe' lau Dios benne' dxelėnzene' da nadxixruį bea na, san zaj nagá'ana chawe' lau Dios benne' dxuluzúę' dizra' da nadxixruį bea na. <sup>14</sup> Benne' zitu' ca', benne' quebe zaj núnbe'e da bdxixruį be'e Moisés, gate dxelunę' ca dxenná da nadxixruį bea na na', lácala quebe zaj núnbe'e da nadxixruį bea na, naca cheę cáteze zua da nadxixruį bea na lu xichaj lázrdawe'. <sup>15</sup> Caní naquen lawe' da ca dxelunę' dxulé'e na zua xichaj lázrdawe' ca naca da nadxixruį bea na, na' naca na ca naca da bdxixruį

be'e Moisés. Xichaj lázrdawe' dxunna bea na chee da nigá, na' da dxelegú'u lazre' guzríia xi na le', u xecá'a na le' <sup>16</sup>lu zra na' gate Dios guchi'e xúgute da nagache' chee xúgute bènneache lu na' Jesucristo cáteze dxenná dizra' chawe' na' da dxuzenda' bènneache.

*Ca naca chee benne' judío ca' ne da bdxixruj be'e Moisés*

<sup>17</sup>Dxenná'u nacu' judío, ne dxenné'enu' da bdxixruj be'e Moisés, ne dxucá'ana szren cuinu' lawe' da núnbe'u Dios chiu'. <sup>18</sup>Nézenu' da dxaca lazre' Dios, na' da gunná bé'ene' dxulé'e na lue' gunu' da nácadxa chawe'. <sup>19</sup>Dxuxrén lazru' cuinu' waca gulé'enu' ca da xelún benne' zaj naque' ca lo chul-la, ne gusení'u benne' zaj zra' lu da chul-la. <sup>20</sup>Dxéqenu' waca guzéajni'inu' benne' quebe zaj naxéajni'e, ne gusédenú' benne' quebe ne cheajni'e lawe' da naca da nadxixruj bea na da napu' tu da dxulé'e na dxí'u chee gúnbeadxu da li. <sup>21</sup>Lue' dxusédenú' benne' xula. ¿Bizr chee na' quebe dxusede cuinu'? Lue' dxuzennu' benne' quebe dxal-la' cuandxu. ¿Bizr chee na' dxebanu' lue'? <sup>22</sup>Lue' dxenná'u quebe dxal-la' súaleđxu zru'ula benne' xula. ¿Bizr chee na' dxunu' lue' ca'? Lue' dxecuídenu' bedáu' xiaj xaga. ¿Bizr chee na' dxebanu' lue' da gunní'a da de lu xudau' ca' chee bedáu' xiaj xaga ca'? <sup>23</sup>Dxucá'ana szren cuinu' lawe' da núnbe'u da nadxixruj bea na, san dxucá'ana ditju' Dios lawe' da quebe dxunu' lue' ca da dxenná bea da nadxixruj bea na. <sup>24</sup>Naxúaj lu dizra' lá'axza da dxenná na: Benne' quebe zaj naque' judío dxeleñné' schanni' chee Dios ne chee da calela da dxunle le'e.

<sup>25</sup>Da li da nadxugu lu belá' chiu' da dxulé'e na nacu' bi chee Dios, naca na tu da chawe' che dxunu' ca da dxenná bea da bdxixruj be'e Moisés, san che quebe dxunu' ca dxenná na, nacu' ca tu benne' quebe nadxugu lu belá' chee' da na' dxulé'e na. <sup>26</sup>Che benne' quebe nadxugu lu belá' chee' dxune' ca nadxixruj bea na, naque' ca tu benne' nadxúguqeze lu belá' chee' da na', lácala quebe naca caní chee'. <sup>27</sup>Benne' quebe nadxugu lu belá' chee' da na' dxulé'e na, san dxune' da nadxixruj bea na, da na' dxune' dxulé'e na nabagu' zria lue', lawe' da quebe dxunu' da dxenná bea da nadxixruj bea na, lácala zua lu na'u da nadxixruj bea na, ne nadxugu lu belá' chiu' da na'. <sup>28</sup>Quebe naca xanne' judío bènnea' naque' caní cúzreze, ne quebe naca xanne' da nadxugu na lu belá' chee benne' da naca na cúzreze, lu belá'ze. <sup>29</sup>Benne' naca xánnie' judío naque' bènnea' naque' judío lu xichaj lázrdawe', ne da naca xanne' da nadxugu lu belá' chee benne' naca na da zua na lázrdawe'. Quebe nácaqeze na nen dízra'ze san naca na chee be' chee'. Benne' caní dxelezi'e xel-la ba lá'ana, quegá chee bènneache, san chee Dios.

### 3

<sup>1</sup>¿Bizra da ba neza naca na chee benne' lawe' da nadxugu lu belá' chee' da na' dxulé'e na? <sup>2</sup>Nácale'e na, ne zánete ca naca na. Da nédxute, Dios bde'e dizra' chee' lu na' benne' judío ca'. <sup>3</sup>¿Bizra xca'? Che bal-la benne' judío ca' quebe zaj naque' li lazre', ¿nnadxu chee da na' quebe naca Dios li lazre'? <sup>4</sup>¿Cabata! Dios dxúnqueze' ca naca da li lácala xúgute bènneache zaj naque' wen lazre', lawe' da naxúaj lu dizra' lá'axza da dxenná Dios. Dxenné': Nacu' xrlátaje ca da dxenná'u, na' wegá'anaquezu' xrlátaje gate xuluchi'e ca da dxunu'.

<sup>5</sup>Che da calela da dxundxu dxulé'e na naca Dios xrlátaje, ¿Bízraqeze nnadxu? (Dx-uchálaja' ca da dxuluchalaj bènneache.) ¿Naca Dios benne' quebe naca xrlátaje lawe' da dxudé'e dxí'u xel-la zi'? <sup>6</sup>¿Cabata! Chela naca Dios Benne' quebe dxun da xrlátaje, ¿ájazra guné' guchi'e ca da dxelún bènneache?

<sup>7</sup>Che da wen lazre' da dxuna' gun na chee xegá'ana zrendxa da li da dxun Dios, ¿bizr chee na' dxuchi'e chia' neda', dxenné' naca' benne' dul-la? <sup>8</sup>Che naca na caní, ¿bizr chee na' quebe gundxu da calela chee gulé'e laudxa da xrlátaje? Da nigá naca na da dxeleñné' bal-la benne' dxundxu, benne' ca' dxelún da calela, ne dxeleñné' schanni' cheedxu. Xrlátaje naca Dios nne' zaj nabaga zria benne' caní.

*Xúgutedxu nabáqadxu dul-la*

<sup>9</sup>¿Bizra xca'? Dxí'u, benne' judío, ¿nácadxadxu xrlátaje ca xezícadxa benne' ca'? ¿Cabata! Bache blé'entu' zaj nabaga dul-la benne' judío, ne cá'aqueze xezícadxa benne' ca'. <sup>10</sup>Naxúaj lu xiche lá'axza da dxenná na:

Quebe nu chilá' benne' xrlátaje, netú gué'.

<sup>11</sup>Quebe nu chilá' benne' dxéajni'ing'.

Quebe nu chilá' benne' dxexilaje' Dios.

<sup>12</sup>Xúgute' dxeledé' calela. Xúgute' zaj nanítie'.

Quebe nu chilá' benne' dxune' da xrlátaje, netú gué'.

<sup>13</sup>Da dxeleñné'queze' naca na ca tu da sgute, ca tu ba da naxálaje.

Nen luzre' ca' dxelezi' xe'e.

Xrtizre' zaj naca na ca nisa snia chee belá' da dxe na zran lázxaba'.

14 Tu dxelennézqueze' dizra' schanni', ne dizra' zi'.

15 Chadite' dxelúti'e' bënneache.

16 Gáteteze dxeledé'e' dxuluzrí xi'e, ne dxulusaca zi'e.

17 Quebe zaj nézene' ájala xelebeza zri lazre'.

18 Quebe dxelezrebe' Dios.

19 Nezdru xúgute' ca da dxenná da nadxiruj bea gula na' da bzuaj Moisés, dxé na benne' ca' zaj xu' e lu na' da nadxiruj bea na na', chee xelezúa zri xúgute', ne chee xelexúnbea xúgute' bënneache zaj nabague' zria lau Dios. 20 Netú benne' quebe xegá'ane' xrlátaje lau Dios lawe' da nune' da dxenná bea da nadxiruj bea na, lawe' da dxulé'eze da nadxiruj bea na dxi'u nácadu benne' dul-la.

#### *Xelélé bënneache che xelájl'e chee Cristo*

21 Na'a, dxunna bea na ca gaca xegá' anadru xrlátaje lau Dios, da quebe naca na ne chee da nadxiruj bea na, lácala lu da nadxiruj bea na, ne lu da buluzúaj benne' ca' gulenné' waláz chee Dios dxuluchalaj na ca naca chee da nigá. 22 Nagá' anadru xrlátaje lau Dios caní che dxeajlí lázredru Jesucristo, ne cá' anqueze gaca chee xúgute' bënneache xeleajlí lazre' Le'. Tuz ca naca chee bënneache 23 lawe' da zaj nun xúgute' bënneache dul-la, ne quebe zaj naca chee' xelxú' e lu xabáa chee Dios. 24 Lu da chawe' chee Dios, cá' aze nune' chee xegá' anadru xrlátaje lau Le' lawe' da bexa'u Jesucristo dxi'u lu dul-la da nabágadru. 25 Dios bzue' Jesucristo gutie' ne chee xtúl-ladru chee xegá' anadru xrlátaje lau Le' che dxeajlí lázredru da ben Le'. Da nigá guca na chee ble'e Dios naque' xrlátaje lácala lu xel-la zren lazre' chee' bdee' cá' aze ca naca dul-la da bëndru nédxute. 26 Gúcaqueze da nigá chee gulé'e lawe' naca Dios xrlátaje na'a, ne gácaqueze' xrlátaje gate gucá'ane' xrlátaje benne' ca' dxeajlí lazre' Jesús.

27 Na'a, ¿waca gucá'ana szren cuínadru? ¡Cabata! ¿Biz chee na? Naca na lawe' da nagá' anadru xrlátaje, quegá lawe' da bëndru ca nadxiruj bea na, san lawe' da guxeajlí lázredru Cristo. 28 Ca'an naca, dxunna bea na nagá' ana xrlátaje tu benne' lau Dios lawe' da dxeajlí lazre' Cristo, ne quegá lawe' da nune' ca da nadxiruj bea na.

29 ¿Naca Dios cheeze benne' judío ca'? ¿Quegá nácaqueze' Dios chee benne' ca' quebe zaj naque' judío? Da li nácaqueze' Dios chee benne' ca' 30 lawe' da zua tuze Dios, na' Le' gucá'ane' xrlátaje benne' ca' zaj nadxugu lu belá' chee' da na' dxunna bea na che dxeajlí lazre' Cristo, ne cá' anqueze gucá'ane' xrlátaje benne' ca' quebe zaj nadxugu lu belá' chee' da na', che dxeajlí lazre' Cristo. 31 Na'a che dxucá' ana Dios xrlátaje benne' dxeajlí lázreze', ¿naca da nadxiruj bea na tu da quebedxa zaca? ¡Cabata! Che dxeajlédru chee Cristo dxúnquezdru ca dxenná da nadxiruj bea na.

## 4

### *Da dxulé'e da guca chee Abraham*

1 ¿Bizraqueze nnadru chee da ba neza da guca na chee xra xrtáudru Abraham? 2 Che Abraham bega'ane' xrlátaje lau Dios ne chee tu da bene', waca gucá'ana szren cuine' san quegá lau Dios. 3 ¿Bizraqueze naxúaj na lu dizra' lá'azxa? Dxenná na: Abraham guxeajlí lazre' Dios, na' Dios guzú' lu ne'e le' ca tu benne' xrlátaje. 4 Che nu benne' dxune' zrin, lazruj da si'e quebe naca na tu da dxunézrujedru, san naca na tu da nabágaquezdru chee'. 5 Che nu benne' quebe bi nune', san dxeajlí lázreze' Dios, Bénnea' dxucá'ane' xrlátaje benne' dul-la, nacan lawe' da dxezi' lu na' Dios xel-la dxeajlí lazre' chee' chee xuca'ane' le' xrlátaje. 6 Cá' anqueze bchalaj David ca naca chee benne' naca da ba neza chee' lawe' da dxucá' ana Dios le' xrlátaje lácala quebe bi nune' chee xegá'ane' xrlátaje. 7 Gunná David:

Ba neza zrenté naca na chee benne' ca' ba bunite lau Dios chee' da zrinnaj da zaj nune', ne gudé'e' cá' aze dul-la da belún benne' ca'.

8 Ba neza zrenté naca na chee benne' ca' quebe dxusebaga Xránadru le' dul-la da belune'.

9 ¿Naca ba neza nigá cheeze benne' ca' zaj nadxugu lu belá' chee' da na' dxulé'e na, u che nácaqueze na chee benne' ca' quebe zaj nadxugu lu belá' chee' da na'? Bache blé'entu' bca'ana Dios Abraham xrlátaje lawe' da guxeajlí lazre' Le'. 10 ¿Bátzra bca'ane' le' xrlátaje? ¿Guca na ca gudé na', san nédxula guca na. 11 Gudxugu da na' lu belá' chee Abraham ca tu da dxunna bea na chee gulé'e na nagá'ane' xrlátaje lau Dios lawe' da guxeajlí lazre' Dios gate na' quebe ne chugu da na' lu belá' chee'. Ca'an guca, naca Abraham xra xúgute' benne' dxeajlí lazre' Dios, ne quebe zaj nadxugu da na' lu belá' chee'. Cá' anqueze dxucá' ana Dios le' xrlátaje lawe' da dxeajlí lazre' Le'. 12 Da li naca Abraham xra benne' ca' zaj nadxugu da na' lu belá' chee', na' cá' anqueze dxeajlí lazre' Dios ca ben xradru Abraham gate na' quebe ne chugu lu belá' chee' da na'.

*Dxezidxu da guchebe lazre' Dios che dxeajli lázredxu Cristo*

<sup>13</sup> Dios guchebe lazre' chee Abraham, ne chee zri'ine zre sue' gaca chee benne' ca' xezr la xu nigá. Quebe guchebe lazre' na chee' lawe' da nune' ca dxenná bea da nadxixruj bea na, san lawe' da bega'ane' xrlátaje lau Dios gate guxeajli lazre' Le'. <sup>14</sup> Che xezr la xu nigá gaca na tuze chee benne' ca' dxelune' ca da dxenná bea da nadxixruj bea na, dácheze nagá'ana xel-la dxeajli lazre', ne québedxa zaca da guchebe lazre' Dios. <sup>15</sup> Lu da nadxixruj bea na xelebía xi' bènneache, san naga quebe ne zrin da nadxixruj bea na, quebe bi zaj nabaga bènneache chee da nadxixruj bea na na'.

<sup>16</sup> Ca' naca na, dxezi' lu nnadxu da guchebe lazre' Dios ne chee xel-la dxeajli lazre' cheedxu Le', chee gaca na tu da sidxu cá'aze, ne chee gaca na tu da súatequeze chee xúgute zri'ine zre sua Abraham. Ca' naca na, quegá naca na cheeze benne' ca' dxelune' ca da nadxixruj bea na, san cá'anqueze naca na chee benne' ca' dxeleajli lazre' Dios ca ben Abraham. Ca' naca na, le' naque' xra xúgutedxu <sup>17</sup> lau Dios, Bènnea' guxeajli lazre' Abraham Le'. Naca na ca da naxúaj na lu dizra' lá'azxa, dxenná na:

Nuna' lue' xra bènneache zánete' cue' xezr la xu.

Dios na' dxu'e xel-la nabán chee benne' ca' zaj nate, ne dxuchálaje' chee da quebe ne sua ca dxuchálaje' chee da ba zua.

<sup>18</sup> Abraham guxeajli lazre' Dios, ne guleza lazre' si'e da guchebe lazre' Dios, lácala ba gude chee si'e da dxebeza lazre'. Ca'an guca, guque' xra bènneache zánete' cue' xezr la xu cáteze ba guzre Dios le', gunné': "Canite' chan zri'ine zre su'." <sup>19</sup> Abraham ba zue' ca tu gaxúa iza, san quebe gute ni'a ne'e lu xel-la dxeajli lazre' chee' gate xeajsá lazre' zaj naque' ca benne' ba zaj nate, le' ne zru'ule' Sara, ne naca Sara nu'ula wizre. <sup>20</sup> Quebe ben chupa lazre', san bxren lazre' da guchebe lazre' Dios chee', na' gudápadxe' xel-la dxeajli lazre', ne bxren lázredxe'. Bca'ana szrene' Dios, <sup>21</sup> ne bentequeze' neza napa Dios xel-la waca guné' xúgute ca da guchebe lazre'. <sup>22</sup> Chee le' na' Dios guzi' lu ne'e xel-la dxeajli lazre' chee' chee bca'ane' le' xrlátaje.

<sup>23</sup> Gate dxenná na: "Dios guzi' lu ne'e xel-la dxeajli lazre' chee'", quebe guxuaj na chee tuze Abraham <sup>24</sup> san cá'anqueze cheedxu dxi'u lawe' da si' lu na' Dios xel-la dxeajli lazre' cheedxu che dxeajli lázredxu Bènnea' bsebané' Xránadxu Jesucristo ládujla benne' gate, <sup>25</sup> na' naca Jesús Bènnea' bde Dios Le' chee gutie' ne chee dul-la da nabágadxu dxi'u, ne bsebané' Le' chee xegá'anadxu xrlátaje lau Dios.

## 5

*Da naca cheedxu lawe' da nagá'anadxu xrlátaje lau Dios*

<sup>1</sup> Che nagá'anadxu xrlátaje lau Dios lawe' da dxeajli lázredxu Cristo zúadxu xrlátaje nen Dios ne chee Xránadxu Jesucristo. <sup>2</sup> Cá'anqueze lawe' da dxeajli lázredxu Cristo, ne chee Le' dxezidxu da xrlátaje chee Dios da tu dxeajlézquezedxu, ne dxebéle'edxu lawe' da dxebeza lázredxu sidxu da xabáa chee Dios. <sup>3</sup> Quegaze da nigá, san cá'anqueze dxebéle'edxu gate dxededxu xel-la zi', lawe' da nézedxu xel-la zi' da dxededxu dxun na dxi'u zren lazre', <sup>4</sup> na' xel-la zren lazre' dxucá'ana na dxi'u xrlátaje lau Dios, na' gate nagá'anadxu xrlátaje dxebeza lázredxu. <sup>5</sup> Quebe naca tu da dácheze da na' dxebeza lázredxu lawe' da ba nuzúa Dios lu lázrdaudxu xel-la zri'i lazre' chee' ne chee Be' Lá'azxa, Bènnea' ba nuna' Dios dxi'u.

<sup>6</sup> Gate na' quebe guzéquedxu guselá cuínadxu, lu zra blé'eqeque Dios, gute Cristo waláz chee benne' wen da zrinnaj ca'. <sup>7</sup> Stébele'e naca che nu benne' gatie' waláz chee tu benne' xrlátaje, lácala wexázrelja tu benne' gatie' waláz chee tu benne' naque' duté li lazre'. <sup>8</sup> Dios dxulé'ene' dxi'u ca nazri'ilé'ene' dxi'u lawe' da gute Cristo waláz cheedxu gate ne nácadxu benne' dul-la. <sup>9</sup> Na'a nagá'anadxu xrlátaje lau Dios lawe' da gute Cristo waláz cheedxu, ne ba nácaqueze cheedxu ladxu ne chee Le' lu da zi' da xa', da za za' lu zra ni'. <sup>10</sup> Gate na' ne dxecuédexu Dios, Le' bexunge' dxi'u tuze nen Le' lawe' da gute Cristo waláz cheedxu, na' na'a lawe' da nácadxu tuze nen Dios ba nácaqueze cheedxu ladxu ne chee xel-la nabán chee Cristo da zúale na dxi'u. <sup>11</sup> Quegá tuze da nigá, san cá'anqueze dxebéle'edxu lu da naca chee Dios ne chee Xránadxu Jesucristo, ne ne chee Le' nácadxu tuze nen Dios.

*Da nun Adán, na' da nun Cristo*

<sup>12</sup> Ca guca, guxú'u dul-la lu xezr la xu nigá ne chee da ben tuze benne', na' bla' xel-la gute ne chee dul-la, ca'an guca gulú'u bènneache lu na' xel-la gute lawe' da zaj nun xúgute' dul-la. <sup>13</sup> Nédxula ca bla' da nadxixruj bea na, ba zaj nun bènneache dul-la lu xezr la xu nigá, lácala quebe dxusebaga Dios bènneache dul-la gate quebe ne zrin da nadxixruj bea na. <sup>14</sup> Ca guzú lau lu zra zua Adán ca bzrin zra zua Moisés, gulú'u bènneache lu na' xel-la gute, benne' ca' zaj nune' dul-la, lácala quebe belune' dul-la ca da ben Adán, bènnea' gudichje' da gunná be'e Dios, na' Adán na' naque' tu da dxulé'eze na ca naca Bènnea' dxal-la' xide', Le' Cristo.

<sup>15</sup> Da zrinnaj da ben Adán quebe gaca dí-lalêbe na ca da dxunna Dios dxi'u. Ne chee da zrinnaj da ben tuze benne', gulate benne' zante, san xel-la weselá da nunna Dios dxi'u cá'aze ne chee xetuze benne', Jesucristo, naca na da zrëndxaqueze, ne naca na da ba neza chee benne' zante. <sup>16</sup> Da zrinnaj na' da ben tuze benne' quebe gaca dí-lalêbe na ca da dxunna Dios dxi'u lawe' da ne chee tuze da zrinnaj, zaj nabaga zria bënneache, san da dxunna Dios dxi'u naca na chee xelexegá'ana xrlátaje benne' zante benne' zaj nune' da zrinnaj. <sup>17</sup> Ne chee da zrinnaj da ben tuze benne' gulú'u bënneache lu na' xel-la gute, na' benne' ca' zaj nazí' lu ne'e da dxunna Dios cá'aze, ne zaj nagá'ane' xrlátaje lau Le' ba zaj nalé' lu na' dul-la, ne dxelezéqueñe' xelenná be'e cuine' lu xel-la nabán chee' ne chee da nun xetuze benne', Jesucristo.

<sup>18</sup> Ca guca zaj nabaga zria xúgute bënneache ne chee da zrinnaj da ben tuze benne', Adán, cá'anqueze ne chee da xrlátaje da ben xetuze benne', Jesucristo, belexexaca bënneache xrlátaje chee xelaca bané'. <sup>19</sup> Ca guca belexexaca bënneache zante benne' dul-la lawe' da quebe bzua dizra' tuze benne', cá'anqueze lawe' da bzua dizra' xetuze benne', xelexegá'ana benne' zante xrlátaje lau Dios.

<sup>20</sup> Bzua Dios da nadxixruj bea na chee gunná béadxá na da naca dul-la, na' gate dul-la guxánle'e na, ca' guzrendxa xel-la zri'i lazre' chee Dios. <sup>21</sup> Ca naca zua lu na' dul-la gute na bënneache, cá'anqueze zua lu na' xel-la zri'i lazre' chee Dios gucá'ana na dxi'u xrlátaje lau Dios chee gaca bandxu chadía chacanna ne chee Xránadxu Jesucristo.

## 6

### *Nácadxu ca benne' gate ca' chee québedxa gundxu dul-la, na' naca bandxu nen Cristo*

<sup>1</sup> ¿Bízraqueze nnadxu? ¿Gúndxadxu dul-la chee gulé'e láwedxa xel-la zri'i lazre' chee Dios? <sup>2</sup> ¡Cabata'! Ba nácadxu ca benne' gate chee québedxa gundxu dul-la. ¿Ájazra gúndxadxu dul-la? <sup>3</sup> ¿Quebe nézele le'e, xúgutedxu dxi'u ba nadxúadxu nisa chee gácadxu tuze nen Jesucristo, naca na ca ba nátedxu tu zren nen Le' lu da nadxúadxu nisa? <sup>4</sup> Ca' naca na, ne chee da nadxúadxu nisa naca ca bgáchedxu tu zren nen Le', ne nátedxu chee xebandxu, ne súadxu tu lu xel-la nabán cube cáteze guca chee Cristo, bebané' ládujla benne' gate ne chee xel-la waca xabáa chee Xre'.

<sup>5</sup> Che gúcadxu tuze nen Cristo lu xel-la gute, cá'anqueze gácadxu tuze nen Le' lu xel-la dxexebán chee'. <sup>6</sup> NezdXu da gúcadxu gate nate ba gudá na le'e xaga béguaj tu zren nen Le' chee cuía xi' benne' dul-la da gúcadxu chee québedxa gundxu zrin chee dul-la ca benne' zaj nada'u cheeñ. <sup>7</sup> Tu benne' ba nate, ba bedxúaje' lu na' dul-la. <sup>8</sup> Che ba gútedxu tu zren nen Cristo, dxuxrén lázredxu gaca bânquezdXu tu zren nen Le'<sup>9</sup>lawe' da nezdXu quebe gate Cristo da xula lawe' da ba bebané' ládujla benne' gate, na' québedxa xu'e lu na' xel-la gute. <sup>10</sup> Gate gute Cristo, tu lásaze guti'e ne chee dul-la waláz chee xúgute bënneache, san na'a naca bané', na' lu na' Dios naca bané'. <sup>11</sup> Cá'anqueze le'e, le gueque nácale benne' gate chee québedxa gunle dul-la, san naca banle lu na' Dios tu zren nen Xránadxu Jesucristo.

<sup>12</sup> Chee le na' québedxa güele lataj nna be'e dul-la belá' dxen chee le da dxal-la' gate, chee québedxa gun na gunle da dxezá lazre' belá' dxen chee le. <sup>13</sup> Quebe guzúa cuínale lu na' dul-la chee guchine na le'e lu da caleja, san le guzúa cuínale lu na' Dios, gácale ca benne' belexebán ládujla benne' gate, chee guchinene' le'e lu da xrlátaje. <sup>14</sup> Québedxa gaca dul-la nna be'e na le'e lawe' da québedxa xu'ule lu na' da nadxixruj bea na, san xu'ule lu na' xel-la zri'i lazre' chee Dios.

### *Tu da dxulé'e na ca naca chee benne' zaj nada'u*

<sup>15</sup> ¿Bízra xca'? ¿Gundxu dul-la lawe' da québedxa xú'udxu lu na' da nadxixruj bea na, san xú'udxu lu na' xel-la zri'i lazre' chee Dios? ¡Cabata'! <sup>16</sup> Ba nézqueze che guzúa cuínale lu na' tu xránale ca benne' zaj nada'u chee guzúale dizra' chee', nadxa nácale benne' zaj nada'u chee xránale, ne dxun na ba xen guzúale dizra' chee'. Cá'anqueze naca chee le'e che guzúale dizra' chee dul-la, da gunna na le'e xel-la gute, u che guzúale dizra' chee Dios, chee gácale xrlátaje. <sup>17</sup> Xcalén Dios, lálaca gúcale ca benne' zaj nada'u lu na' dul-la, na'a du lázrele dxuzúale dizra' chee dizra' li na', lu da na' bzua cuínale. <sup>18</sup> Gate bedxúaje le'e lu na' dul-la, bexácale wen zrin chee da xrlátaje. <sup>19</sup> (Dxuchálajlena' le'e ca dxuluchalaj bënneache lawe' da lu belá' dxen chee le quebe gaca chéajni'ile ca naca da nigá.) Cáteze benle gate na' bzua cuínale lu na' da sban, ne lu na' da zrinnaj chee gunle da zrinnaj, cá'anqueze le gun na'a, le guzúa cuínale lu na' da xrlátaje chee gácaquezele bi chee Dios.

<sup>20</sup> Gate ne nácale ca benne' zaj nada'u lu na' dul-la, quebe ben na ba xen gunle da xrlátaje. <sup>21</sup> Na'a ¿bizra da ba neza guca chee le da ca' dxexedué'ele chee na'a? Da ca' benle nédxuté guché na le'e lu xel-la gute. <sup>22</sup> Na'a nadxúaje lu na' dul-la, ne ba nácale wen zrin chee Dios chee gácaquezele bi chee Dios da naché na le'e lu xel-la nabán da zeají canna. <sup>23</sup> Benne'



dxunë' dul-la dzezi'e lazruj chee' da naca na xel-la gute, san da dxúnnaze Dios dxi'u naca na xel-la nabán da zeaǵlí canna tu zren nen Xránadxu Jesucristo.

## 7

### *Tu da dxulé'e na ca naca chee' xel-la wechaga na'*

<sup>1</sup> Bi bícha'dau', le'e núnbeale da nadxixruj bea na, zaj xu'u lu na' da nadxixruj bea na bénneache tuze dxácatë ne zaj naca banë'. <sup>2</sup> Ca naca da nigá, tu nu'ula nuchaga na' xu'e lu na' benne' chee' ne chee' da nadxixruj bea na dxácatë zuë' nabane', san che gate benne' chee', na' xedxúaj zru'ulé' lu na' da nadxixruj bea na na'. <sup>3</sup> Ca' naca na, che nu'ula na' súalëne' benne' xula dxácatë ne nabán benne' chee', gunë' dul-la gáchajne' xrba chee' xel-la nuchaga na', san che benne' chee' na' gatíe', xedxúaj zru'ulé' lu na' da nadxixruj bea na na', na' waca xuchaga ná'leñe' benne' xula, ne quebe gunë' dul-la da gáchajne' xrba chee' xel-la nuchaga na'.

<sup>4</sup> Cá'anqueze naca chee' le'e, bi bícha'dau', le'e zrágale bël-la' dxen chee' Cristo, ba nácale ca benne' gate, ne québedxa xu'ule lu na' da bdxixruj be'e Moisés, chee' gácale ca zru'ula benne' xula. Na'a nácale ca zru'ula Cristo, Bénnea' bebane' ládujla benne' gate, chee' gácaxu bi guchine Dios. <sup>5</sup> Dxácatë na' bëndxu da naca chee' bēla' dxen chee'dxu, da nadxixruj bea na ble'e na dxi'u naca dul-la da bēndxu ca da dxezá lazre' bēla' dxen chee'dxu, na' da na' guché na dxi'u lu xel-la gute. <sup>6</sup> Na'a ba nácadxu ca benne' zaj nate, na' ba bedxúajdxu lu na' da nadxixruj bea na da gunná be'e na dxi'u, chee' gaca gundxu zrin chee' Dios lu xel-la nabán cube da dxunna Be' Lá'azxa dxi'u, ne quegá gundxu zrin na' lu da nadxixruj bea gula da naxúaj na.

### *Dul-la da zúalë neda'*

<sup>7</sup> ¿Bizra nnadxu xca'? ¿Dxun da nadxixruj bea na nácadxu benne' dul-la? ¡Cabata! Quebe gunezda' da naca na dul-la chela ca ble'e da nadxixruj bea na neda'. Quebe gunezda' naca dul-la sa lazra' da naca chee' nu benne' chela ca gunná da nadxixruj bea na: Quebe sa lazru' da naca chee' nu benne'. <sup>8</sup> Ble'e da nadxixruj bea na neda' da naca dul-la, na' guque be'eda' zúalë' zánëte da calela lu xichaj lázrdawa' da guzá lazra', lawe' da gate quebe ne gúnbe'a da nadxixruj bea na, guca dul-la chia' tu da nagache lawa' neda'. <sup>9</sup> Guzúa tu zra gate quebe ne la' da nadxixruj bea, na' gúqueda' naca bana' neda', san gate benda' da na' gunná be'e na neda', bēnbe'a da naca dul-la, na' guque be'eda' nabaga' zria, ne dxal-la' gatia'. <sup>10</sup> Ca'an guca, da nadxixruj bea na' naca na chee' gunna na neda' xel-la nabán, san guca na chia' ca tu da bēte neda' <sup>11</sup> lawe' da ble'e da nadxixruj bea na' neda' da naca na dul-la, da na' guzi xë na neda', na' ne chee' da nadxixruj bea na' guque be'eda' nabaga' zria, ne dxal-la' gatia'.

<sup>12</sup> Ca' naca na, da li naca lá'azxa da nadxixruj bea na. Da nadxixruj bea na' naca na lá'azxa, ne xrlátaje, ne chawe'. <sup>13</sup> ¿Ájazra naca da nigá? ¿Bēte da nadxixruj bea xrlátaje na' neda'? ¡Cabata! Dul-la na' bēte na neda', na' caní guque be'eda' naca na dul-la. Da nigá guque be'eda' ne chee' da nadxixruj bea xrlátaje na', na' caní ble'e da nadxixruj bea na' da sbánle'e naca dul-la.

<sup>14</sup> Nezdru da nadxixruj bea na naca na da bēnna Be' Lá'azxa chee' Dios dxi'u, san lu bēla' dxen chia' naca' ca tu benne' nada'u, na' da naca' dxun na guna' dul-la. <sup>15</sup> Neda' quebe dxéajni'ida' da dxaca chia' lawe' da quebe dxuna' da dxaca lazra' guna', san da dxecuüeda' naca na da dxuna'. <sup>16</sup> Che dxuna' da calela da quebe dxaca lazra' guna', da na' dxenná da nadxixruj bea na naca na dul-la, na' nezda' xrlátaje naca da nadxixruj bea na. <sup>17</sup> Ca' naca na, quegá neda' dxuna' da na', san dul-la da zúalë neda', le na' dxun na ca'. <sup>18</sup> Nezdá' quebe bi zúalë bēla' dxen chia' da naca xrlátaje, lawe' da dxezá lazra' guna' da xrlátaje, san quebe dxezéqueda' guna' na. <sup>19</sup> Quebe dxuna' da xrlátaje da dxaca lazra' guna', san dxuna' da calela da quebe dxaca lazra' guna'. <sup>20</sup> Chee' le na', che dxuna' da quebe dxaca lazra' guna', quebe naca neda' dxuna' na, san dul-la da zúalë neda' dxun na ca'.

<sup>21</sup> Caní naca da dxaca chia': Gate dxaca lazra' guna' da xrlátaje, dxulé'e lawe zúalë da calela neda'. <sup>22</sup> Lu xichaj lázrdawa' dxedáneda' da nadxixruj bea Dios, <sup>23</sup> san dxeque be'eda' lu bēla' dxen chia' zua tu da dxedábaga na ca da dxaca lazra', da naca da nadxixruj bea dul-la da zúalë bēla' dxen chia', na' dxenná be'e na neda'.

<sup>24</sup> ¡Edxugúa neda'! ¿Nu guselá neda' lu bēla' dxen chia' da naché na neda' lu xel-la gute? <sup>25</sup> Xcalén Dios, Le' gunë' na ne chee' Xránadxu Jesucristo. Ca' naca, lu xichaj lázrdawa' dxuzúa cuina' lu na' Dios, san lu bēla' dxen chia' naca' ca tu benne' nada'u lu na' da nadxixruj bea dul-la.

## 8

*Xel-la nabán da dxunna Be' Lá'azxa chee' Dios dxi'u*

<sup>1</sup> Na'a, quebe zaj nabía xi' benne' ca' zaj naque' tuze nen Jesucristo, benne' ca' québedxa dxeluné' da calela cáteze dxenná bea belá' dxen cheé', san dxeluné' da xrlátaje cáteze dxenná bea Be' Lá'azxa. <sup>2</sup> Da nadxixruj bea na da dxunna Be' Lá'azxa, Bénnea' dxunne' dxi'u xel-la nabán lawe' da nácadxu tuze nen Jesucristo, ba bselá na neda' lu na' da bdxixruj be'e Moisés da dxulé'e na neda' naca' benne' dul-la, ne nabaga' zria, ne dxal-la' gatia'. <sup>3</sup> Ba ben Dios da quebe guca gun da bdxixruj be'e Moisés, ba gudúe' dul-la da zaj nabaga bénneache. Da nadxixruj bea na quebe guca gun na gundxu da xrlátaje lawe' da nate ni'a na' belá' dxen cheedxu. Cheé' le' na' Dios gusel-le' Zrí'inequeze', na' guque' bénneache ca naca belá' dxen cheedxu da xu'u na lu na' dul-la, cheé' gutié' ne cheé' dul-la cheedxu, lawe' da nabágadxu zria gátedxu ne cheé' dul-la da zúale belá' dxen cheedxu. <sup>4</sup> Caní' beñe' cheé' gaca gundxu da nadxixruj bea na, dxi'u québedxa dxundxu ca dxenná bea belá' dxen cheedxu, san dxundxu ca dxenná bea Be' Lá'azxa.

<sup>5</sup> Benne' dxeluné' ca dxenná bea belá' dxen cheé' zaj dxe'e gunne xue da naca cheé' belá' dxen cheé', san benne' dxeluné' ca dxenná bea Be' Lá'azxa zaj dxe'e gunne xue da naca cheé' Be' Lá'azxa. <sup>6</sup> Benne' zaj dxe'e gunne xue da naca cheé' belá' dxen cheé' welátequeze', san benne' ca' zaj dxe'e gunne xue da naca cheé' Be' Lá'azxa xelaca bane', ne xelebeza zri lazre'. <sup>7</sup> Benne' zaj dxe'e gunne xue cheé' belá' dxen cheé' dxelecuídené' Dios, lawe' da quebe dxelaca lazre', ne quebe gaca xuluzá cuine' lu na' da nadxixruj bea le'. <sup>8</sup> Cheé' le' na' benne' dxeluné' ca da dxezá lazre' belá' dxen cheé' quebe gaca xeluné' da dxezaca ba lazre' Dios.

<sup>9</sup> Le'e quebe dxunle ca dxenná bea belá' dxen chee, san dxunle ca dxenná bea Be' Lá'azxa, lawe' da ba zúale Be' Lá'azxa cheé' Dios le'e. Benne' quebe zúale Be' Lá'azxa le', Be' da nase-la Cristo, quebe naque' bi cheé' Cristo. <sup>10</sup> Lácala zua Cristo lu xichaj lázrdau, lu belá' dxen chee dxal-la' gátele, san lu xichaj lázrdau ba xu'ule tu xel-la nabán bane' lawe' da bca'ana Dios le'e xrlátaje. <sup>11</sup> Che zúale Be' Lá'azxa le'e, Be' cheé' Dios, Bénnea' bsebané' Jesucristo ládujla benne' gate, Léqueze Dios na', Bénnea' bsebané' Le', gunne' xel-la nabán cube cheé' belá' dxen chee da gátequeze na. Da nigá guné' ne cheé' Be' Lá'azxa cheé' Dios, Bénnea' zue' xichaj lázrdau.

<sup>12</sup> Ca' naca na, bi bícha'dau', nabágadxu tu da gundxu, san quegá cheé' gundxu ca dxenná bea belá' dxen cheedxu. <sup>13</sup> Che gundxu ca dxenná bea belá' dxen cheedxu, gátequezdxu, san che ne cheé' Be' Lá'azxa guzúadxu chalá'ala da dxun belá' dxen cheedxu, na' gaca bandxu.

<sup>14</sup> Xúguté' benne' ca' dxelún ca dxulé'e Be' Lá'azxa le', benne' caní' zaj naque' bi cheé' Dios. <sup>15</sup> Be' Lá'azxa da guzi' lu na'le quebe dxugu'e le'e lu xel-la dxezrebe ca benne' zaj nada'u, san dxuné' nácale bi cheé' Dios. Ne cheé' Be' Lá'azxa nigá dxennédxu: "Xrae", gate dxuláwizredxu Dios. <sup>16</sup> Léqueze Be' Lá'azxa nigá dxexechébelene' be' nácadxu, dxenné' nácadxu bi cheé' Dios. <sup>17</sup> Che nácadxu bi cheé' ca', gácaqueze cheedxu da naca cheé' Dios. Gaca cheedxu da dxal-la' gaca cheé' Cristo che gudedxu xel-la zi' tu zren nen Le', cheé' xegá'ana szrendxu tu zren nen Le'.

<sup>18</sup> Dxéqueda' ca xel-la zi' da dxededxu na'a quebe gutíl-lelebe na ca da xabáa da sidxu lu zra da za za'. <sup>19</sup> Da dxelezá lazre', ne da dxelebeza xúguté' da nun Dios naca na cheé' gulé'e Dios bi zaj naca be' bi cheé' ca'. <sup>20</sup> Ca naca da nun Dios belexaca na dácheze, quegá ca gulaca lazre' le' na, san lawe' da núnqueze Dios gaca na ca'. Beñe' zua da dxelebeza lazre' na <sup>21</sup> lawe' da xeledxúaj ca da nun Dios lu na' da dxuzrí'a xi' le' na, cheé' gaca ba neza cheé' na tu zren nen bi ca' zaj naca bi ca' cheé' Dios lu xel-la weselá chebe' da naca xabáa. <sup>22</sup> Nézquezdxu, ca zrin na'a zra, xúguté' da nun Dios dxelebezre we' na, ne dxeledé na xel-la zi' ca tu nu'ula zue' xel-la dxudía cheé' sané' bidau'. <sup>23</sup> Quegá tuze da na' nun Dios dxedé na xel-la zi', san cá'anqueze dxi'u dxededxu xel-la zi', dxi'u na' ba zúale Be' Lá'azxa dxi'u, da naca cheedxu tu da dxunna bea na da dxal-la' sidxu. Cá'anqueze dxi'u dxebezre lázredxu dxácaté na' dxebézadxu zra gulé'e Dios nácadxu bi cheé' ca', gate na' gunne' cheedxu tu belá' dxen cube. <sup>24</sup> Lu da dxebeza lázredxu guládxu, san che gaca lé'edxu da dxebeza lázredxu, québedxa naca na tu da dxebeza lázredxu. Tu da ba dxelé'edxu, québedxa dxun na ba xen cueza lázredxu na. <sup>25</sup> Che da dxebeza lázredxu naca na tu da quebe gaca lé'edxu, dxun na ba xen cuézadxu na lu duté' xel-la zren lazre' cheedxu.

<sup>26</sup> Cá'anqueze Be' Lá'azxa dxácalené' dxi'u lu xel-la nate ni'a na' cheedxu. Quebe nezdxu guchálajledxu Dios ca dxal-la' gundxu, san Léqueze Be' Lá'azxa dxue lazre' lau Dios waláz cheedxu, ne dxebezre lazre' ca da quebe dxezeque' nu nne. <sup>27</sup> Dios, Bénnea' dxenné'e da zua xichaj lázrdaudxu nézene' da dxaca lazre' nne Be' Lá'azxa lawe' da dxue lazre' Be' Lá'azxa lau Dios cáteze naca da dxaca lazre' Dios waláz cheé' bi zaj naca be' cheé'.

*Nácadxu wal-la ca tu benne' dxezrué'ene'*

<sup>28</sup> Nezdxu dxuchine Dios xúguté' da dxaca cheedxu cheé' gucá'ana na dxi'u chawe', dxi'u na' nazri'idxu Le', na' Le' bláwizre' dxi'u ca naca da nune' guné'. <sup>29</sup> Benne' ca' bénnea Dios nédxudauté, ben Le' nédxudauté xelaque' ca naca Zrí'inequeze', cheé' gaca Zrí'ine' na'

Benne' blau ládujla zánete bi biche'. <sup>30</sup> Benne' ca' ben Dios nédxudaute ca xelaque', cá'anqueze bláwizre' le', na' benne' ca' bláwizre', cá'anqueze bca'ane' le' xrlátaje, na' benne' ca' bca'ane' xrlátaje, cá'anqueze bca'ana szrénqueze' le'.

<sup>31</sup> ¿Bizra nnadxu chee da caní? Che caní dxácale Dios dxi'u, ¿nuzra benne' seque' tábague' dxi'u? <sup>32</sup> Dios quebe bezúene' zi' gunne' dxi'u Zrí'inequeze', san bdege' Le' chee gútie' waláz cheedxu. ¿Quebe gunne' cheedxu xúgte da ca' tu zren nen Zrí'ine'? <sup>33</sup> ¿Nuzra seque' bi nne chee benne' ca' ba gucá'a Dios le'? Léqueze Dios na' bca'ane' benne' ca' xrlátaje. <sup>34</sup> ¿Nuzra benne' seque' nne' zaj nabaga zria benne' ca'? Léqueze Cristo gutie' waláz cheedxu, ne da naca na blaudxa, naque' Bénnea' bebán ládujla benne' gate, na' zué' chalá'a xabela chee Dios, ga dxue lazre' lau Le' waláz cheedxu. <sup>35</sup> ¿Nuzra seque' xecá'a dxi'u lu na' Cristo, Bénnea' nazri'ine' dxi'u? ¿Wazeque' xel-la zi', u xel-la xache', u da nau zi' xuzre na dxi'u, u xel-la dxedún, u da dxugúa zra lánadxu, u da stebe, u xel-la gute? <sup>36</sup> Naca na ca da naxúaj na lu dizra' lá'azxa, dxenná na:

Lawe' da nácantu' bi chiu' zúaquezentu' gátentu' xúgte zra.

Dxeluné' netu' ca zríla'dau' ba zaj zúaba' chee xelútie'-ba'.

<sup>37</sup> Lu xúgte da caní nácadxadxu szren ca benne' dxelezrué'eng', ne chee Bénnea' bzri'ine' dxi'u. <sup>38</sup> Chee le' na' dxuxrén lazra' quebe bi de da seque' gucuasa na dxi'u lu na' Dios, Bénnea' nazri'ine' dxi'u.

Ne xel-la gute, ne xel-la nabán,

ne gubáz chee xabáa ca', ne be' xriwe' dxelenná bea,

ne xel-la waca chee be' xriwe' ca',

ne da dxaca na'a, ne da za za',

<sup>39</sup> ne da zua xabáa, ne da zua lu xezr la xu,

ne xetú da nun Dios,

quebe seque' xecá'a na dxi'u lu xel-la zri'i lazre' chee Dios,

da blé'eng' dxi'u gate bdege' Xránadxu Jesucristo waláz cheedxu.

## 9

### *Dios guqu'é benne' Israel ca'*

<sup>1</sup> Dxenná' da li ca bi chee Cristo, ne quebe dxun lazra', na' xichaj lázrdawa' ne chee Be' Lá'azxa dxé na neda' naca na da li. <sup>2</sup> Dxexíaje lázrelé'eda', ne tu zúazqueze xel-la dxudía lu lázrdawa', <sup>3</sup> na' dxezá lázrtea' cuía xi'a neda', ne xecuasa' nen Cristo, la naca da nigá da gácale na bi bícha'dau' ca', benne' walázr chia', benne' judío. <sup>4</sup> Benne' caní zaj naque' zri'ine zre sua Israel, na' Dios guzi' lu ne' e benne' caní ca bi chee' ca'. Dios guzié' ládujla benne' ca' lu da xabáa chee', ne bene' tu xel-la wezríá nen benne' ca', ne bnézruje' le' da nadxixruij bea na da bzuij Moisés, ne xel-la wil-la chee xudau', ne da nachebe lazre'. <sup>5</sup> Zaj naque' zri'ine zre zua xra xrtáudxu ca', na' ládujla benne' walázr chee' ca', lu belá dxen chee' bla' Cristo, Bénnea' naque' Dios lawe' xúgte da de, ne gaca báqueze' chadíá chacanna. ¡Ca' gaca na!

<sup>6</sup> Quebe nnadxu quebe dxun Dios da dxenná xrtizre', san da naca na, quegá xúgte zri'ine zre sua Israel zaj nababa benne' Israel ca' chee Dios. <sup>7</sup> Quegá xúgte zri'ine zre sua Abraham zaj naca xánne' zri'inequeze', san naca na ca guzre Dios le', gunné': "Lu zri'ine zre sua Isaac xelaca zri'ine zre su'." <sup>8</sup> Da nigá dxulé'e na dxi'u quebe nu naca bi chee Dios cáteze nálajbe', san zaj naca bi chee' benne' ca' zaj nálaje' ca naca da guchebe lazre' Dios. <sup>9</sup> Ca naca da guchebe lazre' Dios da gunné' chee Abraham naca na da nigá: Lu zra da ba gunniá' xida', na' Sara chiu' sang' tu zri'inu'.

<sup>10</sup> Quegá tuze da nigá, san cá'anqueze gate Rebeca guzrá' chupa zri'ine' naca tuze xrabe', Isáac, xra xrtáudxu, <sup>11-13</sup> ne gate bi ca' quebe ne xelálajbe', ne quebe ne xelunbe' da xrlátaje u da calela, Dios guzre' Rebeca: "Bi waca chiu' gácabe' wen zrin chee bi cuide'." Da nigá naca na tuze nen da naxúaj lu dizra' lá'azxa, da dxenná na: Bzri'ida' Jacob, ne quegá Esaú. Ca' guca na, begá'ana chawe' da xu'u lu na' Dios chee gudxé' ca naca da núnqueze', benne' ca' dxaca lazre' guláwizre', ne quebe dxuché'e ca da zaj nunge'.

<sup>14</sup> ¿Bízraqueze nnadxu? ¿Naca Dios Benne' quebe dxun da xrlátaje? ¡Cabata! <sup>15</sup> Guzre' Moisés: "Wezrí lazra' benne' dxaca lazra', ne wexache lazra' benne' dxaca lazra'." <sup>16</sup> Ca' naca na, quebe naca lawe' da dxaca lázredxu, ne quegá lawe' da dxun zi' lázredxu, san naca na lawe' da dxexache lazre' Dios dxi'u. <sup>17</sup> Lu dizra' lá'azxa Dios dxé'e wenna' bea chee xezr la xu Egipto: "Bena' lue' wenna' bea chee gulé'eda' ne chiu' lue' xel-la waca chia', ne chee xelúnbea béneache La neda' du gab'i' xezr la xu." <sup>18</sup> Ca' naca na, Dios dxexache lazre' benne' dxaca lazre', ne cá'anqueze dxu'e lataj gaque' zizraj lazre' benne' dxaca lazre' gu'e lataj gaque' zizraj lazre'.

<sup>19</sup> Na'a xi'u neda': Che caní naca na, ¿bizr chee na' dxugapa Dios bèneache dul-la? ¿Núzraqueze sequé' tábaga ca da dxaca lazre' Le'? <sup>20</sup> Lue', benne', ¿nuzra nacu' lue' chee gutil-lu' Dios dizra'? ¿Waca tu xesu' xé na benne' bene' le na: ¿Bizr ché na' benu' neda' caní? <sup>21</sup> Benne' wen xesu' zruaga na' wazéquene' gungé' chee guna' na' ca dxaca lazre'. Wazéquene' gungé' chee guna' ná'queze tu xesu' dá zácadxa, ne tu xesu' dá xálaze. <sup>22</sup> ¿Bizra nnáquezdxa che Dios guca lazre' gulé'ene' dxi'u ca dxuzría xi'e bèneache, ne ca naca xel-la waca chee', na' lu xel-la zren lazre' chee' bhaga lawe' chee' benne' ca' lácala dxal-la' xeledé' le' xel-la zi', na' xelebía xi'tequeze'?

<sup>23</sup> Bene' na chee blé'ene' ca naca xel-la szren chee da xabáa chee' lu da naca cheedxu dxi'u, nácadxu benne' dxexache lazre' Le', ne bequé'e dxi'u nédxuté chee gaca cheedxu xabáa na' da nucueza Le'. <sup>24</sup> Dios bláwizre' dxi'u ládujla benne' judío, ne ládujla benne' quebe zaj naque' judío. <sup>25</sup> Naca na ca naxúaj na lu dizra' lá'azxa ca gunná Oseas, gunné':

Benne' ca' quebe zaj naque' bi chia', xapa' le' bi chia', na' benne' quebe bzri'ida', xapa' le' bi nazri'té lazra'.

<sup>26</sup> Lu lataj naga gucha'-be': Quebe nácale bi chia', ná'queze xapa' le' bi chee Dios ban.

<sup>27</sup> Ca naca chee benne' Israel ca', Isaías dxenné': "Lácala zaj naxán zri'ine zre sua Israel ca naxán xuzre' dxe' dxu'a tu xegu zren, bábaze benne' ca' xelxegá'ane' chee xelélé'", <sup>28</sup> lawe' da gun Xránadxu ca dxenná xrtizre', guzría xi'e zezr la xu nigá lu da naca xrlátaje, ne chadite.

<sup>29</sup> Naca na ca gunná léqueze Isaías na' gate nate, gunné':

Chela Xránadxu, Xrana zánete' gubáz chee xabáa, quebe bca'ane' zri'ine zre súadxu ca', na' xenítedxu ca guca chee xezre Sodoma, ne chee xezre Gomorra.

*Benne' judío ca', ne dizra' chawe'*

<sup>30</sup> ¿Bizraqueze nnadxu? Benne' quebe zaj naque' judío, ne quebe belexeláj lazre' xelxegá'ane' xrlátaje lau Dios, zaj naque' benne' belexegá'ane' xrlátaje lau Dios, da zéaje na, belexegá'ane' xrlátaje lawe' da guleajlí lazre' Cristo. <sup>31</sup> Benne' Israel ca', benne' belune' ca dxenná da nadxixruj bea na da dxal-la' xucá'ana na le' xrlátaje lau Dios, quebe gulezéquene' xelxegá'ane' xrlátaje lawe' Le'. <sup>32</sup> ¿Bizr chee na? Naca na lawe' da quebe belune' ba xuzre xelxegá'ane' xrlátaje ne chee xel-la dxeajlí lazre' chee', san gulaca lazre' xelxegá'ane' xrlátaje ne chee da belúnqueze' le'. Chee le na' xeailecházije' lawe' xiaj da dxelechegu bèneache, da na' naca Cristo <sup>33</sup> ca da dxenná Dios lu dizra' lá'azxa chee', dxenné': Neda' dxuzúa' lu xezre Sión tu benne' naque' xiaj da dxelechegu bèneache. Nu benne' cheajlí lazre' Le' quebe xedué'equezne'.

## 10

<sup>1</sup> Le'e, bi bícha'dau', da dxezá lazra', ne da dxenaba' Dios gungé' chee benne' Israel ca' naca na chee xelélé'. <sup>2</sup> Ca naca chee benne' ca', da li dxelebile lazre' da naca chee Dios, san quebe naca na chee xel-la sina li. <sup>3</sup> Quebe zaj nézene' ca xrlátaje dxucá'ana Dios bèneache, san dxelaca lazre' xulucá'ana xrlátaje cuine', ne quebe dxelezi' lu ne'e ca xrlátaje dxucá'ana Dios bèneache. <sup>4</sup> Cristo dxune' da dxaca lazre' Dios gun da nadxixruj bea na, lawe' da dxucá'ana Cristo xrlátaje xúguté bèneache dxeleajlí lazre' Le'.

<sup>5</sup> Ca naca chee da dxucá'ana xrlátaje bèneache lau Dios da naca na ne chee da nadxixruj bea na, bzuaj Moisés caní: Benne' dxune' ca naca da dxenná da nadxixruj bea na gaca bané ne chee le na. <sup>6</sup> Ca naca chee da dxucá'ana xrlátaje bèneache lau Dios da naca na ne chee xel-la dxeajlí lazre' dxenná na caní: Quebe nnau' lu lazrda'u: "¿Núzraqueze benne' cuéne' xabáa?" (da naca na chee gulétaje' Cristo), <sup>7</sup> ne quebe nnau': "¿Núzraqueze benne' xétaje' lataj chul-la chee benne' gate ca'?" (da naca na chee xebéaje' Cristo ládujla benne' gate.) <sup>8</sup> ¿Bizra da na' dxenná na: Dizra' na' zua na gáguté naga zu', lu dxu'u ne lu lazrda'u? Dizra' nigá naca na dizra' chawe' da dxuzéntenú' bèneache chee xeléajle'e chee Cristo. <sup>9</sup> Che nen dxu'u dxenná' naca Cristo Xranu', ne che lu lazrda'u dxeajlí lazru' Dios bsebané' Le' ládujla benne' gate, nadxa lau'. <sup>10</sup> Lu lázrdaudxu dxeajlí lázredxu chee xegá'anadxu xrlátaje lau Dios, ne nen dxu'adxu dxexechébedxu nácadxu chee Cristo chee ladxu.

<sup>11</sup> Lu dizra' lá'azxa dxenná na: Nu benne' dxeajlí lazre' Le' quebe xedué'ene'. <sup>12</sup> Dios quebe dxebé'e' benne' judío ca', u benne' quebe zaj naque' judío lawe' da Léqueze Xránadxu na' naque' Xrana xúguté bèneache, na' dxunézrujle'e' xúguté benne' ca' dxululáwizre' Le'. <sup>13</sup> Naca na ca da dxenná na: Xúguté benne' dxululáwizre' La Xránadxu xelélé'. <sup>14</sup> Na'a ¿ájazra xululáwizre' Le' che quebe ne xeléajle'e' chee'? ¿Ájazra xeléajle'e' chee' che quebe ne xelenne' nu dxuchalaj chee'? ¿Ájazra xelenne' che quebe nu chilá' benne' guzenne' le'? <sup>15</sup> ¿Ájazra xuluzenne' bèneache che quebe nu nase-la le'? Naca na ca dxenná dizra' lá'azxa, dxenná na: Xrtante' naca lau Dios da dxelún benne' dxeledé' dxuluzenne' bèneache dizra' chee xel-la dxebeza zri lazre', ne dizra' chawe'.

<sup>16</sup> Quegá xúgute bénneache dxelezi' lu ne'e dizra' chawe' nigá. Naca na ca gunná Isaiás, gunné: "Xran, ¿zua nu benne' ba guxéajle'e ca da dxuchálajntu?" <sup>17</sup> Ca' naca na, dxéajledxu chee' gate dxénedxu, na' da dxal-la' xénedxu naca na da gunná Cristo.

<sup>18</sup> Na'a dxenaba': ¿Quebe ne xelenne'? Da li ba belenne'. Lu dizra' lá'azxa dxenná na: Da dxuluzén benne' caní bache belén bénneache du ca naca xezr la xu nigá.

Dizra' chee' benne' caní bache belén bénneache du gabí'i xezr la xu.

<sup>19</sup> Xecha lasa dxenaba': ¿Quebe ne xeleque be'e benne' Israel ca da gunná Dios? Za'a Moisés bzuaje' ca gunná Dios, gunné':

Neda' guna' gácale benne' se lazre' chee' tu xezre benne' quebe ne xelaque' tu xezre.

Guna' zrá'ale tu xezre benne' quebe ne xeléajni'ing'.

<sup>20</sup> Gudé na' bzuaj Isaiás ca gunná Dios, gunné':

Benne' quebe belexílaje' neda' belexezrélené' neda'.

Ble'e lawa' benne' ca' quebe bululáwizre' neda'.

<sup>21</sup> Ca naca chee' benne' Israel, gunná Dios: "Tu dxuláwizrazqueza' benne' quebe dxuluzé' dizra', ne dxeledábague' xrtizra'."

## 11

### *Nu benne' Israel ca' zaj nalé'*

<sup>1</sup> Na'a dxenaba': ¿Ba bzuá Dios chalá'ala xezre chee', benne' Israel ca', tu chí'izqueze? ¿Cabata! Néda'queza' naca' benne' Israel. Neda' nabábalena' zri'ine zre sua Abraham, ne nabábalena' zri'ine zre sua Benjamín. <sup>2</sup> Gate nate Dios guzi' lu ne'e benne' Israel ca', na' na'a quebe nuzé' benne' ca' chalá'ala. ¿Quebe nézele le'e da dxenná dizra' lá'azxa ca naca chee' Elías, bénnea' bchálaje' waláz chee' Dios, gate na' gudawe' zria benne' Israel ca' lau Dios? Gunné': <sup>3</sup> "Xran, ba belútié' benne' buluchálaje' waláz chiu', ne buluzría xi'e lataj lá'azxa chiu' ca', na' tuza' neda' nagá'ana', na' cá'anqueze neda' dxelaca lazre' xelútié'." <sup>4</sup> Dios bechebe', guzre' Elías: "Ba gucá'a chia' ga xun chi gaxúa benne' quebe ne xuluzúa zribe' lau bedá'u' xiaj xaga le' na Baal." <sup>5</sup> Cá'anqueze na'a ba begá'ana tu cue' benne' ca', benne' ba gucá'a Dios chee' lu xel-la zri'i lazre' chee'. <sup>6</sup> Na'a, che naca na ne chee' xel-la zri'i lazre' chee' Dios, quebe naca na ne chee' da gaca gun nu benne', lawe' da la guca na ca', na' xel-la zri'i lazre' chee' Dios quebe naca na xel-la zri'i lazre'.

<sup>7</sup> ¿Bizra xca'? Benne' Israel ca' quebe belezrué'ene' da dxelexílaje', san benne' ca' gucá'a Dios le' belezrué'ene' na, san xezícadxa benne' ca' gulaque' benne' zide'. <sup>8</sup> Naca ca dxenná dizra' lá'azxa, dxenná na: Dios be'e lataj gulaca benne' ca' lázrdau zide'. Be'e le' lataj gulaque' ca benne' la chul-la, ne ca benne' cwezru' ca', na' caní zaj naque' na'a. <sup>9</sup> Cá'anqueze gunná David, gunné':

Ca naca laní chee' benne' ca' ben xelaca na ca tu xralaj, u ca tu da quęla na le'

chee' cheajlecházie', na' gudé Dios le' lu da ba xa'.

<sup>10</sup> Xiaj lawe' xelexchul-la na chee' québedxa xelelé'ene',

na' xelelé'güé' hadía chacanna zran xua da naca na dul-la chee'.

### *Ca zaj nalá benne' quebe zaj naque' judío*

<sup>11</sup> Na'a dxenaba': ¿Tu chí'ize belenite benne' judío ca' gate xeajlecházie'? ¿Cabata! Gate benne' judío ca' guledábague' xrtizra Dios, guta' lataj xelexá benne' quebe zaj naque' judío, chee' xelexúa benne' judío ca' lu xel-la dxezá lazre'. <sup>12</sup> Na'a, che da zrinna' da belún benne' judío ca' ben na guca tu da ba neza chee' xúgute bénneache, ne che gate belenitie' guca na tu da ba neza chee' benne' quebe zaj naque' judío, gaca na tu da ba neza zrendxa gate xelexú'u xúgute benne' judío ca' lu na' Dios.

<sup>13</sup> De tu da dxal-la' xapa' le'e, núlale quebe nácale benne' judío. Lawe' da gusel-la Dios neda' chee' guzenda' benne' quebe zaj naque' judío xrtizre', dxé'le'a gunne xue chee' zrin nabaga' guna'. <sup>14</sup> Dxaca lazra' guna' xelexúa lu xel-la dxezá lazre' bal-la benne' walá'zr chia' chee' xelelé'. <sup>15</sup> Che gate bzua Dios chalá'ala benne' judío ca', belexaca tuze nen Dios benne' quebe zaj naque' judío, ¿ájazra gaca gate xelexaca benne' judío ca' tuze nen Dios? Gaca na ca xelexaca bane' ládujla benne' gate. <sup>16</sup> Che guzúadxu lau Dios xeta nedxu chee' cua, na' nácaqueze chee' duté' cua na'. Na' che naca chee' Dios lue xaga, zaj nácaqueze chee' ca naca zruze xaga na'.

<sup>17</sup> Benne' judío ca' zaj naque' ca zruzequeze tu xaga olivo, san bal-la zruze guledxugu na, na' lue' beda'u waláz chee' zruze ca', ne nacu' ca tu zruze xaga olivo xixre'. Ca'an guca, gucu' tuze nen lue xaga olivo chawe' na', ne dxezi'u ba neza xel-la nabán chee' xaga olivo na'.

<sup>18</sup> Quebe gucá'ana szren cuinu' lawe' zrúzequeze xaga olivo na'. Che dxucá'ana szren cuinu', naca be'e quebe dxugagu' lue' lue xaga na', san luéqueze na' dxugagu na lue'.

<sup>19</sup> Wannáu': Awe', guledxugu zrúze ca' chee cheajxedá'a neda' le'e xaga olivo na'. <sup>20</sup> Ca'an naca, san guledxugu na lawe' da quebe guléajle'e chee Dios, na' lue' bedá'azu' le'e xaga na' lawe' da dxéajle'u. Ca'an naca, quebe gucá'ana szren cuinu', san bxue xanne' cuinu'. <sup>21</sup> Che Dios quebe bnite lawe' chee benne' ca' zaj naque' ca' zrúzequeze xaga na', na' bebéaje' le', cá'anqueze quebe gunite lawe' chiu' lue', na' xebéaje' lue'. <sup>22</sup> Le nna'xque ca xrlátaje naca Dios, na' cá'anqueze ca snia naque'. Guque' snia nen benne' ca' xeajlecházie', na' naque' chawe' nen lue'. Dxun na ba xen tu gúnzquezu' ca dxal-la' gunu' chee tu sí'zquezu' da chawe' chee', lawe' da che quebe gunu' caní, cá'anqueze wegüe' lue'. <sup>23</sup> Che benne' judío ca' xelexexéaj lazre', na' xelexaque' tuze nen xaga olivo na', lawe' da napa Dios xel-la waca xuné' le' tuze. <sup>24</sup> Lue' quebe nacu' judío, san guchugue' lue' le'e tu xaga olivo xixre', na' bexuné' lue' tuze nen xaga olivo chawe' na', da quebe nu dxun. Benne' judío ca', benne' zaj naque' ca' zrúzequeze xaga olivo chawe' na', gácadxa chawe' xexuné' le' tuze nen xaga olivo cheéqueze' na'.

*Ca xelexú'u benne' judío lu na' Dios*

<sup>25</sup> Le'e, bi bícha'dau', dxaca lazra' chéajni'ile chee da nagache nigá, chee quebe guéquele nácale benne' sina. Benne' Israel ca' zaj naque' benne' lázrdau zide' tu chí'idauze, ca zrin zra xelexú'u lu na' Dios xúgute' benne' quebe zaj naque' judío. <sup>26</sup> Gate gaca na, nadxa xeledá xúgute' benne' Israel ca' lawe' da naxúaj lu dizra' lá'azxa da dxenná na:

Benne' weselá ze'e Sión,

na' cue' da calela da zaj nabaga zri'ine zre sua Jacob.

<sup>27</sup> Da nigá gaca xel-la wezria' guna' nen benne' ca',

gate neda' cua' dul-la chee'.

<sup>28</sup> Ca naca chee dizra' chawe' chee Cristo, zaj naca benne' judío ca' ca benne' dxelecuídené' Dios chee gaca da ba neza chele le'e, san Dios ne nazrí'ine' benne' ca' lawe' da guqué'e xra xrtawe' ca'. <sup>29</sup> Ca da dxunna Dios, quebe xequé'e na, ne quebe dxuzú'e chala'ala nu ba bláwizre'. <sup>30</sup> Le'e nédxute' gudábagale xrtizra Dios, san na'a, lawe' da guledábaga benne' judío ca' xrtizre', Dios dxexache lazre' le'e. <sup>31</sup> Cá'anqueze na'a, benne' judío ca' dxeledábague' xrtizra Dios, san naca na chee xexache lazre' Dios le' ca dxexache lazre' le'e. <sup>32</sup> Dios be' lataj xúgute' guledábague' xrtizre' chee gaca xexache lazre' xúgute'.

<sup>33</sup> Szrenté naca xel-la gunni'a chee xel-la sina, ne xel-la dxéajni'i chee Dios. Quebe séquedu chéajni'idxu ca da dxuchi'e, ne quebe gaca gúnbea xánnedxu da dxuné'. <sup>34</sup> ¿Núzraqueze gaca chéajni'i ca da xu'u xichaj lázrdau Xránadxu? ¿Núzraqueze gaca guzéajni'i le'e? <sup>35</sup> ¿Núzraqueze benne' bi bnéruzje' chee Xránadxu, chee gun na ba xen bi xuzri'e chee béneea'? <sup>36</sup> Xúgute' da dxelé'edxu zá'aca na lu na' Dios, na' Le' hene' da ca', ne zaj naca na chee Léqueze'. ¡Gaca ba Dios chadía chacanna! ¡Ca'an gaca na!

## 12

*Da dxal-la' gun benne' naque' bi chee Dios*

<sup>1</sup> Ca'an naca, bi bícha'dau', lu xel-la dxexache lazre' chee Dios, dxata' xúeda' le'e guzúa cuínale lu na' Dios ca tu guna' ban, da naca na lá'azxa, ne da xezaca ba lazre' Dios. Da nigá naca na tu da gucá'ana szrene Dios da dxal-la' gunle. <sup>2</sup> Québedxa gunle ca dxelún béneache chee xezr la xu nigá, san le guchá cuínale chee caní zra duté ca naca lu xichaj lázrdau. Ca'an gaca, gúnbeale da dxaca lazre' Dios gunle, da na' naca xrlátaje, ne da dxezaca ba lazre' Dios, ne da naca na li lazre'.

<sup>3</sup> Ne chee da nusebaga Dios neda' lu da chawe' chee' dxapa' xúgute'le le'e quebe nu benne' dxal-la' gucá'ana cuine' szrendxa ca dxal-la' guné', san dxal-la' guxú'e ca da naque' lu xel-la dxexruj lazre', cáteze naca xel-la dxeajli lazre' da nunezruj Dios le'. <sup>4</sup> Ca naca chee bel-la' dxen cheedxu, zánete' da napa na, na' xúgute' da ca' quebe dxelún na tuze zrin, <sup>5</sup> cá'anqueze dxi'u, láqueze naxandxu, nácadxu ca tuze bel-la' dxen chee Cristo, ne nácadxu tuze tudxu tetudxu ca zaj naca da ca' napa tu bel-la' dxen chee nu benne'.

<sup>6</sup> Benne' nunne' dxi'u cha cheedxu ca da gaca gundxu ca da dxaca lazre' gunne' tu tudxu. Dخال-la' guchine xánnedxu ca da nunne' dxi'u.

Che nunne' dxi'u chee guchálajdxu waláz chee',

dxal-la' gundxu na duté xel-la dxeajli lazre' da nápadxu.

<sup>7</sup> Che nunne' dxi'u chee gundxu zrin chee ljwézredxu,

dxal-la' gundxu na cháwe'dau'.

Che nunne' dxi'u chee gusédedxu béneache,

dxal-la' guséde xánnedxu le'.

<sup>8</sup> Che nunne' dxi'u chee gutípadxu lazre' béneache,

dxal-la' gutipa xánnedxu lazre' le'.

Che nunne' dxi'u cheę bi gunézrujdxu,  
dxal-la' gundxu na du lázredxu.

Che nunne' dxi'u cheę nne xuedxu,  
dxal-la' guxúe xánnedxu ca dxundxu na.

Che nunne' dxi'u gácaleđdxu benne' xache' ca,  
dxal-la' gundxu na dutę xel-la dxebe cheędxu.

<sup>9</sup> Le zri'i lјwézrele du lázrele tule xetule.

Le guzúa chalá'ala da caleļa, ne le gun da xrlátaje.

<sup>10</sup> Dخال-la' zri'i lјwézrele tule xetule ca nazri'ile bi bichequezele.

Le gapa ba lá'ana lјwézrele, ne le güe lataj tule xetule.

<sup>11</sup> Le gun zi' lázrele, ne quebe gácale zrawęde,  
na' le gun zrin cheę Xránadxu dutę lázrdaule.

<sup>12</sup> Le sua xel-la dxebe lu da dxebeza lázrele.  
Le gaca dxexruj lazre' gate dxedele xel-la zi'.

Le guchálajlezeze Xránadxu.

<sup>13</sup> Le gunezruj da dxelexazrje benne' ca' zaj naque' bi cheę Dios.

Le si' lu na'le du lázrele benne' ca' zá'aque' dxelenabe' le'e.

<sup>14</sup> Le naba da chawe' cheę benne' ca' zaj nau zi' xuzre' le'e.

Le naba da xrlátaje cheę', ne quebe ná bale da caleļa cheę benne' ca'.

<sup>15</sup> Le be nen benne' dxelebe',

ne le xexache lazre' benne' ca' dxelebezre xache'.

<sup>16</sup> Le gaca tuze nen lјwézrele tule xetule.

Quebe gucá'ana szren cuínale,  
san le gaca tuze nen benne' dxexruj lazre' ca'.

Quebe guéquele ba ná pale dutę xel-la sina.

<sup>17</sup> Quebe xebi'ile da caleļa cheę benne' nune' cheęle da caleļa.

Le gun ba xuzre gunle da xrlátaje lau xúgute bėnneache.

<sup>18</sup> Che naca cheęle, le gun naga ze lau séquele cueza zri lázrele nen xúgute bėnneache. <sup>19</sup> Bi bicha'dau' nazri'ite lazra', quebe xebéaj lázrele, san le güe lataj Dios xebéaj lazre', lawe' da naxúaj lu dizra' lá'azxa da dxenná na: Chia' neda' naca xebéaj lazra'. "Neda' xebi'a cheę bėnneache," dxenná Xránadxu. <sup>20</sup> Cá'anqueze dxenná na: Che dxedún benne' dxecuđene' lue', bnezruj da gawe', na' che dxeбіlene', bnezruj da xí'aje', lawe' da gate dxunle caní, xedué'e bėnnea'. <sup>21</sup> Quebe gu'u lataj da caleļa nna be'e na lue', san gunná be'e da caleļa ne cheę da xrlátaje da dxunu'.

## 13

<sup>1</sup> Xúgutedxu dxal-la' guzúadxu dizra' cheę benne' xu'u lawe', lawe' da quebe nu chilá' benne' xu'u lawe' che quebe nunna Dios le' xel-la dxenná bea cheę'. Benne' xu'u lawe' ca' zaj naque' benne' nuzúa Dios. <sup>2</sup> Cheę le' na' nu benne' dxedábage' benne' xu'u lawe' dxedábage' ca da nun Dios. Benne' dxeledábage' caní zaj nabague' zria, na' Dios xuzri'e cheę' da xexal-le'. <sup>3</sup> Benne' ca' dxelenná be'e quebe nuzúa Dios le' cheę xuluchebe' benne' dxelune' da xrlátaje, san cheę xuluchebe' benne' dxelune' da caleļa. ¿Dxaca lazru' quebe zrebu' benne' xu'u lawe'? Ben da xrlátaje, na' benne' xu'u lawe' ca' xelape' ba lá'ana lue' <sup>4</sup>lawe' da zaj naque' wen zrin cheę Dios cheę xelune' chiu' da xrlátaje. Che dxunu' da caleļa, dxal-la' zrebu' lawe' da quegá dácheze zaj nape' xel-la dxenná bea xelxebi'e cheę bėnneache lawe' da zaj naque' wen zrin cheę Dios cheę xuluzúe' lu da ba xa' benne' ca' dxelune' da caleļa. <sup>5</sup> Cheę le' na', dxun na ba xen guzúadxu dizra' cheę benne' xu'u lawe', quegá tuze cheę quebe xuluzúe' dxi'u lu da ba xa', san lawe' da nezdxu naca na da nadxixruj bea Dios. <sup>6</sup> Cheę le' na' dxízrujle da dxebá gale cheę xu'u lawe', lawe' da zaj naca benne' xu'u lawe' wen zrin cheę Dios, ne dxelún xánnie' zrin cheę' na'.

<sup>7</sup> Le quizruj xúgute bėnneache ca da nabá gale cheę'.

Da nabá gale cheę benne' wechizruj, le quizruj da nabá gale.

Da nabá gale cheę xu'u lawe', le quizruj na.

Benne' dxal-la' gápale ba lá'ana, le gape' ba lá'ana.

Benne' dxal-la' gucá'ana szrenle, le gucá'ang' szren.

<sup>8</sup> Quebe dxal-la' cue zria cheęle nen nu benne' san tuze cheę zri'ile le' ca dxal-la' gunle cheę le sa' lјwézrele tule xetule. Che gunle da nigá, na' gunle da nadxixruj bea na. <sup>9</sup> Naga zaj naxúaj da nadxixruj be'e Dios dxenná na:

Quebe súalenu' zru'ula benne' xula.

Quebe gutiu' benne'.

Quebe cuanu'.

Quebe gun lazru' chee benne'.

Quebe sa lazru' da naca chee benne'.

Xúgute da nadxixruj bea caní, ne xúgute da nadxixruj bea xezícadxa dxun bénnea' dxuzúe' dizra' da nadxixruj bea na' dxenná na: Bzri'i le sa' ljwezru' ca nazrí'i cuinu'. <sup>10</sup> Bénnea' nazrí'ine' le sa' ljwezre' quebe dxune' da calela chee le sa' ljwezre' na'. Ca'an naca, bénnea' nazrí'ine' le sa' ljwezre' dxuzúe' dizra' chee da nadxixruj bea na.

<sup>11</sup> Ca naca da caní, le guxúe xanne' ca naca zra zúadxu na'a lawe' da ba bzin zra xebandxu lu bchigala lawe' da ba zua gágudxa zra ladxu lu da nácadxu ca guzúa na gate na' guzú lau dxéajlédxu. <sup>12</sup> Ba dxedé chee da chul-la, ne ba za te zra. Chee le na' dxal-la' gusandxu da dxelún bénneache lu da chul-la, na' gácadxu ca tu benne' zeje' wedil-la dxacu zra lané' xia, chee tadxu lu xel-la naxaní' chee Dios.

<sup>13</sup> Dخال-la' tadxu li lazre' ca dxal-la' tadxu te zra.

Quebe dxal-la' xi'ajdxu da dxuzuzre na bénneache, ne quebe gagu xrátadxu.

Quebe gundxu da sban, ne da calela.

Quebe til-lalédxu le sa' ljwézredxu,

ne quebe gácadxu xa lazre'.

<sup>14</sup> Xránadxu Jesucristo gácaqueze' ca zra lánadxu xia, na' quebe gundxu da dxezá lazre' belá' dxen cheédxu.

## 14

### *Quebe si tizru' biche ljwezru'*

<sup>1</sup> Che tu bi bíchedxu quebe ne se cháchabe' lu xel-la dxeajlí lazre', le si' lu na'le lebe', san quegá chee gutíl-lalele lebe' dizra' ca naca da quebe dxun na ba xen. <sup>2</sup> Ca naca na, zaj zra' benne' dxelaajlí lazre' naca chee' xelawe' bal-la bi de, san zaj zra' benne' xezícadxa quebe ne xezele chache' lu xel-la dxeajlí lazre', na' dxeléquene' waca xelawe' tuze xixre' cuan. <sup>3</sup> Benne' dxawe' xúgute da ca' quebe dxal-la' gaxúe' chalá'ala bénnea' nadxúaj nadxeze da dxawe', na' benne' nadxúaj nadxeze da dxawe' quebe dxal-la' si tizre' bénnea' dxawe' bal-la bi de, lawe' da nazi' lu na' Dios bénnea'. <sup>4</sup> ¿Nuzra nacu' lue' dxezí tizru' wen zrin chee Xránadxu? Che xegá'ane' xrlátaje, u che quegá, naca na da nabaga Xránadxu. Xegá'ane' xrlátaje lawe' da napa Xránadxu xel-la waca chee gucá'ane' le' xrlátaje.

<sup>5</sup> Caní naca xetú. Zaj zra' benne' dxulupá'anadxe' tu zra ca xetú zra, na' zaj zra' benne' dxeléquene' tuz ca zaj naca xúgute zra. Tu tudxu dxal-la' se cháchadxu lu xichaj lázrdaudxu ca naca da caní. <sup>6</sup> Benne' dxupá'ane' tu zra dxune' na chee gape' ba lá'ana Xránadxu, na' bénnea' quebe dxupá'ane' zra na' dxune' ca' chee gape' ba lá'ana Xránadxu. Benne' dxawe' bal-la bi de dxune' na chee gape' ba lá'ana Xránadxu lawe' da dxe'e Dios: Xcalenu', na' bénnea' nadxúaj nadxeze da dxawe' dxune' na chee gape' ba lá'ana Xránadxu, na' cá'anqueze dxe'e Dios: Xcalenu'.

<sup>7</sup> Netudxu dxi'u naca bandxu chee gundxu da naca cheézedxu, ne quegá gátédxu lu da naca cheézedxu. <sup>8</sup> Che naca bandxu, naca na chee gaca ba Xránadxu. Ca' naca na, che gaca bandxu, u che gátédxu nácadxu bi chee Xránadxu. <sup>9</sup> Cristo gutié', ne bebane' chee gaque' Xrana benne' gate ca', ne Xrana benne' ban ca'.

<sup>10</sup> Na'a lue', ¿bizr chee na' quebe dxel'éenu' chawe' ca da dxun le sa' ljwezru', bi bíchedxu? ¿Bizr chee na' dxuzú' le' chalá'ala? Xúgutedxu dxal-la' zrindxu lau Cristo chee guchi'e ca da nundxu tu tudxu. <sup>11</sup> Naxúaj lu xiche lá'azxa da dxenná na:

Dxenná Xránadxu: "Dxuzetaj cuina' dxennía':

Xúgute bénneache xuluzú zribe' lawa'.

Xúgute' xelexechebe' lawe' lau naca' Dios."

<sup>12</sup> Ca'an naca, tu tudxu dxi'u dxun na ba xen gulé'edxu ca da nundxu lau Dios.

<sup>13</sup> Chee le na' québedxa dxal-la' si tizradxu tudxu xetudxu. Le gun ba xuzre quebe bi gunle da gun na gaca chegu bi bíchele, u da gun na cheajcházig' lu dul-la. <sup>14</sup> Dxuxrén lazra' Xránadxu Jesús, ne nezda' quebe bi da dxágudxu nácaqueze sban, san che tu bi bíchedxu dxéquebe' de tu da dxágudxu da naca na sban, chee lebe' naca na da sban. <sup>15</sup> Che ne chee da dxagu' lue', dxunu' dxeajchaze bi bichu', quebe dxunu' da naca chee xel-la zri'i lazre'. Quebe gunu' cuia xi' tu benne', bénnea' gute Cristo waláz chee', lawe' da dxaca lazru' lue' gagu' bi xel-la wagu. <sup>16</sup> Quebe bi gunle da güe lataj nu nne schanní' chee da dxéquele naca na da xrlátaje. <sup>17</sup> Chee súadxu naga dxenná be'e Dios dxi'u quebe naca na chee da dxágudxu, u chee da dxi'ajdxu, san naca na chee xegá'anadxu xrlátaje lau Dios, ne chee gápadxu xel-la dxebeza zri lazre', ne chee súadxu xel-la dxebe', da ca' nápadxu ne chee Be' Lá'azxa. <sup>18</sup> Nu benne' dxune' zrin chee Cristo caní dxune' da dxezaca ba lazre' Dios, na' dxelapa bénneache le' ba lá'ana.



<sup>19</sup> Ca' naca na, dxal-la' gundxu da dxulusá na xel-la dxebeza zri lazre', ne da dxuluzúa chacha na dxi'u. <sup>20</sup> Quebe guzria xi'u da nun Dios lu xichaj lárzdau le sa' ljwezru' ne chee da dxagu'. Da li xúgute da dxágudxu zaj naca na xrlátaje, san quebe naca xrlátaje bi gágudxu da gun na cheajchaze benne' xula lu dul-la. <sup>21</sup> Xrlátaje naca quebe gágudxu bela', ne quebe xi'ajdxu xrise uva wal-la, ne quebe bi gundxu da gun na cheajchaze bi bíchedxu lu dul-la, u da guzria xi na xel-la dxeajlí lazre' chee'. <sup>22</sup> Che napu' xel-la dxeajlí lazre' bi gaca gunu', dxal-la' gunu' na lué'queze lau Dios. Ba neza naca na chee benne' quebe guzria xi' cuine' ne chee da dxéqene' naca na da xrlátaje gung'. <sup>23</sup> Bénnea' dxawe' da dxéqene' quebe dxal-la' gawe', nabague' zria gate dxawe' na lawe' da dxawe' da quebe dxeajlí lazre' naca chee' gawe'. Xúgute da dxundxu zaj naca dul-la che quebe dxuxrén lázredxu zaj naca na xrlátaje.

## 15

*Ben da dxezaca ba lazre' bi bichu', ne quegá da dxezaca ba lázrezu' lue'*

<sup>1</sup> Dxi'u ba ze cháchadxu lu xel-la dxeajlí lazre' dxal-la' gácalédxu benne' quebe ne se chache' lu xel-la dxeajlí lazre', ne quebe gundxu da dxezaca ba lázredxu dxi'uze. <sup>2</sup> Tu tudxu dxal-la' gundxu da dxezaca ba lazre' bi bíchedxu lu da gun na chawe' cheebe', ne lu da gusegula na lebe' lu xel-la dxeajlí lazre' cheebe'. <sup>3</sup> Cristoqueze quebe bene' da dxezaca ba lazre' leze', san guca chee' ca naxúaj na lu dizra' lá'azxa, dxenná na: Benne' ca' gulenné' schanni' chiu' Lue', Dios, guca na ca gulenné' schanni' chia' neda'. <sup>4</sup> Xúgute da naxúaj nédxudauté lu dizra' lá'azxa zaj naxúaj na chee guzéajni'i na dxi'u, chee gápádxu xel-la dxebeza lazre' ne chee xel-la zren lazre', ne xel-la dxexúe zren, da ca' nápadxu ne chee da ca' zaj naxúaj na. <sup>5</sup> Dxenaba' lau Dios, Bénnea' dxunne' dxi'u xel-la zren lazre', ne dxexúe zrene' dxi'u, chee gácaléne' le'e chee gácale tuze tule xetule ne chee Jesucristo, <sup>6</sup> chee gunle xúgutele tu zren güe lá'ana le Dios, Xra Xránadxu Jesucristo.

*Dxelén benne' quebe zaj naque' judío dizra' chawe'*

<sup>7</sup> Ca'an naca, chee gaca ba Dios, le si' lu na'le ljwézrele tule xetule ca ben Cristo, guzi' lu ne'e dxi'u. <sup>8</sup> Ca da dxennéa' neda', dxennéa' bla' Cristo, ne bene' zrin chee benne' judío ca', chee bene' ca da guchebe lazre' Dios lau xra xrtáudxu ca', ne caní blé'ene' naca Dios li lazre'. <sup>9</sup> Cá'anqueze ble'e chee xelúe lá'ana Dios benne' ca' quebe zaj naque' judío lawe' da dxexache lazre' bénneache, ca da naxúaj na caní chee Cristo lu dizra' lá'azxa, dxenné': Güe lá'ana' lue', Dios, lau benne' xezr la xu ca', ne tu gul-lazqueza' da xelapa ba lá'ana Lue'.

<sup>10</sup> Cá'anqueze dxenná na:

Le be, le'e, bénneache duté xezr la xu  
nen benne' zaj naque' bi chee Dios.

<sup>11</sup> Cá'anqueze dxenná na:

Le güe lá'ana Xránadxu,  
le'e, bénneache chee xúgute xezr la xu,  
ne le guchalaj chee xel-la szren chee',  
le'e, xúgute bénneache.

<sup>12</sup> Cá'anqueze bchalaj Isaiás ca naca chee Cristo, gunné':

Welá'queze tu zri'ine zre sua Isai,  
Bénnea' nna bé'ene' xúgute cue' xezr la xu,  
na' benne' ca' xelebeza lazre' Le'.

<sup>13</sup> Dxenaba' Dios, Bénnea' dxunne' dxi'u xel-la dxebeza lazre', chee gúnna'le'e le'e xel-la dxebe', ne xel-la dxebeza zri lazre' lawe' da dxeajlí lázrele Le', chee gápale'quezele xel-la dxebeza lazre' ne chee xel-la waca chee Be' Lá'azxa.

<sup>14</sup> Le'e, bi bícha'dau', dxuxrén lazra' nápalé'ele da chawe', ne núnbeale xúgute chee gaca guzéajni'ile ljwézrele tule xetule. <sup>15</sup> Lu xiche nigá bechugu lazra' guzúaja' chee da caní chee quebe gal-la lázrele na. Dxuna' na ne chee da bsebaga Dios neda' lu da chawe' chee'. <sup>16</sup> Caní guna' zrin chee Jesucristo láduja benne' quebe zaj naque' judío. Zrin dxuna' naca na chee guzenda' bénneache dizra' chawe' chee Dios chee guzra'a benne' quebe zaj naque' judío lau Dios ca tu guna' da dxezaca ba lazre' Le'. Xelaque' benne' lá'azxa ne chee Be' Lá'azxa.

<sup>17</sup> Lu da naca' chee Jesucristo waca xezaca ba lazra' lu zrin dxuna' chee Dios <sup>18</sup> lawe' da quebe dxedxugu lazra' guchálaja', san tuze ca naca da nun Cristo ne chia' neda', chee guna' xuluzúa benne' quebe zaj naque' judío xrtizra Dios. Da nigá bena' ne chee da bchálaja', ne da bena', <sup>19</sup> ne ne chee xel-la waca chee da ble'e Dios, nen xel-la waca chee xabáa, ne ne chee xel-la waca chee Be' Lá'azxa. Caní bchálaja' dizra' chawe' chee Cristo du ca naca xezr la xu. Guzú lawa' dxuna' na xezre Jerusalén, bzrintea' naga nababa Ilírico. <sup>20</sup> Caní naca, bena' ba xuzre bchálaja' dizra' chawe' naga quebe ne xelenne' La Cristo, chee quebe guna' zrin naga ba zaj nun zrin xezicadxa benne', <sup>21</sup> na', ca dxenná dizra' lá'azxa:

Xelélé'e benne' ca' quebe ne zrin nu benne' guzenne' lę' cheę Cristo, na' benne' ca' quebe ne xelén cheę Le' xelėjani'ine da naca cheę'.

*Pablo dxugú'u be'e chėjaję xęzre Roma*

<sup>22</sup> Cheę guzenda' le'e da canı, da zan lasa guca lazra' xedajnná'a le'e zrale xęzre Roma, san quebe guca chia'. <sup>23</sup> Na'a, ba bexuzre bena' zrin nigá, ne lawe' da zánęta iza ba guca lazra' xida' súalena' le'e, <sup>24</sup> dxebeza lazra' tea' xedajnná'a le'e gate cha'a lu xęzr la xu España. Gate te sua' xel-la dxebé nen le'e dxebeza lazra' xusi'ile neda' neza, na' cha'a ná'ala. <sup>25</sup> Na'a cha'a Jerusalén, gu'a late' da gácale na bi bíchedxu zaj zre'e na', <sup>26</sup> lawe' da bi bíchedxu zaj zre'e xęzre ca' zaj nababa Macedonia, ne xęzre ca' zaj nababa Acaya guléquene' naca xrlátaje bulutube' dumı da xelesel-le' cheę bi bíchedxu zaj naque' baxache', zaj zrabe' Jerusalén. <sup>27</sup> Guléquene' naca xrlátaje xelune' da nigá, na' canı naca na lawe' da dxelebague' cheę benne' ca', lawe' da benne' judıo ca', benne' dxelėjaję'e cheę Cristo, bulunézruje' cheę benne' quebe zaj naque' judıo cheę da zaj nape' cheę Dios, na' benne' canı dxal-la' xulunézruje' cheę benne' judıo ca' cheę da zaj nape' cheę xęzr la xu nigá. <sup>28</sup> Canı naca, gate xexuzre guna' da nigá, ne ba bnézruja' lę' dumı nigá, na' cha'a lu xęzr la xu España, na' ca teza' xedajnná'a le'e. <sup>29</sup> Dxuxrén lazra' gate xida' naga zrale le'e, gúale'a da chawe' cheę dizra' chawe' cheę Cristo.

<sup>30</sup> Le'e, bi bıcha'dau', dxata' xúeda' le'e ne cheę Xránadxu Jesucristo, ne ne cheę xel-la zrı'i lazre' da dxunna Be' Lá'azxa dxi'u, cheę gácale tuze nen neda' guchálajędxu Dios cheę gácalene' neda'. <sup>31</sup> Le naba Dios cheę guselé' neda' lu na' benne' quebe dxelėjaję'e cheę Cristo naga nababa Judea, ne cheę xezezi' du lazre' bi bíchedxu zaj zre'e Jerusalén dumı nigá da nu'a, <sup>32</sup> na' che naca da dxaca lazre' Dios, la'a lu dutę xel-la dxebé xedajnná'a le'e, ne cheę xezi' lazra' naga zrale le'e. <sup>33</sup> Dxenaba' Dios, Bénnea' dxunne' dxi'u xel-la dxebeza zrı lazre', súalene' xúgutele le'e. ¡Ca'an gaca na!

## 16

*Pablo dxugape' diuzre bi bíchedxu ca'*

<sup>1</sup> Dxegu'a lu na'le nu'ula zandxu Febe, nu'ula na' ba bene' zrin cheę Cristo ládujla bi bíchedxu zaj zre'e xęzre Cencrea. <sup>2</sup> Le si' lu na'le lę' cháwedau' lu La Xránadxu, ca dxal-la' gaca ládujla bi bíchedxu dxelėjaję'e cheę Cristo, na' le gácalene' bıteteze da dxexázrjene', lawe' da ba gúcale lę' benne' zan, ne neda'queza'.

<sup>3</sup> Le gugapa diuzre Priscila ne Aquilo, benne' belún zrin cheę Jesucristo tu zren nen neda'. <sup>4</sup> Benne' canı buluzę' xel-la nabán cheę lu da stebe cheę gúcalene' neda'. Ca' naca na, dxapa' benne' ca' xcalenle, ne quegaze neda', san cá'aqueze dxelún xúgute bi bíchedxu quebe zaj naque' judıo. <sup>5</sup> Le gugapa diuzre bi bíchedxu ca' dxelezáragabe' lızre Priscila, ne Aquilo. Le gugapa diuzre Epeneto, benne' ljwezra' nazrı'ite lazra'. Lę' guque' benne' nedxu naga nababa Acaya guxėjaję'e cheę Cristo. <sup>6</sup> Le gugapa diuzre María, nu'ula na' ba benle'e zrin ládujla le'e. <sup>7</sup> Le gugapa diuzre benne' walázr chia', Andrónico, ne Junias, benne' ca' gulaque' ljwezra' lızre xia. Zaj naque' benne' blau ládujla benne' gubáz ca' cheę Cristo, na' gulėjaję'e cheę Cristo nédxudxa ca neda'.

<sup>8</sup> Le gugapa diuzre Amplias, benne' ljwezra' nazrı'ite lazra' lu La Xránadxu. <sup>9</sup> Le gugapa diuzre Urbano, benne' ljwezra' lu zrin cheę Jesucristo, ne le gugapa diuzre Estaquis, benne' nazrı'ite lazra'. <sup>10</sup> Le gugapa diuzre Apeles, benne' blé'ene' da zan lasa ca dxeajlı lazre' Cristo. Cá'aqueze le gugapa diuzre Aristóbulo, benne' xrtia'. <sup>11</sup> Le gugapa diuzre Herodión, benne' walázr chia', ne Narciso, benne' xrtia', benne' dxelėjaję'e cheę Xránadxu. <sup>12</sup> Le gugapa diuzre Trifena ne Trifosa, nu'ula ca' dxelune' zrin cheę Xránadxu, ne le gugapa diuzre Pérsida, bi zandxu nazrı'ite lazrdxu, nu'ula na' ba benle'e zrin cheę Xránadxu. <sup>13</sup> Le gugapa diuzre Rufo, benne' blau dxėjaję'e cheę Xránadxu, ne xrne'e, nu'ula na' naque' ca xrnáqueza'. <sup>14</sup> Le gugapa diuzre Asíncrito, ne Elegonte, ne Hermas, ne Patrobas, ne Hermes, ne bi bíchedxu ca' zrálene' lę'. <sup>15</sup> Cá'aqueze le gugapa diuzre Filólogo, ne Julia, ne Nereo, ne nu'ula zane', ne Olimpás, ne xúgute bi bíchedxu dxeleajlı lazre' Cristo, benne' zrálene' benne' canı.

<sup>16</sup> Le gugapa diuzre ljwézrele tule xetule, gunıdate ljwézrele. Xúgute cue' bi bíchedxu dxulugape' le'e diuzre.

<sup>17</sup> Le'e, bi bıcha'dau', dxata' xúeda' le'e, nna' xánnele benne' ca' dxelune' chupa la'a bi bíchedxu ca', ne dxelune' dxeajlecházię' benne' ca', na' dxulusédenę' da dxdábaga na ca da nusédele. Le cuasa naga zaj zra' benne' ca' <sup>18</sup> lawe' da quebe dxelún benne' ca' zrin cheę Xránadxu Jesucristo. Dxelune' ca da dzezaca ba lazre' belá' dxen cheęqueze', ne dxelezi xę'e benneáchedu ca' quebe ne xeleneze xánnię' ca naca dizra' chawe'. Benne' wen lazre' ca' cadite zaj nupé'ę, ne zaj nézene' da dxuluchálaje'. <sup>19</sup> Xúgute bénneache zaj nézene' ca ba bzúale xtızra' Dios. Cheę lę' na' dxebeda', ne dxaca lazra' gácale ban lazre' gunle da xrlátaje, na' quegá gunle da caleła. <sup>20</sup> Dios, Bénnea' dxunne' dxi'u xel-la dxebeza zrı lazre' ba zúaqueze'

gácalēṅe' le'e, cheḡ guchúchujle Satanás da xriwe'. Dxenaba' lau Xránadxu Jesucristo gunḡ gaca chawe' cheele.

<sup>21</sup> Bi bíchedxu Timoteo dxugápabe' le'e diuzre. Nácabe' ljwezra' lu zrin cheḡ Cristo. Cá'anqueze dxulugape' le'e diuzre benne' waláwr chia' Lucio, ne Jasón, ne Sosípater.

<sup>22</sup> Neda', Tercio, dxuzúaja' xtizra' Pablo caní, dxugapa' le'e diuzre lu La Xránadxu.

<sup>23</sup> Gayo dxugape' le'e diuzre, bēnnea' zua' lizre', na' dxunne' lizre' naga dxelezraga xúguteḡ benne' bíchedxu caní. Cá'anqueze dxulugape' le'e diuzre Erasto, benne' xu'u lu ne'e dumí cheḡ xezre, ne bi bíchedxu Cuarto.

<sup>24</sup> Dxenaba' Xránadxu Jesucristo gunḡ gaca chawe' cheḡ xúgutele le'e. ¡Ca'an gaca na!

*Pablo dxue lá'ang' Dios*

<sup>25</sup> Na'a, dxue lá'anantu' Dios, Bēnnea' séquene' guzé cháchadḡ le'e lu dizra' chawe' da dxuzenda' bēnneache, ne lu da dxusédeda' ca naca cheḡ Jesucristo. Da nigá naca na tuze nen da ble'e Dios cheḡ da nagache da gulú'u chawe' bagácheze nédxudaute, <sup>26</sup> san na'a ba ble'e lawe' na ne cheḡ dizra' lá'azxa da buluzúaj benne' ca' buluchálajḡ waláz cheḡ Dios, ca da bdxixruj be'e Dios chadía chacanna. Ba ble'e lau dizra' chawe' nigá na'a lau benne' xúguteḡ xezr la xu cheḡ xeléajle'e cheḡ na, ne xuluzúḡ dizra' cheḡ na.

<sup>27</sup> Dios, Benne' tu licha', ne Benne' sina, gaca ba Le' chadía chacanna ne cheḡ Jesucristo. ¡Ca'an gaca na!

## **DIZRA' NEDXU DA BZUAJ SAN PABLO CHEE BI CHEE CRISTO ZAJ ZRE'E XEZRE CORINTO**

*Pablo dxuzúaj'e chee bíchedxu zaj zre'e xezre Corinto*

<sup>1</sup> Neda', Pablo, naca' benne' bláwizra Dios chee gaca' gubáz chee Jesucristo. Naca na da guca lazre' Dios gaca'. Tu zren nen bíchedxu Sóstenes <sup>2</sup> dxuzúaja' da nigá cheele le'e, bi bicha', zrágale chee Dios lu xezre Corinto. Nácale bi chee Dios lawe' da nácale tuze nen Jesucristo. Dios ba bláwizre' le'e chee gácale bi cheequeze' tu zren nen xúgute benne' ca' zaj zre'e du ca naca xezr la xu, ne dxululáwizre' La Xránadxu Jesucristo, Bénnea' naque' Xrane benne' ca', ne Xránadxu dxi'u. <sup>3</sup> Dxenaba' Xradxu Dios, ne Xránadxu Jesucristo gunne' le'e xel-la dxebeza zri lazre', ne gun chawe'e le'e.

*Da chawe' da nápadxu ne chee Cristo*

<sup>4</sup> Dxápequeza' Dios: Xcalenu', ca naca cheele ne chee da chawe' da benne' Dios le'e ne chee Jesucristo. <sup>5</sup> Lawe' da nácale tuze nen Cristo, Dios ba benne' le'e xel-la gunní'a zante' da naca chee Be' Lá'azxa chee', lu da dxuchálajle, ne lu da nézele. <sup>6</sup> Ca' naca na, da dxuchálajdxu ca naca chee Cristo ba guca na li cheele le'e. <sup>7</sup> Ca' naca na, quebe bi dxexázirole ca da dxunna Dios dxi'u dxácaté dxebézadxu zra xelá' Xránadxu Jesucristo. <sup>8</sup> Le' guxrú chache' le'e ca zrin zra zbebe, chee quebe nu benne' gaca gusebágué' le'e zría gate xelá' Xránadxu Jesucristo. <sup>9</sup> Dios tu dxúnzqueze' ca da nachébe lazre', naque' Bénnea' bláwizre' le'e chee gácale tuze nen Zrí'ine', Xránadxu Jesucristo.

*Dxaca chupa la'a bi chee Cristo*

<sup>10</sup> Bi bicha', dxata' xúeda' le'e lu La Xránadxu Jesucristo, chee gácale tuze, ne quebe gácale chupa la'a. Le gaca xanne' tuze, ne tuze da cu'u xichaj lázrdaule, ne da gunle. <sup>11</sup> Da nigá dxapa' le'e, bi bicha', lawe' da buluzén benne' xrtia Cloé neda' dxutil-lale dizra'. <sup>12</sup> Da nigá zéajje na nácale chupa la'a, na' bál-lale dxennale: Netu' da'ntu' Pablo. Xezícale dxennale: Netu' da'ntu' Apolos. Xezícale dxennale: Netu' da'ntu' Pedro. Xezícale dxennale: Netu' da'ntu' Cristo. <sup>13</sup> ¿Dxéquele naca Cristo chupa la'a? ¿Dxéquele gudá'a neda', Pablo, le'e xaga béguaj waláz cheele? ¿Bedxúale le'e nisa lu la Pablo? <sup>14</sup> Xcalén Dios quebe núlale le'e bchua' nisa san tuze Crispo, ne Gayo <sup>15</sup> lawe' da quebe nu gaca nna: Lu la Pablo gudxú'a nisa. <sup>16</sup> Cá'anqueze bchua' nisa benne' xrtia Estéfanos, san quebe dxeajsa' lazra' che nu xetú bchua' nisa. <sup>17</sup> Cristo quebe gusel-le' neda' nu guchúa' nisa, san chee guzenda' bénneache dizra' chawe' chee', quegá nen dizra' sina, chee quebe gaca dácheze da ben Cristo gate gutié' le'e xaga béguaj.

*Cristo naque' xel-la waca, ne xel-la sina chee Dios*

<sup>18</sup> Dizra' ca gute Cristo le'e xaga béguaj naca na ca tu da xálaze lau benne' xelebía xi'e, san cheedxu dxi'u, nápadxu xel-la weselá, dizra' nigá napa na xel-la waca chee Dios. <sup>19</sup> Naca na ca naxúaj na lu dizra' lá'azxa. Dxenná Dios: Guzría xi'a xel-la sina chee benne' sina ca', ne guzúa' chalá'ala xel-la naxéajni'i chee benne' dxeléajni'ine'.

<sup>20</sup> ¿Gazra nagá'ana benne' sina na'a? ¿Waca guselá cuine'? ¿Gazra nagá'ana benne' dxusédené' bénneache? ¿Gazra nagá'ana benne' dxuchálajje' ca naca da dxaca lu xezr la xu nigá? Ca naca xel-la sina chee xezr la xu nigá, Dios ba nunge' na tu da xálaze lawe' da tuze Le' gaca guselé' bénneache. <sup>21</sup> Dios nézengé' xúgute. Quebe be'e lataj bénneache xelúnbe'e Le' ne chee xel-la sina chee bénneache. Bezaca ba lazre' Dios ne chee dizra' nigá bselé' benne' ca' dxuluxrén lazre' Le', lácala zaj zra' benne' dxeléquengé' naca dizra' nigá tu da xálaze.

<sup>22</sup> Benne' judío ca' dxelaca lazre' xelélé'engé' xel-la waca da za xabáa, na' benne' griego ca' dxelexiláje' xel-la sina, <sup>23</sup> san dxi'u dxuzendxu bénneache ca naca chee Cristo, ca gutié' le'e xaga béguaj. Benne' judío dxelexedué'engé' chee dizra' nigá, na' benne' quebe zaj naque' judío dxeléquengé' naca na tu da ca zeaje na. <sup>24</sup> Na'a, benne' ca' ba bláwizra Dios, benne' judío ca', ne benne' quebe zaj naque' judío, Cristo nácaqueze' xel-la waca, ne xel-la sina chee Dios. <sup>25</sup> Da dxeleque bénneache naca tu da xálaze chee Dios nácadxa na sina ca xel-la sina chee bénneache, na' da dxeleque bénneache naca na tu da naca bea nate ni'a na' Dios nápadxa na xel-la waca ca xel-la waca chee bénneache. <sup>26</sup> Le'e, bi bicha', dxal-la' gueque be'ele ba bláwizra Dios le'e lácala bábaze le'e nácale sina lau bénneache chee xezr la xu nigá, ne bábaze le'e nácale xel-la dxenná bea, u nácale xrtia benne' zaj naque' blau. <sup>27</sup> Dios ba guqu'é' benne' ca' dxeleque bénneache zaj naque' benne' xálaze, chee xellexedué' benne' sina ca', ne ba guqu'é' benne' ca' dxeleque bénneache zaj nate ni'a ne'e, chee xellexedué' benne' wal-la ca'. <sup>28</sup> Dios ba guqu'é' benne' ca' quebe zaj naque' blau, ne benne' ca' zaj nuzúa bénneache

chalá'ala, benne' ca' quebe nu zaj naque', chee guzague' naze benne' zaj naque' blau, <sup>29</sup>chee quebe nu zaca' gucá'ana szren cuina lau Dios. <sup>30</sup>Diósqueze ba nune' le'e tuze nen Jesucristo, ne nune' naca Cristo Benne' dxunna dxi'u xel-la sina, ne Benne' gucá'ana dxi'u xrlátaje, ne Benne' dxuzúe' dxi'u lu na' Dios, ne benne' dxexá'awe' dxi'u. <sup>31</sup>Ca' naca na ca da naxúaj na lu dizra' lá'azxa, da dxenna na: Che nu benne' dxaca lazre' nu gucá'ana szrene', dxal-la' gucá'ana szrene' Xránadxu.

## 2

*Dizra' ca naca chee Cristo, gudé'e xaga béguaj*

<sup>1</sup>Na'a, bi bícha'dau', gate bedajchálajlena' le'e da li chee Dios, quebe bchíneda' dizra' sina, ne dizra' zaca. <sup>2</sup>Gate ne zúalena' le'e quebe guca lazra' guchálaja' chee bila da xetu san tuze chee Jesucristo, Bénnea' gudé'e xaga béguaj. <sup>3</sup>Gate guzúalena' le'e ne nátete' ni'a na'a, ne guzrizetea' lawe' da bzreba' quebe guca guna' da nusebaga' Cristo neda'. <sup>4</sup>Gate bchálajlena' le'e, ne bzenda' le'e dizra' chawe', quebe guca lazra' guna' chéajle chee' nen dizra' sina chee bénneache da guchálaja', san bēna' guxéajle chee' ne chee Be' Lá'azxa, ne ne chee xel-la waca chee Dios <sup>5</sup>chee gápale xel-la dxeajlí lazre' da naca na ne chee xel-la waca chee Dios, ne quegá ne chee xel-la sina chee bénneache.

*Dios dxulé'e cuine' ne chee Be' Lá'azxa*

<sup>6</sup>Dxuchálajntu' dizra' sina lau benne' ca' ba zaj ze chache' lu xel-la dxeleajlí lazre' chee'. Xel-la sina nigá quebe naca na xel-la sina chee xezr la xu nigá, ne chee benne' dxelenná be'e lu xezr la xu nigá, benne' ca' xeledé chie'. <sup>7</sup>Dxuchálajntu' xel-la sina nagache chee Dios, da na' bzua Dios nédxudaute' ca bene' xezr la xu nigá, chee ladxu chadia chacanna. <sup>8</sup>Netú benne' ca', benne' dxelenná be'e lu xezr la xu nigá, quebe guléajni'ine' da nigá, lawe' da la guléajni'ine' na quebe buludé'e Xránadxu, Benne' xabáa, le'e xaga béguaj. <sup>9</sup>Naca na ca da naxúaj na lu dizra' lá'azxa, dxenna na: Dios ba nucueze' chee benne' ca' zaj nazrí'ine' Le' da ca' quebe nu ne le'e, ne quebe nu ne xen, ne da quebe nu ne cu'u lazre'.

<sup>10</sup>Da caní zaj naca na da ble'e Dios dxi'u ne chee Be' Lá'azxa nasel-la Le', lawe' da dxelé'e Be' Lá'azxa xúgute' da de, ne duté da xu'u na lu xichaj lázrdau Diósqueze.

<sup>11</sup>Ládujla bénneache, ¿nu seque' neze da xu'u lu xichaj lázrdau xetu benne', san tuze be' da nacaqueze'? Cá'anqueze, tuze Be' Lá'azxa chee Dios nézene' da xu'u lu xichaj lázrdau Dios. <sup>12</sup>Be' Lá'azxa da xú'udxu quebe naca na chee xezr la xu nigá. Nazidxu Be' Lá'azxa da dxunna Dios dxi'u chee chéajni'idxu da ca' ba nunna Dios dxi'u. <sup>13</sup>Dxuchálajntu' ca naca da caní nen dizra' da bséde Be' Lá'azxa chee Dios netu', ne quegá nen dizra' da bsédentu' lu xel-la sina chee'ntu'. Ca' naca na, dxuzéajni'intu' benne' zaj nazi'e Be' Lá'azxa chee Dios da nusede Be' Lá'azxa nigá dxi'u.

<sup>14</sup>Nu benne' quebe nazi'e Be' Lá'azxa chee Dios quebe dxezí' lu ne'e da zaj naca na chee Be' Lá'azxa chee Dios, lawe' da dxéquene' zaj naca na tu da xálaze. Quebe dxezeque' chéajni'ine' na lawe' da zaj naca na da dxéajni'idxu tuze ne chee Be' Lá'azxa. <sup>15</sup>Bénnea' nazi'e Be' Lá'azxa chee Dios dxezéquene' chéajni'ine' xúgute' da dxulé'e Be' Lá'azxa le'. Benne' quebe zúale Be' Lá'azxa le', quebe séquene' chéajni'ine' da dxuséde Be' Lá'azxa dxi'u. <sup>16</sup>Naxúaj lu dizra' lá'azxa da dxenna na: ¿Nuzra ba guxéajni'i da xu'u xichaj lázrdau Xránadxu? ¿Nuzra benne' séquene' guzéajni'ine' Dios? Dxi'u nazidxu ca da xu'u xichaj lázrdau Cristo.

## 3

*Benne' dxelune' tu zren Dios lu zrin chee'*

<sup>1</sup>Na'a, le'e, bi bícha'dau', quebe guca guchálajlena' le'e da dxuchálajlena' benne' ca' zúale Be' Lá'azxa chee Dios le', san bchálajlena' le'e ca dxuchálajlena' benne' ca' quebe zúale Be' Lá'azxa le', lawe' da ne nácale ca bidu ca' lu da naca chee Cristo. <sup>2</sup>Bsédeda' le'e da quebe zaj naca na stebe da naca na ca da dxugágudxu bidu dxe'ene, bidu ne dxázrebe', ne quebe gaca gágube' xel-la wagu da naca na zibaj, lawe' da quebe ne séquene chéajni'ile da zaj naca na stebe. Cá'anqueze na'a quebe ne séquene chéajni'ile na <sup>3</sup>lawe' da ne nácale ca zaj naca benne' cun ca nalaje'. Dxácate' ne xu'ule xel-la zre lazre', ne dxutil-la ljwézrele dizra' ne nácale chupa la'a, ne nácale ca zaj naca benne' cun ca nálaje', ne dxunle cáteze dxelún xúgute' bénneache. <sup>4</sup>Dxácate' ne dxennale: Netu' da'ntu' Pablo, na' xezícale dxennale: Netu' da'ntu' Apolos, ne dxunle ca dxelún benne' cun ca nálaje'.

<sup>5</sup>Na'a, ¿nuzra na' Pablo? ¿Nuzra na' Apolos? Nácantu' wen zrin chee Dios, na' ne chee netu' guxéajle chee Xránadxu. Tu tuntu' bentu' zrin chee Xránadxu da blé'ene' netu'. <sup>6</sup>Neda' guza' binnedu ca' lu xichaj lázrdaule, bchálajlena' le'e xrtizra Dios, na' Apolos gudile' na, san Dios bsegule' na. <sup>7</sup>Ca' naca na, ne benne' dxaze', ne benne' dxilé' na, quebe bi zaque', san Dios

na' dxung' xúgute, lawe' da dxusegule' da du ca'. <sup>8</sup> Benne' dxelaze', ne benne' dxelile' zaj naque' lébete, san Dios quízruje' tu tu benne' caní ca naca zrin da belune'. <sup>9</sup> Nácantu' wen zrin tu zren nen Dios, na' le'e nácale ca tu xezr la xu naga dxun Dios zrin.

Cá'anqueze nácale ca tu xu'u da dxun Dios. <sup>10</sup> Neda' naca' ca tu wen xu'u blau, na' Dios benne' neda' lataj gulecha' lane na, na' benne' xula dxusegule' ze'e na'. Tu tu benne' dxal-la' guxúe xánnie' ca dxusegule' na'. <sup>11</sup> Québedxa nu seque' cueche' xetú lane ca da ba dxe', da na' naca na Jesucristoqueze, <sup>12</sup> san waca nu benne' gusegule' lawe' na da zaca na ca oro, ne plata, ne xiaj da zaj zaca, u waca gusegule' lawe' na da quebe zaca na ca blaga', ne xizre, ne luaj laga'. <sup>13</sup> Zrin da nun tu tu benne' gulé'eqeaze lawe' na lu zra guchi'a Dios, lawe' da lu zra na' la' tu xi', na' lu xi' na' gulé'e lawe' na ca naca zrin nun tu tudxu. <sup>14</sup> Che nu benne' nune' tu zrin da quebe chezxe na lu xi', na' wazi'e lazruj chee'. <sup>15</sup> Che chezxe zrin na', ca naca na nite na, san léqueze' walé', ca tu benne' dxexedxúaje' lu xi'.

<sup>16</sup> ¿Quebe nézele le'e nácale xudau' chee' Dios, na' Be' Lá'axxa chee' Dios zue' lu xichaj lázrdau'e? <sup>17</sup> Che nu benne' gucá'ana dítaje' xudau' nigá chee' Dios, Dios guzríá xi'e bénnea' lawe' da naca lá'axxa xudau' chee' Dios, na' lé'eqeazle nácale xudau' na'.

<sup>18</sup> Quebe si xé cuínale. Che núlale dxéquele nácale benne' sina lu da naca chee' xezr la xu nigá, dxal-la' xun cuínale ca tu benne' quebe bi dxaque', chee' gunna Dios le'e xel-la sina li. <sup>19</sup> Xel-la sina chee' xezr la xu nigá naca na tu da xálaze lau Dios. Naxúaj lu dizra' lá'axxa da dxenná na: Dios dxun zréajang' benne' sina ca' lu xel-la sina da zaj nápaqueze'. <sup>20</sup> Cá'anqueze dxenná na: Xránadxu nézene' quebe bi zaca da dxululaba lazre' benne' sina ca'. <sup>21</sup> Chee' le' na' quebe nu benne' dxal-la' gun szren cuing' lawe' da de'e tu benne', lawe' da Dios dxunne' le'e xúgute da ca' dxechínnele. <sup>22</sup> Pablo, ne Apolos, ne Pedro, ne xezr la xu nigá, ne xel-la nabán, ne xel-la gute, ne na'a zra, ne da za za', ne xúgute da ca' zaj naca na chee' gaca da chawe' chee', <sup>23</sup> na' lé'eqeazle xu'ule lu na' Cristo, na' Cristo xu'e lu na' Xradxu Dios.

## 4

### *Zrin dxelún benne' gubáz chee' Cristo*

<sup>1</sup> Ca' naca na, dxal-la' guéquele nácazentu' wen zrin chee' Cristo, ne nabágantu' gusédentu' bénneache da zaj nagache chee' Dios. <sup>2</sup> Na'a, benne' nabague' tu zrin, dxun na ba xen gaque' li lazre'. <sup>3</sup> Neda' quebe dxe'a gunne xue bi dxéquele naca' neda', u bi dxeleque bénneache naca'. Quebe gaca nnia' xrlátaje u quegá chee' da nuna' <sup>4</sup> lawe' da lácala quebe dxagu na zria neda' lázrdawa', da nigá quebe dxulé'e na quebe nabaga' zria. Xránadxu naque' Benne' dxuchi'e ca da dxuna'. <sup>5</sup> Ca' naca na, quebe guchi'ale chee' da ca' che quebe ne zrin zra. Le cueza zra xelá' Xránadxu, na' xebéaje' lu xel-la naxaní' ca naca da nagache lu da chulla. Xránadxu gulé'ene' ca naca da dxulaba lázredxu, na' Dios gulé'ene' chawe' tu tudxu ca da dxal-la' sidxu.

<sup>6</sup> Le'e, bi bicha', dxuchálajlena' le'e da caní chee' gaca chawe' chee', dxuzúa' ca tu da gulé'e na le'e Apolos, ne néda'queza'. Dxennia' da nigá chee' gusédele ne chee' netu' chee' quebe gundxale ca da dxue lataj dizra' lá'axxa le'e, ne chee' quebe gucá'ana szren cuínale, ne chee' quebe guzúale chalá'ala le sa' ljwézrele. <sup>7</sup> ¿Nuzra nun lue' blaudxa ca xezícadxa benne'? ¿Bizra napu' da quebe nunna Dios lue'? Che Le' benne' chiu' da na', ¿bizr chee' na' dxucá'ana szren cuínu', dxéquenu' lué'queze gudilju' da na'?

<sup>8</sup> ¿Nácale le'e benne' gunní'a? ¿Nápale xúgute da dxechínele? ¿Dxequele nácale wenná bea lácala quebe nácantu' netu' wenná bea? Xrlátaje dxgua la nácaquezle wenná bea chee' guntu' netu' le'e tu zren lu xel-la dxenná bea chee'. <sup>9</sup> Dxéqueda' Dios nuzúe' netu', benne' gubáz chee', lu lataj bzebe. Nácantu' ca benne' ba zaj nabía xi' chee' gátentu'. Nácantu' ca tu da dxuzé na lau bénneache, na' dxelenná' gubáz chee' xabáa ca', ne bénneache netu'. <sup>10</sup> Dxeleque bénneache nácantu' netu' tu da xálaze lawe' da dxuntu' zrin chee' Cristo, san le'e dxéquele dxéajni'i xánnele da zaj naca chee' Cristo. Dxeleque bénneache nate ní'a na'ntu' netu' san le'e dxéquele nácale le'e benne' wal-la. Dxuluzúa' bénneache netu' chalá'ala, san dxelape' le'e ba lá'ana. <sup>11</sup> Ga bzrinté lu zra na'a zra dxeduntu', ne dxebilentu', ne nácantu' gala xídeze, na' bénneache dxulucháchalene' netu', ne quebe zua lízrentu'. <sup>12</sup> Dxexedú lázrentu' dxuntu' zrin. Dxelenné' schanni' cheentu', san netu' dxexechéentu' dizra' chawe'. Zaj nau zi' xuzre' netu' san dxuchaga launtu' na. <sup>13</sup> Dxelenné' schanni' cheentu', san netu' dxuchálajentu' le' da li duté xel-la zren lazre' cheentu'. Dxeluné' netu' ca tu xizre bebe, ne ca tu da ba guca dítaje chee' bénneache ca lu zra na'a zra.

<sup>14</sup> Quegá dxuzúaja' cheele da nigá chee' xedué'ele, san chee' guzéajni'ida' le'e, nácale ca bi chia' nazri'ite lazra'. <sup>15</sup> Lácala zaj zúale le'e gaxúa gaxúane benne' dxulusédené' le'e ca naca chee' Cristo, quebe nu zua xetú xrale. Néda'queza' naca' xrale lu xel-la dxeajlí lazre' chee'le Cristo lawe' da bzenda' le'e dizra' chawe' chee' Jesucristo. <sup>16</sup> Ca' naca na, dxata' xúeda' le'e gunle ca dxuna' neda'.

<sup>17</sup> Chee le na' dxusel-la' Timoteo xedajná'abe' le'e, nácabé' ca bi li lazre' chia' nazri'ite lazra', lu da naca chee Xránadxu. Lebe' gusá'abe' lázrele ca dxuna' lu da naca chee Cristo, ne ca naca da dxusédéda' bènneache gáteteze na', ne lau xúgute cue' bi chee Cristo. <sup>18</sup> Bál-lale le'e ba núcá'ana szren cuínale lawe' da dxéquele quebe xida' xedajnnaba' le'e, <sup>19</sup> san dxebeza lazra' xídazequeza' xedajnná'a le'e che gunna Xránadxu lataj. Nadxa le'eda' da dxelezeque' xelún benne' ca' dxulucá'ana szren cuine', ne quegá tuze da dxelenné'. <sup>20</sup> Che dxenná be'e Dios dxi'u quebe naca na chee tu da dxuchálajzedxu. Lécage' ba nunne' dxi'u xel-la waca chee'. <sup>21</sup> ¿Bizra dxaca lázrele le'e? ¿Dxaca lázrele gun na ba xen gudéa' le'e xel-la zi', u che xida' xedajnná'a le'e lu xel-la zri'i lazre', ne xel-la dxexrui lazre'?

## 5

### *Pablo dxuchi'e chee tu da sban*

<sup>1</sup> Ba benda' zua tu benne' ládujla le'e nuné' ca zru'ule' xrna zie'. Da nigá naca na tu da sbánle'e da quebe ne xelún benne' quebe zaj núnbe'enge' Dios. <sup>2</sup> Ca naca da na' le'e ne dxucá'ana szren cuínale. Dخال-la' cuezre xáchele. Bénnea' nuné' da nigá dxal-la' xebéajle le' ládujla le'e. <sup>3</sup> Quebe zua' neda' naga zúale lu bēla' dxen chia', san naca cáteze zúalena' le'e lu be' nácaqueza', na' ba bchi'a chee bēnnea' nuné' dul-la nigá ca tu benne' zúaletequeze le'e. <sup>4</sup> Le zraga le'e lu La Xránadxu Jesucristo, na' gaca na cáteze neda' súalena' le'e lu be' nácaqueza', na' xel-la waca chee Xránadxu Jesús suale' na le'e. <sup>5</sup> Nadxa dxal-la' xudele bēnnea' lu na' Satanás da xriwe', na' lálcala cuía xi' bēla' dxen chee' na' be' nácaqueze' la na lu zra xelá' Xránadxu Jesús.

<sup>6</sup> Quebe dxal-la' gucá'ana szren cuínale ca naca da dxunle. ¿Quebe núnbeale dizra' na' dxenná na: Láteze na zichaj dxuchazra na ca naca cua na'? <sup>7</sup> Le xebéaj chálá'ala cua zichaj gula na' da dxuxrinnaj na le'e, chee gácale ca tu xeta xtila da dxágudxu Laní Pascua, da dxundxu nen cua cube da quebe nachixre na cua zichaj, ca da li nácale le'e. Crístoqueze gutié' waláz cheedxu. Naque' cheedxu zri-la, be dxelutie' laní pascua. <sup>8</sup> Ca' naca na, dxal-la' gupá'adxu Laní Pascua cheedxu lu da naca du lazre', ne lu da li, da ca' zaj naca na ca xeta xtila da quebe nachixre na cua zichaj. Quebe gupá'adxu na lu da calela, ne lu da zrinnaj, da ca' zaj naca na ca cua zichaj gula na'.

<sup>9</sup> Lu da bzuaaja' cheele nédxudxa gucha' le'e quebe guchixre cheele nen benne' ca' dxeluné' da sban. <sup>10</sup> Quebe gucha' le'e xecuásatequezele chee benne' zaj zre'e xezr la xu nigá, benne' dxeluné' da sban, ne benne' wecude' ca', ne benne' gubán ca', ne benne' dxelúe lá'angé' bedáu' xiaj xaga ca', lawe' da chee quebe guchixre cheele nen benne' caní, dxun na ba xen xedxúajle xezr la xu nigá. <sup>11</sup> Da guca lazra' xapa' le'e naca na chee quebe guchixre cheele nen netú benne' dxenné' naque' bíchedxu, san dxuné' tu da sban, u naque' benne' wecude', u dxue lá'angé' bedáu' xiaj xaga, u dxutupe' dizra' bizruj, u dxi'aje', u naque' gubán. Quebe dxal-la' gágulele benne' caní. <sup>12-13</sup> Quegá naca chia' guchi'a chee benne' dxeledá cúzrela. Dios guchi'e chee benne' ca'. Le'e dxal-la' guchi'ale chee benne' zaj naque' bi bíchedxu. Chee le na' le xebéaj benne' dul-la na' ládujla le'e.

## 6

### *Zria da dxelagu ljwezre bi ca' chee Cristo*

<sup>1</sup> Gate tule le'e zua da dxaca cheele nen xetule le'e, ¿bizr chee na' dxeajle lau benne' dxuchi'e da dxaca, na' quebe dxéajle'e chee Cristo, ne quebe dxeajle lau bi bíchele? <sup>2</sup> ¿Quebe nézele le'e, benne' zaj naca bi chee Dios xuluchi'e ca da dxelún bēnneache chee xezr la xu nigá? Che le'e guchi'ale chee bēnneache lu xezr la xu nigá, ¿quebe naca cheele guchi'ale chee tu da dauze? <sup>3</sup> ¿Quebe nézele le'e guchi'adxu chee gubáz chee xabáa ca'? Cá'anqueze dxal-la' guchi'adxu da naca chee xezr la xu nigá. <sup>4</sup> Che le'e zua da dxaca cheele lu xezr la xu nigá, ¿bizr chee na' dxeajle lau benne' ca' quebe nu zaj naque' ládujla bi bíchedxu ca' chee xuluchi'e chee da na'? <sup>5</sup> Da nigá dxapa' le'e chee gapa stu'le. ¿Quebe nu chilá' ládujla le'e nu bíchedxu, benne' naxéajni'ingé' chee guchi'e tu da dxaca chee bi bíchedxu ca'? <sup>6</sup> ¿Dxun na ba xen tu bi bíchedxu cheajtágube' zria da dxaca cheebe' nen benne' ljwézrebe' lau tu benne' dxuchi'e da dxaca, na' quebe naque' bi chee Dios?

<sup>7</sup> Che zua da dxedíl-lalele biche ljwézrele, naca na tu zria da ba nabágale. ¿Bizr chee na' quebe dxucá'anale na cá'aze? ¿Bizr chee na' quebe dxuele lataj nu benne' cuangé' cheele? <sup>8</sup> Le'e dxunle da quebe naca na xrlátaje, ne dxebanle, na' dxunle caní chee bi bíchele.

<sup>9-10</sup> ¿Quebe nézele le'e, quebe xelxú'u benne' wen da calela naga dxenná bea Dios? Quebe güele lataj nu si xé le'e. Quebe xelxú'u naga dxenná bea Dios benne' ca' dxeluné' da sban, ne benne' ca' dxelúe lá'angé' bedáu' xiaj xaga, ne benne' ca' dxelezúalengé' zru'ula benne' xula, ne benne' ca' dxeledálengé' ljwezre biue', ne benne' gubán ca', ne benne' wecude' ca', ne benne' ca' dxelélé'aje', ne benne' ca' dxulutupe' dizra' bizruj, ne benne' ca' dxulucache lané'.

<sup>11</sup> Caní gúcale bál-lale le'e, san na'a bache bexádxle lu xichaj lázrdaule, ne nuzúa cuínale lu na' Dios, na' nazi' lu ne'e le'e lu La Xránadxu Jesús ne chee Be' Lá'azxa chee Dios cheedxu.

*Naca lá'azxa bela' dxen cheedxu*

<sup>12</sup> Da li naca da dxelenné': Nápadxu lataj gundxu da dxaca lazre' tu tudxu. Quegá xúgute na naca na da ba neza. Awe', napa tu benne' lataj guné' da dxaca lazre', san quebe dxal-la' gu'e lataj bi da nna be'e na le'. <sup>13</sup> Naca da li da dxelenné': Xela wagu naca na chee le'edxu, na' le'edxu naca na chee xel-la wagu, san Dios gusexuzre' dxúpaté na. Quebe naca bela' dxen cheedxu chee gun na da sban. Bela' dxen cheedxu naca na da gunézrujdxu chee Xránadxu, na' Xránadxu naque' Bénnea' guchínene' bela' dxen cheedxu lu da xrlátaje. <sup>14</sup> Ca ben Dios bsebang' Xránadxu ládujla benne' gate ca', cá'anqueze gusebang' dxi'u nen xel-la waca chee'.

<sup>15</sup> ¿Quebe nézele le'e bela' dxen chee naca na chee Cristo? ¿Wacá'a tu da naca na bela' dxen chee Cristo, ne guchaga' na nen bela' dxen chee tu nu'ula wen da sban? ¿Cabata'! <sup>16</sup> ¿Quebe nézele le'e gate tu benne' biu dxuchague' tu nu'ula wen da sban dxúpaté' zaj naque' ca tuze bela' dxen? Naxúaj lu dizra' lá'azxa da dxenná na: Dxúpaté' xelexaque' tuze bela' dxen. <sup>17</sup> Gate tu benne' dxuchague' Xránadxu, dxelexaque' tuze be'.

<sup>18</sup> Le guzrunnaj chee da sban. Zaj nita dul-la xula da dxun benne' da quebe dxulucá'ana ditaj na bela' dxen chee', san benne' dxuchague' nu'ula quebe naca zru'ule' dxuné' dul-la lu bela' dxen cheequeze'. <sup>19</sup> ¿Quebe nézele le'e naca bela' dxen chee xudau' chee Be' Lá'azxa, Bénnea' nunna Dios le'e, na' Be' Lá'azxa zue' xichaj lázrdaule? Quebe nácale xrana bela' dxen chee, <sup>20</sup> lawe' da guzi' Dios le' na nen tu lazruj zrente. Chee le' na', dxal-la' gápale ba lá'ana Dios nen bela' dxen chee, ne nen be' nácaqueze, lawe' da dxúpaté na' zaj naca na chee Dios.

## 7

*Ca naca chee xel-la dxuchaga na'*

<sup>1</sup> Na'a xecheba' ca zaj naca da bchébele neda'. Da li naca xrlátaje quebe guchaga na' tu benne'. <sup>2</sup> Lawe' da dxácale'e da sban naga zúale, tu tu benne' biu dxal-la' súalene' nu'ula cheequeze', na' tu tu nu'ula dxal-la' súalene' benne' biu cheequeze'. <sup>3</sup> Benne' biu dxal-la' guné' nen zru'ule' da nabague' chee zru'ule', na' cá'anqueze nu'ula dxal-la' guné' nen benne' biu chee' da nabague' chee benne' chee'. <sup>4</sup> Nu'ula na' quebe naque' xrana bela' dxen chee', san naca na chee benne' biu chee'. Cá'anqueze benne' biu quebe naque' xrana bela' dxen chee', san naca na chee zru'ule'. <sup>5</sup> Quebe dxal-la' xeledábaga ljwezre', san tuze gate xelezúe' xel-la wezría tu chí'idauze chee xuluzúa cuine' lau Dios chee xuluchálajlene' Le'. Te na' dxal-la' xuluchaga ljwezre' chee quebe seque' Satanás nna be'e na le' che quebe xelezéquene' xelenná be'e cuine'.

<sup>6</sup> Da nigá dxapa' le'e naca na tu da dxue le'e lataj. Quebe naca na tu da nadxixruj bea na. <sup>7</sup> Neda' dxezá lazra' súale xúgutele ca zua' neda', san Dios ba nunne' tu tudxu da gaca gundxu. Tu da nunne' tudxu, na' da xula xetudxu.

<sup>8</sup> Dxapa' benne' wegú', ne nu'ula wezebe, naca xrlátaje xelexegá'ane' cá'aze ca zua' neda'. <sup>9</sup> Che quebe xelezéquene' xelenná be'e cuine', waca xuluchaga ne'e, lawe' da nácadxa xrlátaje xuluchaga ne'e quézcala xeledé' ba xa' lu bela' dxen chee'.

<sup>10</sup> Benne' zaj nuchaga ne'e dxapa' nu'ula quebe gusané' benne' biu chee'. Quebe naca cheeza' da nadxixruj bea nigá, san naca na da dxun Xránadxu. <sup>11</sup> Che nu nu'ula gusané' benne' biu chee', dxal-la' xegá'ane' cá'aze, u xexaque' tuze nen benne' biu chee' na'. Cá'anqueze benne' biu quebe dxal-la' gusané' zru'ule'.

<sup>12</sup> Dxapa' xeziacadxa benne' néda'queza', quegá Xránadxu, che zru'ula tu bi bíchedxu quebe dxéajle'e chee Xránadxu, dxéquene' xrlátaje zúalene' benne' chee', bi bíchedxu na' quebe dxal-la' gusané' le'. <sup>13</sup> Che benne' biu chee tu nu'ula zandxu quebe dxéajle'e chee Xránadxu, san dxéquene' xrlátaje zúalene' zru'ule', nu'ula zandxu na' quebe dxal-la' gusané' benne' biu chee' na'. <sup>14</sup> Benne' biu na' quebe dxéajle'e chee Xránadxu naque' ca tu bi chee Dios lawe' da nuchague' zru'ule' dxéajle'e chee Xránadxu, na' nu'ula na' quebe dxéajle'e chee Xránadxu naque' ca tu bi chee Dios lawe' da nuchague' benne' biu chee' dxéajle'e chee Xránadxu. La quebe naca na caní, zrí'inele le'e xelácabe' ca zrí'ine benne' quebe zaj naque' chee Dios, san da li zaj nácabé' ca bi chee Dios. <sup>15</sup> Che benne' biu na' u zru'ule', benne' quebe dxéajle'e chee Xránadxu, dxaca lázrtequeze' gusané' ljwezre', waca na. Che caní dxaca chee tu bi bíchedxu u chee tu bi zandxu, nape' lataj lawe' da gunné Dios dxi'u chee cueza zri lázredxu. <sup>16</sup> Che quebe gaca caní, quebe nézenu' lue', nu'ula, che wazéquenu' cu'u benne' biu chiu' lu na' Cristo, na' lue', benne' biu, quebe nézenu' che wazéquenu' cu'u zru'ulu' lu na' Cristo.

<sup>17</sup> Ájateze naca, tu tudxu dxal-la' gundxu ca naca da nunna Xránadxu dxi'u, ne xegá'anaxu cáteze nácadxu gate gunné Dios dxi'u. Caní dxapa' xúgute cue' bi chee Cristo. <sup>18</sup> Che Dios dxenné' tu benne' biu nadxugu lu bela' chee' da dxulé'e na naque' bi chee Dios, benne' nigá dxal-la' xegá'ane' ca', na' che dxenné Dios tu benne' quebe nadxugu lu bela' chee' da na',



quebe dxal-la' chugu lu beĵa' chee' da na'. <sup>19</sup> Quebe bi naca che nadxugu da na' lu beĵa' cheeđxu, u quebe. Da dxun na ba xen naca gundxu da dxaca lazre' Dios. <sup>20</sup> Tu tudxu dxal-la' xegá<sup>1</sup>anadxu cáteze nácadxu gate Dios dxenné' dxi'u chee' gácadxu bi chee'. <sup>21</sup> Che gucu' benne' nada'u gate Dios gunné' lue', quebe cue'u gunne xue, san che gapu' lataj gacu' benne' quebe nada'u, dxal-la' guchínenu' na. <sup>22</sup> Bénnea' guque' benne' nada'u gate gunné' Xránadxu le' naque' ca benne' quebe nada'u chee' guné' zrin chee' Xránadxu, na' cá'aqueze bénnea' quebe naque' benne' nada'u gate gunné' Xránadxu le', naque' ca benne' nada'u chee' Xránadxu. <sup>23</sup> Dios ba ná'awe' le'e nen tu lazruj zrente. Quebe güele lataj nu benne' guné' le'e benne' zaj nada'u. <sup>24</sup> Ca' naca na, bi bicha', tu tudxu dxal-la' xegá<sup>1</sup>anadxu lau Dios cáteze nácadxu gate gunné' dxi'u.

<sup>25</sup> Ca naca chee' benne' ca' quebe zaj nuchaga ne'e quebe bi gunná' be'e Xránadxu neda', san dxapa' le'e ca da dxéqueda', na' waca guxrén lázrele neda' lawe' da bexache lazre' Xránadxu neda'. <sup>26</sup> Dxéqueda' neda' dxal-la' xegá<sup>1</sup>ana tu benne' biu cáteze naque' lawe' da zúadxu zra stébele'e. <sup>27</sup> Che nuchagu' che nu'ula quebe cuasu' le', na' che quebe nuchagu' nu'ula, quebe guchaga na'u. <sup>28</sup> Che guchaga na'u, quebe gunu' dul-la, na' che tu nú'uladau' guchaga na'abe', quebe gunbe' dul-la. Benne' ca' dxuluchaga ne'e welezúe' stebe lu zra caní, na' dxaca lazra' quebe sáale stebe caní.

<sup>29</sup> Bi bícha' dau', da nigá dxaca lazra' xapa' le'e. Xelátega ne de súadxu lu xezr la xu nigá. Ná'atela benne' zaj nuchaga ne'e dxal-la' guné' da naca chee' Cristo ca dxelún benne' quebe zaj nuchaga ne'e. <sup>30</sup> Benne' dxelebezre xache' dxal-la' xeluné' da naca chee' Cristo ca dxelún benne' quebe zaj naque' baxache'. Benne' zaj zra' laní dxal-la' xeluné' da naca chee' Cristo ca dxelún benne' quebe zaj zue' xel-la dxebe', na' benne' dxelá'awe' dxal-la' xeluné' da naca chee' Cristo ca dxelún benne' quebe zaj nape' da na' dxelá'awe'. <sup>31</sup> Benne' dxelezi'e ba neza lu xezr la xu nigá dxal-la' xeluné' da naca chee' Cristo ca dxelún benne' quebe dxelezi'e ba neza na, lawe' da ba dxexuzre lazre' xezr la xu nigá.

<sup>32</sup> Dxaca lazra' quebe bi cue'le gunne xue. Gate tu benne' biu nácabé' wegú' dxe'ebe' gunne xue da naca chee' Xránadxu chee' gunbe' da dxezaca ba lazre' Xránadxu. <sup>33</sup> Gate ba nuchaga ne'e, dxe'e gunne xue da naca chee' xezr la xu nigá chee' guné' da dxezaca ba lazre' zru'ule'. <sup>34</sup> Cá'aqueze dxaca chee' nu'ula zua benne' biu chee', ne nu'ula wegú'. Nu'ula wegú' dxe'ebe' gunne xue da naca chee' Xránadxu chee' chu'ube' lu na' Dios duté' beĵa' dxen chee'be', ne duté' be' chee'be', san nu'ula zua benne' biu chee' dxe'e' gunne xue da naca chee' xezr la xu nigá chee' guné' da xezaca ba lazre' benne' chee'.

<sup>35</sup> Dxapa' le'e da nigá chee' gaca chawe' chee'le, ne quebe chee' nna be'eda' le'e, san chee' gunle da xrlátaje, ne da li, chee' chu'ule du lázrele lu na' Xránadxu.

<sup>36</sup> Che nu benne' dxéquene' nácadxa xrlátaje guchaga na' zrí'ine' nu'ula lawe' da ba dxedé xel-la cuide' chee'be', ne naca da dxal-la' gunbe', dxal-la' guné' da dxéquene' naca xrlátaje. Waca guchaga na'abe'. Quebe naca na dul-la. <sup>37</sup> Che nu benne' quebe dxéquene' dxun na ba xen, ne che nape' lataj guné' da dxaca lazre', ne che ba nune' lu xichaj lázrdawe' xegá<sup>1</sup>ana zrí'ine' nu'ula wegú', dxuné' da xrlátaje. <sup>38</sup> Ca' naca na, benne' dxu'e' lataj guchaga na'abe' zrí'ine' nu'ula, dxuné' da xrlátaje, na' bénnea' quebe dxu'e' lataj dxuné' da nácadxa xrlátaje.

<sup>39</sup> Nu'ula zua benne' biu chee' nuchague' bénnea' ne chee' da nadixiruj bea na dxácaté' ne zue' nabangé', san che gate benne' chee', de' lataj nu'ula na' guchaga ne'e nen núteteze benne' biu, san dxun na ba xen dxéajle'e chee' Xránadxu. <sup>40</sup> Gácadxa chee' da ba neza che xegá'ane' cá'aze. Caní dxéqueda' neda', ne dxéqueda' dxun Be' Lá'azxa chee' Dios neda' tuze.

## 8

### *Xel-la wagu da zaj nuzúa bénneache lau bedáu' xiaj xaga*

<sup>1</sup> Na'a guchálaja' ca naca chee' xel-la wagu da zaj nuzúa bénneache lau bedáu' xiaj xaga. Da li xúguteđxu nápadxu xel-la dxéajni'i ca naca da nigá. Xel-la dxéajni'i dxun na dxi'u benne' dxulucá'ana szren cuina, san xel-la zri'i lazre' dxusegula na dxi'u lu xel-la dxéajli lazre' cheeđxu. <sup>2</sup> Che nu benne' dxéquene' nape' duté' xel-la dxéajni'i, quebe ne chéajni'ine' ca dxal-la' chéajni'ine'. <sup>3</sup> Che nu benne' nazrí'ine' Dios, Dios ba nazí' lu ne'e' bénnea'.

<sup>4</sup> Na'a, ca naca chee' xel-la wagu da zaj nuzúa bénneache lau bedáu' xiaj xaga, nezdxu quebe bi naca tu bedáu' xiaj xaga lu xezr la xu nigá, ne tuze Bénnea' naque' Dios. <sup>5</sup> Lácala zaj zra' xabáa, ne xezr la xu nigá da zante da dxeleque bénneache zaj naca na dios, ne chee' benne' caní zante dios zaj zra na, ne zante xrane' zaj zra na, <sup>6</sup> cheeđxu dxi'u che nácadxu chee' Cristo, tuze Bénnea' naque' Dios, Bénnea' naque' Xradxu. Xradxu Dios bene' xúgute da de, na' dxi'u zúadxu chee' guchínene' dxi'u. Cá'aqueze tuze Bénnea' naque' Xránadxu, Jesucristo. Ne chee' Le' guzrá' xúgute da de, na' zúadxu dxi'u ne chee' Le'.

<sup>7</sup> Quegá xúgute bi chee' Cristo zaj nézene' da nigá. Bal-la benne' caní gulú'u lawe' belúe' lá'ane' bedáu' xiaj xaga, na' gate dxelawe' xel-la wagu na', dxeléquene' naca na tu da naca na

chee bedáu, na' lawe' da quebe zaj zę chache' lu xichaj lázrdawe', dxeléquene' zaj nabague' zria ne chee da dxelawe'. <sup>8</sup> Da na' dxágudxu quebe dxucá'anadx na dxi' bi xrlátedu lau Dios, lawe' da quebe nácadxadxu xrlátaje che dxágudxu, ne quebe nácadxadxu caleja che quebe dxágudxu. <sup>9</sup> Le guxie xanne' cuínale ca naca lataj da nápane bi gágule chee quebe guzría xile tu benne' quebe zę chache' lu xel-la dxeajlí lazre' chee'. <sup>10</sup> Ca' naca na, che lue' nézenu' da nigá, na' che cue'u gagu' tu naga zra' bedáu' xiaj xaga, na' che tu bi bíchedxu benne' quebe zę chache' lu xel-la dxeajlí lazre' chee', lé'ene' lue' dxe'u dxagu' na', na' bi bíchedxu na' wexázrquezne' cue'e gawe' da na' zaj nuzúa bėnneache lau tu dios quebe bi naca. <sup>11</sup> Ca' naca na, lue', lawe' da napu' xel-la dxėajni'i, guzría xi'u tu bi bichu' quebe zę chache' lu xel-la dxeajlí lazre' chee', na' naque' benne' gute Cristo waláz chee'. <sup>12</sup> Ca' naca na, gate dxuzría xile bi bíchedxu quebe zaj zę chache' lu xel-la dxeajlí lazre' chee', dxunle dul-la da dxuzúa Cristoqueze chalá'ala. <sup>13</sup> Chee lę na', che guzría xi'a tu bi bicha' ne chee da dxawa', nácadx chawe' cabátadx gawa' belá' chee quebe guzría xi'a lę'.

## 9

### *Da naca chee tu benne' gubáz chee Cristo*

<sup>1</sup> Naca chia' naca' gubáz chee Cristo, ne napa' lataj bi guna' lawe' da ble'eda' Xránadxu Jesús, na' nácale le'e bi chee Cristo ne chee zrin be'na' chee'. <sup>2</sup> Che dxeleque xezicadx benne' quebe naca' gubáz chee Cristo, san dxun na ba xen guéquele le'e naca' gubáz chee' lawe' da dxunna bea da nácale chee Xránadxu da li naca' gubáz chee'.

<sup>3</sup> Da nigá naca na da dxapa' benne' ca' dxelezi tizre' neda': <sup>4</sup> Naca chia' si' lu na'a da xi'aj gawa' ne chee zrin da dxuna'. <sup>5</sup> Cá'anqueze naca chia' guchaga na'a tu nu'ula zandxu chee cheájlene' neda' ca dxelún xezicadx benne' gubáz chee Cristo, ne benne' bíchequeze Xránadxu, ne Pedro. <sup>6</sup> Dxéquele tuze Bernabé, ne neda' dxal-la' guntu' zrin chee gata' da xi'aj gáguntu' gate dxuzėnentu' bėnneache dízra' chawe'? <sup>7</sup> ¿Nuzra benne' gaque' benne' zeje' wedil-la che quebe nu quízruj lę'? ¿Nuzra benne' dxaze' lba uva che quebe gawe' na? ¿Nuzra benne' gusegule' zřila' che quebe xequé'e xicha zřaba'? <sup>8</sup> Quebe dxal-la' guéquele dxapa' le'e da nigá néda'queza', lawe' da caniqueze dxenná na lu da bdxixruj be'e Moisés. <sup>9</sup> Naxúaj lu da nadxixruj bea na da dxenná Dios: Quebe cu'ule xixruj dxu'a beze, be dxíchuba' zřua' xtila. Quebe gunná Dios da nigá lawe' da dxue lazre' chee beze cá'aze. <sup>10</sup> Gunné' na ne cheedxu dxi'u. Naxúaj da nadxixruj bea nigá chee gaca da ba neza cheedxu, lawe' da benne' dxugá'ane' beze, ne benne' dxine' dxal-la' xelebeza lazre' xelexezi'e ca naca da gunna lina da xelaze'. <sup>11</sup> Na'a, che netu' ba gúzantu' lu xichaj lázřdaule da naca na chee Be' Lá'azxa, ¿quebe dxal-la' si' lu na'ntu' látėdauze da naca chee lu xęzř lu xę nigá? <sup>12</sup> Che xezicadx benne' naca chee' xelezi' lu ne'e da naca chee, ¿gázřadxu netu'?

Quebe ne guchėnentu' da nigá naca na cheentu'. Bchaga launtu' xúgute chee quebe guzágantu' ca naca dízra' chawe' chee Cristo. <sup>13</sup> Ba nézele benne' dxelune' zrin chee xudau' dxelawe' chee da xu'u lu xudau' na', na' benne' dxelune' zrin chee lu cugu naga dxelutie' be xixre'du ca' lau Dios dxelawe' belá' chee beádu ca'. <sup>14</sup> Cá'anqueze ba nun Xránadxu chee benne' dxuluchalaje' dízra' chawe', xelezi'e ba neza zrin da dxelune'. <sup>15</sup> Cabata' guchėneda' netú da caní zaj naca na chia', ne quebe dxuzúaja' da nigá chee gúnnale neda' late'. Gaca lázřredxa' gatia' quézcala nu gucuasa da ba neza da napa'.

<sup>16</sup> Quebe dxal-la' gucá'ana szren cuina' lawe' da dxuzenda' bėnneache dízra' chawe' chee Cristo, lawe' da dxun na ba xen guna' na. Baxache' naca' che quebe guzenda' bėnneache dízra' chawe' nigá. <sup>17</sup> Chee lę na', che dxuna' na lawe' da naca na da dxaca lazra' guna', ba de lazruj chia'. Na'a, che dxuna' na xadíaze, naca na tu da nusebaga Dios neda'. <sup>18</sup> Ca' naca na, lazruj da dxezi'a naca na da ba neza napa' gate dxuzenda' bėnneache dízra' chawe' chee Cristo, ne quebe bi dxuchízruja' benne' ca'. Ca' naca na, quebe dxuchėneda' da naca na chia' lawe' da dxuna' zrin nigá.

<sup>19</sup> Lácala quebe naca' benne' nada'u chee nu benne', ba nun cuina' ca tu benne' nada'u chee xúgute bėnneache, chee séqueda' cu'a benne' zandxa lu na' Cristo. <sup>20</sup> Gate zua' ládujla benne' judío ca', dxun cuina' benne' judío chee cu'a lę' lu na' Cristo. Ca' naca na, ládujla benne' zaj xu'e lu na' da nadxixruj bea na dxun cuina' ca tu benne' xu'e lu na' da nadxixruj bea na, chee cu'a lę' lu na' Cristo lácala da li quebe xu'a lu na' da nadxixruj bea na. <sup>21</sup> Xetú na'a, chee séqueda' cu'a lu na' Cristo benne' ca' quebe zaj xu'e lu na' da bdxixruj be'e Moisés, dxun cuina' ca tu benne' quebe xu'e lu na' da nadxixruj bea na na', lácala da li xu'a lu na' da nadxixruj bea na chee Dios lawe' da xu'a lu na' da nadxixruj bea na chee Cristo. <sup>22</sup> Gate zua' ládujla benne' ca' quebe zaj zę chache' lu xel-la dxeajlí lazre' chee' dxun cuina' ca zaj naca benne' ca' chee séqueda' cu'a lę' lu na' Cristo. Ca' naca na, dxun cuina' ca naca tu tu benne' ca' chee ájatezla séqueda' cu'a bal-la benne' ca' lu na' Cristo. <sup>23</sup> Dxuna' xúgute da nigá ne chee dízra' chawe' chee Cristo chee gapa' tu da ba neza chee na.

<sup>24</sup> Ba nézquezle le'e tu lu da huitaj benne' zan dxesi'aca chégü'e na' tuze' dxezrué'eng' lataj blau. Le sa'aca chegu le'e chee zrué'ele da dxunna Cristo. <sup>25</sup> Xúgute benne' ca' dxulupá'a cuine' chee xelu'e da huitaj, dxuluzú'e' chalá'ala xúgute da dxun na caléla chee'. Benne' caní dxeluné' da caní chee xezezi' lu ne'e tu da guzié' xíchaje' da naca na laga' da québequeze si bea, san dxi'u dxundxu zrin chee zrué'edxu da zeajlí canna. <sup>26</sup> Neda' quebe dxez' chégu'a ájatezla, ne quebe dxedil-la' ca tu benne' dxu'e lu be'ze gate dxedil-le'. <sup>27</sup> Neda' dxudé'a' xel-la zi' belá' dxen chia', ne dxenná' be'eda' na, chee quebe gunitia' neda' da naca chia' lu zrin nigá, ca te na' ba bsédeda' benne' xula ca'.

## 10

*Da dxuzéajni'i na dxi'u ca naca chee bedáu' xiaj xaga ca'*

<sup>1</sup> Dxaca lazra' nézele, bi bícha'dau', ca guca chee xra xrtáudxu ca' xjácalené' Moisés. Dios guché'e xúgute benne' ca' ne chee beuj bza na', na' xúgute' guledé'e' ládujla nísadau' da nazí le na Xrna. <sup>2</sup> Ca' naca na, waca nradxu xúgute' beleedxú'e' nisa lu nísadau' na', ne gulaque' tuze nen Moisés gate guledálené' beuj bza na'. <sup>3</sup> Cá'anqueze xúgute' gulawe' tuze xel-la wagu da bnezruj Dios le', <sup>4</sup> ne gule'aj xúgute' tuze nisa da bnezruj Dios le', lawe' da gulé'aje' nisa na' bedxúaj na xiaj xre na'. Xiaj xre nigá dxulé'e na ca naca Crístoqueze, Bénnea' guxéajlené' benne' ca' le'e xixre' lawe' lataj na'. <sup>5</sup> Benne' zan benne' ca' quebe beluné' da bezaca ba lazre' Dios, na' chee le na' gulatié' le'e xixre' lawe' lataj.

<sup>6</sup> Xúgute da caní guca na chee guzéajni'i na dxi'u chee quebe sa lázredxu da caléla ca', ca belún benne' ca'. <sup>7</sup> Chee le na' quebe gucá'ana szrenle bedáu' xiaj xaga ca' ca belún bal-la benne' ca', ca naxúaj na lu dizra' lá'azxa, dxenná na: Bénneache gulebé'e, ne gule'aj gulawe' lau bedáu' xiaj xaga, na' belexase' chee buluxé'e. <sup>8</sup> Quebe dxal-la' gundxu da sban ca belún bal-la benne' ca', na' tu zraze gulate chupa gaxú'a chí dxua gaxue'. <sup>9</sup> Quebe dxal-la' guchínedxu xel-la zren lazre' chee Xránadxu chee gundxu da caléla ca belún bal-la benne' ca', na' gulatié', gate gulí'ina belá' le'. <sup>10</sup> Quebe nnele chee Dios ca gulenné bal-la benne' ca', na' gubáz chee xabá' chee xel-la gute bête' benne' ca'.

<sup>11</sup> Xúgute da caní gulezaca xra xrtáudxu, na' zaj naxúaj na lu dizra' lá'azxa chee guzéajni'i na dxi'u, zúadxu lu zra bzebe caní. <sup>12</sup> Ca' naca na, nu benne' dxéqueñe' ze chache' lu da naca chee Dios dxal-la' guxúe xanne' cuine' chee quebe cheajcházié'. <sup>13</sup> Da dxelún zr'éaje le'e naca na tuze ca da dxelún zr'éaje xúgute' Bénneache, na' waca guxrén lázrele Dios lawe' da quebe gu'e' lataj bi gun zr'éaje le'e da quebe séquele guchaga laule, na' gate gaca tu da gun zr'éaje na le'e, Dios gunne' le'e ájala gunle chee lale lu da na', chee séquele guchaga laule na.

<sup>14</sup> Chee le na', bi bícha' nazri'ite' lazra', québedxa gucá'ana szrenle bedáu' xiaj xaga ca'. <sup>15</sup> Dxuchálajlena' le'e ca dxuchálajlena' benne' dxel'éajni'ing', na' le'é'equze waca guchi'ale chee da dxapa' le'e. <sup>16</sup> Gate dxágadxu da dxucube na ca guca gate guce Xránadxu, dxápádxu ba lá'ana Dios. Gate dxi'ajdxu xrisa uva lá'azxa, da nigá dxulé'e na dxezidxu ba neza dxen chee Cristo da gularaj na le'e xaga béguaj. Xeta xtila na' da dxuzúzrujdxu dxulé'e na xezidxu ba neza belá' dxen chee Cristo da bdeé' waláz cheedxu le'e xaga béguaj. <sup>17</sup> Lálaca naxandxu, xúgutedxu dxágudxu tu xeta xtilaqueze da naca na tuze, da na' dxulé'e na nácadxu ca tuze belá' dxen chee Cristo.

<sup>18</sup> Le nna'xque ca zaj naca benne' Israel ca'. Benne' caní, benne' dxelawe' da dxuluzr'é le cugu chee Dios dxezezi'e ba neza lu cugu na'. <sup>19</sup> Quebe dxennía' naca tu bedáu' xiaj xaga tu da zaca, na' belá' da dxuluzrí'a Bénneache lau bedáu' xiaj xaga quebe zácadxa ca biteteze xetú belá'. <sup>20</sup> Dxennía' da dxuluzrí'a lau bedáu' xiaj xaga benne' ca' quebe zaj núnbe'e' Dios, dxuluzrí'e na lau be' xriwe' ca' ne quegá lau Dios, na' quebe dxaca lazra' gunle tuze be' xriwe' ca'. <sup>21</sup> Quebe gaca xí'ajle da na' dxulé'e na nácale Xránadxu tuze, ne xí'ajle da gulé'e na nácale tuze be' xriwe' ca', ne quebe gaca gágule da naca na chee Xránadxu, ne gágutele da naca na chee be' xriwe' ca'. <sup>22</sup> ¿Dxaca lázrele xewine lazre' Xránadxu lawe' da dxusandxu Le'? ¿Dxéquele le'e nácadxu benne' wáladxa ca Le'?

*Da naca cheedxu gundxu, ne ca naca xel-la zri'i lazre'*

<sup>23</sup> Da li naca da na' dxelenná Bénneache, dxelenné': Naca chia' guna' da dxaca lazra'. Quegá xúgute naca na da sidxu ba neza. Naca chee nu benne' guné' ca dxaca lazre' san quegá xúgute gusegula na le' lu xel-la dxeajlí lazre' chee'. <sup>24</sup> Dخال-la' gundxu da gaca chawe' chee benne' xula, ne quegá da gaca na chawe' cheézedxu.

<sup>25</sup> Le gagu le'e ca naca da dxeda'u lawe' xi'a, ne quebe naba xúzrele chee na chee quebe sua stébe xichaj lázrdaule, <sup>26</sup> lawe' da zaj naca chee Xránadxu xezr la xu nigá, ne xúgute da ca' zaj zra' lu xezr la xu.

<sup>27</sup> Che nu benne', benne' quebe dxéajle'e chee Xránadxu, dxenné' le'e gágule xeta, na' che dxaca lázrele chéajle, le gagu xúgute da guzrí'e laule, ne quebe naba xúzrele chee na chee quebe sua stébe xichaj lázrdaule. <sup>28</sup> Che nna nu benne' zúalé le'e, na' xe'e le'e: "Belá' nigá

bache guzríia na lau bedáu' xiaj xaga", quebe gágule na, chee quebe guzúale stebe bénnea' gunné' ca', ne chee quebe sua stebe xichaj lázrdau. <sup>29</sup> Dxennia' da nigá chee xichaj lázrdau benne' zúaleng' lue', ne quegá chee xichaj lázrdau' lué'queze.

Waca naba xuzre tu benne': "¿Bizr chee na' dxuchi'u da naca chia' lawe' da sua stebe xichaj lázrdau benne' xula? <sup>30</sup> Che dxapa' Dios: Xcalenu' chee da dxawa', ¿bizr chee na' xelezí tizre' neda' chee da dxawa'?" <sup>31</sup> Chee le na', che dxágule u dxí'ajle, u bíteteze da dxunle, le gun xúgutę chee gaca ba Dios. <sup>32</sup> Quebe bi gunle da guzúa na stebe benne' xula, quegá benne' judío ca', ne quegá benne' quebe zaj naque' judío, ne quegá nu benne' naque' bi chee Dios. <sup>33</sup> Neda' dxuna' ba xuzre guna' da xelezaca ba lazre' xúgutę bénneache ca naca xúgutę da dxuna'. Quebe dxuna' da gaca chawe' cheeza' san da gaca chawe' chee xezicadxa bénneache chee xeलेlé'.

## 11

<sup>1</sup> Le gun ca dxuna' neda', ca neda' dxúnqueza' ca ben Cristo.

*Da dxelún nu'ula naga zaj nazraga bi chee Cristo*

<sup>2</sup> Bi bicha', dxapa' le'e ba lá'ana lawe' da dxeajsá lázrequezle neda', ne dxunle ca naca da bzéajni'ida' le'e. <sup>3</sup> Na'a dxaca lazra' chéajni'ile naca Cristo xíchaję chee tu tu benne' biu, na' benne' biu naque' xíchaję chee zru'ulé', ca naca Dios, naque' xíchaję chee Cristo. <sup>4</sup> Che tu benne' biu gugácue' xíchaję' gate dxuchálajęne' Dios naga zaj nadupa bi chee Cristo, u gate dxuchálaję' waláz chee Dios, naca na tu xel-la stu' chee Bénnea' naque' xíchaję'. <sup>5</sup> Che tu nu'ula quebe gugácue' xíchaję' gate dxuchálajęne' Dios, u gate dxuchálaję' waláz chee Dios, naca na tu xel-la stu' chee, lawe' da dxun cuing' ca tu benne' biu. Lébezqueze naca na chugue' xíchaję'. <sup>6</sup> Che tu nu'ula quebe gugacu xíchaję', nácadxa xrlátaje chugue' tu chi'ize ca naca xicha xíchaję'. Na' che naca na tu xel-la stu' chee nu'ula che chugue' xíchaję', u che guzúe' zrígaze xíchaję' ca dxun tu benne' biu, dxal-la' gugacu xíchaję' naga zaj nazraga bi chee Cristo. <sup>7</sup> Benne' biu quebe dxal-la' gugacu xíchaję' lawe' da naque' lu'a le saca Dios, na' da naque' dxulé'e na ca naca xel-la szren chee Dios. Da naca nu'ula dxulé'e na ca naca xel-la szren chee benne' biu. <sup>8</sup> Gate ben Dios benne' biu, quebe bi guláję' le' lu' bęla' dxen chee nu'ula, san guláję' lu' bęla' dxen chee benne' biu da na' bexune' nu'ula na'. <sup>9</sup> Dios bęne' nu'ula na' chee nna be'e benne' biu le', ne quegá bęne' benne' biu chee nna be'e nu'ula le'. <sup>10</sup> Chee le na' nu'ula dxal-la' guzúe' xíchaję' tu da dxulé'e na zua nu' dxenna' be'e le' chee quebe gun zréajęne' gubáz chee xabáa ca' chee Dios. <sup>11</sup> Lu da nácadxu chee Cristo, benne' biu dxechinęe' nu'ula, ne cá'anqueze dxechin' nu'ula benne' biu. <sup>12</sup> Da li Dios guláję' nu'ula na' lu' bęla' dxen chee benne' biu, na' cá'anqueze benne' biu dxálaję' chee nu'ula, na' xúgutędxu zadxu lu na' Dios.

<sup>13</sup> Le nna'xque le'e che naca xrlátaje che tu nu'ula guchálajęne' Dios, ne quebe gugacu xíchaję'. <sup>14</sup> Da nácaquezdxu dxulé'e na dxi'u naca tu xel-la stu' che benne' biu se tunna xicha xíchaję', <sup>15</sup> na' naca tu da ba lá'ana chee nu'ula se na tunna, lawe' da nunna Dios le' xicha xíchaję' tunna chee gugacu na xíchaję'. <sup>16</sup> Na'a che nu benne' dxaca lazre' gutil-le' dizra' ca naca da nigá, dxal-la' nézene' quegá dxi'u ne quegá benne' zaj nazraga chee Cristo quebe núnbeadxu xetú da xula.

*Da dxelún benne', gate dxelawe' da naca chee Xránadxu*

<sup>17</sup> Ca naca chee da nigá quebe dxapa' le'e ba lá'ana lawe' da dxaca da calela chee gate nazrágale, ne quegá da chawe'. <sup>18</sup> Da nédxuteca, dxulé'e neda' gate dxezrágale chee güe lá'anale Dios nécale chupa la'a. Dxéqueda' naca da li da dxelenné'. <sup>19</sup> Dxál-la'queze gácale chupa la'a chee gulé'e lawe' nu benne' ládújla le'e da li naque' bi chee Cristo. <sup>20</sup> Chee le na' gate dxezrágale le'e chee gágule da naca chee Xránadxu, da li québedxa naca na chee Xránadxu. <sup>21</sup> Gate dxezrín zra dxágule, tu tule le'e dxebíia lau chee dxecá'ale xel-la wagu cha chee, na' bál-lale le'e dxegá'anale dxedunle, na' xezicadxale dxezúzele. <sup>22</sup> ¿Quebe bi de chee naga xi'aj gágule? Ca'an dxunle, dxuzúale chalá'ala bi ca' chee Dios, ne dxugu'ule xel-la stu' benne' ca' quebe bi de chee'. ¿Bízraqueze xapa' le'e? ¿Dxal-la' gapa' le'e ba lá'ana? ¡cabata'!

*Da dxágudxu da naca chee Xránadxu*

(Mt. 26.26-29; Mr. 14.22-25; Lc. 22.14-20)

<sup>23</sup> Xránaquezdxu bzéajni'ine' neda' da nigá bsédeda' le'e: Lu zre' ná'queze gate Judas bde'e' Xránadxu Jesús lu na' benne' guledábague' Le', na' Jesús guquę'e xeta xtila, <sup>24</sup> na' gudé guzre' Dios: Xcalenu', bzúzruje' na, na' gunné': "Le gagu. Xeta xtila nigá dxulé'e na ca gaca chee bęl-la' dxen chia' lu da na' saca zi'a waláz chee. Le gun da nigá chee cheajsá lázrele neda'." <sup>25</sup> Cá'anqueze, gudé gulawe', guquę'e xrisa uva, na' gunné': "Xrisa uva nigá dxulé'e na ca naca da dxuzé chacha na xel-la wezríia cube da naca na dxen chia'. Tu tu lasa xi'ajle na, le

gun na chee cheajsá lázrele neda'." <sup>26</sup> Ca' naca na, ca zrin zra xelá' Xránadxu, gulé'ele ca guca gate gute Xránadxu tu tu lasa gate gágule xeta xtila nigá, ne xi'ajle xrisa uva nigá.

*Ca dxal-la' gágudxu da naca chee Xránadxu*

<sup>27</sup> Ca' naca na, núteteze benne' gawe' xeta xtila nigá, u xi'aje' xrisa uva chee Xránadxu, ne quebe dxape' ba lá'ana na, na' dxune' dul-la da dxuzúa belá' dxen chee Xránadxu chalá'ala. <sup>28</sup> Chee le na' tu tudxu dxal-la' guxúe xánnedxu xichaj lázrdaudxu gate za gágudxu xeta xtila nigá, ne za xi'ajdxu xrisa uva nigá, <sup>29</sup> lawe' da che xi'aj gágudxu, ne quebe dxéqedxu dxulé'e na ca naca belá' dxen chee Xránadxu, na' da xi'aj gágudxu gun na bágadxu zria. <sup>30</sup> Chee le na' benne' zan ládujla le'e quebe chawe' zaj zue', ne zaj nate ni'a ne'e, na' bal-la benne' ládujla le'e ba gulate'. <sup>31</sup> Che guxúe xanne' cuínadxu, quebe gun na ba xen guchi'a Xránadxu cheedxu caní. <sup>32</sup> Gate Xránadxu dxuchi'e cheedxu, dxudé'e dxi'u xel-la zi' chee quebe cuía xidxu nen benne' zaj zre'e xezr la xu nigá.

<sup>33</sup> Ca' naca na, bi bicha'. Gate dxezragale chee gágule da naca chee Xránadxu, le cueza ljwézele tule xetule chee bi gágule. <sup>34</sup> Che núlale dxedunle, le gagu lu xu'u lízquezele, chee quebe gun na ba xen guzría xi' Dios le'e gate na' nazragale. Xezicadxá da ca' dxelaca cheele gucá'ana' chawe' gate xida' xedajnná'a le'e.

## 12

*Xel-la waca ca' da dxunna Be' Lá'azxa tu tudxu dxi'u*

<sup>1</sup> Bi bicha', zaj de da dxaca lazra' chéajni'ile ca naca chee xel-la waca ca' da dxunna Be' Lá'azxa tu tudxu dxi'u.

<sup>2</sup> Ba nézquezele gate na' quebe ne chéajlele chee Xránadxu, be'ele lataj gulezrube xue' le'e chee xeajé lá'anale bedáu' xiaj xaga ca', da quebe dxelenné na. <sup>3</sup> Chee le na' dxaca lazra' nézele che zua nu benne' nne': Nabía xi' Jesús, quebe dxuchálaje' ne chee Be' Lá'azxa chee Dios. Na' netú benne' gaca nne': Jesús naque' Xrana', che quebe dxuchálaje' ne chee Be' Lá'azxa.

<sup>4</sup> Zaj nazrá' xel-la waca ca' da gaca si' lu nnadxu, q san tuze naca Be' Lá'azxa, Bénnea' dxunne' dxi'u na.

<sup>5</sup> Zaj nazrá' ca gaca gundxu zrin, san tuze naca Xránadxu, Bénnea' dxundxu zrin chee'.

<sup>6</sup> Zaj nazrá' ca da gaca gundxu, san tuze naca Dios, Bénnea' dxunne' dxi'u xel-la waca gundxu na.

<sup>7</sup> Dios dxunne' cha cheedxu tu xel-la waca chee Be' Lá'azxa chee gaca da ba neza chee xúgutedxu.

<sup>8</sup> Ne chee Be' Lá'azxa dxunne' bal-la benne' xel-la waca xuluchálaje' duté xel-la sina, na' xebal-le' ne chee Be' ná'queze dxunne' le' xel-la waca xuluchálaje' duté xel-la naxéajni'i.

<sup>9</sup> Xebal-le' dxelezi'e xel-la dxeajlí lazre' ne chee Be' ná'queze, na' xebal-le' dxelezi'e xel-la waca chee xelexune' benne' we' ca'.

<sup>10</sup> Xebal-le' dxelezi'e xel-la waca xelune' xel-la waca ca' chee xabáa, na' xebal-le' dxelezi'e xel-la waca chee xuluchálaje' waláz chee Dios.

Xebal-le', Dios dxunne' le' xel-la waca xelenézené' nu be' dxuchalaj na lu dxu'a bénneache. Xebal-le' dxelezi'e xel-la waca xuluchálaje' dizra' nazrá', da quebe naca xrtízrqueze',

na' xebal-le' dxelezi'e xel-la waca xuluxuzájle'e dizra' nazrá' na'.

<sup>11</sup> Xúgute da caní dxun tuze Be' ná'queze, Bénnea' dxunne' cha cheedxu xel-la waca caní cáteze da dxaca lázrequeze'.

*Xúgutedxu nuchágadxu tuze belá' dxen*

<sup>12</sup> Zua cheedxu tu belá' dxen da napa na zánete cue'. Dxi'u, dxéajledxu chee Cristo, nácadxu ca tuze belá' dxen chee Cristo. <sup>13</sup> Xúgutedxu dxi'u, che nácadxu benne' judío, u benne' quebe nácadxu judío, ne che nácadxu benne' zaj nada'u, u benne' quebe zaj nada'u, gate gudxúadxu nisa da dxulé'e na nácadxu Cristo tuze, cá'anqueze bexácadxu ca tuze belá' dxen, da na' ben tuze Be' Lá'azxa, na' Diosqueze benne' dxi'u lataj sidxu tuze Be' ná'queze.

<sup>14</sup> Tu belá' dxen quebe naca na tu cue'ze, san naca na zane' cue'. <sup>15</sup> Che ní'adxu nna na: Quebe naca' na'u, ne chee le na' quebe naca' chee belá' dxen chiu', quegá da ni gun na québedxa naca na chee belá' dxen na'. <sup>16</sup> Na' che nágadxu nna na: Quebe naca' lau', ne chee le na' quebe naca' chee belá' dxen chiu', quegá da ni gun na québedxa naca na chee belá' dxen na'. <sup>17</sup> Che duté belá' dxen cheedxu naca na laudxu, ¿ájazra gundxu xendxu? Che duté belá' dxen cheedxu naca na nágadxu, ¿ájazra gundxu lé'edxu? <sup>18</sup> Dios nuzúe' cha chee cue' belá' dxen na' naga dxaca lazre' Le'. <sup>19</sup> Che duté na' naca na tuze cue', ¿gazra zúaqueze belá' dxen na'? <sup>20</sup> Ca naca na, lálaca naca na zane' cue', tuze belá' dxen naca na.

<sup>21</sup> Xia laudxu quebe dxal-la' xe na nadxu: Quebe nachinda' lue', ne quebe dxal-la' nna xichajdxu, xe na ní'adxu: Quebe nachinda' le'e. <sup>22</sup> Da naca na, da zaj naca chee belá' dxen

cheedxu da dxéquadxu quebe zaj nácateca na blau, zaj naca na da dxechínedxadxu, <sup>23</sup> Da zaj naca na chee belá' dxen cheedxu da quebe dxápadxu ba lá'ana zaj naca na da dxugacu xánnedxadxu. Da ca' dxéquadxadxu quebe dxal-la' gulé'edxu zaj naca na da dxucáchedxu, <sup>24</sup> da quebe dxun na ba xen gundxu chee da ca' gaca gulé'edxu. Ca' naca na, Dios bené' belá' dxen cheedxu chee gápadxadxu ba lá'ana da ca' dxéquadxu quebe nácateca na da gápadxu ba lá'ana, <sup>25</sup> chee quebe gaca chupa la'a belá' dxen cheedxu. Tu tu cue' chee belá' dxen cue' na gunne xue chee ljwezre na. <sup>26</sup> Che dxedé xel-la zi' tu da naca na chee belá' dxen cheedxu, xúgute da ca' dxeledé na xel-la zi', na' che tu da na' gaca da ba neza chee na, na' xúgute da ca' dxelebé na tu zren.

<sup>27</sup> Ca' naca na, le'e nácale belá' dxen chee Cristo, na' tu tule nácale ca tu tu cue' chee belá' dxen chee' na'. <sup>28</sup> Ca' naca na, Dios nunézruje' lataj blau chee bal-la benne' ládujla bi chee Cristo. Lu lataj blau nuzré'e benne' gubáz chee' ca', na' lu lataj gudxupe' nuzré'e benne' dxuluchálaje' waláz chee', na' lu lataj guxunne' nuzré'e benne' dxulusédené' bi chee' ca', na' gudé na' nuzré'e benne' dxelune' xel-la waca da za xabáa. Gudé na' nuzré'e benne' ca' dxelexuné' benne' we' ca', ne benne' ca' dxelácalené' bi chee' ca', ne benne' ca' dxelenná be'e, ne benne' ca' dxuluchálaje' dizra' nazrá' da quebe zaj nézene'. <sup>29</sup> ¿Zaj naca xúgute' benne' gubáz chee'? ¿Dxuluchalaj xúgute' waláz chee'? ¿Dxuluséde xúgute' bi chee' ca'? ¿Dxelún xúgute' xel-la waca chee xabáa? <sup>30</sup> ¿Dxelexún xúgute' benne' we' ca'? ¿Dxuluchalaj xúgute' dizra' nazrá' da quebe naca xrtizre'? ¿Dxuluxzájla'a xúgute' dizra' nazrá' na'? ¡Cabí! <sup>31</sup> Le gun ba xuzre si' lu na'le chee Dios xel-la waca ca' da nácadxa chawe'. Na'a gulé'eda' le'e tu da cháwedxa.

## 13

### *Xel-la zri'i lazre' li*

<sup>1</sup> Che dxuchálaja' dizra' chee benne', ne chee gubáz chee xabáa ca', san quebe napa' xel-la zri'i lazre' li, quebe nácadxa' ca tu xide da dxenné na, u ca tu xia da dxenné na. <sup>2</sup> Che dxuchálaja' waláz chee Dios, ne che nezda' xúgute da zaj nagache, ne dxéajni'ida' xúgute da dxelaca, ne napa' xel-la dxejlí lazre' chee séqueda' gucuasa' xi'a ca', san che quebe napa' xel-la zri'i lazre' li, quebe nu nácaqueza'. <sup>3</sup> Che quíusia' xúgute da de chia', ne che guzú'a' belá' dxen chia' chee chezxe na, san che quebe napa' xel-la zri'i lazre' li, quebe bi da ba neza naca na chia'.

<sup>4</sup> Bénnea' nape' xel-la zri'i lazre' li:

Naque' zren lazre'.

Naque' zri'i lazre', ne quebe naque' xa lazre'.

Quebe dxucá'ana szren cuine', ne quebe dxuzécu'e.

<sup>5</sup> Quebe dxuné' da caléa,

ne quebe naque' zre'e lazre'.

Quebe dxezre'e, ne quebe dxu'u lazre'.

<sup>6</sup> Quebe dxebene' gate nu benne' dxejcházie' lu dul-la,

san dxebene' lu da li.

<sup>7</sup> Dxuchaga lawe' xúgute da dxaca nen duté xel-la dxejlí lazre' chee',

ne duté xel-la dxebeza lazre' chee',

ne duté xel-la zren lazre' chee'.

<sup>8</sup> Xel-la zri'i lazre' li quebe te chee na. Wazrín zra gate québedxa chínedxu nu benne' guchálajléné' dxi'u waláz chee Dios, ne benne' dxéajni'ine' xúgute. <sup>9</sup> Na'a dxéajni'idxu látedauze, ne látedauze dxuchálajdxu waláz chee Dios. <sup>10</sup> Zrin zra gate na' chéajni'idxu dute ca naca, na' te chee da na' naca na látedauze.

<sup>11</sup> Gate ne naca' bidau' bchálaja' ca bidau', ne gulaba lazra' ca bidau', ne bchi'a ca bidau', san gate guca' benne' waca, bzua' chalá'ala da zaj naca chee bidau'. <sup>12</sup> Cá'anqueze na'a quebe dxelé'edxu cátequeze, ne da dxelé'edxu ze zrul-la, san lu zra na' lé'edxu cátequeze. Na'a látedauze núnbe'a, san lu zra na' gúnbe'a cátequeze ca dxun Dios, núnbe'tequeze' neda'. <sup>13</sup> Ca' naca na, xel-la dxejlí lazre', ne xel-la dxebeza lazre', ne xel-la zri'i lazre' li xelexúaqueze na chadía chacanna, san da blaudxa chee da caní naca na xel-la zri'i lazre' li.

## 14

### *Ca naca chee nu benne' dxuchálaje' dizra' nazrá' da quebe naca na xrtizre'*

<sup>1</sup> Le gun ba xuzre gápale xel-la zri'i lazre' li, ne cá'anqueze le naba Dios gunné' le'e xel-la waca ca' chee Be' Lá'azxa, ne da naca blaudxa, chee gaca guchálajle waláz chee Dios. <sup>2</sup> Bénnea' dxuchálaje' dizra' nazrá' da quebe naca na xrtizre' dxuchálajléné' Dios, quegá nen bénneache, lawe' da quegá nu dxéajni' da dxenné'. Dxuchálaje' ne chee Be' Lá'azxa da zaj nagache. <sup>3</sup> Bénnea' dxuchálaje' waláz chee Dios dxuchálajléné' bénneache chee gusegule' benne' ca' lu da naca chee Dios, ne chee ne xúnené'-be', ne chee xue zrene'-be'. <sup>4</sup> Bénnea'

dxuchálajê dizra' nazrá' na' dxusegula cuine', san bënnea' dxuchálajê waláz chee Dios dxusegule' bi ca' chee Cristo lu da naca chee Dios.

<sup>5</sup> Dxaca lazra' gapa xúgutele xel-la waca guchálajle dizra' nazrá', san dxaca lázredxa' gaca guchálajle waláz chee Dios, lawe' da nácadxa chawe' guchálajle waláz chee Dios quézcala guchálajle dizra' nazrá', che quebe zua nu benne' xuzájle'ê dizra' nazrá' na' chee xelegula bi chee Cristo lu da naca chee Dios. <sup>6</sup> Chee lè na', bi bícha'dau', che xida' xedajná'a le'e, ne guchálajlêna' le'e dizra' nazrá', çbizra da ba neza gaca na chee che quebe guchálajlêna' le'e tu da ba ble'e Dios neda', u tu da bzéajni'ine' neda', u tu da guchálajla' waláz chee Dios, u tu da guzéajni'ida' le'e?

<sup>7</sup> Nná'xqedxu ca da ca' dxelenné na da quebe zaj naca bane na ca bchiuj, ne bihuel-la. Che quebe gaca chéajni'idxu da dxelenné na, quebe gaca nezdxu ca da dxelul-la na. <sup>8</sup> Gate dxaca wedil-la, che quebe dxebezre luzu da dxulucuezre' cátequeze, quebe nu sê lu wedil-la. <sup>9</sup> Cá'anqueze dxaca chee le'e. Che quebe guchálajla' dizra' da dxéajni'ile, çájazra gaca nézele da dxenná'? Guchálajla' lu be'. <sup>10</sup> Da zantê dizra' nazrá' zaj de lu xezr la xu nigá, ne da li xúgute na zaj zéajé na. <sup>11</sup> Na'a che quebe dxéajni'ida' dizra' dxuchálajle tu benne' neda', gaca' ca tu benne' zitu' lau bënnea', na' le' gaque' ca tu benne' zitu' lawa' neda'. <sup>12</sup> Chee lè na', lawe' da dxaca lázrele si' lu na'le xel-la waca ca' da dxunna Be' Lá'azxa dxi'u, le gun ba xuzre si' lu na'le da ca' xulusegula na bi ca' chee Cristo lu da naca chee Dios.

<sup>13</sup> Ca' naca na, bënnea' dxuchálajê dizra' nazrá' dxal-la' naba lau Dios gunne' lè' xel-la waca xuzájle'ê dizra' nazrá' na'. <sup>14</sup> Che guchálajlêna' Dios tu dizra' nazrá'la, da li dxuchálajlêna' Lè' lu be' nácaqueza', san quebe bi da ba neza naca na chee xel-la dxéajni'ia' chia'. <sup>15</sup> ÇBizra da dxal-la' guna' xca'? Dخال-la' guchálajlêna' Dios lu be' nácaqueza', ne cá'anqueze nen xel-la dxéajni'ia' chia'. Dخال-la' gul-la' chee Dios lu be' nácaqueza', ne cá'anqueze nen xel-la dxéajni'ia' chia'. <sup>16</sup> Che dxue la'anuu' Dios tuze lu be' nácaquezu', na' benne' ljwezru' dxenne' chiu' quebe gaca gunê' tu zren lue' gate dxu'u Dios: Xcalenu', lawe' da quebe dxéajni'ine' da dxenná'. <sup>17</sup> Da dxuchálajlênu' Dios nácale' na chawe', san bënnea' dxenne' quebe dxegule' lu da naca chee Dios. <sup>18</sup> Dxapa' Dios: Xcalenê' lawe' da dxuchálajdxa' dizra' nazrá' ca xúgutele le'e, <sup>19</sup> san naga zaj nazraga bi chee Cristo dxaca lázredxa' guchálajla' gáxuze dizra' da dxéajni'ibe' chee gusédeda'-be', quézcala guchálajla' chi mila dizra' nazrá' da quebe gaca xeléajni'ibe'.

<sup>20</sup> Bi bícha'dau'. Quebe gulaba lázrele ca bidau'. Le gaca ca bidau' chee quebe gunle da calela, san le gaca benne' wal-la chee gulaba lázrele cháwe'dau'. <sup>21</sup> Naxúaj lu xiche lá'azxa chee da dxenná' bea Dios, da dxenná' na: Guchálajlêna' benne' xezr la xu nigá nen dizra' nazrá', ne lu dxu'a benne' zitu' ca', san ne caní quebe xelenne' chia'. Caní dxenná' Xránadxu. <sup>22</sup> Ca' naca na, xel-la waca chee guchálajdxu dizra' nazrá' naca na tu da dxulé'e na lau benne' quebe dxeléajle'ê chee Dios, ne quegá lau benne' dxeléajle'ê chee'. <sup>23</sup> Na'a, gate nazrágale, che xúgutele dxuchálajle dizra' nazrá', na' che xelexú'u benne' quebe zaj nazédenê', u benne' quebe dxeléajle'ê chee Dios, çquebe xelenné' zaj nadá xichaj lázrdau'le? <sup>24</sup> Na'a che dxuchalaj xúgutele waláz chee Dios, na' che chu'u tu benne' quebe dxéajle'ê chee Dios, u tu benne' quebe nazédenê', na' guéquenê' nabague' dul-la, na' léqueze' guchi'a cuine' gate xenne' da dxennale xúgutele. <sup>25</sup> Ca' gaca na, da zaj nagache xichaj lázrdawê' xululé'e lau na, na' guzúa zribe', ne güe lá'anê' Dios, na' nne' da li zúale Dios le'e.

<sup>26</sup> Ca' naca na, bi bícha'dau', gate dxezrágale, bál-lale le'e nápale salmo ca', ne xebál-lale nápale da gusédele ljwézrele, ne xebál-lale nápale tu da ble'e Dios le'e, ne xebál-lale nápale tu dizra' nazrá' da guchálajle, ne xebál-lale nápale xel-la waca xuzájla'ale dizra' nazrá' na'. Cháwe'dau' naca na, san xúgute da ca' dxal-la' xulusegula na bi ca' chee Cristo lu da naca chee Dios. <sup>27</sup> Gate guchálajle dizra' nazrá', waca xuluchalaj chupa benne', u chunna benne', ne tuwéaj tuwéajle, na' tu benne' dxal-la' xuzájle'ê da dxennale. <sup>28</sup> Na'a che quebe nu chilá' benne' xuzájle'ê dizra' nazrá' na', gácadxa chawe' quebe bi da nne' naga nazrágale. Tu tule dxal-la' naxale lé'eqeuzle, ne nen Dios. <sup>29</sup> Cá'anqueze benne' dxuluchálajê waláz chee Dios waca xelenné' chupa chúnnaze', na' xezícadxale dxal-la' guchi'ale da na' dxenné'. <sup>30</sup> Che dxulé'e Dios xetú benne' dxe'ê na' tu dizra', na' bënnea' dxuchálajê dxal-la' gusane' ca da dxuchálajê'. <sup>31</sup> Xúgutele le'e waca guchálajle waláz chee Dios tuwéaj tuwéajle chee chéajni'ia' xúgutele, ne síle da gun chacha na le'e. <sup>32</sup> Benne' ca' dxuluchálajê waláz chee Dios dxun na ba xen nna bé'eng' be' nácaqueze', <sup>33</sup> lawe' da naca Dios Bënnea' dxunne' dxi'u xel-la dxebeza zri lazre', ne quebe dxun zrêajene' bënneache.

Ca zaj xu'u lau xúgute cue' bi bíchedxu, bi chee Dios, <sup>34</sup> dxal-la' xelexú'a zrize nu'ula ca' naga nazrágale, lawe' da quebe naca chee' xuluchálajê'. Dخال-la' xuluzú'ê dizra' ca naxúaj na lu da nadxixruj bea Dios. <sup>35</sup> Che dxelaca lazre' bi xeléajni'ine', dxal-la' xuluchêbe' benne' cha chee' lizre tu tue' lawe' da quebe dxulé'e na chawe' tu nu'ula guchálajê' naga nazrágale.

<sup>36</sup> Dخال-la' gueque be'ele quebe guzú lau xrtizra Dios sua na ládujla le'e, ne quegá le'eze nazi' lu na'le na. <sup>37</sup> Che nu benne' dxéquenê' naque' benne' dxuchálajê' waláz chee Dios, u

zúale Be' Lá'azxa le', dxal-la' gueque bé'ene' da nigá dxuzúaja' chee'le naca na tu da gunná be'e Xránadxu. <sup>38</sup> Che quebe dxaca lazre' gueque bé'ene' da nigá, quebe dxal-la' si' lu na'le bënnea'.

<sup>39</sup> Ca' naca na, bi bicha'dau', le gun ba xuzre guchálajle waláz chee Dios, ne quebe guzágale bënnea' dxuchálaje' dizra' nazrá'la. <sup>40</sup> Xúgute da caní dxal-la' gunle duté ba lá'ana, ne ca dxal-la' gaca na.

## 15

### *Ca bebán Cristo ládujla benne' gate*

<sup>1</sup> Na'a, bi bicha'dau', dxuzenda' le'e dizra' chawe' da ba bzenda' le'e, da na' guzí' lu na'le, ne da da'le le'e. <sup>2</sup> Ne chee dizra' chawe' nigá nalale che dxéajle'le chee da bzenda' le'e, ne che quebe guca dácheze xel-la dxeajlí lazre' chee'le.

<sup>3</sup> Da naca blaudxa, bzéajni'ida' le'e da guzí' lu na'a, gute Cristo ne chee dul-la da nabágadxu ca naxúaj na lu dizra' lá'azxa, <sup>4</sup> na' bulucache' Le', na' bebane' zra guxunne' zra ca naxúajqueze na lu dizra' lá'azxa, <sup>5</sup> na' ble'e lawe' lau Pedro, na' gudé na' ble'e lawe' lau benne' gubáz chee' ca'. <sup>6</sup> Gudé na' ble'e lawe' lau bi bíchexu zaj nácadxe' ca gazxu' gaxúa benne' zaj nazrague' tu zren, na' benne' zan, benne' ca' ne zaj naca bane', láqueze benne' zan, benne' ca' ba gulatié'. <sup>7</sup> Gudé na' ble'e lawe' lau Jacobo, na' gudé na' ble'e lawe' lau xúgute benne' gubáz chee' ca'.

<sup>8</sup> Bzébedxa, ca gudé chee xúgute da na', ble'e lawe' lawa' neda', lácala neda' naca' ca tu bidau', bi gúlajbe' ba gudé beu' cheebe'. <sup>9</sup> Neda' naca' benne' bzébedxa chee xúgute benne' gubáz chee Cristo, ne quebe naca chia' si' la' gubáz chee Cristo lawe' da gudáu zi' xuzra' bi ca' chee Dios. <sup>10</sup> Naca' da naca' lawe' da guca Dios zri'i lazre' nen neda', na' quebe guca dácheze xel-la zri'i lazre' chee' nen neda', lawe' da ba nundxa' zrin ca xúgute benne' gubáz ca', láqueze quegá neda' nuna' na, san Dios bchínene' neda'. <sup>11</sup> Quebe zácadxa na che naca neda', u che naca benne' ca', da nigá naca na dizra' bzénentu' bënneache, ne naca na da guxéajle'le.

### *Ca xelexebán benne' gate*

<sup>12</sup> Che da dxuzénentu' bënneache dxenná na bebán Cristo ládujla benne' gate, zájazra naca na bál-lale le'e dxennale quebe xelexebán benne' gate? <sup>13</sup> Che quebe xelexebán benne' gate, Cristoqueze quebe bebane' ládujla benne' gate, <sup>14</sup> na' che quebe bebán Cristo ládujla benne' gate, dácheze naca da dxuzénentu' bënneache, ne dácheze naca da dxeajlí lázrele chee Cristo. <sup>15</sup> Che caní naca na dxexechéentu' chee Dios da wen lazre' lawe' da dxennantu' bsebán Dios Cristo, na' che quebe xelexebán benne' gate, quebe bsebán Dios Cristo. <sup>16</sup> Che quebe xelexebán benne' gate, Cristoqueze quebe bebane', <sup>17</sup> na' che quebe bebán Cristo, dácheze naca da dxeajlí lázrele chee', na' ne nabágale dul-la. <sup>18</sup> Che caní naca na, cá'anqueze benne' zaj nate, benne' ca' guleajlí lazre' Cristo zaj nanítequeze'. <sup>19</sup> Che da dxebeza lázrente' da naca chee Cristo naca na cheeze xezr la xu nigá, nácadxu baxáchedxa ca xúgute bënneache.

<sup>20</sup> Na'a da li bebán Cristo ládujla benne' gate. Le' naque' benne' nedxu bebane' ládujla benne' gate quézcala xúgute benne' ca' dxal-la' xelexebane'. <sup>21</sup> Ca guca, bla' xel-la gute lu xezr la xu nigá ne chee tuze benne', cá'anqueze ne chee tuze benne' bla' xel-la dxexebán chee benne' gate. <sup>22</sup> Ca naca dxelate xúgute bënneache lawe' da zaj naque' tuze nen Adán, cá'anqueze xúgute benne' zaj naca tuze nen Cristo xelape' xel-la nabán li lazre'. <sup>23</sup> Xelexebán tu tué' gate xelexexalé', nédxula bebán Cristo ca tu lina nedxu, na' gudé na', gate xelá' Cristo xelexebán benne' zaj naque' bi chee' ca'. <sup>24</sup> Nadxa cheajsé chee xezr la xu nigá gate guzría xi' Cristo xúgute da dxelenná bea, ne xúgute da dxelirixj bea na, ne xúgute da zaj napa xel-la waca, na' gudé' xel-la dxenná bea chee' lu na' Xradxu Dios. <sup>25</sup> Dxun na ba xen nna bea Cristo ca zrin zra ba nuzúa Dios zran ni'e xúgute benne' guledábague' Le', <sup>26</sup> na' da bzébedxa da cuía xi' naca na xel-la gute. <sup>27</sup> Ba nuzúa Dios xúgute zran ni'a Cristo, san gate dxenná na nuzúe' xúgute zran ni'e, dxaca bea na quebe zua Dios ládujla da ca', lawe' da Léqueze' naque' Bënnea' bzué' xúgute zran ni'a Cristo. <sup>28</sup> Gate ba zua xúgute lu na' Cristo, nadxa Cristoqueze, Bënnea' naque' Zri'inequeze Dios guzúa cuine' lu na' Dios, Bënnea' bdee' xúgute lu na' Le'. Ca' naca na, Dios gaque' blau lawe' xúgute da de.

<sup>29</sup> Xetú da dxaca, zaj zua benne' dxeledxúe' nisa waláz chee benne' zaj nate. ¿Bizr chee na' dxelune' caní che quebe xelexebán benne' gate? ¿Bizr chee na' dxeledxúe' nisa waláz chee benne' gate?

<sup>30</sup> Cá'anqueze, ¿bizr chee na' zúatequezdxu dxi'u lu da stebe? <sup>31</sup> Xúgute zra zua' lu da stebe chee xel-la gute. Dxapa' le'e, bi bicha', da li naca da nigá ne chee da ba neza da napa' ne chee'le lu da nácadxu nen Xránadxu Jesucristo. <sup>32</sup> Che ca tu bënneacheze gudíl-lalena' benne' zaj naca ca be snia ca' lu xezre Efeso ¿bizra da ba neza naca na chia'? Che quebe xelexebán benne' gate dxal-la' gundxu ca dxelenná bënneache, dxelenné': "Xi'aj gágudxu lawe' da wxre gátedxu."



<sup>33</sup> Quebe güele lataj nu si xe le'e. Naca cáteze dxenná na:

Che gácadxu tuze benne' ca' dxelune' da caleļa, tu zrénqueze gundxu da caleļa.

<sup>34</sup> Le guxúe xanne' cuñale, ne quebe gunle dul-la, lawe' da bál-lale le'e quebe núnbea xánnele Dios. Da nigá dxapa' le'e chee gápale xel-la stu'.

<sup>35</sup> Guchebe nu benne' neda': Ájazra xelexebán benne' gate? ¿Ájazra gaca belá' dxen chee'?

<sup>36</sup> Da nigá naca na tu da xálaze, lawe' da gate dxázadxu tu binne, dxun na ba xen cuia xi' binnedu na' chee gaca na tu xágadau'. <sup>37</sup> Da na' dxázadxu quebe naca na da xelá', san tu binnedauze naca na, che naca na zrua' xtila u xetú binnedau'. <sup>38</sup> Te na' gun Dios chee binnedu na' tu xágadau' cáteze dxaca lázrequeze', na' chee tu tu binnedau' dxune' tu tu xágadau' cáteze zaj naca binnedu ca'. <sup>39</sup> Quegá xúgute belá' dxen tuz ca zaj naca na. Tuze ca naca belá' dxen chee bénneache, ne xetuze ca naca belá' dxen chee be xixre' ca', na' xetuze ca naca belá' dxen chee bxinnedu ca', ne xetuze belá' dxen chee bela ca'. <sup>40</sup> Cá'anqueze zaj naca belá' dxen chee xabáa, ne belá' dxen da zaj naca na chee xezr la xu nigá. Xel-la xrtan chee da zaj naca chee xabáa nazrá' ca xel-la xrtan chee da zaj naca chee xezr la xu. <sup>41</sup> Xel-la naxaní' chee gubizra nazrá' ca xel-la naxaní' chee beu', ne cá'anqueze nazrá' ca xel-la naxaní' chee belaj ca', na' láduļa belaj ca', xel-la naxaní' chee tu belaj nazrá' ca xel-la naxaní' chee xetú belaj. <sup>42</sup> Cá'anqueze dxaca chee benne' ca' xelexebane' láduļa benne' gate. Dxucáchedxu lu ba tu da guzru', na' xebán tu da québedxa gate. <sup>43</sup> Dxucáchedxu tu da xálaze, na' xebán tu da xabáa. Dxucáchedxu tu da nate ni'a na', na' xebán tu da wál-lale'e. <sup>44</sup> Dxucáchedxu tu belá' dxen chee beníacheze, na' xebán tu belá' dxen da naca na chee be' nácaquezdxu. Che zua tu belá' dxen da naca na bénneacheze, cá'anqueze zua tu belá' dxen da naca na chee be' nácaquezdxu.

<sup>45</sup> Cá'anqueze caní naxúaj lu dizra' lá'azxa da dxenná na: Benne' nedxu Adán guque' bénneache ban, na' Adán, benne' bzebe, naque' Be' da dxunna xel-la nabán. <sup>46</sup> Bénnea' naque' Be' quebe ble'e nedxu, san bénnea' naque' bénneacheze. Gudé na' bla' Bénnea' naque' Be'. <sup>47</sup> Benne' nedxu guque' xu bxrte, ne guque' chee xezr la xu nigá, na' Benne' gudxupe' naque' Xránadxu, Benne' chee xabáa. <sup>48</sup> Belá' dxen ca' chee xezr la xu nigá zaj naca na ca guca bénnea' guque' xu bxrte, na' belá' dxen ca' da zaj naca na chee xabáa zaj naca na ca Bénnea' naque' chee xabáa. <sup>49</sup> Ca naca, nácadxu ca bénnea' guque' xu bxrte, cá'anqueze gácadxu ca Bénnea' naque' chee xabáa.

<sup>50</sup> Dxaca lazra' xapa' le'e, bi bicha'dau', belá' dxen cheedxu da naca na xu bxrte quebe gaca chu'u na naga dxenná bea Dios lawe' da na' guzru quebe gaca zraga na da na' si bea chádia chacanna. <sup>51</sup> Dxapa' le'e tu da nagache nédxute: Quegá xúgutedxu gátedxu, san xúgutedxu sidxu tu belá' dxen cube. <sup>52</sup> Chadite gaca na, ca dxun benne' guchudie' xexrate lawe', gate xendxu chi'i luzu da dxulucuezre' da bzebe. Cuézrequeze luzu da dxulucuezre', na' xelexebán benne' gate naga cabátadxa xelatie', na' dxi'u sidxu tu belá' dxen cube. <sup>53</sup> Belá' dxen cheedxu da guzru dxal-la' xexaca na tu da québedxa guzru, na' belá' dxen cheedxu da gate dxal-la' xexaca na tu belá' dxen da québedxa gate. <sup>54</sup> Gate belá' dxen cheedxu da guzru ba bexaca na da québedxa guzru, ne belá' dxen cheedxu da gate ba bexaca na tu da québedxa gate, nadxa gaca li da naxúaj na lu dizra' lá'azxa, da dxenná na: Ba beladxu lu na' xel-la gute.

<sup>55</sup> Lue', xel-la gute, ¿ga na' xel-la waca chiu' chee gunu' netu' we'?

Lue', xel-la gute, ¿ga na' da zrué'enu'?

<sup>56</sup> Da dxunna xel-la gute xel-la waca chee gun na dxi'u we' naca na dul-la, na' da nadxiruj bea da gula na' naca na da dxunna na dul-la xel-la waca chee gudé na dxi'u lu xel-la gute.

<sup>57</sup> Na'a, xcalén Dios, Bénnea' dxunne' dxi'u xel-la waca chee zrué'edxu lu dul-la, ne lu xel-la gute ne chee Xránadxu Jesucristo.

<sup>58</sup> Chee le na', bi bicha' nazri'ite lazra', le se chacha, ne le súdeze lu zrin dxúndxale chee Xránadxu lawe' da nézele quebe naca dácheze zrin dxunle tu zren nen Xránadxu.

## 16

*Dumí da gutúpale chee gácalele bíchedxu ca'*

<sup>1</sup> Ca naca chee dumí gutúpale chee gácalele bi bíchedxu ca', le gun na cáteze bzéajni'ida' xúgute cue' bi chee Cristo zaj zra' xezre ca' zaj nababa Galacia. <sup>2</sup> Tu tu zra nedxu chee da gazre zra tu tule le'e dxal-la' gúnnale late' weaj ca da dxezile, na' cu'u cháwele na chee quebe gun na ba xen gúnnale dumí gate xida'. <sup>3</sup> Gate na' xelá'a, sel-la' xezre Jerusalén benne' ca' cuele, na' gunézruja' le' tu xiche chee xelu'e dumí na' chee bi bíchedxu zaj zre'e na'. <sup>4</sup> Che gata' lataj cha'a, na' sá'acalequeze' neda'.

*Da dxugú'u bea Pablo gune'*

<sup>5</sup> Lu neza chia' dxun na ba xen tea' naga nababa xezr la xu Macedonia, na' xelá'a xezre Corinto ca te na'. <sup>6</sup> Wegá'analja' nen le'e tu chi'i, u che ba guca, na' sua' nen le'e duté beu' zaga ca', na' le'e waca gácalele neda' lu neza chia' naga dxal-la' cha'a. <sup>7</sup> Quebe dxaca lazra'

xedajnná'a le'e ca teza', san dxebeza lazra' súaqueza' tu chi'i nen le'e, che gunna Xránadxu lataj. <sup>8</sup> Na'a xegá'ana' lu xezre Efeso nigá ca zrin zra Pentecostés, <sup>9</sup> lawe' da napa' lataj guna' tu zrin zren chee Xránadxu da gulé'etē lawe na, lácala naxán benne' ca' dxeledábaguē.

<sup>10</sup> Che ba bla' Timoteo, le gun ba xuzre suabe' xel-la dxebé nen le'e, ne quebe bi cué'ebe' gunne xue, lawe' da dxunbe' zrin chee Xránadxu cáteze dxun neda'. <sup>11</sup> Chee lē na' netule le'e quebe guzúale-be' chalá'ala, san le gácale-be' chee xexu'ube' neza lu xel-la dxebeza zri lazre' chee xedajnná'abe' neda', lawe' da dxebeza'-be' tu zren nen bi bíchedxu caní.

<sup>12</sup> Ca naca chee bíchedxu Apolos, guta' xúle'ēda' lē' chee chéajlēne' bi bíchedxu ca' xedajlenné'ē le'e, san quebe guca lazre' se'ē na'a. Wíde' gate gape' lataj.

*Dxulugapa ljawezre' diuzre*

<sup>13</sup> Le sua ban lazre'. Le se chacha lu xel-la dxeajlí lazre' cheele. Le se ca ze benne' biu. Le gaca benne' wal-la. <sup>14</sup> Dute' xel-la zri'i lazre' le gun xúgute' da dxunle.

<sup>15</sup> Na'a, bi bícha'dau', ba nézquezle gulaca xrtía Estéfanos benne' nedxu naga nababa Acaya gulezí' lu ne'ē dizra' chawe' chee Cristo, na' buluzúa cuine' chee xelácalēne' bi bíchedxu ca', bi chee Cristo. <sup>16</sup> Dxaca lazra' guzúa cuínale lu na' benne' caní, ne lu na' xúgute' benne' dxelácalē ljawézredxu, ne dxelún zrin chee Cristo. <sup>17</sup> Zua' xel-la dxebé lawe' da belelá' Estéfanos, ne Fortunato, ne Acaico, lawe' da belune' chia' da quebe guzéquele gunle le'e lawe' da zrale zitu'. <sup>18</sup> Belún chúchue' be' nácaqueza', ne be' nácaquezele le'e. Dxun na ba xen si' lu na'le benne' caní.

<sup>19</sup> Xúgute' cue' bi chee Cristo naga nababa xezr la xu Asia dxulugapa le'e diuzre. Aquilo ne Priscila, ne bi bíchedxu ca' dxelezraga lu xu'u lizre' dxulugápalē'ē le'e diuzre lu La Xránadxu. <sup>20</sup> Xúgute' bíchedxu nigá dxulugapē' le'e diuzre. Le gugapa diuzre ljawézrele tule xetule, ne le gunida ljawézrele.

<sup>21</sup> Neda', Pablo, dxuzúaja' da dxugapa' le'e diuzre nen ná'aqueza'.

<sup>22</sup> Che nu benne' quebe nazrí'ine' Xránadxu Jesucristo, cuía xi' bēnnea'. ¡Gudá Xránantu'!

<sup>23</sup> Dxenaba' Xránadxu Jesucristo gun cháwe'ē le'e. <sup>24</sup> Dxusel-la' chee xúgutele' xel-la nazrí'i chia' lu La Jesucristo. ¡Ca'an gaca na!

## DIZRA' GUDXUPE' DA BZUAJ SAN PABLO CHEE BI CHEE CRISTO ZAJ ZRE'E CORINTO

*Pablo dxuzúaję' cheę bi bíchedxu zaj zre'ę xęzre Corinto*

<sup>1</sup> Neda', Pablo, naca' gubáz cheę Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá cheęle le'e, bi bicha'dau', zrágale cheę Dios lu xęzre Corinto. Cá'anqueze dxuzúaja' da nigá cheę xúgute bi cheę Dios zaj zre'ę xęzre ca' zaj nababa xęzr la xu Acaya. <sup>2</sup> Dxenaba' Xradxu Dios, ne Xránadxu Jesucristo gun chawe'ę le'e, ne gunnę' le'e xel-la dxebeza zri lazre'.

*Da ca' guzi guzaca' Pablo*

<sup>3</sup> Dxue lá'anantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene'ę dxi'u. <sup>4</sup> Dios dxexúe zréneque'ę dxi'u ca naca xúgute xel-la zi' da dxededxu, cheę cá'anqueze dxi'u gaca xexúe zrendxu benne' ca' dxeledé'ę xel-la zi', na' xue zrendxu le' cáteze da ba nun Dios cheędxu dxi'u. <sup>5</sup> Lawe' da dxededxu xel-la zi' zren ca da gudé Cristo, cá'anqueze ne cheę Cristo zua Nu dxexúe zréneque'ę dxi'u, Léqueze Dios. <sup>6</sup> Cheę le' na', che dxedentu' netu' xel-la zi', naca na cheę sua Nu xexúe zren le'e, ne cheę lale, na' caní gaca guchaga laule lu dutę xel-la zren lazre' cheęle xel-la zi' ca' da dxededxu dxi'u. <sup>7</sup> Duxurén lázrele'ęntu' le'e, lawe' da nézentu' ca dxedele xel-la zi' tu zren nen netu', cá'anqueze sua Nu xexúe zren le'e tu zren nen netu', Léqueze Dios.

<sup>8</sup> Bi bicha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa ca da gaca guchaga launtu', na' quębedxa guleza lázrentu' lantu'. <sup>9</sup> Gúquentu' ba zua gagu xelute benne' ca' netu'. Guca cheęntu' da nigá cheę bzéajni'i na netu' guxrén lázrentu' Dios, ne quegá guxrén lazre' cuínantu'. <sup>10</sup> Dios bselé' netu', na' ne dxuselé' netu' lu da stębe zren nigá cheę xel-la gute, na' dxebeza lázrentu' Le' guseláqueze' netu' <sup>11</sup> che le'e gácalele netu', nábadxu Dios gácaleņę' netu'. Che benne' zan xelenabę' Dios gácaleņę' netu', na' benne' zan xelé'ę Dios: Xcalenu', cheę da chawe' ca' da gun Dios cheęntu'.

*Bizr cheę na' Pablo guzrene'ę chéaję' Corinto*

<sup>12</sup> Naca tu da ba neza da nápantu' da zua na lawe' da dxę xichaj lázrdauntu' netu' ba gudantu' lu da lá'azxa, ne du lázrentu', lu xęzr la xu nigá, ne ládujla le'e. Dios lu xel-la zri'i lazre' cheę' gúcaleņę' netu' cheę bentu' caní, ne quebe bentu' na lu xel-la sina cheęzquezentu'. <sup>13</sup> Lu da dxuzúajntu' cheęle quebe bi de da quebe gaca gulábale, ne chéajni'ile, na' dxaca lazra' chéajni'i xánnele <sup>14</sup> ca ba guxéajni'ile late', cheę lu zra xelá' Xránadxu Jesús, gácantu' netu' tu da ba neza cheęle le'e, ca le'e gácale tu da ba neza cheęntu'.

<sup>15</sup> Lawe' da dxuxrén lazra' gaca caní, bechugu lazra' xida' nédxula xedajnná'a le'e cheę gaca tu da ba neza cheęle, na' xedajnná'a le'e chupa lasa, <sup>16</sup> lawe' da bechugu lazra' xedajnná'a le'e gate tea' cha'a xęzre ca' zaj nababa Macedonia, na' te na', gate zezá'a lu xęzre ca' zaj nababa Macedonia, xedajnná'a le'e xetú. Ca' gaca na, le'e gaca gácalele neda' cha'a xęzre ca' zaj nababa Judea. <sup>17</sup> ¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' cheę xęzr la xu nigá, na' dxennia': Awe', cabí, gate dxechugu lazra' da guna'? <sup>18</sup> Dios nézqueznę' neda', ne Silvano, ne Timoteo, quebe dxęntu' le'e: Awe', cabí. <sup>19</sup> Naca na caní lawe' da Jesucristo, Zri'ine Dios, Bénnea' bzénentu' le'e ca naca cheę', cabata' gunnę': Awe', cabí. Nen Cristo nácaqueze da li xrtizra Dios, <sup>20</sup> lawe' da ne cheę Le' dxelaca li xúgute da guchebe lazre' Dios. Cheę le' na', gate dxue lá'anantu' Dios, dxennantu': ¡Ca'an naca na! ne cheę Jesucristo. <sup>21</sup> Dios naque' Bénnea' ba nuzé chúchuę' netu', ne le'e lu da naca cheę Cristo, ne ba guquę'ę dxi'u, <sup>22</sup> ne ba nuzúę' cheędxu tu da dxulé'e na nácadxu bi cheę Le', lawe' da ba nuzúę' Be' Lá'azxa lu xichaj lázrdaudxu, da dxunna bea na sidxu da naca cheę'.

<sup>23</sup> Che quebe ne xida' Corinto ca bechugu lazra', neze Dios naca na cheę gaca' zren lazre' nen le'e, ne che quebe naca caní, dxenaba' Dios xequę'ę xel-la nabán chia'. <sup>24</sup> Quebe naca na lawe' da dxaca lázrentu' nna bé'entu' le'e da dxal-la' chéajlele, lawe' da ba zę cháchale lu da dxéajlele. Dxaca lázrentu' bédxale lu da naca cheę Cristo.

## 2

<sup>1</sup> Cheę le' na' bechugu lazra' quebe xida' xedajnná'a le'e lu da baxache'. <sup>2</sup> Che neda' guzúa' le'e lu da baxache', ¿núzraqueze guzúa neda' lu xel-la dxebé? Tuze le'e, benne' ca' ba bzua' lu da baxache'. <sup>3</sup> Cheę le' na' bzua' cheęle ca da bęna' lawe' da quebe guca lazra' xida' cheę guzúale neda' lu da baxache', le'e na' dxal-la' guzúale neda' lu xel-la dxebé. Bxren lazra' che neda' zua' lu xel-la dxebé, cá'anqueze le'e súale lu xel-la dxebé. <sup>4</sup> Gate bzua'ja' cheęle da na'

guzéle'eda' gunne xue, ne guzúa' lu da zi' da xa', ne cá'aqueze gudxézrele'equeza', san quebe bzujaja' da na' chee guzúa' le'e lu da baxache', san chee nézele nazrí'ile'eda' le'e.

*Ca dxal-la' xulunita lawe' chee béneea' bene' da caléla*

<sup>5</sup> Che nu benne' ba bzue' neda' lu da baxache', quegá chia' néda'ze bene' na, san cá'aqueze waca nnadxu, bzue' xúgutele lu da baxache'. Dxenniá': Waca nnadxu, chee quebe gácatēca' snia. <sup>6</sup> Ca xel-la zi' da bdele béneea' gate na' bzrágale, ba nácale'equeze da na'. <sup>7</sup> Ca' naca na, na'a dxal-la' gunita laule chee béneea', ne xue zrenle le', chee quebe gunitie' xel-la dxebeza lazre' chee' ne chee da baxache' zren da dxedé'e'. <sup>8</sup> Chee le' na' dxata' xueda' le'e gulé'ele le' xecha lasa ca nazrí'ile'ele le'. <sup>9</sup> Bzujaja' nédxula chee ca naca da nigá chee gulé'e lawe' che nácale wezúe dizra' lu xúgute da dxaca. <sup>10</sup> Na'a, nu benne' dxunite laule chee', cá'aqueze neda' dxunite lawa' chee'. Ca da bnite lawa' neda', che naca na tu da dxal-la' gunita lawa', ba bnite lawa' na ne chee le'e lau Cristo <sup>11</sup> chee quebe seque' Satanás nna be'e na dxi'u, na' ba nézquezdxu ca da dxun na.

*Pablo dxezé' gunne xue lu xezre Troas*

<sup>12</sup> Gate bzrina' xezre Troas chee guzenda' béneache dizra' chawe' chee Cristo, gutá'le'e lataj chia' guna' zrin chee Xránadxu. <sup>13</sup> Guzúale'a gunne xue lawe' da quebe bezrelda' bi bíchedxu Tito ga na'. Chee le' na' bzea' dizra' benne' ca' zaj zre'e na', na' guxá'a xezr la xu Macedonia.

*Dxezrué'edxu ne chee Cristo*

<sup>14</sup> Xcalén Dios, Béneea' dxeché'tequeze' dxi'u lu neza guxú'u Jesucristo lu da bzrué'ene', ne dxulé'e lawe' ne cheedxu dxi'u dizra' chee' ca tu da dxelá zixre da dxezriluj gáteteze na. <sup>15</sup> Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xelélé', ne ládujla benne' ca' xelebia xi'e. <sup>16</sup> Lau benne' ca' xelebia xi'e da dxelá nigá naca na ca tu da dxute béneache, san lau benne' ca' xelélé' naca na tu da dxunexruj na béneache xel-la nabán. ¿Nu benne' naca chee' gaque' caní? <sup>17</sup> Netu' quebe dxedantu' dxútentu' dizra' chee Dios, ne quebe dxuchantu' na ca dxelún benne' zante'. Lawe' da dxen Dios, dxuchálajntu' du lázrentu', ca benne' nasele' na, ne ca wen zrin chee Cristo.

### 3

*Dizra' chee xel-la wezría cube*

<sup>1</sup> Gate dxennantu' da nigá, ¿dxéquele dxezú launtu' xecha lasa dxennentu' chawe' da naca cheé'quezentu'? ¿Dxun na ba xen gulé'entu' le'e tu xiche da dxulé'e na nácantu' xrlátaje, u nábantú' chee tu xiche caní, ca dxelún bal-la benne'? 2 ¡Cabí! Lawe' da nácaqueze le'e ca tu xiche da dxulé'e na nácantu' xrlátaje, da naxúaj na lu xichaj lázrauntu', na' xúgute béneache gaca xelxúnbe'e na, ne xululabé' na. <sup>3</sup> Le'e nácale ca tu xiche da nuzáj Cristo, ne da dxulé'e launtu' netu'. Nácale ca tu da naxúaj na da quebe naca na tu lu xiche, san ne chee Be' Lá'azxa chee Dios ban, tu da quebe naxúaj na lu blaga xiaj, san lu lázrauntu'.

<sup>4</sup> Ne chee Cristo dxuxrén lázrentu' Dios, <sup>5</sup> quegá chee bi gaca guntu' da naca cheé'quezentu', san, ca naca da gaca guntu' naca na chee Dios. <sup>6</sup> Le' ba nunne' netu' guntu' zrin chee' ne chee tu xel-la wezría cube da quebe naca na ne chee tu da naxúaj na, san da naca na ne chee Be' Lá'azxa chee'. Da naxixruj bea na da naxúaj na dxuzría xi na dxi'u, san Be' Lá'azxa na' dxunna dxi'u xel-la nabán.

<sup>7</sup> Da bdxixruj be'e Moisés na' bxujaj na le'e xiaj blaga', ne bla' nen tu da bseni'le'e, na' quebedxa belezúe benne' Israel ca' xelené'e lau Moisés, lawe' da gicatite legala le'e dxu'a lawe', na' xel-la naxaní' na' bexul-la na chawe lazre'. Che lu xel-la naxaní' zren bla' da naxixruj bea na, da dxuzría xi na dxi'u, <sup>8</sup> da zrenlé'edxa naca xel-la naxaní' chee dizra' chawe' na' da nusá Be' Lá'azxa cheedxu. <sup>9</sup> Che da naxixruj bea na da dxuzría xi na dxi'u guca na tu da xabáa zrente, na' tu da xabáa zrenlé'edxa naca dizra' chawe' na' da dxucá'ana na dxi'u xrlátaje lau Dios. <sup>10</sup> Lácala che da naxixruj bea na nédxula guca na tu da xabáa, na'a quebe bi naca xabáa chee na lau dizra' chawe' nigá da naca na tu da xabáa zrenlé'edxa. <sup>11</sup> Che guca tu da xabáa chee da na' guzi' bea na tu chí'idauze, napa na tu da xabáa zrenlé'edxa da na' si bea na chadía chacanna.

<sup>12</sup> Lawe' da dxuxrén lázrentu' naca na caní, du lázrentu' dxuchálajntu' dizra' chawe' na'. <sup>13</sup> Quebe dxuntu' ca ben Moisés, bgacu lawe' tu ladxe' chee quebe xelélé'e benne' Israel ca' xexul-la xel-la naxaní' na' da quebe guzi' bea na. <sup>14</sup> Benne' Israel ca' quebe guléajni'ingé'. Ne na'a zra, gate dxululabé' xel-la wezría gula na', ladxe' ná'queze quebe dxue na le' lataj xeléajni'ingé', lawe' da quebe ne xedúa na, na' gaca xedúa na tuze ne chee Cristo. <sup>15</sup> Na'a zra, gate dxululabé' dizra' chee Moisés, zua ca tu ladxe' da dxucache na xichaj lázrdawé'. <sup>16</sup> Gate tu benne' xexaque' chee Xránadxu, xedúa ladxe' na' lu xichaj lázrdawé', <sup>17</sup> lawe' da naca Xránadxu Be' na', na' naga zua Be' chee Xránadxu, na' de' xel-la weselá lu na' da naxixruj

bea na chee Moisés na'. <sup>18</sup> Chee le na' xúgute dxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa chee Xránadxu, na' dxi'úqueze, tu tu lasa gate dxelé'edxu da xabáa chee' dxexácadxadxu ca naca Cristo, lawe' da tu tu lasa na' nápadxadxu da xabáa chee'. Da nigá dxun Be' chee Xránadxu, na dxuché'e dxi'u lu xichaj lázrdaudxu.

#### 4

<sup>1</sup> Ca' naca na, cabata' dxate ni'a nantu' lawe' da lu xel-la dxexache lazre' chee', Dios ba nusebague' netu' zrin nigá chee Cristo da dxuntu'. <sup>2</sup> Ba nuzúantu' chalá'ala da dxelún bénneache bagácheze, ne da dxedué'entu' ca zaj naca na. Quebe bi dxuntu' da wen lazre', ne quebe dxuchantu' dizra' chee Dios, san dxennentu' tuze da li, na' caní dxuzúa cuínantu' lu na' xichaj lázrdau xúgute bénneache lau Dios. <sup>3</sup> Che dizra' chawe' da dxuzé'entu' bénneache ne nagache na, naca na caní tuze lau benne' ca' xelebía xi'e. <sup>4</sup> Lawe' da quebe dxeléajlé'e chee Cristo, na' da xriwe', da na' naca na dios chee xezr la xu nigá ba nun chul-la na xichaj lázrdawe' chee quebe xelelé'ene' xel-la naxaní' chee dizra' chawe' chee xabáa chee Cristo, Bénnea' naque' lu'a lesaca Dios. <sup>5</sup> Quebe dxuzé'entu' bénneache ca naca cheézquezentu', san ca naca chee Jesucristo. Dxennantu' naque' Xránadxu, na' ca naca cheentu' dxennantu' nácantu' wen zrin chee lawe' da nazrí'intu' Jesús. <sup>6</sup> Dios ná'queze, Bénnea' gunná be'e guxaní' xi' na' lu da chul-la, naque' Benne' ba bene' guxaní' xi' chee' lu xichaj lázrdaudxu, chee gaca gúnbeadxu da xabáa chee Dios da dxácatite legala na dxu'a lau Jesucristo.

#### *Dxundxu xúgute ne chee xel-la dxeajlí lazre' cheedxu*

<sup>7</sup> Da xabáa nigá nápantu' lu belá' dxen cheentu', da naca na ca tu xesu' xu, chee gaca bea za xel-la waca zren nigá lu na' Dios, ne quegá cheézquezentu'. <sup>8</sup> Chee le na':

Láqueze zúantu' lu da stébele'e, quebe dxezentu' gunne xue.

Láqueze dxezentu' gunne xue, tu dxebeza lázrezquezentu' gácale Dios netu'.

<sup>9</sup> Láqueze zaj nau zi' xuzre' netu', quebe dxusán Dios netu'.

Láqueze dxeline' netu' xu, quebe dxebíá xintu'.

<sup>10</sup> Gáteteze dxéajntu' naca tuze belá' dxen cheentu' nen xel-la gute chee Jesús chee gulé'e lau lu belá' dxen cheentu' xel-la nabán chee Jesús. <sup>11</sup> Dxácaté naca bantu' zúantu' chee gátentu' xúgute zra ne chee Jesús, chee gulé'e lau xel-la nabán chee Jesús lu belá' dxen cheentu' da gate. <sup>12</sup> Ca' naca na, lácala tu zúzquezentu' lu da stébe chee xel-la gute da nigá, dxun na sua tu xel-la nabán cube chee.

<sup>13</sup> Naxúaj lu dizra' lá'azxa da dxenná na: Guxéajlé'a, na' chee le na' bchálaja', na' cá'anqueze netu', lu xel-la dxeajlí lazre' caníqueze, dxéajlé'entu', ne dxuchálajntu', <sup>14</sup> lawe' da nézentu' Dios, Bénnea' bsebané' Xránadxu Jesús ládujla benne' gate, cá'anqueze gusebané' dxi'u tu zren nen Jesús, na' tu zren nen le'e, xeché'e dxi'u lau Le'. <sup>15</sup> Xúgute da nigá guzaca zintu' chee gaca tu da ba neza chee, chee gaca na, gate xezezi' benne' zante xel-la xrlátaje chee Dios, cá'anqueze benne' zante xelé'e Le': Xcalenu', chee gaca ba chee Dios.

<sup>16</sup> Chee le na', cabata' dxate ni'a nadxu. Láqueze dxexru belá' dxen cheedxu, Dios dxuxucubé' be' nácaquezdxu tu zra tu zra. <sup>17</sup> Da dxezácadxu lu xezr la xu nigá naca na tu da dauze, da teze chee na, na' nusá na cheedxu tu xabáa chadíá chacanna da szrente, ne da cháwedxa. <sup>18</sup> Quebe nná'adxu ca da dxelé'edxu, san nná'adxu da quebe nalá', lawe' da quebe dxelezi' bea da ca' dxelé'edxu, san da ca' quebe dxelé'edxu dxelezi' bea na chadíá chacanna.

#### 5

<sup>1</sup> Belá' dxen cheedxu naca na ca tu xu'u lizre be' nácaquezdxu. Belá' dxen cheedxu naca na ca tu xu'u da quebe si bea na, na' gate gátedxu Dios ba nucueze' cheedxu xabáa tu xu'u da zea jli canna, da nun Diósqueze, ne quegá bénneache. <sup>2</sup> Da li dxácaté naca bandxu lu belá' dxen nigá dxebezre wé'dxu lawe' da dxaca lázredxu cheajchú'udxu xel-la cube na' da gunna Dios dxi'u xabáa. <sup>3</sup> Quebe xegá'ana cá'aze be' nácaquezdxu xabáa. Cheajchú' u na' belá' dxen cube na'. <sup>4</sup> Dxácaté ne naca bandxu lu xu'u nigá da naca na belá' dxen cheedxu, dxebezre wé'dxu, ne dxededxu xel-la zi'. Quebe nácaze na lawe' da dxaca lázredxu gusandxu belá' dxen gula cheedxu nigá. Dxaca lázredxu cheajchú'udxu belá' dxen cube, na' ca'an gaca xenite belá' dxen cheedxu da dxal-la' gate, na' la' belá' dxen cube cheedxu da gaca ban na chadíá chacanna. <sup>5</sup> Bénnea' ba nuné' dxi'u chee gaca cheedxu caní naque' Dios, Bénnea' ba nunné' dxi'u Be' Lá'azxa ca tu da dxunna bea na dxal-la' sidxu tu belá' dxen cube xabáa.

<sup>6</sup> Ca' naca na, dxuxrén lázretequezdxu Dios. Ba nezdxu dxácaté naca bandxu lu belá' dxen nigá zúadxu zítu'la naga zua lízredxu, da naca na, quebe zúaledxu Xránadxu, <sup>7</sup> na' dxedadxu ne chee xel-la dxeajlí lazre' cheedxu, quegá ne chee da dxelé'edxu. <sup>8</sup> Dxuxrén lázredxu Dios, ne dxaca lázredxadxu gusandxu xel-la nabán cheedxu lu belá' dxen nigá chee chéajdxu cheajsúaledxu Xránadxu. <sup>9</sup> Chee le na' dxundxu ba xuzre gúntéquezdxu da xezaca ba lazre' Xránadxu, che nagá'anadxu lu belá' dxen cheedxu nigá, u che cheajchú'udxu belá' dxen cube,

da zua na xabáa, <sup>10</sup>lawe' da xúgute<sup>g</sup>dxu dxun na ba xen xezrindxu lau Cristo chee guchi'e ca da nundxu tu tudxu, chee si' lu nadxu ca da xáladxu, cáteze naca da xrlátaje, u da caleja da ba bendxu gate ne zúadxu lu beja' dxen cheedxu nigá.

*Dizra' da dxexún dxi'u tuze nen Dios*

<sup>11</sup>Chee le' na, lawe' da núnbeantu' ca dxal-la' zrébedxu Xránadxu, dxuntu' ba xuzre guntu' xelélé bènneache. Dios ba nézene' da nácantu', na' dxebeza lazra' cá'aqueze le'e nézele na. <sup>12</sup>Quegá dxennentu' xrlátaje cheé<sup>z</sup>quezentu', san dxúnnantu' le'e lataj gápale netu' ba lá'ana, chee gaca xechébele chee benne' ca' dxulucá'ana szren cuine' ca naca da zaj naque' cúzreze, ne quegá ca naca da zaj naque' lu xichaj lázrdawe'. <sup>13</sup>Che dxeleque bènneache nadá xichaj lázrdau<sup>ntu'</sup> naca na chee guntu' zrin chee Dios, na' che quebe nadá xichaj lázrdau<sup>ntu'</sup> naca na chee gaca tu da ba neza chee le'e. <sup>14</sup>Xel-la zri'i lazre' chee Cristo dxusebaga na netu' lawe' da nézentu' che tu benne' gutie' waláz chee xúgute bènneache, na' ba gulate xúgute'. <sup>15</sup>Cristo gutie' waláz chee xúgute bènneache, chee benne' ca' zaj naca bané' québedxa xelaca bané' cheé<sup>z</sup>queze', san chee Le', Bènnea' gutie', ne bebane' waláz chee benne' ca'. <sup>16</sup>Chee le' na, québedxa nna'ntu' ca naca da nácaqueze tu benne' lu xezr la xu nigá, na' láqueze nédxula gunna'ntu' Cristo cáteze gúcaqueze' lu xezr la xu nigá, na'a québedxa nna'ntu' Le' cani. <sup>17</sup>Ca' naca, che tu benne' naque' tuze nen Cristo, naque' tu benne' cube. Da gula ca' chee benne' nigá ba guledé chee na, na' xúgute na zaj naca na cube.

<sup>18</sup>Xúgute da cani dxun Dios, Bènnea' bexune' dxi'u tuze nen Léqueze' ne chee Cristo, na' bsebague' dxi'u guzendxu bènneache ca gaca xelexaque' tuze nen Dios. <sup>19</sup>Gate gute Cristo, Dios guzálequeze' Le', ne bexune' bènneache chee xezr la xu nigá tuze nen Le', ne quebe gunné'e ca zaj naca dul-la zaj nabaga bènneache ca', na' bsebague' dxi'u guzendxu bènneache dizra' da dxexún dxi'u tuze nen Dios. <sup>20</sup>Ca' naca na, nácantu' gubáz chee Dios ne chee Cristo, na' naca na cáteze Diósqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios. <sup>21</sup>Cristo netú dul-la ca bene', san ne cheedxu dxi'u, Dios bde' Le' chee gutie' le'e xaga béguaj ca tu benne' dul-la, chee xexácadxu benne' xrlátaje lau Dios ne chee da ben Cristo.

## 6

<sup>1</sup>Ca' naca na, ca wen zrin tu zren nen Dios dxata' xuentu' le'e chee quebe guzále chala'ala xel-la zri'i lazre' chee Dios, <sup>2</sup>lawe' da lu dizra' lá'azxa dxenné':

Tu zra dzezaca ba lazra' benda' chiu',  
na' lu zra chee xel-la weselá gúcalena' lue'.

Na'a naca na zra dzezaca ba lazre' xenne' chee le, ne guselé' le'e.

<sup>3</sup>Quebe bi dxuntu' da gun na quebe xeléajle bènneache chee Cristo, chee quebe nu nne caleja chee zrin dxuntu'. <sup>4</sup>Ca naca xúgute da dxuntu', dxaca lázrentu' gulé'entu' bènneache nácantu' wen zrin chee Dios,

ne chee xel-la dxebeza zren lazre' cheentu' gate dxuchaga launtu' da dzezácantu',  
ne da dxexá<sup>z</sup>rjentu', ne da zaj naca stebe cheentu',

<sup>5</sup>ca buluzálaje' netu', ne gulegu'e netu' lizre xia.

Guledábague' netu' san bènle'entu' zrin.

Zane' lasa quebe gúsentu', ne quebe bi gudáguntu'.

<sup>6</sup>Cá'aqueze blé'entu' da nácantu'

ne chee tu xel-la nabán li lazre' cheentu',

ne ne chee da li da núnbeantu',

ne ne chee xel-la zren lazre' cheentu',

ne xel-la zri'i lazre' cheentu',

ne ne chee Be' Lá'azxa, Bènnea' zúalene' netu',

ne ne chee xel-la nazri'i cheentu' da naca na du lazre',

<sup>7</sup>ne ne chee dizra' li da dxuzé<sup>ntu'</sup> bènneache,

ne ne chee xel-la waca chee Dios da zúale na netu'.

Bchí<sup>ntu'</sup> da zaj naca ca xia chee wedil-la chee da xrlátaje chee gudí<sup>l</sup>-lantu', ne chee gudentu' chala'ala da zaj naca ca xia chee wedil-la chee benne' ca' dxeledábague' netu'.

<sup>8</sup>Zua gate dxelape' netu' ba lá'ana',

ne zua gate dxuluzúe' netu' chala'ala.

Zua gate dxelenné' cheentu' da xrlátaje,

ne zua gate dxelenné' cheentu' da caleja.

Zua gate dxelenné' nácantu' wen lazre',

ne zua gate dxelenné' dxennentu' da li.

<sup>9</sup>Zua gate quebe nu dxuzé naga netu',

ne zua gate dxuluzé naga xánnie' netu'.

Zua gate zúantu' lu da štebe cheę xel-la gute, san ne naca bantu'.

Zua gate dxuludéę netu' xel-la zi', san quebe ne xelutię netu'.

<sup>10</sup> Láqueze zúantu' lu da baxache', zúateęquezentu' lu xel-la dxebe.

Lácala nácantu' benne' xache', ba nuntu' benne' zan benne' gunní'a.

Láqueze quebe bi núantu', xúgute nápantu'.

<sup>11</sup> Bi bícentu', benne' Corinto, ba bchájantu' du lázrentu'. Ba blé'entu' le'e ca nazrí'i

lázrentu' le'e. <sup>12</sup> Tu zúazqueze xel-la zrí'i lazre' chegentu', na' le'e na' quebe nazrí'ile netu'

du lázrele. <sup>13</sup> Dxata' xueda' le'e ca dxun tu benne' dxata' xuene' bi cheęqueze' cheę gulé'ele

neda' du lázrele xel-la nazrí'i da zua na lu xichaj lázrdaule cáteze bęna' neda'.

*Nácadxu xudau' cheę Dios ban*

<sup>14</sup> Quebe gunle tuze nen benne' quebe dxeléajle'ę cheę Cristo, da gaca na ca chacué' bezure gu'una, be quebe zaj nadíl-leba'.

¿Ájazra gun da xrlátaje gaca na tuze nen da caleļa?

¿Ájazra gun xel-la naxaní' gaca na tuze nen da chul-la'?

<sup>15</sup> ¿Ájazra gun Cristo gaque' tuze nen Satanás'?

¿Ájazra gun benne' dxéajle'ę cheę Cristo gaque' tuze nen benne' quebe dxéajle'ę cheę'?

<sup>16</sup> ¿Ájazra gun xudau' cheę Dios gaca na tuze nen bedáu' xiaj xaga?

Lé'equeze nácale xudau' cheę Dios ban cáteze gunná Díósqueze:

Súalęna' le', ne tálena' benne' ca'.

Gaca' Dios cheę benne' ca', na' le' xelaque' benne' xęzre chia'.

<sup>17</sup> Cheę le' na', cá'aqueze gunné':

Le xedxúaj ládujla benne' ca', ne le cuaca na', dxenná Xránadxu.

Quebe gutale da sban.

Nadxa si' lu na'a le'e <sup>18</sup> ne gaca' Xrale le'e,

na' le'e gácale zrí'ina' bi biu, ne zrí'ina' bi nu'ula.

Caní dxenná Xránadxu, Bęneea' nape' dutę xel-la waca.

## 7

<sup>1</sup> Ca' naca na, bi bícha'dau' nazrí'ite lazra', da caní zaj naca na da guchebe lazre' Dios cheędxu. Cheę le' na' dxal-la' guxúe xanne' cuínadxu cheę quebe güedxu lataj netú da sban gudxén na dxi'u lu beļa' dxen cheędxu, ne lu be' nácaquezdxu, na' lawe' da dxezrebedxu Dios dxal-la' guzúa cuínadxu lu na' Dios dutę ca nácadxu.

*Ca belexebí'i lazre' benne' Corinto*

<sup>2</sup> Le si' lu na'le netu'. Quebe bi da caleļa ne guntu' cheę nu benne' ládujla le'e, ne quebe nu ne guchántu', ne quebe nu ne si xentu'. <sup>3</sup> Quebe dxennía' da nigá cheę gusebaga' le'e zria, san naca na ca ba gucha' le'e nédxula, le'e zúale lu lázrdawa' che gaca bana', u che gatia' tu zrentę nen le'e. <sup>4</sup> Du lazra' dxuchálęna' le'e, ne zua' lu da ba neza ne cheęle le'e. Lu xúgute da dxezácantu' zua da dxexúe zréńle'ę neda', na' dxebełę'ęda'.

<sup>5</sup> Da li, gate bzrintu' naga nababa Macedonia, quebe bezi' lázrentu'. Guzúantu' lu da štebe gáteteze, lawe' da gáteteze gudentu' guledábaga bęneache netu', na' lu lázrdauntu' bezbęntu'. <sup>6</sup> Nadxa Dios, Bęneea' dxexúe zrene' benne' zaj nate ni'a ne'e, bexúe zrene' netu' ne cheę Tito lawe' da bezrinbe' naga zúantu', <sup>7</sup> ne quegá tuze lawe' da bla'be', san cá'aqueze lawe' da bexúe zrenle lebe'. Gúzrebe' netu' ca dxezáz lázrele lé'ele netu', ne bzenbe' netu' ca lu da baxache' zúale, ne ca gunne xue dxezele neda', na' cheę le' na' gubéłę'ędxeda'.

<sup>8</sup> Láqueze da bzuaja' cheęle bzua na le'e lu da baxache', quebe dxebezre lazra' cheę da na'. Láqueze gudxezre lazra' nédxula gate guęe be'eda' bzua na le'e lu da baxache' tu chí'idaul', <sup>9</sup> na'a dxebeda', quegá lawe' da guzúale lu da baxache', san lawe' da bęn da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaja' cheęle quebe bi da caleļa bęn na cheęle. <sup>10</sup> Da baxache' da dxuchaga laudxu ca da dxezaca ba lazre' Dios dxun na dxexebí'i lázredxu cheę ladxu, na' quebe dxal-la' cuezre lázredxu cheę na. Che xegá'anadxu lu da baxache' ca dxelún bęneache cheę xęzr la xu nigá, na' tu chí'ize gátedxu. <sup>11</sup> Le'e bchaga laule da baxache' da guca na cheęle ne cheę da bzuaja', ne bęnle ca da dxezaca ba lazre' Dios, na' le' nna'xque na'a:

Bzua na le'e gunne xue ca naca da guca,

ne bęn na blé'ele ca da bęnle.

Bcha'a na le'e, ne bchebe na le'e.

Nadxa guzé lázrele lé'ele neda',

ne guzúale gudele xel-la zi' bęneea' bęn da caleļa na'.

Ca naca xúgute da nigá ble'ele quebe nabágale zria chee dul-la nigá. <sup>12</sup> Ca' naca na, gate bzuaja' cheele da na', quebe guca na lawe' da gudxe'a gunne xue chee bénnea' bene' da calela na', ne quegá lawe' da gudxe'a gunne xue chee bénnea' guca na chee', san bēna' na chee gueque be'ele lau Dios ca dxele gunne xue cheentu'. <sup>13</sup> Chee le na' guca da bexúe zren na netu'.

Da naca tu da zrendxa, gubéle'entu' gate blé'entu' zúale Tito xel-la dxebe, lawe' da xúgutele le'e bexúe zrenle-be'. <sup>14</sup> Láqueze bca'ana szrena' le'e lau Tito, quebe dxeuédá, lawe' da cáteze naca da li ca naca xúgute da bchálajena' le'e, cá'aqueze guca da li da bēna' gate bca'ana szrena' le'e lau Tito. <sup>15</sup> Nazrí'idxabe' le'e gate dxajásá lázrebe' ca benle xúgutele le'e, benle cáteze gunábabe' le'e, ne ca guzú' lu na'le lebe' lu duté xel-la dxexruz lazre', ne lu xel-la dxezrebe. <sup>16</sup> Dxebeda' lawe' da dxuxrén lazre' xánnia' le'e.

## 8

### *Da dxunézrujdxu du lázredxu*

<sup>1</sup> Na'a, bi bicha', dxaca lazra' guzenda' le'e ca ble'e lau xel-la zri'i lazre' chee Dios ne chee xúgute cue' bi chee Cristo zaj nnita' lu xezr la xu Macedonia. <sup>2</sup> Láqueze guledé' tu xel-la zi' zren gulebéle'queze, na' láqueze zaj nácale' e benne' xache', du lazre' bulunézruje' da zaj de chee', na' belune' ca benne' gunní'a ca'. <sup>3</sup> Dxexecheba' du lazre' bulunézruje' xúgute da gulezéque, ne da zrendxa ca da gulezéque. <sup>4</sup> Gulata' xuene' netu' güentu' le' lataj xelune' tu zren bēneache dxelácalēne' bi bíchedxu ca' dxelexzrjene'. <sup>5</sup> Belundxe' ca da guleza lázrentu', lawe' da belunna cuínaqueze', nédxula chee Xránadxu, na' gudé na' cheentu' netu', cáteze dxaca lazre' Dios. <sup>6</sup> Ca' naca na, guta' xüentu' Tito gusexuzre' gutupe' da gunézruje le'e, da na' guzú lawe' dxutupe' gate nate. <sup>7</sup> Le'e dxunlé'ele ca naca da dxunle, ca dxeajlí lázrele Dios, ne ca dxusédele bi chee Cristo, ne ca naca da naxéajni'ile, ne ca du lázrele dxunle xúgute, ne ca nazri'ile netu'. Ca' naca na, cá'aqueze dxal-la' gúnle'ele ca gunle zrin chawe' nigá.

<sup>8</sup> Quebe dxapa' le'e da nigá ca tu da dxenná be'eda' le'e. Dxaca lazra' nézele ca du lazre' dxelún xezícadxa bēneache zrin nigá, dxulunézruje' dumí, chee gueque be'ele che naca li lazre' xel-la zri'i lazre' cheele. <sup>9</sup> Ba nézqueze ca naca xel-la zri'i lazre' chee Xránadxu Jesucristo. Naque' benne' gunní'a, san ben cuine' benne' xache' lawe' da bzri'ine' le'e, chee gácale le'e benne' gunní'a lu da naca chee Cristo lawe' da gudé Le' lu xel-la xache'.

<sup>10</sup> Chee gaca da ba neza chele dxapa' le'e da dxéqeda' ca naca da nigá. Gudú iza guzú laule, quegá dxúnzele, san du lázrele dxunle da nigá, dxunézruje dumí. <sup>11</sup> Na'a, le günteze na chee xexuzrte gunle na, gunle na du lázrele cáteze guzú laule dxunle nédxute, gunézruje ca da du de chele. <sup>12</sup> Che da li dxaca lazre' tu benne' gunézruje', Dios xezaca ba lazre' na chee gunézruje' ca da nape', ne quegá dxenabe' da quebe napa bēnea'.

<sup>13</sup> Quebe dxennía' da nigá chee xexácale le'e xache' chee gácale benne' xula. <sup>14</sup> Naca na chee gápale lébete. Na'a nápane chee gunézruje ca da dxelexazrje benne' xula ca', na' xetú lasa xelapa benne' ca' da xelunne' cheele gate bi xázrjele le'e. Caní gápale lébete <sup>15</sup> cáteze naxúaj na lu dizra' lá'axza, dxenná na: Bēnea' nápalé e quebe bi begá'ana chee', na' bēnea' nape' láteze quebe bi bexázrjene'.

### *Tito ne bi ljwezre' ca'*

<sup>16</sup> Xcalén Dios, Bēnea' bzué' lu lázrdau Tito sué' gunne xue cheele le'e ca zua' neda'. <sup>17</sup> Guzú' lu ne'e da bsebaga' le', na' lawe' da zúaqueze' gunne xue cheele le'e, ba bezé'e chee xide' xedajnné'e le'e lawe' da dxaca lázrequeze le'.

<sup>18</sup> Tu zren nen Tito nasél-lantu' tu bi bíchedxu, tu benne' dxelenné chawe' chee' xúgute cue' bi chee Cristo, ca naca zrin xrlátaje da nune' chee dizra' chawe' chee Cristo. <sup>19</sup> Quegá tuze da nigá, san xúgute cue' bi chee Cristo gulequé'e bi bíchedxu níqueze chee sálene' netu' chee gácalēne' netu' lu zrin nigá da dxuntu' dxutúbentu' dumí da gácale na benne' xache' ca' chee gaca ba Xránadxu, ne chee gulé'e lau du lázrele dxunle zrin chawe' nigá. <sup>20</sup> Caní dxuntu' chee quebe nu benne' si tizre' netu' ca dxuchínentu' dumí zrente nigá da dxulunézruj bi bíchedxu ca'. <sup>21</sup> Dxuntu' ba xuzre guntu' zrin nigá lu duté xel-la li lazre' cheentu', quegá tuze lau Xránadxu, san cá'aqueze lau xúgute bēneache.

<sup>22</sup> Tu zren nen benne' caní nasél-lantu' xetú bi bíchedxu, tu benne' da zánete lasa ba blé'engé netu' du lazre' dxunge' zrin chee Cristo, na' na'a du lázredxe' dxunge' zrin nigá lawe' da dxuxrén lazre' le'e. <sup>23</sup> Che nu benne' guchebe le'e ca naca chee Tito, le xe'e nácabé' bi ljwezra', ne dxunbe' zrin tu zren nen neda' chee gunbe' zrin cheele. Che nu guchebe le'e ca naca chee xezícadxa bi bíchedxu ca' zeajzrague' Tito, le xe'e zaj naque' benne' gulesel-la xúgute cue' bi chee Cristo, ne dxelape' ba lá'ana Cristo. <sup>24</sup> Chee le na', chee xeleneze xúgute cue' bi chee Cristo, le gulé'e le' nazri'ile le', na' naca cheentu' xucá'ana szrentu' le'e.



## 9

*Da dxulunézruje' chee bi bíchexu ca'*

<sup>1</sup> Ca naca chee dumí da gunézruje chee bi ca' chee Cristo, quebe dxun na ba xen guzúajá' cheele, <sup>2</sup> lawe' da ba nezda' ca dxaca lázrele gunle na. Dxezaca ba lazra' dxapa' bi bíchexu zaj zre'e xezre ca' zaj nababa xezr la xu Macedonia, le'e zrale xezre ca' zaj nababa Acaya, gudú iza ba zúatequezele bi gunézruje, na' benne' zante' benne' Macedonia du lazre' dxulunézruje' lawe' da dxunézruje le'e du lázrele. <sup>3</sup> Dxusel-la' bi bíchexu caní chee quebe gaca tu da wen lazre' ca da chawe' da ba gunnía' ca dxunle le'e da nigá, ne chee súatezle bi gunézruje, ca ba gucha' benne' caní, <sup>4</sup> ne che sa'aca bal-la benne' Macedonia tu zren nen neda' chee quebe xelexé'ene' quebe zúatequezele le'e bi gunézruje. Chela gaca na caní xedué'entu' lawe' da bxren lázrentu' le'e caní, na' da zrendxa ca dxal-la' xedué'ele le'e. <sup>5</sup> Chee le na' gúqueda' dxun na ba xen naba' bi bíchexu ca' xelide' xedajlennabe' le'e nédxula, ne chee xelácalene' le'e gutúpale da guchebe lázrele nédxula gunézruje. Ca' gaca na, dumí da gutúpale watá'queze na chee gulé'e na naca tu da dxaca lázrele gunle, ne quegá tu da gunne xúentu' le'e.

<sup>6</sup> Le nna'xque da nigá: Bénnea' dxaze' láteze, cá'anqueze láteze xezi'e, na' bénnea' dxázale'e, cá'anqueze xezi'ile'e. <sup>7</sup> Tu tu benne' dxal-la' gunézruje' cáteze da ba nune' lu lázrdawe', quegá ca tu benne' quebe dxezaca ba lazre', u xadíaze, lawe' da nazrí'i Dios benne' dxunézruje' duté xel-la dxebé. <sup>8</sup> Wazeque' Dios gúnna'e le'e ca naca xúgute' da chawe', chee gata' cheele xúgute' da nachínele, ne gápale bi gunézruje chee gunle xúgute' zrin xrlátaje. <sup>9</sup> Naxúaj lu dizra' lá'azxa da dxenná na:

Du lazre' bnézruje' chee benne' xache' ca'.

Ca zaj naca zrin xrlátaje nune' xelegá'anatequeze na.

<sup>10</sup> Dios, Bénnea' dxunézruje' bímedu ca' da dxázadxu, ne dxunne' da dxi'aj dxágudxu, gunne' le'e xúgute' da nachínele chee gázale, na' gusegule' na chee gúnna'e'queze na lina chee zrin chawe' da gunle. <sup>11</sup> Ca' gaca na, gáta'le'e cheele xel-la gunní'a ca' chee séquele gunézruje du lázrele, na' dumí na' sél-lale lu na'ntu' netu' gun na xelé bi bíchexu ca' Dios: Xcalenu'. <sup>12</sup> Ca' naca na, gate gunézrujdxu bi bíchexu ca' dumí nigá da gácale na le', quegá tuze dxunézrujdxu tu da dxelechínnene' san cá'anqueze dxundxu xelé'e Dios: Xcalenu'. <sup>13</sup> Xelúe lá'ane' Dios lawe' da da nigá dxunézruje gulé'e na dxuzúale dizra' chee dizra' chawe' chee Cristo. Cá'anqueze xelúe lá'ane' Dios ne chee da gunézruje du lázrele da gácale na le', ne xúgute' cue' bi chee Cristo. <sup>14</sup> Chee le na' benne' ca' xelenabe' cheele lau Dios, ne xelzrí'ile'ene' le'e ne chee xel-la zrí'i lazre' zren da gulé'e lau Dios ne chee le'e. <sup>15</sup> Xcalén Dios lawe' da nunne' dxi'u tu da zrenté da quebe séquedxu xuzájla'adxu.

## 10

*Xel-la dxenná bea napa Pablo lawe' da naque' gubáz chee Cristo*

<sup>1</sup> Neda', Pablo, dxuzenda' le'e da nigá ne chee xel-la dxexruj lazre', ne xel-la zrí'i lazre' chee Cristo. Dxelenné' naca' benne' zren lazre' gate zúalena' le'e, na' gate zua' zitu' nácale'a benne' snia. <sup>2</sup> Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládújla le'e, benne' ca' dxelenné' dxuntu' zrin chee Cristo lu belá' dxeze cheentu', na' zúaqueza' tíl-laqueza' benne' ca'. <sup>3</sup> Láqueze nácantu' belá' dxen quebe dxedílantu' lu belá' dxenze cheentu', <sup>4</sup> lawe' da quebe zaj naca chee belá' dxenze da dxuchíntu' lu wedil-la cheentu', san zaj napa na xel-la waca chee Dios chee séquentu' guzrí'a xintu' da wal-la ca' chee nu na' dxedábaga' netu'. <sup>5</sup> Ca'an naca, dxuchí'a xintu' da dxusebaga bénnea' dxi'u, ne da dxuzú'e lu xel-la dxucá'ana szren cuina chee quebe xelúnbea bénneache Dios. Xúgute' da zaj xu'u lu xichaj bénneache dxuzúantu' lu na' Cristo chee xuluzú'e dizra' chee'. <sup>6</sup> Zúatequezentu' gudentu' xel-la zi' xúgute' benne' ca' quebe dxuluzú'e dizra' chee' gate na' ba dxuzúale dizra' chee' du lázrele.

<sup>7</sup> Le'e dxenna'le benne' ca' cáteze da zaj naque' cúzreze. Che nu benne' dxéquene' da li naque' bi chee Cristo, dxal-la' gueque bé'ene' cáteze na' naca le' bi chee Cristo, cá'anqueze nácantu' netu' bi chee Cristo. <sup>8</sup> Láqueze dxuchínedxada' ca dxal-la' guna' xel-la dxenná bea cheentu', quebe dxedué'eda' lawe' da nunna Cristo netu' xel-la dxenná bea na' chee séquentu' gusegúlantu' le'e lu da naca chee Dios, ne quegá chee guzrí'a xintu' le'e. <sup>9</sup> Quebe dxaca lazra' guéquele le'e dxaca lazra' gucheba' le'e ne chee da dxuzúajá' cheele. <sup>10</sup> Dxelenné' xiche ca' da dxusél-la' zaj naca na snia, ne wal-la, san néda'queza' naca' benne' nate ni'a na', ne ca dxuchálajá' quebe zácateca. <sup>11</sup> Bénnea' dxenné' da nigá dxal-la' gueque bé'ene' cáteze naca' lu dizra' dxuzúajá' gate ne zua' zitu', cá'anqueze gaca' lu da guna' gate na' súalena' le'e.

<sup>12</sup> Quebe dxexázrentu' gutil-le lébentu', u gulé'e cuínantu' ca zaj naca bal-la benne' ca' dxulucá'ana szren cuine'. Dxeluné' tu da xálaze gate dxelenné'e ca da zaj nácaqueze', ne

dxulutil-le lēbe ljweze'. <sup>13</sup> Quebe gucá'ana szren cuínantu' lu da quebe naca cheentu'. Dios naque' Bénnea' gulé'eng' netu' naga ze lau guntu' zrin, na' Le' benne' netu' lataj blantu' naga zrāle le'e lu xezre Corinto. <sup>14</sup> Chee lē na' quebe dxedxúajntu' naga ze lau cheentu', cáteze gaca na che quebe ne zrintu' naga zrāle le'e nédxute. Netu' nácantu' benne' nedxu blantu' naga zrāle le'e núantu' dizra' chawe' chee Cristo. <sup>15</sup> Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxeajjí lazre' chee, waca gúndxantu' zrin ládujla le'e gusegúlantu' xel-la dxeajjí lazre' chee, san guntu' na lu'ule da naca cheentu'. <sup>16</sup> Te na' dxebeza lázrentu' tédxantu' ca naga zrāle chee guzēntu' bēnneache zaj zre'e ga na' dizra' chawe' chee Cristo, ne quebe chú'untu' naga ba zaj nun zrin xezícadxa benne' ca', chee quebe gucá'ana szren cuínantu' lu da ba zaj nune'.

<sup>17</sup> Che nu benne' dxaca lazre' nu gucá'ana szrene', dxal-la' gucá'ana szrene' Xránadxu. <sup>18</sup> Bénnea' dxexedxúaj xrlátaje, quebe naque' benne' dxucá'ana szren cuine', san naque' bēnnea' dxucá'ana szren Xránadxu lē'.

## 11

*Ca naca chee Pablo, ne benne' gubáz ca' quebe nase-la Cristo lē'*

<sup>1</sup> Le guchaga lau neda' chee nnia' late' da ca zeaje na. Ájateze naca na, le guchaga lau neda', <sup>2</sup> lawe' da dxé'le'a gunne xue chee le'e lu da nusebaga Dios neda', ne lawe' da ba nachebe lazra' chee gácale zru'ula Cristo, dxaca lazra' gudé'a' le'e lau lē' ca tu nu'ula cuide'dau' du lazre' súalebe' benne' chee'. <sup>3</sup> Ca ben be'a' gula na' guzi' xebe' Eva nen xel-la neze chee', dxezreba' güele lataj nu si xē le'e, na' cuásale lu xichaj lázrdaule chee québedxa gácale du lázrele chee Cristo. <sup>4</sup> Le'e dxuchaga laule benne' ca' zá'aque' dxuluchálaje' chee tu Jesús, benne' nazrá' ca Bénnea' bzēntu' le'e chee lē', ne du lázrele dxezi' lu na'le tu be' da nazrá' ca Be' na' da ba guzi' lu na'le, ne dxezi' lu na'le tu dizra' da nazrá' ca naca dizra' chawe' da ba guzi' lu na'le. <sup>5</sup> Dxéqueda' quebe zaca' neda' látezdxa ca benne' gubáz zren ca', benne' ca' zéajlele le'e. <sup>6</sup> Láqueze quebe gaca guchálaja' xrtándau', dxéajni'ida' da na' dxuchálaja' chee na, na' blé'entu' caní naca na lu xúgute da ba bentu'.

<sup>7</sup> ¿Bena' tu da calēla gate bzenda' le'e dizra' chawe' chee Cristo, ne quebe bi bchízruja' le'e, na' ben cuina' dxexruj lazre' chee xegá'ana szrenle le'e? <sup>8</sup> Guca na ca gudawa' dumí chee xezícadxa cue' bi chee Cristo gate guzi'a da belunne' neda' chee bēna' zrin ga zúale le'e. <sup>9</sup> Gate na' guzúalēna' le'e, ne bxájrjeda', quebe bi guzi' lu na'a da naca chee, san bi bíchedxu zá'aque' xezr la xu Macedonia belunne' neda' ca da guchínmeda'. Bena' ba xuzre quebe bi gunábeda' le'e, na' cá'anqueze guna'. <sup>10</sup> Lawe' da núnbe'a da li chee Cristo, quebe zua nu benne' naga nababa xezr la xu Acaya gaca guzague' neda' chee québedxa gucá'ana szren cuina' chee da nigá dxuna'. <sup>11</sup> ¿Bizr chee na' dxennia' caní? ¿Naca na lawe' da quebe nazrí'ida' le'e? Nézqueze Dios nazrí'ida' le'e.

<sup>12</sup> Gúnqueza' ca dxuna' chee quebe gata' lataj chee benne' ca' dxelaca lazre' xulucá'ana szren cuine' lawe' da dxeléqueng' dxelunē' zrin cáteze dxuntu' netu'. <sup>13</sup> Benne' caní zaj naque' gubáz quebe nase-la Cristo. Dxelezí xē'e bēnneache, ne dxululé'e cuine' ca gubáz chee Cristo. <sup>14</sup> Quebe naca da nigá da xebánedxu lawe' da Satanásqueze dxululé'e cuina na ca tu gubáz chee xabáa zue' lu xel-la naxani' chee Dios, <sup>15</sup> na' chee lē na' dxululé'e cuine' ca benne' dxelún da xrlátaje. Benne' caní xelebía xi'e ca ba naca chee benne' dxelún da caní.

*Da guzaca Pablo lawe' da naque' gubáz chee Cristo*

<sup>16</sup> Xecha lasa dxapa' le'e, quebe nu benne' dxal-la' guéqueng' nadá xichaj lázrdawa'. Che ca'an dxéquele le'e, le gunna neda' lataj guchálajēna' le'e ca tu benne' nadá xichaj lázrdawe', chee gaca gucá'ana szren cuina'. <sup>17</sup> Quebe dxapa' le'e da nigá lu xel-la dxenná bea chee Xránadxu. Guchálaja' ca tu benne' nadá xichaj lázrdawe', nnia' tu da gucá'ana szren cuina'. <sup>18</sup> Lawe' da zaj zra' benne' zantē dxulucá'ana szren cuine' lu da zaj naque' chee xezr la xu nigá, cá'anqueze neda' gucá'ana szren cuina'. <sup>19</sup> Lawe' da nácale'ele benne' sina dxuchaga laule du lázrele benne' zaj nadá xichaj lázrdawe'. <sup>20</sup> Dxuchaga laule benne' ca' dxelexunē' le'e ca benne' zaj nada'u, ne benne' ca' dxuluchíneng' le'e, ne benne' ca' dxelenná bé'eng' le'e, ne benne' ca' dxuluzúe' le'e chalá'ala, ne benne' ca' dxelegape' xraga laule. <sup>21</sup> Láqueze dxedué'eda' dxennia' da nigá, quebe guca' benne' dxechugu lazre' chee guna' ca dxelún xezícadxa benne'. Na'a gaca' lazre' dxugu guna' caní.

Ba dxelechugu lazre' benne' xezícadxa dxulucá'ana szren cuine'.

Cá'anqueze neda' xechugu lazra' guna' na, láqueze naca

tu da ca zeaje da dxennia'.

<sup>22</sup> ¿Zaj naque' benne' hebreo?

Cá'anqueze neda' naca' benne' hebreo.

¿Zaj naque' benne' Israel? Cá'anqueze neda'.

¿Zaj naque' zri'ine zre sua Abraham? Cá'anqueze naca' neda'.

<sup>23</sup> ¿Zaj naque' wen zrin chee Cristo?

Nácadxa' neda' wen zrin chee' ca benne' ca',  
lácala dxuchálaja' ca tu benne' nadá xichaj lázrdawe' gate  
dxennía' da nigá.

Ba bendxa' zrin ca benne' ca'.

Ba buluzálajdxa bénneache neda' ca nu bzálaj benne' ca'.

Ba gulegu'udxa bénneache neda' lizre xia ca belunge' chee benne' ca',  
na' zane' lásate ba guzúa' lu da stebe chee xel-la gute.

<sup>24</sup> Gazzu' lasa ba belúe benne' judío ca' neda' xide chennu dxua weaj.

<sup>25</sup> Chunna lasa belúe' neda' xaga. Tu lasa belú'e neda' xiaj.

Chunna lasa guxaze da dxedá lawe' nísadau' da xu'a lu nisa.

Tu lasa, tu zra tu xela guxu'a lu nísadau'.

<sup>26</sup> Zane' lásate guxu'a neza, ne guzúa' lu da stebe:

Chee xegu ca', ne chee gubán ca'.

Chee benne' waláizr chia' ca', ne chee benne' zitu' ca'.

Guzúa' lu da stebe lu xezre, ne le'e xixre', ne lu nísadau',  
ne ládujla benne' wen lazre' dxelenné' zaj naque' bi bíchedxu.

<sup>27</sup> Benlé'a zrin, ne guzúa' lu da zi' da xa'.

Zane' lásate quebe gusia' dxela.

Gudúnle'a, ne gubílele'eda', na' zane' lásate bēna' gubasa.

Catite bexaga', ne bexáizrjeda' zra lana' gacua'.

<sup>28</sup> Da zrendxa ca da caní, ne xezícadxa da guzraca'.

Xúgutē zra dxéqueda' zi' lawe' da zua' gunne xue chee  
xúgutē cue' bi chee Cristo.

<sup>29</sup> Che nu benne' nate ni'a ne'e lu xel-la dxeajlí lazre' chee',

cá'anqueze neda' dxéqueda' nate ni'a ná'aqueza'.

Che nu benne' dxelunge' dxeajchaze', néda'queze dxaca' tul-la.

<sup>30</sup> Che dxun na ba xen gucá'ana szren cuina',

gucá'ana szren cuina' chee da ca' dxululé'e na nate ni'a na'a.

<sup>31</sup> Dios, Xra Xránadxu Jesucristo, Bénnea' naca chee' güe lá'anatequezdXu Le', nézene' dxennía'  
da li. <sup>32</sup> Gate guzúa' xezre Damasco, benne' wnná bea na' dxune' zrin chee wenná bea  
Aretas bzre'e benne' dxuluxúe' dxa xu'u chee xezre na', chee xelēl-le' neda'. <sup>33</sup> Na' bi  
bíchedxu ca' bululetje' neda' tu lu xcuite xia ga dxu'u leni' chee xu'u lu ze'e da naxechaj  
na xezre na'. Ca' guca na, gulá' lu na' benne' ca'.

## 12

### *Da ca' Dios blé'eng' Pablo*

<sup>1</sup> Da li quebe dxal-la' gucá'ana szren cuina', san guchálaja' chee da ca' ble'e Xránadxu neda',  
ne da ca' ble'eda' ca naca chee'. <sup>2</sup> Neda', ca tu benne' dxéajle chee Cristo, ba zeaj chidá' iza  
guché Dios neda' xabáa guxunne'. Quebe nezda' che guxá'a na' dutē bēla' dxen chia', u che  
cabí. Dios nézene'. <sup>3</sup> Nezda' néda'queza', che zua' lu bēla' dxen chia', u che cabí, quebe nezda',  
tuze Dios nézene'. <sup>4</sup> Guché Dios neda' tu xabáa chee', naga benda' dizra' bagache da quebe  
naca chee bénneache xelenné' ca zaj naca na. <sup>5</sup> Waca gucá'ana szrena' tu benne' caní, san  
quebe gucá'ana szren cuinaqueza', che quebe naca na chee xel-la nate ni'a na' chia'. <sup>6</sup> Láqueze  
che gaca lazra' gucá'ana szren cuina' quebe gaca na tu da xálaze, lawe' da gaca na tu da  
li. Quebe guna' na chee quebe nu guéquene' nácadxa' ca da gaca lé'eng' naca', u ca da gaca  
xenne' da dxennía'.

<sup>7</sup> Da caní ble'e Xránadxu neda' gulaca na da xebánele'edXu, na' chee quebe gucá'ana szren  
cuina', guca chia' ca tu xeche' naxaze lu bēla' dxen chia' da dxuchine Satanás chee guzalaj  
na neda'. <sup>8</sup> Chunna lasa guta' xueda' Xránadxu gucuase' da dxezaca'. <sup>9</sup> Xránadxu guzre' neda':  
"Xela zri'i lazre' chia' naca na dutē da dxechínenu' lawe' da dxulé'edxa lau xel-la waca chia'  
nen benne' nate ni'a ne'e." Ca' naca, dxebeda' lawe' da nate ni'a na'a chee gulé'e lau lu bēla'  
dxen chia' xel-la waca chee Cristo. <sup>10</sup> Chee le' na' dxebeda' ca naca xel-la nate ni'a na' chia',  
ne ca naca dizra' schanni' ca' dxelenná bénneache chia', ne ca naca da ca' dxexáizrjeda', ne  
gate zaj nau zi' xuzre' bénneache neda', ne ca naca da ba xa' ca' da dxedéa' ne chee Cristo,  
lawe' da gate nátedxa ni'a na'a, dxéqueda' nácadxa' benne' wal-la.

### *Pablo dxe'e gunne xue chee bi chee Cristo zaj zre'e Corinto*

<sup>11</sup> Guca' ca tu benne' nadá xichaj lázrdawe' gate bca'ana szren cuina' caní, san le'e bēne  
bēna' na. Le'e na' dxal-la' gucá'anale neda' szren lawe' da quebe zaca' látezdxca ca benne'  
gubáz zren ca', benne' ca' dxéajlele, láqueze quebe bi zaca' neda'. <sup>12</sup> Zrin bēna' ládujla le'e lu  
dutē xel-la zren lazre' chia' ble'e na da li naca' gubáz chee Cristo ne chee da dxelunna bea

na, ne xel-la waca ca' cheę xabáa, ne da ca' dxexebánedxu. <sup>13</sup> ¿Dxéquele le'e nácale látezdxá blau ca xezícadxa cue' bi cheę Cristo lawe' da guzí' lu na'a da belunne' chia', na' quebe guzí' lu na'a da zaj naca cheęle? Le gunité lau neda' che naca tu da caleļa quebe benna' le'e lataj bi gúnnale chia'.

<sup>14</sup> Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na cheęle. Quebe dxexíłaja' da nácale, san lé'eqeze, lawe' da dxal-la' xulucude xruze xrna' dumí da xulunézruje' zrí'ine', ne quegá xulucude zrí'ine' da xulunézruje' xra xrnabe'. <sup>15</sup> Du lazra' guchínedá' dumí chia' cheę gaca chawe' cheę bénne'du xu'ule, láqueze dxéqueda' gate nazrí'idxeda' le'e, látezdxá nazrí'ile le'e neda'.

<sup>16</sup> Bal-la benne', láqueze zaj nézene' quebe bi guzí' lu na'a da zaj naca na cheęle, dxelenné' gudęl-la' le'e lu da wen lazre'. <sup>17</sup> ¿Guzí xę'a le'e lu na' tu benne' gusel-la' cheęle? <sup>18</sup> Guta' xueda' Tito xídabe' xedajnná'abe' le'e, ne gusel-la' nen lebe' xetú bi bíchedxu. ¿Guzí xę Tito le'e? ¿Quebe bentu' tuze ca bentu' ládujla le'e neda', ne Tito, na' nen tuze Be' Lá'azxa?

<sup>19</sup> Bi bicha' nazrí'ite' lazra', ¿dxéquele dxucá'ana cuínantu' xrlátaje laule le'e? Dx-uchálajlentu' le'e lau Díos, ne lu La Xránadxu Jesucristo. Xúgutę da caní dxennantu' cheę gúłale lu da naca cheę Díos. <sup>20</sup> Dxezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dxezreba' dxedíl-lálele lįwézrele, ne nácale xa lazre', ne dxezrá'ale lįwézrele, ne nácale zide lazre', ne nácale wetupa dizra' bizruj, ne dxezí tízrale lįwézrele, ne dxucá'ana szren cuínale, ne dxunle da caleļa. <sup>21</sup> Dxezreba' gate xida' xedajnná'a le'e, Díos gunę' xedué'eda' ne cheęle le'e, da gucuezre na neda' ne cheę zánele le'e, benne' ca' dxelúntequeze' dul-la, ne quebe dxulusané' dxelunę' da sban, ne da dxulucá'ana sban lįwezre', ne da caleļa da tu dxelúnzqueze'.

## 13

### *Dizra' bzebe*

<sup>1</sup> Da nígá naca na da guxunne' lasa xida' xedajnná'a le'e. Xúgutę dxulé'le lawe na naca na da li ne cheę dizra' cheę chupa u chunna benne' xelexechebe'. <sup>2</sup> Benne' ca' belunę' dul-la nédxula, ne xúgutęle le'e, dxácate ne zua' zitu' naga zrle, dxuzenda' le'e da xula ca da gucha' le'e gate bedajnná'a le'e da gudxupe' lasa, che xida' xedajnná'a le'e da xula quebe gudé'a cá'aze ca da ba nunle. <sup>3</sup> Nadxa lé'ele da gulé'e na dxenné' Cristo lu dxu'a neda', na' Le' quebe nate ni'a ne'e lu da gunę' cheęle, san naque' benne' wal-la ládujla le'e. <sup>4</sup> Da li gudé'e xaga bęguaj ca tu benne' nate ni'a ne'e, san naca banę' ne cheę xel-la waca cheę Díos. Cá'anqueze netu' nate ni'a nantu' ca da guca cheę', san lawe' da nácantu' tuze nen Le' gaca bantu' ne cheę xel-la waca cheę Díos cheę guntu' zrin cheęle le'e.

<sup>5</sup> Le guxúe xanne' cuínale cheę gueque be'ele che da li dxeajlı lázrele Cristo. Le guxúequeze cuínale. ¿Quebe dxeque be'ele zua' Jesucristo xichaj lázrdaule, che da li dxeajlı lázrele Le'?' <sup>6</sup> Dxebeza lazra' gueque be'ele quebe naca' neda' benne' wen lazre' lu da naca' cheę Cristo. <sup>7</sup> Dxenábantu' lau Díos cheę quebe bi da caleļa gunle, quegá cheę gulé'entu' dxennantu' da li, san cheę gunle le'e da xrlátaje, láqueze dxéquele le'e quebe dxennantu' da li. <sup>8</sup> Quebe bi gaca guntu' da dxedábaga na da li, san tuze da dxácale na da li. <sup>9</sup> Cheę le' na' dxebentu' gate nate ni'a nantu', che le'e nácale benne' wal-la, na' nábaquezentu' Díos cheę gácale dutę da dxal-la' xelaca bi cheę Díos. <sup>10</sup> Dxuzúaja' cheęle da nígá nédxula ca xida' xedajnná'a le'e, cheę quebe gun na ba xen gate xida', gácale'a benne' snia ca guchínedá' xel-la dxenná' bea chia', da benna Xránadxu neda' cheę séqueda' gusegula' le'e lu da naca cheę Díos, ne quegá cheę guzrí'a xi'a le'e.

<sup>11</sup> Na'a, bi bicha', le sua xel-la dxebe. Le gaca dutę da dxal-la' xelaca bi cheę Díos. Le xue zren lįwézrele. Le gaca tuze tule xetule, ne le sua xel-la dxebeza zri lazre', na' Díos, Bénnea' dxunne' dxi'u xel-la dxebeza zri lazre', ne nazrí'ine' dxi'u súalęne' le'e. <sup>12</sup> Le gugapa diuzre lįwézrele tule xetule, ne le gunida lįwézrele. <sup>13</sup> Xúgutę bi bíchedxu, bi cheę Cristo dxulugape' le'e diuzre.

<sup>14</sup> Dxaca lazra' gucá'ana Xránadxu Jesucristo le'e chawe', ne zrí'i Díos le'e, ne sua tuze Be' Lá'azxa nen le'e. ¡Ca'an gaca na!

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZR LA XU GALACIA

*Dizra' da bzuaj Pablo chee bi chee Cristo zaj zre'e xezr la xu Galacia*

<sup>1</sup> Neda', Pablo, naca' gubáz chee Cristo. Quebe gulesel-la bèneache neda', ne quegá buluzúa bèneache neda' gaca' gubáz. Caní bènqueze Jesucristo chia', ne Xradxu Dios, Bénnea' bsebane' Jesús ládujla benne' gate. <sup>2</sup> Xúgute benne' bíchedxu zralene' neda' zaj naque' neda' tuze. Neda' dxuzúaja' dizra' nigá chee xúgute cue' benne' bíchedxu zaj zre'e xezre ca' zaj nnita' xezr la xu Galacia. <sup>3</sup> Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'. <sup>4</sup> Jesucristo bzane cuine' chee gutie' ne chee dul-la da nabágadxu, chee bselé' dxi'u lu da naca chee xezr la xu nigá da naca na da calela. Bèñe' da guca lazre' Xradxu Dios. <sup>5</sup> ¡Gaca báqueze Dios chadia' chacanna! ¡Ca'an gaca na!

*Quebe de xetú dizra' chawe' chee Dios*

<sup>6</sup> Dxexebánele' éda' chee le'e lawe' da dxebéaj xíchajtele Dios, Bénnea' gunné' le'e chee si' lu na'le da dxunna Cristo, na' dxezi' lu na'le tu dizra' nazrala ca naca dizra' chawe' chee Cristo. <sup>7</sup> Da li quebe bi de xetú dizra' chawe', san zaj zra' bal-la benne' dxelún zréajene' le'e, ne dxelaca lazre' xuluchuque' dizra' chawe' chee Cristo. <sup>8</sup> Che nu benne' dxuzenne' le'e xetú dizra' da nazrala ca naca dizra' chawe' da ba bzénentu' le'e, dxenaba' lau Dios cue'e bènea' de', lálaca naca neda', u naca tu gubáz chee xabáa. <sup>9</sup> Báchequeze bzenda' le'e, ne dxuzenda' le'e da xula, che nu benne' guzenne' le'e tu dizra' da nazrala ca naca dizra' chawe' da ba guzi' lu na'le, dxenaba' lau Dios cue'e bènea' de'.

<sup>10</sup> Gate dxennia' da nigá, ¿Dxaca lazra' xegá'ana' xrlátaje lau bèneache, u che lau Dios? ¿Dxaca lazra' guna' da dxezaca ba lazre' bèneache? Che ca'an dxaca lazra' guna' da dxezaca ba lazre' bèneache, quebe naca' wen zrin chee Cristo.

*Ca bexaca Pablo gubáz chee Cristo*

<sup>11</sup> Dxuzéajni'ida' le'e, bi bicha', dizra' chawe' da dxuzenda' bèneache, na' quebe naca na tu da gulaj na lu xichaj lázrdau bèneache. <sup>12</sup> Quebe nu benne' bènne' na neda', ne quegá nu benne' bsédené' neda' le' na, san Léqueze Jesucristo bzenne' na neda'.

<sup>13</sup> Ba bènqueze ca bena' neda' nédxula gate na' nazí' lu na'a xel-la benne' xudau' chee judío ca', ca gudáu zi' xuzra' bi chee Dios zaj nácabe' bi chee Cristo, ne ben zi' lazra' guzria xi'a-be'. <sup>14</sup> Lu xel-la benne' xudau' chee judío ca', neda' ba bzrué'edxeda' ca xúgute bi walázr chia', bi ljwezra' ca', lawe' da be lázredxa' gapa' ca da xjácale xra xrtawa' ca'. <sup>15</sup> Dios guqugé' neda' nédxula gate za gálaja', na' lu xel-la zri'i lazre' chee' gunné' neda'. Nadxa gate guca lazre' le', <sup>16</sup> blé'ene' neda' Zrí'ine', chee guzenda' benne' ca' quebe zaj naque' judío ca naca chee Zrí'ine'. Gate guca da nigá, quebe nu benne' gunábeda', <sup>17</sup> ne quebe guxá'a Jerusalén cheajnábeda' benne' zaj naque' gubáz chee Cristo nédxudxa ca neda'. Guxá'a naga nababa xezr la xu Arabia, na' gudé na' bezrina' xezre Damasco.

<sup>18</sup> Gudé chun iza guxá'a Jerusalén, chee xeajchálajlèna' Pedro, na' begá'analèna' le' xta' gubizra. <sup>19</sup> Quebe nu ble'eda' xetú benne' gubáz chee Cristo, san tuze Jacobo, bi biche Xránadxu. <sup>20</sup> Ne chee La Dios dxapa' le'e, da li naca da nigá dxuzúaja' chee le'e.

<sup>21</sup> Ca gudé na' guxá'a xezre ca' zaj nababa xezr la xu Siria, ne xezre ca' zaj nababa xezr la xu Cilicia. <sup>22</sup> Benne' bíchedxu ca', bi chee Cristo zaj zre'e xezr la xu Judea quebe zaj nunbe'e neda'. <sup>23</sup> Belénzene' nu dxenna': "Bénnea' nédxula gudáu zi' xuzre' dxi'u, na'a dxuchálaje' dizra' chawe' chee xel-la dxeajli lazre' Cristo, da na' guca lazre' guzria xi'e nédxute." <sup>24</sup> Na'a dxelúe lá'ane' Dios ca da belenne' ca naca chia'.

## 2

*Benne' gubáz ca' dxelezi' lu ne'e Pablo*

<sup>1</sup> Ca gudé chidá' iza guxá'a xecha lasa Jerusalén nen Bernabé, na' ben bi Tito neda' tu zren. <sup>2</sup> Guxá'a na' lawe' da ble'e Dios neda' dxal-la' cha'a na'. Na' cheézela bchálajlèna' benne' ca' zaj naque' blau ládujla bi chee Cristo, ne bzenda' le' dizra' chawe' da dxuchálaja' ládujla benne' ca' quebe zaj naque' judío. Bena' caní chee nezda' quebe guca dácheze zrin da ba bena', ne da dxuna'. <sup>3</sup> Gulezi' lu ne'e zrin nuna', na' quebe nu gunná be'e Tito, bi zálezbe' neda', chugu lu belá' cheebe' da gulé'e na nácabe' bi chee Dios, lálaca quebe nácabe' judío. <sup>4</sup> Bal-la benne' quebe zaj naque' du lazre' benne' bíchedxu, benne' gulu'e ládujla dxi'u lu da wen lazre', gulaca lazre' chugu da gulé'e na lu belá' chee Tito. Benne' caní gulu'e ládujla dxi'u chee xelenézene' ájala xelegúe' lataj da nazidxu lu na' Jesucristo, chee xuluxuzúe' dxi'u ca

benne' zaj nada'u lu da bdxixruj bea Moisés. <sup>5</sup> Ne chíteze quebe bentu' lē' lataj xelegú'u xel-lē' netu' lawe' da guca lázrentu' xegá'analē le'e da li dizra' chawe' chee Cristo.

<sup>6</sup> Benne' ca' zaj naque' blau quebe bi da cube bulusebague' netu'. Da zaj naque' quebe bi naca na chia' lawe' da quebe xuchí'a Dios ca da nalá' láweze chee bēnneache. <sup>7</sup> Quebe bi bulusebague' neda', lawe' da belexúnbe'e Diósqueze bsebague' neda' guzenda' benne' ca' quebe zaj naque' judío dizra' chawe', cáteze bsebague' Pedro guzenne' benne' judío ca' dizra' chawe'. <sup>8</sup> Léqueze Dios na', Bēnnea' bzue' Pedro gubáz chee' ládujla benne' judío ca', cá'aqueze bzue' neda' gaca' gubáz chee' ládujla benne' quebe zaj naque' judío.

<sup>9</sup> Chee lē na', Jacobo, ne Pedro, ne Juan, benne' zaj naque' blaudxa, belexúnbe'e bēn Dios neda' culuēn nigá, na' gulezí' lu ne'e neda', ne Bernabé, na' belunē' tuze dizra' cheajzentu' netu' benne' ca' quebe zaj naque' judío dizra' chawe', dxácatē na' lē' xuluzenne' na benne' judío ca'. <sup>10</sup> Túteze da gulenábene' netu' xexache lázrentu' benne' xache' ca', da na' dxue lazra' dxuna'.

*Pablo dxedil-lē' Pedro lu xezre Antioquia*

<sup>11</sup> Gate bla' Pedro xezre Antioquia gudil-la' lē' caníqueze lawe' da gunegue lazre'. <sup>12</sup> Nédxutē gudágulēnē' benne' ca' quebe zaj naque' judío cadxa belelá' bal-la benne' gusel-la Jacobo. Nadxa bebigue'e chala'ala, ne bsané' québedxa gudágulēnē' benne' ca' lawe' da bzrebe' judío ca', benne' ca' zaj nadxugu lu belá' chee' da dxulé'e na. <sup>13</sup> Nadxa xezícadxa judío ca' zaj naque' bi chee Cristo belunē' tu zren Pedro lu da dxunē' láweze. Caní belunē', na' ca' bēntē Bernabé tu zren benne' ca' lu da na' dxelunē' láweze. <sup>14</sup> Gate ble'eda' neda' quebe dxelunē' cáteze naca chee da li chee dizra' chawe' chee Cristo, na' gucha' Pedro lau xúgutē benne' ca': Lue' nacu' judío, na' benu' ca tu benne' quebe naque' judío, ne quebe bēnu' ca tu benne' judío. ¿Biz chee na' dxenná be'enu' benne' quebe zaj naque' judío xelunē' ca dxelún benne' judío?

*Benne' judío xeelé' che dxeajli lazre' Cristo ca dxaca chee xezícadxa benne'*

<sup>15</sup> Cá'aqueze gucha'-ne': Dxi'u nácadxu benne' judío lawe' da nálajdxu ca', ne quebe nácadxu benne' dul-la ca benne' zaj nababa xezícadxa xezr la xu ca'. <sup>16</sup> Nézedxu netú benne' quebe xegá'ane' xrlátaje lau Dios lawe' da nunē' da bdxixruj be'e Moisés, san tuze che dxeajli lazre' Jesucristo. Chee lē na' cá'aqueze dxi'u dxeajli lázredxu Cristo chee xegá'anadxu xrlátaje lau Dios ne chee xel-la dxeajli lazre' cheedxu Cristo, ne quegá lawe' da bēndxu ca nadxixruj bea na. Netú benne' quebe xegá'ane' xrlátaje lau Dios lawe' da nunē' da nadxixruj bea na.

<sup>17</sup> Na'a, che dxi'u dxuxrén lázredxu nagá'anadxu xrlátaje lau Dios ne chee Cristo, ne che zua da dxulé'e na ne nácadxu benne' dul-la, ¿nnadxu Cristo dxunne' dxi'u lataj gundxu dul-la lawe' da québedxa dxenná be'e da bdxixruj be'e Moisés dxi'u? ¿Cabata! <sup>18</sup> Che dxuchínajá' tu, na' che té na' xexuna' na, na' nabaga' zria. <sup>19</sup> Ba naca' ca tu benne' gate lu da naca chee da nadxixruj bea na. Da nadxixruj béaqueze ble'e na neda' naca' ca tu benne' gate, chee gaca bana' ne chee da nun Dios. <sup>20</sup> Ba naca' ca tu benne' gate lawe' da naca chia' ca naca chee tu benne' gudá' xaga béguaj tu zren nen Cristo. Chee lē na', québedxa naca bana' neda'. Cristo naca bane' lu xichaj lázrdawa'. Xel-la nabán da napa' lu belá' dxen chia', napa' na ne chee xel-la dxeajli lazre' chia' Zri'ine Dios, Bēnnea' bzri'ine' neda', ne bzane cuine', gutiē' waláz chia' neda'. <sup>21</sup> Quebe dxaca lazra' guzúa' chala'ala xel-la zri'i lazre' chee Dios. Che nu benne' gaca xegá'ane' xrlátaje lau Dios lawe' da nunē' da nadxixruj bea na, na' dácheze guca da bēn Cristo gate gutiē'.

### 3

*Dxezidxu Be' Lá'azxa ne chee xel-la dxeajli lazre'*

<sup>1</sup> Bi bicha', zrale Galacia, nácale le'e benne' xala ca'. ¿Zua nu benne' dxezí xē'e le'e chee québedxa guzúale dizra' chee da li? Ba blé'entu' le'e caníqueze Jesucristo, ca gudé'e le'e xaga béguaj. <sup>2</sup> Le xexque neda': ¿Guzile Be' Lá'azxa lawe' da bēnle da bdxixruj be'e Moisés, u lawe' da guxéajle chee da bēnele? <sup>3</sup> ¿Ajala chee na' nácale benne' xala? ¿Dxéquele gunle gácale dutē da na' guzú laule gácale ne chee Be' Lá'azxa? <sup>4</sup> ¿Dácheze gudele záneté xel-la zí' ca'? Dxaca lazra' quebe guca na níteze. <sup>5</sup> Gate Dios dxunne' le'e Be' Lá'azxa chee', ne dxunē' xel-la waca ca' chee xabáa ládujla le'e, ¿dxunē' na lawe' da dxunle ca nadxixruj bea na, u lawe' da guxéajle chee dizra' chawe' da bēnele?

<sup>6</sup> Abraham guxeajli lazre' Dios, na' Dios guzú' lu ne'e da nigá ca tu da bca'ana lē' xlátaje. <sup>7</sup> Chee lē na' dxa-la' nézele, benne' ca' da li zaj naque' zri'ine zre sua Abraham zaj naque' benne' dxeleajli lazre' Dios. <sup>8</sup> Naxúaj na lu dizra' lá'azxa ca naca da nigá. Lawe' da neze Dios nédxutē gucá'ane' xlátaje benne' quebe zaj naque' judío, benne' xealeajli lazre' Lē', na' guzre' Abraham nédxutē dizra' chawe' nigá, gunné': "Gaca chawe' chee benne' dutē xezr la

xu ne chiu' lue'.<sup>9</sup> Ca'an naca, dxaca chawe' chee benne' dxeleajlí lazre' Dios tu zren nen Abraham, bénnea' guxeajlí lazre' Dios.

<sup>10</sup> Benne' ca' dxuluxrén lazre' zaj nagá'ang' xrlátaje lau Dios lawe' da zaj nunge' ca da nadxixruj be'e Moisés zaj xu'e de' lawe' da naxúaj lu dizra' lá'azxa da dxenná na: Zaj xu'u de' xúgte benne' quebe dxelúnqueze' xúgte da nadxixruj bea na, da na' naxúaj na lu xiche lá'azxa. <sup>11</sup> Dxunna bea na netú benne' quebe xegá'ang' xrlátaje lau Dios lawe' da nunge' da nadxixruj bea na lawe' da naxúaj lu xiche lá'azxa da dxenná na: Bénnea' nagá'ang' xrlátaje lau Dios gata' chee' xel-la nabán li lazre' che dxeajlí lazre' Dios. <sup>12</sup> Bénnea' dxunge' ca bdxixruj be'e Moisés quebe dxunge' na ne chee' xel-la dxeajlí lazre' chee' lawe' da naxúaj da dxenná na: Benne' dxunge' xúgte da caní gaca bané' ne chee' le' na.

<sup>13</sup> Cristo bselé' dxi'u lu de' da xu'u nu quebe dxun da nadxixruj bea na lawe' da guxú'queze' de' waláz cheedxu cáteze naxúaj lu dizra' lá'azxa da dxenná na: Xu'u de' bénnea' de'e le'e xaga. <sup>14</sup> Da nigá guca na chee' gaca gun Dios xrlátaje benne' ca' quebe zaj naque' benne' judío, da na' guchebe lazre' gune' lau Abraham ne chee' Jesucristo, na' chee' sí' lu nnadxu xúgte dxu Be' Lá'azxa ne chee' xel-la dxeajlí lazre' cheedxu ca da guchebe lazre' Dios.

#### *Da naca chee' da nadxixruj bea na, ne da naca chee' da guchebe lazre' Dios*

<sup>15</sup> Bi bicha', dxulé'eda' le'e ca da dxaca chee' bénneache. Gate tu benne' dxunge' tu xel-la wezria, ne ba bzuajte' láqueze' lawe' na, netú benne' quebe gaca guchinnaje' na, ne quebe bi gaca gudé'e chee' na. <sup>16</sup> Dios guchebe lazre' da gune' chee' Abraham, ne chee' zri'ine zre sue'. Quebe dxenná na: Chee' zri'ine zre sue' ca', da naca na chee' benne' zan, san dxenná na: Chee' zri'ine zre su', da naca na chee' tuze benne', bénnea' naque' Cristo. <sup>17</sup> Da dxennia' naca na da nigá: Dios beñe' tu xel-la wezria nen Abraham, ne bca'ana chawe' na. Chee' le' na', da bdxixruj be'e Moisés da bla' na ca gudé' tapa gaxúa chi dxua iza quebe gaca guchinnaj na xel-la wezria na', u xucá'ana na dácheza da guchebe lazre' Dios. <sup>18</sup> Che dxezidxu da dxunna Dios che dxundxu ca da bdxixruj be'e Moisés, quebe naca na tu da nachebe lazre' Dios, san da li Dios guchebe lazre' guné'zruje' na cá'aze chee' Abraham.

<sup>19</sup> Na'a xca', ¿bizra dxun da bdxixruj be'e Moisés? Dios bné'zruje' da na' gudé' na' chee' gulé'e na ca naca xtul-la bénneache cadxa xelá' zri'ine zre sua Abraham na', Bénnea' guchebe lazre' Dios gune' da xrlátaje chee'. Dios gusel-le' da gunná bé'eng' lu na' gubáz chee' xabáa chee', na' Moisés guque' benne' dxudé' dizra' cheeñ. <sup>20</sup> Quebe dxun na ba xen nu benne' gudé' dizra' gate naca na chee' tuze benne', na' Dios naque' tuze, Bénnea' guchebe lazre' chee' Abraham ca da gune'.

#### *Da dxun da bdxixruj be'e Moisés*

<sup>21</sup> ¿Nnadxu dxedábaga da bdxixruj be'e Moisés da na' guchebe lazre' Dios? ¡Cabata! Che da nadxixruj bea na da bnezruj Dios gaca gunna na xel-la nabán chee' bénneache, na' gaca xegá'ana xrlátaje lau Dios tu benne' che gune' ca da nadxixruj bea na na'. <sup>22</sup> Dxenná na lu dizra' lá'azxa, xúgte bénneache zaj nabague' dul-la chee' gaca xelezi' lu ne'e da guchebe lazre' Dios gunne' benne' ca' xeleajlí lazre' Jesucristo.

<sup>23</sup> Nédxudxa ca bzrin zra gaca nu cheajlí lazre' Cristo, ne chee' da nadxixruj bea na, xúgte dxu, benne' judío, gúcadxu ca benne' zaj xu'e lizre xia, lawe' da xadize bendxu ca dxenná da nadxixruj bea na, na' gulézadxu ca bzrin zra guca cheajlí lázredxu Cristo. <sup>24</sup> Da nadxixruj bea na gunná be'e na dxi'u, ca dxun tu benne' dxusegule' bidau' chee' benne' xula cadxa bzrin zra bla' Cristo, chee' xegá'anadxu xrlátaje lau Dios gate guxeajlí lázredxu Cristo. <sup>25</sup> Na'a lawe' da ba bzrin zra gaca cheajlí lázredxu Cristo, québedxa xú'udxu lu na' da nadxixruj bea na da naca na cheedxu ca tu benne' dxusegule' bidau'.

<sup>26</sup> Xúgtele na' dxeajlí lázrele Jesucristo nácale tuze nen Le'. Chee' le' na' nácale bi chee' Dios. <sup>27</sup> Xúgtele le'e na' gudxúale nisa chee' gácale tuze nen Cristo, Le' naque' chee' ca tu ladxe' nácale. <sup>28</sup> Québedxa dxelé'e Dios le'e ca benne' judío, u benne' quebe naque' judío, u ca benne' nada'u, u benne' quebe nada'u, u ca benne' biu, u nu'ula. Dxelé'eng' le'e, naca xúgtele ca tuze bel-la' dxen lawe' da nácale tuze nen Jesucristo. <sup>29</sup> Che nácale bi chee' Cristo, da li nácale zre sua Abraham, na' gaca chee' da guchebe lazre' Dios gune'.

## 4

<sup>1</sup> Da dxaca lazra' nnia' naca na da nigá: Dxacate ne naca bidau' bi na' gaca chee'be' da naca chee' xrabe', nácabé' ca bi nada'u xu'ube' lu na' xránabe', lálcala da li gácabé' xrane xúgte da de lizre xrabe'. <sup>2</sup> Xu'ube' lu na' benne' dxulusédené'-be', ne lu na' benne' ca' xu'u lu ne'e da naca chee'be', cadxa zrin zra gulé'e xrabe' da li nácabé' zri'ine'. <sup>3</sup> Cá'aqueze dxaca cheedxu. Gate ne nácadxu ca bidau', xú'udxu lu na' xúgte da dxelenná bea na lu xezr la xu nigá. <sup>4</sup> Gate bzrin zra ba ble'e lau Dios, na' gusel-le' Zri'ine', gúlajbe' ne chee' tu nu'ula, na' guxú'e lu na'

da bdxixruj be'e Moisés. <sup>5</sup> Błe'e bselé' benne' zaj xu'e lu na' da nadxixruj bea na, chee gaca si' lu na' Dios dxi'u ca zri'inequeze'.

<sup>6</sup> Lawe' da ba nácale bi chee Dios, Le' gusel-le' Be' Lá'azxa chee Zri'ine' lu xichaj lárzdaule, na' dxenná Be' na': "Abba", da zéaję na: Xrae. <sup>7</sup> Ca'an naca, ba nácadxu bi chee Dios, ne québedxa nácadxu ca benne' zaj nada'u lu na' da bdxixruj be'e Moisés. Na' lawe' da nácadxu bi chee', Dios gunne' dxi'u da de cheen'. Cani naca lawe' da nácadxu Cristo tuze.

*Pablo dxe'e gunne xue chee bi ca' chee Cristo*

<sup>8</sup> Da líqueze, gate quebe ne gúnbeale Dios, gúcale benne' zaj nada'u chee dios ca', da' quebe zaj nácaqueze dios. <sup>9</sup> Na'a gate ba núnbeale Dios, u nnadxu, Dios na' núnbe'e le'e, ¿ájazra gunle xexú'ule xecha lasa lu na' da dxelenná bea na lu xezr la xu nigá, da ca' quebe zaj zaca? <sup>10</sup> Le'e ne dxapa ba lá'anale bal-la zra ca', ne bal-la beu' ca', ne tu tu iza ca'. <sup>11</sup> Dxezrébele'a beña' zrin níteze ládujla le'e gate bzenda' le'e dizra' chawe' chee Cristo.

<sup>12</sup> Bi bícha'dau', dxata' xúeda' le'e gácale ca naca' neda', québedxa xu'a lu na' da nadxixruj bea na, lawe' da gúcaqueza' neda' ca nácale le'e. Quegá bi da calęla benle chia' neda'. <sup>13</sup> Ba nézqueze gate nédxudau' bzenda' le'e dizra' chawe' chee Cristo. Guca na gate na' guxu'a tu xízrawe'. <sup>14</sup> Xízrawe' na' guca na da gusegute na le'e, san le'e quebe begútele neda', ne quebe bzúale neda' chalá'ala, san guzi' lu na'le neda' ca tu gubáz chee xabáa chee Dios, u ca nácaqueza' Jesucristo. <sup>15</sup> ¿Bizra guca chee xel-la dxebe da guzúale? Waca nnia' tu da xecá'ana le'e chawe', la naca da guzéquele gunle, bebéajtele xiaj láuqueze, chee gúnmale na neda'. <sup>16</sup> Na'a, ¿bexaca' ca tu benne' dxecuđene' le'e lawe' da gucha' le'e da li?

<sup>17</sup> Benne' ca' dxelaca lazre' chugu lu belá' chee da na' dxul'é e na, dxe'e gunne xue chee le'e, san quegá chee xegá'ana le' chawe'. Da dxelaca lazre' naca na xulucuaşe' le'e nen netu' chee cuele gunne xue chee le'. <sup>18</sup> Naca chawe' cuedxu gunne xue chee benne' xula chee xegá'ang' chawe', ne quegaze gate zúalęna' le'e. <sup>19</sup> Zri'ina'dau', naca chia' ca zua' lu xel-la dxudía ne chee ca dxaca chee tu nu'ula ba zua san' bidau', ne wabédxequęza' gunne xue chee cadxa gul'é lau da li dxenná bea Cristo lu xichaj lárzdaule. <sup>20</sup> Dxezé lazra' súałęna' le'e ná'aqueze chee gaca guchálajęna' le'e xezicadxa dizra' lawe' da dxezi'ale'a gunne xue.

*Da dxusede dxi'u ca guca chee Sara, ne chee Agar*

<sup>21</sup> Le'e na', dxaca lázlele chu'ule lu na' da bdxixruj be'e Moisés, le xechébeque da nigá: ¿Quebe ne xénmele ca dxenná da nadxixruj bea na? <sup>22</sup> Dxenná na gulezrá' chupa zri'ine Abraham. Tube' gúcabe' zri'ine zru'ulaqueze', nu'ula quebe nada'u. <sup>23</sup> Zri'ine nu'ula nada'u gúlajbe' cáteze dxelalaj xúgute bidau', na' zri'ine nu'ula quebe nada'u gúlajbe' chee guca li ca da guchebe lazre' Dios. <sup>24</sup> Da nigá naca na ca tu da dxul'é e na. Dxúpatę nu'ula cani dxulul'é'eng' ca zaj naca chupa xel-la wezria. Tu xel-la wezria nigá naca na da bnezruj Dios Moisés lu xi'a Sinaí, da na' dxul'é e Agar. Benne' ca' zaj xu'e lu na' xel-la wezria nigá dxelálaję' ca benne' zaj nada'u. <sup>25</sup> Cá'anqueze dxul'é e Agar da naca chee xi'a Sinaí da zua na ga nababa Arabia, Cá'anqueze xi'a nigá dxul'é e na ca naca Jerusalén lu zra na'a zra lawe' da zaj naca benne' chee xezre nigá ca benne' zaj nada'u tu zren nen zri'ine' ca'. <sup>26</sup> Benne' zaj nababe' Jerusalén chee xabáa quebe zaj naque' benne' zaj nada'u, na' dxi'u nácadxu ca zri'ine benne' ca'. <sup>27</sup> Lu dizra' lá'azxa, naxúaj na ca naca chee benne' zaj nababa Jerusalén chee xabáa na', da dxenná na:

Gubé lue', nu'ula wizre, lue' quebe nu chilá' zri'inu'.

Gudxezre xa'a lu xel-la dxebe', lue' quebe núnbe'u xel-la dxudía

chee xel-la dxezán bidau'.

Nu'ula quebe guzán bidau' gate guque' cuide' waxandxa zri'ine' quęzcala zri'ine nu'ula zúalęne' benne' chee'.

<sup>28</sup> Le'e, bi bícha'dau', nácadxu ca Isaac. Nácadxu zri'ine Abraham, bi ca' guchebe lazre' Dios gunéruzje' le'. <sup>29</sup> Na'a ca guca lu zra na', Ismael, zri'ine Abraham na', bi gúlajbe' ca dxelalaj xúgute bidau', gudáu zi' xúzrebe' Isaac, zri'ine Abraham na', bi gúlajbe' ne chee Be' chee Dios, cá'anqueze dxaca na na'a. <sup>30</sup> Na'a ¿bizra dxenná dizra' lá'azxa? Dxenná na: Bebéaj chalá'ala nu'ula nada'u tu zren nen zri'ine' lawe' da quebe gaca chee zri'ine nu'ula nada'u sibe' da dxal-la' si' zri'ine nu'ula quebe nada'u. <sup>31</sup> Ca' naca na, bi bícha', quebe nácadxu ca Ismael, zri'ine nu'ula nada'u, san nácadxu ca Isaac, zri'ine zru'ula Abraham, nu'ula quebe nada'u.

## 5

*Le sua chuchu lu xel-la weselá*

<sup>1</sup> Cristo bselé' dxi'u lu na' da nadxixruj bea na chee gácadxu ca benne' quebe zaj nada'u. Le sua chuchu lu xel-la weselá da ba guzile, ne québedxa xexú'ule lu na' da na' dxun na le'e benne' zaj nada'u.

<sup>2</sup> Le xene da dxapa' le'e. Neda', Pablo, dxapa' le'e, che güele lataj chugu lu belá' chee da na' dxul'é e na, quebe bi da ba neza gaca chee da naca chee Cristo. <sup>3</sup> Dxaca lazra' xapa'



le'e xecha lasa, che nu benne' chugu lu belá' chee' da na' dxulé'e na, dxun na ba xen gun béneea' xúgute da bdxixruj be'e Moisés. <sup>4</sup>Le'e na' dxéquele nagá'anale xrlátaje lau Dios lawe' da nunle ca nadxixruj bea na, ba bcá'anale da naca chee' Cristo, ne dxexebéaj cuínale lu xel-la zri'i lazre' chee' Dios. <sup>5</sup>Dxi'u, ne chee' Be' Lá'azxa, ne lawe' da dxeajlí lázredxu Cristo, dxuxrén lázredxu nagá'anadxu xrlátaje lau Dios. <sup>6</sup>Che nácadxu tuze nen Cristo, quebe bi da ba neza gaca na cheedxu che chugu lu belá' cheedxu da na' dxulé'e na, u che quebe chugu na. Da ba neza naca na cheedxu che dxeajlí lázredxu Cristo, ne' xel-la dxeajlí lazre' cheedxu dxuzúa na dxi'u lu xel-la zri'i lazre'.

<sup>7</sup>Da xrlátaje bënquezele. <sup>8</sup>Nuzra gulú'u xel-la le'e chee' québedxa guzúale dizra' da li? <sup>8</sup>Quegá Dios bene' da na'. Nácaqueze Le' Bénnea' bláwizre' le'e. <sup>9</sup>Quebe gal-la lázrele da dxenná na: Láteze cua zichaj dxuchazra na ca naca cua. <sup>10</sup>Dxuxrén lazra' Xránadxu ca naca chee' le'e, quebe guzúale chalá'ala da nigá dxuchálaja'. Dios gudé' lu da ba xa' bennea' dxun zréajene' le'e, núteteze naque'.

<sup>11</sup>Da naca chia', bi bicha', la xapa' neda' benneache dxal-la' chugu lu belá' chee' da na' dxulé'e na, quegá weláu zi' xuzre benne' judío neda' lawe' da che dxuna' da caní quebe xelaque' tula che cu'a lban chee' xaga béguaj chee' Cristo. <sup>12</sup>Na' a ca naca chee' benne' ca', benne' dxelún zréajene' le'e, ne dxelenné' dxal-la' chugu lu belá' chee' da na' dxulé'e na, dxaca lazra' chugu ca da zaj naca benne' ca' chee' québedxa xelún zréajene' le'e.

<sup>13</sup>Bi bicha'dau', Dios bláwizre' le'e chee' gácale benne' quebe zaj nada'u, ne québedxa xu'ule lu na' da bdxixruj be'e Moisés. Quebe guchínele da nácale chee' gunle ca da dxezá lázrele. Le gun cuínale ca benne' zaj nada'u, chee' gunle zrin chee' le sa' ljwézrele tule xetule lu xel-la zri'i lazre' chee'le. <sup>14</sup>Xúgute da nadxixruj bea na dxun bennea' dxuzúe' dizra' da na' dxenná na: Bzri'i le sa' ljwezru' cáteze nazri'i cuinu'. <sup>15</sup>Che dxunle ca dxelún be' xixre' ca', ne dxun zi' ljwézrele, ne dxasa ljwézrele tule xetule, le guxúe ga guzrí'a xi' cuínale.

*Da dxundxu cáteze dxezá lazre' belá' dxen cheedxu, ne da dxundxu cáteze dxezá lazre' Be' Lá'azxa*

<sup>16</sup>Da nigá dxapa' le'e: Le gun cáteze dxulé'e Be' Lá'azxa le'e, na' quebe gunle cáteze dxezá lazre' belá' dxen chee'le. <sup>17</sup>Da dxezá lazre' belá' dxen cheedxu dxedíl-lalé na da dxezá lazre' Be' Lá'azxa, na' da dxezá lazre' Be' Lá'azxa dxedíl-lalé na da dxezá lazre' belá' dxen cheedxu. Dxupate da caní dxeledíl-lalé ljwezre na, na' chee' le na' quebe gaca gunle da dxaca lázrele gunle. <sup>18</sup>Che dxunle ca da dxulé'e Be' Lá'azxa le'e, québedxa xu'ule lu na' da nadxixruj bea na.

<sup>19</sup>Zaj nulé'e láuqueze da dxelún benne' ca' dxelune' cáteze da dxezá lazre' belá' dxen chee': Deledálene' nu'ula xula.

Dulucá'ana dítajé' le sa' ljwezre'  
Dxelune' da sban, ne da schanni'.

<sup>20</sup>Dxelúe szrene' bedau' xiaj xaga, ne dxelune' xel-la wazrá'.

Dxelecuídené' le sa' ljwezre', ne dxelezzré'e.

Dxelaque' wide', ne dxelezzrá'a xíchaje'.

Dxelenné' chee' ljwezre'.

Dxelebéaj xichaj ljwezre' tue' xetue', ne dxelaque' chupa la'a.

<sup>21</sup>Dxelaque' xa lazre', ne dxelutie' benne'.

Dxelezzréne', ne dxeledanne' da caléla da dxelune' lu laní ca'.

Zánete da dxelundxe' bi chee' da caní. Che le na' dxapa' le'e ca bënqueza' nédxute, benne' dxelune' da caní quebe xelexú'e naga dxenná bea Dios.

<sup>22</sup>Da dxelún benne' ca' dxelune' cáteze da dxulé'e Be' Lá'azxa le' zaj naca na caní:

Zaj nazri'ine' le sa' ljwezre', ne zaj nape' xel-la dxebé.

Dxelebeza zri lazre', ne zaj naque' zren lazre'.

Zaj naque' zri'i lazre', ne dxelune' da zri'a chawe'.

Zaj naque' li lazre'.

<sup>23</sup>Zaj naque' dxexruj lazre', ne dxelenná be'e cuine'.

Quebe de da nadxixruj bea na da dxé na dxi'u quebe gundxu da caní. <sup>24</sup>Benne' ca' zaj naque' bi chee' Cristo ba buludé'e le'e xaga béguaj belá' dxen chee' nen xúgute da dxezá lazre na. <sup>25</sup>Che naca bandxu ne chee' Be' Lá'azxa, dxal-la' gundxu ca da dxulé'e Be' Lá'azxa dxi'u.

<sup>26</sup>Quebe dxal-la' gucá'ana szren cuínadxu, ne quebe gácadxu wide' tudxu xetudxu, ne quebe sua da xa lazre' ládujla dxi'u.

## 6

*Le gácale le sa' ljwézrele tule xetule*

<sup>1</sup>Bi bicha'dau', che nu benne' ládujla le'e nune' dul-la, le'e na' dxedálele Be' Lá'azxa dxal-la' gácalele bennea' chee' xezé chúchue'. Dخال-la' gácale dxexruj lazre' gunle da nigá chee' quebe

güele lataj da xriwe' cu'u xel-la na le'e. <sup>2</sup> Le gácale le sa' l'jwézrele tule xetule lu da naca xua chee, na' caní gunle ca nadxixruj be'e Cristo.

<sup>3</sup> Che nu benne' dxéquene' naque' benne' blau, ne quebe nu naque', dxezí xézqueze cuine'. <sup>4</sup> Tu tu benne' dxal-la' na' xánnie' da dxúnqueze', na' che nagá'ana xrlátaje da dxune', waca xape' ba lá'ana da dxúnqueze', ne quegá da ben xetú benne'. <sup>5</sup> De tu xua da nabágadxu chee Cristo, da dxal-la' gua tu tu benne'.

<sup>6</sup> Benne' zua nu dxusede le' ca naca xrtizra Dios dxal-la' gunézruje' late' da naca chee' chee bénnea'.

<sup>7</sup> Quebe si xe cuínale: Netú benne' gaca quitajlene' Dios. Da dxaza bénneache, léqueze na xelape'. <sup>8</sup> Che dxune' da dxezá lazre' bela' dxen chee', da xezi'e naca na xel-la nabán zeajlí canna. <sup>9</sup> Ca' nacan xca', quebe gusandxu gundxu da xrlátaje lawe' da che quebe gate lazrdxu, lu zra na' quizruj Dios dxi'u, na' xezidxu lazruj cheedxu. <sup>10</sup> Chee le na', gate nazidxu lataj, dxal-la' gundxu da xrlátaje chee le sa' l'jwézredxu, ne da dxundxa na ba xen, gundxu da xrlátaje chee le sa' l'jwézredxu dxeleajlí lazre' Cristo.

*Da bzuaj Pablo nen ná'queze'*

<sup>11</sup> Le nna'xque cadite da zri'a naca da nigá dxuzúaja' cheele nen ná'queza'. <sup>12</sup> Benne' ca' dxelaca lazre' chugu lu bela' chee da na' dxulé'e na, dxelune' na chee xelexegá'ane' chawe' lau bénneache, ne chee quebe xeláu zi' xuzre' le' lawe' da dxuluchálaje' dizra' chee da ben Cristo le'e xaga béguaj. <sup>13</sup> Benne' caní, benne' zaj nadxugu lu bela' chee' da na' dxulé'e na quebe dxelune' xúgute ca da nadxixruj bea na. Dxelaca lazre' chugu lu bela' chee da na' dxulé'e na chee gaca xulucá'ana szren cuine' ca naca da belune' chee. <sup>14</sup> Quebe dxaca lazra' xucá'ana szren cuina' chee tu da beña', san tuze chee da ben Xránadxu Jesucristo le'e xaga béguaj. Ne chee le' naca xezr la xu nigá ca tu da gate chia' neda', na' neda' naca' ca tu benne' gate. Québedxa dxezá lazra' da naca chee xezr la xu. <sup>15</sup> Che nácadxu tuze nen Cristo, quebe bi da ba neza gaca na cheedxu che nadxugu lu bela' cheedxu da na' dxulé'e na, u che quebe nadxugu na. Da ba neza naca na cheedxu che nácadxu benne' cube lu xichaj lázrdaudxu. <sup>16</sup> Dxenaba' lau Dios gunézruje' xel-la dxebeza zri lazre' chee xúgute benne' ca' zaj naque' benne' cube caní, ne xexache lazre' benne' ca' da li zaj naque' bi chee'.

<sup>17</sup> Lawe' da zaj zria lu bel-la' dxen chia' xizra' da dxululé'e na naca' wen zrin chee Cristo quebe nu benne' dxal-la' gulálene' neda' na'a, ne lu da za za'.

<sup>18</sup> Le'e, bi bícha'dau', dxenaba' lau Xránadxu Jesucristo guné' chawe' chee xúgutele. Ca'an gaca na.

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE EFESO

*Pablo dxugape' diuzre bi chee Cristo zaj zre'e xezre Efeso*

<sup>1</sup> Neda', Pablo, naca' gubáz chee Jesucristo lawe' da guca lazre' Dios gaca' caní. Dxuzúaja' da nigá chee le'e, nácale bi chee Dios, ne dxeajlí lázrele Jesucristo, na' zrale xezre Efeso. <sup>2</sup> Dxenaba' lau Xradxu Dios, ne lau Xránadxu Jesucristo gun chawe'e le'e, ne gunne' le'e xel-la dxebeza zri lazre'.

*Ca naca da chawe' da dxezi' lu nnadxu ne chee Cristo*

<sup>3</sup> Dxue lá'anadxu Dios, Xra Xránadxu Jesucristo lawe' da ba bene' cheedxu ca naca xúgute da chawe' chee Be' Lá'axza da zá'aca xabáa lawe' da nácadxu bi chee Cristo. <sup>4</sup> Dios guqu'é dxi'u chee gácadxu bi chee Cristo gate quebe ne gunte' xezr la xu, chee gácadxu benne' lá'axza, ne du lazre' lau Le'. <sup>5</sup> Lawe' da bzri'ine' dxi'u, bene' cheedxu gate nate si' lu ne'e dxi'u ca bi cheéqueze' ne chee Jesucristo, cáteze da guca lazre' guné'. <sup>6</sup> Chee le' na', tu dxue lá'anazquezdxu Dios ne chee xel-la xrlátaje chee' da naca na szrenté. Lu xel-la xrlátaje chee' na' gúcalene' dxi'u lawe' da nácadxu tuze nen Zri'ine', bi nazri'ite lazre'. <sup>7</sup> Ne chee Zri'ine' na' naxá'awene' dxi'u nen dxen cheéqueze', na' lu xel-la zri'i lazre' zren chee' bnite lawe' cheedxu dxi'u ca naca dul-la da nabágadxu. <sup>8</sup> Dios nazri'ilé'ene' dxi'u, ne dxunne' dxi'u xel-la sina, ne xel-la dxéajni'i, <sup>9</sup> na' bzéajni'ine' dxi'u ca naca da dxaca lazre' da bgache na, da na' lu xel-la zri'i lazre' chee' gune' ne chee Cristo. <sup>10</sup> Nuchague' xúgute da zaj zua na xabáa, ne xezr la xu, chee xelú'u na lu na' Cristo, da gusexúzre' guné' gate zrin zra chee na.

<sup>11</sup> Ne chee Cristo Dios guqu'é dxi'u chee' gate nate, chee si' lu nnadxu da xáladxu da gunna Le', ca da ba núnqueze Dios, Bénnea' dxune' xúgute da dxeque Le' xrlátaje. <sup>12</sup> Caní bene' chee gácadxu tu da gucá'ana szren na xel-la szren chee', nácadxu dxi'u benne' nedxu dxebeza lázredxu Cristo. <sup>13</sup> Cá'anqueze le'e, gate benle dizra' li, da naca na dizra' chawe' chee da ben Cristo, bselé' le'e. Guxeajlí lázrele Le', na' Dios bzue' Be' Lá'axza lu xichaj lázrdaule ca tu da dxunna bea na nácale bi chee', ca guchebe lazre' guné'. <sup>14</sup> Be' Lá'axza na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi chee' ca', chee' gie lá'anaquezdxu Le' ca naca xel-la szren chee'.

*Dxenaba Pablo gunezruj Dios xel-la sina chee bi ca' chee Cristo*

<sup>15</sup> Chee le' na' gate benda' ca dxeajlí lázrele Cristo, ne ca nazri'ile xúgute bi ca' chee Dios, <sup>16</sup> dxápaqueza' Dios; Xcalenu', ca naca chee le'e gate dxuchálajlena' Dios, ne dxeajlí lázrqueza' le'e. <sup>17</sup> Dxenaba' Dios chee Xránadxu Jesucristo, naque' Xradxu zue' xabáa, gunne' le'e xel-la sina lu be' nácaquezele da gulé'e na le'e gúnbea xánnele Le'. <sup>18</sup> Dxenaba' lau Dios guzéajni'ine' xichaj lázrdaule le'e chee nézele ca naca da dxebeza lázredxu da bláwizre' dxi'u sidxu, ne ca naca xel-la gunni'a chee xel-la szren da gunezruj Dios bi chee ca', <sup>19</sup> ne ca naca xel-la waca zrenté chee' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu duté xel-la dxenná bea zren chee' <sup>20</sup> gate bsebané' Cristo ládujla benne' gate ca', ne guleche' Le' chalá'a xabéla chee' xabáa, <sup>21</sup> ne bzue' Le' chee nna bé'ene' xúgute benne' blau xabáa, ne xúgute benne' dxelenná bea xabáa, ne xúgute benne' zaj napa xel-la waca, ne xúgute benne' zaj naca xrane, ne xúgute da dxelenná bea na lu zra na'a zra, ne lu da za za'. <sup>22</sup> Bzue' xúgute da zaj zua lu na' Cristo, ne bzue' Le' gaque' benne' xichaj chee bi chee ca' ca naca xúgute da dxelune'. <sup>23</sup> Benne' caní zaj naque' ca béla' dxen chee Cristo, da dxulé'e na duté ca nácaqueze Le', Bénnea' dxusexuzre' dxucá'ana chawe' ca naca xúgute da zaj zua.

## 2

*Naca bandxu lawe' da nazri'i Dios dxi'u*

<sup>1</sup> Gate nate gúcale ca benne' gate lu xichaj lázrdaule ne chee da caléla ca', ne dul-la ca' <sup>2</sup> da bene' gate ne dxunle ca dxelún bénneache zaj zre'e xezr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzúe' dizra' chee Dios. <sup>3</sup> Cá'anqueze dxi'u, xúgutedxu bendxu caní gate nate, gate bendxu cáteze da guzá lázredxu, ne bendxu ca da gunná béla' dxen cheedxu, ne ca da gunná xichaj lázrdaudxu. Chee le' na' guca na cheedxu sidxu da zi' da xa' chee Dios ca guné' chee xezicadxa benne' ca', <sup>4</sup> san Dios bexache lázrele' dxi'u, ne bzri'ilé'ene' dxi'u, <sup>5</sup> na' benne' dxi'u xel-la nabán tu zren nen Cristo gate ne nátedxu lu xichaj lázrdaudxu ne chee dul-la da nabágadxu. Naladxu ne chee xel-la xrlátaje chee Dios. <sup>6</sup> Cá'anqueze bsebán Dios dxi'u tu zren

nen Jesucristo, ne guleche' dxi'u tu zren nen Le' xabáa. <sup>7</sup> Benge' caní chee gulé'ene' lu zra da za za' ca nazrí'ile'ene' dxi'u, ne ca naca da cháwele'e benge' cheedxu ne chee Jesucristo. <sup>8</sup> Lu xel-la xrlátaje chee Dios bselé' le'e lawe' da guxeajlí lázrele Cristo. Quebe naca na ne chee bi da benle le'e, san naca na tu da ben Dios cá'aze ne chee. <sup>9</sup> Quebe nalá nu benne' ne chee bi da dxúnqueze', chee quebe nu benne' gucá'ana szren cuine'. <sup>10</sup> Dios benge' dxi'u, na' bexune' dxi'u tuze nen Jesucristo chee gundxu da xrlátaje ca' da ba nun Le' gundxu gate nate.

*Nácadxu tuze ne chee Cristo*

<sup>11</sup> Le gusá lázrele ca gúcale le'e gate nate. Quebe nácale benne' judío, benne' ca' dx-elechugue' lu bel-la' dxen chee' da na' dxulé'e na zaj nababe' chee Dios, ne zaj nazí le' benne' zaj nadxugu, na' dxelenné' cheele nácale benne' quebe zaj nadxugu. <sup>12</sup> Lu zra ca' quebe guzúale Cristo le'e. Quebe benle tuze benne' Israel ca', ne quebe bénbeale ca naca xel-la wezríá da ben Dios, ne ca naca da guchebe lazre' Dios. Guzúale lu xezr la xu nigá, ne quebe bi guleza lázrele, ne quebe bénbeale Dios. Gate nate guzrale zítu'la naga zua Dios. <sup>13</sup> Na'a ne chee Cristo Dios ba bzué' le'e gáguté lawe' da gute Cristo waláz chee. <sup>14</sup> Léqueze Cristo benne' dxi'u xel-la dxebeza zri lazre', ne bexune' dxi'u tuze, netu', benne' judío ca', ne le'e, benne' quebe zaj naque' judío, ne bzria xi'e xel-la dxezrá'a da ben na dxi'u chupa la'a, da guca na ca tu ze'e. <sup>15</sup> Gate gute Jesús waláz cheedxu guchugue' da nadxixruj bea na da naca na da gunná Dios gundxu, ne da ca' dxelenná bea na, na' bexune' dxúpaté xezre ca' tuze xezre cube da nababa na chee'. Caní gudíxruje' xel-la dxebeza zri lazre' cheedxu. <sup>16</sup> Caní guca ne chee xel-la gute chee Cristo le'e xaga béguaj, guchugue' naze xel-la dxezrá'a ljwezre chee dxúpaté xezr ca', na' bexune' dxúpaté tuze bel-la' dxen, ne bexune' le' tuze nen Dios.

<sup>17</sup> Bla' Cristo, ne bzenne' le'e dizra' chawe' chee', le'e quebe nácale judío, na' guzrale zítu' naga zua Dios, ne le'e nácale judío, na' guzrale gagu naga zua Dios, <sup>18</sup> na' ne chee Cristo, xúgutedxu, benne' judío ca', ne benne' quebe zaj naque' judío, dxebígdaxu lau Xradxu Dios ne chee Be' Lá'azxa. <sup>19</sup> Chee le' na' le'e, benne' quebe nácale judío, québedxa nácale ca benne' zítu' tu lu xezr la xu da quebe naca na chee, san nácale benne' walazre' ca' xúguté benne' ca' zaj nababa chee Dios. Nabábale Zrí'ine Dios. <sup>20</sup> Nácale ca tu xu'u zren da zria na lawe' lane da gulixruj benne' gubáz ca' chee Cristo, ne benne' ca' buluchálaje' waláz chee Dios, na' Jesucristo nácaqueze' xiaj blau chee lane xu'u na'. <sup>21</sup> Lawe' lane nigá da naca Cristo, duté xu'u na' dxegula na tu li chee gaca na tu xudau' lá'azxa chee Xránadxu. <sup>22</sup> Cá'anqueze le'e, lawe' da nácale Cristo tuze, xu'ule lu xu'u na' naga zua Dios ne chee Be' Lá'azxa chee'.

### 3

*Pablo dxuzenne' benne' quebe zaj naque' judío dizra' chawe'*

<sup>1</sup> Chee le' na' neda', Pablo, dxuzú zriba' lau Dios. Xu'a lizre xia lawe' da dxuna' zrin chee Jesucristo chee gaca chawe' cheele le'e, quebe nácale judío. <sup>2</sup> Ba nézele ca ben Dios lu xel-la xrlátaje chee', bsebague' neda' guchálaja' dizra' chawe' chee Cristo ládujla le'e. <sup>3</sup> Lu da ble'e Dios neda' bzéajni'ing' neda' tu da nagache chee' ca da bzuaja' cheele nedxu. <sup>4</sup> Gate gulábale na weque bé'equezele núnbe'a da nagache ca naca chee Cristo. <sup>5</sup> Guca na tu da nagache gate nate. Dios quebe bzéajni'ing' na bénneache, san na'a ne chee Be' Lá'azxa chee' ba blé'ene' na benne' gubáz lá'azxa ca', na' benne' ca' dxuluchálaje' waláz chee'. <sup>6</sup> Caní naca da nagache na': Ne chee dizra' chawe' chee Cristo benne' quebe zaj naque' judío welezí'queze' da gunezruj Dios le' ca da xelezí' benne' judío ca', ne zaj naque' tuze bel-la' dxen, ne xelezí'queze' tu zren da nachébe lazre' Dios ne chee Jesucristo.

<sup>7</sup> Dios benge' neda' wen zrin chee dizra' chawe' na' ne chee tu da bénnazé' neda', bchínene' xel-la waca zren chee'. <sup>8</sup> Neda' nácadxa' benne' baxáche ca xúguté benne' zaj naca bi chee Dios. Benge' neda' tu culúen zren chee guzenda' benne' quebe zaj naque' judío dizra' chawe' ca naca xel-la gunní'a zrenté chee Cristo. <sup>9</sup> Bsebague' neda' guchéajni'ida' xúguté bénneache ca da nun Dios gune' da bgache gate nate, na' naca Dios Bénnea' benge' xúguté da zaj zua, <sup>10</sup> chee xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrenté chee Dios. Xelúnbe'e na ne chee benne' ca' zaj naca bi chee Cristo. <sup>11</sup> Da nigá ben Dios ca da nune' gate nate gusexuzre' ne chee Xránadxu Jesucristo. <sup>12</sup> Ne chee Cristo waca bígdaxu lau Dios du lázredxu, ne duté xel-la dxuxrén lazre' cheedxu lawe' da dxeajlí lázredxu Le'. <sup>13</sup> Chee le' na' dxata' xúeda' le'e quebe gate ni'a na'le lawe' da dxedéa' xel-la zi' ne chee le'e. Xel-la zi' da dxedéa' neda' gaca na chee tu da ba neza.

*Xel-la zri'i lazre' chee Cristo*

<sup>14</sup> Chee le' na' dxuzú zriba' lau Xra Xránadxu Jesucristo, <sup>15</sup> Bénnea' dxuzúg' la cha chee benne' zaj zre'e xabáa, ne xezr la xu. <sup>16</sup> Dxenaba' lau Xradxu, ca naca xel-la gunní'a zrenté chee' guz' tipe' le'e nen xel-la waca chee' lu xichaj lázrdaule ne chee Be' Lá'azxa chee', <sup>17</sup> chee sua Cristo lázrdaule ne chee xel-la dxeajlí lazre' cheele, ne se cháchale lu xel-la zri'i lazre', ca tu xaga da nudé lue na sítujla, <sup>18</sup> chee seque' chéajni'ile tu zren nen xúguté bi chee' ca nazriluj,

ne ca natunna, ne ca nasituj, ne ca nasibe xel-la zri'i lazre' chee Cristo. <sup>19</sup> Dxenaba' lau Dios gúnbeale xel-la zri'i lazre' na', lácala cabata' séquedxu gúnbeadxu duté ca naca na. Caní dxenaba' Le' chee suale le'e duté da nácaqueze Dios.

<sup>20</sup> Na'a, gaca báqueze Dios, Bénnea' nape' xel-la waca gúnle'eqeque' da zrendxa ca da dxenábadxu, u ca da dxéquedxu, ne chee xel-la waca chee' da dxun na zrin lu xichaj lázrdaudxu. <sup>21</sup> Gaca ba Dios ládujla benne' zaj naque' bi chee Cristo ne chee Jesucristo xúgute iza chadía chacanna. ¡Ca'an gaca na!

## 4

### *Nácadxu tuze ne chee Be' Lá'azxa*

<sup>1</sup> Chee le' na' dxata' xúeda' le'e, neda', xu'a lizre xia lawe' da dxuna' zrin chee Xránadxu, chee gunle da xrlátaje ca dxal-la' xelún bénneache ba gucá'a Dios le', ca gucá'aqueze' le'e. <sup>2</sup> Le gaca dxexruj lazre', ne zri'i lazre'. Le cueza lazre', ne le cue' gunne xue chee tule xetule lu xel-la zri'i lazre' chee. <sup>3</sup> Le gun ba xuzre gácaquezele tuze, guchínele xel-la waca chee Be' Lá'azxa lu xel-la dxebeza zri lazre' da na' dxun na le'e tuze.

<sup>4</sup> Tuze naca be'la' dxen chee Cristo da nácadxu.

Tuze naca Be' Lá'azxa, Nu na' zúalene' tu tudxu.

Tuze da dxuxrén lázredxu, da na' sidxu lu na' Dios.

<sup>5</sup> Tuze Bénnea' naque' Xránadxu.

Tuze da dxeajlí lázredxu.

Tuze ca dxedxúadxu nisa.

<sup>6</sup> Tuze Bénnea' naque' Dios, ne Xra xúgutedxu.

Le' naque' Benne' xíchaje xúgutedxu.

Dxulé'e cuine' lu da dxundxu xúgutedxu.

Zúaqueze' lu xichaj lázrdau xúgutedxu.

<sup>7</sup> Tu tudxu nasidxu tu xel-la waca cha cheedxu

ca da nunna Cristo dxi'u.

<sup>8</sup> Naca na ca naxúaj na lu dizra' lá'azxa, dxenná na:

Begüene' xabáa, gate gudé bzétaje' benne' guledábague' Le'.

Na' bnézruje' bénneache xel-la waca ca'.

<sup>9</sup> ¿Bi zéaje na, dxenná na: Begüene'? Zéaje na nédxula bétaje' lu xezr la xu nigá. <sup>10</sup> Bénnea' bétaje' nácaqueze' Bénnea' begüene' lu da blaudxa lu xabáa chee gaca bea na xu'u lu ne'g xúgute da de, <sup>11</sup> na' benne' cha cheedxu xel-la waca chee:

Gaca bál-ladxu benne' gubáz chee'.

Gaca guzendxu xezícadxu bénneache dizra' chawe' chee'.

Gácadxu xezícadxu benne' dxuxúedxu bi chee' ca'.

Na' gusededxu-be' xezícadxu.

<sup>12</sup> Ca'an bene' chee bpa'adxé' bi chee' ca' chee xelunbe' zrin xulucá'anabe' xrlátaje bénneache ca' zaj naque' zruza ni'a na' Cristo:

<sup>13</sup> Chee gácadxu tuze ca dxéajledxu,

ne ca núnbeadxu Zri'ine Dios,

chee gácadxu benne' du lazre',

chee gácadxu cáteze nácaqueze Cristo.

<sup>14</sup> Caní nacan chee québedxa gácadxu ca bidu ca', bi ca' dxelezibe' bíteteze dizra' da zaj naca na ca tu be' da zeaj na nila na'la, ne québedxa güedxu lataj xelún zréaje benne' wen da zrinmaj ca' dxi'u, chee quebe xelezi xé'e dxi'u chee gundxu da caleja. <sup>15</sup> Lu xel-la zri'i lazre' dxal-la' guchálajdxu da lí chee gácadxu cáteze nácaqueze Cristo, Bénnea' naque' xichaj be'la' dxen da nácadxu dxi'u. <sup>16</sup> Le' dxune' tuze xúgute ni'a na' zaj zria be'la' dxen chee' chee gaca na tu be'la' dxen nazá'ate chee na, ne chee xelún zrin xúgute ni'a na' ca' chee gula be'la' dxen na', ne gaca na chawe' lu xel-la zri'i lazre'.

### *Xel-la nabán cube da dxunna Cristo dxi'u*

<sup>17</sup> Da nigá dxapa' le'e, ne dxusebaga' le'e waláz chee Xránadxu chee québedxa gunle ca dxelún bénneache quebe zaj núnbe'g Dios, benne' ca' dxelune' cáteze dxeléqune' xrlátaje, <sup>18</sup> benne' ca' zaj nachul-la xichaj lázrdawe'. Benne' caní quebe zaj nape' xel-la nabán li lazre' da dxunna Dios bénneache:

Zaj nachul-la nanítene', ne zaj naca zide' lázrdawe'.

<sup>19</sup> Québedxa dxelexedué'ene'.

Belezanne cuine' dxelune' da schanni'.

Du lazre' dxelune' xúgute da sban.

<sup>20</sup> Quegá caní nazédele le'e chee Cristo, <sup>21</sup> che da li xca' bénnele da dxuchalaj Le', ne nusédené' le'e ca naca da li da zúale Jesús. <sup>22</sup> Ca naca da benle nédxula, le guzúa chalá'ala da gúcale lawe' da guzrínnajle lu da sban da guzá lázrele.

<sup>23</sup> Dخال-la' gácale benne' cube lu xichaj lázrdaule.

<sup>24</sup> Dخال-la' gunle da naca chee benne' cube na' da ben Dios le'e chee gunle da naca na xlátaje, ne da li da naca na lá'azxa.

<sup>25</sup> Chee le' na' québedxa gun lázrele.

Le nne' da li tule xetule lawe' da nácadxu ni'a na' tuze bel-la' dxen chee Cristo.

<sup>26</sup> Che dxezrá'ale, quebe dxal-la' gunle dul-la, ne quebe zrá'ale scha'.

<sup>27</sup> Quebe güele da xriwe' lataj guchixre chee na le'e.

<sup>28</sup> Bénnea' guque' gubán québedxa dxal-la' cuane'. Dخال-la' guné' tu zrin chawe' nen ni'a ná'queze' chee gape' da gunézruje' benne' dxelexázrjeng'.

<sup>29</sup> Quebe nnele dizra' calęla. Le guchalaj da naca na xrlátaje chee xezezé tipa benne' xelenne', ne xezezi'ę na ba neza. <sup>30</sup> Quebe guzúa xáchele Be' Lá'azxa chee Dios, lawe' da zúale Be' le'e chee gaca bea na nácale bi chee Dios ca zrindxa zra xezi' lu ne'ę dxi'u.

<sup>31</sup> Le guzúa chalá'ala:

Xel-la dxecuide', ne xel-la dxezrá'a, ne xel-la xichaj zra'a, ne xel-la wetil-la dizra', ne xel-la wechacha, ne xúgute da zrinnaj.

<sup>32</sup> Dخال-la' gácale du lazre', ne xache lázrele tule xetule, ne gunite laule chee tule xetule ca ben Dios, bnite lawe' chee le'e lawe' da nácale bi chee Cristo.

## 5

### *Ca dxal-la' xelaca bi ca' chee Dios*

<sup>1</sup> Lawe' da nácale bi chee'queze Dios, bi nazri'ing', le gun ba xuzre gácale cáteze nácaqueze Le'. <sup>2</sup> Le zri'i le sa' ljwézrele tule xetule cáteze ben Cristo, bzri'ing' dxi'u, ne bzanne cuine' waláz cheedxu ca tu zríla'dau', béadu dxelute benne' lau Dios chee xedúa xtul-le'. Gate gute Cristo le'ę xaga béguaj, guca ca tu da dxelá zixre lau Dios da dxelegú'u bénneache lau Le'.

<sup>3</sup> Lawe' da nácale bi chee Dios, québedxa dxal-la' guchálajle chee da dxucá'ana dítaj na bénneache, ne chee da sban ca', ne chee xel-la wecude' da de. <sup>4</sup> Quebe guchálajle dizra' schanni', ne dizra' bize, ne dizra' calęla, da quebe dxulucá'ana na chawe' bénneache, san dxal-la' xéquezele Dios: "Xcalenu'." <sup>5</sup> Ba nézquezele quebe chu'u naga dxenná bea Cristo nen Dios netú benne' dxucá'ana dítajé' bénneache, u tu benne' dxune' da sban, u tu benne' dxucúdie' da de, da naca na ca dxucá'ana szrene' bedau' xiaj xaga. <sup>6</sup> Quebe güele lataj nu si xę le'e nen dizra' xala, lawe' da ne chee da níga dxesel-la Dios da dxusaca zi na benne' ca' quebe dxuluzúę' dizra' chee'. <sup>7</sup> Quebe gunle tu zren benne' dxelune' da caní.

<sup>8</sup> Nédxute guzúale lu da chul-la, na' na'a zrágale xel-la naxani' lawe' da nácale bi chee Xránadxu. Chee le' na, le gun da naca na chee xel-la naxani', <sup>9</sup> da na' naca xel-la dxucá'ana chawe' ljwézredxu, ne da xlátaje, ne da li. <sup>10</sup> Le gun zi' lázrele nézele gunle da dzezaca ba lazre' Xránadxu. <sup>11</sup> Quebe gunle tu zren benne' dxelune' da calęla, da ca' naca chee da chul-la, san le til-la da ca' <sup>12</sup> lawe' da naca na tu da xedué'edxu guchálajzedxu chee da dxelún benne' ca' bagácheze. <sup>13</sup> Gate dxeledxúaj da caní lu da chul-la, ne zaj xu'u na lu xel-la naxani', gulé'e lawe' ca zaj naca xúgute da caní, lawe' da dxulé'e lawe' xel-la naxani' xúgute. <sup>14</sup> Ca naca da caní dxenná na:

Bebán, lue' dxásiu'.

Bexasa ládujla benne' gate,

na' gusení' Cristo lu xichaj lazra'du.

<sup>15</sup> Chee le' na', le guxúe xanne' ca da dxunle. Quebe gunle ca dxelún benne' zaj nachul-la naníteng', san le gun ca dxelún benne' zaj naxéajni'ing'. <sup>16</sup> Le guchine chawe' zra caní lawe' da dxácale'ę da zrinnaj lu zra na'a zra. <sup>17</sup> Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu. <sup>18</sup> Quebe stizele, da na' dxuxrinnaj na bénneache, san du lázrele le si' Be' Lá'azxa. <sup>19</sup> Le guchálajle le sa' ljwézrele tule xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. Du lázrele le gul-la, ne le güe lá'ana Xránadxu. <sup>20</sup> Le xéqueze Xradxu Dios: "Xcalenu'", chee xúgute lu La Xránadxu Jesucristo.

### *Ca dxal-la' xelún bi chee Cristo nen lwézrebe'*

<sup>21</sup> Le gaca dxexruj lazre' tule xetule, ne le gapa ba lá'ana Dios.

<sup>22</sup> Nu'ula dxal-la' gaque' dxexruj lazre' lau benne' chee', cáteze dxal-la' gaque' lau Xránadxu, <sup>23</sup> lawe' da naca benne' biu xichaję chee zru'ule', cáteze naca Cristo xichaję chee bi chee' ca'. Cristo naque' Benne' weselá chee bi chee' ca', bi zaj naca be' ca bel-la' dxen

cheéqueze'. <sup>24</sup> Cáteze zaj naca dxexrui lazre' bi chee' ca' lau Cristo, cá'anqueze nu'ula dxal-la' gaque' dxexrui lazre' lau benne' chee' lu xúgute.

<sup>25</sup> Benne' biu dxal-la' zrí'ine' zru'ule' cáteze ben Cristo, bzrí'ine' bi chee' ca', ne bzánene' xel-la nabán chee' ne cheebe'. <sup>26</sup> Caní bene' chee' bebéaje'-be' cheéqueze', ne ben chí'e-be' ne chee' dizra' chee', da guca na ca dxun benne' dxexibe' bi chee' nen nisa, <sup>27</sup> chee' guzúe'-be' lau Le', xelácabe' bi xabáa, ne quebe bi da sban zaj nápabe', ne netú da zrinaj, ne netú da naca na ca da ca', san xelácabe' lá'azxa, ne du lazre'. <sup>28</sup> Cá'anqueze benne' biu dxal-la' zrí'ine' zru'ule' cáteze nazri'ine' bel-la' dxen cheéqueze'. Benne' nazri'ine' zru'ule' nazri'i cuine'. <sup>29</sup> Netú benne' quebe dxecuídene' bel-la' dxen cheéqueze', san dxugawe' na, ne dxuxúe' na, ca dxúnqueze Cristo chee' bi chee' ca' <sup>30</sup> lawe' da zaj nácabé' ca bel-la' dxen cheéqueze', na' dxi'u nácadxu ca ni'a na' bel-la' dxen chee', ne nácadxu ca belá' dxen chee', ne zrita chee'. <sup>31</sup> Chee' le' na' tu benne' biu dxal-la' gusané' xra xrné'e chee' gaque' tuze nen zru'ule', na' dxúpaté' xelaque' ca tuze benne'. <sup>32</sup> Da nigá naca na tu da zren da nagache, na' dxennía' da caní ca naca chee' Cristo nen bi chee' ca'. <sup>33</sup> Cá'anqueze tu tule le'e dxal-la' zrí'ile zru'ulale cáteze nazri'i cuínale, na' nu'ula dxal-la' gape' ba lá'ana benne' chee'.

## 6

<sup>1</sup> Le'e, bi cuide', lawe' da nácale bi chee' Xránadxu, dxal-la' guzúale dizra' xruze xrna cheele, da naca na xlátaje. <sup>2</sup> Da nadxixrui bea nedxu da zraga na tu da guchebe lazre' Dios naca na da dxenná na: Gudapa ba lá'ana xra xrna'u, <sup>3</sup> chee' gaca chawe' chiu', ne chee' su' scha' lu xezr la xu.

<sup>4</sup> Le'e, xruze xrna', quebe guchá'ale zrí'inele. Le gusegula-be' lu xel-la dxenná bea chee Xránadxu, ne le gusina-be' da naca chee Le'.

<sup>5</sup> Le'e, benne' nada'u, le guzúa dizra' chee' benne' zaj naque' xránale lu xezr la xu nigá, ne le gapa le' ba lá'ana, ne le zrebe le', ne du lázrele le gaca chee', cáteze dxuzále dizra' chee' Cristo. <sup>6</sup> Le gun zrin chee' xránale ca', quegaze gate dxelenná'te' le'e, ca dxelún benne' ca' dxelaca lazre' xelezaca ba lazre' bénneache chee'. Le gun zrin na' cáteze dxunle zrin chee' Cristo, gunle du lázrele da dxaca lazre' Dios. <sup>7</sup> Le gun zrin chee' xránale du lázrele, cáteze dxunle zrin chee' Xránadxu, ne quegaze chee' bénneache. <sup>8</sup> Ba nézqueze lu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nuné'.

<sup>9</sup> Le'e, xrana benne' ca', cá'anqueze le gun le'e nen benne' wen zrin cheele ca', ne quebe guzálajle le' lawe' da nézele zua Bénnea' xabáa naque' Xrana benne' ca', ne Xránale le'e, na' Le' quebe dxebéaje' cha chee' bénneache.

### *Zra lana bi chee' Cristo da dxácale lebe' lu wedil-la*

<sup>10</sup> Na'a, bi bícha'dau', le gaca chuchu ne chee' Xránadxu nen xel-la wala zren chee'. <sup>11</sup> Le gaca ca benne' zjaque' wedil-la zaj nácué' zra lané' xia da na' dxunna Dios le'e, chee' gaca se chúchule lau xúgute da dxuzé' da xriwe' laule chee' si xe' na le'e. <sup>12</sup> Quegá dxedil-lalédxu bénneache zaj naque' belá' dxen. Dxedil-lalédxu xel-la dxenná bea chee' da xriwe' da dxeledá na lu be', ne dxedil-lalédxu be' xriwe' ca', da dxelenná bea na, ne be' xriwe' ca' dxé na ljwezre ca' da xelún na, ne be' xriwe' ca' xu'u lu na' na xezr la xu chul-la nigá. <sup>13</sup> Chee' le' na', le gaca ca benne' zjaque' wedil-la zaj nacué' zra lané' xia da dxunna Dios le'e, chee' séquele súale wedil-la lu zra che da xriwe', na' ca te na' xegá'ana chúchule. <sup>14</sup> Le se chuchu xca', suale le'e da li ca tu bazxu da nacá'a na le'ele, ne suale le'e da xlátaje ca tu xia da dá' lachu'le. <sup>15</sup> Le gaca sina chee' guchálajle dizra' chawe' chee' xel-la dxebeza zri lazre', da gaca na cheele ca tu cue' zrelale. <sup>16</sup> Da dxun na ba xen, le gapa xel-la dxeajli lazre', da gaca na cheele ca tu da wegapa na, da xusula na xúgute da zaj nalá na zaj zua na xi' da dxuzala da xriwe'. <sup>17</sup> Xel-la weselá gaca na cheele ca tu lapa xia da gucache xíchajle, na' xrtzra Dios gaca na cheele ca tu xia da gunna Be' Lá'azxa le'e. <sup>18</sup> Gate ne dxunle da caní dxal-la' guchálajle Dios, gata' xúele, ne návale lau Le' ne chee' Be' Lá'azxa. Chee' gaca gunle da caní dxal-la' súale ban lazre', ne quebe gate ni'a na'le, na' návale Dios chee' gácaléne' xúgute bi chee' ca'. <sup>19</sup> Cá'anqueze le naba Le' waláz chia' neda' chee' gunne' neda' dizra' da guchálajja', chee' xazrda' guzenda' bénneache dizra' chawe' chee'. <sup>20</sup> Dios bene' neda' gubáz chee' dizra' chawe' chee', na' chee' le' na' xu'a lizre xia na'a. Le naba Le' gácaléne' neda' chee' xazrda' guchálajja' dizra' chawe' chee' ca dxal-la' guna'.

### *Pablo dxugape' diuzre le sa' ljwezre'*

<sup>21</sup> Tíquico, bi bíchedxu nazri'ite lazrdxu, bi li lazre' lu zrin chee' Xránadxu, guzenbe' le'e da dxaca chia' nigá, ne da dxuna'. <sup>22</sup> Chee' le' na' dxusel-la'-be' lau le'e chee' guzenbe' le'e ca zúantu', ne chee' gutípabe' lázrele.

<sup>23</sup> Dxenaba' lau Xradxu Dios, ne lau Xránadxu Jesucristo gunéruje' bi bíchedxu ca' zaj zré'e na' xel-la dxebeza zri lazre', ne xel-la zri'i lazre', ne xel-la dxeajli lazre', <sup>24</sup> na' guné' chawe' xúgute benne' ca' du lazre' zaj nazri'ine' Xránadxu Jesucristo. Ca'an gaca na.

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE FILIPOS

*Pablo dxugape' diuzre bi bíchedxu ca' zaj zre'e xezre Filipos*

<sup>1</sup> Neda' Pablo, ne Timoteo nácantu' wen zrin chee Jesucristo. Dxuzúaja' da nigá chee le'e, bi bíchentu', ne chee le'e, dxuxúele bi chee Cristo, ne le'e, zaj xu'u lu na le bi chee Cristo, ne zrale xezre Filipos. Nabábale chee Dios, ne nácale tuze nen Jesucristo. <sup>2</sup> Dxenábantu' lau Xradxu Dios, ne lau Xránadxu Jesucristo gun'e chee da xrlátaje, ne gunne' le'e xel-la dxebeza zri lazre'.

*Da dxenaba Pablo gun Dios chee bi ca' chee Cristo*

<sup>3</sup> Tu tu lasa dxajsá lazra' le'e dxapa' Dios chia': Xcalenu'. <sup>4</sup> Gate dxuchálajena' Dios, duté xel-la dxebe dxenábaqueza' bi gun L'e' chee xúgutele le'e. <sup>5</sup> Caní dxuna' lawe' da dxundxu zrin tu zren chee dizra' chawe' chee Cristo gate guzú lau númbe'tu' na bzrinte' lu zra na'a zra. <sup>6</sup> Dxuxrén lazra' Dios, Bénnea' guzú lawe' dxune' tu zrin chawe' lu xichaj lázrdaule le'e, gúnqueze' na ca zrinte' zra xelá' Jesucristo. <sup>7</sup> Naca xrlátaje dxéqueda' neda' caní chee xúgutele le'e, lawe' da nazrí'ile'eda' le'e, ne dxezidxu tu zren da chawe' ca' dxunna Dios dxi'u. Dxácaté ne xu'a lizre xia nigá, ne gate na' gudíl-lalena' bénneache ca' dizra', benne' ca' guledábague' dizra' chawe' chee Cristo, ba ble'eda' benne' ca' naca na da li. <sup>8</sup> Dios nézquezene' nazrí'ile'eda' le'e, lu duté xel-la zri'i lazre' da dxunna Jesucristo neda'. <sup>9</sup> Dxenaba' lau Dios gun'e zri'idxa ljwézrele, ne gápale'quezle xel-la sina, ne xel-la dxéajni'i lu xúgute' da dxunle, <sup>10</sup> chee nézele cuele da cháwedxa, chee gácale du lazre', ne quebe bi gata' da gagu na zria chee lu zra na' xelá' Cristo. <sup>11</sup> Caní gaca, da ca' dxunle xululé'e na da xrlátaje da dxun Jesucristo lu xichaj lázrdaule, chee gaca ba lá'ana Dios, ne xegá'ana szrénqueze'.

*Dxenná Pablo: Che naca bana', Cristo dxuchínene' neda'*

<sup>12</sup> Le'e, bi bícha'dau', dxaca lazra' nézele ca da ca' guzraca' gulácale na neda' chee bchálaja' dizra' chawe' chee Cristo. <sup>13</sup> Caní guca, xúgute benne' xra'aga xu'u lawe', ne xezicadxa benne' ca' zaj zre'e xu'u lawe' na' zaj nézene' xu'a lizre xia lawe' da dxunna' zrin chee Cristo. <sup>14</sup> Lawe' da xu'a neda' lizre xia nigá, chaze xúgute bi bíchedxu ca' dxuluxrén lázredxe' Xránadxu, na' dxuluchálaje' du lazre' dizra' chee Dios, ne quebe dxelezrebe'.

<sup>15</sup> Da li bal-la benne' ca' dxuluchálaje' ca naca chee Cristo lawe' da zaj naque' zre'e lazre', ne zaj naque' wil-la dizra'. Xezicadxa benne' caní dxuluchálaje' na duté xel-la li lazre' chee'. <sup>16</sup> Benne' nedxu ca' dxuluchálaje' da naca chee Cristo chee xulucá'ana szren cuine', ne quegá du lazre', lawe' da dxelaca lazre' súadxa da guzúa na neda' stebe dxácaté xu'a lizre xia nigá. <sup>17</sup> Xezicadxa benne' ca' dxeluné' na duté xel-la zri'i lazre' chee', lawe' da zaj nézene' nuzúa cuina' guzéajni'ida' benne' ca' dxeledábague' dizra' chawe' chee Cristo. <sup>18</sup> ¿Bizra xca'? Ájatezla dxeluné', che dxuluchálaje' du lazre', u quebe dxuluchálaje' du lazre', dxuluchálaje' chee Cristo, na' dxebeda', ne wabéqueza' <sup>19</sup> lawe' da nezda' lu xúgute da caní wedxúaj na chawe' chia' neda', lawe' da dxenábale le'e lau Dios chia' neda', na' gácale Be' Lá'axza neda', Bénnea' gusel-lé' Jesucristo cheedxu. <sup>20</sup> Dxaca lazra', ne dxuxrén lazra' quebe xedué'eda' neda', séqueda' guchálaja' du lazra' chee xelélé'e bénneache zúalédxa xel-la szren chee Cristo neda' na'a, ca zúaléqueze na neda', che gaca bana', u che gatia'. <sup>21</sup> Chia' neda', che naca bana', Cristo dxuchínene' neda', ne che gatia' wazrue'eda' da cháwedxa. <sup>22</sup> Che xedxúaj na chawe' chee zrin chee Xránadxu che naca bana', quebe nezda' bila na ca'a. <sup>23</sup> Naca na stebe chia' neda' bila da caní ca'a. Dxaca lazra' gatia' chee cheajsúalena' Cristo, da gácadxa chawe' chia' neda', <sup>24</sup> san che naca bana' nácadxa chawe' chee le'e. <sup>25</sup> Lawe' da nuxrén lazra' naca caní, nezda' wazúalédxa' le'e chee se cháchadxale lu da naca chee Cristo, ne chee béquezdxale. <sup>26</sup> Chee lé na' bédxale lu da naca chee Cristo ne chia' neda' gata súalena' le'e.

<sup>27</sup> Dxun na ba xen gunle da dxuzéajni'i dizra' chawe' chee Cristo le'e, na' che xedajnná'a le'e, u che sua' zitu', wenda' ze cháchale, ne nácale tuze, dxunle tu zren zrin chee Cristo chee xeleajli lazre' bénneache dizra' chawe' chee'. <sup>28</sup> Quebe zrēbele benne' ca' dxeledábague' le'e. Ca dxunle gulé'e na le' xelebía xi'e, na' nalale le'e lawe' da bselá Dios le'e. <sup>29</sup> Tu da zrenté naca da dxunna Dios le'e gate gunle zrin chee Cristo, quegaze chéajle chee', na' cá'anqueze che tele xel-la zi' ne chee L'e'. <sup>30</sup> Le'e dxunle neda' tu zren dxedíl-lalédxu da zaj naca da caléla. Blé'equenze gate nate ca gudíl-lalena' na, na' na'a dxenle ca dxedíl-lalena' na.

## 2

*Xel-la dxexruj lazre', ne xel-la szren chee Cristo*



<sup>1</sup> Cristo dxutipe' lázrele, na' xel-la zri'i lazre' chee' dxuzúa na le'e lu da ba neza, na' Be' Lá'azxa chee' zúalene' le'e, na' nápaie xel-la zri'i lazre', ne xel-la dxexache lazre' chee'. <sup>2</sup> Chee le' na' le gun ga béle'eda', gaca tuze ca da dxéquele, ne gácale tuze lu xel-la zri'i lazre' chee'le, ne gunle tuze lu xichaj lázrdaule. <sup>3</sup> Quebe bi gunle chee' xulucá'ana szren bénneache le'e, ne chee' gaca gucá'ana szren cuínale, san duté xel-la dxexrui lazre' chee'le dxal-la' guéquele nácadxa blau le sa' ljwézrele ca le'e. <sup>4</sup> Netule le'e quebe dxal-la' gunle ca da gácalen le'eze. Le gun da gácalen na xezícadxa bénneache.

<sup>5</sup> Dخال-la' si' lu na'le da gaca na chee'le ca ben Jesucristo. <sup>6</sup> Lácala naque' ca nácaqueze Dios, quebe gúquene' dxal-la' guné' ba xuzre xegá'anaqueze' ca Dios. <sup>7</sup> Bzue' chalá'ala da nápaqueze', ne ben cuine' ca tu benne' nada'u, guque' bénneache. <sup>8</sup> Gate ba naque' bénneache, guque' dxexrui lazre', na' bzue' dizra' chee' Dios ca bzrinté gutie', lácala gutie' ca tu benne' wen da calela le'e xaga béguaj. <sup>9</sup> Chee le' na' Dios bca'ana szrénle'le' Le', ne bzue' tu Le' da naca szrendxa ca xúgute' la xezícadxa, <sup>10</sup> chee' gate xelenne' La Jesús, na' xuluzú zribe lau Le' xúgute' benne' zaj zre'e xabáa, ne xezr la xu nigá, ne zran xezr la xu nigá, <sup>11</sup> ne chee' xelexechebe xúgute' naca Jesucristo Xránadxu, chee' gaca ba lá'ana Xradxu Dios.

*Bi chee' Cristo zaj náca'be' ca xi' da dxuluseni na*

<sup>12</sup> Chee le' na', le'e, bi bicha' nazri'it'e lazra', ca na' benle le'e, bzúaquezle dizra' chee' Dios gate na' zúalena' le'e, le guzúadxa dizra' chee' Dios na'a gate zua' zitu'. Duté xel-la dxexrui lazre', ne duté xel-la dxezrebe le gun zrin chee' zrué'ele duté ca naca xel-la weselá chee', <sup>13</sup> lawe' da dxun Dios zrin lu xichaj lázrdaule chee' sa lázrele gunle da xrlátaje da dxaca lazre' Le', ne chee' séquele gunle na.

<sup>14</sup> Le gun xúgute' da dxunle, ne quebe gáchajele, ne quebe gutil-la dizra' ljwézrele <sup>15</sup> chee' gácale li lazre', ne quebe nu nne' chee'le. Gácale bi chee' Dios du lazre' ládujla bénneache zaj naque' benne' dxelún da calela, ne gácale ca belaj ca' dxuluseni na lu xezr la xu naga nachulla na, <sup>16</sup> ne guchálajlele benne' ca' dizra' da nua na xel-la nabán. Che gunle caní, neda' wezaca ba lazra' chee'le gate xelá' Cristo, lawe' da wanezda' quebe ben zi' lazra' dácheze, ne quebe be'na' zrin níteze. <sup>17</sup> Béle'eda' lácala gun na ba xen gatia' chee' gaca li lazre' xel-la dxejlí lazre' chee'le lau Dios. Bzua cuínale lu na' Dios ca tu guna' da gúnnale chee', na' chee' le' na' béle'equezda' tu zren nen xúgute'le le'e. <sup>18</sup> Le béquezle le'e, ne le gun tuze neda' lu xel-la dxebé chia'.

*Ca naca chee' Timoteo, ne Epafrodito*

<sup>19</sup> Che naca da dxaca lazre' Xránadxu Jesús, dxebeza lazra' sél-lazequeza' Timoteo xedajnná'abe' le'e, chee' beda' gate xelabe', ne guzenbe' neda' chee'le le'e. <sup>20</sup> Quebe nu chilá' xetú benne' guéquene' chee'le ca da dxéqueda' neda'. Tuze Timoteo dxé'ebe' gunne xue chee' gaca chawe' chee'le le'e. <sup>21</sup> Xúgute' benne' ca' xezícala zaj dxé'e' gunne xue da zaj naca chee'ze', ne quebe zaj dxé'e' gunne xue da naca chee' Jesucristo. <sup>22</sup> Le'e nézquezle ca da xrlátaje dxun Timoteo, ne ca benbe' zrin tu zren nen neda'. Dxuchálajntu' dizra' chawe' chee' Cristo, na' dxunbe' ca dxun tu bi dxácalebe' xrabe'. <sup>23</sup> Caní naca, dxebeza lazra' sel-la'-be' gate nezda' ca gaca chia'. <sup>24</sup> Dxuxrén lazra' Xránadxu, néda'queza' xida' xedajnná'a le'e.

<sup>25</sup> Cá'anqueze dxéqueda' dxun na ba xen sel-la' Epafrodito, bi bíchedxu. Dxunbe' zrin tu zren nen neda', dxedíl-lalentu' da calela. Lé'equezele gusél-lale bi nigá chee' gácalenbe' neda', ne xu'a lizre xia nigá. <sup>26</sup> Dxezá lázrele'ebe' xedajnná'abe' le'e, ne zúale'ebe' stebe lawe' da nézebe' bénele quebe chawe' guzúabe'. <sup>27</sup> Da li quebe chawe' guzúabe', ne bache gátebe', san Dios bexache lazre' lebe', ne quegá tuze lebe', cá'anqueze neda' chee' quebe xewine lázredxa' ca da dxaca chia' na'a. <sup>28</sup> Chee le' na' dxezá lázredxa' sel-la' lebe' chee' bele le'e gate xelé'ele lebe', ne chee' québedxa xewine lazra' neda'. <sup>29</sup> Le xezí' lu na'le lebe' duté xel-la dxebé, ca bi bíchele lu da naca chee' Xránadxu, ne le gápaqueze ba lá'ana benne' ca' zaj naque' ca lebe', <sup>30</sup> lawe' da guzúa gátebe' dxunbe' zrin chee' Cristo. Bzua'be' lu da stebe xel-la nabán chee'be' chee' gunbe' zrin chia' da quebe guzéquele le'e gunle.

### 3

*Da naca chawe' da naca na du lazre'*

<sup>1</sup> Na'a, bi bicha', le be lu da naca chee' Xránadxu. Quebe naca na zéde chia' neda' guzúaja' chee'le xecha lasa ca da ba bzúajqueza', lawe' da dxun na ba xen guna' da nigá chee'le. <sup>2</sup> Le guxúe cuínale chee' benne' ca' dxeluné' da calela, ne zaj naque' ca becu', benne' ca' dxelechugue' lu be'la' dxen da na' naca bea na benne' zaj naque' chee' Dios. <sup>3</sup> Dxi'u nácadxu benne' nápaquezdxu da dxunna bea na nácadxu chee' Dios, ne dxue lá'anadxu Dios ne chee' Be' Lá'azxa, ne dxebedxu lawe' da nácadxu bi chee' Jesucristo. Quebe dxuxrén lázredxu da dxundxu, <sup>4</sup> lácala neda' wazéqueda' guxrén lazra' da ca' nuna'. Che nu benne' dxéquene' waca guxrén lazre' ca da ba nune', wazéquedexeda' neda'. <sup>5</sup> Gate gúqueda' xrunu' zra gulechugue' lu be'la' dxen chia' da na' dxulé'e na naca' chee' Dios lawe' da naca' benne' Israel, ne xrtia

Benjamín. Naca' da li benne' hebreo. Guca' benne' fariseo ca buzájla' da bdxixruj be'e Moisés. <sup>6</sup> Gudxéle'a gunne xue da naca chee Dios ca bzrinte gudáu zi' xuzra' benne' ca' zaj nácabe' bi chee Jesús. Ca naca da xlátaje da napa tu benne' dxunge' ca dxenná da nadxixruj bea na, quebe nu benne' guzéquene' bi nnie' chia'. <sup>7</sup> Xúgute da ca' gúqueda' gate nate zaj zácále' e na, na'a dxéqueda' da ca' quebe bi zaj zaca na, lawe' da nazrí'idxeda' Cristo. <sup>8</sup> Da li dxéqueda' xúgute da ca' ca' tu da nite lawe' da zácaxa Xrana' Jesucristo. Lawe' da nazrí'ida' Le' ba bzua' chalá'ala xúgute da gudapa', ne dxéqueda' da ca' ca' tu da níteze chee si'a da ba neza da dxunna Cristo, <sup>9</sup> chee gaca' tuze nen Le', quegá lawe' da guca' xlátaje ne chee da nadxixruj bea na na', san lawe' da ble'e Dios neda' xlátaje lawe' da dxeajli lazra' Cristo, na' Dios dxelé'ene' xlátaje xúgute benne' dxeajli lazre' Cristo. <sup>10</sup> Da dxaca lazra' naca na gúnbeadxá' Cristo, ne súale' xel-la waca neda' da bsebán na Le', ne tea' xel-la zi' ca da gudé' Le', ne gudé' cuina' lu na' Dios lácala dxal-la' gatia' ca gute Cristo, <sup>11</sup> na' dxebeza lazra' xebana' ládujla benne' gate ca'.

*Pablo dxun zi' lazre' gusexuzre' gune' zrin chee Cristo*

<sup>12</sup> Quebe dxennía' ba bzrué'eda' xúgute da caní, u ba naca' dute xlátaje, san dxun zi' lazra' chee zrué'eda' da na' bláwizra Jesucristo neda' chee zrué'eda'. <sup>13</sup> Le'e, bi bicha', quebe dxennía' ba bzrué'eda' da nigá, san tuze da dxuna', dxuzúa' chalá'ala da ba gudé, ne dxun zi' lazra' chee zrué'eda' da za za', <sup>14</sup> chee gusexuzra' guna' zrin da dxuna', chee zrué'eda' da na' bláwizra Dios dxi'u sidxu lu xabáa chee' lawe' da nácaxu bi chee Jesucristo.

<sup>15</sup> Caní dxal-la' guéquedxu dxi'u, ze cháchadxu ca naca da dxeajli lázredxu. Che quebe dxéquele caní chee bíteteze da caní, Dios guzéajni'ine' le'e ca naca chee na. <sup>16</sup> Tuze ca dxal-la' guéquedxu, ne tuze ca dxal-la' gundxu lu da ca' ba bzrué'edxu.

<sup>17</sup> Le'e, bi bicha' dau', le gun ca dxuna' neda', ne nna' ca dxelún benne' ca', dxelune' ca da blé'entu' le'e. <sup>18</sup> Zane' lasa ba gucha' le'e, ne na'a dxebézrtea' dxapa' le'e, zralé'e bi bíchedxu dxelune' ca dxelún benne' dxuluzúe' chalá'ala da ben Cristo le'e xaga béguaj. <sup>19</sup> Ca gaca chee benne' ca' lu zra bzebe, xebebia xi'e. Zaj nunge' dios chee da dxelé'aj dxelawé', ne dxulucá'ana szren cuine' chee da na' dxal-la' xelapa stu'e. Zaj dxe'e gunne xue da naca chee xezr la xu nigaze. <sup>20</sup> Dxi'u nácaxu benne' zaj nababe' xabáa, ne dxebézadxu zra xelá' benne' weselá cheedxu, Xránadxu Jesucristo, ze'e xabáa. <sup>21</sup> Le' xegü'e' bel-la' dxen cheedxu da dxeledé chee na, ne gune' na ca naca bel-la' dxen xabáa chee', guchinene' xel-la waca chee' da nape' chee nna bé'ene' xúgute da zaj zua.

## 4

*Dxal-la' béquezdxu lu da naca chee Xránadxu*

<sup>1</sup> Chee le' na' le'e, bi nazrí'ite lazra', le se chacha lu da naca chee Xránadxu. Le'e, bi bicha' dau' nazrí'ite lazra', dxezá lázrele'a le'eda' le'e, lawe' da dxebeda' ca nácale le'e, na' lawe' da bena' neda' nácale bi chee Cristo dxal-la' si'a tu da gunna Dios neda'.

<sup>2</sup> Dxata' xueda' Evodia, ne Síntique xelaque' tuze, lawe' da zaj naque' bila ne chee Xránadxu. <sup>3</sup> Na'a lue', bi ljwezra' li lazre', dxata' xueda' lue' gácalenu' nu'ula zandxu caní, nu'ula belúnlene' neda' zrin chee dizra' chawe' chee Cristo. Belune' zrin na' tu zren nen Clemente, ne xezicaxa benne' ca' belúnlene' neda' zrin. La benne' caní zaj naxúaj na lu xiche chee xel-la nabán zeajli canna.

<sup>4</sup> Le béqueze lu da naca chee Xránadxu. Xecha lasa dxennía': Le be. <sup>5</sup> Dxaca lazra' xeleque be'e xúgute bèneache nácale zren lazre'. Ba zua bagu zra xelá' Xránadxu.

<sup>6</sup> Quebe bi cuele gunne xue, san le guchálajlequeze Dios ca naca chee da ca'. Le naba na lau Dios, na' le xe'e: Xcalenu'. <sup>7</sup> Nadxa gunna Dios le'e xel-la dxebeza zri lazre', da naca na szrendxa ca da seque' gúnbea bèneache, na' guzúa chuchu na xichaj lázrdaule ne chee Jesucristo.

*Le gulaba lazre' ca naca da xrlátaje*

<sup>8</sup> Na'a, bi bicha', le gulaba lazre' ca naca xúgute da zaj naca li, ne xúgute da zaj napa na ba lá'ana, ne xúgute da zaj naca na li lazre', ne xúgute da zaj naca na du lazre', ne xúgute da dzezaca ba lazre' Dios, ne xúgute da dxulucá'ana na bèneache xrlátaje.

Che zua tu da naca xrlátaje, u da dxal-la' gucá'ana szrendxu, le gulaba lazre' da caní.

<sup>9</sup> Le gun ca naca da bsédeda' le'e, ne da bzéajni'ida' le'e, ne da bzenda' le'e, ne da ble'eda' le'e, na' súale' Dios le'e, Bènea' dxunne' dxi'u xel-la dxebeza zri lazre'.

*Da gulesel-la benne' Filipos ca' chee Pablo*

<sup>10</sup> Dxebéle'eda' ne chee Xránadxu, lawe' da dxajsá lázrele neda'. Quebe dxennía' ba gula lázrele neda', san quebe guta' lataj gácalele neda'. <sup>11</sup> Quebe dxennía' da nigá lawe' da bi dxexázrjeda', lawe' da ba bsede Xránadxu neda' sua' xel-la dxebé ájatze dxaca chia'. <sup>12</sup> Ba gudéa' xel-la xache', ne cá'anqueze xel-la gunní'a. Nazédia' dxuchaga lawa' xúgutę da dxaca chia', che néljada', u che dxeduna', che nápalę'a, u che quebe bi napa'. <sup>13</sup> Xúgutę wazéqueda' guchaga lawa' lawe' da dxuzę tipa Cristo neda'. <sup>14</sup> Benle da xrlátaje, gúcalele neda' ne chee da gusél-lale chia'.

<sup>15</sup> Ba nézquezle le'e, benne' Filipos, ca guca gate guzú lawa' dxuchálaja' dizra' chawe' chee Cristo nigá. Gate bezá'a xęzre ca' zaj nababa xęzr la xu Macedonia, le'eze gusél-lale chia' dumí chee da guzú' lu na'le. <sup>16</sup> Gate guzú'a' xęzre Tesalónica, chupa chunna lasa gusél-lale dumí chia' chee quebe bi xázrjeda'. <sup>17</sup> Quebe dxennía' da nigá lawe' da dxaca lazra' bi gúnnale chia', san dxaca lazra' gácadxa da ba neza chee le'e lau Dios. <sup>18</sup> Ba guzi'a' xúgutę da gusél-lale, na' dęle'e chia'. Ca naca da gusélal-le chia' lu na' Epafrodito, da zrendxa guca na ca da bexázrjeda'. Da na' gusél-lale naca na ca tu guna' da dxelá zixre na lau Dios, u tu da bzúale lau Dios da dxezaca ba lazre'. <sup>19</sup> Dios chia' gunne' le'e xúgutę da dxexázrjele, chee xel-la gunní'a chee xabáa chee' ne chee Jesucristo. <sup>20</sup> Gaca ba Xradxu Dios chadia' chacanna. ¡Ca'an gaca na!

*Pablo dxuzę dizra' benne' Filipos ca'*

<sup>21</sup> Waláz chia' neda' le gugapa diuzre lu La Jesucristo xúgutę benne' zaj nababę' chee Dios. Bi bíchedxu ca' zaj zúalę neda' dxulugape' le'e diuzre. <sup>22</sup> Xúgutę bi bíchedxu zaj zre'e nigá, benne' zaj nababę' chee Dios, ne bi bíchedxu zaj zre'e lizre bėnnea' dxenná bė'ene' xęzr la xu Roma, dxulugape' le'e diuzre.

<sup>23</sup> Dxenaba' lau Xránadxu Jesucristo gunę' da chawe' chee xúgutęle le'e. Ca'an gaca na.

## DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE COLOSAS

*Pablo dxugape' diuzre bi bíchedxu zaj zre'e xezre Colosas*

<sup>1</sup> Neda', Pablo, naca' gubáz chee Jesucristo lawe' da naca da dxaca lazre Dios, na' zúale bi bíchedxu Timoteo neda'. <sup>2</sup> Dxuzúaja' da nigá chee le'e zrle xezre Colosas, ne nabábale chee Dios, ne dxeajlí lázrele Cristo. Dxenaba' Xradxu Dios guné' da chawe' chee le'e, ne guné' le'e xel-la dxebeza zri lazre'.

*Da dxenaba Pablo lau Dios chee bi bíchedxu ca'*

<sup>3</sup> Dxéquezentu' Dios, Xra Xránadxu Jesucristo: Xcalenu' ca naca chee gate dxuchálajentu' Le'. <sup>4</sup> Ba bémentu' ca dxeajlí lázrele Cristo, ne ca nazri'ile xúgute' bi ca' chee Dios. <sup>5</sup> Caní dxunle lawe' da dxebeza lázrele da nucueza Dios chee xabáa, na' guzú laule dxunle ca naca da nigá gate guzile dizra' chawe' da naca na da li. <sup>6</sup> Dizra' chawe' nigá bla na ládujla le'e ca bla na duté xezr la xu nigá, na' dxezriluj na, ne dxun na zrin duté xezr la xu ca dxun na ládujla le'e, gate béntele ca nazri'i Dios bénneache, ne gunézele naca na da li. <sup>7</sup> Da nigá ble'e Epafras le'e. Naque' bi bíchedxu nazri'i lázredxu, ne ba bénqueze' zrin nen netu', ne naque' chee le'e tu benne' wén zrin li lazre' chee Cristo. <sup>8</sup> Epafras nigá bzenne' netu' ca dxaca chee le'e, ne ca nazri'i ljwézele ne chee Be' Lá'azxa.

<sup>9</sup> Chee le' na', zra gunézentu' da nigá, dxuchálajlequezentu' Dios chee le'e, ne dxenábantu' Le' guzéajni'ing' le'e ca naca da dxaca lazre', ne guné' le'e duté xel-la sina, ne duté xel-la dxéajni'i da dxunna Be' Lá'azxa dxi'u. <sup>10</sup> Caní dxenábantu' Le' chee gaca gunle ca dxal-la' xelún bi ca' chee Xránadxu, ne gunle ca da dxezaca ba lazre' Le', gunle xúgute' da naca da xrlátaje, ne gúnbeadxaquezle Dios. <sup>11</sup> Dxenábantu' Le' guzúa chache' le'e lu xel-la waca da naca chee xel-la szren chee' chee séquele guchaga laule xúgute' da dxaca chee lu duté xel-la zren lazre' chee, ne duté xel-la dxebe. <sup>12</sup> Dخال-la' xe le Dios: Xcalenu', lawe' da bzua Dios dxi'u chee sidxu da nucueze' cheedxu, chee súadxu lu xel-la naxani' chee', lawe' da nácadxu bi chee Le'. <sup>13</sup> Dios bselé' dxi'u lu xel-la dxenná bea chee da chul-la, na' bzue' dxi'u naga dxenná bea Zrí'ing' nazri'ite lazre'. <sup>14</sup> Zrí'ing' nácaqueze' Bénnea' bselé' dxi'u gate gutie' waláz cheedxu, chee bnite lau Dios dul-la gubágadxu.

*Bexácadxu tuze nen Dios lawe' da gute Cristo*

<sup>15</sup> Ca naca Jesús, dxulé'e na dxi'u ca nácaqueze Dios, Bénnea' quebe gaca lé'edxu, ne naque' chee Dios ca tu bi nedxu chee bénneache, bi nácadxabe' blau ca xúgute' da ben Dios. <sup>16</sup> Ne chee Le' ben Dios xúgute' da zaj zua xabáa, ne da zaj zua xezr la xu nigá, da ca' dxelé'edxu, ne da ca' quebe gaca lé'edxu, che zaj naca na be' ca' zaj naca na blau, u be' ca' dxelenná bea na, u be' ca' zaj napa na xel-la szren, u be' ca' zaj napa na xel-la waca, xúgute' na ben Dios ne chee Le', na' chee Le' zaj naca na. <sup>17</sup> Cristo ba zúaqueze' nédxute' ca xúgute' da zaj zua, na' ne chee Le' xúgute' da ca' dxelún na ca zaj naca chee na. <sup>18</sup> Xúgute' benne' zaj naque' bi chee Cristo zaj naque' ca tuze bel-la' dxen, na' Cristoqueze naque' xichaj bel-la' dxen na' da nácadxu. Le' bzue' bel-la' dxen na', ne Le' naque' Benne' bebán nédxute' ládujla benne' gate ca' chee gaque' Benne' blau lu xúgute' da zaj zua. <sup>19</sup> Caní naca na lawe' da guca lazre' Dios súale Cristo duté da nácaqueze Dios. <sup>20</sup> Cá'anqueze guca lazre' Dios ne chee Cristo xexune' tuze nen Le' xúgute' da zaj zua, ca da zaj zua na lu xezr la xu, ne da zaj zua na xabáa. Bexune' dxi'u tuze nen Le' ne chee xel-la gute chee Cristo le'e xaga béguaj.

<sup>21</sup> Nédxute le'e gúcale ca benne' zitu' lau Dios, ne bzrá'ale Dios lu xichaj lázrdaule, ne benle xúgute' da caléla, san na'a Dios ba hexune' le'e tuze nen Le', <sup>22</sup> ne chee da ben Cristo gate gutie' le'e xaga béguaj lu belá' dxen chee'. Da nigá ben Le' chee gaca guzúe' le'e lau Le', gácale benne' lá'azxa, ne du lazre', ne quebe bi nabágale da caléla. <sup>23</sup> Chee gaca caní dxal-la' se cháchale, ne sua típale ca dxeajlí lázrele Cristo, ne quebe gusanle ca da dxebeza lázrele, da na' nápale lawe' da dxéajle dizra' chawe' chee Cristo. Dizra' chawe' nigá nene na duté xezr la xu, na' nuzúa Dios neda', Pablo, benne' wén zrin chee', chee guchálaja' dizra' chawe' nigá.

*Zrin dxun Pablo chee bi ca' chee Cristo*

<sup>24</sup> Na'a dxebeda' lu xel-la zi' da dxedéa' ne chee le'e, lawe' da dxuzá lawa' lu bel-la' dxen chia' ca da dxezaca Cristo ne chee bi chee' ca', benne' ca' zaj naque' ca bel-la' dxen cheéqueze'. <sup>25</sup> Bzua Cristo neda' ca benne' wén zrin chee bi chee' ca', ne chee da bláwizra Dios neda' guna, gácale'na le'e, na' guchálaja' dútequeze da naca dizra' chee Dios, <sup>26</sup> ne chee guzéajni'ida' bénneache ca da nagache, da na' nagache nédxute, san na'a Dios ba blé'eng' bi chee' ca' ca naca na. <sup>27</sup> Guca lazre' Dios gulé'eng' benne' ca' ca naca xel-la gunní'a zren chee da na' nagache nédxute, da gunézruje' benne' ca' quebe zaj naque' judío. Da na' nagache

nédxutę naca na caní: Cristo zug' xichaj lázrdaule, na' cheę lę na' dxebeza lázredxu súadxu xabáa cheę'.

<sup>28</sup> Netu' dxuchálajntu' ca naca cheę Cristo. Dxuzéajni'intu' xúgutę bėnneache, ne dxusédentu' xúgutę', cheę xelejajni'i xánneę' cheę xelaca xúgutę' bėnneache du lazre' lau Dios ne cheę Jesucristo. <sup>29</sup> Cheę gaca caní dxuna' neda' zrin, dxuchineda' dutę xel-la waca cheę Cristo, da dxun na zrin lu xichaj lázrdawa'.

## 2

<sup>1</sup> Dxaca lazra' nézele le'e dxúnłę'a zrin, dxe'a gunne xue lęn Dios da naca cheęle le'e, ne da naca cheę bi bíchedxu ca' ca' zaj zre'e Laodicea, ne da naca cheę xúgutę bi bíchedxu ca' quebe ne xelexé'eng' neda' caníqueze. <sup>2</sup> Dxaca lazra' xeledipa lazre', ne xelaque' tuze lu xel-la zri'i lazre', ne xelaque' benne' gunni'a lu xichaj lázrdawe', cheę xelúnbe'e da nagache cheę Xradxu Dios da nácaqueze Cristo. <sup>3</sup> Lu na' Le' zaj dę ca naca xel-la gunni'a cheę xel-la sina, ne xel-la dxéajni'i. <sup>4</sup> Dxapa' le'e da nigá cheę quebe xelexi xę le'e benne' ca' zaj neze xrgúę' ca dxuluchálaję'. <sup>5</sup> Lácala quebe zúalętea' le'e caníqueze, naca na cáteze zúalęna' le'e lu be' nácaqueza', na' dxebełę'ęda' dxenda' dxunle da xlátaję, ne zę cháchale ca dxeajłi lázrele Cristo.

<sup>6</sup> Cheę lę na', ca bęnle, guzi' lu na'le Xránadxu Jesucristo, cá'anqueze dxal-la' gunle súalele Le'. <sup>7</sup> Dxal-la' gácale ca tu xaga da dxudé lue na síujla lu da naca cheę Cristo. Cá'anqueze dxal-la' gácale ca tu xu'u da dxe' lane lu da naca cheę' Le', cheę sę cháchale ca dxeajłi lázrele Le', ca blé'entu' le'e, na' dxál-la' queze xęle Dios: Xcalenu'.

### *Xel-la nabán cube da dxunna Cristo dxi'u*

<sup>8</sup> Le guxúe cuínale. Quebe güele lataj xelexi xę benne' ca' le'e, xuluchíneng' xel-la sina cheę bėnneache, ne dizra' caleła, ca naca da dxulusédequeze bėnneache, ne ca zaj naca da ca' dxácaqueze lu xęzr la xu nigá, ne quegá ca naca cheę Cristo.

<sup>9</sup> Dutę ca naca Dios nácaqueze Cristo.

<sup>10</sup> Nápałe le'e xúgutę da naca cheę' lawe' da nácaqueze beł-la' dxen cheę Le'.

Le' dxenná be'eng' xúgutę be' da dxelenná bea na, ne xúgutę be' da zaj napa na xel-la waca.

<sup>11</sup> Cá'anqueze, lawe' da nácale tuze nen Cristo nácale bi cheę Dios. Quebe guca cheęle ca da na' belúnqueze benne' judío ca', gulechugue' late' beł-la' dxen cheę bi biu cheę' ca', da na' dxulé'e na zaj nácabę' cheę Dios. Bedúa dutę da naca cheę beł-la' dxen cheęle da naca sban, da guca na ne cheę da bęn Cristo lu xichaj lázrdaule. Bęne' nácale bi cheę Dios. <sup>12</sup> Gate gudxúale nisa guca cheęle ca guca cheę Cristo gate bgache' lu xędxu ba, na' cá'anqueze guca cheęle ca guca cheę Le' gate bebane' ládujla benne' gate. Caní guca cheęle lawe' da guxeajłi lázrele xel-la waca cheę Dios, Bėnnea' hsebane' Cristo ládujla benne' gate ca'. <sup>13</sup> Gate nate gücale le'e ca benne' gate lu dul-la da gubágale, ne lu beł-la' dxen sban cheęle da quebe ne xedúa na. Na'a Dios ba nunne' le'e xel-la nabán tu zren nen Cristo, ne ba bnite lawe' xúgutę dul-la da gubágale. <sup>14</sup> Dios bzria xi'e ca naca da nabágadxu cheę xúgutę da nadxixruj bea na da gula da buluzría xi na dxi'u. Bebéaję' na chalá'ala, ne bde'e na le'e xaga bęguaj ca tu da gubaga' Cristo. <sup>15</sup> Gate gate Cristo le'e xaga bęguaj begüę' ca naca xel-la dxenná bea, ne xel-la waca cheę be' xriwe' ca', na' blé'eng' da ca' láwala gubáz cheę xabáa ca' lawe' da gunná bé'eng' na.

### *Le sa lazre' da ca' zaj dę na xabáa*

<sup>16</sup> Cheę lę na', quebe nu dxal-la' si tizra' le'e ca naca da dxe'aj da dxágule, ne ca zaj naca zra laní, ne ca naca laní cheę beu' dxe'ene, ne ca zaj naca zra dxupá'anale. <sup>17</sup> Xúgutę da caní zaj naca na ca tu zrúl-laze cheę da zaj zéaję da ca'. <sup>18</sup> Quebe güele lataj nu cua da nucueza Dios cheęle le'e, ne cheę da dxululé'e benne' ca', benne' dxeléquene' zaj naque' dxexruj lazre' lawe' da dxulucá'ana szrene' gubáz cheę xabáa ca', ne dxuluchálaję' cheę da quebe ne xelexé'eng', ne dxulucá'ana szren cuinę' ca naca xel-la sina cheę bėnneacheze da zaj nape'. <sup>19</sup> Quebe zaj dę'e Cristo, Bėnnea' naque' xichaj beł-la' dxen da nácadxu dxi'u, na' Le' dxusegule' dutę beł-la' dxen na', ne dxugawe' na, ne dxunę' na tuze du ca naca na, cheę gaca na ca dxaca lazre' Dios.

<sup>20</sup> Naca cheęle ca naca cheę tu benne' ba nate lawe' da nácale beł-la' dxen cheę Cristo, cheę québedxa gunle ca zaj naca da ca' dxácaqueze lu xęzr la xu nigá. Na'a, zbizr cheę na' dxedale ca benne' ne zaj nácaqueze' cheę xęzr la xu nigá, ne dxunle ca da dxelenná bea bėnneache. <sup>21</sup> Dxelenné': Quebe guchínenu' da nigá. Quebe gagu' da ca'. Quebe chajtáu' da na'. <sup>22</sup> Xúgutę da nadxixruj bea caní dxuluchalaj na cheę da ca' dxeledé cheę na gate dxuchinedxu na, ne zaj nácaze na da dxelenná bea bėnneache, ne da dxuluséde bėnneache. <sup>23</sup> Da li dxeleque bėnneache zaj naca na sina da nadxixruj bea caní, lawe' da dxuluséde na bėnneache xelúe lá'anę' Dios, ne xelaque' dxexruj lazre', ne xelenná be'eng' beł-la' dxen

chee'. Quebe bi culuén zaj napa na chee xelenná be'e na xel-la dxezá lazre' sban ca' chee bénneache.

### 3

<sup>1</sup> Le'e nácale ca benne' ba belexebán tu zren nen Cristo. Chee le na' le sa lazre' da zaj zua xabáa, naga dxe' Cristo chalá'a xabeła chee Dios. <sup>2</sup> Le gulaba lazre' chee da zaj de xabáa, quegá chee da zaj de lu xezr la xu. <sup>3</sup> Nácale ca benne' ba zaj nate, na' xel-la nabán chee le nuzúa chawe' Dios naga zua Cristo. <sup>4</sup> Cristo nácaqueze xel-la nabán chee dxu, na' gate xelá' Le', cá'anqueze le'e gunle tu zren Le' lu xel-la szren chee'.

#### *Xel-la nabán gula ne xel-la nabán cube*

<sup>5</sup> Chee le na', le xebéaj ca tu da nate xúgute da zaj zua lu xichaj lázrdaule da zaj naca na chee xezr la xu nigá, ca naca xel-la dxichaj na xrba chee xel-la nuchaga na', ne da sban, ne xel-la dxezá lazre' da sban ne da caleła ca', ne xel-la dxucude', lawe' da naca da dxucude' bénneache ca dios chee queze. <sup>6</sup> Xúgute da caní dxelún benne' quebe dxuluzúe' dizra' chee Dios, na' chee le na' gudé Dios benne' ca' lu da ba xa'. <sup>7</sup> Cá'anqueze le'e benle xúgute da caní gate nate. <sup>8</sup> Na'a, québedxa gunle xúgute da caní:

Xel-la dxezrá'a, ne xel-la xichaj zra'a, ne xel-la dxeuide ljwezre.

Québedxa nnele dizra' schanni'.

Québedxa gucháchale ljwézrele.

<sup>9</sup> Quebe si xe ljwézrele tule xetule, lawe' da ba bzúale chalá'ala da gúcale nédxute, ne ca naca da benle. <sup>10</sup> Nácale ca benne' cube, lawe' da dxuxucube Dios le'e chee gácale ca nácaqueze Dios, Bénnea' bené' le'e, ca zrindxa gúnbea xánnele Le'. <sup>11</sup> Lau Dios québedxa bi zaca che nácadxu benne' griego, che benne' judío, u che nácadxu benne' zaj nadxugu lu bel-la' dxen chee' da dxulé'e na zaj nababe' chee Dios, che benne' quebe zaj nape' da na' dxulé'e na, u che nácadxu benne' zitu', che benne' ca' zaj zre'e xi'a xegu ca', u che nácadxu benne' zaj nada'u, che benne' quebe zaj nada'u. Da zaca na naca na che naca Cristo benne' xíchajdxu, ne che zue' lu xichaj lázrdaudxu.

<sup>12</sup> Dios nazri'ing' le'e, ne guqu'é le'e chee gácale bi chee' ca'. Chee le na' le gaca:

Benne' dxexache lazre', ne benne' zri'i lazre',

ne benne' dxexruj lazre', ne benne' chawe' lazre',

ne benne' zren lazre'.

<sup>13</sup> Le gácale ljwézrele tule xetule,  
ne le gunite lau chee tule xetule,  
che núlale dxezrá'a ljwézrele.

Ca ben Cristo, bnite lawe' chee,  
cá'anqueze le gun le'e chee ljwézrele.

<sup>14</sup> Da dxundxa na ba xen, le zri'i ljwézrele lawe' da naca xel-la zri'i lazre' da dxun na dxi'u tuze, ne li lazre'. <sup>15</sup> Xel-la dxebeza zri lazre' da dxunna Dios dxi'u dxal-la' nna bea na lu xichaj lázrdaudxu, lawe' da bláwizra Dios le'e chee súale lu xel-la dxebeza zri lazre' chee', ne gácale ca tuze bel-la' dxen. Cá'anqueze dxal-la' xe le Dios: Xcalenu'.

<sup>16</sup> Dizra' chee Cristo dxal-la' guzúa xánnele lu xichaj lázrdaule chee séquele guzéajni'ile, ne gusízre ljwézrele nen duté xel-la sina chee Dios. Lu duté xel-la dxezaca ba lazre' le gul-la lau Dios salmo ca', ne da dxue lá'anale Dios, ne da ca' dxuzúa Be' Lá'azxa xichaj lázrdaule. <sup>17</sup> Bíteteze da gunle, u da nnale, le gun xúgute na lu La Xránadxu Jesús, ne xe le Xradxu Dios: Xcalenu', ne chee Le'.

#### *Ca dxal-la' xelún benne' ca' zaj naque' bi chee Cristo*

<sup>18</sup> Le'e, nu'ula, le guzúa dizra' chee benne' chee chee, lawe' da naca na da dxal-la' xelún benne' dxeajlí lazre' Xránadxu.

<sup>19</sup> Le'e, benne' biu, le zri'i zru'ulale, ne quebe xexitaj lázrele le'.

<sup>20</sup> Le'e, bi cuide', le guzúa dizra' chee xra xrnale lu xúgute da dxelenné', chee gunle da dxezaca ba lazre' Xránadxu.

<sup>21</sup> Le'e, xruze xrna', quebe tételale xel-la snia nen zrí'inele, chee quebe xelate ni'a na'be'.

<sup>22</sup> Le'e, benne' zaj nada'u, le guzúa dizra' xúgute da xelenná xrnale lu xezr la xu nigá, quegaze gate dxelenná'te', chee xeléquene' le'e xrlátaje, san le gun da ca' du lázrele, ne le zrebe Dios. <sup>23</sup> Bíteteze da gunle, le gun na du lázrele, ca nu benne' dxunge' zrin chee Xránadxu, ne quegá zrin chee beniácheze. <sup>24</sup> Lácala dxunle zrin nigá chee bénneache, nézele gunna Xránadxu lazruj chee da dxal-la' sile lu zra na', lawe' da dxunle zrin chee Cristo, Bénnea' nácaqueze' Xránale. <sup>25</sup> Nu benne' dxunge' da caleła, wazi'e lazruj chee da caleła nune' lawe' da quebe dxuchá Dios ca da dxunge' chee tu xetú benne'.

## 4

<sup>1</sup> Le'e, benne' nácale xrane bénneache, dxal-la' gácale xlátaje, ne li lazre' ca dxuchínele benne' ca' ná'ule. Le gusá lázrele, cá'anqueze le'e, zua Xránale xabáa.

<sup>2</sup> Le'e, bi bícha'dau', le guchálajlequeze Dios, síale ban lazre', ne xele Dios: Xcalenu'.

<sup>3</sup> Cá'anqueze, le naba lau Dios waláz cheentu', chee gácale Xránadxu netu' chee séquentu' guchálajntu' xrtizre', ne guzėjajni'intu' bénneache ca naca da nagache ca naca chee Cristo. Lawe' da dxuna' da cani ne xu'a lizre xia nigá. <sup>4</sup> Le naba lau Dios chee séqueda' guzėjajni' xáneda' bénneache ca dxal-la' guna'.

<sup>5</sup> Le gaca sina ca dxunle chee benne' ca' quebe dxeleajli lazre' Cristo, guchine xánnele zra ca' dxunna Dios le'e. <sup>6</sup> Dizra' dxuchálajle dxal-la' gaca na xrlátaje, ne da xelexezaca ba lazre' bénneache, na' dxal-la' nézele ca xechébele chee tu tu benne' ca' gate bi dxelenábene' le'e.

*Dxulugapa diuzre bi bíchedxu ca' ljwezre'*

<sup>7</sup> Tiquico, bi bíchedxu nazri'i lázredxu guzenbe' le'e ca naca da dxaca chia'. Nácab'e tu bi li lazre' dxácalenbe' neda', ne dxunbe' zrin chee Xránadxu tu zren nen neda'. <sup>8</sup> Chee le' na', dxusel-la'-be' naga zúale, chee guzenbe' le'e ca dxaca cheentu', ne chee gutípabe' lázrele. <sup>9</sup> Cá'anqueze zėjajle Onésimo lebe', naque' bíchedxu li lazre', benne' nazri'i lázredxu, ne naque' benne' walázr cheele. Benne' caní xuluzenne' le'e ca naca da dxaca nigá.

<sup>10</sup> Aristarco, benne' xú'uleñe' neda' lizre xia, dxugape' le'e diuzre, ne cá'anqueze dxun Marcos, bi xrtia Bernabé. Ba bzėjajni'ida' le'e ca dxun Marcos. Che waza'be' xedajnná'abe' le'e, le si' lu na'le lebe' cháwe'dau'. <sup>11</sup> Cá'anqueze bénnea' le' Jesús dxugape' le'e diuzre, bénnea' le'queze' Justo. Benne' zan benne' judío dxeleajli lazre' Cristo, san benne' canize ládujla benne' judío ca' dxelun'e zrin tu zren nen neda', na' dxuzénentu' bénneache ca xelezéqueñe' xelu'e naga dxenná bea Dios, na' dxuluzúe' neda' tu lu da ba neza zrente. <sup>12</sup> Dxugapa Epafras le'e diuzre. Naque' wən zrin chee Cristo, ne benne' walázr cheequezele. Dxenábaqueze' lau Dios cheele le'e chee se cháchale, ne guzúa cuínale du lázrele chee gunle da dxaca lazre' Dios. <sup>13</sup> Neda' dxexechəba' chee Epafras, dxe'e gunne xue cheele le'e, ne chee bi bíchedxu zaj zre'e xezre Laodicea, ne xezre Hierápolis. <sup>14</sup> Dxugapa le'e diuzre Lucas, bénnea' dxexun'e benne' we' ca', ne naque' benne' nazri'i lazra'. Cá'anqueze dxugapa Demas le'e diuzre.

<sup>15</sup> Le gugapa diuzre bi bíchedxu zaj zre'e xezre Laodicea. Cá'anqueze le gugapa diuzre Ninfas, ne bi bíchedxu ca' dxelezrague' lizre'. <sup>16</sup> Ca te gulábale le'e xiche nigá, le sel-la na chee xululaba bi bíchedxu ca' zaj zre'e Laodicea na. Cá'anqueze le gulaba le'e xiche da ze za na Laodicea. <sup>17</sup> Le xe Arquipo da nigá: Bxue xanne' gunu' cháwe'dau' ca naca zrin chee Xránadxu da bzue' lu na'u.

<sup>18</sup> Neda' Pablo dxuzúaja' da nigá nen ná'aqueza'. Dxugapa' le'e diuzre. Le gusá lázrele xu'a lizre xia. Dxenaba' lau Dios gun'e cheele da chawe'. ¡Ca'an gaca na!

## DIZRA' NEDXU BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

*Pablo dxugape' diuzre bi bíchedxu ca'*

<sup>1</sup> Neda', Pablo, ne Silvano, ne Timoteo dxugá pantu' le'e diuzre. Dxuzú aja' da nigá chee le'e, bi bicha', nazrá gale chee Cristo lu xezre Tesalónica, ne nabábale chee Xradxu Dios, ne chee Xránadxu Jesucristo. Dxenaba' lau Xradxu Dios ne lau Xránadxu Jesucristo guné' chee da xrlátaje, ne gunné' le'e xel-la dxebeza zri lazre'.

*Ca dxelejli lazre' benne' Tesalónica Cristo*

<sup>2</sup> Dxeqezentu' Dios xcalenu' ca naca chee xú gúte le'e, ne dxenábantu' gaca da chawe' chee le'e gate dxuchálajntu' Le'. <sup>3</sup> Lau Xradxu Dios dxeajsá lázrentu' ca benne' zrin duté lu xel-la dxeajli lazre' chee, ne ca benne' zrin chee Cristo lu duté xel-la zri'i lazre' chee, ne ca zé chácale ca dxebeza lázrele súalele Xránadxu Jesucristo. <sup>4</sup> Le'e, bi bicha', Dios nazri'ine' le'e, na' nézentu' gucá'a Le' le'e. <sup>5</sup> Gate bchálajntu' dizra' chawe' chee Cristo naga zúale, quebe bentu' na nen dizra'ze, san nen duté xel-la waca chee Be' Lá'azxa bchálajntu', ne lu duté xel-la dxuxrén lazre' cheentu'. Nézquezle ca bentu' zrin nigá ládujla le'e lawe' da nazri'ile'entu' le'e.

<sup>6</sup> Le'e bénquezle ca bentu' netu', ne ca ben Xránadxu, na' guzile dizra' na' lu duté xel-la dxebe' chee da benna Be' Lá'azxa le'e, lácala gudéle'ele xel-la zi'. <sup>7</sup> Cani guca, nácale tu da dxulé'e na ca dxal-la' xelaca xú gúte benne' dxelejli lazre' Cristo naga nababa Macedonia, ne naga nababa Acaya. <sup>8</sup> Cani guca, bzenle le'e benne' ca' dizra' chee Xránadxu. Na'a quegá tuze benne' zaj zre'e Macedonia, ne Acaya, san cá'anqueze benne' ca' zaj zre'e xú gúte xezre zaj nézené' ca dxeajli lázrele Dios, na' québedxa dxun na ba xen guzémentu' le'. <sup>9</sup> Benne' caniqueze dxuluchálaje' ca guca gate bedajnná'antu' le'e ne ca guzi' lu na'le netu', ne ca bsanle bedau' xiaj xaga ca' chee bábale chee Dios, na' guzú laule dxunle zrin chee Dios ban, Benne' li. <sup>10</sup> Cá'anqueze dxuluchálaje' ca dxebézale zra xelá' Jesús, zé'e xabáa. Le' naque' Zri'ine Dios, na' Dios bsebane' Le' ládujla benne' gate ca'. Léquezle' guselé' dxi'u lu da ba xa' zrenté da za za' da sel-la Dios lu duté xel-la dxezrá'a chee'.

## 2

*Zrin ben Pablo lu xezre Tesalónica*

<sup>1</sup> Le'e, bi bicha', ba nézquezle le'e da bentu' gate na' bedajnná'antu' le'e quebe guca na zrin nite. <sup>2</sup> Nézquezle ca belún benne' zaj zre'e xezre Filipos, buluchácalené' netu', ne buluzalje' netu' gate na' za xedajnná'antu' le'e, na' Dios beXu chache' netu' chee bchálajntu' dizra' chawe' chee Cristo naga zúale, lácala buluzaga benne' zan netu'. <sup>3</sup> Quebe guque zréajntu' ca bchálajntu', ne quegá bi da caléla guca lázrentu' guntu', ne quegá guca lázrentu' si xentu' le'e. <sup>4</sup> Dxuchálajquezentu' ca dxaca lazre' Dios lawe' da bxren lazre' netu', ne bsebage' netu' guchálajntu' dizra' chawe' chee Cristo. Cani dxuchálajntu', quegá chee xelexezaca ba lazre' bènneache san chee xezaca ba lazre' Dios, Bénnea' dxenná'teé da zua xichaj lázrdaudxu. <sup>5</sup> Nézquezle le'e cabata' ne xentu' le'e dizra' gúladau' da gucá'ana szren na le'e, ne quegá bi gunnantu' chee bi gúnnale netu'. Dios nézquezene' naca na da li. <sup>6</sup> Cabata' ne gaca lázrentu' xelapa bènneache netu' ba lá'ana, le'e u benne' xula, lácala wazéquentu' nna bé'entu' le'e bi gúnnale netu' lawe' da nácantu' gubáz chee Cristo. <sup>7</sup> Bentu' le'e xrtandau' ca dxun tu nu'ula dxusegule' zri'ine'. <sup>8</sup> Nazri'ile'entu' le'e, la guzréntu' gúnnatentu' le'e, quegaze dizra' chee Dios, san cá'anqueze xel-la nabán cheentu'. Cani nazri'ile'entu' le'e. <sup>9</sup> Le'e, bi bicha', nézquezle ca bentu' zrin du lázrentu' chee gate' da xe'aj gáuntu'. Bentu' zrin te zra ne chizrele chee quebe bi gusaca zi'ntu' le'e dxácaté bchálajntu' le'e dizra' chee Dios.

<sup>10</sup> Le'e dxexechébequezle, ne cá'anqueze Dios nézené' ca bentu' gate na' zúalentu' le'e, gúcantu' li lazre', ne xlátaje, na' quebe nu guzeque' nu nne' cheentu'. <sup>11</sup> Cá'anqueze nézquezle ca bentu', bsízrentu' tu tule le'e, ne btípantu' lázrele ca dxun tu xra bidau' chee zri'ine'. <sup>12</sup> Gunná bé'entu' le'e gunle ca dxal-la' xelún benne' zaj naque' bi chee Dios, Bénnea' dxuláwizre' le'e chee chu'ule naga dxenná'be'e lu duté xel-la szren chee'.

<sup>13</sup> Chee le' na' dxéquezentu' Dios xcalenu' lawe' da benne' ca naca dizra' chee Dios da bchálajntu', ne guzile na ca dizra' chee Dios, ne quegá ca dizra' chee benneácheze. Da li naca na dizra' chee Dios, ne dxun na zrin lu xichaj lázrdaule le'e, na' dxeajli lázrele Le' chee gácale chee Dios duté ca nácale. <sup>14</sup> Le'e, bi bicha', gate gudele xel-la zi' chee da belún benne' walá z chee, guca chee ca guca chee benne' zaj nababa chee Dios naga nababa Judea, benne' ca' zaj naque' bi chee Cristo, lawe' da cá'anqueze guledé' xel-la zi' chee da belún benne' walá z



chee' ca', benne' judío. <sup>15</sup> Benne' judío caní belutię Xránadxu Jesús, ca belún benne' judío ca' gate nate, belutię 'benne' ca' gulenné' waláz chee Dios, na' benne' caní gulebeaje' netu' lázrentu'. Quebe dxelunę' da dzezaca ba lazre' Dios, ne dxeledábague' xúgute bénneache, <sup>16</sup> na' gate dxaca lázrentu' guchálajęntu' benne' quebe zaj naque' judío chee xeledé', quebe dxelunę' netu' lataj. Caní dxelunę', dxuluzandxę' dul-la da zaj nabague'. Na'a, ba be' Dios lataj dxaca da ba xa' zrentę chee benne' ca'.

*Pablo dxezá lazre' cheajnné'ę bíchedxu zaj zre'ę xezre Tesalónica*

<sup>17</sup> Le'e, bi bicha', gate becuásentu' naga zúale tu chi'i, lácala québedxa blé'entu' le'e, nuzúaquezentu' le'e lu lázrdauntu', ne guzá lázrele'entu' xedajnná'antu' le'e. <sup>18</sup> Guca lázrentu' xídanu', na' neda', Pablo, guca lazra' xida' tu chupa lasa, na' bzaga Satanás neda'. <sup>19</sup> ¿Bizra da na' dxunna na netu' xel-la dzebeza lazre', ne xel-la dxebe', ne da dxuzúa na netu' lu da ba neza, ne da dxunna bea na xua da si'ntu' lu na' Dios? Lé'eqeze gácale da caní lu zra xelá' Xránadxu Jesucristo. <sup>20</sup> Awe'. Da nácale le'e gun na si'ntu' da xabáa lau Dios, ne súantu' lu da ba neza.

### 3

<sup>1</sup> Nadxa gate québedxa guca guchaga launtu' lawe' da quebe bi bénentu' ca dxaca chee, na' gúquentu' xegá'ana chúpantu' lu xezre Atenas, <sup>2</sup> na' sél-lantu' bi bíchedxu Timoteo xedajnná'abe' le'e, lawe' da naca lębe' tu bi wen zrin chee Dios, ne ba benbe' zrin tu zren nen netu', bchálajntu' dizra' chawe' chee Cristo, na' wazéquebe' guzé cháchabe' le'e, ne gutípabe' lázrele ca dxeajlí lázrele Cristo, <sup>3</sup> chee quebe gate ní'a na'le lawe' da dxedentu' lu da štebe caní. Le'e nézquezle dxal-la' tedxu xel-la zi' caní. <sup>4</sup> Gate ne zúalentu' le'e bzéajni'intu' le'e wadéquezdxu lu da zi' da xa', na' ca'an guca, ca ba nézquezle. <sup>5</sup> Chee lę na', gate québedxa bzúeda' guchaga lawa' lawe' da quebe bi benda' chee, na' gusel-la' nu bedajnába le'e ájala dxaca chee lu xel-la dxeajlí lazre' chee Cristo, lawe' da bzreba' ga gaze xucuasa da xriwe' le'e lu neza chee Dios, na' gaca níteze zrin bentu' ga na'.

<sup>6</sup> Na'a ba belá' Timoteo ga ní zúantu', ze zabe' Tesalónica, ne ze núabe' dizra' chawe' ca naca xel-la dxeajlí lazre', ne xel-la zri'i lazre' chee. Dxebe' netu' dxeajsá lázrquezle le'e netu' nen dutę xel-la zri'i lazre', ne dxezá lázrele'ele lé'ele netu', ca netu' dxaca lázrentu' le'entu' le'e. <sup>7</sup> Chee lę na', bi bicha', dxácatę dxedentu' lu da štebe caní, ne lu da zi' da xa', zúantu' xel-la dxebe' lawe' da nézentu' zę cháchale ca dxeajlí lázrele Cristo. <sup>8</sup> Na'a naca cheęntu' ca naca chee tu benne' bezúateę' chawe' lawe' da nézentu' zę cháchale lu da naca chee Xránadxu. <sup>9</sup> ¿Ájazra guntu' xęle'entu' Dios: Xcalenu' ca dxal-la' guntu' waláz chee le'e, ne ca naca xel-la dxebe' nápanu' lau Dios ne chee le'e? <sup>10</sup> Te zra, ne chizrela dxata' xúentu' Dios gunne' netu' lataj xedajnná'quezentu' le'e, chee gácadxale li lazre' ca dxeajlí lázrele Cristo.

<sup>11</sup> Dxenábantu' lau Xradxu Dios, ne lau Xránadxu Jesucristo gácalęnę' netu' chee séquentu' xedajnná'antu' le'e. <sup>12</sup> Dxenábantu' Le' chee zri'idxa lįwézrele tule xetule, ne chee zri'idxale xúgute bénneache ca nazri'intu' netu' le'e. <sup>13</sup> Dxenábantu' Le' guzúa chúchue' lázrdaule, chee gácale benne' li lazre', ne benne' lá'axza lau Xradxu Dios lu zra na' gate xelá' Xránadxu Jesús nen xúgute bi chee Le'.

### 4

*Dxal-la' gundxu da dzezaca ba lazre' Dios*

<sup>1</sup> Le'e, bi bicha', dxata' xúentu' le'e, ne dxusebágantu' le'e da nigá lu La Xránadxu Jesús. Le gúndxaze da blé'entu' le'e gunle, da na' dzezaca ba lazre' Dios.

<sup>2</sup> Nézquezle le'e da bzéajni'intu' le'e ne chee Xránadxu Jesús. <sup>3</sup> Da dxaca lazre' Dios naca na guzúa cuñale lu na' Le', ne québedxa gunle da sban, <sup>4</sup> na' súalele zrú'ulaquezle tu tule le'e lu xel-la lá'axza chee Xránadxu, ne gápale le' ba lá'ana, <sup>5</sup> ne quebe súale lu xel-la dxezá lazre' chee da sban ca dxelún benne' quebe zaj nunbe'ę Dios. <sup>6</sup> Ca naca chee da nigá, netule le'e quebe dxal-la' si xęle bi bichele, quebe gunle da sban chee', lawe' da xebéaj lazre' Xránadxu chee xúgute benne' dxelunę' da caní, ca ba bzéajni'intu' le'e. <sup>7</sup> Dios bláwizre' dxi'u chee gundxu da xrlátaje, ne quegá gundxu da sban. <sup>8</sup> Caní naca, che nu benne' dxuzúę' chalá'ala ca naca da nigá, quegá tuze bénneache dxuzúę' chalá'ala, san Diósqueze dxuzúę' chalá'ala, Bénéa' nunne' dxi'u Be' Lá'axza.

<sup>9</sup> Ca dxal-la' zri'i lįwézrele quebe dxun na ba xen guzúaja' chee, lawe' da ba blé'eqeze Dios le'e chee zri'i lįwézrele tule xetule. <sup>10</sup> Caníqueze dxal-la' zri'ile xúgute bi bíchedxu zaj zre'ę xezre ca' zaj nababa xezr la xu Macedonia. Dxata' xuentu' le'e, bi bicha', chee zri'idxa lįwézrele. <sup>11</sup> Le gun ba xuzre súale lu xel-la dxebeza zri lazre', ne gunle da naca chee zquezle, ne gunle zrin nen ní'a na'le ca ba guzrentu' le'e, <sup>12</sup> chee xelapa benne' xula le'e ba lá'ana, ne chee quebe bi xázrjele le'e.

*Ca gaca zra xelá' Xránadxu*

<sup>13</sup> Le'e, bi bicha', dxaca lázrentu' nézele ca naca chee' bi bíchele zaj nate, chee' quebe xewine lázrele ca dxelún xezicadxu benne' ca' quebe bi dxelebeza lazre'. <sup>14</sup> Dxéajlédxu gute Jesús, ne bebang' ládujla benne' gate, ne cá'anqueze dxéajlédxu Dios gusebang' benne' gate ca' guleajlí lazre' Jesús, chee' xelezúalene' Le'.

<sup>15</sup> Chee' le' na' dxéntu' le'e da na' ble'e Xránadxu, gunné': Dxi'u naca bandxu gate xelá' Xránadxu, quebe cheajlédxu Le' nédxula ca benne' ca' zaj nate. <sup>16</sup> Xránaquezdxu zé'e xabáa, na' cuezre xé'e nen duté xel-la dxenná' bea chee', na' xendxu chi'i gubáz blau chee' xabáa, ne chi'i luzu da dxulucuezre' waláz chee' Dios. Nadxa benne' gate ca', benne' guléajlé'e chee' Cristo xelexebánqueze' za'a le'. <sup>17</sup> Te na', dxi'u na' naca bandxu xeché'e dxi'u tu zren nen benne' ca' ládujla beuj chee' xezrágdxu Xránadxu lu be'. Ca'an gaca súaledxu Xránadxu chadía chacanna. <sup>18</sup> Chee' le' na' le gutipa lázrele tule xetule nen dizra' caní.

## 5

<sup>1</sup> Na'a, ca naca chee' bi zra, u bi iza xelá' Xránadxu, quebe dxun na ba xen guzúaja' cheele, bi bicha'. <sup>2</sup> Ba nézquezle le'e zrin zra xelá' Xránadxu gate québela nu dxebeza Le', ca za tu benne' gubán chizrela. <sup>3</sup> Gate dxelenná' bénneache: Cháwélé'e dxaca cheedxu, ne quebe bi dxuchixre chee, nadxa za da guzríá xi na benne' ca', ca za xel-la dxudía chee' tu nu'ula gate zue' z'i, ne quebe xelelé' lu da na'. <sup>4</sup> Le'e, bi bicha', quebe zúale lu da chul-la, chee' quebe gaca cheele lu zra na' xelá' Xránadxu ca dxaca chee' tu benne' dxu'u gubán lizre'. <sup>5</sup> Xúgutele le'e dxunle xrlátaje, da naca chee' xel-la naxaní', ne chee' te zra. Quebe dxundxu da calela, da naca chee' chizrela, ne chee' da chul-la. <sup>6</sup> Chee' le' na' quebe dxal-la' gácadxu ca benne' la wase' ca dxelún benne' xula, san dxal-la' gácadxu ban lazre', ne guzéajni'i cuínadxu. <sup>7</sup> Benne' dxelase, chizrela dxelásié', ne benne' dxelezuzre, chizrela dxelezúzequeze'. <sup>8</sup> Nácadxu dxi'u chee' te zra, na' dxal-la' guzéajni'i cuínaquezdxu. Che dxéajlí lázredxu Xránadxu, ne zri'idxu Le', da nigá gaca na cheedxu ca tu zra lana benne' zeje' wedil-la da naca na xia. Cá'anqueze che dxebeza lázredxu ladxu, da nigá gaca na cheedxu ca tu lapa xia ca da dxuzúá tu benne' zeje' wedil-la xíchaje'. <sup>9</sup> Dios quebe beñe' cheedxu tedxu lu da ba xa' da sel-le' lu xel-la dxezrá'a chee. Beñe' cheedxu zrué'edxu xel-la weselá ne chee' Xránadxu Jesucristo. <sup>10</sup> Jesucristo gutie' waláz cheedxu chee' gaca bandxu tu zren nen Le', che naca bandxu, u che ba nátedxu gate zrin zra na'. <sup>11</sup> Chee' le' na' le gutipa lázrele, ne le guzé' chacha ljwézrele tule xetule, ca ba dxúnquezle.

*Pablo dxuzéajni'ine' bi bíchedxu ca'*

<sup>12</sup> Le'e, bi bicha', dxata' xúentu' le'e gápale ba lá'ana benne' dxelune' zrin ládujla le'e, benne' ca' gucá'a Xránadxu chee' xelenná' be'ene' le'e, ne xulusédene' le'e. <sup>13</sup> Dxal-la' gápale benne' ca' ba lá'ana, ne zri'ile le' lawe' da dxelune' zrin chee' Dios. Le sua lu xel-la dxebeza zri lazre' tule xetule.

<sup>14</sup> Cá'anqueze dxusebáantu' le'e, bi bicha', gusízrele benne' ca' quebe dxelaca lazre' xelune' zrin, ne gutipa lázrele benne' ca' dxelate ni'a ne'e, ne gácalele benne' quebe zaj ze' chacha, ne gácale zren lazre' nen xúgute bénneache.

<sup>15</sup> Le guxúe xanne' cuínale chee' quebe gunle da calela chee' nu benne' dxune' cheele da calela, san le gun ba xuzre gúnquezle da xrlátaje, tule xetule, ne chee' xúgute bénneache.

<sup>16</sup> Le béquezle.

<sup>17</sup> Le guchálajlequezle Dios.

<sup>18</sup> Le xé Dios: Xcalenu' ca naca xúgute da dxaca cheele.

Dxal-la' gunle da nigá lawe' da naca na da dxaca lázrqueze Dios gunle le'e, lawe' da nácale bi chee' Jesucristo.

<sup>19</sup> Quebe guzágale da dxun Be' Lá'azxa.

<sup>20</sup> Quebe guzúale chalá'ala dizra' da nunezruj Be' Lá'azxa nu bi bíchedxu ca'.

<sup>21</sup> Le guchi'a xanne' xúgute da ca', na' le si' da naca na xrlátaje.

<sup>22</sup> Le cuasa lu xúgute da quebe naca na xrlátaje.

<sup>23</sup> Dios dxunne' dxi'u xel-la dxebeza zri lazre'. Dxenaba' lau Le' guné' le'e benne' lá'azxaqueze, ne guxúe' be' nácaquezle, ne bénne'du xu'ule, ne be'l-la' dxen cheele chee' gácale du lazre' lu zra na' xelá' Xránadxu Jesucristo. <sup>24</sup> Bénnea' bláwizre' le'e naque' li lazre', na' Le' guné' xúgute da caní.

*Pablo dxuzé dizra' bi bíchedxu ca'*

<sup>25</sup> Le'e, bi bicha', le naba lau Dios gácal-lene' netu'.

<sup>26</sup> Le gugapa diuzre xúgute bi bíchedxu ca', ne gunídale le'.

<sup>27</sup> Lau Xránadxu dxusebaga' le'e gulábale xiche nigá lálwela xúgute bi bíchedxu ca'.

<sup>28</sup> Dxenaba' lau Xránadxu Jesucristo guné' cheele da chawe'. ¡Ca'an gaca na!

## DIZRA' GUDXUPE' BZUAJ SAN PABLO CHEE BI CHEE CRISTO ZAJ ZRE'E XEZRE TESALÓNICA

*Pablo dxugape' diuzre bi bíchedxu ca'*

<sup>1</sup> Neda', Pablo, nen Silvano, ne Timoteo, dxugápantu' le'e diuzre. Dxuzúaja' da nigá cheele le'e, bi bícha'dau', nazrágale chee Cristo lu xezre Tesalónica, ne nácale bi chee Xradxu Dios, ne chee Xránadxu Jesucristo. <sup>2</sup> Dxenaba' lau Xradxu Dios, ne lau Xránadxu Jesucristo guné' cheele da chawe', ne gunné' le'e xel-la dxebeza zri lazre'.

*Dios guchi'e da belún benne' dul-la ca' gate xelá' Cristo*

<sup>3</sup> Le'e, bi bícha'dau', dxal-la' xéquezentu' Dios: Xcalenu' ca naca cheele, da dxal-la' guntu' lawe' da ba dxegula xel-la dxeajlí lazre' cheele, ne ba zúadxa xel-la nazrí'i lazre' len ljwézrele tule xetule. <sup>4</sup> Chee le na' dxuchálajntu' ca naca cheele le'e lávela bi ca' chee Cristo. Dxuchálajntu' ca dxuchaga laule da dxelún benne' ca' zaj nau zi' xuzre' le'e, ne ca naca xel-la zi' da dxedele, san nácale zren lazre', ne dxeajlí lázrele Dios. <sup>5</sup> Da nigá dxulé'e na xlátaje naca Dios ca dxuchi'e da dxelún bénneache, dxenné' naca cheele chu'ule naga dxenná bea Le' lawe' da dxedele xel-la zi' chee la' xel-la dxenná bea chee'.

<sup>6</sup> Xlátaje naca gudé Dios benne' ca' xel-la zi', benne' ca' dxuludé' le'e xel-la zi' na'a, <sup>7</sup> na' guzúe' le'e naga xezí' lázrele chee xel-la zi' da dxedele na'a. Xezí' lázrele tu zren nen netu' gate xelá' Xránadxu Jesús, ze'e xabáa nen gubáz blau ca' chee xabáa chee'. <sup>8</sup> Ze'e nu'e xi' chee gudé' lu da ba xa' benne' ca' chee dxelexúnbe'e Dios, ne quebe dxuluzúe' dizra' ca dxenná dizra' chawe' chee Xránadxu Jesucristo. <sup>9</sup> Benne' caní xelecuase' naga zua Xránadxu lu xel-la szren chee', ne xel-la dxenná bea chee', na' xeledé' xel-la zi' chee' da ba xa' chadia chacanna. <sup>10</sup> Caní gaca gate xelá' Xránadxu lu zra na' chee xulucá'ana szren benne' chee' ca' Le', na' benne' ca' dxeajlí lazre' Le' xelape' Le' ba lá'ana. Le'e gunle benne' ca' tu zren lawe' da guxéajjele chee da bechébentu'.

<sup>11</sup> Chee le na' tu dxuchálajlequezentu' Dios ca naca cheele, ne dxenábantu' Le' gaca cheele sile da na' bláwizre' le'e sile. Cá'anqueze dxenábantu' lau Dios guchínene' xel-la waca chee' chee gaca gunle ca naca xúgute' da xrlátaje da dxezá lázrele, ne xúgute' zrin dxunle ne chee xel-la dxeajlí lazre' cheele. <sup>12</sup> Caní gunle, gucá'ana szrenle La Xránadxu Jesucristo, na' Le' gape' le'e ba lá'ana ne chee xel-la xrlátaje chee Dios cheedxu, ne chee Xránadxu Jesucristo.

## 2

*Benne' xriwe'*

<sup>1</sup> Le'e, bi bícha', ca naca chee zra xelá' Xránadxu Jesucristo chee xutupe' dxi'u chee Le', dxata' xúentu' le'e <sup>2</sup> chee quebe guchale ca dxéquele, ne quebe síale stébe chee bi dizra' xuluchalaj bénneache lácala xelenné' naca na da dxunezruj Be' Lá'azxa le', u chee xetú bila dizra' xénele, u chee bi xiche xelenné' naca na da gusel-lantu' netu', che dxenná na ba belá' Xránadxu. <sup>3</sup> Quebe güele lataj nu si xe le'e, lawe' da xelexá' bénneache xelexéaj xíchaje' Dios, ne la' bénnea' dxedábague' Dios nédxula gate zrin zra xelá' Xránadxu. Bénnea' dxedábague' Dios, na' ba naca chee' cuía xíqueze', <sup>4</sup> na' tábague' xúgute' da naca chee Dios, ne xúgute' da dxulucá'ana szren bénneache. Gucá'ana szren cuine' ca zrinte cheajché'e lu xudau' chee Dios, ne gun cuine' ca Díosqueze.

<sup>5</sup> ¿Quebe dxeajsá lázrele gúchequeza' le'e da nigá gate na' zúalena' le'e? <sup>6</sup> Le'e ba nézele Nu Benne' nuzague' bénnea' dxedábague' Dios chee quebe le'e gate quebe ne zrin zra le'e. <sup>7</sup> Ba dxun zrin xel-la waca da nagache chee da calela, san zua Nu Benne' nuzague' le na' na'a, ca zrin zra xecuasa Bénnea' nuzague' le na. <sup>8</sup> Nadxa la' bénnea' dxedábague' Dios, na' Xránadxu Jesús gutie' le', guchínene' be' da dxuaj na dxu'e, ne guzria xi'e le', guchínene' xel-la naxani' chee zra ze'e. <sup>9</sup> Benne' xriwe' na' ze'e ne chee xel-la dxenná bea chee Satanás, na' lu duté xel-la waca chee na guné' da ca' xelunna bea na, ne xel-la waca ca' da zaj naca na wen lazre', <sup>10</sup> ne guchínene' xúgute' da calela ca' chee si xe'e benne' ca' xelexía xi'e, benne' ca' quebe gulaca lazre' xelexí'e da li chee xelexé'. <sup>11</sup> Chee le na' Dios dxu'e lataj si xe da calela benne' ca' chee xelexájele chee da wen lazre', <sup>12</sup> chee xelexía xi' xúgute' benne' ca' quebe gulaca lazre' xelexájele chee da li, san dxeladnedxene' da naca da calela.

*Dios guqu'e dxi'u chee ladxu*

<sup>13</sup> Netu' tu dxál-la'queze xentu' Dios: Xcalenu' ca naca cheele le'e, bi bícha'dau', nazrí'i Xránadxu le'e, lawe' da gucá'a Dios le'e nédxute' chee lala. Be' Lá'azxa ba nuné' le'e chee Dios lawe' da dxéajjele chee da li. <sup>14</sup> Chee gaca cheele da nigá Dios ba bláwizre' le'e ne chee dizra' chawe' da dxuchálajntu', chee zrué'ele xel-la szren chee Xránadxu Jesucristo.

<sup>15</sup> Chee lē na', bi bícha'dau', le sē chacha, ne quebe gal-la lázrele da ca' bzéajni'intu' le'e caníqueze, ne cá'anqueze lu xiche. <sup>16</sup> Dxenaba' lau Xránadxu Jesucristo, ne lau Xradxu Dios, Bénnea' lu dutē xel-la xrlátaje chee' bzri'ine' dxi'u, ne ba benne' dxi'u xel-la dxexúe zren chee' tu chi'i gaze, ne tu xel-la dxebeza lazre' li. <sup>17</sup> Dxenaba' Le' gutipe' lázrele, ne guzē chúchue' le'e chee nnae, ne gunle xúgute da xrlátaje.

### 3

*Pablo dxenné xúene' bíchedxu ca' xelenabe' Dios gácalene' le'*

<sup>1</sup> Na'a, bi bícha'dau', le naba Dios gácalene' netu', chee zrínzega dizra' chee Xránadxu xúgute xezre ca', ne chee xelezi'e na dutē lu xel-la ba lá'ana, ca guca ládujla le'e. <sup>2</sup> Le nábaqueze chee ladxu lu na' benne' ca' dxelune' da calela, ne lu na' benne' sban ca', lawe' da quegá xúgute benne' dxelejli lazre' Cristo. <sup>3</sup> Xránadxu naque' li lazre', na' Le' guzē chache' le'e, ne guxúe' le'e chee quebe bi da calela gaca na cheele. <sup>4</sup> Dxuxrén lázrentu' Xránadxu gácalene' le'e chee gunle ca da dxénentu' le'e, ca ba dxúnqueze. <sup>5</sup> Dxenabantu' lau Xránadxu gácalene' le'e chee gápale xel-la zri'i lazre' da gunna Dios le'e, ne gápale xel-la zren lazre' da gunna Cristo le'e.

*Dxal-la' gundxu zrin*

<sup>6</sup> Le'e, bi bícha'dau', lu La Xránadxu Jesucristo dxénentu' le'e quebe gunle tuze núteteze bi bíchedxu quebe dxaca lazre' gunē' zrin, ne quebe dxune' ca da bsédentu' le'e. <sup>7</sup> Ba nézele dxal-la' gunle zrin ca bentu' netu' gate na' zúalentu' le'e. <sup>8</sup> Quebe nu chee gudáguntu' cá'aze che nadxu quebe gudízrujntu' na. Bēnle'equezentu' zrin te zra, ne chízrela chee quebe bsaca zi'ntu' le'e da gáguntu'. <sup>9</sup> Nácaqueze cheentu' nábantu' le'e da gáguntu', san bentu' zrin chee blé'entu' le'e dxal-la' gunle ca bēnquezentu' netu'. <sup>10</sup> Gate na' zúalentu' le'e, bdentu' lu na'le da nadxixruj bea nigá: Benne' quebe dxaca lazre' gunē' zrin ca'an gunē' quebe gawe'. <sup>11</sup> Ba bēntu' bál-lale le'e quebe dxunle zrin, na' dxedázele dxuchixre chee da dxaca chee benne' xula. <sup>12</sup> Benne' caní dxixruj be'entu', ne dxusebágantu' le' lau Xránadxu Jesucristo chee xelune' zrin du lazre' chee gata' da xele'aj xelawe'.

<sup>13</sup> Le'e, bi bícha', le gun da xrlátaje, ne quebe cheajtá lázrele. <sup>14</sup> Che nu benne' quebe dxuzúe' dizra' ca da dxennantu' lu xiche nigá, le nna' nu bēnnea', ne quebe gunle le' tuze, chee gapa stuē'. <sup>15</sup> Quebe zrá'ale le', san le guzéajni'i le' ca bi bíchele.

*Pablo dxuzé' dizra' bi bíchedxu ca'*

<sup>16</sup> Xránadxu naque' Bénnea' dxunne' dxi'u xel-la dxebeza zri lazre'. Dxenaba' lau Le' gúnnaqueze' le'e xel-la dxebeza zri lazre' lu xúgute da dxunle, ne súalene' xúgutele le'e.

<sup>17</sup> Neda', Pablo nen ná'aqueza' dxuzúaja' cheele da nigá. Da nigá dxunna bea na xúgute xiche da dxuzúajqueza' neda'. Caní dxuzúaja'. <sup>18</sup> Dxenaba' lau Xránadxu Jesucristo gunē' da chawe' chee xúgutele le'e. Ca'an gaca na.

## DIZRA' NEDXU BZUAJ SAN PABLO CHEE TIMOTEO

*Pablo dxugape' diuzre Timoteo*

<sup>1</sup> Neda', Pablo, naca' gubáz chee Jesucristo lawe' da caní bdxixruj bea Dios, Xra Xránadxu Jesucristo, weselá cheedxu, Bénnea' dxebeza lázredxu xelá'tee'. <sup>2</sup> Dxuzúaja' da nigá chiu' lue', Timoteo, nacu' ca zri'inequeza' lawe' da dxeajli lazru' Cristo. Dxenaba' Xradxu Dios, ne Xránadxu Jesucristo guné' chiu' da chawe', ne xexache lazre' lue', ne gunne' lue' xel-la dxebeza zri lazre'.

*Pablo dxusízrene' Timoteo ca naca chee benne' ca' dxulusédené' da wen lazre'*

<sup>3</sup> Ca ba guta' xúeda' lue' gate na' bezá'a naga zu', ne bexá'a naga nababa xezr la xu Macedonia, begá'ana lu xezre Efeso chee nne xúenu' benne' ca' zaj zre'e na' québedxa xulusédené' da wen lazre', <sup>4</sup> ne québedxa xululapa ne'e dizra' dxuluzaze benne' ca' ca zaj naca zánete' xra xrtawé' ca'. Dizra' caní dxulutil-la na bénneache. Quebe naca na da xelácale na bénneache chee xelezé' chache' ca dxeajli lazre' Dios. Caní dxenné' xúeda' lue' xecha lasa.

<sup>5</sup> Dxenné' xúeda' lue' gunu' caní chee xelezrí'i ljwezre' duté' lázrdawé', chee quebe bi sua da gagu na zria lázrdawé' ca', ne gaca du lazre' ca dxeajli lazre' Cristo. <sup>6</sup> Bal-la benne' ca' belexeuase' lu da caní, na' ba zaj nazi'e dizra' xálaze. <sup>7</sup> Dxelaca lazre' xuluxuzájle'e da nadxixruj bea Dios, ne quebe dxeléajni'ine' da dxuluchálajqueze', ne ca naca da ca' dxuluxrén lazre'.

<sup>8</sup> NezdXu da nadxixruj bea na naca na xrlátaje che nu benne' dxuchínene' na ca naca chee na. <sup>9</sup> Dخال-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san chee nna be'e na benne' ca' dxelunge' da calela, ne benne' ca' quebe dxuluzúe' xrtizre'e, ne benne' ca' dxelunge' da zrinnaj, ne benne' wen dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute' xra xrna', ne benne' ca' dxelutie' benne', <sup>10</sup> ne benne' ca' dxelunge' da sban, ne benne' biu ca', benne' dxulugune' ljwezre biue' ca nu'ula, ne benne' dxelebané' benne' ca' chee xelutie' le' lu na' benne' xula, ne benne' ca' dxelún lazre', ne benne' ca' dxelexechebe' da wen lazre', ne benne' ca' dxuluchuque' da li. <sup>11</sup> Caní naca da dxulé'e dizra' chawe' da bsebagá Dios neda'. Naque' Dios xabáa, Benne' szrente'.

*Pablo dxé'e Dios: Xcalenu'*

<sup>12</sup> Dxapa' Xránadxu Jesucristo: Xcalenu'. Naque' Bénnea' benne' neda' xel-la waca chee guna' da nigá, lawe' da dxelé'eng' neda' xlátaje, na' nuzúe' neda' lu zrin chee'. <sup>13</sup> Xúgute' da caní ba bene' chia' lálaca gunniá' schanni' chee Cristo gate nate, ne gudáu zi' xuzra' bi chee' ca', ne ben la' chee benne' ca'. Dios bexache lazre' neda' lawe' da quebe ne cheajli lazra' Cristo, ne quebe guxéajni'ida' da na' bena'. <sup>14</sup> Chee le' na' Xránadxu, duté' lu xel-la zri'i lazre' zren chee' bnite lawe' chia', ne benne' neda' xel-la dxeajli lazre', ne xel-la zri'i lazre' da nápadxu lawe' da nácadxu bi chee Jesucristo.

<sup>15</sup> Da nigá naca na da li, na' xúgute' bénneache dxal-la' xeléajle'e chee na. Caní dxenná na: Jesucristo ble'e lu xezr la xu nigá chee guselé' benne' dul-la ca', na' neda' nácadxa' benne' dul-la ca' xúgute' benne' ca'. <sup>16</sup> Chee le' na' Dios bexache lazre' neda' chee gulé'e Cristo ca szren naca xel-la zren lazre' chee' nen neda', nácale'a benne' dul-la, chee gaca' neda' tu da gulé'e na lau xúgute' benne' ca' xeleajli lazre' Cristo, na' xelape' xel-la nabán chadía chacanna. <sup>17</sup> Chee le' na' dxal-la' gápadxu ba lá'ana, ne güe lá'anadxu Bénnea' nna béaqueze' chadía chacanna. ¡Cabata' gatié', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadía chacanna! ¡Ca'an gaca na!

<sup>18</sup> Lue', bi chia', Timoteo, dxusebaga' lue' su' wedil-la chee tíl-lalenu' da naca chee da calela, ca da buluchalaj nédxute' benne' ca', benne' gulenné' waláz chee Dios ca dxal-la' gunu' lue'. <sup>19</sup> Bexru tipa xel-la dxeajli lazre' chiu', chee quebe bi sua da gulale na lu xichaj lazrda'u. Bal-la benne' ca' quebe belune' caní, na' buluzúe' chalá'ala xel-la dxeajli lazre' chee'. <sup>20</sup> Caní guca chee Himeneo, ne chee Alejandro, benne' ca' bdea' neda' lu na' Satanás chee xulusédie' quebe xelenné' schanni' chee Dios.

## 2

*Ca dxal-la' guchálajledxu Dios*

<sup>1</sup> Da dxundxa na ba xen dxenné' xúeda' lue', dxal-la' ná bale lau Dios gácale'ne' bénneache, ne guchálajlele Dios, ne gucá'ana szrenle Le', ne ná bale Dios gunne' le'e da dxexázzele, ne xe le Dios: Xcalenu'. Dخال-la' gunle caní, guchálajlele Dios da naca na chee xúgute' bénneache. <sup>2</sup> Cá'anqueze dxal-la' ná bale Le' gácale'ne' benne' xichje ca', benne' dxelenná

be'ene' benneache, ne benne' xu'u lawe' ca' chee chadxu chawe', ne súadxu lu xel-la dxebeza zri lazre', ne guzúa cuínadxu lu na' Dios du lázredxu, ne gápadxu ba lá'ana benneache. <sup>3</sup> Da nigá naca na xrlátaje, ne da dzezaca ba lazre' Dios, weselá cheedxu, <sup>4</sup> lawe' da dxaca lazre' Le' xelélé xúgute benneache, ne xelúnbe'e da li. <sup>5</sup> Zua tuze Dios, ne zua tuze wenaba chee benneache lau Dios, Bénnea' naque' Jesucristo, ne cá'anqueze ben cuine' benneache. <sup>6</sup> Jesucristo bzua cuine' lu xel-la gute chee bexá'awe' xúgute benneache, na' blé'ene' da na' ca bzrin zra chee na. <sup>7</sup> Chee le' na' bzué' neda' gubáz chee' chee' cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xelune' ca naca da li. Lau Cristo dxexcheba', ne quebe dxun lazra'.

<sup>8</sup> Chee le' na' dxaca lazra' xuluchálaje xúgute benneache Dios gáteteze na', ne xelechisa ne'e duté xel-la li lazre' chee' lau Dios, ne quebe xelezré'e ljwezre', ne quebe xeledíl-lalene' ljwezre' ca'. <sup>9</sup> Nu'ula ca' dxal-la' xelácué' da naca xlátaje, ne ca naca chee da dxelúe lechítaje cuine' dxal-la' gaca na xel-la dxexruj lazre', ne xel-la du lazre', ne quegá ca dxulupá'a xichaje', ne quegá lechítaje da naca na oro, ne quegá bga ca', ne quegá zra lane' da zácále'e na. <sup>10</sup> Dخال-la' xelune' da gácalé na benneache, ca dxal-la' xelún nu'ula ca' ba zaj nuzúa cuine' lu na' Dios. <sup>11</sup> Nu'ula ca' duté lu xel-la dxexruj lazre' chee' dxal-la' xuluzé nague' gate nu dxuséde xrtizra Dios, ne quebe xelenné' chee na. <sup>12</sup> Quebe dxunna' lataj nu'ula gusédené' benne' biu ca', ne quebe nna be'ene' le', san dxal-la' sue' zrize. <sup>13</sup> Caní naca na lawe' da ben Dios teca Adán, na' gudé na' bene' Eva, nu'ula chee Adán na'. <sup>14</sup> Adán, quebe guzí xé da xriwe' le', san guzí xé na Eva, nu'ula na', na' gudé guzí xé na le', na' bene' dul-la. <sup>15</sup> Tu nu'ula gape' xel-la weselá che dzezane' bidu ca', ne cheajlí lazre' Dios, ne nazri'ing' Le', ne nuzúa cuine' lu na' Dios, ne naque' dxexruj lazre'.

### 3

#### *Ca dxal-la' xelaca benne' ca' dxulusédené' bi ca' chee Cristo*

<sup>1</sup> Da líqueze naca da nigá: Che nu benne' dxezá lazre' gague' benne' gusédené' bi ca' chee Cristo, tu zrin xrlátaje dxaca lazre' gune'. <sup>2</sup> Tu benne' dxusédené' bi ca' chee Cristo:

Dخال-la' gague' benne' quebe bi zua da dxunite na le'.

Dخال-la' súalene' tuze nu'ula.

Dخال-la' gague' benne' dxuzéajni'i cuine',

ne benne' dxenná be'e cuine',

ne benne' nape' ba lá'ana.

Dخال-la' si' lu ne'e benne' xelezrine' lizre'.

Dخال-la' gague' benne' dxaca dxusédené' benneache.

<sup>3</sup> Quebe dxal-la' xé'aje' da guzuzre na le',

ne quebe gutil-le' nu benne',

ne quebe sa lazre' dumí.

Dخال-la' gague' benne' dxexruj lazre', ne zren lazre'.

<sup>4</sup> Dخال-la' nézene' nna be'ene' benne' zaj zre'e lizre',

ne gulé'ene' zri'ing' ca' xelácabe' wezúa dizra',

ne xelápabe' ba lá'ana xra xrnabe'.

<sup>5</sup> Che nu benne' quebe nézene' ájala nna be'ene' benne' zaj zre'e lizre', zájazra gune' gusédené' bi ca' chee Dios? <sup>6</sup> Benne' dxusédené' bi ca' chee Cristo quebe dxal-la' gague' benne' za dxúnbeate dizra' chee Cristo, chee quebe gucá'ana szren cuine', chee quebe cuía xi'e ca guzría xi' da xriwe'. <sup>7</sup> Cá'anqueze dxal-la' gague' benne' nape' ba lá'ana lávela benne' quebe zaj naque' chee Cristo, chee quebe gata' lataj nu guzúa le' chala'ala, na' chee quebe chu'e lu na' da xriwe'.

#### *Ca dxal-la' xelaca benne' dxelácalene' bi ca' chee Cristo*

<sup>8</sup> Cá'anqueze benne' ca' dxelácalene' bi ca' chee Cristo:

Dخال-la' xelaque' benne' zaj nape' ba lá'ana, ne benne' li lazre'.

Quebe dxal-la' xelé'aje' da guzuzre na le',

ne quebe xelaque' benne' dxulucudee'.

<sup>9</sup> Dخال-la' xelapa xánnie' da zácále'e chee da dxeajlí lázredxu,

ne quebe bi sua da gagu na zria chee' lu xichaj lázrdawe'.

<sup>10</sup> Dخال-la' guxúe xánnele ca dxeledé'.

Te na', che quebe bi zua da dxagu na zria chee', waca xelácalene' bi ca' chee Cristo. <sup>11</sup> Zru'ula benne' caní:

Dخال-la' xelaque' benne' zaj nape' ba lá'ana,

ne quebe xelaque' wetupa dizra' bizruj.

Dخال-la' xelaque' du lazre', ne li lazre' ca naca xúgute da dxelune'.

<sup>12</sup> Tu benne' dxácalenē' bi ca' chee Cristo dxal-la' súaalenē' tuze nu'ula, ne dxal-la' nézenē' nna be'ene' zri'ine' ca', ne benne' zaj zre'ē lizre'. <sup>13</sup> Benne' ca' dxelácalenē' bi ca' chee Cristo, che dxelunē' cháwedau' zrin chee', welezrué'ene' xel-la ba lá'ana, na' xelezéqueuxenē' xuluchálaje' du lazre' ca dxeajlí lázredxu Jesucristo.

*Tu da ble'e Dios dxi'u ca naca da zéajlédxu*

<sup>14</sup> Dxebeza lazra' xidazequeza' xedajnná' a lue', na' dxuzúaja' chiu' da nigá <sup>15</sup> chee chéajni'inu' che dxezreda', ca dxal-la' gunu' ládujla benne' ca' zaj nababē' chee Dios, benne' ca' ba bláwizra Dios ban, ne zaj nuxru chache' da li, ne dxuluxúe xánmie' na. <sup>16</sup> Da li tu da zrentē naca da nigá ble'e Dios dxi'u ca naca da zéajlédxu:

Dios blé'e nigá, ne guque' bēnneache.

Be' Lá'azxa blé'ene' naque' xlátaje.

Belelé'e gubáz chee xabáa ca' Le'.

Benne' dutē xezr la xu belenne' ca naca chee'.

Guleajlí lazre' benne' zaj zre'ē dutē xezr la xu nigá Le'.

Dios bezi'ē Le' xabáa.

## 4

*Ca naca chee benne' ca' dxuluzúe' chalá'ala xel-la dxeajlí lazre' chee'*

<sup>1</sup> Be' Lá'azxa ba bdxixruj lie' wazrín zra xulusán bal-la benne' xel-la dxeajlí lazre' chee', na' chjácálenē' be' ca' xelezi' xē na le', ne xelezi'ē ca da xululé'e be' xriwe' ca'. <sup>2</sup> Xuluzé' nague' ca da xuluséde benne' wen lazre' ca', benne' dxelún láweze da xrlátaje, ne québedxa zaj zua xel-la dxeléquebe'e xichaj lázrdawē', ne zaj naque' lázrdau zizraj, na' quebe zaj nape' xel-la stu' gate dxelún lazre'. <sup>3</sup> Benne' caní quebe dxelu'ē latja nu guchaga na', ne cá'anqueze nu xe'aj gagu bal-la da dxágudxu, lácala ben Dios da ca' chee xelagu benne' ca' dxeleajlí lazre' Le', ne benne' ca' zaj núnbe'ē da li, ne xelé'ē Le'; Xcalenu'. <sup>4</sup> Xúgute da ben Dios naca na chawe', ne quebe dxal-la' bi guzúadxu chalá'ala, san dxal-la' sidxu na, ne xēdxu Dios; Xcalenu', <sup>5</sup> lawe' da naca chawe' lau Dios bíteteze da dxágudxu che dxundxu ca dxenná xrtizre', ne che nábadxu Le' gunē' gaca na da chawe'.

*Benne' wen zrin xrlátaje chee Jesucristo*

<sup>6</sup> Che dxusédenu' bi bíchedxu ca' da caní, nacu' bi wen zrin chawe' chee Jesucristo, na' nazí lu na'u dizra' chee Dios, ne ca naca da dxusédedxu, da na' zéajlenu'. <sup>7</sup> Quebe gulapa na'u da dxuluzaze bēnneache, ne dizra' xálaze. Bzazraj cuinu' lu da naca chee Dios. <sup>8</sup> Che dxuzazraj cuinu' ca naca lu bel-la' dxen chiu' wácalequeze na lue' late', san che dxuzazraj cuinu' lu da naca chee Dios, wácale na lue' lu xúgute da dxunu', na' naca na da sidxu na neza lu xezr la xu nigá, ne cá'anqueze lu xezr la xu da za za'. <sup>9</sup> Da li naca da nigá, na' xúgute bēnneache dxal-la' xeléajlé'ē chee na. <sup>10</sup> Chee le na' dxudé xel-la zi' cuínadxu dxundxu zrin lawe' da dxebeza lázredxu Dios ban, Bēnea' naque' weselá chee xúgute bēnneache, na' dxuselé' benne' ca' dxeajlí lazre' Le'.

<sup>11</sup> Da caní dxal-la' gusédenu' bēnneache, ne nne xuenu' le' xelunē' na. <sup>12</sup> Quebe gu'u lataj nu guzúa lue' chalá'ala lawe' da nacu' benne' cuide', san dxal-la' gacu' tu da gulé'e na benne' ca' dxeleajlí lazre' Cristo ca dxal-la' xelunē'. Gulé'e na le':

Nē chee da dxuchálaju',

ne nē chee da dxunu',

ne ca nazri'inu' le sa' ljwezru',

ne ca naca Be' Lá'azxa zúalēnē' lue',

ne ca dxeajlí lazru' Cristo,

ne ca nacu' du lazre'.

<sup>13</sup> Dxácatē xida' neda', ben zi' lazru' gulabu' xiche lá'azxa lávela bēnneache, ne gutipu' lazre' bi bíchedxu ca', ne guzéajni'inu' le'. <sup>14</sup> Quebe gusanu' xel-la waca da bēna Dios lue' gate buluzé' na' benne' gula ca' xichju', ne gulenné' ca da ble'e Be' Lá'azxa le' ca naca zrin chee Xránadxu da dxal-la' gunu'.

<sup>15</sup> Ben da caní du lazru' chee xelelé'e xúgute bēnneache nápaquezu' da naca chee Dios.

<sup>16</sup> Bxue xanne' cuinu', ne ca da dxusédenu', ne guzé chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelenne' da guchálaju'.

## 5

*Ca dxal-la' xelaca benne' ca' dxeleajlí lazre' Cristo*

<sup>1</sup> Quebe cun til-lu' tu benne' gula, san bzéajni'i le' ca xráquezu'. Gúcale benne' cuide' ca' ca bi bíchequezu'. <sup>2</sup> Gúcale nu'ula gula ca' ca xrnáquezu'. Gúcale nu'ula cuide' ca' ca bi zánquezu', dutē lu xel-la dxapa ba lá'ana chiu'.

<sup>3</sup> Gúcale nu'ula ba nate benne' chee', nu'ula' quebe nu xrtie' zradxa. <sup>4</sup> Che tu nu'ula ba gute benne' chee' ne zaj zra' zrí'ine', u zre sue', lebe' dxal-la' xelunbe' ca da zaj nabágabe' chee' xelácalebe' benne' zaj naca xrtiaquezbe', ne xelunbe' ca da zaj nabágabe' chee' xra xrnabe', lawe' da naca na xrlátaje, ne da dxezaca ba lazre' Dios. <sup>5</sup> Nu'ula da li québedxa nu chilá' chee' dxebeza lazre' Dios, ne dxuchálajlene' Dios te zra, ne chizrela. <sup>6</sup> Nu'ula caní, che dxune' ca da dxezaca ba lazre' léqueze', naque' ca benne' ba nate. <sup>7</sup> Bdxixruj be'e benne' ca' xelune' caní, chee' quebe gun na ba xen nu til-la le'. <sup>8</sup> Che nu benne' quebe dxebe'e gunne xue chee' benne' ca' zaj naque' tuze, ne da dxun na ba xen che quebe dxácalene' xrtiaqueze', ba bsane' xel-la dxeajli lazre' chee', ne nácadxe' benne' wen da zrinna' ca tu benne' quebe ne chéajle'e chee' Dios.

<sup>9</sup> Lu xiche naga zria la nu'ula ca' quebe nu chilá' chee', benne' dxácalele, dxal-la' guzúajle la nu'ula caní, nu'ula na' ba gudé'e ga xun iza, ne guzúa tuze benne' chee'. <sup>10</sup> Dخال-la' gaque' nu'ula ba bēnle'e da xrlátaje ca da caní:

Che ba bsegule' zrí'ine' ca'.

Che ba guzú' lu ne'e benne' bíchedxu belezrín lizre'.

Che ba gúcalene' benne' caní duté lu xel-la dxexruj lazre' chee'.

Che ba gúcalene' benne' dxedé'e xel-la zi'.

Che bi xetú da xrlátaje ba beñe'.

<sup>11</sup> Quebe guzríale lu xiche na' nu'ula caní che quebe ne xelezrí'e ga xun iza lawe' da gagaze xucuasa xel-la dxelezá lazre' chee' le' lu da naca chee' Cristo, na' xelaca lazre' xuluchaga ne'e xecha lasa, <sup>12</sup> na' xelebague' zria lawe' da bulusane' ca da gulechebe lazre' chee' Cristo. <sup>13</sup> Cá'anqueze che dxeledé' tu tu xu'u, xelaque' zrawede, ne quegaze zrawede, san cá'anqueze xelaque' wetupa dizra' bizruj, na' xuluchixre chee' lu xúgute da xelenne', ne xelenné' da quebe dxal-la' xelenné'. <sup>14</sup> Chee' le' na' dxaca lazra' xuluxuchaga ne'e che ne zaj naque' nu'ula cuide', ne xelezrá zrí'ine', ne xuluxú'e lizre', chee' quebe xelezí lataj xelezí tizra benne' ca' dxelezre'e dxi'u. <sup>15</sup> Bal-la nu'ula caní ba belexecuase' chee' Cristo, ne zjácalene' da xriwe'.

<sup>16</sup> Che nu benne' dxeajli lazre' Cristo, benne' biu, u nu'ula, che zua xrtie' naque' nu'ula ba gute benne' chee', dxal-la' gácalene' le' chee' quebe xelebaga bi ca' chee' Cristo da nigá, na' benne' caní welezeque' xelácalene' nu'ula caní québedxa nu chilá' chee'.

<sup>17</sup> Che zaj zra' benne' gula ca' dxulusédene' cháwedau' bi ca' chee' Cristo, dxal-la' gápale'e'le benne' ca' ba lá'ana, na' dxundxa na ba xen gápale ba lá'ana benne' gula ca' dxuluchálajlequeze' le'e dizra' chee' Dios, ne dxulusédene' le'e. <sup>18</sup> Lu xiche lá'axza dxenná na: Quebe cu'ule xixruj dxu'a bezre, be dxíchujba' zrua' xtila. Cá'anqueze dxenná na: Benne' wen zrin dxal-la' si'e xrláruje'.

<sup>19</sup> Quebe guzé nagu' che nu gagu zria chee' tu benne' gula chee' xudau' che quebe xelelá' chupa u chunna benne' xelexechebe'. <sup>20</sup> Benne' ca' dxelúnqueze' dul-la, dxal-la' til-lu' benne' ca' lówela xúgute bi ca' chee' Cristo, chee' xelezrebe xezícadxa benne' ca'. <sup>21</sup> Lau Dios, ne lau Xránadxu Jesucristo, ne lau gubáz blau ca' chee' xabáa chee', dxusebaga' lue' chee' gunu' da caní. Dxenné' xueda' lue' quebe cueu' ca zaj naca benne', ne quebe gucha'u ca gunu' chee' tu tu benne'. <sup>22</sup> Quebe xexúbenu' nu la guzúateu' lu zrin chee' Cristo chee' quebe bagu' dul-la chee' benne' xula. Quebe gulapa na'u ne tu da calēla.

<sup>23</sup> Lawe' da quebe chawe' zua le'u, ne tu lize dxaca na, québedxa xé'aju' nísaze, san güe'e late' xrise uva wal-la.

<sup>24</sup> Zaj nalá' dul-la chee' bal-la benne' gate quebe nu ne guchi'a ca da zaj nune', san dul-la da zaj nun xezícadxa benne' ca' xululé'e lawe na te na'. <sup>25</sup> Cá'anqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

## 6

<sup>1</sup> Benne' zaj nada'u dxal-la' xelápalé'e ba lá'ana xrane' ca' chee' quebe nu nne schanni' chee' Dios, ne chee' da dxusédedxu. <sup>2</sup> Che benne' zaj nada'u, zaj zra' xrane' ca' dxeleajli lazre' Cristo, quebe dxal-la' xuluzú'e le' chala'ala lawe' da zaj naque' benne' biche', san dxal-la' xelune' zrin da nácadxa xrlátaje chee' xrane' ca' dxelezi'e ba neza zrin na', lawe' da dxeleajli lazre' Cristo, ne zaj naque' benne' biche' zaj nazri'ine'. Bzējajni'i benne' ca' da nigá ne bsizre le'.

*Da calēla da dxulusēde benne', ne xel-la gunní'a li*

<sup>3</sup> Che nu benne' dxusédene' da zaj naca calela da quebe zaj naca na tuze ca da bsede Xránadxu Jesucristo, ne ca da dxusēde da dxéajlédxu chee' Dios, <sup>4</sup> benne' nigá dxucá'ana szren cuine', ne quebe bi nézene'. Dxezá lázrele'e gutil-le' benne' dizra' ca naca chee' tu tu dizra' ca'. Benne' dxelún caní:

Dxelaque' benne' xre lazre', ne dxeledil-le',



ne dxulucháchale ljweze',  
 ne dxeléquene' dxun le sa' ljweze' da calela,  
<sup>5</sup> ne tu lize dxulutil-la dizra' ljweze',  
 ne zaj naque' benne' zaj nazrinnaj lu xichaj lázrdawe',  
 ne quebe zaj nunbe'e da li.

Dxeléquene' zrin dxundxu chee Cristo naca na tu da waca xuluchíne' chee xelaque' benne' gunní'a. Quebe gunu' tuze benne' caní. <sup>6</sup> Da li da zéajledxu chee Cristo naca na tu da gunní'a zren, na' caní nácaqueze chee tuze bène' dxezaca ba lazre' ca da nape'. <sup>7</sup> Quebe bi núadxu gate gúlajdxu lu xezr la xu nigá, ne quebe bi xexúadxu gate xezá'adxu nigá, <sup>8</sup> san che de da gágudxu, ne zra lánadxu, dxal-la' xezaca ba lázredxu nen da ca'. <sup>9</sup> Benne' ca' dxelaca lazre' xelaque' gunní'a, cheajlecházie' lu na' da xriwe', na' cheajlechu'e lu xralaj chee le na, chee xezezá lazre' da xálaze, da dxulucá'ana ditaj na bèneache, ne dxelegú'u na bèneache lu da ba xa' naga xelebía xi'e. <sup>10</sup> Benne' nazri'ine' dumí dxunge' xúgute da calela, na' zaj zra' bal-la benne' gulezá lazre' na, na' bulusané' xel-la dxelejli lazre' chee', na' ba gulezi' lataj xel-la dxudía lu lázrdawe'.

*Da dxusizre Pablo Timoteo*

<sup>11</sup> Lue', wen zrin chee Dios, gucuasa lu da caní. Ben da naca xlátaje, ne bzua cuinu' lu na' Dios, ne guxeajli lazre' Cristo, ne bzri'i Le', ne guca zren lazre', ne dxexruj lazre'. <sup>12</sup> Gudíl-lale da xriwe', guchínenu' xel-la dxeajli lazre' chiu'. Bexru tipa xel-la nabán da chadía chacanna lawe' da bláwizra Dios lue' chee gapu' da nigá, na' ba blé'enu' ca dxeajli lazru' Cristo lávela zane' benne' dxelexechebe' chee na. <sup>13</sup> Na'a, lau Dios, Bène' nuzúe' xel-la nabán chee xúgute da naca ban, ne lau Jesucristo, Bène' cá'anqueze blé'ene' da naque', ne bechebe' chee na lau Poncio Pilato, dxenné xueda' lue'. <sup>14</sup> Guzú' dizra' ca da dxapa' lue', ne quebe gucha'u na. Dخال-la' gunu' na chee quebe nu seque' bi nne' chiu' ca zrin zra xelá' Xránadxu Jesucristo. <sup>15</sup> Ca zrin zra chee na Dios sel-le' Le'. Naque' Dios tu licha', na' Benne' Lá'azxa dxenná be'e. Naque' Wenná bea, Benne' dxenná be'ene' wenná bea ca', ne naque' Xrana xúgute benne' zaj naque' xrana bèneache. <sup>16</sup> Tuze Dios quebe gatie', ne zue' lu xel-la naxaní' naga quebe nu seque' cheaj. Netú bèneache quebe ne lé'ene' Le', ne quebe nu gaca le'e Le'. Chee Le' naca xel-la ba lá'ana, ne xel-la dxenná bea chadía chacanna. ¡Ca'an gaca na!

<sup>17</sup> Gunné xue benne' zaj naque' gunní'a lu xezr la xu nigá chee quebe xulucá'ana szren cuine', ne quebe xuluxrén lazre' xel-la gunní'a chee', lawe' da quebe naca na da chadía chacanna. Dخال-la' xuluxrén lazre' Dios ban, Bène' dxúnnale'e dxi'u xúgute da dxechinedxu chee sidxu da ba neza. <sup>18</sup> Gunné xue benne' caní xelunge' da xrlátaje, ne xelaque' benne' gunní'a lu da xrlátaje da xelunge', ne bi xulunézruje' benne' xache' ca', ne xulunézruje'e na. <sup>19</sup> Caní gaca, xelezrué'ene' xel-la gunní'a da gaca na tu da guzúa chacha na le' lu zra da za za', ne xelape' xel-la nabán da zeajli canna.

<sup>20</sup> Lue', Timoteo, bxue xanne da nuzúa Dios lu na'u. Quebe guzé nagu' dizra' xálaze chee xezr la xu nigá, da na' dxelenná bal-la benne' naca na xel-la sina. Da nigá naca na da wen lazre'. <sup>21</sup> Bal-la benne' gulezi'e na, na' bulusané' xel-la dxelejli lazre' chee'. Dxenábeda' Dios guné' da chawe' chiu'. ¡Ca'an gaca na!

## DIZRA' GUDXUPE' DA BZUAJ SAN PABLO CHEE TIMOTEO

*Pablo dxugape' diuzre Timoteo*

<sup>1</sup> Neda', Pablo, naca' gubáz chee Jesucristo lawe' da guca lazre' Dios gaca' caní, chee cu'a lban ca naca xel-la nabán da guchêbe lazre' Dios gunne' chee benne' ca' zaj naque' bi chee Jesucristo. <sup>2</sup> Dxuzúaja' da nigá chiu' lue' Timoteo, bi chia' nazri'i lazra', na' dxenaba' Xradxu Dios, ne Xránadxu Jesucristo gunê' da chawe' chiu', ne xexache lazre' lue', ne gunne' chiu' xel-la dxebeza zri lazre'.

*Pablo dxusízreng' Timoteo chee gunbe' zrin chee Cristo*

<sup>3</sup> Te zra ne chizrela gate dxuchálajlêna' Dios, ne dxeajsá lazra' lue', dxápequeza' Dios: Xcalenu', Bénnea' dxuna' zrin chee', ne quebe bi zua da dxagu na zria lu xichaj lázrdawa'. Dxuna' zrin na' ca belúnqueze xra xrtawa' ca'. <sup>4</sup> Dxeajsá lázrqueza' ca gudxezru' gate na' bezá'a naga zu', ne dxaca lázrelê'a xel'éda' lue' chee gápale'a xel-la dxebé. <sup>5</sup> Cá'anqueze dxeajsá lazra' xel-la dxeajlí lazre' li da napu'. Xrna'u gula, Loida, ne xrna'u, Eunice gulape' xel-la dxeajlí lazre' caní, na' nuxrén lazra' lue' nápaquezu' na.

<sup>6</sup> Chee lê na' dxuzéajni'ida' lue' guchínenu' ca da benna Dios lue' gate na' bzea' na'a xichju', ne gunaba' gun Dios da chawe' chiu'. <sup>7</sup> Be' Lá'azxa benna Dios dxi'u quebe dxunê' dxi'u bi zra chebe, san dxunne' dxi'u xel-la wal-la, ne xel-la zri'i lazre', ne dxunê' dxi'u benne' dxenná be'e cuina. <sup>8</sup> Chee lê na' quebe gapa stu' ca naca chee Xránadxu, ne cá'anqueze ca naca chia' neda', xu'a lizre xia nigá lawe' da dxuna' zrin chee Cristo, san bchaga lau lue' xel-la zi' da dxeledé benne' ca' dxuluchálajê' dizra' chawe' chee Jesús, na' Dios gutípaqueze' lazru'. <sup>9</sup> Dios bselé' dxi'u, ne bláwizre' dxi'u chee guzúa cuínadxu lu na' Lê', quegá lawe' da bendxu tu da xrlátaje, san lawe' da guca lázrequeze Lê' gaca na caní, ne lawe' da bzri'ine' dxi'u, nazrágadxu chee Cristo. Dios bzri'ine' dxi'u gate quebe ne gunte' xezr la xu nigá, <sup>10</sup> na' blé'eng' xel-la zri'i lazre' nigá na'a, lawe' da gusel-ê' Jesucristo, weselá chegdxu, na' bzria xi'ê xel-la dxenná bea chee xel-la gute, ne blé'eng' bènneache ca gaca xezezi' lu ne'ê xel-la nabán chadía chacanna, ca dxennáqueze dizra' chawe' da dxuchálajdxu.

<sup>11</sup> Dios bzue' neda' chee guchálaja' ca naca dizra' chawe' nigá, ne bene' neda' benne' gubáz chee' chee gusédeda' benne' quebe zaj naque' judío. <sup>12</sup> Chee lê na' dxedéa' xel-la zi' caní. Quebe dxapa stu'a ne chee da nigá, lawe' da núnbe'a Bénnea' nuxrén lazra', ne nezda' nape' xel-la waca cu'u chawe' da nuzúa' lu ne'ê ca zrindxa zra na'.

<sup>13</sup> Bexru tipa ca naca dizra' da bsédeda' lue', ne quebe gusanu' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo. <sup>14</sup> Ne chee xel-la waca chee Be' Lá'azxa, Bénnea' zue' xichaj lázrdaudxu, bexru tipa da na' nuzúa Dios lu na'u.

<sup>15</sup> Ba nézenu' ca belún xúgutê bi bíchedxu zaj zre'ê naga nababa Asia. Gulebéaj xíchajê' neda'. Cá'anqueze Figelo, ne Hermógenes belunê' tu zren benne' za'. <sup>16</sup> Dxenaba' Xránadxu xexache lazre' benne' zaj zre'ê lizre Onesíforo. Gúcale' neda' zane' lásaqueze, ne quebe gudapa stuê' chia' neda', xu'a lizre xia. <sup>17</sup> Gate blê'ê xezre Roma, bexílajê' neda', na' bezrélenê' neda'. <sup>18</sup> Dxenaba' Xránadxu xexache lazre' lê' lu zra ná' gate xelá' Lê'. Ba nézenu' ca gúcale'ê'eng' dxi'u lu xezre Efeso.

## 2

*Benne' wên zrin du lazre' chee Jesucristo*

<sup>1</sup> Lue', zri'ina', guzé tipa ne chee da xrlátaje da nápadxu lawe' da nácadxu bi chee Jesucristo. <sup>2</sup> Ca da bennu' bchálaja' lálwela benne' zan, benne' belexechebê' naca na da li, bzua na lu na' benne' zaj naque' li lazre', benne' xelexéqueñê' xulusédene' na benne' xula.

<sup>3</sup> Lue' dxal-la' gacu' benne' wên zrin du lazre' chee Jesucristo, guchaga lau' xel-la zi' ca tu benne' zeje' wedil-la. <sup>4</sup> Netú benne' zeje' wedil-la, benne' xu'ê lu zrin chee xranê', quebe dxunê' zrin xula, lawe' da dxaca lazre' xezaca ba lazre' xranê' chie'. <sup>5</sup> Cá'anqueze, benne' xu'ê lu witaj quebe zrue'eng' da xexalê' che quebe quitajê' ca naca chee na. <sup>6</sup> Cá'anqueze benne' dxaza dxa'ana, benne' dxúnle'ê zrin, dxal-la' xezzi' lu ne'ê lina chee'. <sup>7</sup> Blaba lazre' ca da dxapa' lue', na' Xránadxu guzéajni'ine' lue' xúgutê na.

<sup>8</sup> Bsa lazre' ca naca chee Jesucristo, guque' xrtia David, ne bebang' ládujla benne' gate, ca dxenná dizra' chawe' da dxuchálaja' neda'. <sup>9</sup> Ne chee dizra' chawe' nigá dxedéa' xel-la zi', ne xu'a lizre xia nigá ca tu benne' wên da zrinna, san dizra' chee Dios quebe nu seque' cu'u lê na lizre xia. <sup>10</sup> Chee lê na' xúgutê da ca' dxuchaga lawa' ne chee benne' ca' ba gucá'a Dios lê', chee cá'anqueze benne' ca' xelexé' ne chee Jesucristo, ne xelexéxú'ê lu xabáa chadía chacanna.

<sup>11</sup> Da nigá naca na da li:  
 Che nuzúa cuínadxu gátedxu ca bzua cuina Le',  
 cá'anqueze waca bandxu nen Le'.  
<sup>12</sup> Che dxededxu xel-la zi',  
 na' nna béaquezdxu tu zren nen Le'.  
 Che quebe xechébedxu nácadxu bi chee Le',  
 cá'anqueze Le' quebe xechébe' nácadxu bi chee'.  
<sup>13</sup> Che dxi'u quebe nácadxu li lazre',  
 Le' nácaqueze' li lazre'.  
 Dios québequeze guché'e ca naque'.

*Tu benne' wen zrin du lazre'*

<sup>14</sup> Bsa lazre' bi bíchedxu ca', ne bsizre le' lu La Xránadxu québedxa xulutil-la dizra' ljwezre'. Xel-la dxutil-la dizra' ljwezre' quebe bi culuén napa na, san dxuxrinnaj na xichaj lázrdau benne' ca' dxelénne' na. <sup>15</sup> Ben ba xuzre gacu' wen zrin du lazre' lau Dios, na' quebe gaca xel-la stu' chiu', lawe' da dxuchínenu' xrlátaje dizra' li. <sup>16</sup> Quebe gulapa na'u dizra' xálaze, ne dizra' sban da dxuluchálaje bénneache, da ca' dxulucuasa na bénneache lu da naca chee Dios. <sup>17</sup> Dizra' sban caní dxuluxrinnaj na xichaj lázrdau bénneache ca dxun tu we' da dxuzru na lu bel-la' dxen cheedxu. Caní guca chee Himeneo, ne Fileto, <sup>18</sup> benne' ca' gulecuase' lu xel-la li, na' dxelenné' ba belexebán benne' gate, na' dxuluxrinnaje' xel-la dxeajlí lazre' chee bal-la benne'. <sup>19</sup> Dios ba gudixruj bi'e xrtizre' da naca na ca tu lane xu'u chee xel-la dxeajlí lazre' cheedxu, da dxenná caní: Xránadxu núnbe'e bi chie' ca' Cá'anqueze dxenná na: Xúgute bi ca' chee Cristo québedxa dxal-la' xelune' da calela.

<sup>20</sup> Tu lu xu'u zaca, quegá zra' tuze zriga xé'ena da zaj naca na oro ne plata, san cá'anqueze zaj zra' da zaj naca na xiaj ne xu. Dxuluchínene' da ca' zaj zácadxa lu da zaca, na' xezícadxa da ca' dxuluchínene' ájateze. <sup>21</sup> Nácadxu ca zriga xé'ena ca'. Che nu benne' dxaca lazre' gaque' ca tu da zaca, chee gaque' benne' guchine Xránadxu lu zrin xrlátaje chee', dxal-la' xexadxe' ca naca da calela ca'.

<sup>22</sup> Bxue xanne' cuinu' ca zaj naca da ca' dxelezá lazre' benne' cuide' ca', ne quebe gusanu' da xrlátaje da dxunu', ne ca dxeajlí lazru' Cristo, ne ca nazri'ínu' Le', ne ca dxebeza zri lazru', da ca' dxunu' tu zren nen xúgute benne' ca' du lazre' dxululáwizre' Xránadxu. <sup>23</sup> Quebe gulapa na'u dizra' xálaze, ne dizra' quebe zeaj xrlátaje, lawe' da nézenu' dxuluzúa na bénneache lu da ba xa'.

<sup>24</sup> Benne' wen zrin chee Xránadxu:  
 Quebe dxal-la' til-lalene' benne'.  
 Dxa-la' gaque' zri'i lazre' nen xúgute bénneache.  
 Dxa-la' gaque' benne' dxezeque' gusédene' bénneache.  
 Dxa-la' gaque' zren lazre',

<sup>25</sup> ne duté xel-la dxexruj lazre' gusízrene' benne' dxelune' da calela.  
 Caní dxa-la' gune' che ba benla Dios xelexexéaje lazre' benne' ca chee xelúnbe'e da li, <sup>26</sup> na' xelelé' lu xralaj chee da xriwe', naga nuzrá na le', na' dxelune' ca da dxenná ne na.

### 3

*Ca xelaca bénneache lu zra bzébe*

<sup>1</sup> Cá'anqueze dxal-la' nézele lu zra bzébe ni' gaca na stébe chee bénneache. <sup>2</sup> Bénneache ca' xelaque':

Benne' xelezrí'ize cuina, ne xelezrí'ine' dumí.  
 Xulucá'ana szren cuine',  
 ne xulucá'ana cuine' ca benne' blau ca'.  
 Xelenné' schanni' chee Dios,  
 ne quebe xuluzúe' dizra' chee xra xrne'e.  
 Xelaque' benne' quebe dxelezí le',  
 ne benne' quebe dxelapa ba lá'ana Dios.  
<sup>3</sup> Quebe xelaque' zri'i lazre',  
 ne quebe xelexexache lazre' ljwezre'.  
 Xelenné' chee ljwezre', ne quebe xelenná be'e cuine'.  
 Xelaque' benne' snia ca', ne xuluzúe' chalá'ala da naca xrlátaje.  
<sup>4</sup> Quebe xelaque' li lazre' nen ljwezre'.

Xelaque' benne' dxelexube.  
 Xeléquene' zaj naque' benne' szrente.  
 Xelexezaca ba lázredxene' da ca' dxeledánene' quézcala da naca chee Dios.  
<sup>5</sup> Lácala xululé'e cuine' ca benne' zaj naque' chee Dios,

quebe súale le' xel-la waca chee Dios.

Quebe gunu' tu zrén benne' ca'. <sup>6</sup> Ca zaj naca benne' caní zaj naca benne' ca' zjaque' tu tu xu'u, ne dxelezi xe'e nu'ula quebe zaj zie' du lazre', ne zaj zua da dxagu na zria lázrdawe' da naca chee xtul-le'. Xel-la dxelezá lazre' chee nu'ula caní nazrube xu na le'. <sup>7</sup> Lácala tu dxulusédezeque' chee xel-la li, cabata' dxeléajni'iquezng'e na. <sup>8</sup> Ca belún Janes ne Jambres, benne' wazrá' ca', benne' ca' guledábague' Moisés, cá'anqueze dxelún benne' caní, dxeledábague' xel-la li. Zaj nazrinnaj xichaj lázrdawe', ne belexecuase' lu xel-la dxeajlí lazre' chee Dios. <sup>9</sup> Quebe bi xelezrué'e benne' caní, lawe' da xeleque bé'equeze xúgute bèneache zaj naque' benne' xálaze, ca gulaca benne' chupa ca' guledábague' Moisés.

*Da bzebe da dxusebaga Pablo Timoteo*

<sup>10</sup> Ba benu':

Ca da bzéajni'ida' bèneache, ne blé'equeznu' ca bènqueza'.

Nézenu' da dxaca lazra' guna', ne ca dxeajlí lazra' Cristo.

Bchaga lawa' da guzaca', ne nazrí'ida' xúgute bèneache.

Nézenu' ca naca xel-la zren lazre' chia'.

<sup>11</sup> Blé'enu' ca guláu zi' xuzre' neda', ne ca gudéa' xel-la zi'.

Nézenu' xúgute da guzaca' lu xezre Antioquia, ne xezre Listra.

Guláu zi' xuzre benne' ca' neda', na' Xránadxu bselé' neda' lu xúgute da ca'.

<sup>12</sup> Xúgute benne' ca', benne' dxelaca lazre' xelúnqueze' ca da dxenná Jesucristo, weláu zi' xúzrequeze bèneache le'. <sup>13</sup> Benne' ca' dxelung'e da caléla, ne benne' dxelezi xe'e welúndxaqueze' da caléla. Xelezi xe'e bèneache, na' benne' xula xelezi xe'e benne' caní.

<sup>14</sup> Lue', guzé chacha ca da ba naxéajni'inu', da na' nuxrén lazru'. Nézqueznu' nu' bseé lue', <sup>15</sup> na' ne nácateu' bídau'te ba núnbe'u da dxenná lu xiche lá'azxa, da dxezeque na guzéajni'i na lue', chee lau' lawe' da dxeajlí lazru' Jesucristo. <sup>16</sup> Xúgute da naxíaj na lu xiche lá'azxa naca na da bzéajni'i Dios benne' ca' zaj naque' bi chee Le', ne naca na da dxuzéajni'i na dxí'u, ne da dxedil-la na benne' dxelung'e da caléla, ne da dxusizre na dxí'u, ne da dxulé'e na dxí'u ca dxal-la' gundxu da xrlátaje, <sup>17</sup> chee gaca du lazre' bi chee Dios, na' gácabe' bi nazéde xanne chee gunbe' xúgute da xrlátaje.

## 4

<sup>1</sup> Lau Dios, ne lau Xránadxu Jesucristo, Bénéa' guchi'e chee benne' ban ca', ne chee benne' gate ca' gate ze'e xedajnná be'e, dxusebaga' lue' <sup>2</sup> guchálaju' dizra' chee Dios, ne gunu' ba xuzre guchálaju' che xuluzé naga bèneache, ca xuluzé nague'. Bzéajni'i benne' ca' duté xel-la zren lazre' chi'u, ne ble'e le' ca da zaj nabague'. Gudil-la, ne bsizre benne' ca'. <sup>3</sup> Caní dxal-la' gunu' lawe' da wazrín zra québedxa xuluzé naga bèneache chee xel-la li da dxusédedxu. Ca dxelezá lázrqueze le', xulunné' zane' benne' xulusédené' le' ca da dxelaca lázreze le' xelenne'. <sup>4</sup> Québedxa xuluzé nague' da li. Wuluzé nague' dizra' da dxuluzaze bèneache. <sup>5</sup> Na' lue', bzéajni'i cuinu' lu xúgute da caní. Bchaga lau xel-la zi' da teu'. Bzua cuinu' chee guchálaju' dizra' chawe' chee Cristo, ne beñ zrin da nabagu' chee Cristo.

<sup>6</sup> Ba bzrin zra guzúa' xel-la nabán chia' lu na' Dios, lawe' da ba zua bagu xelutie' neda'. <sup>7</sup> Du lazra' gudábaga' benne' ca' guledábague' da naca chee Cristo. Tu bènzqueza' ca naca da li chee', ne ba bexuzre beña' da bsebaga Cristo neda' guna'. <sup>8</sup> Lawe' da beña' da xrlátaje, na' ba dxebeza da dxexala' neda', da na' gunna Xránadxu neda' lu zra na', ne quegá tuza' neda' gunng'e na. Cá'anqueze gunézruje' na chee benne' ca' duté xel-la zri'i lazre' chee' dxelebeze' zra xelé'e.

*Pablo dxulé'eng'e Timoteo ca dxal-la' gunbe'*

<sup>9</sup> Ben ba xuzre xídazeu' xedajnná'u neda'. <sup>10</sup> Ba guleaj xichaj Demas neda' lawe' da dxedánedxabe' da naca chee xezr la xu nigá, ne ba zexíajbe' Tesalónica. Crescente ba gusel-la'-be' zexíajbe' naga nababa Galacia, na' Tito gusel-la'-be' naga nababa Dalmacia. <sup>11</sup> Tuze Lucas zúalebe' neda'. Bexilaj Marcos, na' guché'-be' tu zrén len lue', lawe' da wazéquebe' gácalebe' neda' lu zrin chee Cristo. <sup>12</sup> Tíquico gusel-la'-be' lu xezre Efeso. <sup>13</sup> Gate xidu', gúagu' gabán chia' da nucá'ana' xezre Troas lizre Carpo. Cá'anqueze gu'u xiche ca' bcá'ana' ga na', ne da dxunte na ba xen gu'u xiche ca' zaj naca na xide.

<sup>14</sup> Alejandro, benne' gubizre xia bsaca' zí'le'e neda'. Xránadxu gunézruje' lazruj chee' ca da beñe'. <sup>15</sup> Bxue xanne cuinu' chee benne' nigá lawe' da ba gudábagalé'e dizra' da dxuchálajdxu.

<sup>16</sup> Da nedxu lasa gate becheba' ca naca chia' lau benne' xu'u lawe' ca', netú benne' quebe gúcaléne' neda'. Xúgute' buluzá' xíchaje' neda'. <sup>17</sup> Gúcalé Xránadxu neda', ne btipe' lazra' chee guzéqueda' bhálaja' dizra' chawe' lau xúgute benne' ca' quebe zaj naque' judío. Ca'an guca bselá Xránadxu neda' lu na' benne' ca', ca dxun benne' dxuselé' béadu ca' lu dxu'a bezre

xixre', <sup>18</sup> na' guseláqueze' neda' lu xúgute da calëla, ne guxúequeze' neda' ca zrin zra xezrina' xabáa naga dxenná bea Le'. ¡Gaca báqueze Le'! ¡Ca'an gaca na!

*Benne' chee Cristo dxulugapa diuzre ljwezre'*

<sup>19</sup> Dxugapa' diuzre Priscila, ne Aquilo, ne benne' zaj zra' lizre Onesíforo. <sup>20</sup> Erasto begá'anabe' xezre Corinto, na' bcá'ana' Tróximo lu xezre Mileto lawe' da quebe chawe' zúabe'. <sup>21</sup> Ben ba xuzre xidu' nigá dxácatë quebe ne chú'udxu beu' zaga. Eubulo, ne Pudente, ne Lino, ne Claudia, ne xúgute bi bíchedxu zaj zre'e nigá dxulugape' lue' diuzre.

<sup>22</sup> Dxenaba' Xránadxu Jesucristo súalene' lue', ne dxenaba' Dios gunë' da chawe' chee xúgutele le'e. ¡Ca'an gaca na!

## DIZRA' DA BZUAJ SAN PABLO CHEE TITO

*Pablo dxugape' Tito diuzre*

<sup>1</sup> Neda', Pablo, naca' wen zrin chee Dios, ne gubáz chee Jesucristo chee guzéajni'ida' benne' ca' ba gucá'a Dios chee xeleajli lazre' Cristo, ne xelúnbe'e da naca li lazre' chee da naca chee Dios, <sup>2</sup> ne chee xelebeza lazre' xel-la nabán chadía chacanna, da guchebe lazre' Dios gunne' cheedxu gate za gunte' xezr la xu nigá. Dios quebe dxun lazre', <sup>3</sup> na' na'a, ca ba bzrin zra chee na, ba bzéajni'ine' dxi'u ca naca xrtizre' ne chee da bxrize' Dios neda' cu'a lban chee na. Dios nácaqueze' weselá cheedxu. <sup>4</sup> Dxuzúaja' da nigá chiu', Tito. Nacu' ca zrí'inequeza' lawe' da dxeajli lázredxu Cristo. Dxenaba' lau Xradxu Dios, ne lau Xránadxu Jesucristo, Benne' weselá cheedxu, guné' chiu' da cháwedau', ne xexache lazre' lue', ne gunne' lue' xel-la dxebeza zri lazre'.

*Zrin da dxun Tito lu xezr la xu Creta*

<sup>5</sup> Bcá'ana' lue' lu xezr la xu Creta da naxechaj nisa chee gucá'ana chawu' da quebe begá'ana chawe' ládujla bíchedu ca', ne chee gunnitu' benne' gula chee xudau' tu tu xézredu ca', cáteze bxriseda' lue' gunu'. <sup>6</sup> Tu benne' gula chee xudau':

Dxal-la' gaque' benne' quebe bi zua da gagu na chie'.

Dxal-la' súalene' tuze nu'ula.

Zrí'ine' dxal-la' xelácabe' bi ba dxéajli lázrebe' Cristo.

Quebe bi da zrinna' dxelún zrí'ine' ca',

ne quebe gaca nu gagu zria chee da dxelunbe'.

<sup>7</sup> Lawe' da xu'u lu ne'e zrin chee Dios, tu benne' dxuxúe' benne' zaj nababe' chee Cristo:

Dxal-la' gaque' benne' quebe bi zua da gagu na zria chee'.

Quebe dxal-la' gaque' benne' dxucá'ana szren cuine'.

Quebe dxal-la' gaque' benne' xichaj zra'a.

Quebe dxal-la' gaque' benne' dxé'aje' da dxuzuzre na le'.

Quebe dxal-la' gaque' benne' dxedíl-lalene' bénneache.

Quebe dxal-la' gaque' benne' dxucúdee'.

<sup>8</sup> Dxal-la' súateze' si' lu ne'e benne' zjaque' lizre'.

Dxal-la' guné' da naca cháwedau'.

Dxal-la' gaque' benne' nna be'e cuine'.

Dxal-la' gaque' benne' xrlátaje.

Dxal-la' gaque' benne' nuzúa cuine' chee Dios.

Dxal-la' gaque' benne' dxuzéajni'i cuine'.

<sup>9</sup> Dxal-la' gaque' benne' nuzúa cuine' chee dizra' li.

Dizra' li naca na da bsede nu benne' le' chee séquene' guszirene' benne' xubla ne chee da li da dxusédene', ne chee séquene' guzexruje' lazre' benne' ca' dxelenné' chee da li na'.

<sup>10</sup> Caní dxal-la' guné' lawe' da zrále'e benne' dxelenné' chee dizra' li, benne' dxelezi' xe'e benne' xubla lu da xala da dxelenné'. Zane' benne' Israel dxeluné' caní. <sup>11</sup> Dxal-la' guzúa zrii' benne' dxeluné' da caní lawe' da dxuluxrinnaje' xichaj lázxdau xúgute' benne' zaj zra' tu tu xu'u naga dxelú'e chee xulusédene' da quebe naca xrlátaje. Dxeluné' caní chee xelezi' lu ne'e dumí. Da nigá da dxeluné' naca na da calela.

<sup>12</sup> Tu benne' Creta naga zu', benne' gunné' waláz chee xudau' chee benne' ca', gunné': "Benne' Creta zaj nácaqueze' wen lazre', ne zaj naque' ca be snia ca', ne zaj naque' benne' wagu xrata', ne zrawede." <sup>13</sup> Da li gunné'. Chee le' na' gudíl-laqueze benne' ca' chee xelaque' li lazre' ca dxelejli lazre' Cristo, <sup>14</sup> ne chee quebe xuluzé' nague' dizra' da dxuluzaze benne' Israel ca', ne ca naca da nadxixruj bea ca' da dxelún benne' ca' dxuluzúe' chalá'ala dizra' li.

<sup>15</sup> Xúgute' naca na xrlátaje chee benne' ca' zaj naca xrlátaje xichaj lázrdawe', san chee benne' ca' dxeluné' da sban, ne québedxa dxeléajle' chee Cristo, quebe bi de' da naca xrlátaje. Zaj nazrinna' xichaj lázrdawe'. <sup>16</sup> Benne' caní dxelenné' zaj núnbe'eng' Dios, san da dxeluné' dxulé'e na quebe naca da li da dxelenné'. Zaj naque' benne' wen da sban, ne benne' wen da calela, ne quebe xelezéquene' xeluné' tu da xrlátaje.

## 2

<sup>1</sup> Dxal-la' guchálaju' da ca' dxuséde na dxi'u da naca li.

<sup>2</sup> Benne' gula chee xudau':

Dxal-la' xelaque' benne' dxelenná bé'e cuine'.

Dxal-la' xelaque' benne' du lazre'.

Dxal-la' xelaque' benne' dxuluzéajni'i cuine'.

Dxal-la' xelaque' li lazre' ca dxleajli lazre' Cristo,  
ne ca zaj nazri'ine' Le',  
ne ca naca xel-la zren lazre' chee'.

<sup>3</sup> Cá'anqueze nu'ula gula ca' chee xudau':

Dxal-la' dxelapa ba lá'ana Dios ca naca xúgute da dxelune'.

Quebe dxal-la' xelaque' benne' dxulutupe' dizra' bizruj.

Quebe dxal-la' xelaque' benne' dxelé'aje' da xuzuzre na le'.

Dxal-la' xulusédené' da naca xrlataje

<sup>4</sup> chee gaca xulusédené' nu'ula cuide' ca'

chee xelezri'ine' benne' chee' ca', ne zri'ine' ca',

<sup>5</sup> ne chee xelessá be'e cuine',

ne xelaque' du lazre',

ne xulupe'e lizre',

ne xuluzé' dizra' chee benne' chee'.

Caní dxal-la' xelune' chee quebe nu nne' schanní' chee xrtizra' Dios.

<sup>6</sup> Cá'anqueze bsizre bi cuide' ca' chee xelessá be'e cuínabe'. <sup>7</sup> Ca naca da xrlátaje dxunu' lue' dxal-la' gulé'e na benne' ca' ca dxal-la' xelune'. Gate dxusédenu' benne' ca' dxal-la' gacu' li lazre', ne du lazre'. <sup>8</sup> Dxal-la' guchálaju' da naca li lazre' chee quebe nu seque' si tizra le na. Che gunu' caní, na' che nu benne' nnie' chee, wedué'eqezeñe, lawe' da quebe sua tu da calela da dxunle.

<sup>9</sup> Bzéajni'i benne' ca' zaj nada'u chee xuluzé' dizra' chee xrane' ca naca xúgute da xelé xrane' le'. Dxal-la' xelune' da xelexezaca ba lazre' xrane', ne quebe xelexenné' lau xrane'.

<sup>10</sup> Quebe dxal-la' xelebange' da naca chee xrane', san dxal-la' xelaque' li lazre', chee xelessá be'e benne' ca da dxelún benne' caní, na' xelessá chawe' chee xrtizra' Dios, Benne' weselá cheedxu.

<sup>11</sup> Dios ba blé'engé' ca naca da chawe' chee' chee xelessá xúgute bénneache. <sup>12</sup> Da xrlátaje chee Dios dxuséde na dxi'u chee quebedxa gundxu da calela, ne ca naca xel-la dxezá lazre' da calela, san chee nna be'e cuínadxu, ne gácadxu du lazre', ne gápadxu ba lá'ana Dios lu xezr la xu nigá <sup>13</sup> dxácaté ne dxebézádxu zra xelá' Dios szren, ne weselá cheedxu Jesucristo nen xel-la szren chee', da na' dxebeza lázredxu. <sup>14</sup> Le' bzua cuine' lu na' benne' ca' belútie' Le' waláz cheedxu dxi'u chee bselé' dxi'u lu xúgute da zrinnaj, na' bca'ana chawe' dxi'u chee gácadxu bi cheéqueze', ne chee gundxu da xrlátaje du lázredxu.

<sup>15</sup> Da caní dxal-la' gusédenu' benne' ca'. Gudil-la benne' ca', ne bsizre-ñe' duté xel-la dxenná bea chiu'. Quebe bi da calela gunu' chee quebe nu si tizra lue'.

### 3

#### *Da dxal-la' xelún benne' zaj nababé' chee Cristo*

<sup>1</sup> Bsa lazre' benne' bíchedxu ca' chee xelune' ca dxuluchixruj benne' ca' dxelenná bé'engé', ne benne' xu'u lawe', ne chee xuluzé' dizra' chee benne' ca', ne chee xelessá xelune' xúgute da xrlátaje. <sup>2</sup> Quebe dxal-la' xelessá chee nu benne', san dxal-la' xelaque' zren lazre', ne zri'i lazre', ne dxexruj lazre' lau xúgute bénneache. <sup>3</sup> Cá'anqueze dxi'u gate nate gúcadxu benne' xala, ne quebe bzúadxu dizra' chee Dios. Gudadxu calela, na' gunná be'e belá' dxen cheedxu dxi'u, chee bendxu ca naca xúgute da guzá lázredxu, ne da bezaca ba lázredxu. Bendxu da zrinnaj, ne gúcadxu xa lazre'. Belecuide bénneache dxi'u, na' bzrá'adxu ljwézredxu tudxu xetudxu. <sup>4</sup> Gate Dios, weselá cheedxu, blé'engé' da naca chawe' chee', ne xel-la zri'i lazre' chee', <sup>5</sup> na' bselé' dxi'u, quegá lawe' da bendxu dxi'u tu da xrlátaje, san lawe' da bexache lazre' dxi'u. Bselé' dxi'u ne chee da gudibe na dxi'u gate na' bexálajdxu, na' bucube Be' Lá'azxa chee' dxi'u. <sup>6</sup> Ne chee Jesucristo, weselá cheedxu, Dios ba núnnalé'e dxi'u Be' Lá'azxa chee', <sup>7</sup> chee ne chee da naca chawe' chee' gácadxu xrlátaje lau Le', ne zrué'edxu xel-la nabán chadia chacanna da dxebeza lázredxu. <sup>8</sup> Da caní zaj naca na da li. Dxaca lazra' gusízrequeznu' benne' ca' ca naca da caní chee xelessá gunne xue xelún benne' ca' da chawe', benne' ca' dxeléajlé'e chee Dios. Da caní zaj naca na da xrlátaje, ne da gaca xuluchine xúgute bénneache. <sup>9</sup> Quebe gulapa na'u dizra' xala ca', ne dizra' dxuluzaze bénneache ca naca chee zra xrtawe', ne dizra' da dxun na bénneache chupa la'a, ne da dxulutil-la bénneache da naca chee da bchixruj be'e Moisés. Da caní quebe culuén zaj napa na. Dácheze naca na.

<sup>10</sup> Che nu benne' dxune' le'e chupa la'a, bsizre-ñe' tu chupa lasa, ne che quebe dxenne' ca dxu'u le', bebéaje' ládujla le'e <sup>11</sup> lawe' da nézenu' nazrinnaj xichaj lázxdau benne' caní, na' dul-la dxelúnqueze' ba nuzria xi na le'.

#### *Da dxal-la' gun Tito*

<sup>12</sup> Gate sel-la' Artemas u Tíquico naga zu', ben baxuzre xidu' xedajinna'u neda' lu xezre Nicopolis lawe' da bache nuna' sua' nigá beu' zaga ca'. <sup>13</sup> Gúcale Zenas, benne' wedé

dizra', ne Apolos, ca da séquenu'. Bnezruj benne' ca' ca da zaj nachínene' chee chjaque' lu neza chee', na' quebe bi xelexázejene'. <sup>14</sup> Cá'aqueze benne' zaj nabábalene' dxi'u dxal-la' xulusédie' xelune' da chawe', chee xelácalene' benne' dxelaxázejene', chee xelaque' benne' guchine Cristo.

*Pablo dxuzé' Tito dízra'*

<sup>15</sup> Xúgute benne' zrálene' neda' dxulugape' lue' diuzre. Bgape diuzre benne' ca' zaj nazrí'ine' dxi'u lu da naca chee Cristo. Dxenaba' Dios gun chawe'e xúgutele le'e. ¡Ca'an gacana!



## DIZRA' BZUAJ SAN PABLO CHEE FILEMÓN

*Pablo dxugape' diuzre Filemón*

<sup>1</sup> Neda', Pablo, xu'a lizre xia lawe' da dxuna' zrin chee Jesucristo, nen bi bíchexu Timoteo. Dxugápantu' lue' diuzre, Filemón, benne' nazrí'ite lázrentu'. Nacu' bi ljwézrentu' lu zrin chee Cristo. <sup>2</sup> Dxugapa' diuzre benne' bíchexu ca' dxelezrague' lizru', ne nu'ula zandxu Apia, ne Arquipo, bi ljwézredxu nácabe' benne' zeje' wedil-la chee Cristo. <sup>3</sup> Dxenaba' Xradxu Dios ne Xránadxu Jesucristo guné' da chawe' cheele, ne gunné' le'e xel-la' dxebeza zri lazre'.

*Ca naca chee Filemón*

<sup>4</sup> Dxápequeza' Dios xcalenu' gate dxuchálajlena' Le' ne dxeajsá lázrqueza' lue', <sup>5</sup> lawe' da ba benda' ca nazrí'inu' Xránadxu Jesucristo ne ca dxeajli lazru' Le', ne ca nazrí'inu' xúgute' bi ca' chee Dios. <sup>6</sup> Dxenaba' lau Dios guzéajni'ine' benne' ca' dxeajli lazre' Le' ne chee xel-la' dxeajli lazre' chiu', ca naca xúgute' da chawe' ca' da nápaxu ne chee Jesucristo. <sup>7</sup> Xel-la' zri' i lazre' chiu', bi bicha', dxúnnale'ē ne neda' xel-la' dxebe', ne dxutipá na lazra', ca dxutipá na lazre' xúgute' bi chee Dios.

*Pablo dxenabe' Filemón tu da guné' chee Onésimo, bi na'u Filemón*

<sup>8</sup> Chee le' na', lácala xu'u lu na'a nna be'eda' lue' ca dxal-la' gunu' lawe' da naca' gubáz chee Cristo, <sup>9</sup> dxata' xúeda' lue' lu xel-la' zri' i lazre' cheedxu, neda', Pablo, benne' gula, ne xu'a lizre xia lawe' da dxuna' zrin chee Cristo. <sup>10</sup> Dxata' xúeda' lue' tu da gunu' chee Onésimo, bi nácabe' ca zri' inequeza' lu da naca chee Cristo, neda', xu'a lizre xia nígá.

<sup>11</sup> Gate nate Onésimo, bi na'u lue' gúgabe' tu bi wen da calela, san na'a nácabe' wen zrin li lazre' chiu' lue', ne chia' neda'. <sup>12</sup> Dxesel-la'-be' naga zu'. Bezi' lu na'u-be', nácabe' bi nazrí'ite lazra'. <sup>13</sup> Guzá lazra' neda' xegá'analebe' neda' nígá chee gunbe' zrin chia' neda' waláz chiu' lue' dxácaté ne xu'a lizre xia lawe' da dxuna' zrin chee dizra' chawe'. <sup>14</sup> Quebe dxaca lazra' bi guna' che quebe naca na da nnau' lue', chee gácalenu' neda' lawe' da naca na ca dxaca lazru' lue', ne quegá lawe' da dxenná be'eda' lue'. <sup>15</sup> Becuasa Onésimo nen lue' tu chí'idau', san na'a súaletéquezebe' lue', <sup>16</sup> quegá ca tu bi na'u lue', san gágabe' tu bi cháwedxa ca tu bi na'u lue', da zéajé na, gágabe' tu bi bichu' nazrí'ite lazru'. Neda' nazrí'ite'eda'-be', san lue' dxal-la' zri'idxenu'-be', quegaze ca bénneacheze, san cá'anqueze ca bi bíchexu, bi chee Cristo.

<sup>17</sup> Chee le' na', che dxéquenu' neda' ca bi ljwezru', bezi' lu na'u-be' ca dxezi' lu na'u neda'. <sup>18</sup> Che bi da calela ba benbe' chiu', u che bi dxál-labe' chiu', neda' quízruja' na. <sup>19</sup> Neda', Pablo, dxuzúaja' da nígá nen ná'aqueza': Neda' quízruja' na, lácala neda' la gusá'a lazru' lue' dxál-laquezu' chia' cuínquezu'. <sup>20</sup> Lue', bi bicha', dxata' xúeda' lue' lu La Xránadxu, ben da guzúa na neda' lu da ba neza.

<sup>21</sup> Dxuzúaja' chiu' lawe' da nuxrén lazra' gunu' ca da dxapa' lue', ne nezda' gundxu' ca da dxenaba' lue'. <sup>22</sup> Cá'anqueze bcueza latja naga sua' neda' lawe' da dxebeza lazra' gun Dios da dxenábale Le', gunné' neda' lataj xida' xedajnná'a le'e.

*Bi chee Cristo dxulugápabe' diuzre Filemón*

<sup>23</sup> Epafras, bi ljwezra', xú'ulebe' neda' lizre xia lawe' da dxunbe' zrin chee Jesucristo, <sup>24</sup> ne Marcos, ne Aristarco, ne Demas, ne Lucas, bi ca' dxelácalebe' neda' lu zrin chee Cristo dxulugápabe' lue' diuzre.

<sup>25</sup> Dxenaba' lau Xránadxu Jesucristo guné' da chawe' cheele le'e. Ca'an gaca na.

## DIZRA' DA NAZÚAJ CHEE BENNE' HEBREO CA'

*Dios ba bchálajlëne' dxi'u lu dxu'a Zrí'inequeze'*

<sup>1</sup> Dios bchálajlëne' xra xrtáudxu ca' gate nate zane' lasa, ne zane' ca bchálajë' lu dxu'a benne' ca' buluchálajë' waláz chee'. <sup>2</sup> Na'a, lu zra caní, Dios ba bchálajlëne' dxi'u lu dxu'a Zrí'inequeze'. Dios bene' xezr la xu nigá lu na' Zrí'ine' nigá, ne ba bene' naca chee' xúgute da ca' bene'. <sup>3</sup> Zrí'ine Dios nigá naque' Benne' dxulé'ene' ca naca xel-la' szren chee Dios, ne naque' ca da nácaqueze Dios, na' nuxre' xúgute da ca' nunge', dxuchínene' dizra' chee' da nápalë'e na xel-la' waca. Gate ba gudúe' dul-la da nabágadxu xeajxedxé'e chalá'a xabëla chee lataj blau chee Dios xabáa.

*Zrí'ine Dios nácadxe' blau ca gubáz chee xabáa ca'*

<sup>4</sup> Zrí'ine Dios nácadxe' blau ca gubáz chee xabáa ca' chee Dios, ca naca La Cristo da bzua Dios, nácadxa na blau ca la gubáz chee xabáa ca'. <sup>5</sup> Dios cabata' guzre' tu gubáz chee xabáa ca guzre' Cristo, gunné':

Lue' nacu' Zrí'ina'.

Neda' nácaqueza' Xrau' na'a zra.

Cá'anqueze cabata' guzre' tu gubáz chee xabáa ca gunné' chee Cristo:

Neda' gaca' Xre',

na' Le' gaque' Zrí'ina'.

<sup>6</sup> Gate bzuë' Zrí'ine' lu xezr la xu nigá, gunné':

Xúgute gubáz chee xabáa ca' xelue lá'anë' Le'.

<sup>7</sup> Ca naca chee gubáz chee xabáa ca', Dios gunné':

Dsesel-le' gubáz chee' ca' ca tu be' da dxaca,

ne dxuchínene' gubáz wen zrin chee' ca' ca tu xi'.

<sup>8</sup> Ca naca chee Zrí'ine', gunná Dios:

Lataj blau chiu' lue', Dios, zúatequeze.

Xel-la' dxenná bea chiu' naca na xlátajë.

<sup>9</sup> Nazri'inu' da xlátajë, ne dxezra'u da calela.

Chee le' na' Dios chiu' ba bënnadxe' Lue'

xel-la dxebe' ca da bnézruje' bi ljwezru' ca'.

<sup>10</sup> Cá'anqueze guzre' Le':

Lue', Xran, nédxudate' benu' xezr la xu.

Nen xel-la' waca chiu' benu' xabáa.

<sup>11</sup> Da caní weledé chee na, san Lue' súatequezu'.

Xúgute da caní welaca gula ca zra lana bënneache.

<sup>12</sup> Na' xutubu' na ca tu ladxe',

ne gucha'u na ca dxun tu benne' dxuché'e zra lanë'.

Lue' zúaquezu' chadía chacanna,

na' xel-la' nabán chiu' quebe téqueze chee na.

<sup>13</sup> Dios cabata' guzre' tu gubáz chee xabáa ca guzre' Zrí'ine', gunné':

Gudxe'e chalá'a xabëla chia',

cadxa guzúa' benne' ca' dxeledábague' Lue' zran ni'u.

<sup>14</sup> Xúgute gubáz chee xabáa ca' zaj naque' be' ca' dxelún zrin chee Dios, na' dxezel-le' gubáz chee xabáa ca' chee xelácalëne' benne' ca' dxelezi'e xel-la' weselá.

## 2

*Quebe dxal-la' guzúadxu chalá'ala xel-la' weselá*

<sup>1</sup> Chee le' na' dxal-la' nna' xánnedxu dizra' da ba bendxu chee quebe cuásadxu lu neza chee xel-la' lí. <sup>2</sup> Dizra' da gusel-la Dios gate nate lu na' gubáz chee xabáa ca' guca na li lazre', na' xúgute benne' ca' buluzúe' na chalá'ala, ne quebe buluzúe' dizra' ca da gunná Dios, Dios bdeë' le' xel-la' zi' ca da dxal-la' xezezi'e. <sup>3</sup> ¿Ájazra gaca ladxu che guzúadxu chalá'ala tu xel-la' weselá zren caní? Xránaquezdxu bchálajë' chee xel-la' weselá nigá nédxute, na' gude' na' buluchálaj benne' ca' belenne' na, na' gulenné' naca na da li laudxu dxi'u. <sup>4</sup> Cá'anqueze ba bzua chacha Dios na ne chee da dxelunna bea na, ne ne chee da zren ca' ben Dios, ne ne chee xel-la' waca zan ca', ne ne chee Be' Lá'azxa, Bënnea' benne' dxi'u xel-la' waca ca', ca da guca lázrequeze Le'.

*Jesucristo ben cuine' ca nácadxu dxi'u*

<sup>5</sup> Dios quebe bzue' lu na' gubáz chee xabáa ca' xezr la xu da za za', chee da na' dxuchálajdxu na'a. <sup>6</sup> Naca na ca naxúaj na lu xiche lá'azxa, ca da gunná tu benne':

¿Ajazra naca bénneache che Lue', Dios, dxeajsá lazru' chee'?

¿Ajazra naca bénneache, che Lue' dxe'u gunne xue chee le'?

<sup>7</sup> Tu chí'idau'ze bzu' bénneache látezdxa ca gubáz chee xabáa ca'.

Nunu' chee' si'e xel-la' szren, ne xel-la' ba lá'ana, ne bzu' lu ne'e xúgute da benu'.

<sup>8</sup> Xúgute ba bzu' na zran ni'a le'.

Caní naca, gate Dios bzue' xúgute zran ni'a bénneache, quebe bi de da quebe guzúa na dizra' chee bénneache, na' quebe ne xuluzúa ca naca da ca' dizra' chee'. <sup>9</sup> Na'a dxelé'edxu Jesús, Bénnea' bzua Dios guque' tu chí'idau' látezdxa ca gubáz chee xabáa ca'. Dios gúnene' gate Jesús waláz chee xúgute bénneache lawe' da nazri'ine' bénneache, na' na'a nuné'zruje' Le' xel-la' szren, ne xel-la' ba lá'ana lawe' da gudé' lu xel-la' gute zi xa'.

<sup>10</sup> Dios bene' xúgute da zaj zua, na' zaj zua na chee gaca ba Le'. Le' dxaca lazre' xezezi' xúgute bi chee' ca naca xel-la' szren chee'. Chee le' na' ben na ba xen ben Dios naca Jesucristo duté weselá cheedxu, ne chee da zi' da xa' da gudé' chee séquene' guselé' bénneache chadia chacanna. <sup>11</sup> Benne' caní dxejúa Jesús dul-la da zaj nabague', na' benne' caní, ne Léqueze' zaj naque' bi ca' chee tuze Xradxu. Chee le' na' quebe dxeué'e Jesús nne' chee benne' ca', zaj naque' bi biche'.

<sup>12</sup> Naca na ca dxenná lu xiche lá'azxa:

Guchálajqueza' da naca chiu' Lue' lávela bicha' ca',

na' gúl-laqueza' da güe lá'ana' Lue' ládujla benne' ca' zaj nazrague' lau Lue'.

<sup>13</sup> Cá'anqueze dxenná xiche lá'azxa:

Neda' guxrén lazra' Dios.

Cá'anqueze dxenná na:

Nigá zua' nen bi chia' ca', bi ca' benne' Dios neda'.

<sup>14</sup> Lawe' da zaj naca be'la' dxen benne' ca' zaj naque' bi chee', Le' ben cuine' be'la' dxen chee guzéquene' gutié', ne caní bene' chee séquene' guzría xi'e da xriwe', da na' napa na xel-la' dxenná bea gute na bénneache. <sup>15</sup> Caní guca bselé' xúgute benne' gulaque' ca' benne' zaj nada'u xúgute iza zaj naca bané' lawe' da belezrebé' xel-la' gute. <sup>16</sup> Da li quebe ble'e nigá chee gácalene' gubáz chee xabáa ca', san naca na ca dxenná xiche lá'azxa: Ble'e chee gácalene' benne' zaj naque' zri'ine zre sua Abraham. <sup>17</sup> Chee le' na' ben na ba xen guque' duté ca zaj naca bi biche' ca', chee séquene' gaque' lau Dios tu bxruze blau naque' li lazre', ne dhexache lazre' bénneache, ne chee séquene' gun cuine' tu da dxejúa na dul-la zaj nabaga bénneache. <sup>18</sup> Lawe' da gudéqueze Le' xel-la' zi' gate guca lazre Satanás gun zréaje Le', dxezéquene' na'a gácalene' benne' ca' dxun zréaje da xriwe' le'.

### 3

#### *Jesús nácadxe' blau ca Moisés*

<sup>1</sup> Le'e, benne' bicha'dau', nácale bi chee Dios, lawe' da nácale benne' ca' ba gunné Dios, le nna' xanne' Jesucristo, Bénnea' gusel-la Dios chee gaque' bxruze blau chee da dxéajlédxu.

<sup>2</sup> Jesús nigá guque' li lazre' lau Dios, Bénnea' bzue' Le' lu zrin na' da ba bene', ca guca Moisés, guque' li lazre' lu zrin na' bene' lau benne' ca' gulaque' bi chee Dios. <sup>3</sup> Jesús dxal-la' sidxe' xel-la' ba lá'ana ca da si' Moisés, ca dxaca chee benne' dxune' tu xu'u, dxezidxe' xel-la' ba lá'ana ca da dxezi' xu'u ná'queze. <sup>4</sup> Tu tu xu'u naca na da ben benne', san Dios nune' xúgute da zaj zua. <sup>5</sup> Ca wen zrin chee Dios guca Moisés li lazre' lu zrin na' bene' lau benne' ca' gulaque' bi chee Dios, na' bchálaje' ca naca da nne' Dios ca te na'. <sup>6</sup> Cristo naque' li lazre' ca Zrí'inequeze Dios laudxu dxí'u. Nácadxu ca lizre Dios che se cháchadxu lu da dxuxrén lázredxu ca zrindxa zra cheajsé cheedxu, ne dxebéle'edxu lu da dxebeza lázredxu.

#### *Bi ca' chee Dios xelexezi' lazre' naga zua Dios*

<sup>7</sup> Caní naca, naca na ca da dxenná Be' Lá'azxa lu xiche lá'azxa, dxenné':

Na'a, che le'e dxenle ca da dxenná Dios,

<sup>8</sup> quebe gácale lázrdau zide' ca gulaca benne' ca' guledábague' Dios,

na' belune' Dios zede le'e xixre' lawe' lataj.

<sup>9</sup> Belún xra xrtaule ca' neda' zede chee guna' ca gunnía',

lácala belelé'ene' da bene' lávela chua iza.

<sup>10</sup> Chee le' na' bzra'a xichja' benne' ca',

na' gunnía': Tu dxelebéaj xíchajzqueze benne' caní neda',

ne dxeledábague' ca naca da bdxíruja'.

<sup>11</sup> Chee le' na' bzra'a xichja' benne' ca', ne bzua chúchua' da gucha' benne' ca',

gunnía' quebe xelexú'e naga xelexezi' lazre' naga zúaqueza' neda'.

<sup>12</sup> Le'e, benne' bícha'dau', le guxúe cuínale cheę quebe gaca lázrdau zide' netule le'e, quebe cuásale lau Dios ban lawe' da quebe dxéajle cheę Le'. <sup>13</sup> Le gutipa lázrele tule xetule tu zra tu zra, dxácate ne zúadxu lu zra da nunna Dios dxi'u, cheę quebe si xę dul-la netule le'e, na' gácale lázrdau zide'. <sup>14</sup> Che ęę cháchadxu ca zrin zra cheajsé cheędxu ca naca da dxuxrén lázreqezdxu nédxute, na'a nácadxu bi cheę Cristo.

<sup>15</sup> Naca na ca dxenná na lu xiche lá'azxa:

Na'a, che le'e dxenle ca da dxenná Dios,

quebe gácale lázrdau zide' ca gulaca benne' ca' guledábaguę' Dios.

<sup>16</sup> ¿Nuzra benne' ca' belenne' dizra' cheę Dios, na' ca gudé na' guledábaguę' Dios? Zaj naca xúgutę benne' ca' bebéaj Moisés lu xęzr la xu Egipto. <sup>17</sup> ¿Nuzra benne' ca' bzra'a Dios le' lávela chua iza? Zaj naca benne' ca' belún dul-la, na' gulátie' le'ę xixre' lawe' lataj. <sup>18</sup> ¿Nuzra benne' ca' bzua chuchu Dios xrtizre' gate guzre' le' quebe xelexú'ę naga xelexezi' lazre' naga zua Le'? Zaj naca benne' ca' guledábaguę' xrtizra Dios. <sup>19</sup> Na'a dxelé'edxu quebe guca xelexú'ę lawe' da quebe guléajle'ę cheę Le'.

#### 4

<sup>1</sup> Caní naca, dxácate ne zua cheędxu da nahebe lazre' Dios cheę xexú'udxu naga xezi' lázredxu naga zua Dios, dxal-la' guxúe cuínadxu gagáze nule le'e quebe xexú'ule. <sup>2</sup> Cá'anqueze dxi'u ba bendxu dizra' chawe' cheę Dios ca da belén benne' ca', san benne' ca' quebe bi da ba neza gulezi'ę cheę dizra' da belenne' lawe' da quebe guléajle'ę cheę na. <sup>3</sup> Dxi'u ba guxéajledxu, na' chú'udxu naga xezi' lázredxu, ca da gunná Dios gate gunné':

Cheę le' na' bzra'a xichja' benne' ca',

na' bzua chúchua' da gucha' benne' ca', gunnía':

Quebe xelexú'ę naga xelexezi' lazre' naga zua neda'.

Caní gunná Dios lácala ba bsexuzre' zrin cheę' gate na' bęnte' xęzr la xu, <sup>4</sup> lawe' da naxúaj na lu xiche lá'azxa ca naca cheę zra gazre', dxenná na:

Lu zra gazre bezi' lazre' Dios lu zrin da bęne'.

<sup>5</sup> Xetú dizra' da naxúaj na lu xiche lá'azxa dxenná na:

Quebe xelexú'ę naga xelexezi' lazre' naga zua neda'.

<sup>6</sup> Benne' ca' belenne' dizra' chawe' nigá cheę Dios nédxute quebe belexú'ę lawe' da quebe buluzúe' dizra' ca naca da gunná Dios. Na'a ne zaj zra' benne' dxal-la' xelexú'úqueze' naga xelexezi' lazre'. <sup>7</sup> Cheę le' na' Dios ba guléajle' xetú zra, gunné': Na'a zra. Caní naca lawe' da dxuchálajle' Dios dxi'u dxuchinene' dizra' da gunná David gudé na', da naxúaj na lu xiche lá'azxa naga dxenná na:

Na'a, che le'e dxenle ca da dxenná Dios,

quebe gácale lázrdau zide'.

<sup>8</sup> Chela belexezi' lazre' benne' ca' be Josué lataj gulu'e xęzr la xu na', quegá guchálajdxa Dios cheę xetú zra. <sup>9</sup> Caní naca na, de lataj xelú'u bi ca' cheę Dios naga xelexezi' lazre' naga zua Dios. <sup>10</sup> lawe' da xezi' lazre' lu zrin dxun nu benne' chu'ę naga xezi' lazre' naga zua Dios, ca ben Dios, bezi' lazre' lu zrin ben Le'. <sup>11</sup> Dخال-la' gun zi lázredxu séquedxu chú'udxu naga xezi' lázredxu gagáze nu benne' gunę' ca belún benne' ca' quebe guléajle'ę.

<sup>12</sup> Dizra' cheę Dios naca na da bane, ne napa na xel-la' waca. Naládxa na ca tu xia da nalá na dxupa la'ate, ne dxaze na naga dxelezraga bęnne'du xú'udxu, ne be' nácaquezdxu, ne dxaze na lu xichaj lázrdau bęnneache, na' dxuchi'a na ca naca da dxugú'u bea bęnneache ne ca da dxéquene' gunę'. <sup>13</sup> Quebe bi de da ben Dios da seque' gucache cuina na lau Dios. Xúgutę zaj nalá' na, ne zaj naxalaj na lau Bęnnea' dxal-la' xulé'edxu Le' ca da bęndxu.

*Jesús naque' bxruze blau zrente*

<sup>14</sup> Jesús, Zri'ine Dios naque' bxruze blau zrente cheędxu, Bęnnea' ba bexu'e lau Dios. Cheę le' na' dxal-la' ęę típadxu lu da dxéajledxu cheę Dios. <sup>15</sup> Bxruze blau cheędxu wazéquene' xexache lazre' dxi'u che dxi'u dxate ni'a nadxu lu xel-la' dxeajlí lazre' cheędxu, lawe' da gudéqueze Le' lu xel-la' zi' ca' gate guca lazre da xriwe' gun zréaje na Le', ca da dxededxu dxi'u na'a, na' Le' quebe bęne' dul-la. <sup>16</sup> Cheę le' na' dxal-la' bigadxu du lázredxu lu lataj blau cheę Dios cheędxu, Bęnnea' nazri'ine' dxi'u, cheę xexache lazre' dxi'u, ne dutę xel-la' xrlátaje cheę' gácalęne' dxi'u gate nachínedxu nu gácale dxi'u.

#### 5

<sup>1</sup> Tu tu bxruze blau dxecá'a Dios ládujla bęnneache, ne dxuzúe' le' cheę gunę' zrin lau Dios waláz cheę bęnneache ca', ne cu'ę guna' lau Dios, ne gutie' béadu ca' ne cheę dul-la zaj nabaga' bęnneache. <sup>2</sup> Cá'anqueze bxruze blau nigá dxate ni'a ne'ę lu da ca' dxunę' ca da dxaca cheędxu dxi'u. Cheę le' na' wape' xel-la' zren lazre' cheę benne' ca' quebe dxeléajni'ine', ne

dxelune' da caleļa, <sup>3</sup> na' lawe' da dxate ni'a ne'e, dxal-la' gutie' béadu ca' ne chee dul-la da nabáaqueze', cáteze dxune' ne chee dul-la da zaj nabaga xezicadxa bèneache.

<sup>4</sup> Quebe nu gaca gun cuina bxruze blau, san Diósqueze dxenne' bènea', ne dxunézruje' le' xel-la' szren na', ca bene' chee Aarón. <sup>5</sup> Cá'anqueze naca na chee Cristo, quebe bzua cuine' bxruze blau, san Dios be'e Le' xel-la' szren na' ca da guzre' Le': Lue' nacu' Zri'ina'.

Neda' nácaqueza' Xrau' na'a.

<sup>6</sup> Cá'anqueze naxúaj na lu xiche lá'azxa ca guzre' Le':

Lue' nacu' bxruze blau chadía chacanna

ca gúcaqueze Melquisedec.

<sup>7</sup> Gate zua Cristo lu xezr la xu nigá, bchájlajene' Dios, ne guta' xuene' Dios nen chi'e zizraj, ne gudxézrele'e, lawe' da napa Dios xel-la' waca guselé' Le' lu xel-la' gute, na' Dios benne' chee' lawe' da gudapé' Xre' ba lá'ana. <sup>8</sup> Ca'an guca, lácala naca Cristo Zri'ine Dios, bsédie' guque' wezúa dizra' ne chee xel-la' zi' da gudée', <sup>9</sup> na' gate guque' duté Weselá cheedxu ne chee da caní, nadxa guzéquene' bselé' bèneache chadía chacanna, benne' ca' dxuluzúe' dizra' chee', <sup>10</sup> na' Dios bzue' Le' bxruze blau ca gúcaqueze Melquisedec.

### *Quebe dxal-la' gusandxu xel-la' dxeajlí lazre' cheedxu*

<sup>11</sup> Déle'e da dxal-la' guchálaja' ca naca chee da nigá, san naca na stebe guzéajni'ida' le'e na'a, lawe' da quebe ne gaca chéajni'ile na. <sup>12</sup> Zane' iza ba guca dxéajle chee Cristo, na' ba gul-la' gúsédele benne' xula ca naca chee Le', san dxun na ba xen nu guzéajni'ile' da xula da quebe nácatéca stebe ca naca dizra' chee Dios. Ne nácale ca bidau' ne dxázrebe' nizre'. Quebe ne gaca gágule xel-la' wagu chee benne' waca. <sup>13</sup> Benne' ca' zaj naca ca bidau' ne dxázrebe' nizre' zaj naque' benne' ca' quebe ne xuluchíne' dizra' chee xel-la' li. <sup>14</sup> Xel-la' wagu chee benne' waca naca na chee benne' ca' ba zaj nézene' xelxúnbe'e da naca da xrlátaje, ne da naca da caleļa.

## 6

<sup>1</sup> Chee le' na' québedxa dxal-la' gusédedxu ca da bsédedxu nédxute ca naca chee Cristo, san chéajtezedxu gusédedxu da naca chee' chee gácadxu benne' waca. Québedxa bi dxal-la' guchálajdxu chee da du ca' da bsédedxu nédxute, ca dxal-la' xexéaje lázredxu chee da ca' béndxu da zaj nua na xel-la' gute, ne ca dxal-la' chéajlédxu chee Dios, <sup>2</sup> ne ca dxal-la' xedxúadxu nisa, ne ca dxal-la' xuluzé ne'e xíchajdxu, ne ca xellexabn benne' gate, ne ca gun Dios, guchi'e da nun tu tu bèneache chee gudée' benne' ca' dxelune' da caleļa lu lataj ba xa' chadía chacanna. <sup>3</sup> Chee le' na' chéajteedxu lu da naca chee Cristo, che Dios gunne' dxi'u lataj.

<sup>4</sup> Benne' ca' ba gulezúe ca naca xel-la' naxani' chee Dios, ne ba gulezú lawe' xelúnbe'e da dxunna Dios, ne ba gulezúe Be' Lá'azxa, <sup>5</sup> ne ba gulezú lawe' xelúnbe'e da xrlátaje ca' chee Dios ca naca da xelezúe lu xezr la xu da za za', <sup>6</sup> na' te na' che xuluzúe' Dios chalá'ala, québedxa gaca xellexéaje lazre' lawe' da gaca na ca xuludé'e Cristo le'e xaga begúaj da xula, ne dxelún le' chee' lávela xúgute bèneache. <sup>7</sup> Zaj naque' ca xezr la xu da dxezi na nisa xiuj. Che xezr la xu na' dxunna lina chawe' chee benne' dxelune' na zrin, naca na da dxun chawe' Dios, <sup>8</sup> san che dxachuj na xeche', ne xixre' da quebe bi culuén napa na, quebe bi zaca xezr la xu na', san naca na tu da xu'u de', na' naga chéajsete chezxe na.

### *Xel-la' dxebeza lazre' da nápadxu*

<sup>9</sup> Le'e, benne' bicha'dau', lácala dxuchálajntu' caní, dxuxrén lázrentu' ca naca chee le'e wazile le'e da chawe' chee xel-la' weselá. <sup>10</sup> Dios dxune' da xlátaje, ne quebe gal-la lazre' ca naca zrin da ba bene' ne ca bzri'ile Le' gate gúcalele benne' bíchedxu ca', ne ca da tu dxúnzqueze. <sup>11</sup> Dxac lázrentu' chéajteze tu tule gunle da caní duté lázraule ca zrin zra cheajse chee, chee zru'éle da dxebeza lázrele. <sup>12</sup> Quebe dxaca lázrentu' xewédele. Dxac lázrentu' gunle le'e ca belún benne' ca' guleajlí lazre' Dios, ne gulaque' zren lazre', na' gulezúe ca da guchebe lazre' Dios gunézruje' chee'.

<sup>13</sup> Gate guchebe lazre' Dios bi gunézruje' chee Abraham, na' bzétajqueze cuine' lawe' da québedxa nu zua nácadxa szren ca Le', nu guzétaje', <sup>14</sup> gunné': "Da li gúnqueza' da chawe' chiu' lue', ne guzánqueza' zri'ine zre su'." <sup>15</sup> Abraham guleze' duté xel-la' zren lazre', na' chee le' na' guzi'e da guchebe lazre' Dios gunézruje' chee'. <sup>16</sup> Gate nu dxuluzetaj bèneache, dxuluzétaje' benne' nácadxe' szren ca léqueze', ne gate bi dxuluzúa chúchué', ne dxuluzétaje' Dios, québedxa bi de' da bi xelenné'. <sup>17</sup> Chee le' na' Dios bzua chúchué' da guchebe lazre', ne bzetaj cuine', lawe' da guca lazre' gulé'eng' benne' ca' xelezúe da guchebe lazre', Le' guné' ca naca da guchebe lazre', ne quebe guché'e ca guné'. <sup>18</sup> Caní naca, da chupa caní quebe gaca cha na, na' lu da caní Dios quebe gaca gun lazre', ne ne chee da ca' Dios ba nunne' dxi'u tu da gun na dxi'u dipa lazre', dxi'u na' ba nézedxu dxuxúe Le' dxi'u, ne nuxrén lázredxu si'

lu nnadxu da dxebeza lázredxu ca naca da gunne' dxi'u. <sup>19</sup> Da nigá dxebeza lázredxu nuxru chacha na béenne'du xú'udxu ca dxun tu xia da dxuxru chacha na tu da dxedá lawe' nísadau' gate zria na lawe' nísadau'. Da na' dxebeza lázredxu zúalé na Cristo cuzru ladxe' da ze lu xudau' da zua xabáa, <sup>20</sup> naga guxú'u Jesús waláz cheedxu chee' gusaláje' neza naga tedxu, na' Le' naque' tu bxruze blau chadía chacanna ca guca Melquisedec.

## 7

### *Jesús naque' bxruze blau ca guca Melquisedec*

<sup>1</sup> Melquisedec nigá guque' wenná bea chee' xezre Salem, ne bxruze chee' Dios szrente. Gate ze za' Abraham lu wedil-la gate bzétaje' benne' wenná bea ca', na' Melquisedec nigá xeajchague' le', ne gunabe' lau Dios guné' da chawe' chee' Abraham, <sup>2</sup> na' Abraham bnézuje' chee' le' tu cue' chee' da chi cue' ca' ca naca da bzrué'eng' lu wedil-la na'. La Melquisedec zéaje na wenná bea xlátaje, ne lawe' da guque' benne' wenná bea chee' xezre Salem, da zéaje na xel-la' dxebeza zri lazre', le' zéajequeze na wenná bea chee' xel-la' dxebeza zri lazre'. <sup>3</sup> Quebe naxúaj na zua xre', ne xrné'g, ne xra xrtawe', ne quebe naxúaj na che gúlaje', ne che gutié'. Caní naca na, da guca Melquisedec dxulé'e na ca naca chee' Zri'ine Dios, naque' bxruze blau chadía chacanna.

<sup>4</sup> Le na' xque na'a ca szren guca Melquisedec, che bnezruj xra xrtáudxu Abraham chee' le' tu cue' chee' da chi cue' chee' da guqué'g lu na' wenná bea ca' lu wedil-la na'. <sup>5</sup> Ca naca da bdxixruj bea Moisés, bxruze ca', benne' ca' zaj naque' xrtia Leví dxal-la' xezezi'g tu cue' chee' da chi cue' ca' da xelizruj benne' Israel ca', benne' zaj naque' xrtia ljwezre', lálala zaj naque' zri'ine zre sua Abraham ca zaj nácaqueze benne' ca'. <sup>6</sup> Melquisedec, benne' quebe naque' xrtia Leví guzi'g tu cue' chee' da chi cue' ca' da gudizruj Abraham, bénnea' dxal-la' si'g da guchebe lazre' Dios. Cá'anqueze Melquisedec gunabe' lau Dios guné' da chawe' chee' Abraham, <sup>7</sup> na' dxelenná xúguté' bénneache nácadxa blau bénnea' dxenabe' lau Dios guné' chawe' chee' benne' xula ca' quézcala bénnea' si'g da chawe' na' dxenabe'. <sup>8</sup> Na'a benne' ca' dxezezi'g tu cue' chee' da chi cue' ca' zaj naque' benne' dxelate, san ca naca chee' Melquisedec, naque' ca tu benne' naca bánqueze' lawe' da quebe naxúaj na lu xiche lá'azxa che gutié'. <sup>9</sup> Ca naca chee' Leví, ne ca naca chee' xúguté' bxruze ca' zaj naque' zri'ine zre sua Leví na', benne' ca' dxezezi'g na'a tu cue' chee' da chi cue' ca', wácaqueze nnadxu cá'anqueze benne' caní gulízruje' chee' Melquisedec tu cue' chee' da chi cue' gate na' bezrague' Abraham, <sup>10</sup> lawe' da wazeque' nnadxu ne zaj zua zri'ine zre sua Abraham lu bel-la' dxen chee', benne' quebe ne xelalaj gate na' bdxuaj Melquisedec xeajchague' Abraham na'.

<sup>11</sup> Benne' Israel ca' gulezi' lu ne'g da bdxixruj bea Dios lu na' bxruze ca' zaj naque' xrtia Leví. Chela guzeque' da belún bxruze ca' gun na li lazre' benne' ca' buluzúe' dizra' chee' da bdxixruj bea Dios na', na' quebe ben na ba xen la' xetú bxruze ca guca Melquisedec, ne quegá ca guca Aarón. <sup>12</sup> Che xezrá' ca dxal-la' gaca bxruze na', na' dxál-la'queze xezrá' da nadxixruj bea na'. <sup>13</sup> Xránadxu, Bénnea' naxúaj na chee' gaque' bxruze ca guca Melquisedec, nababe' xetú cue' xrtia Israel ca', benne' ca' netue' quebe ne gaque' bxruze. <sup>14</sup> Naca bea na nababa Xránadxu xrtia Judá, na' Moisés quebe gunné' xelaca benne' caní bxruze.

<sup>15</sup> Da nigá naca béadxa na che bxruze cube na' dxal-la' gaque' ca guca Melquisedec, <sup>16</sup> ne bxruze cube nigá quebe gaque' bxruze ne chee' tu da nadxixruj bea da dxenná na nu xrtia dxal-la' gaque'. Gaque' bxruze lawe' da nape' xel-la' waca chee' tu xel-la' nabán da quebe te chee' na. <sup>17</sup> Naca chee' ca da dxenná Dios:

Lue' nacu' bxruze chadía chacanna  
ca da guca Melquisedec.

<sup>18</sup> Caní guca, bedxúaj chalá'ala da bdxixruj bea Dios gate nate lawe' da quebe guzeque' bi gun na, ne quebe bi culuén gudapa na, <sup>19</sup> lawe' da quebe guca da gunná bea Moisés gun na bénneache li lazre'. Na'a nápaxdu tu xel-la' dxebeza lazre' da cháwedxá, na' ne chee' na dxebigadxu lau Dios.

<sup>20</sup> Gate Dios bené' Jesús bxruze, bzetaj cuine'. <sup>21</sup> Quebe bzetaj cuine' gate bzue' xezícadxa bxruze ca'. Gate bené' Jesús bxruze bzetaj cuine' ca da naxúaj na lu xiche lá'azxa, dxenná na:

Xránadxu Dios bzetaj cuine', ne quebe guché'g xrtizre'.  
Gunné': "Lue' nacu' bxruze chadía chacanna  
ca da guca Melquisedec."

<sup>22</sup> Chee' le' na' Jesús dxun chúchue' tu xel-la' wezría da nácadxa chawe' ca da nedxu. <sup>23</sup> Xezícadxa bxruze ca', benne' gulezrá' nédxula ben na ba xen gulaque' benne' zan lawe' da gulate tu tue', na' quebe guca xeledie'. <sup>24</sup> Jesús naque' tu bxruze chadía chacanna lawe' da quebe gatie'. <sup>25</sup> Chee' le' na' dxezéquene' guselé' chadía chacanna benne' ca' xelegibe' lau

Dios ne chee Le', lawe' da naca ban Le' chadía chacanna chee gudée' dizra' chee benne' ca' lau Dios.

<sup>26</sup> Jesús naque' bxruze blau, bxruze na' dxechínedxu. Naque' lá'azxa, ne quebe bi da calela bene', ne quebe nabague' dul-la. Quebe naque' tuze ca zaj naca benne' dul-la, na' Dios nucá'ana szrendxe' Le' ca xúgute' da zaj zua xabáa. <sup>27</sup> Quebe naque' ca xezícadxa bxruze ca', benne' ca' ben na ba xen belutié' béadu ca' tu zra tu zra, béadu ca' buluzúé' nedxu ne chee xtúl-laqueze', na' ca gudé na' buluzúé' béadu xula ca' ne chee xtul-la bénneache. Jesús tu lásaze bzua cuine' ne chee dul-la zaj nabaga xúgute' bénneache. <sup>28</sup> Da bdxixruj bea Moisés dxuzúa na bxruze blau ca' zaj naque' benne' quebe zaj naque' li lazre'. Gate Dios bzetaj cuine' ca gudé bla' da nadxixruj bea na', bzue' tu bxruze blau naque' Zrí'inequeze', Bénnea' ben Dios naque' tu bxruze blau li lazre' chadía chacanna.

## 8

### *Jesús naque' bxruze blau cheedxu*

<sup>1</sup> Da naca blaudxa chee da caní dxennantu' naca na da nigá: Zua tu bxruze blau cheedxu caní, Bénnea' dxe'e chala'a xabela chee lataj blau chee Dios xabáa, <sup>2</sup> ne naque' bxruze blau dxune' zrin lu lataj lá'azxa li, da ben Xránadxu, quegá bénneache. <sup>3</sup> Xúgute' bxruze blau nuzúa Dios le' chee xelegú'e guna' lau Dios, ne xelútié' béadu ca' lau Dios. Chee le' na' dxun na ba xen bi guzúa Cristo lau Dios. <sup>4</sup> La zua Cristo xezr la xu nigá, quebe gaque' bxruze lawe' da ne zaj zra' bxruze ca' dxelegú'e guna' ca nadxixruj bea da bde Moisés. <sup>5</sup> Zrin dxelún bxruze caní naca na ca tu da dxulé'eze na, ne ca tu zrúaze chee da na' zua xabáa. NezdXu naca na tu da dxulé'eze lawe' da gunná Dios, guzre' Moisés gate ba zue' gune' lataj lá'azxa: "Bxue xanne' gunu' xúgute na cáteze naca da ble'eda' lue' lu xi'a na'." <sup>6</sup> Na' a bxruze blau cheedxu nigá dxune' tu zrin zácadxa lawe' da naque' wedé dizra' chee tu xel-la' wezría cháwedxa, da nun Dios ne chee da ca' guchebe lazre' da zaj naca na cháwedxa.

<sup>7</sup> La guca li lazre' xel-la' wezría da bene' nedxu, quebe ben na ba xen gune' xel-la' wezría gudxupe' na'. <sup>8</sup> Gate Dios gudil-le' benne' ca' zaj naque' bi che, gunné':

Dxenná Xránale: Wazrín zra

gate guna' tu xel-la' wezría cube

nen benne' Israel ca', ne benne' Judá ca'.

<sup>9</sup> Quebe gaca na ca guca xel-la' wezría da bena' nen xra xrtaule ca' gate beca'a ne'e,

ne bebéaja' benne' ca' lu xezr la xu Egipto.

Caní guna' lawe' da quebe buluzúé' dizra'

xel-la' wezría da nuna',

na' chee le' na' guleaj xichja' benne' ca'.

Da ni dxenná Xránale.

<sup>10</sup> Xel-la' wezría guna' nen benne' Israel ca'

ca te chee lu zra caní gaca na caní, dxenná Xránale:

Guzúa' da gudxixruj be'a lu xichaj lázrdau benne' ca',

ne guzúaja' na lu lázrdawe'.

Nadxa gaca' neda' Dios chee benne' ca',

na' le' xelaque' bi chia' ca'.

<sup>11</sup> Quebe gun na ba xen xulusede ljwezre',

ne quegá nu benne' xe'e bi biche': Benbea Xránadxu.

Xúgute' xelúnbe'e neda',

benne' cá'aze, ne benne' blau.

<sup>12</sup> Gunite lawa' chee benne' ca'

ca naca da calela da zaj nune',

ne québedxa cheajsá lazra' chee dul-la da zaj nune'.

<sup>13</sup> Gate dxuchalaj Dios chee tu xel-la' wezría cube, naca na lawe' da ba gunné' chee da nedxu naca na da gula, na' da ba dxaca na da gula, ne da gulasá la xenítete' na.

## 9

### *Lataj lá'azxa da zua lu xezr la xu, ne da zua xabáa*

<sup>1</sup> Gate ne zua xel-la' wezría nedxu, zaj de' da nadxixruj bea ca dxal-la' xelún bxruze ca' tu lu xudau' da zua xezr la xu nigá. <sup>2</sup> Xudau' nedxu caní guca na tu xu'u xide zren. Lu lataj nedxu chee xudau' na' da nazí le na Lataj Lá'azxa zaj zua da dxusa'ní', ne tu ta'a naga zria xeta xtila lá'azxa. <sup>3</sup> Cuzre naga ze ladxe' gudxupe' zua xetu' lataj da nazí le na Lataj Lá'azxa Blau. <sup>4</sup> Lu lataj nigá zaj zua tu tá'adau' naga xezxe xala, ne tu xi'ina chee xel-la' wezría da nun Dios, da nacu na oro du ca nácaqueze na. Lu'ule xi'ina na' xu'u tu zruágadau' xu'u na xeta

maná. Cá'anqueze lu'ule na xu'u xágadau' da bexru Aarón da na' bezría na, ne zaj xu'u na xiaj ca' naga zaj naxúaj dizra' chee xel-la' wezría. <sup>5</sup>Lawe' xi'ina nigá zaj zua gubáz chee xabáa ca' zaj naca na oro, da dxulul'é na zua Dios na', na' zaj nugacu xrile na naga dxuluzríe' dxen ne chee dul-la zaj nabaga bénneache. Québedxa séquentu' guchálajntu' ca naca chee da caní na'a.

<sup>6</sup>Gate ba nagá'ana chawe' da caní, na' bxruze ca' dxelú'ueze' lu lataj nedxu chee lataj lá'azxa chee xelune' zrin chee xel-la' bxruze chee'. <sup>7</sup>Lu lataj gudxupe' dxu'u tuze bxruze blau tu lásaze tu tu iza, na' gate dxu'e na' dxun na ba xen gu'e dxen chee béadu ca' da guzríe' ne chee dul-la nabáaqueze', ne ne chee dul-la zaj nabaga bénneache ca'. <sup>8</sup>Be' Lá'azxa dxuzéajni'ine' dxi'u quebe naxalaj neza chee chú'udxu Lataj Lá'azxa Blau na' dxácate dxelune' zrin chee xel-la' bxruze chee' lu lataj nedxu chee lataj lá'azxa na'. <sup>9</sup>Xúgute da caní zaj naca na da dxulul'éze, da dxaca lu zra na'a zra, lawe' da guna' ca', ne dxen chee béadu ca' da dxuluzúa bxruze ca' lau Dios quebe gaca xelún na bénneache duté li lazre'. <sup>10</sup>Da caní zaj naca na chee da dxel'éaj dxelawe', ne chee da dxulucá'ana chawe' cuine', ne chee da nadxiruj bea ca naca chee belá' dxen chee bénneache, da ca' bzua Dios ca zrindxa zra guché'e da ca'.

<sup>11</sup>Na'a ba bla' Cristo, ne naca Le' bxruze blau chee da xrlátaje ca' da ba belelá'. Lataj Lá'azxa naga dxun Le' zrin ca bxruze blau naca na blaudxa, ne da li lázredxa. Quebe naca na tu da zaj nun bénneache, da zéaje na, quebe naca na chee xezr la xu nigá. <sup>12</sup>Cristo ba xaxú'e Lataj Lá'azxa Blau, quegá chee guzúe' dxen chee béadu ca', ne chee među ca', san chee guzúe' dxen cheequeze', na' guxú'e ga na' tu lásaze lawe' da ba bene' xel-la' weselá chadia chacanna cheedxu dxi'u. <sup>13</sup>Da li dxen chee bezre, ne chee béadu ca', ne de chee bézredu ca', bea ca' dxuluzezxe' lu ta'a chee Dios, da ca' dxuluzré'e xichaj benne' ca' zaj naque' sban, zaj napa na xel-la' waca xelibe na benne' ca' cúzreze, ne chee xulucá'ana chawe na le' lau Dios. <sup>14</sup>Che caní naca na, wazéqedxa dxen chee Cristo, Bénéne' bzua cuine' lau Dios ne chee Be' Lá'azxa duté xel-la' li lazre' chee', na' dxen chee' na' dxibe na xichaj lázrdaxu chee da bendxu da nua na xel-la' gute, chee séqedxu gundxu zrin chee Dios ban.

<sup>15</sup>Chee le na' naca Jesucristo wedé dizra' chee tu xel-la' wezría cube. Xel-la' gute chee Cristo dxun na zrin chee gaca gunite lau Dios cheedxu ca naca dul-la da bendxu gate ne zúadxu lu xel-la' wezría nedxu, na' na'a benne' ca' ba gunné Dios waca xelezí'e ca naca da ca' guchebe lazre' Dios, da zaj naca na chadia chacanna. <sup>16</sup>Gate tu benne' dxune' tu xiche da dxelá'a na da de chee', dxun na ba xen gul'édxu ba nate bénne' chee gundxu ca dxenná xiche na'. <sup>17</sup>Xiche na' quebe bi seque na dxácate ne naca ban benne' bene' na, san gate ba gute bénne', na' seque na. <sup>18</sup>Chee le na', xel-la' wezría nedxu na' guzúa chuchu na ne chee dxen da buluzríe' na. <sup>19</sup>Moisés blabe' xúgute da nadxiruj bea da zaj naxúaj na lu dizra' chee Dios lau xúgute bénneache, na' ca gudé na' guqué'e zrila' da nadxé na da xrna, ne tu zruze xaga hisopo, na' gusebise' na dxen chee među ca', ne dxen chee béadu ca', ne nisa, na' bzre'e na lawe' xiche naga naxúaj xtizra Dios, ne bzre'e na bénneache ca'. <sup>20</sup>Nadxa guzre' benne' ca': "Dxen nigá naca na da dxuzúa chuchu na xel-la' wezría da nun Dios nen le'e." <sup>21</sup>Cá'anqueze bzra Moisés dxen lu lataj lá'azxa, ne lu xúgute da dxuluchínene' lu zrin da dxelún bxruze ca'. <sup>22</sup>Ca naca da bdxiruj bea Dios, dxal-la' xulucá'ana chawe' xúgute da ca' nen dxen, na' che quebe nu gulalaj dxen, Dios quebe gunite lawe' chee bénneache ca naca dul-la da zaj nabague'.

### *Dxen chee Jesucristo dxegúa na dul-la*

<sup>23</sup>Caní ben na ba xen xulucá'ana chawe' da ca' zaj naca na da dxulul'éze na ca zaj naca da zaj zua xabáa, na' da ca' zaj zua xabáa dxun na ba xen xulucá'ana chawe' na nen tu da zácadxa. <sup>24</sup>Cristo quebe guxú'e lu lataj lá'azxa da zaj nun bénneache, da na' naca na tu da dxulul'éze ca naca lataj lá'azxa li da zua xabáa, san guxú'e xabáaqueze, naga zue' na'a lau Dios, dxudé'e dizra' cheedxu dxi'u. <sup>25</sup>Bxruze blau chee benne' judío ca' dxu'e lu lataj lá'azxa blau tu iza tu iza chee guzúe' ga na' dxen da quebe naca cheequeze'. Na'a Cristo quebe dxuzúa cuine' zane' lasa. <sup>26</sup>La ben na ba xen guzúa cuine' zane' lasa, cá'anqueze zane' lasa gatié' ca gudé bene' xezr la xu nigá. Na'a, gate ba bzrin zra dxaca li ca da guchebe lazre' Dios, Cristo ba blé'e tu lásaze, na' bzua cuine' chee cue' dul-la zaj nabaga bénneache. <sup>27</sup>Ca dxun na ba xen xelate xúgute bénneache tu lásaze, na' te na' Dios guchi'e da zaj nun tu tue', <sup>28</sup>cá'anqueze Cristo bzua cuine' chee gutié' tu lásaze chee gudúe' dul-la zaj nabaga' benne' zante. Te nigá xelé'e da gudxupe', quegádxu chee cue' dul-la, san chee xedajselé' xúgute benne' dxelebeze' Le'.

## 10

<sup>1</sup>Da nadxiruj bea da bde Moisés guca na ca tu zrúl-laze chee da chawe' ca' da dxal-la' xelelá', ne quegá naca na léqueze na. Chee le na' da ca' buluzúa bxruze ca' lau Dios ca



nadxixruj bea na', da ca' buluzúe' tu iza tu iza, quebe gulezeque na xelún na benne' ca' li lazre', benne' ca' gulebigue' lau Dios. <sup>2</sup> La guzeque' da nadxixruj bea na' gun na benne' ca' li lazre', québedxa nu guzúa da ca' lau Dios lawe' da la guladxé benne' ca' lu dul-la zaj nabague', québedxa zaj nabague' dul-la. <sup>3</sup> Na'a da ca' buluzúe' lau Dios tu iza tu iza bulusá na lazre' chee' dul-la da zaj nabague', <sup>4</sup> lawe' da quebe guzeque' dxen chee' bezre ca', ne dxen chee' béadu ca' cua na dul-la zaj nabaga bèneache.

<sup>5</sup> Chee' le' na', gate bla' Cristo lu xezr la xu nigá, guzre' Dios:

Quebe dxaca lazru' guna', ne béadu ca' nu gute le'ba' lau'.

Na'a ba benu' bel-la' dxen chia' nigá.

<sup>6</sup> Quebe dzezaca ba lazru' béadu ca' dxuluzexxe' lau',

ne béadu ca' dxelutie' lau' chee' cua na dul-la zaj nabague'.

<sup>7</sup> Nadxa gunnía': "Nigá za'a neda' chee' guna' ca da nnau' Lue', Dios,

ca naxúaj na chia' neda' lu xiche lá'axza."

<sup>8</sup> Nédxula gunné': "Quebe dxaca lazru', ne quebe dzezaca ba lazru' guna', ne béadu ca' nu gute le'ba' lau', ne béadu ca' dxuluzexxe' lau', ne béadu ca' dxelutie' lau' chee' cua na dul-la zaj nabaga bèneache." Caní gunné' lálaca zaj naca na da nadxixruj bea na xuluzúe' na lau Dios. <sup>9</sup> Ca gudé na' gunné': "Nigá za'a neda' chee' guna' ca da nnau' Lue', Dios." Da nigá zéaje na gudé' lu waláz chee' da ca' buluzúa bxruze ca' lau Dios, gate bzua cuine' lau Dios ne chee' dul-la zaj nabaga bèneache. <sup>10</sup> Dios ba bca'ana chawe' dxí'u lu dul-la nabáxadu lawe' da ben Cristo ca da gunná Dios gate bde cuine' lau Dios tu lásaze gate gutie' le'e xaga begúaj.

<sup>11</sup> Xúgute' bxruze judío dxelune' zrin lau Dios tu zra tu zra, ne zane' lasa dxuluzríe' lau Dios da ca'anqueze lálaca da ca' cabata' xezezeque na xelegúa na dul-la chee' bèneache.

<sup>12</sup> Jesucristo bzríe' lau Dios tuze da dxugúa na dul-la, na' gudé na' gudxé' chala' xabela chee' Dios. <sup>13</sup> Zue' na'a dxebeze' zra gate guzúa Dios benne' ca' dxeledábage' chee' zran n'e. <sup>14</sup> Caní dxune' lawe' da bca'ana chawe' chadía chacanna benne' ca' zaj naque' bi chee' Dios. Caní bene' gate bzua cuine' lau Dios tu lásaze. <sup>15</sup> Caníqueze dxenná Be' Lá'axza lawe' da gunné' nédxula:

<sup>16</sup> Caní naca xel-la' wezría guna' nen benne' Israel ca'

ca te chee' lu zra caní, dxenná Xránale:

Guzúa' da nadxixruj bea na' lu xichaj lázrdau benne' ca',

ne guzúaja' na lu lázrdawe'.

<sup>17</sup> Ca gudé na' dxenné':

Cabátadxá cheajsá lazra' chee' dul-la da zaj nabague',

ne chee' da calela ca' da zaj nuné'.

<sup>18</sup> Ca'an naca, gate Dios ba bnite lawe' chee' bèneache ca naca dul-la da zaj nabague', québedxa dxun na ba xen bi xuluzúe' lau Dios chee' cua na dul-la ca'.

### *Dxal-la' bígadxu lau Dios*

<sup>19</sup> Chee' le' na', benne' bícha'dau', waca chú'udxu lu lataj lá'axza blau duté lázrdaudxu ne chee' dxen chee' Jesucristo da blalje'. <sup>20</sup> Dxezrindxu lau Dios, dxededxu tu neza cube, da quebe naca na ca da xjále' bxruze ca' lu lataj lá'axza. Dxededxu neza da naca Crístoqueze, Bénéne' zúale' Dios xabáa. <sup>21</sup> Jesús naque' bxruze blau cheedxu, ne zaj xu'u lu ne'e bèneache chee' Dios. <sup>22</sup> Chee' le' na' dxal-la' bígadxu lau Dios duté lázrdaudxu ne duté xel-la' dxeajlí lazre' li, lawe' da bca'ana chawe' Le' lázrdaudxu chee' québedxa sua da stebe lu xichaj lázrdaudxu ca naca chee' dul-la, ne naca cheedxu cáteze ba gudibe' bel-la' dxen cheedxu nen da naca ca tu nisa chawe'. <sup>23</sup> Dxal-la' sua cháxadxu ca naca da dxebeza lázredxu chee' da dxéajledxu, ne quebe guchadxu ca dxundxu, lawe' da gun Dios ca da guchebe lazre' guné' cheedxu. <sup>24</sup> Dxal-la' quilaj lázredxu ca gundxu gácale' ljwézredxu tudxu xetudxu chee' zri'i ljwézredxu, ne gundxu da xrlátaje. <sup>25</sup> Quebe dxal-la' gusandxu xezrágadxu lau Dios ca dxelún bal-la benne'. Dxal-la' gutipa lazre' ljwézredxu tudxu xetudxu, na' gúndxadxu caní na'a lawe' da dxelé'edxu ba za bagu zra xelá' Xránadxu.

<sup>26</sup> Che núnbeadxu ca naca xel-la' li chee' Dios, ne chéajdxadxu gundxu dul-la, québedxa bi de da cua na dul-la bágadxu. <sup>27</sup> Lu xel-la' dxezebebe súadxu da naca chee' zra guchi'a Dios, ne chee' xi' da guzría xi na benne' ca' dxeledábage' chee' Dios. <sup>28</sup> Gate nu benne' bzue' chala'ala da gunná bea Mnoisés, ne gulezrá' chupa u chunna benne' belexechebe' chee' da ben bènea', na' belutie' bènea', ne quebe belexache lazre' le'. <sup>29</sup> Tu da stebe zrendxa dxal-la' xezezi' benne' ca' dxuluzúe' chala'ala Zri'ine Dios, ne dxulucá'ana ditaje' dxen chee', da blalje', dxen na' dxuzúa chuchu na xel-la' wezría chee' Dios, ne dxucá'ana chawe na benne' ca', na' dxelenné' schanni' chee' Be' Lá'axza chee' Dios, Bénéne' nazri'ine' le'. <sup>30</sup> Ba núnbeadxu Xránadxu, Bénéne' gunnáqueze': "Neda' xebéaj lazra' bèneache. Neda' gunéruja' lazruj chee' benne' ca'." Cá'anqueze gunné': "Xránale guchi'e chee' bèneache chee'." <sup>31</sup> Da dxal-la' xezezebe bèneache naca da stebe da gun Dios benne' ca'. <sup>32</sup> Le gusá lázrele le'e iza

da ba guledé, gate za guzítele xel-la' naxaní' chee Dios, na' duté xel-la' zren lazre' bhaga laule xel-la' zi' da gudele. <sup>33</sup> Bál-lale le'e bulucháchalene', ne belú'e le'e lálwela bénneache, na' xebál-lale le'e guzáca'le gate guná'ale benne' ca' guledé'e xel-la' zi' caní. <sup>34</sup> Bexache lázrele benne' gulezrá' lizre xia, ne duté xel-la' dxebé bhaga laule da beluné' gate gulequé'e ca da nápane, lawe' da nézele nápane xabáa da zácadxa na, ne da naca na da chadía chacanna. <sup>35</sup> Quebe gusanle ca da dxuxrén lázrele, lawe' da nusá xel-la' dxuxrén lazre' chee tu da zren da sí'le. <sup>36</sup> Le'e dxal-la' gácale zren lazre' chee gunle ca da nna Dios, na' síle ca da guchebe lazre' Dios gunné' chee. <sup>37</sup> Naca na ca dxenná xiche lá'azxa:

Xátédauze de,

na' xelá' Bénnea' dxal-la' xelá', ne quebe chene'.

<sup>38</sup> Benne' naque' xlátaje lawa' neda',

gata' chee' xel-la' nabán li lazre' lawe' da dxéajle'e chia',

na' che cueaj xíchaje' neda' quebe xezaca ba lazra' nen bénnea'.

<sup>39</sup> Na'a dxi'u quebe nácadxu tuze nen benne' ca' dxelebéaj xíchaje' Dios, ne xelebía xi'e. Nácadxu tuze nen benne' dxeléajle'e chee Dios, na' xelalá bénne' du zaj xu'e.

## 11

### *Xel-la' dxeajli lazre'*

<sup>1</sup> Che nápadxu xel-la' dxeajli lazre' dxuxrén lazrdxu sidxu da dxebézadxu, ne nézquezdXu naca da li da quebe dxelé'edxu. <sup>2</sup> Xra xrtáudxu ca' belexegá'ané' xrlátaje lau Dios lawe' da guléajle'e chee'.

<sup>3</sup> Lu xel-la' dxeajli lazre' cheedxu nezdXu ben Dios xezr la xu nigá, bchínene' dizra' chee', na' ca naca da dxelé'edxu na'a ben Dios le' na nen da quebe nalá' gate nate.

<sup>4</sup> Abel, lu xel-la' dxeajli lazre' chee', bzue' lau Dios tu guna' da zácadxa na ca da bzua Caín, na' chee le' na' Dios gunné' naca xlátaje Abel, ne guzi'e guna' chee'. Ca'an naca, lálcala ba gute Abel, ne dxusédene' dxi'u ne chee da bène' lawe' da gudape' xel-la' dxeajli lazre'.

<sup>5</sup> Enoc, lu xel-la' dxeajli lazre' chee', Dios beche'e le'. Quebe gutié', na' québedxa nu ble'e le' lawe' da beché Dios le'. Naxúaj na lu xiche lá'azxa da dxenná na, gate quebe ne xeché Dios le', ben Enoc ca da bezaca ba lazre' Dios. <sup>6</sup> Quebe gaca nu gun da xezaca ba lazre' Dios che quebe dxeajli lazre' le'. Bénnea' dxebigue' lau Dios, dxun na ba xen chéajle'e zua Dios, ne xunézruje' chee benne' ca' dxelexilaje' le'.

<sup>7</sup> Noé, lu xel-la' dxeajli lazre' chee', gate Dios guzre' le' nédxula ca da dxal-la' gaca, bzue' dizra' chee' Dios, ne bène' tu da zren da dxedá lawe' nísadau' chee xelalá xrtie' ca'. Guxeajli lazre' Noé Dios, san gulebía xi' bénneache zaj zre'e xezr la xu na', lawe' da quebe guleajli lazre' Dios. Dios bca'ané' Noé xrlátaje lawe' da guxeajli lazre' le'.

<sup>8</sup> Abraham, lu xel-la' dxeajli lazre' chee', gate Dios gunné' le', bzue' dizra', ne guzé'e zéajle' tu lu xezr la xu da guchebe lazre' Dios gunézruje' chee'. Bdxuajé' lázrie', ne quebe nézene' naga zéajle'. <sup>9</sup> Lawe' da guxeajli lazre' Dios, guzúa Abraham lu xezr la xu na' da guchebe lazre' Dios gunézruje' chee', naga naca xezr la xu chee benne' zitu' ca'. Guzúe' tu lu xu'u ladxe', ne cá'anqueze ben Isaac, ne Jacob, benne' ca', cá'anqueze Dios guchebe lazre' xelezi'e da na' gunezruj Dios le'. <sup>10</sup> Caní ben Abraham lawe' da guleza lazre' chu'e lu xezre na' da quebe te chee na, da na' guleche Dios, ne da ben Léqueze'.

<sup>11</sup> Cá'anqueze Sara, lálcala ba nácale'e benne' gula, ne quebe nu bi chee' dxalaj, san xel-la' dxeajli lazre' chee' guque' xrna bidau'. Guzúa tu bi biu chee' lawe' da guxeajli lazre' Dios guné' ca da guchebe lazre'. <sup>12</sup> Caní guca, Abraham, lálcala ba gúxrule'e, guxánle'e zrí'ine zre sué' ca naxán xuzre' da zaj dxe' dxu'a tu yegu zren, da quebe nazeque' gulábadxu.

<sup>13</sup> Xúgute benne' caní gulatíe', ne quebe ne xelezi'e da ca' nachebe lazre' Dios, san lawe' da guleajli lazre' Dios, belelé'eng' na zítu'la, na' belexezaca ba lázrele'ng' na. Caní bululé'eng' gulaque' ca benne' zitu', benne' guledeze lu xezr la xu nigá. <sup>14</sup> Benne' dxuluchálaje' caní dxululé'eng' dxeledé' dxelexilaje' tu lazrie'. <sup>15</sup> La buluwía lazre' ca naca xezr la xu naga gúsá'aque', na' waca xelexezrine' na'. <sup>16</sup> Gulaca lazre' tu lazrie' da naca na cháwe'dxa, da na' naca na lazrie' da zua xabáa. Chee le' na' Dios quebe dxexedu'e'eng' gate dxelenná benne' ca' naque' Dios chee', na' nucueze' tu xezre naga xelezúa benne' ca'.

<sup>17</sup> Gate guca lazre' Dios nézene' ca naca xel-la' dxeajli lazre' chee' Abraham, na' lu xel-la' dxeajli lazre' chee' guché'e Isaac chee' gutié'-be' lau Dios. Ba zue' gutié' bi tu licha' chee' lálcala ba nachebe lazre' Dios, gunné': <sup>18</sup> "Ne chee Isaac wazrále'e zrí'ine zre su'." <sup>19</sup> Abraham bxren lazre' Dios wazéque'ng' gusebané' benne' gate, na' waca nnadXu bezí' lu ne'e zrí'ine' Isaac ládujla benne' gate.

<sup>20</sup> Isaac, lu xel-la' dxeajli lazre' chee', guchebe lazre' xelezi' zrí'ine' Jacob, ne Esaú da xrlátaje ca'. <sup>21</sup> Jacob, lu xel-la' dxeajli lazre' chee', gate zua gatié', guchebe lazre' xelezi' tu

tu zri'ine José da xrlátaje ca', ne be lá'ane' Dios, nuchiche tipe' xágadu nuxre'. <sup>22</sup> José, lu xel-la' dxeajlí lazre' chee', gate ba zua gatie' gunné' welixedxúaj benne' Israel ca' lu xezr la xu Egipto, ne bdxixruj be'e ca dxal-la' xeluné' chee' zrita xu'e.

<sup>23</sup> Gate gulaj Moisés, xra xrne'e, lu xel-la' dxeleajlí lazre' chee' bulucache' lebe' lawe' chunna beu', lawe' da belelé'ene' naca bidu na' xrtanle'e, ne quebe belezrebe' benne' wenná bea, bènnea' bdxixruj be'e xelate bidu ca'. <sup>24</sup> Moisés, lu xel-la' dxeajlí lazre' chee', gate guque' benne' waca, quebe guca lazre' gaque' zri'ine nu'ula zri'ine benne' wenná bea chee' xezr la xu Egipto, <sup>25</sup> san guca lázredxe' té'e' xel-la' zi' nen bi ca' chee' Dios quézcala sue' tu chí'idau' lu da ba neza chee' da naca dul-la. <sup>26</sup> Gúquene' nácadxa chawe' gate belún lala bènneache chee' ca da guca chee' Cristo, quézcala gape' ca naca da gunni'a chee' xezr la xu Egipto, lawe' da dxenné'e da gunezruj Dios le'. <sup>27</sup> Moisés, lu xel-la' dxeajlí lazre' chee', bedxúaje' lu xezr la xu Egipto, ne quebe bezrebe' xel-la' dxezrá'a chee' benne' wenná bea, na' guzúa chúchué' ca tu benne' dxelé'eng' Dios, Bènnea' quebe gaca nu le'e.

<sup>28</sup> Moisés, lu xel-la' dxeajlí lazre' chee', bene' Laní Pascua gate na' bdxixruj be'e xuluzrá benne' Israel ca' dxen le'e xaga dxa xu'u chee' quebe gute gubáz chee' xabáa chee' xel-la' gute netú zri'ine benne' Israel ca', bi biu nedxu. <sup>29</sup> Benne' Israel ca', lu xel-la' dxeleajlí lazre' chee', beledé'e lu Nísadau' Xrna ca benne' dxeledé lu xu bizre, san gate gulú'u benne' Egipto ca' naga ba guledé benne' ca', na' bezraga nisa na', na' gulebé' chí'i benne' Egipto ca', na' gulatíe'.

<sup>30</sup> Benne' Israel ca', lu xel-la' dxeleajlí lazre' chee', guzré'e ze'e da naxechaj na xezre Jericó ca gudé guledé benne' Israel ca' bezúate xezre na' tu tu lasa du gazre zra. <sup>31</sup> Rahab, nu'ula dxezi' lu ne'e benne' zaj xu'e neza, lu xel-la' dxeajlí lazre' chee', quebe gutie' tu zren nen benne' Jericó ca', benne' quebe buluzúa dizra' chee' Dios, lawe' da gudapa le' ba lá'ana benne' Israel ca', benne' xeajlenná' lané' xezre na'.

<sup>32</sup> ¿Bízradxa nni'a? Québedxa bi lataj napa' guchálaja' ca ben Gedeón, ne ca ben Barac, ne ca ben Sansón, ne ca ben Jefe, ne ca ben David, ne ca ben Samuel, ne ca belún benne' ca' gulenné' waláz chee' Dios. <sup>33</sup> Benne' ca' lu xel-la' dxeleajlí lazre' chee' gulezi'e xezr la xu ca' chee' benne' xula, ne gulenná be'ene' cháwe'dau' benne' waláxr chee' ca', na' gulezi'e da guchebe lazre' Dios, lawe' da gúcaléne' le'.

Belelé' lu dxu'a bezre xixre' ca'.

<sup>34</sup> Buluxusulé' xi' da dxéneaca.

Belelé' lu xia nalá.

Benne' ca' zaj nate ni'a na' belexaque' dipa lazre'.

Gulaque' benne' wala lu wedil-la, ne gulaca lu ne'e

da guta' chee' benne' ca' guledábage' le'.

<sup>35</sup> Nu'ula ca' belezi' lu ne'e benne' gate chee' ca', benne' belexebáne'.

Xebal-le' gulátie' gate buludé'e le' ba xa',

lawe' da quebe belú'e lataj nu gusán le',

chee' xelezrué'ene' xel-la' dxexebán

chee' xelezi'e xetú xel-la' nabán da naca na da li.

<sup>36</sup> Xebal-le' belún le' chee',

na' xebal-le' belú'e le',

na' xebal-le' buluchéaje' le' du xia ne gulegu'e le' lizre xia.

<sup>37</sup> Belutie' xebal-le' nen xiaj,

na' xebal-le' gulecheze' le' nen xia.

Xebal-le' buludé'e le' lu da stebe ca',

na' xebal-le' belutie' nen xia nalá.

Xebal-le' guledé'e nila na'la,

zaj nacue' zra zrila' ne zra béadu ca'.

Baxache' gulaque', na' guledé'e lu da zi' da xa',

na' buluzalje' le'.

<sup>38</sup> Bènneache zaj zra' lu xezr la xu nigá quebe zaj naca chee' xelezi'e ba neza chee' benne' caní. Tu guledázqueze' le'e xixre', ne lu xi'a ca', ne lu bluj ca', ne lu bluj xu ca'. <sup>39</sup> Xúgute benne' ca' bca'ana chawe' Dios le' lawe' da guleajlí lazre' Le', san quebe ne xelezi'e ca naca da guchebe lazre' Dios, <sup>40</sup> lawe' da nucueza Dios tu da nácadxa chawe' cheedxu dxi'u, chee' xellexaca benne' ca' li lazre' tu zren nen dxi'u.

## 12

### *Dxal-la' nna'dxu Jesús*

<sup>1</sup> Lawe' da zaj naxéxaj benne' zante dxi'u, benne' ca' ba bululé'ene' ca guléajle'e chee' Dios, dxal-la' guzúadxu chalá'ala xúgute da dxululale na dxi'u, ne dul-la da naxel-la na dxi'u, na' lu duté xel-la' zren lazre' cheedxu gundxu zrin chee' Dios, da naca na ca dxezá' chéudxu

chee zrué'eledxu da dxelé'edxu tu chi na'. <sup>2</sup> Dxal-la' nna'dxu Jesús, Bénnea' dxunge' nápadxu xel-la' dxeajli lazre', ne dxunge' li lazre' xel-la' dxeajli lazre' na'. Jesús gudé' xel-la' zi' le'e xaga begúaj, ne quebe bedué'engé' lawe' da guné'e xel-la' dxebe' na' da dxebeza na Le', na' gudxé'e chala'a xabéla chee lataj blau chee Dios.

<sup>3</sup> Le nna' xanne' ca da ben Jesús, gudé'le'e xel-la' zi' da bulusaca benne' dul-la ca' Le'. Chee le' na' quebe chajxré'quele gunle zrin chee', ne quebe gute lázrele. <sup>4</sup> Ba gudíl-lalele dul-la, na' quebe ne gátele lu wedil-la na'. <sup>5</sup> Quebe gal-la lázrele le'e ca dxun Dios, dxuzéajni'ingé' le'e ca zri'inequeze', gate dxenné':

Zri'ina', quebe guzú' chala'ala da dxun Xranu' gate dxusízrenge' lue',  
ne quebe gate lazru' gate dxedil-le' lue'.

<sup>6</sup> Xránadxu dxusízrenge' bi ca' nazrí'ingé',

na' xúgute' bi dxezi' lu ne'e ca zri'inequeze' dxudé'-'be' xel-la' zi'.

<sup>7</sup> Le guchaga lau le'e xel-la' zi' da dxedele, lawe' da dxuxúe Dios le'e ca zri'inequeze'. ¿Zra bi quebe dxusízre xrabe' lebe'? <sup>8</sup> Che Dios quebe dxusízrenge' le'e ca dxusízrenge' xúgute' bi chee' ca', quebe nácale zri'inequeze Le'. Nácale ca bi lan ca'. <sup>9</sup> Gate ne nácadxu bidau', bulusízre xra xrnadxu dxi'u, na' gudápadxu le' ba lá'ana. Dxal-la' guzúadxadxu dizra' Xradxu zue' xabáa, na' gaca bandxu. <sup>10</sup> Xra xrnadxu bulusízrenge' dxi'u tu chí'idauze ca da gulé'quené' chawe', san Dios dxusízrenge' dxi'u chee' gaca tu da ba neza cheedxu da naca na li lazre', chee' gácadxu lá'azxa ca naca lá'azxa Lé'queze'. <sup>11</sup> Da li quebe dxedánnedxu da dxusízre xradxu dxi'u, san dxé'quedxu zi', na' dxedé' na', che dxé'ajni'idxu ca da dxusízrenge' dxi'u, na' gundxu da xrlátaje ca', ne cueza zri' lázredxu lau Dios.

#### *Quebe dxal-la' guzúadxu chala'ala da dxenná Dios*

<sup>12</sup> Chee le' na' le guzazraj na'le, ne zribele da ba dxelate ni'a na', <sup>13</sup> ne le sa' lu neza da zaj naca na li, chee' quebe chegu ni'ale da quebe zaj zua chacha, ne chee' xelaxaca chacha na.

<sup>14</sup> Le gun ba xuzre suale lu xel-la' dxebeza zri lazre' nen xúgute' bénneache, ne le gaca li lazre' lau Dios. Che quebe gunle caní, quebe gaca lé'elele Xránadxu. <sup>15</sup> Le guxúe xanne' chee' quebe gusanle da chawe' ca' dxunna Dios le'e, ne chee' quebe gaca netule le'e ca tu xixre' sla' da dxulala na, ne dxuxrinnaj na da xezícala. <sup>16</sup> Le guxúe xanne' chee' quebe gunle da sban, ne quebe guzúale chala'ala ca da dxunna Dios, ca ben Esaú, bénnea' bsané' xúgute' da gunezruj xre' le' chee' guzi'e tu cueze xel-la' wagu. <sup>17</sup> Ba nézele da da guca gudé' na', gate guca lazre' Esaú na' si'e da chawe' da naba xre' lau Dios, na' xre' bzue' le' chala'ala, ne lácala gudxézrele'e, quebe guca xuché'e ca da ba bene'.

<sup>18</sup> Quebe dxaca chee' ca da guca chee' benne' Israel ca', gulebigue' naga zua tu xi'a, da na' wazeque' nu guchiche, ne naga dxala na xi', naga zua da chul-la, ne dxe' zren, ne dxaca be' bduunu'. <sup>19</sup> Belenne' gudxezre luzu da dxulucuezre', ne chí'i Dios bchájlajlene' le'. Benne' ca' belenne' chí'i Dios na' gulata' xúene' québedxa guchálajlene' le'. <sup>20</sup> Ca'an guca lawe' da quebe gulezé'quené' xuluchaga lawe' ca naca da bdxixruj be'e Dios, gunné': "Che tu béadauze gulé'ajba' lu xi'a na', dxal-la' xelútie'-ba' nen xiaj u nen tu xia nalá xéche'ze." <sup>21</sup> Da na' belelé'engé' bchébele'e na le', na' Moisés gunné': "Dxezrízetea' xel-la' dxezrebe."

<sup>22</sup> Na'a le'e ba nabícale naga zua xi'a lá'azxa da nazí le na Sión, ne lu xezre chee' Dios ban, da naca na Jerusalén da zua xabáa, ne naga zaj zra' gázxue gázxue gubáz chee' xabáa, <sup>23</sup> ne naga zaj nazraga benne' ca' gulaca bi chee' Dios nédxute, benne' ca' ba zaj naxúaj le' xabáa, ne lau Dios, Bénnea' guchi'e chee' xúgute' bénneache, ne naga zaj zra' be' gulácaqueze benne' ca' ba nun Dios le' li lazre', <sup>24</sup> ne lau Jesús, Benne' wedé dizra' chee' xel-la' wezria cube, ne naga bzre'e dxen da dxuchalaj na da cháwedxa ca da bchalaj dxen chee' Abel.

<sup>25</sup> Chee le' na', le guxúe xanne' cuínale chee' quebe guzúale chala'ala Bénnea' dxuchálajlene' dxi'u. Quebe belegache benne' ca' buluzúe' chala'ala Dios gate na' bchájlajlene' le' lu xezr la xu nigá, ne quebe gáchedxu dxi'u che guzúadxu chala'ala Bénnea' dxuchálajlene' dxi'u, zue' xabáa. <sup>26</sup> Lu zra na' gate gunná Dios, na' guzrú' xezr la xu nigá. Na'a dxenné': "Xetú lásaze guniba' quegaze xezr la xu nigá, san cá'anqueze xabáa." <sup>27</sup> Gate gunné': "Xetú lásaze", zéaje na xecá'a Dios ca naca da dxeledá, da ca' bene', na' xegá'ana da quebe seque' nu gutá. <sup>28</sup> Dxal-la' xedxu Dios: Xcalenu' lawe' da gunné' dxi'u tu lataj naga dxenná bea Le' da quebe seque' nu gutá. Dxal-la' güe lá'anadxu Dios tu lázredxu ne duté xel-la' ba lá'ana, ca da dxezaca ba lazre', <sup>29</sup> lawe' da naca Dios cheedxu ca tu xi' da guzria xi na da sban.

## 13

#### *Da dxezaca ba lazre' Dios*

<sup>1</sup> Quebe gusanle ca nazrí'i ljwézrele tule xetule ca bíchequezele. <sup>2</sup> Le gusá lázrele dxal-la' si' lu na'le benne' zá'aque' lízrele, lawe' da gate belún caní bal-la benne', gulezi' lu ne'e gubáz chee' xabáa ca', ne quebe guleque be'ene'.

<sup>3</sup> Le gusá lázrele gácalele benne' zaj xu'e lizre xia, gun cuínale ca benne' xú'uqueze lizre xia nen benne' ca'. Le gusá lázrele gácalele benne' ca' dxeledéé' xel-la' zi', gun cuínale ca benne' dxeledéqueze' xel-la' zi'.

<sup>4</sup> Xúgutele dxal-la' gápale ba lá'ana xel-la' wechaga na', ne gunle da xlátaje lu xel-la' wechaga na' chee, lawe' da guchi'a Dios chee benne' ca' dxuluzúe' chalá'ala xel-la' wechaga na' chee, ne chee benne' ca' dxelune' da sban.

<sup>5</sup> Quebe sa lázrele xel-la' gunní'a. Le xezaca ba lázrele ca da nápa lewe' da ba gunná Dios: "Cabata' gusana' lue', ne quebe cueaj xíchajqueza' lue'." <sup>6</sup> Caní naca, du lázredxu waca nnadxu:

Xrana' Dios dxácalene' neda'.

Quebe zreba' bi da gusaca bénneache neda'.

<sup>7</sup> Le gusá lázrele gácalele benne' ca' dxuluxúe' le'e, ne dxuluchálajlene' le'e dizra' chee Dios. Le na' xque ca da dxelúne', ne le chéajle chee Dios ca dxelún benne' ca'.

<sup>8</sup> Túzqueze ca naca Jesucristo neaje, ne na'a zra, ne chadía chacanna. <sup>9</sup> Quebe sile ca da dxuluchalaj benne' dxulusédene' da quebe naca na ca da naxúaj na lu xiche lá'azxa chee Dios. Cháwedxa naca guzúa chuchu lázrdaudxu lu xel-la' zri'i lazre' chee Dios, ne quebe chéajledxu da dxeledixruij bea benne' ca naca da dxal-la' xi'aj gágudxu, lawe' da benne' ca' zjácálene' da ca' cabata' ne xezezi' ba neza ne chee da ca'.

<sup>10</sup> Bxruze judío ca' gulawe' béadu ca' belutié' lataj lá'azxa. Quebe zaj naca chee' xelawe' guna' da dxugú'udxu dxi'u chee Dios. <sup>11</sup> Bxruze blau judío bzrie' dxen chee béadu ca' lu lataj lá'azxa blau ca tu guna' da dxegúa na dul-la. Buluzexxe' da nagá'ana chee béadu ca' cuzrela xezre. <sup>12</sup> Cá'anqueze gute Jesús cuzrela xezre na' chee bca'ana chawe' bénneache ne chee dxen cheéqueze'. <sup>13</sup> Le dxuaj, gundxu tu zren Cristo, lácala xuluzúa bénneache dxi'u chalá'ala ca belune' chee Le'. <sup>14</sup> Lu xezr la xu nigá quebe de cheedxu tu xezre da súatequeze. Dxebézadxu tu da za za'. <sup>15</sup> Chee le na' tu dxál-lazqueze güe lá'anadxu Dios nen dxú'aquezdxu ne chee Jesucristo, da naca na ca tu guna' da dxugú'udxu chee Dios. <sup>16</sup> Dxal-la' gusá lázredxu gundxu da xrlátaje, ne bi gunézrujdxu chee benne' ca' quebe bi zaj napé', lawe' da dxezaca ba lazre' Dios le na.

<sup>17</sup> Le guzúa dizra' chee benne' ca' dxuluxúe' le'e, ne le gun ca da dxelenné'. Benne' caní dxuluxúe' bénne'du xu'ule, ne xuluxudéé' lau Dios ca da zaj nune'. Che gunle caní, na' benne' caní welune' zrin chee' du lazre', ne quebe xezezi' xache', lawe' da che quebe gunle caní, quebe bi da ba neza gaca na chee.

<sup>18</sup> Le naba lau Dios gaca chawe' cheentu'. Quebe bi zua lu lázrdauntu' da dxagu na zria netu' lawe' da dxun zi' lázrentu' guntu' da xrlátaje ca naca xúguté' da dxuntu'. <sup>19</sup> Dxenaba' le'e nába le lau Dios gunne' neda' lataj xídazega' súaleña' le'e naga zúale.

<sup>20</sup> Dxenaba' lau Dios, Bénnea' dxunne' dxi'u xel-la' dxebeza zri lazre', ne bsebané' Xránadxu Jesucristo ládujla benne' gate. Léqueze' naque' Benne' Blau Dxuxúe' Dxi'u, nácadxu zri'la chee', na' caní naque' lawe' da blalje' dxen chee' da bzua chuchu na xel-la' wezrí' chadí' chacanna da bene'. <sup>21</sup> Dxenaba' Dios guné' le'e li lazre' chee séquele gunle da xrlátaje ca da dxaca lazre' Le', ne guné' cheentu' ca da dxaca lazre' ne chee Jesucristo. ¡Gaca ba Cristo chadí' chacanna! ¡Ca'an gaca na!

<sup>22</sup> Le'e, benne' bícha'dau', dxata' xueda' le'e gácale zren lazre' ca naca dizra' caní, da dxulusizre na le'e, na' láttega da du nigá dxuzú'aja' chee. <sup>23</sup> Dxuzenda' le'e ba bedxúaj bi bíchedxu Timoteo lizre xia, ne che xelá' zé'ebe', na' che'a-be' gate xedajnná'a le'e.

<sup>24</sup> Le gugapa diuzre xúguté' benne' ca' dxuluchálajlene' le'e dizra' chee Dios, ne le gugapa diuzre xúguté' benne' bíchedxu ca'. Benne' zaj zré'e xezr la xu Italia nigá dxulugape' le'e diuzre.

<sup>25</sup> Dxenaba' lau Dios guné' da chawe' chee xúgutele le'e. ¡Ca'an gaca na!

## DIZRA' CHEE DIOS DA BZUAJ SANTIAGO

*Santiago dxuzuajé' chee benne' ca' zaj nadxúajé' lazre'*

<sup>1</sup> Neda', Jacobo, naca' wen zrin chee Dios, ne chee Xránadxu Jesucristo. Dxugapa' le'e diuzre. Nácale chazrinnu cue' zri'ine zre sua Israel, ne nase dínnajle du gabi'i xezr la xu nigá.

*Xel-la' sina da za lu na' Dios*

<sup>2</sup> Benne' bícha'dau', dxal-la' béle'ele gate dxedele zane cue' da stebe ca', <sup>3</sup> lawe' da nézele gate dxedé xel-la' dxeajlí lazre' chee lu da stebe, da nigá dxundxa na le'e zren lazre'. <sup>4</sup> Le gun ba xuzre gaca li lazre' xel-la' zren lazre' chee chee gácale benne' xrlátaje ne li lazre', ne quebe bi xáxrjele.

<sup>5</sup> Che núlale le'e dxexáxrjele xel-la' sina, le naba na lau Dios, na' Le' gunne' na le'e, lawe' da dxunézrujle' Dios chee xúgute' bénneache, ne quebe dxexezúene' zi'. <sup>6</sup> Dخال-la' návale nen duté xel-la' dxeajlí lazre' chee, ne quebe gun chupa lázrele. Benne' dxun chupa lazre' naque' ca xeajxruza chee nísadau' da dxua be' nila na'la. <sup>7-8</sup> Benne' dxuné' caní, ne quebe zrize dxezúa lázrdawe', ne quebe tuz ca dxun xichaj lázrdawe' quebe dxal-la' guéque' bi da xunezruj Xránadxu chee'.

<sup>9</sup> Tu benne' bíchedxu naque' baxache' dxal-la' bene' lawe' da guzúa Dios le' ca tu benne' zaca. <sup>10</sup> Benne' nape' xel-la' gunní'a dxal-la' bene' gate gun Dios le' dxexruj lazre' lawe' da naca benne' gunní'a ca tu xiaj xixre' da quebe dxezi béateca na. <sup>11</sup> Gate dxalaj gubizra, ne dxenná'le' na, na' dxebizre xixre' na', na' dxexruj xiaj chee na, na' dxedé xel-la' xrtan chee na. Cá'anqueze gaca chee benne' gunní'a, xenitie' dxacate' na' dxezi' lu ne'e xel-la' gunní'a.

*Ca naca chee da stebe ca' da dxededxu*

<sup>12</sup> Ba neza naca na chee benne' dxuchaga lawe' da stebe ca' duté xel-la' zren lazre' chee', lawe' da che ba bedxúajé' chawe' lu da stebe da dxedé', na' si' lu ne'e da nachebe lazre' Dios gunézrujé' chee benne' ca' zaj nazri'ing' Le'. <sup>13</sup> Gate nu benne' zua da dxegú'u xel-la' na le' chee gune' da calela, quebe dxal-la' guéque' dxuzúa Dios da na' dxegú'u xel-la' na le', lawe' da quebe bi de da seque' xegú'u xel-la' na Dios chee gune' da calela, ne quebe bi guzúa Dios da xegú'u xel-la' na dxi'u chee gundxu da calela. <sup>14</sup> Tu benne' zua da dxegú'u xel-la' na le' chee gune' da calela gate xel-la' dxezá lazre' da calela chee' dxeca' na le', ne dxenná' be'e na le'. <sup>15</sup> Nadxa ca naca xel-la' dxezá lazre' da calela caní dxuluzán na dul-la, na' gate ba guzeque' zua dul-la na', na' dxute na bénnea'.

<sup>16</sup> Benne' bícha'dau' nazri'ite' lazra', quebe güele lataj nu si xe le'e. <sup>17</sup> Xúgute' da zaj naca xrlátaje ne da zaj naca li lazre' da dxezidxu zá'aca na xabáa lu na' Dios, Bénnea' bene' da ca' dxulusení na zran xabáa. Dios quegá dxuchá cuine', ne quebe dxuché' ca dxune'. <sup>18</sup> Ca naca da guca lazre' Dios, ba benne' dxi'u xel-la' nabán. Bchínene' dizra' li chee', chee gácadxu ca tu lina nedxu chee', chee da ba ben Le'.

*Xel-la' dxucá'ana szren Dios da naca na li lazre'*

<sup>19</sup> Chee le' na', benne' bícha'dau' nazri'ite' lazra', tu tule le'e dxal-la' gácale ban lazre' chee xénele, san dxal-la' cueza lázrele ca da nnele ne quebe la' zrátale. <sup>20</sup> Tu benne' xichaj zra'a quebe dxune' da dxezaca ba lazre' Dios. <sup>21</sup> Chee le' na', le gusán xúgute' da sban ne ca naca da calela da dxanle' na, na' duté xel-la' dxexruj lazre' chee le si' ca naca dizra' chee Dios da ba naxaza na lu xichaj lázrdau'e, lawe' da wazeque' dizra' na' guselá na bénne' du xu'ule.

<sup>22</sup> Le gun ca da dxulé'e dizra' na' le'e, ne quegá xénezele na. Benne' dxénzene' na dxezi xeze cuine'. <sup>23</sup> Bénnea' dxénzene' dizra' na', ne quebe dxune' ca dxenná na, naque' ca tu benne' dxenné' lawe' tu lu wana'. <sup>24</sup> Dxenné' ca naque', na' gate ze xeajze' na', na' dxal-la lazre' ca naque'. <sup>25</sup> Benne' dxenná' xánnie' ca da bdxixruj be'e Dios da naca na li lazre', ne da dxuselá na dxi'u, ne dxusédie' ca naca na, ne quegá dxénzene' na, quebe dxal-la lazrte' na. Che dxung' ca naca na, benne' nigá gaca tu da ba neza chee' lu xúgute' da dxung'.

<sup>26</sup> Che nu benne' dxéque' naque' benne' dxucá'ana szren Dios, ne quebe dxezéque' nna be'ene' luzre', benne' nigá dxezi xeze cuine', na' ca naca xel-la' dxucá'ana szren Dios chee' dácheze naca na. <sup>27</sup> Xel-la' dxucá'ana szren Dios da naca na du lazre', ne da naca na da dxezaca ba lazre' Xradxu Dios naca na caní: Gácalgdxu bidu ca' zaj nazebe, ne nu'ula ca' ba zaj nate benne' biu chee' gate zaj zue' lu da zi' da xa', ne quebe gundxu ca naca da sban chee xezr la xu nigá.

## 2

*Quebe guchale ca gunle chee tu tu benne'*

<sup>1</sup> Benne' bícha'dau', le'e dxéajle chee Xránadxu, Benne' xabáa Jesucristo, quebe dxal-la' guchale ca gunle chee tu benne'. <sup>2</sup> Che chu'u tu benne' naga nazrágale, ne nácué' zra lané' da zaca, ne xu'u da naca na oro lu xrube ne'e, na' cá'anqueze che chu'u tu benne' xache', ne nácué' zra lané' tuzruj, <sup>3</sup> na' che dxelé'ele cháwedau' béneea' nácué' zra lané' da zaca, ne dxéle le': "Gudxe'e nigala naga nácadxa na chawe", na' dxéle benne' xache' na': "Xeajsé na'la, u gudxe'e lu xu ná'teze." <sup>4</sup> Che dxunle caní, dxuchale ca dxunle chee tu tu benne', ne dxuchí'ale ca zaj naca bénmeache, quebe naca xrlátaje xichaj lázrdaule.

<sup>5</sup> Benne' bícha'dau' nazri'it'e lazra', le xen da nigá: Dios ba guqu'é' benne' ca' zaj naque' benne' xache' lu xezr la xu nigá chee xelaque' benne' gunní'a lu xel-la' dxeajlí lazre', ne chee xezezí' lu ne'e da nucueza Dios naga dxenná bea Le', da na' guchebe lazre' Le' gunézruje' chee benne' ca' zaj nazri'ing' Le'. <sup>6</sup> Le'e dxuzúale chalá'ala benne' xache' ca'. ¿Quegá benne' gunní'a ca' benne' dxuluchínene' le'e, ne dxelech'é' le'e lau benne' xulawe' ca'? <sup>7</sup> ¿Quegá benne' gunní'a ca' benne' dxelenné' schanni' chee da xrlátaje ca nazí' lale, dxennale nácale bi chee Cristo?

<sup>8</sup> Che da li dxunle ca dxenná da nadxixruj be'e Dios, da nácadxa blau ca da naxúaj na lu xiche lá'azxa, dxenná na: Bzri'i biche ljwezru' ca nazri'i cuinu', xrlátaje dxunle. <sup>9</sup> Na'a che dxuchale ca dxunle chee tu tu benne', dul-la dxunle, ne nabágate zria lawe' da quebe dxunle du ca bdxixruj be'e Dios. <sup>10</sup> Che tu benne' dxuné' ca zaj naca da nadxixruj be'e Dios, san che dxenéguené' ca naca tuze da nadxixruj be'ene', naca na cáteze nabague' zria ca zaj naca xúgute da nadxixruj be'e Dios. <sup>11</sup> Léqueze Dios gunné': "Quebe gunle dul-la da dxichaj na xrba chee xel-la' wechaga na", cá'anqueze gunné': "Quebe gútele benne'." Caní naca, che tu benne' quebe dxuné' dul-la da dxichaj na xrba chee xel-la' wechaga na', san che dxutie' benne', ba gunéguené' ca da nadxixruj be'e Dios. <sup>12</sup> Le'e dxal-la' guchálajle, ne gunle ca dxal-la' xelún benne' ca' guchi'a Dios ca da dxelune', benne' ca' zaj nalá lu na' da gunná bea Le'. <sup>13</sup> Benne' ca' quebe dxelexexache lazre' chee benne' xula, Dios guchi'e ca da dxelún benne' ca', ne quebe xexache lazre' chee benne' ca', san benne' ca' dxelexexache lazre' chee benne' xula quebe bi zria xelegage' gate Dios guchi'e ca da zaj nun benne' caní.

*Ca naca chee xel-la' dxeajlí lazre', ne chee zrin dxundxu*

<sup>14</sup> Le'e, benne' bícha'dau', ¿bizra culuén gapa na che tu benne' dxenné' dxeajlí lazre' Cristo, na' quebe bi dxuné' da dxácalen nu benne' dxexázejne'? ¿Wazeque' xel-la' dxeajlí lazre' na' guselá na le'? <sup>15</sup> Che zra' benne' bíchedxu u nu'ula zandxu, benne' quebe bi zaj de zra lané' u da xelawe', <sup>16</sup> na' che núlale le'e xeje benne' ca': "Bexiajzé cháwedau'. Nazré'enu', ne gágugu' szri'", san che quebe bi gunézruje ca da dxexázejne', ¿bizra culuén gapa da na' gunnále? <sup>17</sup> Caní naca na chee xel-la' dxeajlí lazre'. Che quebe bi zaj de da chawe' da xulul'é na che dxeajlí lazre' béneea' Cristo, xel-la' dxeajlí lazre' chee' naca na ca tu da gate.

<sup>18</sup> Wannalja nu benne': Lue' dxenná'u dxéajle'u chee Cristo, na' neda' dxuna' da chawe' ca'. Ble'e neda' dxéajle'u chee Cristo ne quebe dxunu' da chawe' ca', na' neda' gul'é'eda' lue' dxeajlí lazra' Cristo ne chee da chawe' ca' da dxuna'. <sup>19</sup> Dxéajle'u lue' zua tuze Dios. Nácaqueze na ca'. Cá'anqueze da xriwe' ca' dxeléajle na, ne dxelegrize na lu xel-la' dxelezebe. <sup>20</sup> Lue', benne' xala, ¿dxaca lazru' gul'é'eda' lue' naca xel-la' dxeajlí lazre' ca tu da gate che nu benne' dxeajlí lazre' Cristo na' quebe bi zaj de da chawe' da xelunna bea na? <sup>21</sup> ¿Ájazra guca chee xra xrtáudxu Abraham guque' benne' xrlátaje lau Dios? Guca na ne chee da beñe' gate guxúé' zri'ing' Isaac lu bdupa xiaj chee guzezxé'-be'. <sup>22</sup> ¿Quebe dxele'enu'? Ca da ben Abraham dxul'é na guxeajlí lazre' Dios, na' xel-la' dxeajlí lazre' chee' guca na du lazre' ne chee da beñe'. <sup>23</sup> Caní guca li ca da dxenná na lu xiche lá'azxa: Abraham guxéajle'e chee Dios, na' Dios blé'eng' le' benne' xrlátaje. Na' bchálaje' ca naca chee Abraham, gunné': "Bi zrágaqueza', Abraham."

<sup>24</sup> Na'a dxelé'ele Dios dxezi' lu ne'e tu benne' ne chee da chawe' da dxuné', ne quegá tuze lawe' da dxeajlí lazre' Le'. <sup>25</sup> Cá'anqueze guca chee Rahab, nu'ula wen da sban. Nu'ula nigá gulu'é lizre' benne' ca' gusel-la Josué, na' bsi'e benne' ca' neza xula chee belelé' lu na' benne' ca' dxjaque' wedil-la, na' ne chee da beñe', Dios guzú' lu ne'e nu'ula na'. <sup>26</sup> Ca naca chee belá' dxen cheedxu, che ba bedxúaj be' chee na, ba nate na, cá'anqueze naca chee xel-la' dxeajlí lazre' cheedxu. Che quebe bi zaj de da chawe' da xulul'é na dxeajlí lazrdxu Cristo, naca na ca tu da gate.

### 3

*Ca naca chee lúzredxu*

<sup>1</sup> Benne' bícha'dau', quebe dxal-la' gun cuínale benne' dxulusede dizra' chee Dios, lawe' da nézele ca gun Dios, guchi'a xánnedxe' chee da dxundxu dxi'u, dxuchálajdxu xrtizre'. <sup>2</sup> Xúgutedxu dxúnle'edxu da calela. Che nu benne' quebe bi da calela dxuné' ca naca da dxuchálaje', naque' benne' li lazre', na' wazéque' nna be'ene' ca nácaqueze belá' dxen chee'.

<sup>3</sup> Gate dxugú'udxu xia dxu'a bzrina' chee gunba' da dxaca lazrdxu, wazéquedxu nna be'edxu duteba'. <sup>4</sup> Le na' xque ca naca chee da ca' dxeledán lawe' nísadau'. Lácala zaj naca na da zri'a, na' be' da dxuzriga na le na dxácale'e na, benne' dxusé'e na dxuchíne'e tu xágadauze, na' dxenná be'eng' na chee cheaj na naga dxaca lazre' le'. <sup>5</sup> Cá'anqueze naca chee lúzredxu. Naca na tu da dauze da naca chee be'la' dxen cheedxu, na' da zrenté da dxenná na. Tu xí'dauze waca guzeze na tu xi'a zren. <sup>6</sup> Lúzredxu naca na ca tu xi'. Lúzredxu naca na ca tu xezr la xu sban da zua lu be'la' dxen cheedxu, ne dxuxrinnaj na du ca nácadxu. Zúale ca tu xi' lúzredxu da za' lataj ba xa', ne naca na ca tu da dxegú'u na xi' ca naca xúgute' da dxundxu. <sup>7</sup> Wazeque' nu benne' nna bé'eng' xúgute' be' xixre' ca', ne be' zaj zua xrila, ne be' snia ca', ne be' zaj zra' lu nísadau', ne ba gunná bé'eng'-ba'. <sup>8</sup> Quebe nu benne' dxezéqueng' nna bé'eng' dute' da dxenná luzre'. Naca na tu da cale'la da quebe dxue na lataj nu nna be'e le' na, ne naca na ca tu be' snia, be' dxúteba' bènneache ca'. <sup>9</sup> Nen lúzredxu níqueze dxue lá'anadxu Xradxu Dios, ne nen le' na dxennéquezdXu da cale'la chee bènneache, benne' ca' nun Dios na' lu'a le saca Léqueze'. <sup>10</sup> Lu dxú'adxu ná'queze dxeledxúaj da xrlátaje ne da cale'la. Benne' bícha'dau', da nigá quebe dxal-la' gaca na ca'. <sup>11</sup> ¿Waca galaj nisa chawe' ne nisa sla' lu tuze beaj? <sup>12</sup> Benne' bícha'dau', ¿waca tu xaga higo cuía na da zixre chee xaga olivo? ¿Waca tu lba uva cuía na da zixre chee xaga higo? Cá'anqueze, tu beaj quebe gaca gunna na nisa xene', ne nisa zri lazre'.

#### *Xel-la' sina da naca li lazre'*

<sup>13</sup> Che zua tu benne' ládujla le'e naque' benne' sina, ne dxéajni'ing', dxal-la' gulé'eng' na ne chee da chawe' da dxung' dute' xel-la' dxexruj lazre' chee' da dxunexruj xel-la' sina le'. <sup>14</sup> Che zua lu lázrdaule xel-la' zre'e lazre' ne xel-la' xa lazre', quebe dxal-la' gucá'ana szren cuínale ca naca xel-la' sina chee'la lawe' da caní nnele da wen lazre' chee' da naca da li. <sup>15</sup> Xel-la' sina caní quebe naca na chee Dios. Naca na chee xezr la xu nigá, ne chee bènneache, ne za na lu na' da xriwe'. <sup>16</sup> Naga zua xel-la' zre'e lazre' ne xel-la' xa lazre', na' zaj zra' benne' wechacha ca', ne dxelune' xúgute' da cale'la. <sup>17</sup> Benne' zaj napé' xel-la' sina da dxunna Dios zaj naque' du lazre', ne zren lazre', ne dxe'ene lazre', ne dxexruj lazre'. Dxelexache lazre' ljuwezre', ne dxelune' da chawe'. Zaj naque' li lazre' ne quebe dxelune' dxeze'la da chawe'. <sup>18</sup> Benne' dxelebeche zrié' da ba xa' dxelune' tu zrin da naca ca tu binne da dxunna na da chawe'.

## 4

#### *Ca naca chee benne' zaj nazri'ing' da zaj naca chee xezr la xu nigá*

<sup>1</sup> ¿Bizr chee na' dxedil-lale ne dxe' da ba xa' ládujla le'e? Dxaca caní lawe' da dxezá lázrele da zaj naca chee da cale'la, da dxuluzúa na le'e lu da ba xa'. <sup>2</sup> Le'e dxaca lázrele bi gápale, na' lawe' da quebe dxezreú'e'le na, na' dxútele benne'. Dxezá lázrele tu da sile, na' lawe' da quebe dxezéquele sile na, na' dxedil-lalé ljuwézrele, ne dxebéquele da ba xa'. Quebe dxezile ca da dxezá lázrele lawe' da quebe dxenábale na lau Dios. <sup>3</sup> Che dxenábale na, quebe dxezile na lawe' da dxenábale na cale'la, lawe' da dxedánele na chee guchínele na ca da dxaca lázrele. <sup>4</sup> Le'e, benne' quebe nácale li lazre', ¿quebe nézele che nu benne' dxedánneng' da cale'la da de lu xezr la xu nigá, benne' nigá dxecuídené' Dios? Núteteze benne' dxaca lazre' si'e ba neza ca da dxaca lu xezr la xu nigá naque' benne' dxecuídené' Dios. <sup>5</sup> Chee le' na' dxenná xiche lá'azxa: Be' da nuzúa Dios lázrdaudxu cadite dxe'e gunne xue cheedxu. <sup>6</sup> Dios dxácale' dxene' dxi' u lu xel-la' xrlátaje chee', ca dxenná xiche lá'azxa: Dios dxezré'e' benne' ca' dxulucá'ana szren cuína, na' dute' xel-la' xrlátaje chee' dxácale'ng' benne' dxexruj lazre' ca'.

<sup>7</sup> Le guzúa dízra' chee Dios.

Le til-la da xriwe', na' le' na xuzrunnuj na naga zrale.

<sup>8</sup> Le biga lau Dios, na' Le' bigue' naga zúale le'e.

Le'e, benne' dul-la, le gupá'a cuínale chee dul-la da nabágale.

Le'e, benne' quebe nazri'ile Dios du lázrele, le gaca benne' du lazre'.

<sup>9</sup> Le guzua ba xa' lázre'le.

Le cuezre, ne le gaca xache' lazre'.

Québedxa guzrízrele, na' le cuezre.

Québedxa bele, ne le xewine lazre'.

<sup>10</sup> Le gaca dxexruj lazre' lau Xránadxu, na' Le' gucá'ana szrene' le'e.

#### *Quebe dxal-la' guchí'adxu ca da dxun tu benne' bíchedxu*

<sup>11</sup> Le'e, benne' bícha'dau', quebe nnele chee ljuwézrele tule xetule. Benne' dxenné' chee tu benne' bíchedxu, u dxuchi'e ca da dxun bènnea', naque' benne' dxenné' cale'la chee da bdxixruj be'e Dios, ne dxebé'e ca zaj naca da bdxixruj be'e Dios. Che dxebé'u ca zaj naca da bdxixruj be'e Dios, dxun cuinu' ca benne' dxuchi'e da dxaca, ne quebe dxuzú' dízra' da bdxixruj be'e. <sup>12</sup> Zua tuze Dios, Bènnea' bdxixruj be'e da ca', ne dxuchi'e da dxaca, na' Léqueze' wazéqueng' guselé' dxi'u, ne guzría xi'e dxi'u. Lue', ¿núzraqueze nacu', dxuchi'u da dxun benne' xula?



*Quebe nezdXu bi gaca wxre*

<sup>13</sup> Na'a, le xene da nigá, le'e dxennale: Na'a u wxre chéajdxu tu xezre ne cheajsúadxu na' tu iza. Gá'udxu, ne gútedxu chee gucúdedxu dumí. <sup>14</sup> Quebe nézele ca da gaca wxre. ¿Ájazra naca chee xel-la' nabán cheedxu? Naca na ca tu beuj da dxebe' tu chi'i, na' chadí dxenite na. <sup>15</sup> Da dxal-la' guchálajle naca caní: Che Xránadxu dxaca lazre', gaca bandxu ne gundxu da nigá u da na'. <sup>16</sup> Le'e dxucá'ana szren cuínale ca da dxuchálajle. Xel-la' dxucá'ana szren cuína caní naca na da caléla. <sup>17</sup> Che nu benne' ba nézene' ca da chawe' da dxal-la' guné', na' quebe dxuné' na, na' bágale'g dul-la.

## 5

*Santiago dxusízrene' benne' gunní'a ca'*

<sup>1</sup> Le xene da nigá, le'e, benne' gunní'a. Le cuezre ne le xewine lazre' ca naca da zi' da xa' da lé'ele. <sup>2</sup> Ca naca xel-la' gunní'a chee ba zaj nuzru na, na' zra lánale zaca ba zaj nagu béadu ca' le na. <sup>3</sup> Ca naca oro chee ne plata chee, ba gulezén xrché'g na, na' lawe' da quebe bchínele da gunní'a chee lu da xrlátaje, da caní dxululé'e na nabágle zria lau Dios, na' Le' gudé'g le'e lu da ba xa'. Caní gaca chee lawe' da btúbele xel-la' gunní'a chee gápale na gate ba dxéxrule. <sup>4</sup> Quebe gudízruje ca naca chee na benne' ca' belexelape' lina chee, na' dxelawe' zria chee da quebe gudízruje, na' Xránadxu, Bénnea' nape' duté xel-la' dxenná bea, ba benne' ca naca zria da dxelagu benne' ca' chee le'e. <sup>5</sup> Lu xezr la xu nigá ba guzile ba neza xel-la' gunní'a chee ne xúgute da zaca ca', ne guzrenle ca tu bezre dxánnele'g, na' ba dxezrín zra xelútié'-ba'. <sup>6</sup> Le'e ba bzria xile, ne ba bétele benne' quebe bi da caléla zaj nuné', na' benne' ca' quebe guledábage' le'e.

*Dxal-la' gácadXu benne' zren lazre' ne guchálajle dxu Dios*

<sup>7</sup> Chee le na', benne' bícha'dau', le gaca zren lazre' ca zrindxa zra xelá' Xránadxu. Benne' dxaza dxa'ana dxal-la' cueze' duté xel-la' zren lazre' chee' ca zrindxa zra xelá' xiuj ba ne xiuj lina, chee xezí' lu ne'g lina chawe' chee'. <sup>8</sup> Cá'anqueze le gaca zren lazre', ne quebe gute lázrele, lawe' da ba zua gagu zra xelá' Xránadxu. <sup>9</sup> Le'e, benne' bícha'dau', quebe gágule zria chee ljwézrele, chee quebe guchi'a Dios chee da dxunle, lawe' da zua gágute zra xelá' Dios, Bénnea' dxuchi'g da dxaca. <sup>10</sup> Le'e, benne' bícha'dau', le gusá lázrele ca guca chee benne' ca' gulenné' waláz chee Dios, gulaque' zren lazre' lácala guledé'e xel-la' zi'. <sup>11</sup> Dxennadxu guca da ba neza zren chee benne' ca' buluchaga lawe' xel-la' zi' ca'. Le'e ba benle ca benne' zren lazre' guca Job, ne ba nézele ca da chawe' ben Dios chee' ca gudé na'. Xránadxu naque' zri'i lazre', ne dxexache lazre' dxi'u.

<sup>12</sup> Da dxundxa na ba xen, benne' bícha'dau', quebe guzétajle xabáa, ne quebe guzétajle da zua xezr la xu nigá, ne quebe bi da xula guzétajle. Gate nnale: Awe', le nnaze: Awe', ne gate nnale: Cabí, le nnaze: Cabí, chee quebe guzríá xi' Dios le'e.

<sup>13</sup> Che núlale dxedele lu da zi' da xa', dxal-la' guchálajlenle Dios. Che nu benne' zue' xel-la' dxebe', dxal-la' gul-le' da güe lá'ang' Dios. <sup>14</sup> Che nu benne' quebe chawe' zue', dxal-la' nne' benne' gula ca' dxuluxú'g bi chee Cristo, chee xelenabe' lau Dios xexuné' benne' we' na', ne xelegú'g le' da za lu La Xránadxu. <sup>15</sup> Gate dxuluchálajlene' Dios duté xel-la' dxelejli lazre' chee', na' xexaca benne' we' na', na' Xránadxu xechise' le', ne che bi dul-la nune', na' gunite lau Dios chee bénnea'. <sup>16</sup> Chee le na', le xrúalepe lau ljwézrele tule xetule dul-la da nunle, ne le guchálajle Dios chee tule xetule, chee xexuné' le'e. Da dxenaba benne' xrlátaje du lazre' lau Dios wazrué'ene' na. <sup>17</sup> Elías, bénnea' gunné' waláz chee Dios, guque' tu bèneache ca dxi'u, na' gate gunabe' lau Dios chee quebe gaca xiuj, na' quebe guca xiuj lu xezr la xu duté chun iza xugachaj. <sup>18</sup> Gudé na', gate gunabe' lau Dios da xula, na' belá' xiuj, na' xezr la xu na' benna na lina.

<sup>19</sup> Le'e, benne' bícha'dau', che nu benne' ládujla le'e dxecuase' lu da li, na' che núlale le'e xegu'ule le' lu xel-la' li, <sup>20</sup> dxal-la' nézele, núteteze benne' xucuase' tu benne' dul-la lu neza caléla da zeajlene', guselé' bénne'du xu'u benne' dul-la na' lu xel-la' gute, na' xunite lau Dios dul-la zan da nabaga bénnea'.

## DÍZRA'DAU' NEDXU DA BZUAJ SAN PEDRO

*Dizra' gusel-la Pedro chee benne' ca' gucá'a Jesús, ne zaj nase dínmaje'*

<sup>1</sup> Neda', Pedro, naca' benne' gubáz chee Jesucristo. Dxuzúaja' da nigá chee le'e nadxúajle lázrele, ne zrale xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia. <sup>2</sup> Xradxu Dios ba guqu'é le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnmale' le'e da chawe', ne xel-la' dxebeza zri lazre'.

*Ca da dxebeza lázredxu*

<sup>3</sup> Dxue lá'anadxu Dios, Xra Xránadxu Jesucristo. Lawe' da dxexache lázrele'e dxi'u ba bene' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu, <sup>4</sup> ne gun na sile ca da nucueza Dios chee xabáa, da na' quebe cuia xi na, ne quebe xexúe na, ne quebe te chee na. <sup>5</sup> Lawe' da dxéajlele chee Dios, Le' guxre' le'e nen xel-la' waca chee' ca zrindxa zra na' sile du ca naca xel-la' weselá da nucueze' cheedxu, na' gulé'eng' na lu zra bzebe ni'.

<sup>6</sup> Chee le' na' dxebele'ele lácala dxun na ba xen tele xel-la' zi' tu chí'idau'. <sup>7</sup> Xel-la' dxeajli lazre' chee gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajli lazre' chee, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lá'ana lu zra na' gate xelá' Jesucristo.

<sup>8</sup> Le'e nazri'ile Jesucristo lácala quebe ne lé'ele Le', na' lawe' da nuxrén lázrele Le' lácala quebe ne xel'é'ele Le', dxebele'ele. Ca naca xel-la' dxebe chee naca na da zrenté da quebe séquentu' xuzájla'antu' <sup>9</sup> lawe' da nalá bénne'du xu'ule lawe' da dxéajlele chee Dios. <sup>10</sup> Lu iza da ba gulédé gate nate, benne' ca' gulenné' waláz chee Dios buluxúe xánnie', ne belexebéajni'e ca naca chee xel-la' weselá nigá, na' buluchálaje' ca naca xel-la' chawe' chee Dios da gunné' le'e. <sup>11</sup> Be' Lá'azxa, Bénnea' gusel-la Cristo, bzéajni'ine' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexilaje' nuzra benne' nigá, ne bátala gaca da dxenná Be' Lá'azxa, Bénnea' zúale le'. <sup>12</sup> Dios bzéajni'ine' benne' ca' ca naca chee da na' dxuluchálaje', gunné' quebe naca na chee lé'queze', san naca na cheedxu dxi'u. Na'a, da nigá naca dizra' chawe' da ba bénquezele, da buluchalaj benne' ca' ne chee Be' Lá'azxa, Bénnea' ze'e xabáa. Da caní gulaca lazre' gubáz chee xabáa xeléajni'ine'.

*Dios dxenné' dxi'u chee gácadxu bi lá'azxa chee'*

<sup>13</sup> Chee le' na', le guxúe xanne' ca da gunle. Tu dxál-lazqueze gunle da xrlátaje. Dute lázrdaule le guxrén lazre' xel-la' chawe' chee Dios, ne le cueza da gunné' le'e lu zra na' gate xelá' Jesucristo. <sup>14</sup> Lawe' da nácale bi chee Dios, le guzúa dizra' chee', ne québedxa gunle ca da guzá lázrele gate quebe ne gúnbeale Dios. <sup>15</sup> Na'a, le ta lu xel-la' lá'azxa chee' lawe' da naca Dios lá'azxa, Bénnea' gunné' le'e. <sup>16</sup> Cá'anqueze naxúajqueze na lu xiche lá'azxa chee', dxenné': "Le gaca lá'azxa, lawe' da naca' neda' lá'azxa."

<sup>17</sup> Che dxennale le'e naca Dios Xrale, na' Le' dxuchi'e ca da dxelún bénneache, dxal-la' zrébele Le' dxácate ne zúale lu xezr la xu nigá. <sup>18</sup> Dios ba bselé' le'e lu da benle gate na' guxíajlele ca da belún xra xrtaulé, da caléla, na' ba nézquezele quebe guca na ne chee tu da dxuzru na ca oro, ne plata. <sup>19</sup> Bselé' le'e ne chee dxen zácále'e chee Cristo, Bénnea' bzua cuine' lau Dios ca tu zríla'dau' du lazre', ne quebe nadxenba', be dxelutie' chee xunite lau Dios dul-la zaj nabague'. <sup>20</sup> Cristo ba nácaqueze chee' gate nate saque' da nigá, na' blé'e lu zra caní chee gaca chawe' chee. <sup>21</sup> Ne chee Cristo dxéajlele chee Dios, Bénnea' bsebang' Le' ládujla benne' gate, ne bca'ane' Le' szren. Chee le' na' dxéajlele chee Dios, ne dxuxrén lázrele Le'.

<sup>22</sup> Na'a, ba bzúale dizra' chee xel-la' li ne chee Be' Lá'azxa, chee zri'ile dute lázrdaule benne' zaj nababe' dxi'u. Chee le' na' dxal-la' zri'ile ljwézrele tule xetule dute lázrdaule, ne dute xel-la' wala chee. <sup>23</sup> Caní naca na lawe' da ba bexálajle, quegá chee bénneache, benne' dxelate. Náajle ne chee dizra' chee Dios, da naca ban na, ne da zua na chadía chacanna. <sup>24</sup> Caní naca na lawe' da naxúaj na lu xiche lá'azxa, da dxenná na:

Xúgute bénneache zaj naque' ca xixre',  
na' xel-la' szren chee' naca na ca xiaj chee xixre'du ca'.  
Xixre' na' dxebizre na, na' xiaj chee na dxexruj na.

<sup>25</sup> Dizra' chee Xránadxu zúatequeze na chadía chacanna.

Dizra' nigá ba benle le'e ne chee dizra' chawe' da dxuchálajntu'.

## 2

<sup>1</sup> Chee le na', québedxa gunle da calela. Québedxa nu si xeje, ne quebe gunle láweze da xrlátaje. Québedxa gácale xa lazre', ne quebe bi nnele chee ljwézrele. <sup>2</sup> Cáteze dxeledane bidu dx'e'ene ca' nizre', ca' le gane xrtizra Dios, da naca na du lazre', chee gun na se cháchale, ne lale lu na' dul-la. <sup>3</sup> Che da li ba guzú laule nézele naca Xránadxu chawe', na' gaca lázrele sídxale xrtizre'.

*Cristo naque' ca xiaj xre ban*

<sup>4</sup> Le biga lau Xránadxu, Bénnea' naque' ca xiaj xre ban. Bénneache buluzú' Le' chalá'ala, san lau Dios naque' tu xiaj chawe' da zácále'e na. <sup>5</sup> Cá'anqueze le'e nácale ca xiaj ban ca'. Le güe Dios lataj guchinene' le'e chee gun' tu xudau' chee Be' Lá'azxa chee', gácale bxruze chee Dios chee guzúale lau Dios ca da dxunna Be' Lá'azxa le'e. Da nigá waca gunle ne chee Jesucristo, da xezaca ba lazre' Dios. <sup>6</sup> Chee le na' lu xiche lá'azxa dxenná Dios:

Neda' nuzú'a' lu xezre lá'azxa tu benne'

naque' ca tu xiaj blau chee xu'u,

da naca na tu xiaj du lazre',

ne da zácále'e na,

na' nu benne' chéajle'e chee Le'

quebe gaca xel-la' stu chee'.

<sup>7</sup> Chee le'e dxéajle chee', xiaj nigá zácále'e na, san chee benne' ca' quebe dxéajle'e naca na ca da dxenná xiche lá'azxa:

Xiaj na' buluzú'a benne' wen xu'u ca' chalá'ala,

le na' naca na xiaj blau.

<sup>8</sup> Cá'anqueze naca na ca dxenná xiche lá'azxa:

Naque' tu xiaj da dxechegu bénneache,

na' lawe' le na' dxeajlecházie'.

Caní naca na, dxeajlecházie' lawe' da quebe dxelezi'e dizra' chee Dios. Dios ba núnqueze' gaca caní chee benne' ca'.

*Benne' zaj naque' bi chee Dios*

<sup>9</sup> Le'e nácale benne' ba gucá'a Dios. Nácale bxuze lu zrin chee Benne' Wenná Bea, Jesús. Nácale tu xezre lá'azxa chee Dios, na' Le' naxá'awene' le'e chee guzenle bénneache ca naca xel-la' szren chee Dios. Le' gunné' le'e chee xedxúajle lu da chul-la, na' súale lu xel-la' naxani' li lazre' chee'. <sup>10</sup> Gate nate quebe nu bexache lazre' le'e, san na'a Diósqueze' dxexache lazre' le'e.

*Zúale chee gunle zrin chee Dios*

<sup>11</sup> Bi bicha' nazri'ite' lazra', dxata' xueda' le'e, nácale ca benne' zaj zre'e' zitu' naga zua lazre', chee quebe gunle ca da dxenná bela' dxen chee, da dxedil-lale' na benne' du xu'ule.

<sup>12</sup> Ca da dxunle, dxal-la' gaca na xrlátaje lau bénneache quebe zaj númbe'e Dios. Caní gaca na, lácala na'a dxeleonné' chee, dxeleonné' nácale benne' ca' dxelune' da zrinna, na' welelé'equezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bénneache.

<sup>13</sup> Lawe' da nácale bi chee Xránadxu, le guzú'a dizra' ca da dxenná benne' xu'u lawe', bénnea' buluzú'a benne' xezre ca'. Le guzú'a dizra' chee benne' nape' xel-la' dxenná bea zren, <sup>14</sup> ne chee benne' dxeleonné' bea, benne' ca' nasele' le' chee xuludé'e' xel-la' zi' benne' ca' dxelune' da zrinna, ne xelu'e' ba lá'ana benne' ca' dxelune' da xrlátaje. <sup>15</sup> Dios dxaca lazre' gunle le'e da xrlátaje chee guzú'a zrire benne' ca' quebe zaj naxéajni'ine', gate dxeleonné' calela chee dizra' chawe' da nazile.

<sup>16</sup> Le gaca ca benne' quebe zaj nada'u, san quebe guchínele da na' nazile, quebe gunle da calela. Le gaca ca benne' ca' dxenná be'e Dios. <sup>17</sup> Le gapa ba lá'ana xúgute' bénneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

*Ca da guzaca zi' Cristo dxuzéajni' na dxi'u*

<sup>18</sup> Le'e, bi wen zrin, le guzú'a dizra' chee xránale duté xel-la' ba lá'ana, quegaze chee benne' zaj naque' zri'i lazre', ne dxelebé'e' gunne xue chee, san cá'anqueze gunle chee benne' snia ca' zaj naque' xránale. <sup>19</sup> Naca na tu da xrlátaje chee guchaga laudxu xel-la' zi' da dxulusaca bénneache dxi'u gate dxundxu da nezdru naca na da dxezaca ba lazre' Dios. <sup>20</sup> Che dxunle tu da calela, na' dxulusaca zi'e' le'e, ¿bizra da ba neza gaca na chee? Na'a, che dxedele xel-la' zi' lawe' da dxunle da xrlátaje, ne dxuchaga laule na duté xel-la' zren lazre' chee, da nigá naca na xrlátaje lau Dios. <sup>21</sup> Dios gunné' le'e chee tele xel-la' zi' caní, lawe' da gudé Cristo xel-la' zi' waláz chee le'e, da dxuzéajni' na le'e gunle ca da ben Le'.

<sup>22</sup> Le' quebe bene' dul-la, ne quebe nu guzú xe'e.

<sup>23</sup> Gate buluchácalene' Le', quebe bi dizra' schanni' bechebe'.

Gate buludéḡ Le' xel-la' zi', Le' quebe bexéchéjaje'.

Bzua cuineḡ lu na' Dios, Bénnea' dxuchi'e ca da naca na. <sup>24</sup> Biá'queze Cristo na' lu belá' dxen chee' ca naca dul-la cheedxu gate gudeḡe leḡe xaga begúaj, cheeḡ gácadxu ca benne' gate, québedxa gundxu dul-la, na' gaca bandxu cheeḡ gundxu da xrlátaje.

Le' guzríḡ we' cheeḡ xexácale le'e chawe'.

<sup>25</sup> Le'e gudale gate nate ca zrla' zaj naníteba'.

Na'a ba belá'le lau Cristo, Bénnea' dxuxúḡ le'e ca dxun tu benne' dxuxúḡ zrlá'du ca', ne dxeḡe gunne xue cheeḡ bénne'du xú'ule.

### 3

*Ca dxal-la' xelún benne' zaj nuchaga na'*

<sup>1</sup> Cá'anqueze le'e, nu'ula nuchaga na'le, le guzúa dizra' cheeḡ benne' cheeḡe, na' che núlale zua benne' biu cheeḡe quebe dxéajleḡe xrtizra Dios, xexúnbeḡe naca na da li gate lé'eneḡ da xrlátaje da dxun zru'uleḡ, ne quebe gun na ba xen bi guchalaj zru'uleḡ, <sup>2</sup> lawe' da lé'ezenḡe da xrlátaje dxunḡe lawe' da naqueḡ xrlátaje, ne dxape' le' ba lá'ana. <sup>3</sup> Ca lechítaje chee tu nu'ula quebe dxal-la' gaca na cúzreze ca xel-la' dxupá'a xicha xíchajé', ne lechítaje da naca na oro, ne zra lanḡ da zácaleḡe. <sup>4</sup> Lechítaje cheeḡ dxal-la' gaca na lu xichaj lázrdawe', da naca na tu da xrtan da quebe te chee na. Da xrtan nigá naca na tu be' dxexruj lazre', ne zren lazre', da na' zácaleḡe na lau Dios. <sup>5</sup> Cá'anqueze guca lechítaje chee nu'ula ca' gulaqueḡ bi cheeḡ Dios gate nate. Nu'ula ca' buluxrén lazreḡ Dios, ne buluzúḡe dizra' cheeḡ benne' cheeḡ. <sup>6</sup> Cá'anqueze guca Sara, bzuḡe dizra' cheeḡ Abraham, na' guzreḡ le': "Xran." Le'e wácaquezle ca guca Sara na' che gunle da xrlátaje, ne quebe bi guchebe lázrele.

<sup>7</sup> Cá'anqueze le'e, benne' biu, zúaleḡe nu'ula, le gaca dxexruj lazre' nen zru'ulale. Le gapa ba lá'ana zru'ulale lawe' da quebe zaj naqueḡ benne' wal-la ca le'e, ne cá'anqueze zaj nape' xel-la' nabán ca da nunna Dios le'e duté xel-la' chawe' cheeḡ. Dخال-la' gunle caní cheeḡ quebe bi guzaga na le'e gate guchálajlele Dios.

*Benne' dxeledéḡ xel-la' zi' lawe' da dxelunḡe da chawe'*

<sup>8</sup> Na'a:

Le gaca tuze

Le xexache lazre' ljuwézrele, ne le zri'i ljuwézrele.

Le gaca benne' zri'i lazre', ne zren lazre'.

<sup>9</sup> Quebe gunle da caleḡa cheeḡ benne' dxunḡe cheeḡe da caleḡa, ne quebe gucháchaleḡe benne' dxulucháchaleḡe le'e. Le gun da chawe' cheeḡ benne' ca' lawe' da gunnḡe Dios le'e cheeḡ sile da chawe'. <sup>10</sup> Caní naca na lawe' da dxenná xiche lá'azxa:

Benne' dxaca lazreḡ gaca tu da ba neza cheeḡ,

ne suḡe xel-la' dxebe

dxal-la' guxúḡe luzre' cheeḡ quebe nneḡ dizra' schanni',

ne guxúḡe dxu'e cheeḡ quebe nneḡ na da wen lazre'.

<sup>11</sup> Dخال-la' gusanḡe ca da caleḡa beḡeḡ,

ne québedxa gunḡe na, cheeḡ gunḡe da chawe'.

Dخال-la' cueche zrigḡe da ba xa',

ne gaqueḡ benne' zren lazre'.

<sup>12</sup> Xránadxu dxuxúḡe benne' chawe' ca',

ne dxenneḡ ca da dxelenaba benne' ca'.

Dxuzúḡe chalá'ala benne' wen da zrinnaj ca'.

<sup>13</sup> ¿Núzraqueze benne' gunḡe cheeḡe da zrinnaj che le'e cuele gunne xue gunle da chawe'?

<sup>14</sup> Lácala tele xel-la' zi' lawe' da dxunle da chawe', gaca na da ba neza cheeḡe. Quebe nu zrébele, ne quebe xrúsale. <sup>15</sup> Le gapa ba lá'ana Cristo ca Xránale lu xichaj lázrdaule. Le súateze ban lazre' xechébele lau benne' ca' dxelenabe' le'e bizr chee na' dxuxrén lázrele Le'. Le gun na lu xel-la' dxexruj lazre', ne le gapa ba lá'ana benne' ca'. <sup>16</sup> Le gun da chawe' cheeḡ quebe bi sua da gagu na zria lu xichaj lázrdaule, na' benne' ca' dxelennéḡ schanni' cheeḡ da chawe' da dxunle lawe' da dxéajleḡe cheeḡ Cristo, xelapa stu'e ca dizra' da dxelennéḡ. <sup>17</sup> Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da caleḡa.

<sup>18</sup> Caní naca na lawe' da gudé Cristo tu lásaze lu xel-la' gute zi xa' ne cheeḡ dul-la da nabágadxu. Le' guqueḡ benne' xrlátaje, na' gudéḡe xel-la' zi' waláz cheedxu dxu'u, benne' wen da zrinnaj, cheeḡ gaca xechéḡe dxu'u lau Dios. Gute Cristo lu bel-la' dxen cheeḡ, san bebánquezeḡ lu be' nácaquezeḡ. <sup>19</sup> Cá'anqueze lu be' nácaquezeḡ guxiájé' lataj chul-la naga xeajchálajleḡe be' zaj nácaqueze benne' ca' nuzaga xel-la' gute lu lataj na'. <sup>20</sup> Benne' caní quebe buluzúḡe dizra' ca da bchalaj Noé gate nate, gate na' guleza Dios duté xel-la' zren lazre' cheeḡ dxácaté na' beḡ Noé da zren na' da dxedá lawe' nísadau'. Lu da dxedá lawe'

nísadau' gulelá xrúnuze benne' ne chee nisa xiuj da na' bzria xi na ca naca bèneache. <sup>21</sup> Nisa xiuj na' dxulé'e na ca naca nisa naga dxelexedxúa benne' nisa, na' lu le' na' naladxu na'a. Nisa nigá quegá le' na' quibe na dxi'u, san dxulé'e na dxaca lázredxu chádxedxu lau Dios, na' ladxu lawe' da bebán Jesucristo ládujla benne' gate, <sup>22</sup> ne begieng' xabáa, ne zue' chalá'a xabêla chee Dios, na' dizra' chee Le' dxuluzúa gubáz chee xabáa, gubáz ca' zaj nape' xel-la' dxenná bea, ne gubáz blau ca'.

## 4

*Dxal-la' gundxu zrin chee Dios guchínedxu ca da ba nunna Dios dxi'u*

<sup>1</sup> Chee le' na, ca ben Cristo, gudé' xel-la' zi' lu bêla' dxen chee', cá'anqueze le'e dxal-la' si lu nale tele xel-la' zi' lawe' da che tu benne' ba gudé' xel-la' zi' lu bêla' dxen chee', ba bzua bènea' chalá'ala da naca dul-la, <sup>2</sup> chee guné' ca da dxaca lazre' Dios dxácaté naca bané', ne quebe guné' ca da dxenná bêla' dxen chee'. <sup>3</sup> Naze cáтите da ba benle gate nate da dxelanne benne' quebe zaj núnbe'e Dios. Ca lu iza da ba guledé benle da sban ca', ne da zrinnaj ca' da guzá lázrele, ne guzúzrele, ne benle laní sban ca'. Gúé'elé'ele, ne bca'ana szrenle bedau' xiaj xaga ca' da na' dxecuide Dios. <sup>4</sup> Benne' ca' quebe zaj núnbe'e Dios dxelexebáneng' lawe' da québedxa dxunle le' tuze ca naca da sban da dxeluné', na' chee le' na' dxelellé' schanni' chee. <sup>5</sup> Benne' ca', dxun na ba xen xululé'eng' ca da zaj nuné' lau Bènea' naca chee' guchi'e chee benne' ban ca', ne chee benne' gate ca'. <sup>6</sup> Benne' ca' zaj nate belenne' ca naca dizra' chee Dios chee xelexaca bané' lu be' zaj nácaqueze' ca naca ban Dios, lácala lu xezr la xu nigá Dios bchi'e ca da beluné' ca guchi'e chee xúgute' bèneache.

<sup>7</sup> Ba za cheasé chee xúgute' da dxelé'edxu. Chee le' na, le sua ban lazre', ne le guchálajlequeze Dios. <sup>8</sup> Da nácadxa blau, le zrí'ile' ljwézrele. Che nazrí'idxu benne' bíchedxu ca', na' gunite laudxu da calela da beluné' cheedxu. <sup>9</sup> Le guzáa lízrele ljwézrele tule xetule, ne quebe nnele chee ljwézrele. <sup>10</sup> Tu tule le'e dxal-la' gunle zrin chee ljwézrele ca da nunna Dios chee, ca benne' dxuluchíneng' chawe' ca da chawe' da dxunezrui Dios chee'. <sup>11</sup> Che nu benne' dxuchálaje', dxal-la' guchálaje' da gunezrui Dios le'. Che nu benne' guné' zrin chee, dxal-la' guné' na guchíneng' xel-la' waca chee' da nunezrui Dios le'. Ca naca xúgute' da dxunle, dxal-la' gaca ba Dios lawe' da nácale bi chee Jesucristo, na' chee Le' gaca xel-la' szren, ne xel-la' dxenná bea chadía chacanna. ¡Ca'an gaca na!

*Wadedxu xel-la' zi' lawe' da nácadxu bi chee Cristo*

<sup>12</sup> Benne' bícha'dau' nazrí'ite' lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca. <sup>13</sup> Le be lawe' da tele xel-la' zi' ca xel-la' zi' da gudé Cristo chee cá'anqueze bêlé'ele gate lé'ele xel-la' szren chee Cristo gate zezé'e. <sup>14</sup> Che dxulugazja' benne' le'e dizra' lawe' da nácale bi chee Cristo, ba neza zren naca na chee, lawe' da zúale Be' Lá'azxa chee Dios le'e, Bènea' ze'e xabáa. Dxelellé' bèneache schanni' chee Le', san le'e dxápale Le' ba lá'ana. <sup>15</sup> Che núlale le'e dxedele xel-la' zi', quebe dxal-la' gaca na lawe' da bêtele benne', u bi gulanle chee benne', u bi da zrinnaj benle, u lawe' da guchixre chee da naca chee benne' xula. <sup>16</sup> Che nu benne' dxedé' xel-la' zi' lawe' da naque' bi chee Cristo, quebe dxal-la' xedué'eng', san dxal-la' güe lá'ane' Dios lawe' da nazí le' bi chee Cristo. <sup>17</sup> Ba bzrin zra su lau Dios guchi'e ca da zaj nun tu tu bi nácabé' chee Le'. Che Dios su lawe' guchi'e ca da nundxu dxi'u, ¿ájala gaca chee benne' ca' quebe dxeluné' ca dxenná dizra' chawe' chee Dios? <sup>18</sup> Che benne' xrlátaje ca' cánnaze xelelé' ¿ájazraqueze gaca chee benne' wên da zrinnaj ca', ne chee benne' wên dul-la ca'? <sup>19</sup> Caní naca, benne' dxeledé' xel-la' zi' lawe' da dxeluné' da xrlátaje da dxaca lazre' Dios, dxal-la' xelúnqueze' da xrlátaje, ne xuluzúe' bène'du zaj xu'e lu na' Dios, Bènea' bène' le', lawe' da naca Le' li lazre'.

## 5

*Pedro dxuzéajni'ine' bi ca' chee Cristo*

<sup>1</sup> Dxuzéajni'ida' le'e, benne' gula dxuxúele tu tu cue' bi ca' chee Cristo lawe' da naca' neda' benne' gula ca le'e, ne dxexechêba' ca xel-la' zi' da gudé Cristo, ne cá'anqueze lawe' da gúnnaqueze' neda', ne le'e, chee sidxu da xabáa chee' da gulé'eng' te chee zra caní. <sup>2</sup> Ca dxelún benne' dxuluxúe' zrila' ca', le guxúe bidu ca' chee Dios, bène'du ca' nabágale. Le gun na duté lázrdaule ca dxaca lazre' Dios, quebe gun na ba xen nu benne' nna bé'eng' le'e, ne quebe gunle ba chee dumí. Le gun zrin du lázrele, <sup>3</sup> ne quebe gun cuínale ca xrane bène'du ca' nabágale. Le gun ba xuzre gácale tu da gulé'e na ca dxal-la' xelún bène'du ca'. <sup>4</sup> Caní gaca, gaca xelá' Xránadxu, Benne' Blau dxuxúe' zrila' ca', sile tu lazrui da naca na chee xabáa, da quebe te chee na. <sup>5</sup> Cá'anqueze le'e, benne' cuide', le gun ca da dxelellé' benne' gula ca'. Xúgutele dxal-la' guzúale dizra' chee ljwézrele tule xetule lu xel-la' dxexrui lazre' chee le' lawe' da dxenná xiche lá'azxa: Dios dxezré'e benne' ca' dxulucá'ana szren cuine'.

Dutę xel-la' chawe' cheę' dxácalęę' benne' dxexruj lazre' ca'.

<sup>6</sup>Le guzexruj lázrele lu xel-la' dxenná bea zren cheę Dios, na' xechisa Le' le'e ca zrin zra cheę na. <sup>7</sup>Le guzúa lu na' Dios xúgutę da dxele gunne xue, lawe' da dxe' Le' gunne xue da naca cheęle.

<sup>8</sup>Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu bezure xixre', dxebezre xa'aba', dxiljaba' nu guębeba'. <sup>9</sup>Le tıl-lalę da xriwe', ne le sę chacha lu xel-la' dxeajlı lazre' cheęle, lawe' da nézquezle dxeledéqueze xúgutę bíchele zaj zre'ę lu xęzr la xu nigá xel-la' zi' ca da dxedele le'e. <sup>10</sup>Gate bache gudele xel-la' zi' tu chi'i, Dios gunę' le'e li lazre', ne guzúa chawe'ę le'e. Dios ná'queze dxunnę' dxi'u xúgutę da chawe' cheę', ne ba gunnę' dxi'u cheę gápaxu da naca cheę xabáa cheę' lawe' da nácadxu bi cheę Jesucristo. <sup>11</sup>Gaca ba Le', ne cheę' Le' gaca xel-la' dxenná bea chadía chacanna. ¡Ca'an gaca na!

*Pedro dxugape' diuzre bi bíchedxu ca'*

<sup>12</sup>Silvano, benne' nigá dxéqueda' naque' tu bi bíchedxu li lazre', ba bzuaje' dizra' caní cheęle le'e cáteze neda', Pedro, ba gucha' le' guzúaje'. Dxuzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'inę' le'e. Le sę chacha ca zaj naca da caní.

<sup>13</sup>Bi cheę Cristo zaj zre'ę Babilonia nigá, benne' ca' gucá'a Dios ca guquę'ę le'e, dxulugape' le'e diuzre. Cá'anqueze Marcos, bi na' nácabe' ca bi cheęqueza' dxugápabe' le'e diuzre. <sup>14</sup>Le gugapa diuzre ljwézrele tule xetule, ne le gunida' ljwézrele lu xel-la' zri'i lazre'.

Dxenaba' lau Dios gunnę' le'e xel-la' dxebeza zri lazre', le'e nácale bi ca' cheę Jesucristo. ¡Ca'an gaca na!

## DIZRA' GUDXUPE' DA BZUAJ SAN PEDRO

*Dizra' da gusel-la San Pedro chee bi ca' chee Jesús*

<sup>1</sup> Neda', Simón Pedro, naca' wen zrin chee Jesucristo, ne benne' gubáz chee'. Dxuzúajá' da nigá chee le'e, ba nápale xel-la' dxeajlí lazre' da zácale'ē, ne naca tuze ca da nápantu' netu'. Caní naca lawe' da naca li lazre' Dios chee dxu, ne Benne' Weselá chee dxu Jesucristo. <sup>2</sup> Dxenaba' lau Dios gúnnale'ē le'e da chawe' chee', ne xel-la' dxebeza zri lazre', lawe' da núnbeale Dios, ne Xránadxu Jesús.

*Ca dxal-la' gaca bi chee Cristo*

<sup>3</sup> Dios lu xel-la' waca chee' ba nunne' dxi'u xúgute' da nachínedxu chee gápadxu xel-la' nabán chee Le', ne chee gaca gundxu zrin chee', lawe' da núnbeadxu Bénnea' gúnné' dxi'u chee gápadxu da xabáa chee Le', ne xel-la' szren chee'. <sup>4</sup> Caní naca na, ba nunne' dxi'u ca da nachébe lazre', da zaj naca na szrénle'ē, ne da zaj zácale'ē na, chee ne chee da guchebe lazre' wazrué'ele le'e gácale ca nácaqueze Dios, ne chee lala lu da sban da dxaca lu xezr la xu nigá ne chee da dxezá lazre' bēla' dxen chee bēnneache. <sup>5</sup> Chee le' na' dxal-la' cue'le gunne xue gun xel-la' dxeajlí lazre' chee le gunle da xrlátaje, ne chee gun da xrlátaje da dxunle gácale benne' sina. <sup>6</sup> Xel-la' sina chee le dxal-la' gun na nna be'e cuínale, na' xel-la' dxenná be'e cuina chee le dxal-la' gun na gácale benne' zren lazre', na' xel-la' zren lazre' chee le dxal-la' gun na zri'ile Dios. <sup>7</sup> Xel-la' zri'i lazre' chee le nen Dios dxal-la' gun na zri'ile benne' bíchedxu ca', na' xel-la' zri'i lazre' chee le nen bíchele ca' dxal-la' gun na gácale zri'i lazre'.

<sup>8</sup> Che le'e dxunle da caní, ne dxelepe ban na, quebe xegá'ana cá'aze xel-la' nabán chee le, ne quebe naca na níteze núnbeale Xránadxu Jesucristo. <sup>9</sup> Benne' quebe dxuné' da caní naque' ca benne' la chul-la, u ca benne' quebe dxenné'ē ca da za za'. Ba gul-la' xezr' guxádxie' ca naca chee dul-la ca' da bēne' gate nate. <sup>10</sup> Chee le na', benne' bícha'dau', le gun ba xuzre nézele Dios gúnné' le'e, ne ba guqué'ē le'e, na' che gunle da nigá, cabata' cheajcházele. <sup>11</sup> Caní gun Dios, gúnnale'ē le'e lataj chu'ule naga nna bea Xránadxu, ne weselá chee dxu Jesucristo chadía chacanna.

<sup>12</sup> Chee le na' tu dxusá'azqueza' lázrele da caní, lácala ba nézele na, ne ba ze cháchale lu xel-la' li da ba nápale. <sup>13</sup> Dxacate' naca bana' dxéqueda' dxun na ba xen gusá'a lázrele chee da caní <sup>14</sup> lawe' da ba nēda' wáteza' ca ba gúnná Xránadxu Jesucristo, guzre' neda'. <sup>15</sup> Na'a guna' ca da séqueda' chee gate te gatia' neda', cheajsa' lázrquezele chee da caní.

*Benne' belelé'ene' xel-la' szren chee Cristo*

<sup>16</sup> Da bsédentu' le'e ca naca chee xel-la' szren chee Xránadxu Jesucristo, ne ca xelé'ē xecha lasa quebe naca na ca da dxenná xichaj lázrdau bēnneache. Netu' blé'equezentu' ca naca xel-la' szren chee Xránadxu. <sup>17</sup> Blé'entu' Le' gate Xradxu Dios be'ē Le' xel-la' ba lá'ana, ne xel-la' szren, na' Dios gúzrequeze' Le' lu da xabáa chee': "Benne' nigá naque' Zri'ina' nazri'ite lazra', ne dxezaca ba lazra' nen Le'." <sup>18</sup> Nétu'queze bēnentu' chi'na' da za na xabáa gate zúntu' nen Xránadxu lu xi'a lá'azxa na'. <sup>19</sup> Chee le na' dxuxrén lázredxantu' dizra' da buluzúaj benne' ca' gulenné' waláz chee Dios. Da xrlátaje dxunle le'e lawe' da dxenle ca naca dizra' nigá. Naca na ca tu xi' da dxunle na lu lataj naga naca chul-la ca zrin zra chani', na' Cristo, Bénnea' naque' ca belaj zila súalene' le'e chee gusení'ē lu xichaj lázrdau. <sup>20</sup> Le guxúe xanne' ca naca da nigá. Netú da naxúaj na lu xiche lá'azxa quebe nu benne' seque' xuzájle'ē na lu xel-la' dxéajni'i cheeze'. <sup>21</sup> Benne' ca' buluchálaje' waláz chee Dios quebe buluchálaje' ca da gulaca lázrequeze le'. Gulaque' benne' chee Dios, na' gulenné' waláz chee' ca da bnezruj Be' Lá'azxa le'.

## 2

*Ca naca chee benne' ca' dxulusédené' da wen lazre' (Judas 4-13)*

<sup>1</sup> Cá'anqueze gulezrá' ládujla benne' Israel benne' wen lazre' ca', benne' belún cuine' ca benne' dxelenné' waláz chee Dios. Cá'anqueze welezrá' ládujla le'e benne' wen lazre', benne' xelún cuine' ca benne' dxulusédené' bēnneache dizra' chee Dios. Benne' caní wuluzéajni'ine' bēnneache bagácheze ca naca dizra' wen lazre' da guxrinnaj na, na' caní xeledábage' Xránadxu, Bénnea' bselé' dxi'u, na' lawe' da dxulusédené' da caní xelebia xi' zéqueze'. <sup>2</sup> Benne' zan chjácálene' ca da sban dxuluséde benne' ca', na' ne chee benne' caní xelenné' bēnneache schanni' chee dizra' li chee xel-la' weselá. <sup>3</sup> Lawe' da dxelezá lazre' xelezi'ē dumí, xelebéajé' le'e dumí ne chee da wen lazre' da dxuluséajni'ine' le'e. Dios ba nucueze' da guzriá xi na benne' caní, lawe' da ba guchugue' gate nate ca da gaca chee benne' ca'.

<sup>4</sup> Dios quebe bnite lawe' chee' gubáz chee' xabáa ca' belún dul-la. Bdee' gubáz chee' xabáa ca' lu lataj ba xa', ne bzre'e le' lu da chul-la, ne bcheaje' le' du xia naga zaj nadxéaje' ca zrin zra chugu Dios ca da gaca chee' gubáz chee' xabáa ca'. <sup>5</sup> Cá'anqueze Dios quebe bnite lawe' chee' benne' ca' gulezrá' gate nate. Gusel-le' nisa xiuj da bzria xi na benne' ca' belune' da calela. Bselé' Noé, béneea' bchálaje' ca naca da xrlátaje da dxal-la' xelún béneache. Bselé' gázreze benne'. <sup>6</sup> Cá'anqueze guchugu Dios chee' xezre Sodoma, ne xezre Gomorra chee' xelebia xi na. Bzézxié' dxúpaté xezre ca', na' belexegá'anaté na de. Caní dxuluzéajni' na benne' ca' xelune' da calela, benne' xelezré'e te na'. <sup>7</sup> Dios bselé' Lot lu xezre Sodoma na' lawe' da guque' tu benne' xrlátaje, ne bexíajele' ene' gate blé'ene' ca naca da sban da dxelún benne' ca' dxelune' da calela. <sup>8</sup> Benne' xrlátaje nigá guzúe' ládujla benne' ca', na' tu zra tu zra guzúa ba xa' lázrdawe' ca dxenné'e, ne dxenne' ca da calela da dxelún benne' ca'. <sup>9</sup> Nézqueze Xránadxu guselé' benne' zaj naca bi chee' che bi da dxusaca zi na le', na' guzráqueze' benne' ca' dxelune' da calela, ca tu lizre xia, ca zrin zra chugue' chee' chjaque' lataj ba xa'.

<sup>10</sup> Dios xudé' xel-la' zi' xrendxa benne' ca' dxelune' cáteze da sban da dxelezá lazre', ne dxuluzé' chalá'ala xel-la' dxenná bea chee' Xránadxu. Benne' caní zaj naque' lazre' dxugu dxelune' da sban, ne dxulucá'ana szren cuine'. Quebe dxelezrebe' dxelenné' schanni' chee' gubáz chee' xabáa ca'. <sup>11</sup> Gubáz ca' zaj nápadxe' xel-la' dxenná bea, ne xel-la' szren ca benne' caní, quebe dxelenné' da calela chee' benne' ca' gate dxelawe' zria chee' lau Xránadxu.

<sup>12</sup> Benne' caní zaj naque' ca bea ca' quebe zaj naxéajni'iba', be dxelumba' ca da zaj nézezeba', ne zraba' chee' xelél-le'-ba', ne xelutie'-ba'. Benne' caní dxelenné' schanni' chee' da quebe dxeléajni'ine', na' xelátequeze' ca dxelate bea ca', <sup>13</sup> ne xeledé' xel-la' zi' ca xel-la' zi' buludé' benne' xula. Dxeléquene' zaj zre'e lu da ba neza gate dxelebane' ca da dxaca tu zra tu zra. Zaj naque' ca tu da sban da dxusi' na le'e xel-la' stu' gate zaj zre'e nen le'e lu laní cheele, dxácate ne dxelezúe' lu xel-la' dxebé lu da calela da dxelune'.

<sup>14</sup> Dxelezá lazre' xúguté nu'ula dxelelé'ene', ne quebe dxelálene' dxelune' dul-la. Dxulusi'e neza xula benne' bíchedxu quebe zaj ze chache'. Dxulucúdequeze', ne zaj naque' benne' zaj xu'e de'. <sup>15</sup> Zaj nanítie' lawe' da gulecuase' lu neza li chee' Dios. Dxelune' ca da ben Balaam, zri'ine Beor. Balaam nigá bene' ba chee' dumí, ne gudé' dxune' da calela, <sup>16</sup> na' bea na', be dxua xua', gunneba' ca benne', ne gudíl-laba' Balaam ca naca dul-la da dxune', na' guchúguba' da xala da dxun Balaam.

<sup>17</sup> Benne' caní zaj naque' ca tu beaj bizre, ne ca tu beuj da dxua be' bdonu'. Ba zaj naca chee' benne' ca' xelexegá'ane' chadía chacanna lu da chul-la. <sup>18</sup> Dxelenné' dizra' da dxulucá'ana szren na le', ne da zaj naca na dácheze. Dxuluchíne' da sban ca', ne da dxezáz lazre' béla' dxen chee' béneache chee' dxulusi'e chalá'ala benne' ca' za dxelexedxúajteque' ládujla benne' ca' dxelune' da calela. <sup>19</sup> Dxelechebe lazre' xulunéruje' benne' ca' tu xel-la' weselá, san léqueze benne' ca' zaj naque' wen zrin chee' da sban. Tu tu béneache naque' benne' nada'u chee' da dxenná be'e na le'. <sup>20</sup> Benne' ba zaj númbe'e Xránadxu, ne Weselá cheedxu Jesucristo, ne ba gulelé' lu da sban chee' xezr la xu nigá, na' te na' che xelexexu'e xecha lasa lu da sban na', ne xelu'e lataj xenná be'e na le', na' gácaxa da ba xa' chee' benne' ca' ca da guca chee' gate nate. <sup>21</sup> Cháwe'dxela gaca na chee' benne' caní la quebe zaj númbe'e Cristo, quegala gate ba belúnbe'e Le', na' xelexecuase' ca naca xel-la' dxixruj bea lá'azxa da guzre Dios le' xelune'. <sup>22</sup> Ca da guca chee' benne' caní dxulé'e na naca da lí dizra' nigá da dxenná na:

Becu' dxexáguba' ca da ba bexébeba',

na' cuche za bexíbeba' bexú'uba' xecha lasa lu guzra' chee'ba'.

### 3

#### *Ca naca chee' zra xelá' Xránadxu*

<sup>1</sup> Benne' bícha'dau' nazri'ite' lazra', da nigá naca na dizra' gudxupe' da dxuzúaja' cheele. Lu dxúpaté xiche caní guca lazra' guzéajni'ida' le'e chee' gulaba lázrele chee' da caní. <sup>2</sup> Le gusá lazre' ca da gulenná benne' lá'azxa ca', benne' buluchálaje' waláz chee' Dios, ne ca naca da gudixruj be'e Xránadxu, Benne' Weselá cheedxu, da na' bulusede benne' gubáz chee' ca' le'e.

<sup>3</sup> Dxunna ba xen gúnbeale, lu zra da za zá'aca welelá' benne' xelún le' chee' da zaj naca na da lá'azxa, ne xelune' cáteze da dxelezá lazre', <sup>4</sup> ne xuluchebe' béneache: ¿Bizra guca chee' da guchebe lazre' Cristo, gunné: Welá'a? Xra xrtáudxu ca' ba gulatigé', na' túzqueze ca guca, gaca na gate guzrete xezr la xu. <sup>5</sup> Benne' caní quebe dxeleque be'ene' gulezúa xabáa, ne xezr la xu gate nate, Dios gunné' bedxúaj na lu nisa, na' guzúa chacha na lu nisa, <sup>6</sup> na' xezr la xu da zua gate nate guzria xi na ne chee' nisa xiuj, <sup>7</sup> na' xabáa, ne xezr la xu da zaj zua na na'a, ba naca chee' na xelexze na ca ba núnqueze Dios chee' na. Xi' na' guzezxe na da caní lu zra guchi'a Dios, gate xelebia xi' benne' ca' dxelune' da calela.



<sup>8</sup> Benne' bícha'dau' nazri'itę lazra', quebe gal-la lázrele da nigá: Lau Xránadxu tu zraze naca na ca chí gaxúa iza, na' chí gaxúa iza zaj naca na ca tu zraze. <sup>9</sup> Quebe dxezré Xránadxu gunę' da nachębe lazre' ca dxeleque bęnneache. Naque' zren lazre' nen dxi'u lawe' da quebe dxaca lazre' nu cuía xi'. Dxaca lazre' xelexíaje lazre' xúgute bęnneache.

<sup>10</sup> Zra xelá' Xránadxu zrin na gate quebe nu dxeque ca', ca za' tu gubán chizrela. Lu zra na' cuía xi' xabáa da dxelę'dxuxu, na' gunle'ę na schaga, ne ca naca da dxelę'dxuxu zran xabáa xelebía xi na lu xi', na' xęzr la xu nigá chezxe na tu zren nen da dę lawe na.

<sup>11</sup> Che ba nézele xelebía xi' xúgute da caní, ¿ájala dxal-la' gunle? Dخال-la' gácale li lazre' ne guzúa cuínale lu na' Dios <sup>12</sup> dxácatę ne dxebézale zra na', ne dxal-la' gunle ca da séquele zrintę zra na'. Lu zra na' cuía xi' xabáa lu xi', na' da zaj zria zran xabáa xelexuna na lu xi' na'. <sup>13</sup> Dxi'u dxebézadxu tu xabáa cube, ne tu xęzr la xu cube da ba guchębe lazre' Dios naga gaca xlátaje xúgute.

<sup>14</sup> Cheę lę na', benne' bícha'dau' nazri'itę lazra', dxácatę dxebézale da caní, le gun ca da séquele cheę quebe bi bágale, ne quebe bi nadxenle cheę dul-la lau Dios, ne suale lu xel-la' dxebeza zri lazre'. <sup>15</sup> Le gusá lázrele naca Xránadxu zren lazre' nen dxi'u cheę ladxu. Cá'anqueze Pablo, benne' bíchedxu nazri'itę lázredxu, bzuaje' cheęle, bchínenę' ca naca xel-la' sina da bnezruj Dios lę'. <sup>16</sup> Lu xúgute xiche da ba bzuaje', ba bchálajlęnę' le'e ca naca cheę da caní, lálala bal-la na nácale'ę na stebe chėjni'idxu na, na' benne' ca' quebe dxelėjni'inę' na, ne benne' ca' quebe zaj zua chache' dxuluchuque' na, ca dxuluchuque' xezícala xrtizra Dios, na' cheę lę na' Dios guzría xi'e benne' ca'.

<sup>17</sup> Cheę lę na', benne' bícha'dau' nazri'itę lazra', che le'e ba nézele da nigá nédxula, le guxúe cuínale cheę da wen lazre' cheę benne' ca' dxelunę' da calela cheę quebe xelechę le'e chalá'ala, ne quebe nite xel-la' li lazre' cheęle lau Dios. <sup>18</sup> Le gúnbea xanne' Xránadxu, Benne' Weselá cheędxu, Jesucristo, ne le gula lu xel-la' zri'i lazre' cheę'. ¡Gaca ba Lę' na'a, ne chadía chacanna! ¡Ca'an gaca na!

## DIZRA' NÉDXUDAU' DA BZUAJ SAN JUAN

*Xtizra Dios da dxunna na xel-la' nabán li lazre'*

<sup>1</sup> Dxuzúaja' cheeje da nigá ca naca chee Bénnea' zúaqueze' gate guzú lau zua xúgute da dxelédxu. Dxuzúaja' ca naca chee Bénnea' ba béntentu' chee', ne ca naca da ba blé'equzentu' bene', neda' ne xezicadxa benne' ca' bsede Jesús. Ca naca chee Benne' nigá guzúantu' dxennantu', ne btantu' Le' nen na'ntu'. Dxuchálajntu' ca naca chee Bénnea' naque' Dizra' da dxunna na xel-la' nabán li lazre'. <sup>2</sup> Bénnea' dxunne' xel-la' nabán zeajli canna ba blé'e, na' netu' blé'entu' Le'. Dxixruj béantu' da naca chee', ne dxuzentu' le'e ca naca chee'. Léqueze' zúalene' Xradxu Dios, na' blé'e naga zúadxu. <sup>3</sup> Da blé'entu', ne da béntentu' dxuzentu' le'e chee gácale tuze nen netu'. Da lítegage, nácadxu tuze nen Xradxu Dios, ne nen Jesucristo, Zri'ine Dios. <sup>4</sup> Ca naca da caní dxuzúaja' cheeje chee gaca du lazre' xel-la' dxebe cheeje.

*Dios naque' lení chee xichaj lázrdau bénneache*

<sup>5</sup> Da nigá naca dizra' da bchálajle Jesús netu', ne da dxuzentu' le'e. Gunné': Dios naque' lení, ne quebe bi zúale Le' da naca chee da chul-la. <sup>6</sup> Che dxennadxu nácadxu tuze nen Le', na' che dxundxu da naca na chee da chul-la, dxun lázredxu ca naca da dxennadxu, na' ca naca da dxundxu quebe dxundxu da li. <sup>7</sup> Che dxundxu da li da naca chee xel-la' naxaní', ca naca Dios, Bénnea' naque' li lazre', ne zue' lu xel-la' naxaní', nadxa zúadxu tuze tudxu xetudxu, na' dxen chee Jesús, Zri'ine Dios, dxibe na dxi'u ca naca xúgute dul-la nabágadxu.

<sup>8</sup> Che dxennadxu quebe nabágadxu dul-la, dxezi xéqueze cuínadxu, na' da li quebe zúale na dxi'u. <sup>9</sup> Che xrúalepedxu ca naca dul-la da nabágadxu, Dios naque' li lazre', ne xlátaje, na' chee le na' Le' gunite lawe' cheedxu ca naca dul-la da nabágadxu, ne quibe' dxi'u ca naca xúgute da sban da ba bendxu. <sup>10</sup> Che dxennadxu quebe nundxu dul-la, dxucá'anadxu Dios ca wen lazre', ne quebe ne sidxu du lázredxu ca naca dizra' chee'.

## 2

<sup>1</sup> Le'e, bi nazri'ite lazra', dxuzúaja' da nigá cheeje chee quebe gunle dul-la. Che nu benne' guné' dul-la, zua wenaba cheedxu lau Dios, Jesucristo, Benne' xlátaje. <sup>2</sup> Le' gutie' waláz cheedxu chee gudúe' da nabágadxu lau Dios ca naca dul-la cheedxu, ne quegaze da nabágadxu dxi'u, san gudúe' da zaj nabaga xúgute bénneache.

<sup>3</sup> Che dxuzúadxu dizra' ca naca da bdxixruj be'e Dios, nezdXu ba núnbeadxu Le'. <sup>4</sup> Che nu dxenná: Neda' núnbe'a Le', ne che quebe dxuzúe' dizra' ca naca da bdxixruj be'e Dios, benne' nigá naque' wen lazre', ne quebe dxenné' da li. <sup>5</sup> Che nu benne' dxuzúe' dizra' ca naca da bdxixruj be'e Dios, benne' nigá nazri'ine' Dios du lazre'. Che dxundxu caní nezdXu ba zúadxu tuze nen Le'. <sup>6</sup> Bénnea' dxenné' naque' tuze nen Dios dxal-la' gaque' ca guca Jesús.

*Tu da cube da bdxixruj be'e Jesús*

<sup>7</sup> Le'e, bi nazri'ite lazra', dxuzúaja' cheeje ca naca da dxenná na dxal-la' zri'idxu le sa' ljwézredxu. Quebe naca na tu da cube da bdxixruj bea Dios. Naca na da gula na' da ba guzile nédxudaute. Da gula da bdxixruj bea Dios naca na dizra' da ba bénequeze. <sup>8</sup> Naca na ca dxuzúaja' cheeje tu da cube da dxixruj bea Dios, da naca béaqueze na naca da li lawe' da ben Jesús ca naca na, ne lawe' da dxunle le'e ca naca na. Caní naca na lawe' da ba dxusení' xel-la' naxaní' li chee xel-la' zri'i lazre' lu xichaj lázrdaudxu, da dxegúa na da naca na chee da chul-la.

<sup>9</sup> Che nu benne' dxenné' dxunge' da naca na chee xel-la' naxaní', ne che dxecuídene' le sa' ljwezre', benne' nigá ne dxedé' lu da naca na chee da chul-la. <sup>10</sup> Benne' nazri'ine' le sa' ljwezre' dxunge' da naca chee xel-la' naxaní', ne quebe dxunge' da guzriá xi na le sa' ljwezre'. <sup>11</sup> Bénnea' quebe chawe' dxelé'ene' le sa' ljwezre', lu da naca na chee da chul-la zua bénnea', ne lu da na' dxedé', ne quebe nézene' ga zéaje' lawe' da dxucá'ana da chul-la le' ca tu benne' la chul-la.

<sup>12</sup> Le'e, bi nazri'ite lazra', dxuzúaja' cheeje lawe' da ba bnite lau Dios cheeje ca naca dul-la cheeje, lawe' da gute Jesucristo waláz cheedxu. <sup>13</sup> Le'e, benne' nazri'ite lazra', dxuzúaja' cheeje lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheeje lawe' da ba bsanle da dxenná da xriwe'.

Le'e, bi nazri'ite lazra', dxuzúaja' cheeje lawe' da ba núnbeale Xradxu Dios.

<sup>14</sup> Le'e, xruze xrna', dxuzúaja' cheeje lawe' da ba núnbeale Bénnea' zúaqueze' nédxudaute.

Le'e, benne' cuide', dxuzúaja' cheeje lawe' da nácale benne' wal-la, ne dizra' chee Dios nápale, ne bsanle da dxenná da xriwe'.

<sup>15</sup> Quebe sa lázrele da caleja ca' da zaj naca na chee xezr la xu nigá, ne quegá da zaj de lu xezr la xu nigá. Che nu benne' dxezá lazre' da zaj de lu xezr la xu nigá, quebe nazri'ine'

Xradxu Dios. <sup>16</sup> Da caní zaj naca na chee xezr la xu nigá, da dxezá lázredxu da dxezaca ba lazre' be'la' dxen cheedxu, ne da dxezaca ba lazre' xiaj laudxu, ne ca naca xel-la' dxucá'ana szren cuina chee da nápadxu. Xúgute da caní quebe zaj naca na da dxunna Dios, san zaj naca na chee xezr la xu nigá. <sup>17</sup> Ba za zra xuzre lazre' xezr la xu nigá, ne ca naca da dxezá lázredxu da naca na chee xezr la xu nigá. Bénnea' dxuné' da dxaca lazre' Dios wazúatecaze'.

*Ca naca da li, ne da wen lazre'*

<sup>18</sup> Le'e, bi nazri'ite lazra', zra caní zaj naca na zra bzebe. Ba bénele gul'é lawe' benne' tábague' Cristo. Neda' dxapa' le'e na'a, bache belelá' benne' zante benne' dxeledábague' Cristo. Chee le na' nezdXu ba zúadXu zra bzebe. <sup>19</sup> Benne' caní belexedxúajqueze' ládujla dxi'u. Da líqueze quebe gulaque' tuze nen dxi'u. La gulaque' tuze nen dxi'u, na' belexegá'analequeze' dxi'u. Caní guca chee nezdXu quebe zaj naca xúgute' tuze nen dxi'u.

<sup>20</sup> Ca naca chee le'e, ba zúale Be' Lá'axza le'e, Bénnea' gusel-la' Xradxu Lá'axza. Chee le na' ba nézele xúgute da caní. <sup>21</sup> Dxuzúaja' chee da nigá lawe' da ba nézele da li, ne quegá dxennia' quebe nézele da li. Ba nézqueze le'e quebe dxun lazre' Bénnea' naque' da li.

<sup>22</sup> ¿Nuzra' naca benne' wen lazre'? Naca bénnea' dxenné' Jesús quebe naque' Cristo, Benne' nasel-la' Dios. Benne' wen lazre' nigá dxenné' Dios quebe naque' Xra Jesús, ne Jesús quebe naque' Zri'ine Dios. <sup>23</sup> Xúgute benne' dxelenné' Jesús quebe naque' Zri'ine Dios, Dios quebe zúalene' benne' ca'. Bénnea' dxexechébe' Jesús naque' Zri'ine Dios, Dios zúalequeze' bénnea'.

<sup>24</sup> Chee le na', le cu'u lu xichaj lázrdaule dizra' da ba bénele nédxudaute. Che da ba bénele nédxudaute zua na lu xichaj lázrdaule, le'e súatequezele tuze nen Zri'ine Dios, ne nen Xradxu Dios. <sup>25</sup> Da nigá naca na da nachebe lazre' Dios, gunne' dxi'u xel-la' nabán zeajli canna.

<sup>26</sup> Ba bzuaja' chee da nigá ca naca chee benne' ca' dxelezé xé'e le'e. <sup>27</sup> Na'a zúale Be' Lá'axza le'e, Bénnea' gusel-la' Jesucristo chee, na' Be' Lá'axza nigá zue' xichaj lázrdaule. Chee le na' quebe nachínele nu gusede le'e lawe' da dxusede Be' Lá'axza le'e ca naca xúgute da caní, na' da dxusédené' le'e naca na da li, ne quebe naca na da wen lazre'. Chee le na', le súatequeze tuze nen Cristo ca naca da ba bsede Be' Lá'axza le'e.

*Ca naca chee benne' zaj naque' zri'ine Dios*

<sup>28</sup> Na'a, bi nazri'ite lazra', le súatequeze tuze nen Cristo, chee súadXu li lazre' gate xelá' Le', ne quebe xedué'edXu lau Le' gate xel'é. <sup>29</sup> Ba nézele naca xlátaje Dios. Chee le na' dxal-la' nézele xúgute benne' ca' dxelúnqueze' da naca na xlátaje zaj naque' zri'ine Dios.

### 3

<sup>1</sup> Le nna' xque ca nazri'ilé'e Dios dxi'u lawe' da nazí ladXu bi chee Dios, ne caní nácadXu. Chee le na' quebe zaj neze bénneache lu xezr la xu nigá da nácadXu lawe' da quebe belúnbe'e Jesús. <sup>2</sup> Le'e, bi nazri'ite lazra', na'a nácadXu bi chee Dios. Quebe ne gul'é lawe' da gácadXu. NezdXu gate xelá' Le', gácadXu ca naca Le' lawe' da lé'edXu Le' ca nácaqueze Le'. <sup>3</sup> Nu benne' dxebeza lazre' gaque' ca naca Jesús dxue lazre' gaque' du lazre' ca naca Jesús, naque' du lazre'.

<sup>4</sup> Nu benne' dxuné' dul-la quebe dxuzúe' dizra' ca naca da bdxixruj be'e Dios lawe' da naca dul-la da dxedábaga da bdxixruj be'e Dios. <sup>5</sup> Ba nézele bla' Jesucristo chee gudúe' dul-la nabágadXu, ne Le' quebe bi dul-la bené'. <sup>6</sup> Xúgute benne' zaj zúatequeze' tuze nen Jesús quebe dxeluné' dul-la, na' xúgute benne' dxeluné' dul-la quebe ne xelelé'engé' Cristo, ne quebe ne xelúnbe'e Le'. <sup>7</sup> Le'e, zri'ina'dau', quebe güele lataj nu si xé le'e. Bénnea' dxuné' da xlátaje, xlátaje naque', ca naca Dios, naque' xlátaje. <sup>8</sup> Benne' dxuné' dul-la naque' chee da xriwe' lawe' da dxun da xriwe' dul-la nédxudaute. Chee le na' bla' Zri'ine Dios, chee bzria xi'e xúgute da nun da xriwe' lu xezr la xu nigá.

<sup>9</sup> Xúgute benne' zaj naca bi chee Dios quebe dxeluné' dul-la lawe' da zúatequeze Be' chee Dios benne' ca'. Chee le na' québedxa gaca xelezúe' xeluné' dul-la lawe' da zaj naque' bi chee Dios. <sup>10</sup> Naca bea nu naca bi chee Dios ne nu naca bi chee da xriwe'. Bénnea' quebe dxuné' da xrlátaje ne quebe nazri'ingé' le sa' ljwezre' quebe naque' bi chee Dios.

*Dxal-la' zri'idXu tu xetudXu*

<sup>11</sup> Da nigá naca na dizra' da ba bénequezele nédxudaute, da dxenná na: Dxal-la' zri'idXu tudXu xetudXu. <sup>12</sup> Quebe gundXu ca ben Caín, bi na' gúcabe' chee da xriwe', na' bétebe' bi bíchebe'. ¿Bizr chee na' bétebe' lebe'? Bétebe' lebe' lawe' da naca da zrinnaj da ben Caín, na' da ben bi bíchebe' naca na da xrlátaje.

<sup>13</sup> Le'e, benne' bícha'dau', quebe xebánele che bénneache lu xezr la xu nigá dxuluzúe' le'e chalá'ala. <sup>14</sup> NezdXu ba bdxúajdxu lu na' xel-la' gute, ne ba guxú'udXu lu xel-la' nabán lawe' da nazri'idXu bíchedXu ca'. Bénnea' quebe nazri'ingé' bíchedXu ca' zúaqueze' lu xel-la' gute. <sup>15</sup> Bénnea' dxuzúe' chalá'ala bíchedXu ca' naque' ca tu benne' dxute benne', na' ba nézqueze le'e nu benne' dxute benne' quebe nape' xel-la' nabán zeajli canna. <sup>16</sup> Ba nezdXu da naca xel-la' zri'i lazre' lawe' da bzanne Jesucristo xel-la' nabán chee', na' gutié' waláz cheedXu.

Cá'anqueze dxi'u dxal-la' guzúdxu xel-la' nabán cheędxu cheę gácaleđdxu bíchedxu ca'. <sup>17</sup> Che tu benne' nape' xel-la' gunní'a da naca na cheę xęzr la xu nigá, ne che dxelé'ene' le sa' ljwezre' dxexázrjene', na' che quebe xexache lazre' le', benne' nigá quebe nazri'ine' Dios. <sup>18</sup> Le'e, zrí'ina'dau', dxal-la' zrí'idxu tudxu xetudxu, quegá nen dizra'ze, ne quegá nen da nnézedxu. Dخال-la' gúntequezdXu na, na' gaca bea na da li nazrí'idxu bíchedxu ca'.

#### *Zua zri lázrdaudxu lau Dios*

<sup>19</sup> Che gundxu caní ba nezdXu nácadXu cheę da li, na' sua zri lázrdaudxu lau Dios, <sup>20</sup> gate zua tu da dxagu na zria lu lázrdaudxu, lawe' da nezdXu naca Dios zrendxa ca lázrdaudxu. Le' nézquezne' ca naca da dxundxu. <sup>21</sup> Ca'an naca, bi nazrí'ite' lazra', che quebe zua tu da dxagu na zria lu lázrdaudxu, waca sua zrize lázrdaudxu lau Dios, <sup>22</sup> na' Le' gunne' dxi'u xúgute' da nábadxu lawe'. Ca'an gaca lawe' da dxuzúdxu dizra' da bdxixruij be'e Dios, ne dxundxu da dzezaca ba lazre' Le'. <sup>23</sup> Da bdxixruij be'ene' dxi'u naca na chéajleđdxu cheę Jesucristo, Zrí'ine Dios, ne zrí'idxu tudxu xetudxu ca bdxixruij be'e Le'. <sup>24</sup> Bénnea' dxuzúę' dizra' da bdxixruij be'e Le' zúalequeze' Dios, na' Dios zúalequeze' bénnea'. Ba nezdXu Le' zúalequeze' dxi'u lawe' da bache beņne' dxi'u Be' cheę'.

## 4

#### *Naca bea Be' cheę Dios*

<sup>1</sup> Le'e, bi nazrí'ite' lazra', quebe chéajle cheę xúgute' benne' dxelenné' zúale Be' cheę Dios le'. Le nna' xque ca naca da dxulusédenę' cheę nézele che zúale Be' cheę Dios le'. Caní dxal-la' gunle lawe' da ba belelá' benne' zante, benne' wen lazre', dxelenné' dxuluchálaje' waláz cheę Dios. <sup>2</sup> Caní gaca nézele che zúale Be' cheę Dios tu benne'. Xúgute' benne' dxelexechebe' ba bla' Jesucristo, ne guque' bénneache, benne' caní zaj naque' cheę Dios. <sup>3</sup> Xúgute' benne' quebe dxelexechebe' ca gaca Jesucristo quebe zaj naque' cheę Dios. Zaj naque' cheę bénnea' dxedábage' Jesucristo. Ba bénele gulé'e lawe' bénnea', na' na'a ba zue' lu xęzr la xu nigá.

<sup>4</sup> Le'e, bi nazrí'ite' lazra', nácale cheę Dios, ne bache bzúale chalá'ala benne' ca' dxelezi xę'e lawe' da szrendxa naca Be' zúale na le'e ca be' zua na lu xęzr la xu nigá. <sup>5</sup> Benne' ca' zaj naque' cheę xęzr la xu nigá. Cheę le' na' dxuluchálaje' cheę da naca na cheę xęzr la xu nigá, na' benne' zaj zre'e xęzr la xu nigá dxelenné' da dxuluchalaj benne' ca'. <sup>6</sup> Dxi'u nácadXu cheę Dios. Benne' zaj núnbe'e Dios dxuluzé' nague' cheędxu. Benne' quebe zaj naque' cheę Dios quebe dxuluzé' nague' cheędxu. Cheę le' na' nezdXu nu benne' zúale Be' cheę xel-la' li le', ne nu benne' zúale be' cheę da dxezi xę na le'.

#### *Tu dxúnzqueze Dios da naca cheę xel-la nazrí'i lazre'*

<sup>7</sup> Le'e, bi nazrí'ite' lazra', dxal-la' zrí'idxu tudxu xetudxu lawe' da dxunna Dios dxi'u xel-la' nazrí'i lazre' na'. Xúgute' benne' zaj naque' zrí'i lazre' caní zaj naque' zrí'ine Dios ne zaj núnbe'e Dios. <sup>8</sup> Bénnea' quebe naque' zrí'i lazre' caní quebe núnbe'e Dios lawe' da tu dxúnzqueze Dios da naca cheę xel-la nazrí'i lázre'. <sup>9</sup> Naca béaqueze Dios nazrí'ile'ene' dxi'u lawe' da gusel-le' Zrí'ine' tu licha' lu xęzr la xu nigá cheę zrué'dxu xel-la' nabán da naca na cheę Zrí'ine' na'. <sup>10</sup> Xel-la' zrí'i lazre' li naca na caní: Quegá dxi'u na' bzrí'idxu Dios. Le' bzrí'ine' dxi'u, ne gusel-le' Zrí'ine' cheę guque' da gudúa na da nabágadXu lau Dios lawe' da nabágadXu dul-la.

<sup>11</sup> Le'e, bi nazrí'ite' lazra', che Dios bzrí'ine' dxi'u caní, dxi'u dxal-la' zrí'idxu tudxu xetudxu. <sup>12</sup> Quebe nu ne le'e Dios, san che zrí'idxu tudxu xetudxu, Dios zúaqueze' lu xichaj lázrdaudxu, na' xel-la' zrí'i lazre' cheę' dxun na li lazre' xel-la' zrí'i lazre' cheędxu. <sup>13</sup> NezdXu nácadXu tuze nen Dios, na' Dios naque' tuze nen dxi'u lawe' da bzue' Be' cheę' lu lázrdaudxu. <sup>14</sup> Ba blé'entu', ne dxuzentu' le'e ca naca da ben Xradxu Dios, gusel-le' Zrí'ine' cheę bedajselé' bénneache cheę xęzr la xu nigá. <sup>15</sup> Bénnea' dxexechebe' naca Jesús Zrí'ine Dios, Dios zúalequeze' bénnea', na' le' zúalequeze' Dios.

<sup>16</sup> Ba núnbeadxu ca nazrí'i Dios dxi'u, ne ba guxéajleđdxu nazrí'ine' dxi'u. Tu dxúnzqueze Dios da naca cheę xel-la nazrí'i lazre', na' bénnea' naque' zrí'i lazre' caní zúalequeze' Dios, na' Dios zúalequeze' le'. <sup>17</sup> Caní dxaca li xel-la' zrí'i lazre' cheędxu, cheę sua zrize lázrdaudxu lu zra guzria xi' Dios bénneache, benne' ca' dxelung' da calęla, lawe' da nácadXu lu xęzr la xu nigá ca nácaqueze Jesucristo. <sup>18</sup> Bénnea' naque' zrí'i lazre' caní quebe dxezrebe' da gaca na lu zra na'. Xel-la' zrí'i lazre' li dxebeáj na chalá'ala xel-la' dxezrebe na'. Nu benne' dxezrebe' dxebeze' bi da saque', na' bénnea' dxezrebe' quebe dxaca li xel-la' zrí'i lazre' cheę'.

<sup>19</sup> Dxi'u nazrí'idxu Dios lawe' da bzrí'i Dios dxi'u nédxudautę'. <sup>20</sup> Che nu benne' dxenné': Nazrí'ida' Dios, ne che benne' nigá dxuzúę' chalá'ala le sa' ljwezre', dxun lazre'. Che quebe nazrí'ine' le sa' ljwezre', bi dxelé'etene', çájazra gunę', zrí'ine' Dios, ne quebe dxelé'ene' Le'? <sup>21</sup> Dios ba bdxixruij be'ene' dxi'u caní, gunné': Bénnea' nazrí'ine' Dios, zrí'iquezne' le sa' ljwezre'.

## 5

*Ca bdxúajdxu chawe' lu xezr la xu nigá*

<sup>1</sup> Xúgute benne' dxeléajle'e Jesús naque' Cristo, Benne' nase-la Dios, benne' caní zaj naque' bi chee Dios, na' che zaj nazri'ine' Xradxu Dios, dxal-la' xelezri'iquezne' xúgute benne' zaj naque' bi chee Dios. <sup>2</sup> NezdXu nazri'idxu benne' zaj naque' bi chee Dios chete nazri'idxu Dios, ne dxundxu ca naca da dxi'e dxi'u. <sup>3</sup> Che da li nazri'idxu Dios, dxundxu da dxi'e dxi'u. Da dxi'e dxi'u quebe naca na stebe. <sup>4</sup> Xúgute benne' zaj naque' bi chee Dios dxdexúaje' chawe' lau da calela da dxaca na lu xezr la xu nigá. Dxdexúajdxu chawe' lau da calela da dxaca na lu xezr la xu nigá lawe' da dxéajledxu da naca na chee Jesucristo. <sup>5</sup> Benne' dxdexuaje' chawe' lau da calela da dxaca na lu xezr la xu nigá naque' bènnea' dxéajle'e naca Jesús Zri'ine Dios.

*Da dxenná Dios ca naca chee Zri'ine'*

<sup>6</sup> Guca bea Jesús naque' Cristo gate gudxúe' nisa, ne gate gulalaj dxen chee'. Quegá gudxúaze' nisa san cá'aqueze gulalaj dxen chee'. Be' chee Dios gudxixruj li'e da nigá, na' Le' dxuchálaje' da li. <sup>7</sup> Chunne' dxelixruj li'e chee' da nigá xabáa, Xradxu Dios, ne Zri'ine', ne Be' Lá'azxa, na' chunne' caní zaj naque' tuze. <sup>8</sup> Cá'aqueze chunna da dxelixruj li na chee da nigá lu xezr la xu nigá, Be' Lá'azxa, ne da guca gate gudxúe Jesús nisa, ne da guca gate gulalaj dxen chee', na' da chunna caní, túzqueze da dxelixruj li na. <sup>9</sup> Dxéajledxu da dxelixruj li bènneache, san da nadxixruj li Dios zácadxa na, na' Le' nadxixruj li'e naca Jesús Zri'inequeze'. <sup>10</sup> Bènnea' dxéajle'e naca Jesús Zri'ine Dios ba guzi'e xichaj lázrdawe' da ba gudxixruj li Dios, san bènnea' quebe dxéajle'e chee Dios dxucá'ang' Dios ca tu benne' wen lazre', lawe' da quebe guxéajle'e chee da ba gudxixruj li Dios ca naca chee Zri'ine'. <sup>11</sup> Da nigá naca na da nadxixruj li Dios, dxenne' ba bènne' dxi'u xel-la' nabán zeajlí canna, na' xel-la' nabán nigá za na lu na' Zri'ine', Jesucristo. <sup>12</sup> Bènnea' zua Zri'ine Dios na' lu xichaj lázrdawe' zúale xel-la nabán nigá le', san bènnea' quebe zua Zri'ine' lu xichaj lázrdawe' quebe zúale xel-la' nabán nigá le'.

*Ca gaca nezdXu nápadxu xel-la' nabán zeajlí canna*

<sup>13</sup> Da nigá dxuzúaja' chee dxéajle chee Zri'ine Dios chee nézele zúale xel-la' nabán zeajlí canna le'e.

<sup>14</sup> Dxuxrén lázredxu Dios lawe' da nezdXu che bi nábadxu lau Le' ca naca da dxaca lazre' Le', Léqueze' wenne' cheedxu. <sup>15</sup> Lawe' da nezdXu Dios dxenne' cheedxu, cá'aqueze ba nezdXu gunna Le' da ba gunábadxu lau Le'.

<sup>16</sup> Che tu benne' dxelé'eng' dxun bíchedxu dul-la da quebe nua na xel-la' gute, dxal-la' nabe' lau Dios ne chee bíchedxu na', na' Dios gunézruje' xel-la' nabán chee', che naca na tu dul-la da quebe nua na xel-la' gute. De dul-la da nua na xel-la' gute, na' quebe dxennía' ná bale lau Dios ne chee bènnea' dxunne' dul-la nigá. <sup>17</sup> Xúgute da calela naca na dul-la, na' de dul-la da quebe nua na xel-la' gute.

<sup>18</sup> NezdXu nu benne' naca bi chee Dios québedxa dxúnqueze' dul-la lawe' da dxuwía dxuxúe Zri'ine Dios le', na' da xriwe' quebe bi dxezeque gunne na le'.

<sup>19</sup> NezdXu nácadxu bi chee Dios, na' xúgute benne' zaj naca chee xezr la xu nigá zaj xu'e lu na' da xriwe'.

<sup>20</sup> NezdXu ba bla' Zri'ine Dios, ne ba bzéajni'ine' dxi'u chee gúnbeadxu Dios li. Nácadxu tuze nen Bènnea' naque' li lazre', Jesucristo, Zri'ine Dios. Benne' nigá naque' Dios li, ne Léqueze' naque' xel-la' nabán zeajlí canna da zúale na dxi'u. <sup>21</sup> Le'e, zri'ina'dau', le guxúe xanne' cuinale chee quebe gucá'ana szrenle bedau' xiaj xaga ca'.

## DIZRA'DAU' GUDXUPE' DA BZUAJ SAN JUAN

*Da naca li, ne xel-la' zri'i lazre'*

<sup>1</sup> Neda', benne' gula wen zrin chee Cristo, dxuzúaja' da nigá chiu' lue', nu'ula zana', ba gucá'a Dios lue'. Dxuzúaja' chee zri'inu' ca'. Da li nazrí'ida' le'e, ne quegá tuze neda', san cá'anqueze benne' ca' zaj núnbe'e da li zaj nazrí'iquezne' le'e. <sup>2</sup> Nazrí'ida' le'e lawe' da ba núnbeadxu da li, da suatequeze na xichaj lázrdauxu. <sup>3</sup> Dxenaba' lau Xradxu Dios, ne lau Xránadxu Jesucristo, Zri'ine Dios, xezá' lazre' chee da xrlátaje, ne xache lazre' le'e, ne gunne' le'e xel-la' dxebeza zri lazre', chee gúnbeale da li, ne chee gácale zri'i lazre'.

<sup>4</sup> Dxebéle'eda' lawe' da ba benda' zri'inu' ca' dxelunbe' ca naca da li, ca naca da bdxixruj be'e Xradxu Dios. <sup>5</sup> Na'a, nu'ula zána'dau', dxata' xúeda' lue' zri'idxu tudxu xetudxu. Da nigá dxuzúaja' chiu' quebe naca na tu da cube da nadxixruj bea Dios, san naca na da ba bendxu nédxudauté. <sup>6</sup> Xel-la' zri'i lazre' li naca bea na che dxundxu ca da nadxixruj bea Dios, na' da nadxixruj be'e naca na da ba bénele nédxudauté, chee zri'idxu tudxu xetudxu.

*Benne' dxelezí xé'e*

<sup>7</sup> Ba belelá' benne' zanté, benne' dxelezí xé'e. Benne' caní quebe dxelexechebe' guca Jesús bela' dxen. Benne' caní zaj naque' benne' dxelezí xé'e, ne dxeledábage' Cristo. <sup>8</sup> Le guxúe xanne' cuínale chee quebe gunítele da dxal-la sile du naxá'.

<sup>9</sup> Nu benne' dxedé' nagá xula chee da nigá quebe dxezilene' ca naca da bsede Cristo, ne quebe zúale Dios le'. Bénnea' dxezilene' ca naca da bsede Cristo, da li Dios zúalene' Le', na' cá'anquez zúale Cristo Le'. <sup>10</sup> Che nu benne' xidé' naga zúale le'e, ne quebe dxusédene' le'e ca naca da bsede Cristo, quebe nnele bénnea' lízrele, ne quebe gápale le' ba lá'ana. <sup>11</sup> Nu benne' gape' bénnea' ba lá'ana, dxun benne' nigá tuze ca da calela da dxun bénnea'.

*Dizra' bzebe*

<sup>12</sup> Da zanté dxal-la' xapa' le'e, san quebe dxaca lazra' guzúaja' na lu xícheze. Dxebeza lazra' xida' xedajná'a le'e, na' guchálajlequeza' le'e, chee gaca béle'edxu.

<sup>13</sup> Bidu ca' chee bi bilu', nu'ula ba gucá'a Dios le', dxulugápabe' lue' diuzre. Ca'an gaca na.

## DIZRA'DAU' GUXUNNE' DA BZUAJ SAN JUAN

*San Juan dxenné' da chawe' chee benne' le' Gayo*

<sup>1</sup> Neda', benne' gula wen zrin chee Cristo, dxuzuaja' da nigá chiu' lue', Gayo, bi nazri'ite lazra'. Da líqueze nazri'ida' lue'.

<sup>2</sup> Lue', bi nazri'ite lazra', dxenaba' lau Dios gaca da chawe' chiu', ne su' chawe', ca dxaca chee béenne'du xu'u. <sup>3</sup> Gubéle'eda' gate belelá' tu chupa benne' bíchedxu, ne gulé'e neda' ca dxéajle'u chee Xránadxu, ne ca dxunu' ca naca da li. <sup>4</sup> Québequeze bi de da gundxa na neda' súale'a xel-la' dxebé, ca xel-la' dxebé da zua' gate dxenda' dxelún benne' zaj naque' ca zri'inequeza' ca naca da li.

<sup>5</sup> Lue', bi nazri'ite lazra', nacu' benne' li lazre' ca naca da dxunu' dxácalenu' bi bíchedxu ca', ne da naca blaudxa dxácalenu' bi bíchedxu za'aque' xezre xula. <sup>6</sup> Lau benne' zaj nazrague' chee Dios nigá dxuluchalaj bi bíchedxu caní ca nazri'inu' bi bíchedxu ca'. Da cháwedau' dxunu' gate dxugú'u benne' caní neza, dxácalenu' le' ca naca da dzezaca ba lazre' Dios. <sup>7</sup> Benne' caní zjaque' dxeluné' zrin nigá lawe' da zaj nazri'ine' Cristo, ne quebe bi dxelezi'e da xelunna benne' quebe zaj núnbe'e Dios. <sup>8</sup> Chee le' na' dxal-la' gápadxu ba lá'ana benne' caní chee gúnledxu le' zrin chee da li.

*Da calela da dxun benne' le' Diótrfes*

<sup>9</sup> Ba bzuaja' chee benne' zaj nazrague' chee Dios naga zu', na' bénnea' le' Diótrfes quebe dxape' netu' ba lá'ana lawe' da dxaca lazre' gaque' blau lávela benne' ca'. <sup>10</sup> Chee le' na', che xida' naga zu', guzéajni'ida' benne' ca' ca naca da dxun bénnea', dxezi' tizre' netu', ne dxennéle'e cheentu'. Qeégá da nigáze dxuné', san cá'anqueze quebe dxezi' lu ne'e benne' bíchedxu zá'aque' ga na', ne quebe dxu'e lataj benne' ca' dxelaca lazre' xelezi' lu ne'e benne' caní, ne dxexebéaje' le' ládujla benne' ca' zaj nazrague' chee Dios.

<sup>11</sup> Lue', bi nazri'ite lazra', quebe gunu' lue' ca naca da calela da dxelún benne' caní. Ben ca naca da xrlátaje. Bénnea' dxuné' da xrlátaje naque' chee Dios, san nu benne' dxuné' da calela, quebe ne gúnbeaqueze' Dios.

*Da xrlátaje da dxun benne' le' Demetrio*

<sup>12</sup> Xúgute' benne' dxelenné' da chawe' ca naca da dxun Demetrio, na' da líqueze naca bea na ca dxuné'. Cá'anqueze netu' dxixruj beantu' ca naca da dxuné', na' lue' nézqueznu' dxuchálajntu' da li.

*Dizra' bzebe*

<sup>13</sup> Déle'e da dxal-la' guchálajlena' lue', san quebe dxaca lazra' guzúaja' na lu xícheze, <sup>14</sup> lawe' da dxebeza lazra' lé'ete'quezda' lue'. Nadxa guchálajdxu caníqueze.

<sup>15</sup> Dxenaba' lau Dios sua zrize lazrda'u. Bi bíchedxu zaj zra' nigá dxulugape' lue' diuzre. Bgapa lue' diuzre tu benne' bíchedxu zaj zre'e naga zu'. Ca'an gaca na.

## XTIZRA DIOS DA BZUAJ SAN JUDAS

*Dizra' da gusel-la San Judas chee bi ca' chee Dios*

<sup>1</sup> Neda', Judas, wen zrin chee Jesucristo, naca' benne' biche Jacobo, na' dxesel-la' dizra' nigá cheele le'e, nácale benne' ca' ba gunné Xradxu Dios, ne ba gucué'e le'e chee gácale bi chee', ne dxuxú'e le'e lawe' da nácale tuze nen Jesucristo. <sup>2</sup> Dxenaba' lau Dios xache lázrele'e le'e, ne gúnnale'e cheele xel-la' dxebeza zri lazre', ne xel-la' zri'i lazre'.

*Ca naca chee benne' ca' dxulusédene' da wen lazre'  
(2 Pedro 2.1-17)*

<sup>3</sup> Benne' bícha'dau' nazri'ite lazra', ba guca lázreli'a guchálajlena' le'e ca naca chee xel-la' weselá da ba nazile le'e, ne cá'anqueze neda', san na'a dxun na ba xen guchálajlena' le'e, ne gata' xueda' le'e gapa típale da naca chee xel-la' dxeajli lazre' da ba benna Dios chalásaze chee bi chee' ca'. <sup>4</sup> Caní naca lawe' da ba gulú'u benne' wen lazre' ca' ládujla dxi'u, benne' ca' ba gunná Dios gate nate dxal-la' xelebía xi'e. Zaj naque' benne' dxelune' da sban, na' lawe' da dxunite lau Dios chee benne' dul-la, dxeléquene' zaj nápaqueze' lataj xelune' cáteze da dxelaca lazre', ne dxuluzú'e chala'ala Dios tu licha', Bénnea' dxenná bea, ne Xránadxu Jesucristo.

<sup>5</sup> Lácala ba nézqueze le'e da nigá, dxaca lazra' gusá'a lázrele ca ben Xradxu Dios gate bebéaj'e benne' Israel ca' ládujla benne' Egipto, na' gudé na' bzria xi'e benne' Israel ca', benne' quebe guléajle'e chee'. <sup>6</sup> Cá'anqueze gubáz chee xabáa, gubáz ca' chee Dios, quebe belune' ca da guzre Dios le', san bulucá'ane' lataj chee'. Dios nuzague' le' lu da chul-la, ne nuchéaj'e gubáz ca' chalásaze nen du xia, chee guzria xi'e le' lu zra bzebe ni'. <sup>7</sup> Cá'anqueze guca chee xezre Sodoma, ne xezre Gomorra ne chee xezre walízredu ca'. Ca belún gubáz chee xabáa ca', cá'anqueze belún bénneache chee xezre caní. Buluzúa cuine' lu da sban, ne belune' cáteze da gulaca lazre', ne buluzú'e chala'ala ca da bdxixruj bea Dios chee xel-la' zúale nu'ula. Na'a, lawe' da bzria xi' Dios benne' ca', bde'e le' tu lu xi' da québedxa xexula na, na' da na' guca chee benne' caní dxuzéajni'i na dxi'u chee quebe gúnquezdxu ca'.

<sup>8</sup> Láqueze gulaca caní chee benne' ca', cá'anqueze dxelún benne' caní, zjácalene' xel-la' bchigala, ne dxuluca'ane' sban belá' dxen chee', ne dxuluzú'e chala'ala xel-la' dxenná bea chee Xránadxu, ne dxelenné' schanni' chee gubáz chee xabáa, gubáz ca' chee Dios. <sup>9</sup> Léqueze Miguel, gubáz blau chee xabáa chee Dios gate gudil-lalene' da xriwe', ne btil-le' dizra' nen le' na chee guca bexu'e bel-la' dxen chee Moisés, quebe hexázrjene' nnabe' da ba xa', san guzre' na: "Xránadxu Dios til-laqueze' lue'." <sup>10</sup> Na'a benne' caní dxelenné' schanni' chee da quebe zaj núnbe'e, na' da ba zaj núnbeaqueze', ca da zaj neze be xixre', be quebe zaj naxéajni'iba', da caní dxuluchíne'e chee xuluzría xi' cuine'.

<sup>11</sup> Edxugua benne' caní lawe' da dxelune' ca da ben Caín, chee gulezi' lu ne'e dumí, buluzú'e chala'ala da dxenná Dios ca ben Balaam, na' welexenite' ca guca chee Coré, bénnea' bzria xi' Dios lawe' da gudábage' xrtizra Dios. <sup>12</sup> Benne' caní, gate dxelágulene' le'e lu laní cheele dxelune' cheajlechaze bénneache. Dxelé'aj dxelawe' nen le'e, ne quebe dxelape' ba lá'ana Dios. Dxelún cuine' ca benne' dxuluxú'e' zrila', san dxuluxúeze cuine'. Zaj naque' ca beuj ca' quebe zaj xuzru nisa, beuj ca' da dxua be'. Zaj naque' ca xaga ca' quebe dxelebía na da xixre chee na, ne zaj nabizre na du lue na, ne ba zaj zua na chee lepe na. <sup>13</sup> Zaj naque' ca xeajxruza chee nísadau' da dxedxú'u na bzrina' sgute, da dxulé'e na ca da sban da dxelune'. Zaj naque' ca belaj ca' dxelecuasa na lu xrneze na, ne zaj nabía xi na chee cheajsúa na chadía chacanna lu da chul-la.

<sup>14</sup> Cá'anqueze Enoc, benne' chee gazre cue' zre sua Adán gunné' waláz chee Dios ca naca chee benne' caní, gunné': "Ble'eda' Xránadxu ze'e nen gaxúane gaxúane bi chee ca' <sup>15</sup> chee guchi'e ca da zaj nun xúgute bénneache. Gulezria xi' xúgute benne' wen da sban ne chee da calela da belune' lu xel-la' calela chee', nen benne' dul-la ca' ne chee xúgute dizra' schanni' da gulenné' chee Dios." <sup>16</sup> Zaj naque' benne' wagu zria, ne benne' wezi tizra', benne' dxelunze' cáteze dxelezaca ba lazre'. Dxluchálaje' dizra' da dxucá'ana szren na le', ne dxelennáze' da chawe' chee bénneache chee xezezi'e da zaj de chee benne' ca'.

*San Judas dxenné xuene' bi ca' chee Xránadxu*

<sup>17</sup> Le'e, benne' bícha'dau' nazri'ite lazra', le gusá lázrele ca zánete' iza gulenná benne' gubáz chee Xránadxu Jesucristo, <sup>18</sup> gulé'e le'e: Lu zra bzebe welezrá' benne' xelún le' chee da ca' zaj naca lá'azxa, ne xelune' cáteze zaj naca da sban da dxelezá lazre'. <sup>19</sup> Benne' caní dxelune' chupa la'a bénneache. Zaj naque' benne' chee xezr la xu nigá, ne quebe zúale Be' Lá'azxa chee Dios le'.



<sup>20</sup> Le'e, benne' nazri'ite lazra', le se chacha ca naca lu xel-la' dxeajlí lazre' lá'azxa da nápaie. Le guchálajle Dios, zúale xel-la' waca chee Be' Lá'azxa le'e. <sup>21</sup> Le cha' lu xel-la' zri'i lazre' chee Dios, ne le cueza zra gate gunna Xránadxu Jesucristo dxi'u xel-la' nabán da zeajlí canna lu xel-la' zri'i lazre' chee'.

<sup>22</sup> Le gácale benne' ca' dxelaca chupa lazre' ca naca chee Cristo. <sup>23</sup> Le gun xeeléa benne' xula chee quebe chjaque' lu xi' chee lataj ba xa', ne le xexache lazre' xezícala bénneache. Le guxúe xanne' ca naca da sban da dxelún benne' ca' chee quebe ca'a le na le'e.

*San Judas dxue lá'ane' Dios*

<sup>24-25</sup> Dios tu licha', Benne' naque' sina, ne naque' Weselá cheedxu, wazéquene' guxúe' le'e chee quebe cuásale Le', ne chee guzúe' le'e lau Le' lu xel-la' szren chee', ne chee quebe dxenle da naca chee dul-la, ne chee súalequeze xel-la' dxebé le'e.

¡Gaca ba Le', ne gaca chee' xel-la' szren, ne xel-la' waca, ne xel-la' dxenná bea, ne chee Xránadxu Jesucristo, na'a zra, ne chadía chacanna! ¡Ca'an gaca na!

## DIZRA' DA BLE'E JESUCRISTO JUAN

### *Da ble'e Jesucristo Juan*

<sup>1</sup>Da nigá naca tu da bnezruij Dios Jesucristo da gulé'ene' wen zrin chee' ca' ca naca da dxal-la' gácate. Jesucristo gusel-le' gubáz chee' xabáa chee', na' le' bzéajni'ing' neda', Juan, naca' wen zrin chee' Jesús. <sup>2</sup>Neda' dxulé'eda' le'e da li ca naca xúgute' da ble'eda', ne dxexecheba' ca naca dizra' chee' Dios, ne ca naca da gunná Jesucristo.

<sup>3</sup>Ba neza zrentę naca na chee' benne' gulabe', ne cá'aqueze ba neza zrentę naca na chee' benne' ca' dxuluzę nague' chee' bėnnea' gulabe' dizra' nigá da bėnna Dios, ne xelune' ca naca da naxúaj nigá, lawe' da ba za gáguze zra gaca na.

### *Juan dxuzuaje' chee' gazre cue' benne' dxelėjle'e chee' Jesús*

<sup>4</sup>Neda', Juan, dxuzúaja' chee' gazre cue' benne' dxelėjle'e chee' Jesús, zaj zre'e naga nababa Asia. Dxenaba' lau Dios gaca chawe' cheele, ne gunne' le'e xel-la' dxebeza zri lazre'. Le' guzúaqueze' nédxudaute, ne zúaqueze' na'a, ne tu súazqueze' chadıa chacanna. Gazre Be' ca' zaj zra' ca li naga dxé' Dios zaj naca Le' tuze, <sup>5</sup>ne cá'aqueze Jesucristo naque' Le' tuze ca naca da chawe' da dxun Dios cheele. Jesucristo naque' benne' li lazre' dxexechebe' ca da zaj naca chee' Dios, ne naque' benne' nedxu bebane' chalásaze ládujla benne' gate ca', ne nape' xel-la' dxenná bea lówela xúgute' wenná bea zaj zre'e xęzr la xu nigá. Cristo nazri'ine' dxi'u, ne ba gudibe' xichaj lázrdaudxu. Begüe' dul-la cheedxu gate blálaje' dxen cheéqueze' le'e xaga begúaj. <sup>6</sup>Bęne' dxi'u ca benne' wenná bea ca', ne bxruze ca' chee' gundxu zrin chee' Dios chee', Bėnnea' naque' Xre'. ¡Gaca ba Le', ne gape' xel-la' dxenná bea chadıa chacanna! ¡Ca'an gaca na!

<sup>7</sup>Le na' xque. Cristo ze'e lu beuj bza. Xúgute' bėnneache xelelé'ene' Le', ne cá'aqueze benne' ca' belune' Le' we', na' ca naca bėnneache zaj zra' lu xęzr la xu xelebezre xache'e ca xelelé'ene' Le'. ¡Awe', ca'an gaca na!

<sup>8</sup>Le' dxenné': "Neda' zúaqueza' nédxudaute, ne zúaqueza' bzébedxa. Dxuna' su lau sua xúgute' ne guna' xexuzre na." Caní dxenná Xránadxu, nape' dutę xel-la' dxenná bea, naque' Bėnnea' guzúaqueze', ne zúaqueze', ne tu súazqueze'.

### *Juan dxelé'ene' tu da ble'e Dios le' da naca na da xabáa chee' Cristo*

<sup>9</sup>Neda', Juan, naca' benne' bichele le'e, ne naca' tuze nen le'e lu xel-la' zi', ne lu xel-la' dxenná bea, ne lu xel-la' dxuchaga lau da dxunna Jesucristo dxi'u. Ca tu benne' xu'e lizre xia guzúa' lu xęzr la xu Patmos da naxechaj nísadau', lawe' da bchálaja' dizra' chee' Dios ne dxuna' ba nalí ca naca chee' Jesucristo. <sup>10</sup>Guzúale' Be' Lá'azxa neda' lu zra chee' Xránadxu, na' benda' cúzrula' chi'i tu benne' dxenné' zizraj ca chi'i luzu da dxulucuezre'. <sup>11</sup>Gunné':

—Neda' naca' nedxu, ne bzebe ca naca da dxezú lau, ne da dxexuzre na. Bzuaj tu lu xiche da dxelé'enu', na' gusel-la na chee' gazre cue' bėnneache dxelėjle'e chia', zaj zre'e naga nababa Asia, benne' ca' zaj zre'e xęzre Efeso, ne xęzre Esmirna, ne xęzre Pérgamo, ne xęzre Tiatura, ne xęzre Sardis, ne xęzre Filadelfia, ne xęzre Laodicea.

<sup>12</sup>Bexéchaja' chee' le'eda' nu chi'i na' gunné' neda', na' ca bexéchaja' na', ble'eda' gazre da zua na xi' da' zaj naca na oro. <sup>13</sup>Laduj da zaj zua na xi' ca' ble'eda' tu benne' naque' ca Bėnnea' gulje' bėnneache, nácuę' zra lane' da dxezrintę lu ni'e dxe'ela, na' xu'u tu bazxu oro lachu'e. <sup>14</sup>Xicha xíchaje' zaj naca na chiche ca zrila' chiche, u ca bezze', na' xiaj lawe' dxelácatite legala na ca xi'. <sup>15</sup>Ni'e dxelácatite na ca xia da gudete' bea guxu'u na lu xi', na' chi'e naca na zizraj ca naca chi'i' zane' xegu zri'a ca'. <sup>16</sup>Lu ne'e da zua xabęla nuxre' da ca' zaj naca ca gazre belaj xabáa, na' dxu'e dxedxuaj da naca na ca tu xia da nalá dxupa la'ate. Dxu'a lawe' dxácatite na ca gubizra gate dxennále'e na.

<sup>17</sup>Ca ble'eda' Le', xeajchazia' zran ni'e ca tu benne' gate. Na' Le' guxrúa ne'e xabęla neda', na' gunné':

—Quebe zrebu'. Neda' zúaqueza' nédxudaute, ne zúaqueza' bzébedxa. <sup>18</sup>Naca bánqueza'. Gutia', na' na' nabánqueza' chadıa chacanna. Neda' nuxra' zren xia chee' xel-la' gute, ne chee' lataj ba xa'. <sup>19</sup>Bzuaj da ba blé'enu' ne da dxaca na'a, ne da gaca te nigá. <sup>20</sup>Caní naca da zéaje ca gazre belaj ca' blé'enu' nuxra' na'a xabęla, ne ca naca chee' gazre da zua na xi' da' zaj naca na oro. Gazre da zaj naca ca belaj ca' zéaje na gubáz ca' nasele' chee' gazre cue' bėnneache chia' ca', na' gazre da zua na xi' zéaje na gazre cue' bėnneache chia' ca'.

## 2

*Dizra' gusel-la Cristo chee' gazre cue' bėnneache chee'*

*Dizra' gusel-le' chee' bi chee' zaj zre'e xęzre Efeso*

<sup>1</sup> Guzre Jesús neda':

—Bzuaj chee gubáz chia' zúalene' bi chia' zaj zre'e xezre Efeso. Bzuaj da nigá: Caní dxenná Jesús, Bénnea' nuxre' gazre belaj ne'e xabela, ne dxedé' laduj gazre da zua na xi' da zaj naca na oro. <sup>2</sup> Neda' nezda' xúgutę da dxunle. Nezda' dxúnle'ele zrin ne nácale zren lazre', ne quebe dxuele lataj benne' wen da zrinna' ca'. Neda' nezda' ba bxue xánnele benne' ca' dxelenné' zaj naque' gubáz chia' ne quebe zaj naque', na' ba ble'ele zaj naque' benne' wen lazre'. <sup>3</sup> Gúcale zren lazre', ne gudele xel-la' zi', na' bęnle'ele zrin chia', ne quebe gute ni'a na'le. <sup>4</sup> Na'a zua tu da dxagu na zria chee, quębedxa nazri'ile neda' ca bzri'ile neda' nédxute. <sup>5</sup> Chee le na', le gusá lazre' ca bzri'ile neda' nédxute, ne le xexiáje lazre', na' le gun ca da bęnle nédxute. Che quebe gunle caní xídaqueza' naga zúale, na' xecá'a xrlátajle lu da naca chia' chee quębedxa gácale ca da zua na xi' chia'. Caní guna' che quebe xexiáje lázrele. <sup>6</sup> Zua tu da dxexecá'a na le'e, dxecuıdele da dxelún benne' ca' zaj nazı le' nicolaıta ca', benne' ca' dxulucá'ana szrene' bedau' xiaj xaga ca', da na' dxecuıdequeza' neda'. <sup>7</sup> Benne' zua nague' dxal-la' xenne' da nigá dxę Be' Lá'azxa bi chia' ca'. Benne' ca' xeledxúaje' xrlátajle lawe' da zrinna', neda' gunézruja' da xelawe' da dxebıa xaga da dxunna na xel-la' nabán, ne zua na lu lataj xrlátajle chee Dios.

*Dizra gusel-le' chee bi chee' zaj zre'e xezre Esmirna*<sup>8</sup> Guzre Jesús neda':

—Bzuaj chee gubáz chia' zúalene' bi chia' zaj zre'e xezre Esmirna. Bzuaj da nigá: Caní dxenná Jesús, Bénnea' zúaqueze' nédxudaute, ne zúaqueze' bzębedxa, Bénnea' gutie', ne bebánqueze'. <sup>9</sup> Neda' nezda' xúgutę da dxunu'. Nezda' gudele xel-la' zi', ne nácale benne' xache'. Da li nácale benne' gunnı'a. Nezda' ca dxelenné' schanni' chee'le benne' ca' dxelenné' zaj naque' judıo, san zaj naque' tu cue' benne' dxulucá'ana szrene' da xriwe'. <sup>10</sup> Quebe zrebele ca naca xel-l' a' zi' da tele, lawe' da guzra' da xriwe' bál-lale le'e lizre xia chee gul'e lau da nácale, na' tele xel-la' zi' lawe' chi zra. Le gaca li lazre' lácala xelutie' le'e, na' neda' gunna' le'e xel-la' nabán ca tu da dxunna bea na bedxuajle chawe'. <sup>11</sup> Benne' zua nague' dxal-la' xenne' da nigá dxę Be' Lá'azxa bi chia' ca'. Benne' ca' xeledxúaje' chawe' lawe' da zrinna', quebe bi gune da zi' da xa' da zeaılı canna chee benne' ca'.

*Dizra gusel-le' chee bi chee' zaj zre'e xezre Pérgamo*<sup>12</sup> Guzre Jesús neda':

—Bzuaj chee gubáz chia' zúalene' bi chia' zaj zre'e xezre Pérgamo. Bzuaj da nigá: Caní dxenná Jesús, Bénnea' nuxre' xia da nalá dxupa la'a. <sup>13</sup> Neda' nezda' xúgutę da dxunle. Nezda' zúale naga dxenná bea da xriwe'. Quebe nusanle da naca chia'. Quebe bsanle dxexehębele chia', ne lu zra ca' gate belutie' Antipas, benne' bechebe' du lazre' da naca chia' ládujla le'e, naga zua da xriwe'. <sup>14</sup> Na'a, zua tu da dxagu na zria chee, dxuele lataj zaj zra' ládujla le'e benne' ca' ne zjácálene' da bşede Balaam, bénnea' gulı'u xel-le' Balac, bennen' bene' belún benne' Israel ca' dul-la, na' gulawe' da buluzrıe' lau bedau' xiaj xaga ca', ne belune' da sban. <sup>15</sup> Cá'aqueze zaj zra' ládujla le'e bal-la benne' ne zjácálene' da dxulusede benne' zaj nazı le' nicolaıta, da na' dxecuıdequeza' neda'. <sup>16</sup> Chee le na' le xexiáje lázrele lawe' da che quebe xexiáje lázrele xida' naga zúale, na' tıl-lalena' benne' ca' nen xia nalá da dxedxuaj na dxu'a. <sup>17</sup> Benne' zua nague' dxal-la' xenne' da nigá dxę Be' Lá'azxa bi chia' ca'. Benne' xedxuajle' chawe' lawe' da zrinna', neda' gunézruja' da gawe' da naca na xeta maná da nagache na xabáa, ne gunézruja' le' tu xiaj chiche, na' le'e xiaj na' naxúaj tu la cube chee bénnea', da quebe nu neze, san tuze bénnea' si'e na.

*Dizra gusel-le' chee bi chee' zaj zre'e xezre Tiatira*<sup>18</sup> Guzre Jesús neda':

—Bzuaj chee gubáz chia' zúalene' bi chia' zaj zre'e xezre Tiatira. Bzuaj da nigá: Caní dxenná Jesús, Bénnea' zaj zra xiaj lawe' da dxelácatite na ca xi', na' ni'e zaj naca na ca xia gache da nabá'ale' na. <sup>19</sup> Neda' nezda' xúgutę da dxunle. Nezda' ca nazri'ile neda', ne ca dxęajlele chia', ne ca dxunle zrin chia', ne ca nácale zren lazre', na' dxúndxale na'a da zrendxa ca da bęnle nédxute. <sup>20</sup> Na'a, zua tu da dxagu na zria chee, dxuele lataj nu'ula na' le' Jezabel, nu'ula na' dxenné' dxuchálaje' waláz chee Dios, na' dxezi xe' benne' wen zrin chia' ca' ca naca da dxusędene' chee xelune' da sban, ne xelawe' da dxuluzrıe' lau bedau' xiaj xaga ca'. <sup>21</sup> Neda' ba be'a nu'ula na' lataj xexiáje lazre', na' quebe guca lazre'. Quebe dxusané' ca naca da sban da dxune'. <sup>22</sup> Na'a, che benne' ca' quebe xulusané' ca da dxelune' ca dxun nu'ula na', neda' cu'a le' xel-la' we' da quixruj na le', na' weledęle' xel-la' zi' benne' ca' dxelune' dul-la nen nu'ula na', <sup>23</sup> na' gútequeza' benne' ca' zaj de'e nu'ula na'. Canı gaca, xúgutę cue' bi chia' ca' xeque be'ene' neda' nezda' ca naca dutę da zua lu xichaj lázrdau bénneache, na' tu tule le'e gunna' le'e cáteze naca da bęnle. <sup>24</sup> Xezıcadxale le'e zrale xezre Tiatira, quebe zęajlele da na' dxusęde nu'ula na', ne quebe ne sile da dxenné' naca

na da nagache cheę da xriwe', neda' dxapa' le'e, quebe bi xetú da gucha' le'e gunle. <sup>25</sup> Le gapa chi'i xel-la' dxixruj be'e da ba gucha' le'e gunle ca zrindxa zra xelá'a neda'. <sup>26</sup> Benne' ca' xeledxúaje' chawe' lawe' da zrinnaj, ne xelunę' ca' dxaca lazra' neda' ca' zrindxa zra bzebe ni', neda' gunézruja' cheę benne' ca' xel-la' dxenná bea lawe' xęzre ca'. <sup>27</sup> Ca' bęn Xra', benne' neda' xel-la' dxenná bea, na' xelenná be'eng' benne' xęzre ca' nen tu var xia, na' xuluzria xi'e xęzre ca' ca' dxun tu benne' dxelę' tu xesu' xu. <sup>28</sup> Cá'anqueze gu'a benne' ca' lataj xelezúalęne' neda', naca' ca' belaj zila. <sup>29</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

### 3

#### *Dizra' gusel-łę' cheę bi cheę' ca' zaj zře'ę xęzre Sardis*

<sup>1</sup> Guzre Jesús neda':

—Bzuaj cheę gubáz chia' zúalęne' bi chia' zaj zře'ę xęzre Sardis. Bzuaj da nigá: Cani dxenná Jesús, Bénnea' zaj zúalę gazre Be' cheę Dios Łę', ne nuxre' da gazre ca' zaj naca ca' belaj ca'. Neda' nezda' xúgute' da dxunle. Nezda' ba nácale ca' benne' gate ca' lau Dios lácala dxeleque bénneache naca banle. <sup>2</sup> Le guxúe, ne le sua chacha cheę quębedxa gácale ca' benne' ca' ba zúate xelátie'. Dxele'eda' da dxunle, quebe naca na li lazre' lau Dios chia'. <sup>3</sup> Le gusá lazre' ca' naca da ba nazédele. Le chéajle na, ne le xexiáje lazre'. Che quebe guxúe cuinale wida' naga zúale ca' za tu gubán, ne quebe nézele bi zra xida'. <sup>4</sup> Zaj zra' ládujla le'e bábaze benne' quebe ne xelunę' da sban, na' benne' cani xeledáłęne' neda', ne xelácuę' zra lanę' chiche lawe' da cani dxal-la' gaca cheę'. <sup>5</sup> Benne' ca' xeledxúaje' chawe' lawe' da zrinnaj xelácuę' zra lanę' chiche ne quebe xusula' la benne' ca' lu xiche naga zaj naxúaj la benne' ca' zúalę xel-la' nabán le', na' xechęba' cheę benne' ca' lau Xra' ne lau gubáz cheę xabáa cheę' ca'. <sup>6</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

#### *Dizra' gusel-łę' cheę bi cheę' zaj zře'ę xęzre Filadelfia*

<sup>7</sup> Guzre Jesús neda':

—Bzuaj cheę gubáz chia' zúalęne' bi chia' zaj zře'ę xęzre Filadelfia. Bzuaj da nigá: Cani dxenná Jesús, Bénnea' naque' lá'azxa ne li lazre', Bénnea' nuxre' zren xia da dxunna bea na nape' xel-la' dxenná bea ca' da gudapa wenná bea David, na' gate salje', netú quebe nu gaca xusezxuj, na' gate xusézxuję' netú quebe nu gaca salaj. <sup>8</sup> Neda' nezda' xúgute' da dxunle. Nuzúa' laule le'e tu dxa xu'u da naxalaj, da quebe nu gaca xusezxuj. Lácala quebe nádipatecale, zéajlele dizra' chia', ne quebe ne gusán lázrele da naca chia'. <sup>9</sup> Benne' ca' dxulucá'ana szrenę' da xriwe', benne' wen lazre' ca', benne' dxelennę' zaj naque' judío ne quebe zaj naque', neda' guna' xuluzú zribe' zran ní'ale cheę xelenézene' neda' nazrí'ida' le'e. <sup>10</sup> Ba bęnle ca' da gucha' le'e gunle cheę gácale zren lazre', na' cheę le' na' guxúequeza' le'e lawe' xel-la' zi' da xeledé xúgute' bénneache zaj zře'ę lu xęzr la xu, cheę gulé'e lau da zaj naque'. <sup>11</sup> Wídaze'queza'. Le gapa chi'i da nácale cheę quebe nu ca'a ca' da dxal-la' si'le. <sup>12</sup> Benne' ca' xeledxúaje' chawe' lawe' da zrinnaj, neda' gun chacha' benne' ca', na' xelaque' ca' ze'e xiaj ca' zaj zua na lizre Xra', ne cabátaquezdxa xelexedxúaje' na', na' lu lázrdawę' guzúaja' La Xra', ne la xęzre cheę Dios chia' da naca na Jerusalęn cube da za' xabáa, ne Lá' cube. <sup>13</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

#### *Dizra' gusel-łę' cheę bi cheę' zaj zře'ę xęzre Laodicea*

<sup>14</sup> Guzre Jesús neda':

—Bzuaj cheę gubáz chia' zúalęne' bi chia' zaj zře'ę xęzre Laodicea. Bzuaj da nigá: Cani dxenná Jesús, Bénnea' naque' li lazre', Bénnea' dxexechębe' da li, Bénnea' naque' naga guzú lau xúgute' da bęn Dios. <sup>15</sup> Neda' nezda' xúgute' da dxunle. Nezda' quebe nácale zaga ca' dxunle da naca chia', ne quebe nácale látęla. Dxaca lazra' la gácale zaga u la. <sup>16</sup> Nácale ca' nisa bate, ne quebe nácale zaga, ne quebe nácale la, na' chu'una' le'e ca' tu benne' dxexębe' nisa bate. <sup>17</sup> Le'e dxennale nácale gunní'a, ne dxaca chawe' cheęle ne quebe bi dxexázrjele, na' quebe dxęquebe'ele' dxaca ba xa' cheęle ne dxezaca zi'le, ne nácale xache', ne nácale la chul-la, ne nácale gala xide. <sup>18</sup> Cheę le' na' dxuzęajni'ida' le'e si'le lu na' neda' da naca ca' oro da nabá'a na lu xi', cheę gápale xel-la' gunní'a li lazre', ne si'le zra lánale chiche cheę gáculę, da gunna' le'e, na' xenite xel-la' stu' cheę da gúcale gala xide, ne si'le da cu'ule xiaj laule cheę xelé'ele. <sup>19</sup> Neda' dxusízreda', ne dxudéa' xel-la' zi' xúgute' benne' ca' nazrí'ida'. Cheę le' na' dxal-la' xexiáje lázrele ne gunle zrin chia' du lázrele. <sup>20</sup> Le na' xque. Neda' zea' dxa xu'u dxennia'. Che nu benne' xenne' chi'a, ne salje' xu'u, na' chu'a gágulęna' le', na' le' gágulęne' neda'. <sup>21</sup> Benne' ca' xeledxúaje' chawe' lawe' da zrinnaj, neda' gunézruja' le' lataj xelebé'łęne' neda' naga dxenná be'a, ca' neda' bedxúaja' chawe', ne dxé'łęna' Xra' naga dxenná bea Łę'. <sup>22</sup> Benne' zua nague' dxal-la' xenne' da nigá dxę Be' Lá'azxa bi chia' ca'.

## 4

*Dxulucá'ana szrenę' Dios lu xabáa*

<sup>1</sup> Ca gudé na' gunná'a, na' ble'eda' tu dxa xu'u da naxalaj na xabáa, na' benda' chi'i Bénnea' benda' cheę' nédxutę da naca na ca chi'i luzu da dxulucuezre', na' guzre' neda':

—Guluén nigá, na' gulé'eda' lue' da ca' dxal-la' gaca ca te cheę da nigá.

<sup>2</sup> Ca gunné' ca' guzúale Be' Lá'azxa neda', na' ble'eda' tu lataj blau xabáa, ne ble'eda' tu Benne' zaca dxe'e lataj blau na'. <sup>3</sup> Bénnea' dxe'e lu lataj blau na' nalé' ca tu xiaj jaspe da dxácatite na, u ca tu xiaj cornalina, na' dxu'a lataj blau na' naxechaj ca tu bchita' da dxácatite na ca tu xiaj esmeralda. <sup>4</sup> Dxu'a lataj blau na' zaj zua tape dxua lataj naga zaj dxe' tape dxua benne' gula ca', zaj nacue' zra lanę' chiche, ne zaj zria xíchaję' da zaj naca na oro. <sup>5</sup> Lu lataj blau na' dxeledxúaj xesa, ne dxaca nine, ne dxelenné' guziu', na' lau lataj blau na' zaj zua gazre xi' dxelala na, da zaj naca na gazre Be' cheę Dios. <sup>6</sup> Le na' lau lataj blau na' de ca tu nísadau' da naca na ca xiaj esa' xani'le'e.

Laduj na' dxu'a lataj blau na' zaj zra' xetapa da zaj naca ban, zaj zua xiaj lau cuzre', ne laule'. <sup>7</sup> Benne' nedxu nalé'e ca tu beżre xixre', na' benne' gudxupe' nalé'e ca tu beżre, na' benne' guxunne' naca lawę' ca lu bénneache, na' benne' gudape' nalé'e ca tu bsia nachiluj xilaba'. <sup>8</sup> Dápatę benne' caní zaj zua xrupa xrile' tu tue', na' dxupa la'a le'e xrila benne' caní zaj zria zane' xiaj lawę'. Te zra ne chizrela quebe dxulusanę' dxelenné':

Lá'azxa, lá'azxa, lá'azxa naca

Xránadxu Dios nape' dute xel-la' dxenná bea,

Bénnea' guzúaquezę', ne zúaquezę', ne tu súazquezę'.

<sup>9</sup> Tu tu lasa gate dápatę benne' ban caní dxelegú'e ba Dios, ne dxulucá'ana szrenę' Le', ne dxelé'e Le': Xcalenu', Bénnea' zúaquezę' chadía chacanna, <sup>10</sup> na' dape dxuatę benne' gula ca' dxuluzú zribe' lau Le', ne dxulucá'ana szrenę' Bénnea' zúaquezę' chadía chacanna, ne dxuluzúe' da ca' zaj zria xíchaję' ca' lau lataj blau na', dxelenné':

<sup>11</sup> Xránantu' Dios, Lue' naca chiu' si' lu na'u xel-la' szren,

ne xel-la' ba lá'ana, ne xel-la' dxenná bea,

lawe' da beńu' Lue' xúgutę da de,

na' ca dxaca lazru' Lue' zaj zua na, ne gulá gulebinna na.

## 5

*Tu xiche nadube, ne Bénnea' naque' Zrila'dau'*

<sup>1</sup> Lu na' xabeła cheę Dios, Bénnea' dxe'e lataj blau na', ble'eda' tu xiche nadube, da naxúaj dxupa la'ate na, na' nazriche na gazre da dxelunna bea na. <sup>2</sup> Ble'eda' tu gubáz cheę xabáa nápalé'e xel-la' waca, na' gunné' zizraj:

—¿Nuzra naca cheę' chíluje' xiche na', ne cheze' da ca' dxelunna bea na?

<sup>3</sup> Queba nu chilá' xabáa, ne lu xęzr la xu, ne zranla xęzr la xu naca cheę' chíluje' xiche na', ne quebe nu gaca nne'e na cheę lé'ene' ca naca na. <sup>4</sup> Neda' gudxézreli'a lawe' da quebe nu chilá' benne' naca cheę' chíluje' xiche na', ne gulabe' na, ne quebe gaca nne'e na. <sup>5</sup> Nadxa tu benne' ládujla benne' gula ca' guzre' neda':

—Québedxa cuezru' lawe' da ba bzrué'e Jesús, Bénnea' nazi'i le' Beżre Xixre' cheę xrtia Judá lawe' da nape' xel-la' dxenná bea zrente, ne naque' zri'ine zre sua David, na' Le' naca cheę' chíluje' xiche na', ne cheze' da gazre ca' dxelunna bea na.

<sup>6</sup> Nadxa ládujla naga zua lataj blau na', ládujla tapa benne' ban ca', ne ládujla tape dxua benne' gula ca', ble'eda' Jesús, Bénnea' naque' Zrila'dau' cheę Dios. Ze'e na', lácala zrie' we' lawe' da belutię' Le'. Zria gazre lúzuba' ne gazre xiaj lauba', na' xiaj lauba' ca' zaj naca na gazre Be' cheę Dios da ca' nasel-la Dios du ca naca xęzr la xu. <sup>7</sup> Bénnea' naque' Zrila'dau' guxiáję guqué'e xiche na' lu na' xabeła Bénnea' dxe'e lataj blau na'. <sup>8</sup> Ca guqué'e xiche na', na' tapa benne' ban ca', ne tape dxua benne' gula ca' buluzú zribe' lau Bénnea' naque' Zrila'dau'. Tu tu benne' gula ca' zaj nuxre' tu da dxelúl-lalęne' da can zriadi'i na du, nazi le na árpa, ne zaj nu'e xé'ena bzri da naca na oro zaj xu'u na xala zixre, da zéaję na xel-la' dxuláwizra Dios da dxelún bi ca' cheę Dios. <sup>9</sup> Dxelul-le' tu da cube caní:

Lue' naca chiu' ca'u xiche na',

ne chezu' da ca' dxelunna bea na,

lawe' da belutię' Lue', na' nen dxen chiu'

bexa'u bénneache cheę xelaque' cheę Dios,

Zaj naque' benne' xúgutę cue' bénneache,

ne dxelenné' xúgutę dízra' walazre',

ne zaj naque' benne' xúgutę xęzre

ne xúgutę cue' xęzr la xu.

<sup>10</sup> Beńu' le' benne' wenna' bea ca',

ne bxruze ca' lau Dios cheedxu,  
na' xelenná be'e lu xezr la xu.

<sup>11</sup> Nadxa gunná'a, na' benda' chi'i zane' gubáz ca' chee' xabáa zaj naxéchaje' lataj blau na', ne tapa benne' ban ca', ne tape dxua benne' gula ca'. Zaj zra' benne' zantau' gubáz ca', <sup>12</sup> na' dxelenné' zizraj:

Bénnea' naque' Zríla'dau' belutie',  
naca chee' si'e xel-la' dxenná bea, ne xel-la' gunní'a,  
ne xel-la' sina, ne xel-la' waca,  
ne xel-la' ba lá'ana, ne xel-la' szren,  
ne xel-la' dxue lá'ana.

<sup>13</sup> Cá'anqueze benda' dxelenná xúgute da ca' ben Dios, da ca' zaj zra' xabáa, ne da ca' zaj zra' xezr la xu, ne da ca' zaj zra' lu nísadau', ne xúgute da ca' zaj nita xúgute lataj ca', dxelenná na: Xel-la' dxue lá'ana, ne xel-la' ba lá'ana,  
ne xel-la' szren, ne xel-la' dxenná bea  
zaj naca na chee' Bénnea' dxe'e lataj blau na',  
ne chee' bénnea' naque' Zríla'dau',  
gaxúane gaxúane iza.

<sup>14</sup> Dápatē benne' ban ca' gulenné':

—iCa'an gaca na!

Na' dape dxuate benne' gula ca' buluzú zribe', ne bulucá'ana szrene' Bénnea' naca bane' gaxúane gaxúane iza.

## 6

*Dxecheze' xrupa da gazre ca' da dxelunna bea na*

<sup>1</sup> Nadxa ble'eda' gate Bénnea' naque' Zríla'dau' gucheze' da nedxu da gazre ca' dxelunna bea na. Na' benda' dxenná tu benne' tapa ca' zaj naca bane', na' chi'e ben na ca guzi'u, dxenné':

—Gudá, le'enu'.

<sup>2</sup> Gunná'a, na' ble'eda' tu bzrina' chiche, na' benne' zrie'-ba' nuxre' tu da dxedxú'una na xágadau' nalá xéche'ze. Bulunézruje' le' tu da naquen oro da guzúe' xíchaje', na' nen duté xel-la' dxenná bea bdxuajé' chee' zrué'ene' lu wedil-la.

<sup>3</sup> Gate Bénnea' naque' Zríla'dau' gucheze' da gudxupe' da dxunna bea na, na' benda' benne' gudxupe' chee' benne' tapa ca' zaj naca bane', dxenné':

—Gudá, le'enu'.

<sup>4</sup> Na' bdxuaj xetú bzrina', nácaba' be' xrna, na' bénnea' zrie'-ba' guzi'e xel-la' dxenná bea chee' cue' xel-la' dxebeza zri lazre' lu xezr la xu, ne chee' guné' xelute bénneache ljwezre' ca', na' bulunézruje' le' tu xia tunna da nalá.

<sup>5</sup> Gate Bénnea' naque' Zríla'dau' gucheze' da guxunne' da dxunna bea na, na' benda' benne' guxunne' chee' benne' tapa ca' zaj naca bane', gunné':

—Gudá, le'enu'.

Gunná'a, ne ble'eda' tu bzrina' gasaj, na' benne' zrie'-ba' nuxre' zrgú'unsá. <sup>6</sup> Benda' tu chi'i dxenné na ládújla tapa benne' ban ca', gunná na:

—Chupa xia zrua' xtila saca na lazruj chee tu zra, ne xrupa xia zrua' cebada saca na lazruj chee tu zra, san quebe cu' za xel-la' wagu, ne quebe cu' xrise uva wal-la.

<sup>7</sup> Gate Bénnea' naque' Zríla'dau' gucheze' da gudape' da dxunna bea na, na' benda' benne' gudape' chee' benne' ban ca', gunné':

—Gudá, le'enu'.

<sup>8</sup> Gunná'a, ne ble'eda' tu bzrina' gache, na' benne' zrie'-ba' le' Xel-la' Gute, na' cuzru bénnea' za tu benne' ze'e waláz chee' lataj chul-la ga nnita benne' gate ca'. Bénnea' le' Xel-la' Gute guzi'e xel-la' dxenná bea chee' gutie' tu cue' chee' tapa cue' ca naca bénneache zaj zre'e xezr la xu. Gutie' benne' ca' lu wedil-la, ne lu xel-la' dxedún, ne lu xízrawe' ca', ne lu na' be snia zaj zraba' lu xezr la xu.

<sup>9</sup> Gate Bénnea' naque' Zríla'dau' gucheze' da gáxzue da dxunna bea na, na' ble'eda' zran cugu bénne'du ca' gulú'u benne' ca' belute bénneache le' lawe' da buluchálaje' dizra' chee' Dios, ne belexechebe' ca naca chee'. <sup>10</sup> Bénne'du ca' gulú'u benne' ca' gulenné' zizraj:

—Xran lá'azxa, ne li lazre', xéaxáté chenu' chee' guchi' u cheentu', ne xebéaj lazru' benne' ca' belutie' netu', benne' ca' zaj zre'e lu xezr la xu?

<sup>11</sup> Nadxa bénne'du ca' gulú'u benne' ca' gulezí'e zra lang' chiche, na' guzre' le' xelebeze' xetú chí'idau', cadxa cha benne' biche' ca' dxelunge' zrin chee' Cristo, xelute bénneache le' ca belutie' benne' ca'.

<sup>12</sup> Gate Bénnea' naque' Zríla'dau' gucheze' da xrupe da dxunna bea na, na' guná'a, na' guzrú'le' lu xezr la xu. Gubizra bexaca na da chul-la ca ladxe' gasaj, na' beu' bexaca na xrna ca dxen, <sup>13</sup> na' belaj zaj zria xabáa belexruj na lu xezr la xu, ca dxelexruj higo dxe'ene ca' gate dxácale'e be' dxunibe na xaga higo na'. <sup>14</sup> Xabáa benite na ca tu xiche da dxexedube, na' xúgute' xi'a ca', ne xezr la xu ca' da zaj naxechaj nísadau' gulecuasa na naga zaj zua na. <sup>15</sup> Benne' wenná bea ca' zaj zre'e lu xezr la xu bulucache cuine' lu bluaj ca' ne ládujla xiaj ca' zaj nita lu xi'a ca', na' tuze gulaca benne' blau ca' ne benne' gunní'a ca', ne benne' xíchaj'e ca' chee' benne' dxjaca wedil-la, ne benne' ca' dxelenná bea, ne benne' zaj nada'u, ne benne' zaj nadxúaj'e lu na' xran'e' ca', <sup>16</sup> na' benne' caní gulé'e xi'a ca', ne xiaj xre ca':

—Le quia cha netu', ne le gucache netu' lau Dios, Bénnea' dxe'e lataj blau, ne lu xel-la' zi' zren da gunna Bénnea' naque' Zríla'dau'.

<sup>17</sup> Ba bzrin zra chee' xel-la' zi' zren. ¿Núzraqueze sue le na?

## 7

### *Benne' Israel ca' gucá'a Dios*

<sup>1</sup> Ca gudé chee' da nigá, ble'eda' tapa gubáz chee' xabáa zaj ze' dapa saca chee' xezr la xu, na' zaj nuzague' be' da zá'aca na dapa saca, chee' quebe bi be' gaca lu xezr la xu, ne lawe' nísadau', ne lawe' xaga ca'. <sup>2</sup> Cá'anqueze ble'eda' xetú gubáz chee' xabáa ze'e naga dxalaj gubizra, na' nuxre' da gunna bea na nu benne' naque' che' Dios ban. Gubáz nigá gunné' zizraj, dxe'e dápat'e gubáz chee' xabáa ca' bache zaj nazi'e xel-la' dxenná bea xuluzrí'a xi'e xezr la xu, ne nísadau', gunné':

<sup>3</sup> —Quebe guzrí'a xile xezr la xu, ne nísadau', ne xaga ca', dxácat'e quebe ne guchícentu' luzrgá benne' ca' tu da gunna bea na zaj naque' chee' Dios cheedxu.

<sup>4</sup> Benda' cátite zaj naca benne' ca' gulezriche luzrgue' da na' dxunna bea na. Zaj naque' tu gaxúe tape xun cue' da zaj naca na chi gaxúa weaj lálwela xúgute' cue' benne' Israel. <sup>5</sup> Gulezriche luzrgue' da na':

Chazrinnu cue' benne' xrtia Judá, ne  
chazrinnu cue' benne' xrtia Rubén, ne

chazrinnu cue' benne' xrtia Gad, ne

<sup>6</sup> chazrinnu cue' benne' xrtia Aser, ne

chazrinnu cue' benne' xrtia Neftalí, ne

chazrinnu cue' benne' xrtia Manasés, ne

<sup>7</sup> chazrinnu cue' benne' xrtia Simeón, ne

chazrinnu cue' benne' xrtia Leví, ne

chazrinnu cue' benne' xrtia Isacar, ne

<sup>8</sup> chazrinnu cue' benne' xrtia Zabulón, ne

chazrinnu cue' benne' xrtia José, ne

chazrinnu cue' benne' xrtia Benjamín.

### *Benne' zan zaj nacu zra lan'e' chiche*

<sup>9</sup> Gudé na' gunná'a ne ble'eda' benne' zan chee' xúgute' cue' bèneache:

Benne' xúgute' cue' xezr la xu,

ne benne' dxelenné' xúgute' dizra' walazre' cha chee',

ne benne' xúgute' xezre ca'.

Zaj ze' le na' naga zua lataj blau na', ne naga ze' Bénnea' naque' Zríla'dau'. Benne' caní zaj nacue' zra lan'e' chiche, ne zaj nuxre' zina'. <sup>10</sup> Xúgute' dxelenné' zizraj:

Xel-la' weselá za na lu na' Dios cheedxu,

Bénnea' dxe'e lataj blau,

ne lu na' Bénnea' naque' Zríla'dau'.

<sup>11</sup> Xúgute' gubáz chee' xabáa ca' zaj ze' zaj naxéčaj'e' lataj blau na', ne naga zaj zra' benne' gula ca', ne tapa benne' ban ca', na' buluzú zribe' belíxrujt'e lawe' zran ni'e, na' bulucá'ana szren'e' Dios. <sup>12</sup> Dxelenné':

¡Ca'an gaca na!

¡Xel-la' dxue lá'ana, ne da xabáa,

ne xel-la' sina, ne xel-la' dxezaca ba lazre',

ne xel-la' ba lá'ana, ne xel-la' dxenná bea,

ne xel-la' szren,

zaj naca na chee' Dios cheedxu chadí'a chacanna!

¡Ca'an gaca na!

<sup>13</sup> Nadxa tu benne' gula ca' bche'be' neda':

—¿Nuzra benne' caní zaj nacue' zra lan'e' chiche, ne gazra zesi'aque'?

<sup>14</sup> Neda' gucha' le':

—Xran, lue' nézqueznu'.

Le' guzre' neda':

—Benne' caní ba guledé' lu xel-la' zi' zren na', na' benne' caní ba zaj nacue' zra lane' chiche lawe' da Bénnea' naque' Zríla'dau' ba gudibe' xichaj lázrdawe' nen dxen chee'. <sup>15</sup> Chee' le' na' zaj zre'e dxu'a lataj blau naga dxé' Dios, ne dxelúe' lá'ane' Le' te zra ne chizrela lu xudau' chee', na' Bénnea' dxé'e lataj blau na' guxúequeze' benne' ca', ne súaletecaze' le'. <sup>16</sup> Québedxa xeledunge' ne québedxa xelebílene', ne québedxa guzezxe gubizra benne' ca', ne québedxa xeléquene' da la, <sup>17</sup> lawe' da zua Bénnea' naque' Zríla'dau' cuita lataj blau na', na' guxúe' benne' ca' ca dxun benne' dxuxúe' zríla' ca', ne che'e benne' ca' naga dxelalaj nisa da dxunna na xel-la' nabán, na' Díosqueze tu súalezqueze' benne' ca' chee' québedxa xebezre'.

## 8

*Dxecheze' da gazre da ca' dxelunna bea na*

<sup>1</sup> Gate Bénnea' naque' Zríla'dau' gucheze' da gazre da ca' dxelunna bea na, da ca' zaj nuchiche na xiche na', na' gudxe' zri xabáa tu chi'i zrénqueze. <sup>2</sup> Nadxa ble'eda' gazre gubáz chee' xabáa ca' zaj ze' lau Dios, na' bulunézruje' gubáz chee' xabáa ca' gazre luzu da xulucuezre'. <sup>3</sup> Gudé na' bla' xetú gubáz chee' xabáa nuxre' tu xé'ena bzri da naca na oro ne guzé' dxu'a cugu, na' bulunézruje' le' xala zixre chee' guzúe' na lau Dios tu zren nen xel-la' dxuláwizra Dios ca' da belún benne' ca' zaj naque' chee' Dios. Bzue' na lu cugu naca na oro, da zua na lau lataj blau na'. <sup>4</sup> Zren chee' xala na' guluén na lau Dios tu zren nen xel-la' dxuláwizra Dios ca' belún benne' ca' zaj naque' chee' Dios. <sup>5</sup> Nadxa tu gubáz chee' xabáa guqué'e xé'ena bzri na', na' bzre'e na xi' da guqué'e lu cugu na', na' gudxú'ung' xi' na' lu xezr la xu, na' gulenné' guziú', ne gulénnele'e, ne gulépele'e xesa, ne guzrú' xezr la xu.

*Dxuluchine gubáz ca' da dxulucuezre'*

<sup>6</sup> Nadxa gázrete' gubáz chee' xabáa ca' zaj nuxre' gazre luzu da dxulucuezre' gulezé' chawe' xuluchíne' na.

<sup>7</sup> Gubáz nedxu na' bchínene' da dxucuezre', na' gulinnaj xiaj bezxe', ne xi' da zaj nachixre na dxen da belexruj na lu xezr la xu. Xáteze quebe bedú gachaj xezr la xu guzezxe na late weaj du ca naca lu xezr la xu. Xáteze quebe gudache gáchajte xaga ca' zaj ze' lu xezr la xu gulezxe na, ne cá'anqueze guca chee' xixre' xa'a ca'.

<sup>8</sup> Gubáz chee' xabáa gudxupe' bchínene' da dxucuezre', na' bexruj da naca na ca tu xi'a zren da dxala na xi' lu nísadau', na' xáteze quebe guca gáchajte nísadau' na' bexaca na dxen. <sup>9</sup> Xáteze quebe guca gáchajte bea zaj zraba' lu nísadau' guláteba', na' xáteze quebe guca gáchajte da ca' dxeledán lawe' nísadau' gulebía xi na.

<sup>10</sup> Gubáz chee' xabáa guxunne' bchínene' da dxucuezre', na' bexruj tu belaj zrente zran xabáa, da dxala na ca tu xi' xedxe. Naga bexruj na, xáteze quebe gudache gáchajte xegu ca', ne beaj ca' gulebía xi na. <sup>11</sup> Belaj na' le' na Ajenjo, da zéaje na da naca na sla', na' xáteze quebe guca gáchajte nisa da de' lu xezr la xu bexaca na ajenjo, na' benne' zante gulatíe' ne chee' nisa na' lawe' da bexaca na sla'.

<sup>12</sup> Gubáz chee' xabáa gudape' bchínene' da dxucuezre', na' xáteze quebe bedú gachaj xel-la' naxaní' chee' gubizra, ne xel-la' naxaní' chee' beu', ne xel-la' naxaní' chee' belaj ca' belexaca na chul-la, na' quebe bulusení na du lazre' xáteze quebe guca gachaj zra, ne cá'anqueze che zrela.

<sup>13</sup> Nadxa gunná'a, ne benda' chi'i tu gubáz chee' xabáa dxedé' lu be', dxenné' zizraj:

—Edxugua bénneache zaj zra' xezr la xu gate xebezre luzu da xuluchine xechunna gubáz chee' xabáa ca'.

## 9

<sup>1</sup> Gubáz chee' xabáa gáxzue bchínene' da dxucuezre', na' ble'eda' tu benne' naque' ca tu belaj bexruj na lu xezr la xu, na' bulunézruje' le' zren xia chee' lataj chul-la chee' benne' gate ca'. <sup>2</sup> Gusálaje' lataj chul-la na', na' lu'ule na' bdxuaj zren ca naca da dxedxuaj na naga dxeluzre' bla'dau', na' zren na' bchul-la na lau gubizra, ne lu be'. <sup>3</sup> Lu zren na' beledxúaj biche zu. Guledaba' du ca naca xezr la xu, na' biche zu ca' guleziba' lataj xeláduba' bénneache ca da dxelún bexrujni. <sup>4</sup> Dios guzre' biche zu ca' quebe xuluzría xiba' xixre' xa'a ca', ne netú xaga, san xeláduzeba' bénneache quebe nazriche luzrgue' da dxunna bea na benne' ca' zaj naque' chee' Dios. <sup>5</sup> Quebe zaj naziba' lataj xelúteba' bénneache, san xuludézeba' bénneache ba xa' lawe' gazxu' beu', na' xel-la' dxelá chee' naga dxeláduba' naca na ca naca da dxun bexrujni, be' dxelúteba' bénneache. <sup>6</sup> Lu zra ca' xelaca lazre' bénneache xelxute cuíng'e, ne quebe xelézquene'. Xelaca lazre' xelatíe' ne quebe xelatíe'.

<sup>7</sup> Biche zu ca' zaj nácaba' ca' bzrina' ca' ba zaj nabézaba' chjácaba' lu wedil-la. Xíchajba' zaj zria na ca tu da naca na oro, na' dxu'a lau biche zu ca' naca na ca lau bénneache. <sup>8</sup> Xicha



xíchajba' zaj naca na ca xicha xichaj nu'ula ca', na' láchxaba' zaj naca na ca lazxa bezre xixre'.<sup>9</sup> Lachu'uba' xu'u na ca zraba' xia, na' xrilaba' dxeleninne na ca dxeleninne da dxeleca'a bzrina' ca' zjaca chéguba' lu wedil-la. <sup>10</sup> Zaj zua xrbanba' ca xrban béxrujni, zaj zua na liba'. Zaj nazi'ba' lataj xeláduba' bénneache lawe' gazxu' beu'. <sup>11</sup> Zua tu xrane biche zu ca' naca gubáz chee lataj chul-la, ne le na Abadón nen dizra' hebreo, ne nen dizra' griego xi na Apolión, da zéaje na da dxuzria xi na.

<sup>12</sup> Caní guca da nedxu da ba xa' da xeledé bénneache, na' da' zí'aca xechupan ca'.

<sup>13</sup> Nadxa gubáz chee xabáa xrupe bchínene' da dxucuezre', na' benda' tu chi'i da gunná ládujla tapa luzu cugu lá'azxa na' naca na oro da zua na lau Dios. <sup>14</sup> Chi'i na' guzre na gubáz chee xabáa xrupe na' nuxre' luzu da dxucuezre':

—Bsan dápaté gubáz ca' zaj nadxéaje' dxu'a xegu zren le na Eufrates.

<sup>15</sup> Ca' guca na, na' gulelá gubáz ca' chee xelutie' xáteze ca gaca gáchajté bénneache lawe' da ba zaj nabeza gubáz ca' chee zra na', ne beu' na', ne iza na'. <sup>16</sup> Benda' cáttite zaj naca benne' dxjaca wedil-la ca' zaj zrie' bzrina' zraléne' gubáz ca'. Zaj naque' chupa cue' gaxua da zaj naca gaxúane gaxúane.

<sup>17</sup> Lu da ble'e Dios neda' ble'eda' ca zaj naca bzrina' ca', ne ca zaj naca benne' dxjaca wedil-la ca' zaj zrie'-ba'. Zaj xu'u lachu'e zre' xrna da naca na xia, ne da nalá' ca zran xabáa, ne da gache. Xíchaj bzrina' ca' zaj naca na ca xichaj bezre xixre', na' dxú'aba' ca' beledxúaj xi', ne zren, ne tu da gache da dxuzéxele'e na. <sup>18</sup> Xáteze quebe gudache gáchajté bénneache gultatíe' lu da ca' beledxúaj na dxu'a bzrina' ca', xi', ne zren, ne da gache na'. <sup>19</sup> Xel-la' snia chee bzrina' ca' zua na dxú'aba', ne xrbanba' lawe' da zaj naca xrbanba' ca' bēla' ca' zaj zua xíchajba', na' nen da ca' dxuluzria xiba' bénneache.

<sup>20</sup> Benne' ca' xezica, benne' quebe belúteba', belúnqueze' da zrinnaj ca da dxelúnqueze', ne bulucá'ana szrénqueze' be' xriwe' ca', ne bedau' oro ca', ne bedau' plata ca', ne bedau' xia gache ca', ne bedau' xiaj ca', ne bedau' xaga ca', da ca' quebe dxaca xeledé'e na, ne quebe dxaca xelén na, ne quebe dxaca si'aca na'. <sup>21</sup> Cá'anqueze belútequeze' benne' ca', ne belúnqueze' xel-la' wazrá', ne belúnqueze' da sban, ne gulebánqueze'.

## 10

*Tu gubáz chee xabáa nuxre' tu xíchedau' nazriluj na*

<sup>1</sup> Nadxa ble'eda' xetú gubáz chee xabáa nápalé'e xel-la' dxenná bea. Bétaje' xabáa, xu'e tu lu beuj, ne zua tu bchíta' xíchajé'. Dxu'a lawé' dxácattite na ca gubizra, na' ni'e zaj naca na ca xi'. <sup>2</sup> Nuxre' tu xíchedau' da nazriluj na, na' bzue' ni'e zua xabēla lawe' nísadau', ne ni'e zua xéglala lawe' xezr la xu bizre. <sup>3</sup> Nadxa gudxezre xé'e ca dxun bezre xixre' dxebezre xa'aba', na' ca gudxezre xé'e gulenné gazre guziu'. <sup>4</sup> Ca gudé gulenné gazre guziu' ca', ba zúate guzúaja', na' benda' tu chi'e za xabáa, guzre neda':

—Bcache naze da gulenná gazre guziu' ca'. Quebe guzúaju' na.

<sup>5</sup> Nadxa gubáz chee xabáa na' ble'eda' ze' lawe' nísadau', ne lawe' xezr la xu bizre guchisa ne'e da zua xabēla zran xabáa, <sup>6</sup> na' bzétaje' La Bénnea' zue' chadía chacanna, ne bené' xabáa, ne xezr la xu, ne nísadau', ne xúguté da zaj de lawe' da ca' bené', na' gunné':

—Québedxa che na, <sup>7</sup> lawe' da gate su lau gubáz chee xabáa gazre guchínene' luzu da xulucuezre', ba guca li ca naca da nun Dios dxal-la' gaca ca bzenne' benne' wen zrin chee' ca', benne' gulenné' waláz chee'.

<sup>8</sup> Ca naca chi'e da benda', da za xabáa, bchálajlene' neda' xetú, gunné':

—Guxiáj xejcá'a xíchedu na' nuxru gubáz chee xabáa na' ze' lawe' nísadau', ne lawe' xezr la xu bizre.

<sup>9</sup> Nadxa guxá'a lau gubáz chee xabáa na', na' gunaba' gunné' neda' xíchedu na', na' guzre' neda':

—Gucá'a na. Gudagu na. Lu dxu'u gaca na zixre ca bzrina'dau', na' lu le'u xexaca na da sla'.

<sup>10</sup> Nadxa gucá'a xíchedu na' lu na' gubáz chee xabáa na', na' gudawa' na, na' lu dxu'a guca na zixre ca bzrina'dau'. Ca gudé gudawa' na, bexaca na sla' lu le'a. <sup>11</sup> Nadxa gulé'e neda':

—Dxun na ba xen guchálaju' waláz chee Dios lau benne' zaj zre'e zane cue' xezr la xu, ne lau benne' zaj zre'e xezre zan ca', ne lau benne' dxelenné' dizra' walazre' cha chee' ca', ne lau benne' wenná bea ca'.

## 11

*Chupa benne' dxelexechebe'*

<sup>1</sup> Nadxa belunne' neda' tu xia xtíladau' da naca na ca tu xaga da dxudxíredxu, na' gulé'e neda':

—Guxasa, bdxixre' xudau' chee' Dios ne lu cugu, na' blaba bal-la benne' zaj zre'e' na' dxulucá'ana szrene' Dios. <sup>2</sup> Quebe gudxixru' chale'aj chee' xudau' na' lawe' da ba gudé na lu na' benne' zitu' ca', na' benne' ca' xululé'aje' xezre lá'azxa lawe' chupe xun beu'. <sup>3</sup> Neda' sel-la' chupa benne' zaj nacue' ladxe' tuzruj, na' xelenné' waláz chia' lawe' chazrinnu gaxúa gaxun zra.

<sup>4</sup> Benne' chupa caní zaj naque' ca' chupa xaga olivo ca', ne ca' zaj naca chupa da zaj zuan xi', da ca' zaj zua na lau Dios, Xrane xezr la xu. <sup>5</sup> Che nu benne' dxaca lazre' guzría xi'e' benne' caní, na' le' xululube' xi' da dxuaj lu dxu'e' ca', na' guzézketé na benne' ca' dxeledábague' le'. Caní gate núteteze benne' tábague' benne' chupa caní. <sup>6</sup> Benne' chupa caní zaj nape' xel-la' dxenná bea xelune' ga quebe gaca xiuj dxácaté na' dxeleenné' waláz chee' Dios. Cá'anqueze zaj nape' xel-la' dxenná bea xelune' xaca nisa dxen, ne chee' xulusaca zi'e' bèneache nen xúgute' xízrawe' ca', bátatezla dxelaca lazre'. <sup>7</sup> Gate bache belexuzre belune' zrin chee', na' be' xixre' snia, be' dxedxúajba' lataj chul-la, tíl-laléba' benne' chupa ca', na' quél-laba' le', ne gúteba' le'. <sup>8</sup> Bela' dxen gate chee' benne' caní xelégá'ana na la neza chee' xezre zrentau' naga gudá' Xránadxu xaga begúaj, ne ca' dxutil-la Dios lebe, le' na Sodomá, ne Egipto. <sup>9</sup> Lawe' chunna zra xugachaj, bèneache chee' xúgute' cue' benne', ne benne' xezre ca', ne benne' zra du gabí'i xezr la xu, ne benne' dxeleenné' dizra' walazre' cha chee' xelélé'ene' bela' dxen gate chee' benne' caní, ne quebe xelu'e' lataj nu benne' gucache' le'. <sup>10</sup> Benne' zaj zre'e' lu xezr la xu xelebeng' lawe' da zaj nate benne' caní, na' xelexeza ca' balázre'le', ne xelesel-le' da xulunezruj ljwezre' tue' xetu' lawe' da bulusaca zi' benne' caní gulenné' waláz chee' Dios bèneache ca'. <sup>11</sup> Gate guca chunna zra xugachaj, na' Dios bsebang' benne' caní, na' belexase', na' xúgute' benne' ca' belelé'ene' le' belezre'bele'e'. <sup>12</sup> Nadxa dxúpaté benne' ca' dxelexechebe belenne' chi'i tu benne' dxenné' zizraj xabáa, dxé'e' benne' ca':

—Le xegüén nigá.

Na' belexegüene', na' belelé'e' benne' ca' dxeledábague' le' ca' guca. <sup>13</sup> Ca'an gúcate' guzrú'le'e' xezr la xu, na' xu'u zaj nita na lu xezre na' gulebía xi na, na' gulate gazre cue' da nacan chí gaxúa bèneache weaj ne chee' da guzrú'. Benne' ca', benne' quebe gulate lu xezre na', nen duté xel-la' dxelezrebe belúe' lá'ané' Dios zue' xabáa.

<sup>14</sup> Ba gudé da gudxupe' da ba xa' da xeledé bèneache, na' la za'té da guxunne'.

*Gubáz gazre dxuchíne' da dxucueze'*

<sup>15</sup> Gubáz gazre bchíne' da dxucueze', na' ben chi'i benne' zan xabáa dxeleenné' zizraj: Naga dxeleenná bea bèneache lu xezr la xu ba guledé na lu na' Xránadxu Dios, ne lu na' Cristo chee', na' Le' nna be'ene' lataj ca' chadía chacanna.

<sup>16</sup> Nadxa tape dxua benne' gula ca' zaj dxe'e' dxu'a lataj blau naga dxe' Dios buluzú' zribe' zaj nuzuaté lawe' zran ni'e, dxulucá'ana szrene' Dios, <sup>17</sup> dxeleenné': Xcalenu', Xran.

Dios, napu' duté xel-la' dxenná bea.

Guzúaquezu', ne zúaquezu', ne tu súzaquezu', lawe' da ba guzi'u xel-la' dxenná bea zrente' chiu', ne ba guzú' lau' dxenná be'u.

<sup>18</sup> Bèneache xúgute' xezre ca' dxeleze'e' san ba bzzrin zra gudéu' benne' ca' ba xa', zra na' guchí'u chee' benne' gate ca'. Xunézruju' da naca chee' benne' ca' gulenné' waláz chiu', ne da naca chee' benne' ca' zaj naque' chiu', ne da naca chee' benne' ca' beluné' Lue' ba lá'ana, benne' blau ca', ne benne' quebe nu zaj naca.

Ba bzzrin zra guzría xi'u benne' ca' buluzría xi'e' xezr la xu.

<sup>19</sup> Nadxa bxalaj xudau' chee' Dios da zua xabáa, na' ble'e' lau xi'ina naga xu'u xel-la' wezría xrlátaje chee', da zua na lu xudau' na'. Gulepe xesa, ne gulenné' na, ne gulenné' guzi'u, ne guzrú' xezr la xu, na' bxínnajle'e' xiaj bezxe'.

## 12

*Tu nu'ula ne be' snia schanni' zrente'*

<sup>1</sup> Nadxa ble'e' lau tu da zrente' xabáa. Zua tu nu'ula naca zra lané' ca' gubizra, na' zran ni'e' zua da naca ca' beu', na' xíchajé' zria tu da zaca zaj zria na chazrinnu belaj. <sup>2</sup> Nu'ula nigá zue' zi'i, ne dxebezre xé'e' xel-la' dxudi'a sané' tu bidau', dxedéle'e' xel-la' zi' chee' galaj bidu na'. <sup>3</sup> Nadxa ble'e' lau xabáa xetú' da zrente', zua tu be' snia schanni', be' xrna, zua gazre xíchajba' ne chí lúzuba', na' zria tu da zaca tu tu xíchajba' ca'. <sup>4</sup> Nen xrbamba' gucá'a dxéguba'

xáteze quebe guca gáchajte belaj zaj zria zran xabáa, na' bzálaba' na lu xezr la xu. Bę snia schanni' na' guzeba' lau nu'ula na' sane' bidau' cheę gáguba' bidu' na' gate ze gálajbe'. <sup>5</sup> Nu'ula na' guzane' tu bi biudau', bi na' nna be'ebe' dutę xezr la xu nen tu var xia. Nadxa bi biu cheę nu'ula na' gucá'a Dios lębe', na' bexu'e-be' lataj blau cheę naga dxę'e. <sup>6</sup> Na' nu'ula na' bzrúnnuje' zęaje' lę'e xixre' lawe' lataj naga nucueza Dios tu lataj naga sua nu'ula na', naga xulugawe' lę' lawe' chazrinnu gaxúa ga xun zra.

<sup>7</sup> Gudę na' guxú'u wedil-la xabáa gate gubáz cheę xabáa blau lę' Miguel nen gubáz cheę xabáa zaj da' lę' guledil-lalene' bę snia schanni' zrente. Bę snia schanni' na', ne gubáz zaj de'e-ba' belune' wedil-la. <sup>8</sup> Quebe bi gulezéquene' lu wedil-la na', na' québedxa guta' lataj cheę gubáz ca' lu xabáa. <sup>9</sup> Ca'an guca gulebéaje' bę snia schanni' na' xabáa, bę snia na' zúaba' nédxute, na' nazí laba' da xriwe', ne Satanás, da na' dxęzí xę na xúgute bęnneache. Da xriwe' na', ne gubáz ca' zaj de'e na guledxú'une' na lu xezr la xu.

<sup>10</sup> Nadxa benda' tu chí'i benne' gunné' zizraj xabáa:

—Ba bla' xel-la' weselá, ne xel-la' szren, ne xel-la' dxenná bea cheę Dios cheędxu, ne xel-la' dxenná bea cheę Cristo cheę', lawe' da ba guledxú'une' da na' gudagu zria na cheę benne' bíchedxu, da na' dxagu zria na cheę benne' ca' te zra, ne chizrela lau Dios cheędxu. <sup>11</sup> Benne' bíchedxu ca' beledxúaje' chawe' nę cheę dxen cheę Bęnnea' naque' Zríla'dau', ne nę cheę da belexechebe' ca naca cheę dizra' cheę Cristo, ne quebe belezrebe' nu benne' gutię' lę'. <sup>12</sup> Cheę lę na' gata' xel-la' dxebé xabáa.

¡Le be le'e zrale xabáa!

¡Edxugua benne' ca' zaj zře'e xezr la xu, ne lawe' nísadau' lawe' da ba bla' da xriwe' naga zúale, dutę xel-la' dxęzrá'a cheę na, lawe' da neze na xáte'ga ne de cheę na!

<sup>13</sup> Gate guque be'e da xriwe' ba buluzale' na lu xezr la xu, na' gudxé' nau na nu'ula na' guzane' bi biudu na'. <sup>14</sup> Nu'ula na' bulunézruje' lę' chupa xrilę' zren ca xrila bsia cheę gaca xexiaje' xezuę' lę'e xixre' lawe' lataj, zítu' naga zua bę snia schanni' na', na' bulugawe' lę' lawe' chun iza xugachaj. <sup>15</sup> Bę snia schanni' na' bęxębeba' nisa cheę bęnba' tu xęgu cheę gua na nu'ula na'. <sup>16</sup> Gúcale xezr la xu nu'ula na'. Bzra xezr la xu, na' gudebe na xęgu na' bęxębe bę snia schanni' na'. <sup>17</sup> Cheę lę na' bzrá'lę'e da xriwe' nu'ula na', na' guxíaj na xęajtíl-lalę na xrtia nu'ula na' zaj zře'e xezr la xu, benne' ca' dxuluzúe' dizra' da bdxixruj be'e Dios, ne dxelexechebe' ca naca cheę Jesucristo.

## 13

### *Chupa bę xixre' snia ca'*

<sup>1</sup> Nadxa guzėja' dxu'a nísadau', ne ble'eda' bdxuaj tu bę xixre' snia lu nísadau' na', zua gazre xíchajba', ne chí lúzuba'. Zria tu tu lúzuba' na' tu da zaca, na' da' tu laba' xíchajba' ca' da dxecuide Dios. <sup>2</sup> Bę xixre' snia nigá nácaba' ca tu bezrtau', na' ní'aba' zaj naca na wal-la ca ní'a oso, na' dxú'aba' naca na ca dxu'a bezre xixre'. Bę snia schanni' bnézrujba' xel-la' dxenná bea cheęba', ne lataj blau cheęba', ne xel-la' waca cheęba' lu na' bę snia na' nácaba' ca bezrtau'. <sup>3</sup> Zua tu wę' tu xíchaj bę xixre' snia na' nácaba' ca bezrtau' da gute na leba', na' wę' na' bęxaca na, na' ca naca bęnneache ca' zaj zře'e lu xezr la xu belexebánele'ęne', ne zjácáleę bę xixre' snia na'. <sup>4</sup> Bulucá'ana szrenę' bę snia schanni' na' lawe' da bnézrujba' xel-la' dxenná bea cheę bę xixre' na' nácaba' ca bezrtau', ne cá'anqueze bulucá'ana szrenę' bę xixre' snia na', dxelennę'.

—¿Núzraqueze naca ca bę xixre' nigá, ne nu seque' tíl-lalę leba'?

<sup>5</sup> Nadxa da xriwe' bę na leba' lataj gunneba' dizra' zri'a, na' gunneba' da calęla cheę Dios, ne gudápaba' xel-la' dxenná bea lawe' chupe xun beu'. <sup>6</sup> Gunneba' da calęla cheę Dios, ne cheę La Dios, ne cheę lataj lá'azxa cheę', ne cheę benne' ca' zaj zře'e xabáa. <sup>7</sup> Cá'anqueze guziba' xel-la' dxenná bea tíl-lalęba' benne' ca' zaj naque' cheę Dios, ne gútęteba' benne' ca', na' guziba' xel-la' dxenná bea lu xúgute cue' bęnneache, ne benne' zaj zře'e xúgute xezre ca', ne xúgute cue' xezr la xu ca', ne benne' dxelennę' dizra' walazre' cha cheę'. <sup>8</sup> Xúgute benne' zaj zře'e xezr la xu bulucá'ana szrenę' bę xixre' snia na', benne' ca' quebe zaj naxúaj lę' lu xiche naga zaj naxúaj la benne' ca' zaj nape' xel-la' nabán, xiche na' bzuaj Bęnnea' naque' Zríla'dau' belutię'-ba'.

<sup>9</sup> Che nu benne' zua naque', dxal-la' xenne' dizra' nigá. <sup>10</sup> Benne' ca' dxelegú'e bęnneache lizre xia, cá'anqueze xelú'u benne' ca' lizre xia, na' benne' ca' dxelutię' benne' nen xia nalá, cá'anqueze xelatię' lu xia nalá. Cheę lę na' benne' zaj naque' cheę Dios dxal-la' xelaque' zren lazre', ne xelájle'e cheę Dios.

<sup>11</sup> Gudę na' ble'eda' xetú bę xixre' snia bdxúajba' lu xezr la xu. Bea nigá zua chupa lúzuba' zaj naca na ca luzu zríla'. Bea nigá gunneba' ca bę snia schanni' na'. <sup>12</sup> Bea nigá nápaba' dutę

xel-la' dxenná bea da napa be nedxu na', gate zúaba' lau be nedxu na', na' gunná be'eba' ca naca bénneache zaj zre'e duté xezr la xu xulucá'ana szrené' be nedxu na', bea na' hexaca we' cheeba' da na' naca gute leba'. <sup>13</sup> Be gudxupe' na' benba' xel-la' waca zri'a ca', ne benba' bexruj xi' zran xabáa lu xezr la xu lau bénneache ca'. <sup>14</sup> Ne chee xel-la' waca ca' da benba' lau be nedxu na', guzi xeba' benne' zaj zre'e xezr la xu, na' gunná be'eba' benne' ca' xeluné' tu bedau' ca naca be nedxu na', bea na' guzúa we' chee xia nalá, na' naca bánquezeba'. <sup>15</sup> Be gudxupe' na' guziba' xel-la' dxenná bea gunézrujba' xel-la' nabán bedau' na' naca na ca be nedxu na', chee nne' bedau' na', ne gute na xúgute benne' quebe xulucá'ana szrené' na. <sup>16</sup> Cá'anqueze bedau' na' gunná be'e na zriche tu da gunna bea na luzrgá u lu na' zua xabéla chee xúgute bénneache, benne' blau, ne benne' quebe nu naca, ne benne' gunní'a, ne benne' xache', ne benne' zaj nada'u, ne benne' zaj zre'e cá'aze. <sup>17</sup> Netú benne' quebe gaca ga'uwe' ne gutié' che quebe zriche da na' dxunna bea na le', u la be xixre' snia na', u xrbaba ca naca laba'. <sup>18</sup> Nu benne' gulabé' da nigá dxal-la' gaque' sina. Benne' dxéajni'ine' waca gulabé' ca naca xrbaba chee laba'. Naca na tuze ca naca xrbaba chee bénneache, na' xrbaba nigá naca na xrupa gaxúa ga xun xrupa.

## 14

*Da dxelul-la tu gaxúa tape xun cue' chi gaxúa weaj benne'*

<sup>1</sup> Gudé na' gunná'a, na' ble'eda' Bénnea' naque' Zríla'dau' ze' lu xi'a Sión. Tu zren nen Le' zaj zra' tu gaxúa tape xun cue' chi gaxúa weaj benne', zaj zriche luzrgue' La Bénnea' naque' Zríla'dau', ne La Xre'. <sup>2</sup> Nadxa benda' tu da dxeninne na da za' xabáa, da dxeninne na ca schaga' da dxelún zánete xegu ca', ne ca schaga' da dxun guziu' gate dxennéle'e na, ne ca dxeninne naga zaj zra' zánete benne' dxelinnie' da ca' cun zriadi' na du. <sup>3</sup> Belul-le' tu da cube dxu'a lataj blau naga dxe' Dios, ne lau tapa benne' ca' zaj zua nabancze', ne lau tape dxua benne' gula ca'. Netú benne' xezica quebe guca gul-le' ca naca da na' belul-le'. Dxacá dxelul-le na benne' tu gaxúa tape xun cue' chi gaxúa weaj, benne' ca' gulelé' lálwela benne' zaj zre'e xezr la xu. <sup>4</sup> Benne' caní quebe gulezúalene' nu'ula chee benne' xula, san belexegá'ana chawe', na' zjácalene' Bénnea' naque' Zríla'dau' gáteteze zéaje'. Benne' caní gulelé' lálwela bénneache, ne zaj naque' lau Dios ca tu da blaudxa chee da dxezidxu, da dxuzúadxu lau Dios, ne lau Bénnea' naque' Zríla'dau'. <sup>5</sup> Cabata' dxelún lazre', na' zaj naque' du lazre' dxu'a lataj blau naga dxe' Dios.

*Dizra' da dxuluzén chunna gubáz chee xabáa bénneache*

<sup>6</sup> Nadxa ble'eda' xetú gubáz chee xabáa dxedé' lu be' zran xabáa, nape' dizra' chawe' da chadía chacanna, chee guzenne' na benne' ca' zaj zre'e xezr la xu, benne' xúgute cue' bénneache, ne benne' xúgute cue' xezr la xu, ne xúgute xezre, ne benne' dxelenné' dizra' walazre' cha chee'. <sup>7</sup> Gubáz na' gunné' zizraj:

—Le zrebe Dios, ne le güe lá'ana Le' lawe' da ba bzrin zra guchi'a Le' chee bénneache. Le gucá'ana szren Bénnea' be'ne' xabáa, ne xezr la xu, ne nisadau', ne beaj ca'.

<sup>8</sup> Xetú gubáz chee xabáa zéaje' cuzru gubáz chee xabáa nedxu na', dxenné':

—¡Ba guzría xi'! ¡Ba guzría xi' xezre Babilonia, xezre zren na', lawe' da bulusuzre' benne' xezre ca', ne benne' duté xezr la xu nen da naca ca xrise uva wal-la chee da sban da dxeluné'!

<sup>9</sup> Xetú gubáz chee xabáa zéaje' cuzru gubáz chupa ca', dxenné' zizraj:

—¡Che nu benne' dxucá'ana szrené' be snia na', ne bedau' cheeba', ne gu'e lataj zriche luzrgue' u ne'e laba', <sup>10</sup> benne' nigá téé' lu da ba xa' da nucueza Dios lu xel-la' dxezrá'a chee', na' saca zi'e lu xi' chee da dxuzéxle'e na lau gubáz chee xabáa ca' chee Dios, ne lau Bénnea' naque' Zríla'dau'! <sup>11</sup> ¡Zren chee xi', naga saca zi'e, cuen na chadía chacanna, na' xelezaca zi' te zra ne chizrela benne' ca' dxulucá'ana szrené' be snia na', ne bedau' cheeba', ne dxelu'e lataj zriche laba' luzrgue'! <sup>12</sup> ¡Chee le' na', benne' ca' zaj naque' chee Dios, ne dxuluzé' dizra' ca nadxixruj be'ene', ne zjácalene' da naca chee Jesús, dxal-la' xelaque' zren lazre'!

<sup>13</sup> Nadxa benda' chi'i tu benne' da za xabáa. Dxe'e neda':

—Bzuaj da nigá: Na'a, ne lu da za za' ba neza zrenté naca na chee benne' gate ca' xelute bénneache le' lawe' da dxeléajle'e chee Xránadxu. Be' Lá'azxa dxenné': “¡Ca' naca na, lawe' da xelezezi' lazre' ca naca lu zrin da beluné', na' da xrlátaje da beluné' zeajle na benne' ca'!”

*Lina chee xezr la xu*

<sup>14</sup> Nadxa guná'a, na' ble'eda' tu beuj chiche, na' lawe' beuj na' dxe' tu benne' naque' ca Bénnea' gulje' bénneache. Zria tu da naca na oro xíchaje', ne nuxre' tu xia nalá. <sup>15</sup> Bdxuaj tu gubáz chee xabáa lu xudau' da zua xabáa, na' gunné' zizraj. Dxe'e bénnea' dxe'e lawe' beuj:

—¡Bchine xia nalá chiu', ne becá'a lina, lawe' da ba bzrin zra, na' lina chee xezr la xu ba guca na!

<sup>16</sup> Nadxa bénnea' dxe'e lawe' beuj na' gudine' xia nalá chee' na', na' bequé'e lina chee' xezr la xu.

<sup>17</sup> Nadxa xetú gubáz chee' xabáa bdxuaje' xudau' da zua xabáa, nuxre' tu xia nalá. <sup>18</sup> Xetú gubáz chee' xabáa bdxuaje' lu cugu, gubáz chee' xabáa na' nape' xel-la' dxenná bea lu xi', na' gunné' zizraj. Dxe'e gubáz chee' xabáa na' nuxre' xia nalá:

—jBchine xia nalá chiu' na', ne becá'a uva ca' da zaj den lu xezr la xu lawe' da ba güé na!

<sup>19</sup> Na' gubáz chee' xabáa na' gudine' xia nalá chee' lawe' xezr la xu, ne bequé'e uva ca' da zaj de lu xezr la xu da zéaje na benne' ca' dxelunge' da zrinnaj, na' bzre'e na naga xelesie' na, da na' zéaje na da ba xa' da nucueza Dios chee' benne' ca' dxelunge' da zrinnaj. <sup>20</sup> Uva ca' gulesie' na naga dxdexuaj xezre, na' naga dxelesie' na bdxuaj dxen chee' benne' ca' dxelunge' da zrinnaj da gulén na cáтите sibe zua dxu'a bzrina', na' guzá' dxen na' cáтите sadxu du gazre zra.

## 15

*Gubáz chee' xabáa ca' zaj nuxre' gazre da ba xa' da xuluzá'e' xezr la xu*

<sup>1</sup> Ble'eda' xabáa xetú da zrente da xebánedxu, belelá' gazre gubáz chee' xabáa zaj nuxre' gazre da ba xa' bzebe, da zaj naca na naga cheajsete' xel-la' dxezrá'a chee' Dios.

<sup>2</sup> Cá'anqueze ble'eda' tu da naca na ca nísadau' da naca na ca xiaj esa', ne nachixre na xi', na' benne' ca' quebe gulezi lu ne'e da naca na chee' be snia na', ne da nacan chee' bedau' cheeba', ne xrbaba chee' laba', zaj ze' lu nísadau' na' da naca na ca xiaj esa', zaj nuxre' da ca' con zriadi'i na du da ba bnezruj Dios le'. <sup>3</sup> Dxelul-le' da bil-la Moisés, benne' wen zrin chee' Dios, ne da dxul-la Bénnea' naque' Zríla'dau', da dxenná na:

Da zrente, ne da dxebánedxu zaj naca xúgutę da ba bęnu' Lue'.

Xran, nacu' Dios napu' dutę xel-la' dxenná bea.

Xrlátaje, ne li lazre' zaj naca xrbá chiu' Lue'.

Nacu' Wenná Bea chee' dutę xezr la xu.

<sup>4</sup> ¿Núzraqueze quebe zrebe Lue', Xran?

¿Núzraqueze quebe güe lá'ana Lue'?

Tuze Lue' nacu' lá'azxa.

Xelélá' benne' dutę xezr la xu, na' xulucá'ana szrene' Lue',

lawe' da ba belelé'eng' da xrlátaje da nunu'.

<sup>5</sup> Gudé na' gunná'a ne ble'eda' bxalaj xudau' da zua na xabáa, naga zua lataj naga zaj naxúaj da ca' bdxixruj be'e Dios. <sup>6</sup> Lu xudau' na' beledxúaj gazre gubáz chee' xabáa ca' zaj nuxre' gazre da ba xa'. Zra lanę' zaj nacue' naca na ladxe' zaca, da naca na ba'a, ne dxelácatite na, na' zaj nasie' lachu'e bazxu da naca na oro. <sup>7</sup> Nadxa tu benne' laduj tapa benne' zaj naca bánqueze' bnézruje' tu tu gubáz gazre ca' tu xé'ena bzri da naca na oro, ne zaj nazrate na da ba xa' da nucueza Dios, Bénnea' zue' chadia chacanna. <sup>8</sup> Guzrate xudau' na' nen zren chee' xi' da dxulé'e na ca zaj naca xel-la' szren, ne xel-la' dxenná bea chee' Dios, na' netú benne' quebe guca chu'e ga na' cadxa gudé chee' da gazre da ba xa' ca' da zaj nuxru gazre gubáz chee' xabáa ca'.

## 16

*Da gazre da ba xa' ca'*

<sup>1</sup> Nadxa benda' chi'i tu benne' gunné' zizraj lu xudau'. Dxe'e gazre gubáz chee' xabáa ca': —Le chjaca, le cheajzala da ba xa' ca' lu xezr la xu, da ca' nucueza Dios.

<sup>2</sup> Na' guxéaj gubáz chee' xabáa nedxu, xeajlatje' xé'ena bzri chee' lawe' xezr la xu, na' xúgutę bénneache, benne' zaj nazriche luzrgue' la be snia na', ne dxulucá'ana szrene' bedau' cheeba', gulebia we' lu bęla' dxen chee' benne' ca' da gulále'e na.

<sup>3</sup> Gubáz gudxupe' xeajlatje' xé'ena bzri chee' lu nísadau', na' nísadau' na' bexaca na dxen ca dxen chee' benne' gate, na' gulate xúgutę bea zaj naca banba' lu nísadau' na'.

<sup>4</sup> Gubáz guxunne' xeajlatje' xé'ena bzri chee' lu xęgu nisa ca', ne lu beaj ca', na' belexaca na dxen. <sup>5</sup> Na' benda' chi'i tu gubáz chee' xabáa dxenná be'ene' nisa caní, gunné':

—Xran, Dios Lá'azxa, zúaquezu', ne guzúaquezu'. Xrlátaje nacu' lawe' da guchugu' chee' benne' ca' guca caní, <sup>6</sup> lawe' da bululalje' dxen chee' benne' chiu' ca', ne chee' benne' ca' gulenné' waláz chiu', na' na'a dxuxí'aju' benne' caní dxen lawe' da caní zaj naca chee' xelé'aje'.

<sup>7</sup> Cá'anqueze benda' chi'i tu benne' zue' lu cugu, dxenné':

—Ca' naca na, Xran. Nacu' Dios napu' dutę xel-la' dxenná bea. Ba bchi'u chee' bénneache ca' ca naca da li, ne da xrlátaje.

<sup>8</sup> Gubáz gadupe' xeajlatje' xé'ena bzri chee' lau gubizra, na' gubizra guzi' na lataj guzezxe na Bénneache ca' nen xi' chee' na. <sup>9</sup> Xúgute' bénneache gulézele'e, ne quebe belexebi' i lazre', ne quebe belúe lá'angé' Dios, san gulenné' da calela chee' Bénnea' nucueze' da ba xa' na'.

<sup>10</sup> Gubáz gáxzue xeajlatje' xé'ena bzri chee' lawe' lataj naga dxe' be xixre' snia, na' naga dxenná beaba' guchul-la na. Bénneache ca' gulagu xa'a luzre' lu xel-la' dxudía chee', <sup>11</sup> ne quebe bulusané' da zrinnaj da dxelune'. Gulenné' da calela chee' Dios zue' xabáa, lawe' da dxelezaque' caní ne chee' we' da zaj zria bela' dxen chee' ca'.

<sup>12</sup> Gubáz xrupe xeajlatje' xé'ena bzri chee' lawe' xegu zren le' na Eufrates, na' nisa xegu na' bebizre na, chee' xalaj tu neza naga xeledé benne' dxjaca wedil-la chee' benne' wenná bea ca' zá'aque' naga dxalaj gubizra.

<sup>13</sup> Nadxa ble'eda' beledxúaj chunna be' xriwe' dxu'a be snia schanni', ne dxu'a be xixre' snia na', ne dxu'a benne' dxenné' waláz cheeba'. Be' xriwe' ca' zaj naca na ca bluzru ca'.

<sup>14</sup> Be' xriwe' caní belún na xel-la' waca zri'a ca', na' beledxúaj na chee' xulutupa na xúgute' benne' wenná bea chee' xezr la xu, chee' chjaque' lu wedil-la chee' zra zren chee' Dios, Bénnea' nape' duté xel-la' dxenná bea.

<sup>15</sup> Dxenná Xránadxu:

—Le na' xque, neda' xida' gate quebe dxebézale neda', ca za' tu benne' gubán. Ba neza zrenté naca na chee' bénnea' zue' ban lazre' ne nupé'e lázrdawe' ca tu benne' dxuxúe' zra lané' chee' quebe te' gala xídeze, ne quebe xedué'ene' lau bénneache.

<sup>16</sup> Nadxa beledube' benne' wenná bea ca' lu lataj naga le' na Armagedón nen dizra' hebreo.

<sup>17</sup> Gubáz gazre na' xeajlatje' xé'ena bzri chee' lu be', na' lu xudau' da zua xabáa ben tu chi' i benne' dxenné' zizraj, da za na lataj blau naga dxe' Dios, dxenné':

—Bache naca na.

<sup>18</sup> Nadxa gulepe xesa, ne guleninne na, ne gulenné' guziu', na' lu xezr la xu guzrú'le'e ca netú lasa quebe ne xru', na' gulálate' zaj zra' bénneache lu xezr la xu. <sup>19</sup> Xezre zrentau' na' guzra na chunna cue', na' xezre ca' zaj nita lu xezr la xu gulebía xi na, na' xejasá lazre' Dios benne' ca' chee' xezre zrentau' na' le' na Babilonia chee' xeledé' lu da ba xa' zren da nucueza Dios lu xel-la' dxezra' a chee'. <sup>20</sup> Xúgute' xezr la xu ca' da naxechaj nísadau', ne xúgute' xi' a ca' belexenite na. <sup>21</sup> Cá'anqueze belexruij zran xabáa xiaj bezxe' zri'a lawe' bénneache ca', da dxelá' na ca tu gaxúa xia weaj, na' bénneache ca' gulenné' da calela chee' Dios ne chee' da ba xa' da gulezaque', lawe' da guca na tu da ba xa' zrente.

## 17

### *Dios dxuzría xi'e nu'ula dxúnle'e da sban*

<sup>1</sup> Nadxa bla' tu gubáz chee' gazre gubáz chee' xabáa ca', gubáz ca' bululátaje' xé'ena bzri ca', na' guzre' neda':

—Gudá, na' gulé'eda' lue' ca naca da ba xa' da saca' nu'ula na' dxúnle'e da sban, nu'ula na' dxe'e' lawe' nísadau' ca'. <sup>2</sup> Benne' wenná bea ca' zaj zre'e' xezr la xu dxelune' da sban nen nu'ula na', na' benne' zaj zre'e' xezr la xu zaj naque' ca' benne' dxelezuzre' lawe' da dxelune' da sban nen nu'ula na'.

<sup>3</sup> Nadxa, lu da ble'e Be' Lá'azxa neda', gubáz chee' xabáa na' guché'e neda' le'e xixre' lawe' lataj, na' lataj na' ble'eda' tu nu'ula zrie' cuzru tu be xixre' schanni' xrna, na' zaj naxúaj lu bela' dxen cheeba' laba' schanni' ca', da ca' dxecuide Dios, na' zaj naca gazre xíchajba', ne chi lúzuba'. <sup>4</sup> Nu'ula nigá nacue' zra lané' bzawe, ne da xrna, na' lechítaje' chee' zaj naca na oro, ne xiaj xrtante, ne bga ca'. Nuxre' tu xé'ena bzri da naca na oro da nazrate' na da sgute ca', ne da sban da dxune'. <sup>5</sup> Naxúaj luzrgue' ca' le', da dxenná na: Babilonia, Xezre Szrentau', Xrna' Xúgute' Nu'ula Ca' Dxelune' Da Sban, ne Xúgute' Da Sgute Da De Xezr La Xu.

<sup>6</sup> Nadxa ble'eda' nu'ula na' dxezúzreng' nen dxen chee' benne' ca' zaj naque' chee' Dios, ne chee' benne' ca' belute bénneache le' lawe' da belexechebe' chee' Jesús. Gate ble'eda' da na', bebánele'eda'. <sup>7</sup> Nadxa gubáz chee' xabáa na' guzre' neda':

—¿Bizr chee' na' dxebánenu'? Gulé'eda' lue' ca naca da nagache chee' nu'ula nigá, ne chee' be xixre' schanni' na' nuaba' le', bea na' zaj napa gazre xíchajba', ne chi lúzuba'. <sup>8</sup> Be' xixre' schanni' na' blé'enu', nácaba' tu be zúaba' nédxute, na' na' québedxa zúaba'. Wagüenba' lu lataj chul-la nédxudxa ca za gáteba' tu ch'izqueze. Benne' zaj zra' xezr la xu, ne quebe zaj naxúaj le' lu xiche chee' xel-la' nabán ca bente' Dios xezr la xu, xelxebánele'ene' gate xelélé'ene' bea nigá, be zúaqueze nédxute, na' na' québedxa zúaba', na' wela'ba'.

<sup>9</sup> Nigá de' late' da gulé'eda' benne' xeléajni'ine' na. Gazre xíchajba' caní zaj zéaje na gazre xi'a naga dxenná bea nu'ula na'. <sup>10</sup> Cá'anqueze xíchajba' ca' zaj zéaje na gazre benne' wenná bea. Gazxu' benne' wenná bea caní ba gultatíe'. Tu benne' ca' dxenná be'e na'a, na' xetue' quebe ne xide'. Gate la' benne' bzebe nigá, québedxa súateque' scha'. <sup>11</sup> Be' xixre' schanni' na',

bę zúaba' nédxutę, na' na' a québedxa zúaba', zéaję na benne' xrunu' naquę' benne' wenná bea. Naquę' tu benne' ládujla benne' gazre ca', na' te na' gatię' tu chí'izqueze.

<sup>12</sup> Chi lúzu bę xixre' snia na' da blé'enu' zaj naca na chi benne' wenná bea ca', benne' quebe ne xelezú lawe' xelenná bę'e, na' xelezí'ę xel-la' dxenná bea xelaquę' wenná bea tu chí'idau'ze tu zren nen bę xixre' schanni' na'. <sup>13</sup> Benne' chi wenná bea caní zaj nungę' tuze dizra', na' xuluné'zruję' xel-la' szren cheę', ne xel-la' dxenná bea cheę' lu na' bėnnea' naquę' bę xixre' schanni' na'. <sup>14</sup> Benne' caní xeledíl-lalęne' Bėnnea' naquę' Zrıla'dau', na' Benne' nigá guzria xi'ę benne' wenná bea ca', lawe' da naca Lę' Benne' Wenná Beá cheę' benne' wenná bea ca', ne Xrane benne' zaj naquę' xrane bėnneache, na' benne' ca' zrlęne' Lę', gunné Dios lę', ne guquę'ę lę', na' zaj naquę' li lazre'.

<sup>15</sup> Cá'anqueze gubáz cheę xabáa na' guzre' neda':

—Nísadau' ca' blé'enu', naga dxe' nu'ula na' dxúnle'ę da sban, zaj naca na xęzre bėnneache ca', ne benne' dxeleńnę' dizra' walazre' cha cheę', ne benne' zane cue' xęzr la xu. <sup>16</sup> Chi lúzuba' na' blé'enu' xichaj bę xixre' schanni' na', da zaj naca na chi benne' wenná bea ca', xelexúidęne' nu'ula na' dxúnle'ę da sban, na' xelexébęaj xichaję' lę', ne xulucá'anę' lę' gala xídeze. Xelawe' bęla' dxen cheę', ne xuluzezxę' lę' lu xi'. <sup>17</sup> Dios bzue' lu lázrdau benne' wenná bea ca' xelunę' ca da dxaca lazre' Lę', gate belunę' tuze dizra', ne buluné'zruję' xel-la' dxenná bea cheę' lu na' bėnnea' naquę' bę xixre' schanni' na', cadxa gaca ca da ba gunná Dios. <sup>18</sup> Nu'ula na' blé'enu' naquę' Babilonia, xęzre zrentau' na' dxenná bę'e na benne' wenná bea ca' zaj zre'ę xęzr la xu.

## 18

### *Dxebia xi' xęzre Babilonia*

<sup>1</sup> Gudé na' ble'eda' betaj xetú gubáz cheę xabáa, nápalę'ę xel-la' dxenná bea, na' bseni' xel-la' szren cheę' lu xęzr la xu. <sup>2</sup> Na' gunné' zizraj:

—Ba guzria xi'. Ba guzria xi' Babilonia, xęzre zrentau' na', ne ba bexaca na lataj naga zaj zra' da xriwę' ca', ne lataj naga zaj zra' xúgutę' cue' bę' xriwę' ca', ne lataj naga zaj zra' bę zua xriła, bę schanni' ca', ne bę sgute ca'. <sup>3</sup> Xúgutę' bėnneache zaj zre'ę tu tu cue' xęzr la xu zaj naquę' ca' benne' dxelezuzre', lawe' da dxelunę' da sban da dxaca xęzre na', na' benne' wenná bea ca' zaj zre'ę xęzr la xu belunę' da sban da dxaca xęzre na', na' benne' ca' dxelúti'e gualaquę' benne' gunní'a nę cheę' da zantę da gulezá lazre' benne' ca' zaj zre'ę xęzre na'.

<sup>4</sup> Nadxa benda' chí'i xetú benne' da za xabáa, dxennę':

—Le dxuaj xęzre na', le'e, nácale chia', cheę quebe gácale benne' ca' tuze lu dul-la da dxelunę', ne cheę quebe tele lu da ba xa' da xelezaca benne' ca'. <sup>5</sup> Dul-la cheę benne' ca' ba guxán na, na' zaj naca na ca tu da ba bgula, da ba bzrintę na zran xabáa, na' Dios ba xeajsá lazre' ca naca da zrinnađ da dxelún benne' ca'. <sup>6</sup> Dios guné'zruję' cheę benne' ca' cáteze da buluné'zruję' cheę benne' xula, ne xuné'zruję' lę' chupa cuenla ca da zrinnađ da belunę'. Ba nucueze' da xelexaquę' da nácalę'ędxá zi' ca da bulusaquę' benne' xula. <sup>7</sup> Gudę' benne' ca' lu da ba xa', ne gudę' lę' xel-la' zi' cáteze na' belunę'. Buluzúá cuinę' lu xel-la' szren, ne gulezú'ę lu xel-la' dxelexezaca ba lazre' cheę', lawe' da dxeleńnę' lu lázrdawę': Dxé'entu' nigá dxenná bėantu'. Quebe nácantu' węzebe, ne quebe bi sácantu'. <sup>8</sup> Cheę lę' na', tuze zra xelezrín da ba xa' ca' da xelexaquę', xel-la' gute, ne xel-la' zi', ne xel-la' dxedún, na' xelexxę' lu xi', lawe' da napa Xránadxu Dios dutę xel-la' dxenná bea, na' naquę' Bėnnea' guchugę' cheę benne' ca' xelexaquę' caní.

<sup>9</sup> Benne' wenná bea ca' zaj zre'ę xęzr la xu, ne belúnleńę' benne' ca' da sban ne da belexezaca ba lazre', xelexezre xachę' gate xelexé'ęne' ca naca zren cheę xęzre na', da dxezxe na. <sup>10</sup> Welezé' zítu'la lawe' da xelexrebe' xelexaquę' ca da dxelezaca benne' ca', na' xelennę':

—Baxache' nácale le'e, benne' zaj zre'ę xęzre zrentau', Babilonia, lawe' da chaditę bla' da ba xa' da dxezácale.

<sup>11</sup> Cá'anqueze benne' ca' dxelúti'e, benne' zaj zre'ę xęzr la xu, welebezre', ne welebezre xáchequeze' ca naca da dxaca cheę xęzre na', lawe' da québedxa nu chilá' benne' si'ę da dxeluti'e,

<sup>12</sup> da zaj naca oro, ne plata,

ne xiaj xrtantę ca', ne bga ca',

ne ladxe' zaca ca', ne ladxe' bzawe ne da xrna,

ne xúgutę' cue' xaga ca' dxelexalę'ę na zixre,

ne zrita xrtantę, ne xaga xrtantę,

ne xia gache, ne xia, ne xiaj esa',

<sup>13</sup> ne lacu zixre, ne xixre'dau' dxelalę'ę na zixre,

ne xala, ne da ca' dxelexalę'ę na zixre,

ne xrise uva wala, ne za xel-la' wagu,  
 ne xrte xezaj, ne zrúa' xtila,  
 ne bę xixre', bę dxelúa xua',  
 ne zrila' ca', ne bzrina' ca',  
 ne da ca' dxudé xua,

ne benne' ca' dxelúti'e le' lu na' benne' gunní'a ca'.

<sup>14</sup> Benne' caní xelé'e benne' zaj zře'e xezre na':

—Na'a québedxa gápale da zixre ca' da zácále'e na da bdánnele'e, ne ba bnítele tu chí'izqueze xúgute xel-la' gunní'a chee, ne da xrtante chee.

<sup>15</sup> Benne' ca' belúti'e da ca' xeze'e zítu'la lawe' da dxelezrebe' xezeaque' ca da dxelezaca benne' zaj zře'e xezre na', na' xebezre'e, ne xebezre xáchequeze', <sup>16</sup> na' xelenné':

—Baxache' zaj naca benne' ca' zaj zře'e xezre zrentau' na'. Gulaque' ca tu nu'ula nacue' ladxe' zácále'e da bzawe, ne da xrna, ne nazí'e lechítaje da naca na oro, ne xiaj xrtante, ne bga ca'. <sup>17</sup> Chadite' benite xel-la' gunní'a na', ne guxezxe na.

Xúgute benne' xrane da ca' dxeledán lawe' nísadau', ne benne' zaj zře'e lu'ule na, ne benne' dxulusé'e da ca' dxeledán lawe' nísadau', ne benne' dxelune' zrin lu nísadau' beleze' zítu'la, <sup>18</sup> na' gate belelé'eng' zren chee xezre na' dxezxe na, na' gulenné' zizraj:

—;Bízraqueze xetú xezre naca na da zren ca xezre zrentau' nigá?

<sup>19</sup> Dute' xel-la' dxelexewi'ine lazre' xuluzré'e xu xíchaje' ca', ne xebezre'e, ne xebezre xáchequeze', xelenné':

—Baxache' zaj naca benne' ca' zaj zře'e xezre zrentau' na'. Nen xel-la' gunní'a chee benne' ca' gulenni'a xúgute benne' ca' zaj nape' da ca' dxeledán lawe' nísadau'. Chadite' guzría xi' xezre zrentau' na'.

<sup>20</sup> Ca guca chee xezre na', le be, le'e zrle xabáa, ne le'e, gubáz chee Cristo, ne le'e bchálajle waláz chee Dios, ne xúgutele le'e nácale bi chee Dios, lawe' da gate bzria xi' Dios xezre na', bebéaj lazre' da naca chee le'e.

<sup>21</sup> Nadxa tu gubáz chee xabáa, gubáz nácale'e xel-la' dxenná bea guchise' tu xiaj zren da naca na ca xiaj xiche, na' bzalé' na lu nísadau', gunné':

—Cá'ante cuía xi' Babilonia, xezre zrentau' na', na' québedxa nu lé'equezdxa le na, <sup>22</sup> ne québedxa nu xen la neza chee xezre na' da ca' dxulugul-la bėnneache, da can zriadi'i na du, ne bchiuj, ne luzu da dxulucuezre', ne québedxa nu chilá' gun zrin lu xezre na', ne québedxa xen schaga da dxun da dxutu na. <sup>23</sup> Québedxa gusení' netú xi' lu xezre na', ne québedxa xen laní chee wechaga na' ga na', lácala benne' ca' belúti'e lu xezre na' gulenná be'e lawe' xúgute benne' zaj zře'e xezr la xu, ne gulezi' xe'e xúgute cue' xezr la xu nen xel-la' wazrá' chee'.

<sup>24</sup> Caní guca lawe' da lu xezre na' gulalaj dxen chee benne' ca' gulenné' waláz chee Dios, ne dxen chee benne' ca' zaj naque' bi chee Dios, ne dxen chee benne' ca' belute bėnneache le' du ca naca xezr la xu.

## 19

<sup>1</sup> Gudé na' benda' chi'i benne' zan zaj zře'e xabáa, dxeleenné' zizraj:

¡Gaca ba Dios! ¡Xel-la' weselá, ne xel-la' szren, ne xel-la' dxenná bea zaj naca na chee Dios cheedxu.

<sup>2</sup> Ca dxuchi'a Le', xrlátaje, ne li lazre' naca na!

¡Ba bzria xi'e xezre na' dxulé'e na nu'ula na' núnle'e da sban,

nu'ula na' bxrinnaje' bėnneache zaj zře'e dute' xezr la xu lu da sban da bėne'!

¡Dios ba bebéaj lazre' nu'ula na' lawe' da betie' wen zrin ca' chee Dios!

<sup>3</sup> Nadxa gulenné' da xula:

—¡Gaca ba Dios lawe' da tu cuénzqueze zren chee xezre na' dxezxe na!

<sup>4</sup> Nadxa tape dxua benne' gula ca' ne tapa benne' ban ca' buluzú zribe', na' bulucá'ana szreng' Dios, Bėnnea' dxe'e lataj blau na', dxeleenné':

—¡Ca' naca na! ¡Gaca ba Dios!

<sup>5</sup> Nadxa ben tu chi'i benne' lu lataj blau na', dxenné':

¡Le güe lá'ana Dios cheedxu, xúgutele le'e dxunle zrin chee',

ne dxezrébele Le', le'e benne' blau, ne benne' quebe nu nácale!

*Laní chee wechaga na' chee Bėnnea' naque' Zríla'dau'*

<sup>6</sup> Cá'anqueze benda' tu da naca ca chi'i benne' zan, ca dxeleninne zánete xegu, ne ca dxeleenné'e guziu' ca', dxeleenné':

¡Gaca ba Dios lawe' da ba guzú lau dxenná bea Xránadxu Dios, Benne' nape' dute' xel-la' dxenná bea!

<sup>7</sup> ¡Du be! ¡Béle'equezdxa, ne güe lá'anadxu Le'!

¡Ba bzrin zra chee laní wechaga na' chee Bėnnea' naque' Zríla'dau'!



Nu'ula na' si'e ba nupá'a cuínabe',

<sup>8</sup> nu'ula na' nazi'ibe' lataj nácube' ladxe' zaca, da quebe nadxén na, ne dxácate na.

Ladxe' zaca na' zéaje na da xrlátaje da zaj nun benne' ca' zaj naque' bi chee Dios.

<sup>9</sup> Nadxa guzre gubáz chee xabáa neda':

—Bzuaj caní: Ba neza zren naca na chee benne' ca' gunné Dios xeledé'e laní wechaga na' chee Bénnea' naque' Zríla'dau'.

Nadxa guzre' neda':

—Da caní zaj naca na dizra' li chee Dios.

<sup>10</sup> Nadxa bzu zriba' lau gubáz chee xabáa na' chee gucá'ana szrena' le', na' le' guzre' neda':

—Quebe gunu' caní lawe' da nácaqueza' neda' wen zrin chee Dios ca lue', ne ca benne' bichu' ca' zéajle da li na' da ble'e Jesús le'e. Bca'ana szren Dios. Da li na' da ble'e Jesús le'e naca na da dxelenná benne' ca' dxuluchálaje' waláz chee Dios.

### *Benne' zrie' bzrina' chiche*

<sup>11</sup> Nadxa ble'eda' ba naxalaj xabáa, na' ble'e lau tu bzrina' chiche, na' Benne' zrie'-ba' le' Du Lazre', ne Li Lazre', lawe' da dxenná be'e, ne dxune' wedil-la lu da xrlátaje. <sup>12</sup> Xiaj lawe' dxelácate na ca xi' ca, na' xichaje' zaj zria zánete da zaca ca', na' naxúaj tu le' lawe', da nézene' tuze Le'. <sup>13</sup> Nacue' tu zre' da nazaj na dxen, na' La Le' naca na Xrtizra Dios. <sup>14</sup> Xúgute benne' ca' zaj zre'e xabáa zjácálene' Le', zaj nacue' ladxe' zaca ca', ladxe' chiche zríladau', ne zaj zrie' bzrina' chiche ca'. <sup>15</sup> Dxu'a Bénnea' zua tu da naca na ca tu xia nalá'e da quine' benne' xezre ca', na' nna be'ene' benne' ca' nen tu bar xia. Le' guzria xi'e benne' ca' ca tu benne' dxesie' uva ca', ne dxuléaje' na, da zéaje na da ba xa' da nucueza Dios lu xel-la' dxezrá'a chee', ca da xelezaca bénneache ca'. <sup>16</sup> Naxúaj le'e zre', ne zrichuje' da nazí Le' caní: Benne' Dxenná Be'ene' Benne' Wénná Bea Ca', ne Xrane Benne' Ca' Zaj Naque' Xrane Bénneache.

<sup>17</sup> Nadxa ble'eda' tu gubáz chee xabáa ze' lu gubizra, na' gunné' zizraj xúgute be' zua xrila, be' dxeledá zran xabáa, dxenné':

—Le da. Le zraga gágule da dxúnnalé'e Dios le'e, <sup>18</sup> chee gágule be'la dxen chee benne' wénná bea ca', ne chee benne' dxelenná be'e lu wedil-la, ne chee benne' wal-la ca', ne chee bzrina' ca', ne chee benne' zaj zrie'-ba', ne chee xúgute bénneache, benne' ca' zaj nadá'ue', ne benne' ca' quebe zaj nadá'ue', benne' blau ca' ne benne' quebe nu zaj naque'.

<sup>19</sup> Nadxa ble'eda' be' xixre' schanni', ne ca naca benne' wénná bea zaj zre'e xezr la xu nen benne' dxjaca wedil-la chee' ca', ba nazrague' chee xeledíl-lalene' Bénnea' zrie' bzrina' chiche na', ne nen benne' ca' zaj de'e Le'. <sup>20</sup> Gulel-le' be' xixre' schanni' na' tu zren nen bénnea' gunné' waláz cheeba', bénnea' benle'e xel-la' waca zren lauba'. Ne chee xel-la' waca caní da be'ne', benne' nigá guz' xe'e benne' ca' belú'e lataj guzriche luzrgue' laba', ne bulucá'ana szrene' bedau' cheeba'. Nadxa beleché'e be' xixre' schanni' na', ne bénnea' gunné' waláz cheeba', na' belegu'e le' zaj nabante' lu xi' chee da dxuzéxele'e na da dxe' ca tu nísadau'. <sup>21</sup> Nadxa Bénnea' zrie' bzrina' chiche be'tie' benne' ca' xezícala nen xia nalá na' zua dxu'e, na' xúgute bea ca' zaj zua xrila gulélajba' be'la dxen chee benne' ca'.

## 20

### *Chi gaxúa iza*

<sup>1</sup> Gudé na' ble'eda' betaj tu gubáz chee xabáa, nuxre' zren xia chee lataj chul-la, ne nuxre' tu du xia zren. <sup>2</sup> Gubáz nigá gudel-le' be' snia schanni', nácaba' be'la' zua nédxute, ne nácaba' da xriwe', ne Satanás, na' bcheaje'-ba' du xia lawe' chi gaxúa iza. <sup>3</sup> Na' gudxú'ung'-ba' lataj chul-la na' naga bsézxuje'-ba', na' bde'e le'e dxa xu'u na' tu da gunna bea na, chee québedxa si xe na bénneache chee xezr la xu ca' cadxa te chi gaxúa iza. Te chee chi gaxúa iza, dxal-la' xelá' na tu chí'idau'.

<sup>4</sup> Nadxa ble'eda' lataj blau ca', naga zaj dxe' benne' ca' ba zaj nazi'e xel-la' dxenná bea chee xuluchi'e ca da zaj nun bénneache. Cá'anqueze ble'eda' benne'du ca' gulexú'u bénneache ca' gulechugu bénneache xichaje' lawe' da belexechebe' chee Jesús, ne buluchálaje' xrtizra Dios. Benne' caní quebe bulucá'ana szrene' be' xixre' schanni' na', ne bedau' cheeba', ne quebe belú'e lataj zriche laba' luzrgue', u ne'e. <sup>5</sup> Benne' gate ca' xezícala quebe xelexebane' ca tedxa chee chi gaxúa iza ca'. Da nigá guca naca na xel-la' dxexebán nedxu. <sup>6</sup> Ba neza zrente naca na chee benne' ca' zaj naque' bi chee Dios, benne' ca' xelexebane' nedxu. Da zi' da xa' da zeajlí canna quebe seque' bi gune na benne' ca'. Xelaque' bxruze chee Dios, ne chee Cristo, na' xelenná be'e tu zren nen Le' chi gaxúa iza.

<sup>7</sup> Ca te chee chi gaxúa iza ca', na' la' Satanás naga nadxéaj na, <sup>8</sup> na' xedxúaj na chee cheajxri xe na bénneache zaj zre'e xúgute cue' xezr la xu ca'. Si xe na bénneache xezre Gog, ne xezre Magog, na' guchaga na benne' dxjaque' wedil-la chee xúgute cue' xezr la xu lu wedil-la, na' benne' dxjaque' wedil-la zaj naque' benne' zan ca naxán kuzre' da dxe' dxu'a tu xegu zren. <sup>9</sup> Ca' guca, beledxúaje' du ca naca lu xezr la xu, na' guléchaje' naga zaj zra' benne'

zaj naque' chee' Dios, ne xezre na' da nazr'i' Dios. Nadxa Dios gusel-le' xi' da za' xabáa, na' bzezxe xi' na' ca naca benne' ca'. <sup>10</sup>Nadxa gulel-le' da xriwe', da guzi xę na bėnneache ca', na' guledxú'ungę' na lu xi' chee' da dxuzézrele'e na da dxe' ca tu nísadau', naga zaj zra' bę xixre' schanni', ne bėnnea' gunné' waláz cheeba'. Lu xi' na' xeledéę' lu da ba xa' te zra, ne chizrela chadía chacanna.

*Dios dxe'e lataj blau chiche, dxuchi'e chee' benne' ca' dxelune' da zrinnaj*

<sup>11</sup>Nadxa ble'eda' tu lataj blau chiche, ne Bėnnea' dxe'e' lataj na'. Lau Le' belexenite xęzr la xu, ne xabáa, na' quėbedxa nu benne' lé'ene' da ca'. <sup>12</sup>Nadxa ble'eda' benne' gate ca', benne' blau, ne benne' quebe nu zaj naque', zaj zę' lau Dios, na' belexalaj xiche ca', ne cá'anqueze xetú xiche naga zaj naxúaj la benne' ca' zaj napę' xel-la' nabán. Dios bchi'e chee' benne' ca' cáteze da belún tu tuę', da ca' zaj naxúaj na lu xiche ca'. <sup>13</sup>Belexedxúaj benne' gate ca' zaj nagache' lu nísadau', ne belexedxúaj benne' gate ca' zaj nagache' lataj chul-la chee' benne' gate, na' Dios bchi'e chee' xúgute' cáteze da belún tu tuę'. <sup>14</sup>Nadxa guledxú'ungę' benne' gate ca' gulezúę' lataj chul-la naga zra' benne' gate lu xi' chee' da dxuzézrele'e na da dxe' ca tu nísadau'. Xi' nigá naca na da zi' da xa' da zeałlı canna, <sup>15</sup>na' lu xi' nigá guledxú'ungę' xúgute' benne' ca' quebe zaj naxúaj le' lu xiche chee' xel-la' nabán.

## 21

*Tu xabáa cube ne tu xęzr la xu cube*

<sup>1</sup>Ca gudé na' ble'eda' tu xabáa cube, ne tu xęzr la xu cube, lawe' da belexenite xabáa nedxu, ne xęzr la xu nedxu, na' quėbedxa de nísadau'. <sup>2</sup>Neda', Juan, ble'eda' xęzre lá'azxa, da naca na Jerusalén cube, dxetaj na xabáa, za na naga zua Dios. Xęzre na' nabeza na ca tu nu'ula wechaga na' nupá'a cuınabe' chee' gácabe' tuze nen benne' cheębe'. <sup>3</sup>Benda' chi'i tu benne' da za' xabáa, dxennę':

—Gunná'xque, Dios zue' ládujla bėnneache, na' xelaque' xęzre chee', na' Dios súaqueze' nen benne' ca', ne gaque' Dios chee'. <sup>4</sup>Dios tu súalezqueze' benne' ca' chee' quėbedxa xelebezre', na' quėbedxa gata' xel-la' gute, ne xel-la' gubezre, ne xel-la' dxebezre xache', ne xel-la' dxudía, lawe' da ba gudé chee' xúgute' da gulaca nédxute.

<sup>5</sup>Nadxa Dios, Bėnnea' dxe'e' lataj blau na' gunné':

—Gunná'xque, neda' dxuna' cube xúgute' da ca'.

Cá'anqueze gunné':

—Bzuaj dizra' canı lawe' da naca li lazre', na' waca guxrén lázrele le' na.

<sup>6</sup>Gudé na' guzre' neda':

—Ba bęna' xúgute' da ba gunnía' guna'. Neda' naca' Benne' zúaqueze' nédxudautę, ne Benne' zúaqueze' bzėbedxa. Naca' Bėnnea' dxuna' su lau sua xúgute, ne dxuna' xexuzre na. Nu benne' dxebilene', neda' gunézruja' nisa beaj xi'aje' da gunezruj na le' xel-la' nabán, ne quebe bi quızruje'. <sup>7</sup>Nu benne' zrue'engę' si'e xúgute' da canı, neda' gaca' Dios chee', na' le' gaque' zri'ına'. <sup>8</sup>Benne' ca' zaj naque' zra' chebe, ne benne' ca' quebe dxelėajle'e chia', ne benne' ca' dxelune' da zrinnaj, ne benne' ca' dxelutie' benne', ne benne' dxelune' da sban, ne benne' wazrá' ca', ne benne' dxulucá'ana szrenę' bedau' xiaj xaga ca', ne xúgute' benne' dxelún lazre', gudéa' le' lu xi' chee' da dxuzézrele'e na da dxe' ca nísadau', da naca na da zi' da xa' da zeałlı canna.

*Jerusalén cube*

<sup>9</sup>Nadxa bla' tu gubáz chee' gazre gubáz chee' xabáa ca' belúxrue' gazre xé'ena bzri ca' naga zaj xu'u da gazre da ba xa' bzėbe ca', na' guzre' neda':

—Gudá. Gulé'eda' lue' nu'ula wechaga na', zru'ula Bėnnea' naque' Zrıla'dau'.

<sup>10</sup>Lu da ble'e Be' Lá'azxa neda', gubáz chee' xabáa na' guché'e' neda' tu xi'a zren, ne sibe, na' blé'ene' neda' ca naca xęzre lá'azxa zren na', Jerusalén cube. Dxetaj na xabáa naga zua Dios. <sup>11</sup>Xęzre nigá dxátite na nen da xabáa chee' Dios, na' xel-la' dxátite chee' na naca na ca dxátite tu xiaj xrtante, ca tu xiaj jaspe, da naca na ca xiaj esa' xrtante. <sup>12</sup>Dxu'a xęzre na' naxechaj na tu ze'e sibe, na' napa na chazrinnu dxa xu'u, na' tu tu dxa xu'u ca' zaj zę tu weaj gubáz chee' xabáa, na' le'e dxa xu'u ca' zaj naxúaj la chazrinnu cue' benne' Israel. <sup>13</sup>Zaj zua chunna dxa xu'u weaj dapa sácatę. <sup>14</sup>Lu lane ze'e da naxechaj na xęzre na' zaj zra' chazrinnu xiaj, na' zaj naxúaj lu xiaj ca' la chazrinnu benne' gubáz chee' Bėnnea' naque' Zrıla'dau'.

<sup>15</sup>Gubáz chee' xabáa na' dxuchálajlene' neda' nuxre' tu da naca na ca tu xia xtila da naca na oro chee' gudxixre' xęzre na', ne dxa xu'u chee' na ca', ne ze'e da naxechaj na. <sup>16</sup>Xęzre na' naca na lébetę dapa saca. Lébetę naca na xel-la' tunna, ne xel-la' laga chee' na. Gubáz na' bdxixre' xęzre na' nen da nuxre', na' naca na laga catite sadxu tapa gaxúa zra, na' xel-la' laga, ne xel-la' tunna, ne xel-la' sibe chee' na zaj naca na lébetę. <sup>17</sup>Gudé na' bdxixre' xel-la'

sibe cheę ze'e na' naxečaj na. Naca na tu gaxúa tape xun zrita, na' chazrita cheę gubáz cheę xabáa na' naca na lěbete ca cheę bėnmeache.

<sup>18</sup> Ze'e na' da naxečaj na xezre na' naca na xiaj jaspe, na' xezre na' naca na oro du lazre', da naca na ca xiaj esa' du lazre'. <sup>19</sup> Xiaj lane ze'e na' zaj naca na xiaj xrtantę ca':

Xiaj nedxu naca na xiaj jaspe,  
na' xiaj gudxupe' naca na xiaj zafiro,  
na' xiaj guxunne' naca na xiaj ágata,  
na' xiaj gudape' naca na xiaj esmeralda,

<sup>20</sup> na' xiaj gáxzue naca na xiaj ónice,  
na' xiaj xrupe naca na xiaj cornalina,  
na' xiaj gazre naca na xiaj crisólito,  
na' xiaj xrunu' naca na xiaj berilo,  
na' xiaj ga naca na xiaj topacio,  
na' xiaj chi naca na xiaj crisoprasa,  
na' xiaj chinéaj naca na xiaj jacinto,  
na' xiaj chazrinnu naca na xiaj amatista.

<sup>21</sup> Chazrinnu da dxusezxuj na dxa xu'u ca' zaj naca na chazrinnu bga ca'. Tu tu na naca na tuze bga. Neza blau cheę xezre na' naca na oro du lazre', ca xiaj esa' du lazre'.

<sup>22</sup> Quebe ble'eda' netú xudau' xezre na', lawe' da Xránadxu Dios, Bėnnea' nape' dutę xel-la' dxenná bea, nácaqueze' xudau' cheę xezre na', ne cá'anqueze naca Bėnnea' naque' Zríla'dau'. <sup>23</sup> Xezre na' quebe nachine na gusení' gubizra na', ne beu', lawe' da dxusení' queze da xabáa cheę Dios ga na', na' Bėnnea' naque' Zríla'dau' naque' xel-la' naxaní' cheę na. <sup>24</sup> Bėnmeache cheę xúgute cue' xezr la xu, bėnmeache gulelé', xeledé' lu xel-la' naxaní' cheę xezre na', na' benne' wenná bea ca' cheę xezr la xu xelu'e da gunni'a cheę' lu xezre na'. <sup>25</sup> Dxa xu'u cheę xezre na' quebe xelexzuj na te zra, na' québedxa gata' chizrela. <sup>26</sup> Xelu'e xel-la' szren, ne xel-la' ba lá'ana cheę xúgute cue' xezr la xu lu xezre na'. <sup>27</sup> Cabata' chu'u da sban ga na', ne netú benne' dxunę da zrinnaj, ne netú benne' dxun lazre'. Xelú'uze benne' ca' zaj naxúaj lę' lu xiche cheę xel-la' nabán da napa Bėnnea' naque' Zríla'dau'.

## 22

<sup>1</sup> Nadxa gubáz cheę xabáa na' blé'eng' neda' tu xęgu nisa da dxunna na xel-la' nabán. Naca na xaní' ca xiaj esa', na' dxedxuaj na lataj blau naga zaj dxe' Dios, ne Bėnnea' naque' Zríla'dau'. <sup>2</sup> Laduj neza blau cheę xezre na' zaj naxaza xaga dxupa la'a dxu'a xęgu na', na' da zixre cheę xaga caní zaj naca na da dxunna na xel-la' nabán, ne dxebía na da zixre chazrinnu lasa tu tu izá. Dxebía na da zixre cheę na tu tu beu', na' xrlęue xaga na' naca na da dxexún na benne' zaj zre'e du gabi'i xezr la xu. <sup>3</sup> Québedxa bi gata' da xu'u de'. Lataj blau naga zaj dxe' Dios, ne Bėnnea' naque' Zríla'dau' sua na lu xezre na', na' benne' węn zrin cheę' ca' xulucá'ana szrenę' Lę'. <sup>4</sup> Xeledé'eng' Lę' caníqueze, na' La Dios zriche na luzrgá benne' ca'. <sup>5</sup> Québedxa gata' chizrela ga na', na' benne' zaj zre'e' na' quebe xelechinnę' xi', ne xel-la' naxaní' cheę gubizra, lawe' da Xránadxu Dios gusení'eng' benne' ca', na' benne' ca' xelenná be'e chadía chacanna.

*Ba zua gagu zra xelá' Cristo*

<sup>6</sup> Nadxa gubáz cheę xabáa na' guzre' neda':

—Dizra' caní zaj naca na li lazre', ne waca guxrén lázrele lę na. Xránadxu Dios, Bėnnea' dxuzúe' Be' cheę' xichaj lázrdau benne' ca' dxelennę' waláz cheę' ba gusel-lę' gubáz cheę xabáa cheę' cheę gulé'eng' benne' węn zrin cheę' da ba zua gaca, <sup>7</sup> dxenné': "La zátequeza'. Ba neza zrentę naca na cheę benne' zéajlęnę' dizra' cheę Dios da naxúaj na lu xiche nigá."

<sup>8</sup> Neda', Juan, benda', ne ble'eda' da caní. Ca gudé benda' na, na' bzu zriba' zran ni'a gubáz cheę xabáa na', gubáz blé'eng' neda' da caní cheę gucá'ana szrena' lę'. <sup>9</sup> Na' lę' guzre' neda':

—Quebe gunu' ca' lawe' da naca' węn zrin cheę Dios ca nacu' lue', ne ca zaj naca benne' bichu' ca' dxelennę' waláz cheę Dios, ne ca zaj naca xúgute' benne' ca' zjácalęnę' ca da naxúaj na lu xiche nigá. Bca'ana szren Dios.

<sup>10</sup> Cá'anqueze guzre' neda':

—Quebe gucachu' ca naca dizra' cheę Dios da naxúaj na lu xiche nigá lawe' da ba zua gaca da naxúaj na. <sup>11</sup> Dxácatę na', be' lataj benne' dxelunę' da zrinnaj xelúnqueze' da zrinnaj dxelunę', ne benne' ca' dxelunę' da sban xelúnqueze' da sban na', san benne' xrlátaje ca' xelúnqueze' da xrlátaje, na' benne' zaj naque' bi cheę Dios hjácalęqueze' da naca na cheę'.

<sup>12</sup> Dxenné':

—Ca' naca. La zátequeza', ne nu'a ca naca da gunézruja' tu tu benne' ca', cáteze da zaj nun tu tųe'. <sup>13</sup> Neda' naca' benne' zúaqueza' nédxudautę, ne benne' zúaqueza' bzébedxa, bėnnea' dxuna' su lau sua xúgute, ne dxuna' xexuzre na. <sup>14</sup> Ba neza zrentę naca na cheę benne' ca'

dxulupé'ë xichaj lázrdawé' ca tu benne' dxibe' zra lané', cheë xelape' lataj xelawé' da zixre cheë xaga da dxunna na xel-la' nabán, na' caní xelezé'quene' xelú'ë lu dxa xu'u cheë xezre na'. <sup>15</sup>Benne' ca' dxeluné' da zrinnaj quebe xelu'ë ga na', ne québequeze xelú'u benne' wazrá' ca', ne benne' dxeluné' da sban ca', ne benne' wete benne', ne benne' dxulucá'ana szrené' bedau' xiaj xaga ca', ne benne' zaj nazri'ingé' da wen lazre', ne benne' dxelún lazre'. <sup>16</sup>Neda', Jesús, ba gusel-la' gubáz cheë xabáa chia' cheë xuluzenne' tu tu cue' bënneache chia' ca naca da nigá. Neda' naca' ca xra xrtau David, benne' wenna' bea, ne naca' zri'ine zre sua David na'. Neda' naca' ca belaj zila da dxácatite'ë na.

<sup>17</sup>Be' Lá'azxa, ne benne' ca' zaj naca ca zru'ula Bénnea' naque' Zríla'dau', dxelenné':

—Gudá, Xran.

Nu benne' xenne' da nigá dxal-la' nne':

—Gudá, Xran.

Benne' dxebílené', ne dxaca lazre' dxal-la' xide', na' xí'aje' nisa da dxunna na xel-la' nabán, na' quebe bi quízruje'.

<sup>18</sup>Xúgutele le'e dxulábale dizra' cheë Dios da naxúaj na lu xiche nigá, neda' dxuzéajni'ida' le'e da nigá: Che nu benne' bi gudé'ë cheë da caní, Dios gudé'ë cheë bënnea' da ba xa' ca' da zaj naxúaj na lu xiche nigá. <sup>19</sup>Cá'anqueze che nu benne' bi xequé'ë cheë da zaj naxúaj na lu xiche nigá, Dios wecá'aqueze' da naca cheë bënnea' lu xiche cheë xel-la' nabán, ne lu xezre lá'azxa cheë', cáteze naxúaj na lu xiche nigá.

<sup>20</sup>Xránadxu, Bénnea' dxulé'ene' da nigá, dxenné':

—Ca' naca na. La záté'queza'.

¡Ca' gaca na! ¡Gudá, Xrana' Jesús!

<sup>21</sup>Dxenaba' Xránadxu Jesucristo guné' da chawe' cheële le'e, xúgutele. ¡Ca'an gaca na!